

# Xela wezria cube nen salmo ca'

New Testament and Psalms in Zapotec, Tabaa

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

Salmos.....	4
San Mateo.....	71
San Marcos.....	106
San Lucas.....	128
San Juan.....	163
Los Hechos.....	189
Romanos.....	220
1 Corintios.....	234
2 Corintios.....	247
Gálatas.....	256
Efesios.....	261
Filipenses.....	266
Colosenses.....	270
1 Tesalonicenses.....	274
2 Tesalonicenses.....	277
1 Timoteo.....	279
2 Timoteo.....	283
Tito.....	286
Filemón.....	288
Hebreos.....	289
Santiago.....	299
1 San Pedro.....	303
2 San Pedro.....	307
1 Juan.....	310
2 Juan.....	314
3 Juan.....	315
Judas.....	316
Apocalipsis.....	318

# Salmos

1 Ba neza zrentę naca na cheę bėnnea'  
 quebe dxezi'e da dxuluzėajni'i benne' węn da  
 caleļa ca' le',  
 ne quebe dxunę' tuze benne' dul-la ca',  
 ne quebe dxunę' tu zren benne' ca' dxelún le' chee  
 Dios.  
 2 Zue' xel-la' dxebe lawe' da dxuzúe' dizra'  
 da nadxixruj bea Xránadxu,  
 ne ca naca da nadxixruj bea na,  
 te zra ne chizrela dxelaba lazre' na.  
 3 Benne' nigá naque' ca tu xaga zua na dxu'a xęgu  
 nisa,  
 da dxunna na da zixre cheę na lu beu' cheęqueze na,  
 ne xrlęue na quebe dxase na.  
 Ca naca da dxun benne' nigá, dxępe ban na.  
 4 Quegá caní zaj naca benne' węn da caleļa ca'.  
 Zaj naque' ca tu xizre laga' da dxua be' bđunu'.  
 5 Quebe xelexegá'ana chawe' benne' węn da caleļa ca'  
 gate guchi'a Dios cheę',  
 ne quebe xelú'u benne' dul-la ca' naga zaj nazraga  
 benne' xrlátaje ca'.  
 6 Dzezaca ba lazre' Dios ca da dxelún benne' xrlátaje  
 ca'.  
 Da dxelún benne' węn da caleļa ca'  
 che na le' naga xelebía xi'e.  
 2 ¿Bizr cheę na' dxeledábaga benne' xęzr la xu ca'  
 neda'?  
 ¿Bizr cheę na' dxululaba lázrequeze bėnneache  
 da guzúa na neda' chalá'ala?  
 2 Dxeledábagaqueze benne' wenná bea ca',  
 ne dxelún tuze dizra' benne' ca' dxelenná bea ca  
 xelunę'  
 cheę Xránadxu Dios, ne cheę Bėnnea' gucá'a Le'.  
 3 Dxelenné': "Guselá cuínadxu lu xel-la' dxenná bea  
 cheę',  
 ne guzúadxu chalá'ala da zaj nadxixruj bé'ene' dxi'u."  
 4 Naga dxe' Xránadxu xabáa dxuzrizre'.  
 Quebe dxezí' lenę' cheę da dxelegú'u lazré' xelunę'.  
 5 Lu xel-la' dxezrá'a cheę' dxedil-le' le',  
 ne lu xel-la' snia cheę' dxuchebe' le'.  
 6 Dxenné': "Lu xi'a lá'azxa chia', xi'a Sión  
 ba nuzúa' benne' gaque' Wenná Bea waláz chia' ne-  
 da'."  
 7 Dxenná Wenná Bea na: "Guzenda' le'e da  
 guzre Xránadxu neda'."  
 Guzre' neda': "Lue' nacu' Zri'ina'. Ná'aqueze naca'  
 Xrau'.  
 8 Gunabe neda', na' gunna' Lue' xúgute cue' xęzr la xu  
 ca',

na' gaca chiu' dute ca naca xęzr la xu.  
 9 Guzızxenu' bėnneache xęzr la xu ca' nen vara xia,  
 ne ca tu dxe'e xu guzuzru' le'."  
 10 Na'a, le'e, wenná bea, le xene da nigá dxuzėajni'ida'  
 le'e.  
 Le gusede da nigá dxusızreda' le'e,  
 benne' dxelenná bea lu xęzr la xu.  
 11 Le gun zrin cheę Xránadxu Dios, dute xel-la' dx-  
 ezrebe cheęle.  
 Nen xel-la' dxezrize cheęle, le be lau Le'.  
 12 Le gapa ba lá'ana Zrí'ine' cheę quebe zre'e,  
 checa' cuía xile la neza cheęle, lawe' da la zra'ate Le'.  
 Da ba neza zrentę naca na cheę xúgute benne'  
 dxuluxrén lazre' Le'.  
 3 Xrana' Dios, ba naxánle'e benne' dxeledábague'  
 neda'.  
 Benne' zantę dxeledíl-lalęne' neda'.  
 2 Benne' zantę dxelenné' chia': "Quebe guselá Dios  
 le'."  
 3 Lue', Xrana' Dios, dxucú'uju' neda'.  
 Nacu' Benne' dxebełęna', ne Benne' dxuzé chawe' ne-  
 da'.  
 4 Gudhezre xa'a, bláwizra' Xrana' Dios,  
 na' Le' bechebe' chia' naga zue' lu xi'a lá'azxa cheę'.  
 5 Guta', ne gusia',  
 na' bebana' lawe' da nuxru Xrana' neda'.  
 6 Quebe zreba' gaxúa gaxúa bėnneache,  
 benne' zaj naxéčaję' neda'.  
 7 Guzé, Xrana' Dios.  
 Bselá neda', Dios chia'.  
 Bęn wę' xraga benne' ca' dxeledíl-lalęne' neda',  
 ne guzuzruj lazxa benne' xriwe' ca'.  
 8 Xel-la' weselá za' lu na'u, Xrana' Dios.  
 Bęn da chawe' cheę bėnneache chiu'.  
 4 Bechebe chia' gate dxuláwizra' Lue', Dios.  
 Nacu' Benne' dxuchi'e ca da dxuna'.  
 Gate guzúa' lu da stebe, Lue' btipu' lazra'.  
 Bexache lazre' neda', ne bene ca da dxuchálajłęna'  
 Lue'.  
 2 Le'e, bėnneache, ¿ájatešcha' gucá'ana dítjale neda'?'  
 ¿Ájatešcha' zri'ile da quebe zaca, ne chėjlele da węn  
 lazre'?'  
 3 Le xexúnbea ba gucá'a Xránadxu  
 nu benne' dxape' Le' ba lá'ana.  
 Xrana' Dios xenne' gate dxuláwizra' Le'.  
 4 Le zrebe lau Dios, ne quebe gunle dul-la.  
 Le gulaba lazre' cheę' naga dxásale, ne le sua zrize.  
 5 Le gute lau Le' béadu ca' lu da naca du lazre',  
 ne le guxrén lázre' Xránadxu Dios.

6 Benne' zante dxelenné': "¿Nuzra gun gá'anatu' chawe'?"  
 Dutę xel-la' zri'i lazre' chiu' bxue netu', Xran.  
 7 Lue' bzu' xel-la' dxebe lu xichaj lázrdawa',  
 da naca na zrendxa ca da zaj napa benne' zaj nápałe'ę zrua',  
 ne xrise uva wal-la.  
 8 Dutę xel-la' dxebeza zri lazre' gata', ne gasia',  
 lawe' da dxunu' Lue', Xran, zua' zri'a chawe'.  
**5** Bze naga dizra' chia', Xran.  
 Bde lazre' ca dxebezre lazra'.  
 2 Bene ca guchálajlena' Lue', Wenná Bea chia', ne Dios  
 chia', q lawe' da guláwizraja' Lue', Dios.  
 3 Xran, che zílala xennu' chi'a.  
 Che zílala xídaqueza' lau Lue', ne wabeza lazra' Lue'.  
 4 Nacu' Dios quebe dzezaca ba lazru' da całeła.  
 Benne' węn da całeła quebe súaqueze' naga zu' Lue'.  
 5 Quebe dxu'u lataj xelezrín benne' węn da całeła lau'.  
 Dxecuídenu' xúgute benne' dxelunę' da zrinnaj.  
 6 Guzría xí'quezu' benne' ca' dxelezí xę'ę.  
 Guzú' chalá'ala benne' węte benne', ne benne' guzrí  
 xę'.  
 7 Neda' waca chu'a lizru' lawe' da nazrí'ilę'ęnu' neda'.  
 Güe lá'ana' Lue' lu xudau' lá'azxa chiu' dutę xel-la' dx-  
 ezrebe.  
 8 Bsi neda' cheę guna' da xrlátaje chiu', Xran,  
 lawe' da zráłe'ę benne' dxeledábage' neda'.  
 Gulú'u neda' neza chawe' chiu'.  
 9 Benne' caní quebe dxelenné' da li.  
 Lu xichaj lázrdawę' xu'u da całeła.  
 Xędxu lbe'ę zaj naca na ca tu ba cheę benne' gate da  
 naxalaj na.  
 Zaj nupé'ę dizra' chawe' cheę' da zaj naca na da węn  
 lazre'.  
 10 Bde benne' ca' lu da ba xa', Xrana' Dios.  
 Bęn cheajlecházie' cáteze zaj naca xrtízraqueze'.  
 Lawe' da naxánłe'ę da całeła da dxelunę'  
 ne lawe' da guledábage' Lue', bebéaje' chalá'ala.  
 11 Welebélę'ę benne' ca' dxuluxrén lazrę' Lue'.  
 Welebézre xá'aqueze' dutę xel-la' dxelebé  
 lawe' da dxucú'uju' łe'.  
 Lau Lue' welebélę'ę benne' ca' zaj nazrí'ine' Lue'.  
 12 Gúnquezu' da chawe' cheę benne' xrlátaje, Xran.  
 Gucu'uju' bėnnea' lawe' da dzezaca ba lázrelęnu' łe'.  
**6** Lue', Xran, quebe til-lu' neda' lu xel-la' snia chiu',  
 ne quebe gudéu' neda' ba xa' lu xel-la' dxezrá'a  
 chiu'.  
 2 Bexache lazre' neda', Xran, lawe' da quebe chawe'  
 zua'.  
 Bexún neda', Xran, lawe' da dxedéa' xel-la' zi'.  
 3 Stébelę'ę zua xichaj lázrdawa'.  
 Xran, ¿bátala gácalęnu' neda'?'  
 4 Gudá, Xran, bselá bėnne'du xu'a.  
 Bselá neda' dutę xel-la' zri'i lazre' chiu'.  
 5 Naga zaj zra' benne' gate ca', quebe nu dxeajsá  
 lazre' Lue'.  
 Lu lataj ba xa' ¿núzraqueze güe lá'ana Lue'?'  
 6 Ba dxexedú lazra' lawe' da dxebezre lazra'.

Tu zre' tu zre' dxebísane ga dxásia' nisa da dxebezra'.  
 Dxusebisa' xrcugua' nisa da dxebezra'.  
 7 Ba dxane xiaj lawa' xel-la' dxebezre.  
 Ba bebízrqueze nisa xuzru xiaj lawa' lawe' da zráłe'ę  
 benne' dxulusaca zi'ę neda'.  
 8 Le cuasa naga zua', xúgutele dxunle da zrinnaj  
 lawe' da ba ben Dios dxebézrełe'a.  
 9 Xrana' Dios ba benne' da dxata' xueda' Lę'.  
 Ba guzí' Xrana' Dios da dxuchálajłena' Lę'.  
 10 Dxelexedué'e, ne zaj zua lu da stébelę'ę xúgute  
 benne' dxeledábage' neda'.  
 Chaditę xelexebiguę' naga zua', ne xelexedué'ęne'.  
**7** Xrana' Dios, dxuxrén lazra' Lue'.  
 Gúcalę neda' ne bselá neda' lu na' benne' ca' dxu-  
 lusaca zi'ę  
 neda',  
 2 cheę quebe xelęł-lę' neda' ca dxun bęzre xixre',  
 na' xuluzúzruje' neda' naga quebe nu chilá' nu guselá  
 neda'.  
 3 Xrana' Dios, che bęna' neda' caní:  
 Che bi da zrinnaj bęn ni'a na'a.  
 4 Che bi da całeła bęna' cheę benne' zuę' chawe' nen  
 neda'.  
 (Bselá' bėnnea' dxedábage' neda' lácala quebe bi  
 nuna' cheę'.)  
 5 Che caní bęna',  
 bę lataj benne' dxedábage' neda' gau zi' ne  
 xezrúnene' neda'.  
 Bę lataj bėnnea' guchuchu guléaje' neda' lu xu,  
 ne xusunitię' xel-la' ba lá'ana chia'.  
 6 Xran, dutę xel-la' dxezrá'a chiu', guzę'.  
 Bexechaj benne' ca' dxulusaca zi'ę neda' lu xel-la' dx-  
 elezrá'a cheę'.  
 Gusel-la da gácalę na neda' gate guchi'u da dxaca  
 chia'  
 ca da gunná be'u.  
 7 Xúgute benne' zaj zrę'ę xęzr la xu xelezraguę' lau'.  
 Gunná be'e benne' ca' dutę xel-la' szren chiu'.  
 8 Lue', Xran, guchi'u cheę benne' xúgute xęzre.  
 Bchi'a ca da nuna' lu da naca xrlátaje,  
 ne lu da naca du lazre' chia'.  
 9 Bęn cheajsé naze da zrinnaj da dxelún benne' węn  
 da całeła ca',  
 san bzua chawe' benne' xrlátaje,  
 lawe' da nacu' xrlátaje, Dios, ne dxenná'u da xu'u  
 xichaj lázrdau bėnneache.  
 10 Diósqueze dxucu'uje' neda'.  
 Dxuselę' benne' zaj naquę' du lazre'.  
 11 Xlátaje dxuchi'a Dios cheę da dxelún bėnneache.  
 Tu dxezrá'azqueze Dios da dxelún benne' węn da zrin-  
 naj ca'.  
 12 Che quebe xelxíaje lazrę' Dios gulę' xia cheę'.  
 Ba nuzúa cuásate' xaga nalá xéche'ze cheę'.  
 13 Ba naxrúa cuásate' xia cheę' ca' cheę wedil-la.  
 Ba nuzúa cuásate' xaga nalá xéche'ze da dxelala.  
 14 Benne' węn da zrinnaj dxugú'u lazrę' ca da całeła  
 gunę'.

Xu'u lázrdawę' da zrinnaj da gunę', na' dxebéaję' da węn lazre'.

<sup>15</sup> Ba gudęnę' tu xędxu situj naga cheajlechaze bęneache,

na' lęzqueze' xeajcházie' lu xędxu na'.

<sup>16</sup> Da zrinnaj da bęnę' dxebague na lęqueze', na' da bsaque' bęneache xezrizre na xíchaję'.

<sup>17</sup> Güe lá'anaqueza' Xrana' Dios ca da xrlátaje da dx-une', ne gúl-laqueza' cheę La Xrana' Dios, Bęneea' naque' szrentę.

**8** Lue' Dios, Xránantu', zrentę naca Lau' du gabí'i xęzr la xu.

Zrendxa naca xel-la' szren chiu' ca xabáa.

<sup>2</sup> Bidu ca', ne bidu dxe'ene ca' dxelúl-labe' ca naca na. Zúaquezu' lataj chawe' naga quebe xelezrín benne' ca'

dxeledábage' lue'.

Dxuzúa zriu' benne' dxeledábage' lue', ne benne' dxelecuídenę' Lue'.

<sup>3</sup> Gate dxenná'a xabáa da nunu' Lue',

ne beu', ne belaj ca', da ca' nuzú' cha cheę na,

<sup>4</sup> na' dxuchęba': "¿Ájazra naca bęneache, dxulaba lazru' cheę lę'?"

¿Ájazra naca bęneache, dxe'u gunne xue lę'?"

<sup>5</sup> Bęnu' lę' látezdxa szren ca nacu' Lué'queze, ne bzu' cheę' xel-la' szren, ne xel-la' ba lá'ana.

<sup>6</sup> Bęnu' dxenná bę'ene' xúgute' da ca' nunu'.

Xúgute' na bdeu' lu ne'ę,

<sup>7</sup> zřila' ca', ne bęzre ca',

ne xúgute' bę xixre' ca',

<sup>8</sup> bę zaj zua xřila, ne bela ca',

ne xúgute' da zaj zua na lu nísadau'.

<sup>9</sup> Xránantu', Dios,

szrentę naca Lau' du gabí'i xęzr la xu.

**9** Xran, dutę lázrdawa' güe lá'ana' Lue'.

Guzenda' bęneache ca zaj naca da zrentę da bęnu'.

<sup>2</sup> Wabéquezda', ne gúl-laqueza' ca naca chiu'.

Gul-la' cheę lau' Lue', nacu' Dios zrentę.

<sup>3</sup> Buluzrunnuj benne' dxeledábage' neda'.

Xeajlechazie', ne belexenitie' lau Lue'

<sup>4</sup> lawe' da nucá'ana chawu' da xrlátaje da dxuna'.

Dxe'u lataj blau chiu', ne lu da xrlátaje dxuchi'u.

<sup>5</sup> Gudil-lu' benne' xęzr la xu ca',

ne bzřia xi'u benne' węn da calęla ca'.

Bsulu' la benne' ca' chadía chacanna.

<sup>6</sup> Ba gulebía xi' benne' dxeledábage' neda'.

Chadía chacanna zaj nazrinnaj lataj cheę benne' ca', ne xęzre cheę' ca', da ca' bchínnuju' Lue'.

Netú benne' cheajsá lazre' benne' ca'.

<sup>7</sup> Xránadxu Dios súatequeze' chadía chacanna.

Ba nucueze' lataj blau cheę' naga guchi'ę cheę bęneache.

<sup>8</sup> Lu da xrlátaje guchi'ę cheę bęneache dutę xęzr la xu,

ne cheę benne' xúgute' xęzre ca' lu da naca li lazre'.

<sup>9</sup> Xránadxu Dios gaque' ca tu lataj ga xelezrá chawe' benne' xache',

naga xelezré'ę chawe' gate zřin zřa cheę da zi' da xa'.

<sup>10</sup> Benne' ca' zaj núnbe'ę Lue', Xran, xuluxrén lazre'

Lue',

lawe' da quebe bsan lazru' benne' ca' belexílaję' Lue'.

<sup>11</sup> Le gul-la cheę Xránadxu, Bęneea' zue' xęzre Sión.

Le guzén benne' xęzre ca' ca zaj naca da ca' nune',

<sup>12</sup> lawe' da dxeajsá lazre' cheę benne' ca',

ne dxexebéaj lazre' cheę benne' węte benne'.

Quebe gul-la lazre' ca da dxululáwizra benne' ba xache' ca' Lę'.

<sup>13</sup> Bexache lazre' neda', Xran.

Gunná' da dzezaca' lu ni'a na' benne' ca' dxelecuídenę' neda'.

Dxeca'u neda' lu na' xel-la' gute,

<sup>14</sup> cheę guzenda' bęneache da dxue lá'ana' Lue',

naga dxu'untu' xęzre Sión,

ne cheę beda' lawe' da bseláu' neda'.

<sup>15</sup> Xeajlechaze benne' xęzr la xu ca' lu xędxu da gulęnę'.

Xeajlechu'ę lu xřalaj da bulucueze'.

<sup>16</sup> Xránadxu Dios blé'ene' ca da zaj naque' ne cheę da zi' da xa' da gudichaj be'ę cheę benne' ca' dxelune' da calęla.

Xeajchaze benne' węn da calęla na' lu da nun ni'a ná'queze'.

<sup>17</sup> Benne' węn da calęla ca' xeledéqueze' lu lataj ba xa'.

Xúgute' benne' ca' dxelal-la lazre' Xránadxu Dios.

<sup>18</sup> Quegá chadía chacanna gal-la lazre' Dios benne' xache' ca',

ne quegá tu chi'ize xenite da dxelebeza lazre' lę'.

<sup>19</sup> Guxasa, Xrana' Dios.

Quebe gu'u lataj xelexegá'ana szřenqueze bęneache.

Xelalá' lau' benne' xęzr la xu ca' cheę guchi'u cheę'.

<sup>20</sup> Xran, bęn xelezrebe benne' ca' Lue'.

Bęn xelexúnbea benne' xęzr la xu ca' zaj naque' bęneacheze.

**10** ¿Bizr cheę na' zu' zitu', Xran?  
¿Bizr cheę na' dxucache cuinu' gate dxeledé xel-la' zi'

bęneache chiu'?

<sup>2</sup> Benne' węn da calęla dxenáu zi' xuzre' benne' xache' lu xel-la' dxucá'ana szren cuine', na' xeajchaze benne' xache' na' lu da ba nucuéza bęneea'.

<sup>3</sup> Dxucá'ana szren cuine' ca naca da dxezá lazre'.

Nupé'ę dizra' da dxenné' cheę benne' dxucude', na' dxucá'ana dítaję' Xránadxu Dios.

<sup>4</sup> Benne' węn da calęla na' lu xel-la' dxucá'ana szren cuine'

quebe dxape' Dios ba lá'ana, ne quebe dxéquene' che zua Dios.

<sup>5</sup> Tu dxúnzqueze' da calęla,

ne quebe dxéquene' guchi'u Lue' ca da dxune'.

Dxuzúę' chalá'ala xúgute' benne' dxeledábage' lę'.

<sup>6</sup> Lu xichaj lázrdawę' dxenné': "Quebe bi seque' guzaga na neda'.

Cabata' bi gaca chia' da calęła."

<sup>7</sup> Tu dxennézqueze' dizra' schanni', ne da węń lazre', ne ca naca da calęła da gunę'. Dxeledxúaj dxu'ę dizra' calęła, ne dizra' xálaze.

<sup>8</sup> Dxu'a xęzre ca' dxucache cuinę' cheę quęę' bęneache.

Bagácheze dxutię' benne' dxeledeze' na'.

Bagácheze dxenné'ę cheę bi gunę' cheę benne' xache' ca'.

<sup>9</sup> Bagácheze dxebeze' ca dxun bęzre xixre'.

Dxebeze' ga séquene' quęł-le' benne' xache' ca'.

Dxęł-le' benne' xache' lu xralaj cheę', ne dxexu'ę lę'.

<sup>10</sup> Dxińe' xu bęne'a' gudęł-le'.

Dxusaca zie' benne' zan nen ne'ę wal-la.

<sup>11</sup> Lu xichaj lázrdawę' dxenné': "Nal-la lazre' Dios benne' caní.

Nucache lawę', ne quebe lé'ene' da dxuna'."

<sup>12</sup> Guxasa, Xrana' Dios, ne bzę na'u.

Quebe gal-la lazru'u benne' xache' ca'.

<sup>13</sup> ¿Ájazra chęń' benne' ca' dxelunę' da calęła dxuluzúę' Dios chalá'ala?

Lu xichaj lázrdawę' dxelenné': "Quebe xebéaj lazre' Dios."

<sup>14</sup> Dios, Lue' blé'eqeznu' da nigá,

lawę' da dxenná'u benne' węń da calęła,

ne da ca' dxunę' quebe naca na xrlátaje, na' xebéaj lázrequezu' bęne'a'.

Dxuluzúa cuina benne' xache' ca' lu na'u.

Lue' dxácalequezu' bi węzębedu ca'.

<sup>15</sup> Dxugú' xel-la' wal-la cheę benne' węń da calęła.

Guleaj lówela da calęła da nunę', da na' bęne' lu da bagache'.

<sup>16</sup> Chadía chacanna naca Xránadxu Wenná Bea cheędxu.

Lu xęzr la xu cheę' ba gulebía xi' benne' dxelecuídenę' Lę'.

<sup>17</sup> Bńezruju' ca da bululáwizra benne' dxexruj lázre'du ca' Lue', Xran.

Lue' dxupa'u lázxdau bęne'du ca' cheę xuluzę nague' xrtizru',

<sup>18</sup> cheę guchi'u cheę bi węzębedu ca',

ne cheę benne' dxeledéę' xel-la' zi',

cheę quębedxa bi da calęła xelún benne' ca'

dxelunę' da calęła cheę bęne'du caní.

**11** Dxuxrén lazra' Xrana' Dios.

Ájazra chęń' dxi'u bęne'du xu'a:

"Bzrunnuj, guxía! lu xí'ala ca tu bxinne?"

<sup>2</sup> Le na' xque, dxulucuéza benne' ca' dxelunę' da calęła

xaga nalá xéche'ze.

Ba zaj naxrúę' xaga nalá xéche'ze cheę' lu du cheę na, cheę xelútię' bagácheze benne' xrlátaje ca'.

<sup>3</sup> Chete ca' xelxinna' da dxulusę chuchu da xrlátaje, ¿ájazra xelún benne' xrlátaje ca'?

<sup>4</sup> Xránadxu Dios zúaqueze' lataj lázaxa cheę'.

Xabáaqueze zua lataj blau naga dxe' Dios.

Dxelenná' xanne xiaj lawę'.

Dxelé'ene' ca da dxelún bęneache.

<sup>5</sup> Xránadxu Dios dxudęę' chawe' benne' xrlátaje ca' lu da stębe.

Dxeuíduenę' benne' ca' dxelunę' da calęła,

ne benne' dxelunę' da zrinnaj.

<sup>6</sup> Gudęę' benne' ca' dxelunę' da calęła lu da zi' da xa', da zaj naca na xi', ne da dxuzézrelę'e da dxala na ca xedxe,

ne tu be' lále'ę, da ca' sel-lę' lawę' benne' ca'.

<sup>7</sup> Caní gunę' lawę' da naca xrlátaje Xránadxu Dios,

ne nazrí'inę' da naca na xrlátaje.

Benne' li lazre' ca' xeledé'ene' lawę'.

**12** Xrana' Dios, bselá bęneache chiu' lawę' da quębedxa

dxapę' benne' xezica Lue' ba lánana.

Quebe nu chilá' benne' li lazre' lądujla bęneache ca'.

<sup>2</sup> Xúgute bęneache ca' dxelezí xęę le sa' lįwezre'.

Lu da węń lazre' ba zaj nupęę' dizra' cheę xelezí xęę lę'.

<sup>3</sup> Xránadxu Dios guzría xi'ę xúgute benne'

quebe dxuluchálaje' du lazre',

ne benne' ca' dxuluchálaje' da dxucá'ana szren cuinę'.

<sup>4</sup> Benne' ca' gulenné': "Nę cheę dizra' cheętu' zrué'entu' da chawe'.

Ca dxezá lázrentu' guchálajntu', ¿nuzra nna be'e netu', xca'?"

<sup>5</sup> Dxenná Xránadxu Dios: "Na'a xídaqueza' lawę' da

dxulusaca zi'ę benne' xache' ca',

na' dxelebezre lazre' benne' baxache' ca'.

Guselá' benne' ca' dxelánene' da guna'."

<sup>6</sup> Xrtizra' Xránadxu Dios zaj naca na du lazre'.

Zaj naca na ca xiaj plata da ba gudé na lu xi',

da ba gudé na lu xi' gazre lasa.

<sup>7</sup> Xran, guxúquezu' Lue' bęneache chiu' ca'.

Chadía chacanna gucu'uju' lę' lu na' benne' zaj zręę

lu zra na'a zra.

<sup>8</sup> Gáteteze na' dxaca da calęła

gate dxulucá'ana szren bęneache da naca sban.

**13** ¿Ájatequeze gal-la lazru' neda', Xran?

¿Gal-la lázrtequezu' neda'?

¿Ájatequeze quebe le'enu' da dxaca chia'?

<sup>2</sup> ¿Ájatequeze gun na ba xen guchaga lawa' da dxezaca'?

¿Ájatequeze gaca wi'ine lazra' te zra, ne chizrela?

¿Ájatequeze nna be'e benne' dxedábague' Lue' neda'?

<sup>3</sup> Gunná' da dxaca chia', Xran, ne bechebe chia'.

Btipa lazra' cheę quebe gatia',

<sup>4</sup> ne cheę quebe nna benne' dxedábague' neda':

"Ba bętia' ni'a ne'ę."

Benne' ca' dxeledábague' neda' xeledenę'

che cheajcházia' lu da calęła.

<sup>5</sup> Neda' dxuxrén lazra' Lue' xexache lazru' neda'.

Dutę lázrdawa' dxebeda' lawę' da dxuseláu' neda'.

<sup>6</sup> Gúl-laqueza' cheę Xrana' Dios

lawę' da ba nunę' chia' da xrlátaje.

**14** Benne' lázxdau zide' dxezá' lazre', dxenné':

"Quebe zua Dios."

Benne' caní zaj nazrinnaj xichaj lázrdawe'.  
 Dxelunę' da sban ca'.  
 Quebe nu chilá' benne' dxunę' da xrlátaje.  
 2 Xránadxu Dios zuę' xabáa dxenné'ę bėnneache  
 cheę lé'ene' che zua nu benne' dxėajni'ine',  
 bėnnea' dxape' ba lá'ana Dios.  
 3 Xúgute' zaj xu'ę neza xuca'.  
 Xúgute' zaj nazrinnaj xichaj lázrdawe'.  
 Quebe nu chilá' benne' dxunę' da xrlátaje, netúguę'.  
 4 ¿Quebe dxelėajni'i benne' ca' dxelunę' da sban?  
 Dxulusunítie' bėnneache chia' ca dxuzuzruj tu benne'  
 xeta da dxawe',  
 ne quebe dxelėquebe'ene' zua Xrane' Dios.  
 5 Dutę xel-la' dxelezrebe dxelezrize benne' ca'  
 lawe' da dxácalę Dios benne' xrlátaje ca'.  
 6 Belún lę' cheę da gulenná benne' xache' ca',  
 san benne' caní xebebe lazre' Xránadxu Dios.  
 7 Xídatega Bėnnea' guselę' benne' Israel ca'.  
 Gate gun Xránadxu xelexezrín benne' cheę' ca',  
 benne' ca' zaj nada'u zítu'la,  
 na' welebė zrí'ine zre zua Jacob,  
 ne welebėlę'ęquezne' benne' Israel ca'.  
**15** Xran, ¿núzraqueze benne' sue' naga zu' Lue'?  
 ¿Núzraqueze benne' sue' naga naca lá'azxa  
 chiu'?  
 2 Waca bėnnea' naque' du lazre', ne dxunę' da xrláta-  
 je,  
 bėnnea' zua da líqueze lu xichaj lázrdawe',  
 3 bėnnea' quebe dxenné' cheę le sa' ljwezre',  
 ne quebe bi da caleļa dxunę' cheę le sa' ljwezre',  
 ne quebe dxu'ę lataj nu benne' si tizre' le sa' ljwezre'.  
 4 Waca bėnnea' quebe dxape' ba lá'ana  
 nu benne' dxunę' da sban.  
 Dxape' ba lá'ana benne' ca' dxelape' ba lá'ana Xrá-  
 nadxu Dios,  
 bėnnea' quebe dxuché'ę dizra' da ba gunné' lácala bi  
 da' gunítie'.  
 5 Waca bėnnea' dxusanę' dumí cheę' ne quebe dxen-  
 abe' xíchajen,  
 ne quebe dxezí' lu ne'ę dumí cheę nnie' cheę  
 nu benne' quebe bi zria nabaguę'.  
 Nu benne' dxunę' caní cabata' cheajchazie' lu da  
 caleļa.  
**16** Bxue neda', Dios, lawe' da dxuxrén lazra' Lue'.  
 2 Lu xichaj lázrdawa' gucha' Xrana' Dios:  
 "Lue' nacu' Xrana'.  
 Quebe bi xetú da xrlátaje dę chia' da quebe naca na  
 chiu'."  
 3 Tuze benne' ca' zaj naque' cheę Dios lu xęzr la xu,  
 ne benne' ca' zaj naque' du lazre' dxezaca ba lázreļa-  
 na'.  
 4 Waxánqueze da dxelezaca benne' ca' dxelape' ba  
 lá'ana  
 tu dios quebe bi zaca.  
 Quebe guna' lę' tu zren gate dxuluzrįe' zren lau dios  
 na',  
 ne quebe guchíneda' la dios na'.

5 Xránadxu Dios dxugawe' neda', ne naque' da ba  
 neza chia'.  
 Lue', Dios, nuxru' ca da naca chia'.  
 6 Ca da nuzú' chia' zaj naca na da dxezi'a ba neza,  
 ne xrtantę zaj naca da nunnu' chia'.  
 7 Tu gucá'ana szrėnzqueza' Xránadxu Dios,  
 Bėnnea' dxusėdenę' neda'.  
 Chizrela gate ne dxasia' dxuzėajni'ine' neda' lu xichaj  
 lázrdawa'.  
 8 Xránadxu Dios nuxrén lazra' gusi'ę neda'.  
 Lawe' da zuę' cuita', quebe bi seque' guchebe na ne-  
 da'.  
 9 Cheę lę na' gubė lázrdawa', ne gubėlę'ęquezda',  
 na' zra gacha' lu xędxu ba cueza lazra'  
 10 lawe' da quebe gucá'anu' bėnne'du xu'a lu lataj ba  
 xa',  
 ne quebe gu'u lataj guzru nu benne' nácaqueze' chiu'.  
 11 Gulėenu' neda' da guna' cheę gata' chia' xel-la'  
 nabán.  
 Naga zu' Lue' wabėlę'ęquezda',  
 na' cuitu' Lue' súdequeze da ba neza chia'.  
**17** Bzę naga chi'a, Xran.  
 Ben xanne' da dxuláwizra' Lue'.  
 Guzí' da dxenaba' Lue', naca' du lazra'.  
 2 Bėnna lataj xelá'a lau' cheę guchi'u chia',  
 lawe' da dxelė'enu' xúgute' cáteze zaj naca na.  
 3 Lue' dxenná' xánniu' xichaj lázrdawa'  
 ne dxelė'enu' neda' chizrela.  
 Gunná' xánniu' da dxuna', na' quebe bi da caleļa  
 blė'enu'.  
 Ba nuna' quebe bi dizra' caleļa nnia'.  
 4 Dxuzúa' dizra' ca naca da dxennáu',  
 na' quebe dxuna' ca da dxelún benne' węn da zrinnaj  
 ca'.  
 5 Bxue neda' lu neza chawe' chiu',  
 cheę quebe cheajcházia' lu da caleļa.  
 6 Dxuláwizra' Lue', Dios, lawe' da dxennu' chi'a.  
 Bzę naga chi'a, na' bene da dxennía'.  
 7 Ble'e ca dxexache lázreļe'u bėnneache.  
 Bselá benne' ca' dxuluxrén lazre' Lue' lu na' benne'  
 dxeledábaguę' lę'.  
 8 Bxue neda' ca dxun benne' dxuxúe' xiaj lawe'.  
 Gudęzre neda' ca dxun bedxuj dxėzreba' zrí'ineba'  
 zran xrílaba'  
 9 cheę quebe bi xelún chia' benne' ca' dxelunę' da  
 caleļa,  
 benne' dxeledábaguę' neda', ne dxelaca lazre' xelútie'  
 neda'.  
 10 Quebe dxelexache lazre' le sa' ljwezre',  
 na' dutę xel-la' dxulucá'ana szren cuinę' dxuluchálaje'.  
 11 Gáteteze dxedá' dxelėchaję' neda'.  
 Dxelaca lazre' xeline' neda' xu.  
 12 Zaj naque' ca tu bęzre xixre'dau' dxaca lázreba' bi  
 gáguba'.  
 Zaj naque' ca tu bęzre xixre',  
 ba nucache cuínaba' cheę quėl-laba' bėadu ca'.  
 13 Gudá, Xran, gudábaga' benne' ca' dxelunę' da  
 caleļa,



na' bchiche' lu xu.  
 Bselá neda' lu na' benne' ca' dxelunę' da calęla,  
 guchínenu' xia chiu'.  
<sup>14</sup> Bselá neda' lu na' benne' ca' nen ni'a ná'quezu',  
 Xran.  
 Bselá neda' lu na' bėnneache, benne' ca' zaj dxe'e  
 gunne xue  
 cheę xęzr la xu nigaze,  
 benne' ca' dxeláguqueze' da zácaleę'e chiu'.  
 Da nigáqueze dxulugawę' zrí'ine' ca',  
 ne dxexegá'anaqueze da dxelágu zrí'ine zre suę'.  
<sup>15</sup> Le'eda' neda' lau Lue' lawe' da naca' xrlátaje.  
 Xezaca ba lazra' gaca' ca nácaquezu' Lue' gate xe-  
 bana'.  
**18** Nazrí'ida' Lue', Xran.  
 Lue' dxuzę' chuchu' neda'.  
<sup>2</sup> Lue', Xran, nacu' ca tu xiaj naga zę chúchua',  
 ne ca tu xu'u zren naga xu'u chawa', na' nacu' weselá  
 chia'.  
 Dios chia', Lue' dxuzę' chuchu' neda', na' guxrén lazra'  
 Lue'.  
 Dxucu'uju' neda', ne dxuseláu' neda', ne dxucache  
 chawu' neda'.  
<sup>3</sup> Wannéqueza' Xránadxu Dios,  
 Bėnnea' naca cheę' güe lánadxu Lę'.  
 Lę' guselé' neda' lu na' benne' ca' dxeledábague' ne-  
 da'.  
<sup>4</sup> Guzúa' lu da stębe cheę xel-la' gute,  
 na' guca da calęla ca tu xęgu nisa da bchebe na ne-  
 da'.  
<sup>5</sup> Guzúa' lu da stębe chu'a lataj ba xa'  
 lawe' da zua' lu da stębe cheę xel-la' gute.  
<sup>6</sup> Lu da zi' da xa' bláwizra' Xrana' Dios, ne gun-  
 néqueza' Dios chia'.  
 Lę' benne' chi'a naga zuę' lataj lánaxa cheę',  
 ne bzę nague' da bchálaja' lawę'.  
<sup>7</sup> Nadxa guzrú' lu xęzr la xu nigá.  
 Gulezrize lane xi'a ca'.  
 Gulezrízeleę'e na lawe' da bzra'a Le'.  
<sup>8</sup> Bdxuaj zren cheę xi' lu zrineę',  
 ne bdxuaj xi' lu dxu'e da bzezxe na da dę lawę',  
 na' xi' na' gudel-la na bau ca'.  
<sup>9</sup> Bzėxruje' da zria zran xabáa, na' bétaje',  
 na' guzúa da chul-la zran ni'e.  
<sup>10</sup> Gudéę' lu be' zrię' tu da nazí le na querubín.  
 Chadí gudéę' lu be' bđunu'.  
<sup>11</sup> Gúcuę' da chul-la, da bcache na Lę',  
 da na' naca na beuj bza da xuzru na nisa.  
<sup>12</sup> Lu da dxácatite legala cheę' da xu'u lu beuj bza,  
 na' beledxúaj bau dxelala, ne xiaj bezxe'.  
<sup>13</sup> Zran xabáa gunné guziu' cheę chi'i Xránadxu,  
 na' ben chi'i Dios szrentę ládujla bau dxelala ca',  
 ne xiaj bezxe' na'.  
<sup>14</sup> Bsanę' xaga nalá xéche'ze cheę' ca',  
 na' bęse dínnaje' benne' ca' dxeledábague' neda'.  
 Bsanę' xesa guziu' ca', ne bzria xi'e benne' ca'.  
<sup>15</sup> Nadxa belelá' da zaj dę lu situj cheę nísadau',  
 ne ble'e lau lane xęzr la xu da zua na zran nísadau',

gate na' gudil-lu' benne' ca' dxeledábague' neda',  
 Xran,  
 ne lu xel-la' dxezrá'a chiu' bzagu' benne' ca'.  
<sup>16</sup> Bétaje' lu da sibe, ne bequę'e neda'.  
 Bebéaje' neda' lu da naca ca tu nisa zila.  
<sup>17</sup> Bselé' neda' lu na' benne' wal-la dxeledábague' ne-  
 da',  
 ne lu na' benne' ca' dxelecuídenę' neda',  
 benne' zaj nácadxę' wál-la ca neda'.  
<sup>18</sup> Buluzague' neda' gate na' zua' lu da stębeleę'e,  
 san Xrana' Dios gúcalęne' neda'.  
<sup>19</sup> Bebéaje' neda' naga xu'a, ne bzue' neda' tu lataj  
 zren.  
 Bselé' neda' lawe' da bezaca ba lazre' chia'.  
<sup>20</sup> Xránadxu Dios bexunne' chia' cáteze naca  
 da xrlátaje da nuna'.  
 Cáteze naca da xrlátaje da nuna' bexunne' chia'  
<sup>21</sup> lawe' da dxuna' ca da dxusęde Xrana' neda',  
 ne quebe guleaj xíchaja' Dios chia'.  
<sup>22</sup> Dxuna' ca naca da dxenná bé'ene' neda',  
 ne quebe bsana' da ca' nadxíxruj be'e.  
<sup>23</sup> Guca' li lazre' lau Lę',  
 ne bxue cuina' cheę quebe guna' da calęla.  
<sup>24</sup> Cheę lę na' bexunna Xránadxu Dios chia'  
 cáteze naca da xrlátaje da bęna',  
 cáteze naca da xrlátaje da nuna' lau Lę'.  
<sup>25</sup> Dxexache lazru' cheę benne' dxexache lazre' le sa'  
 ljwezre',  
 ne nacu' li lazre' nen benne' naque' li lazre'.  
<sup>26</sup> Dxunu' da naca chawe' cheę benne' naque' chawe',  
 na' gacu' snia nen benne' węn da calęla.  
<sup>27</sup> Guseláu' benne' zaj zuę' lu da zi' da xa',  
 san guzėxruju' benne' dxulucá'ana szren cuinę'.  
<sup>28</sup> Lué'queze guzalju' xi' chia'.  
 Xrana' Dios, guzani'u chia' naga zua' lu da chul-la.  
<sup>29</sup> Nen xel-la' waca chiu' guzría xi'a benne' zantę  
 dxeledíl-lalęne' neda'.  
 Che Lue', Dios, súalęnu' neda'  
 waca guchínnaja' ze'e da zaj naxechaj xęzre ca'.  
<sup>30</sup> Li lazre' zaj naca da dxun Dios, na' du lazre' naca xr-  
 tizre'.  
 Dxucu'uję' xúgutę benne' ca' dxelebeza lazre' Lę'.  
<sup>31</sup> Tuze Xránadxu naque' Dios.  
 Tuze Dios cheędxu naque' Benne' dxucu'uję' dxi'u.  
<sup>32</sup> Dios naque' Bėnnea' dxunę' neda' benne' wal-la,  
 ne Benne' dxunę' li lazre' da dxuna' neda'.  
<sup>33</sup> Dxunę' ni'a ca zaj naca ni'a bzrina' xixre'  
 ne dxuzúa chúchuę' neda' lu xi'a Sión cheę'.  
<sup>34</sup> Dxusędenę' neda' cheę gaca cha'a lu wedil-la,  
 ne cheę gaca guchíneda' xaga nalá xéche'ze  
 da naca na xia gache'.  
<sup>35</sup> Lu xel-la' weselá chiu' bcu'uju' neda',  
 ne nen na'u xabęla gúcalęnu' neda'.  
 Xel-la' zri'i lazre' chiu' ba nucá'ana szren na neda'.  
<sup>36</sup> Bęn chawu' neza naga tea',  
 cheę quebe cuila' lu neza na'.  
<sup>37</sup> Blaga' benne' dxeledábague' neda', na' xejzrena'  
 lę',

na' quebe bebi'a cadxa bétetea' benne' ca'.  
 38 Bena' benne' ca' wē', na' quebe guca xelexasē'.  
 Xeajlechazie' zran ni'a.  
 39 Btipu' lazra' chee' cha'a lu wedil-la.  
 Bzérxuju' benne' dxeledábague' neda' zran ni'a.  
 40 Benu' buluzrunnuj benne' dxeledábague' neda'  
 lawa',  
 chee' bzria xi'a benne' ca' dxelecuídenē' neda'.  
 41 Gulennē' nu benne' gácalēne' le' san quebe nu  
 chilá'.  
 Gulennē' Xránadxu Dios, san quebe benne' chee'.  
 42 Búzruja' benne' ca' ca bxrte xu da dxua be'.  
 Bléaja' le' ca dxuléaja' guna' la neza ca'.  
 43 Bseláu' neda' lu na' benne' ca' dxeledábague',  
 na' benu' neda' benne' xíchajē xēzr la xu ca',  
 na' benne' ca' quebe núnbe'a dxelunē' zrin chia'.  
 44 Gate belenne' chia', na' buluzúē' xrtizra'.  
 Benne' zaj zra' xēzr la xu ca' belunē' ca' gunná be'eda'.  
 45 Benne' zitu' ca' gulate ni'a ne'e,  
 na' beledxúajē' dxelezríziē' lu xēzre zrentau' chee' ca'.  
 46 Gaca ba lá'azxa Xránadxu Dios.  
 Gaca ba Bénnea' dxucu'ujē' neda'.  
 Xegá'ana szrénqueze Dios, Bénnea' dxuselé' neda'.  
 47 Naca Dios Bénnea' dxebeáj lazre' benne' dx-  
 eledábague' neda',  
 ne dxuzúē' benne' ca' zran ni'a.  
 48 Naque' Bénnea' dxuselé' neda' lu na' benne' ca'  
 dxeledábague' neda'.  
 Dxunē' dxenná be'eda' benne' ca' guledábague' ne-  
 da'.  
 Bselé' neda' lu na' benne' xichaj zra'a ca'.  
 49 Chee' le' na' xechēba' chiu', Xran, lau benne' xēzr la  
 xu ca',  
 na' gúl-laqueza' chee' Lau' Lue'.  
 50 Dxun Dios dxenná bea bénnea' waláz chee',  
 ne dxexache lazre' bénnea' guqué'e, bénnea' naque'  
 David,  
 ne zri'ine zre sue' chadía chacanna.  
**19** Dxulé'e lau zran xabáa ca naca xel-la' szren chee'  
 Dios.  
 Dxuchálajqueze na ca zaj naca da nunē'.  
 2 Tu zra tu zra dxuzén na zra xula da nigá,  
 na' tu zre' tu zre' dxē na zre' xula da ná'queze.  
 3 Quebe dxuluchine na xrtizra' bénneache,  
 ne quebe nu dxen chi'i na,  
 4 san dxezriluj da dxelenná na du gabí'i xēzr la xu,  
 ne dxelezrín xrtizra' na dapa saca chee' xēzr la xu.  
 Dios bēne' xabáa ca tu xu'u naga zua gubizra.  
 5 Che zílala dxalaj na ca tu benne' wechaga na'.  
 Dxebé na ca tu benne' dxezá chégüē' lu witja.  
 6 Dxedxuaj na chalá'a naga dxalaj na,  
 na' dxezrín na chalá'a naga dxebía na.  
 Dxuchá'a na xúgute da zaj dē.  
 7 Du lazre' naca da nadxixruj bea Xránadxu,  
 ne dxuzé chacha na bénne'du xú'udxu.  
 Li lazre' naca da dxexechēbe Xránadxu,  
 ne dxunezruj na xel-la' sina chee' benne' ca'  
 quebe zaj napē' na.

8 Da líqueze zaj naca da nadxixruj bea Xránadxu,  
 na' dxelebéle'e benne' ca' dxelunē' ca zaj naca na.  
 Du lazre' zaj naca da dxuzéajni'i Xránadxu dxi'u,  
 da dxuluzúa na dxi'u lu xel-la' naxaní'.  
 9 Cháwedau' naca zrédexu Xránadxu,  
 da gun na súadxu chadía chacanna.  
 Da líqueze zaj naca da dxuchi'a Xránadxu cheedxu,  
 ne zaj naca na chawe'.  
 10 Zaj naca na da dxezá lázredxadxu ca oro,  
 ne ca oro zrentē da zácalē'e na.  
 Zaj naca na zíxredxa ca bzrína'dau', da nácalē'e na  
 zixre.  
 11 Dxulusizre na neda', wēn zrin chiu'.  
 Lawe' da dxuna' ca zaj naca na, da zrentē dxezi'a.  
 12 Netú benne' quebe gaca lé'ene' da calēla da dxunē'.  
 Bselá neda', Xran, lu da calēla da quebe  
 dxéquebe'eda' dxuna'.  
 13 Bucache chawe' neda', wēn zrin chiu',  
 chee' quebe bi dul-la guna' du lazra'.  
 Quebe gu'u lataj nna be'e dul-la neda'.  
 Nadxa gaca' du lazra', ne quebe baga' zria chee' dul-la  
 na'.  
 14 Gaca da dxuchálaja', ne da dxulaba lazra'  
 da dxezaca ba lazru' Lue', Xran  
 Nacu' Benne' dxuxúē' neda', ne Benne' dxexá'ue' ne-  
 da'.  
**20** Dxenaba' Xránadxu xenne' chi'u lu zra zu' lu da  
 stēbe,  
 ne gucu'uj La Dios chee' Jacob lue'.  
 2 Dxenaba' Le' naga zue' lataj lá'azxa chee' sel-le'  
 da gácalē na lue',  
 ne chee' xi'a Sión xidē' guxre' lue'.  
 3 Dxenaba' Le' cheajsá lazre' ca naca xúgute guna'  
 bzru' chee',  
 ne si' lu ne'e béadu ca' dxuzezru' lawē'.  
 4 Dxenaba' Le' gunne' lue' ca naca da dxezá lazru',  
 ne gunē' xúgute da dxéquenu' xrlátaje.  
 5 Béle'entu' gate guselé' lue',  
 na' chísantu' tu da gulé'e lawe na La Dios cheedxu.  
 Dxenaba' Xránadxu gunne' lue' xúgute da dxenabu'  
 lau Le'.  
 6 Na'a nezda' dxuselá Xránadxu bénnea' ba  
 gucá'aquezē'.  
 Naga zue' xabáa lá'azxa chee' xenne' chi'i bénnea'.  
 Xel-la' waca zrentē chee' guselé' bénnea'.  
 7 Bal-la benne' dxuluxrén lazre' carro ca' chee' wedil-  
 la,  
 na' xezícadxe' dxuluxrén lázre' bzrina' ca'.  
 Dxi'u dxuxrén lázredxu La Xránadxu Dios.  
 8 Benne' ca' gulate ni'a ne'e, ne xeajlechazie'.  
 Dxi'u bexásadxu, na' zēdxu.  
 9 Bselá netu', Xran, nacu' Wenná Bea cheentu'.  
 Ben chi'intu' gate dxuláwizrantu' Lue'.  
**21** Benne' dxenná bea dxebéle'ēne' nen xel-la' waca  
 chiu', Xran,  
 na' ca naca xel-la' weselá chiu' dxebéle'ēne'.  
 2 Bnézruju' le' da guzá lazre',  
 ne quebe bzagu' da gunabē' Lue'.

3 Guzú' lu na'u lẹ', ne benu' dxaca chawe' chee'.  
 Nuzriu' xíchajẹ' tu da naca na oro.  
 4 Gunabe' Lue' gunnu' lẹ' xel-la' nabán,  
 na' bnézruju' na lẹ' chee' súaqueze' zane' iza.  
 5 Zrentẹ' naca xabáa chee' lawe' da bseláu' lẹ'.  
 Benu' lẹ' xel-la' ba lá'ana, ne xel-la' szren.  
 6 Lawe' da nunu' gaca chawe' chee' chadía chacanna  
 dxunu' dxebele' lẹ' lau Lue'.  
 7 Lawe' da dxuxrén lazre' wenná bea na' Xránadxu,  
 xexache lazre' Dios szrentẹ' lẹ',  
 na' quebe suẹ' lu da stẹbe.  
 8 Xulétaju' xúgute' benne' dxeledábague' lue'.  
 Xel-la' waca chiu' xulétaju' benne' ca' dxelecuídene'  
 lue'.  
 9 Lu zra na' zra'u lẹ' gaca chee' benne' ca'  
 ca guzú' lẹ' lu xi' ga dxulúzriẹ' bla'dau'.  
 Xránadxu guzúzruje' benne' ca' lu xel-la' dxezrá'a  
 chee',  
 na' xi' na' guzezxe na lẹ'.  
 10 Xúgute' da belunẹ' lu xęzr la xu nigá guzria xi'u,  
 ne xegú' zri'ine zre suẹ' ládujla bėnneache,  
 11 lawe' da gulaca lazre' xelunẹ' da calẹla chiu' Lue'.  
 Gulilaj lazre' ca da xelunẹ', san quebe bi  
 xelezėquene',  
 12 lawe' da gulagu' benne' ca'.  
 Nucuezu' xaga nalá xėche'ze chiu' chee' lẹ'.  
 13 Begá'ana szrėnqueze Lue', Xran, lu xel-la' wal-la  
 chiu'.  
 Tu gúl-lazquezdxu, ne tu güe lá'anazquezdxu Lue'  
 ca naca xel-la' waca chiu'.  
**22** Dios chia', Dios chia', ¿bizr chee' na' nusán lazru'  
 neda'?  
 ¿Bizr chee' na' quebe dxennu' da dxenaba' Lue'  
 chee' guseláu' neda'?  
 2 Dios chia', dxuláwizra' Lue' te zra, ne quebe dxex-  
 echebu' chia'.  
 Dxuláwizra' Lue' chizrela, ne quebe dxezi'í lazra'.  
 3 Lá'azxa nacu' Lue'.  
 Nacu' Benne' dxebeze' naga dxelúe lá'ana benne' Is-  
 rael Lue'.  
 4 Xra xrtáuntu' gulebeza lazre' Lue'.  
 Gulebeza lazre', na' bseláu' lẹ'.  
 5 Bululáwizre' Lue', na' belelé'.  
 Buluxrén lazre' Lue', na' quebe belexedué'ne'.  
 6 Neda' naca' ca tu bẹla' gúna'dau', ne quegá bėn-  
 neache.  
 Dxelecuide bėnneache neda', ne dxuluzúe' neda'  
 chalá'ala.  
 7 Xúgute' benne' dxelelé'e neda' dxelún lẹ' chia'.  
 Lu da dxelún lẹ' chia' dxelexrá dxu'e,  
 ne dxulutá xíchajẹ', dxelelé'e':  
 8 "Bzua cuine' lu na' Xránadxu chee' guselé' lẹ'.  
 Guselé' lẹ' che dxezaca ba lázrele' lẹ'."  
 9 Lue' nacu' Bėnnea' bęxru' neda' gate gúlaja'.  
 Benu' bxren lazra' Lue' gate na' ne dxázretea'.  
 10 Guxu'a lu na'u gate quebe ne gálajtea'.  
 Gate ne xu'a lu lẹ'e xrna'a, báchequeze nacu' Dios  
 chia'.

11 Quebe xebigu' naga zua' lawe' da zua gágute'  
 da gusaca zi na neda',  
 ne quebe nu chilá' benne' gácalenẹ' neda'.  
 12 Zaj naxechaj benne' dxeledábague' neda' ca bęzre  
 ca'.  
 Zaj naxechaj benne' neda' zaj naque' ca bęzre wal-la  
 ca'  
 chee' Basán.  
 13 Gulaca lazre' xuluzría xi'e neda'  
 ca tu bęzre xixre' dxedunba', ne dxebezre xa'aba'.  
 14 Bebizre lazra' ca nisa da nalalaj na lu xu,  
 na' ca naca zrita xu'a bulusán ljwezre na.  
 Lázrdawa' guca na ca xina' da bxuna na lu lẹ'a ca nisa.  
 15 Bexaca xel-la' wal-la chia' ca tu xé'ena xu la'a,  
 na' luzra' bedá' na chichja'.  
 Nuzú' neda' lu xu xrte chee' xel-la' gute.  
 16 Zaj naxėchajẹ' neda' ca becu' ca'.  
 Zaj naxechaj benne' węn da zrinnaj ca' neda'.  
 Gulíduẹ' ni'a na'a.  
 17 Waca gulaba' ca naca zrita xu'a,  
 na' benne' ca' dxelenné'e neda', ne dxelenná' xánnie'  
 neda'.  
 18 Belexelé'e zra lana' late' weaj,  
 na' lawe' zra lana' gulebeje' da gaca bea na.  
 19 Quebe xebigu' naga zua', Xran.  
 Nacu' xel-la' wal-la chia'.  
 Gudázega gácalenu' neda', Xran.  
 20 Bselá bėnne'du xu'a lu na' benne' gu'e neda' xia.  
 Bėnnea' guzría xi'e neda' gunẹ' ca dxun becu'.  
 21 Bselá neda' lu dxu'a bęzre xixre'.  
 Bselá neda' lu luzu bęzre wal-la ca'.  
 22 Guzenda' bi bícha'dau' ca' lau' Lue'.  
 Güe lá'anaqueza' Lue' ladaj benne' zaj nazrague' lau'.  
 23 Le'e, dxezrébele Xránadxu, le güe lá'ana Lẹ'.  
 Le gucá'ana szreñe', le'e, zri'ine zre sua Jacob.  
 Le zrebe Lẹ', le'e, zri'ine zre sua Israel.  
 24 Quebe bzua Dios chalá'ala, ne quebe gucúidene'  
 da zi' da xa' da guledé benne' xache' ca',  
 ne quebe bcache lawe' lau benne' ca'  
 san gate bululáwizre' Lẹ', benne' chi'e.  
 25 Güe lá'anaqueza' Lue' laduj benne' zan zaj  
 nazrague' lau'.  
 Ca da guchębe lazra' gúnqueza' lau benne' ca' dx-  
 elezrebe' Lue'.  
 26 Xelagu benne' dxexruj lazre', ne welėlajquezne'.  
 Benne' ca' dxelebigue' lau Xránadxu xelúe lá'anaque-  
 ze' Lẹ'.  
 Tu gáčazqueze da ba neza chee' benne' ca'.  
 27 Cheajlesá lazre' benne' dutẹ xęzr la xu Xránadxu,  
 na' xelėxebí'e lau Lẹ'.  
 Xúgute' cue' benne' chee' xúgute' cue' xęzr la xu  
 xelúe lá'anaqueze' Lẹ',  
 28 lawe' da xu'u lu na' Xránadxu xel-la' dxenná bea,  
 na' nna bė'ene' xúgute' benne' xęzr la xu ca'.  
 29 Xeláguqueze xúgute' benne' zren ca' chee' xęzr la xu  
 nigá,  
 ne xelúe lá'anaqueze' Dios.  
 Xuluzú zribe lau Lẹ' xúgute' benne' ca' xelate,

benne' ca' quebe xelezéqueñe' xelegú'u chawe'  
bénne'du zaj xu'e chee' quebe xelatie'.

<sup>30</sup> Zrí'ine zre sua benne' ca' xelunbe' zrin chee' Xránadxu.

Xuluzenne' zrí'ine' ca' ca naca chee' Xránadxu  
cadxa cheajsete' chee' bénneache.

<sup>31</sup> Xelezrine', ne xuluzenne' bénneache ca naca  
da xrlátaje da dxun Dios.

Xuluzenne' benne' quebe ne xelálaje' ben Dios da  
caní.

**23** Xránadxu Dios dxuxúe' neda' ca tu benne' dx-  
uxúe' zríla' chee'.

Quebe bi dxexázejeda'.

<sup>2</sup> Ca dxelezu' zríla'du ca' ba guláguba' xixre'  
xá'adau',

caní dxune' chia' chee' xezí' lazra'.

Gune' chia' ca dxaca chee' zríla' ca'

dxeché'e-ba' dxu'a xegu nisa da de' zrise.

<sup>3</sup> Dxuxuzúa chúchue' neda' lu xichaj lázrdawa'.

Dxusi'e neda' lu da xrlátaje chee' gaca li da guchébe  
lazre'.

<sup>4</sup> Láqueze tea' naga sua' lu da stébe chee' xel-la' gute,  
quebe bi da caléla guchebe na neda',  
lawe' da zúalenu' Lue' neda', Xran,  
na' dxelácale' zrise', ne blazru chiu' neda'.

<sup>5</sup> Dxucuezu' da xi'aj gawa' lálcala benne'  
dxeledábage' neda' zaj naxechaj neda'.

Dxugú'u da za xichja' da dxapa na neda' ba lá'ana,  
ne dxusezráteu' zriga' chia'.

<sup>6</sup> Da xrlátaje, ne xel-la' dxexache lazre' chiu'  
da lítegaze xelezúale' na neda' xúgute' zra naca bana',  
na' lizru', Dios, gaca na lizra' chadía chacanna.

**24** Chee' Dios naca xezr la xu nigá ne xúgute' da zaj  
de' lawe na.

Naca chee' xezr la xu, ne xúgute' bénneache zaj zre'e  
ga na'.

<sup>2</sup> Bzue' na lawe' nísadau',  
ne bzale' lane na sítujla zran nísadau'.

<sup>3</sup> ¿Nu seque' cuen xi'a chee' Xránadxu?

¿Nu seque' chu'u xudau' lá'azxa chee'?

<sup>4</sup> Waca benne' ca' zaj naque' du lazre' ca naca da dx-  
elune',

ne ca naca da dxulaba lazre'.

Benne' ca' quebe ne xelechisa ne'e lau bedáu' xiaj xa-  
ga ca',

ne quebe bi ne xelechébe lazre' da naca wen lazre'.

<sup>5</sup> Xránadxu gune' da chawe' chee' benne' caní.

Dios guchi'e chee' benne' caní, ne guselé' le'.

<sup>6</sup> Caní zaj naca bénneache dxelebigue' lau Le',  
benne' ca' dxelexu'e naga zua Dios chee' Jacob.

<sup>7</sup> Le salaj dxa xu'u chee' xudau'.

Le salaj dxa xu'u chawe' ca',

na' chu'u Wenná Bea szrente'.

<sup>8</sup> ¿Nuzra na' Wenná Bea szrente' nigá?

Naque' Xránadxu, Benne' wal-la,

Bénnea' napé' duté xel-la' waca.

Naque' Xránadxu, Bénnea' dxedxúaje' chawe' lu  
wedil-la.

<sup>9</sup> Le salaj dxa xu'u chee' xudau'.

Le salaj dxa xu'u chawe' ca',

na' chu'u Wenná Bea szrente'.

<sup>10</sup> ¿Nuzra na' Wenná Bea szrente' nigá?

Naque' Xránadxu, Benne' dxenná bé'ene' xúgute' da  
zaj zua.

Le' naque' Wenná Bea szrente' na'.

Xran, dxenná' Lue' duté lázrdawa'.

**25** <sup>2</sup> Dxuxrén lazra' Lue', Dios chia'.

Quebe gu'u lataj xedu'é'eda'.

Quebe gu'u lataj benne' dxeledábage' neda' xuluzé-  
taje' neda'.

<sup>3</sup> Da líqueze, benne' ca' dxelebeza lazre' Lue'  
quebe xeleque zréajene'.

Xeledu'é' benne' ca' dxeledábage' xrtizru'.

<sup>4</sup> Xran, ble'e neda' da dxaca lazru' guna'.

Ble'e neda' da dxezaca ba lazru' guna'.

<sup>5</sup> Bse'de neda' guna' ca naca da li chiu'

lawe' da nacu' Dios dxuseláu' neda'.

Tu dxebeza lázrezqueza' Lue'.

<sup>6</sup> Bsa lazre', Xran, gacu' zrí'i lazre',

ne xexache lazru' chia' cáteze da dxúntequezu'.

<sup>7</sup> Quebe chajsá lazru' dul-la da bēna' gate ne naca'

benne' cuide', ne ca gudábage' xrtizru'.

Nen duté xel-la' dxexache lazre' chiu', bsa lazre' neda',

ne nen duté xel-la' zrí'i lazre' chiu', Xran.

<sup>8</sup> Xrlátaje, ne li lazre' naca Xránadxu Dios.

Chee' le' na' gusédené' benne' dul-la ca' da dxal-la'  
xelune'.

<sup>9</sup> Gulé'ene' benne' dxexruj lazre' ca' da xrlátaje da  
xelune',

ne gusédené' benne' zren lazre' ca' da xelune'.

<sup>10</sup> Lu xel-la' dxexache lazre',

ne lu da li dxeché' Xránadxu benne' ca' dxelune'

ca naca xel-la' wezríla' chee', ne ca da dxuse'de Le'.

<sup>11</sup> Lawe' da dxunu' ca da ba gunnú', Xran,  
gunite lau' ca naca dul-la nuna', da naca na zren.

<sup>12</sup> ¿Nu benne' dxezrebe' Xránadxu Dios?

Le' gusédené' benne' nigá da dxal-la' gune'.

<sup>13</sup> Gaca chee' tu da ba neza zrente',

na' zrí'ine zre sue' gaca cheébe' xezr la xu.

<sup>14</sup> Xránadxu Dios naque' tuze nen benne' ca' dxelezre-  
be' Le',

na' gune' xelúnbe'e' xel-la' wezríla' chee'.

<sup>15</sup> Tu dxennázqueza' Xránadxu Dios

lawe' da guselé' neda' lu na' benne' ca' dxelaca lazre'  
xelel-le' neda'.

<sup>16</sup> Gunná' neda', ne bexache lazre' neda'

lawe' da zua' tuza', ne dxezaca zi'a.

<sup>17</sup> Naxánle'e' da stébe da zaj zua lázrdawa'.

Bselá neda' lu da stébe zua'.

<sup>18</sup> Gunná' ca dxezaca zi'a, ne ca dxunle'a zrin,

na' bnite lau xúgute' dul-la da nabaga'.

<sup>19</sup> Gunná' benne' ca' dxeledábage' neda' ca naxán-  
le'ene',

ne ca dxelecuídele'ene' neda'.

<sup>20</sup> Bxue bénne'du xu'a, ne bselá neda'.

Quebe gu'u lataj xedué'eda' lawe' da dxuxrén lazra' Lue'.

<sup>21</sup> Zaj nuxru da xrlátaje, ne xel-la' li lazre' neda' lawe' da dxebeza lazra' Lue'.

<sup>22</sup> Dios, bselá benne' Israel ca' lu xúgute da dxelezaca zi'e.

**26** Bchi'a chia', Xran, lawe' da nuna' da xrlátaje. Bxren lazra' Lue', Xrana' Dios, ne quebe ben chupa lazra'.

<sup>2</sup> Gunná' xanne' lázrdawa', Xran, ne bxue ca da nuna'. Gunná' xanne' da xu'u lu xichaj lázrdawa'

<sup>3</sup> lawe' da dxeque be'eda' dxexache lazru' neda', ne dxuna' ca naca da li chiu'.

<sup>4</sup> Quebe ne guna' tu zren benne' ca' dxeluné' da xrlátaje cúzreze, ne quebe ne guna' tuze benne' ca' dxululé'e cuine' xrlátaje.

<sup>5</sup> Dxecuédeda' da dxelún benne' ca' dxeluné' da calela naga dxelezrague', ne quebe ne chu'a tu zren benne' ca' dxuluzúe' Dios chalá'ala.

<sup>6</sup> Dxelé'enu' quebe bi zria nabaga', na' waca biga' lu cugu chiu', Xran,

<sup>7</sup> chee cuezre xa'a, xapa' Lue': "Xcalenu'", ne chee guzenda' bènneache ca naca da zren ca' da nunu'.

<sup>8</sup> Xran, nazrí'ida' lizru' naga zu', ne lataj lá'azxa naga zua da xabáa chiu'.

<sup>9</sup> Quebe guzría xi'u neda' tu zren nen benne' dul-la ca',

ne quebe gutiu' neda' tu zren nen benne' ca' dxelútie' benneáche,

<sup>10</sup> benne' ca' dxeluné' da calela, ne tu dxulunézrujzqueze' dumí chee xeledé' lu da zaj nune'.

<sup>11</sup> Neda' tu gúnzqueza' da naca li lazre'. Bselá neda', ne bexache lazre' neda'.

<sup>12</sup> Tu núnzqueza' da xrlátaje, na' güe lá'anaqueza' Xránadxu Dios

lau benne' ca' zaj nazrague' chee'.

**27** Xránadxu Dios naque' xel-la' naxaní' chia', ne Benne' dxuselé' neda'.

¿Nu benne' gaca guchebe' neda'?

Xránadxu Dios naque' Benne' dxucu'uje' neda'.

¿Nu benne' gaca guzúe' neda' lu da stébelé'e?

<sup>2</sup> Gate guléchaj benne' ca' dxeluné' da calela chia', nen benne' ca' dxulusaca zi'e neda', ne benne' ca' dxeledábague' neda' chee xuluzría xi'e neda',

na' gulechégüe', ne xeajlecházie'.

<sup>3</sup> Láqueze xeléchaj tu cue' benne' dxjaque' wedil-la neda', benne' ca' dxeledábague' neda', quebe zrèbequeza'. Láqueze xuluzúe' neda' lu wedil-la, neda' guxrén lázrequeza' Dios.

<sup>4</sup> Tu da gunábeda' Xránadxu Dios.

Da nigáze sa lazra', da naca na chee sua' lizre Xránadxu

xúgute zra gaca bana',

chee gulaba lazra' ca naca da xrtante chee Xránadxu, ne chee guchálajlena' Lē' lu xudau' lá'azxa chee'.

<sup>5</sup> Lē' gucache chawe' neda' lu lataj lá'azxa chee' lu zra dxaca da calela.

Gucache chawe' neda' lu lataj cheéqueze' naga zúaqueze'.

Guzúe' neda' tu naga se cháweda'.

<sup>6</sup> Nadxa guné' guzétaja' benne' dxeledábague' neda', ne zaj naxéchaje' neda',

na' nen duté xel-la' dxebé gutia' béadu ca' guzúa'-ba' lu cugu chee'.

Gúl-laqueza', ne tu güe lá'anazqueza' Xránadxu.

<sup>7</sup> Xran, ben chi'a gate ne dxuláwizra' Lue'.

Bexache lazre' neda', ne bechebe chia'.

<sup>8</sup> Lu xichaj lázrdawa' benda' chi'u, gunnú': "Bexilaj chia'."

Xexíłaja' chiu', Xran.

<sup>9</sup> Quebe gucache lau' chia' neda'.

Lu xel-la' dxezrá'a chiu' quebe xebigu' naga zua' neda',

wen zrin chiu'.

Nacu' Benne' dxácalene' neda'.

Quebe gusanu' neda', ne quebe cueaj xichju' neda', Dios, weselá chia'.

<sup>10</sup> Lácala xulusán xra xrna'a neda', tu xecá'azqueze Xránadxu Dios neda'.

<sup>11</sup> Bsede neda' da dxaca lazru' guna', Xran, ne ble'e neda' da li lazre' da dxal-la' guna', lawe' da zaj naxán benne' dxeledábague' neda'.

<sup>12</sup> Quebe gu'u lataj benne' dxeledábague' neda' xeluné' chia' da dxelaca lazre'

lawe' da zaj naxechaj benne' wen lazre' neda' nen benne' dxelaca lazre' xulusaca zi'e neda'.

<sup>13</sup> Xránadxu Dios guchebe lazre' le'eda' da xrlátaje chee'

naga gaca bana'.

La quebe guxéajle'a da nigá, na' gute ni'a na'a.

<sup>14</sup> Le cueza xelá' Xránadxu.

Le gutipa lázrele, na' Lē' guzúe' chúchue' le'e.

Awe', le cueza xelá' Xránadxu.

**28** Xran, dxuláwizra' Lue'.

Nacu' Benne' dxucú'uju' neda'.

Bze naga chi'a lawe' da che quebe xennu' neda' gaca' ca tu benne' dxu'e lataj ba xa'.

<sup>2</sup> Ben chi'a dxuláwizra' Lue',

ne dxechisa na'a lau' naga zu' lataj lá'azxa chiu'.

<sup>3</sup> Quebe guzría xi'u neda' tu zren nen benne' wen da calela ca',

ne cá'anqueze nen benne' ca' dxeluné' da zrinna,

benne' ca' dxelenné' dizra' cháwedau' lau le sa' ljwezre',

san xu'u lázrdawe' da calela guné' chee'.

<sup>4</sup> Bde benne' ca' lu da ba xa' cáteze naca chee da beluné',

cáteze naca da calela da zaj nune'.

Bunezruj chee benne' ca' cáteze da beluné', da na' dxal-la' xelezi'e.

<sup>5</sup> Lawe' da quebe gulape' ba lá'ana da ben Xránadxu, ne quegá da bene' lu ni'a ná'queze', guxrínnaje' benne' ca', ne gudée' le' lu da ba xa'.

<sup>6</sup> ¡Gaca ba Xránadxu Dios, Bénnea' benne' chi'a gate bláwizra' Le'!

<sup>7</sup> Xránadxu naque' Bénnea' dxuzé chúchué' neda', ne dxucu'uje' neda'.

Bxren lazra' Le', na' gúcalene' neda', na' chee le' na' gubéle'eda', na' gul-laqueza', ne güe lá'anaqueza' Le'.

<sup>8</sup> Xránadxu naque' Bénnea' dxuzé chúchué' benne' chee' ca', ne naque' Benne' dxucu'uje', ne dxuselé' bénnea' guqué'e.

<sup>9</sup> Bselá benne' chiu' ca', ne ben gaca chawe' chee da naca chee'.

Bxue benne' ca', ne bexru le' chadía chacanna.

**29** Le güe lá'ana Xránadxu, le'e, zrale xabáa.

Le güe lá'ana xel-la' szren chee', ne xel-la' waca chee'.

<sup>2</sup> ¡Da xabáa naca La Xránadxu!

¡Le güe lá'ana na!

Le guzú zríbele lau Xránadxu lá'azxa gate xel'é'e.

<sup>3</sup> Chi'i Xránadxu dxen na lawe' nísadau'.

Dxen chi'i Dios xabáa ca guziu' da dxenné na.

Dxedá chi'e lawe' nísadau'.

<sup>4</sup> Dxen chi'i Xránadxu ca naca xel-la' wal-la chee na.

Dxen chi'i Xránadxu duté xel-la' szren chee na.

<sup>5</sup> Chi'i Xránadxu dxichaj na xaga cedro ca'.

Dxichaj na xaga cedro ca' zaj zé na xi'a Líbano.

<sup>6</sup> Dxuxrite na xi'a Líbano ca' ca dxelexrite bézredu ca', na' dxuxrite xi'a Hermón ca tu bézredau'.

<sup>7</sup> Chi'i Xránadxu dxun na chaze xesa.

<sup>8</sup> Chi'i Xránadxu dxuxrize na le'e xixre' lawe' lataj.

Dxuxrize na le'e xixre' chee xezr la xu Cades.

<sup>9</sup> Chi'i Xránadxu dxuxrize na xaga wal-la ca'.

Dxuchibe na xrlague xaga ca', na' lu xudau' chee' dxelenná xúguté bénneache:

“¡Gaca ba Dios!”

<sup>10</sup> Dxenná be'e Xránadxu nísadau' ca'.

Chadía chacanna dxenná be'e ca Wenná Bea.

<sup>11</sup> Xránadxu Dios dxuzé chache' benne' chee' ca'.

Dxuzé' le' lu da ba neza chee xel-la' dxebeza zri lazre'.

**30** Gucá'ana szrena' Lue', Xran, lawe' da bechisu' neda',

ne quebe bnézruju' lataj benne' ca' dxeledábague' neda'

xelún le' chia'.

<sup>2</sup> Xrana' Dios, bláwizra' Lue', na' bexunu' neda'.

<sup>3</sup> Xran, bseláu' neda' lu lataj ba xa'.

Bexunu' neda' chee quebe chu'a xedxu ba.

<sup>4</sup> Le gul-la chee Xránadxu, le'e nácale benne' cheéqueze'.

Le xé Le': “Xcalenu”, ne dxajsá lázrele naque' lá'azxa,

<sup>5</sup> lawe' da tu chí'idauze dxezré'e

san chadía chacanna zua xel-la' zri'i lazre' chee'.

Wabézredxu tu zreze, san che zílala wabéle'edxu.

<sup>6</sup> Gate guzúa chawa' gunnía': Quebe nu seque' gutá neda',

<sup>7</sup> lawe' da bze chuchu' neda', Xran, ca tu xi'a zren, ne blé'enu' neda' cháwedau'.

Gate bcache lau', na' guzúa' stebe.

<sup>8</sup> Xran, guláwizra' Lue', ne gata' xueda' Lue'.

<sup>9</sup> ¿Bizra da ba neza gaca na chiu' che gatia', ne chu'a xedxu ba?

¿Güe lá'ana' Lue' gate ba naca' xu xrte?

¿Waca nu guzenda' da li chiu'?

<sup>10</sup> Bze naga neda', Xran, ne bexache lazre' neda'.

Xran, gúcale neda'.

<sup>11</sup> Benu' bexaca xel-la' dxebezre chia' xel-la' wexá'a.

Bcuasu' xel-la' dxewí'ine lazre' chia', ne bzu' chia' xel-la' dxebe'.

<sup>12</sup> Chee le' na' tu gúl-lazqueza' chiu', lawe' da nacu' da ba neza chia', ne quebe sua zríqueza'.

Xrana' Dios, tu güe lá'anazqueza' Lue' chadía chacanna.

Dxuxrén lazra' Lue', Xrana' Dios.

**31** Quebe gu'u lataj xedué'eda'.

Lu da xrlátaje chiu' bselá neda'.

<sup>2</sup> Bze naga chi'a, ne bselá neda'.

Bze chuchu neda', ne bucú'uj neda' chee la'.

<sup>3</sup> Nacu' Benne' dxuzé chuchu' neda', ne dxucú'uju' neda'.

lawe' da nacu' li lazre' gulé'enu' neda' neza, ne gusi'u neda' neza na'.

<sup>4</sup> Bebéaj neda' lu xralaj da ba zaj nucueze', chee xel'e le' neda'.

Lue' nacu' Benne' dxuxúe' neda'.

<sup>5</sup> Lu na'u dxuzúa' bénne'du xu'a, Xran.

Lue' bexá'awenu' neda', Dios li lazre'.

<sup>6</sup> Dxequí'eda' benne' ca' dxelebeza lazre' dios ca' quebe bi zaj zaca.

Neda' dxebeza lazra' Xrana' Dios.

<sup>7</sup> Béle'eda', ne sua' lu da ba neza lawe' da dxexache lazru' neda'.

Caní dxunu' lawe' da dxelé'eqeznu' ca da dxezaca zi'a.

Nézenu' ca dxedéa' lu da ba xa'.

<sup>8</sup> Quebe bdeu' neda' lu na' benne' ca' dxeledábague' neda'.

Bze chuchu' neda' tu lataj chawe'.

<sup>9</sup> Bexache lazre' neda', Xrana' Dios, lawe' da zua' lu da ba xa'.

Ba bebizre nisa xuzru xiaj lawa' lawe' da dxewí'ine lazra'

duté bénne'du xu'a, ne duté bēla' dxen chia'

<sup>10</sup> lawe' da dxedé xel-la' nabán chia' lu da ba xa',

ne dxedéa' iza chia' ca' dxebezre lazra'.

Dxedú lazra' lawe' da nabaga' zria, na' dxelelá zrita xu'a.

<sup>11</sup> Xúguté benne' ca' dxeledábague' neda' dxelecuí'dene' neda',

na' benne' walí'zr chia' dxuluzúe' neda' chelá'ala,

na' benne' zaj núnbe'e neda' dxelecuase' neda'.

Benne' ca' dxelelé'ene' neda' la neza dxuluzrúnnuje'  
naga zua'.

<sup>12</sup> Benne' caní ba gulal-la lazre' neda' ca dxelal-la  
lazre'

tu benne' gate.

Naca' neda' ca tu xé'ena xu da nalá'a.

<sup>13</sup> Dxenda' dizra' schanni' da dxelenná benne' zante'  
chia',

na' gáteteze zua da dxuchebe na neda'.

Dxácate' na' dxelune' tuze dizra' bi xelune' chia',

ne zaj nunę' xelútię' neda'.

<sup>14</sup> Neda' dxuxrén lazra' Lue', Xran.

Dxennía' nacu' Lue' Dios chia'.

<sup>15</sup> Lu na'u Lue' zaj xu'u zra chia' ca'.

Bselá neda' lu na' benne' ca' dxeledábague' neda',

ne lu na' benne' ca' zaj nau zi' xuzre' neda'.

<sup>16</sup> Lu xel-la' szren chiu' bxue neda', węn zrin chiu'.

Lu xel-la' dxexache lazre' chiu' bselá neda'.

<sup>17</sup> Quebe gu'u lataj xedué'eda', Xran, lawe' da dx-  
uláwizra' Lue'.

Bęn xelxedué'e benne' ca' dxelebéaj xíchaje' Lue'.

Bęn xelézua zrię' lu lataj ba xa'.

<sup>18</sup> Bęn quebe gaca xelenné benne' ca' dxelezí xęę,  
benne' ca' dxelenné' da caleła cheę benne' xrlátaje  
ca',

da dxelenné' lu xel-la' dxulucá'ana szren cuina,

ne lu xel-la' dxulucá'ana ditaj benne' caní.

<sup>19</sup> Da zrente' naca xel-la' zri'i lazre' chiu' da napu'

cheę bi gunu' cheę benne' ca' dxelape' Lue' ba lá'ana,

da na' dxunu' lau xúgute' bęnneache

nę cheę benne' ca' dxelebeza lazre' Lue'.

<sup>20</sup> Lu da bagácheze naga zu' Lue' dxucachu' benne' ca'

cheę quebe bi xelún bęnneache cheę'.

Dxuzú' benne' ca' tu lu xu'u nagache

cheę quebe bi gun cheę' xel-la' wetil-la dizra' cheę

bęnneache.

<sup>21</sup> ¡Gaca ba Xránadxu Dios!

Lu xel-la' dxexache lazre' cheę' bęne' da zrente'

cheę gúcalęne' neda' tu lu xęzre naga guca wedil-la.

<sup>22</sup> Gate na' guzúa da dxuchebe neda' gunnía':

Zua' naga québedxa le'e Xrana' neda'.

Lue' bennu' chi'a da guta' xueda' Lue' gate na' bláwiz-  
ra' Lue'.

<sup>23</sup> ¡Le zri'i Xránadxu, xúgutele le'e nácale benne' cheę  
Léqueze'!

Xránadxu dxuxúę' benne' ca' quebe dxulusanę' Lę',

na' dxuxunézrujle'ę cheę benne' ca' dxulucá'ana

szrene' Lę'.

<sup>24</sup> Le gutipa lázrele, xúgutele le'e dxebeza lázrele Xrá-  
nadxu Dios,

na' Lę' guzé chúchue' le'e.

**32** ¡Ba neza zrente' naca na cheę bęnnea'  
Dios ba bnite lawę' dul-la da gubáguę',

ne ba gudúę' zria da guzúa cheę'!

<sup>2</sup> ¡Ba neza zrente' naca na cheę bęnnea'

Dios quebe dxusebague' le' zria,

bęnnea' quebe dxezí xęę'!

<sup>3</sup> Gate quebe guxrúalepa' dul-la gubaga',

bedú lazra' lawe' da gudxezra' bedú zra.

<sup>4</sup> Te zra ne chizrela bdeu' neda' xel-la' zi', Xran.

Bedú lazra' ca dxebizre beaj nisa beu' la.

<sup>5</sup> Nadxa guxrúalepa' dul-la gubaga',

ne quebe bcacha' zria da guzúa chia'.

Bechugu lazra' guxrúalepa' na lau Lue', Xran,

na' Lue' bnite lau' cheę dul-la gubaga'.

<sup>6</sup> Xúgute' bęnneache chiu' dxal-la' xuluchálajle'ę Lue'

gate de' lataj xelxezrele'ę Lue', na' gate zrin da zi' da  
xa'

da xelezaque',

da gaca na ca tu xęgu nisa zren da dxedxuaj na,

na' quebe bi gune na benne' ca'.

<sup>7</sup> Lue' nacu' ca tu lataj naga gaca gucache cuina',

na' gucache chawu' neda' cheę quebe bi da saca'.

Tu gul-lazqueza' zizraj ca bseláu' neda' lawe' da dx-

uxú' neda'.

<sup>8</sup> Dxenná Xránadxu: "Gulé'eda' lue' neza naga dxal-la'  
tau'.

Gusédeda' lue', ne guzėjni'ida' lue' ca dxal-la' gunu'.

<sup>9</sup> Quebe gacu' ca tu bzrina' u tu bea, bę quebe bi dx-

elėjni'iba',

bea ca' dxun na ba xen nna be'enu'-ba', na' cu'u xia

dxú'aba',

cheę gunu' xelunba' ca dxaca lazru'."

<sup>10</sup> Benne' węn da caleła ca' dxun na ba xen

xelédéę' lu da zi' da xa'.

Benne' ca' dxuluxrén lazre' Xránadxu,

tu dxuxúezqueze' le' nen dutę xel-la' zri'i lazre' cheę'.

<sup>11</sup> Le'e, benne' xrlátaje, le be, ne le sua lu da ba neza,

nę cheę da bęn Xránadxu, gúcalęne' le'e.

Nen dutę xel-la' dxebe le gul-la, le'e, nácale li lazre'

lau Lę'.

**33** Le be le'e, benne' xrlátaje, lau Xránadxu Dios.

Xrtante' naca lau Dios da dxelúe lá'ana benne'

xrlátaje ca' Lę'.

<sup>2</sup> Le gucá'ana szren Dios nen da zriadi'i na du da dxín-  
nele.

Le gúl-laqueze cheę' nen da dxúl-lalęle,

ne nen tu da nua na chi du.

<sup>3</sup> Le gul-la cheę Lę' tu da cube.

Le gul-la cháwedau', quínele dutę xel-la' dxebe'.

<sup>4</sup> Li lazre' naca xrtizra' Xránadxu Dios,

na' nunę' dutę lu xel-la' li lazre' cheę'.

<sup>5</sup> Lę' nazrí'ine' da naca xrlátaje, ne da naca du lazre'.

Zaj núnbea bęnneache xel-la' dxexache lazre' cheę

Xránadxu

du gabí'i xęzr la xu.

<sup>6</sup> Nę cheę xrtizra' Xránadxu Dios, bęne' xabáa,

na' xúgute' belaj da zaj nalá' zran xabáa bęne'

nen be' dxedxuaj dxu'ę.

<sup>7</sup> Lę' dxuxutube' nísadau', ne dxexunę' na ca tu xi'a

nisa.

Dxegá'a chawę' nisa lu da situj ca' naga nucueze'

cheę na.

<sup>8</sup> Le zrebe Xránadxu Dios, xúgutele zrale xęzr la xu

nigá.

Le zrebe lau Lę', xúgutele le'e zrale lu xęzr la xu

9 lawe' da gunneze', na' guca xezr la xu.  
 Gunná be'ene' na, na' zúaqueze na.  
 10 Xránadxu Dios dxune' dxexaca dácheze dizra' zaj  
 nun  
 benneache xezr la xu ca',  
 ne dxune' dxelaca níteze da ca' zaj nune' xelune'.  
 11 Dizra' ba nun Xránadxu Dios tu súazqueze  
 na chadía chacanna.  
 Da dxegú'u be'e lu lázrdawe' tu wadíazqueze na  
 lau xúgute benneache.  
 12 Ba neza zrente naca na chee benne' xezr la xu ca'  
 Xránadxu naque' Dios chee le',  
 benne' xezr la xu ca' gucá'a Dios chee xelaque' benne'  
 chee'.  
 13 Naga zu'e xabáa chee' dxenná' Xránadxu Dios,  
 na' dxel'éne' xúgute cuen benneache.  
 14 Naga zu'e lataj lá'azxa chee' dxenné'e,  
 na' dxel'éne' ca zaj zra' benneache lu xezr la xu.  
 15 Le' bene' xichaj lázxdau xúgute benne' ca',  
 na' dxenné'e xúgute da dxelune'.  
 16 Quebe la benne' wenná bea ne chee benne'  
 dxjaque' wedil-la zante chee',  
 ne quebe la benne' wal-la ne chee xel-la' wal-la da  
 nape'.  
 17 Quebe nu benne' le' ne chee bzrina',  
 ne quebe nu la ne chee xel-la' wal-la zren chee'.  
 18 Le na' xque, dxuxúe Xránadxu Dios benne' ca' dx-  
 elezrebe' Le'.  
 Dxuxúe' benne' ca' dxelebeza lazre' Le' xexache lazre'  
 le'  
 19 chee guselé' le' lu xel-la' gute,  
 ne chee gugawe' le' gate dxaca gubina'.  
 20 Dxebeza lázredxu Xránadxu Dios.  
 Le' naque' Bénnea' dxácalene' dxi'u, ne dxucu'uje'  
 dxi'u.  
 21 Chee le' na' du lázredxu béle'equezdXu lau Le',  
 lawe' da tu dxuxrén lázrezquezdXu La lá'azxa chee'.  
 22 Bexache lazre' netu', Xránantu',  
 lawe' da dxebeza lázrentu' Lue'.  
**34** Tu güe lá'anazqueza' Xránadxu Dios te zra  
 chizrela.  
 Tu gúl-lazqueza' da güe lá'ana na Le'.  
 2 Xezaca ba lázreña' Xránadxu Dios.  
 Xelén benne' dxexrux lazre' da caní, na' welebélé'ene'.  
 3 Le gucá'ana szren Xránadxu Dios tu zren nen neda',  
 na' tu zren gucá'ana szrendxu La lá'azxa chi'e.  
 4 Bláwizra' Xránadxu Dios, na' Le' benne' chia',  
 ne bselé' neda' lu xúgute da buluchebe na neda'.  
 5 Benne' ca' gulebeza lazre' Le' belelé'ene' da xabáa  
 chee',  
 ne quebe belexedué'ene'.  
 6 Neda', benne' xache', bláwizra',  
 na' ben Xránadxu Dios chia',  
 ne bselé' neda' lu xúgute da dxezaca zi'a.  
 7 Gubáz chee Xránadxu zu'e cuita benne' ca' dxelezre-  
 be' Le',  
 na' dxucu'uje' benne' ca'.

8 Le guxúe xque, na' lé'ele naca xrlátaje Xránadxu  
 Dios.  
 Ba neza zrente naca na chee bennea' dxuxrén lazre'  
 Le'.  
 9 Le zrebe Xránadxu Dios, le'e, nácale benne' chee  
 Léqueze',  
 lawe' da quee bi dxelaxazrje benne' ca' dxelezrebe'  
 Le'.  
 10 Bēze xíxre'du ca' dxelaxázejba', ne dxeledunba'.  
 Benne' ca' dxelebeza lazre' Xránadxu Dios  
 quebe bi da chawe' xelexázejene'.  
 11 Le da, bidau', ne le xen chia'.  
 Gusédeda' le'e chee zrébele Xránadxu Dios.  
 12 ¿Nu benne' ládujla le'e dxaca lazre' xegá'ane'  
 lu xel-la' nabán,  
 bennea' dxaca lazre' sue' zane' iza chee lé'ene' da  
 chawe'?  
 13 Bxue xanne' ca dxuchálaju' chee quebe nneu' da  
 calela,  
 ne chee quebe guchálaju' da wen lazre'.  
 14 Bsan da calela da dxunu', na' ben da xrlátaje.  
 Ben ba xuzre gapu' xel-la' dxebeza zri lazre',  
 ne ben ca naca chee na.  
 15 Dxuxúe Xránadxu Dios benne' ca' zaj naque' xrláta-  
 je,  
 ne dxuzé nague' da dxululáwizre' Le'.  
 16 Dxezrá'a Xránadxu Dios benne' ca' dxelune' da  
 calela,  
 chee quebe sua nu benne' chajsá lazre'  
 benne' wen da calela ca'.  
 17 Benne' xrlátaje ca' dxululáwizre' Xránadxu Dios,  
 na' Le' dxenne' chee',  
 ne dxuselé' benne' ca' lu xúgute da dxelezaca zi'e.  
 18 Gágute zua Xránadxu Dios naga zaj zra' benne' ca'  
 dxellexewi'ine lazre',  
 ne dxuselé' benne' ca' dxellexewi'ine lazre'.  
 19 Da zante da dxezaca zi' benne' xrlátaje.  
 Dxuselá Xránadxu Dios bennea' lu xúgute da ca'.  
 20 Le' dxuxúequeze' xúgute zrita xu'e,  
 na' netú zrita chee' quebe gachaj na.  
 21 Dul-la da dxun benne' wen da calela gute na le',  
 na' xelebía xi' benne' ca' dxelecuídené' benne' xrláta-  
 je.  
 22 Xránadxu Dios dxexá'awe' benne'du xu'u  
 benne' wen zrin chee' ca',  
 na' xúgute benne' ca' dxuluxrén lazre' Le'  
 québequeze xelebía xi'e.  
**35** Xran, bsizre benne' ca' dxelenné' chia'.  
 Gudíl-lale benne' ca' dxeledíl-lalene' neda'.  
 2 Gudá gucu'uju' neda' lu wedil-la,  
 ne gúcale neda'.  
 3 Gudel-la xia chee wedil-la chee guzagu' benne' ca'  
 dxululague' neda'.  
 Guzre neda' nacu' Benne' dxuselé' neda'.  
 4 Ben xelexedué'e, ne xeleque zréaje benne' ca'  
 dxelaca lazre' xelúti'e neda'.  
 Ben xuluzrunnuj, ne xelexedué'e benne' ca' dxelaca  
 lazre'



xelunĕ' chia' da caleĭa.  
 5 Bĕn xelaqueĕ' ca tu xizre bĕbe da dxua be',  
 ne gusel-la gubáz cheĕ xabáa chiu' cheĕ gulagueĕ'  
 benne' ca'.  
 6 Bĕn chul-la neza naga xeledéĕ', na' gaca na naga  
 xelebile',  
 ne gusel-la gubáz cheĕ xabáa chiu' cheĕ gulagueĕ'  
 benne' ca'.  
 7 Bulucacheĕ' tu xralaj cheĕ queĭa na neda',  
 ne quegá bi nuna' cheĕ'.  
 Gulĕneĕ' tu xĕdxu naga cheajcházia' neda',  
 ne quegá bi dĕ da dxagu na zria chia'.  
 8 Gusel-la da guzría xi na benne' ca', ne quebe  
 xeleque be'eneĕ'.  
 Bĕn queĭa xralaj cheĕ' na' léquezeĕ',  
 ne cheajlecházie' naga xelebía xi'e.  
 9 Nadxa béĭeĕqueza' ca naca da nun Xránadxu Dios.  
 Sua' lu da ba neza lawe' da bselé' neda'.  
 10 Xúgutĕ zrita xu'a xelenná na: Xran, ĭnúzraqueze  
 naca  
 ca nacu' Lue'?'  
 Dxuseláu' benne' xache' lu na' benne' wál-ladxa ca ĭĕ',  
 ne benne' dxexazrje lu na' benne' dxebaneĕ' da du dĕ  
 cheĕ'.  
 11 Belasa benne' dxelexechĕbeĕ' da wĕn lazre'.  
 Gulaweĕ' zria neda' cheĕ tu da quebe dxaca be'eda'.  
 12 Belexebi'e neda' da caleĭa cheĕ tu da xrlátaje da bĕ-  
 na',  
 cheĕ xuluzúĕ' neda' lu da ba xa'.  
 13 Neda', gate quebe chawe' gulezúĕ', bewi'ine lazra'.  
 Bĕna' gubasa da bsaca zi na neda',  
 ne du lazra' bláwizra' Dios cheĕ xexunĕ' benne' ca'.  
 14 Bewi'ine lazra' cheĕ benne' ca' ca dxuna' cheĕ  
 le sa' ĭjwezra', u cheĕ bi bíchequeza'.  
 Guzúa' lu da baxache' ca dxun benne' cheĕ xrneĕĕ  
 gate dxatieĕ'.  
 15 Gulebé benne' ca' gate zua' lu da ba xa', ne  
 belezragueĕ'.  
 Belezraga benne' dxeledábagueĕ' neda',  
 benne' wĕn da caleĭa, na' chaditĕ guleĭ-ĭĕ' neda'.  
 Tu belúezquezeĕ' neda', ne quebe gulezúa zrieĕ'.  
 16 Bulusaca zi'e neda', ne belún ĭĕ' chia',  
 ne gulagu lazxeĕ' lu xel-la' dxelezá'a cheĕ' neda'.  
 17 Xran, ĭjátĕ scha' gu'u latja da dxelunĕ'?'  
 Bselá neda' lu na' benne' caní dxuluzría xi'e neda',  
 benne' zaj naqueĕ' ca bĕzre xixre' ca'.  
 18 Xapa' Lue': Xcalenu', lálwela benne' zan ca' zaj  
 nadupeĕ' chiu' Lue'.  
 Tu güe lánazqueza' Lue' ládújla benne' zan ca'.  
 19 Quebe gu'u lataj xelebé benne' ca' dxeledábagueĕ'  
 neda',  
 ne quebe bi nuna' cheĕ'.  
 Quebe gu'u lataj xelún la benne' ca' chia',  
 benne' dxelecuídenĕ' neda',  
 ne quebe bi dĕ da dxagu na zria chia'.  
 20 Benne' caní quebe dxelaca lazreĕ' xelezúĕ' lu  
 xel-la' dxebeza zri lazre',

na' lu xel-la' dxelezí xĕ cheĕ' dxelenné' cheĕ benne'  
 ca'  
 dxelebeza zri lazreĕ' lu xĕzr la xu nigá.  
 21 Belún ĭĕ' chia'.  
 Gulenné': "ĭE! ĭE! ĭBa blé'entu' da nunĕ'!"  
 22 ĭXran, ba blé'eqeznu' da dxelunĕ'!  
 ĭQuebe sua zriu'!  
 ĭXran, quebe gusanu' neda'!  
 23 ĭGuxasa, guzúa guchi'u chia'!  
 ĭGudá, Xrana' Dios, cheĕ gácalĕnu' neda'!  
 24 ĭBchi'a chia' lu da xrlátaje chiu', Xrana' Dios!  
 ĭQuebe gu'u benne' ca' lataj xuluzrizreĕ' chia'!  
 25 ĭQuebe gu'u lataj xelenné': "Ba guca da dxezá  
 lázredxu!"  
 ĭQuebe xelenné': "Ba bendxu chieĕ!"  
 26 Bĕn xelexedué'e, ne xeleque zréaje xúgutĕ benne'  
 ca'  
 dxelebeneĕ' gate bi dxaca chia'.  
 Bsi'e xel-la' stu', ne bĕn xelaca xala benne' ca'  
 dxeledábagueĕ' neda'.  
 27 Bĕn xelúl-la, ne xelebé benne' ca' zaj dĕĕ neda',  
 cheĕ xelennáquezeĕ': "Tu xegá'ana szrénzqueze Xrá-  
 nadxu,  
 Bénnea' dxezá lazreĕ' sua lu xel-la' dxebeza zri lazre'  
 benne' wĕn zrin cheĕ'!"  
 28 Tu guchálajzqueza' cheĕ da xrlátaje chiu',  
 ne cheĕ da dxue lánanaqueze na Lue' te zra chizrela.  
 36 Da zrinnaj da dxun benne' dxuzúa chalá'ala Dios  
 dxuchálajĭe lu xichaj lázrdaweĕ'.  
 Quebe dxezá lázrequezeĕ' gapeĕ' Dios ba lánana.  
 2 Cheĕ ĭĕ' na' dxulé'e cuineĕ' ca tu benne' zrentĕ.  
 Dxéqueĕ' quebe dxelé'e Dios da zrinnaj da dxunĕ',  
 ne quebe dxecuide Dios ĭĕ'.  
 3 Da tu dxuchálajzquezeĕ' naca na da zrinnaj, ne da  
 wĕn lazre'.  
 Québedxa dxéajni'ineĕ', ne québedxa dxunĕ' da xrláta-  
 je.  
 4 Dxulaba lazreĕ' ca naca da caleĭa gunĕ' gate dĕ' naga  
 dxate'.  
 Xu'e neza da quebe naca neza chawe'.  
 Quebe dxecuídenĕ' da caleĭa.  
 5 Xrana' Dios, zrentĕ naca xel-la' dxexache lazre' chiu'  
 da dxezrintĕ na xabáa,  
 na' dxezrintĕ lu beuj xel-la' li lazre' chiu'.  
 6 Da xrlátaje chiu' naca na ca tu xi'a zren chiu',  
 na' ca dxuchi'u naca na ca tu nísadau' sítujĕ.  
 Xrana' Dios, tu dxuxúezquezu' bĕnneache, ne bĕ  
 xixre' ca'.  
 7 Xrdantĕ naca xel-la' dxexache lazre' chiu', Dios.  
 Cheĕ ĭĕ' na' dxuluxrĕn lazre' bĕnneache Lue' ca dx-  
 elún  
 bedxuj dxé'enedu ca' dxelexezraba' zran xrila bedx-  
 uj.  
 8 Welélajquezneĕ' cheĕ da dĕĭeĕ lizru',  
 na' Lue' gunézruju' xelé'aje' da naca ca tu xegu da  
 naca na da dxezaca ba lazru' Lue'.  
 9 Naga zu' Lue' zua beaj naga dxalaj nisa da dxunna  
 na

xel-la' nabán.  
 Lu xel-la' naxaní' chiu' walé'entu' da naca lení'.  
 10 Bexache lazre' benne' ca' zaj núnbe'e Lue',  
 ne bzua chee benne' li lazre' ca' da xrlátaje chiu'.  
 11 Quebe gu'u lataj tábaga benne' dxucá'ana szren  
 cuina neda',  
 ne quebe gutá benne' dxun da calela neda'.  
 12 Xeajlechaze benne' ca' dxeluné' da zrinnaj.  
 Lue' benu' xeajlechaze benne' ca', na' quebe gaca  
 xelexasé'.  
**37** Quebe su' stébe ne chee da dxelún benne' ca'  
 dxeluné' da calela,  
 ne quebe se lazru' da zaj nápalé'e benne' dxeluné' da  
 zrinnaj,  
 2 lawe' da xeledé chee benne' ca' ca dxaca chee  
 xixre'du ca',  
 na' gaca chee benne' ca' ca dxaca chee xixre' da  
 nadxugu,  
 dxebizre na.  
 3 Bxren lazre' Xránadxu Dios, ne ben da xrlátaje,  
 na' súaquezu' lu xezr la xu, ne sí'quezu' ba neza da li.  
 4 Bezaca ba lazre' nen Xránadxu,  
 na' Lē' gúnnaqueze' chiu' da dxezá lazru'.  
 5 Bzua cuinu' lu na' Xránadxu,  
 ne bxren lazre' Lē', na' Lē' gune' ca da dxenabu'.  
 6 Gulé'ene' da xrlátaje chiu' ca tu xel-la' naxaní',  
 ne da li lazre' chiu' ca lawe' zra.  
 7 Guzúa zrize lau Xránadxu, ne guleza lazre Lē'.  
 Quebe su' stébe ne chee benne' dxezi'e ba neza,  
 bénnea' dxúnqueze' da calela.  
 8 Bsan xel-la' xichaj zra'a, ne quebe cuídenu'.  
 Quebe sa lazru' bi xusacu' benne' ca' dxeluné' da  
 calela,  
 9 lawe' da guzría xi' Dios benne' ca' dxeluné' da calela.  
 Benne' ca' dxelebeza lazre' Xránadxu, gaca chee' xezr  
 la xu.  
 10 Chadite te chee benne' ca' dxeluné' da calela.  
 Le'enu' lizre lataj benne' ca', san québedxa zaj zre'e  
 na'.  
 11 Benne' dxexruj lazre' ca' gaca chee' xezr la xu,  
 na' xelexezaca ba lazre' lu xel-la' dxebeza zri lazre'  
 zrente.  
 12 Benne' dxelún da calela dxelilaj lazre' bi xeluné'  
 chee benne' xrlátaje,  
 ne lu xel-la' dxelezá'a chee' xelagu lazxa benne' ca'.  
 13 Xránadxu Dios guzrízrequeze' chee benne' ca' dx-  
 eluné'  
 da calela  
 lawe' da nézene' ba za zra cheajsé chee benne' ca'.  
 14 Benne' dxeluné' da zrinnaj dxelebéaje' xia chee',  
 ne dxuluzé' xaga nalá xéche'ze chee',  
 chee' xuluzría xi'e benne' xache' ca', ne benne' dxelex-  
 azrje',  
 chee' xelúti'e benne' ca' dxeluné' da li lazre'.  
 15 Xia nalá chee benne' ca' chaze na lu lazrdáuqueze',  
 na' gáchajqueze xaga nalá xéche'ze chee'.  
 16 Cháwedxa naca da du da de chee benne' xrlátaje  
 ca da gunní'a da zaj napa zánete benne' dul-la ca',

17 lawe' da welátequeze ni'a na' benne' dxeluné' da  
 zrinnaj.  
 Xránadxu ná'queze dxuxúe' benne' xrlátaje ca'.  
 18 Nunbea Xránadxu ca zaj naca zra xelezúa benne'  
 du lazre' ca',  
 na' da zaj napa benne' ca' xelezúa na chadía chacan-  
 na.  
 19 Quebe xelexedué'ene' gate quebe dxaca chawe'  
 chee  
 bénneache,  
 na' lu zra chee gubina' gata' da xelawe'.  
 20 Xelebía xi' benne' dxeluné' da zrinnaj,  
 na' benne' ca' dxeledábaga' Xránadxu,  
 ca dxaca chee xiaj xixre' ca'.  
 Xeledé chee', ne xelexeniti'e ca zren chee xi'.  
 21 Benne' ca' dxelún da calela tu da dxelenabe' tu  
 chí'idauze,  
 ne quebe dxuluxunézruje' na,  
 na' benne' xrlátaje dxexache lazre' le', ne dxunézruje'  
 chee'.  
 22 Benne' ca' dxelé'e Xránadxu le' chawe', gaca chee  
 benne' ca' xezr la xu,  
 na' benne' ca' quebe dxelé'ene' chawe', xelebía  
 xí'queze'.  
 23 Da dxelún benne' xrlátaje ca' zaj naca na da ble'e  
 Xránadxu le', na' dxelé'ene' cháwedau' ca da dxeluné'.  
 24 Gate dxeleajchaze benne' xrlátaje ca' quebe chea-  
 jlechaze'  
 tu chí'ize lawe' da nuxru Xránadxu na' benne' ca'.  
 25 Benne' cuide' guca', ne na'a ba gúxrua',  
 ne cabata' ble'eda' tu benne' xrlátaje gusán Dios le',  
 na' quebe xeledá zri'ine zre sue' xelebéaje' guna'.  
 26 Benne' xrlátaje nigá tu dxexache lázrezqueze',  
 ne dxunézruje' bi dxexazrje nu benne',  
 na' zri'ine zre sue' zaj naque' da ba neza chee' bén-  
 neache.  
 27 Québedxa gunu' da calela, san ben da xrlátaje,  
 na' gaca bánquezu' chadía chacanna,  
 28 lawe' da nazrí'i Xránadxu da naca li lazre',  
 ne quebe dxusané' benne' zaj de'e Lē'.  
 Chadía chacanna tu guxúezqueze' benne' ca',  
 san guzría xi'e xrtia ljwezre benne' ca' dxeluné' da  
 calela.  
 29 Benne' xrlátaje ca' gaca chee' xezr la xu nigá,  
 na' xelezrá'queze' chadía chacanna lu xezr la xu.  
 30 Benne' xrlátaje dxuchálajqueze' da naca sina,  
 na' ca dxuchi'e naca na xrlátaje.  
 31 Da nadxixruj bea Dios tu xú'uzqueze na xichaj lázr-  
 dawe'.  
 Chee le' na' quebe cheajchaze bénnea'.  
 32 Benne' wen da zrinnaj dxenné'e benne' xrlátaje,  
 ne dxuné' ba xuzre guti'e le'.  
 33 Quebe gusán Xránadxu le' lu na' benne' wen da  
 calela na',  
 ne quebe guzría xi'e le' gate dxuchi'e chee'.  
 34 Guleza lazre' Xránadxu, ne ben ca da ba gunné',  
 na' Lē' chísaqueze' Lue' chee gaca chiu' xezr la xu  
 nigá.

Gate xelebía xi' benne' dul-la ca', na' lé'enu' na.  
<sup>35</sup> Ble'eda' tu benne' wən da zrinnaj, nagá'ane'  
szrentę,  
na' guxánlę'ę da dę cheę' ca dxegula tu xaga zrentę.  
<sup>36</sup> Na' gudé cheę', na' québedxa zuę' na'a.  
Bexílaja' lę', san quebe nu bezrelda'.  
<sup>37</sup> Blaba lazre' ca naca cheę benne' li lazre',  
ne gunná' benne' xrlátaje  
lawe' da naga cheajsę gaca tu da ba neza cheę  
benne'  
dxebeze' zri lazre'.  
<sup>38</sup> Benne' dxelunę' da calęla xelebía xí'queze'.  
Quebe nu cha' xrtia ljwezre benne' dxelunę' da zrin-  
naj.  
<sup>39</sup> Xránadxu Dios guseláqueze' benne' xrlátaje ca',  
na' Lę' gutipe' lazre' benne' ca' lu zra cheę da stębe.  
<sup>40</sup> Xránadxu Dios gácalęne' lę', ne guselé' lę'.  
Guselé' lę' lu na' benne' ca' dxelunę' da calęla,  
na' gunę' gaca chawe' cheę' lawe' da buluxrén lazre'  
Le'.  
**38** Xrana' Dios, quebe til-lu' neda' lu xel-la' dxezrá'a  
chiu'.  
Quebe gudéu' neda' da ba xa' lu xel-la' snia chiu',  
<sup>2</sup> lawe' da belúe xaga nalá xéche'ze chiu' neda',  
na' bę na'u neda'.  
<sup>3</sup> Quebe bi chawe' zua bęla' dxen chia' lawe' da dx-  
ezra'u neda',  
ne quebe zaj zua zrita xu'a cháwedau' lawe' da nuna'  
dul-la.  
<sup>4</sup> Ca naca da zrinnaj da nuna' ba zria cháqueze na  
xíchaja'.  
Zaj naca na chia' ca tu xua' zí'ilę'ę.  
<sup>5</sup> Wę' da zaj zria bęl-la' dxen chia' ba dxelelá na,  
ne ba dxeluzru na,  
da na' dxaca chia' lawe' da bęna' da calęla.  
<sup>6</sup> Nucache lawa', ne dxexedué'elę'ęda',  
ne dxebezre xacha' te zra chizrela,  
<sup>7</sup> lawe' da ca naca bęl-la' dxen chia' dxelá na,  
ne quebe bi chawe' zua bęla' dxen chia'.  
<sup>8</sup> Nate ni'a na'a, ne dxéqueda' ba naxúzrujne zrita  
xu'a.  
Dxebezre lazra' lawe' da zua stębe lázrdawa'.  
<sup>9</sup> Xran, ca naca da dxezá lazra' zaj zua na nen Lue',  
na' da dxebezre lazra' dxelé'equeznu' Lue'.  
<sup>10</sup> Dxatę lázrdawa', ne ba bedú lazra',  
ne québedxa dxelé'eda' cháwedau'.  
<sup>11</sup> Dxelexebiga ljwezra', ne le sa' ljwezra' ca' zítu'la  
nę cheę xízrawę' chia',  
na' benne' walír chia' ba belexecuase' zítu'la.  
<sup>12</sup> Benne' ca' dxelaca lazre' xelútię' neda' dxuluzalę'  
xralaj,  
na' benne' ca' dxelúe lazre' bi gaca chia' dxelenné'  
chia'  
wabía xi'a, ne tu zaj zúaze' bi xulusaque' neda'.  
<sup>13</sup> Neda' quebe dxenda' ca dxaca cheę tu benne'  
cuezru,  
ne naca' ca tu benne' quebe dxaca nne',  
benne' quebe dxexrá dxu'ę.

<sup>14</sup> Naca' ca tu benne' quebe dxenne',  
bénnea' quebe dxexechebę',  
<sup>15</sup> lawe' da dxebeza lazra' Lue', Xrana' Dios.  
Lue' xechębu' waláz chia', Xrana' Dios.  
<sup>16</sup> Gunnia': Quebe gu'u lataj xelebene' nę cheę da dxa-  
ca chia'.  
Gate dxeajchazia', quebe gu'u lę' lataj xulucá'ana  
szren cuinę'  
lawe' da zua' lu da baxache'.  
<sup>17</sup> Ba zua' cheajcházia',  
ne tu dxelázqueze dutę bęl-la' dxen chia'.  
<sup>18</sup> Cheę lę' na' xrúalepequeza' da calęla da bęna',  
ne xewine lazra' ca naca dul-la da nabaga'.  
<sup>19</sup> Benne' ca' dxeledábage' neda' zaj zúaqueze'  
chawe',  
ne zaj naque' benne' wal-la.  
Zaj naxánlę'ę benne' ca' dxelecuídenę' neda',  
ne quebe bi dę da dxagu na zria chia' lau lę'.  
<sup>20</sup> Benne' ca' dxelunę' da calęla cheę benne' ca'  
dxelunę' da xrlátaje  
zaj naque' benne' dxeledábage' neda' lawe' da  
tu dxúnzqueza' da xrlátaje.  
<sup>21</sup> Quebe gusanu' neda', Xrana' Dios.  
Dios chia', quebe su' zitu' naga zua'.  
<sup>22</sup> Bęn ba xuzre gácalęnu' neda', Xran.  
Nacu' Benne' dxuselé' neda'.  
**39** Neda' gunnía': Guxúe xanne' cuina' cheę quebe  
guna' dul-la  
lu da guchálaja'.  
Tu guxúe xánnezqueza' ca da guchálaja' dxácatę na'  
zua benne' wən da calęla naga zua'.  
<sup>2</sup> Guzúa' zrize ca tu benne' quebe dxaca nnie',  
ne québequeze bchálaja' da xrlátaje,  
na' bzáladxa xel-la' dxudía chia'.  
<sup>3</sup> Guca lázrdawa' ca tu da dxala,  
na' lu da dxulaba lazra' guca na ca tu xi'.  
Na' gunaba' lau Xránadxu, gunnía':  
<sup>4</sup> Xran, ble'e neda' da gaca chia',  
ne ájatę zra gaca bana'.  
Bzėjni'i neda' chaditę nazruzre gatia'.  
<sup>5</sup> Nunu' chia' sua' bábaze zra,  
na' iza chia' québequeze bi naca na lau Lue'.  
įDa líqueze quebe bi zaj naca zra cheę xúgutę bęn-  
neache!  
<sup>6</sup> įDa líqueze zaj naca bęnneache ca tu zrúl-laze!  
įDa líqueze dácheze naca zaj dxe' bęnneache gunne  
xue  
cheę xel-la' nabán cheę!  
įDxulucúdię' xel-la' gunnía', ne quebe zaj nézene'  
nu cheę gaca na!  
<sup>7</sup> Na'a, Xran, įbízraqueze cueza lazra'?  
Tuzu' Lue' dxal-la' cueza lazra'.  
<sup>8</sup> Bselá neda' lu xúgutę da zrinnaj da bęna'.  
Quebe gu'u lataj benne' xala ca' xelún lę' chia'.  
<sup>9</sup> Guzúa' zrize, ne quebe bi bchálaja'  
lawe' da Lué'queze bęnu' guca caní chia'.  
<sup>10</sup> Becá'a xízrawę' da bzu' lu bęla' dxen chia'.  
Bache gatia' lu da dxusacu' neda'.

11 Dxudéu' ba xa' tu benne' ba nun dul-la  
cheę dxuzéajni'inu' le',  
ne ca dxun béadu dxuteba' ladxe' dxuzría xi'u  
da nazrí'idxe bēneea'.  
¡Da líqueze quebe bi zaj naca zra cheę xúgutę bēn-  
neache!

12 Bene da dxenaba' lau Lue', Xran,  
ne bze naga ca da dxuláwizra' Lue'.  
Quebe su' zrize gate zua' dxebezra' lau'  
lawe' da naca' lau Lue' ca tu benne' dxedaze', ne  
quebe de lize',  
ne naca' ca tu benne' quebe de xęzr la xu cheę'  
ca gulaca xra xrtawa' ca'.

13 Bsan neda' cheę gata' lataj xezí' le dipa'  
nédxula ca xexá'a xenitia'.

**40** Nen dutę xel-la' zren lazre' chia' guleza lazra'  
Xrana' Dios,  
na' bze nague' chia', ne benne' da gunábeda' Le'.  
2 Bebéaje' neda' ca tu lu xędxu situj, ne lu da naca  
ca guna' guzra'.

Bzuę' ni'a ca tu lu xiaj xre, ne begu'e neda' neza li.

3 Beņe' dxul-la' tu da cube da naca na da dxue lá'ana'  
Xránadxu.

Benne' zantę xeledé'ene' da nigá dxunę', na' xelezre-  
be' Le',

ne xuluxrén lazre' Xránadxu Dios.

4 Ba neza zrentę naca na cheę bēneea' dxuxrén lazre'  
Xránadxu Dios,  
ne quebe dxunę' ca dxelún benne' ca' dxulucá'ana  
szrenę'

bedáu' xiaj xaga ca',  
ne quegá ca dxelún benne' ca' dxelún lazre'.

5 Da zantę beņu', Xrana' Dios, da dxebánentu',  
ne ca zaj naca da dxezá lazru' gunu' cheęntu'  
quebe gaca guláabantu' lau Lue'.

Chela nu guzenda' ca zaj naca na,  
ne che guchálaja' cheę na, quebe baben tu na.

6 Quebe dxezaca ba lazru' béadu ca' gutia' lau',  
u da gunna' Lue',

ne quebe gunabu' béadu ca' guzézxea' lau', u dxen  
cheę

béadu ca' da guzúa' lau' ne cheę dula nabaga',  
san gusalaju' naga' cheę xenda' chi'u.

7 Nadxa gunnía': Guná' xque, za'a neda'.

Lu xiche lá'azxa naxúaj na ca naca chia'.

8 Dxezaca ba lazra' guna' ca da dxaca lazru' Lue', Dios  
chia',

na' da nadxixruj be'u zua na lu xichaj lázrdawa'.

9 Ca naca da xrlátaje chiu' ba bzenda' bēneache  
naga zaj nazraga chiu' bēneache zantę.

Gunná' xque, quebe guzúa' zria',  
ca nézqueznu' Lue', Xrana' Dios.

10 Quebe bcácheza' ca da xrlátaje chiu' lu lázrdawa'.

Ba bchálajqueza' ca naca xel-la' li lazre' chiu',  
ne ca dxuseláu' bēneache.

Quebe guzúa' zri ca naca xel-la' dxexache lazre' chiu',  
ne ca naca da li chiu' ládujla benne' zantę zaj  
nazrage' chiu'.

11 Xran, quebe chenu' xexache lazru' neda'.  
Xel-la' dxexache lazre' chiu', ne da li chiu'  
tu dxelácalęzqueze na neda'.

12 Lawe' da ba guléchajle'ę da caleļa ca' neda',  
da caleļa ca' da ba nuna' zaj zria na neda',  
na' quebe gaca nna'a naga zu'.

Zaj naxándxu na ca zaj naca xicha xíchaja', na' dxedú  
lazra'.

13 Dxenaba' lau', Xran, guseláu' neda'.

Xran, beņ ba xuzre gácalęnu' neda'.

14 Beņ xelexedué'e, ne xeleque zréaje  
xúgutę benne' ca' dxelaca lazre' xelútię' neda'.

Beņ xeajxaca bzébela, ne xelexedué'e

benne' ca' dxelezá lazre' xelunę' chia' da caleļa.

15 Beņ xeleque zréaje' lawe' da belún zréaje' neda'  
benne' ca' gulé'e neda': "E, e."

16 Beņ xeledé, ne xelezúe lu da ba neza xúgutę benne'  
ca'

dxelebeze' Lue',

ne beņ xelennáqueze benne' ca' zaj nazrí'ine' Lue',  
weselá cheę'.

Xelenné': "Xegá'ana szrénqueze Xránadxu."

17 Láqueze sua' neda' lu da ba xa', ne lu da baxache',  
guxúequeze Xrana' Dios ájala gunę' chia'.

Nacu' Benne' dxácalęne' neda', ne Benne' weselá  
chia'.

Dios chia', quebe chenu' gácalęnu' neda'.

**41** Ba neza zrentę naca na cheę bēneea' dxe'e  
gunne xue  
cheę benne' xache'.

Lu zra gate zuę' lu da stebe, guselá Xránadxu bēn-  
nea'.

2 Xránadxu guxúequeze' le', ne gunézruje' le' xel-la'  
nabán.

Gaca na tu da ba neza zrentę cheę bēneea' lu xęzr la  
xu nigá,

na' quebe gudé Xránadxu le' lu na' benne' ca' dx-  
eledábague' Le'.

3 Xránadxu Dios gúxruqueze' le' gate zúe' lu xel-la' dx-  
udía.

Gun chawę' dutę da naque' gate na' quebe chawe'  
zuę'.

4 Gunnía': Xrana' Dios, bexache lazre' neda'.

Bexún bēne'du xu'a lawe' da beņa' dul-la gate  
gudábaga' Lue'.

5 Benne' ca' dxeledábague' neda' dxelenné' chia' da  
caleļa.

Dxelenne': "¿Bátala gate benne' nigá, ne xenite le'?"

6 Che xedajlenné'e neda', dxelún lazre'.

Dxelebéaje' neda' dizra' cheę bi da caleļa gaca xelen-  
né' chia',

na' gate dxelixedxúaje', na' dxelextrúe' dizra' na'.

7 Gate dxelezraga benne' dxelecuídenę' neda',  
na' tu dxelennézqueze' chia'.

Tu dxuluchálajle'zqueze' ljwezre' chia' neda' da naca  
da caleļa, dxelenné':

8 "Ba guxú'e tu xízrawę' da gute na le',  
ne québedxa xexásaqueze' ga na' de'."

<sup>9</sup> Cá'anqueze bènea' guleza zri lazre' nen neda',  
bènea' bxren lazra', na' gudágulequeze' neda',  
benne' nigá dxedábagageze' neda'.

<sup>10</sup> Lue', Xrana' Dios, bexache lazre' neda',  
ne bēn xexasa' neda',  
na' xunézruja' benne' ca' ca da dxal-la' xezezí'e.

<sup>11</sup> Caníqueze nezda' ba bēna' da dxezaca ba lazru'  
Lue',  
chee quebe bi xebebēle benne' ca' dxeledábage' ne-  
da'.

<sup>12</sup> Ca naca chia' neda', ba bēxruquezu' neda' lawe' da  
naca' du lazre',  
ne ba bzu' neda' lau Lue' chadía chacanna.

<sup>13</sup> ¡Gaca ba Xránadxu, Dios chee benne' Israel ca'  
gaxuane iza, ne chadía chacanna!  
¡Ca'an naca na, ne ca'an gaca na!

**42** Ca dxun bzrina' xixre' dxebezre xa'aba' lawe' da  
dxebíleba' nisa,  
ca' dxuláwizra bēne'du xu'a da naca chiu', Dios.

<sup>2</sup> Dxebile bēne'du xu'a da naca chiu', Dios ban.  
¿Bata gaca xida' chee guzúa cuina' lau Dios?

<sup>3</sup> Nisa xuzru xiaj lawa' guca na ca xeta dxawa'  
te zra chizrela,  
dxácatē na' gulé'e neda' xúgutē zra: "¿Ga na' Dios  
chiu'?"

<sup>4</sup> Dxajsá lazra' chee da caní, ne dxebezre lazra'.  
Dxajsá lazra' ca guxá'alēna' benne' zan ca',  
ne nuzúa' lawe' lē' lizre Dios.

Tu dxúl-lazquezdxu lu xel-la' dxebé,  
ne dxue lá'anaquezdxu Dios lu laní.

<sup>5</sup> ¿Bizr chee na' dxate ni'a na'u, bēne'du xu'a?

¿Bizr chee na' zu' stēbe lu xichaj lázrdawa'?  
Guleza lazre' Dios lawe' da güe lá'anaqueza' Lē' da xu-  
la.

Naque' Benne' dxuselé' neda', ne Dios chia'.

<sup>6</sup> Dios chia', ba nate ni'a na' bēne'du xu'a  
lu xichaj lázrdawa'.

Chee lē na' dxajsá lazra' chiu' nigá zua' lu xēzr la xu  
xechalá'a xēgu Jordán,  
ne lu xēzr la xu chee benne' Hermón naga zua xi'a  
Mizar.

<sup>7</sup> Ca schaga da dxun nísadau', ne da dxun tu bdua  
nisa

zren chiu', Dios,  
ca' dxeque bēne'du xu'a lawe' da dxusaca zi' na'u ne-  
da'.

<sup>8</sup> Te zra xexache lazre' Xránadxu neda',  
na' chizrela tu gúl-lazqueza' da güe lá'ana' Lē',  
ne tu guchálajlezqueza' Dios,

Bēne'a' dxunne' xel-la' nabán chia'.

<sup>9</sup> Xapa' Dios: Lué'queze dxucu'uju' neda'.

¿Bizr chee na' nal-la lazru' neda'?

¿Bizr chee na' dxewí'ine lazra' lawe' da dxusaca zi'  
benne' dxedábage' neda'?

<sup>10</sup> Ca tu benne' dxelé'e zrita xu'a, ca' dxelún benne' ca'  
chia', dxelún lē' chia'.

Tu zra tu zra dxelenné' chia': "¿Ga na' Dios chiu'?"

<sup>11</sup> ¿Bizr chee na' dxate ni'a na'u, bēne'du xu'a?

¿Bizr chee na' zu' stēbe lu xichaj lázrdawa'?  
Guleza lazre' Dios lawe' da güe lá'anaqueza' Lē' da xu-  
la.

Naque' Benne' dxuselé' neda', ne Dios chia'.

**43** Bchi'a chia', Dios, ne ble'e lau naca' xrlátaje.

Bselá neda' lu na' benne' ca' dxuluzúe' Lue'

chalá'ala,  
ne lu na' benne' ca' dxezezí xē'e, ne dxelunē' da zrin-  
naj.

<sup>2</sup> Nacu' Lue' Dios chia', ne dxuzé chuchu' neda'.

¿Bizr chee na' nusán lazru' neda'?

¿Bizr chee na' dxewí'ine lazra' lawe' da dxusaca zi' ne-  
da'

benne' ca' dxeledábage' neda'?

<sup>3</sup> Gusel-la chia' xel-la' naxaní' chiu', ne da li chiu'.

Da caní xulusí na neda' neza.

Xeleché na neda' lu xi'a lá'azxa chiu', ne naga zúaque-  
zu' Lue'.

<sup>4</sup> Chu'a naga zua lucugu chee Dios.

Chu'a lau Dios, Bēne'a' dxunē' dxebeda', na' zua' lu  
da ba neza.

Güe lá'ana' Lue' nen da zríadi'i na du, Dios chia'.

<sup>5</sup> ¿Bizr chee na' dxate ni'a na'u, bēne'du xu'a?

¿Bizr chee na' zu' stēbe lu xichaj lázrdawa'?

Guleza lazre' Dios lawe' da güe lá'anaqueza' Lē' da xu-  
la.

Naque' Benne' dxuselé' neda', ne Dios chia'.

**44** Dios, bache bēnentu' lawe' da buluzén Xra  
xrtáuntu' netu'

ca naca da bēnu' lu zra chee', da naca na iza ba  
guledé na.

<sup>2</sup> Bzria xi'u bēneache xēzr la xu xezícadxa ca' lau  
xra xrtáuntu' ca', na' bzu' lē' xlatay benne' ca'.  
Bsaca zi'u benne' xēzr la xu ca', san bzua chachu'  
bēneache chiu' lu xēzr la xu nigá.

<sup>3</sup> Xra xrtáuntu' ca' quebe gulezi'e xēzr la xu nigá  
nen xia nalá cheéqueze',  
Ne quebe buluselá cuine' nen xel-la' wal-la da zaj  
napē'.

Lue' bseláuquezu' lē' nen xel-la' waca chiu',  
ne nen xel-la' wal-la chiu',  
ne nen xel-la' naxaní' chiu', lawe' da bezaca ba lazru'  
nen lē'.

<sup>4</sup> Dios, nacu' wenná bea chia'.

Bselá zri'ine zre sua Jacob.

<sup>5</sup> Nen xel-la' waca chiu' xebéajntu' benne' ca'  
dxeledábage' netu'.

Lu Lau' Lue' guchuchuj guléajntu' benne' ca'  
dxeledábage' netu'.

<sup>6</sup> Quebe guxrén lazra' xaga nalá xéche'ze chia',  
ne quebe guselá xia chia' neda'.

<sup>7</sup> Lue' bcu'uju' netu' lau benne' ca' dxeledábage' ne-  
tu',

ne bēnu' belexedu'e benne' ca' belexedu'e netu'.

<sup>8</sup> Ne chee Dios tu súazquezentu' lu da ba neza,  
na' chadía chacanna güe lá'anantu' Lau' Lue'.

<sup>9</sup> Nusán lazru' netu', ne nunu' dxexedu'éntu',

ne quebe dxéajlenu' benne' cheentu' ca' dxjaque' wedil-la.

<sup>10</sup> Benu' buzrúnnujntu' lau benne' ca' dxeledábague' netu',

na' benne' ca' dxelecuídenę' netu' gulegüę' ca naca da ná pantu'.

<sup>11</sup> Bdeu' netu' ca zřila' ca' lu na' benne' xelútię' netu', ne ba beše dínnaju' netu' ládujla benne' xęzr la xu ca'.

<sup>12</sup> Bdéu' netu', benne' chiu' ca' cá'aze, ne quebe bi guzi'u.

<sup>13</sup> Dxunu' dxelún la benne' walızre cheentu'.

Benne' zaj naxéchaję' netu' dxelún lę', ne dxuluzrıze' cheentu'.

<sup>14</sup> Nuzú' netu' ca tu da dxelenná benne' xęzr la xu ca' naca na da baxácheleę.

Xúgute' benne' dxelelé'ene' netu' dxulutá xíchaję', ne dxelexebánene' ca da baxache' ná cantu'.

<sup>15</sup> Tu zra tu zra tu dxexedu'ézquezda', ne tu zúazqueza' lu da stébeleę

<sup>16</sup> lawe' da dxelenné' schanni' chia', ne dxuluzúę' neda' chalá'ala,

ne dxulutíl-lalę neda' benne' ca' dxeledábague' neda', nen benne' ca' dxelexebeaj lazre' neda'.

<sup>17</sup> Xúgute' da caní dxaca cheentu', ne quebe ne gal-la lazrentu' Lue',

ne quebe ne guzúantu' chalá'ala xel-la' wezřia chiu'.

<sup>18</sup> Quebe ne gusán lázrentu' Lue',

ne quebe ne xecuásantu' lu da gunná be'enu' netu'.

<sup>19</sup> ¿Bizr cheę na' nuzú' netu' chalá'ala tu lataj cheę be snia ca',

ne nuzú' netu' naga xelaze gátentu'?

<sup>20</sup> La gul-la lázrentu' La Dios cheędxu, ne bca'ana szrentu' tu dios da quebe bi zaca,

<sup>21</sup> ¿quebe dxal-la' zra'a Dios netu' ne cheę da nigá? Lę' nézquezne' da zaj zua lu xichaj lázxdau bėn-

neache.

<sup>22</sup> Lawe' da ná cantu' chiu', tu zra tu zra ba zaj zúatequeze' xelútię' netu'.

Zaj nune' netu' ca zřila' ca' ba zua xelútię'-ba'.

<sup>23</sup> ¡Bebán, Xran!

¿Bizr cheę na' dxasiu'?

¡Bebán!

¡Quebe su' zitu' tu chí'ize!

<sup>24</sup> ¿Bizr cheę na' nucache cuinu',

ne quebe dxeque be'enu' ca dxezaca zí'intu', ne ca dxuluchine benne' ca' netu'?

<sup>25</sup> Ba nate ni'a na' bėnne'du xú'untu', ne dxea-jcházetęntu' lu xu,

na' ba dé'tęntu' sudxú'ala lu xęzr la xu.

<sup>26</sup> ¡Guxasa, gúcale' netu',

ne dutę xel-la' dxexache lazre' chiu', bselá netu'!

**45** Xu'u lázrdawa' tu dizra' xrtante', na' gúl-laqueza' tu da naca cheę Wenná Bea. Gúl-laqueza' tu da bzuaj tu benne' dxuchálajleę cháwedau'.

<sup>2</sup> Nacu' xrtánle'ędxa ca xúgute' bėnneache.

Dxezilę'ęntu' ba neza cheę dizra' dxuchálaju',

lawe' da nucá'anaqueze Dios Lue' cháwedau' tu chí'izqueze.

<sup>3</sup> Bda' xia chiu' dxu'a lę'u, Lue', benne' wal-la, lu dutę xel-la' szren chiu', ne xel-la' dxenná bea chiu'.

<sup>4</sup> Lu xel-la' szren chiu' chepe bánquezu'.

Bchine dizra' li, ne xel-la' dxexruj lazre', ne da xrlátaje, na' guzėjai'ni' Cuinu' da zři'a ca'.

<sup>5</sup> Zaj naláleęę xaga nalá xéche'ze chiu' ca',

da xelute na benne' xęzr la xu ca' lau Lue', ne cheajlechaze na lu lázrdau benne' ca' dx-

eledábague' Lue'.

<sup>6</sup> Lataj blau naga dxe'u, Dios, naca na da chadía channa,

ne súatequeze na.

¡Xrlátaje naca ca dxenná be'u!

<sup>7</sup> Nazři'inu' da naca xrlátaje, ne dxecuídenu' da caleła.

Cheę lę na' ba nuzúa Dios chiu' Lue' xlátaju',

naga dxebéle'ędxenu' ca le sa' ljwezru' ca'.

<sup>8</sup> Dxelá zixre zra lanu' nen xala da naca na nizre xaga, ne xiaj, da ca' dxelelá na zixre.

Lu xu'u lızru' da zácaleęę na dxuluzúę' Lue' lu da ba neza.

<sup>9</sup> Bi nu'ula cheę wenná bea ca' zaj zúabe' ládujla nu'ula

chiu' ca' zaj naque' blaudxa.

Chalá'a xabęla chiu' dxe' nu'ula gácabe' zru'ulu' nácube' oro

da za na xęzre Ofir.

<sup>10</sup> Bene, nú'uladau', ne gunná' xque, ne bze naga da nnia':

Bzala lazru' lazřiu' ne lızre xrau',

<sup>11</sup> na' benne' wenná bea sa lazre' xel-la' xrtan chiu'.

Bzexruj lazru' lau lę' lawe' da naca lę' xranu'.

<sup>12</sup> Xelelá' nu'ula xęzre Tiro lau lue', zaj nu'ę da xelunne' chiu',

na' xelenaba benne' gunnía' ca' gunu' tu culuén cheę'.

<sup>13</sup> Xrtanle'ęę naca bi nu'ula cheę wenná bea lu xu'u naga zue'.

Zra lánabe' nazí' lechítaje na oro.

<sup>14</sup> Xeleché'ę-be' lau wenná bea, nácube' zra lánabe' da núaleęę lechítaje na.

Nu'ula wėgu'du ca' chjácabe' cuzru lębe'.

Nu'ula caní, nu'ula ljwézrebe' xuluzúabe' lawe' lue'.

<sup>15</sup> Lu dutę xel-la' dxebe', ne lu da ba neza xeleché'ę-be',

na' xelú'ube' lu xu'u lızru', wenná bea.

<sup>16</sup> Waláz cheę xra xrna'u xelehezúa zři'inu',

bi ca' gunu' xelenná beabe' du gabí'i xęzr la xu.

<sup>17</sup> Guna' cheajlesá lazre' xúgute' bėnneache lau' lue'.

Cheę lę na' xelúe lál'ana bėnneache lue' chadía channa,

ne gaxuane iza.

**46** Dios naque' Benne' dxuxúę' dxi'u, ne dxunę' dxi'u

benne' wal-la.

Zúatequeze' gácaleņę' dxi'u gate dxededxu xel-la' zi'.

<sup>2</sup> Cheę lę na', quebe zřėbedxu lácala xru' xęzr la xu nigá

na' cheajlechaze xi'a ca' lu nísadau',  
 3 ne lácala xeajxruza zren cheę nísadau' xuluninne na,  
 ne dxelúnleę na schaga,  
 na' welezzízequeze xi'a ca' ne cheę da dxezrú'.

4 De tu xęgu da dxunna na xel-la' dxebé lu xęzre cheę  
 Dios,  
 ne lu xu'u lácaxa cheę Dios, Benne' nape' dutę xel-la'  
 szren.

5 Dios zuę' xęzre na', ne cabata' cuía xi na.  
 Dxanísise' xidę' gácalęę' bénneache zaj zře'ę xęzre  
 na'.

6 Dxelezzébeleę benne' xęzr la xu ca',  
 na' dxelezzize benne' cheę wenná bea ca'.  
 Dxennę Dios ca dxennę guziu', na' dxexuna xęzr la xu.  
 7 Dios, Bénnea' nape' dutę xel-la' waca, zúalęę' dxi'u.  
 Dios na' cheę Jacob dxucache chawe' dxi'u.

8 Le da lé'ele da ca' nun Xránadxu.  
 Le nna' ca naca da dxebánedxu da nune' lu xęzr la xu.

9 Dxebeque zrie' wedil-la da dxelaca du gabí'i xęzr la  
 xu.

Dxuzúzruje' da dxuzala na xaga nalá xéche'ze ca',  
 ne dxíchuję' xaga tuche' ca' cheę wedil-la,  
 na' dxuzezxe' da ca' zaj nachę' benne' wedil-la ca'.

10 Dxenná Dios: "Le sua zrize, ne le xúnbea naca' Dios.  
 Naca' szrendxa ca zaj naca xúgute cue' xęzr la xu.  
 Naca' szrendxa ca dutę xęzr la xu."

11 Dios, Bénnea' nape' dutę xel-la' waca, zúalęę'  
 dxi'u.

Dios na' cheę Jacob dxucache chawe' dxi'u.

**47** ¡Le capa na'le, le'e, xúgute bénneache!  
 ¡Le güe lácana Dios nen dutę xel-la' dxebé!  
 2 Dxa-la' zrębedxu Xránadxu, nape' dutę xel-la' szren.  
 Naque' Wenná Bea zren dxenná bé'ene' dutę xęzr la  
 xu.

3 Bzuę' benne' xęzr ca' zran ní'adxu.  
 Bzuę' dxi'u cheę nna be'edxu zánete cue' xęzr la xu  
 ca'.

4 Bequę'ę tu xęzr la xu da gaca na cheędxu,  
 Da naca tu xęzr la xu xrtante cheę zri'ine zre sua Ja-  
 cob,  
 benne' ca' nazrí'ine'.

5 Dzegüén Dios naga dxe'ę dxenná be'ę.  
 Dxelebezre luzu da dxulucuezre' gate dxegüén Xrá-  
 nadxu ga na'.

6 ¡Le gul-la da gaca ba Dios!  
 ¡Le gul-la!  
 ¡Le gul-la da gaca ba Wenná Bea cheędxu!  
 ¡Le gul-la!

7 ¡Dios naque' Wenná Bea dutę lu xęzr la xu nigá!  
 ¡Le gul-la cheę' nen dutę xel-la' dxéajni'i cheęle!

8 Dxe' Dios naga dxenná be'ę, lu lataj na' naca na  
 lácaxa.

Dxenná bé'ene' xúgute cue' xęzr la xu ca'.  
 9 Dxelezzraga benne' dxelenná bé'ene' xúgute cue'  
 xęzr la xu

tu zren nen bénneache cheę Dios cheę Abraham.  
 10 Benne' ca' dxelenná be'ę du gabí'i xęzr la xu  
 buludęę' xel-la' dxenná bea cheę' lu na' Dios.

Le' dxenná bé'ene' xúgute benne' wenná bea ca'.

**48** ¡Zrente naca Xránadxu!  
 ¡Naca cheę' güe lácana!ędxu Le'

ga naca lu xęzre cheę Dios cheędxu,  
 da dxe' na lu xi'a lácaxa cheę'!

2 Sión, da naca na xi'a cheę Dios, naca na sibe, ne xr-  
 tante.

Naca na xęzre cheę Wenná Bea zrente,  
 da dxunna na xel-la' dxebé dutę xęzr la xu nigá.

3 Dios ba blé'ene' dxucache chawe' dxi'u,  
 lu xu'u zaca ca' cheę xęzre cheę' na'.

4 Belezraga benne' wenná bea ca',  
 na' belelé'ę cheę xeledíl-lalęę' xęzre nigá,  
 5 na' gate belelé'ene' na, na' belexebánene'.

Belezzébe', na' buluzrúnnuje'.

6 Gulezzé'ę lu da stębe,  
 ne gulezúę' xel-la' dxudía ca dxaca cheę tu nu'ula  
 ba zua sanę' bidau'.

7 Gulaque' ca da ca' dxeledá lawe' nísadau' dxexrite  
 na  
 gate dxácale'e be' bduu' lu nísadau'.

8 Bendxu ca da ben Dios, na' na'a ba ble'edxu na,  
 ga naca lu xęzre cheę Xránadxu, nape' dutę xel-la' wa-  
 ca,

da naca na xęzre cheę Xránadxu Dios.  
 Le' guzúa chawe' xęzre nigá chadía chacanna.

9 Ga naca lu xudau' chiu' Lue', Dios  
 dxajsá lázredxu ca naca xel-la' zri'i lazre' zren chiu'.

10 Gáteteze na' dxelúe lácana bénneache Lue',  
 na' ca naca xel-la' szren chiu' dxezrín na  
 du gabí'i xęzr la xu.

Ca naca da xrlátaje dxenná be'u.

11 Xelebéle'ę bénneache zaj zře'ę Sión.  
 Xelebéle'ę bénneache zaj zře'ę xęzre ca' cheę Judá  
 ne cheę da dxuchi'u cheę'.

12 Le'e, bénneache cheę Dios, le chechaj dxu'a xęzre  
 na',

ne le gulaba ca zaj naca xu'u sibe ca',  
 da dxuluzę chacha na xęzre na'.

13 Le nna' xque ca naca ze'e zren naxechaj na xęzre  
 na'.

Le nna' xanne' ca zaj naca xu'u wal-la cheę na,  
 cheę guzenle bi cheęle ca naca xęzre na'.

14 Dios nigá nácaqueze' Dios cheędxu chadía chacan-  
 na.

Le' tu gulé'ezquezne' dxi'u neza.

**49** Le xen da nigá, le'e, benne' xúgute cue' xęzr la  
 xu.

Le guzé nágale, le'e, benne' dutę xęzr la xu,  
 2 le'e, benne' blau, ne le'e, benne' xezícaxa,  
 le'e, benne' gunní'a, ne le'e, benne' xache'.

3 Guchálajqueza' xel-la' sina,  
 ne guzéajni'ida' le'e da xu'u lázrdawa'.

4 Guzé naga' tu dizra' sina.  
 Gúl-laqueza' cheę tu da nagache,  
 ne quinnia' da zríadi'i na du çęn.

5 ¿Bizr cheę na' dxun na ba xen zreba' lu zra cheę da  
 stębe,

gate naxechaj da calela neda' da dxelún benne' dxeledábague' neda'?

6 Benne' ca' dxuluxrén lazre' da zaj de chee', ne dxulucá'ana szren cuine' lawe' da zaj nápalé'e.

7 Quebe xelezéquene' xelexá'awe' le sa' ljwezre', ne quebe gaca xulunézruje' Dios da guselá na le'

8 chee' tu xelaca bázqueze', ne chee' cabata' xeluzru bel-la' dxen chee' lawe' da zrentę naca da dxexa'u na xel-la' nabán chee' bėnneache,

ne cabata' seque' nu benne' quízruje' na.

10 Xelelé'ene' dxelátequeze benne' sina ca', ne xelúzruje' cáteze dxaca chee' benne' xala ca', ne chee' benne' lázrdau zide' ca', na' dxulucá'ane' xel-la' gunní'a chee' lu na' benne' xu-la ca'.

11 Dxeléquene' wazráqueze zri'ine zre sue' chadía chacanna,

na' xelexegá'ana lizre' chee' xelaca na chee' xúgute cuen

xrtia ljwezre',

na' dxelu'e la xęzr la xu chee' ca' ca zaj nazí láqueze'.

12 Quebe xelexegá'anatequeze bėnneache lu da ba lá'ana.

Zaj naque' ca be xixre' ca', be dxeláteba'.

13 Ca da dxelune' naca na da xálaze,

na' dxelexezaca ba lazre' xrtia ljwezre' ca' nen da dxe-lennaze'.

14 Zaj naque' ca tu cue' zrila' zjácaba' lataj ba xa', naga guxúe xel-la' gute leba'.

Benne' xrlátaje ca' xelenná bé'ene' benne' gunní'a ca' gate za' chaní',

na' xelebía xi' da ca' guta' chee',

na' lataj ba xa' gaca na naga tu xelezúazqueze'.

15 Dios xexá'awe' xel-la' nabán chia' lu lataj ba xa' lawe' da xeché'e neda' naga zúaqueze' Le'.

16 Quebe su' stębe gate nu benne' dxezrué'ene' xel-la' gunní'a,

ne gate dxune' lizre' da zácale'edxa,

17 lawe' da gate gatie' quebe bi xexu'e,

ne quebe chéajle xel-la' gunní'a chee' le'.

18 Lácala dxácatę naca banę' dxę cuine' zue' lu da ba neza zrentę,

na' dxelúe lá'ana bėnneache le' gate dxępe banę',

19 san chu'e naga zaj zra xra xrtawe' ca', ne cabátadxa lé'ene' xel-la' naxaní'.

20 Bėnnea' dxelapa bėnneache le' ba lá'ana san quebe bi dxéajni'ine' naque' ca be xixre' ca', be dxeláteba'.

**50** Ba gunné Xránadxu Dios, ne ba nutube' bėnneache

chee' dutę xęzr la xu,

benne' zaj zre'e naga dxalaj gubizra,

ne benne' zaj zre'e naga dxebía na.

2 Lu xi'a Sión, da naca na xrtánle'e ba bzani' Dios.

3 Xelá' Dios cheędxu, ne quebe sua zrie'.

Gálajqueze xi' lau Le',

ne gácale'e be' bdunu' da chechaj na Le'.

4 Xutúbequeze' benne' zaj zre'e xabáa na'ala,

ne benne' zaj zre'e xęzr la xu,

chee' guchi'e chee' bėnneache chee'.

5 Dxenné': "Le xutube benne' chia' ca', benne' ca' belune' tu xel-la' wezría nen neda' da buluzúa chúchue' nen dxen chee' béadu ca'."

6 Da zua xabáala gulé'e lau na naque' xrlátaje,

lawe' da naca Dios Benne' guchi'e chee' bėnneache.

7 Dxenné': "Le xen, bėnneache chia', na' guchálaja'.

Le guzé nágale, benne' Israel, na' nnia' da gagu na zria chee'e.

Neda', Dios, naca' Dios chee'e.

8 Quebe til-la' le'e ca naca béadu ca' bėtele lawa', ne ca naca béadu ca' bėzxele,

da zaj zúaqueze na lawa' neda'.

9 Quebe ca'a lu na'ale među ca', ne chivo biu ca', be nápaquezle

10 lawe' da zaj naca chia' xúgute be xixre' ca', ne zane gaxúa be xixre' zaj zra' lu xí'adu ca'.

11 Xu'u lu na'a xúgute be zua xrila,

ne naca chia' xúgute be zaj naca banba'.

12 Chela neda' dxeduna', quebe xapa' le'e ca' lawe' da naca chia' xęzr la xu, ne xúgute da de lawe na.

13 ¿Dxun na ba xen gawa' be'a' be'zre ca'?

¿Xí'aja' dxen chee' chivo biu ca'?

14 Le guzúa lau Dios da güe lá'anale Le'

ne le gunezruj ca da guchebe lázrele lau Dios szrentę.

15 Bláwizra neda' lu zra zu' lu da zi' da xa', na' guselá' lue', na' lue' gapu' neda' ba lá'ana."

16 Dios guzre' benne' wen da calela:

"¿Bi dxéquenu' lue', dxuchálaju' ca nadxixruj bi'a,

ne dxenníu' ca naca chee' xel-la' wezría chia'?

17 Lue' dxecuídenu' neda' che dxusízreda' lue', ne dxuzú' chalá'ala dizra' chia'.

18 Gate dxelé'enu' gubán, na' dxunu' le' tu zren, ne nacu' tu zren benne' ca' dxeledálene' nu'ula quebe zaj naca zru'ule'.

19 Dxuchálajquezu' da calela,

ne tu dxúnzquezu' da wen lazre'.

20 Tu dxennézquezu' da calela chee' bi bíchequezu', Ne dxagu' zria chee' bi chee' xrná'aquezu'.

21 Da caní' benu', na' neda' guzúa' zrire.

Gúquenu' naca' tu benne' ca nacu' lue'.

Na'a wadíl-laqueza' lue', ne gulé'eda' lue' ca ba benu'."

22 Le chéajni' da nigá na'a, le'e dxal-la lázrele Dios.

Ga gaze guzuzruj Dios le'e, ne québedxa sua nu guselá le'e.

23 Bėnnea' guzúe' lawa' da güe lá'ane' neda' gape' neda' ba lá'ana,

na' bėnnea' dxuxuchá cuine' chee' gunę' da xrlátaje,

gulé'eda' le' ca guselá' le', naca' Dios chee'.

**51** Gúcale neda', Dios, lu dutę xel-la' dxexache lazre' chiu'.

Dutę xel-la' dxexache lazre' chiu' bsula zria da naba-ga'.

2 Gudibe neda' ca naca da calela da nuna',



ne bca'ana chawe' neda' cheę dul-la da bęna',  
 3 lawe' da dxexúnbe'a ca bęna' gudábaga' Lue',  
 ne ca naca dul-la chia' tu dxáguze na zria neda'.  
 4 Lau' Lue' bęna' dul-la.  
 Awe', lau' Lué'queze, ne ba bęna' da caleļa lau' Lue'.  
 Caní dxaca na chia' cheę gaca bea nacu' xrlátaje lu da  
 dxenníu',  
 ne nacu' du lazre' ca da dxuchi'u cheę bęneache.  
 5 Gunná' xque, báchequeze nabaga' dul-la gate gúla-  
 jtea',  
 ne lu dul-la zúaqueza' gate guzrán xrna'a neda'.  
 6 Lue' dxezá lazru' sua da li lu xichaj lázrdawa',  
 ne lu xichaj lázrdawa' ba bzéajni'inu' neda' da naca  
 sina.  
 7 Bca'ana chawe' neda' nen da na' dxuchínenu',  
 na' xegá'ana' xrlátaje.  
 Gudibe neda', na' gaca' chíchedxa ca tu bezxe'.  
 8 Bęn xenda' xel-la' dxebé, ne da ba neza,  
 na' xelexezí' le dipa zrita xu'a, da ba gudáchaju'.  
 9 Quebe gusá lazru' ca naca dul-la da bęna',  
 na' bsula xúgute da caleļa da nuna'.  
 10 Dios, bzua neda' tu lázrdawa' xrlátaje,  
 ne bzua tu be' li lazre' lu xichaj lázrdawa'.  
 11 Quebe gucasu' neda' lau' Lue',  
 ne quebe xeca'u lu xichaj lázrdawa' be' lá'azxa chiu'.  
 12 Bexunna neda' xel-la' dxebé cheę xel-la' weselá  
 chiu',  
 ne bzua chuchu be' chawe' da xu'a.  
 13 Nadxa gusededa' benne' ca' dxelunę' da zrinnaj  
 ca dxaca lazru' xelunę',  
 na' benne' dul-la ca' xelexequę' chiu' Lue'.  
 14 Bselá neda' lu zria da nabaga', bętia' benne'.  
 Lue' Dios, nacu' Dios dxuseláu' neda',  
 na' gúl-laqueza' cheę da xrlátaje nacu' Lue'.  
 15 Xran, gusalaj dxu'a,  
 na' guzenda' bęneache da dxue lá'ana' Lue'.  
 16 Quebe dxaca lazru' béadu ca' gutia'-ba' lau',  
 ne quebe dxaca lazru' béadu ca' guzézxea' lau'.  
 17 Da guzúadxu lau' Dios da dxaca lazre' naca na  
 tu lázxdau dxexruj lazre'.  
 Tu lázxdau dxexruj lazre', ne da dxexíaje lazre'  
 quebe guzú' chalá'ala, Dios.  
 18 Dute xel-la' zri'i lazre' chiu', bęn gaca chawe' cheę  
 xęzre Sión.  
 Bsegula ze'e da nzechaj na xęzre Jerusalén.  
 19 Nadxa xezaca ba lazru' nen béadu ca' gútentu' lau'  
 dute da naca xrlátaje cheęntu',  
 ne béadu ca', ne da du ca' guzézxentu' lau'.  
 Nadxa xelútię' béadu ca' lu cugu chiu'.  
**52** ¿Bizr cheę na' dxucá'ana szren cuinu' cheę da  
 caleļa  
 da nunu', lue', benne' wal-la?  
 Tu zúazqueze xel-la' dxexache lazre' cheę Dios.  
 2 Tu dxuchálajzquezu' cheę da caleļa da gunu' cheę le  
 sa' ljwezru'.  
 Da dxenníu' naca na ca tu xia da nalále'ę, dxezí xę'u  
 ljwezru'.  
 3 Nazrí'idxenu' da caleļa quézcala da xrlátaje,

ne dxedánnedxenu' da węn lazre' quézcala da li.  
 4 Nazrí'inu' xúgute dizra' da dxulucá'ana ditaj na bęn-  
 eache,  
 lue', benne' dxezí xę'u.  
 5 Cheę le na' guzría xi' Dios lue' tu chí'izqueze.  
 Waxęle' lue', ne xequęę lue' naga zúaquezu',  
 ne gucasę' lue' naga zaj zra' benne' ban ca'.  
 6 Xelelé'e benne' xrlátaje ca' da nigá, na' xezezrebe-  
 queze'.  
 Xuluzrízrqueze' chiu' lue', xelennę':  
 7 "Le na' xque, benne' nigá quebe bxren lazre' Dios  
 cheę gucu'uję' le'.  
 Bxren lázrequeze' ca naca xel-la' gunnía' zrentę cheę',  
 ne guzúaqueze' lu da caleļa da dxunę'."  
 8 Neda' naca' ca tu xaga olivo xa'a lu xu'u lize Dios.  
 Tu dxuxrén lázrequeza' xel-la' dxexache lazre' cheę  
 Dios chadía chacanna.  
 9 Güe lá'anaqueza' Lue' chadía chacanna lawe' da  
 bęnu' da caní,  
 ne cueza lazra' lau' Lue' lawe' da naca na xrlátaje lau  
 xúgute  
 benne' chiu' Lue'.  
**53** Benne' xala ca' dxelenná lu lázrdawę': Quebe  
 zua Dios.  
 Xúgute' zaj naque' sban, ne zaj nune' da caleļa.  
 Quebe nu chilá' benne' dxunę' da xrlátaje.  
 2 Dios zuę' xabáa dxennęę' bęneache  
 cheę lé'enę' che zua tu benne' sina,  
 bęnea' dxape' Dios ba lá'ana.  
 3 Xúgute' benne' zaj nabéaj xíchaję' Dios.  
 Xúgute' zaj naque' sban.  
 Quebe nu chilá' benne' dxunę' da xrlátaje, netú guę'.  
 4 Dxenná Dios: "¿Quebe dxelėjni'i benne' caní  
 dxelunę' da caleļa?  
 Dxele'aj dxelawę' da dxelebanę' cheę bęneache  
 chia',  
 ne quebe dxelexíaję' neda'."  
 5 Za zrin zra xelexrusę' ca da quebe ne xezezaque',  
 lawe' da gusedinnaj Dios zrita ca' cheę benne'  
 guledábague' bęneache cheę'.  
 Dios na' nuzúę' chalá'ala benne' ca',  
 na' bęneache cheę' xuluzría xi'ę benne' ca'.  
 6 Dxenaba' Dios gunę' dxuaj Sión da gácale na  
 benne' Israel ca'.  
 Gate ba nun Dios xezezrín bęneache cheę' lu xęzr la  
 xu  
 cheęqueze',  
 xelebé zri'ine zre sua Jacob,  
 ne xelezúa lu da ba neza benne' Israel ca'.  
**54** Bselá neda', Dios, nen xel-la' waca chiu'.  
 Gúcale neda', Dios, nen xel-la' wal-la chiu'.  
 2 Bene da dxenaba' lau', Dios, ne bechebe chia'.  
 Bze naga da guchálajlęna' Lue'.  
 3 Za'aca benne' snia ca' xeledíl-lalęnę' neda'.  
 Benne' xichaj zra'a ca' dxelaca lazre' xelútię' neda',  
 benne' ca' quebe dxelape' ba lá'ana Lue', Dios.  
 4 Dios naque' Benne' dxácalęnę' neda'.  
 Xránadxu Dios zúalęnę' benne' ca' dxuluxúę' neda'.

<sup>5</sup> Ca naca da calela dxelún benne' dxeledábage' neda',

xuzrí'i Dios na cheę benne' ca'.

Guzría xi'e benne' ca' lawe' da naque' li lazre'.

<sup>6</sup> Du lazra' cu'a da gudéa' lau Lue', Xran.

Güe lá'anaqueza' Lau' lawe' da nácaleę na xrlátaje.

<sup>7</sup> Bseláu' neda' lu xúgute da stębe guzúa'.

Ble'eda' gulebía xi' benne' ca' dxeledábage' neda'.

**55** Bzę naga, Xran, ca da dxuchálajęna' Lue',

ne quebe guzú' chalá'ala ca da dxenaba' lau'.

<sup>2</sup> Guzúa' ban lazre', ne bechebe chia'.

Dxuláwizra' Lue' lu da dxuchálaja', ne zua' stębe,

<sup>3</sup> lawe' da benne' dxeledábage' neda' dxelenné' chia',

ne lawe' da dxelún la benne' węn da calela neda'.

Bulusebage' neda' da zrinnaj,

ne dute xel-la' dxelezá'a zaj nau zi' xuzre' neda'.

<sup>4</sup> Dxe' gunne xue lázrdawa' lu beła' dxen chia',

ne dxuchebe xel-la' gute neda'.

<sup>5</sup> Zua' lu xel-la' dxezrebe, ne dxezríztequeza',

na' zúale neda' da dxuchebe na neda'.

<sup>6</sup> Na' gunnía': ¿Nuzra gunna neda' xrila' ca xrila tu bsia

cheę cha'a lu be'la naga xezí' lazra'?

<sup>7</sup> Da líqueze guzrúnnuja' zítu'la,

na' súaqueza' le'e xixre' lawe' lataj.

<sup>8</sup> Guna' ba xuzre la' lu be' bđunu', ne lu be' wal-la.

<sup>9</sup> Bzria xi' benne' ca' dxelunę' da calela, Xran.

Bzaga naze da dxelunę',

lawe' da ble'eda' da zrinnaj, ne da calela da dxelunę' lu xęzre.

<sup>10</sup> Te zra chizrela dxeledé' lawe' ze'e da naxečaj na xęzre,

ne dxelunę' da zrinnaj, ne da calela lu xęzre nigá.

<sup>11</sup> Nazrate xęzre nigá da calela da dxelunę',

ne tu dxelúnzqueze' da węn lazre', ne xel-la' dxezí xę lu neza cheę na.

<sup>12</sup> La guca tu benne' bęnea' dxedábage' neda',

bęnea' bęn le' chia',

na' bchaga lawa' da na'.

La guca tu benne' dxecuídenę' neda' bęnea' gudábage' neda',

na' bcache cuina' lau le'.

<sup>13</sup> Lue', bęnea', gucu' ca tu le sa' ljwezra'.

Bsi'u neda', ne gucu' tuze neda'.

<sup>14</sup> Tu zren bchálajdxu du lázredxu,

ne lu xel-la' zri'i lazre' gudadxu lu xu'u lizre Dios.

<sup>15</sup> Dios, bęn queła xel-la' gute benne' ca' dxelunę'

da calela chadite.

Bęn xelexú'e lu lataj ba xa' zaj naca banę',

lawe' da nazrate xu'u lizre' da calela da dxelunę'.

<sup>16</sup> Ca naca chia' neda', bláwizra' Dios,

na' Xrana' Dios bselé' neda'.

<sup>17</sup> Che zílala, ne wagubizra, ne ca dxebía gubizra

guchálajęqueza' Dios, ne guláwizra' Le',

na' Le' xenne' chia'.

<sup>18</sup> Xexá'awę' bęne'du xu'a lu wedil-la da dxaca chia' neda',

ne gunę' cueza' zri lazra',

lácala zaj zra' zánete benne' dxeledábage' neda'.

<sup>19</sup> Wene Dios, na' guzría xi'queze' benne' ca'.

Naque' Bęnea' zúatequeze' dxenná be'e nédxute.

Caní gunę' cheę benne' ca' lawe' da quebe dxuluchę'e ca dxelunę', ne quebe dxelezrebe' Dios.

<sup>20</sup> Guchisa na' benne' węn da zrinnaj cheę gu'e benne' ca'

dxelebeza zri lazre' nen le'.

Gudíčaję' xrba cheę xel-la' wezría da bęne' nen benne' ca'.

<sup>21</sup> Dizra' bchálaje' zaj naca na dizra' zren lazre',

san xu'u lázrdawe' xel-la' dxezrá'a.

Dxunę' xrtante dizra' dxuchálaje',

san zaj naca na ca xia da zaj nalále'e.

<sup>22</sup> Bda xua chiu' cuzru Xránadxu, na' Le' gutipe' lazru'.

Québequeze gu'e lataj cheajchaze benne' chawe' tu chí'ize.

<sup>23</sup> Lue', Dios, gunu' xelexú'u benne' ca' dxelunę'

da calela lataj ba xa',

benne' dxelute benne', ne benne' dxelezí xę'e,

gate quebe ne xelezrine' gachaj catite dxal-la' xelaca banę',

san neda' guxrén lazra' Lue'.

**56** Bexache lazre' neda', Dios, cheę quebe xuluzría xi'

bęneache neda'.

Tu zra tu zra dxulusaca zi' bęneache neda', benne' ca'

dxeledíl-lalęne' neda'.

<sup>2</sup> Te zra chizrela benne' ca' dxeledábage' neda'

dxulucá'ana dítaję' neda',

lawe' da zaj zra' benne' zante, benne' dxeledíl-lalęne' neda'

lu xel-la' dxulucá'ana szren cuine'.

<sup>3</sup> Lu zra dxezreba', dxuxrén lazra' Lue'.

<sup>4</sup> ¿Dxuxrén lazra' Dios, na' güe lá'ana' xrtizre'!

¿Dxuxrén lazra' Dios, na' québedxa zreba'!

¿Bízraqueze gaca gun bęneache chia' neda'?

<sup>5</sup> Xúgute zra dxuluchuque' xrtizra'.

Ca naca da dxelegú'u be'e zaj naca na cheę xelunę' chia'

da calela.

<sup>6</sup> Dxelezrage', ne dxulucache cuine'.

Dxelenná' xánnie' ca da dxuna'.

Dxelilaj lazre' ca xelunę' xelútię' neda'.

<sup>7</sup> Dios, bxue ca da dxelunę',

na' dute xel-la' dxezrá'a chiu' bzria xi' benne' ca'.

<sup>8</sup> Nézqueznu' Lue' ca dxuzrúnnuja' lau benne' ca'.

Bsa lazre' nisa da ba gudxezra'.

¿Quebe zaj naxúaj na lu xiche chiu'?

<sup>9</sup> Gate dxuláwizra' Dios, lu zra ná'queze xuluxuzrun-nuj

benne' ca' dxeledábage' neda'.

Nézquezda' zúale Dios neda'.

<sup>10</sup> ¿Dxuxrén lazra' Dios, na' güe lá'ana' xrtizre'!

¿Dxuxrén lazra' Xránadxu, na' güe lá'ana' xrtizre'!

<sup>11</sup> ¿Dxuxrén lazra' Dios, na' québedxa zreba'!

¿Bízraqueze gaca gun bénneache chia' neda'?  
 12 Nabaga' ca da nachébe lazra' chiu', Dios.  
 Gúl-laqueza' da güe lá'ana' Lue'.  
 13 Ba bseláu' bénne'du xu'a lu xel-la' gute,  
 ne bebéaju' ni'a naga zaj zua cheajlechaze na,  
 cheę gaca chu'a lau Dios lu xel-la' naxaní' da dxunne'  
 cheę benne' ca' zaj naca banę'.  
**57** Bexache lazre' neda', Dios.  
 Bexache lazre' neda', lawe' da dxuxrén lazra'  
 Lue'  
 dutę lázrdawa'.  
 Queęzru' neda' ca dxun bedxuj dxézreba' zrí'ineba'  
 zran xrílabá', cadxa te cheę da stębe caní.  
 2 Guláwizra' Dios, Benne' zrentę.  
 Guláwizra' Dios cheę gácalęne' neda'.  
 3 Naga zúatę' xabáa cheę' sel-le' nu guselá neda' lu  
 na'  
 bénnea' dxáca lazre' guzríá xi'ę neda'.  
 Gusel-la Dios xel-la' dxexache lazre', ne da li cheę'.  
 4 Zua' lu da stębe ca tu benne' zue' ládujla beęze xixre'  
 ca'.  
 Xu'a ládujla bénneache zaj naque' ca beęze xixre' ca'  
 dxeláguba' bénneache.  
 Dizra' da dxelenné' chia' zaj naca na ca tu xia  
 natuche',  
 ne xaga nalá xéche'ze ca',  
 na' xrtizre' zaj naca na ca tu xia da nalále'ę.  
 5 Xega'ana szrénquezu' lu xabáa, Dios.  
 Xel-la' szren chiu' sua na lawe' dutę xęzr la xu.  
 6 Ba zaj nabeche' xralaj cheę xelęl-le' neda'.  
 Ba dxedú lazra' lu da dxaca chia'.  
 Ba zaj naxęne' tu xędxu cheę cheajcházia' lu'uile na.  
 Lu'uile da na' ba xeajlecházqueze le'.  
 7 Ba zúatęqueze lázrdawa', Dios.  
 Ba zúatęqueze lázrdawa' cheę gúl-laqueza' da güe  
 lá'ana' Lue'.  
 8 Bebán lazre', bénne'du xu'a, ne le xebán lázrele,  
 le'e dxínnele da dxúl-lalęnle, ne da zríadi'i na du.  
 Che zílala chásaqueza'.  
 9 Güe lá'anaqueza' Lue' ládujla bénneache chiu', Xran.  
 Gúl-laqueza' chiu' lau benne' xúgute cue' xęzr la xu,  
 10 lawe' da naca xel-la' dxexache lazre' chiu' zrendxa  
 ca xabáa,  
 na' da li chiu' naca na zrendxa ca beuj bza ca'.  
 11 Xegá'ana szrénquezu' lu xabáa, Dios.  
 Xel-la' szren chiu' sua na lawe' dutę xęzr la xu.  
**58** Le'e dxenná beale ¿da li dxuchálajle da naca xr-  
 látaje?  
 ¿Dxuchí'ale ca naca da li cheę bénneache chia'?  
 2 ¡Cabíze'!  
 ¡Lu lázrdaule dxugú'u beale da zrinnaj!  
 ¡Stębele'ę dxuzúale bénneache lu xęzr la xu chia'!  
 3 Zaj nazrinnaj lázxdau benne' ca' zaj nabéaj xíchaję'  
 neda'  
 gate gulálajte'.  
 Belexase dínnaje' dxelún lazre' gate gulezantę xrne'ę  
 le'.

4 Dizra' da dxelenné' zaj naca na da dxelute bén-  
 neache  
 ca da zria zran lazxa beła'.  
 Zaj naca na ca beła' snia, be nácaba' be cuezru.  
 5 Quebe dxenba' chí'i benne' dxunne' leba'  
 lácala dxennéle'ę xrtandau'.  
 6 Dios, gudichaj lazxa benne' ca'.  
 Gudichaj, Xran, lazxa benne' ca' zaj naque' ca beęze  
 xixre' ca'.  
 7 Ben xelexenítie' ca nisa da dxelalaj na lu xu.  
 Gate dxulusanę' xaga nalá xéche'ze cheę',  
 ben xeledé na chalá'ala.  
 8 Ben xeledé cheę' ca dxaca cheę be zaga dxellexún-  
 aba'.  
 Ben québedxa xeledé'ę gubizra ca tu bidau' dxála-  
 jbe'  
 ba nátebe'.  
 9 Nédxula gate quebe ne la xesu' lu xi'  
 xecá'a Dios benne' ca' tu lu be' bđunu',  
 benne' zaj naca banę', ne benne' ca' zaj zua xelatie'.  
 10 Wabé benne' xrlátaje gate lé'ęne' xebéaj lazre' Dios  
 benne' ca' dxelunę' da calęla.  
 Guchuchu guláje' dxen cheę benne' zaj nabéaj  
 xíchaję' Dios.  
 11 Nadxa nne bénnea': "Da líqueze de lazruj cheę  
 benne' xrlátaje.  
 Da líqueze zua Dios, Bénnea' dxuchi'ę cheę bén-  
 neache  
 zaj zre'ę lu xęzr la xu."  
**59** Bselá neda' lu na' benne' ca' dxeledábague' ne-  
 da', Dios chia'.  
 Bselá neda' lu na' benne' ca' dxelunę' chia' da calęla.  
 2 Bselá neda' lu na' benne' ca' dxelunę' da zrinnaj.  
 Bselá neda' lu na' benne' ca' dxelutie' benne',  
 3 lawe' da dxelilaj lazre' xelútie' neda'.  
 Zaj nazraga benne' wal-la ca' cheę xeledíl-lalęne' ne-  
 da',  
 quegá lawe' da bi zria nabaga', ne quegá ne cheę  
 dul-la nuna' neda', Xran.  
 4 Lácala quebe bi beña' cheę benne' ca',  
 zá'aca chégüę', ne dxulucueze' bi xelunę' chia'.  
 Bebán cheę xidu' naga zua', na' le'enu' da dxelunę'.  
 5 Lue', Xran, Dios cheę benne' zan dxjaque' wedil-la,  
 ne Dios cheę benne' Israel ca',  
 bebán cheę gudéu' ba xa' benne' xúgute cue' xęzr la  
 xu.  
 Quebe xexache lazru' xúgute benne' ca' dx-  
 eledábague' Lue',  
 ne dxelunę' da zrinnaj.  
 6 Xelélé'ę gate cuía gubizra, ne xebebezre xę'ę  
 ca dxelún becu', na' xeléchaję' xęzre.  
 7 Gunná' xque, da dxuluchálaję' naca na ca da dxellex-  
 eębe'.  
 Dizra' dxelenné' zaj naca na ca xia zaj nalá na,  
 lawe' da dxelenné': "¿Nuzra xene?"  
 8 Lue', Xran, guzrizru' cheę benne' ca'.  
 Gun lau' cheę benne' xúgute cue' xęzr la xu ca'.  
 9 Zaj naca wal-la benne' ca' dxeledábague' neda'.

Cueza lazra' Lue' lawe' da dxucu'uju' neda', Dios.

<sup>10</sup> Dios, Bénnea' dxexache lazre' neda', cuía lawe' lawa' neda'.

Dios gunë' le'eda' gaca cheë benne' ca' dx-  
eledábage' neda'

ca da dxezá lazra'.

<sup>11</sup> Quebe gutiu' benne' ca', cheë quebe xelal-la lazre'  
bénneache chia' ca da gunu'.

Bëse dinnaj benne' ca' nen xel-la' waca chiu'.

Lue', Xran, Benne' dxucu'uj netu', ben cheajlecházie'.

<sup>12</sup> Bën xeledulé' lu xel-la' dxulucá'ana szren cuine',  
ne cheë dul-la dxelunë' lu da dxuluchálaje',  
ne ne cheë dizra' schanni', ne da wën lazre' da dxe-  
lenné'.

<sup>13</sup> Bzria xi'ë lu xel-la' dxezrá'a chiu'.

Bzria xi'ë cheë québedxa xelezúë'.

Dios, bën xeleque be'ene' dxenná be'enu' zri'ine zre  
sua Jacob.

Dxenná be'u du ca naca xëzr la xu.

<sup>14</sup> Dxelelé'ë gate dxebía gubizra, ne dxelebezre xë'ë  
ca dxelún becu', ne dxeléchaje' xëzre.

<sup>15</sup> Dxeledé' ca benne' dxeledaze', dxelílaje' da xelawë',  
na' che quebe dxeléljane', na' du xëla dxelawë' zria  
tue' xetúë'.

<sup>16</sup> Neda' gúl-laqueza' cheë xel-la' waca chiu',  
na' che zílala güe lá'ana' xel-la' dxexache lazre' chiu',  
lawe' da gúcalënu' Lué'queze neda',  
ne bcu'uju' neda' gate guzúa' lu da stébelë'ë.

<sup>17</sup> Lue' dxutipu' lazra', na' gúl-laqueza' chiu',  
lawe' da nacu' Lue', Dios, Bénnea' dxucu'uje' neda',  
ne Dios, dxexache lazru' neda'.

**60** Dios, Lue' ba bzu' netu' chalá'ala, ne bënu' xea-  
jcházentu'.

Bzrá'alë'ënu' netu'.

Na'a bedá gácalënu' netu'.

<sup>2</sup> Bënu' guzrú' xëzr la xu, ne bënu' bxalaj na.

Bexún na naga bxalaj na lawe' da dxebía xi na.

<sup>3</sup> Bënu' blé'entu' netu', benne' chiu', da naca stébelë'ë.  
Bënu' guca cheëntu' ca güé'entu' tu da bën na xea-  
jcházentu'.

<sup>4</sup> Bnézruju' tu da dxulé'e lau cheë benne' dxelezrebe'  
Lue',

Da xeluxrë' cheë gulé'e lau da naca li.

<sup>5</sup> Cheë xeledá benne' ca' nazrí'iqueznu' Lue',  
bsel-la lë' dutë xel-la' waca chiu', ne bene chia'.

<sup>6</sup> Dios gunné' lu lataj lá'azxa cheë': "Wabéquezda' ne-  
da'.

Gunna' late weaj cheële xëzr la xu cheë benne'  
Siquem,

ne gudxixra' cheële xëzr la xu de cuita xëgu Sucot.

<sup>7</sup> Chia' naca xëzr la xu Galaad, ne chia' naca xëzr la xu  
cheë zri'ine zre sua Manasés.

Xëzr la xu cheë zri'ine zre sua Efraín naca na ca  
tu da napa chi'i na xíchaja'.

Xëzr la xu cheë zri'ine zre sua Judá naca na naga  
dxenná be'a.

<sup>8</sup> Xëzr la xu cheë benne' Moab naca na ca tu  
zriga' da xuzru nisa guná'a,

na' xëzr la xu cheë benne' Edom guchichan' nen  
zrela'.

Si'a ba neza xëzr la xu cheë benne' Filistea."

<sup>9</sup> ¿Nuzra che' neda' cheë guzétaja' xëzre da naxečaj  
na

ze'e sibe?

¿Nuzra che' neda' cheë guzétaja' benne' Edom ca'?

<sup>10</sup> ¿Quegá Lue' na' che'u neda', Dios, nacu' Bénnea'  
bzue' netu' chalá'ala,

ne quebe guxeájle'nu' benne' cheëntu' ca', benne' dx-  
jaque'

wedil-la?

<sup>11</sup> Gúcalë netu' cheë séquentu' tíl-lalëntu' benne' ca'  
dxeledíl-lalëne' netu',

lawe' da naca dácheze xelácalë bénneache netu'.

<sup>12</sup> Tu zren nen Dios gundxu tu da zrentë,

na' Lë' gulague' benne' ca' dxeledíl-lalëne' dxi'u.

**61** Bene, Dios, da dxuláwizra' Lue'.

Bzë naga da dxuchálajle'na' Lue'.

<sup>2</sup> Zitu' naga zua lazria' dxuláwizra' Lue', lawe' da  
dxdé' lazra'.

Guché' neda' naga zua Bénnea' naque' ca tu xi'a xiaj,  
Bénnea' nácadxë' szren ca neda',

<sup>3</sup> Nacu' Lue' Benne' nuxruë' neda',

ne nacu' ca tu ze'e xiaj da dxucu'uj na neda' lau  
benne' ca'

dxeledábage' neda'.

<sup>4</sup> Tu súazqueza' lu xu'u lá'azxa chiu'.

Sua chawa'a cuitu' Lue' ca zaj zua chawe' bedxuj  
dxé'enedu ca'

zran xrila bedxuj.

<sup>5</sup> Lawe' da bennu' Lue', Dios, ca da guchëbe lazra'  
chiu',

bënu' napa' ca da dxelapa benne' ca' dxelezrebe' Lue'.

<sup>6</sup> Gunu' gaca bana' neda', wenná bea, zánëtë zra.

Iza chia' xelaca na ca da zaj naca cheë chupa cuen  
bénneache.

<sup>7</sup> Tu súazqueza' lau', Dios.

Bcueza xel-la' dxexache lazre' chiu', ne da li  
cheë xulucá'ana chawe' na neda', wenná bea.

<sup>8</sup> Caníqueze gúl-laqueza' cheë lau' tu chí'izqueze,  
ne gúnqueza' tu zra tu zra ca da guchëbe lazra'.

**62** Tuze nen Dios dxebeza zri lazre' bénne'du xu'a.  
Léquezë' dxuselé' neda'.

<sup>2</sup> Tuze Lë' dxucu'uje' neda', ne dxuselé' neda'.

Naque' Bénnea' dxuxrë' neda', na' quebe negue  
lazra'.

<sup>3</sup> ¿Ajatëzcha' gucuézale da gunle cheë tu benne',  
na' dxunle ba xen xúgutele guzría xile lë',

ca dxun tu benne' dxuchínnaje' tu ze'e da ba de  
chalá'ala,

u tu le'aj da ba guzru'?

<sup>4</sup> Dxunle tuze dizra' ájazra xebéajle neda' lu xel-la'  
szren chia'.

Nazrí'ile da wën lazre'.

Nen dxú'ale dxennele da xrlátaje, san xu'u lázrdaule  
da calëla.

<sup>5</sup> Lue', bénne'du xu'a, guleza lazre' tuze Dios,

lawe' da naca Le' Bénnea' dxebeza lazra'.  
 6 Tuze Le' dxucu'uje' neda', ne dxuselé' neda'.  
 Naque' Bénnea' dxuxre' neda', na' quebe negue lazra'.  
 7 Naca Dios Bénnea' dxuselé' neda', ne naque' da ba neza chia'.  
 Naca Dios Bénnea' dxucu'uje' neda', ne Benne' dxuxre' neda'.  
 8 Le cueza lazre' Le' tu chí'izqueze, le'e, bèneache. Le xe'e ca da dxezá lázrele.  
 Naca Dios Bénnea' dxuxre' dxi'u.  
 9 Da líqueze, da dácheze zaj naca bèneache, ne ca tu da wen lazre' benne' zren ca'.  
 Quebe bi dxelé'e tu lu zrgú'unsá.  
 Zaj nácadxe' zraze ca tu be' da dxecá'a lázredxu.  
 10 Quebe guxrén lázrele da síle gate dxexúbele, ne quebe gucá'ana szren cuínale chee' da ca' dxebanle.  
 Che dxegula xel-la' gunn'á chee', quebe xezaca ba lázrele  
 chee' da na'.  
 11 Tu lásaze gunná Dios:  
 na' chupa lasa benda' da nigá:  
 Chee' Dios naca xel-la' waca.  
 12 Chiu' Lue', Xran, naca xel-la' dxexache lazre' lawe' da dxunézruju' lazruj chee' tu tu bèneache cáteze da zaj nune'.

**63** Dios, Lue' nacu' Dios chia'.  
 Dxebile bène'du xu'a da naca chiu',  
 na' be'la' dxen chia' dxezá lazre' na da naca chiu'.  
 Naca chia' ca zúaqueza' tu xezr la xu bizre naga quebe bi nisa de.  
 Dxań'siseze xida' lau Lue' chee' le'eda' xel-la' waca chiu',  
 ne xel-la' szren chiu',  
 cáteze ba ble'eda' da naca chiu' lu lataj lá'azxa chiu'.  
 3 Cháwedxa naca xel-la' dxexache lazre' chiu'  
 ca xel-la' nabánqueze.  
 Chee' le' na' güe lá'anaqueza' Lue'.  
 4 Caníqueze nnia' chiu' da xrlátaje dxácaté naca bana'.  
 Chee' gucá'ana szrena' Lau' chísaqueza' na'a.  
 5 Xélaje bène'du xu'a da naca na ca beše zrita,  
 ne be'la' da dxánnele'e,  
 na' duté xel-la' dxebe güe lá'anaqueza' Lue'.  
 6 gate dxajsá lazra' chiu', ne dea' ga dxata',  
 ne gate dxulaba lazra' ca naca chiu' gate dxennaza' chizrela.  
 7 Lawe' da dxácalenu' neda', béle'eda' cuitu' ca dxelún bedxuj dxé'enedu ca' zran xrila bedzuj.  
 8 Naca bène'du xu'a Lue' tuze.  
 Nen na'u wal-la' nuxru' neda'.  
 9 Benne' ca' gulezá lazre' xuluzr'ía xi'e neda' cheajlecházie' lataj ba xa'.  
 10 Xeleb'ía xi'e lu xia nalá.  
 Xelaque' da xelagu becu' xixre' ca'.  
 11 Neda', wenná bea, beda' lu da naca chee' Dios.  
 Xegá'ana ba lá'ana nüteteze benne' dxuluchínene' la',

lawe' da xelexxuj dxu'a benne' ca' dxelenné' da wen lazre'.

**64** Dios, bze naga chi'a lawe' da zua' stébe dxuláwizra' Lue'.  
 Bxue xel-la' nabán chia' lawe' da dxezreba' bi xelún benne' ca'  
 dxeledábague' neda'.  
 2 Bcache chawe' neda' chee' quebe xelún benne' wen da cale'a chia' ca da dxelezá lazre',  
 ne chee' quebe xelún benne' dxelún da zrinnaj chia' ca da zaj nune' xelune' chia'.  
 3 Dizra' dxuluchálaje' zaj naca na ca xia zaj nalále'e na,  
 ne dxelenné' schanni' ca dxun tu benne' dxusané' xaga nalá xéche'ze chee'.  
 4 Caní dxelenné' bagácheze chee' xelune' cheajlechaze benne' zaj naque' li lazre'.  
 Chadite' dxelune' na, ne quebe bi dxelezrebe'.  
 5 Dxelune' ba xuzre xelune' da zrinnaj da zaj nune' xelune',  
 na' dxuluzúe' xralaj ca' chee' xele'e bèneache, dxelenné': "¿Nuzra le'e da dxundxu?"  
 6 Dxelílaje' ca zaj naca da zrinnaj xelune',  
 ne dxelenná' xánne' ca zaj naca na.  
 Ca da zaj xu'u xichaj lázrdawe' zaj naca na stébele'e ca zaj naca lázrdauqueze'.  
 7 Dios guné' benne' ca' we' nen tu xaga nalá xéche'ze chee'.  
 Chadite' xelu'e xízrawe' zren ca'.  
 8 Dizra' buluchalaj benne' ca' xelún na cheajlecházie',  
 na' xelezrebe xúguté bèneache gate xelelé'ene' benne' ca'.  
 9 Nadxa xelezrebe xúguté bèneache, ne xuluzenne'  
 ca da nun Dios,  
 na' xuluxúnbe'e ca zaj naca da bene' Le'.  
 10 Béqueze benne' xrlátaje lau Xránadxu, ne guxrén lazre' Le',  
 na' xelezúa lu da ba neza xúguté benne' zaj naque' li lazre'.

**65** Naca chiu' Lue', Dios, güe lá'anantu' Lue' lu xezre Sión,  
 na' guntu' da guchebe lázrentu' chiu'.  
 2 Lue' dxénqueznu' da dxuchálajlentu' Lue',  
 na' xelelá' lau Lue' xúguté bèneache.  
 3 Nabágale'a da zrinnaj da be'na',  
 san Lue' dxunite lau' ca da gudábagantu' Lue'.  
 4 Ba neza zrente' naca na chee' bènea' dxeca'u Lue',  
 ne dxenníu' le' gaque' chiu', chee' súaqueze' lataj lá'azxa chiu'.  
 Xélajquezentu' da xrlátaje da de lizru', da ca' da zaj de xudau' lá'azxa chiu'.  
 5 Lu da xrlátaje chiu' gunu' da zaj naca zrente' gate gunu'  
 ca da dxenábantu' Lue', Dios, Benne' dxuselé' netu'.  
 Xúguté bèneache zaj zra' duté xezr la xu dxelebeza lazre' Lue',  
 ne cá'anqueze dxelebeza lazre' benne' dxeledé'e zítu'la lawe' nísadau'.

6 Lué'queze dxuzúa chuchu' xi'a zren ca' nen xel-la' waca chiu'.  
 Nácaquezu' Benne' wal-la.  
 7 Dxebeche zriu' nísadau' gate dxelucu na, ne schaga da dxelún xeajxruza chee na.  
 Dxebeche zriu' benne' xęzr la xu gate dxeledábage' Lue'.  
 8 Chee le na' benne' zaj zře'ę dutę xęzr la xu xelezrebe' ca naca da zrentę da dxunu'.  
 Dxuzú' lu da ba neza bėnneache zaj zra' du gabí'i xęzr la xu.  
 9 Dxenna'u xęzr la xu, ne dxesel-lu' nisa xiuj.  
 Dxunu' dxúnnale'ę na lina chee na.  
 Nuzúaquezu' lu xęzr la xu xęgu ca' da zaj dele'ę na nisa.  
 Dxucuezu' zrua' za da xelagu bėnneache, ca ba núnquezu' gaca na.  
 10 Dxesel-lu' nisa xiuj naga ba zaj nunę' na'.  
 Dxunu' dxexaca na xu xa'a.  
 Dxuculu na nen nisa xiuj na'.  
 Dxunu' dxelegula chawe' da du ca' ba zaj naxaza na.  
 11 Dxunu' dxelexezi' bėnneache ba neza tu iza tu iza ne chee da dxunézruju',  
 na' ca zaj naca beuj bza chiu' dxelunna na xiuj da dxun na dxelegula chawe' da zaj naza bėnneache.  
 12 Dxelunna na xiuj naga dxeledá bę xixre'du ca' da dxeledá guba',  
 na' dxelebe bėnneache dxelele'ene' ca bane zaj zua xí'adu ca'.  
 13 Lache' ca' zaj zra' zřila' ca',  
 na' dxu'a xęgudu ca' zaj naxaza zrua' xtila,  
 na' dxelebezre xa'a bėnneache chiu' dutę xel-la' dx-elebe,  
 ne dxelúl-laqueze' chiu'.  
**66** Le gucá'ana szren Dios dutę xel-la' dxebe,  
 le'e zrale dutę xęzr la xu.  
 2 Le gul-la ca naca xel-la' szren chee le'.  
 Le gucá'ana szrenę' gate dxue lá'anale Lę'.  
 3 Le xę Dios: "Dxebánele'ęquezentu' ca zaj naca da nunu'."  
 Ne chee xel-la' szren chee xel-la' waca chiu' xuluzúa xrtizru' benne' ca' dxeledábage' lue'.  
 4 Xúgutę bėnneache zaj zra' dutę xęzr la xu xelúe lá'anaqueze' Lue', ne xelúl-laqueze' chiu'.  
 Tu xelúl-lazqueze' chee Láquezu'.  
 5 Le da, lé'ele ca zaj naca da nun Dios.  
 Da zřebedxu zaj naca da bęne' chee benne' ca' belunę' da calęla.  
 6 Bęne' bexaca nísadau' xu bizre.  
 Guledé bėnneache chee' ní'aze' naga nedxu de tu xęgu situj.  
 Dxu'a nísadau' na' gubele'ędxu lau Dios.  
 7 Dutę xel-la' waca chee' nna be'ę chadía chacanna.  
 Dxuxúequeze' ca da dxelún bėnneache dutę xęzr la xu.  
 Benne' dxeledábage' Lę' quebe xelezrué'ęquezne' xel-la' szren.  
 8 Le'e, bėnneache, le gucá'ana szren Dios cheędxu,

ne le guzén bėnneache ca da dxue lá'anale Lę'.  
 9 Léqueze' bxue' dxi'u chee naca bandxu, ne quebe be'ę lataj cheajchádzxu.  
 10 Lué'queze bxu' netu' ca da bęntu', Dios.  
 Bdeu' netu' xel-la' zi' ca dxelún bėnneache dxuludę' xia plata lu xi' chee xegá'ana chawe na.  
 11 Bęnu' xeajchú'untu' tu lu xralaj.  
 Bda'u cúzruntu' tu xua zí'ile'ę.  
 12 Bęnu' guledé xíchajntu' benne' zaj zřię' bzřina' chee' ca'.  
 Gudentu' tu lu xi', ne tu lu nisa situj,  
 na' bebéaju' netu', ne bzu' netu' tu lataj naga zúantu' lu da ba neza.  
 13 Chú'unqueza' lu xu'u lizru' chee guzézxea' béadu ca', ne gunna' chiu' ca da guchebe lazra' guna',  
 14 da na' guchebe lazra' ca da gunniá' gate guzúa' lu da stébelęę.  
 15 Guzézxea' béadu ca', bę dxelanne lau' Lue', ne guna' cuen zren chee zříla'du ca' lau', ne gutia' bęzre ca', ne chivo biu ca' lau'.  
 16 Le da, xénele, xúgutęle dxezřebele Dios, na' guzenda' le'e ca da bęne' gúcalęne' neda'.  
 17 Du lazra' bláwizra' Lę',  
 ne bca'ana szřenqueza' Lę'.  
 18 La guzé lazra' tu da calęla,  
 quebe ben Xránadxu chia'.  
 19 Da líqueze bene Dios chi'a.  
 Bze nague' ca da gunábeda' Lę'.  
 20 ¡Gaca báqueze Dios!  
 ¡Quebe bzue' chalá'ala da bchálajlęna' Lę',  
 san bexache lazre' neda'!  
**67** Dios, bexache lazre' netu', ne bęn da chawe' cheęntu'.  
 Dutę xel-la' zři'i lazre' chiu' guzúalę netu',  
 2 chee xelúnbea bėnneache du gabí'i xęzr la xu ca naca da dxaca lazru',  
 ne chee xeleneze bėnneache dutę xęzr la xu ca dxuseláu' bėnneache.  
 3 Xúgutę bėnneache dxelúe lá'ane' Lue', Dios.  
 Dxelúe lá'ana xúgutę bėnneache Lue'.  
 4 Le be, ne le sua lu da ba neza, le'e, bėnneache dutę xęzr la xu,  
 lawe' da guchi'a Dios cheęle ca naca da xrlátaje,  
 ne guxúequeze' xúgutę bėnneache.  
 5 Xúgutę bėnneache dxelúe lá'ane' Lue', Dios.  
 Dxelúe lá'ana xúgutę bėnneache Lue'.  
 6 Xęzr la xu nigá ba zřia na lina chee na,  
 lawe' da bęn Dios cheędxu da chawe' cheędxu.  
 7 Dios ba bęne' chawe' cheędxu,  
 na' gáteteze dxal-la' xelapa bėnneache Lę' ba lá'ana.  
**68** Guzé, Dios, ne bęse dinnaj benne' ca' dx-eledábage' Lue',  
 ne bęn xuluzrunnuj benne' ca' dxelecuídenę' Lue'.  
 2 Ca dxun tu be', dxulaga na zren chee xi',  
 ca' gulagu' benne' ca'.  
 Ca dxuna xina' lu xi', ca' xelexenite benne' ca' lau Dios,  
 benne' ca' dxelunę' da zřinnaj.

<sup>3</sup> Xelebé benne' xrlátaje ca', ne xelexúe' lu da ba neza lau Dios,  
 ne xelexrítequeze' lu xel-la' dxelebé chee'.  
<sup>4</sup> ¡Le gul-la chee' Dios!  
 ¡Le gul-la da du ca' chee' Láqueze'!  
 ¡Le gucá'ana szren Bénnea' dxe'e' xabáa, nazí le' Jah!  
 ¡Le be lau Le'!  
<sup>5</sup> Ca xra bi dxé'enedu ca', ne ca benne' dxuxúe  
 nu'ula ca' zaj zué' tuze,  
 naca Dios lu lataj lá'azxa naga zúaqueze'.  
<sup>6</sup> Dxun Dios xelexúa xrtia ljwezre bénneache quebe nu  
 xrtia ljwezre' zaj zra'.  
 Dxebéaje' benne' zaj xu'e' lu na' benne' zitu' ca'  
 chee' xelexúe' lu da ba neza.  
 Benne' ca' dxeledábaga Dios zaj zué' tu lu xęzr la xu bizre.  
<sup>7</sup> Dios, gate bdxúaju' lau bénneache chiu',  
 ne gudáu' lu xęzr la xu bizre na',  
<sup>8</sup> na' guzrú' xęzr la xu na'.  
 Cá'anqueze gúcale'e' xiuj lau Dios.  
 Xí'a Sinaí guzrize na lau Dios,  
 Dios chee' benne' Israel ca'.  
<sup>9</sup> Gusel-lu' tu nisa xiuj zílale'e, Dios.  
 Gate belexedú lazre' bénneache chiu', Lue' btipu' lazre'.  
<sup>10</sup> Bénneache zaj naca chiu' zaj zúaqueze' lu xęzr la xu chiu'.  
 Dutę da chawe' chiu', Dios, dxuxú' benne' xache' ca'.  
<sup>11</sup> Xránadxu Dios gusel-le' tu dizra' chawe',  
 na' gulezrá' benne' zantę, benne' buluzenne' bénneache  
 ca naca dizra' chawe' na'.  
<sup>12</sup> ¡Buluzrúnnuje'!  
 ¡Buluzrunnuj wenná bea ca' nen  
 ca naca benne' chee' dxjaque' wedil-la,  
 na' benne' ca' zaj nagá'ana lu xu'u lizre' belexequé'e  
 da bulucá'ana benne' ca' buluzrúnnuje'.  
<sup>13</sup> Lácala bcache cuínale naga dxuxúele zrila' ca',  
 gacu zra lánale da naca na ca xrila bgúgudu ca' da  
 zaj nazí lechítaje na plata,  
 na' dube' chee' xrílabá' ca' zaj nazí lechítaje na oro.  
<sup>14</sup> Gate beşe dinnaj Dios zrentę wenná bea ca' lataj na',  
 na' bexruj bezxe' da bgacu na xi'a Salmón.  
<sup>15</sup> Tu xi'a zrentę naca xi'a Basán.  
 Tu xi'a zri'a naca xi'a Basán na'.  
<sup>16</sup> ¿Bizr chee' na' dxenna'le, le'e, xi'a zri'a ca',  
 xi'a na' naga dxaca lazre' Dios súaqueze'?  
 Da líqueze súaqueze Xránadxu lu xi'a na' chadía chacanna.  
<sup>17</sup> Da zaj naché' benne' ca' lu wedil-la da napa Dios  
 zánete' cue' gaxúa zaj naca na.  
 Xránadxu Dios zezé'e xi'a Sinaí chee' suę' lataj lá'azxa chee'.  
<sup>18</sup> Begüénu' xabáa, zeche'u benne' ca' bebéaju'  
 lu na' xel-la' gute,  
 na' guzi'u da chawe' ca' da belunna bénneache,

ne cá'anqueze guzúa da bęnnu' chee' benne' ca'  
 guledábague' Lue',  
 chee' súaquezu' ládujla bénneache, Dios, leu' Jah.  
<sup>19</sup> ¡Gaca ba Xránadxu!  
 ¡Tu zra tu zra dxusezrate' dxi'u da chawe' chee'!  
 ¡Naque' Dios, dxuselé' dxi'u!  
<sup>20</sup> Dios, Bénnea' naque' Dios cheedxu guselé' dxi'u.  
 Léqueze Xránadxu Dios guselé' dxi'u lu na' xel-la' gute.  
<sup>21</sup> Da líqueze Dios gunę' wę' xichaj benne' ca'  
 dxeledábague' Le'.  
 Gunę' wę' xichaj benne' quebe dxulusanę' ca' zaj naca  
 dul-la da dxelunę'.  
<sup>22</sup> Gunná Xránadxu: "Guna' xezrinle lázrele,  
 xeza'ale lu xi'a Basán.  
 Guna' xeza'ale lu da situj chee' nísadau', xezrinle  
 lázrele,  
<sup>23</sup> lawe' da guna' guchuchu guléajle dxen chee' benne'  
 ca'  
 dxeledábague' le'e,  
 na' xelexé'e' becu' cheęle dxen chee' benne' ca'."  
<sup>24</sup> Belexé'e bénneache ca' guledá bénneache chiu'  
 belúe  
 lá'ane' Lue', Dios.  
 Dutę xel-la' dxelebé gulu'e' lataj lá'azxa chiu', Dios,  
 Wenná Bea chia'.  
<sup>25</sup> Benne' ca' dxelul-la zeajzrię' láwe'la,  
 na' benne' zaj nu'e' da dxulucuezre' zja'aque' bzébelá.  
 Ládujla zjaca nu'ula cuide'du ca' zaj núxrube'  
 da du ca' dxulusézxebe'.  
<sup>26</sup> Le güe lá'ana Dios naga zaj nazraga bénneache  
 chee'.  
 Le güe lá'ana Xránadxu, le'e nácale zri'ine zre sua Is-  
 rael.  
<sup>27</sup> Zaj zra' zri'ine zre sua Benjamín na', guque' benne'  
 cuidedxa, na' dxelenná be'e.  
 Zaj nazraga benne' xíchaję chee' zri'ine zre sua Judá  
 na',  
 ne benne' xíchaję chee' zri'ine zre sua Zabulón,  
 ne benne' xíchaję chee' zri'ine zre sua Neftalí.  
<sup>28</sup> Dios, ble'e lau xel-la' wal-la chiu'.  
 Bzua chacha, Dios, da na' bęnu' cheętu'.  
<sup>29</sup> Ne chee' xel-la' szren chee' xudau' chiu' da zua na  
 xęzre Jerusalén,  
 xelegú'u benne' wenná bea ca' da xelunę' lau'.  
<sup>30</sup> Gudil-la benne' dxjaque' wedil-la chee' dutę xęzr la  
 xu  
 zaj nazraguę' chee' xeledíl-lalęne' Lue',  
 benne' ca' zaj naque' ca' bezure zan ca' nen biadu chee-  
 ba' ca',  
 cadxa xuluzúa xúgute' dizra' chiu',  
 na' xelunę' ca' naca xia plata da zaj nape'.  
 Beşe dinnaj benne' dutę xęzr la xu dxelexezaca ba  
 lazre'  
 xelexúe' lu wedil-la.  
<sup>31</sup> Xelexé' benne' xíchaję chee' xęzr la xu Egipto.  
 Benne' xęzr la xu Etiopía xelunę' ba xen xulucá'ana  
 szrenę' Dios.

32 ¡Le gul-la cheę Dios, le'e zrale du gab'í xęzr la xu!  
¡Le gul-la cheę Xránadxu!

33 ¡Le gul-la cheę Bénnea' dxe'e xabáa na'ala,  
da zua na nédxutę!

¡Le nna' xque, wanné', ne zízrajle'e nne'!

34 ¡Le nne nápalęe Dios xel-la' waca!

¡Lu xel-la' szren cheę dxuxúequeze' benne' Israel ca',  
na' zran xabáa nalá' xel-la' waca cheę'!

35 Benne' zrębentu' nacu' Lue', Dios,  
naga zu' lataj lá'azxa chiu'.

Dios cheę benne' Israel ca', Léqueze' dxutipe' lazre'  
bénneache cheę'.

¡Gaca ba Dios!

**69** Bselá neda', Dios.

Naca' ca tu benne' dxepe' lu nisa.

<sup>2</sup> Naca' ca tu benne' xu'e lu guzra' situj, ne quebe dxa-  
ca se'e.

Naca' ca tu benne' xu'e lu nisa sítujle'e,  
na' nisa na' ba dxacu na xíchaje'.

<sup>3</sup> Ba dxajxręqueda' lawe' da ba gunnęle'a, ne ba da  
lba'a.

Ba dxelátete lawa' dxenná'a gácale Dios neda'.

<sup>4</sup> Ba naxándxa benne' dxelecuídenę' neda' ca naxán  
xicha xíchaja', ne quebe bi de bi nuna'.

Zaj naca benne' wál-lalęe benne' dxeledábague' ne-  
da',

benne' ca' dxuluzría xi'e neda', ne quebe bi de bizr  
cheę na'.

¿Dxal-la' quízruja' da quebe gulana'?

<sup>5</sup> Dios, nézqueznu' Lue' naca da xálaze da nuna',  
ne dxelé'equeznu' dul-la da bęna'.

<sup>6</sup> Quebe gu'u lataj xelexedué'e ne chia' neda' benne'  
ca'

dxuluxrén lazre' Lue', Xrana' Dios szrentę.

Quebe gu'u lataj xelexe zréaje ne chia' neda' benne'  
ca'

dxelebeza lazre' Lue', Dios cheę benne' Israel ca'.

<sup>7</sup> Lawe' da nazrí'ida' Lue' bulucháchalęe' neda',  
na' lu xel-la' stu' zúaqueza'.

<sup>8</sup> Ca tu benne' zitu' naca' lau bi bícha'dau' ca',  
ne quebe zaj núnbea bi cheę xrna'a neda'.

<sup>9</sup> Lawe' da dxé'le'a gunne xue cheę lizru' dxal-la na  
lu lázrdawa'.

Gate dxelennę' benne' ca' schanni' chiu' Lue', Dios,  
naca ca dxelennę' schanni' chia' neda'.

<sup>10</sup> Gudxezra', ne bęna' gubasa, na' bde cuina' xel-la'  
zi',

na' cheę le' na' bulucháchalęe' neda'.

<sup>11</sup> Cá'anqueze bgacu cuina' zra lana' tuzruj.  
Buluzúę' neda' ca tu da dxulé'e na da baxache' zrentę.

<sup>12</sup> Gulennę' chia' benne' ca' zaj xu'e xu'u lawe',  
na' benne' ca' dxelezuzre' belún le' chia' lu da belul-  
le'.

<sup>13</sup> Neda' bláwizra' Lue', Xrana' Dios, lu zra  
dxezaca ba lazru' Lue'.

Dios, lu xel-la' dxexache lazre' zren chiu', ne lawe' da  
líqueze nacu' weselá cheęntu', bene chia'.

<sup>14</sup> Bebėj neda' lu da stębe zua', naca' ca tu benne'

xu'e lu guzra' situj, ne quebe gu'u lataj cházedxa'.

Bselá neda' lu na' benne' ca' dxelecuídenę' neda'.

Naca' ca tu benne' xu'e lu nisa situj.

<sup>15</sup> Quebe gu'u lataj gatia' ca tu benne' xegache' lu nisa  
situj,

ne quebe gaca' ca tu benne' chu'e lu da situj,  
ne quebe gaca' ca tu benne' cheajchazię' tu lu xędxu  
situj.

<sup>16</sup> Bechebe chia', Xrana' Dios, lawe' da chawe' naca  
xel-la' dxexache lazre' chiu'.

Gudá, gúcale neda', lawe' da zrentę naca xel-la'  
dxexache lazre' chiu'.

<sup>17</sup> Gunná' xque ca da dxaca chia' neda', węn zrin chiu'.  
lawe' da zua' lu da stębelęe, bęn ba xuzre xennu'  
chia'.

<sup>18</sup> Gudá naga zua', ne bselá neda'.

Bselá neda' lawe' da zaj naxánle'e benne' ca'  
dxeledábague' neda'.

<sup>19</sup> Lue' nézqueznu' ca dxulucháchalęe' neda', ne ca  
zua'

lu da stębelęe, ne ca dxulucá'ana dítaje' neda'.

Dxelé'equeznu' xúgute benne' ca' dxelecuídenę' ne-  
da'.

<sup>20</sup> Lawe' da dxelún le' chia' dxedú lazra', ne zua' lu da  
stębe.

Guleza' nu benne' xexache lazre' neda', san quebe nu  
chilá'.

Guleza' nu benne' xelexúe zrentę' neda', san quebe nu  
chilá'.

<sup>21</sup> Bulugawe' neda' da sla',

na' gate gubíleda', buluxí'aje' neda' da zichaj.

<sup>22</sup> Ca naca laní cheę benne' ca' bęn gaca na ca tu  
xralaj naga cheajlecházie',

ne bęn xexaca da ba neza cheę' tu da gun na chea-  
jlecházie'.

<sup>23</sup> Bęn xelechul-la xiaj lawe' cheę québedxa  
xelelé'ęe',

ne bęn tu xelexrízrequeze benne' ca'.

<sup>24</sup> Dute xel-la' dxezrá'a chiu' ble'e benne' ca',  
ne dute xel-la' xichaj zra'a chiu' bę' benne' ca'.

<sup>25</sup> Bęn quebe nu chilá' lu xu'u lizre benne' ca',  
ne quebe nu sua lu xęzr la xu cheę',

<sup>26</sup> lawe' da guláu zi' xuzre' bénnea' bęnu' Lue' wę',  
ne dxuluzrizre' ca naca xel-la' zi' dxedé bénnea' bę'u  
Lue'.

<sup>27</sup> Ble'e dul-la da zaj nabaga benne' ca',  
ne quebe gu'u le' lataj xelaque' tuze benne' xrlátaje  
chiu'.

<sup>28</sup> Busula la benne' ca' lu xiche cheę benne' ca'  
zaj nape' xel-la' nabán,  
ne quebe guzúaju' le' naga zaj naxúaj la benne' xrlá-  
taje ca'.

<sup>29</sup> Neda' zua' lu da ba xa', ne lu da stębelęe.  
Bselá neda', Dios, ne bechisa neda'.

<sup>30</sup> Gúl-laqueza' da güe lá'ana' La Dios chia'.  
Gucá'ana szrena' Le' nen da dxue lá'ana' Le'.

<sup>31</sup> Da nigá xezaca ba lázredxa Dios ca tu bęzre, bę  
gutia' lawe',



u ca tu me', béadu zaj zua lúzuba', ne xrúguba'.  
<sup>32</sup> Xelelé'equeze benne' baxache' ca' da nigá, na' xelebené'.  
 Le biga lau Dios, na' gaca bánquezle,  
<sup>33</sup> lawe' da dxene Xránadxu benne' ca' dxelexázejne',  
 ne quebe dxuzúe' chalá'ala benne' chee' ca', benne'  
 zaj xu'e lizre xia.  
<sup>34</sup> Le güe lá'ana Le', le'e zrale xabáa, ne le'e, zrale lu  
 xezr la xu,  
 ne le'e zrale lawe' nísadau', ne cá'anqueze xúgute  
 da zaj naca ban xúgute lataj caní.  
<sup>35</sup> Dios guselé' benne' zaj zre'e xezre Sión,  
 ne xexune' xezre ca' zaj zra na lu xezr la xu chee  
 benne' Judá ca',  
 na' tu xelezúazqueze' na', ne gata' chee' xezr la xu na'.  
<sup>36</sup> Zri'ine zre sua benne' wen zrin chiu' ca', gaca  
 chee' xezr la xu na',  
 na' benne' ca' zaj nazrí'ine' Lau' Lue' xelezúe' na'.

**70** Bselá neda', Dios.  
 Gúcaleche neda', Xran.  
<sup>2</sup> Ben xelexedué'e, ne xelezúa lu da stębe benne' ca'  
 dxelaca lazre' xelútię' neda'.  
 Ben xelexebigue', ne xelexala benne' ca' dxelebené'  
 lawe' da zua' lu da stębe.  
<sup>3</sup> Ben xelexegá'ana xala benne' ca' dxelún le' chia'.  
<sup>4</sup> Benne' ca' zá'aque' lau Lue' xelebené',  
 ne xelezúe' lu da ba neza.  
 Benne' ca' dxelę'e Lue': "Xcalenu'" lawe' da bseláu' le',  
 tu dxelennázqueze': "įZrentę naca Dios!"  
<sup>5</sup> Zua' lu da stębe, ne nate ni'a na'a.  
 Gudázega gácalęnu' neda', Dios.  
 Nacu' Weselá chia', ne Xrana'.  
 Quebe chenu', Xran.  
**71** Za'a lau' Lue', Xran, chee' guxrú' neda'.  
 Ben québedxa xedué'eda'.  
<sup>2</sup> Gúcale neda', ne bselá neda' nen dutę da naca xrlá-  
 taje chiu'.  
 Bze naga chi'a, ne bselá neda'.  
<sup>3</sup> Nacu' ca tu xiaj xre naga sua' chawe', na' waca xida'  
 naga zu' te zra chizrela.  
 Gunná be'enu' nu guselá neda', lawe' da nacu' Lue'  
 ca tu xiaj xre naga dxaca dipa lazra'.  
<sup>4</sup> Dios chia', bselá neda' lu na' benne' ca' zaj nabéaj  
 xíchaję' Lue',  
 ne lu na' benne' ca' dxelunę' da calęla ne zaj naque'  
 xichaj zra'a,  
<sup>5</sup> lawe' da dxebeza lazra' Lue', Xrana' Dios.  
 Nacu' Bénnea' dxuxúe' neda' gate nácatea' bídau'tę.  
<sup>6</sup> Lue' núxruquezu' neda' gate gúlajtea'.  
 Lue' bęnu' bdxuaja' lu le'ę xrna'a.  
 įTu güe lá'anazqueza' Lue'!  
<sup>7</sup> Belexebane benne' zantę ca naca chia',  
 ne ca naca chiu', dxuxúe xánniu' neda'.  
<sup>8</sup> Ben tu gul-lazqueza' da güe lá'ana' Lue',  
 ne gucá'ana szrena' Lue' du zra.  
<sup>9</sup> Quebe guzú' neda' chalá'ala gate ba guxrúa'.  
 Gate ba bedú lazra', quebe gusanu' neda'.  
<sup>10</sup> Benne' dxeledábage' neda' dxelenné' chia',

na' benne' ca' dxelezá lazre' xelútię' neda' belunę'  
 tuze dizra',  
<sup>11</sup> dxelenné': "Ba bsan Dios le'.  
 Chéajdxu cheajtęladxu le' lawe' da québedxa nu zua  
 nu guselá le'."  
<sup>12</sup> įDios, quebe su' zitu' naga zua!  
 įDios chia', gudázega gácalęnu' neda'!  
<sup>13</sup> įBen xelexedué'ene'!  
 "Ben xelexenite benne' ca' dxeledábage' neda'."  
 "Ben xelezúa xel-la' stu', ne xelege zréaje benne' ca'  
 dxelezá lazre' xelunę' chia' da calęla."  
<sup>14</sup> Neda' tu cueza lázrezqueza' Lue',  
 ne tu güe lá'anazqueza' Lue'.  
<sup>15</sup> Guzenda' bęnneache nacu' xrlátaje,  
 ne tu guzúnzquezda' le' ca da bęnu' bseláu' neda',  
 láqueze quebe nezda' bal-la lasa bseláu' neda'.  
<sup>16</sup> Tu guchálajzqueza' chee' da zrentę da bęnu' Lue',  
 Xrana' Dios,  
 ne gusá'a lazre' bęnneache chee' da xrlátaje  
 cheęquezu'.  
<sup>17</sup> Dios, Lue' bsédenu' neda' gate nácatea' bidau'tę.  
 Dxulę'eda' bęnneache ca naca da zrentę da bęnu'.  
<sup>18</sup> Dios, quebe gusán lazru' neda' gate bache guxrúa',  
 ne ba bgucha'.  
 Bę' neda' lataj guzenda' zri'ine zre sua' ca naca  
 xel-la' waca chiu',  
 ne guzenda' bi za xelalaj ca naca xel-la' wal-la chiu',  
<sup>19</sup> ne ca naca da xrlátaje chiu', da naca na da zrentę,  
 Dios.  
 Lue' ba bęnu' da zaj nácale'ę na zrentę.  
 Dios, įNúzraqueze ca Lue'?  
<sup>20</sup> Lue' bęnu' gudéa' lu da stębe zantę, ne lu da calęla  
 ca',  
 na' gunu' xexaca bana', na' da xula xechisu' neda' lu  
 xędxu ba.  
<sup>21</sup> įGucá'ana szrendxu' neda',  
 ne xue zręnquezu' neda'!  
<sup>22</sup> įCá'anqueze güe lá'anaqueza' Lue', quínnia' da gul-  
 lałęna!  
 įDios chia', gúl-laqueza' chee' da li chiu', quínnia'  
 da du' zríadi'i na du!  
 įNacu' Benne' Lá'azxa chee' benne' Israel ca'!  
<sup>23</sup> įSua' lu da ba neza gate gúl-laqueza' chiu' Lue',  
 ne béqueze bęnne'du xu'a, bęnne'du' bexa'u!  
<sup>24</sup> įTu guchálajzqueza' chee' da xrlátaje chiu' te zra  
 chizrela,  
 lawe' da bęnu' belexedué'e, ne guleque zréaje  
 benne' ca' belunę' ba xuzre xelunę' chia' da calęla!  
**72** įDios, bęn guchi'a wenná bea da dxaca cheęntu'  
 ca dxuchí'aquezu' Lue',  
 ne bęn xelaca xrlátaje zri'ine wenná bea na'!  
<sup>2</sup> Nadxa le' guchi'a chee' bęnneache chiu' ca naca  
 da naca xrlátaje,  
 ne ca naca da li guchi'ę chee' benne' chiu' ca' zaj zuę'  
 lu da ba xa'.  
<sup>3</sup> Lu xi'a ca' xebeza zri lazre' bęnneache chiu',  
 ne lu xí'adu ca' xelezúe' lu da naca chawe'.  
<sup>4</sup> Guchi'ę chee' benne' ca' zaj zuę' lu da ba xa'

lu xezre cheentu',  
 ne guselé' bidu ca' chee benne' ca' dxelexázejne',  
 ne guzría xi'e benne' ca' dxulusaca zi'e bénneache.  
 5 Xelezrebe' Lue' dxácaté ne zua gubizra,  
 ne beu' lawe' tu cuen tu cuen bénneache.  
 6 Gaca wenná bea na' ca nisa xiu' da dxaca naga ba  
 nadín,  
 ne ca xrlé'ela da dxaca dxela lu xezr la xu.  
 7 Lu zra chee wenná bea na' gaca da xrlátaje,  
 ne xelebeza zri lazre' bénneache dxácaté ne zua beu'.  
 8 Nna be'e duté xezr la xu,  
 ne dxu'a xegu Eufrates, ga zrinté dxu'a nísadau'.  
 9 Lau le' xuluzú zribe benne' ca' zaj zré'e xezr la xu,  
 na' guzérxuje' lazre' benne' guledábague' Le'.  
 10 Benne' wenná bea chee xezr la xu Tarsis,  
 ne wenná bea ca' chee tu tu cue' xezr la xu zitu' ca'  
 xeledé'e zaj nu'e da xulunézruje' chee',  
 na' benne' wenná bea chee xezr la xu Sabá,  
 ne wenná bea chee Seba xulunézruje' chee' da gun-  
 ní'a.  
 11 Xúgute benne' wenná bea ca' xuluzú zribe' lau le',  
 na' benne' xúgute cue' xezr la xu xeluné' zrin chee'.  
 12 Le' guselé' benne' ca' dxelexázejne',  
 benne' dxululáwizre' le',  
 ne guselé' benne' ca' zaj zué' lu da ba xa',  
 ne quebe sua nu benne' gácaléne' le'.  
 13 Xexache lazre' benne' xache' ca', ne benne' ca'  
 dxelexázejne',  
 na' guselé' benne' xache' ca' chee xelaca bané'.  
 14 Xexá'awe' benne' xache' ca' lu na' benne' wen lazre'  
 ca',  
 ne benne' snia ca'.  
 Guné' ba xuzre guselé' benne' ca' lu na' benne' ca'  
 dxelutie' benne'.  
 15 Gaca ban wenná bea nigá,  
 na' xulunézruje' chee' oro chee xezr la xu Sabá,  
 na' tu xelenábazqueze bénneache Dios gácaléne' le',  
 ne te zra chizrela xelenabe' Dios guné' gaca chawe'  
 chee wenná bea na'.  
 16 Tu zrígadauze zrua' xtila xelazé' lu xezr la xu,  
 ne lu xí'adu ca',  
 da cuále'e na ca da dxebía lu xi'a Líbano,  
 na' benne' zaj zré'e lu xezre ca' xelane' ca xixre' zé lu  
 xezr la xu.  
 17 Tu súazqueze la benne' wenná bea na'.  
 Tu xuluchálajzqueze' chee la le' dxácaté ne zua gu-  
 bizra.  
 Ne chee le' gaca da ba neza chee bénneache xúgute  
 cue' xezr la xu,  
 na' xelenné' chee' naca chee' da ba neza zrenté.  
 18 Xrlátaje naca Xránadxu Dios, Dios chee benne' Is-  
 rael ca',  
 na' tuze Le' dxuné' da dxexebánedxu.  
 19 Xrlátaje naca La Le' da naca na da xabáa chadía  
 chacanna,  
 na' duté xezr la xu nigá xeledé'ene' da xabáa chee'.  
 ¡Ca'an naca na, ne ca'an gaca na!

20 Nigá dxexuzre xrtizra' David, da dxuchálajléne'  
 Dios.

David nigá naque' zri'ine Isaí.

**73** Da líqueze ba ben Dios da chawe' chee benne'  
 Israel ca',

benne' ca' zaj naque' du lazre' lau Dios.

2 Neda' ba guzúa cheajcházia' lu dul-la.

Ba guzúa guna' tu da zrinna,

3 lawe' da guca' zre'e lazre' ne chee benne' gunní'a  
 ca',

gate ble'eda' ca dxelepe ban benne' ca' zaj nabéaj  
 xíchajé' Dios.

4 Benne' caní quebe zaj zué' stébe chee xel-la' gute,  
 lawe' da zaj zúale'e chawe'.

5 Quebe dxeledé'e lu da ba xa' ca da dxeledé xúgute  
 benne' ca',

ne quebe dxelezaca zi'e ca da dxaca chee xezícadxa  
 bénneache.

6 Chee le' na' dxulucá'ana szren cuine'.

Tu dxelexúbezquezne' dxeluné' da caléla.

7 Dxelánnie' lawe' da dxelagu cháwélé'e.

Dxelezíle'e ca naca da dxelezá lazre'.

8 Dxelún le' chee Dios, ne dxelenné' caléla ca da zrin-  
 naj

da xeluné'.

Duté xel-la' dxulucá'ana szren cuina dxuluchálaje' da  
 zrenté.

9 Dxelenné' chee da ca' zaj zua xabáa,  
 ne dxuluchálaje' ca benne' zaj nape' duté xezr la xu.

10 Chee le' na' xúgute bénneache dxeluné' le' tu zren,  
 ne dxelezí'e ca da dxelenná benne' gunní'a ca'.

11 Dxelenná benne' ca' dxeluné' da caléla:

“¿Ájazra gaca neze Dios?

¿Dxelé'equeze Bénnea' zué' na'ala?”

12 Benne' caní zaj naque' benne' zaj nabéaj xíchajé'  
 Dios,

na' dxelepe bané' lu xezr la xu, ne dxelaque' gunní'a.

13 Da líqueze, dácheze naca guca' du lazre',  
 ne quebe bi da caléla nuna'.

14 Gudéa' lu da ba xa' tu zra tu zra,  
 ne gudéa' xel-la' zi' xúgute zra.

15 La nnia' neda': Guchálaja' ca dxuluchalaj benne' ca',  
 na' si xe'a bénneachedu ca' chiu', Dios.

16 Gate blaba lazra' chee chéajni'ida' da nigá,  
 guca na stébele'e chia' neda'.

17 Gate guxu'a lu lataj lá'azxa chee Dios,  
 na' guque be'eda' da gaca chee benne' ca' gate chea-  
 jsé.

18 Da líqueze nunu' chee benne' ca' cheajlecházie',  
 ne gunu' xelebía xí'queze'.

19 Chadité gulebía xí'queze'.

Belexenité' lu xel-la' gulezrébele'e.

20 Zaj naque' ca tu da ble'edxu lu xela da dxexenite na  
 gate dxexebandxu.

Ca'an gaca, Xran, gate chasu', guzú' chalá'ala ca da  
 gulaca benne' ca'.

21 Gate guca' zre'e lazre' chee benne' ca',  
 guzúa lázrdawa' lu da stébe.

22 Lawe' da guca' xichaj zide', na' quebe guxéajni'ida' guca' ca tu bę xixre' lau Lue'.  
 23 Tu guzúazqueza' nen Lue', na' guca'u na'a xabęla.  
 24 Bsi'u neda' cheę guna' da dxulé'enu' neda', na' te nigá xezí' lu na'u neda' lu xabáa chiu'.  
 25 Quebe nu xetú zua chia' xabáa san tuzu' Lue', ne quebe nu xetú dxezá lazra' lu xęzr la xu, san tuzu' Lue'.  
 26 Dxelexedú lazre' bęla' dxen chia', ne lázrdawa'. Dios naqueę' Benne' dxutipeę' lazra', ne naqueę' da ba neza chia' chadía chacanna.  
 27 Benne' ca' dxelexecuaseę' naga zu' xelexenítieę'. Guzría xi'u xúguteę' benne' ca' xelexebeaj xíchaję' Lue'.  
 28 Ca naca chia' neda', dxaca chawe' chia' lawe' da gu-biga' lau Dios.  
 Tu dxebeza lázrezqueza' Xránadxu Dios, cheę guchálajqueza' ca naca da zrentę da nuneę'.  
**74** Dios, ¿tu chí'izqueze nuzú' netu' chalá'ala? ¿Dxezra'u netu', nácantu' ca zrila' chiu' ca'?  
 2 Bsá lazre' bėnneache chiu', benne' ca' guzi'u nédxu-dauteę.  
 Benne' ca' bexa'u cheę gunu' xelaqueę' benne' cheęquezu', benne' ca' zaj zreęę lu xi'a Sión nigá, naga zúaquezu' Lue'.  
 3 Gudá xedajnná'u ca nabía xi' xęzre nigá, ne ca naca da calęla da belún benne' ca' dxeledábagueę' netu', lu lataj lá'azxa chiu'.  
 4 Dxelebezre xa'a benne' ca' dxeledábagueę' Lue' laduj naga zaj nazraga bėnneache chiu'. Zaj nuzúę' nigá da dxululé'e na xu'untu' lu na' benne' ca'.  
 5 Buluzría xi'e xęzre nigá, ca dxun tu benne' dxineę' ca naca xaga zaj zę tu xi'a.  
 6 Na'a nen xa waga cheę' ca', ne nen xaga cheę' ca', ba buluzría xi'e ca naca lechítaję cheę xudau' chiu'.  
 7 Ba buluzézxieę' lataj lá'azxa chiu'. Bulucá'ana dítaję' xu'u lizru'. Buluchínnaję' na.  
 8 Lu lázrdaweę' gulenné': "Guzría xí'tegadxu na tu chí'ize."  
 Ba buluzézxieę' xúguteę' xu'u naga bezrágantu' chiu' lu xęzr la xu chiu'.  
 9 Québedxa dxelé'entu' da la'axza ca' da dxululé'e na da guchísantu' lu xęzr la xu cheęntu'. Québedxa nu chilá' benne' guchálaję' waláz chiu', ne quebe nu zua ládujla netu', benne' nézeneę' bá-taqueze lantu'.  
 10 Dios, ¿Báta cueza na xulucháchalę benne' ca' netu', benne' ca' dxulusaca zi'e netu'? ¿Chadía chacanna welenné benne' dxeledábagueę' lue' schanni' cheę Lau'?  
 11 ¿Bizr cheę na' quebe dxebéaj lazru' benne' ca'? ¿Bizr cheę na' quebe dxuzría xi'u benne' ca' dxelunę' da calęla?  
 12 Lue', Dios, nacu' Wenná Bea chia' nédxudauteę. Lué'queze dxuseláu' bėnneache dutę xęzr la xu.

13 Xel-la' waca chiu' bęnu' nísadau' chupa la'a. Gula'u xichaj bę schanni' ca' lu nísadau'.  
 14 Bzúzruju' xichaj bę schanni' lęba' leviatán, Na' bęnu' gulagu bę xixre' lęba', bea ca' zaj zra'ba' lu xu bizre.  
 15 Bęnu' gulaj nisa beaj, ne nisa xęgu ca'. Bsebizru' xęgu zri'a ca'.  
 16 Chiu' Lue' naca te zra, ne cá'anqueze chiu' naca dx-ęla.  
 Lue' bzu' beu', ne gubizra naga dxeledé na.  
 17 Lue' bzu' tu chí'ize ca naca da zaj dę xęzr la xu nigá. Lue' bęnu' beu' la ca', ne beu' zaga ca'.  
 18 Bsa lazre' da nigá: Benne' ca' dxeledábagueę' lue' ba zaj nun lę' chiu' Lue', Xran. Benne' xala ca' ba gulenné' schanni' cheę Lau'.  
 19 Quebe gusanu' lu na' benne' zaj naqueę' ca bę snia ca' benne' ca' nazrí'iquezu', ne quebe gal-la lazru' tu chí'ize bėnneache chiu' zaj zuę' lu da ba xa'.  
 20 Gunná' ca naca xel-la' wezría da bęnu', lawe' da gáteteze naca chul-la lu xęzr la xu, na' zaj zra' benne' ca' dxelunę' da zrinnaj.  
 21 Quebe gu'u lataj xelegá'ana lu xel-la' stu' benne' ca' zaj zuę' lu da baxache'. Benne' dxelezaca zi'e, ne benne' dxelexázrjeneę' xelúe lá'anę' Lau'.  
 22 ¡Guzé, Dios! ¡Ben ca ba gunnú'! ¡Bsa lazre' ca dxelún benne' xala ca', dxelún lę' chiu' te zra te zra!  
 23 Quebe gal-la lazru' ca da gulenná benne' ca' dxeledábagueę' lue'. Da schaga dxelún benne' ca' dxeledábagueę' Lue' tu dxéznqueze na.  
**75** "Xcalenu'", dxęntu' Lue', Dios: "Xcalenu'." Dxuzentu' bėnneache zúalęnu' netu', ne ba nunu' da ca' dxexebánequezentu'.  
 2 Dxenná Dios: "Ba nuzúa' zra guchi'a cheę bėnneache. Guchi'a ca naca da xrlátaję.  
 3 Lácala xru' dutę xęzr la xu, ne xelezrize xúguteę da zaj naca ban na, neda' gúxruqueza' ca naca lane xęzr la xu na'.  
 4 Dxapa' benne' xala ca': Quebe gáwele. Dxapa' benne' ca' dxelunę' da calęla: Quebe gucá'ana szren cuínale.  
 5 Quebe guxrén lázrele xel-la' wal-la cheęle. Quebe gácale benne' lázxdau zide'."  
 6 Quebe za xel-la' szren naga dxalaj gubizra, ne naga dxebía na, ne quebe za na lę'e xixre' lawe' lataj.  
 7 Dios naqueę' Bėnnea' guchi'e cheę bėnneache. Dxucá'anę' cá'aze tu benne', ne dxucá'anę' szren xetú benne'.  
 8 Dios nuxreę' tu zriga', da nazratę na xrise uva wal-la, da zeaje na xel-la' dxezrá'a cheę'.

Dxulálaję' na cheę xelę'aj benne' ca' dxelunę' da caleła.

Xelę'aję' na xebizrte na.

<sup>9</sup> Neda' guzénquezda' bėnneache,  
ne gul-la' da güe lá'ana' Dios cheę Jacob.

<sup>10</sup> Lę' guchínnajqueze' xel-la' waca cheę benne'  
węn da caleła ca'.

Gusezrendxę' xel-la' waca cheę benne' xrlátaje ca'.

**76** Zaj núnbea benne' Judá ca' Dios,  
na' ládujla benne' Israel zrentę nácaqueze La  
Lę'.

<sup>2</sup> Lu xęzre Salem zua lataj lá'azxa cheę'.

Lu xęzre Sión zua naga zúaqueze'.

<sup>3</sup> Lataj na' gudíchaję' xaga nalá xéche'ze ca',  
ne xia da dxucu'uj na benne' lu wedil-la,  
ne ca naca da dxuluchínenę' lu wedil-la.

<sup>4</sup> Benne' xabáa nacu' Lue',  
ne Benne' wál-ladxa ca xi'a zri'a ca'.

<sup>5</sup> Xeajlechaze benne' wal-la ca', ne guláse dínnaję'.  
Netú benne' wal-la ca' quebe belexchisa neę cheę  
xelunę' wedil-la.

<sup>6</sup> Dios cheę benne' Israel ca', gate gudil-lu' benne' ca',  
guláse dínnaj bzrina' ca', ne benne' gulebíę'-ba'.

<sup>7</sup> Nacu' Lue' Benne' zrébedxu.

¿Nu benne' gaca se' lau Lue' gate dxezra'u?

<sup>8</sup> Xabáate gunná'u, na' guchi'u cheę bėnneache.  
Dxelezrebe bėnneache lu xęzr la xu, na' dxelebeze'.

<sup>9</sup> zra seu' Lue', Dios, cheę guchi'u cheę bėnneache,  
ne cheę guseláu' xúgutę benne' dxexruj lazre' zaj  
zręę lu xęzr la xu.

<sup>10</sup> Da líqueze xel-la' dxelezá'a cheę bėnneache  
gaca na tu da gucá'ana szren na Lue'.

Guzúa zriu' xel-la' dxelezá'a cheę bėnneache zaj  
nagá'anę'.

<sup>11</sup> Le chebe lázrele da gunle cheę Dios,  
na' le gun da na' cheę Xránadxu, Dios cheęle.

Xúgutę benne' zaj zręę du gabi'ila xeledęę,  
na' xulunęzruję' da zaj nuę cheę Dios,

Bėnnea' dxezrébedxu.

<sup>12</sup> Guzaguę' da xu'u lu xichaj lázxdau benne' blau ca'.  
Lę' dxuchebe' benne' wenná bea ca' zaj zręę lu xęzr la  
xu.

**77** Nen chi'a bláwizra' Dios.

Bláwizra' Dios, na' Lę' buzę nague' chi'a.

<sup>2</sup> Guxu'a lau Xránadxu lu zra guzúa' lu da ba xa'.  
Chizrela guchisa na'a lau Lę', ne quebe guzúa zria'.

Quebe bę'a lataj nu benne' xue zrenę' neda'.

<sup>3</sup> Bsa lazra' cheę Dios, ne guzúa' stębe.  
Gudawa' zria lawę', ne bedú lazra'.

<sup>4</sup> Begúę' bchigala chia'.  
Guzúa' stębeleęę, ne quebe guca guchálaja'.

<sup>5</sup> Blaba lazra' ca naca zra nédxute.  
Ca naca iza zan ca' da ba guledę cheę na.

<sup>6</sup> Bsa lazra' ca naca da bil-la' chizrélala,  
ne blaba lázrequeza' ca zaj naca na, na' gunaba be'  
xu'a:

<sup>7</sup> ¿Guzúa Xránadxu dxi'u chalá'ala tu chi'ize  
ne québedxa gácalęę' dxi'u?

<sup>8</sup> ¿Cabátadxa xexache lazre' dxi'u?

¿Cabátadxa gunę' ca da guchebe lazre'?

<sup>9</sup> ¿Gul-la lázrequeze Dios xexache lazre' dxi'u?

¿Dxezréę dxi'u, na' québedxa xexache lazre' dxi'u?

<sup>10</sup> Nadxa gunnía': Caní dxuna' lawe' da quebe chawe'  
zua'.

Cheę lę na' cheajsá lazra' cheę xúgutę da zrentę  
da bęn Dios zrentę lu iza ba guledę cheę na.

<sup>11</sup> Cheajsá lazra' cheę da zrentę ca' da bęn Jah.

Awe', cheajsá lazra' cheę da bęnu' nédxudautę da ca'  
dxexebánentu'.

<sup>12</sup> Gulaba lazra' ca naca xúgutę da ba bęnu',  
ne guchálaja' ca zaj naca da nunu'.

<sup>13</sup> Dios, lá'azxa naca da dxusédenu' netu' ca guntu'.

¿Zua xetú Dios naqueę' benne' zren ca naca Dios  
cheentu'?

<sup>14</sup> Lue' nacu' Dios, dxunu' da ca' dxexebánentu'.  
Blé'enu' xúgutę bėnneache lu xęzr la xu ca zrentę  
naca xel-la' waca chiu'.

<sup>15</sup> Nen xel-la' waca chiu' bexa'u bėnneache chiu',  
zri'ine zre sua Jacob, ne zri'ine zre sua José.

<sup>16</sup> Xęgu nisa ca' belelé'en Lue', Dios.

Belelé'e xęgu nisa ca' Lue', na' belezrébeleęę na.  
Cá'anqueze gulezúa stębe nísadau' situj ca'.

<sup>17</sup> Nisa xiuj zila bdxuaj na lu beuj bza ca',  
ne gulennéleęę guziu', ne gulépeleęę xesa.

<sup>18</sup> Lu be' bdunu' ben guziu' chiu' da gunnéleęę na.  
Bulusaní' xesa guziu' ca naca xęzr la xu.

Guzúa stębe, ne guzrize xęzr la xu.

<sup>19</sup> Lawe' nísadau' guza'u,  
ne lawe' nisa zila ca' gudéquezu',  
ne quebe naca bea naga bléaju'.

<sup>20</sup> Guchę'u bėnneache chiu' ca zri'la' ca'  
lu na' Moisés, ne lu na' Aarón.

**78** Le xen, le'e, bėnneache chia', ca da dxusédeda'.  
Le xen xanne' ca da dxuchálaja'.

<sup>2</sup> Guchíneda' dizra' ca da dxuluchalaj benne' sina ca',  
na' guzėjajni'ida' le'e da ca' gulezúa na bagácheze  
gate nate,

<sup>3</sup> da ca' bendxu, ne bėnbeadxu na,  
da ca' belixru be'e xra xrtáudxu ca' dxi'u.

<sup>4</sup> Quebe gucáchedxu na lau zrí'inedxu ca'.  
GuzénquezdXu zrí'inedxu ca' ca naca xel-la' szren  
cheę Xránadxu,

ne ca naca xel-la' waca cheę', ne ca zaj naca da zren  
ca'

da bęnę'.

<sup>5</sup> Bzue' tu da nadxixruj bea na da xelún benne' Israel  
ca',

ne da bdxixruj be'ęnę' ca' da xelún zri'ine zre sua Ja-  
cob.

Gunná bé'ęnę' xra xrtáudxu ca' xuluzenne' bi cheę' ca'  
ca naca da gunná bé'ęnę',

<sup>6</sup> cheę xelúnbea zrí'ine' bidu ca' za xelálajbe' ca naca  
na,

na' bi caní xuluzenbe' zrí'inebe' da na',

<sup>7</sup> cheę xuluxrén lázrebe' Dios,  
ne quebe xelal-la lázrebe' da ca' bęn Dios,

ne chee xuluzúabe' dizra' da ca' gunná be'ë.  
 8 Quebe xelácabe' ca gulaca xra xrtáube' ca'.  
 Benne' ca' quebe buluzúe' dizra' chee', ne  
 guledábague' Lë',  
 ne quebe buluzúa chúchue' ca buluxrén lazre' Dios,  
 ne quebe gulaque' li lazre' lu da naca chee' Dios lu  
 be' zaj nácaqueze'.

9 Benne' zrí'ine zre sua Efraín, benne' zaj nu'e  
 da dxuluchíne' lu wedil-la  
 buluzrúnnuje' naga dxaca wedil-la.

10 Quebe belune' ca naca xel-la' wezría da ben Dios,  
 ne quebe buluzúe' dizra' da gunná bé'ene'.

11 Gulal-la lazre' da ca' ben Dios,  
 ne xel-la' waca ca' blé'ene' Lë'.

12 Lau xra xrtawe' ca' bene' xel-la' waca ca'  
 lu xezr la xu Egipto, ne lu xezr la xu Zoán.

13 Gusalje' neza lu nísadau' naga guledé benne' ca'.  
 Bene' nísadau' na' ca xi'a ca' chalá'a weaj.

14 Te zra blé'ene' benne' ca' neza nen tu beuj bza da  
 xjácálene',  
 ne chizrela nen beuj bza da naca na ca tu xi'.  
 15 Gulé'ë xiaj ca' naga naca xu bizre,  
 na' bxí'aje' benne' ca' nisa da gulaj na lë'ë xiaj ca'  
 ca tu xegu nisa.

16 Bene' gulaj tu xegu nisa lë'ë xiaj na',  
 na' bzriluj na ca tu xegu zren.

17 Lácála bene' caní belúndxaqueze' dul-la lau Dios  
 lë'ë xixre' lawe' lataj,  
 ne guledábague' Dios nape' dutë xel-la' szren.

18 Gulegú'u lazre' xulu'zúa zrië' Dios.  
 Gulenabe' xelawe' ca da dxelezá lazre' lë'.

19 Gulenné' chee' Dios, gulenné':  
 ¿Wazeque Dios na' gunne' da gágudxu lë'ë xixre'  
 nigá?

20 Da líqueze gulé'ë xiaj na', na' gulaj nisa na',  
 na' bzriluj na ca tu xegu zren.  
 ¿Wazéquequezne' gunne' dxi'u xeta, ne gunne' bëla'  
 da gágudxu?

21 Chee' lë' na' bzra'a Xránadxu gate benne' da na',  
 ne gusel-lë' xi' da bzezxe na bal-la bënneache chee',  
 na' bsdexí'ulë'ë xel-la' dxezrá'a chee' nen benne' Israel  
 ca',

22 lawe' da quebe guléajlë'ë chee' Dios,  
 ne quebe buluxrén lazre' Lë' guselé' lë'.

23 Gunná bé'ene' beuj zran xabáa,  
 ne gusalaje' dxa xu'u chee' xabáa,

24 na' bene' bxinnaj xeta maná ca dxinnaj xiuj chee'  
 gulagu benne' chee' na.  
 Bnézruje' lë' da naca ca zrua' chee' xabáa.

25 Gulawe' da dxelagu gubáz chee' xabáa ca'.  
 Gusél-lalë'ë da gulawe', na' guléajtequezene'.

26 Bene' guca be' da za' chalá'ala naga dxalaj gubizra,  
 ne xel-la' waca chee' bene' guca be' za' chalá'ala  
 naga dxedé gubizra beu' zaga,

27 na' gusel-lë' chee' benne' ca' bëla' ca zë bxrte xu,  
 béadu zaj zua xrila naxanba' ca xuzre' da dxe' dxu'a  
 tu xegu zren.

28 Bene' guléxrujba' chale'aj chee' benne' ca'.

Guléxrujba' dútequeze naga zaj zua xu'u xide chee'.  
 29 Gulawe'-ba', ne guléajquezene'.

Dios bnézruje' chië' ca naca da gulaca lazre'.

30 Gate quebe ne xelélajene', ne ne dxelawe'-ba',  
 31 bzra'a Dios benne' ca',  
 na' bëtië' benne' zaj nácadxe' benne' wal-la,  
 ne benne' Israel ca' zaj nácadxe' benne' waca.

32 Láqueze bene' caní, na' belúndxaqueze' dul-la,  
 ne láqueze belélé'ene' xel-la' waca ca' da bene',  
 quebe buluxrén lazre' Lë'.

33 Chee' lë' na' guchugue' zra chee' benne' ca' ca  
 tu be' dxecá'adxu,  
 ne ca zaj naca iza da gulezúe', bdeë' lë' lu da zi' da xa'.

34 Gate bëtië' bal-la benne' ca', na' xezícadxe'  
 belexaque' chee' Dios.  
 Belexebí'i lazre', ne du lazre' buluchálajlëne' Lë'.

35 Xeajlesá lazre' naca Dios Benne' dxuxúe' lë',  
 ne Dios na' nape' dutë xel-la' szren naque' Bënnea'  
 bxá'awene' lë',

36 san quebe guca li lazre' da gulenné'  
 lawe' da belún lazre' lau Dios.

37 Quebe gulaque' li lazre' nen Lë',  
 ne quebe belune' du lazre' ca naca xel-la' wezría  
 chee'.

38 Dios bexache lazre' chee' benne' ca',  
 ne bnite lawe' dul-la belune', ne quebe bzria xi'ë lë'.  
 Zane' lásatë bzue' chalá'ala xel-la' dxezrá'a chee',  
 ne quebe bzre'ë lë' dutë ca da dxéquene'.

39 Xeajsá lazre' Dios zaj naque' bëla' dxen.  
 Zaj naque' ca tu be' da dxedé na, ne quebe xezrín na.

40 Zane' lasa guledábague' Lë' lë'ë xixre' lawe' lataj  
 na',  
 ne zane' lasa buluzúe' Lë' baxache'.

41 Zane' lasa buluzúe' Dios chalá'ala,  
 ne buluché'ë Dios lá'azxa chee' benne' Israel ca'.

42 Gulal-la lazre' ca naca xel-la' waca zren chee',  
 ne ca bene' lu zra na' bxá'awene' lë' lu da zi' da xa',

43 gate bene' xel-la' waca ca' lu xezr la xu Egipto,  
 ne blé'ene' da ca' da dxebánedxu lu xezr la xu Zoán.

44 Bexune' xegu chee' ca' dxen,  
 na' québedxa guca da xele'aj benne' Egipto ca'.

45 Gusel-lë' bë'a ládujla benne' ca', bë buludeba' lë'  
 xel-la' zi'.

Gusel-lë' bluzru ca' buluzría xiba' xezr la xu chee'.

46 Gusel-lë' biche zu ca' guláguba' lina chee',  
 ne buluzría xiba' da zaj zua lu xezr la xu chee'.

47 Gusel-lë' xiaj bezxe' zri'a da bzria xi na lba uva chee'  
 ca',  
 ne gusel-lë' da zaga da bsebizre na xaga higo chee'  
 ca'.

48 Gusel-lë' xiaj bezxe' zri'a da bëte na bë xixre' chee'  
 ca',  
 ne gusel-lë' xesa da bëte na zrila' chee' ca'.

49 Bdeë' benne' Egipto ca' lu xel-la' zi' zren,  
 lawe' da bzrá'alë'ë benne' ca',  
 na' guca da ca' ca zánete' gubáz ca' chee' xel-la' gute.

50 Quebe bzague' xel-la' dxezrá'a chee',  
 ne quebe bnite lawe' chee' chee' quebe xelátie',

san beŋie' le' nen tu xízrawe' wal-la.  
 51 Beŋie' bi biu nedxu chee' benne' ca',  
 bi biu nedxu ca' chee' benne' Egipto ca'.  
 52 Nadxa beche'e' benne' chee' ca' ca tu benne'  
 dxeche'e' zrila' ca',  
 ne bsi'e' le' le'e' xixre' lawe' lataj.  
 53 Bsi'e' le' zri'a chawe', ne quebe bi belezrebe',  
 san gulate benne' guledábage' Le' lu nísadau'.  
 54 Beche'e' le' lu xezr la xu lá'azxa chee',  
 naga zua xi'a nigá da guca cheéqueze'.  
 55 Bebéaje' benne' zaj zre'e' lu xezr la xu na' lau  
 benne' chi'e' ca',  
 na' gulé'e' xezr la xu chee' cha chee' benne' Israel ca',  
 ne bzre'e' le' lizre benne' ca' bebéaje'.  
 56 Da xula buluzúe' Dios chalá'ala, ne buluché'e'  
 Dios, nape' duté' xel-la' szren.  
 Quebe buluzúe' dizra' da ca' gunná be'ene' le'.  
 57 Da xula guledábage' Dios ca belún xra xrtawe' ca'.  
 Gulaque' ca tu bdxequé' xala chee' xaga nalá  
 xéche'ze.  
 58 Buluché'e' Le' ne chee' lataj ca' naga bulucá'ana  
 szrene' bedáu' xiaj xaga ca',  
 ne ne chee' bedáu' xiaj xaga chee' ca' bzrá'ale'e' Dios.  
 59 Bzra'a Dios gate blé'ene' na,  
 na' gucuídele'e'ne' benne' chee' ca', benne' Israel.  
 60 Guleaj xíchaje' xu'u xide lá'azxa chee' zua na xezre  
 Silo,  
 xu'u xide na' guzuáqueze' ládujla benne' ca'.  
 61 Be'e' lataj belecá'a benne' ca' dxeledábage' dxi'u  
 xi'ina lá'azxa chee',  
 da na' dxul'é' na xel-la' waca, ne xel-la' szren chee'.  
 62 Bzre'e' benne' chee' ca',  
 na' bdee' le' lu na' benne' ca' belúti'e' le'.  
 63 Benne' wal-la ca' guláti'e' lu wedil-la.  
 Quebe nu zra' benne' wegú', benne' xelezúalene'  
 nu'ula wegú' ca'.  
 64 Cá'anqueze gulate bxruze ca' lu wedil-la,  
 na' nu'ula chee' bxruze ca' quebe gulebezre xache'  
 chee' bxruze ca'.  
 65 Nadxa guca Xránadxu ca tu benne' dxexebane' lu  
 bchigala.  
 Guque' ca tu benne' wal-la dxebezre xé'e' gate ba  
 né'aje'  
 xrise uva wal-la.  
 66 Na' blague' benne' guledábage' Le',  
 ne bca'ane' le' cá'aze chadía chacanna.  
 67 Bzue' chalá'ala zri'ine zre sua José,  
 ne quebe bequ'é'e' zri'ine zre sua Efraín,  
 68 san bequ'é'e' zri'ine zre sua Judá,  
 ne xi'a Sión, da na' nazrí'ile'ene'.  
 69 Lu xi'a na' bene' xudau' lá'azxa chee',  
 da guca na ca naca da zua na xabáa.  
 Bzua chúchu'e' na chadía chacanna,  
 ca nácaqueze xezr la xu nigá.  
 70 Bequ'é'e' David, benne' wen zrin chee'.  
 Bebéaje' le' naga zaj zra' zri'ine ca'.  
 71 Beche'e' le' naga zue' dxuxúe' zri'ine ca' zaj nache'e'-  
 ba' bedau',

chee' gaque' wenná bea, benne' guxúe' bénneache  
 chee',  
 zri'ine zre sua Jacob, benne' zaj naque' benne' Israel  
 ca'.  
 72 Dute' xel-la' du lazre' chee' bxue' benne' ca'.  
 Bxue' le' duté' xel-la' waca zren chee'.  
 79 Dios, ba gulú'u benne' xezr la xu zitu' ca' lu xezr  
 la xu  
 chee' bénneache chiu'.  
 Bulucá'ana dítaje' xudau' lá'azxa chiu'.  
 Buluzría xi'e' xezre Jerusalén.  
 2 Bulucá'ane' be'la' dxen chee' wen zrin chiu' ca' naga  
 gulagu be' zua xrila le'.  
 Be' xixre' ca' guláguba' be'la' dxen chee' benne' ca'  
 zaj naque' chiu'.  
 3 Ca nisa bululálaje' dxen chee' benne' ca' xúgute' lu  
 neza  
 chee' xezre Jerusalén,  
 ne quebe nu chilá' benne' gucacha' benne' ca'.  
 4 Benne' xezr la xu walizre' cheentu' ca'  
 dxulucháchalene' netu'.  
 Benne' zaj zre'e' xezre walí'zr ca' dxulucá'ana dítaje' ne-  
 tu',  
 ne dxelún le' cheentu'.  
 5 ¿Bata cuézaqueze gaca caní cheentu', Xran?  
 ¿Tu chí'izqueze dxezra'u netu'?  
 ¿Tu chí'izqueze gaca xel-la' dxezrá'a chiu' ca tu xi'?  
 6 Bzra'a benne' xezr la xu ca' quebe zaj núnbe'e' Lue',  
 na' benne' xezr la xu ca' quebe dxululáwizre' Lue',  
 7 lawe' da ba buluzría xi'e' zri'ine zre sua Jacob,  
 ne bulucá'ana dítaje' xu'u lizre benne' ca'.  
 8 Quebe gusebagu' netu' ca naca da zrinnaj da belún  
 xra xrtautu' ca'.  
 Gudázega xexache lazru' netu', lawe' da dxezraga  
 lául'e'entu'.  
 9 Gúcale' netu', Dios, nacu' Bénnea' dxuselé' netu',  
 chee' gaca ba Lau'.  
 Bselá netu', ne bnite lau dul-la nuntu' chee' xegá'ana  
 szren Lau',  
 10 lawe' da xelenná bénneache: "¿Ga na Dios chee'  
 benne' ca'?"  
 Bebéaj lazre' benne' ca' belúti'e' wen zrin chiu' ca'.  
 11 Caní ben chee' xelelé'e' xúgute' benne' chiu' ca' zaj  
 xu'e'  
 lu na' benne' ca' dxeledábage' netu'.  
 Dute' xel-la' waca zren chiu' bselá benne' ca' ba zaj  
 nachugue'  
 chee' xelatí'e'.  
 12 Bunezruj chee' benne' xezr la xu walizre' cheentu'  
 ca' xegazre cue'  
 ca da calé'la da belune', bulucá'ana dítaje' Lue', Xran.  
 13 Netu', bénneache chiu', nácantu' ca zri'ine chiu' ca',  
 güe' lá'anaquezentu' Lue' chadía chacanna.  
 Tu cuen tu cuen zri'ine zre suantu' gúl-laquezentu' da  
 güe' lá'anantu' Lue'.  
 80 Bene cheentu', Lue' dxuxú' benne' Israel ca',  
 Lue' na', dxuxú' zri'ine zre sua José ca zrí'adu  
 ca',

ne dxe'u lataj blau chiu' da zua na lówela querubín ca'.

<sup>2</sup> Ble'e xel-la' szren chiu' lau zri'ine zre sua Efraín, ne Benjamín, ne Manasés.

Ble'e xel-la' waca chiu', ne gudá guseláu' netu'.

<sup>3</sup> Beché' netu', Dios.

Bexache lazre' netu', na' lantu'.

<sup>4</sup> Xránantu' Dios, napu' dutę xel-la' waca,

¿bata chajsequeze zra'u netu',

ne quebe xennu' ca da nábantu' Lue'?

<sup>5</sup> Bzúale'u netu' lu xel-la' dxewí'ine lazre',

ne bzílale'u nisa dxebézrentu'.

<sup>6</sup> Be'u lataj xęzr la xu walizre ca' bulucá'ana díťaje' netu',

na' benne' ca' dxeledábague' netu' belún le' cheętu'.

<sup>7</sup> Beché' netu', Dios, napu' dutę xel-la' waca.

Bexache lazre' netu', na' lantu'.

<sup>8</sup> Bebéaju' tu zrigu' lba uva lu xęzr la xu Egipto da naca na

bénneache chiu'.

Blagu' benne' xęzr la xu gulezré'e nigá, na' guzu' nigá zrigu' lba uva na'.

<sup>9</sup> Gú'unu' lba uva na' cheę gula na.

Bdélé'e lue zrigu' lba uva na', na' gucu na xęzr la xu na'.

<sup>10</sup> Gulú'u na zrul-la xúgute xi'a ca',

na' zruze na ca' gulegú'u na zrul-la xaga cedro zren ca'.

<sup>11</sup> Gulechiluj zruze na, belezrintę na dxu'a nísadau', ne belezrintę na dxu'a xęgu Eufrates.

<sup>12</sup> ¿Bizr cheę na' gucá'u le'aj da naxechaj na le' na?

Na'a xúgute benne' dxeledé na' dxelebanę' da zixre cheę na.

<sup>13</sup> Dxuluchuchu dxululéaj cuche xixre' ca' lba uva na', na' bę xixre' ca' dxeláguba' na.

<sup>14</sup> Bedá cheętu', Dios, napu' dutę xel-la' waca.

Gunná' netu' ga na' zu' xabáa, ne gudá xedajnná'u lba uva chiu'.

<sup>15</sup> Gudá, guseláu' lba uva nigá, da gúzaquezu'.

Bechuj cheę lba uva na', ba bzua chuchu' gaca na chiu'.

<sup>16</sup> Benne' ca' dxeledábague' netu' ba gulechúgue' lba na',

ne ba guláduę' na xi'.

Gunná' benne' ca' lu xel-la' dxezrá'a chiu',

ne bzria xi' benne' ca'.

<sup>17</sup> Bzua chuchu, ne bxue benne' ca' ba guca'u,

benne' xęzr la xu na' ba nuzúa chuchu'.

<sup>18</sup> Cabátadxa cueaj xíchajntu' Lue' xecha lasa.

Bcache chawe' netu', naca bantu', na' güe lánanantu' Lau'.

<sup>19</sup> Xránantu' Dios, napu' dutę xel-la' waca, beché' netu'.

Bexache lazre' netu', na' lantu'.

**81** Lu dutę xel-la' dxebé le gul-la cheę Dios, Bénnea' dxutipe'

lázredxu.

Lu da ba neza cheęle le cuezre xa'a lau Dios cheę

zri'ine zre sua Jacob.

<sup>2</sup> Le gul-la, ne le capa xidedau'.

Le quinne xrtan da con zríadi'i na du, ne da dxúl-lalęne.

<sup>3</sup> Le gucuezre luzu da dxulucuezre' gate naca beu' dxe'ene,

da naca na zra nuzúadxu gundxu laní lówaxa.

<sup>4</sup> Naca na tu da dxun na ba xen xelún benne' Israel

ca',

da bdxixruj bea Dios xelún zri'ine zre sua Jacob.

<sup>5</sup> Bzue' na ca tu da gulé'e lau na zri'ine zre sua José

gate beledxúaje' lu xęzr la xu Egipto,

naga benda' tu xrtizra' bénneache da quebe guxéa-jni'ida'.

<sup>6</sup> Gunná Dios: "Begúa' xua' da buludé'e' benne' chia' ca'.

Bsezrá'a benne' chia' ca' da zi'i."

<sup>7</sup> Lu da ba xa' da guzúale, blówizrale neda', na' bselá' le'e.

Becheba' cheęle naga nagacha' lu beuj bza gate na' gunnéle'e guziu',

na' bxua' ájala gunle naga zaj dę beaj nisa zaj nazí le Meriba.

<sup>8</sup> Le xene, bénneache chia', na' gusízreda' le'e.

Le'e, benne' Israel, che dxaca lázrele sile da dxennía',

<sup>9</sup> quebe gápale tu díos cheę benne' xula,

ne quebe guzú zríbele lau tu díos cheę benne' zitu'.

<sup>10</sup> Neda', Xránale, naca' Dios cheęle.

Bebéaja' le'e lu xęzr la xu Egipto.

Le salaj dxú'ale, na' gunna' da gágule.

<sup>11</sup> Bénneache chia' quebe belúe lazre' da gunnía'.

Benne' Israel ca' quebe gulaca lazre' xelezí' lu ne'e neda'.

<sup>12</sup> Cheę le' na' bsana' benne' ca' lawe' da gulaque' lázxdau zide'.

Belunę' ca da guléquene' xrlátaje.

<sup>13</sup> Che la gulebé' gunne xue bénneache chia' cheę da gunnía',

ne che la belún benne' Israel ca da ble'eda' le',

<sup>14</sup> na' chaditę bzria xi'a benne' guledábague' le',

ne gudíl-lalęna' benne' guledíl-lalęne' le'.

<sup>15</sup> Che la belún benne' Israel caní,

na' benne' ca' dxelecuídenę' Xránadxu buluzúe' xrtizre',

(san chadía chacanna zaj nabague' zria),

<sup>16</sup> na' Dios gunę' xelawe' zrua' xtila cháwedau',

ne gunę' xelélajquezne' nen bzrína'dau'.

**82** Zua Dios naga zaj nazraga benne' dxuluchi'e cheę bénneache cheę'.

Dios dxuchi'e cheę benne' ca' dxuluchi'e cheę bénneache.

<sup>2</sup> Dxenná Dios: "¿Bátadxa guchí'ale cheę bénneache chia' da quebe naca xrlátaje,

ne gápale ba lówana benne' ca' zaj nabéaj xíchaje' Dios?"

<sup>3</sup> Le gácale benne' xache' ca', ne bidau' węzębe ca'.

Le gun da xrlátaje cheę benne' baxache' ca'

ne cheę benne' ca' dxelexázrjene'.

4 Le guselá benne' ca' dxeledé' lu da ba xa',  
ne benne' ca' quebe bi zaj nape'.  
Le guselá benne' ca' lu na' benne' ca' zaj nabéaj xícha-  
je' Dios.

5 Quebe bi zaj nézene', ne quebe dxeléajni'ine',  
na' dxeledé' lu da chul-la.

Dxuluzrizre' ca naca da zaj de lu xezr la xu.

6 Neda' gunnía': Le'e nácaquezle ca dios ca',  
ne nácale xúgutele ca zrí'inequeze Dios szrenté,

7 Wátej ca dxelate xezícadxa bénneache,  
na' cheajcházele ca cheajchaze núteteze benne' dxen-  
ná be'e.

8 ¡Guxasa, Dios!

¡Bchi'a chee bénneache zaj zra' lu xezr la xu,  
lawe' da naca duté xezr la xu chiu' Lue'!

83 ¡Dios, quebe sua zriu'!

Quebe su' zrize, Dios, ne quebe gusezxuj dxu'u,

2 lawe' da dxelebezre xa'a benne' ca' dxeledábage' Lue',

ne dxulucá'ana szren cuina benne' ca' dxelecuídené' Lue'.

3 Bagácheze ba zaj nuné' tuze dizra' bi xeluné' chee bénneache chiu',

ne ba zaj nuné' bi xeluné' chee benne' ca' dxuxúe-  
quezu' Lue'.

4 Gulenné': "Le chu'u, guzría xidxu benne' ca'  
chee québedxa xelaque' tu cue' xezr la xu,  
ne québedxa nu sua benne' cheajsá lazre' la Israel."

5 Ba beluné' tuze dizra'.

Zaj nuné' tuze dizra' xeledábage' Lue'

6 benne' Edom ca', ne benne' Ismael ca',

ne benne' Moab ca', ne benne' zri'ine zre sua ca' Agar,

7 ne benne' Gebal ca', ne benne' Amón ca', ne benne'

Amalec ca',

ne benne' Filistea ca', ne benne' zaj zre'e xezre Tiro.

8 Cá'anqueze benne' Asiria ca' zaj nuné' le' tuze.

Xúgute benne' caní dxeluné' zrin chee zri'ine zre sua  
Lot.

9 Bën chee benne' caní ca' benu' chee benne' Madián  
ca',

ne ca' benu' chee Sísara, ne ca' benu' chee Jabín dxu'a  
xegu Cisón,

10 benne' ca' gulátie' lu xezr la xu Endor,  
na' belexaque' ca' xrc'e beze da gun na' bebe lu  
xezr la xu.

11 Bën gaca chee benne' blau ca' chee benne' caní  
ca' guca chee Oreb, ne chee Zeeb,

ne bën gaca chee benne' dxelenná bé'ene' benne'  
caní

ca' guca chee Zeba, ne chee Zalmuna,

12 lawe' da gulenná benne' caní: "Gaca cheedxu xezr  
la xu

naga zaj zra' bénneache chee Dios."

13 Dios chia', bën xelaque' ca' xizre bebe da dxua be'  
gate dxedube na.

Bën xelaque' ca' xrlácue xia xéladu ca' da dxua be'  
bdunu'.

14 Ca dxun tu xi' da dxuzezxe na tu xi'a zren,

ne ca dxun xi' da dxuzezxe na tu din zren,

15 ca'an gudáu zi' xuzre benne' caní tu lu be' bdunu',  
ne bchebe le' nen tu be' bdunu' chiu'.

16 Bën xelxedué'ele'ene',

ne bën xelape' Lue' ba lá'ana, Xran.

17 Bën xeleque zréajene' ne xelezúa stébele'e tu  
chí'izqueze.

Bën xelxegá'ana dítaje', ne xelxenítie'.

18 Bën xelxúnbe'e nacu' Lue' Xránantu' Dios.

Tuzu' Lue' nacu' Dios zrenté lawe' duté xezr la xu.

84 Nazrí'ile'eda' xudau' chiu' Lue', Dios, napu' duté  
xel-la' waca.

2 Dxaca lázrele'eda' sua' ga na',

ne dxezá lazra' sua' lu xudau' chiu', Xran.

Duté da naca', ne duté lázrdawa' dxul-la' chiu' Lue',  
Dios ban.

3 Ba belún chjegu ca' xrú'uneba',

na' buchuj ca' zaj de lataj naga dxuluzríaba' biadu  
cheeba' ca'

naga zua lu cugu chiu' Lue', Dios, napu' duté xel-la'  
waca.

Nacu' Lue' Wenná Bea chia', ne Dios chia'.

4 Ba neza zrenté naca na chee benne' ca' zaj zre'e xu-  
dau' chiu'.

Chadía chacanna xelúe lá'anaqueze' Lue'.

5 Ba neza zrenté naca na chee benne' ca',

Lue' dxuzúa chuchu' le',

benne' ca' dxelezá lazre' chjaque' xi'a lá'azxa chiu', xi'a  
Sión.

6 Gate dxeledé' lache' bizre nazí le na

Lache' Nisa Dxebézredxu,

dxexaca na lataj naga dxalaj nisa,

na' gusezrá nisa xiuj ca' zaj naca beaj ca'.

7 Dxelácadxe' benne' wal-la dxácaté ne zaj xu'e neza  
lawe' da xelélé'ene' Dios lu xi'a lá'azxa chee', xi'a Sión.

8 Bene, Xran, ca naca da dxenaba' Lue', Dios, napu'  
duté xel-la' waca.

Bene, Dios, nacu' Dios chee Jacob.

9 Bën da xrlátaje chee benne' wenná bea cheentu',  
Dios,

benne' wenná bea na' guca'u Lue'.

10 Cháwedxa naca sua' tu zraze lu xudau' chiu'

quézcala sua' chi gaxúa iza naga xula.

Dxaca lazredxa' sua' dxa xu'a xudau' chee Dios chia'  
ca tu benne' nada'u,

quézcala súaqueza' tu lizra' zaca naga quebe zua

Dios.

11 Xránadxu Dios naque' Benne' dxuxúe' dxi'u,

ne Benne' Wenná Bea xabáa cheedxu.

Dxuné' dxi'u da chawe' duté xel-la' zri'i lazre' chee',

ne dxuné' dxelapa bénneache dxi'u ba lá'ana.

Quebe xezúene' zi' guné' da chawe' chee benne' ca'  
zaj naque' du lazre'.

12 ¡Dios, napu' duté xel-la' waca!

¡Ba neza zrenté naca na chee benne' ca' dxuluxrén  
lazre' Lue'!

85 Benu' da xrlátaje chee bénneache chiu', Xrana'  
Dios.



Benu' belexelá zri'ine zre sua Jacob,  
 benne' ca' gulu'e lu na' benne' zitu' ca'.  
 2 Bnite lau' da zrinnaj da belún bénneache chiu'.  
 Bdeu' chalá'ala ca zaj naca dul-la chee benne' ca'.  
 3 Bzua zriu' xel-la dxezrá'a chiu',  
 ne bsanu' xel-la' xichaj zra'a chiu'.  
 4 Bēn xezúantu' lu da ba neza chee xel-la' weselá  
 chiu', Dios,  
 ne québedxa zra'u netu'.  
 5 ¿Tu chí'izqueze zra'u netu'?  
 ¿Wazrá'aquezu' tu cuen tu cuen zri'ine zre suantu'?  
 6 ¿Québedxa gunu' xexaca bantu',  
 chee súantu' lu da ba neza lau Lue'?  
 7 ¿Xran, bexache lazre' netu', ne bselá netu'!  
 8 Guzé naga' da nne Xrana' Dios.  
 Nne' da guzúa na bénneache chee'  
 lu xel-la' dxebeza zri lazre',  
 chee québedxa xelún benne' lá'azxa chee' da xálaze.  
 9 Da líqueze Le' zúatequeze' guselé' benne' ca' dx-  
 elezrebe' Le',  
 chee sua da xabáa chee' lu xezr la xu cheedxu.  
 10 Zaj nazraga xel-la dxexache lazre', ne da li chee  
 Dios.  
 Zaj naca tuze da xrlátaje, ne xel-la' dxebeza zri lazre'.  
 11 Da li chee' gusezrá na xezr la xu nigá,  
 na' sel-le' da xrlátaje chee' da za xabáa.  
 12 Xránadxu gúnnaqueze' dxi'u da cháwedau',  
 na' gúnnae'e xezr la xu cheedxu.  
 13 Nu benne' naque' xrlátaje waca xezrine' lau Dios,  
 na' guné' gundxu ca da ba blé'ene' gundxu.  
**86** Bze naga, Xran, ne bene chia',  
 lawe' da zua' lu da ba xa', ne dxexájrjeda'.  
 2 Bxue neda' lawe' da naca' chiu'.  
 Bselá neda', Dios chia', naca' wen zrin chiu',  
 ne dxuxrén lazra' Lue'.  
 3 Bexache lazre' neda', Xrana' Dios,  
 lawe' da dxuláwizra' Lue' te zra chizrela.  
 4 Bēn béle'eda' neda', wen zrin chiu',  
 lawe' da dxuzúa cuina' lau Lue', Xran,  
 5 na' Lue', Xran, nacu' xrlátaje, ne dxunite lau' cheen-  
 tu'.  
 Zúatequezu' xexache lazru' benne' ca' dxululáwizre'  
 Lue'.  
 6 Xrana' Dios, bene da dxuchálajlęna' Lue',  
 ne bze naga ca da dxenaba' lau'.  
 7 Lu zra sua' lu da stébelę'ę wannéqueza' Lue',  
 lawe' da dxexechébequezu' Lue' chia'.  
 8 Xran, quebe nu chilá' Dios ca Lue',  
 ne quebe nu dxun ca da dxunu' Lue'.  
 9 Xelélé' bénneache dutę xezr la xu da benu' Lue',  
 na' xelúe lá'anaqueze' Lue', Xran,  
 ne xulucá'ana szrenę' Lau' Lue',  
 10 lawe' da nacu' Lue' szren, ne dxunu' da dxexebá-  
 nentu'.  
 Tuzu' Lue' nacu' Dios.  
 11 Bsede neda' da dxaca lazru' guna', Xrana' Dios,  
 na' guna' ca naca da li chiu'.  
 Gunná be'e lázrdawa' chee zreba' La cuinu'.

12 Dute lázrdawa' güe lá'anaqueza' Lue', Xrana' Dios,  
 ne gucá'ana szrénqueza' Lau' chadía chacanna,  
 13 lawe' da zúatequezu' xexache lazru' neda',  
 ne bseláu' bénne' du xu'a lu lataj ba xa'.  
 14 Dios, belasa benne' dxulucá'ana szren cuinę',  
 ne dxeledábague' neda',  
 na' benne' xichaj zra'a ca' belunę' tuze dizra' xelútię'  
 neda',  
 ne quebe dxelezrebe benne' ca' Lue'.  
 15 Lue', Xrana', nacu' Dios dxexache lazru' netu',  
 ne nacu' zren lazre',  
 ne quebe dxezrá'azeu', san zúatequezu' xexache  
 lazru' netu',  
 ne nacu' li lazre'.  
 16 Gunná' ca naca chia', ne bexache lazre' neda'.  
 Bēna chia' neda', wen zrin chiu', xel-la' waca chiu',  
 na' bxue neda', zri'ine nu'ula wen zrin chiu'.  
 17 Ble'e neda' tu da gaca bea na gaca chawe' chia',  
 ne bēn xelélé'e benne' ca' dxelecuídene' neda' da na',  
 ne bēn xellexedué'ene',  
 lawe' da nacu' Lue', Xrana' Dios, Bénnea' gúcalęne'  
 neda',  
 ne bexúe zrene' neda'.  
**87** Lane xezre Sión zria na lu xi'a lá'azxa.  
 2 Nazrí'idxa Xránadxu Dios lataj naga dxuluchi'a  
 benne' zaj zře'ę xezre Sión,  
 ca nazrí'ine' xúgutę xu'u lizre zri'ine zre sua Jacob.  
 3 Da xrtantę ca' dxelenná bénneache ca naca xezre  
 chee' Dios.  
 4 Cheajsá lazra' lu xezr la xu Egipto, ne lu xezr la xu  
 Babilonia  
 ga na' zaj zra' bénneache zaj núnbe'e neda'.  
 Le nna' xque, lu xezr la xu Filistea, ne lu xezre Tiro, ne  
 lu  
 xezr la xu Etiopía gulalaj benne' caní zaj naque' chia'.  
 5 Ca naca chee xezre Sión nnia':  
 Benne' nigá, ne bénnea' gulálaje' ga na', na' neda',  
 Dios zrentę, guzúa chúchua' xezre na'.  
 6 Gate gulaba Xránadxu Dios benne' ca' zaj naque'  
 chee',  
 nne': "Benne' nigá gúlaje' lu xezre na'."  
 7 Benne' ca' dxelul-lę', ne benne' ca' dxeline' xide xe-  
 lenné':  
 Ca naca da ba neza zúantu' lu xezre na'.  
**88** Xran, nacu' Dios dxuseláu' neda'.  
 Te zra, ne chizrela dxuláwizra' Lue'.  
 2 Bene da dxuchálajlęna' Lue',  
 ne bze naga da dxuláwizra' Lue'.  
 3 Dxedú lazra' lu da caleła ca' da dxaca na chia',  
 ne ba zua' gatia'.  
 4 Dxeleque bénneache neda' ca tu benne' gate,  
 lawe' da dxátele'ę ni'a na'a.  
 5 Nagá'ana' cá'aze ládujla benne' gate.  
 Naca' ca benne' gulátię' lu wedil-la, ne zaj de' xędxu  
 ba ca',  
 benne' ca' québedxa dxajsá lazru', Dios,  
 ne québedxa zaj xu'e lu na'u Lue'.  
 6 Dxaca chia' cáteze ba nuzú' neda' tu xędxu zren

naga naca chul-la, ne nácaleḡe situj.  
<sup>7</sup> Dxéqueda' dxezrá'le'u neda'.  
 Da dxaca chia' naca na ca dxazia' zran xeajxruza zri'a cheḡ nísadau'.  
<sup>8</sup> Benu' belexebiga bi ljwezra' ca' naga zua'.  
 Benu' neda' ca tu da dxusegute na benne' ca'.  
 Naca' ca tu benne' xu'e lizre xia ne quebe gaca xedxúaje'.  
<sup>9</sup> Dxelechul-la xiaj lawa' ne cheḡ da dxezí dxezaca'.  
 Xúgute zra dxuláwizra' Lue', Xrana' Dios.  
 Dxechisa na'a lau Lue'.  
<sup>10</sup> ¿Dxúnquezu' xel-la' waca cheḡ xabáa dxácalenu' benne' gate ca'?  
 ¿Dxelexasa benne' gate ca' dxelúe lá'aneḡ Lue'?  
<sup>11</sup> ¿Dxuluchalaj benne' zaj nagacheḡ lu xedxu ba cheḡ xel-la zri'i lazre' chiu',  
 na' dxuluchalaj cheḡ da li lazre' chiu' benne' zaj xu'e lataj chul-la cheḡ benne' gate ca'?  
<sup>12</sup> ¿Welexúnbea benne' zaj xu'e lataj chul-la na' ca naca da zrentḡ da dxunu',  
 na' welexúnbea benne' zaj xu'e naga quebe nu dxajsá lazre' le'  
 ca nacu' xrlátaje?  
<sup>13</sup> Neda' dxuláwizra' Lue', Xrana' Dios.  
 Xúgute zila dxezrín lau' da dxenaba' Lue'.  
<sup>14</sup> ¿Bizr cheḡ na' dxebéaj xíchaju' neda', Xran?  
 ¿Bizr cheḡ na' quebe dxenná'u neda' cheḡ gácalenu' neda'?  
<sup>15</sup> Dxezí dxezaca', ne ba zua' gatia'.  
 Nácatea' bi cúide'tḡ dxedéa' xel-la' zi' da dxudeu' neda',  
 na' dxedú lazra'.  
<sup>16</sup> Dxéqueda' dxezrá'le'u neda'.  
 Da dxuchebu' neda' ba bsedú na lazra'.  
<sup>17</sup> Zaj naxechaj da caní neda' du zra.  
 Dxulusaca zi na neda' gáteteze na'.  
<sup>18</sup> Benu' belexebiga bi ljwezra' ca' naga zua',  
 na' tuze da naca chul-la dxedále na neda'.  
**89** Tu gúl-lazqueza' cheḡ xel-la' zri'i lazre' chiu',  
 Xran.  
 Guzenda' tu cuen tu cuen zri'ine zre súantu' nacu' li lazre'.  
<sup>2</sup> Nezda' tu súazqueze xel-la zri'i lazre' chiu',  
 ne chadía chacanna zua xel-la li lazre' chiu',  
 cáteze zúaqueze xabáa.  
<sup>3</sup> Lue' gunnáu': "Bena' xel-la wezría nen bénnea' ba gucá'a.  
 Guchebe lazra' cheḡ David, wen zrin chia',  
<sup>4</sup> gunnia': Guna' tu cházqueze zri'ine zre su'.  
 Guna' xelenná be'e tu chí'izqueze lu waláz chiu'."  
<sup>5</sup> Benne' zaj zra' xabáa dxelúe lá'aneḡ Lue',  
 ne cheḡ da zrentḡ ca' da dxunu', Xran,  
 ne ne cheḡ xel-la' li lazre' chiu', naga zaj nazrague'.  
<sup>6</sup> Quebe nu zua xabáa, benne' naqueḡ ca Lue', Xran.  
 Quebe nu zua benne' szrentḡ, benne' naqueḡ ca Lue'.  
<sup>7</sup> Benne' zaj zra' xabáa dxelapeḡ Dios ba lá'ana,  
 na' xúgute benne' ca' zaj nazraga cheḡ dxelezrebeḡ Le'.

<sup>8</sup> Xran, nacu' Dios cheḡ benne' zanteḡ, benne' zaj zra' xabáa.  
 Quebe nu zua, benne' naqueḡ ca Lue', Xran.  
 Nacu' Benne' wál-lateḡ, ne tu nácazquezu' li lazre'.  
<sup>9</sup> Xu'u lu na'u xeajxruza zren cheḡ nísadau'.  
 Gate dxelasa xeajxruza ca' Lue' dxebeque zriu' na.  
<sup>10</sup> Bchúchuju' benne' Egipto ca', na' belexegá'aneḡ ca tu da gate.  
 Beḡe dínnaju' benne' ca' dxeledábagueḡ lue' nen na'u wál-lateḡ.  
<sup>11</sup> Chiu' Lue' naca xabáa, ne chiu' Lué'queze naca xezr la xu.  
 Benu' xezr la xu nigá, ne da ca' zaj nnita lawe na.  
<sup>12</sup> Benu' da de chalá'a naga za' be' zaga,  
 ne da de chalá'a naga dxedé gubizra beu' zaga ca'.  
 Xel-la dxelebé dxelul-la chiu' xi'a Tabor, ne xi'a Her-món.  
<sup>13</sup> Benne' wál-lateḡ nacu' Lue'.  
 Da zrentḡ naca xel-la waca chiu', ne nagá'ana szren na.  
<sup>14</sup> Lu da xrlátaje, ne lu da li lazre' dxenná be'u.  
 Lu xel-la zri'i lazre', ne lu da li lazre' zaj zua ca da dxunu'.  
<sup>15</sup> Ba neza zrentḡ naca na cheḡ benne' ca' dxelul-leḡ da dxue lá'ana na Lue',  
 ne zaj zuḡ lu xel-la naxaní' chiu', Xran.  
<sup>16</sup> Ne chiu' Lue' dxelebéleḡeneḡ du zra,  
 ne dxulucá'ana szrentḡ Lue' ca naca da xrlátaje chiu'.  
<sup>17</sup> Lué'queze nacu' xel-la wal-la cheḡ benne' ca',  
 ne xel-la xrtan cheḡ'.  
 Dxúnnadxu' netu' xel-la' waca lawe' da ca' dxéquenu' xrlátaje.  
<sup>18</sup> Xránadxu Dios dxucu'ujeḡ dxi'u,  
 na' Dios lá'azxa cheḡ benne' Israel ca' naqueḡ Wenná Bea cheḡdxu.  
<sup>19</sup> Nédxudautḡ bchálaju' lu da blé'enu' benne' wen zrin chiu' ca', benne' zaj naqueḡ li lazre', gunnáu':  
 Ba gucá'a tu benne' wal-la ládujla bénneache chia',  
 ne ba bzua' leḡ gaqueḡ wenná bea, ne dxácalena' leḡ.  
<sup>20</sup> Ba gucá'a David, wen zrin chia'.  
 Bzúaqueza' leḡ gaqueḡ wenná bea.  
<sup>21</sup> Neda' tu gácalezqueza' leḡ.  
 Xel-la waca chia' gutípaqueza' lazreḡ.  
<sup>22</sup> Benne' ca' guledábagueḡ Leḡ quebe xelezéqueneḡ bi xeluneḡ cheḡ,  
 na' benne' ca' dxeluneḡ da calela quebe xelezéqueneḡ xuluchúchujeḡ leḡ.  
<sup>23</sup> Guchúchujqueza' benne' dxeledábagueḡ Leḡ, ne gucuasa'  
 benne' ca' lau leḡ.  
 Guna' weḡ benne' ca' dxelecuídeneḡ leḡ.  
<sup>24</sup> Tu zrí'izqueza' leḡ, ne gaca' li lazre' nen leḡ,  
 na' ne chia' neda' gápadxeḡ xel-la' wal-la.  
<sup>25</sup> Guna' nna be'e dutḡ dxu'a nísadau' zren,  
 ne dutḡ dxu'a xegu Eufrates.  
<sup>26</sup> Leḡ xḡeḡ neda': "Lue' nacu' Xra'.

Nacu' Dios chia', dxucu'uju' neda', ne dxuseláu' neda'."

<sup>27</sup> Neda' guzúa' le' ca zri'ina' blau,  
na' nna bé'ene' xúgute benne' wenná bea zaj xęzr la xu.  
lu xęzr la xu.

<sup>28</sup> Tu chí'izqueze nuzúa' cheę' xel-la' zri'i lazre' chia',  
na' ca naca xel-la' wezría chia' gaca líqueze na nen le'.

<sup>29</sup> Guna' tu cházqueze zri'ine zre suę',  
na' xelenná be'e lu waláz cheę' dxácatę ne zua xabáa.

<sup>30</sup> Che xulusán zri'ine zre sua David da nadxixruj be'a,  
ne che quebe xelune' ca da nuchi'a cheę',

<sup>31</sup> ne che xelecuasę' lu da dxenná be'a,  
ne che quebe xelune' ca da dxapa' le',

<sup>32</sup> na' gu'a le' zrise lawe' da dxeledábague' neda',  
ne quina' le' xide lawe' da dxelune' da calęla.

<sup>33</sup> Quebe gusana' ca nazrí'ida' David,  
ne quebe gusana' gaca' li lazre' nen le',

<sup>34</sup> ne quebe gal-la lazra' xel-la' wezría da nuna',  
ne quebe guchá'a ca da ba gunniá'.

<sup>35</sup> Tu lásaze bzetaj cuina' gucheębe lazra',  
na' cabata' gun lazra' cheę' David,

<sup>36</sup> gunniá': Tu cházqueze zri'ine zre suę',  
na' xelenná be'e lu waláz cheę' lawa' neda'

dxácatę ne zua gubizra.

<sup>37</sup> Xel-la' dxenná bea cheę' tu sua chúchuzqueze na  
ca zua beu' zran xabáa.

Tu sua chúchuzqueze na dxácatę ne zua xabáa.

<sup>38</sup> Lue', Dios, guleaj xíchaju', ne bzu' chalá'ala bënnea'  
guca'u,

ne dxezrá'le'u le'.

<sup>39</sup> Nuzú' chalá'ala xel-la' wezría bënle'nu' David,  
węn zrin chiu',

ne nucá'ana dítaju' xel-la' dxenná bea cheę'.

<sup>40</sup> Nuxrínna'ju' ze'e da naxechaj na xęzre zręntau'  
cheę',

ne nuzría xi'u ca naca lataj wal-la cheę' cheę' wedil-la.

<sup>41</sup> Xúgute bënneache, benne' dxeledaze ga na' dxele-  
banę'

cheę' da zaj dę cheę',

na' benne' xęzre walíZR cheę' dxelún le' cheę'.

<sup>42</sup> Ba bęnu' bedxúaj chawe' benne' guledábague' le',  
na' dxelebé'ęne'.

<sup>43</sup> Bęn dítaju' da ca' dxuchínene' lu wedil-la,  
ne quebe gúcalęnu' le' lu wedil-la na'.

<sup>44</sup> Ba gudú' ca naca da xrtantę cheę',  
ne nucá'ana dítaju' xel-la' dxenná bea cheę'.

<sup>45</sup> Bęnu' naque' ca tu benne' gula gate ne zuę' iza  
cuide' cheę',

ne bsi'u le' xel-la' stu'.

<sup>46</sup> Xrana' Dios, ¿bátaqueze quebe xennu' cheętu'?  
¿Tu chí'izqueze dxezrá'aquezu' netu'?

<sup>47</sup> Bsa lazre' látega sua' lu xęzr la xu.  
Látega nunu' xel-la' nabán cheę' xúgute bënneache.

<sup>48</sup> Quebe zua nu benne' gaca banę' tu chí'izqueze.  
Xúgute' xelatię'.

Quebe zua nu benne' le' lu na' xel-la' gute.

<sup>49</sup> Xran, ¿ba bsanu' David, ne québedxa nazrí'inu' le',  
ca bzetaj cuinu' gucheębe lazru' zrí'iquezenu' le'?

<sup>50</sup> Gunná' xque, Xran, ca dxelún le' chia' neda',  
węn zrin chiu',  
ne ca dxuchaga lawa' da dxelún lala benne' xúgute  
xęzr la xu

chia' neda'.  
<sup>51</sup> Benne' ca' dxeledábague' lue' dxulucá'ana dítaje'  
bënnea' guca'u Lue', Xran.

Dxulucá'ana dítaje' le' gáteteze zéaje'.

<sup>52</sup> Ba neza zrentę gaca Xránadxu Dios chadía chacan-  
na.

Ca' naca na, ne ca' gaca na.

**90** Xránantu' Dios, ba cua ba cua,  
Lue' nacu' ca tu xu'u naga zra cháwentu'.

<sup>2</sup> Nédxudautę ca za gunu' xi'a zri'a ca',  
ne ca za sua xęzr la xu, ne bënneache,  
na' nédxudautę, ne lu da za za' nácaquezu' Lue' Dios.

<sup>3</sup> Dxu'u bënneache xelexaque' da gulaque',  
dxelexaque' xu xrte.

<sup>4</sup> Chiu' Lue' chi gaxúa iza zaj naca na ca neaje, da ba  
gudę na,

ne ca tu chí'idau'ze chizrela.

<sup>5</sup> Dzegú' bënneache ca dxun guba'u,  
da dxua na xúgute xizre laga ca'.

Zaj naque' ca tu bchigala da dxexenite na gate dxexe-  
bandxu.

<sup>6</sup> Zaj naque' ca tu xixre' da dxegula na che zílala.

Dxegula na, ne dxelá'tę na xiaj,

na' xelate' zua gubizra dxelechugue' na, na' dxebizre  
na.

<sup>7</sup> Dxebía xi'ntu' lawe' da dxezra'u netu'.

Stébele'ę zúantu' lawe' da dxezrá'le'u netu'.

<sup>8</sup> Dxenna'u ca da calęla da nuntu'.

Dxulé'enu' lówela zria da nabágantu'.

<sup>9</sup> Dxuzáchiu' iza cheętu' lawe' da dxezra'u netu'.

Dxelexedú iza cheętu' ca tu be' da dxecá'antu'.

<sup>10</sup> Ca zaj naca zra naca bantu', zaj naca na ga xun chi  
iza,

na' che nácantu' benne' wal-la, waca bantu' du tá-  
palalaj iza,

san ca zaj naca iza ca', dxedentu' xel-la' zi',  
ne dxéquentu' zęde.

Chadí dxeledé iza ca', na' xenítentu'.

<sup>11</sup> ¿Nuzra núnbea xanne' ca naca xel-la' dxezrá'a chiu'?

¿Nuzra núnbea ca naca xel-la' xichaj zra'a chiu'?

<sup>12</sup> Ble'e netu' ca láteze zaj naca zra cheętu'

cheę gácantu' benne' dxelėjni'ine'.

<sup>13</sup> Xran, bexaca netu' tuze.

¿Bátadxa chenu'?

Bexache lazre' netu', węn zrin chiu'.

<sup>14</sup> Tu tu zila bzua xichaj lázrdauntu' xel-la' zri'i lazre'  
chiu',

na' dutę xel-la' dxebe' tu gul-lazquezentu' chiu'

xúgute zra naca bantu'.

<sup>15</sup> Bęnna netu' zane' iza cheę bentu' ca zaj naca iza

bsaca zi'u netu',

ne ca zaj naca iza guzúantu' lu da stębe.

<sup>16</sup> Bę lataj netu', węn zrin chiu', le'entu' da zrentę da  
dxunu',

ne xelélé'e zri'ine zre suantu' da xabáa chiu'.  
 17 Xránantu' Dios, bën gaca cheentu' da chawe' chiu'.  
 Bën chepe ban ca naca zrin dxuntu'.  
 Awe', Xran, bën chepe ban ca naca zrin dxuntu'.  
**91** Bénnea' dxuxrén lazre' Xránadxu Dios chee  
 guxúe' le',  
 ne dxuzúe' Dios, Bénnea' napé' duté xel-la' waca,  
 chee gácalēne' le',  
 2 waca xē'e Dios: Nacu' Bénnea' dxebeza lazra',  
 ne Bénnea' dxucache chawé' neda'.  
 Nacu' Dios chia', na' dxuxrén lazra' Lue'.  
 3 Dios gucache chawé' lue' lu xúgute' da stēbe da  
 quebe zaj nalá',  
 ne lu xúgute' xízrawe' da dxelute na bēnneache.  
 4 Gucache chawé' lue' ca dxun tu bedxuj dxézreba'  
 biadu cheēba' zran xrlába', na' chu'u chawu' lu na' Lē'.  
 Xel-la' li lazre' chee' gácalē na lue', ne gucache chawe  
 na lue'.  
 5 Quebe bi guchebe lue' chizrela, ne quebe bi da  
 stēbe te zra,  
 6 ne quebe bi xízrawe' chee' da chul-la,  
 ne quebe bi da calēla ca' da dxelute na bēnneache te  
 zra.  
 7 Welate chi gaxúa bēnneache cuitu' lue',  
 ne gaxúa gaxúa bēnneache gáguze naga zu',  
 san quebe bi sacu' lue'.  
 8 Wanna'u, na' walé'enu'  
 ca ba xa' xeledé benne' ca' dxelunē' da calēla.  
 9 Nuzú' Xránadxu Dios ca Benne' dxebeza lazru', ne  
 Dios,  
 Bénnea' napé' duté xel-la' waca, chee gucache chawé'  
 lue'.  
 10 Chee le' na' quebe bi da calēla gaca na chiu',  
 ne quebe bi xízrawe' chu'u na lizru'.  
 11 Dios gusebage' gubáz chee' xabáa chee' ca' chee  
 xelácalēne' lue',  
 na' xuluxúe' lue' gáteteze chéaju'.  
 12 Xeluxre' lue' lu ne'e chee' quebe ga'a xiaj ni'u.  
 13 Guléajquezu' beze xixre' ca', ne bēla' ca',  
 beze xixre' schanní' ca', ne bē snia ca'.  
 14 Dxenná Dios: "Guselá' xúgute' benne' ca' zaj  
 nazrí'ine' neda',  
 ne gucache chawa' benne' ca' dxelexechebe' naca'  
 Xranē'.  
 15 Gate xelenné' neda', na' xechēba' chee'.  
 Gate zaj xu'e lu da stēbe, súalequeza' le'.  
 Guselá' le', ne guna' le' ba lánana.  
 16 Guna' xelaca banē' zánete' iza, ne guselá' le'."  
**92** Chawe' naca dxue lánanantu' Lue', Xrana' Dios,  
 ne gúl-lantu' da dxucá'ana szren na Lue', Dios  
 szrentē.  
 2 Chawe' naca dxuzénentu' bēnneache tu zra tu zra  
 ca dxexache lazru' netu',  
 na' dxēla dxulé'entu' nacu' li lazre'.  
 3 Dxúl-lantu' da caní, dxínentu' da dxúl-lalēntu'  
 da zē chi du chee' na,  
 ne dxínentu' da con zríadi'i na du da dxennéle'e xr-  
 tandau'.

4 Xrana' Dios, ne chee' da dxunu' Lue', dxunu' dxe-  
 béle'eda'.  
 Ca zaj naca da nun na'u zua' lu da ba neza.  
 5 Da zrentē zaj naca da nunu', Xrana' Dios.  
 Da zrénele'e zaj naca da dxugú'u lazru' gunu'.  
 6 Québequeze neze benne' lázxdau zide',  
 ne quebe dxéajni'i benne' xala ca naca da nigá.  
 7 Gate dxelegula benne' dxelebéaj xíchajē' Dios  
 ca dxegula xixre',  
 ne dxēpe ban da dxelún benne' wēn da zrinnaj,  
 naca na chee' xelebía xi'e tu chí'izqueze.  
 8 Lue', Xrana' Dios, tu nácazquezu' Dios szrentē.  
 9 Dxunna bea na ca gaca chee' benne' dxedábage'  
 Lue',  
 Xrana' Dios.  
 Dxunna bea na xelebía xi' benne' ca' dxeledábage'  
 Lue'.  
 Xelase dinnaj xúgute' benne' ca' dxelunē' da zrinnaj.  
 10 Lue' dxunu' dxezrendxa xel-la' wal-la chia' ca naca  
 xel-la' wal-la chee' beze.  
 Dxugú'u da za xíchaja' da dxutipa na lazra'.  
 11 Dخال-la' le'eda' xelezrá' zran ni'a benne'  
 dxeledábage' neda',  
 na' xenda' xelebezre xache' benne' ca' guledíl-lalēne'  
 neda',  
 benne' ca' dxelunē' da calēla.  
 12 Welaxán benne' xrlátaje ca' ca dxun xaga zina'.  
 Xelegulé' ca dxun xaga cedro lu xi'a Líbano.  
 13 Zaj naque' ca tu xaga zē na lu xudau' chee' Xrá-  
 nadxu Dios,  
 da dxegúlale'e na lu chale'aj chee' xu'u lizre Dios  
 cheedxu.  
 14 Zaj naque' ca xaga ca' dxelebía da zixre chee' na  
 gate  
 ba zaj nagula na, ne zaj naca na xaga xa'a wal-la.  
 15 Benne' caní xuluzenne' bēnneache naca li lazre'  
 Xrana' Dios, Bénnea' dxuzé chúchue' neda',  
 ne quebe bi zúale' Lē' da quebe naca xrlátaje.  
**93** Xránadxu Dios naque' Wenná Bea,  
 ne nacue' zra lanē' da zácále'e.  
 Nácue' zra lanē', ne da nagú'u le'e naca na xel-la' wa-  
 ca zren.  
 Nuzúa chúchue' xēzr la xu nigá, na' quebe nu seque'  
 gutá na.  
 2 Lataj naga dxe'u dxenná be'u, Xran,  
 zua chuchu na nédxudaute,  
 na' Lue' zúaquezu' chadía chacanna.  
 3 Dxelebezre xa'a xegu ca', Xran.  
 Dxelebezre xa'a na, ne dxelenné na zizraj.  
 4 Xránadxu, Bénnea' zue' xabáa nápadxē' xel-la' waca  
 ca da zaj napa xegu ca' dxelebezre xa'a na,  
 ne ca da zaj napa xejxruza chee' nísadau'.  
 5 Chúchule'e zaj naca da nadxixru be'u, Xran.  
 Lázaxa nácaqueze xudau' chiu' chadía chacánnaque-  
 ze.  
**94** Xrana' Dios, dxebeaj lazru' bēnneache.  
 Lue', Bénnea' dxebeaj lazre' bēnneache, ble'e  
 cuinu'.

2 Dxuchi'u Lue' cheę da dxelún xúgutę bénneache.  
Guxasa, bexizruj da dxal-la' xezezí' benne'  
dxulucá'ana szren cuine'.

3 Xrana' Dios, ¿Bátadxaqueze xelún benne' węn da  
caleła caní?  
¿Bátadxaqueze xelebé benne' ca' dxelebéaj xíchaję'  
Dios?  
4 ¿Bátadxaqueze xulucá'ana szren cuina benne' ca'  
dxelebéaj xíchaję' Dios?  
5 Benne' caní dxuluxrínnaę' bénneache chiu' Lue',  
Xran,  
ne dxulusaca zię bénneache guca'u Lue'.  
6 Dxelútię' nu'ula tuze ca', ne benne' zitu' ca',  
ne dxelunę' xelátebe' bidau' węzębe ca'.  
7 Dxelennę': "Quebe bi dxelé'e Dios, Xrana benne' ca'.  
Dios cheę benne' Israel ca' quebe dxue lazre' cheę da  
na'."  
8 Le chéajni'i, le'e, benne' lázxdau zide'.  
Le'e, benne' xala, ¿bátadxaqueze quebe chéajni'ile?  
9 Dios bęne' nágadxu.  
¿Québequeze dxennę' da dxennale?  
Dios bęne' xiaj laudxu.  
¿Québequeze dxelé'ene' da dxunle?  
10 Díósqueze dxuzúę' lu da ba xa' benne' xęzr la xu  
ca'.  
¿Québequeze til-le' le'e?  
Díósqueze dxunę' dxeléajni'i bénneache.  
¿Québequeze gueque be'ene' da xu'u xichaj lázr-  
daule?  
11 Xránadxu Dios nézquezne' da xu'u xichaj lázxdau  
xúgutę bénneache.  
Nézene' zaj naca na da dácheze.  
12 Ba neza szrentę naca na cheę bénnea' dxuzéa-  
jni'inu', Xran,  
ne dxusédenu' le' ca naca da nadxixruj be'u,  
13 cheę cueza zri lazre' gate za zra dxaca da caleła,  
ca zrin zra xelexú'u xędxu ba benne' dxelunę' da zrin-  
naj.  
14 Québequeze cueaj xichaj Xránadxu Dios bénneache  
cheę',  
ne quebe gusán lazre' benne' ca' ba gucá'a Le'.  
15 Naca xrlátaje ca xuluchí'ę cheę bénneache,  
na' xelúnqueze da xrlátaje xúgutę benne' zaj naque' li  
lazre'.  
16 ¿Núzraqueze gácale neda' tíl-lalędxu benne'  
węn da caleła ca'?  
¿Núzraqueze súale neda' tíl-lalędxu benne'  
dxelunę' da zrinnaę?  
17 Chela ca gúcale Xránadxu neda', báchelja xu'a  
xędxu ba.  
18 Gate gunnía': Xran, ba zua cheajcházia',  
na' Lue', dutę xel-la' zri'i lazre' chiu' gúcalenu' neda'.  
19 Gate dxe'a gunne xue, ne zua' lu da stębe,  
Lu'équeze dxexúe zrenu' neda', na' dxebéleęda'.  
20 Québequeze nacu' tuze benne' ca' dxuluchi'ę cheę  
bénneache da quebe naca xrlátaje,

benne' ca' dxulucá'ane' ca xrlátaje da quebe naca na  
xrlátaje.  
21 Benne' caní dxelunę' tuze dizra' da xelunę' cheę  
benne' xrlátaje,  
na' dxelechugę' cheę gate bénnea' quebe bi zria  
nabaguę'.  
22 Xránadxu Dios naque' ca tu xu'u naga zua chawa'.  
Dios chia' naque' ca tu xiaj xre da dxuzé chacha na  
neda'.  
23 Le' xexízruje' benne' ca' dxelunę' da caleła cáteze  
naca  
da zrinnaę da belunę'.  
Guzría xię benne' ca' lu da caleła da dxelunę'.  
Xránadxu Dios guzría xię benne' ca' dxelunę' da  
caleła.  
95 Le da, güe lá'anadxu Xránadxu Dios dutę xel-la'  
dxebé.  
Dutę xel-la' dxebé gúl-ladxu cheę Bénnea' nuzúa  
chúchue'  
dxí'u naga ladxu.  
2 Cheajdxu lau Le', ne xędxu Le': Xcalenu'.  
Dutę xel-la' dxebé gúl-ladxu da güe lá'anadxu Le'.  
3 Naca Xránadxu tu Dios szrentę,  
ne naque' Wenná Bea szrentę lawe' dios ca' cheę bén-  
neache.  
4 Dxenná bé'ene' du gabí'i xęzr la xu,  
naga naca situj, ne naga naca sibe cheę xi'a ca'.  
5 Dxenná bé'ene' nísadau' da núnqueze Le',  
ne cá'anqueze xęzr la xu da bęne'.  
6 Le da, gucá'ana szrendxu Le', gátadxu sudxú'ala.  
Guzú zríbedxu lau Xránadxu, Bénnea' nune' dxi'u.  
7 Le' naque' Dios cheędxu.  
Nácadxu benne' ca' dxuxúequeze', ne nácadxu ca  
zríla'du ca'  
cheęqueze'.  
8 Che dxenle chi'ę na'a zra, quebe gun zide' lázrdaule  
ca belún xra xrtáule ca' naga nazí le na Meriba,  
ne ca belunę' lu zra na' le'ę xixre' lawe' lataj naga  
nazí le na Masah,  
9 naga buluchá'a xra xrtáule neda', ne belunę' neda'  
da stębe  
lácala belelé'ene' xúgutę da bęna'.  
10 Lawe' chua iza beditaj lazra' cheę benne' ca',  
na' gunnía': Zaj naque' benne' dxelebéaj xíchaję' ne-  
da',  
ne quebe dxelunę' ca da dxulé'eda' le'.  
11 Cheę le na', dutę xel-la' dxezrá'a chia' bzetaj cuina'  
gunnía':  
Quebe xelexú'uqueze' naga xelexezí' lazre' nen neda'.  
96 Le gul-la cheę Xránadxu tu da cube.  
Le gul-la cheę Xránadxu, le'e zrale du gabí'i xęzr  
la xu.  
2 Le gul-la cheę Xránadxu, ne le güe lá'ana La lá'azxa  
chie'.  
Tu zra tu zra le guzén ca naca xel-la' weselá da dxun-  
ne'.  
3 Le guzén benne' xęzr la xu ca' ca naca xel-la' szren  
cheę',

Ne benne' xúgute xezre ca zaj naca xel-la' waca zren nune'.

<sup>4</sup> Szrentę naca Xránadxu, ne naca cheę' güe lá'anale'ędxu Le'.

Naca cheę' gápadxę' xel-la' ba lá'ana ca dios ca' cheę' bėnneache,

<sup>5</sup> lawe' da zaj naca xúgute dios ca' bedáu' xiaj xaga ca'.

Xránadxu Dios bęne' xabáa na'.

<sup>6</sup> Zúale Le' da xabáa, ne xel-la' szren.

Nazrate xudau' cheę' xel-la' waca, ne da xrtante.

<sup>7</sup> Le güe lá'ana Xránadxu, le'e zrale du gabí'i xęzr la xu.

Le güe lá'ana xel-la' szren cheę', ne xel-la' waca cheę'.

<sup>8</sup> Le gapa ba lá'ana Xránadxu ca da naca cheę' si'ę.

Le gua da gunézrujle, ne le da chale'aj cheę xudau' cheę'.

<sup>9</sup> Le gucá'ana szren Xránadxu lu xel-la' xrtante cheę da naca lá'azxa cheę'.

Le zrebe lau Le', le'e zrale du gabí'i xęzr la xu.

<sup>10</sup> Le xę bėnneache xęzr la xu: Naca Xránadxu Wenná Bea.

Nuzúa chúchue' xęzr la xu nigá, na' quebe nu seque' gutá na.

Guchi'ę cheę bėnneache ca naca da xrlátaje.

<sup>11</sup> Le be, le'e, xabáa, ne xęzr la xu.

Le cuezre xa'a, le'e, nísadau', ne bea ca' zrale na'.

<sup>12</sup> Le be, le'e, le'ę xixre', ne bea ca' zrale na'.

Xaga ca' zaj dxę' xi'a ca' welunna schaga lu xel-la' dxebé

<sup>13</sup> lau Xránadxu gate xidę'.

Xidę' guchi'ę cheę bėnneache zaj zre'ę xęzr la xu.

Nna bé'ęne' bėnneache du gabí'i xęzr la xu.

Nna be'e Le' ca naca da xrlátaje, ne ca naca da li.

**97** Naca Xránadxu Benne' Wenná Bea.

Le be, le'e zrale xęzr la xu.

Le be, le'e zrale dxu'a nísadu ca'.

<sup>2</sup> Zaj naxechaj beuj, ne da chul-la Le'.

Ca naca da li, ne da xrlátaje dxenná be'ę.

<sup>3</sup> Cuía lau xi' lau Le',

ne guzezxe na benne' guledábague' Le'.

<sup>4</sup> Ca naca xesa ca' cheę' bulusení na xęzr la xu.

Dxelé'e xęzr la xu na, ne dxęzrize na.

<sup>5</sup> Dxelexuna xi'a ca' ca da zixre cheę bėzudau' lau Xránadxu,

lau Xrana bėnneache zaj zre'ę du gabí'i xęzr la xu.

<sup>6</sup> Dxulé'e xabáa ca naca da xrlátaje cheę',

na' dxelélé'e bėnneache dutę xęzr la xu ca naca xel-la' szren cheę'.

<sup>7</sup> Dخال-la' xelexedué'e xúgute benne' ca' dxulucá'ana szreņę'

bedáu' xiaj xaga ca',

benne' ca' dxulucá'ana szren cuinę' ca zaj naca bedáu' xiaj xaga ca'.

Xúgute dios cheę bėnneache ca' dxal-la' xuluzú zribe na

lau Xránadxu Dios.

<sup>8</sup> Belén benne' zaj zre'ę Sión, na' gulebęne'.

Gulebé benne' zaj zre'ę Judá, ne cheę da guchi'u Lue', Xran.

<sup>9</sup> Szrentę nacu' Lue', Xran, lawe' dutę xęzr la xu.

Szrendxa nacu' Lue' ca xúgute dios cheę bėnneache.

<sup>10</sup> Le'e, núlale nazrí'ile Xránadxu, le cuide da calęla.

Le' dxuxúe' bėnne' du zaj xu'ę bėnneache cheę'.

Dxuselé' le' lu na' benne' dxelebéaj xíchaję' Dios.

<sup>11</sup> Zuale da dxusení na benne' xrlátaje ca',

na' xel-la' dxebé zúale na benne' li lazre' ca'.

<sup>12</sup> Le be, le'e, benne' xrlátaje, lau Xránadxu.

Le gosá lázrele ca da nun Dios lá'azxa, ne le güe lá'ana Le'.

**98** Le gul-la cheę Xránadxu tu da cube lawe' da nune' da ca'

da dxebánedxu.

Ne cheę xel-la' wal-la cheę', ne xel-la' waca lá'azxa cheę'

ba bđinne'.

<sup>2</sup> Ba nuzén Xránadxu ca dxune' dxuselé' bėnneache.

Ba bzenne' bėnneache xęzr la xu ca' ca naca da xrlátaje cheę'.

<sup>3</sup> Ba nune' ca da guchębe lazre' cheę benne' Israel ca' ca naca xel-la' li lazre' cheę', ne xel-la' nazrí'i zren cheę'.

Bėnneache du gabí'i xęzr la xu ba belelé'ęne' ca naca da bęn

Dios cheędxu.

<sup>4</sup> Le gul-la lu xel-la' dxebé lau Xránadxu, le'e zrale du gabí'i

xęzr la xu.

Le güe lá'ana Le' nen da gúl-lale, ne lu xel-la' dxebé cheęle

le cuezre xa'a.

<sup>5</sup> Le gul-la da güe lá'anale Xránadxu.

Le gul-la nen da con zríadi'i na du ca' da quínnele.

<sup>6</sup> Le gucuezre luzu da ca' dxulucuezre', ne da dxutíl-lale ca',

ne le cuezre xa'a lu xel-la' dxebé lau Xránadxu,

Wenná Bea cheędxu.

<sup>7</sup> Le gun schaga nísadau', ne bea ca' zrale na'.

Le gul-la, le'e, xęzr la xu, ne le'e zrale na'.

<sup>8</sup> Le capa na'le, le'e xęgu ca'.

Le gul-la lu xel-la' dxebé, le'e, xi'a ca', lau Xránadxu

<sup>9</sup> lawe' da xidę' xedajnná bé'ęne' xęzr la xu nigá.

Nna bé'ęne' benne' zaj zre'ę du gabí'i xęzr la xu lu da xrlátaje,

ne bėnneache dutę xęzr la xu lu da naca li lazre'.

**99** Naca Xránadxu Dios Benne' Wenná Bea, na' dxęlezrize xúgute bėnneache lau Le'.

Dxe'ę lataj blau cheę' da zua na lówela querubín ca', na' dxęzrú' lu xęzr la xu.

<sup>2</sup> Szrentę naca Xránadxu lu xi'a Sión.

Naque' szren lawe' xúgute cue' xęzr la xu ca'.

<sup>3</sup> Le güe lá'ana La Xránadxu da naca na szren, ne da dxal-la' zrébedxu.

¡Lá'azxa naca Le'!

<sup>4</sup> Lue', Wenná Bea szrentę, nazrí'inu' da naca xrlátaje. Nuzúa chachu' da naca li lazre'.

Ba nunu' da naca xrlátaje, ne da naca li lazre'  
ládujla zri'ine zre sua Jacob.

<sup>5</sup> Le gucá'ana szren Xránadxu Dios.

Le guzú zríbele lau Lē' naga dxe'ē.

¡Lá'azxa naca Lē'!

<sup>6</sup> Moisés, ne Aarón gulaque' bxruze chee' ca'.

Samuel guque' tu benne' bchálajleñe' Lē'.

Gulenné' Xránadxu Dios, na' Lē' bechebe'.

<sup>7</sup> Tu lu beuj bza bchálajleñe' benne' ca'.

Buluzúe' dizra' da gunná bé'ene',

ne da ca' bdxixruj be'ene' le'.

<sup>8</sup> Xránantu' Dios, bechebu' lau benne' ca'.

Blé'enu' le' nacu' Dios, dxunité lau' chee' bēneache,

lácala dxudéu' le' xel-la' zi' ne chee' dul-la da zaj

nabague'.

<sup>9</sup> Le gucá'ana szren Xránadxu Dios.

Le guzú zríbele lau Lē' lu xi'a lá'azxa chee',

lawe' da lá'azxa naca Xránadxu Dios.

**100** ¡Le gul-la lau Xránadxu Dios, le'e zrale du gabí'i  
xęzr la xu!

<sup>2</sup> ¡Le gucá'ana szren Lē' dutę xel-la' dxebé!

¡Le da lau Lē', dxúl-lale dutę xel-la' dxebé!

<sup>3</sup> Cabata' gal-la lázrele naca Xránadxu Díosqueze.

Lē' beñe' dxi'u, na' nácadxu chee' Lē'.

Nácadxu xęzre chee', ne zríla'du chee'.

<sup>4</sup> Le chu'u lataj naga zua xudau' chee', xęle Lē':

Xcalenu',

ne chale'aj chee' na, güe lá'anale Lē'.

Le xę Lē': Xcalenu', ne le güe lá'ana Lē'.

<sup>5</sup> Chawe' naca Xránadxu, na' chadía chacanna zua  
xel-la' zri'i lazre' chee'.

Xel-la' li lazre' chee' tu súazqueze na chadía chacan-  
na.

**101** Tu gúl-lazqueza' ca naca xel-la' zri'i lazre',  
ne xel-la' li lazre' chiu'.

Tu gúl-lazqueza' chiu' Lue', Xrana' Dios.

<sup>2</sup> Dxaca lazra' guna' da naca li lazre'.

¿Bátala xidu' gácalenu' neda'?

Guna' da naca du lazre', ne cá'anqueze guna' caní  
lu xu'u lizra'.

<sup>3</sup> Québequeze cu'u lazra' guna' tu da zrinna'.

Dxecuídada' da dxelún benne' ca' dxelebéaj xíchaje'  
Dios.

Québequeze gu'a lataj xelebigue' naga zua' neda'.

<sup>4</sup> Gucuasa' lu xichaj lázrdawa' da calęla,

ne quebe cu'u lazra' chee' da calęla.

<sup>5</sup> Guzúa' chalá'ala benne' dxelenné' bagácheze  
chee' benne' xula.

Quebe gu'a lataj súale' neda' tu benne' dxucá'ana  
szren cuine',

u naque' benne' wenná be'e.

<sup>6</sup> Le'eda' chawe' benne' ca' zaj naque' li lazre' lau Dios,  
chee' xelezré'ę lawa' neda'.

Tuze benne' ca' zaj naque' du lazre' xelunę' zrin chia'.

<sup>7</sup> Quebe gu'a lataj benne' wecache lan chu'ę lizra'.

Quebe gu'a lataj tu benne' węn lazre' xegá'ane' naga  
zua'.

<sup>8</sup> Tu zra tu zra guzrí'a xi'a benne' ca' dxelunę' da calęla,

benne' ca' zaj zre'ę lu xęzr la xu chia'.

Gucuasa' xúgutę benne' ca' dxelunę' da zrinna' lu  
xęzre chee'

Xránadxu Dios.

**102** Xrana' Dios, bene da dxenaba' lau',  
ne bze' naga da dxuláwizra' Lue'.

<sup>2</sup> Quebe gucache lau' lawa' neda', lawe' da lu da stębe  
zua'.

Bze' naga neda', ne bechébeche chia' gate dxuláwizra'  
Lue'.

<sup>3</sup> Naca xel-la' nabán chia' ca zren chee' xi' da dxex-  
enítete'.

Xu'u da la lu zrita chia' ca tu xi' da dxálale'ę na.

<sup>4</sup> Dxedú lazra', ne naca lázrdawa' ca tu xixre' da dxe-  
cuade,

na' québedxa dxenná na gudagu xeta.

<sup>5</sup> Lawe' da dxebezre wé'le'a ba nazríale'a.

<sup>6</sup> Naca' ca tu situgún dxedaba' tu lu xęzr la xu bizre,  
ne ca tu bzriu zríaba' lawe' tu xu'u ze la'a.

<sup>7</sup> Dxíchaja' bchigala, ne naca' ca tu bxinne zríaba'  
túzeba'

xrgu'u sibe.

<sup>8</sup> Tu zra tu zra tu dxulucháchalezqueze benne'  
dxeledábague' neda'.

Benne' ca' dxelecuídene' neda' dxuluchínene' la' ne-  
da'

gate nu benne' dxelegú'ę de'.

<sup>9</sup> Lu waláz chee' xeta dxawa' de,

na' nisa dxebezra' dxexixre na da dxé'aja'.

<sup>10</sup> Caní dxaca chia' lawe' da dxezra'u neda',  
ne dxecuídenu' neda'.

Guca'u neda', na' gudxú'unu' neda'.

<sup>11</sup> Naca xel-la' nabán chia' ca tu zrul-la da dxedeze,  
na' naca' ca tu xixre' da ba nabizre.

<sup>12</sup> Lue', Xrana' Dios, tu chí'izqueze zu',

na' cheajlesá lazre' xúgutę cuen bēneache Lau'.

<sup>13</sup> Chasu', ne xexache lazru' benne' zaj zre'ę xęzre

Sión,

lawe' da ba bzrin zra xexache lazru' benne' ca'.

<sup>14</sup> Netu', węn zrin chiu', nazrí'intu' xiaj ca' chee' xęzre  
na'.

Dxéquentu' zi' lawe' da ba nabía xi na.

<sup>15</sup> Nadxa benne' xęzr la xu ca' xelezrebe' lau Lue',

Xran.

Xelezrebe xúgutę benne' wenná bea chee' xęzr la xu  
nigá

da xabáa chiu',

<sup>16</sup> gate ba bechisu' xęzre Sión, Xran,

ne xelélé'ęquezne' ca naca da xabáa chee' na,

<sup>17</sup> gate na' guzé' nagu' da dxelenaba benne' ca' guleaj  
xíchaju',

ne québedxa guzú' chalá'ala da dxelata' xuene' Lue'.

<sup>18</sup> Xuaj da nigá chee' xululaba benne' ca' za zá'aca,

na' benne' ca' za xelalaj xelúe lá'ane' Xránadxu Dios.

<sup>19</sup> Naga zua Xránadxu xabáa gunné'ę.

Naga zu'e' xabáa blé'ene' lu xęzr la xu nigá.

<sup>20</sup> Dxelé'ene' benne' dxelebezre xache', benne' zaj xu'ę  
lizre xia,

na' gusanē' benne' ca' ba zaj nachugue' chee' xelatie'.  
 21 Xuluzenne' benne' zaj zre'e xezre Sión ca szren naca  
 La Xránadxu Dios,  
 chee' xelúe lá'ane' Lē' lu xezre Jerusalén,  
 22 gate xelezraga bēneache chee' xúgute' xezre, ne  
 xúgute' cue'  
 xezr la xu  
 chee' xulucá'ana szrene' Xránadxu Dios.  
 23 Xránadxu Dios bēne' gute ni'a na'a gate ne naca'  
 cuide'.  
 Xeláteze ca bētie' neda'.  
 24 Nadxa gunniá': Dios chia', quebe gutiu' neda',  
 gate quebe ne guéxrua'.  
 Lue' tu chí'izqueze zu'.  
 25 Nédxudautē' Lue' bzu' xezr la xu nigá, na' nen na'u  
 bēnu' xabáa.  
 26 Xelebíá xi' da ca', san tu zúazquezu' Lue'.  
 Welexru xúgute' da ca' ca tu ladxe'.  
 Ca dxuchadxu zra lánadxu tuzruj, ca' gucha'u da ca',  
 na' xucúbeu' na.  
 27 Túzqueze ca nacu' Lue',  
 ne québequeze te chiu' Lue'.  
 28 Zrí'inentu' netu', wēn zrin chiu', xelezrabe' chawe',  
 na' guzé chúchuquezu' zrí'ine zre súantu' lau Lue'.  
**103** Bē lá'ana Xránadxu Dios, lue', bēnne'du xu'a.  
 Bē lá'ana Lē' lá'azxa, dutē da naca'.  
 2 Bē lá'ana Xránadxu, lue', bēnne'du xu'a,  
 ne quebe gal-la lazru' ca da chawe' da nune' chiu'.  
 3 Dxunite lawē' chee' xúgute' dul-la nabaga'a.  
 Dxexunē' neda' ca naca xúgute' xízrawē' da xu'a.  
 4 Dxuxúē' neda' chee' quebe gatia'.  
 Lu xel-la' zrí'i lazre' chee', ne xel-la' dxexache lazre'  
 chee'  
 dxunē' chawe' chia'.  
 5 Dxuzánlē'e da chawe' da dxaca chia' chee' xegá'ana'  
 benne' cuide',  
 ne benne' wal-la ca dxaca chee' tu bsia.  
 6 Xránadxu Dios dxuchi'e chee' da dxaca chee' benne'  
 dxeledé' da ba xa',  
 ne dxucá'ana chawē' da dxaca chee'.  
 7 Blé'ene' Moisés da ca' gulú'u lazre' gunē',  
 ne bē'e lataj benne' Israel ca' belelé'ene' da ca' bēne'.  
 8 Naca Xránadxu Benne' dxexache lazre', ne Benne'  
 zrí'i lazre'.  
 Quebe dxezrá'azie', san zrentē naca xel-la' zrí'i lazre'  
 chee'.  
 9 Quebe nníaqueze', ne quebe zrá'aqueze'.  
 10 Quebe dxudé' dxi'u lu da ba xa' ca naca zria  
 da nabágadxu,  
 ne quebe ne guzríá xi'e dxi'u ne chee' dul-la da nabá-  
 gadxu.  
 11 Ca sibe naca xabáa lawe' xezr la xu,  
 caníqueze naca xel-la' zrí'i lazre' zren chee' nen  
 benne' ca'  
 dxelape' Lē' ba lá'ana.  
 12 Ca zitu' naca naga dxalaj gubizra, ne naga dxebía  
 na,  
 caníqueze dxucuase' zitu' dul-la da nabágadxu.

13 Ca zrí'i lazre' naca xra bidu ca' nen zrí'inequeze',  
 caníqueze naca zrí'i lazre' Xránadxu nen benne' ca'  
 dxelape' Lē' ba lá'ana.  
 14 Lē' nézene' ca nácadxu lu bēla' dxen cheedxu.  
 Dxajsá lazre' nácadxu xu xrte.  
 15 Ca naca xel-la' nabán cheedxu, nácadxu ca tu xixre'.  
 Dxejúladxu ca tu xiaj xixre',  
 16 na' dxedé be' dxua na lē na, na' dxexenite na,  
 na' québedxa nu dxelé'equeze lē na.  
 17 Ca naca chee' benne' ca' dxelape' ba lá'ana Xrá-  
 nadxu,  
 zúalē xel-la' zrí'i lazre' chee' benne' ca' chadía chacan-  
 na,  
 na' xel-la' xrlátaje chee' zúalēqueze na xúgute' zrí'ine  
 zre sua  
 benne' ca',  
 18 benne' ca' dxelúnqueze' ca naca xel-la' wezríá  
 nune',  
 ne benne' ca' dxelunē' ca zaj naca da nadxixruj be'e.  
 19 Nuzúá Xránadxu lataj chee' xabáa naga dxe'e dxen-  
 ná be'e.  
 Nácaqueze' Wenná Bea lawe' xúgute' da zaj zua.  
 20 Le güe lá'ana Xránadxu, le'e, gubáz chee' xabáa ca',  
 Nácale benne' wal-la, ne benne' chúchulé'e,  
 na' dxunle ca dxenná Lē', ne dxuzé nágale ca dxe'e  
 le'e.  
 21 Le güe lá'ana Xránadxu, le'e, dxenná beale xabáa.  
 Nácale wēn zrin chee', ne dxunle ca dxaca lazre' Lē'.  
 22 Le güe lá'ana Xránadxu, xúgute' le'e ba nun Dios  
 le'e,  
 zrale xúgute' lataj naga dxenná bea Lē'.  
 ¡Bē lá'ana Xránadxu, lue', bēnne'du xu'a!  
**104** Bē lá'ana Xránadxu Dios, lue', bēnne'du xu'a.  
 ¡Xrana' Dios, szrentē nacu' Lue'!  
 Nacu' zra lanu' da xabáa, ne da xrtante.  
 2 Dxugacu cuinu' xel-la' naxaní' ca zra lanu'.  
 Dxechilju' xabáa ca tu xu'u ladxe' chiu'.  
 3 Nunu' lizru' lawe' nisa da zē ná'ala.  
 Dxuchínenu' beuj ca' ca tu da dxudé xua naga dxe'u  
 Lue',  
 da dxedá na lu be'.  
 4 Dxuchínenu' be' ca' ca gubáz chiu' ca',  
 ne xesa ca' ca wēn zrin chiu' ca'.  
 5 Bzua chuchu' xezr la xu nigá lu lane na,  
 na' quebe nu gaca gutá lē na.  
 6 Bgacu' xezr la xu nigá nen nísadau' ca dxun tu  
 benne'  
 dxacue' zra lane',  
 na' nisa na' bgacu na xi'a ca'.  
 7 Gate gudil-lu' nisa na', na' bzrunnuj na.  
 Bebiga na gate ben na chi'u zizraj.  
 8 Nisa na' bgacu na xi'a ca' xajxedxé na dxu'a xegu ca',  
 lataj ca' ba nunu' chee' nisa na'.  
 9 Bzu' naga ze lau cheajsé na, naga québedxa gaca te  
 na,  
 chee' québedxa gacu na xezr la xu bizre na'.  
 10 Dxunu' beaj ca' dxelalaj na dxu'a xégudu ca',  
 ne xegu ca' dxeledé na ládujla xi'a ca'.



11 Lu xegu ca' dxelé'aj bę xixre' ca' nisa,  
 na' dxegúa na xel-la' dxelebile cheę burro xixre' ca'.  
 12 Lu xaga zaj nnita dxu'a xegu ca' zaj zra' béadu ca'  
 zaj zua xrila.  
 Dxelúl-laba' ládujla zruze na ca'.  
 13 Zran xabáa dxesel-lu' xiuj da dxaca na lu xi'a ca',  
 na' dxezrate xęzr la xu na' ca naca da xrlátaje da dx-  
 unu'.  
 14 Dxusegulu' xixre' da dxelagu bęzre ca',  
 ne xixre'du ca' da dxelagu bęnneache,  
 ne da ca' dxuluchine bęnneache dxelunę' xel-la'  
 wagu,  
 15 ne uva ca' da dxelunę' xrise uva wal-la da dxuzúa  
 na  
 bęnneache ca' xel-la' dxelebé,  
 ne olivo ca' da dxelunę' da za da dxelegú'ę xíchaję',  
 ne zrua' da dxelunę' xeta cheę xelaca banę'.  
 16 Xaga cedro ca' da zaj zua na xi'a Líbano dxelezíle'ę  
 na nisa xiuj.  
 Zaj naca na xaga cheę Xránadxu Dios, da ca' guza Le'.  
 17 Lu xaga ca' dxuluzría bxínneđu ca' xrú'uneba',  
 na' lu zruze na ca' zaj zua lizre bxuze' ca'.  
 18 Zaj zua chivo xi'a ca' lu xi'a zri'a ca',  
 na' lu bluaj ca' cheę xi'a ca' zaj zua bzrizru' ca'.  
 19 Bęnu' beu' da dxulé'e na tu beu' tu beu' cheę iza,  
 na' gubizra núnbea na gate dxal-la' cuía na.  
 20 Bęnu' dxęla, na' gate bache nachul-la,  
 na' dxeledxúaj bę dxęla ca'.  
 21 Dxelebezre xa'a bęzre xixre' ca', zaj nauba' bę  
 xeláguba'.  
 Dxelíljaba' da nun Dios xeláguba'.  
 22 Gate dxalaj gubizra, na' dxelexezrinba' lu bluaj  
 cheęba',  
 naga dxeláseba' te zra.  
 23 Nadxa dxeledxúaj bęnneache dxelunę' zrin,  
 na' dxelúnqueę' zrin ca dxebía gubizra.  
 24 Xran, da zantę zaj naca da bęnu'.  
 Dute xel-la' sina chiu' bęnu' da ca'.  
 Nazrate xęzr la xu nigá da ca' bęnu'.  
 25 Na' zua nísadau', da zri'a, ne da laga,  
 naga zaj xu'u zánete bea ca', béadu ca', ne bę zri'a ca'.  
 26 Lu nísadau' na' zaj zra' da dxeledá lawe' nísadau'  
 ca'.  
 Zua bę zri'a na' bęnu' Lue', nazí' laba' leviatán.  
 27 Xúgute bea ca' dxuluxrén lázreba' Lue',  
 cheę gunézruju' da xeláguba' ca zrin cheę na.  
 28 Dxunézruju' leba', na' dxelecá'aba' na.  
 Dxunézruju' da dxeláguba', na' dxeléljeba'.  
 29 Gate quebe dxenná'u-ba', na' dxelezebeba'.  
 Gate dxucuasu' be' dxelecá'aba', na' dxeláteba',  
 ne dxelexácaba' xu xrte.  
 30 Gate dxesel-lu' be' chiu', na' xelexaca banba'.  
 Dxunézruju' xel-la' nabán cube cheę da ca' zaj zua  
 xęzr la xu nigá.  
 31 ¡Chadía chacanna gaca ba Xránadxu Dios!  
 Dxezaca ba lazre' Xránadxu cheę da ca' ba núnqueę'.  
 32 Dxenné'ę xęzr la xu nigá, na' dxezrú' na.  
 Dxuté' xi'a ca', na' dxeledxúaj na zren.

33 Gúl-laqueza' cheę Xránadxu dxácatę na' naca bana'.  
 Xúgute zra zúaqueza' neda' gul-la' da güe lá'ana' Dios  
 chia'.  
 34 Chawe' naca chia' da ca' dxulaba lazra' ca naca  
 cheę',  
 na' dxebéle'ęda' ne cheę Xrana' Dios.  
 35 Welebía xi' benne' dul-la ca' zaj zre'ę lu xęzr la xu  
 nigá,  
 Na' québedxa cha benne' ca' dxelebéaj xíchaję' Dios.  
 ¡Bę lá'ana Xránadxu Dios, lue', bęnne'du xu'a!  
 ¡Le güe lá'ana Xránadxu!  
**105** ¡Le güe lá'ana Xránadxu Dios!  
 ¡Le gucá'ana szren La Le'!  
 ¡Le guzén bęnneache dute xęzr la xu ca naca da  
 nune'!  
 2 ¡Le gul-la cheę'!  
 ¡Le gul-la da güe lá'anale Le'!  
 ¡Le guchalaj cheę da zrentę ca' da nune'!  
 3 ¡Le be lu da naca cheę'!  
 Xúgute benne' ca' dxelapa ba lá'ana Xránadxu dxal-la'  
 xelebéle'ęne'.  
 4 Le naba Xránadxu gácalęne' le'e.  
 Tu zra tu zra le guxrén lazre' Xránadxu Dios.  
 5 Le'e, zri'ine zre sua Abraham, węn zrin cheę Xrá-  
 nadxu.  
 Le'e, zri'ine zre sua Jacob, bęnnea' guquę'ę,  
 Le gusá lazre' xel-la' waca ca', ne da zrentę ca' da  
 bęne',  
 ne ca naca da bchi'ę cheęle.  
 7 Le' naque' Xránadxu, ne Dios cheędxu.  
 Le' dxenná bé'ene' bęnneache zaj zre'ę dute xęzr la  
 xu.  
 8 Lácala te cheę chi gaxúa cuen bęnneache,  
 québequeze gal-la lazre' da guchebe lazre'  
 lu xel-la' wezría cheę',  
 9 xel-la' wezría na' bęnlęne' Abraham,  
 da na' bzetaj cuine' guchebe lazre' cheę Isaac,  
 10 na' bzua chúchue' na ca tu da nadxixruj bea na,  
 da gun Jacob,  
 da gaca na tu xel-la' wezría da zeajlí canna nen  
 benne' Israel ca',  
 11 da bęne' gate na' gunné': "Chiu' lue' gunna' xęzr la  
 xu cheę  
 benne' Canaán ca',  
 da gaca na tu da xudele lu na' zri'ine zre súa'le."  
 12 Gate na' bábaze zaj naque'  
 guleze'ę lu xęzr la xu nigá ca benne' zitu' ca',  
 13 ne guledé'ę tu xęzr la xu xetú xęzr la xu, ne tu xęzre  
 xetú xęzre.  
 14 Quebe bę' Dios lataj nu benne' bi gunę' cheę  
 bęnneache cheę',  
 na' ne cheę benne' ca' gudil-le' benne' wenná bea ca'.  
 15 Guzre' le': "Quebe bi gunle cheę benne' ca' gucá'a,  
 ne quebe gunle da calęla cheę benne' ca' dxuluchala-  
 je'  
 waláz chia'."  
 16 Bęne' guta' tu gubina' lu xęzr la xu na',  
 na' gudú'ę ca naca xeta xelawe'.

17 Gusel-lə' tu benne' cuía lawe' lau benne' chie' ca',  
bénnea' naque' José, bi na' belutie'-be' chee' gácabe'  
wən zrin chee' benne' zitu'.  
18 Buluzré'ə ní'abe' lu xədxu chee' cuaga da bəxru na  
ní'abe',  
gate na' gulu'ə-be' lizre xia lu xəzr la xu Egipto,  
19 ca bzin zra guca li ca da gunná José dxal-la' gaca.  
Caní guca, ble'e xrtizra' Xránadxu cúnnabe' da li.  
20 Nadxa benne' wenná bea chee' Egipto gusel-lə'  
nu gusán José na'.  
Bénnea' dxenná bé'ene' zánete' cue' xəzr la xu bsané'-  
be'.  
21 Bzue'-be' gácabe' xrana benne' zaj zré'ə lizre',  
ne chee' nna be'ebe' ca naca da xu'u lu ne'ə,  
22 chee' tíl-labe' benne' szren ca' chee' wenná bea  
cáteze  
dxaca lázrebe',  
ne chee' guzəajni'ibe' benne' gula chee' xəzr la xu  
Egipto  
chee' xelaque' benne' sina.  
23 Gudé na' gulu'ə benne' Israel ca' lu xəzr la xu Egipto,  
na' guzúa Jacob lu xəzr la xu chee' zri'ine zre sua Cam.  
24 Gulánlə'ə bənneache chee' Xránadxu lu xəzr la xu  
na',  
na' bəne' gulaque' wál-ladxa ca benne' guledábage'  
Lə'.  
25 Bcha Dios lázxdau benne' Egipto ca' chee' xelexu-  
denə'  
bənneache chee',  
chee' xelegú'u lazre' xelunə' da caləla chee' wən zrin  
chee' ca'.  
26 Nadxa gusel-lə' Moisés, wən zrin chee', lau bən-  
neache  
chee' ca', ne Aarón, bénnea' guqué'ə.  
27 Benne' caní bə'ə Dios lataj belunə' xel-la' waca ca'  
chee' xabáa,  
ne xel-la' waca zrentə ca' lu xəzr la xu chee' zri'ine zre  
sua Cam.  
28 Gusel-la Dios tu da chul-la da bgacu na dutə xəzr la  
xu na',  
san benne' Egipto ca' quebe buluzú'ə dizra' da gunná  
be'ene' lə'.  
29 Nadxa bəne' bexaca nisa xəgu chee' benne' ca' dx-  
en,  
ne bətie' xúgutə bela zaj zraba' xəgu ca'.  
30 Busezrate' xəzr la xu chee' bluzru ca' ga bzrintə  
gulezraba'  
xu'u lizre benne' wenná bea chee' benne' Egipto ca'.  
31 Gunnaze Dios, na' belelá' zánete' be'a chee' bəzre,  
ne be'a lase ca' dutə lu xəzr la xu chee' benne' ca'.  
32 Waláz chee' nisa xiuj gusel-lə' xiaj bezxe' lu xəzr la  
xu  
chee' benne' ca',  
ne xi' da bzezxe na ca naca xəzr la xu chee'.  
33 Bzria xi'ə ca zaj naca lba uva chee', ne ca zaj naca  
xaga higo chee',

na' bzúzxujə' ca zaj naca xaga zaj zə lu xəzr la xu  
chee'.  
34 Gunnaze', na' belelá' biche zu ca',  
da quebe nu seque' gulaba ləba',  
35 na' guláguba' dutə xixre' xa'a lu xəzr la xu chee',  
ne guláguba' dutə lina da dxunna xəzr la xu na'.  
36 Nadxa bətie' xúgutə bi biu nedxu chee' benne' Egipto  
ca',  
bi zaj nácabe' bi blau chee'.  
37 Bebəaje' bənneache chee' na' zaj nu'ə dumí plata,  
ne dumí oro,  
na' quebe nu chilá' benne' ládujla lə', benne' quebe  
chawe' zue'.  
38 Gulebé benne' Egipto ca' gate beledxúaj benne' ca'  
ga na',  
lawe' da belezrébele'ə lə'.  
39 Bzalaj Dios tu beuj da gulú'u na benne' ca' zrul-la,  
ne tu xi' da bsaní na chee' chizrela.  
40 Gulenabə' Dios, na' gusel-lə' chee' btau ca',  
ne bəne' gulélajenə' xeta da bdxuaj na xabáa.  
41 Gulə'ə tu xiaj xre, na' gulaj nisa  
da gudé na lu xəzr la xu bizre na' ca tu xəgu nisa.  
42 Caní bən Dios lawe' da bsa lazre' xrtizre' lá'azxa  
da guchəbe lazre' gunə' chee' Abraham, wən zrin  
chee'.  
43 Bebəaje' bənneache chee' lu xəzr la xu Egipto, dx-  
elebenə'.  
Lu da ba neza gulezrá' benne' ca' guqué'ə.  
44 Bnézrujə' benne' ca' xəzr la xu chee' benne' xezica  
ca',  
na' da belún benne' xəzr la xu ca' bexaca na chee'  
benne'  
chee' ca',  
45 chee' xulupá'anə' ca naca xrba chee' ca',  
ne xelunə' ca naca da gunná bé'ene' ca'.  
¡Gaca ba lá'azxa Xránadxu Dios!  
106 ¡Gaca ba lá'azxa Xránadxu Dios!  
¡Le xə Xránadxu Dios: "Xcalenu!"  
Caní dxal-la' gunle lawe' da naque' xrlátaje,  
ne lawe' da tu chí'izqueze dxexache lazre' dxi'u.  
2 ¿Núzraqueze seque' gulé'ene' ca naca xel-la' waca  
zrentə ca'  
da nunə' Xránadxu?  
¿Núzraqueze seque' güe lá'anə' Lə' ca dxal-la'  
gundxu?  
3 Ba neza zrentə naca na chee' benne' ca' dxelunə' da  
xrlátaje,  
benne' ca' tu dxelúnzqueze' da naca xrlátaje.  
4 Bsa lazre' chia', Xrana' Dios, gate dxunu' da chawe'  
chee' bənneache chiu'.  
5 Gudá bselá neda' chee' gaca le'eda' da chawe' gunu'  
chee' benne' ca' ba guca'u Lue',  
ne chee' beda' gate xelezrá' bənneache chiu' lu da ba  
neza,  
ne chee' bé'əna' bənneache chiu'.  
6 Ba bəntu' dul-la cáqueze belún xra xrtáuntu' ca'.  
Bəntu' da caləla, ne bəntu' da zrinnaj.  
7 Gate gulezrá' xra xrtáuntu' lu xəzr la xu Egipto,

quebe bululaba lazre' ca naca xel-la' waca ca' chee xabáa  
da benu'.  
Quebe xeajlesá lazre' ca bexache lázrele'u le'.  
Guledábage' Lue' dxu'a nísadau' da nazí le na Xrna.  
<sup>8</sup> Le' bselé' benne' ca' chee gaca ba lá'ana La Le',  
ne chee gulé'e lau ca naca xel-la' waca chee'.  
<sup>9</sup> Gudil-le' nísadau' Xrna na', na' bebizre na,  
na' guledé bènneache chee' laduj nísadau' na' lu xu bizre.  
<sup>10</sup> Bselé' benne' ca' lu na' benne' guledábage' Le',  
ne bebéaje' le' lu na' benne' ca' bulusaca zi'e le'.  
<sup>11</sup> Nadxa nísadau' na' bgacu na benne' ca' guledábage' le'.  
Netú benne' ca' quebe nu begá'ana.  
<sup>12</sup> Nadxa benne' chee' ca' guléajle'e dizra' chee',  
ne belul-le' da belúe lá'ane' Le'.  
<sup>13</sup> Chadí gulal-la lazre' ca da bene'.  
Quebe gulebeze' ca la' dizra' chee' Dios.  
<sup>14</sup> Gulezá lazre' tu da calela le'e xixre' lawe' lataj na',  
na' buluché'e Dios le'e xixre' na'.  
<sup>15</sup> Gudé na' bnezruj Dios ca da gulenabe',  
san gusel-le' ládujla le' tu da gute na bal-la benne' ca'.  
<sup>16</sup> Gulaque' xa lazre' chee' Moisés naga zaj zre'e,  
ne chee' Aarón, Bénnea' gucá'a Xránadxu Dios.  
<sup>17</sup> Nadxa bzra xezr la xu na', ne gudébe na Datán,  
ne bgacu na benne' ca' zaj de'e Abiram.  
<sup>18</sup> Nadxa guxalaj xi' naga zaj nazraga benne' ca',  
na' bzezxe na benne' ca' dxelune' da calela.  
<sup>19</sup> Belune' tu bedáu' bezre da naca na oro lu xi'a Horeb,  
na' buluzú zribe' lau bedáu' oro na'.  
<sup>20</sup> Caní bulucá'ane' Dios, Benne' xabáa,  
chee' xulucá'ana szrene' tu bedáu' bezre,  
da naca na ca tu bezre dxáguba' xixre'.  
<sup>21</sup> Gulal-la lazre' Dios, Bénnea' bselé' le',  
Bénnea' bene' xel-la' waca zrente' ca' lu xezr la xu Egipto,  
<sup>22</sup> ne bene' xel-la' waca ca' chee' xabáa lu xezr la xu chee' zri'ine zre sua Cam,  
ne da ca' buluchebe na dxi'u dxu'a Nísadau' Xrna.  
<sup>23</sup> Nadxa guca lazre' Dios guzrí'a xi'e bènneache chee',  
san Moisés, bénnea' gucá'a Dios, bzua cuine' lau Dios chee' guzú'a zri'e' xel-la' dxezrá'a chee' Dios,  
na' bene' quebe guzrí'a xi' Dios benne' ca'.  
<sup>24</sup> Buluzúe' chalá'ala xezr la xu xrtante da gunezruj Dios le',  
ne quebe guléajle'e dizra' chee'.  
<sup>25</sup> Tu gulenné'zqueze' chee' Dios lu xu'u xide chee' ca',  
ne quebe buluzé nague' da gunná Xránadxu Dios.  
<sup>26</sup> Chee' le' na' bzetaj cuine' gunné' ca da guné' chee' benne' ca'.  
Gunné' guné' xelate benne' ca' le'e xixre' lawe' lataj na',  
<sup>27</sup> ne gusi'e bènneache chee' lu xel-la' stu' lau benne' xezr la xu ca',  
ne guse dínnaje' le' ládujla benne' xezr la xu ca'.  
<sup>28</sup> Nadxa belune' tuze benne' ca' dxulucá'ana szrene'

bedáu' xia nazí le na Baal-peor,  
ne gulawe' béadu ca' belúti'e' lau dios gate ca'.  
<sup>29</sup> Buluche'e' Dios ne chee' da belune',  
na' guxalaj tu xízrawe' zren da bete na benne' zan benne' ca'.  
<sup>30</sup> Nadxa guxasa Finees, ne beti'e' bénnea' bene' dul-la,  
na' guleza xízrawe' zren na'.  
<sup>31</sup> Da na' ben Finees guzrí' Dios ca tu da dxucá'ana xrlátaje na  
bénnea',  
da gulé'e lawe na lau xúgute' cuen bènneache ca'.  
<sup>32</sup> Cá'anqueze buluché'e' Dios dxu'a beaj nisa nazí le na  
Meriba,  
na' guca da calela chee' Moisés ne chee' benne' ca',  
<sup>33</sup> lawe' da ne chee' da belune' guca Moisés xichaj zra'a,  
na' bexúbeté Moisés da gunné'.  
<sup>34</sup> Gate gulu'e' lu xezr la xu nigá quebe buluzrí'a xi'e bènneache zaj nite' ga na'.  
Caní guca, quebe belune' ca da guzre Dios le' xelune'.  
<sup>35</sup> Gulaque' tuze benne' xezr la xu ca',  
ne bulusé'die' benne' Israel ca' xelune' ca dxelún benne' ca',  
<sup>36</sup> na' bulucá'ana szrene' bedáu' xia xaga ca' chee' benne' ca',  
da na' ben na bxrinnaj Dios bènneache chee'.  
<sup>37</sup> Belúti'e' zri'ine' bi biu, ne bi nu'ula chee' lau bedáu' chee' da xriwe' ca',  
<sup>38</sup> ne bululálaje' dxen chee' bi dxé'enedu ca',  
bi quebe zaj nunbe' dul-la,  
da naca na dxen chee' zri'ine' bi biu, ne bi nu'ula, bi ca' belúti'e' lau bedáu' xia xaga ca' chee' bènneache Canaán,  
na' guca sban xezr la xu na' ne chee' dxen chee' bidu ca'.  
<sup>39</sup> Da ca' belune' ben na le' sban,  
na' gulebéaj xíchaje' Dios lu da belune'.  
<sup>40</sup> Chee' le' na' bzrá'ale'e' Dios bènneache chee',  
na' gucuídené' benne' ca' zaj naca chee'.  
<sup>41</sup> Nadxa bde'e' benne' ca' lu na' benne' xezr la xu ca',  
na' benne' ca' dxelecuide bènneache chee' Dios gulenná bé'ene' le'.  
<sup>42</sup> Benne' ca' guledábage' le' bulusaca zi'e' bènneache chee' Dios,  
ne buluxrínna'e' le' lu xel-la' dxenná bea chee'.  
<sup>43</sup> Zánete' lasa Dios bselé' bènneache chee' ca',  
san guledábage' ca da bsízrene' le',  
na' gulape' xel-la' stu' lawe' da belune' da calela.  
<sup>44</sup> Lácala caní belune', gate gulezré'e' lu da stébe,  
Dios gunné'e' ca da dxelezaque',  
ne benne' ca da bululáwizre' Le',  
<sup>45</sup> na' xeajsa lazre' xel-la' wezrí'a da bènle'ne' benne' ca',  
na' bexíaje lazre' chee' xel-la' dxezrá'a chee' lawe' da nácale'e' benne' dxexache lazre'.

46 Cá'anqueze beñe' belexache lazre' benne' ca' benne' ca' guleché'e le' ca' benne' zaj nada'u.  
 47 ¡Bselá netu', Xránantu', nacu' Dios cheñtu'!  
 ¡Becá'a netu' ládujla benne' xezr la xu ca',  
 chee güe lá'anantu' Lau' lá'azxa,  
 ne chee béleñtu' lu da dxúl-lantu' chiu'!  
 48 Cháwedau' naca Xránadxu, Bénnea' naque' Dios  
 chee  
 benne' Israel ca' nédxudate, ne chadía chacanna.  
 Xúgute bénneache dxal-la' xelenné': ¡Ca'an gaca na!  
 ¡Gaca ba lá'azxa Xránadxu Dios!  
**107** ¡Le güe lá'ana Xránadxu, Benne' xrlátaje!  
 ¡Chadía chacanna naque' Benne' zri'i lazre'!  
 2 Da nigá dxal-la' xelenná benne' ca' ba naxá'awe Xránadxu le',  
 benne' ca' bselé' lu na' benne' guledábage' Le'.  
 3 Beché'e le' naga gulezrá' benne' xezr la xu zitu' ca',  
 da zaj zua naga dxalaj gubizra, ne naga dxebe' na,  
 ne naga za' be' zaga, ne naga dxedé' gubizra beu' za-  
 ga ca'.  
 4 Bal-la benne' ca' guledé' le'e xixre' naga quebe bi  
 neza zua,  
 ne quebe belezreñe' xezre naga xelezúe'.  
 5 Guledune', ne gulebílene',  
 ne québedxa bi gulebeza lazre'.  
 6 Nadxa lu da dxelezaque' gulenné' Xránadxu,  
 na' bselé' benne' ca' lu da dxelezaque'.  
 7 Na' buzre'e le' tu neza li,  
 chee chjaque' tu xezre naga xelezúe'.  
 8 Dخال-la' xelúe lá'ané' Xránadxu lawe' da bexache  
 lazre'  
 Xránadxu le',  
 ne lawe' da beñe' chee' da ca' da dxebénedxu.  
 9 Dxuxí'aje' benne' ca' dxelebile lazre',  
 ne dxugawe' benne' ca' dxeledún nen da chawe'  
 chee'.  
 10 Bal-la benne' caní' gulezúe' lu da chul-la, ne lu da  
 stebe  
 chee' xel-la' gute.  
 Gulaque' ca' benne' zaj xu'e lizre xia,  
 ne zaj nadxéaj du xia, ne dxeledé' ba xa',  
 11 lawe' da guledábage' xrtizra' Xránadxu,  
 ne buluzúe' chalá'ala da bzéajni'i Dios zrenté' le'.  
 12 Belexedú' lazre' lu zrin zí'ite' da dxelune'.  
 Xeleajcházie' zran xua da zaj nu'e,  
 ne quebe nu chilá' gácalene' le'.  
 13 Nadxa lu da dxelezaque' gulenné' Xránadxu,  
 na' bselé' benne' ca' lu da dxelezaque'.  
 14 Nadxa bebéajé' benne' ca' lu da chul-la  
 ne lu da stebe chee' xel-la' gute,  
 ne bzúzruje' du xia ca' da zaj nadxéajé'.  
 15 Dخال-la' xelúe lá'ané' Xránadxu lawe' da bexache  
 lazre' le',  
 ne lawe' da beñe' chee' da ca' da dxebénedxu.  
 16 Bchínnaje' dxa xu'u ca' zaj naca na xia gache,  
 ne bzúzruje' xia ca' da zaj naxechaj na benne' ca'.  
 17 Bal-la benne' ca' gulaque' benne' xala,  
 ne guledé' xel-la' zi' ne chee' dul-la da zaj nabague',

ne ne chee' da zrinnej ca' da belune'.  
 18 Belexegútené' da dxelé'aj dxelawe',  
 na' xáteze ca' gulátie'.  
 19 Nadxa lu da dxelezaque' gulenné' Xránadxu,  
 na' bselé' benne' ca' lu da dxelezaque'.  
 20 Gusel-le' dizra' chee' chee' benne' ca',  
 na' bexune' le', ne bselé' le' lu xel-la' gute.  
 21 Dخال-la' xelúe lá'ané' Xránadxu lawe' da bexache  
 lazre' le',  
 ne lawe' da beñe' chee' da ca' da dxebénedxu.  
 22 Dخال-la' xelé'e Le': Xcalenu'.  
 Dخال-la' xelú'e da xulunézruje' Le',  
 na' lu xel-la' dxelebé' chee' dxal-la' xelúl-le',  
 ne xuluzenne' bénneache ca' zaj naca da nune'.  
 23 Bal-la benne' ca' guledé' lu nísadau'  
 lu da zren ca' da dxedá lawe' nísadau'.  
 Belezi'e dumí' zren lu zrin dxelune' lu nísadau'.  
 24 Belelé'ene' ca' naca da ca' dxun Xránadxu,  
 da ca' dxune' lu nísadau' da zaj naca na da dxe-  
 bénedxu.  
 25 Gunnéze', na' guzú' lau dxaca be' bduu',  
 na' gulasa xejxruza zren lu nísadau'.  
 26 Belegúén da dxedá lawe' nísadau' ca' ca' lu xi'a zri'a  
 da naca na nísadau',  
 na' belexetaj na lu da situj lawe' nísadau' na'.  
 27 Guleché'güe', ne xejjeté' ni xejjeté' na' ca'  
 benne' dxelezuzre,  
 na' guca dácheze ca' da zaj nusé'die'.  
 28 Nadxa lu da dxelezaque' gulenné' Xránadxu,  
 na' bselé' benne' ca' lu da dxelezaque'.  
 29 Bzua zri'e' be' bduu' na' da dxaca na,  
 ne gulezúa zri' xejxruza chee' nísadau' na'.  
 30 Gulebé'le'ene' lawe' da zaj zua zri' xejxruza ca',  
 na' guché'e Dios le' cháwedau' naga zjaque'.  
 31 Dخال-la' xelúe lá'ané' Xránadxu lawe' da bexache  
 lazre' le',  
 ne lawe' da beñe' chee' da ca' da dxebénedxu.  
 32 Dخال-la' xuluzenne' ca' naca xel-la' szren chee' naga  
 zaj nazraga bénneache chee',  
 ne xelúe lá'ané' Le' naga zaj nazraga benne' gula ca',  
 benne'  
 dxelenná be'e.  
 33 Ben Xránadxu gulebizre xegu nisa ca',  
 ne busú'aje' beaj nisa ca'.  
 34 Xu xa'a bexune' na xu bizre,  
 ne chee' da caléla da belún benne' ca' zaj zre'e na'.  
 35 Naga naca xu bizre bexune' na xu nisa,  
 na' xu xiaj bexune' na naga dxalaj nisa.  
 36 Bzre'e ga na' benne' ca' benne' dxeledún,  
 na' belune' tu xezre naga xelezúe'.  
 37 Gulaze' xezr la xu na', na' belexaze' lba uva ca',  
 na' belexezí'le'e lina chee' na.  
 38 Beñe' da chawe' chee' benne' ca', na' gulánle'e  
 bidu chee' ca',  
 ne quebe be'e lataj xelexe ca' zaj naca be' xixre' chee'  
 ca'.  
 39 Gate buludé' benne' dxelenná bea benne' ca' lu xel-  
 la' zi',

ne bulusaca zi'e le',  
 ne gulenná bé'edxene' le', ne belune' le' da calela,  
 ne buludé'e' le' lu da ba xa',  
 40 bca'ana ditaj Dios benne' xíchaje' ca',  
 ne bene' guledé'e' le'e' xixre' lawe' lataj naga quebe bi  
 neza de.  
 41 Bselé' benne' xache' ca' lu da zi' da xa' da dxeledé'e',  
 ne bzánle'e' zri'ine benne' ca' ca dxelán zrila' ca'.  
 42 Gate dxelelé'e' benne' xrlátaje ca' da caní, na' dxele-  
 béle'ene',  
 na' benne' ca' dxelune' da calela quebe bi gaca xelen-  
 né'.  
 43 Benne' ca' zaj naque' sina dxal-la' xulaba lazre'  
 ca zaj naca da caní,  
 ne dxal-la' xelexúnbe'e' ca naca xel-la' zri'i lazre'  
 chee Xránadxu.  
**108** Ba zúatequeze lázrdawa', Dios,  
 chee gúl-laqueza' da güe lá'ana' Lue'.  
 Da nigá dxugú'u na neda' lu da ba neza.  
 2 Bebán lazre', bénne'du xu'a, na' le xebán lázrele,  
 le'e dxínnele da dxúl-lalene, ne da con zríadi'i na du.  
 Che zílala cheajsá'queza'.  
 3 Güe lá'anaqueza' Lue' ládujla bénneache chiu', Xran.  
 Gúl-laqueza' chiu' lau benne' duté xęzr la xu,  
 4 lawe' da naca xel-la' dxexache lazre' chiu' zrendxa ca  
 xabáa,  
 na' da li chiu' naca na zrendxa ca beuj bza ca'.  
 5 Xegá'ana szrénquezu' xabáa, Dios.  
 Xel-la' szren chiu' sua na lawe' duté xęzr la xu.  
 6 Chee xelexá benne' ca' nazrí'iqueznu' Lue',  
 bselá le' duté xel-la' waca chiu', ne bene chia'.  
 7 Lu lataj lá'azxa chee' gunná Dios: "Wabéquezda' ne-  
 da'.  
 Gunna' late weaj chee le xęzr la xu chee benne'  
 Siquem ca',  
 ne gudixra' chee le xęzr la xu de cuite xęgu Sucot.  
 8 Chia' naca xęzr la xu Galaad,  
 ne chia' naca xęzr la xu chee zri'ine zre sua Manasés.  
 Xęzr la xu chee zri'ine zre sua Efraín naca na ca tu  
 da napa chi'i na xíchaja'.  
 Xęzr la xu chee zri'ine zre sua Judá naca na naga  
 dxenná be'a.  
 9 Xęzr la xu chee benne' Moab naca na ca tu zriga'  
 da xuzru nisa guná'a,  
 na' lu xęzr la xu chee benne' Edom chu'una' zrela' gu-  
 la.  
 Si'a ba neza xęzr la xu chee benne' Filistea."  
 10 ¿Nuzra che' neda' chee chu'a xęzre da naxechaj ze'e  
 sibe?  
 ¿Nuzra che' neda' chee guzétaja' benne' Edom ca'?  
 11 ¿Quegá Lue' na' che'u neda', Dios.  
 Nacu' Bénnea' bzua netu' chalá'ala,  
 ne quebe guxéajlenu' benne' cheentu' ca', benne' dx-  
 jaque'  
 wedil-la, Dios?  
 12 Gúcale netu' chee séquentu' tíl-lalentu' benne' ca'  
 dxeledíl-lalene' netu',  
 lawe' da naca dácheze xelácale bénneache netu'.

13 Tu zren nen Dios gundxu tu da zrente,  
 na' Le' gulague' benne' ca' dxeledil-lalene' dxi'u.

**109** ¿Dios, dxue lá'ana' Lue'  
 Quebe xegá'anu' zrire

2 lawe' da dxelenná benne' ca' dxelune' da calela,  
 ne benne' wen lazre' ca' chia' neda'.  
 Dxelenné' chia' da naca da wen lazre'.

3 Lu xel-la' dxelecuide chee' zaj naxéchaje' neda',  
 ne dxelenné' chia'.

Dxeledíl-lalene' neda', ne quebe bi nuna' chee benne'  
 ca'.

4 Lácala bzri'ida' benne' ca', na'a dxeledábague' neda',  
 san neda' dxenaba' gaca da chawe' chee benne' ca'.

5 Lácala bęna' neda' da chawe' chee benne' ca', dx-  
 elune' chia'

da calela,  
 ne lácala bzri'ida' le', dxelecuídené' neda'.

6 Bzua tu benne' wen da zrinnaj chee guchi'e' chee  
 benne' wen da calela ca',

ne ben sua tu benne' nnié' chee benne' ca',  
 benne' guzúe' ca naca da calela belún benne' ca'.

7 Gate na' zri'a chee', ben gaca bea na zaj nabague'  
 zria.

Ble'e da xelenabe' lau' ca tu dul-la da dxelune'.

8 Bzache zra xelaca ban benne' ca',  
 ne ben xelú'u xezica' benne' waláz chee'.

9 Bca'ana zrí'ine' ca' bidau' wezebe,  
 ne xelaca zru'ule' nu'ula tuze ca'.

10 Ben xelaca zrí'ine' bi dxeledaze chee xelenábabe'  
 guna',

ne ben xelexrébe' xeta xelágube' zitu' naga zaj zua  
 lízrebe'

da zaj naxinnaj.

11 Ben xelú'u da ca' zaj nape' lu na' bénne' ca'  
 bulusané' le' dumí.

Ben xelexúa benne' zitu' ca' da ca' zaj nune'.

12 Ben quebe nu zrel-la benne' xexache lazre' le',  
 ne quebe nu benne' zrel-la xexache lazre' bidau'

wezebe  
 chee' ca'.

13 Ben xelebía xi' zri'ine zre sua benne' ca',  
 ne québedxa nu cha' zri'ine zre sue',

si' le' ca zaj nazi'i la benne' ca'.

14 Bsa lazre' ca da calela da belún xra xrtawe', Xran,  
 ne quebe xusulu' dul-la da gulún xrne'e' ca'.

15 Tu chí'izqueze bsa lazre' ca da calela da zaj nune'.  
 Québedxa cheajsá lazru' benne' ca'

16 lawe' da quebe xeleajsá lazre' xelexache lazre' le sa'  
 ljwezre' ca',

san bulusaca zi'e benne' baxache' ca', benne' dx-  
 elexájrjeng',

ne benne' dxexruj lazre' ca', na' belútié' bénne'du ca'.

17 Beledáneng' da dxugú'u na de', na' da caníze guca  
 na chee'.

Quebe gulaca lazre' xelenabe' gaca chawe' chee bén-  
 neache,

na' da chawe' bebiga na naga zaj zue'.

<sup>18</sup> De' da gulegú'ē bēneache guca na ca tu da gulacu cuine',

na' guxú'u na lē'ē ca nisa gulé'aje',  
ne guxú'u na zrita chee' ca da za.

<sup>19</sup> Tu chí'izqueze bēn gaca na chee' ca xicha da dx-elácuē',

ne gaca na ca tu xpádxuē' dxuluchela lē'ē.

<sup>20</sup> Gaca da nigá da quizruj Xránadxu Dios benne' ca' dxelenné' calēla chia',

ne da quízruje' benne' ca' dxelunē' da calēla,  
ne dxelenné' calēla chee' bēnne'du xu'a.

<sup>21</sup> Xrana' Dios, bēn culuén chia' chee' xegá'ana' xrlátaje lau'.

Bselá neda' lawe' da dxexache lázrele'u bēneache,

<sup>22</sup> ne lawe' da dxezaca zi'a, ne dxexáxrjeda',  
ne dxeque zi' lázrdawa'.

<sup>23</sup> Dxedé chia' ca dxedé chee' tu zrul-la gate dxebía gu-bizra.

Dxaca chia' ca dxaca chee' biche xuaj gate dxua be' lē-ba'.

<sup>24</sup> Dxelate zriba' lawe' da dxuna' gubasa,  
ne nazrítale'a lawe' da quebe bi dxawa'.

<sup>25</sup> Naca' ca tu da dxulucá'ana dítajē'.

Dxelenné'ē neda', ne dxelún lē' chia', dxulutá xíchajē'.

<sup>26</sup> Gúcalē neda', Xrana' Dios.

Bselá neda' lawe' da dxexache lazru' bēneache.

<sup>27</sup> Bēn xeleque be'ene' Lué'queze dxácalēnu' neda'.

Lué'queze, Xrana' Dios, ba nunu' da nigá.

<sup>28</sup> Dxelegu'ē neda' de', san bēn Lue' gaca chawe' chia'.

Guxasa, bēn xelxedu'é benne' ca' dxeledábaguē' neda',

san bēn beda' neda'.

<sup>29</sup> Bēn xelezrá' lu xel-la' stu' benne' ca' dxelenné' da calēla chia'.

Bēn xeleque zréajenē' tu chí'izqueze.

<sup>30</sup> Du lazra' gúl-laqueza' da güe lá'anale'a Xránadxu Dios.

Ládujla benne' zan ca' güe lá'ana' Lē'.

<sup>31</sup> Lē' zuē' cuita xabēla chee' benne' xache' ca' chee' guselé' bēnne'du zaj xu'ē lu na' benne' ca' dxuluchi'ē chee'.

**110** Xránadxu Dios guzre' Xrana': "Gudx'é chalá'a xabēla chia'

cadxa zrin zra guna' ga benne' ca' dxeledábaguē' lue' xuluzúa zribē' lau'."

<sup>2</sup> Naga zu' Sión, gun Xránadxu zriluj xel-la' dxenná bea chiu'.

Dxenné': "Gunná be'e benne' ca' dxeledábaguē' lue'.

<sup>3</sup> Lu zra gate tíl-lalēnu' benne' ca' dxeledábaguē' lue', du lázrequeze benne' chiu' ca' chjaque' wedil-la.

Ca dxun xrlē'ēla chee' bálala, dxacu na xi'a lá'azxa, caníqueze xelaca benne' cuide' chiu' ca', xelélé'ē naga zu' xelácalēne' lue'."

<sup>4</sup> Guchebe lazre' Xránadxu, ne quebe gunítie' xrtizre', gunné': "Chadía chacanna nacu' bxruze ca guca bxruze

Melquisedec."

<sup>5</sup> Zua Xránadxu chalá'a xabēla chiu'.

Gate zre'ē, na' guzría xi'ē benne' wenná bea ca'.

<sup>6</sup> Guchi'ē chee' benne' dutē xēzr la xu, na' gutie' zánete

benne' xēzr la xu ca'.

Guzría xi'ē benne' dxelenná be'ē dutē xēzr la xu.

<sup>7</sup> Xi'aj benne' wenná bea nigá nisa xégudu zua na dxu'a neza,

na' xexape' xel-la' wal-la chee'.

**111** Dutē lázrdawa' güe lá'ana' Xránadxu Dios tu zren nen

benne' xrlátaje ca', benne' zaj nazraguē' lau Lē'.

<sup>2</sup> Da zrentē zaj naca da ca' nun Xránadxu Dios, na' xúgute' benne' ca' dxelezaca ba lázrele'ē da nune',

ne dxelaca lazre' xelélé'ene' na.

<sup>3</sup> Da xabáa, ne da xrtantē zaj naca da dxunē' Lē', ne tu chí'izqueze zua da xrlátaje chee'.

<sup>4</sup> Dxunē' dxeajsá lázredxu ca naca xel-la' waca zrentē da dxunē'.

Xránadxu Dios naque' zren lazre', ne dxexache lazre' bēneache.

<sup>5</sup> Dxugawē' benne' ca' dxelezrebe' Lē'.

Tu chí'izqueze dxeajsá lazre' xel-la' wezría da nune'.

<sup>6</sup> Blé'ene' bēneache chee' ca' ca naca xel-la' waca chee'

da ca' bēne'.

Dxunézruje' benne' chee' ca' da zaj napa benne' xezi-ca

xēzr la xu ca'.

<sup>7</sup> Li lazre', ne xrlátaje zaj naca da ca' dxunē'.

Li lazre' zaj naca xúgute' da bdxixruj be'ē.

<sup>8</sup> Tu chí'izqueze, ne chadía chacanna zaj zua da ca' bdxixruje'.

Lu da lí, ne lu da li lazre' nune' ca' zaj naca na.

<sup>9</sup> Gusel-le' tu benne' weselá chee' guselé' bēneache chee'.

Tu chí'izqueze nadxixruj be'ē xel-la' wezría chee'.

Lá'azxa, ne tu da zrēbedxu naca La Lē'.

<sup>10</sup> Chee' su laudxu gácadxu sina, dxun na ba xen zrēbedxu

Xránadxu Dios.

Dxeléajni'i xanne' xúgute' benne' ca' dxelunē' ca' zaj naca

da nadxixruje'.

Tu chí'izqueze dxal-la' güe lá'anadxu Lē'.

**112** Ba neza zrentē naca na chee' bēneache' dxezre-be'

Xránadxu Dios,

ne ca' zaj naca da bdxixruj be'ē dxezaca ba lázrele'ene'.

<sup>2</sup> Zri'ine zre sua bēneache' xelape' xel-la' dxenná bea lu xēzr la xu,

na' gaca chawe' chee' benne' xrlátaje ca'.

<sup>3</sup> Da zan da dē, ne xel-la' gunní'a zaj zra na xu'u lizre', ne tu chí'izqueze zua da xrlátaje da dxun bēneache'.

<sup>4</sup> Dxusaní' tu xi' lu da chul-la naga zaj zra' benne' li lazre' ca',

benne' ca' zaj naque' zren lazre', ne xrlátaje,

ne dxelexache lazre' bënneache.  
 5 Tu benne' xrlátaje dxexache lazre' bënneache,  
 ne dxusanë' le' dumí.  
 Lu da xrlátaje dxenná bé'ene' da zaj xu'u lu ne'e.  
 6 Cheë le' na' quebe bi gutá na le' lu lataj naga zuë',  
 na' tu chí'izqueze xeajlesá lazre' bënneache ca'.  
 7 Quebe zrebe' gate xenne' dxaca da calëla chee  
 da xu'u lu ne'e.  
 Ze chacha lázrdawe' lawe' da dxuxrén lazre' Xránadxu  
 Dios.  
 8 Zua chawe' lázrdawe', ne quebe bi dxezrebe',  
 ca zrindxa zra lé'ene' gaca cheë benne' ca'  
 guledábage' le'  
 ca da dxezá lazre'.  
 9 Dxisië' da dë cheë', ne dxunézruje' da gácale  
 benne' xache' ca',  
 ne tu chí'izqueze zua da xrlátaje da dxunë'.  
 Lu da xabáa xegá'ana szren xel-la' dxenná bea cheë'.  
 10 Walé'e benne' wën da calëla da nigá, na' gueque  
 zréajene'.

Gágu xa'atë lazre', ne cue'e gunne xue.  
 Xelenite da ca' dxelezá lazre' benne' ca' dxelunë' da  
 calëla.

**113** ¡Le'e, wën zrin cheë Xránadxu Dios, le güe  
 lá'ana Le'!

¡Le güe lá'ana La Xránadxu Dios!

2 ¡Gaca ba lá'azxa La Xránadxu Dios,

na'a zra, ne chadía chacanna!

3 ¡Naga dxalaj gubizra ca zrintë naga dxebía na

gaca ba lá'azxa La Xránadxu Dios!

4 ¡Szrentë nagá'ana Xránadxu Dios lawe' dutë xëzr la

xu,

na' lówela xabáa dxe' da xabáa cheë'!

5 ¿Núzraqueze naca ca naca Xránadxu Dios,

Bénnea' dxe'e xabáa na'la?

6 Dios dxun cuinë' dxexruj lazre' cheë lé'ene'

da dë zran xabáa, ne lu xëzr la xu.

7 Dios dxechisë' benne' xache' lu xu xrte,

ne dxebéajë' benne' baxache' lu da dxezaca zi'e,

8 na' dxunë' dxelebé' benne' caní ládujla benne'

dxelenná be'e,

ládujla benne' ca' dxelenná bé'ene' bënneache cheë'.

9 Dxunë' zua nu'ula zuë' tuze ládujla zrí'inequeze' ca',

na' dxebé nu'ula nigá lawe' da naque' xrna bi

cheéqueze'.

¡Gaca ba lá'azxa Xránadxu Dios!

**114** Gate beledxúaj benne' Israel ca' lu xëzr la xu

Egipto,

beledxúaj zri'ine zre sua Jacob lu xëzr la xu chee

benne' zitu' ca',

2 na' gulaca zri'ine zre sua Judá ca tu xu'u lizre Dios,

gulaca benne' Israel ca' naga dxenná be'e.

3 Ble'e Nísadau' Xrna da nigá, na' bzrunnuj na,

na' gugá xëgu Jordán.

4 Gulexrite xi'a zri'a ca' ca dxelexrite chivo ca',

na' gulexrite xí'adu ca' ca dxelexrite chíbudu ca'.

5 ¿Bizra guca chiu', nísadau', lawe' da bën na bzrún-

nuju'?

¿Bizra guca chiu', xëgu Jordán, lawe' da bën na gugú'?

6 Le'e, xi'a zri'a ca', ¿Bizr cheë na' guxrítele ca dx-

elexrite

chivo ca'?

Le'e, xí'adu ca', ¿Bizr cheë na' guxrítele ca dxelexrite

chíbudu ca'?

7 Dxezrize xëzr la xu lau Xránadxu Dios, lau Dios cheë

Jacob.

8 Dios nigá bënë' bexaca xiaj xre' tu beaj nisa,

na' bexaca xiaj tu ga dxalaj nisa.

**115** Quegá netu', Xran.

Quegá cuintu', san Lué'queze dxal-la' xucá'ana

szrentu'

ne cheë xel-la' zri'i lazre' chiu', ne xel-la' li lazre' chiu'.

2 ¿Bizr cheë na' dxun na ba xen xuluchëbe bënneache

netu':

"Gazra zua Dios cheële?"

3 Dios cheëdxu zuë' xabáa.

Dxunë' ca da dxaca lázrequeze'.

4 Dios ca' cheë benne' ca' zaj naca na bedáu' plata,

ne bedáu' oro, da nun ni'a na' bënneache.

5 Zaj zua dxu'a na, san quebe dxelenné na.

Zaj zua xiaj lau na, san quebe dxelelé'e na.

6 Zaj zua naga na, san quebe dxelén na.

Zaj zua zrina na, san quebe dxelelé'e na.

7 Zaj zua na' na, san quebe bi dxelelé'e na.

Zaj zua ni'a na, san quebe dxeledá na.

Quebe dxedxuaj chi'i na lba na.

8 Ca zaj naca na, zaj naca benne' ca' zaj nune' na,

ne benne' ca' dxuluxrén lazre' na.

9 Le guxrén lazre' Xránadxu, le'e, benne' Israel ca'.

Le' dxácalëne' le'e, ne dxuxúe' le'e.

10 Le guxrén lazre' Xránadxu, le'e, bxruze cheë Dios,

nácale zri'ine zre sua Aarón.

Le' dxácalëne' le'e, ne dxuxúe' le'e.

11 Le guxrén lazre' Xránadxu, le'e dxucá'ana szrenle

Le'.

Le' dxácalëne' le'e, ne dxuxúe' le'e.

12 Xránadxu dxajsá lazre' dxi'u, na' gunë' dxi'u da

chawe'.

Gunë' da chawe' cheë benne' Israel ca'.

Gunë' da chawe' cheë bxruze cheë', zri'ine zre sua

Aarón.

13 Gunë' da chawe' cheë xúgutë benne' dxelape' Le'

ba lá'ana,

benne' blau ca', ne benne' quebe zaj naque' blau.

14 Gun Xránadxu chan zri'inu' ca',

ne chan zri'ine bi biu chiu' ca'.

15 Gun Xránadxu da chawe' chiu'.

Naque' Bénnea' bën xabáa, ne xëzr la xu.

16 Cheë tuze Xránadxu naca xabáa,

san bnézruje' bënneache xëzr la xu.

17 Benne' zaj nate quebe gaca xelúe lá'ane' Xránadxu,

ne quebe gaca benne' ca' zaj zuë' lu xëdxu ba.

18 Dxi'u, benne' ban, güe lá'anadxu Xránadxu,

na'a zra, ne chadía chacanna.

¡Le güe lá'ana Xránadxu!

**116** ¡Nazrí'ida' Xránadxu Dios  
 lawe' da benne' chi'a, ne da gunaba' lawe',  
 2 ne lawe' da bze nague' chia!  
 Chee le na' guláwizra' Le' dxácatę naca bana'.  
 3 Guzúa' lu da stębe chee xel-la' gute,  
 ne bzreba' ba zua' chu'a lataj ba xa'.  
 Guzúa' lu da stębe, ne guzaca zi'a.  
 4 Nadxa bláwizra' Xránadxu Dios, gunnía':  
 Xrana' Dios, bselá bęne'du xu'a.  
 5 Cháwe'le'e naca Xránadxu Dios, ne xrlátaje naque'.  
 Awe', dxexache lazre' Dios cheędxu dxi'u.  
 6 Dxuxúe Xránadxu benne' dxexruj lazre' ca'.  
 Gate na' guzúa' lu da stębe bselé' neda'.  
 7 Bęn dipa lazre', bęne'du xu'a,  
 lawe' da nun Xránadxu da chawe' chiu'.  
 8 Lue', Xran, bseláu' bęne'du xu'a lu na' xel-la' gute,  
 chee québedxa cuezre we'a, ne chee quebe chea-  
 jcházia'.  
 9 Ta' lau Xránadxu Dios  
 naga zaj zra' benne' ca' zaj naca banę'.  
 10 Guxéajle'a chee', na' chee le na' bchálaja', lálala  
 guzaca z'le'a.  
 11 Lu xel-la' dxezrebe chia', gunnía':  
 Zaj naca xúgutę bęneache benne' węn lazre' ca'.  
 12 ¿Bizra quízrujqueza' Xránadxu Dios  
 chee xúgutę da chawe' da bęne' chia'?  
 13 Si'a lu ne'e xel-la' weselá,  
 ne guláwizra' Xránadxu Dios.  
 14 Na'a guna' da ca' guchebe lazra' lau Xránadxu.  
 Guna' na lau xúgutę bęneache chee'.  
 15 Xránadxu Dios dxe'e gunne xue  
 chee bęneache chee' gate dxelátie'.  
 16 Xrana' Dios, da li naca' węn zrin chiu'.  
 Naca' węn zrin chiu', ne zri'ine nu'ula węn zrin chiu'.  
 Lue' bzúzruju' da zaj nadxéaj na neda'.  
 17 Da güe lálana' Lue' gaca na ca tu béadau' gutia'  
 lau',  
 ne gucá'ana szrena' Lau', Xrana' Dios.  
 18 Lau Xránadxu Dios guna' da ca' guchebe lazra'  
 chee',  
 da guna' lau xúgutę bęneache chee'.  
 19 Guna' na chale'aj xu'u lizre Xránadxu Dios,  
 da dxe' na lu'ule xęzre Jerusalén.  
 ¡Gaca ba lálaxa Xránadxu Dios!

**117** ¡Le güe lálana' Xránadxu Dios, le'e, benne' dute  
 xęzr la xu!

¡Le güe lálana' Le', le'e, xúgutę bęneache,  
 2 lawe' da zrentę naca xel-la' zri'i lazre' chee' ca  
 nazrí'ine' dxi'u,  
 ne chadía chacanna naca xel-la' li lazre' chee'!  
 ¡Le güe lálana' Xránadxu!

**118** ¡Le güe lálana' Xránadxu Dios lawe' da naque'  
 xrlátaje,

ne lawe' da chadía chacanna dxexache lazre' dxi'u!  
 2 Dخال-la' xelenná benne' Israel ca':  
 ¡Chadía chacanna dxexache lazre' dxi'u!  
 3 Dخال-la' xelenná zri'ine zre sua Aarón:  
 ¡Chadía chacanna dxexache lazre' dxi'u!

4 Dخال-la' xelenná benne' ca' dxelezrebe' Xránadxu  
 Dios:

¡Chadía chacanna dxexache lazre' dxi'u!  
 5 Gate na' guzúa' lu da stębe bláwizra' Xránadxu Dios,  
 na' bechebe Xránadxu, ne bselé' neda' lu da na'  
 bęxru na neda'.

6 Zualę Xránadxu neda', na' québequeze zreba'  
 bi xelún bęneache chia' neda'.

7 Zúalę Xránadxu neda' ládújla benne' ca' dxelácalęne'  
 neda'.

Chee le na' le'eda' cheajlechaze benne' ca' dxelecuí-  
 denę' neda'.

8 Cháwe'dxa naca guxrén lázredxu Xránadxu Dios  
 quézcala guxrén lázredxu bęneache.

9 Cháwe'dxa naca guxrén lázredxu Xránadxu Dios  
 quézcala guxrén lázredxu benne' dxelenná be'e.

10 Gulechaj benne' xúgutę cue' xęzr la xu neda',  
 na' lu La Xránadxu Dios guzría xi'a benne' ca'.

11 Guléchaję' neda', ne buluchídie' neda',  
 na' lu La Xránadxu Dios guzría xi'a benne' ca'.

12 Guléchaję' neda' ca dxelún bęscutuche',  
 na' guca xel-la' dxelezrá'a chee' ca tu xi' da dxuzezxe

na  
 xixre' xeche' bizre,  
 na' lu La Xránadxu Dios guzría xi'a benne' ca'.

13 Buluzrigue' neda' chee cheajcházia'  
 na' gúcalę Xránadxu Dios neda'.

14 Naca Xránadxu Dios ca tu xu'u naga zua chawa',  
 na' tu gúl-lazqueza' chee' lawe' da Lęqueze' dxuselé'  
 neda'.

15 Xel-la' dxelebé dxelul-la benne' xrlátaje ca'  
 lawe' da dxuselá Xránadxu le'.  
 Dute xel-la' waca chee' dxun Xránadxu Dios da zrentę  
 ca'.

16 Szrentę nagá'ana xel-la' waca zren chee Xránadxu  
 Dios.

Da zrentę ca' dxun xel-la' waca zren chee Xránadxu.

17 Québequeze gatia', san gaca bana',  
 na' guzenda' bęneache ca zaj naca da nun Xrá-  
 nadxu.

18 Bde Xránadxu neda' lu da ba xa',  
 san quebe bdeę' neda' lu na' xel-la' gute.

19 Gusalaj dxa xu'u chee chu'a naga guchi'u chia',  
 Xran,

na' chu'a na', ne güe lálana' Lue', Xrana' Dios.

20 Dxa xu'u nigá naca na chee Xránadxu Dios.  
 Dxa xu'u nigá dxelú'u benne' xrlátaje ca'.

21 Güe lálana' Lue', Xran, lawe' da bennu' chia',  
 ne bseláu' neda' lu da guca chia'.

22 Xiaj na' da buluzúa benne' węn xu'u ca' chalá'ala,  
 le na' naca na xiaj blau.

23 Da nigá bęn Xránadxu,  
 na' naca na tu da dxexebánedxu.

24 Zra nigá naca na zra da bęn Xránadxu.  
 Béleędxu, ne súadxu lu da ba neza lu zra nigá.

25 Xrana' Dios, dxata' xueda' Lue' guseláu' netu' na'a.  
 Dxata' xueda' Lue', Xrana', gunu' chepe ban na'a da  
 dxuntu'.



<sup>26</sup> Ba neza zrentę naca na cheę bénnea' zęę waláz cheę

Xránadxu Dios.

Lu xu'u lizre Xránadxu Dios nigá dxenábantu' gaca chawe' chiu'.

<sup>27</sup> Xránadxu naqueę' Dios, ne ba bęneę' dxi'u tu da dhusaní na.

Le guchéaj béadu ca' gútele lawę' lu luzu cugu cheę'.

<sup>28</sup> Nacu' Lue' Dios chia', na' güe lá'ana' Lue'.

Dios chia', gucá'ana szrena' Lue'.

<sup>29</sup> ;Le güe lá'ana Xránadxu Dios lawe' da naqueę' xrlá-taje,

ne lawe' da chadía chacanna dxexache lazre' dxi'u!

#### Da dxun da bdxixruj be'e Dios dxi'u

**119** Ba neza zrentę naca na cheę benne' ca' tu dx-elúnzqueze'

da naca du lazre',

benne' ca' tu dxelúnzqueze' ca dxenná da bdxixruj bea

Xránadxu Dios.

<sup>2</sup> Ba neza zrentę naca na cheę benne' ca' tu dx-elúnzqueze'

ca dxusęde dizra' cheę dxi'u,

na' dutę xichaj lázrdawę' dxuluzúę' dizra' cheę'.

<sup>3</sup> Benne' caní québequeze dxelunę' da zrinnaj, benne' ca' tu dxelúnzqueze' ca dxenná Dios dxal-la' xelunę'.

<sup>4</sup> Lue', Xran, bsízrenu' netu' cheę gun xánntentu'

ca zaj naca da bdxixruj be'u Lue'.

<sup>5</sup> Dxaca lázrele'a tu gúnzqueza'

ca zaj naca xrba chiu'.

<sup>6</sup> Nadxa québequeze xedué'eda',

na' cue'a gunne xue guna' xúgute da bdxixruj be'u.

<sup>7</sup> Dutę xel-la' li lazre' chia' güe lá'ana' Lue' gate ba nusédia'

da ca' nuchi'u cheętu', da zaj naca na xrlátaje.

<sup>8</sup> Tu gúnzqueza' ca da dxenná be'u.

Québequeze cueaj xíchaju' neda'.

#### Dxal-la' gundxu da gunnáqueze Dios

<sup>9</sup> ;Ájala gun benne' cuide' gunbe' da naca na xrlátaje? Dxal-la' tu gúnzquezebe' ca dxenná xrtizru'.

<sup>10</sup> Dutę xichaj lázrdawa' dxuna' ba xuzre guna' da dxennáu' Lue'.

Quebe gu'u lataj guzúa' chalá'ala ca da bdxixruj be'u.

<sup>11</sup> Lu xichaj lázrdawa' tu dxúnzqueza' ca da dxennáu' Lue'

cheę quebe guna' dul-la tábaga' Lue'.

<sup>12</sup> Ba lá'azxa nacu' Lue', Xrana' Dios.

Bsęde neda' da ca' dxenná be'u.

<sup>13</sup> Nen dxú'aqueza' ba bzenda' bęneache

ca zaj naca da ca' nuchi'u cheętu'.

<sup>14</sup> Dxebéleędxeda' tu dxúnzqueza' ca dxusęde dizra' chiu' netu',

quez ca dxelebé benne' ca' déleę xel-la' gunní'a cheę'.

<sup>15</sup> Gulaba lazra' ca zaj naca da bdxixruj be'u Lue',

ne nna' xánnia' ca dxennáu' dxal-la' guntu'.

<sup>16</sup> Béleę'eda' guna' ca da dxenná be'u,

ne quebe gal-la lazra' ca zaj naca xrtizru'.

#### Dxebéleędxu dxundxu da dxennáqueze Dios

<sup>17</sup> Bęn gaca chawe' chia' neda', węn zrin chiu',

na' gaca bana', ne tu gúnzqueza' ca naca xrtizru'.

<sup>18</sup> Gusalaj xiaj lawa' cheę nna'a

da zrentę ca' da zaj zua na lu da bdxixruj be'u.

<sup>19</sup> Naca' ca tu benne' dxedazę' lu xęzr la xu nigá.

Bęn chéajni'ida' da dxenná da bdxixruj be'u.

<sup>20</sup> Dxedú lazra' lawe' da tu chí'izqueze

dxezá lazra' guna' da ca' nuchi'u cheętu'.

<sup>21</sup> Gudil-lu' benne' ca' dxulucá'ana szren cuinę', benne' węn da calęla ca',

benne' ca' dxuluzúę' chalá'ala da bdxixruj be'u.

<sup>22</sup> Quebe gu'u lataj nu benne' nņę' schanni' chia',

na' quegá gucá'ana dítaję' neda'

lawe' da tu dxúnzqueza' ca dxusędenu' netu'.

<sup>23</sup> Cá'anqueze benne' dxelenná bea ca' gulennę' chia'.

Neda', węn zrin chiu', blaba lazra' ca zaj naca xrba chiu'.

<sup>24</sup> Dxezaca ba lázrele'a da dxusęde dizra' chiu' netu'.

Dxuluzéajni'i na neda'.

#### Dutę lázrdaudxu gundxu da dxennáqueze Dios

<sup>25</sup> Zua bęne' du xu'a lu da stębe cheę xel-la' gute.

Bęn dipa xichaj lázrdawa' nen xrtizru'.

<sup>26</sup> Ble'eda' Lue' ca zaj naca da dxuna', na' bezi'u neda'.

Bsęde neda' ca zaj naca xrba chiu'.

<sup>27</sup> Bęn chéajni'ida' ca gaca guna' ca bdxixruj be'u

cheę gulaba lazra' ca zaj naca da zrentę ca' da bęnu'.

<sup>28</sup> Dxedú lazra' lawe' da dxewí'ine lázrele'a.

Bęxru chacha neda' nę cheę xrtizru'.

<sup>29</sup> Quebe gu'u lataj guna' da naca na węn lazre'.

Lu xel-la' dxexache lazre' chiu' bsęde neda' da bdxixruj be'u.

<sup>30</sup> Bechugu lazra' guna' da naca li lazre',

na' dxe'a gunne xue guna' da ca' nuchi'u cheętu'.

<sup>31</sup> Tu dxúnzqueza' ca dxusęde dizra' chiu' netu'.

Xran, quebe guzú' neda' lu xel-la' stu'.

<sup>32</sup> Tu gúnzqueza' ca bdxixruj be'u,

gate guzéajni'idxenu' neda'.

#### Dxaca lázredxu chéajni'idxu xrtizra' Dios

<sup>33</sup> Xran, bsęde neda' cheę guna' ca naca xrba chiu', na' tu gúnzqueza' ca naca na ca zrindxa zra cheajsę chia'.

<sup>34</sup> Bzéajni'i neda', na' tu gúnzqueza' da bdxixruj be'u,

na' dutę lázrdawa' guna' ca naca na.

<sup>35</sup> Ble'e neda' cheę guna' da bdxixruj be'u,

lawe' da dxaca lázrequeza' guna' ca dxenná na.

<sup>36</sup> Bęn sa lazra' guna' ca dxusęde dizra' chiu' netu',

cheę quebe gaca' benne' wecude.

<sup>37</sup> Quebe gu'u lataj gucá'ana szrena' bedáu' xia xaga ca'.

Ben dipa xichaj lázrdawa' chee guna' ca dxenná xrtizru'.

<sup>38</sup> Ben ca dxenná xrtizru' da guchebe lazru' chia' neda',

wen zrin chiu', chee zreba' Lue'.

<sup>39</sup> Bde chalá'ala dizra' schanni' da dxelenné' chia', da na' dxezreba', lawe' da xrlátaje zaj naca xrba chiu'.

<sup>40</sup> Dxezá lazra' guna' da bdxixruj be'u.

Ben dipa xichaj lázrdawa' nen da xrlátaje chiu'.

#### Dxuxrén lázredxu xrtizra' Dios

<sup>41</sup> Gudá xexache lazru' neda', Xrana' Dios.

Gudá guseláu' neda', ca ba guchebe lazru' gunu'.

<sup>42</sup> Becheba' lau bénnea' dxusi'e neda' xel-la' stu', gun-nía':

Dxuxrén lazra' xrtizra' Xrana' Dios.

<sup>43</sup> Ben tu séquezda' guchálaja' dizra' li lazre' chiu', lawe' da dxebeza lazra' da ca' dxuchi'u cheentu'.

<sup>44</sup> Tu gúnzqueza' ca dxenná da bdxixruj be'u.

Guna' na tu chí'izqueze, ne chadía chacanna.

<sup>45</sup> Láqueza' neda'

lawe' da dxe'a gunne xue guna' ca bdxixruj be'u.

<sup>46</sup> Guchálajqueza' ca dxusede dizra' chiu' netu' lau benne' wenná bea ca', na' québequeze xedué'eda'.

<sup>47</sup> Wabéle'eqezda' guna' ca bdxixruj be'u, da ca' nazrí'ile'eda'.

<sup>48</sup> Dxechebe lazra' guna' ca bdxixruj be'u, da nazrí'ida', na' gulaba lazra' ca naca xrba chiu'.

#### Tu zúazqueze xrtizra' Dios

<sup>49</sup> Bsa lazre' da guchebe lazru' chia' neda', wen zrin chiu', da na' benu' dxebeza lazra'.

<sup>50</sup> Gate na' guzaca zi'a, guzúa tu da bexúe zren na neda'

lawe' da ben dipa xrtizru' xichaj lázrdawa'.

<sup>51</sup> Benne' dxulucá'ana szren cuine' belún lalé' chia' neda',

san québequeze gusana' da dxenná da bdxixruj be'u.

<sup>52</sup> Xeajsá lazra' da bchi'u cheentu' nédxudaute, Xran, na' bexaca zrena'.

<sup>53</sup> Nen duté xel-la' dxezrá'a guzúa' lu da stebe ne chee benne' ca' dxelune' da zrinnaj, benne' ca' dxuluzúe' chalá'ala da bdxixruj be'u.

<sup>54</sup> Xrba chiu' ca' gulaca na chia' ca tu da dxul-la' gate na' zua' tu xezr la xu zitu'.

<sup>55</sup> Chizrela xeajsá lazra' lau' Lue', Xrana' Dios, na' tu bénzqueza' ca dxenná da bdxixruj be'u.

<sup>56</sup> Lu da ba neza caní guzúa'

lawe' da tu bénzqueza' ca zaj naca da bdxixruj be'u.

#### Dxebedxu dxulábadxu xrtizra' Dios

<sup>57</sup> Da dxezá lazra' nácaquezu' Lue', Xrana' Dios.

Ba gunnía' tu gúnzqueza' ca naca xrtizru'.

<sup>58</sup> Duté lázrdawa' dxenaba' Lue' xidu' gácalenu' neda'. Bexache lazre' neda' ca ba gunnáu' gunu'.

<sup>59</sup> Gunná' xannia' ca zaj naca da dxuna',

na' xecha lasa dxuna' ca dxusede dizra' chiu' netu'.

<sup>60</sup> Bena' ba xuzre, ne quebe guzreda' chee tu gúnzqueza' ca bdxixruj be'u.

<sup>61</sup> Xralaj chee benne' ca' dxelune' da caléla zaj nucele na

neda',

san quebe ne gal-la lazra' ca dxenná da bdxixruj be'u.

<sup>62</sup> Dxéla dxasa' chee güe lá'ana' Lue'

lawe' da xrlátaje zaj naca da ca' dxuchi'u cheentu'.

<sup>63</sup> Naca' tuze nen xúgute' benne' ca' dxelezrebe' Lue', benne' ca' tu dxelúnzqueze' da bdxixruj be'u.

<sup>64</sup> Xrana' Dios, dxezrín duté xezr la xu

xel-la' dxexache lazre' chiu'.

Bsede neda' chee guna' ca dxenná xrba chiu'.

#### Zácale'e da wnnáqueze Dios

<sup>65</sup> Ba benu' guca chawe' chia' neda', wen zrin chiu'.

Xran, benu' na cáteze dxenná xrtizru'.

<sup>66</sup> Bsede neda' chee gueque be'eda' da naca xrlátaje, ne chee chéajni'ida' lawe' da dxéajle'a da bdxixruj be'u.

<sup>67</sup> Nédxula ca bzéxruju' neda' gudéa' chalá'ala, na' na'a tu dxúnzqueza' ca dxenná xrtizru'.

<sup>68</sup> Nacu' xrlátaje, ne dxunu' gaca chawe' cheentu'.

Bsede neda' guna' ca naca xrba chiu'.

<sup>69</sup> Benne' dxulucá'ana szren cuine' gulenné' chia' da wen lazre'

san duté lázrdawa' tu gúnzqueza' ca bdxixruj be'u.

<sup>70</sup> Quebe xu'u xel-la' dxéajni'i lázrdau benne' ca'.

Neda' dxezaca ba lázreléna' da dxenná da bdxixruj be'u.

<sup>71</sup> Chawe' naca bzéxruju' neda'

chee gusédia' guna' ca naca xrba chiu'.

<sup>72</sup> Cháwedxa naca da bdxixruj be'u chia' neda' quez ca gaxúa gaxúane dumí oro, ne plata.

#### Cháwele'e naca da wnnáqueze Dios

<sup>73</sup> Nen ná'quezu' benu' neda' cáteze naca'.

Bzéajni'i neda' chee gusédia' guna' ca bdxixruj be'u.

<sup>74</sup> Benne' dxelezrebe' Lue' xelélé'ene' neda'.

Xelebene' lawe' da dxebeza lazra' gaca ca dxenná xrtizru'.

<sup>75</sup> Xran, ba nézquezda' xrlátaje naca da dxuchi'u cheentu',

na' lu duté xel-la' li lazre' chiu' bsaca zi'u neda'.

<sup>76</sup> Lu duté xel-la' dxexache lazre' chiu' bexúe zren neda'

cáteze dxenná da guchebe lazru' chia' neda', wen zrin chiu'.

<sup>77</sup> Bexache lazre' neda' chee gaca bana'

lawe' da dxezaca ba lázreléna' da bdxixruj be'u.

<sup>78</sup> Ben xelexedué'e benne' ca' dxulucá'ana szren cuina lawe' da gulenné' schanni' chia', ne quebe bi bena' chee'.

Neda' gulaba lazra' ca da bdxixruj be'u.

<sup>79</sup> Ben xelexelá' benne' ca' dxelezrebe' Lue', chee xelenne' chia',

na' xulusédie' da dxusede dizra' chiu' netu'.

<sup>80</sup> Ben gaca' du lazre' ca naca xrba chiu' chee québequeze xedué'eda'.

#### Gun Dios ca dxenná xrtizre'

<sup>81</sup> Zua bénne'du xu'a lu da stębe

lawe' da dxebeza' xidu' guseláu' neda',

na' dxebeza lazra' gaca ca dxenná xrtizru'.

<sup>82</sup> Dxezé bxrinne xiaj lawa' lawe' da dxezá lazra' xrtizru',

dxennia': ¿Bátaqueze xexúe zrenu' neda'?

<sup>83</sup> Dxebizra' ca tu buzude xide zę na lu zren,

san quebe dxal-la lazra' guna' ca dxenná xrba chiu'.

<sup>84</sup> ¿Bal-la zra gaca bana' neda', węn zrin chiu'?

¿Bátaqueze gudéu' lu da ba xa' benne' ca'

dxeláu zi' xuzre' neda'?

<sup>85</sup> Benne' dxulucá'ana szren cuine' gulęne' tu xędxu naga cheajcházia'.

Québequeze dxelunę' ca dxenná da bdxixruj be'u.

<sup>86</sup> Da líqueze zaj naca xúgutę da bdxixruj be'u.

Gúcalę neda' lawe' da dxeláu zi' xuzre' neda',

ne quebe bi nuna' chee'.

<sup>87</sup> Xeláteze la belutie' neda',

san quebe ne gusana' guna' ca bdxixruj be'u.

<sup>88</sup> Lu xel-la' dxexache lazre' chiu' ben dipa xichaj lázrdawa',

chee tu gúnzqueza' ca dxusede dizra' chiu' netu'.

#### Dxéajle'dxu xrtizra' Dios

<sup>89</sup> Xrana' Dios, tu chí'izqueze

zua xrtizru' xabáa na'la.

<sup>90</sup> Xel-la' li lazre' chiu' sua na chee xúgutę bėnneache.

Lue' bzua chúchuquezu' xęzr la xu, na' zúaqueze na.

<sup>91</sup> Ne chee da gunnáquezu' zaj nnita xúgutę da dę,

na' xúgutę da ca' dxelún na zrin chiu'.

<sup>92</sup> La quebe bezaca ba lázrelęna' da bdxixruj be'u

bache benítia' lu da guzaca zi'a.

<sup>93</sup> Cabátaqueze gal-la lazra' da bdxixruj be'u

lawe' da ne chee da ca' ba btipu' lazra'.

<sup>94</sup> Chiu' Lue' naca' neda'.

Bselá neda', lawe' da dxuna' ba xuzre guna' ca bdxixruj be'u.

<sup>95</sup> Benne' dxelebéaj xichaj Dios gulenné'ę neda' chee

xuluzría xi'ę neda',

san neda' dxulaba lazra' ca dxusede dizra' chiu'.

<sup>96</sup> Dxelé'ęquezda' dxeajsé chee xúgutę da dę lu xęzr la xu,

san da bdxixruj be'u Lue' québequeze cheajsé chee

na.

#### Dxaca lázredxu gúnbeadxu xrtizra' Dios

<sup>97</sup> Dios, nazrí'ile'ęda' da bdxixruj be'u.

Du zra dxulaba lazra' ca naca na.

<sup>98</sup> Ne chee da bdxixruj be'u nunu' nácadxa' sina ca benne' ca'

dxeledábaguę' neda'

lawe' da tu zúalęzqueze da bdxixruj be'u neda'.

<sup>99</sup> Dxéajni'idxeda' ca benne' ca' dxulusédenę' neda'

lawe' da dxulaba lazra' ca dxusede dizra' chiu' neda'.

<sup>100</sup> Ba guxéajni'idxeda' ca benne' gula ca'

lawe' da tu dxúnzqueza' ca dxenná da bdxixruj be'u.

<sup>101</sup> Bęna' ba xuzre quebe bi da calęla guna'

chee tu gúnzqueza' ca dxenná xrtizru'.

<sup>102</sup> Quebe bsana' dxuna' da ca' nuchi'u cheętu'

lawe' da Lué'queze bsédenu' neda'.

<sup>103</sup> Xrtizru' naca na ca tu da zízrelęę lu dxu'a.

Nácadxa na zixre ca bzrina'dau' lu dxu'a.

<sup>104</sup> Ne chee da bdxixruj be'u naca' benne' sina.

Chee le na' dxecuída' xúgutę da węn lazre'.

#### Xrtizra' Dios dxuzéajni'i na dxi'u

<sup>105</sup> Ca tu xi' naca xrtizru' naga dxedá',

da dxusení na neza xu'a.

<sup>106</sup> Bzétaja' Dios, ne guchebe lazra'

tu gúnzqueza' ca nuchi'u cheętu' da naca na xrláta-je.

<sup>107</sup> Dxezaca zílę'a.

Xrana' Dios, btipa lazra' cáteze guchebe lazru' gunu'.

<sup>108</sup> Xrana' Dios, dxata' xueda' Lue' si'u da dxue lá'ana' Lue',

ne gusédenu' neda' guna' ca nuchi'u cheętu'.

<sup>109</sup> Tu zúazqueza' lu da stębe chee xel-la' gute,

san québequeze ne gal-la lazra' guna' ca bdxixruj be'u.

<sup>110</sup> Benne' dxelebéaj xichaj Dios buluzalę' xralaj

da quęla na neda'

san neda' quebe bsana' dxuna' ca bdxixruj be'u.

<sup>111</sup> Ba gucá'a da dxusede xrtizru' neda' chee gaca na

da gápaqueza' chadía chacanna

lawe' da zaj naca xrtizru' da dxezaca ba lázrelę'a.

<sup>112</sup> Zúateęqueze lázrdawa' guna' ca zaj naca xrba chiu'

tu chí'izqueze, ca zrindxa zra cheajsé chia'.

#### Bexácadxu chawe' ne chee xrtizra' Xránadxu

<sup>113</sup> Dxecuída' benne' ca' dxelunę' láweze da xrlátaje,

san nazrí'ida' da dxenná da bdxixruj be'u.

<sup>114</sup> Nacu' Lue' ca tu xu'u naga zua chawa', ne ca tu

da dxucu'uj na neda',

lawe' da dxebeza lazra' gaca na ca dxenná xrtizru'.

<sup>115</sup> Le gucuasa naga zua', le'e, benne' węn da calęla,

lawe' da tu gúnzqueza' ca bdxixruj bea Dios chia'.

<sup>116</sup> Bzę chacha neda' cáteze dxenná xrtizru', na' gaca

bana',

ne quebe xedué'eda' chee da na' dxebeza lazra'.

<sup>117</sup> Bzę chacha neda', na' la',

ne tu xezaca ba lázrezqueza' ca naca xrba chiu'.

<sup>118</sup> Bchuchu bléaju' xúgutę benne' ca' bulusanę' ca naca

xrba chiu'

lawe' da węn lazre' naca xel-la' sina chee benne' ca'.

<sup>119</sup> Ca bębe bzria xi'u xúgutę benne' ca' dxelebéaj xichaję'

Lue' lu xęzr la xu nigá.

Chee le na' nazrí'ida' da dxusede dizra' chiu' netu'.

<sup>120</sup> Dxezrize bela' dxen chia' lawe' da dxezreba' Lue',  
ne dxezreba' da dxuchi'u cheętu' da naca na xrláta-  
je.

#### Dxal-la' gundxu ca dxenná xrtizra' Xránadxu

<sup>121</sup> Ba beńa' ca da nuchi'u cheętu', ne ca naca da xrlá-  
taje.

Quebe gudéu' neda' lu na' benne' ca' dxuluchínene'  
neda'.

<sup>122</sup> Gučebe lazre' chia' gunu' gaca chawe' chia'.  
Quebe gu'u lataj benne' ca' dxulucá'ana szren cuine'  
xuluchínene' neda' xadía.

<sup>123</sup> Guzé bxrinne xiaj lawa' lawe' da dxebeza' xidu'  
guseláu' neda',  
ne guchi'u cheętu' ca dxenná xrtizru'.

<sup>124</sup> Dute xel-la' dxexache lazre' chiu' beń gaca chawe'  
chia' neda', węń zrin chiu',  
ne bseđe neda' guna' ca naca xrba chiu'.

<sup>125</sup> Naca' węń zrin chiu'.  
Bzėjni'i neda' cheę gúnbe'a da dxuseđe dizra' chiu'  
netu'.

<sup>126</sup> Xrana' Dios, ba bzin zra bi gunu',  
lawe' da ba buluzúę' chalá'ala da bdxixruj be'u.

<sup>127</sup> Cheę le na' neda' nazrí'idxeda' da bdxixruj be'u  
Lue'

quézcala oro, ne quézcala galega oro.

<sup>128</sup> Cheę le na' dxéqueda' zaj nácadxa li lazre'  
da bdxixruj be'u ca xúgutę da de,  
na' dxecuídeda' xúgutę da zaj naca na da węń lazre'.

#### Dxaca lázredxu gundxu ca dxenná xrtizra' Dios

<sup>129</sup> Dxebánetu' ca dxuseđe dizra' chiu' netu'.

Cheę le na' du lazra' tu dxúnzqueza' ca dxenná na.

<sup>130</sup> Gate nu dxuzájla'a ca naca xrtizru', dxusaní na.  
Dxun na dxelėjni'i benne' dxexruj lazre' ca'.

<sup>131</sup> Guxá dxu'a, ne gucá'a lazra'  
lawe' da dxezá lazra' gúnbe'a da bdxixruj be'u.

<sup>132</sup> Gunná' neda', ne bexache lazre' neda',  
ca tu dxúnzquezu' cheę benne' ca' zaj nazrí'ine' Lue'.

<sup>133</sup> Beń tu gúnzqueza' ca dxenná xrtizru',  
ne quebe gu'u lataj da zrinnaj nna be'e na neda'.

<sup>134</sup> Bselá neda' lu na' benne' xichaj zra'a ca',  
na' tu gúnzqueza' ca dxenná da bdxixruj be'u.

<sup>135</sup> Beń gaca chawe' chia' neda', węń zrin chiu',  
ne bseđe neda' guna' ca zaj naca xrba chiu' ca'.

<sup>136</sup> Nisa gudxezra' guca na ca tu xęgu nisa  
lawe' da quebe dxelún bėnneache ca bdxixruj be'u.

#### Da li naca da dxenná Xránadxu

<sup>137</sup> Xrana' Dios, xrlátaje nacu' Lue',  
ne li lazre' naca ca dxuchi'u cheętu'.

<sup>138</sup> Da dxuseđe dizra' chiu' netu', da na' bzu' lu na'ntu',  
naca na da li, ne da li lazre'.

<sup>139</sup> Dxedú lazra' lawe' da dxé'le'a gunne xue  
lawe' da gulal-la lazre' benne' ca' dxeledábague' neda'  
ca zaj naca xrtizru'.

<sup>140</sup> Du lázreleę naca xrtizru',

na' nazrí'ida' neda' na, naca' węń zrin chiu'.

<sup>141</sup> Ddexruj lazre' naca', na' dxuluzúę' neda' chalá'ala,  
na' quebe ne gal-la lazra' da bdxixruj be'u.

<sup>142</sup> Tu chí'izqueze zua da dxuchi'u cheętu',  
na' da li naca da bdxixruj be'u.

<sup>143</sup> Da dxezaca zi'a, ne da stębe zua' zaj nuchuchuj na  
neda',

san dxezaca ba lázreleńa' da bdxixruj be'u.

<sup>144</sup> Tu chí'izqueze naca li lazre' da dxuseđe dizra' chiu'.  
Bzėjni'i neda', na' gaca bana'.

#### Dxal-la' gulaba lázredxu da gunná Dios

<sup>145</sup> Dute lázrdawa' dxuláwizra' Lue', Xrana' Dios.

Beń gaca chawe' chia', na' tu gúnzqueza' ca dxenná  
xrba chiu'.

<sup>146</sup> Dxuláwizra' Lue'.

Bselá neda', na' tu gúnzqueza' ca dxuseđe dizra' chiu'  
netu'.

<sup>147</sup> Bálala dxasa', na' dxuláwizra' Lue'.

Dxebeza lazra' gaca ca dxenná xrtizru'.

<sup>148</sup> Dxenná'aza' bedú xęla,  
cheę gulaba lazra' da bdxixruj be'u.

<sup>149</sup> Dute xel-la' dxexache lazre' chiu' bene chi'a.

Xrana' Dios, da bchi'u cheętu' btipa lazra'.

<sup>150</sup> Benne' dxeláu zi' xuzre' neda' ba zaj zreę xelune'  
chia'

da caleļa.

Zaj nusane' da dxenná da bdxixruj be'u.

<sup>151</sup> Xrana' Dios, zu' Lue' gagu naga zua',  
ne da li zaj naca xúgutę da bdxixruj be'u.

<sup>152</sup> Gate nate ba núnbe'a da dxuseđe dizra' chiu' netu',  
da na' nuzú' cheętu' tu chí'izqueze.

#### Da gunná Dios dxuzėjni'i dxi'u

<sup>153</sup> Gunná' xque ca dxezaca zi'a, ne bselá neda'  
lawe' da quebe ne gal-la lazra' da dxenná da bdxixruj  
be'u.

<sup>154</sup> Bečebe waláz chia', ne bexa'u neda'.

Btipa lazra' nen xrtizru'.

<sup>155</sup> Stębeleę naca xeledá benne' ca' dxelebėj xíchaje'  
Lue', Dios,

lawe' da quebe dxelebéę gunne xue xelune' ca naca  
xrba chiu'.

<sup>156</sup> Xrana' Dios, dxexache lázrele'u bėnneache chiu'.

Btipa lazra' cáteze dxenná xrtizru' gunu'.

<sup>157</sup> Zánete zaj naca benne' ca' zaj nau zi' xuzre' neda',  
ne benne' ca' dxeledábague' neda',

san quebe ne gusana' dxuna' ca dxuseđe dizra' chiu'  
netu'.

<sup>158</sup> Ble'eda' benne' ca' dxelún lazre', na' dxegúteda'  
benne' ca'

lawe' da quebe dxelune' ca dxenná xrtizru'.

<sup>159</sup> Gunná'xque, Xran, ca nazrí'ida' da bdxixruj be'u.

Dute xel-la' dxexache lazre' chiu', btipa lazra'.

<sup>160</sup> Da líqueze zaj naca xúgutę xrtizru',

ne tu chí'izqueze zaj naca da dxuchi'u cheętu' lu  
da xrlátaje chiu'.

## Da gunná Dios dxutipá lázredxu

<sup>161</sup> Benne' ca' dxelenná be'ę dxeláu zi' xuzre' neda' na' quebe bi nuna' cheę'.  
Dutę lázrdawa' dxezreba' ca zaj naca xrtizru'.  
<sup>162</sup> Dxebéle'ęda' lu da dxenná xrtizru' ca dxebé bēnnea' dxezrel-lene' tu xel-la' gunn'á zrente'.  
<sup>163</sup> Dxecuídeda', ne dxegúteda' da wēn lazre'.  
Nazr'í'ida' da dxenná da bdxixruj be'u.  
<sup>164</sup> Gazre lasa tu zra dxue lá'ana' Lue' lawe' da xrlátaje naca ca dxuchi'u cheętu'.  
<sup>165</sup> Dxelebeza zri lázrele'ę benne' ca' zaj nazr'í'ine' da bdxixruj be'u,  
na' quebe bi dę da gun na cheajlecházie'.  
<sup>166</sup> Xrana' Dios, dxebeza' Lue' xidu' guseláu' neda', ne tu dxúnzqueza' ca naca da bdxixruj be'u.  
<sup>167</sup> Dutę lázrdawa' tu dxúnzqueza' da dxusęde dizra' chiu' netu',  
ne nazr'í'ile'ęda' ca naca na.  
<sup>168</sup> Tu dxúnzqueza' ca naca da bdxixruj be'u,  
ne ca dxusęde dizra' chiu' netu'  
lawe' da dxelé'ęqueznu' xúgutę da dxuna'.

## Dxebéle'ęlędxu xrtizra' Dios

<sup>169</sup> Xrana' Dios, bene da dxuláwizra' Lue'.  
Bzėjni'i neda' ca dxenná xrtizru' gunu'.  
<sup>170</sup> Bene da dxenaba' lau Lue'.  
Bselá neda' ca dxenná xrtizru' gunu'.  
<sup>171</sup> Tu güe lá'anazqueza' Lue', Xran,  
gate ba nusędenu' neda' guna' ca naca xrba chiu'.  
<sup>172</sup> Tu guchálajzqueza' ca naca xrtizru'  
lawe' da xrlátaje naca ca dxenná be'enu' netu'.  
<sup>173</sup> Guzúateęqueze gácalęnu' neda'  
lawe' da dxuna' ba xuzre guna' ca bdxixruj be'u.  
<sup>174</sup> Dxezá lazra' guseláu' neda', Xrana' Dios.  
Dxezaca ba lázrele'ęna' da bdxixruj be'u.  
<sup>175</sup> Bęn gaca bana', na' güe lá'ana' Lue',  
na' da dxuchi'u chia' xelácalę na neda'.  
<sup>176</sup> Gudéa' chalá'ala ca dxedá tu zrila' naníteba'.  
Bexilaj neda', wēn zrin chiu', lawe' da quebe ne gal-la  
lazra'  
da bdxixruj be'u.  
**120** Gate guzúa' lu da stębe bláwizra' Xránadxu  
Dios,  
na' Lę' gúcalęne' neda'.  
<sup>2</sup> Bselá neda', Xrana' Dios, lu na' benne' wēn lazre' ca',  
ne lu na' benne' dxelezí xę'ę ca'.  
<sup>3</sup> ¿Bizra gunna Dios le'e, benne' dxelezí xę'ę?  
¿Bizra da ba neza gaca na cheęle gate gudéę' le'e  
lu da zi' da xa'?  
<sup>4</sup> Gudéę' le'e lu na' benne' ca' xuludé'ę le'e xaga nalá  
xéche'ze,  
ne xuluzrię' le'e xi' galaj.  
<sup>5</sup> Edxugúa neda'.  
Dxaca chia' ca zúaqueza' ládujla benne' Mesec,  
ne ca zua' tu lu xu'u xide cheę benne' Cedar.

<sup>6</sup> Da zrente' ba guzúa' ládujla benne' caní  
dxuluzúę' chalá'ala xel-la' dxebeza zri lazre'.  
<sup>7</sup> Neda' dxezá lazra' gata' xel-la' dxebeza zri lazre'.  
Gate dxuchálaja' cheęn, dxeledíl-lalę benne' ca' neda'.  
**121** Chisa xíchaja' nna'a da dxelún bēnneache lu  
xi'a ca'.  
¿Gazra za' da gácalę na neda'?  
<sup>2</sup> Da gácalę na neda' za' lu na' Xránadxu Dios,  
Bēnnea' bęne' xabáa, ne xęzr la xu.  
<sup>3</sup> Quebe gu'ę lataj cheajcházium'.  
Quebe gase Bēnnea' dxuxúequeze' lue'.  
<sup>4</sup> Gunná' xque, quebe te bchigala cheę Bēnnea'.  
Québequeze gase Bēnnea' dxuxúequeze' benne' Is-  
rael ca.  
<sup>5</sup> Xránadxu Dios dxucú'uję' lue'.  
Xránadxu Dios zue' cuitu' xabęla dxegu'ę lue' zrul-la.  
<sup>6</sup> Quebe guzezxe gubizra lue' te zra,  
ne quebe bi gunę beu' lue' chizrela.  
<sup>7</sup> Xranu' Dios guxúequeze' lue' cheę quebe bi da  
calęla  
gaca na chiu'.  
Guxúequeze' bēnne'du xu'u.  
<sup>8</sup> Xránadxu Dios guxúequeze' lue' gate dxdexúaju',  
ne gate dxexú'u, na'a zra, ne chadía chacanna.  
**122** Gubéle'ęna' benne' ca' gulé'ę neda':  
"Chéajdxu xu'u lizre Xránadxu Dios."  
<sup>2</sup> Na'a zúadxu nigá, zęntu' dxa xu'u ze'e  
da naxechaj lue', xęzre Jerusalén.  
<sup>3</sup> Jerusalén naca na tu xęzre da belexunę',  
na' naca na xrtante, ne dxé'le'ę na cháwedau'.  
<sup>4</sup> Lu xęzre na' zjaca xúgutę cuen bēnneache zaj dę'ę  
Xránadxu Dios.  
Dxelunę' ca dxenná dizra' da guzre Dios benne' Israel  
ca',  
cheę xelúe lá'ane' La Xránadxu Dios.  
<sup>5</sup> Lu xęzre na' zaj dxe' benne' ca' dxuluchi'ę cheę  
benne' Israel ca',  
naga zaj dxe' benne' xrtia David, benne' ca' dxelenná  
be'ę.  
<sup>6</sup> Le naba lau Dios gata' xel-la' dxebeza zri lazre'  
lu xęzre Jerusalén,  
cheę xelepe ban da dxelún benne' ca' zaj nazr'í'ine'  
xęzre na'.  
<sup>7</sup> Dxenábantu' Dios sua xel-la' dxebeza zri lazre'  
lu'ule ze'e da naxechaj na lue', Jerusalén,  
ne cheę xelezrá' chawe' benne' zaj xu'ę xu'u zren  
chiu'.  
<sup>8</sup> Nazr'í'ida' le sa' ljwezra', ne bi ljwezra' ca', na' dxen-  
nía':  
Gata' xel-la' dxebeza zri lazre' chiu', xęzre Jerusalén.  
<sup>9</sup> Lawe' da nazr'í'ida' xu'u lizre Xránadxu Dios  
dxuna' ba xuzre gaca chawe' chiu'.  
**123** Chisa xíchaja' nna'a naga zu', Xran,  
naga zu' Lue', zu' xabáa na'la.  
<sup>2</sup> Ca dxun tu bi wēn zrin dxenná'abe' bi nna xránabe',  
ne ca dxun nu'ula wēn zrin dxenná'abe' bi nna  
nu'ula xránabe',  
caní dxenná'adxu bi nna Xránadxu Dios

ca zrindxa zra xexache lazre' cheędxu.  
<sup>3</sup> Bexache lazre' cheętu', Xránantu' Dios.  
 Bexache lazre' cheętu', lawe' da dxedú lázrentu'  
 lawe' da dxulucá'ana ditaj bėnneache netu'.  
<sup>4</sup> Dxedú lázrentu' lawe' da dxelún lala benne' gunnía  
 ca'  
 cheętu',  
 ne dxulucá'ana ditaj netu', benne' ca' dxulucá'ana  
 szren  
 cuine'.

**124** Chela ca gúcale Xránadxu Dios dxi'u.  
 Caní dxal-la' xelenná benne' Israel ca' na'a.  
<sup>2</sup> Chela ca gúcale Xránadxu Dios dxi'u  
 gate guledíl-lalę benne' ca' dxi'u,  
<sup>3</sup> na' buluzría xi'tę' dxi'u  
 lu dutę xel-la' dxelezá'a zrentę cheę',  
<sup>4</sup> ne guca cheędxu ca dxaca cheę benne'  
 dxugacu nísadau' le', da na' gute na le'.  
<sup>5</sup> Chela guca caní cheędxu, na' bėtetę da na' dxi'u.  
<sup>6</sup> Dخال-la' xędxu Xránadxu Dios; Xcalenu',  
 lawe' da quebe beę lataj benne' ca' xuluzría xię dxi'u.  
<sup>7</sup> Beladxu ca dxelá tu bxinne lu xixruj cheę benne'  
 wezén bxinne.  
 Bzria xi' Xránadxu xel-la' dxenná bea cheę benne' ca',  
 na' beladxu.

<sup>8</sup> Naca Xránadxu Dios Bėnnea' dxácalęne' dxi'u,  
 Bėnnea' bėnqueze' xabáa, ne xęzr la xu.  
**125** Benne' ca' dxuluxrén lazre' Xránadxu Dios zaj  
 naque' ca xi'a Sión,  
 da quebe nu seque' gutá, san tu chí'izqueze zua  
 chacha na.

<sup>2</sup> Ca zaj zua xi'a ca' da zaj naxechaj na Jerusalén,  
 zua Xránadxu Dios, dxuxúequeze' bėnneache cheę'  
 na'a zra,  
 ne chadía chacanna.  
<sup>3</sup> Quegá tu chí'izqueze xelenná bea benne' ca' dx-  
 elunę'  
 da calęla lu xęzr la xu cheę benne' xrlátaje ca',  
 cheę quebe xelaca benne' xrlátaje ca' tuze nen benne'  
 wen da zrinnaj ca'.  
<sup>4</sup> Xrana' Dios, bęn gaca chawe' cheę benne' xrlátaje  
 ca',  
 ne cheę benne' ca' zaj naque' li lazre'.  
<sup>5</sup> Benne' ca' dxelebéaj xichaj Dios cheę xelunę' da  
 calęla,  
 xucuasa Xránadxu Dios benne' ca' tu zren nen benne'  
 ca'

dxelunę' da zrinnaj.  
 Dxenaba' gata' xel-la' dxebeza zri lazre' cheę benne'  
 Israel ca'.

**126** Gate Xránadxu Dios bselé' dxi'u lu na' benne'  
 zitu' ca',  
 ne beguę dxi'u lu xęzre Sión, gúquedxu dxennędxu  
 xęla.  
<sup>2</sup> Nadxa bzrızredxu, ne bę lánadxu Xránadxu Dios.  
 Nadxa gulenná benne' xęzr la xu ca':  
 "Da zrentę ca' bęn Dios, Xrana benne' ca', cheę'."  
<sup>3</sup> Da zrentę ca' bęn Xránadxu Dios cheędxu dxi'u,

na' zúadxu lu da ba neza zrentę.  
<sup>4</sup> Bselá Xránadxu dxi'u lu na' benne' zitu' ca',  
 na' bezrindxu lu xęzr la xu cheędxu  
 ca dxezrín nisa guba'u lu xęgu bizre ca'.  
<sup>5</sup> Benne' ca' dxelebezre' tię' dxelazę',  
 nen xel-la' dxelebé xelxezię lina.  
<sup>6</sup> Dxebezre tię' zéaję' nuę binne cháwe'du ca',  
 na' dutę xel-la' dxebe dxezrine' zeajnuę lina cheę'.  
**127** Chela ca zúalę Xránadxu Dios benne' ca' dx-  
 elunę' tu xu'u  
 dácheze naca xelunę' zrin na'.  
 Chela ca dxuxúe Xránadxu Dios tu xęzre,  
 dácheze naca dxuluxúe benne' ca' le' na.  
<sup>2</sup> Dácheze naca dxásazele che zílala,  
 ne dxunle zrin cáteze dxalaj gubizra ca dxebíadxa na,  
 ne dutę xel-la' dxudía dxezile da gágule,  
 lawe' da dxunna Dios da xelagu benne' ca' nazrí'ine'  
 dxácatę na' dxelásię'.  
<sup>3</sup> Le nna' xque, zaj naca zrí'inedxu bi ca' bęnna Xrá-  
 nadxu dxi'u.

Zaj naca bę' tu da gunnía zrentę.  
<sup>4</sup> Zrí'inedxu dxelálajbe' cheędxu gate ne nácadxu  
 cuide'  
 zaj nácabe' ca xaga nalá xéche'ze ca' da nuxru benne'  
 zeje' wedil-la.  
<sup>5</sup> Ba neza zrentę naca na cheę bėnnea' nuxruę' zánete  
 xaga nalá xéche'ze caní.  
 Québequeze xedué'neę' gate zri'a cheę'  
 tu zren nen benne' ca' dxeledíl-lalęne' le'.

**128** Ba neza zrentę naca na cheę benne' ca' dx-  
 elezrebe' Xránadxu Dios,  
 benne' ca' tu dxelúnzqueze' ca nadxixruj be'e Dios.  
<sup>2</sup> Gate dxagu' da dxezi'u cheę zrin da nunu'  
 gaca chiu' tu da ba neza, ne gaca chawe' chiu'.  
<sup>3</sup> Gaca zru'ulu' ca tu lba uva da dxebía da zixre  
 cuita xu'u lizru',  
 na' zri'inu' ca' xelácabe' ca xaga olivo ca' zaj zę  
 dxu'a ga dxagu'.  
<sup>4</sup> Caní gun Xránadxu gaca chawe' cheę bėnnea' dx-  
 ezrebe' le'.  
<sup>5</sup> Dxenaba' gun Xránadxu, zuę' xi'a Sión, gaca chawe'  
 chiu',  
 cheę le'enu' gaca chawe' cheę xęzre Jerusalén xúgute  
 zra naca banu',  
<sup>6</sup> ne cheę le'enu' zri'ine zre su'.  
 Dxenaba' gata' xel-la' dxebeza zri lazre' cheę benne'  
 Israel ca'.

**129** Zúadxu lu da stébeleę gate nácateđxu cuide',  
 waca xelenná benne' Israel ca'.  
<sup>2</sup> Zúadxu lu da stébeleę gate nácateđxu cuide'  
 san quebe buluzria xię dxi'u.  
<sup>3</sup> Belunę' we' cúzrudxu gate belinę' dxi'u xide,  
 na' gulaca cúzrudxu ca xęzr la xu naga dxedé xia  
 cheę bęzre.  
<sup>4</sup> Xlátaje naca Xránadxu Dios.  
 Bselé' dxi'u lu na' benne' ca' buluchínene' dxi'u  
 xadíaze.  
<sup>5</sup> Bęn cheajlechaze, ne xelebígaqueze

xúgute benne' ca' dxelecuídenē' benne' Sión ca'.  
 6 Ben xelaque' ca' xíxre'du ca' dxelebía na xrgu'u da dxelebizre na gate ne zaj nadxé'ene na,  
 7 da na' quebe nu benne' dxexeque'ē na,  
 ne quebe seque' nu benne' gunē' na tu cheaj weaj.  
 8 Quebe xelenná benne' dxeledéē' naga zaj zria na:  
 Dxenáantu' gun Xránantu' Dios gaca chawe' cheeḷe.  
 Lu La Xránantu' Dios dxenáantu' gaca chawe' cheeḷe.

**130** Ga ni zua' lu da stébele'ē dxuláwizra' Lue',  
 Xrana' Dios.  
 2 ¡Xran, bene chí'a!  
 ¡Bze naga da dxenaba' lau'!  
 3 Xrana' Dios, chela nna' xánniu' ca' naca dul-la nabá-gantu'  
 ¿núzraqueze xegá'ana xrlátaje lau Lue'?  
 4 Lué'quezu' dxunite lau' cheḷntu'  
 cheḷ gápantu' Lue' ba l'ána.  
 5 Dute lázrdawa' dxebeza lazra' Xránadxu Dios,  
 ne dxuxrén lazra' xrtizre'.  
 6 Dxebeza lazredxa' Xránadxu Dios  
 cáqueze dxelún benne' ca' dxuluxúē' xezre ca',  
 dxelebeze' chaní',  
 ne cáqueze dxelún benne' ca' dxelicha bchigala,  
 dxelebeze' chaní'.  
 7 Benne' Israel ca' dxal-la' xelebeza lazre' Xránadxu  
 Dios  
 lawe' da dxexache lazre' Xránadxu bēneache cheḷ,  
 ne dxexá'awē' benne' ca' lu na' benne' guledábage'  
 Le'.  
 8 Dios xexá'awē' benne' Israel ca'  
 lu na' xúgute dul-la da zaj nabague'.  
**131** Xrana' Dios, ba bsana' xel-la' dxucá'ana szren  
 cuina',  
 ne ba bcuasa' xel-la' dxeque xrlátaje cuina'.  
 Quebe dxulapa napa' lu da zaj naca szren,  
 da ca' quebe naca chia' gulapa' na'a.  
 2 Quebe bi gunnía', ne guzúa' zrize ca' tu bi dxe'ene  
 za bexuzrte' gúzrebe'.  
 Naca bēnne'du xu'a ca' tu bi dxe'ene za bexuzrte'  
 gúzrebe'.  
 3 Le cueza lazre' Xránadxu Dios, le'e, benne' Israel  
 na'a zra, ne chadía chacanna.  
**132** Bsa lazre', Xrana' Dios, ca' guca cheḷ David,  
 ne ca' guzaca zi'ē,  
 2 ne ca' da guchebe lazre' gunē' chiu',  
 da guchebe lazre' lau', Dios wal-la cheḷ Jacob.  
 3 Guné': "Québequeze chu'a xu'u lizra',  
 ne québequeze gáta'a ga dxasia'  
 4 ne québequeze guchúdia' xiaj lawa'  
 ne québequeze gasia'  
 5 ca' zrindxa zra ba bēna' tu xu'u lizre Xrana' Dios  
 naga súaqueze Dios wal-la cheḷ Jacob."  
 6 Bēndxu zua xí'ina l'ázxa naga xu'u xel-la' wezría  
 lu xezr la xu Efrata,  
 na' bezréledxu na lu xezr la xu cheḷ bēnnea' le' Jaar.  
 7 Gunnantu': Chéajntu' naga zua Dios cheḷntu'.  
 Guzú zribentu' zran ni'a Le'.

8 Guxasa, Xránantu' Dios, nen xí'ina naga xu'u  
 xel-la' wezría chiu',  
 ne gudá lu xi'a naga súaquezu' Lue'.  
 9 Ben xelún bxruze chiu' ca' da naca xrlátaje,  
 ne xelebezre xa'a xúgute bēneache chiu', lu dute  
 xel-la' dxelebé cheḷ.  
 10 Lawe' da nazrí'inu' David, wēn zrin chiu',  
 quebe guzú' chalá'ala wenná bea na' ba guca'u Lue'.  
 11 Da líqueze bzetaj cuina Xránadxu Dios,  
 guchebe lazre' cheḷ David quebe gucuase' ca' da gun-  
 né'.  
 Gunné': "Guna' xelenná bea zri'ine zre su' naga  
 dxenná béaquezu' Lue'.  
 12 Che zri'inu' ca' tu xelúnzqueze' ca' naca xel-la'  
 wezría chia',  
 ne ca' naca xrtizra' da gusededa' le',  
 zri'inu' ca' tu xelenná béazqueze' naga dxenná be'u  
 lue'."  
 13 Lawe' da gucá'a Xránadxu Dios xezre Sión,  
 guca lazre' sua xu'u lízrequeze' ga na'.  
 14 Gunné': "Tu gácazqueze lataj nigá naga súaqueza'  
 neda'.  
 Tu súaqueza' nigá lawe' da caní dxezaca ba lazra' gu-  
 na'.  
 15 Guna' gáta'le'ē lina cheḷ benne' ca',  
 ne guna' xeledaj benne' xache' ca' xeta.  
 16 Guna' xelún bxruze chia' ca' da naca chawe',  
 na' xelebezre xa'a xúgute bēneache chia' lu dute  
 xel-la' dxelebé cheḷ.  
 17 Lataj na' guna' xexaca xel-la' dxenná bea cheḷ  
 David.  
 Guna' xelezúa na' zri'ine zre sua wenná bea na'  
 ba gucá'a neda'.  
 18 Guna' xeleque zréaje benne' guledábage' Le',  
 na' guna' chepe ban xel-la' dxenná bea cheḷ David  
 na'."  
**133** Le nna' xque, xrtante' naca, ne cháwe'le'ē naca  
 gate zaj nazraga bēneache cheḷ Dios, zaj  
 naque' tuze.  
 2 Naca na' ca' tu da za da dxuluzúa xíchaje',  
 da dxedínnetē na dxu'a lawe',  
 ca' na' dxedínnetē na lu luzru Aarón,  
 ne dxedínnetē na ga zria zre'.  
 3 Dxedínnetē na ca' xrlē'ela da dxexruj lu xi'a Hermón,  
 ne dxexruj na lu xi'a Sión lawe' da gun Xránadxu Dios  
 gaca chawe' cheḷ bēneache zaj zre'ē na',  
 ne gunne' benne' ca' xel-la' nabán da zeajlí canna.  
**134** Le na' xque, le güe l'ána Xránadxu Dios,  
 le'e, nácale wēn zrin cheḷ Xránadxu,  
 zrale xu'u lizre Xránadxu chizrela.  
 2 Le chisa na'le lau' lataj l'ázxa,  
 ne le güe l'ána Xránadxu Dios.  
 3 Dxenaba' lau' Xránadxu zuē' Sión gunē' gaca chawe'  
 chiu',  
 naque' Bēnnea' bēne' xabáa, ne xezr la xu.  
**135** ¡Le güe l'ána La Xránadxu Dios!  
 ¡Le güe l'ána Le', le'e, wēn zrin cheḷ Xrá-  
 nadxu,

2 le'e zrale xu'u lizre Xránadxu Dios,  
 lu chale'aj chee xu'u naga zúaqueze Dios!  
 3 ¡Le güe lá'ana Xránadxu lawe' da naque' xrlátaje!  
 ¡Le gul-la da güe lá'anale La Le', lawe' da naque' zri'i  
 lazre'!  
 4 Xránadxu Dios ba guqué'e zri'ine zre sua Jacob.  
 Guqué'e zri'ine zre sua Israel chee xelaque' bèn-  
 neache chee'.  
 5 Nézquezdxu szrentę naca Xránadxu Dios.  
 Xránadxu naque' szrendxa ca xúgute dios chee  
 benne' zitu' ca'.  
 6 Xúgute da dxaca lazre' Xránadxu gunę',  
 dxunę' na zran xabáa, ne lu xęzr la xu,  
 ne lu nísadau', ne lu da situj chee nísadau' ca'.  
 7 Dxunę' zá'aca beuj dapa saca chee xęzr la xu.  
 Dxunę' dxelepe xesa guziu' gate dxaca xiuj.  
 Dxunę' dxaca be' gátetęze.  
 8 Bęne' gulate bi biu nedxu chee benne' Egipto ca'.  
 Gulate bi biu nedxu chee bęnneache,  
 ne béadu ca' chee bę xixre' chee' ca'.  
 9 Bęne' xel-la' waca ca' da za xabáa, ne da zrentę ca'  
 da bęne' lu xęzr la xu chee benne' Egipto ca',  
 da ca' bęn Dios da guca chee Faraón,  
 ne chee xúgute węn zrin chee Faraón na'.  
 10 Bzria xi'e bęnneache zánete cue' xęzr la xu ca',  
 ne bętię' benne' wenná bea ca',  
 benne' zaj nápalę'e xel-la' dxelenná bea.  
 11 Bętię' Sehón, wenná bea chee benne' amorreo ca',  
 ne Og, wenná bea chee benne' Basán ca',  
 ne xúgute benne' wenná bea chee benne' Canaán ca'.  
 12 Bequé'e xęzr la xu nigá lu na' benne' wenná bea ca',  
 na' bnęzruje' na lu na' bęnneache chee', benne' Israel  
 ca'.  
 13 Xrana' Dios, chadía chacanna zua lau' Lue'.  
 Tu cheajlesá lázrezqueze bęnneache Lue'.  
 14 Xránadxu Dios guchi'e chee bęnneache chee',  
 ne xexache lazre' cheędxu dxi'u, węn zrin chee'.  
 15 Bedau' xia xaga ca' chee benne' xęzr la xu ca'  
 zaj naca na oro, ne plata.  
 Zaj naca na da belún bęnneache.  
 16 Zaj zua dxu'a na san quebe dxelennę na.  
 Zaj zua lau na san quebe dxelélé na.  
 17 Zaj zua naga na san quebe dxelén na, ne quebe  
 dxelecá'a na be'.  
 18 Benne' ca' dxelunę' na zaj nácaqueze' ca léqueze  
 na,  
 ne caní zaj naca xúgute benne' dxuluxrén lazre' na.  
 19 Le'e, benne' xrtía Israel, le güe lá'ana Xránadxu  
 Dios.  
 Le'e, benne' xrtia Aarón, le güe lá'ana Xránadxu Dios.  
 20 Le'e, benne' xrtia Leví, le güe lá'ana Xránadxu Dios.  
 Le'e, núlale dxezrébele Xránadxu Dios, le güe lá'ana  
 Xránadxu Dios.  
 21 Le'e, zrale xęzre Sión, le güe lá'ana Xránadxu Dios,  
 Bęnnea' zúaqueze' xęzre Jerusalén.  
 ¡Gaca ba lá'azxa Xránadxu Dios!  
 136 ¡Le güe lá'ana Xránadxu Dios, Benne' xrlátaje!  
 ¡Chadía chacanna dxexache lazre' dxi'u!

2 ¡Le güe lá'ana Dios, naque' szręntędxu ca zaj naca  
 dios  
 chee xęzr la xu ca'!  
 ¡Chadía chacanna dxexache lazre' dxi'u!  
 3 ¡Le güe lá'ana Xránadxu, naque' szręntędxu ca zaj  
 naca  
 xrana xęzr la xu ca'!  
 ¡Chadía chacanna dxexache lazre' dxi'u!  
 4 ¡Le güe lá'ana Dios na', dxunę' xel-la' waca zri'a ca'!  
 ¡Chadía chacanna dxexache lazre' dxi'u!  
 5 ¡Le güe lá'ana Dios na', bęne' xabáa dutę xel-la' sina  
 chee'!  
 ¡Chadía chacanna dxexache lazre' dxi'u!  
 6 ¡Le güe lá'ana Dios na', bzuę' xęzr la xu lawe'  
 nísadau'!  
 ¡Chadía chacanna dxexache lazre' dxi'u!  
 7 ¡Le güe lá'ana Dios na', bęne' gubizra ne beu'!  
 ¡Chadía chacanna dxexache lazre' dxi'u!  
 8 ¡Bęne' gubizra chee gusení na te zra!  
 ¡Chadía chacanna dxexache lazre' dxi'u!  
 9 ¡Bęne' beu' ne belaj ca' chee xulusení na chizrela!  
 ¡Chadía chacanna dxexache lazre' dxi'u!  
 10 ¡Le güe lá'ana Dios na', bętię' bi biu nedxu chee  
 benne' Egipto ca'!  
 ¡Chadía chacanna dxexache lazre' dxi'u!  
 11 ¡Le güe lá'ana Dios na', bebáaje' benne' Israel ca'  
 lu xęzr la xu Egipto na'!  
 ¡Chadía chacanna dxexache lazre' dxi'u!  
 12 ¡Beche'e le' dutę xel-la' waca zren chee'!  
 ¡Chadía chacanna dxexache lazre' dxi'u!  
 13 ¡Le güe lá'ana Dios na', bęne' chupa la'a nísadau'  
 da nazí le' na Xrna!  
 ¡Chadía chacanna dxexache lazre' dxi'u!  
 14 ¡Bdeę' benne' Israel ca' laduj nísadau' na'!  
 ¡Chadía chacanna dxexache lazre' dxi'u!  
 15 ¡Bgacue' nísadau' na' Faraón, benne' wenná bea  
 chee Egipto,  
 ne benne' zeje' wedil-la chee' ca'!  
 ¡Chadía chacanna dxexache lazre' dxi'u!  
 16 ¡Le güe lá'ana Dios na', beche'e benne' chee' ca'  
 le'e xixre' lawe' lataj!  
 ¡Chadía chacanna dxexache lazre' dxi'u!  
 17 ¡Le güe lá'ana Dios na', bętię' wenná bea blau ca'!  
 ¡Chadía chacanna dxexache lazre' dxi'u!  
 18 ¡Bętię' wenná bea wal-la ca'!  
 ¡Chadía chacanna dxexache lazre' dxi'u!  
 19 ¡Bętię' Sehón, wenná bea chee benne' amorreo ca'!  
 ¡Chadía chacanna dxexache lazre' dxi'u!  
 20 ¡Bętię' Og, wenná bea chee xęzr la xu Basán!  
 ¡Chadía chacanna dxexache lazre' dxi'u!  
 21 ¡Bnęzruje' xęzr la xu chee benne' ca' chee gaca na  
 chee benne' chee' ca'!  
 ¡Chadía chacanna dxexache lazre' dxi'u!  
 22 ¡Bęne' na chee benne' Israel ca', benne' węn zrin  
 chee' ca'!  
 ¡Chadía chacanna dxexache lazre' dxi'u!  
 23 ¡Naque' Dios na', quebe gul-la lazre' dxi'u  
 gate buluzetja benne' ca' dxi'u!



;Chadía chacanna dxexache lazre' dxi'u!  
 24 ;Le' bselé' dxi'u lu na' benne' ca' guledíl-lalenge'  
 dxi'u!  
 ;Chadía chacanna dxexache lazre' dxi'u!  
 25 ;Naque' Dios na', dxugawe' xúgute' da zaj naca ban!  
 ;Chadía chacanna dxexache lazre' dxi'u!  
 26 ;Le güe lá'ana Dios chee xabáa!  
 ;Chadía chacanna dxexache lazre' dxi'u!  
**137** Dxu'a xegu chee xezr la xu Babilonia  
 gudxé'edxu,  
 ne gudxézredxu gate xeajsá lázredxu chee xezre Sión.  
 2 Lu zruze xaga labada' dxu'a xegu na'  
 buquéladxu da cun zríadi'i na du cheedxu ca'.  
 3 Benne' ca' guleché'ę dxi'u ca benne' zaj nada'u  
 gulenábene' dxi'u gúl-ladxu.  
 Benne' ca' buluzría xi' xezre cheedxu gulé'ę dxi'u  
 súadxu lu xel-la' dxebe, gulenné':  
 Le gul-la cheentu' da ca' bíl-lale lu xezre Sión.  
 4 ;Ajazra gúl-ladxu da güe lá'anadxu Xránadxu Dios  
 naga zúantu' lu xezr la xu chee benne' zitu' ca'?  
 5 Chela gal-la lazra' lue', xezre Jerusalén,  
 gun Dios gunite na'a xabęla xel-la' waca chee na.  
 6 Ben xedá' luzra' chíchajla' che quebe cheajsá lazra'  
 chiu',  
 ne che quebe gucá'ana szrena' lue', Jerusalén,  
 nacu' da dzezaca ba lázreleda'.  
 7 Xrana' Dios, bsa lazre' da calęla da belún benne'  
 Edom  
 lu zra na' guzría xi' xezre Jerusalén,  
 gate na' gulenné': "Le guchinnaj na. Le guchinnaj na,  
 ca zrintę lu lane chee na."  
 8 Le'e, benne' Babilonia, cuía xile.  
 Ba neza zrentę gaca na chee bénnea' gunę' cheęle  
 ca da benle le'e cheentu' netu'.  
 9 Ba neza zrentę gaca na chee bénnea' queęę bidu  
 cheęle ca',  
 ne quine'-be' lu xiaj xre na'.  
**138** Xrana' Dios, dutę lázrdawa' güe lá'ana' Lue'.  
 Tu dxúl-lazqueza' da dxue lá'ana' Lue' lau dios  
 ca' chee  
 benne' zitu' ca'.  
 2 Dxuzú zriba' lau xudau' lá'azxa chiu',  
 ne dxue lá'ana' Lau' lawe' da nacu' li lazre',  
 ne dxexache lazru' bénneache chiu',  
 ne lawe' da blé'enu' nacu' Benne' szrentę,  
 na' szrentę naca xrtizru'.  
 3 Gate bláwizra' Lue', na' gúcalęnu' neda'.  
 Nen dutę xel-la' waca chiu' btipu' lazra'.  
 4 Xúgute' benne' wenná bea du gabí'i xezr la xu  
 xelúe lá'ane' Lue', Xrana' Dios.  
 Caní xelune' lawe' da ba belenne' ca naca xrtizru'.  
 5 Xelúl-lę' chee da ba nune' Xránadxu Dios,  
 lawe' da zrentę naca xel-la' ba chee Xránadxu.  
 6 Szrentę naca Xránadxu Dios, ne dxácalęne'  
 benne' baxache' ca',  
 na' quebe dxu'ę lataj benne' dxucá'ana szren cuine'  
 zrine' lau Le'.  
 7 Lácala zua' lu da ba xa', Lue' dxutipu' lazra'.

Dxedábagu' benne' ca' dxeledábage' neda',  
 ne dutę xel-la' waca chiu' dxuseláu' neda'.  
 8 Gun Xránadxu Dios da guchębe lazre' chia'.  
 Xrana' Dios, tu dxexache lázrezquezu' bénneache  
 chiu'.  
 Quebe gusanu' dxunu' zrin da guzú lau' dxunu'.  
**139** Xrana' Dios, ba gunná' xánniu' neda'  
 ne núnbea xánniu' neda'.  
 2 Nézqueznu' gate dxe'a, ne gate dxasa'.  
 Zítu'la nézqueznu' da zaj xu'u xichaj lázrdawa'.  
 3 Ba gunná' xánniu' ca dxuna', ne ca dxexezí' lazra'.  
 Nézqueznu' xúgute' da dxuna'.  
 4 Gate quebe ne guchálaja' ba nézqueznu' Lue', Xran,  
 xúgute' da nnia'.  
 5 Gátetęzla cuita' neda' zúaquezu' Lue', Xran,  
 ne nuzę na'u neda'.  
 6 Ca szrentę naca da nézenu' Lue' naca na da dxe-  
 báneda'.  
 Nácalęę na sina da quebe gaca chéajni'ida'.  
 7 ;Gala cha'a zitu' naga quebe zúaqueze Be' chiu'?  
 ;Gala guzrúnnuja' naga quebe zúaquezu' Lue'?  
 8 Che cuena' sibe zran xabáa, na' zúaquezu' Lue',  
 ne che xétaja' lu da situj chee xezr la xu, na' zu' Lue'.  
 9 La séqueda' tea' lu be', ne cha'a zitu' naga dxalaj gu-  
 bizra,  
 u tea' xechalá'a nísadau' naga dxebía gubizra,  
 10 cáanqueze na' súalęnu' neda',  
 ne guxru na'u xabęla neda'.  
 11 Chela gaca guna' gacu da chul-la neda',  
 u guna' xexaca lení' da naxechaj neda', chee  
 xaca na da chul-la,  
 12 da chul-la na' quebe gaca gucache na neda' lau  
 Lue',  
 na' chizrela xaca na ca te zra lau'.  
 Túzqueze ca zaj naca da chul-la, ne xel-la' naxaní' lau  
 Lue'.  
 13 Lue' benu' da zaj xu'u lu bęla' dxen chia'.  
 Lue' bzalju' neda' lu lęę xrna'a.  
 14 Güe lá'anaqueza' Lue' lawe' da szrentę zaj naca da  
 dxunu',  
 ne dxebáneda' ca zaj naca na.  
 Dutę lázrdawa' nézquezda' caní naca na.  
 15 Blé'eqeznu' neda' gate gulá' gubinna zrita xu'a,  
 gate na' belezraga na lu lęę xrna'a,  
 gate na' bgula' lu da bagácheze na'.  
 16 Ble'enu' bęla' dxen chia' gate gulá' gubinna na.  
 Xúgute' da caní ba naxúaj na lu xiche chiu',  
 na' ca gudé na' gulá' gubinna na,  
 na' xúgute' na gulaca na cáteze zaj naxúaj na.  
 17 Dios, szrentę zaj naca da dxuwía lazru' gunu'.  
 Da zantę ca zaj naca na.  
 18 Chela gaca lazra' gulaba' ca zaj naca na,  
 zaj naca na ca xuzre' dxe' dxu'a tu xegu zren.  
 Gate dxexebana', ne zúalęqueza' Lue'.  
 19 Dios, da líqueze gutiu' benne' ca' dxelunę' da calęla.  
 Chee lę na', le gucuasa naga zua', le'e, węte benne'.  
 20 Chiu' Lue', Dios, dxelenné' dizra' schanni'.

Benne' ca' dxeledábague' lue' dxuluzétaje' Lau' lu da xálaze.

<sup>21</sup> Xrana' Dios, dxecuídeda' benne' ca' dxuluzúe' Lue' chalá'ala,

ne dxezrá'li'a benne' ca' dxeledábague' Lue'.

<sup>22</sup> Dutę lázrdawa' dxecuídeda' benne' ca'.

Dxéqueda' benne' ca' ca' benne' ca' dxeledábague' né-daqueza'.

<sup>23</sup> Gunná' xanne' neda', Dios, ne gunná' da xu'u na lázrdawa'.

Bxue neda' cheę nézenu' da xu'u lu xichaj lázrdawa'.

<sup>24</sup> Gunná' che zúalę tu da calęla neda',

na' bsi neda' lu neza chawe' chiu' da zeajlí canna.

**140** Xrana' Dios, bselá neda' lu na' benne' ca' dx-elunę' da calęla.

Bxue neda' cheę quebe bi xelún benne' xichaj zra'a ca'

chia' neda'.

<sup>2</sup> Benne' caní dxuluwía lazre' da calęla ca' da xelunę'.

Tu zra tu zra dxulutíl-lalęnę' bėnneache.

<sup>3</sup> Da dxelennę' naca na ca lazxa bęla' da zaj nalále'ę.

Xrtizra' benne' ca' zaj naca na ca nisa snia cheę bęla'.

<sup>4</sup> Xrana' Dios, bxue neda' cheę quebe bi xelún benne' ca'

dxelunę' da calęla chia' neda'.

Bselá neda' lu na' benne' xichaj zra'a ca', benne' ca' dxelunę' ba xuzre cheajcházia'.

<sup>5</sup> Benne' ca' dxulucá'ana szren cuinę' zaj nabeque' tu da quęl-la na neda'.

Ba zaj nuzalę' xralaj dxu'a neza.

Ba zaj nabeque' da ca' xelęl-la na neda'.

<sup>6</sup> Gucha' Xrana' Dios: Lue' nacu' Dios chia'.

Xrana' Dios, bene chi'a dxuláwizra' Lue'.

<sup>7</sup> Xrana' Dios, nacu' weselá chia'.

Lue' bcu'uju' xíchaja' lu zra guca wedil-la.

<sup>8</sup> Xran, quebe gu'u lataj gaca ca da dxelezá lazre' benne' ca'

dxelunę' da calęla.

Quebe gu'u lataj chepe ban da dxuluwía lazre' xelunę',

cheę quebe xulucá'ana szren cuinę'.

<sup>9</sup> Zaj naxechaj benne' ca' dxelunę' da calęla neda'.

Bęn gaca cheę benne' ca' ca de' da dxelaca lazre' gaca cheę benne' xula.

<sup>10</sup> Bęn xexruj xi' lawe' benne' ca'.

Bzra benne' ca' lu xi'.

Bzra benne' ca' lu da sítujlę'ę naga cabátadxa xelexedxúaje'.

<sup>11</sup> Quebe gu'u lataj xegá'ana lu xęzr la xu bėnnea' dxennę'

da calęla.

Bęn gaca da calęla cheę benne' xichaj zra'a, da guzría xi na lę'.

<sup>12</sup> Nezda' xechębe Xránadxu Dios waláz cheę benne' baxache',

ne guzę chache' da zaj xu'u lu na' benne' xache' ca'.

<sup>13</sup> Da líqueze benne' xrlátaje ca' xelúe lánę' Lau' Lue', na' benne' li lazre' ca' xelezúe' naga zu' Lue'.

**141** Xrana' Dios, dxuláwizra' Lue'.

Gudázega gácalęnu' neda'.

Bene chi'a gate nnia' Lue'.

<sup>2</sup> Bęn la' da dxenaba' lau Lue' ca zren xala.

Ble'e na'a da dxechisa' lau' ca tu béadau' dxútia'-ba' lau'.

<sup>3</sup> Xrana' Dios, bxue dxu'a nigá,

ne bxue xide dxu'a cheę quebe nnia' tu da calęla.

<sup>4</sup> Quebe gu'u lataj gaca lazra' guna' tu da calęla,

ne cheę quebe guna' tu da calęla tu zren nen benne' ca'

dxelunę' da zrinnaj,

ne cheę quebe gágulęna' benne' ca' dxelunę' da

calęla

lu laní cheę'.

<sup>5</sup> Che gudé benne' xrlátaje neda' lu da ba xa', gaca na chia'

tu da chawe',

na' che til-lę' neda', gaca na chia' ca tu da dxelále'ę

zixre

da dxegu'ę xíchaja'.

Tu nábazqueza' Dios guzague' da calęla da dxelún

benne' ca'

dxelunę' da calęla.

<sup>6</sup> Gate xeledxú'unę' benne' xíchaję ca' cheę benne'

węn da calęla ca' zran xi'a xiaj ca',

na' xeleque be'e bėnneache naca li ca da gunnía'.

<sup>7</sup> Xelase dinnaj zrita cheę benne' ca' dxu'a xędxu ba cheę' ca'.

Xelaca na ca bhecu xu, da dxelase dinnaj na naga dxa'ana bęzre.

<sup>8</sup> Cheę lę na' dxenná'a naga zu' Lue', Xrana' Dios.

Dxuxrén lazra' Lue', quebe gusán lazru' neda'.

<sup>9</sup> Bxue neda' cheę quebe xelęl-la xralaj ca' cheę benne' ca'

dxelunę' da calęla neda',

ne cheę quebe cheajcházia' lu da zaj nabeque' benne'

węn da calęla ca'.

<sup>10</sup> Bęn cheajlechaze benne' ca' dxelunę' da calęla lu xralaj

da zaj nabéchequeze'

dxácate' na' tea' neda' ga na' zri'a chawe'.

**142** Zizraj dxuláwizra' Xránadxu Dios.

Du lazra' dxenaba' Xránadxu xexache lazre' neda'.

<sup>2</sup> Lau Lę' dxawa' zría ca da dxaca chia'.

Lau Lę' dxulé'eda' ca da stębe zua' neda'.

<sup>3</sup> Gate zua lázrdawa' lu da stębe, Lue', Xran, nézenu' da dxaca chia'.

La neza naga dxedá' gulebeque' xralaj da quęl-la na neda'.

<sup>4</sup> Dxenná'a cuita' xabęla, san quebe nu chilá' gácale neda'.

Quebe nu chilá', benne' guxúequeze' neda'.

Quebe nu chilá', benne' dxe' gunna xuę' chia' neda'.

<sup>5</sup> Dxuláwizra' Lue', Xrana' Dios, dxennia':

Dxebeza lazra' tuzu' Lue'.

Tuzu' Lue' dxezá lazra' lu xęzr la xu nigá.

<sup>6</sup> Bene da dxuláwizra' Lue', lawe' da dxezaca zí'le'a.  
Bselá neda' lu na' benne' ca' dxeláu zi' xuzre' neda',  
lawe' da zaj naque' wál-ladxa ca neda'.

<sup>7</sup> Bebéaj neda' lu da dxaca chia', chee' gaca güe lá'ana' Lue'.

Benne' xrlátaje ca' xeléchaje' neda' lawe' da gunu'  
gaca chawe' chia'.

**143** Xrana' Dios, bene da dxuchálaja' lau Lue'.

Bze' naga da dxenaba' lau'.

Gudá gácalenu' neda' lawe' da nacu' li lazre', ne xrlá-  
taje.

<sup>2</sup> Quebe guchi'u chia' neda', wen zrin chiu',  
ca naca da nabaga',  
lawe' da lau' Lue' quebe nu chilá' benne' naque' du  
lazre'.

<sup>3</sup> Gúcale' neda' lawe' da dxeláu zi' xuzre' neda'.  
Xeláteze bache xelúti'e' neda'.

Ba belun'e' naca' ca tu benne' dxedé' lu da chul-la  
ca naca chee' benne' gate ca'.

<sup>4</sup> Zua lázrdawa' lu da stébel'e', ne dxewí'ine lázrele'a.

<sup>5</sup> Dxeajsá lazra' ca guca nédxudaut'e.

Dxulaba lazra' ca naca xúgut'e da benu'.

Dxeajsá lazra' ca naca da zrente' ca' da benu'.

<sup>6</sup> Dxechisa na'a lau Lue'.

Naca' ca tu xezr la xu bizre, dxebíleda' Lué'queze.

<sup>7</sup> Gudázega gácalenu' neda', Xran, lawe' da dxedú  
lazra'.

Quebe chenu' gácalenu' neda', chee' quebe gaca' ca  
tu benne'

ba xu'e' xedxu ba.

<sup>8</sup> Che zilala ben cheajsá lazra' dxexache lazru' bén-  
neache

chiu' ca'

lawe' da dxuxrén lázrequeza' Lue'.

Bzéajni'i neda' ca dxal-la' guna'

lawe' da dxezá lazra' guna' da dxaca lazru' Lue'.

<sup>9</sup> Xrana' Dios, bselá neda' lu na' benne' ca' dx-  
eledábague'

neda'

lawe' da dxuzúa cuina' lu na'u chee' guxúequezu' ne-  
da'.

<sup>10</sup> Bse'de neda' chee' guna' da dxaca lazru' Lue',

lawe' da nacu' Lue' Dios chia'.

Gusel-la Be' xrlátaje chiu' chee' che'e' neda' la neza  
chawe' chiu'.

<sup>11</sup> Chee' gaca bea na nacu' xrlátaje, Xran, gutipu'  
lazra'.

Lawe' da nacu' xrlátaje, guseláu' neda' lu da dxaca  
chia'.

<sup>12</sup> Lawe' da nacu' li lazre', guzría xi'u benne' ca'  
dxeledábague' neda',

ne guzría xi'u xúgut'e benne' ca' dxelaca lazre'

xuluzría xi'e' neda',

lawe' da naca' neda' wen zrin chiu'.

**144** ¡Gaca ba lá'azxa Xránadxu Dios,

Bénnea' dxuzé chache' neda'!

Naque' Bénnea' dxuzázraje' na'a chee' cha'a lu wedil-  
la,

ne dxuzázraje' zrupe na'a chee' séqueda' tíl-lalena'  
benne' ca'

dxelun'e' da calela.

<sup>2</sup> Naque' Benne' dxexache lazre' neda',

ne naque' ca tu xu'u naga ze' chawa'.

Dxuzúa chache' neda', ne dxuselé' neda'.

Dxucu'uje' neda', na' dxuxrén lazra' Le'.

Dxun'e' dxuluzúa bénneache chia' dizra' chia'.

<sup>3</sup> Xrana' Dios, ¡ájazra naca nu benne', dxeajsá lazru'  
le'?

¡Ájazra naca nu benne' dxe'u gunne xue chee'?

<sup>4</sup> Naca benne' ca tu da níteze.

Zaj naca zra chee' ca tu zrul-la da dxedeze.

<sup>5</sup> Xrana' Dios, gusalaj zran xabáa, ne betaj gácalenu'  
neda'.

Bta xi'a ca', na' dxuaj zren chee' xi'.

<sup>6</sup> Bzalaj xesa guziu', ne blaga benne' ca' dxelun'e' da  
calela.

Bzalaj xaga nalá xéche'ze chiu', ne bzria xi' le'.

<sup>7</sup> Naga zu' na'la, bze' na'u, ne bselá neda' lu da sté-  
bel'e' zua'.

Bselá neda' lu na' benne' zitu' ca',

<sup>8</sup> benne' ca' tu dxelennézqueze' da wen lazre',

ne dxuluzétaje' Dios gate dxelezí xe'e'.

<sup>9</sup> Dios, gúl-laqueza' chiu' da cube, quínnia' da dxúl-  
lalena'.

Nen tu da dxínnia' da nua chi du chee' na gúl-laqueza'  
chiu'.

<sup>10</sup> Nacu' Lue' Bénnea' dxun'e' dxeledxúaj chawe'  
benne' wenná bea ca'.

Dxuseláu' David, wen zrin chiu', lu xia nalá chee'

benne' wen da calela ca'.

<sup>11</sup> Bexa'u neda', ne bselá neda' lu na' benne' zitu' ca',

benne' ca' tu dxelennézqueze' da wen lazre',

na' dxuluzétaje' Dios gate dxelezí xe'e'.

<sup>12</sup> Ben xelegula bi biu cheentu' ca tu xaga da dxegula  
chawe',

ne zaj nácabe' bi cuide'.

Ben xelaca bi nu'ula cheentu' ca bd'u'a xiaj xrtante' ca'  
da zaj nnita tu lu xu'u zren.

<sup>13</sup> Ben chat'e lízrentu' xúgut'e cuen lina cheentu'.

Ben xelánle'e' be xixre' cheentu', chee' xelácaba'

gaxúa gaxúane be xixre'du ca' lu xezr la xu cheentu'.

<sup>14</sup> Ben xelaca bezre cheentu' be wal-la chee' xelunba'  
zrin.

Ben quebe xezezanba' gate quebe ne zrin cha beu'  
cheeba' ca'.

Ben quebe nu cha' cuezre xache' la neza cheentu'.

<sup>15</sup> Ba neza zrente' naca na chee' bénneache ca' dxaca  
caní chee'.

Ba neza zrente' naca na chee' bénneache ca'  
naca Xránadxu Dios chee'.

**145** ¡Gucá'ana szrena' Lue', Dios chia', ne Wenná  
Bea chia'!

¡Tu güe lá'anazqueza' Lau' Lue' chadía chacanna!

<sup>2</sup> ¡Tu zra tu zra güe lá'ana' Lue'!

¡Tu güe lá'anazqueza' Lau' Lue' chadía chacanna!

<sup>3</sup> ¡Szrente' naca Xránadxu Dios, ne naca chee'

tu güe lá'anazquezdxu Lẹ'  
 ¡Québequeze séquedxu gúnbeadxu ca szrente  
 naque'!  
 4 Xúgutẹ cuen bénneache chiu' xelúe lá'ane' da benu'  
 Lue',  
 ne xuluzenne' benne' xęzr la xu ca' ca naca da zrente  
 da benu'.  
 5 Gulaba lazra' ca naca da xrtante cheę da xabáa cheę  
 xel-la' szren chiu', ne ca naca da zrente da nunu'.  
 6 Xúgutẹ bénneache xuluchálaje' ca naca xel-la' waca  
 cheę  
 da zrente da nunu',  
 na' neda' guzenda' lẹ' ca naca xel-la' szren chiu'.  
 7 Xuluzenne' le sa' ljwezre' ca naca xel-la' zri'i lazre'  
 zren  
 chiu',  
 ne tu xelúl-lazqueze' cheę da xrlátaje da nacu' Lue'.  
 8 Xránadxu Dios naque' zri'i lazre', ne dxexache lazre'  
 bénneache cheę'.  
 Dxezrene', ne quebe dxezráaze', na' dxexache  
 lázrele'e dxi'u.  
 9 Dxun Xránadxu Dios da chawe' cheę xúgutẹ bén-  
 neache,  
 ne dxexache lazre' xúgutẹ da zaj naca ban da nune'.  
 10 Xúgutẹ da ca' nunu' xelúe lá'ana na Lue', Xran,  
 na' bénneache chiu' xulucá'ana szrene' Lue'.  
 11 Dxelenné' ca szrente naca xel-la' dxenná bea chiu'.  
 Dxuluchálaje' ca naca xel-la' waca zrente chiu',  
 12 cheę xuluzenne' xúgutẹ bénneache ca naca da  
 zrente ca'  
 da nunu',  
 ne ca naca da xabáa cheę xel-la' szren cheę xel-la'  
 dxenná bea  
 chiu'.  
 13 Xel-la' dxenná bea chiu' tu súazqueze na,  
 ne nna be'enu' xúgutẹ cuen bénneache.  
 14 Nuxru Xránadxu Dios xúgutẹ benne' ca' dxea-  
 jlecházie',  
 ne dxechise' xúgutẹ benne' ca' zaj nada'u lu zrin wal-  
 la.  
 15 Xúgutẹ bénneache dxelenné'e Lue' cheę gácalenu'  
 lẹ',  
 na' Lue' gunézruju' da xelawe' ca zrin zra cheę na.  
 16 Dxuzé na'u, ne dxunézruju' ca naca da chawe'  
 da dxelexázrje xúgutẹ da zaj naca ban.  
 17 Xlátaje naca Xránadxu Dios lu xúgutẹ da dxune',  
 ne dxexache lazre' xúgutẹ da zaj naca ban da nun Lẹ'.  
 18 Xránadxu Dios zúatequeze' gácalene' xúgutẹ  
 benne' ca'  
 dxululáwizre' Lẹ',  
 xúgutẹ benne' ca' du lazre' dxululáwizre' Lẹ'.  
 19 Guné' ca dxelezá lazre' benne' ca' dxelezrebe' Lẹ'.  
 Cá'anqueze xenne' cheę' gate xululáwizre' Lẹ', ne  
 guselé'  
 benne' ca'.  
 20 Xránadxu Dios dxuxúequeze' xúgutẹ benne' ca'  
 zaj nazrí'ine' Lẹ',

san guzría xi'e xúgutẹ benne' ca' dxelebéaj xíchaje'  
 Lẹ'.

21 Du lazra' güe lá'ana' Xránadxu Dios.  
 Xúgutẹ benne' dxal-la' tu xelúe lá'anazqueze' Lẹ'  
 lá'azxa  
 chadía chacanna.

**146** ¡Gaca ba lá'azxa Xránadxu Dios!  
 ¡Du lazra' güe lá'ana' Xránadxu Dios!  
 2 ¡Dxácate naca bana' güe lá'ana' Xránadxu Dios!  
 ¡Tu gúl-lazqueza' da güe lá'ana' Xránadxu Dios dxá-  
 cate  
 naca bana'!  
 3 Quebe guxrén lázrele benne' dxelenná bea,  
 ne quegá bénneache lawe' da quebe xelezéquene'  
 xuluselé' le'e.  
 4 Dxeledxúaj be' zaj xu'e, na' xelexequę' xu xrte.  
 Lu zra ná'queze xelenite da dxuluwía lazre' xeluné'.  
 5 Ba neza zrente naca na cheę bénnea', dxácale Dios  
 cheę

Jacob lẹ',  
 bénnea' dxebeza lazre' Xránadxu Dios.  
 6 Dios na' bene' xabáa, ne xęzr la xu, ne nísadau',  
 ne xúgutẹ da zaj zra' lataj ca'.  
 Naque' Bénnea' tu dxúnzqueze' da li lazre'.  
 7 Dxuchi'e cheę benne' baxache' ca',  
 ne dxugawe' benne' ca' dxeledune'.  
 Xránadxu Dios dxuselé' benne' ca' zaj nada'u lu na'  
 benne' ca'.  
 8 Xránadxu Dios dxexune' xiaj lau benne' la chul-la ca'.  
 Xránadxu Dios dxechise' benne' ca' dxeajlecházie'.  
 Xránadxu Dios nazrí'ine' benne' xrlátaje ca'.  
 9 Xránadxu Dios dxuxúe' benne' zitu' ca'.  
 Nuxre' bidau' węzębe ca', ne nu'ula tuze ca',  
 na' dxuchínnaje' da dxelún benne' ca' dxeluné' da  
 calela.

10 Tu nna béazqueze Xránadxu Dios.  
 Le'e, benne' xęzre Sión, nna be'e Dios cheęle  
 ne xúgutẹ cuen zri'ine zre súale.  
 ¡Gaca ba lá'azxa Xránadxu Dios!

**147** ¡Le güe lá'ana Xránadxu Dios lawe' da naca  
 chawe'

gúl-ladxu da güe lá'anadxu Dios cheędxu,  
 lawe' da xrtante naca güe lá'anadxu Lẹ'!  
 2 Xránadxu Dios xexune' xęzre Jerusalén.  
 Xequé'e benne' Israel ca' zaj zuę' xęzr la xu zitu' ca'.  
 3 Dxexune' benne' ca' dxelexewí'ine lázrele'e,  
 ne dxudé'e ladxe' naga zaj naca wę' cheę benne' ca'.  
 4 ¡Nézquezne' ca' zaj naxán belaj ca'!  
 ¡Tu tu belaj ca' dxu'e la na!  
 5 ¡Szrente naca Xránadxu Dios, ne nape' dute xel-la'  
 waca!  
 ¡Quebe bi de da quebe dxéajni'ine'!  
 6 Xránadxu Dios dxácalene' benne' dxexruj lazre' ca',  
 na' dxuzéruje' benne' ca' dxeluné' da calela.  
 7 ¡Le gul-la da güe lá'anale Xránadxu Dios!  
 ¡Le gul-la, ne le quinne da cun zríadi'i na du lau Dios  
 cheędxu!  
 8 ¡Lẹ' dxudé'e beuj ca' zran xabáa!

¡Le' dxešel-le' nisa xiuj lu xęzr la xu!  
 ¡Le' dxunę' dxelezría xixre'du ca' lu xi'a ca'!  
 9 ¡Le' dxunęzruje' da dxelagu be' xixre' ca'!  
 ¡Dxunęzruje' da dxelagu bęchajdu ca', be' dxelebezre  
 xa'aba'!  
 10 Da dxezaca ba lązrelęne' quebe naca na xel-la' wal-  
 la  
 cheę bzrina' ca',  
 ne quegá xel-la' wal-la cheę bęnneache.  
 11 Dxezaca ba lązrelęne' benne' ca' dxelezrebe' Le',  
 ne benne' ca' dxelebeza lazre' Le' cheę xexache lazre'  
 le'.  
 12 ¡Le güe lá'ana Xránadxu Dios, le'e zrle xęzre  
 Jerusalén!  
 ¡Le güe lá'ana Dios cheęle, le'e zrle xęzre Sión!  
 13 ¡Le' dxuzúa chųchue' dxa xu'u cheę xęzre cheęle!  
 ¡Dxunę' dxaca chawe' cheę benne' ca' zaj zre'e xęzre  
 cheęle!  
 14 ¡Dxebeque' xel-la' dxebeza zri lazre' lu xęzr la xu  
 cheęle!  
 ¡Gúnnałe'e cheęle zrua' chawe'!  
 15 ¡Dxusel-le' xrtizre' cheę benne' ca' zaj zre'e dute  
 xęzr la xu,  
 na' chadı dxaca ca da dxenné!  
 16 ¡Dxugacue' xęzr la xu bezxe' da naca na ca zřila'!  
 ¡Dxuzęxruje' xrlę'ęla dxęla ca de!  
 17 ¡Dxunę' dxelexruj xiaj bezxe' ca weaj xíajdu ca'!  
 ¿Nu benne' gaca guchaga lawe' da zaga cheę na?  
 18 ¡Dxenná be'e, na' dxexuna na!  
 ¡Dxunę' dxaca be', na' dxexaca bezxe' na' nisa guba'u!  
 19 ¡Bzėajni'ine' Jacob ca naca xrtizre', ne bdeę' xrba  
 cheę',  
 ne da ca' gunná be'e lu na' benne' Israel ca'!  
 20 Quebe ne gunę' caní cheę xęzr la xu xezícadxa ca',  
 na' benne' xęzr la xu ca' quebe dxelexúnbe'e xrba  
 cheę'.  
 ¡Gaca ba lá'azxa Xránadxu Dios!  
**148** ¡Le güe lá'ana Xránadxu Dios!  
 ¡Le güe lá'ana Xránadxu, le'e, zrle xabáa!  
 ¡Le güe lá'ana Le', le'e, zrle dxala!  
 2 ¡Le güe lá'ana Le', le'e, gubáz cheę xabáa cheę' ca'!  
 ¡Le güe lá'ana Le', le'e, benne' zantę cheę'!  
 3 ¡Le güe lá'ana Le', le'e, gubizra, ne beu'!  
 ¡Le güe lá'ana Le', le'e, belaj dxusenile!  
 4 ¡Le güe lá'ana Le', le'e, xabáa ca',  
 ne le'e, nisa zrle ląwela xabáa!  
 5 ¡Le güe lá'ana La Xránadxu,  
 lawe' da gunná bé'ene', na' guzúale!  
 6 ¡Bene' sųale tu chi'ize, ne chadıa chacanna!  
 ¡Bzue' cheęle tu da bdxixruj be'e da quebe te cheę na!  
 7 ¡Le güe lá'ana Xránadxu lu xęzr la xu,  
 le'e, bea zři'a zrle lu nísadau', ne xųgute nisa situj,  
 8 ne le'e, xesa guziu', ne xiaj xiuj, ne bezxe', ne beuj  
 ca',  
 ne le'e, be' bdunu' ca', dxunle ca gunná be'e!  
 9 ¡Le güe lá'ana Le', le'e, xí'adu ca', ne xi'a zři'a ca',  
 ne le'e, xaga xixre ca', ne xaga cedro ca',

10 ne le'e, be' xixre' ca', ne bea ca' dxuluxúe bęn-  
 neache,  
 ne le'e, be' snia ca', ne be' zaj zua xřila!  
 11 ¡Le güe lá'ana Le', le'e, benne' wenná bea ca', ne  
 xųgute  
 bęnneache,  
 ne le'e, benne' dxelenná be'e, ne benne' dxuluchi'e,  
 12 ne le'e, benne' wegu' ca', ne nú'uladu ca',  
 ne le'e, benne' gula ca', ne bidu ca'!  
 13 ¡Le güe lá'ana La Xránadxu!  
 ¡Szřentędxa naca La Le' ca xųgute la bęnneache!  
 ¡Da xabáa cheę' dxulé'e lau na lu xęzr la xu, ne xabáa!  
 14 ¡Le' nune' xęzr cheę' xęzre wal-la!  
 ¡Le güe lá'ana Le', le'e, bęnneache cheę',  
 nácale zři'ine zře sua Israel!  
 ¡Nácale benne' nazři' Le'!  
 ¡Le güe lá'ana Xránadxu!  
**149** ¡Le güe lá'ana Xránadxu Dios!  
 ¡Le gul-la cheę Xránadxu tu da cube!  
 ¡Le güe lá'ana Le' naga zaj nazřaga bęnneache cheę'!  
 2 ¡Le be, le'e, benne' Israel, lau Bęnnea' bęne' le'e!  
 ¡Le sua xel-la' dxebe', le'e, zrle Sion, lau Bęnnea'  
 naque'  
 Wenná Bea cheęle!  
 3 ¡Le güe lá'ana La Xránadxu, ne guxa'ale!  
 ¡Le guchunchu xide ca', ne le quinne  
 da cun zřiadi'i na du ca', dxue lá'anale Le'!  
 4 ¡Xránadxu Dios dxezaca ba lązrelęne' bęnneache  
 cheę'!  
 ¡Dxape' ba lá'ana benne' dxexruj lazre' ca', ne dxuselé'  
 le'!  
 5 Dxał-la' xelebéqueze bęnneache cheę' lu da xabáa  
 cheę',  
 ne xelúl-le' dute xel-la' dxelebe' du xęla.  
 6 Dxał-la' xelebezre xę'e, xelúe lá'ane' Dios,  
 zaj nu'e xia da zaj nalá dxupa la'ate,  
 7 cheę xelexebėaj lazre' benne' xęzr la xu ca',  
 ne xuludęe' xel-la' zi' benne' xęzre ca',  
 8 ne xuluchėaję' benne' wenná bea cheę' ca' du xia,  
 ne benne' dxelenná be'e nen du xia,  
 9 ne xuluzřía xi'e benne' ca' ca ba nun Dios gaca cheę'.  
 Da nigá gaca na da xabáa cheę bęnneache cheę Dios.  
 ¡Le güe lá'ana Xránadxu!  
**150** ¡Le güe lá'ana Xránadxu Dios!  
 ¡Le güe lá'ana Xránadxu lu xudau' cheę'!  
 ¡Le güe lá'ana xel-la' waca cheę' lu xabáa cheę'!  
 2 ¡Le güe lá'ana Le' ca zaj naca da zřen da nune'!  
 ¡Le güe lá'ana Le' ca naca xel-la' szřen cheę'!  
 3 ¡Le güe lá'ana Le', gucuęzre luzu ca' da dxulu-  
 cuezre'!  
 ¡Le güe lá'ana Le', quinnele da cun zřiadi'i na du,  
 ne da ca' dxínnele!  
 4 ¡Le güe lá'ana Le', guchųnchule xide, ne guxa'ale!  
 ¡Le güe lá'ana Le', quinnele da cun zřiadi'i na du,  
 ne gucuęzrele bchiuj!  
 5 ¡Le güe lá'ana Le', gutíl-lale xíadu ca'!  
 ¡Le güe lá'ana Le', gutíl-lale xia zřen ca'!  
 6 ¡Le güe lá'ana Xránadxu, xųgutele naca banle!

¡Le güe lá'ana Xránadxu Dios!

# San Mateo

## La benne' ca' gulaque' xra gula chee Cristo (Lc. 3.23-38)

**1** Da caní zaj naca na la chee benne' zaj naque' xra wdé chee Jesucristo. Jesús nigá nababe' zri'ine zre sua David, ne zri'ine zre sua Abraham.

<sup>2</sup> Abraham nigá guque' xra Isaac.

Isaac nigá guque' xra Jacob.

Jacob nigá guque' xra Judá, ne benne' biche' ca'.

<sup>3</sup> Judá nigá guque' xra Fares, ne Zara, na' Tamar guque' xrna Fares, ne Zara caní.

Fares nigá guque' xra Esrom.

Esrom nigá guque' xra Aram.

<sup>4</sup> Aram nigá guque' xra Aminadab.

Aminadab nigá guque' xra Naasón.

Naasón nigá guque' xra Salmón.

<sup>5</sup> Salmón nigá guque' xra Booz, na' Rahab guque' xrna Booz nigá.

Booz nigá guque' xra Obed, na' Rut guque' xrna Obed nigá.

Obed nigá guque' xra Isaí.

<sup>6</sup> Isaí nigá guque' xra David, benne' wenná bea.

Wenná bea David nigá, ne nu'ula na' nédxute guque' zru'ula Urías gulaque' xra xrna Salomón.

<sup>7</sup> Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

<sup>8</sup> Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

<sup>9</sup> Uzías nigá guque' xra Jotam.

Jotam nigá guque' xra Acáz.

Acáz nigá guque' xra Ezequías.

<sup>10</sup> Ezequías nigá guque' xra Manasés.

Manasés nigá guque' xra Amón.

Amón nigá guque' xra Josías.

<sup>11</sup> Josías nigá guque' xra Jeconías ne benne' biche' ca' ca lu zra ca' gate benne' Babilonia guleché'e benne' Israel ca' lu xezr la xu Babilonia.

<sup>12</sup> Jeconías nigá guque' xra Salatiel.

Salatiel nigá guque' xra Zorobabel.

<sup>13</sup> Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

<sup>14</sup> Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

<sup>15</sup> Eliud nigá guque' xra Eleazar.

Eleazar nigá guque' xra Matán.

Matán nigá guque' xra xetú benne' le' Jacob.

<sup>16</sup> Jacob nigá guque' xra José, benne' chee María, xrna Jesús, Bénnea' naque' Cristo.

<sup>17</sup> Caní naca, gulaca chidá' cue' bènneache gate guzú lau zua Abraham, ca bzrinte zra zua David, na' gulaca xechidá' cue' bènneache ca' gate guzú lau zua David, ca bzrinte zra gate na' benne' Babilonia ca' guleché'e benne' Israel ca' lu xezr la xu chee', na' gulaca xechidá' cue' bènneache ca' gate guzú lau zra na', ca bzrinte zra gulaj Cristo.

## Ca guca gate gulaj Cristo (Lc. 2.1-7)

<sup>18</sup> Caní guca gate na' gulaj Jesucristo. María, xrna Jesús ba nachébebe' gácabe' zru'ula José. Nédxula ca za xelenite', nu'ula nigá ba zué' zi'i ne chee xel-la' waca chee Be' Lá'azxa chee Dios. <sup>19</sup> José, benne' chee María nigá, naque' benne' xrlátaje. Quebe guca lazre' gulé'ene' ca ba naca chee María lau benne' xezre ca'. Guca lazre' gusané' le' bagácheze. <sup>20</sup> Dxácaté dxudé lazre' da nigá, ble'e lau tu gubáz chee xabáa, gubáz chee Xránadxu, ga zua José na' lu bchigala, na' guzre' le':

—José, zri'ine zre sua David, quebe zrebu' si' lu na'u María chee gácabe' zru'ulu', lawe' da bidu biu na' sanbe' zabe' ne chee Be' Lá'azxa chee Dios. <sup>21</sup> Zrú'ulu' gúxrube' tu bidu biu cheebe', na' lue' gu'u labe' Jesús. Caní gu'u labe' lawe' da guselabe' bènneache lu dul-la da zaj nabague'.

<sup>22</sup> Xúguté da caní gulaca ca' chee guca ca da gunná Xránadxu lu dxu'a benne' ca' buluchálaje' waláz chee'.

<sup>23</sup> Caní gunné':

Tu nú'uladau' gúadaube' sanbe' tu bidu biu cheebe', na' xelu'e labe' Emanuel.

Emanuel zéaje na: Dios zúalene' dxi'u.

<sup>24</sup> Ca bebán José, na' bene' cáteze gunná gubáz chee Xránadxu, na' guzú' lu ne'e María chee gácabe' zru'ule'.

<sup>25</sup> Quebe gulaque' tuze ca gusandxa María bidu biu nedxu cheebe', na' buluzúe' labe' Jesús.

## Dxelezrín benne' sina ca' lu xezre Jerusalén

**2** Bidau' Jesús gúlajbe' lu xezre Belén da nababa xezr la xu Judea gate dxenná bea benne' le' Herodes ga na'. Nadxa belezrín benne' ca' lu xezre Jerusalén, benne' zá'aque' chalá'a naga dxalaj gubizra, zaj naque' benne' sina gula. <sup>2</sup> Na' gulenabe':

—¿Ga zua bidu na' ba gúlajbe' chee gácabe' benne' nna bé'ene' benne' judío ca'? Gate zuantu' chalá'a naga

dxalaj gubizra blé'entu' belaj chee'be', na' bla'ntu' nigá chee' gúe lá'ana gúe szrentu'-be'.

<sup>3</sup> Ca guneze Herodes, benne' wenná bea, da nigá, na' guzúe' stebe, ne cá'anqueze guca chee' xúgute' benne' zaj zře'ę Jerusalén. <sup>4</sup> Nadxa Herodes, wenná bea na', btupe' xúgute' benne' xíchaję chee' bxruze ca', ne benne' dxuluxuzájle'ę da nadxixruj bea Dios, na' gunábene' benne' ca':

—¿Gazra na' galaj Cristo?

<sup>5</sup> Benne' caní gulé'ę le':

—Lu xęzre Belén da nababa xęzr la xu Judea, lawe' da bzuaj caní tu benne' bchálaję' waláz chee' Dios, gate na' gunné':

<sup>6</sup> Lue', Belén chee' xęzre ca' zaj nababa na Judá, nacu' lue' xęzre da quebe naca na da bzébedxa ládujla benne' ca' dxelenná be'ene' xęzr la xu Judá nigá,

lawe' da ládujla bėnneache chiu' dxuaj tu benne' nna be'ę,

na' guxúequeze' bėnneache chia', benne' Israel.

<sup>7</sup> Nadxa Herodes, wenná bea na', bláwizre' bagácheze benne' sina gula ca', na' gunábene' le' báta-la ble'e lau belaj na' belelé'ene'. <sup>8</sup> Nadxa gusel-le' benne' ca' chjaque' xęzre Belén, ne guzre' le':

—Le chjaca na', ne le naba xanne' chee' bidu na', na' ca cheajxrácale-be', na' le guzén neda' chee' cha'a neda' gúe lá'ana gúe szrena'-be'.

<sup>9</sup> Ca bexuzre belén benne' sina gula ca da gunná Herodes, wenná bea, nadxa besiá'que', na' belaj da belelé'ene' gate zaj zře'ę chalá'a naga dxalaj gubizra zeaj na lau le', na' bzrintę na, ne guzúa na naga zua bidu na'. <sup>10</sup> Gate benne' sina gula ca' belelé'ene' belaj na', nadxa gulebéle'ęne'. <sup>11</sup> Ca gulu'ę lu xu'u, belelé'ene' bidu na', ne xrnabe' María. Nadxa buluzú zribe' dxelúe lá'ana dxelúe szrene' bidu na'. Nadxa gulesálaję' xua chee' ca', ne bulunézruje'-be' oro, ne xalaj zixre, ne mirra da naca na zichaj. <sup>12</sup> Ca gudé na', Dios guzre' benne' ca' lu bchigala québedxa xelexedé' naga zua Herodes. Chee' le' na belexequé'ę neza xula, belexezrine' lazrie'.

### Ca guca beleché'ę Jesús lu xęzr la xu Egipto

<sup>13</sup> Ca gudé besi'aca benne' sina gula ca', nadxa tu gubáz chee' xabáa, gubáz chee' Xránadxu ble'e lawe' José lu bchigala, na' guzre' le':

—Guxasa. Becá'a bidu na', ne xrnabe', na' le chjaca lu xęzr la xu Egipto, na' xegá'anu' ga na' ca zrindxa zra xapa' lue' xetú. Caní dxal-la' gunu' lawe' da wexilaj Herodes bidu nigá chee' gutie'-be'.

<sup>14</sup> Nadxa José guxasę', na' chizrélala beche'ę bidu na', ne xrnabe', na' bexu'ę-be' lu xęzr la xu Egipto.

<sup>15</sup> Gulezré'ę na' ca bzrindxa zra gute Herodes. Caní guca ca naca da gunná Xránadxu lu dxu'a benne' bchálaję' waláz chee', gunné': "Xuláwizra' bi biu chia' chee' xedxúajbe' lu xęzr la xu Egipto."

### Dxenná be'e Herodes benne' ca' xelútię' bidu biu ca'

<sup>16</sup> Gate gúquebe'e Herodes gulezí xę benne' sina ca' le', na' bzrá'ale'ę, ne gunná bé'ene' benne' ca' xelútię' xúgute' bi biu dxé'enedau', ca zrintę bidu ca' ba zaj zua chup iza, bidu ca' zaj zrabę xęzre Belén, ne bidu ca' zaj zrabę lu xęzredu ca' zaj naxechaj na xęzre Belén na'. Caní bęn Herodes cáteze buluzén benne' sina gula ca' le' ca naca zra na' belelé'ene' belaj na'. <sup>17</sup> Ca'an guca ca da bzuaj Jeremías, bėnnea' bchálaję' waláz chee' Dios ba guca zan' iza, gunné':

<sup>18</sup> Guca tu schaga lu xęzre Ramá.

Guca webezre, ne gulebezre xache'.

Raquel na' dxebézrele'ę chee' bi chee' ca'.

Québequeze dxaca lazre' xexaca zrene'

lawe' da ba gulate bi chee' ca'.

<sup>19</sup> Ca gudé gute Herodes, na' tu gubáz chee' xabáa, gubáz chee' Xránadxu ble'e lawe' José lu bchigala naga zuę' Egipto, na' guzre' le':

<sup>20</sup> —Guxásache. Beche'ę bidu chiu' nigá, ne xrnabe'.

Bexíaj lu xęzr la xu Israel, lawe' da ba gulate benne' ca' gulaca lazre' xelútię' bidu nigá.

<sup>21</sup> Nadxa guxasa José, na' beche'ę bidu na', ne xrnabe', na' belexezrine' lu xęzr la xu Israel. <sup>22</sup> Ca guneze José dxenná bea Arquelao naga nababa Judea waláz chee' xre', Herodes na', na' bzrebe José xexíaję' ga na'. Nadxa bexíaję' naga nababa Galilea ca da ba guzre gubáz chee' xabáa le' lu bchigala. <sup>23</sup> Ca bezrine' na', na' bexíaję' cheajxezúę' lu xęzre Nazaret. Caní guca ca da gulenná benne' ca' buluchálaję' waláz chee' Dios, gulenné' Jesús nigá si le' benne' Nazaret.

### Juan dxegu'ę Iban le'ę xixre' lawe' lataj

(Mr. 1.1-8; Lc. 3.1-9, 15-17; Jn. 1.19-28)

**3** Ca lu zra ca' bla' Juan, bėnnea' bchuę' bėnneache nisa, dxegu'ę Iban le'ę xixre' lawe' lataj naga nababa Judea. <sup>2</sup> Dxenné':

—Le xebi'i lazre' lawe' da ba zua gáguze zra nna bea Dios lu xęzr la xu nigá.

<sup>3</sup> Juan nigá naque' bėnnea' bchalaj Isaías chee'.

Isaías bchálaję' waláz chee' Dios gate bzuaję' caní:

Dxene chi'i benne' dxebezre xę'ę le'ę xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau le' naga téę'.

<sup>4</sup> Zra lana Juan nigá nune na xicha zra camello, ne bazxu dxu'a le'ę chee' naca na xide, na' dxawe' biche xuaj, ne bzrina'dau' chee' bėzudau'. <sup>5</sup> Belezrín benne' belenne' ca da dxuchalaj Juan, benne' zá'aque' xęzre Jerusalén, ne benne' chee' xúgute' xęzre ca' zaj nababa Judea, ne benne' zá'aque' xęzredu ca' zaj nnita gáguze xęgu Jordán. <sup>6</sup> Ca gulexrúalępe' dul-la chee', Juan nigá bchuę' benne' ca' nisa lu xęgu Jordán.

<sup>7</sup> Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelexedxúę' nisa, na' guzre' benne' ca':

—Le'e, bę snia. ¿Zua nu guzre le'e guzrúnna'le da ba xa' da za'? <sup>8</sup> Le gun da xrlátaje da xelunna bea na ba



bebí'i lázrele. <sup>9</sup> Quebe guéquele lale, dxennale le'eze: "Nalatu' lawe' da nácantu' xrtia Abraham." Neda' dxa-pa' le'e: Dios waca xexuné' xiaj caní zri'ine xrtia Abraham. <sup>10</sup> Le'e nácale ca xaga ca'. Xia waga bache nalá na cheé chugu na xaga ca', na' xúgute' xaga ca' quebe dx-  
elebía na da zixre chawe' welechugue na, na' xelexe na lu xi'. <sup>11</sup> Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'e ca te chia' neda', Le' gune' ca da zéaje' xel-la' dxedxúa nisa, guzúe' le'e Dios Be' Lá'azxa, ne xi' chee'. Benne' nigá nácadxe' blau ca neda', na' quebe zaca' cuéajza' zrelé' xu'u ni'e. <sup>12</sup> Cá'anqueze nácale ca zrua' xtila. Benne' nigá ba nu'e da dxun be', cuéaje' xrte zrua' xtila na', na' xebéaje' chalá'ala xizre chee' na, na' xuzrá chawe' zrua' xtila na' lu da'a chee' na, san guzezxe' xizre na' lu xi' da quebe xexula na.

### Da guca gate gudxúa Jesús nisa

(Mr. 1.9-11; Lc. 3.21-22)

<sup>13</sup> Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan chee guchúe' Le' nisa. <sup>14</sup> Nédxute' Juan quebe guca lazre', na' dxé'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

<sup>15</sup> Jesús guzre' le':

—Be' lataj gaca caní na'a. Dxun na ba xen gundxu xúgute' da xrlátaje' lau Dios.

Nadxa Juan bené' ca'. <sup>16</sup> Gate bexuzre gudxúa Jesús nisa, na' la bxálajte' xabáa, na' ble'e Juan Be' Lá'azxa chee' Dios dxétaje' ca tu gugu chíchidau', zeajsúaba' lawe' Jesús. <sup>17</sup> Nadxa ben tu chi'i lu be', gunné':

—Benne' nigá naque' Zrí'inequeza' nazrí'ite' lazra'. Dxezaca ba lázrele'na' Le'.

### Dxaca lazre' da xriwe' gun na бага Jesús zria

(Mr. 1.12-13; Lc. 4.1-13)

**4** Nadxa Be' Lá'azxa chee' Dios la guché'te' Jesús le'e xixre' lawe' lataj naga gúe' lazre' da xriwe' gun zréaje' na Le'. <sup>2</sup> Quebe bi gudagu Jesús chua zra chua xela, na' ca gudé' na' guduné'. <sup>3</sup> Nadxa da xriwe' bzrin na naga zua Jesús chee' gun zréaje' na Le', na' dxé na Le':

—Che Lue' nacu' Zri'ine Dios, gunná be'e xiaj caní xelexaca na xeta xtila.

<sup>4</sup> Jesús bechebe':

—Lu xiche chee' Dios dxenné': "Quebe gaca ban nu benne' gawe' xétaze, san nen xúgute' dizra' chee' Dios gaca bane'."

<sup>5</sup> Nadxa da xriwe' guché' na Jesús lu xezre lá'azxa Jerusalén, na' bzua na Le' xíchajte' xudau', <sup>6</sup> na' guzre na Le':

—Che Lue' nacu' Zri'ine Dios, guxrite' nigá, lawe' da dxenná lu xiche chee' Dios:

Dios nna bé'ene' gubáz chee' xabáa chee' ca' chee' xelácalene' Lue'.

Welexehise' Lue' nen ne'e

chee' quebe gunu' zi' ni'u lu xiaj ca'.

<sup>7</sup> Na' gunná Jesús:

—Cá'anqueze dxenná lu xiche chee' Dios, dxé'e bénneache: "Quebe guchínenu' Xranu' Dios cáteze dxaca lazru'."

<sup>8</sup> Nadxa da xriwe' guché' na Le' tu lu xi'a sibe, na' ble'e na Le' ca naca xúgute' cue' xezr la xu zaj nnita lu xezr la xu, ne ca naca xel-la' guni'a chee' na. <sup>9</sup> Na' gunná da xriwe', dxé na Le':

—Xúgute' da caní gunna' chiu' che guzú zribu' gucá'ana szrenu' neda'.

<sup>10</sup> Nadxa Jesús guzre' na:

—Bexíaj, da xriwe', lawe' da dxenná Dios lu xiche chee', dxé'e bénneache: "Bca'ana szren Xranu' Dios, ne be lá'ana tuze Le'."

<sup>11</sup> Nadxa da xriwe' becuasa na lau Jesús, na' belezrín gubáz chee' xabáa chee' Dios, ne bulunézruje' da dxechine Jesús.

### Dxuzú lau Jesús dxuchálaje' xrtizra' Dios naga nababa Galilea

(Mr. 1.14-15; Lc. 4.14-15)

<sup>12</sup> Gate ben Jesús xu'u Juan lizre xia, na' bezé'e zexía-je' naga nababa Galilea. <sup>13</sup> Quebe bga'ana Jesús xezre Nazaret. Xeajsúe' lu xezre Capernaum da zua na dxu'a nísadau' naga zaj zra' xrtia Zabulón, ne xrtia Neftalí.

<sup>14</sup> Caní guca ca da bzua' Isaiás, benne' bchálaje' waláz chee' Dios, gunné':

<sup>15</sup> Lu xezr la xu chee' Zabulón, ne chee' Neftalí, naga zrua neza da zeaj na dxu'a nísadau', chalá'a naga dxalaj gubizra xechalá'a xegu Jordán. Naga nababa Galilea, naga zaj zra' benne' quebe zaj naque' judío.

<sup>16</sup> Bénneache zaj zra' lu da chul-la belelé'ene' tu da dxusaníle'e na,

na' benne' zaj zra' naga xu'u zrul-la chee' xel-la' gute ba bsaní' tu xi' naga zaj zre'e.

<sup>17</sup> Ca lu zra na' guzú lau Jesús dxegu'e' Iban, dxenné':

—Le xebí'i lázrele, lawe' da ba zua gáguze zra nna bea Dios lu xezr la xu nigá.

### Jesús dxuláwizre' tapa benne' wezén bela

(Mr. 1.16-20; Lc. 5.1-11)

<sup>18</sup> Gate na' zeaj Jesús dxu'a nísadau' ga nababa Galilea, na' blé'ene' chupa benne'. Tue' le' Simón, ne zua xetú le' Pedro, na' xetúe' le' Andrés, biche Simón na'. Benne' caní zaj naque' benne' wezén bela, na' dxuluzalé' xixruj bela chee' lu nisa. <sup>19</sup> Nadxa Jesús dxé'e benne' caní:

—Le gun neda' tuze, na' guna' le'e benne' gutúpale chia' bénneache ca dxunle dxezenle bela.

<sup>20</sup> La bulucá'anate' xixruj chee' ca', na' zjálalene' Jesús.

<sup>21</sup> Xelátedauze gusá'aque', na' ble'e Jesús xechupa benne'. Tue' le' Jacobo, ne xetúe' le' Juan, biche Jacobo nigá. Zaj naque' zri'ine Zebedeo, ne zaj xu'e' tu lu da dxedá lawe' nísadau' nen xre', dxexelún chawe' xixruj chee'. Jesús bláwizre' le', <sup>22</sup> na' la bulucá'anate' da dxedá lawe' nísadau' na', ne xre', na' zjálalene' Jesús.

**Jesús dxusédenē' bēnneache naga nababa Galilea**  
(Lc. 6.17-19)

<sup>23</sup> Zeaj Jesús xúgute xēzre zaj nababa Galilea, na' tu tu xēzre ca' dxuzéajni'ine' bēnneache lu xu'u ca' naga dxulucá'ana szren benne' judío ca' Dios. Na' dxegu'e lban ca nna bea Dios, ne dxexunē' xúgute benne' ca' ca zaj naca xízrawē' cha chee'. <sup>24</sup> Ca'an guca, xúgute benne' chee xēzr la xu Siria belenne' ca da dxun Jesús, na' belezrine' lau Jesús, zaj naché'e benne' wē' ca', benne' zaj xu'e xízrawē', ne benne' zaj zuē' lu xel-la' dxudía, ne benne' zaj xu'e be' xriwē', ne benne' zaj xu'e chuna', ne benne' zaj naxrú'unie' bine, na' bexún Jesús xúgute benne' caní. <sup>25</sup> Zjácale benne' zan Lē', benne' zaj nababē' xēzre ca' zaj nababa Galilea, ne benne' zá'aque' xēzre Decápolis ca', ne benne' Jerusalén, ne benne' zaj nababē' xēzre ca' zaj nababa Judea, ne benne' zá'aque' xechalá'ala xēgu Jordán naga dxalaj gubizra.

**Lban da bchalaj Jesús tu lu xi'a**

**5** Gate ble'e Jesús xúgute benne' zan ca' zá'aque' naga zuē', nadxa guluéne' tu lu xi'a, ne gudxé'e na'. Nadxa benne' ca' dxuséde Jesús beledubē' cuitē'.  
<sup>2</sup> Nadxa guzú lau Jesús dxusédenē' benne' ca'.

**Nu benne' naca chee' tu da ba neza**  
(Lc. 6.20-23)

<sup>3</sup> Gunná Jesús:

—Da ba neza zrentē naca na chee benne' ca' dx-elexúnbe'e ca naca xel-la' dxexazrje chee' lau Dios. Benne' caní zaj naca chee' xelexú'e naga dxenná bea Dios xabáa.

<sup>4</sup> Da ba neza zrentē naca na chee benne' ca' dx-elelé'e'le' zaj zuē' lu da baxache' lawe' da zaj nabague' dul-la. Dios dxexúe zrenē' benne' caní.

<sup>5</sup> Da ba neza zrentē naca na chee benne' zaj naque' zren lazre'. Benne' caní xelexú'e chee' xēzr la xu da nachēbe lazre' Dios gunézrujē' benne' caní.

<sup>6</sup> Da ba neza zrentē naca na chee benne' du lazre' dxelaca lazre' xelunē' da naca xrlátaje lau Dios. Dios gácalēne' benne' caní.

<sup>7</sup> Da ba neza zrentē naca na chee benne' dxelaxache lazre' benne' xula. Dios wexache lazre' benne' caní.

<sup>8</sup> Da ba neza zrentē naca na chee benne' ca' zaj xu'u xichaj lázrdawē' da xrlátaje. Benne' caní welelé'ene' Dios.

<sup>9</sup> Da ba neza zrentē naca na chee benne' dxelebeza zri lazre' nen bēnneache. Dios guzúē' lē' ca bi cheéqueze'.

<sup>10</sup> Da ba neza zrentē naca na chee benne' dxeledēe' xel-la' zi' lu na' benne' ca' dxelunē' chee' da calela cate' dxelunē' da xrlátaje. Benne' caní zaj naca chee' xelexú'e naga dxenná bea Dios xabáa.

<sup>11</sup> Da ba neza zrentē naca na chee le'e chee benne' dxelennē' schanni' chee, ne dxelunē' chee da

calela, ne dxelennē' chee le xúgute dizra' wēn lazre' lawe' da nácale chia' neda'. <sup>12</sup> Le be, ne le xezaca ba lázrele lawe' da wazile tu da zrentē da gunna Dios le'e xabáa. Caní gaca na lawe' da cá'anqueze caní guláu zi' xuzre' benne' ca' buluchálaje' waláz chee Dios, benne' ca' gulezré'e nédxudxa ca le'e.

**Nácale ca zede', ne ca tu xi' lu xēzr la xu**  
(Mr. 9.50; Lc. 14.34-35)

<sup>13</sup> Na' gunná Jesús:

—Le'e nácale ca zede' chee bēnneache lu xēzrla xu nigá. Che zede' nigá xenite xel-la' sna'a chee na, zájazra gácale bēnneache ca'? Québedxa gaca guchínedxu zede' caní. ¡Chú'unadxu na, na' xululéaj bēnneache lē na!

<sup>14</sup> Le'e nácale ca tu xi' chee bēnneache zaj zré'e xēzr la xu. Tu xēzre da zua na tu lu xi'a, quebe gáchequeze na. <sup>15</sup> Gate guzálajdxu tu xi', quebe gudúsedxu na. Guzúadxu na sibe naga gusení na chee xelexé'e xúgute benne' zaj zré'e lu xu'u. <sup>16</sup> Cá'anqueze le gun le'e. Le güe lataj gusení xi' da nácale lau bēnneache ca' chee xelexé'ene' ca da xrlátaje da dxunle. Nadxa xelúe lánē' Xrale Dios zuē' xabáa.

**Da bchalaj Jesús ca naca chee da nadxixruj bea Dios**

<sup>17</sup> Gunná Jesús:

—Quebe dxal-la' guéquele le'e za'a neda' chee cua' ca naca da bdxixruj be'e Moisés, ne ca naca dizra' da buluchalaj benne' ca' buluchálaje' waláz chee Dios. Quebe za'a chee cua' na. Za'a chee gul'éda' cáteze zéajē na. <sup>18</sup> Da li dxapa' le'e. Dxácatē zaj zua xabáa, ne xēzr la xu nigá, quebe dúaqueze tu dizra', ne tu da da' lu da nadxixruj bea na nigá ca zrindxa zra gaca xúgute ca da dxal-la' gaca na. <sup>19</sup> Chee lē na', che tu benne' guzúē' chalá'ala bítetezla da nigá da bdxixruj bea Dios, láqueze naca na tu da dauze, ne che guzéajni'ine' bēnneache chee xelúnqueze' ca', benne' nigá xegá'ane' cá'aze naga dxenná bea Dios xabáa. Bēnea' guzúē' dizra' da nadxixruj bea nigá, ne gul'éne' bēnneache chee xelúnqueze' ca', benne' nigá wegá'anaqueze' ba lánana naga dxenná bea Dios xabáa. <sup>20</sup> Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájle'e da nadxixruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

**Da bchalaj Jesús ca naca chee xel-la' dxezrá'a**  
(Lc. 12.57-59)

<sup>21</sup> Na' gunná Jesús:

—Le'e ba bénele ca gulenná xrtíale gula ca': "Quebe gútele benne'," na' "Nútezeze benne' gutiē' benne' waxíajē' chee cuía xi'e." <sup>22</sup> Neda' dxapa' le'e, nútezeze benne' dxezré'e le sa' ljwezre' waxíajē' chee cuía xi'e. Na' bēnea' dxennē' schanni' chee le sa' ljwezre' waxíajē' lau benne' chee xu'u lawe' blau, na' xuludēe' lē' chee cuía xi'e. Bēnea' dxennē' chee le sa' ljwezre'

tu dizra' sban, benne' nigá nácaqueze chee' chéaję' lu lataj ba xa'.

<sup>23</sup> Che gu' lu xudau' tu da gunézruju' lau Dios, ne na' cheajsá lazru' chee' tu da nunu' chee' le sa' ljwezru', <sup>24</sup> bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca xexíaju' lu xudau' chee' bi gunézruju' lau Dios.

<sup>25</sup> Che zua nu benne' dxebagu' chee', na' che'e lue' lau benne' guchi'e chiu', bexaca chawe' nen le' la neza na', chee' quebe gudęe' lue' lau bęnnea' dxuchi'e da dxaca. Che quebe gunu' caní, nadxa benne' dxuchi'e da dxaca na' gudęe' lue' lu na' benne' dxusęzruje' bęnne' ca' lizre xia, na' xelegú'e lue' lizre xia na'. <sup>26</sup> Da li dxapa' lue'. Quebe xedxúaju' na' che quebe quízruju' xúgutę da dxebagu' chee' benne' na'.

### Da bchalaj Jesús ca naca chee benne' dxíchaję' xrba chee xel-la' nuchaga na'

<sup>27</sup> Na' gunná Jesús:

—Le'e bache bęnquezle ca gulennę' nédxute: "Quebe gunu' dul-la da dxichaj na xrba chee xel-la' nuchaga na'." <sup>28</sup> Neda' dxapa' le'e, núteteze benne' ne'e tu nu'ula, ne sa lazre' le', bachequeze bęne' dul-la nen nu'ula na' lu xichaj lázrdawe'.

<sup>29</sup> Che xiaj lau' da zua xabęla dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee bęl-la' dxen chiu' quęzcala chu'u lataj ba xa' dutę bęl-la' dxen chiu'. <sup>30</sup> Che na'u da zua xabęla chiu' dxuzúa na lue' lu dul-la, guchugu na, ne gudxú'una na zitu'. Nácadxa chawe' nite late' da naca na chee bęl-la' dxen chiu', quęzcala chu'u lataj ba xa' dutę bęl-la' dxen chiu'.

### Jesús dxusędenę' ca naca chee benne' dxexelę'e nen zru'ule'

(Mt. 19.9; Mr. 10.11-12; Lc. 16.18)

<sup>31</sup> Na' gunná Jesús:

—Cá'anqueze gulennę' nédxute: "Núteteze benne' dxexelę'e nen zru'ule', dxal-la' gunézruje' nu'ula na' tu xiche da dxulé'e na belexelę'e." <sup>32</sup> Neda' dxapa' le'e, che tu benne' dxexelę'e nen zru'ule', na' nu'ula nigá quebe guzúalęne' benne' xula, benne' chee nu'ula nigá dxuzú'e' le' lu dul-la chee da dxichaj na xrba chee xel-la' nuchaga na' che tu benne' biu xula guchaga ne'e nen nu'ula na' bsan benne' chee' le'. Cá'anqueze le' dxune' dul-la nen nu'ula na'.

### Jesús dxusędenę' ca naca chee benne' dxucá'ana lie' xrtizre'

<sup>33</sup> Na' gunná Jesús:

—Cá'anqueze ba bęnele ca gulenná benne' gula ca', gulennę': "Quebe gucá'anu' cá'aze ca da nachębe lazru' nen dizra' bca'ana liu' lau Xránadxu Dios." <sup>34</sup> Neda' dxapa' le'e: Quebe dxal-la' guzętjale xabáa chee guca'ana lile dizra' cheęle, lawe' da naca na naga dxę' Dios, <sup>35</sup> ne quebe guzętjale xęzr la xu nigá lawe' da naca na naga nuzúa Dios ni'e, ne quebe guzętjale

Jerusalén lawe' da naca na xęzre chee Benne' Blau naque' Wenná Bea. <sup>36</sup> Quebe guzętjale xíchajle chee guca'ana lile dizra' cheęle lawe' da quebe séquele gunle da chiche, ne da gasaj netú xicha xíchajle. <sup>37</sup> Le nnaze: "Awe'," u le nnaze: "Cabí," lawe' da gate tu benne' dxudadxę' chee' chee da nigá, naca na chee da xriwe'.

### Dxulé'e Jesús ca naca chee nu benne' dxexebęaj lazre' (Lc. 6.29-30)

<sup>38</sup> Na' gunná Jesús:

—Le'e ba bęnele ca da gulennę' nédxute: "Che tu benne' cuęaję' xiaj lau', cá'anqueze gunu' chee', ne che cuęaję' lazru', cá'anqueze gunu' chee'." <sup>39</sup> Neda' dxapa' le'e, quebe tíl-lalęle nu benne', san che tu benne' gu'e chalá'a xragu', bę' lataj gu'e xechalá'a xragu'. <sup>40</sup> Che tu benne' gaca xúzre'leņe' lue', ne dxaca lazre' cuę' zrau', bę' lataj xúate' xicha chiu'. <sup>41</sup> Che dxulusebáguę' lue' gu'u xua chee' tu cuęndau', bia na chupa cuenla.

<sup>42</sup> Che núteteze benne' bi dxenabę' chiu', bnézruje' na, ne quebe guzagu' ca gunézruju' chee nu benne' bi dxenabę' chite'.

### Jesús dxusędenę' ca dxal-la' zri'idxu benne' ca' dx-eledábague' dx'i'u (Lc. 6.27-28, 32-36)

<sup>43</sup> Na' gunná Jesús:

—Cá'anqueze ba bęnele ca da gulennę' nédxute: "Bzri'i le sa' ljwezru', ne gucuide benne' dxedábague' lue'." <sup>44</sup> Neda' dxapa' le'e, le zri'i benne' ca' dx-eledábague' le'e. Le naba gaca chawe' chee benne' dx-elennę' cheęle. Le gun da chawe' chee benne' dx-ele-nę' le'e. Le naba lau Dios gaca chawe' chee benne' dxelennę' schanni' cheęle ne dxelunę' cheęle da calęla. <sup>45</sup> Che gunle caní gácale bi cheęqueze Xrale zuę' xabáa, lawe' da dxun le' dxusaní' gubizra naga zaj zra' benne' węn da calęla ne naga zaj zra' benne' xrlátaje ca', ne dxusel-la' nisa xiuj lu xęzr la xu chee benne' chawe' ca', ne lu xęzr la xu chee benne' ca' dxelunę' da calęla. <sup>46</sup> Che nazrí'ile tuze benne' zaj nazrí'ine' le'e, žájazra na' dxezá lázrele quízruj Dios le'e? Cá'anqueze dxelún benne' wechizruj ca', zaj nazrí'ine' le sa' ljwezre'. <sup>47</sup> Che le'e dxugápale diuzre tuze le sa' ljwézrele, žbizra da xrlátaje dxunle? Cá'anqueze dxelún benne' quebe zaj núnbe'e' Dios. <sup>48</sup> Le gaca benne' xrlátaje cáteze naca Xrale zuę' xabáa, naque' xrlátaje.

### Dxulé'e Jesús ca naca da xrlátaje da dxelún bęnneache

**6** Caní gunná Jesús:

—Le guxúe xanne' cuínale chee quebe gunle da naca chee xel-la' benne' xudau' cheęle lau bęnneache chee xelęle'ne' na. Che ca'an dxunle, na' Xrale Dios zuę' xabáa quębequeze bi gunņe' le'e. <sup>2</sup> Chee le' na', gate lue' dxácalęnu' benne' dxelęxzrenę', quebe guzennu' xúgutę bęnneache ca da dxunu', ca dxelún benne' ca' dxelunę' xrlátaje cúzreze la neza, ne lu xu'u naga dxulucá'ana szren benne' judío ca' Dios. Dxelunę'

da caní chee xelenné bénneache xrlátaje chee'. Da li dxapa' le'e, ba déqueze lazruj chee'. <sup>3</sup> Gate lue' gunézruju' late' chee benne' dxelexázejene', ben na luéze chee quebe neze le sa' ljwezru'. <sup>4</sup> Ben da caní bagácheze, na' Xrau' Dios, Bénnea' dxel'é'ene' ca da dxunu' bagácheze, Le' gunne' lazruj chiu'.

**Jesús dxusédenē' ca dxal-la' gundxu xel-la' dxuláwizra Dios**  
(Lc. 11.2-4)

<sup>5</sup> Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxelunē' xrlátaje cúzreze. Dxeledánene' dxelunē' xel-la' dxuláwizra Dios zaj zēzē' lu xu'u naga dxulucá'ana szren benne' judío ca' Dios, ne la neza, chee xeledé'e bénneache da dxelunē'. Da li dxapa' le'e, ba déqueze lazruj chee'. <sup>6</sup> Gate lue' dxuláwizru' Dios, guxú'u lu xu'u chiu'. Bsezxuj dxa xu'u chiu', na' bláwizra Dios guchálajlenu' Xrau' Dios zúalēne' lue' naga zu' tuzu'. Nadxa Xrau' Dios, Bénnea' dxel'é'ene' ca da dxunu' bagácheze, Le' xuzri'e chiu'.

<sup>7</sup> Gate dxuláwizru' Dios dxuchálajlenu' Le', quebe tuz ca da nneu' zánete' lasa ca dxelún benne' ca' quebe zaj núnbe'e Dios. Dxeléquene' wen Dios chee' lawe' da dxelennéle'e. <sup>8</sup> Quebe gunle ca dxelún benne' ca', lawe' da Xrale Dios ba nézquezne' ca da dxechínnele le'e nédxula ca za ná bale na. <sup>9</sup> Chee le' na', le guláwizra Dios nnale caní:

Xrantu' Dios, zu' xabáa,  
gaca lá'azxaqueze Lau'.

<sup>10</sup> Gudá nna be'u lu xēzr la xu nigá.

Gaca lu xēzr la xu nigá ca dxaca lazru' Lue',  
cáteze dxaca xabáa.

<sup>11</sup> Benna netu' da gáguntu' na'a.

<sup>12</sup> Bnrite lau cheentu' ca naca da calēla da bentu',  
ca netu' ba bnrite launtu' chee benne' belunē' cheentu'

da calēla.

<sup>13</sup> Quebe gu'u lataj nu gun zréaje netu',  
2 san bselá netu' lu na' da xriwē'.

Naca chiu' gápaquezu' xel-la' dxenná bea,  
ne xel-la' waca,

ne da xabáa chadía chacanna. ¡Ca'an gaca na!

<sup>14</sup> Che le'e gunite laule chee benne' belunē' chee  
da calēla, na' Xrale Dios zuē' xabáa gunite lawē' chee  
le'e. <sup>15</sup> Che le'e quebe gunite laule chee benne' ca', na'  
Xrale Dios quebe gunite láuqueze' chee le'e ca naca  
dul-la da nabá gale.

**Jesús dxusédenē' ca dxal-la' gundxu gubasa**

<sup>16</sup> Na' gunná Jesús:

—Gate le'e dxunle gubasa, quebe guzúale baxache'  
laule ca dxelún benne' dxelunē' xrlátaje cúzreze.  
Benne' caní dxelunē' ca' chee xeledé'e bénneache le'  
dxelunē' gubasa. Da li dxapa' le'e, ba déqueze lazruj  
chee benne' ca'. <sup>17</sup> Lue', gate dxunu' gubasa, bza xícha-  
ju' chawe', ne gudibe lau', <sup>18</sup> chee quebe xeléquebe'e  
bénneache dxunu' gubasa. Tuze Xrau' Dios na', Bén-

nea' zúalēne' lue' naga zu' tuzu', Le' dxennátequeze',  
na' gunne' da naca na chiu'.

**Jesús dxusédenē' chee da gunní'a chee xabáa**  
(Lc. 12.33-34)

<sup>19</sup> Na' gunná Jesús:

—Quebe gutúpale da gunní'a lu xēzr la xu nigá, naga  
guteba' na, ne da ca' dxelebía xi na, na' xelú'u gubán  
ne xeledane' na. <sup>20</sup> Le'e, le gun da xrlátaje, da gaca na  
ca guzrá cháwele da gunní'a xabáa, naga quebe gute-  
ba' na, ne da ca' quebe bi xeleque na, na' québequeze  
xelú'u gubán chee xeledé'e na. <sup>21</sup> Naga nuzrale da  
gunní'a chee, na' zúa queze lázrdaule.

**Jesús dxusédenē' chee tu xi' da xú'udxu**  
(Lc. 11.34-36)

<sup>22</sup> Na' gunná Jesús:

—Xiaj laule zaj naca na ca tu xi' chee bel-la' dxen  
chee. Che xiaj laule zaj naca na chawe', dutē ca naca  
bel-la' dxen chee naxaní'. <sup>23</sup> Che xiaj laule quebe zaj  
naca na chawe', dutē ca naca bel-la' dxen chee  
nachul-la na. Cá'anqueze che xi' da xu'ule xexaca na tu  
da chul-la, chúl-lalē'dxa súa queze.

**Jesús dxusédenē' chee Dios, ne chee da gunní'a**  
(Lc. 16.13)

<sup>24</sup> Na' gunná Jesús:

—Netú benne' quebe séquene' guzúa cuine' lu na'  
chupa xranē', lawe' da wazré'e tu xranē' ne wazrí'ine'  
xetúe', u wéquene' ba lá'ana tu xranē' na' xetúe'  
guzúe' chalá'ala. Quebe séquele guzúa cuinle lu na'  
Dios, ne lu na' da gunní'a.

**Jesús dxusédenē' ca dxun Dios, dxuxúe' xúgute bi  
chee' ca'**  
(Lc. 12.22-31)

<sup>25</sup> Na' gunná Jesús:

—Chee le' na' dxapa' le'e, quebe cue'le gunne xue ga  
sa' da gágule da xí'ajle chee gaca banle, ne ga sa' zra  
lánale da gácule. Zácadxa xel-la' nabán chee ca da  
dxágule, ne zácadxa bel-la' dxen chee ca zra lánale.

<sup>26</sup> Le nna'xque bxínne du ca' dxeledaba' lu be'. Quebe  
dxelázaba'. Quebe dxeledápaba'. Quebe ga dxuluxuzrá  
cháweba' na. Xrale Dios zuē' xabáa dxunézruje' da dx-  
eláguba'. Zácadxale le'e ca bxínne du ca'. <sup>27</sup> ¿Nuzra  
benne' ládujla le'e gaca gusetunna cuine' xate' lawe'  
da dxe'e gunne xue?

<sup>28</sup> ¿Bizr chee na' dxe'le le'e gunne xue chee zra lá-  
nale? Le nna'xque ca dxelegula xiaj ca' zaj zē le'e xixre'.  
Quebe dxelún na zrin, ne quebe dxelache na du.

<sup>29</sup> Dxapa' le'e, Salomón benne' wenná bea na' quebe  
gucue' ca da xrtan chee xiaj caní, na' le' gúta'le'e chee'  
da gunní'a. <sup>30</sup> Che Dios dxudxēne' xrtánle'e xiaj caní da  
ca' zaj zua na na'a le'e xixre', na' wxre xelexe na lu xi',  
quegá gundxe' da chawe' chee le'e, benne' québete  
ca dxeajlí lazre'. <sup>31</sup> Chee le' na', quebe cué'tecale gunne  
xue, nnale: "¿Ga sa' da gágudxu? ¿Ga sa' da xí'ajdxu?  
¿Ga sa' da gácudxu?" <sup>32</sup> Chee da caní zaj dxe' gunne

xue benne' quebe zaj núnbe'e Dios, san le'e, zua tu Xrale xabáa ba nézquezne' ca naca xúgute da dxechínnele. <sup>33</sup> Zria laudxa cuele gunne xue chee nna bea Dios lu xichaj lázrdaule, ne chee gunle da xrlátaje da xezaca ba lazre' Dios, na' sile xúgute da ca' dxechínnele.

<sup>34</sup> Quebe cuele gunne xue na'a da naca na chee wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

**Jesús dxusédenē' chee benne' dxuchi'e da dxun le sa' ljwézre'**  
(Lc. 6.37-38, 41-42)

**7** Na' gunná Jesús:  
—Quebe guchi'ale da dxelún le sa' ljwézrele chee quebe guchi'a Dios caní chee le'e. <sup>2</sup> Le' guchi'e chee le'e cáteze dxunle le'e chee le sa' ljwézrele, ne cáteze dxunle le'e chee le sa' ljwézrele, ca'an gun Dios nen le'e. <sup>3</sup> ¿Bizr chee na' dxená'u bébedau' da xu'u xiaj lau le sa' ljwezru', ne quebe dxená'u da zrentē da xu'u na xiaj láuquezu' lue'? <sup>4</sup> ¿Ájazra gunu' xu'u le sa' ljwezru': "Benna lataj xebéaja' bébedau' da xu'u xiaj lau", che da zrendxa xu'u xiaj láuquezu' lue'? <sup>5</sup> Lue', benne' dxun xrlátaje cúzreze. Bebéaj nedxu da zrentē da xu'u xiaj láuquezu', na' gaca le'enu' cháwedau' xebéaju' bébedau' da xu'u xiaj lau le sa' ljwezru'.

<sup>6</sup> Quebe gunézrujle da naca lá'azxa chee benne' dxelunē' ca dxelún becu' snia, checa xelexéchajē', ne xuluzúruē' le'e. Quebe guzúale da zaca chee lau benne' dxelunē' ca dxelún cuche, dxuluchuchuj dxululéajba' da dxugágule-ba'.

**Dxuchalaj Jesús ca dxal-la' nábaxdu, ne xexílajdxu, ne nnēdxu dxu'a dxa xu'u**  
(Lc. 11.9-13; 6.31)

**7** Na' gunná Jesús:  
—Le naba, na' Dios gunnē' na chee. Le xilaj na, na' xezrélele na. Le nne dxu'a dxa xu'u, na' sáluje' chee. <sup>8</sup> Le gun caní lawe' da benne' bi dxenabe', dxezi'e na. Benne' bi dxexílajē', dxeajxraqē' na, na' benne' dxennē' dxu'a dxa xu'u, zua nu benne' sáluje' chee'.

<sup>9</sup> Netule le'e quebe gunézrujle zrí'inele tu xiaj che lebe' dxenábabe' le'e tu xeta. <sup>10</sup> Quebe gunézrujle zrí'inele tu be'la' snia che lebe' dxenábabe' le'e tu bela. <sup>11</sup> Che le'e, benne' wen da calēla, nézele gunézrujle zrí'inele da naca na chawe', da cháwedxa gunna Xrale Dios zua xabáa, gunnē' da chawe' chee benne' bi dxenábene' Le'.

<sup>12</sup> Le gun chee le sa' ljwézrele ca dxaca lázrele le'e xelún lebe' chee. Da nigá naca da nadxixruj bea na Moisés, ne da dxenná na lu xiche naga naxúaj da gu-lenná benne' ca' buluchálajē' waláz chee Dios.

**Jesús dxusédenē' chee dxa xu'u lechide'**  
(Lc. 13.24)

**13** Na' gunná Jesús:  
—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebía xi'e, na' benne' zantē zjaque' na'. <sup>14</sup> Dxa xu'u lechide', ne neza

lase zaj naca naga zjaca benne' xelezí'e xel-la' nabán da zeajlí canna, na' bábaze benne' dxellexezrelē' na.

**Naca bea tu xaga ne chee da zixre dxebía na**  
(Lc. 6.43-44)

**15** Na' gunná Jesús:

—Le guxúe cuínale chee benne' wen lazre' ca', benne' dxelennē' zaj naque' benne' dxuluchálajē' waláz chee Dios. Benne' caní zá'aque' naga zrale le'e, zaj nun cuine' ca tu benne' dxexruj lazre' ca naca tu zrila'dau', san lu xichaj lázrdawe' zaj naque' snia ca tu becu' xi'a. <sup>16</sup> Le'e xúnbeale le' ne chee da dxelunē'. Da zixre da dxebía lba uva quebe xuchíbedxu na lu xaga xeche', na' da zixre da dxebía xaga higo quebe xuchíbedxu na lu xeche' ga'. <sup>17</sup> Ca'an naca, xúgute xaga chawe' dxelébía na da zixre chawe', na' xaga da quebe naca na chawe', quebe dxebía na da zixre chawe'. <sup>18</sup> Xaga chawe' ca' quebe dxelébía na da zrin-naj, na' xaga zrinna' na' quebe dxebía na da chawe'. <sup>19</sup> Xúgute xaga zrinna' welechugue na, na' xelezxe na lu xi'. <sup>20</sup> Ca'an naca, le'e xúnbeale benne' ca' ne chee da ca' dxelunē'.

**Quegá xúgute benne' xelu'e naga dxenná bea Dios xabáa**  
(Lc. 13.25-27)

**21** Na' gunná Jesús:

—Quebe xelu'e naga dxenná bea Dios xabáa xugute benne' ca' dxelē'e neda': "Xrana', Xrana'." Welú'u tuze benne' ca' dxelunē' ca da dxaca lazre' Dios zuē' xabáa. <sup>22</sup> Ca zrin zra na', benne' zantē xelē'e neda': "Xránantu', Xránantu', netu' bchálajntu' ne chee Lau' Lue', ne bchí-mentu' Lau' bebéajntu' be' xriwē' ca', ne nen Lau' Lue' bēnle'entu' xel-la' waca ca' chee xabáa." <sup>23</sup> Nadxa neda' xápaqueza' benne' ca': "Quebe núnbe'a le'e. Le cuasa cuita' neda', le'e, ba bēnle da calēla."

**Jesús dxusédenē' chee chupa lane xu'u**  
(Lc. 6.47-49; Mr. 1.22)

**24** Na' gunná Jesús:

—Bénnea' dxennē' chia', ne dxunē' ca da dxennía', naque' ca tu benne' naxéajni'iqueze', benne' bēnē' tu lizre' lu xiaj xre. <sup>25</sup> Guca xiuj, na' bdxuaj guba'u, ne guxasa be' bdunu' chee xuluzría xi na xu'u na', san quebe guzré'e na lawe' da xu'u lane na lu xiaj xre. <sup>26</sup> Bénnea' quebe dxuzé nague' chia', ne quebe dxunē' ca da dxennía', naque' ca tu benne' xala, benne' bēnē' tu lizre' lu xu dxeze. <sup>27</sup> Guca xiuj, na' bdxuaj guba'u ne guxasa be' bdunu' chee xuluzría xi na xu'u na', na' chadite guzré'e na, ne guzría xite na.

<sup>28</sup> Ca bexuzre bchalaj Jesús, na' belexebanne benne' ca' ca naca da bsédenē', <sup>29</sup> lawe' da dxusédenē' benne' ca' ca tu benne' nape' xel-la' dxenná bea, ne quegá ca dxelún benne' ca' dxuluxúzajle'e da nadxixruj bea Dios.

**Dxexún Jesús tu benne' dxuzru lu xpele'**

(Mr. 1.40-45; Lc. 5.12-16)

8 Gate bexetaj Jesús lu xi'a na', benne' zantę zjá-calęę' Lę'. <sup>2</sup> Na' bzrin tu benne' wę' dxuzru lu xpele', ne bzu zribe' lau Jesús. Dxe'e Lę':

—Xran, che dxaca lazru', waca xexunu' neda'.

<sup>3</sup> Nadxa Jesús guxrúa ne'e bėnnea'. Dxe'e lę':

—Dxaca lazra'. Na'a dxexuna' lue'.

Ca gunnę' caní, benne' wę' na' bexácatę' ca naca xízrawę' cheę'. <sup>4</sup> Na' Jesús guzre' lę':

—Gunná' xque. Quebe nu xu'u ca'. Bexíajze na'a xea-jxelé'e cuinu' lau bxruze, ne xejnezruj guna' ca da dxenná bea lu da bdxixruj be'e Moisés, cheę xeledé'e benne' ca' ba bexacu' na'a.

**Dxexún Jesús bi węn zrin cheę tu benne' dxenná be'e****lu wedil-la**

(Lc. 7.1-10)

<sup>5</sup> Ca bexú'u Jesús lu xęzre Capernaum, na' bzrin lawe' tu benne' Roma, benne' dxenná be'ęne' benne' ca' dxjaque' wedil-la, na' guta' xuene' Lę', <sup>6</sup> dxe'e Lę':

—Xran, bi węn zrin chia' dębe' lizra'. Naxrú'ünebe' bine, ne dxezácale'ębe'.

<sup>7</sup> Jesús dxe'e lę':

—Wazá'a xexuna'-be'.

<sup>8</sup> Benne' dxenná be'e na' gunnę':

—Xran, quebe naca chia' chu'u lizra'. Cun gunnęze, na' xexaca bi węn zrin chia'. <sup>9</sup> Caní waca gunu' lawe' da zua benne' dxenná be'ęne' neda', ne cá'anqueze neda' dxenná be'eda' benne' ca' dxjaque' wedil-la. Gate dxapa' tube: "Guxíaj", na' dxéajbe'. Na' gate dxapa' bi xula: "Gudá", na' dxídabe'. Na' gate dxuchíneda' bi węn zrin chia' cheę bi da gunbe', na' dxunbe' na.

<sup>10</sup> Gate bene Jesús da nigá, bebánene', na' guzre' benne' ca' zjácalęę' Lę':

—Da li dxapa' le'e, ládujla benne' Israel quebe nu ne xezrelda', benne' dxéajle'ę chia' ca dxun benne' nigá.

<sup>11</sup> Neda' dxapa' le'e, zá'aca benne' zantę chalá'a naga dxalaj gubizra, ne xechalá'ala naga dxebía gubizra, na' xelebé'ę tu zren xelawę' nen Abraham, ne Isaac, ne Jacob naga dxenná bea Dios xabáa. <sup>12</sup> Benne' ca' gucá'a zga'ale Dios cheę xelu'ę naga dxenná bea Lę', guzalę' benne' ca' lataj chul-la naga xelebezre', ne xeláguxa'atę lazre'.

<sup>13</sup> Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácatę bi węn zrin cheę'.

**Dxexún Jesús xrna zru'ule Pedro**

(Mr. 1.29-31; Lc. 4.38-39)

<sup>14</sup> Guxíaj Jesús lizre Pedro, na' blé'ęne' xrna zru'ule' de' lu da'a, xu'ę da la. <sup>15</sup> Xejjté' ne'e, na' bedxúaj da la da xu'ę. Nadxa nu'ula na' guxase', ne guzú lawę' dxusení'ę da xelagu benne' ca'.

**Dxexún Jesús benne' zantę benne' wę'**

(Mr. 1.32-34; Lc. 4.40-41)

<sup>16</sup> Ca guzrí'a gubizra, na' belezrín benne' zantę lau Jesús, zaj naché'ę benne' zaj xu'ę be' xriwę' ca'. Nen dízra'ze da gunná Jesús, bebéaję' be' xriwę' ca', ne bex-une' xúgute benne' wę' ca'. <sup>17</sup> Da nigá guca na ca da gunná Isaías, benne' bchálaję' waláz cheę Dios, gun-nę': "Lę' bequé'ę xízrawę' ca' da nápadxu, ne gubague' ca da dxezácadxu."

**Dxelaca lazre' benne' chjácalęę' Jesús**

(Lc. 9.57-62)

<sup>18</sup> Gate na' ble'e Jesús benne' zantę zaj naxéchaję' Lę', na' guzre' benne' ca' dxusédenę' gulelaguę' xechalá'a nísadau' tu lu da dxedá lawe' nisa. <sup>19</sup> Na' bzrin lau Jesús tu benne' dxuxuzájle'ę da bdxixruj be'e Dios, na' dxe'e Lę':

—Benne' Wesede, dxaca lazra' sálęna' Lue' gáteteze chéaju'.

<sup>20</sup> Na' Jesús guzre' lę':

—Beza' zaj zua bluaj cheęba', na' bxinne zaj zria xrú'üneba', san neda', Benne' Gulje' Bėnneache, ne naga xrua xíchaja' quebe ga zua.

<sup>21</sup> Bzrin xetú benne' naque' benne' ba bsédequeze Jesús, na' guzre' Lę':

—Xran, bęnna neda' lataj xexá'a nedxu cheę cheajxecha' xra'.

<sup>22</sup> Nadxa Jesús guzre' lę':

—Gudálęn neda'. Be' lataj benne' gate ca' xulucache ljwezre'.

**Dxebeque zri Jesús be' bdunu', ne xejxruza cheę nísadau'**

(Mr. 4.35-41; Lc. 8.22-25)

<sup>23</sup> Nadxa guxú'u Jesús lu da dxedá lawe' nísadau', na' benne' ca' dxusédenę' belunę' Lę' tu zren. <sup>24</sup> Na' guzú lau dxaca tu be' bdunu' lawe' nísadau', na' xejxruza cheę nísadau' guxú'u na lu da dxedá lawe' nísadau' na', dxácatę dxase Jesús. <sup>25</sup> Nadxa benne' ca' dxusédenę' bulusebanę' Lę', na' dxelé'ę Lę':

—Xránantu'. Bselá netu'. Ba dxázentu' lu nisa.

<sup>26</sup> Jesús guzre' lę':

—¿Bizr cheę na' dxezrébelę'ęle? Nácale benne' látega dxeleajlí lázre' Dios.

Nadxa guxasa Jesús. Gudil-ię' be' bdunu', ne nísadau', na' la belebé zrite' na. <sup>27</sup> Benne' ca' belexebánene', gulenné':

—¿Núzraqueze benne' nigá? Dxuluzúa be', ne nísadau' dízra' cheę'.

**Benne' Gadara zaj xu'ę be' xriwę'**

(Mr. 5.1-20; Lc. 8.26-39)

<sup>28</sup> Gate bezrín Jesús xechalá'a nísadau' na' lu xęzr la xu cheę benne' Gadara, na' chupa benne' biu belexedxúaję' lu bluaj cheę benne' gate, na' belezrine' lau Jesús. Dxúpatę benne' ca' zaj xu'ę be' xriwę', ne zaj naque' benne' sníalę'ę, na' netú benne' quebe dx-

exázreṅe' xedé'e' la neza na'. <sup>29</sup> Na' gulezú lawe' dxele-  
bézreṅe'. Dxelenné':

—¿Bizr chee' na' za'u naga zúantu', Jesús, Zri'ine  
Dios? ¿Za'u nigá chee' gusaca zi'u netu', ne quebe ne  
zrin zra?

<sup>30</sup> Tu chi na' zra tu cue' cuche dxeláguba'. <sup>31</sup> Be' xriwe'  
ca' gulata' xue na Jesús, gulenná na:

—Che Lue' xebéaju' netu' nigá, benna lataj chea-  
jchú'untu' lu cuche ca'.

<sup>32</sup> Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na'  
belexú'u na lu cuche ca'. Nadxa xúgute' cuche ca'  
belelázruba' tu dxu'a xi'a zren, na' xeajlecházeba' lu  
nísadau' naga gulázeba' nisa, na' guláteba'.

<sup>33</sup> Benne' ca' buluxúe'-ba' belezrebe', na' besá'aca  
chégü'e', ne belexezrine' lu xezre. Buluchálaje' ca guca  
xúgute' da caní, ne ca guca chee' benne' ca',  
belexedxúaj be' xriwe' zaj xu'e'. <sup>34</sup> Nadxa xúgute' benne'  
zaj zre'e' lu xezre na' beledxúaje', ne belezrine' naga  
zua Jesús. Na' ca belelé'ene' Le', gulata' xuene' Le'  
kezé'e' lu xezr la xu chee'.

#### Dxexún Jesús tu benne' zaj zua zri ni'a ne'e

(Mr. 2.1-12; Lc. 5.17-26)

**9** Nadxa Jesús guxú'e' tu lu da dxedá lawe' nísadau',  
na' gulagu'e' xechalá'a nísadau', na' bezrine' lázre-  
queze'. <sup>2</sup> Na' bedajlegu'e' tu benne' biu lau Le', zaj zua  
zri ni'a ne'e, zaj naxrúe' benne' na' tu lu ta'a blaga'.  
Gate ble'e' Jesús ca dxeléajle'e' chee', na' gunné', dxé'e'  
benne' we':

—Ben dipa lazru', zrí'ina'dau'. Dul-la chiu' dxunite  
lawa'.

<sup>3</sup> Nadxa bal-la benne' dxuluxuzájle'e' da nadxixruj bea  
Dios gulenné' lu xichaj lázrdawe': "Benne' nigá dx-  
ucá'ana dítajé' Dios nen xrtizre'." <sup>4</sup> Lawe' da neze Jesús  
ca gulenné' lu xichaj lázrdawe', na' dxé'e' benne' ca',  
gunné':

—¿Bizr chee' na' dxennale caní lu xichaj lázrdau'e'?

<sup>5</sup> ¿Bízrala da quebe nácadxa stébe guna? ¿Nnia: "Dul-  
la chiu' ba bnite lawa'", u che nnia: "Bexasa, guzá?"

<sup>6</sup> Chee' le' na' gulé'eda' le'e' neda', Benne' Gulje' Bén-  
neache, napa' xel-la' dxenná bea lu xezr la xu nigá gu-  
nite lawa' dul-la.

Nadxa dxé'e' benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

<sup>7</sup> Bénnea' zaj zua zri ni'a ne'e bexase', na' zexíajte'  
lizre'. <sup>8</sup> Gate belelé'e' bènneache da nigá, na' belezre-  
be', ne belúe' lá'ane' Dios lawe' ba bnézruje' xel-la' wa-  
ca caní chee' bènneache.

#### Jesús dxuláwizre' Mateo

(Mr. 2.13-17; Lc. 5.27-32)

<sup>9</sup> Ca bezá Jesús na', na' blé'ene' tu benne' biu le' Ma-  
teo, dxé'e' lataj naga dxuchízruje' waláz chee' xezre Ro-  
ma, na' dxé'e' le', gunné':

<sup>6</sup> —Ben neda' tuze.

Nadxa Mateo nigá guxase' zéajlene' Jesús.

<sup>10</sup> Gate na' dxé' Jesús dxawe' xeta lizre Mateo nigá,  
benne' zanté wechizruj, ne benne' dul-la belezrine', ne  
gulebé'queze' dxelawe' cuita Jesús, ne benne' ca'  
dxusédené'. <sup>11</sup> Benne' xudau' fariseo ca', gate  
belelé'ene' da nigá, dxelé'e' benne' ca' dxuséde Jesús,  
gulenné':

—¿Bizr chee' na' Benne' dxusédené' le'e dxágulene'  
benne' wechizruj ca', ne benne' wen da zrinnaj ca'?

<sup>12</sup> Jesús benne' da nigá, na' dxé'e' benne' ca', gunné':

—Quebe dxelechine benne' chawe' nu benne' dxex-  
une' bènneache. Benne' we' dxelechínene' le'. <sup>13</sup> Le ch-  
jaca, le cheajse'de ca da dxenná da naxúaj na lu xiche  
chee' Dios, dxenné': "Neda' dxaca lazra' xexache lázrele  
le sa' l'jwézrele, quegá gútele be xíxre'du ca' lu cugu  
chia'." Bla' neda', quegá chee' guláwizra' benne' xrláta-  
je. Dxuláwizra' benne' dul-la chee' xelexeb'i lazre'.

#### Jesús dxusédené' ca naca chee' gubasa

(Mr. 2.18-22; Lc. 5.33-39)

<sup>14</sup> Nadxa belezrín lau Jesús benne' ca' dxeledálene'  
Juan, bènnea' dxuchúe' bènneache nisa, na' gu-  
lenábene' Le':

—¿Bizr chee' na' quebe dxelún gubasa benne' dxusé-  
denu' Lue', ca dxuntu' netu', ne ca dxelún benne' xu-  
dau' fariseo ca'? Tu dxúnzquezentu' gubasa.

<sup>15</sup> Na' Jesús dxé'e' benne' ca', gunné':

—¿Ájala chee' na' xelezúa ba xácheze benne' zaj zue'  
laní chee' wechaga na' dxácate' zua benne' wechaga na'  
nen le'? Wazrín zra gate dua benne' wechaga na'.  
Nadxa xelúnqueze' gubasa.

<sup>16</sup> Quegá nu dxudá tu ladxe' cube le'e' tu zra lánadxu  
gula, lawe' da gate cheajxedxé' da cube na', ne xrube  
xu na da gula na', na' dxézadxa da gula na'. <sup>17</sup> Cá'an-  
queze quebe nu benne' que'e' xrise uva wal-la cube lu  
bzude xide gula lawe' da che ca'an guné', gate cue'  
chi'i xrise uva wal-la, na' dxeza bzude xide na', na' xele-  
bía xi' xrise uva wal-la na', ne bzude xide na'. Chee' le'  
na' dxal-la' ca'adxu xrise uva wal-la cube lu bzude xide  
cube. Che ca'an gundxu, xelegá'ana chawe' dxúpaté  
na.

Bchalaj Jesús da caní ca naca chee' benne' ca' dxelezí'  
lu ne'e' xrtizre'.

#### Dxexún Jesús bi nu'ula chee' jairo, ne nu'ula', xeajté'e zra lana Jesús

(Mr. 5.21-43; Lc. 8.40-56)

<sup>18</sup> Dxácate' na' dxuchalaj Jesús da nigá, na' bzrin tu  
benne' xíchaje' chee' benne' judío ca', na' bzu zribe' lau  
Jesús, dxenné':

—Bi nu'ula chia' za gútetebe'. Che Lue' xidu' ne guzé  
na'u lebe', wexaca banbe'.

<sup>19</sup> Na' guxasa Jesús, guxíajlene' le' nen benne' ca'  
dxusédené'. <sup>20</sup> Nadxa bzrin tu nu'ula we' cúzru'la Jesús,  
ba naca chazrinnu iza dxé'ene' tu we' dxaque dxen, na'  
xeajté'e' zra lana Jesús. <sup>21</sup> Dxenné' lu xichaj lázrdawe':  
"Che cheajtaza' zra lane', na' xexaca'."

<sup>22</sup> Jesús guxé'chaje', guné'e' nu'ula', na' dxé'e' le':

—Ben dipa lazru', zrí'ina'dau'. Bache bexacu' lawe' da dxéajlę'u chia'.

La bexácate nu'ula na'.

<sup>23</sup> Gate na' bzin Jesús lizre benne' xíchaję cheę benne' judío ca', na' blé'ene' zaj zra' benne' wil-la xulu-cachę' bi nu'ula na', ne benne' zaj zręę dxelunę' zralaj.

<sup>24</sup> Gunná Jesús, dxęę benne' ca':

—Le xedxúaj nigá. Quegá nate bi nú'uladau' nigá. Dxázezebe'.

Na' buluzrizrę' cheę'. <sup>25</sup> Gudé bebéaję' benne' ca', na' guxú'u Jesús, ne bęxruę' na' bi nu'ula na', na' guxás-abe'. <sup>26</sup> Du ca naca xęzre ca' bzriluj dizra' cheę da ben Jesús.

### Dxexún Jesús chupa benne' la chul-la

<sup>27</sup> Ca bedxúaj Jesús na', na' chupa benne' xjaquę' cuzru Lę', dxelennę' zizraj:

—Bexache lazre' netu', Lue', Zri'ine David.

<sup>28</sup> Ca guxú'u Jesús lu xu'u naga zúaqueze', na' benne' la chul-la caní gulebiguę' lau Lę', na' Jesús guzrę' benne' ca':

—¿Dxéajlęle wazéqueda' xexuna' le'e?

Na' gulé'ę Lę':

—Awe', Xran.

<sup>29</sup> Nadxa Jesús gudangę' xiaj lau benne' ca', dxennę':

—Gaca cheęle ca dxéajlęle.

<sup>30</sup> Belexaca xiaj lawę'. Nadxa Jesús gunné xuene' benne' ca', gunné':

—Le guxúe xanne' cheę quebe nu neze da nigá.

<sup>31</sup> Gate beledxúaję', na' buluchálaję' du ca naca xęzre ca' ca da ben Jesús cheę'.

### Dxexún Jesús tu benne' quebe dxaca nnię'

<sup>32</sup> Ca bezá' Jesús nen benne' ca', na' belezrín bal-la benne' zaj nachęę tu benne' biu quebe dxaca nnię', benne' xu'ę be' xriwę'. <sup>33</sup> Cáteze bebéaj Jesús be' xriwę' nigá, na' benne' quebe dxaca nnię' bezú lawę' dx-uchálaję'. Na' benne' ca' belexebánele'ę, dxelennę':

—Cabata' ne lé'edxu gaca caní ládujla benne' Israel ca'.

<sup>34</sup> Benne' xudau' fariseo ca' gulennę':

—Benne' nigá dxebéaję' be' xriwę', dxuchínene' xel-la' waca cheę da xriwę', da na' dxenná be'e na be' xriwę' ca'.

### Dxexache lazre' Jesús bęneache ca'

<sup>35</sup> Gudé Jesús tu tu xęzre zren, ne tu tu xęzredau', dxusédene' benne' ca' lu xu'u ca' naga dxulucá'ana szrene' Dios tu tu lataj ca'. Gulu'ę Iban cheę dizra' chawe' ca nna bea Dios, ne bexunte' bęneache zaj nape' tu tu cue' xízrawę' ca da dxelezaquę'. <sup>36</sup> Gate ble'e Jesús bęneache ca', na' bexache lazrę' lę' lawe' da zaj zręę xácheze', ne dxelecuán lazrę'. Zaj naquę' ca zri-la' ca' quebe zua benne' guxúę'-ba'. <sup>37</sup> Nadxa guzrę' benne' ca' dxusédene':

—Da li, da zrente dę da lápadxu, na' bábaze benne' węn zrin zaj zręę. <sup>38</sup> Cheę lę na' le naba lau Xrana lina nigá, sel-lę' benne' węn zrin xelelape' lina cheę'.

**Dxecá'a Jesús chazrinnu benne' xelaquę' gubáz cheę'**  
(Mr. 3.13-19; Lc. 6.12-16)

**10** Nadxa Jesús bláwizrę' chazrinnu benne' ca' dxusédene', na' bnézruję' lę' xel-la' dxenná bea cheę xelexebéaję' be' xriwę' ca', ne cheę xellexunę' bęneache zaj xu'ę tu tu cue' xízrawę' ca da dxelezaquę'.

<sup>2</sup> Caní zaj lę chazrinnu benne' gubáz ca' cheę Jesús: Benne' nedxu lę' Simón, ne lé'queze' Pedro.

Xetúę' naquę' benne' biche Pedro, lę' Andrés.

Xechupe' zaj lę' Jacobo, ne Juan, benne' zaj naquę' zri'ine Zebedeo.

<sup>3</sup> Xezícala benne' ca' zaj lę' Felipe, ne Bartolomé, ne Tomás.

Xetuę' lę' Mateo, benne' wechizruj cheę xęzre.

Xetuę' lę' Jacobo, zri'ine Alfeo.

Xetuę' lę' Lebeo, benne' lé'queze' Tadeo.

<sup>4</sup> Xetúę' lę' Simón, benne' dxęę gunne xue cheę xęzr la xu Israel.

Xetúę' lę' Judas Iscariote, bęneache gudęę' Jesús lu na' benne' dxeledábaguę' Lę'.

**Dxesel-la Jesús benne' gubáz cheę' ca' cheajlezenne' bęneache xrtizręę'**  
(Mr. 6.7-13; Lc. 9.1-6)

<sup>5</sup> Nadxa gusel-la Jesús benne' chazrinnu caní. Guzrę' lę':

—Quebe cheajle naga zaj zra' benne' quebe zaj naquę' judío, ne quebe chu'ule xęzre ca' zaj nababa Samaria. <sup>6</sup> Le hjaca naga zaj zra' benne' Israel zaj naquę' ca zri-la' zaj naníteba'. <sup>7</sup> Le hjaca cu'ule Iban, xęle bęneache ba bzin gáguze zra nna bea Dios lu xęzr la xu nigá. <sup>8</sup> Le xexún benne' zaj xu'ę wę' guzru', ne benne' bila xízrawę' dxelé'ene'. Le gusebán benne' gate. Le xebéaj be' xriwę' da zaj xu'u bęneache. Cá'aze guzile xel-la' dxenná bea nigá, na' cá'aze le gu-chine na, quebe bi sile.

<sup>9</sup> Quebe gúale dumí oro, ne dumí plata, ne dumí lase.

<sup>10</sup> Quebe gúale xixruj xeta da gágule la neza.

Quebe gúale xetú cue' zra lánale, ne zrelale, ne xaga da gúxrule. Benne' węn zrin wazrúequeze' da gawę'.

<sup>11</sup> Gate na' zrinle le'e tu xęzre zren u tu xęzredau', le quilaj na' tu benne' du lazre', na' le xegá'ana lizrę' ca zrindxa zra xeza'ale na'.

<sup>12</sup> Gate na' chu'ule lu xu'u na', le xę bęneache naca lizrę' na': "Xela dxebeza zri lazre' sualę na le'e."

<sup>13</sup> Che benne' ca' zaj naca cheę xelezřę xel-la' ba lá'ana caní, le gucá'ana cá'aze na. Che quebe zaj naca cheę xelezřę da nigá, na' quebe gata' cheę'.

<sup>14</sup> Che quebe lataj dxelunę' le'e, ne quebe dxelennę' cheęle, le xedxúaj lu xu'u na' u lu xęzre na', na' le xebibe bxrteđu na' zria ní'ale.

<sup>15</sup> Da li dxapa' le'e, ca zrin zra guchi'a Dios, Dios gundxę' da ba xa' cheę benne' xęzre na' quez ca da gunę' cheę benne' Sodoma, ne benne' Gomorra, xęzre ca' guzřia xi'ę.



## Xelebé nawę' bi ca' cheę Jesús

<sup>16</sup> Na' gunná Jesús:

—Le na' xque nigá. Neda' dxesel-la' le'e, gácale ca zri-la' zaj zraba' ládujla becu' xi'a ca'. Cheę lę na', le gaca sina ca zaj naca bęla', san le gaca dxexruj lazre' ca zaj naca bgúgudu ca'. <sup>17</sup> Le guxúe cuínale. Zaj zra' benne' xuludéę' le'e lu na' benne' xu'u lawe', ne xuluzálaję' le'e lu xu'u naga dxulucá'ana szrenę' Dios. <sup>18</sup> Cá'anqueze welechęę' le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zaj naque' judío. <sup>19</sup> Gate na' xuludéę' le'e lu na' benne' dxuchi'a da dxaca, quebe gunne xue cue'le ca da nnale u ájala guchálajle, lawe' da gate zrin zra guchálajle, Dios gunnę' ca da guchálajle. <sup>20</sup> Quegá le'eze guchálajle, lawe' da Be' Lá'azxa cheę Dios guchálaję' lu dxú'ale.

<sup>21</sup> 'Xuludé bęnneache benne' bíchequeze' lu na' benne' xelútię' lę'. Cá'anqueze xra xrna xuludéę' zrí'in-ę', na' zrí'ingę' ca' xeledábagabe' xra xrnáquezebe' cheę xelátię'. <sup>22</sup> Xúgute bęnneache xelezręę' le'e lawe' da nácale chia' neda', san bęnnea' guxru chache' dizra' cheę Dios ca zrin zra cheajsę cheę', la bęnnea'. <sup>23</sup> Gate xelebé nawę' le'e tu xęzre, le xuzrunnuj xetú xęzre. Da li neda', Benne' Gulję' Bęnneache, dxapa' le'e, xida' nédxula ca quebe ne tache tale xúgute xęzre cheę benne' Israel.

<sup>24</sup> 'Netú benne' quebe naque' szrendxa ca benne' dxusédene' lę'. Cá'anqueze netú benne' węn zrin quebe naque' szrendxa ca xranę'. <sup>25</sup> Tu benne' dxusęde dxal-la' gun zi' lazre' gaque' ca naca benne' dxusédene' lę', na' benne' węn zrin dxal-la' gun zi' lazre' gaque' ca naca xranę'. Che benne' naque' xrane xu'u dxelęę' lę' Beelzebú, da xriwę', chezradxa xelennę' cheę bi cheę' ca'.

## ¿Núzraqueze dxal-la' zrébedxu?

(Lc. 12.2-9)

<sup>26</sup> Na' gunná Jesús:

—Cheę lę na', quebe zrébele bęnneache. Xúgute da bagácheze gaca béaqueze na, na' xúgute da dxelaca ga nagache gulę'e láuqueze na. <sup>27</sup> Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nņę zizraj cheę xelén xúgute benne'. <sup>28</sup> Quebe zrébele benne' xelútię' bęl-la' dxen cheęle. Quebe xelezéquenę' xelútię' bęnne'du xu'ule. Le zrebe Dios. Lę' dxezéquenę' guzrí'a xi'ę bęl-la' dxen cheęle, ne bęnne'du xu'ule lu lataj ba xa'.

<sup>29</sup> 'Dxelútię' chupa bxínnedu ca' nen tu dumídau'. Netuba' quebe gáteba' cheę quebe ne güe lataj Xrale.

<sup>30</sup> Cá'anqueze xicha xíchajle, xúgute na zaj nababa na.

<sup>31</sup> Cheę lę na', quebe zrébele. Zácadxale le'e quézcala bę zan bxínnedu ca'.

## Dxal-la' xechębedxu nácadxu cheę Jesucristo

(Lc. 12.8-9)

<sup>32</sup> Na' gunná Jesús:

—Xúgute benne' ca' dxelexechebę' zaj naque' chia' neda' lau bęnneache, cá'anqueze neda' wechębe-queza' zaj naque' chia' neda' lau Xra' zue' xabáa.

<sup>33</sup> Benne' ca' quebe dxelexechebę' zaj naque' chia' lau bęnneache, néda'queza' québequeze xechęba' zaj naque' chia' lau Xra' zue' xabáa.

## Da naca Jesús naca na tu da dxun na chupa la'a bęnneache

(Lc. 12.51-53; 14.26-27)

<sup>34</sup> Na' gunná Jesús:

—Quebe guęquele bla'a neda' cheę guzúa' xel-la' dxebeza zri lazre' ládujla bęnneache. Bla'a neda', quegá cheę guzúa' xel-la' dxebeza zri lazre', san cheę guzúa' wedil-la. <sup>35</sup> Bla'a neda' cheę guna' tábaga' tu benne' xre', ne cheę guna' tábaga' tu bi nu'ula xrnabe', ne cheę guna' tábaga' tu zru'a lizre' tau zrí'ingę'. <sup>36</sup> Ca'an gaca, tu tu benne' tíl-lalę xrtía ljwezre' lę'.

<sup>37</sup> 'Che tu benne' nazrí'idxenę' xra xrne'ę quezca neda', quebe naca cheę' gaque' chia', na' che nazrí'idxenę' bi cheę' ca' quezca neda', quebe naca cheę' gaque' chia'. <sup>38</sup> Che tu benne' quebe gun cuinę' ca tu benne' zéajte'ę lę'ę xaga béguaj, ne gunę' neda' tuze, quebe naca cheę' gaque' chia'. <sup>39</sup> Benne' dxaca lazre' gapa chi'ę xel-la' nabán cheę' gunitię' na. Bęnnea' zúatequeze gudęę' xel-la' nabán cheę' nę chia' neda', guselę' xel-la' nabán cheę'.

## Da gunna Dios dxi'u

(Mr. 9.41)

<sup>40</sup> Na' gunná Jesús:

—Che tu benne' gape' le'e ba lá'ana, néda'queze gape' ba lá'ana, na' bęnnea' dxape' neda' ba lá'ana, dxápaqueze' ba lá'ana Dios, Bęnnea' gusel-lę' neda'.

<sup>41</sup> Che tu benne' gape' ba lá'ana tu benne' dxuchalaję' waláz cheę Dios lawe' da ze'ę waláz cheę Dios, benne' nigá wazí'queze' tuze ca da si' bęnnea' dxuchálaję' waláz cheę Dios. Na' che tu benne' gape' ba lá'ana tu benne' xrlátaję lawe' da naque' benne' xrlátaję, benne' nigá wazí'queze' tuze ca da si' benne' xrlátaję na'.

<sup>42</sup> Núteteze benne' gunézruję' tu zriga' nisa zaga da xi'aj tu bidu caní lawe' da naque' chia' neda', da líqueze wazi'ę da gunezruj Dios lę'.

## Dxeleznín benne' ca' gusel-la Juan lau Jesús

(Lc. 7.18-35)

**11** Gate bexuzre Jesús bchálajlęę' bęnneache, na' bchálajlęę' chazrinnu benne' ca' dxusédene'. Bezęę' na' cheę cheajsédene', ne cheajchálaję' lban xúgute xęzre ca' lu xęzr la xu na'.

<sup>2</sup> Juan, bęnnea' bchuę' bęnneache nisa, xu'ę lizre xia, na' benne' ca naca da dxun Cristo. Nadxa gusel-lę' chupa benne' ca' dxeledálęę' lę' lau Jesús. <sup>3</sup> Benne' chupe' caní buluchębę' Jesús:

—¿Nacu' Lue' Cristo, Bénnea' dxal-la' xidē', u che dxal-la' cuézantu' xelá' xetú benne'?

<sup>4</sup> Na' bechebe Jesús:

—Le chjaca cheajzrele Juan da caní dxelé'ele, ne da dxenle. <sup>5</sup> Le xē'ē ca dxaca, dxelexelē'e benne' gulaque' la chul-la. Dxelexedá benne' gulezúa zri ni'a ne'ē. Belexexaca benne' gulezaque' we' guzru', ne belexexaca ban benne' ca' gulatiē'. Benne' xache' ca' dxelenne' dizra' chawe' cheē Dios. <sup>6</sup> Ba neza zrentē naca na chee bénnea' quebe xucuán lazre' sálēne' neda'.

<sup>7</sup> Ca besí'aca benne' chupa ca', na' guzú lau Jesús dxuchálajlē' benne' zaj zre'ē na' ca naca chee Juan. Dxenné':

—¿Bizra xejjna'le le'e le'ē xixre' na'? ¿Xejjna'le tu xia da dxuxrize be'? <sup>8</sup> Che cabí, ¿bizra xejjna'le na'? ¿Xejjna'le tu benne' nacue' zra lanē' da zaca? Nézquezle benne' ca' zaj nácue' ladxē' zaca, lizre benne' dxelenná be'ē zaj zra' benne' caní. <sup>9</sup> ¿Bízraqueze xejjna'le? ¿Xejjna'le tu benne' dxuchálajē' waláz chee Dios? Awe'. Ca'an guca. Bénnea' ble'ele na' ná-cadxē' blau ca tu benne' dxuchálajē' waláz chee Dios. <sup>10</sup> Lu xiche chee Dios naxúaj na ca naca chee Juan na'. Dxenná na: Neda' dxesel-la' benne' gubáz chia' nédxula ca Lue', chee gucuezē' neza naga teu'. <sup>11</sup> Da li dxapa' le'e, ládujla xúgutē bēneache quebe nu chilá' benne' nácadxē' blau ca naca Juan, bénnea' bchue' bēneache nisa. Naga dxenná bea Dios, bénnea' nácadxē' benne' dxexruj lazre' nácadxē' blau ca naca Juan na'.

<sup>12</sup> Ca lu zra bla' Juan, bénnea' bchue' bēneache nisa, bzrintē na'a zra, zaj zra' benne' dxelunē' zi' lazre' xelu'ē naga dxenná bea Dios xabáa, na' benne' dxelunē' zi' lazre' dxelezrué'ene' na. <sup>13</sup> Ca da bzuj Moisés lu xiche chee da nadxiruj bea na, ne ca gulenná xúgutē benne' buluchálajē' waláz chee Dios, dxuchalaj na ca naca chee xel-la' dxenná bea chee Dios, bzrintē ca bla' Juan na'. <sup>14</sup> Che le'e dxaca lázrele chéajlē' da nigá, Juan na' naque' Elías, bénnea' bchálajē' waláz chee Dios gate nate, na' dxal-la' xelē'ē chee guchálajē' waláz chee Dios. <sup>15</sup> Che zua nágale, le xen da nigá.

<sup>16</sup> ¿Ájazra zaj naca benne' zaj zre'ē na'a zra? Zaj naque' ca bidu ca' dxelebé'ebe' dxelítajbe' lawe' xi'a, ne dxelennebe' zizraj, dxelē' ljuwézrebe' ca': <sup>17</sup> "Bcuézrentu' bchiuj san quebe bxá'ale le'e. Bil-la xáchent'u' san quebe gudxézrele." <sup>18</sup> Caní zaj naque' lawe' da bla' Juan, quebe dxawē', ne quebe dxí'ajē' da zaca, na' le'e dxennale xu'ē be' xriwē'. <sup>19</sup> Nadxa bla' neda', Benne' Guljē' Bēneache, dxawa', ne dxí'aja', na' dxennale naca' neda' benne' wagu xrata, ne benne' dxi'aj, ne ljuwzre benne' dul-la, ne benne' wechizruj chee Roma. Naca bea nu benne' napē' xel-la' sina chee Dios ne chee da dxun bénnea'.

**Ca gaca chee bēneache quebe dxuluzúē' xrtizra' Dios**  
(Lc. 10.13-15)

<sup>20</sup> Nadxa guzú lau Jesús dxedil-lē' bēneache chee xezre ca' naga bēne' xel-la' waca ca' chee xabáa, lawe' da quebe belexebí'i lazre' benne' zaj zre'ē na'. Na' gunné':

<sup>21</sup> —Baxache' nácale le'e zrale xezre Corazín. Baxache' nácale le'e zrale xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee xabáa ca da gulaca ládujla le'e, da zrentē ba zeaj gulácuē' zra lanē' tuzruj, ne gulegú'ē de xíchajē' da zaj naca bea na belexebí'i lazre'. <sup>22</sup> Neda' dxapa' le'e, lu zra guchi'a Dios, gundxē' da ba xa' chee quez ca da ba xa' gunē' chee benne' Tiro, ne benne' Sidón. <sup>23</sup> Le'e zrale xezre Capernaum, ¿dxéquele Dios wechise' le'e xabáa? Dios gudē' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee xabáa ca da gulaca ládujla le'e, nagá'atequeze xezre na' lu zra na'a zra. <sup>24</sup> Neda' dxapa' le'e, lu zra guchi'a Dios, gundxē' da ba xa' chee quez ca gunē' da ba xa' chee benne' Sodoma ca'.

**Dxenná Jesús: "Le da naga zua' xezí' lázrele"**  
(Lc. 10.21-22)

<sup>25</sup> Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue lá'ana' Lue' lawe' da bcácheu' da caní lau benne' sina ca', ne lau benne' dx-eléajni'ine', san blé'enu' na bidu caní. <sup>26</sup> Ca'an naca, Xrae, lawe' da naca na ca dxaca lazru' Lue'.

<sup>27</sup> Xra' ba bdeē' lu na'a xúgutē da caní. Quegá nu benne' núnbe'ē neda', Zri'ine Dios, san Xra' Dios núnbe'ē neda'. Quegá nu benne' núnbe'ē Xra', san neda', Zri'ine Dios, núnbe'a Lē', ne zaj núnbea benne' ca' Lē', benne' ca' dxaca lazra' gulé'eda' le' ca naca Xra'. <sup>28</sup> Le da naga zua', xúgutēle le'e dxeajxréquele lu zrin dxunle chee xudau', ne ca naca xua da núale, na' neda' guna' xezí' lázrele. <sup>29</sup> Le gunna lataj xrua' le'e ca nu benne' xruē' bēzre xugu' cheēba', ne le gusede chia' lawe' da naca' dxexruj lazre', ne dxe'ene lazre', na' wazrué'ele xezí' lázrele lu bēne'du xu'ule. <sup>30</sup> Da na' naca na ca xugu' chee bēzre da xrua' le'e québetē ca naca na stēbe chee gúale na, na' xua da xrua' le'e naca na zraze.

**Bi ca' dxusede Jesús dxelequē'ē dau zrua' xtila gate naca zra dxulupá'ana judío**  
(Mr. 2.23-28; Lc. 6.1-5)

**12** Ca lu zra na' xu'u Jesús neza zéajē' ládujla naga dē xel-la' zrua' xtila, ne naca zra dxulupá'ana benne' judío. Dxeledún benne' ca' dxusede Jesús, na' gulezú lawē' dxelálajē' dau naga zria zrua' xtila, ne dx-elawē' na. <sup>2</sup> Gate beledé'ē benne' xudau' fariseo ca' da caní, na' gulé'ē Jesús:

—Guná' xque ca dxelún benne' ca' dxusedenu', dx-elunē' zrin da quebe naca chee' xelunē' lu zra dx-upá'anadxu.

<sup>3</sup> Jesús guzre' benne' ca':

—¿Quebe ne gulábale le'e ca bēn David gate na' le', ne benne' ljuwzre' ca' guledunē'? <sup>4</sup> Guxú'ē lu xu'u chee Dios, ne gulawē' xeta xtila lá'azxa, da quebe zaj naca chee' xelawē', le', ne benne' ljuwzre' ca', san tuze bxruze ca' zaj naca chee' xelawē' na. <sup>5</sup> ¿Quebe ne

gulábale da naxúaj na lu da bdxixruj be'e Moisés ca dxelún bxruze ca' lu xudau', dxelunē' zrin chee xudau' lu zra dxupá'anadxu, ne quebe zaj nabague' zria? <sup>6</sup> Neda' dxapa' le'e, de tu da naca blaudxa ca xudau' nigá. <sup>7</sup> ¿Quebe ne chéajni'ile ca zéaje da naxúaj na lu xiche chee Dios? Dxenná na: Neda' dxaca lazra' xexache lázrele le sa' ljwézrele, ne quegá gútele be xixre'du ca' lu cugu chia'. La ba guxéajni'ile da nigá, quebe ne guzría xile bēneache quebe zaj nabague' dul-la. <sup>8</sup> Chee le na', neda', Benne' Gulje' Bēneache, napa' xel-la' dxenná bea dxuna' zrin chia' lu zra dxupá'anadxu.

**Dxexún Jesús tu benne' zua zri ne'e**  
(Mr. 3.1-6; Lc. 6.6-11)

<sup>9</sup> Nadxa Jesús bezé'e na', na' guxú'e tu lu xu'u naga dxelúe lá'anē' Dios. <sup>10</sup> Zua tu benne' zua zri ne'e ga na'. Benne' judío ca' gulaca lazre' xelezrelne' ájala xelunē' chee gaca xelagu zriē' chee Jesús. Chee le na' gulenábenē' Le':

—¿Dxunna Dios lataj xexundxu benne' we' lu zra dxupá'anadxu?

<sup>11</sup> Jesús guzre' benne' ca':

—Núteteze benne' zue' ládujla le'e, che zua tu zri'la chee', ne che bixreba' tu xēdxu situj lu zra dxupá'anadxu, ¿quebe chéaje' cheajxeléaje'-ba' xca'?

<sup>12</sup> Da zrendxa zaca tu benne' quez ca tu zri'la'. Ca'an naca dxunna Dios lataj gundxu tu da xrlátaje lu zra dxupá'anadxu.

<sup>13</sup> Nadxa Jesús guzre' benne' we' na':

—Bli na'u.

Ca blí ne'e, na' bexaca na ca ne'e xetú. <sup>14</sup> Nadxa beledxúaj benne' xudau' fariseo ca', ne gulezú lawē' dxelí'laje' ájala xelunē' xelútie' Jesús.

**Da gunná tu benne' bchálaje' waláz chee Dios ca dxal-la' gaca chee Jesús**

<sup>15</sup> Gate gúquebe'e Jesús da nigá, na' bezé'e na', na' benne' zantē zjácá'le' Le'. Bexún Jesús xúgute benne' we' zaj zre'e ládujla benne' ca'. <sup>16</sup> Jesús gunné xúene' benne' ca' quebe nu xululé'ene' nu naca Le'. <sup>17</sup> Caní guca ca da gunná Isaías, benne' bchálaje' waláz chee Dios, gunné':

<sup>18</sup> Benne' nigá naque' wen zrin chia', benne' ba gucá'a.

Benne' nigá nazrí'ida', ne dxezaca ba lázre'ena' Le'.

Guzúaqueza' xichaj lázrdawe' Be' Lá'azxa chia'.

Guzenne' bēneache xúgute xēzr la xu ca dxuchi'a da dxaca.

<sup>19</sup> Quebe tíl-lalēqueze' bēneache, ne quebe cuézrexe'e.

Netú benne' quebe xenne' chi'e la neza.

<sup>20</sup> Quebe quichje' tu xia da ba nachaj, ne quebe xusul-le' xi' da ba dxaca wexul-la na, ca zrindxa zra xuzú'e' xel-la' dxenná bea chawe' chee'.

<sup>21</sup> Bēneache xúgute xēzr la xu xuluxrén lázrequeze' Le'.

**Dxelenné' napa Jesús xel-la' dxenná bea chee da xriwe'**  
(Mr. 3.19-30; Lc. 11.14-23; 12.10)

<sup>22</sup> Nadxa guleché'e lau Jesús tu benne' la chul-la, benne' quebe dxaca nniē', lawe' da xu'e be' xriwe'. Jesús bexunē' benne' nigá, na' belé'ene', ne benniē'.

<sup>23</sup> Xúgute benne' ca' belexebánene', gulenné':

—¿Naca benne' nigá Zri'ine David zra?

<sup>24</sup> Gate belén benne' xudau' fariseo da nigá, na' gulenné':

—Benne' nigá dxebéaje' be' xriwe', dxuchínene' xel-la' dxenná bea chee Beelzebú, xrane be' xriwe' ca'.

<sup>25</sup> Dxeque be'e Jesús ca da dxelenné', dxelé'e ljwezre', na' guzre' le':

—Lu xu'u lawe' chee gáteteze xēzre, che xelaca chupa la'a benne' xu'u lawe' ca', ne bal-le' xeledíl-lalēne' xezícadxe', na' wexul-la wenite xel-la' dxenná bea chee benne' ca'. Cá'anqueze che tu xēzre benne', u tu cue' xrtía ljwezre xelaque' chupa la'a, ne xeledíl-lalēne' le sa' ljwezre', wenítequeze xēzre na', u xrtía ljwezre ca'.

<sup>26</sup> Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ájazra gácaqueze nna bea na? <sup>27</sup> Le'e dxennale chia' dxebéaje' be' xriwe' ca', dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e tuze chee xebebeaje' be' xriwe' ca'?

<sup>28</sup> Chee le na' léqueze' dxululé'etēne' nanéguele le'e. <sup>28</sup> Che neda' dxebéaje' be' xriwe' ca' dxuchíneda' xel-la' waca chee Be' Lá'azxa chee Dios, da nigá dxunna bea na ba bla' xel-la' dxenná bea chee Dios ládujla le'e.

<sup>29</sup> ¿Ájazra gun tu benne' chu'e lize tu benne' wal-la chee que'e da de chee' che nédxula quebe guchéaje' ni'a na' bēne'ne? Che gunē' caní, na' wazéquene' que'e da de chee bēne'ne'.

<sup>30</sup> 'Nu benne' quebe dxácalēne' neda', dxdábague' neda', na' benne' quebe dxexezígalēne' neda', dxexúsiē' na.

<sup>31</sup> 'Chee le na' dxapa' le'e, gunite lau Dios chee bēneache xúgute dul-la zaj nabague', ne xúgute da calēla da dxelenné', san che xelenné' schanni' chee Be' Lá'azxa, cabata' gunite lau Dios chee'. <sup>32</sup> Núteteze benne', che bi nniē' schanni' chia' neda', Benne' Gulje' Bēneache, Dios gunite lawē' chee', san che tu benne' nniē' schanni' chee Be' Lá'azxa, québequeze gunite lau Dios chee' lu xēzr la xu nigá ne cá'anqueze lu xēzr la xu da za'.

**Da dxun tu benne' dxule'e na ca naque'**  
(Lc. 6.43-45)

<sup>33</sup> Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na ne chee da zixre da dxebía na. <sup>34</sup> Le'e, be snia ca'. ¿Ájazra gunle le'e nnele da xrlátaje che le'e nácaquezele benne' wen da calēla xca'? Ca da dxdxuaj dxú'adxu naca na ca da zua na lu xichaj lázrdaudxu. <sup>35</sup> Benne' xrlátaje dxenné' da

naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'. <sup>36</sup> Neda' dxa-pa' le'e, lu zra guchi'a Dios, xúgute Bénneache xuludé' ca da gulenné', tu tu dizra' xala da gulenné'. <sup>37</sup> Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

**Bénneache wen da calela ca' dxelenábene' Jesús gune' tu xel-la' waca chee xabáa**  
(Mr. 8.12; Lc. 11.29-32)

<sup>38</sup> Nadxa bal-la benne' xudau' fariseo, ne benne' dxuluzájle'e da nadxiruj bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

<sup>39</sup> Na' guzre Jesús benne' ca':

—Bénneache wen da calela, benne' zaj naque' chupa lazre', dxelenábene' neda' guna' tu xel-la' waca da za xabáa. Quebe xeledé'eqezne' tu xel-la' waca, san tuze ca da dxunna bea na ca da guca chee Jonás, benne' bchálaje' waláz chee Dios. <sup>40</sup> Ca guca chee Jonás, guxú'e lu le'e bela zren chunna zra chunna xela, cá'anqueze gaca chia' neda', Benne' Gulje' Bénneache, waxú'queza' lu xedxu ba chunna zra chunna xela.

<sup>41</sup> Benne' gulezré'e xezre Nínive welexásaqueze' lu zra guchi'a Dios gate guchi'e chee Bénneache zaj zré'e na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dizra' chee Dios lau benne' ca', na' blaudxa ca Jonás na' naca Benne' zue' nigá.

<sup>42</sup> Cá'anqueze nu'ula na' gunná be'e chalá'a naga dxedá gubizra beu' zaga ca' wexásaqueze' lu zra guchi'a Dios gate guchi'e chee Bénneache zaj zré'e na'a, na' nu'ula na' gulé'ene' zaj nabaga zria benne' caní lawe' da bezé'e naga naca zítu'te chee xezr la xu nigá chee xenne' dizra' sina da bchalaj Salomón, na' blaudxa ca Salomón na' naca Benne' zue' nigá.

**Ca naca chee be' xriwe' da bexú'u na tu benne'**  
(Lc. 11.24-26)

<sup>43</sup> Na' gunná Jesús:

—Gate tu be' xriwe' dxedxuj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na: <sup>44</sup> "Webi'a xexá'a lizra' naga bedxúaja'." Ca xezrín na, le'e na benne' na', naque' ca tu xu'u da naxíajlbé lu'ule na, ne nalúa na, ne nagá'ana chawe na. <sup>45</sup> Nadxa cheaj na cheajxezrín na xegazre be' xriwe' da zaj naca na xríwēdx ca le na, na' xúgute na dxelú'u na lu bēnea', na' naca chee benne' na' da caléladxa ca guca chee' nedxu. Cá'anqueze gaca chee Bénneache wen da calela caní.

**Benne' zaj naque' ca xrna Jesús, ne ca benne' biche' ca'**  
(Mr. 3.31-35; Lc. 8.19-21)

<sup>46</sup> Jesús ne zue' dxuchálajle' benne' caní gate belezrín xrne'e ne benne' biche' ca' ga na'. Gulezré'e

chalé'ajla, ne dxelaca lazre' xuluchálajle' Jesús.

<sup>47</sup> Nadxa tu benne' guzre' Jesús:

—Xrna'u, ne bi bichu' ca' zaj zré'e chalé'ajla. Dxelaca lazre' xuluchálajle' Lue'.

<sup>48</sup> Jesús guzre' benne' nigá:

—¿Núnbeale nuzra na' xrna'a, ne bi bícha'dau' ca'?

<sup>49</sup> Nadxa ble'e Jesús benne' ca' dxusédené', dxenné':

—Benne' caní zaj naque' xrna'a, ne bi bícha'dau' ca'.

<sup>50</sup> Caní naca na lawe' da núteteze benne' dxuné' ca da dxaca lazre' Xra' zue' xabáa, benne' nigá naque' benne' bicha', ne benne' zana', ne xrna'a.

**Da bsede Jesús ca da ben benne' dxaza**  
(Mr. 4.1-9; Lc. 8.4-8)

**13** Lu zra na' bdxuaj Jesús xu'u, na' xejdxé'e dxu'a nísadau'. <sup>2</sup> Na' lawe' da belezraga benne' zante naga zua Jesús, guxú'e tu lu da dxedá lawe' nísadau', ne gudxé'e na'. Xúgute benne' ca' belexegá'ane' dxu'a nísadau' na'. <sup>3</sup> Nadxa bsede Jesús benne' ca' da zante da bchálaje', dxenné':

—Tu benne' dxaza guzé'e zía'e guza. <sup>4</sup> Dxácaté dxaze', bal-la bínnedu ca' xejlechaze na dxu'a neza. Na' belelá' bxínnedu ca', guláguba' bínnedu ca'. <sup>5</sup> Bal-la bínnedu ca' xejlechaze na lu xiaj naga quebe dxé'teca xu. Bínnedu caní chadí gulezría na lawe' da quebe dxé'teca xu. <sup>6</sup> Gate bla' gubizra, na' gulecuade na. Lawe' da quebe dxé'teca xu, na' gulebizre na. <sup>7</sup> Bal-la bínnedu ca' xejlechaze na naga bezríale'e lba xeche', na' lba xeche' ca' belegula na, ne blule na da du ca' naze'. <sup>8</sup> Bal-la bínnedu ca' xejlechaze na lu xu bebe, na' belúnnale'e na. Bal-la xágadu ca' belunna na tu gaxú'a tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na. <sup>9</sup> Che zua nágale, le xene.

**Dxenná Jesús bizr chee na' dxuchálaje' da dxululé'e na**  
(Mr. 4.10-12; Lc. 8.9-10)

<sup>10</sup> Nadxa benne' ca' dxusede Jesús gulebigue' naga zue' Le', ne buluchebe' Le':

—¿Bizr chee na' dxuchálajle' benne' ca' da dxululé'e na?

<sup>11</sup> Bechebe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'e lataj.

<sup>12</sup> Benne' nape' late', Dios gunézrujdxé' le', na' gá-pale'e, san benne' quebe bi nape', Dios wequ'é' ca da du nape'. <sup>13</sup> Chee le na' dxuchálajle' benne' caní da dxululé'e na, lawe' da cate' dxelenné'e quebe dx-elelé'ene'. Cate' dxelenné' quebe dxeléajni'ine'. <sup>14</sup> Ca naca da dxaca chee benne' caní dxaca na ca gunná Isaiás, bēnea' bchálaje' waláz chee Dios, gunné':

Da li wenle. Cate' dxenle quebe dxéajni'ile.  
Da li wanná'le. Cate' dxenna'le quebe dxelé'ele.

<sup>15</sup> Caní naca na lawe' da zaj naca lázrdau zide' benne' caní.

Quebe dxelaca lazre' xelenne'.

Dxulugácu'e xiaj lawe' chee quebe xeledé'ene'.

Quebe dxelenné', na' quebe dxeléajni'ine'.

Quebe dxelexíajje' neda' chee xexuna' le'.  
<sup>16</sup> Ba neza zrentę naca na chee le' lawe' da dx-  
 elé'ele nen xiaj laule, ne dxenle nen nágale. <sup>17</sup> Da li  
 dxapa' le'e, benne' zante, benne' ca' buluchálajje' waláz  
 chee Dios, ne benne' xrlátaje ca' gulaca lazre'  
 xelexé'engé' da caní dxelé'ele le'e. Quebe belelé'engé' na.  
 Gulaca lazre' xelenne' da caní dxénnele le'e. Quebe be-  
 lenne' na.

**Jesús dxuzéajni'ine' benne' ca' ca naca chee benne' dx-  
 aza**  
 (Mr. 4.13-20; Lc. 8.11-15)

<sup>18</sup> Na' gunná Jesús:  
 —Le xenne ca zéaje da naca chee benne' dxaza nigá.  
<sup>19</sup> Benne' dxelenne' ca naca chee Bénnea' dxenná be'e  
 xabáa, ne quebe dxeléajni'ine' zaj naque' ca bínnedu  
 ca' xeajlechaze na dxu'a neza. Za da xriwe' ne dxugúa  
 na ca naca dizra' da ba gulezí'e lu xichaj lázrdawe'.  
<sup>20</sup> Ca naca chee bínnedu ca' xeajlechaze na lu xiaj, da  
 caní dxululé'e na ca naca chee benne' ca' dxelezi'e  
 dizra' na' du lazre'. <sup>21</sup> Ca na' guca chee bínnedu ca',  
 quebe guca xuludé lue na, ne quebe guzí bea na, ca'an  
 dxaca chee benne' caní, gate na' bi da dxelezaque', u  
 che nu zeajnáu zi' xuzre' le' lawe' da zaj nazi'e dizra'  
 nigá, na' dxelexebigue'. <sup>22</sup> Bínnedu ca' xeajlechaze na  
 ládujla xeche' dxululé'e na ca naca chee benne' dxelen-  
 ne' dizra' nigá, san dxelebé'le'e gunne xue da naca  
 chee xęzr la xu nigá, na' ca naca xel-la' gunní'a dxezí xę  
 na benne' ca'. Xúgutę da caní dxuluzaga na dizra' nigá,  
 na' quebe dxun na da dxal-la' gun dizra' nigá lu xichaj  
 lázrdawe'. <sup>23</sup> Ca naca chee bínnedu ca' da xeajlechaze  
 na lu xu bębe, da caní dxululé'e na ca naca chee  
 benne' ca' dxelenne' dizra' nigá, ne dxeléajni'ine' na,  
 na' zaj naque' ca bínnedu ca' belúnna'e na. Bal-la  
 benne' zaj naque' ca bínnedu ca' belunna na tu gaxúa  
 tu tu na, na' xebal-le' zaj naque' ca bínnedu ca' belun-  
 na na ga xun tu tu na, na' xebal-le' zaj naque' ca  
 bínnedu ca' belunna na chi dxua tu tu na.

**Da bchalaj Jesús ca naca chee xixre' zrinnaj da dxen-  
 ná'queze na ca dxenná' xel-la' zrua' xtila**

<sup>24</sup> Nadxa bchalaj Jesús xetú da dxululé'e na, dxenné':  
 —Ca dxaca ga ni dxenná bea Dios naca na ca da gu-  
 ca gate tu benne' guze' binne cháwe'dau' lu xęzr la xu  
 chee'. <sup>25</sup> Gate dxelase xúgutę, na' bzin tu benne' dx-  
 ezré'e le', ne xeajaze' binne xixre' zrinnaj lávela zrua'  
 xtila, na' bezé'e. <sup>26</sup> Gate na' bgula xel-la' zrua' xtila, ne  
 bla' dau chee na, cá'anqueze bla' xixre' zrinnaj ca'.  
<sup>27</sup> Nadxa benne' węn zrin ca' xeajleguęzre' xrane na,  
 dxelé'e le': "Xran, guzu' binne cháwe'dau' lu xęzr la xu  
 chiu'. ¿Gazra guzá xixre' zrinnaj caní?" <sup>28</sup> Gunná xrán-  
 abe': "Tu benne' dxezré'e neda' bęne' da nigá." Nadxa  
 benne' węn zrin ca' buluchębe' le': "¿Dxaca lazru' chęa-  
 jntu' cheajlépentu' xixre' zrinnaj ca'?" <sup>29</sup> Le' guzre' węn  
 zrin ca': "Quebe gaca na. Gate na' lázrule xixre' zrinnaj  
 ca', walázrutęle xel-la' zrua' xtila. <sup>30</sup> Xelegúladxa na  
 cháwe'la tu zren ca xecá'adxadxu zrua' xtila. Nadxa  
 nna be'eda' benne' węn zrin ca' xeleguę'e nedxu xixre'

zrinnaj ca', na' xuluchéaje' xelunę' tu xrúnujdu weaj  
 chee guzęzxdxu na. Nadxa xelexape' zrua' xtila na', ne  
 xęzrá chawe' na lizra'."

**Da bchalaj Jesús ca naca chee binne mostaza**  
 (Mr. 4.30-32; Lc. 13.18-19)

<sup>31</sup> Nadxa bchalaj Jesús xetú da dxululé'e na, dxenné':  
 —Da dxaca chee benne' dxelezi' lu ne'e nna be'e Dios  
 le' naca na ca da guca gate tu benne' guze' binne  
 mostaza lu xęzr la xu chee'. <sup>32</sup> Da li binne mostaza nigá  
 naca na da bízrujdx lawe' xúgutę binne ca'. Gate ba  
 nagula na naca na tu xaga zrendxa lawe' xúgutę xixre'  
 cuan. Dxaca na ca tu xaga zren naga dxelezeque'  
 cheajlezría bxínnedu ca' xrú'neba' lu zruze na.

**Da bchalaj Jesús ca naca chee cua zichaj chee xeta xtila**  
 (Lc. 13.20-21)

<sup>33</sup> Nadxa bchalaj Jesús xetú da dxululé'e na, dxenné':  
 —Da dxaca chee benne' dxelezi' lu ne'e nna be'e Dios  
 le' naca na ca da guca gate tu nu'ula bchixre' cua zichaj  
 chee xeta xtila lawe' chunna xaga cua zrua' xtila, na'  
 dutę na guxasa na bliche.

**Ca bchine Jesús da dxululé'e na caní**  
 (Mr. 4.33-34)

<sup>34</sup> Xúgutę da caní bchálajje' Jesús benne' ca', dx-  
 uchálajje' da dxululé'e na, na' quebe bchálajje'  
 benne' ca' che quebe bchálajje' da dxululé'e na. <sup>35</sup> Caní  
 guca ca da gunná benne' bchálajje' waláz chee Dios,  
 gunné':  
 Guchálaja' ca naca da dxululé'e na da guchálaja'.  
 Gulé'eda' ca naca da nagache gate guzre'e xęzr la xu.

**Jesús dxuzéajni'ine' ca naca chee da dxululé'e na chee  
 xixre' zrinnaj da dxenná'queze na ca dxenná' xel-la'  
 zrua' xtila**

<sup>36</sup> Nadxa Jesús bze' benne' ca' dizra', na' guxú'e lu  
 xu'u. Benne' ca' dxusęde Jesús gulebigue' lau Le', na'  
 gulé'e Le':  
 —Bzėjni'i netu' da dxululé'e na ca naca chee xixre'  
 zrinnaj da dxenná'queze na ca dxenná' xel-la' zrua' xti-  
 la.

<sup>37</sup> Nadxa Jesús guzre' benne' ca':  
 —Bénnea' dxaze' binne cháwe'dau' nigá naque'  
 Benne' Gulje' Bénneache. <sup>38</sup> Naga dxaze' binne nigá  
 naca na lu xichaj lázrdau' Bénneache. Binne cháwe'du  
 ca' zaj naca benne' ca' dxenná be'e Dios, na' xixre' zrin-  
 naj ca' zaj naca na benne' ca' zaj naque' chee da xriwe'.  
<sup>39</sup> Bénnea' dxezré'e xrane xęzr la xu na', ne xeajaze'  
 xixre' zrinnaj naque' da xriwe' ná'queze. Zra xelexape'  
 naca na zra bzebe chee xęzr la xu nigá, na' benne' ca'  
 xelexape' zrua' xtila na' zaj naque' gubáz chee xabáa  
 chee Dios. <sup>40</sup> Ca belexequę'e xixre' zrinnaj ca', ne bu-  
 luzré'e na lu xi' chee xelexe na, ca'an gácaqueze lu zra  
 bzebe na'. <sup>41</sup> Neda', Benne' Gulje' Bénneache, sel-la'  
 gubáz chee xabáa chia' ca' chee xulucuase' naga nna  
 be'a xúgutę benne' ca' dxuluxrínajje' benne' xula, ne

benne' ca' dxelunē' da calēla. <sup>42</sup> Nadxa gubáz chee xabáa ca' xuluzré'e benne' ca' dxelunē' da calēla lu xi' gabila naga xelebezre', ne xeláguxa'atē lazxe'. <sup>43</sup> Nadxa benne' ca' dxelunē' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

#### Da dxulé'e na ca naca chee tu xel-la' gunní'a da nagache

<sup>44</sup> Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xęzr la xu. Tu benne' bezrélenē' xel-la' gunní'a nigá, na' bucachē' na. Ne zúalē'e xel-la' dxebé zexíaje' xeaxjétiē' xúgute da nape', na' bezí'e xęzr la xu na'.

#### Da dxulé'e na ca naca tu bga da zácalē'e na

<sup>45</sup> Na' gunná Jesús:

—Naga dxenná bea Dios naca na ca tu da dxexilaj tu benne' wete, dxexilaje' bga ca' da zaj zaca na. <sup>46</sup> Gate dxezrélenē' tu da zácalē'e, na' zexíaje' zeaxjétiē' xúgute da nape', na' si'e bga na'.

#### Da dxulé'e na ca naca tu xixruj bela

<sup>47</sup> Na' gunná Jesús:

—Ca naca chee benne' ca' xelexú'e naga dxenná bea Dios, naca na ca tu xixruj bela, da dxuluzalē' lu nísadau', na' dxelezenē' zane' cue' bela. <sup>48</sup> Gate dxezrá xixruj na', na' benne' ca' dxelezenē' bela dxelexequé'e na dxu'a nísadau', na' dxelebé'e dxelexebé'e' bela ca'. Bela chawe' ca' dxuluxuzré'e-ba' lu xcuite, na' bela xala ca' dxeledxú'one'-ba'. <sup>49</sup> Ca'an gaca lu zra bzebe na'. Xeledxúaj gubáz chee xabáa ca', xelexebéaje' benne' ca' dxelunē' da calēla ládujla benne' xrlátaje ca'. <sup>50</sup> Xuluzré'e benne' ca' dxelunē' da calēla lu xi' gabila, naga xelebezre', ne xeláguxa'atē lazxe'.

#### Da zaca ca da zaj naca na da cube, ne da zaj naca na da gula

<sup>51</sup> Nadxa bchebe Jesús benne' ca', dxenné':

—¿Dxéajni'ile le'e xúgute da caní?

Benne' ca' gulenné':

—Awe', Xran.

<sup>52</sup> Nadxa guzre' benne' ca':

—Gate tu benne' dxusédene' da nadxixruj bea Dios, ne nazédene' ca dxenná bea Dios, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawē'.

#### Jesús dxexezrine' Nazaret

(Mr. 6.1-6; Lc. 4.16-30)

<sup>53</sup> Gate bexuzre bchalaj Jesús da dxulé'e na caní, na' bezé'e na'. <sup>54</sup> Bezrine' naga naca lazrie'. Na' guzú lawē' dxusédene' benne' ca' zaj zre'e lu xudau' chee xęzre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxunē' xel-la' waca caní? <sup>55</sup> Benne' nigá naque' zri'ine

gubizre xaga, na' naca xrne'e María. Naque' bi biche Jacobo, ne José, ne Simón, ne Judas. <sup>56</sup> Bi zane' zaj zue' nigá nen dxi'u. ¿Ájazra na' dxaca dxunē' da caní?

<sup>57</sup> Chee le na' buluzúe' Jesús chalá'ala. Jesús guzre' benne' ca':

—Xúgute benne' xula dxelape' ba lá'ana tu benne' dxuchálaje' waláz chee Dios. Benne' lazrie', ne xrtia ljwezre' quebe dxelúne' ca'.

<sup>58</sup> Jesús quebe benteque' na' xel-la' waca ca' lawe' da quebe guléajle'e chee'.

#### Ca gute Juan, bēneea' bchue' bēneache nisa

(Mr. 6.14-29; Lc. 9.7-9)

**14** Lu zra na' Herodes, benne' dxenná be'e xęzre ca' zaj nababa na Galilea, benne' ca naca da dxun Jesús. <sup>2</sup> Na' guzre' bi wen zrin chee' ca':

—Benne' nigá naque' Juan, bēneea' bchue' bēneache nisa. Ba bebanē' ládujla benne' gate. Chee le na' nape' xel-la' waca zren nigá.

<sup>3</sup> Caní gunné' lawe' da gudēla Herodes nigá Juan na', ne bchéaje' le' du xia, ne gulu'e le' lizre xia. Bēne' caní ne chee Herodías, zru'ula Felipe, biche Herodes na'.

<sup>4</sup> Caní bēne' lawe' da guzre Juan le':

—Quebe naca chiu' súalēnu' nu'ula nigá.

<sup>5</sup> Herodes guca lazre' gutiē' le', san dxezrebe' da xelún bēneache ca' lawe' da dxeléquene' naca Juan benne' dxuchálaje' waláz chee Dios. <sup>6</sup> Gate bzin zra dxezría iza Herodes, na' belunē' laní chee', na' bxa'a bi nu'ula chee Herodías na', na' bezaca ba lazre' Herodes na' da dxunbe'. <sup>7</sup> Chee le na' Herodes guchēbe lazre' lau benne' ca' gunézruje' ca da naba bi nú'uladu na'.

<sup>8</sup> Lawe' da ba guzre xrnabe' lēbe', na' gunabe':

—Bēna nigá xichaj Juan, bēneea' bchue' bēneache nisa. Gulú'u na tu lu xé'ena.

<sup>9</sup> Nadxa guzúa stēbe Herodes, bēneea' dxenná be'e, san lawe' da ba guchēbe lazre', na' benne' zaj zre'e dxágulēne' le' belennē' ca', chee le na' guzre' tu benne' wen zrin chee' gunézruje' na lēbe'. <sup>10</sup> Gunná bēne' nu benne' guchugue' xichaj Juan naga xu'e lizre xia.

<sup>11</sup> Nadxa xeaxjexrē'e xíchaje' tu lu xé'ena, ne bulunézruje' na bi nú'uladu na', na' lēbe' bnézrujbe' na xrnabe'.

<sup>12</sup> Nadxa belezrín benne' ca' bsede Juan, na' belexú'e le', ne xeaxjecache' le'. Nadxa xjaque' xeaxjeguezre' Jesús.

#### Dxugagu Jesús chi xun gaxúa benne' biu

(Mr. 6.30-44; Lc. 9.10-17; Jn. 6.1-14)

<sup>13</sup> Gate ben Jesús da na', na' bezé'e na', bexu'e tu lu da dxedá lawe' nísadau', na' bzrine' tu naga quebe nu zra' benne'. Gate belén bēneache, na' gusiá'que' ni'e, na' belezrine' naga zua Jesús. <sup>14</sup> Gate bedxúaj Jesús lu da dxedá lawe' nísadau', na' blé'ene' benne' zante', ne bexache lazre' le', na' bexunē' benne' ca' quebe chawe' zaj zue'. <sup>15</sup> Gate ba za xrinne, benne' ca' dxusēde Jesús gulebigue' lau Le', dxelenné':

—Lataj nigá quebe bi de, ne ba dxedé zra. Bze benne' caní dizra' chee chjaque' xézredu ca', ne xelezí'e da xelawē'.

<sup>16</sup> Jesús guzre' le':

—Quebe dxun na ba xen chjaque'. Le gunezruj le'e da xelawe'.

<sup>17</sup> Benne' ca' gulé'e Le':

—Gázxuze xeta xtila de cheedxu nigá, ne chúpaze bela.

<sup>18</sup> Jesús guzre' benne' ca':

—Le gunna na nigá.

<sup>19</sup> Nadxa gunná bé'ene' gulebé' benne' zan ca' lawe' zrië. Guqué'e xeta xtila, ne bela ca', na' gunné'e xabaala, ne guzre' Dios: "Xcalenu." Nadxa bzúzruje' xeta xtila, ne bnézruje' na benne' ca' dxusédené', na' benne' ca' gulísië' na lávela benne' zan ca'. <sup>20</sup> Xúgute' gulawe', ne gulélajene'. Ca gudé na' bulusuzré'e chazrinnu ga' da bízrujdu ca' zaj nagá'ana. <sup>21</sup> Benne' gulawe' na zaj naque' chi xun gaxúa benne' biu, ne quebe nu blaba nu'ula, ne bidu ca'.

### Jesús dxedé' lawe' nisa

(Mr. 6.45-52; Jn. 6.16-21)

<sup>22</sup> Nadxa gunná be'e Jesús benne' ca' dxusédené' xelu'e lu da dxedá lawe' nísadau' cheë xelague' nísadau' nédxudxa ca Le' cheë xelexezrine' xéchalala nísadau' na', dxácaté Le' dxuzé benne' zan ca' dizra'. <sup>23</sup> Ca gudé bze' dizra' benne' zan ca', na' guluéne' tu lu xi'a xeajchálajlene' Dios naga zué' tuze'. Gate guxrinne zua Jesús tuze' na'. <sup>24</sup> Dxácaté na' ba zeaj da na' dxedá lawe' nísadau' gachaj láwe'te nísadau' na'. Nadxa guxasa xeajxruza cheë nísadau' na', da dxutá na da dxedá lawe' nísadau' na', lawe' da dxácale'e be', ne quebe dxue na lataj sa na. <sup>25</sup> Gate gudé dxela gubiga Jesús naga zaj zré'e, zéajé' lawe' nisa. <sup>26</sup> Gate belelé'e benne' ca' dxedá Jesús lawe' nisa, na' belezrebe', na' lu xel-la' dx-elezrebe gulebézrexe'e, gulenné':

—Da dxedá dxela na'.

<sup>27</sup> Jesús guzre' benne' ca':

—Le gun dipa lázrele. Neda' nigá. Quebe zrébele.

<sup>28</sup> Na' gunná Pedro, dxé'e Jesús:

—Xran, che Lue' na', gunná be'e xida' lawe' nisa naga zu' na'te.

<sup>29</sup> Jesús guzre' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxezé'e lawe' nisa cheë zrine' naga zua Jesús. <sup>30</sup> Gate dxeque be'ene' ca dxun be' na', na' bzrebe', ne guzú lau dxazie' lu nísadau' na'. Ca'an guca gudxezre xe'e, gunné':

—Xran, becá'a neda'.

<sup>31</sup> Nadxa becá'a Jesús ne'e, ne guzre' le':

—Látega dxeajlí lazru' neda'. ¿Bizr cheë na' ben chu-pa lazru'?

<sup>32</sup> Gate belexegüene' lu da dxedá lawe' nísadau', na' bebé' zri be' na'. <sup>33</sup> Nadxa benne' ca' zaj zré'e lu da dxedá lawe' nísadau' na' buluzú zribe' lau Jesús, dx-elé'e Le':

—Da li nacu' Zri'ine Dios.

### Jesús dxexuné' benne' we' ca', benne' zaj zré'e lu xezre Genesaret

(Mr. 6.53-56)

<sup>34</sup> Guledé'e xecha la'a nísadau', na' belezrine' lu xezr la xu cheë benne' Genesaret ca'. <sup>35</sup> Gate benne' ca' zaj zré'e xezre na' belexexúnbe'e Jesús, na' buludé'e dizra' xezícala xézredu ca', na' guleché'e xúgute' benne' we' naga zua Jesús. <sup>36</sup> Gulata' xuene' Jesús gu'e lataj xulutá benne' ca' zra lané' naze. Xúgute' benne' buluté' zra lané' belexexaque'.

### Da dxuxrinnaj na bèneache

(Mr. 7.1-23)

**15** Nadxa benne' fariseo ca', ne benne' dxuluxu-zájle'e da bdxixruj be'e Moisés, benne' ca' beledxuaje' lu xezre Jerusalén, gulebigue' lau Jesús, na' buluchebe' Le', dxelenné':

<sup>2</sup> —¿Bizr cheë na' benne' ca' dxusédenu' quebe dxuluzú'e dizra' ca naca da gulún xra xrtaudxu? Quebe dx-elíbequeze ne'e ca naca da zéajlentu' gate dxelawe'.

<sup>3</sup> Jesús bchebe' benne' ca', gunné':

—¿Bizr cheë na' le'e quebe dxuzuale dizra' da dxenná be'e Dios? Dxunle ca naca da zéajlele. <sup>4</sup> Dios gunné': "Gudapa ba lá'ana xra xrna'u." Cá'anqueze gunné': "Benne' nne' schanni' cheë xra xrne'e, le gute bènea'." <sup>5</sup> Le'e dxennale waca xe tu benne' xra xrne'e: "Quebe séqueda' bi gunna' le'e lawe' da ba guchebe lazra' gunézruja' Dios xúgute' da de chia'." <sup>6</sup> Dxennale che tu benne' dxuné' caní québedxa dxun na ba xen gácalene' xra xrne'e. Caní dxunle le'e, dxuzuale chala'ala da bdxixruj be'e Dios, cheë gunle ca naca da zéajlele. <sup>7</sup> Le'e, láweze dxunle da xrlátaje. Da li naca da gunná Isaías, bènea' bchálaje' waláz cheë Dios, ca naca cheële le'e, gunné':

<sup>8</sup> Benne' caní dxelape' neda' ba lá'ana nen dxú'aze'. Quebe dxelape' neda' ba lá'ana duté lázrdawe'.

<sup>9</sup> Dácheze naca dxelúe lá'ane' neda'.

Da gulenná be'ene' bèneache naca na da ca' dxulusedéne'.

<sup>10</sup> Nadxa Jesús gunné' benne' ca', dxenné':

—Le xene, ne le chéajni'i. <sup>11</sup> Da dxu'u na dxu'a bèneache quegá le na guxrinnaj na bèneache. Da dxedxuaj na dxu'a bèneache naca na da dxuxrinnaj na bèneache.

<sup>12</sup> Nadxa benne' ca' dxusede Jesús gulebigue' lau Le'. Dxelé'e Le':

—¿Nézenu' gulaca tula benne' xudau' fariseo ca' gate belenne' da gunnáu'?

<sup>13</sup> Jesús guzre' benne' ca':

—Bíteteze xágadau' da quebe guza Xra' zué' xabáa, welépeda'. <sup>14</sup> Le gusán benne' ca'. La chul-la zaj naque', ne dxulusi'e neza le sa' ljwezre' la chul-la ca'. Che tu la chul-la che'e le sa' ljwezre' la chul-la, dxúpate' xelebixre' tu lu xedxu.

<sup>15</sup> Nadxa Pedro guzre' Jesús:

—Bzéajni'i netu' ca naca cheë da dxulé'e nigá.

<sup>16</sup> Gunná Jesús:

—¿Cá'aqueze le'e quebe dxéajni'ile? <sup>17</sup> ¿Quebe nézele xúgute da dxu'u na dxú'adxu zeaj na le'édxu, na' te na' xedxuaj na? <sup>18</sup> Da dxedxuaj na dxú'adxu naca na da za' lu xichaj lázrdaudxu. Da nigá naca na da dxuxrinnaj na bénneache. <sup>19</sup> Lu xichaj lázrdau bénneache dxeledxuaj da dxezá lazre' da calēla, ca naca xel-la' wēte benne', ne ca naca xel-la' zualē zru'ula benne' xu-la, ne ca naca da sban da dxelún bénneache, ne ca naca xel-la' gubán, ne xel-la' wēn lazre', ne xel-la' wetu-pa dizra' bizruj. <sup>20</sup> Da caní dxuluxrinnaj na bénneache. Che tu benne' quebe dxexibe ne'e ca da zéajle gate dxawē' xeta, da nigá quebe dxuxrinnaj na le'.

### Tu nu'ula zitu' dxéajle'e chee Jesús

(Mr. 7.24-30)

<sup>21</sup> Nadxa bedxuaj Jesús na', zexíaje' chala'a naga zaj nababa xēzre Tiro, ne xēzre Sidón. <sup>22</sup> Tu nu'ula Canaán zue' na' zē'e dxebezre xē'e cúzrela Jesús, dxenné':

—Xran, Zri'ine David, bexache lazre' neda'. Xu'ube' be' xriwe' zri'ina' nu'ula, ne cáititega dxezácabe'.

<sup>23</sup> Quebe bi bechébe Jesús. Nadxa belezrín benne' ca' dxusédene', ne gulata' xuene' Le', gulé'e Le':

—Bsel-la nu'ula nigá lawe' da zē'e dxebezre xē'e cúzrudxu.

<sup>24</sup> Nadxa gunná Jesús:

—Dios gusel-le' neda' gácaleza' benne' Israel ca' zaj naque' ca zríla'du ca' zaj naníteba'.

<sup>25</sup> Gubiga nu'ula na' naga zua Jesús, ne bzu zribē' lau Le', ne dxē'e Le':

—Xran, gúcale neda'.

<sup>26</sup> Jesús guzre' le':

—Quebe naca xrlátaje cá'adxu da dxelagu zrí'inedxu, chee gunézrujdxu na bécudu ca'.

<sup>27</sup> Nadxa nu'ula na' guzre' Jesús:

—Awe', Xran, san bécudu ca' dxeláguquezeba' da bízrujdu ca' dxelexruj zran naga dxelagu xránaba'.

<sup>28</sup> Nadxa Jesús guzre' le':

—Nú'uladu, da zrentē naca xel-la' dxeajlí lazre' chiu'. Gaca ca dxaca lazru'.

Lu zra ná'queze bexaca zrí'ine' nú'uladu na'.

### Jesús dxexunē' benne' zantē benne' wē'

<sup>29</sup> Jesús guzē'e na', gudé'e dxu'a nísadau' chee Galilea. Guluéne' tu lu xi'a, ne gudxé'e na'. <sup>30</sup> Benne' zan belezrine' naga zua Jesús, zaj naché'e benne' zrin-naj ca', ne benne' la chul-la ca', ne benne' quebe dxaca xelenné', ne benne' zan zaj nadxugu ni'a na', ne zánedxa benne' wē'. Buluzré'e benne' ca' lau Jesús, na' Le' bexunē' le'. <sup>31</sup> Ca'an guca belexebane benne' ca' gate belelé'ene' dxelenné' benne' ca' quebe guca xelenné' nédxula, ne belexexaca benne' ca' gulaque' benne' ni'a na' dxugu, ne dxeledá benne' ca' gulaque' benne' zrinnaj, ne dxelelé'e benne' ca' gulaque' benne' la chul-la. Gulezú lawē' dxelúe lá'anē' Dios chee benne' Israel ca'.

### Jesús dxugawē' tapa cue' tu gaxúa benne' biu

(Mr. 8.1-10)

<sup>32</sup> Nadxa Jesús gunné' benne' ca' dxusédene'. Dxe'e le':

—Dxexache lazra' chee benne' caní lawe' da ba zeaj chunna zra zráleñe' neda' nigá, ne quebe bi de da xelawē'. Quebe dxaca lazra' xesel-la' le' chee cheajx-aque' lizre' quebe ne xelawē' chee quebe xelate ni'a ne'e la neza.

<sup>33</sup> Nadxa benne' ca' dxuséde Jesús gulé'e Le':

—¿Ájazra guntu' zréntu' da xelagu cáitē benne' zan caní? Lataj nigá quebe nu chilá' benne' zua lizre' nigá.

<sup>34</sup> Jesús bchébe' benne' ca', dxenné':

—¿Bal-la xeta xtila ná'pale?

Benne' ca' belexechēbe':

—Gazre na, ne xetú chupa béladau'.

<sup>35</sup> Nadxa Jesús gunná bé'ene' benne' zan ca' xelebé'e lu xu. <sup>36</sup> Guqué'e da gazre xeta xtila, ne béladu ca', na' guzre' Dios: "Xcalenu'." Nadxa bzúruje' na, ne bnézru-je' na benne' ca' dxusédene', na' benne' ca' gulísie' na chee benne' zan ca'. <sup>37</sup> Xúgute' gulawē', ne belélajtēne'. Gudé na' bulusuzrate' gazre ga' da bízrujdu ca' zaj nagá'ana. <sup>38</sup> Benne' gulagu zaj naque' tapa cue' chi gaxúa benne' biu, ne quebe nu blaba nu'ula, ne bidu ca'. <sup>39</sup> Gudé na' Jesús bze' benne' zan ca' dizra', na' bexu'e lu da dxedá lawe' nísadau' zexíaje' naga nababa xēzre Magdala.

### Dxelenabē' Jesús gunē' tu xel-la' waca chee xabáa

(Mr. 8.11-13; Lc. 12.54-56)

**16** Benne' xudau' fariseo ca', ne benne' xudau' saduceo ca' xjaque' naga zua Jesús chee xuluxu-néguene' Le'. Chee le' na' gulenabē' Jesús gunē' tu xel-la' waca zrentē da za xabáa. <sup>2</sup> Jesús bechébe' benne' ca':

—Xelate' zua gubizra dxennale le'e: "Gun chawe' wxre lawe' da da' beuj xrna zran xabáa." <sup>3</sup> Che zílala dxennale: "Quebe chawe' gun na'a zra lawe' da dá'le'e beuj xrna zran xabáa." Le'e dxulé'e cuínale da quebe nácale. Dxácaqueze dxennale ca naca da gun zran xabáa. Quebe dxaca xuzájla'ale ca sa'yeaj da dxaca na'a zra. <sup>4</sup> Benne' wēn da calēla caní, benne' zaj nabéaj xíchaje' Dios, dxelenabē' guna' tu xel-la' waca zrentē. Quebe xelelé'ene' xetú xel-la' waca. Welélé'ene' tuzē da gaca na ca da guca chee Jonás.

Nadxa bulucá'ana Jesús benne' ca', zjá'aque'.

### Da dxelún benne' xudau' ca' da naca na ca cua zichaj chee xeta xtila

(Mr. 8.14-21)

<sup>5</sup> Gate benne' ca' dxuséde Jesús guladé'e xechalá'a nísadau', na' gulal-la lazre' xelu'e chizre'. <sup>6</sup> Jesús guzre' le':

—Le nna'xque. Le guxúe cuínale ca naca chee cua zichaj chee xeta xtila chee benne' fariseo ca', ne chee benne' saduceo ca'.



<sup>7</sup> Benne' ca' dxusede Jesús gulezú lawe' dxelé ljwezre':

—Caní dxenné' lawe' da quebe núadxu xeta xtila.

<sup>8</sup> Jesús dxeque be'ene', na' guzre' le':

—¿Bizr chee' na' dxennale naca na lawe' da quebe núale xeta xtila? Láteze dxéajlele chia'. <sup>9</sup> ¿Quebe ne chéajni'ile, ne quebe dxeajsá lázrele chee' da gazxu' xeta xtila da bgawa' gazxu' cue' chi gaxúa benne' biu, ne bal-la ga' becá'ale? <sup>10</sup> ¿Quebe dxeajsá lázrele chee' da gazre xeta xtila da bgawa' tapa cue' chi gaxúa benne' biu ca', ne bal-la ga' becá'ale? <sup>11</sup> ¿Ájazra na' quebe dxeque be'ele quegá bchálaja' chee' xeta xtila gate gunnía' le guxúe cuínale ca naca chee' cua zichaj chee' xeta xtila chee' benne' fariseo ca', ne chee' benne' saduceo ca'?

<sup>12</sup> Nadxa guleque bé'ene' quegá guzre Jesús le' xuluxúe cuine' chee' da naca cua zichaj chee' xeta xtila, san ca naca da dxulusede benne' fariseo ca', ne benne' saduceo ca'.

### Pedro dxenné' Jesús naque' Cristo

(Mr. 8.27-30; Lc. 9.18-21)

<sup>13</sup> Gate bzin Jesús naga nababa xezre Cesarea da ben Filipino, na' bchebe' benne' ca' dxusédene':

—¿Nuzra na' dxelenná bèneache naca' neda', Benne' Gulje' Bénneache?

<sup>14</sup> Na' benne' ca' gulenné':

—Bal-la benne' dxelenné' nacu' Juan, bènea' bchué' bèneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaje' waláz chee' Dios.

<sup>15</sup> Nadxa guzre Jesús benne' ca':

—¿Gazra le'e? ¿Nuzra na' dxennale naca'?

<sup>16</sup> Gunná Simón Pedro:

—Lue' nacu' Cristo, Zri'ine Dios ban.

<sup>17</sup> Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'ene' lue' da nigá, san Xra' zua xabáa, Le' blé'ene' lue'. <sup>18</sup> Neda' dxapa' lue', nacu' Pedro, da zéaje' na tu xiaj, na' lawe' xiaj xre nigá guzúa' benne' xeleajlí lazre' neda', na' xel-la' dxenná bea chee' da xriwe' quebe seque na gucu'uj na benne' ca'. <sup>19</sup> Neda' gunna' lue' da naca na zren xia chee' xel-la' dxenná bea chee' xabáa, na' da guchéaju' lue' lu xezr la xu nigá gaca na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

<sup>20</sup> Nadxa Jesús gunná bé'ene' benne' ca' dxusédene' chee' quebe nu xelé'e naca Le' Cristo.

### Jesús dxuchálaje' ca gaca gate gatie'

(Mr. 8.31—9.1; Lc. 9.22-27)

<sup>21</sup> Lu zra ná'queze guzú lau Jesús dxuzéajni'ine' benne' ca' dxusédene' dxal-la' xexíaje' xezre Jerusalén, na' benne' gula ca', ne benne' xíchaje' ca' chee' bxruze ca', ne benne' dxuluxuzájle'e da nadxixruj bea Dios wulusaca zi'e Le'. Na' guzre' benne' ca' dxusédene' we-

lute benne' Jerusalén ca' Le'. Nadxa gate gaca chunna zra xebané'.

<sup>22</sup> Nadxa Pedro guléaje' Jesús chalá'ala, ne guzú lawe' dxedil-le' Le', dxenné':

—Dios quebe gu'e lataj, Xran. Cabata' gaca chiu' da caní.

<sup>23</sup> Jesús bexéchaje', na' guzre' Pedro:

—Gucuasa cuita' neda', lue', da xriwe', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bèneache dxulaba lazru'.

<sup>24</sup> Nadxa Jesús guzre' benne' ca' dxusédene':

—Che nu benne' dxaca lazre' gaque' neda' tuze, dxal-la' guzúe' chalá'ala da naca chee', ne guzúa cuine' chee' gatie', na' nadxa gaca xidalene' neda'. <sup>25</sup> Bénnea' dxaca lazre' gapa chi'e xel-la' nabán chee' gunitie' na. Bénnea' gunitie' xel-la' nabán chee' lawe' da dxune' zrin chia', benne' nigá zrué'ene' xel-la' nabán du lazre'.

<sup>26</sup> ¿Bízraqueze ba neza naca na chee' tu benne' che gata' chee' xúgute' xel-la' gunnía' da de lu xezr la xu nigá, na' cuía xi'e lau Dios? Quebe bi gaca quizruj tu benne' chee' la bène'ndu xu'e lau Dios. <sup>27</sup> Neda', Benne' Gulje' Bénneache wida' xecha lasa nen xel-la' szren chee' Xra', ne nen gubáz chee' xabáa ca'. Nadxa xuzría chee' tu tu benne' ca naca da zaj nun tu tu'e. <sup>28</sup> Da li dxapa' le'e, bal-la benne' zaj zre'e nigá quebe xelatie' cadxa xelélé'ene' neda', Benne' Gulje' Bénneache, xida' xedajjná be'a.

### Dios dxuché'e ca dxenná' lau Jesús

(Mr. 9.2-13; Lc. 9.28-36)

**17** Ca gudé guca xrupa zra, na' Jesús guché'e Pedro, ne Jacobo, ne Juan, bi biche Jacobo, na' bi cá'aze xjácálene' Le' tu lau xi'a sibe. <sup>2</sup> Na' Dios bche'e ca dxenná' lau Jesús lávela benne' ca'. Lawe' guca tite na ca gubizra, na' zra lane' guca na da chiche ca xel-la' naxaní'. <sup>3</sup> Na' benne' caní belelé'ene' Moisés, ne Elías, benne' gulezrá' gate nate, dxuluchálajlene' Jesús.

<sup>4</sup> Nadxa Pedro guzre' Jesús:

—Xran, cháwe'le'e zúadxu nigá. Che dxaca lazru', guntu' chunna xu'u lágadau', tu chiu', ne tu chee' Moisés, ne tu chee' Elías.

<sup>5</sup> Dxácaté dxenné' Pedro, bla' tu beuj da dxaca tite na, da gucu na benne' ca', na' lu beuj na' belenne' chi'i Dios, dxenné':

—Benne' nigá naque' Zri'ina' nazrí'ite lazra', ne chee' Le' dxezaca ba lazra'. Chee' Le' le xene.

<sup>6</sup> Gate belenne' da nigá, na' gulate' sudxú'ala lu xu. Dxelezrebele'e. <sup>7</sup> Nadxa Jesús gubigue' naga zaj zre'e, na' bte' benne' ca', ne guzre' le':

—Le chasa. Quebe zrébele.

<sup>8</sup> Gate na' belenné'e, québedxa nu belelé'ene'. Tuze Jesús zue'.

<sup>9</sup> Nadxa gate dxelexétaje' lu xi'a na', Jesús gunná bé'ene' benne' ca', dxenné':

—Quebe nu guchálajlele ca da ble'ele ca zrindxa zra neda', Benne' Gulje' Bénneache, xebana' ládujla benne' gate.

<sup>10</sup> Nadxa benne' ca' dxusede Jesús buluchebe' Le':

—¿Bizr chee na' dxelenná benne' ca' dxuluxuzájle'e da nadxiruj bea Dios dxun na ba xen xelá' Elías nédxudxa ca xelá' Cristo?

<sup>11</sup> Jesús guzre' benne' ca':

—Da li xelá' Elías nédxudxa, ne gucá'ana chawe' ca naca da dxal-la' gaca. <sup>12</sup> Neda' dxapa' le'e, ba bla' Elías, na' benne' ca' quebe belexúnbe'e le'. Bulusaque' le' cáteze da gulaca lazre'. Cá'anqueze xulusaque' neda', Benne' Gulje' Bénneache.

<sup>13</sup> Nadxa benne' ca' dxuséde Jesús guléque be'ene' dxuchalaj Jesús ca naca chee Juan, bénnea' bchué' bénneache nisa.

### Jesús dxexune' tu bi biu dxe'ebe' chuna'

(Mr. 9.14-29; Lc. 9.37-43)

<sup>14</sup> Gate belezrine' naga zaj zra' benne' zante, na' tu benne' gubigué' naga zua Jesús, ne bzu zribé' lau le', dxenné':

<sup>15</sup> —Xran, bexache lazre' zri'ina', dxe'ebe' chuna', ne da zrente da dxezácabé'. Zánete lasa ba xeajcházebe' lu xi', ne lu nisa. <sup>16</sup> Ba bedajgu'a-be' lau benne' caní dxusédenu', na' quebe guca xelexune'-be'.

<sup>17</sup> Jesús bechebe':

—Le'e, benne' wen chupa lazre', ne benne' lázrdau zide'. ¿Bátate zúalena' le'e? ¿Bátate naca' zren lazre' nen le'e? Le cheajxri' bi cuide' na' nigá.

<sup>18</sup> Nadxa Jesús gudil-le' be' xriwe' na', na' bebéaje' na lu bej-la' dxen chee bi cuide' na', na' zra ná'queze bexácatébe'.

<sup>19</sup> Gudé na' benne' ca' dxuséde Jesús gulenné' le' chala'ala, na' buluchébe' le':

—¿Bizr chee na' quebe guca netu' xebéajntu' be' xriwe' na'?

<sup>20</sup> Jesús guzre' benne' ca':

—Lawe' da naca láteze ca dxéajlele chia'. Da li dxapa' le'e, che la nápale xel-la' dxeajlí lazre', lácala naca na láteze ca naca tu binnedau' chee mostaza, waca xele xi'a nigá: "Gucuasa nigá chéaju' xetú lataj", na' xi'a na' wacuasa na. Quebe bi de da quebe gaca gunle che ná-pale xel-la' dxeajlí lazre'. <sup>21</sup> Ca naca be' xriwe' caní, dxun na ba xen guchálajlele Dios, ne gunle gubasa chee séquele xebéajle be' xriwe' caní.

### Jesús dxuchálaje' xecha lasa ca gaca gate gatié'

(Mr. 9.30-32; Lc. 9.43-45)

<sup>22</sup> Dxácaté na' dxeledé' naga nababa Galilea, Jesús guzre' benne' ca':

—Neda', Benne' Gulje' Bénneache wadéa' lu na' bénneache. <sup>23</sup> Xelútié' neda', na' gate gaca chunna zra, xebana'.

Gate belenne' dizra' nigá, na' bewi'ine lázrele'ene'.

### Da dxuluchízruje' bénneache chee xudau'

<sup>24</sup> Gate Jesús ne benne' ca' dxusédene' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchébe' le':

—¿Quebe dxizruj benne' dxusédene' le'e chee xudau'?

<sup>25</sup> Pedro bechebe':

—Awe'. Dxízruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchizruj lazruj chee xezr la xu benne' ca' dxelenná bea lu xezr la xu nigá? ¿Dxuluchízruje' benne' waláwr chee', u benne' zitu' ca'?

<sup>26</sup> Bechebe Pedro:

—Benne' zitu' dxuluchízruje'.

Jesús guzre' le':

—Na' benne' waláwr chee' quebe xelízruje'. <sup>27</sup> Na'a, chee quebe nu guchá'adxu, guxiáj lu nísadau' na', ne guchize da na' dxeláleu' bela lu nisa na', na' bebéaj bela nedxu queļu'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xeaj-tizruj na lau benne' ca'.

### Nu benne' nácadxa blau xabáa

(Mr. 9.33-37; Lc. 9.46-48)

**18** Tu lasa gulebiga benne' ca' dxuséde Jesús naga zue', na' buluchébe' le':

—¿Nuzra benne' nácadxe' blau naga dxenná bea Dios?

<sup>2</sup> Nadxa Jesús gunné' tu bidau', na' bze'-be' lau benne' ca' dxusédene'. <sup>3</sup> Dxenné':

—Da li dxapa' le'e, che quebe xexácale ca bidu nigá, québequeze chu'ule naga dxenná bea Dios xabáa.

<sup>4</sup> Ca'an naca, benne' nácadxe' blau naga dxenná bea Dios xabáa, naca benne' gague' dxexruj lazre', ne xequé' ca bidu nigá. <sup>5</sup> Benne' gape' ba lá'ana tu bidau' caní lu La' neda', néda'queza' gape' ba lá'ana.

### Ca naca da dxun na gundxu dul-la

(Mr. 9.42-48; Lc. 17.1-2)

<sup>6</sup> Na' gunná Jesús:

—Núteteze benne' guné' gun tu bidu caní dul-la, bi dxeajlí lázrebe' neda', cháwela guchéajladxu lbe'e tu xiaj zi'i da dxutu, na' cheajchú'unadxu le' situj lu nísadau'. <sup>7</sup> Edxugúa bénneache lawe' da déle'e da dxun na xelún bénneache dul-la. Tu gátazqueze da caní, na' edxugúa bénneache dxelune' xelún bénneache dul-la. <sup>8</sup> Chee le' na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'e lue' lataj ba xa', zua dxúpaté na'u, ne dxúpaté ni'u. <sup>9</sup> Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'e lue' lu xi' gabila, zua dxúpaté xiaj lau'.

### Da dxulé'e na ca naca chee zri-la naníteba'

(Lc. 15.3-7)

<sup>10</sup> Na' gunná Jesús:

—Gutu guzú' chala'ala netú bidu caní. Neda' dxapa' le'e, zaj zra' gubáz chee xabáa chee bidu caní lau Xra'

xabáa. <sup>11</sup> Neda', Benne' Gulje' Bénneache, bla'a beda-jselá' benne' zaj nanitie'.

<sup>12</sup> ¿Ájazra dxéquele le'e? Che tu benne' nape' tu gaxúa zriila', na' nite tuba', ¿quebe gucá'ane' be tá-palalaj chennu na' le'e xixre', na' cheajdilje' zriila' na' naníteba'? <sup>13</sup> Gate ba bezrelne'-ba', wabéle'edxene' chee be tu na' quézcala chee be tápalalaj chennu ca' quebe guleníteba'. <sup>14</sup> Cá'anqueze Xrale le'e, zue' xabáa, quebe dxaca lazre' nite netú bidu caní.

**Ca dxal-la' gunité laudxu chee le sa' ljwézredxu**  
(Lc. 17.3)

<sup>15</sup> Na' gunná Jesús:

—Che bi bichu' dxunbe' chiu' da calela, bchálajle tuze lebe', chee xúnbeabe' da calela da benbe'. Che xenbe' da dxu'u-be', na' ba bexacu' tuze bi bichu'. <sup>16</sup> Che quebe xenbe' da dxu'u-be', guché' tu chupa benne' chee gaca chupa u chunna benne' xelexechebe' ca naca da dxu'u-be'. <sup>17</sup> Che quebe xenbe' chee benne' ca', guzre ca naca benne' dxelezraga lu xudau'. Che quebe xenbe' chee benne' ca', le guzúa-be' ca tu benne' quebe dxéajle' chee Dios, u ca tu benne' dx-uchízruje' waláz chee benne' zitu' ca'.

<sup>18</sup> Da li dxapa' le'e, da guchéajle lu xezr la xu nigá, naca na da ba nadxéajqueze na xabáa, ne da xesézrele lu xezr la xu nigá naca na da ba nazézrequeze na xabáa.

<sup>19</sup> Cá'anqueze dxapa' le'e, che chúpale le'e gácale tuze ca da návale Dios, na' Xra' zua xabáa gunné' na. <sup>20</sup> Naga zaj zra' chúpabe', u chúnname' zaj nazrágabe' lu La' neda', na' zúaqueza' neda' laduj lebe'.

<sup>21</sup> Nadxa Pedro bchebe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunité lawa' cheebe'? ¿Gazre lasa?

<sup>22</sup> Bechebe Jesús:

—Dxapa' lue', quegá gazre lasa, san ga xun chi da gazre lasa.

**Benne' wen zrin quebe guca lazre' gunité lawe' chee le sa' ljwezre'**

<sup>23</sup> Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe' da dxelal-la benne' wen zrin chee'.

<sup>24</sup> Gate guzú lawe' dxucá'ana chawe' na, na' guleché'e lau le' tu benne' dxebague' chee' zane' cue' chi gaxúa dumí. <sup>25</sup> Lawe' da quebe de chee benne' wen zrin na' da quízruje' xrané', na' gunná be'e xrané' ta'u benne' wen zrin na', ne zru'ule', ne zrí'ine' ca', ne ca nácaqueze da nape', chee gazruj da na' dxebague'. <sup>26</sup> Nadxa bzu zribe benne' wen zrin na' lau xrané', na' guta' xuene' le', dxenné': "Xran, ben zren lazre' neda', na' quízrujqueza' ca naca na." <sup>27</sup> Na' xrané' bexache lazre' le', ne bnite lawe' da na' dxebague' chee', ne bsané' le'. <sup>28</sup> Gate benne' wen zrin na' bedxúaje', na' bezrague' xetú benne' wen zrin ljwezre', benne' dxebague' chee' látedau'. Na' gudéle' lba bénnea', ne guzú lawe'

dxusézxuje' chi'i bénnea', dxé'e le': "Gudizruj neda' da dxal-lu' chia'." <sup>29</sup> Nadxa benne' wen zrin ljwezre' na' bzu zribe' lau le', ne guta' xuene' le', dxenné': "Ben zren lazre' neda', na' quízrujqueza' ca naca na." <sup>30</sup> Bénnea' quebe guca lazre', na' guxiáje' xejlu'e wen zrin ljwezre' na' lizre xia dxácaté quízruje' da na' dxebague'. <sup>31</sup> Gate benne' wen zrin ca' xezícala guleque bé'ene' da nigá, na' belewí'ine lázrele'ene', na' xjaque' xea-jleguezre' xrané' xúgute da ba guca. <sup>32</sup> Nadxa xrané' na' gunná bé'ene' xejlenné' benne' wen zrin na', na' guzre' le': "Bi wen zrin calela. Neda' bnite lawa' chiu' ca naca da na' dxebagu' chia' lawe' da guta' xúenu' neda'. <sup>33</sup> Cá'anqueze lue' dxal-la' xexache lazru' le sa' ljwezru' na' ca bena' neda' bexache lazra' lue'." <sup>34</sup> Xrané' na' bzrá'alé'e bénnea', na' bdee' le' xel-la' zi' dxácaté na' quízruje' ca naca da na' dxal-le' chee'.

<sup>35</sup> Nadxa gunná Jesús:

—Cá'anqueze gun Xra' zua xabáa chee le'e che quebe gunité laule duté lázrdaule chee le sa' ljwézrele.

**Da bchalaj Jesús ca naca chee benne' dxulusán ljwezre'**  
(Mr. 10.1-12; Lc. 16.18)

**19** Ca gudé bchalaj Jesús da caní, na' bezé'e xezre ca' zaj nababa Galilea, na' bezrine' chalá'ala naga nababa Judea, da zua chalá'ala xegu Jordán naga dxalaj gubizra. <sup>2</sup> Benne' zan zjácálene' Le', na' bexune' benne' zanté, benne' we'.

<sup>3</sup> Nadxa bal-la benne' xudau' fariseo gulebigue' naga zua Jesús chee xebebáje' Le' dizra' chee gaca xelagu zrie' Jesús, na' buluchébe' Le':

—¿Waca nu benne' gusané' zru'ule' ne chee bíteteze da guné'?

<sup>4</sup> Bechebe Jesús:

—¿Quebe ne gulábale le'e lu xiche lá'azxa da na' dxenná na: "Bennea' bene' benne' ca' nédxudaute bene' le' benne' biu, ne nu'ula"? <sup>5</sup> Cá'anqueze gunné': "Chee le' na' benne' biu gusané' xra xrne'e chee gaque' tuze nen zru'ule', na' dxupe' xelaque' ca tuze benne'."

<sup>6</sup> Caní naca na, québedxa zaj naque' chupe', san tuze benne' zaj naque'. Chee le' na' quebe dxal-la' xelá'a bénneache da na' ba nuchaga Dios.

<sup>7</sup> Nadxa buluchébe' Jesús:

—¿Bizr chee na' gunná be'e Moisés nu benne' gunézruje' zru'ule' tu xiche da dxulé'e na belexelé'e, na' gusané' le'?

<sup>8</sup> Jesús guzre' benne' ca':

—Caní bene' lawe' da gulaca lazrdau zizraj xra xrtaulé. Moisés bene' lataj gusanle zru'ulale, san nédxudaute quebe guca na ca'. <sup>9</sup> Neda' dxapa' le'e, che tu benne' gusané' zru'ule', ne quebe dxedálene' benne' biu xula, na' che xezúalene' nu'ula xula, benne' nigá guné' dul-la súalene' nu'ula quebe naque' zru'ule', na' che nu benne' biu xequé'e tu nu'ula nusán benne' chee', cá'anqueze gun dul-la bénnea' súalene' nu'ula quebe naque' zru'ule'.

<sup>10</sup> Nadxa benne' ca' dxusede Jesús gulé'e Le':

—Che ca' dxaca chee benne' zúalene' nu'ula, quebe dxal-la' súalentu' nu'ula.

<sup>11</sup> Jesús guzre' benne' ca':

—Quegá xúgutę benne' gaca xelezí'ę dizra' nigá, san tuze benne' ca' ba nun Dios cheę' xelezí'ę na. <sup>12</sup> Zaj zra' benne' quebe dxelezúalęne' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bėneache naca caní. Na' zaj zra' benne' dxelexegá'ane' cá'aze, quebe nu dxelezúalęne' cheę gaca xelunę' zrin cheę Dios, Bėneea' dxenná be'ę xabáa. Benne' gaca si'ę dizra' nigá dxal-la' si'ę na.

### Jesús dxenabe' gaca chawe' cheę bidu ca'

(Mr. 10.13-16; Lc. 18.15-17)

<sup>13</sup> Nadxa belezrín benne' lau Jesús zaj naché'ę bal-la bidau' cheę guzė ne'ę bidu ca', ne nabe' Dios gaca chawe' cheębe', san benne' ca' dxusęde Jesús gulezú lawę' dxeledil-le' benne' ca' zaj naché'ę bidu ca'.

<sup>14</sup> Jesús guzre' le':

—Le güe bidu ca' lataj xelega'be' naga zua'. Quebe guzrúnnale-be', lawe' da benne' zaj naque' ca' bidu caní xelu'ę naga dxenná bea Dios xabáa.

<sup>15</sup> Nadxa bze Jesús ne'ę lawe' bidu ca', na' gudé na' bezé'ę lataj na'.

### Tu benne' cuide' nape' xel-la' gunní'a

(Mr. 10.17-31; Lc. 18.18-30)

<sup>16</sup> Tu benne' cuide' guxíaje' naga zua Jesús, na' bchebe' Le':

—Benne' Wesęde chawe'. ¿Bi da xrlátaje dxal-la' gu-na' cheę gapa' xel-la' nabán zeajlí canna?

<sup>17</sup> Jesús guzre' le':

—¿Bizr cheę na' dxu'u neda', benne' wesęde chawe'? Quebe nu chilá' benne' naque' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca bdxixruj be'e Dios.

<sup>18</sup> Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súalęnu' zru'ula benne' xula. Quebe cuanu'. Quebe nneu' da węn lazre' cheę benne'. <sup>19</sup> Gudapa ba lánana xra xrna'u. Bzri'i le sa' ljwezru' ca nazr'i' cuinu'.

<sup>20</sup> Benne' cuide' na' gunné':

—Xúgutę da caní dxuna' nácatea' bídaute. ¿Bízradxa quebe ne guna'?

<sup>21</sup> Na' guzre Jesús le':

—Che dxaca lazru' gacu' benne' li lazre', bexíaj, xea-jete ca naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

<sup>22</sup> Gate benne' cuide' na' benne' da nigá, bezé'ę dx-exíaje lazre' lawe' da nápałe'ę xel-la' gunní'a.

<sup>23</sup> Nadxa gunná Jesús, dxę'ę benne' ca' dxusędene':

—Da li dxapa' le'e, stębele'ę naca chu'u tu benne' gunní'a naga dxenná bea Dios xabáa. <sup>24</sup> Da xula dxapa' le'e, chadidxa gaca te tu bea', bę dxebía bėneache lu negue' tu xeche' zriche, quézcala chu'u tu benne' gunní'a naga dxenná bea Dios.

<sup>25</sup> Gate belenne' benne' ca' dxusęde Jesús da nigá, na' belexebánełe'ęne', na' buluchębe ljwezre':

—¿Nuzra la xca'?

<sup>26</sup> Jesús guné'ę benne' ca', ne guzre' le':

—Da nigá quebe gaca xelún bėneache, san Dios waca gunę' ca naca.

<sup>27</sup> Nadxa gunná Pedro:

—Xran, netu' ba bcá'anantu' ca naca da nápantu', ne zéajłentu' Lue'. ¿Bizra gápantu' xca'?

<sup>28</sup> Bechebe Jesús:

—Da li dxapa' le'e, ca lu zra na' gate na' xúgutę xelex-aca na cube, gate neda', Benne' Gulje' Bėneache, cue'a lataj chawe' chia' naga nna be'a, le'e na' ba gudáłełe neda' cué'queze lu chazrinnu lataj naga nna beale, cheę guchí'ale cheę chazrinnu cue' benne' Israel, benne' judío ca'. <sup>29</sup> Xúgutę benne' ca' ba bulacá'ane' lizre', u benne' biche', u nu'ula zane', u xre', u xrne'ę, u zru'ule', u zrí'ine', u xęzr la xu cheę, cheę xelunę' zrin chia', xelezí'queze' tu gaxúala na, ne xelezí'queze' xel-la' nabán zeajlí canna. <sup>30</sup> Benne' zante zaj naca blau na'a xelaque' benne' bzebe, na' benne' zante zaj naca benne' bzebe na'a xelaque' benne' blau.

### Da dxul'é na ca naca cheę benne' węn zrin ca'

**20** Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánete cue' xęzr la xu guzė'ę lizre' che zílala, zéaje' zeajtíłaje' benne' węn zrin ca' cheę cheajlechibe' uva cheę'. <sup>2</sup> Bca'ana cháwelenę' benne' węn zrin ca' quízruje' tu dumí lazruj cheę tu zra, na' gusel-le' benne' ca' zeajleguene' zrin lu xęzr la xu cheę'. <sup>3</sup> Ca gudé na' guzė'ę lizre' ca dxedá na, na' blé'ene' benne' zaj zre'ę lawe' xi'a zaj nalátajze'. <sup>4</sup> Na' guzre' benne' ca': "Cá'anqueze le'e, le chjaca węn zrin lu xęzr la xu chia', na' gunna' le'e da naca chawe'." Na' benne' ca' xjaque'. <sup>5</sup> Xrane na' guzė'ę da xula wa gu-bizra, ne cá'anqueze dxexedá' chunna, ne tuze ca bęne'. <sup>6</sup> Xetú du dxedá' gazxu' guxíaje' lawe' xi'a, na' blé'ene' zaj zra' na' benne' zaj nalátajzqueze', ne guzre' le': "¿Bizr cheę na' zrale le'e nigá bedú zra quebe bi zrin dxunle'?"

<sup>7</sup> Gulenné': "Quebe nu ne xę netu' guntu' zrin cheę'."

'Na' guzre' benne' ca': "Cá'anqueze le'e, le cheajén zrin lu lina chia', na' gunna' le'e da naca chawe'." <sup>8</sup> Gate gul-la' chizrela, xrane na' guzre' benne' xu'u lu ne'ę zrin na': "Gunné' benne' węn zrin ca', ne gudízruje', su lau' quízruju' benne' ca' belelá' bzébedxa, na' bzébetę quízruju' benne' ca' belelá' nédxute'." <sup>9</sup> Nadxa belezrín benne' ca' belú'ę lu zrin na' gate dxexedadxa gazxu', na' tu tu benne' ca' belezi'ę lazruj cheę' du naxá' lazruj tu zra węn zrin. <sup>10</sup> Gudé na' gate belezrín benne' ca' gulu'ę nédxute' lu zrin na', guléquene' xelezí'ę da zrendxa, san cá'anqueze gulezi' tu tu benne' ca' lazruj tu zra węn zrin weaj.

<sup>11</sup> Gate gulezi'ę na, na' gulezú lawe' dxelawe' zria lau xrane zrin na', <sup>12</sup> dxelenné': "Benne' caní belelá' bzébedxa, tu chí'idau'ze ga belunę' zrin, na' gudízru-juzeu' benne' caní ca gudízruju' netu', na' netu' bedú

zra bentu' zrin, ne ca naca da la chee zra nigá bchaga launtu'."

<sup>13</sup> Bechebe xrane na', dxé'e tu benne' ca':  
 "Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelená' lue' quízruja' lue' lazruj tu zra wen zrin? <sup>14</sup> Guzí' lazruj chiu', ne bexíaj. Neda' dxaca lazra' gunézruja' chee benne' ca' belú'e bzébedxa ca da gudízrujqueza' lue'. <sup>15</sup> ¿Quebe gaca gu-na' ca da dxaca lazra' nen dumí chia'? ¿Dxacu' xa lazre' lawe' da naca' neda' benne' xrlátaje?"

<sup>16</sup> Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunná' benne' zan, san bábaze benne' ca' xelaque' blau.

#### Xecha lasa dxuchalaj Jesús ca gaca gate gatié'

(Mr. 10.32-34; Lc. 18.31-34)

<sup>17</sup> Gate xu'u Jesús neza, zexíajé' Jerusalén, guléajé' cheeze benne' chazrinnu ca' dxusédené', ne guzre' le':

<sup>18</sup> —Dxelé'ele le'e ba zexíajdxu Jerusalén naga neda', Benne' Gulje' Bénneache, xuludé benne' ca' neda' lau benne' xíchajé ca' chee bxruze ca', ne lau benne' ca' dxuluxuzájle'e da bdixruj be'e Dios, na' xelechugue' chia' gatia'. <sup>19</sup> Xuludé' neda' lu na' benne' zitu' ca' chee xelún le' chia', na' xelu'e neda', ne xuludé'e neda' xaga béguaj, san zra guxunne zra xebana'.

#### Da gunaba xrna Jacobo ne Juan

(Mr. 10.35-45)

<sup>20</sup> Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'e bi ca', na' bzu zribé' lau Jesús, dxenabe' culuén. <sup>21</sup> Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudixruj be'e cue' tu zri'ina' caní chalá'a xabéla chiu', ne xetube' xéglala.

<sup>22</sup> Jesús bechebe', guzre' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda', da na' naca na ca xel-la' zi' da tea' neda', ne waca si'le da naca na ca xel-la' dxedxúa nisa ca da si'a neda' gate chu'a lu xel-la' gute?

Na' gulenabe':

—Wácantu'.

<sup>23</sup> Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chalá'a xabéla chia', ne chalá'a xéglala chia' quebe naca na chia' gunna' na le'e. Xra' gunézruje' na chee bi ca' ca da ba nucueze'.

<sup>24</sup> Gate xechí benne' ca' dxusede Jesús belenne' ca', na' belezré'e dxupa bi chee nu'ula na'. <sup>25</sup> Jesús gunné' benne' ca', ne guzre' le':

—Ba nézele le'e ca dxelún benne' xíchajé chee xezr la xu ca', dxelenná bé'ene' benne' ca', na' benne' nácadxé' blau ládujla benne' ca' dxelenná be'e, dxuchínene' xel-la' dxenná bea chee'. <sup>26</sup> Le'e quebe dxal-la' gunle

ca'. Benne' dxaca lazre' gaque' blau ládujla le'e dxal-la' guné' zrin chee xezícadxale le'e, <sup>27</sup> na' bénnea' dxaca lazre' gaque' xíchajé chee, dxal-la' gaque' wen zrin chee xúgutéle le'e. <sup>28</sup> Dخال-la' guné' ca bēna' neda', Benne' Gulje' Bénneache, quebe bida' chee nu gun zrin chia' neda', san bla'a chee guna' zrin chee bēneache, ne chee guzúa' xel-la' nabán chia' ca da quízruja' chee guselá' benne' zante.

#### Jesús dxexuné' chupa benne' la chul-la

(Mr. 10.46-52; Lc. 18.35-43)

<sup>29</sup> Gate dxelaxedxúajé' xezre Jericó, na' benne' zante zjácálené' Jesús. <sup>30</sup> Naga dxeledé'e zaj dxé' chupa benne' la chul-la dxu'a neza, na' gate belenne' dxedé Jesús na' gulebezre xé'e, dxelenné':

—Xran, Zri'ine David, bexache lazre' netu'.

<sup>31</sup> Benne' zan ca' guledil-le' dxúpaté' na' chee xelexúé' zrize, san le' gulebezre xé'e zízrajdxá, dxelenné':

—Xran, Zri'ine David, bexache lazre' netu'.

<sup>32</sup> Nadxa Jesús gulezé', na' gunné' benne' la chul-la ca', na' bchebe' le':

—¿Bi dxaca lázrele guna' chee?

<sup>33</sup> Belexechebe benne' ca':

—Xran, dxaca lázrentu' xel'é'entu'.

<sup>34</sup> Jesús bexache lazre' benne' ca', ne bté' xiaj lawé'. Na' belexelé'eté benne' la chul-la ca', na' xjácálené' Jesús.

#### Ca da guca gate bexú'u Jesús Jerusalén

(Mr. 11.1-11; Lc. 19.28-40; Jn. 12.12-19)

**21** Gate belezrín Jesús, ne benne' ca' dxusédené' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédené' chee tu da xeluné'. <sup>2</sup> Dxé'e le':

—Le chjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúaléba' léba'. Le sezre-ba', ne le che'e dxúpatéba' nigá. <sup>3</sup> Che nu benne' bi xé'e le'e, le xé'e: "Xránadxu nachinne' léba', na' la xesél-la'téqueze'-ba'."

<sup>4</sup> Da nigá guca na chee guxá ca da gunná benne' bchálajé' waláz chee Dios, gunné':

<sup>5</sup> Le xé benne' zaj zra' xezre Sión:

"Le nna', Benne' nna bé'ene' le'e zé'e naga zúale.

Duté xel-la' dxexruj lazre' zrié' tu burro bzrise'.

Zrié' tu búrrodau', zri'ine tu be dxua xua."

<sup>6</sup> Nadxa dxupa benne' ca' dxusede Jesús besía'que', ne beluné' ca da ba gunná be'e Jesús le'. <sup>7</sup> Xea'jlexrí'e burro bzrise', ne zrí'ineba', na' belezrúe' zra lane' cúzruba', na' guzría Jesús léba'. <sup>8</sup> Benne' zan ca' gulechílajé' zra lane' la neza na', na' xebal-le' bu-luchibe' zina' da buluzalé' la neza. <sup>9</sup> Benne' zjaque' lálwela, ne benne' zá'aque' bzebe gulezú lawé' dxelbezre xé'e, dxelenné':

—¿Gaca ba lá'azxa Zri'ine wenná bea David! ¿Ba neza zrenté naca na chee bēneache' zé'e waláz chee Xránadxu Dios! ¿Gaca ba lá'azxa Dios!

<sup>10</sup> Gate guxú'u Jesús xezre Jerusalén, ca naca bèneache zaj zře'ē na' beledxé'ena zrague', na' buluchēbe ljwezre':

—¿Nuzra benne' nigá?

<sup>11</sup> Bal-la benne' ca' gulenné':

—Benne' nigá naque' Jesús, benne' dxuchálaje' waláz chee Dios, zē'ē xezre Nazaret da nababa Galilea.

### Jesús dxuchi'ē lu xudau'

(Mr. 11.15-19; Lc. 19.45-48; Jn. 2.13-22)

<sup>12</sup> Ca gudé na' guxú'u Jesús dxale'aj xudau' chee Dios, na' bebéaje' xúgute benne' wēte, ne benne' dxelá'awē' na'. Bdxixre' blag ca' chee benne' ca' dxuluché'ē dumí, ne bdxixre' da ca' zaj dxe' benne' ca' dxelútiē' bgúgudu ca'. <sup>13</sup> Nadxa guzre' benne' ca':

—Lu xiche lá'azxa naxúaj da dxenná Dios: "Lizra' nigá naca na xu'u naga xelenaba bèneache lawa' neda'", san le'e ba nunle na ca tu lizre gubán.

<sup>14</sup> Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexune' benne' ca'. <sup>15</sup> Belezrá' benne' xíchaje' ca' chee bxruze ca', ne benne' ca' dxuluxúzajle'ē da nadxixruj bea Dios, gate na' belenne' ca' dxelebezre xa'a bidu ca' lu xudau', dxelennabe': "¿Gaca ba lá'azxa zri'ine wenná bea David!" <sup>16</sup> Gulé'ē Jesús:

—¿Dxennu' ca' dxelenná benne' caní?

Bechēbe Jesús:

—Dxenda' na. ¿Quebe ne gulábale le'e lu xiche lá'azxa naga naxúaj na chee da dxaca nigá? Dxenná na caní:

Ba bēnu' xelúl-la bidu ca', ne bidu dxe'ene ca'.

Da dxelúe lá'anabe' Dios naca na da li.

<sup>17</sup> Nadxa bca'ana Jesús benne' ca'. Bezé'ē xezre na', na' bezrine' xezre Betania, naga bejgá'anē' xēla na'.

### Jesús dxugu'ē de' xaga higo

(Mr. 11.12-14, 20-26)

<sup>18</sup> Che zílala ca zexíaj Jesús xezre na', na' gudunē'.

<sup>19</sup> Zítu'la blé'ene' tu xaga higo dxu'a neza, na' gate bzrine' naga zua na, quebe bi da zixre chee na blé'ene'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubízrete' xaga higo na'. <sup>20</sup> Ca beelé'e benne' ca' dxusēde Jesús da nigá, na' belexebánene', ne buluchēbe' Jesús:

—¿Ájazra na' chadite' gubizre xaga higo nigá?

<sup>21</sup> Bechēbe Jesús:

—Da li dxapa' le'e, che nápale xel-la' dxeajlí lazre', ne quebe gun chupa lázrele, quegaze da nigá gaca gunle ca da bēna' neda' chee xaga higo nigá, san waca xēle xi'a nigá: Gucuasa nigá, xeajsúa lu nísadau', na' gaca na. <sup>22</sup> Che dxeajlí lázrele, na' xezi'le bíteteze da nábale Dios.

### Xel-la' dxenná bea da xu'u lu na' Jesús

(Mr. 11.27-33; Lc. 20.1-8)

<sup>23</sup> Nadxa guxú'u Jesús lu chila xudau', na' dxácate' na' dxusédenē' benne' zaj zře'ē na', gulebiga naga zua

Jesús benne' xíchaje' ca' chee bxruze ca', ne benne' gula chee judío ca', na' buluchēbe' Le':

—¿Bi xel-la' dxenná bea napu' dxunu' da caní?

¿Núzraqueze bēna lue' xel-la' dxenná bea nigá?

<sup>24</sup> Bechēbe Jesús:

—Cá'anqueze neda' guchēba' le'e tu. Che xechébele da nigá, na' neda' xapa' le'e bi xel-la' dxenná bea napa' dxuna' da caní. <sup>25</sup> ¿Nu benne' gusel-le' Juan dxuchúe' bēneache nisa? ¿Dios, che bēneacheze?

Gulezú lawe' dxuluchálajle ljwezre', dxelenné':

—Che nnadxu Dios gusel-le' le', na' xē'ē dxi'u: "¿Bizr chee na' quebe guxéajle chee?" <sup>26</sup> Che nnadxu bēneache gusel-le' le', dxal-la' zrēbedxu bi xelún benne' zan ca' cheedxu dxi'u, lawe' da dxeleque xúgute bēneache bchalaj Juan na' waláz chee Dios.

<sup>27</sup> Chee le' na' gulé'ē Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

### Da dxulé'e na ca naca chee chupa bi biu chee tu benne'

<sup>28</sup> Na' guzre Jesús benne' ca':

—¿Aja dxéquele le'e chee da nigá? Tu benne' zaj zra' chupa zri'ine' bi biu, na' guzre' tube': "Zri'ina', guxíaj xeajén zrin lu lina chee uva chia'." <sup>29</sup> Zri'ine' na' bechébebe': "Quebe dxaca lazra'." Ca gudé na' bexíaje lázrebe', na' guxíajbe' xeajénquezbe' zrin. <sup>30</sup> Cá'anqueze xrabe' na' guxíaje' xeajné' xetube', ne guzre'-be', na' bi nigá bechébebe': "Waca, xrae. Na'a cha'a." Quebe guxíajbe'. <sup>31</sup> ¿Núlabe' bi chupa caní bēnbe' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxē'ē benne' ca':

—Da li dxapa' le'e, benne' wechizruj ca', ne nu'ula dxeledálē benne' biu zantē xelxú'ē naga dxenná bea Dios nédxudxa ca le'e <sup>32</sup> lawe' da bla' Juan, bedajlé'ene' le'e da naca xrlátaje, na' le'e quebe guxéajle chee'. Benne' wechizruj ca', ne nu'ula ca' dxeledálē benne' biu zantē guléajle'ē chee'. Le'e, gate ble'ele da nigá, quebe bexíaje lázrele chee chéajle chee'.

### Da dxulé'e na ca naca chee benne' wēn zrin calēla ca'

(Mr. 12.1-12; Lc. 20.9-19)

<sup>33</sup> Nadxa gunná Jesús:

—Le xene ca naca da nadxixruj bea nigá. Tu benne' xrane tu xezr la xu guze' lba uva ca', ne bēne' le'aj chee na. Bēne' tu xēdxu naga xelesíe' uva ca', ne guchise' tu xu'u sibe chee gaca nu guxúe ca naca na. Na' bca'anē' na lu na' benne' wēn zrin ca', ne guzē'ē zéaje' zitu'.

<sup>34</sup> Gate bzrin zra xuluchibe' uva ca', na' gusel-le' tu chupa bi wēn zrin chee' zeajlexezri'be' da dxal-la' xezi' xrane na'. <sup>35</sup> Benne' wēn zrin ca' gulequē'ē bi wēn zrin chee' ca'. Belúele'ē tube', ne belutiē' xetube', na' xetube' buluzriē'-be' xiaj. <sup>36</sup> Nadxa xrane na' gusel-ladxe' bi wēn zrin chee' bi zandxa ca nedxu. Benne' wēn zrin

ca' tuz ca bulusaque' bi ca'. <sup>37</sup> Naga xeajché'tequeze na gusel-le' zrí'inequeze' lawe' da dxéquene': Welape' ba lá'ana zrí'ina'. <sup>38</sup> Gate belelé'ene' zrí'ine', na' benne' wən zrin ca' gulé' ljwezre': "Bi nigá xezí' lu na'be' ca naca da caní. Du gute-be' chee' xegá'ana cheedxu da caní." <sup>39</sup> Chee' le' na' gulé'le'-be', ne belexebéajé'-be' lu xezr la xu na', na' belutie'-be'.

<sup>40</sup> Nadxa Jesús bchebe' benne' ca':

—Gate xida xrane xezr la xu na', ¿ájazra guné' chee benne' wən zrin ca'?

<sup>41</sup> Gulé'le' Le':

—Gutié' benne' ca' dxeluné' da caléla ne quebe xexache lazre' le'. Nadxa gucá'analene' xezr la xu na' benne' wən zrin xula, benne' xuluxunézruje' da dxal-la' xezí' le' gate zrin zra chee' na.

<sup>42</sup> Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na:

Xiaj na' da buluzúa benne' wən xu'u ca' chalá'ala, le' na' naca na xiaj blau na'a.

Da nigá naca na da bən Xránadxu, ne naca na tu da dxexebánedxu.

<sup>43</sup> Chee' le' na' dxapa' le'e, Dios wequé' da naca chee' le'e naga dxenná be'e, na' gunézruje' na benne' xeluné' da naca chee' xel-la' dxenná bea chee' Dios. <sup>44</sup> Che tu benne' cheajchazie' lawe' xiaj nigá waxúzruje', na' che xexruj na lawe' tu benne', na' guzuzruj na le'.

<sup>45</sup> Gate benne' xíchajé' ca' chee' bxruze' ca', ne benne' xudau' fariseo ca' belenne' da bchalaj Jesús, guleque bé'ene' chee' lé'queze' bchalaj Jesús da caní. <sup>46</sup> Gate gulaca lazre' xelé'le' Le', belezrebe' benne' xezre' ca' lawe' da dxeléajle' benne' ca' naca Jesús benne' dxuchálajé' waláz chee' Dios.

### Da dxulé'e na ca naca chee' laní wechaga na'

**22** Guzú lau Jesús dxuchálajlene' benne' ca' xecha lasa tu da dxulé'e na, dxé'le' le':

<sup>2</sup>—Ca da gaca xabáa naga dxenná bea Dios naca na ca da guca gate tu benne' wenná bea bene' tu laní wechaga na' chee' bi biu chee'. <sup>3</sup> Gusel-le' benne' wən zrin chee' ca' cheajletupe' benne' ca'an gunné' lizre', san benne' ca' quebe gulaca lazre' xédajgaque'.

<sup>4</sup> Nadxa gusel-ladxe' benne' wən zrin chee' ca', benne' xula. Dxé'le' le': "Le' xe benne' ca' gunnía', ba nucueza' xel-la' wagu. Ba gunná be'eda' xelútie' be'ze ca', ne be dxelanne, na' ca naca na bache de. Dخال-la' xelélé'e nigá naga zra' wechaga na'." <sup>5</sup> Benne' ca' gunné' quebe gulaca lazre' xédajgaque'. Tu benne' ca' guxiáje' lu xezr la xu chee', ne xetú benne' guxiáje' wete. <sup>6</sup> Xebal-la benne' ca' gulé'le' bi wən zrin ca' chee' wenná bea na', na' bulucháchalene'-be', ne belútete'-be'. <sup>7</sup> Nadxa wenná bea na' bzrá'ale'e, na' gusel-le' benne' chee' ca', benne' zjaca wedil-la xeajleguétie' benne' wete benne' ca', ne xeajlezé'xe'te' lazre' benne' ca'. <sup>8</sup> Nadxa guzre' bi wən zrin chee' ca': "Bal-la bi de ba de chee' wechaga na', na' benne' ca' gunnía' quebe zaj naca chee' xelélé'e. <sup>9</sup> Le' chjaca neza zrí'a ca', ne le nne' xúgute' benne' lé'ele, chee' xelélé'e laní chee' wechaga na'."

<sup>10</sup> Benne' wən zrin ca' xjaque' la neza ca', na' xeajletupe' xúgute' benneache, benne' belelé'ene' zaj naque' benne' caléla, ne benne' xrlátaje. Ca'an guca guzrate xu'u na' benneache. <sup>11</sup> Nadxa wenná bea na' guxú'e xeajné'e benne' ca' gunné', na' blé'ene' tu benne' dxé'e na', quebe nazi'e zra lané' chee' laní chee' wechaga na'. <sup>12</sup> Guzre' le': "Lue', benne', ¿ájazra guca guxú'u nigá, ne quebe nazi'u zra lanu' chee' laní wechaga na'?" Bénéa' gudxé'e zrize. <sup>13</sup> Nadxa wenná bea na' guzre' bi zaj zúabe' ga na', "Le' guchéaj ni'a ne'e, ne le guzalé' chalé'ajla naga naca chul-la, naga cuezre', ne xáguxa'ate' lazxe'." <sup>14</sup> Benne' zante' gunnía', na' bábaze' zaj naca chee' xelu'e nigá.

### Ca naca chee' dumí da dxuluchízruje'

(Mr. 12.13-17; Lc. 20.20-26)

<sup>15</sup> Nadxa benne' fariseo ca' besiá'que', ne beluné' tuze dizra' xelebéajé' Jesús dizra' chee' xelezé'quene' xelawe' zría chee'. <sup>16</sup> Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, chee' zeajleguezre' Jesús:

—Benne' weséde, nézentu' dxenníu' da li, ne dxusé-denu' da li da zaj naca chee' Dios, ne quebe dxezrebu' bi xelenná benneache, ne quebe dxenná'u ca da zaj napa benneache. <sup>17</sup> Gunná xque. ¿Aja dxé'quenu' lue'? ¿Dxun na ba xen quízrujdxu da dxuluchizruj benne' ca' nase'la César, benne' zitu', che cabí?

<sup>18</sup> Jesús ba nézene' ca da dxelaca lazre' xeluné' chee', na' guzre' benne' ca':

—Le'e, láweze dxunle da xrlátaje. ¿Bizr chee' na' dxuzúale da guzrí'a xi na neda'? <sup>19</sup> Le' gulé'e neda' dumí na' da dxízrujle chee' wechizruj.

Nadxa bulunézruje' Le' tu dumí chee' xezre Roma.

<sup>20</sup> Gate blé'ene' na, na' Jesús bchebe' benne' ca':

—¿Nuzra lau ni, ne le' da naxúaj na nigá?

<sup>21</sup> Belexechebe':

—Chee' César na'.

Na' guzre' Jesús benne' ca':

—Le' gunezruj chee' César da naca chee' César, ne le gunezruj chee' Dios da naca chee'.

<sup>22</sup> Gate belenne' da nigá, na' belexebánene', ne besiá'que' naga zua Jesús.

### Da buluchébe' Jesús chee' benne' xelxebane' ládujla benne' gate

(Mr. 12.18-27; Lc. 20.27-40)

<sup>23</sup> Zra ná'queze belezrín bal-la benne' saduceo ca' naga zua Jesús. Benne' saduceo ca' dxelenné' quebe xelxebán benne' gate. Gulé'le' Jesús:

<sup>24</sup>—Benne' weséde, Moisés gunné' che tu benne' nuchaga ne'e gatie', ne quebe nu bidu chee' chilá', na' bi biche' dxal-la' guchaga na'abe' nen nu'ula gute benne' biu chee' na' chee' sua tu bi chee' benne' ba gutié'. <sup>25</sup> Naga zúantu' gulezrá' gazre benne' gulácabe' zrí'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu chee' lawe' da quebe nu zrí'ine bi nedxu na' gúlajbe'. <sup>26</sup> Cá'anqueze gúcaqueze na chee'

bi gudxupe', na' gudé na' chee bi guxunne', na' cá'an-queze guca chee xúgute bi gazre ca'. <sup>27</sup> Ca gudé na', na' gute nu'ula na'. <sup>28</sup> Gate xelexebán benne' gate, ¿nu-la bi gazre caní gácabe' benne' chee nu'ula na' lawe' da tu tu bi gazre ca' bchaga na'abe' nen nu'ula na'?

<sup>29</sup> Jesús bechebe':

—Le'e dxeque zréajele lawe' da quebe núnbeale da naxúaj na lu xiche lá'azxa, ne ca naca xel-la' waca chee Dios. <sup>30</sup> Gate zrin zra xelexebán benne' gate, québedxa xuluchaga na' bénneache, ne québedxa xelúti'e' bi nu'ula chee xuluchaga na'abe'. Xelaque' ca zaj naca gubáz chee xabáa chee Dios. <sup>31</sup> Ca naca na che dxal-la' xelexebán benne' gate, ¿quebe ne gulábale le'e ca gunná Dios? Gunné': <sup>32</sup> "Neda' naca' Dios chee Abraham, ne Dios chee Isaac, ne Dios chee Jacob." Dios quebe naque' Dios chee benne' gate, san naque' Dios chee benne' ban, benne' ca' ba gulati'e' lu xezr la xu nigá.

<sup>33</sup> Gate belenne' da nigá, na' belexebane benne' ca' ca naca da dxusede Jesús.

### Da gunná be'e Dios da naca blau

(Mr. 12.28-34)

<sup>34</sup> Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'. <sup>35</sup> Tu benne' ca', benne' naque' benne' dxuxuzájle'e' da nadxixruj bea na, guca lazre' guxúe' ájala nne' Jesús. Bchebe' Le':

<sup>36</sup> —Benne' wesede, ¿bizrla da gunná be'e Dios naca blau?

<sup>37</sup> Bechébe Jesús:

—Dxal-la' zri'inu' Xranu' Dios duté xichaj lázrda'u, ne duté bénne'du xu'u, ne duté xel-la' dxéajni'i chiu'. <sup>38</sup> Da nigá naca da nadxixruj bea da blaudxa, ne da dxundxa na ba xen. <sup>39</sup> Da nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazrí'i cuinu'. <sup>40</sup> Che tu benne' dxune' ca zaj naca chupa da nadxixruj bea caní, dxune' ca naca xúgute da nadxixruj bea da bzuaj Moisés, ne ca naca xúgute da bulusede benne' ca' buluchálaje' waláz chee Dios.

### ¿Nuzra zri'ine naca Cristo?

(Mr. 12.35-37; Lc. 20.41-44)

<sup>41</sup> Dxácaté ne zaj nazraga benne' fariseo ca' na',

<sup>42</sup> Jesús bchebe' le':

—¿Ájala dxéquele le'e chee Cristo? ¿Nuzra zri'ine naque'?

Benne' ca' gulé'e' Le':

—Zri'ine David na'.

<sup>43</sup> Nadxa guzre Jesús benne' ca':

—¿Ájazra na' David gate bchálaje' chee Cristo dxé'e' Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

<sup>44</sup> Xrana' Dios guzre' Xrana':

"Gudxé'e' chalá'a xabéla chia'

cadxa guzúa' zran ni'u benne' ca' quebe chawe' dx-elelé'ene' Lue'."

<sup>45</sup> ¿Ájazra naca na naca Cristo zri'ine David, che David ná'queze dxé'e' Le': "Xrana'?"

<sup>46</sup> Quebe nu benne' guca xechébequeze' chee', na' ze lau zra na' netú québedxa nu bexazre bi guchébedxa Le'.

### Jesús dxedil-le' benne' xudau' ca'

(Mr. 12.38-40; Lc. 11.37-54; 20.45-47)

**23** Nadxa Jesús guzre' benne' ca' zaj zre'e' na', ne benne' ca' dxusédené', <sup>2</sup> dxenné':

—Benne' ca' dxuluxuzájle'e' da nadxixruj bea Moisés, ne benne' xudau' fariseo ca' zaj nape' xel-la' dxenná bea xuluxuzájle'e' da nadxixruj bea Moisés. <sup>3</sup> Chee le' na' le guzúa dizra' chee benne' caní, ne le gun xúgute da xelenné'. Quebe gunle ca da dxelún benne' ca', lawe' da dxelenné' da ca' dxal-la' gunle, na' quebe dx-elúnqueze' na. <sup>4</sup> Dxelune' xua zí'ile'e' da quebe dx-elezeque xelezúe bénneache, ne dxelenná bé'ene' bénneache chee xelu'e' na. Benne' ca' ne quebe dxuluzúe' na netú zrupe ne'e' chee da dxuluzúe benne' xubla.

<sup>5</sup> Xúgute da dxelún benne' ca' naca na chee xelélé'e bénneache. Dxeledánnene' dxelu'e' luzxgue', ne ne'e' ladxe' laga naga naxúaj dizra' chee Dios, ne dxelácu'e' zra lané' da zeajzé luzre na tunna. <sup>6</sup> Dxelaca lazre' xelebé'e' naga ze láweze naga dxelawe', ne naga naca blau lu xu'u ca' naga dxeledube'. <sup>7</sup> Dxelaca lazre' xelapa bénneache le' ba lá'ana la neza ca', ne xelé'e' le':

"Benne' wesede." <sup>8</sup> Na'a le'e, quebe güele lataj nu xé le'e, "Benne' wesede", lawe' da xúgutele nácale bi bíchele tule xetule, ne tuze Benne' dxusédené' le'e, neda', Cristo. <sup>9</sup> Quebe nu xele le'e: Xrae, lu xezr la xu nigá, lawe' da zua tuze Xrale, Dios na' zue' xabáa.

<sup>10</sup> Quebe güele lataj nu xé le'e: Xran, lawe' da zua tuze Xránale, neda', Cristo. <sup>11</sup> Bénnea' dxune' zrin chee xezí-cadxle le'e nácadxe' blau ládujla le'e. <sup>12</sup> Bénnea' dx-ucá'ana szren cuine' wexéxrujla bénnea', na' bénnea' dxaque' dxexruj lazre' wegá'ane' szren.

<sup>13</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrláta-je. Dxusézxujle neza chee xabáa chee quebe nu chu'u na. Lé'equeze quebe dxú'ule, ne quebe dxuele lataj benne' dxelaca lazre' xelu'e'.

<sup>14</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrláta-je. Dxejúale lizre nu'ula ca' ba gulate benne' biu chee', na' chee xulé'ele xrlátaje cuínale, dxuwízrale Dios xcha lu xudau'. chee le' na' da zrenté da guzría xi na le'e.

<sup>15</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrláta-je. Le'e dxedale du ca naca xezr la xu nigá ne ca naca nísadau' chee si' tu benne' ca naca da zéajle'e chee Dios, na' gate bache dxunle na, na' dxugápadxale bénnea' dul-la ca da nabágale le'e chee cuía xi'e' lu lataj ba xa'.

<sup>16</sup> 'Edxugua le'e. La chul-la nácale, ne dxaca lázrele cu'ule benne' neza. Dxennale che tu benne' dxuzétaje' xudau', quebe dxun na le' ba xen, na' che dxuzétaje' oro chee xudau', da na' dxun na le' ba xen. <sup>17</sup> Nácale benne' xala, ne la chul-la. ¿Nula da naca na blaudxa, oro, che xudau' na' da dxucá'ana na lá'azxa oro na'?



<sup>18</sup> Cá'anqueze dxennale le'e che nu dxuzetaj cugu lá'azxa, quebe dxun na le' ba xen, san che dxuzétajé' guna' da zria na lawe' cugu lá'azxa, da na' dxun na le' ba xen. <sup>19</sup> Nácale benne' xala ne la chul-la. ¿Nula da naca na blaudxa, guna' na', u cugu lá'azxa na' da dxucá'ana na lá'azxa guna' na'? <sup>20</sup> Che nu benne' dxuzétajé' cugu lá'azxa, quegaze cugu lá'azxa dxuzétajé', san cá'anqueze dxuzétajé' ca naca da zria lawe na. <sup>21</sup> Bénnea' dxuzétajé' xudau', quegaze xudau' na' dxuzétajé'. Cá'anqueze dxuzétajé' Dios zué' lataj na'. <sup>22</sup> Cá'anqueze benne' dxuzétajé' xabáa, dxuzétajé' lataj naga zria Dios, ne Díosqueze, Bénnea' zrié' lataj na' dxuzétajé'.

<sup>23</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézrujle cheé xudau' tu cue' cheé da chi cue' cheé xixruj weaj, ne cheé bínnedu ca' cheé anís, ne cheé cumín. Quebe dxunle da zaj naca na blaudxa da zaj zua na lu da nadxixruj bea na, ca naca cheé gácale xrlátaje, ne cheé xexache lázrele le sa' ljwézrele, ne cheé chéajle cheé Dios. Da caní zaj naca na da dxun na ba xen gunle, ne quebe gusanle da ca' ba dxunle.

<sup>24</sup> La chul-la nácale, ne dxaca lázrele cu'ule benne' neza. Dxecá'ale da naca ca tu bé'adau', be zrua lawe' da dxí'ajle, na' quebe dxeque be'ele dxí'ajle da naca ca tu camello, be dxelaga benneache.

<sup>25</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácale lawe' da lu lázrdaule nácale ca gubán, ne benne' dxucude.

<sup>26</sup> Benne' fariseo la chul-la. Nedxu le quibe lu'ule zriga', ne xé'ena, na' cá'anqueze xegá'ana chawe' cúzrele.

<sup>27</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca tu ba chiche da nalá na xrtanté cúzrele, na' lu'ule na nazraté na zrita cheé benne' gate', ne xúgute da sgute. <sup>28</sup> Ca'an nácale le'e. Cúzrele nala'le ca benne' xlátaje, na' lu lázrdaule nazraté na da wen lazre', ne da calela da dxunle.

<sup>29</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxucá'anale cháwedau' ba ca' naga zaj nagache benne' ca' buluchálajé' waláz cheé Dios, ne dxuele lechítajé lu'a cheé benne' xrlátaje ca'. <sup>30</sup> Dxennale: "Chela netu' ba zúantu' gate na' gulezrá' xra xrtantu' ca', quebe gúcalentu' benne' ca' belutié' benne' ca' buluchálajé' waláz cheé Dios." <sup>31</sup> Gate dxennale ca', le'e dxexúnbeaquezle nácale zri'ine zre sua benne' ca' belutié' benne' ca' buluchálajé' waláz cheé Dios. <sup>32</sup> Dxu-sexúzrele dxunle ca da gulezú lau belún xra xrtáule ca'.

<sup>33</sup> 'Be snia nácale, ne xrtia be snia. ¿Ájazra gunle cheé gáchele lu da zi' da xa' cheé lataj ba xa'? <sup>34</sup> Cheé le' na' neda' sel-la' cheé benne' ca' xuluchálajé' waláz cheé Dios, ne benne' sina ca', ne benne' ca' xulusédené' le'e. Lé'eqeze gútele, ne gudá'le xaga béguaj bal-la benne' ca', na' xebal-le' gunle le' zi' lu xudau' ca', na' gau zi' xúzrele le' tu xezre xetú xezre. <sup>35</sup> Ca'an gaca, le'e bá-

gale zria cheé xel-la' gute cheé xúgute benne' xrlátaje ca' belute xra xrtáule ca', gate guzú lau na nu be'te Abel, benne' xrlátaje, ne naga bzrinté bétele Zacarías ládujla naga zua lataj lá'azxa cheé xudau' ne lataj naga dxuluzexé' be xíxre'du ca', be dxelegú' lu cugu cheé Dios. <sup>36</sup> Da li dxapa' le'e, benneache zaj zre'e na'a xelebague' zria cheé xúgute da caní.

### Jesús dxebezre' cheé xezre Jerusalén

(Lc. 13.34-35)

<sup>37</sup> Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálajé' waláz cheé Dios, ne dxuzríale xiaj benne' gubáz ca' dxezel-la Dios naga zúale. Zane' lásate guca lazra' gutupa' zrí'inele chia' ca dxun bedxuj, dxutúpa-ba' be dxé'enedau' zran xrlába', san quebe guca lázrele. <sup>38</sup> Le nna'xque na'a, lízrele xelexegá'ana na dácheze, <sup>39</sup> lawe' da dxapa' le'e, québedxa lé'ele neda' cadxa zrin zra nnale: La'azxa naca bénnea' zé'e waláz cheé Xránadxu.

### Jesús dxenné' wabía xi' xudau'

(Mr. 13.1-2; Lc. 21.5-6)

**24** Nadxa bedxúaj Jesús xudau', na' dxácaté dxexedxúajé' na', gulebiga benne' ca' dxusédené' lau Jesús, ne gulezú lawe' dxuluchálajlene' Le' ca naca cheé xudau' na'. <sup>2</sup> Bechebe Jesús:

—¿Dxelé'ele xúgute da caní? Da li dxapa' le'e, netú xiaj caní quebe xegá'ana zeajzria cuzru ljwezre na. Ca naca na cuía xi na.

### Ca naca da xelunna bea na ba za zra bzebe

(Mr. 13.3-23; Lc. 21.7-24; 17.22-24)

<sup>3</sup> Nadxa xjaque' lu xi'a naga zaj zé xaga olivo, na' gate dxe' Jesús na', benne' ca' dxusédené' belezrine' lau Le', ne bagácheze buluchébe' Le':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsé cheé xezr la xu nigá?

<sup>4</sup> Nadxa Jesús guzre' benne' ca':

—Le guxúe cuínale cheé quebe nu si xé le'e. <sup>5</sup> Benne' zan xelexé'e. Xelún lazre' xelenné' zaj naque' Cristo, na' xelexé' cheé benne' zan. <sup>6</sup> Wenle le'e dxaca wedil-la, ne waca wedil-la gáteteze na'. Quebe zrébele, lawe' da dxal-la' xelaca da caní. Da caní quebe zaj naca na cheé zra bzebe. <sup>7</sup> Tu cue' xezr la xu tíl-lale na xetú cue' xezr la xu, ne tu xezre tíl-lale na xetú xezre. Wata' gubina', ne welata' xízrawe' ca', ne wazrú' gáteteze na'.

<sup>8</sup> Xúgute da caní zaj naca na naga dxezú lau ca da xelezaca benneache.

<sup>9</sup> 'Nadxa xuludé' le'e naga si sácale, na' bál-lale welútequeze'. Ca naca benneache xelexé' le'e lawe' da dxunle da naca chia'. <sup>10</sup> Lu zra na' benne' zan québedxa xeléajle'e chia', na' xelexé' le sa' ljwezre', ne xuludé' le sa' ljwezre' lu na' benne' guledábague' le'. <sup>11</sup> Welelá' benne' zan benne' wen lazre'. Xelenné' dxuluchálajé' waláz cheé Dios, na' xelexé' cheé benne' zante. <sup>12</sup> Lawe' da gáta'le'e da calela,

benne' zan québedxa xelexrí'ine' le sa' ljwezre'. <sup>13</sup> Bénnea' zua chache' ca zrinte' zra bzebe, la bennea'. <sup>14</sup> Ca naca dizra' chawe' nigá ca nna bea Dios, zralaj na du gabí'i xezr la xu chee' xelén ca naca benne' chee' xúgute' cue' xezr la xu, na' te na' cheajsé chee' xezr la xu nigá.

<sup>15</sup> Benne' gulabe' da nigá dxal-la' chéajni'ine'. Daniel, benne' bchálaje' waláz chee' Dios, bzuaje' ca naca chee' tu da dxezra'a Dios, da dxuxrinnaj na. Gate lé'ele da nigá zua na lataj lá'azxa chee' xudau', <sup>16</sup> nadxa benne' zaj zre'e' xezre ca' zaj nababa Judea dxal-la' xuluzrún- nuje', ne chjaque' lu xi'a zren. <sup>17</sup> Che tu benne' ze' chju'u chee', quebe dxal-la' xexétaje' bi cheajxeléaje' lu xu'u. Dxal-la' guzrúnnujte'. <sup>18</sup> Benne' zue' le'e' xixre' quebe dxal-la' xezrine' lizre' cheajxezri'e' xicha chee' da gácu'e'. <sup>19</sup> Edxugúa nu'ula ca' zaj zre'e' lu zra na' zaj zue' z'i'i, ne nu'ula ca' zaj nu'e' bidau', ne dxelázrebe'. <sup>20</sup> Le naba Dios quebe gun na ba xen guzrúnnuje beu' za- ga, ne quegá lu zra dxupá'anale, <sup>21</sup> lawe' da che ca' gaca na, na' da zréntedxa da xelexí saca benneache ca da quebe ne xelexa'ca' ca guzú lauté zua xezr la xu nigá, ne québedxa bi xelexa'ca' caní ca te chee' da nigá. <sup>22</sup> Che Dios quebe guzáchie' zra ca', na' netú quebe nu la. Guzáchie' na chee' gácalene' benne' ca' bache nabéaje' chee'.

<sup>23</sup> Chee' le' na', quebe chéajle' che nu xé le'e: "Le nna'xque, nigá zua Cristo", u che nu xé le'e: "Le nna' xque, na'la zue'." <sup>24</sup> Caní dxapa' le'e lawe' da xelexá' benne' zan, benne' guzrí xé'e, na' xelenné' zaj naque' Cristo, u zaj naque' benne' dxuluchálaje' waláz chee' Dios, na' da zrente' xulul'é'ne', ne xeluné' xel-la' waca zren ca' chee' xelexí xé'e' benne' ca' ba nabéaj Dios. Caní xeluné' che xelexé'quene'. <sup>25</sup> Ba bchálajle'na' le'e caníqueze na'a quebe ne gaca na. <sup>26</sup> Chee' le' na', che nu xé le'e: "Le nna'xque, na' zue' le'e' xixre'", quebe chéajle' na', u che nu xé le'e: "Le nna'xque, lu xu'u nigá zue'", quebe chéajle'. <sup>27</sup> Ca dxun tu xesa guziu', dxépe na naga dxalaj gubizra, na' dxeléd'edxu na naga dxebía gubizra, ca'an gaca gate xida' neda', Benne' Gulje' Bénneache. <sup>28</sup> Gáteteze de' tu da nate, na' dxelexezraga la- ba ca'.

**Ca da gaca gate ba zua xelá' Benne' Gulje' Bénneache**  
(Mr. 13.24-37; Lc. 21.25-33; 17.26-30, 34-36)

<sup>29</sup> Na' gunná Jesús:

—Gate bache guca zra na' gate xelexaca zi' bénneache, nadxa gubizra chul-la na naga zua na, na' beu' quebe gusení na, na' belaj xelexruij na, na' xelexríze- queze ca naca da zaj naca na szren da dxeledá' lu be'. <sup>30</sup> Nadxa lé'ele zran xabáa da gul'é' na ba zua xelá'a neda', Benne' Gulje' Bénneache, na' ca naca bénneache zaj zre'e' xezr la xu xelexé'zrequeze'. Nadxa xelexé'ne' neda', Benne' Gulje' Bénneache, zezá'a lu beuj zran xabáa, zúale' neda' duté xel-la' dxenná bea, ne da xabáa. <sup>31</sup> Nadxa sél-laqueza' gubáz chee' xabáa chia' ca', na' xulucuzre' zizraj lúzuba' chee' xuluxutu- pe' benne' ca' ba nabéaja' chia' dapa saca chee' xezr la xu nigá, ne du ca naca xezr la xu nigá.

<sup>32</sup> Le gusede ca naca da dxulé'e xaga higo. Gate dx- elaxed'é'ene zruze na, ne dxezrí'a na laga' dxé'ene, ba nézele ba za xaca beu' la. <sup>33</sup> Cá'anqueze gate lé'ele dx- elaca xúgute' da caní, dxal-la' nézele gágute' ba zua cheajsé chee' xezr la xu, ne ba zua gaca na. <sup>34</sup> Da li dxapa' le'e, xúgute' da caní xelaca na nédxula gate quebe ne xelate benneache zaj zre'e' lu zra na'. <sup>35</sup> Xabáa ne xezr la xu weledé chee' na. Dizra' chia' quebe te chee' na.

<sup>36</sup> Gate za zra na', ne bila zra na', quebe nu neze, quegá gubáz chee' xabáa zaj zre'e' xabáa, ne neda', Zri'ine' Dios. Tuze Xradxu Dios nézene' gate zrin zra na'.

<sup>37</sup> Ca guca lu zra ca' gate zua Noé, cá'anqueze gaca na gate xelá'a neda', Benne' Gulje' Bénneache. <sup>38</sup> Ca lu zra ca' gate quebe ne gun Dios nisa xiuj da guzrí'a xi na benneache, gulezra' benneache ca' dxel'é'aj dxelawe', ne dxuluchaga ne'e, ne dxuluné'zruje' zri'ine' ca' chee' xuluchaga na'be', cadxa bzrin zra guxú'u Noé lu da zren na' dxedá lawe' nísadau' da nazí le na arca.

<sup>39</sup> Quebe guleque bé'ene' ca da dxal-la' gaca na, cadxa bzrin zra guca xiuj na', ne bête na ca naca benne' ca'. Cá'anqueze gaca gate xelá'a neda', Benne' Gulje' Bénneache. <sup>40</sup> Ca lu zra ca' xelexrá' chupa benne' biu le'e' xixre'. Tu'e' xeché'e, na' xetú'e' xegá'ane'. <sup>41</sup> Xelexrá' chu- pa nu'ula dxelútue'. Tu'e' xeché'e, na' xetú'e' xegá'ane'.

<sup>42</sup> Le sua le'e ban lazre' lawe' da quebe nézele bi zra xelá'a neda', Xránale. <sup>43</sup> Da nigá dxal-la' nézele: Che tu xrane xu'u nézene' bi zra chizrela zrin gubán, waxícha- je' bchigala, ne quebe gu'e' lataj xusalaj benne' gubán lizre' chee' cuane'. <sup>44</sup> Chee' le' na', le sua le'e ban lazre' lawe' da xelá'a neda', Benne' Gulje' Bénneache, gate québela dxé'quele ca'.

**Benne' wen zrin li lazre', ne benne' wen zrin quebe naque' li lazre'**  
(Lc. 12.41-48)

<sup>45</sup> Na' gunná Jesús:

—Nuzra na' benne' wen zrin li lazre' ne dxéajni'ine', bénnea' xrane' dxucá'analene' le' benne' zaj zre'e' lizre' chee' guné'zruje' da xelawe' gate zrin zra chee' na? <sup>46</sup> Ba neza naca na chee' benne' wen zrin na', gate xezrín xrane', lé'ene' le' dxuné' ca naca da nabague'. <sup>47</sup> Da li dxapa' le'e, xrane' gucá'analene' le' ca naca da nape'. <sup>48</sup> Che benne' wen zrin na' gaque' benne' wen da cale'la, ne gué'quene' quebe xelá' ze' xrane', <sup>49</sup> ne che su lawe' gusaca z'i'e' xezícala benne' wen zrin ca', ne xi'aj gágulene' benne' dxelexuzre', <sup>50</sup> nadxa xrane' xezrine' zra gate québela dxebeze'. Gaca na zra quebe nézene', <sup>51</sup> na' gusaca z'i'e' le' le'. Chugue' chee' gaque' tuze benne' ca' dxeluné' láweze da xrlátaje. Cuezre', ne xáguxa'ate' lazxe'.

**Da dxulé'e na ca naca chee' chi nu'ula cuide'**

<sup>25</sup> Gunná Jesús:

—Ca gaca chee' benne' xelu'e' naga dxenná bea Dios xabáa naca na ca da guca chee' chi nu'ula cuide' caní. Gulequ'é' xi' chee' ca', chee' chjaque' laní chee' wechaga na', dxelebeze' bátala xelá' benne' wechaga

na'. <sup>2</sup> Gazxu' nu'ula caní gulaque' gat lazre', na' xegazxu' nu'ula caní zaj naque' ban lazre'. <sup>3</sup> Nu'ula ca' quebe zaj naque' ban lazre' belú'e xi' chee' ca', san quebe belú'e da za zxezxe na da xelegué'e lu xi' chee' ca'. <sup>4</sup> Nu'ula ban lazre' ca' belú'e xi' chee' ca', ne da za zxezxe na da xelegué'e na. <sup>5</sup> Lawe' da guzré benne' wechaga na', na' gulaca wase ca zaj naque', na' xúgutē' gulasie'. <sup>6</sup> Dxēla ben tu chi'i benne' dxebezre xē'e, dxenné': "Ba za' wechaga na'. Le dxuaj si' lu na'le le'." <sup>7</sup> Xúgutē' nu'ula cuide' caní gulase', na' gulezú lawe' bulugale' xi' chee' ca'. <sup>8</sup> Nadxa gazxu' nu'ula ca' quebe zaj naque' ban lazre' gulé'e gazxu' nu'ula ban lazre' ca': "Le gunna late' da za zxezxe na cheentu', lawe' da ba dxelexula xi' cheentu'." <sup>9</sup> Nu'ula ban lazre' ca' belexechebe': "Quebe gaca, lawe' da che gúnnantu' late' chee, quebe gaca na da dxechínnentu' netu', ne da dxechínnele le'e. Le chjácala naga dxutiē' na, ne le cheajxri' chee." <sup>10</sup> Dxácate' zjaca nu'ula ca' quebe zaj naque' ban lazre', na' bezrín wechaga na'. Nu'ula ban lazre' ca' gulu'e nen le' lu laní chee wechaga na', na' bsezxuj dxa xu'u na'. <sup>11</sup> Gudé na' belexezrín xegazxu' nu'ula ca', na' gulenné': "Xran, Xran, gusalaj chú'untu'." <sup>12</sup> Le' bechebe': "Cabata'. Da líqueze quebe núnbe'a le'e."

<sup>13</sup> Nadxa Jesús guzre' benne' ca':

—Le sua le'e ban lazre', lawe' da quebe nézele bi zra, u bi xel-la' xelá'a neda', Benne' Gulje' Bénneache.

#### Da dxulé'e na ca naca chee benne' gulezú'e dumí

<sup>14</sup> Na' gunná Jesús:

—Ca gaca chee benne' xelu'e naga dxenná bea Dios xabáa, naca na ca da guca gate tu benne' zue' chee se'e chéaje' zitu', na' gunné' bi wēn zrin chee' ca', ne bcá'anale' bi wēn zrin ca' dumí chee'.

<sup>15</sup> Tu bi ca' bnézruje' gazxu' cue' dumí, na' xetube' bnézruje' chupa cue' dumí, na' xetube' bnézruje' tu cue' dumí. Bnézruje' chee tu tube' ca da xelezéquebe' xuluchínebe' na. Nadxa guz'é zéaje' zitu'. <sup>16</sup> Bi wēn zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí. <sup>17</sup> Cá'anqueze bi wēn zrin na' guzi'be' chupa cue' dumí, bezi'be' xechupa cue' dumí. <sup>18</sup> Bi wēn zrin na' guzi'be' tu cue' dumí na' guxiá-je', ne bcáchebe' dumí chee xránabe' tu lu xēdxu da be'be' lu xu.

<sup>19</sup> Zane' iza ba guca gate bezrín xrane bi wēn zrin ca', na' guzú lawe' dxezi'e da bde'e lu na' bi wēn zrin ca'.

<sup>20</sup> Nedxu bzrin bi wēn zrin na' guzi'be' gazxu' cue' dumí, na' bnézruje' xránabe' xegazxu' cue' dumí, na' gúzrebe' le': "Xran, bēnnu' neda' gazxu' cue' dumí. Nigá dē xegazxu' cue' da bezi'a nen dumí chiu'." <sup>21</sup> Na' xránabe' guzre' lebe': "Da chawe' bēnu'. Nacu' tu bi wēn zrin xrlátaje, ne li lazre'. Gucu' li lazre' lu late' da bēnna' lue', na' gúnnaqueza' lue' da zrēndxaqueze. Guxú'u naga zua' neda', ne gubélē'e." <sup>22</sup> Gudé na' bzrin bi wēn zrin na' guzi'be' chupa cue' dumí, na' gunabe': "Xran, bēnnu' neda' chupa cue' dumí. Nigá dē xechupa cue' da bezi'a nen dumí chiu'." <sup>23</sup> Na' xránabe' guzre' lebe': "Da chawe' bēnu'. Nacu' tu bi wēn zrin xrlátaje,

ne li lazre'. Gucu' li lazre' lu late' da bēnna' lue', na' gúnnaqueza' lue' da zrēndxaqueze. Guxú'u naga zua' neda', ne gubélē'e." <sup>24</sup> Gate bzrin bi wēn zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné' xue, ne dxezi'u da quebe guzu', ne dxexeca'u da quebe bēsiu'. <sup>25</sup> Chee le' na' bzreba', na' guxá'a xejácchia' dumí chiu' lu xu. Nigá dē da naca chiu'." <sup>26</sup> Na' xránabe' guzre' lebe': "Nacu' bi wēn zrin calela, ne zrawēde. Ba nézqueznu' dxezi'a da quebe guza', ne dxexecá'a da quebe bēsia'. <sup>27</sup> Chee le' na' la xju'u dumí chia' na' lu na' benne' dxelízruje' chee dumí da dxuluchínene', na' gate za' neda', na' xezi'a da naca chia' nen da belezi'e." <sup>28</sup> Nadxa guzre' benne' ca' zaj zre'e na': "Le xecá'a dumí na' da núrube', ne le gunezruj na bēnnea' nape' chi cue' dumí. <sup>29</sup> Benne' nape' wazidxē' da zrendxa, na' benne' quebe nape', ca late' da du na' nape' wecá'a na. <sup>30</sup> Ca naca bi wēn zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'ate' lázxabē'."

#### Ca gun Dios gate guchi'e chee bēnneache zaj zre'e xezr la xu

<sup>31</sup> Na' gunná Jesús:

—Gate xelá'a neda', Benne' Gulje' Bénneache, ne Benne' Wenná Bea, nen ca naca gubáz chee xabáa chia', na' cué'queza' lataj naga nna be'a, da naca na da xabáa. <sup>32</sup> Na' bēnneache chee xúgutē' cue' xezr la xu xelexezrague' lawa' neda', na' xebéaja' cha chee' ca dx-un benne' dxuxú'e zrila'. xebéaje' chíbudu ca' ládujla zrila' ca'. <sup>33</sup> Guzá'a benne' ca' zaj naca zrila' chia' chalá'a xabēla chia', na' benne' ca' zaj naca ca chíbudu ca' guzá'a le' chalá'a xéglala chia'. <sup>34</sup> Nadxa xapa' benne' ca' zaj zra' chalá'a xabēla chia': "Le da le'e, ná-cale xrlátaje lau Xra'. Le chu'u naga dxenná bea Xra', lataj na' bcueze' chee gate na' bēne' xezr la xu nigá. <sup>35</sup> Caní dxaca lawe' da guduna', na' bgágule neda'. Gubíleda', na' bēnnale da gu'a. Gudá' ca tu benne' xu'e neza, na' gulu'ule neda' lízrele. <sup>36</sup> Bxáazrjeda' zra lana' gácu'a, na' bgácu'le neda'. Quebe chawe' guzúa', na' bedajná bale neda'. Guxu'a lize xia, na' bedajná bale neda'." <sup>37</sup> Nadxa benne' xrlátaje caní xelenné': "Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxebílenú', na' bēnnantu' da gu'u? <sup>38</sup> ¿Bata blé'entu' Lue' ca tu benne' xu'e neza, na' gulú'untu' Lue' lízrentu'? ¿Bata blé'entu' Lue' dxexáazr-jenu' zra lanu', na' bgácuntu' Lue'? <sup>39</sup> ¿Bata bēnentu' quebe chawe' zu', u xu'u lize xia, na' bedajná bantú' Lue'?" <sup>40</sup> Neda' xechēba': Da li dxapa' le'e, ca da bēnle chee bēnnedu caní, benne' zaj naca dxexruj lazre', chee néda'queza' bēnle ca'.

<sup>41</sup> 'Nadxa neda', Benne' Wenná Bea, xapa' benne' ca' zaj zra' chalá'a xéglala chia': Le cuasa cuita' neda', le'e, nácale wēn da calela lau Xra'. Le chjaca lu xi' chee lataj ba xa' da nabeza na chee da xriwē', ne chee gubáz chee na ca'. <sup>42</sup> Caní dxaca lawe' da guduna', na' le'e quebe bēnnale da gawa'. Gubíleda', na' quebe bēnnale da xí'aja'. <sup>43</sup> Gudá' ca tu benne' xu'e neza, na' quebe gulu'ule neda' lízrele. Bxáazrjeda' zra lana' gacua', na'

quebe bgácule neda'. Quebe chawe' guzúa' ne guxu'a lizre xia, na' quebe bedajná bale neda'. <sup>44</sup> Nadxa benne' ca' xeléqueze' neda': "Xran, ¿bata blé'entu' Lue' dxe-dunu', u dxebilenu', u xu'u neza, u dxexá zrjenu' zra lanu', u quebe chawe' zu', u xu'u lizre xia, na' quebe gúcalentu' Lue'?" <sup>45</sup> Neda', benne' wenná bea, xeche-ba': Da li dxapa' le'e, lawe' da quebe bi benle chee binnedu caní, benne' zaj naca dxexruj lazre', quebe bi benle chee néda'queza'. <sup>46</sup> Benne' caní chjácaqueze' lataj ba xa', na' benne' xrlátaje ca' chjaque' lu xel-la' nabán da zeajlí canna.

**Dxelílaje' ájala xelele' Jesús**  
(Mr. 14.1-2; Lc. 22.1-2; Jn. 11.45-53)

**26** Gate bexuzre bchalaj Jesús caní, na' guzre' benne' ca' dxusédenē':

<sup>2</sup>—Ca ba nézquezle, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéaje' bèneache chee' lu xezr la xu Egipto, na' neda', Benne' Gulje' Bèneache, xuludé' neda' lu na' benne' xuludé' neda' xaga béguaj.

<sup>3</sup>Ca lu zra na' benne' xíchaje' ca' chee' bxruze ca', ne benne' dxuluxuzájle' da bdxixruj Moisés, ne benne' gula sina ca' chee' judío ca', belezrague' chale'aj chee' xu'u zaca chee' Caifás, bxruze blau. <sup>4</sup>Na' belílaje' ájala xelele' Jesús lu da wēn lazre' chee' xelútiē' Lē'. <sup>5</sup>Gulenné':

—Quebe gundxu na lu zra laní nigá, chee' quebe xeledábaga benne' ca' dxi'u.

**Tu nu'ula dxegu'e Jesús da dxelá zixre**  
(Mr. 14.3-9; Jn. 12.1-8)

<sup>6</sup>Zua Jesús xezre Betania lizre Simón, bènea' gúé'ene' wē' guzru'. <sup>7</sup>Bzrin tu nu'ula naga zua Jesús, nu'e tu zruágadau' da naca na xiaj alabastro, ne nazrate na da dxelá zixre da zácále' na. Gate na' dxe' Jesús ga dxelawé', na' nu'ula nigá gulu'e na xichaj Jesús. <sup>8</sup>Gate belelé'e benne' ca' dxuséde Jesús da nigá, na' belezré'e, ne gulezú lawe' dxelenné':

—¿Bizr chee' na' guzrí xí' da nigá? <sup>9</sup>Da nigá waca la gudá'u na sí'adxu da zrentē, chee' gácalēdxu benne' xache' ca'.

<sup>10</sup>Jesús benne' da nigá, na' guzre' benne' ca':

—¿Bizr chee' na' dxunle nu'ula nigá zēde? Da nigá bēne' naca na tu da xrlátaje. <sup>11</sup>Benne' xache' ca' tu zrázqueze' ládujla le'e, na' neda' quegá tu súáleza' le'e. <sup>12</sup>Ca naca da bēn nu'ula nigá, gulu'e da zixre na' bēl-la' dxen chia', naca na da xucá'ana chawe na neda' chee' zra gachia' lu xēdxu ba. <sup>13</sup>Da li dxapa' le'e, gáteteze xu-luchálaje' dizra' chawe' chia' nigá du gabí'i xezr la xu, na' zrlájqueze ca da bēn nu'ula nigá, chee' cheajlesá lazre' bèneache le'.

**Judas dxexēbe lazre' gudé' Jesús**  
(Mr. 14.10-11; Lc. 22.3-6)

<sup>14</sup>Nadxa tu benne' chazrinnu ca' dxuséde Jesús, bēnea' le' Judas Iscariote, guxíaje' xeajchálajlēne' benne' xíchaje' ca' chee' bxruze ca'. <sup>15</sup>Guzre' le':

—¿Ájate gúnnale neda' che ca' gudéa' Jesús lu na'le? Nadxa benne' ca' gulízruje' le' chi dxua dumí plata. <sup>16</sup>Ca lu zra na' guzú lau Judas dxexílaje' ájala gunē' gudé' Jesús lu na' benne' ca'.

**Da dxágudxu chee' xucúbedxu ca guca gate gute Xrá-nadxu**

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup>Zra nedxu chee' laní na' gate na' dxelawe' xeta xtila da quebe nachixre cua zichaj chee' na, benne' ca' dxuséde Jesús belezrine' lau Lē', na' buluchebe' Lē':

—¿Gazra dxaca lazru' gucuézentu' da gágudxu chee' laní pascua chee' benne' judío?

<sup>18</sup>Jesús guzre' le':

—Le chjaca lu xezre na', naga zua lizre tu benne', na' le xē'e: "Bennea' dxusédenē' dxi'u dxenné': Zra chia' gatia' ba zua gágutē, na' lizru' lue' gawa' chee' Laní Pascua tu zren nen benne' ca' dxusédeda'."

<sup>19</sup>Benne' ca' dxuséde Jesús belunē' ca da gunná bē'ene' le', na' bulucueze' da xelawe' chee' Laní Pascua.

<sup>20</sup>Gate gula chizrela, na' gudxé' Jesús ga gawē' tu zren nen benne' ca' dxusédenē'. <sup>21</sup>Dxácatē na' dx-elawe', guzre Jesús benne' ca':

—Da li dxapa' le'e, tule le'e naca bēnea' gudé' neda' lu na' benne' ca' dxelunē' da calēla.

<sup>22</sup>Nadxa benne' ca' belexewí'inele'e, na' gulezú lawe' tu tuē' dxuluchebe' Jesús:

—Xran, ¿quebe naca neda'?

<sup>23</sup>Na' bechebe Jesús:

—Bēnea' dxudé' nē'e lu xé'ena tu zren nen neda', benne' na' gudé' neda'. <sup>24</sup>Neda', Benne' Gulje' Bēneache, waxá'a naga dxal-la' gatia' ca naxúaj na lu xiche chee' Dios, san edxugúa bēnea' gudé' neda'. Cháwedxa naca la quebe gulaj bēnea'.

<sup>25</sup>Nadxa gunná Judas, bēnea' gudé' Jesús, dxenné':

—Benne' dxuséde, ¿quebe naca neda'?

Na' bechebe Jesús, gunné':

—Awe', lue' na'.

<sup>26</sup>Dxácatē dxelawe', Jesús guqué'e xeta xtila, na' guzre' Dios: "Xcalenu'." Gudé na' bzúzruje' na, na' bnézruje' na benne' ca' dxusédenē', dxenné':

—Le gagu. Da nigá naca na bēl-la' dxen chia'.

<sup>27</sup>Gudé na' guqué'e tu zriga', na' guzre' Dios: "Xcalenu'", na' bnézruje' na benne' ca', dxenné':

—Le xí'aj xúgutele da xuzru lu zriga' nigá. <sup>28</sup>Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na nē chee' benne' zantē chee' gunite lau Dios dul-la zaj nabaga benne' ca'. <sup>29</sup>Dxapa' le'e, québedxa xí'aja' ca naca xrise uva nigá ca zrindxa zra xí'aja' da cube tu zren nen le'e naga dxenná bea Xra'.

**Jesús dxenné' nna Pedro quebe núnbe'e Lē'**  
(Mr. 14.26-31; Lc. 22.31-34; Jn. 13.36-38)

<sup>30</sup>Ca gudé belul-le' chee' Dios, na' gusiá'que' zjaque' lu Xí'a Xaga Olivo Ca'. <sup>31</sup>Nadxa Jesús guzre' benne' ca':

—Xúgutele le'e gusán lázrele neda' na'a zre', lawe' da naxúaj na lu xiche chee Dios, dxenné': "Gutia' benne' dxuxúe' zrila', na' zrila' ca' xelase dínnajba'." <sup>32</sup> Gate te xebana' neda', cha'a neda' ga nababa Galilea nédxudxa ca le'e.

<sup>33</sup> Nadxa bechebe Pedro:

—Lácala xúgute benne' caní xulusán lazre' Lue', quebe guna' neda' ca'.

<sup>34</sup> Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

<sup>35</sup> Pedro guzre' Jesús:

—Lácala gatia' neda' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute benne' ca' dxusede Jesús.

**Jesús dxuchálajlene' Dios naga zaj xze' xaga olivo ca' nazí le na Getsemaní**

(Mr. 14.32-42; Lc. 22.39-46)

<sup>36</sup> Nadxa bzin Jesús nen benne' ca' dxusédené' tu lataj nazí le na Getsemaní, na' guzre' le':

—Le cue'e nigá dxácaté cha'a neda', guchálajlena' Dios.

<sup>37</sup> Jesús guché'e Pedro, ne dxúpaté zri'ine Zebedeo, na' guzú lawe' bewí'inele'ene' ne guzúalé'e stébe.

<sup>38</sup> Nadxa guzre' benne' ca':

—Dxewí'ine lázrele'a dxunte na gute na neda'. Le xegá'ana le'e nigá, ne le sua ban lazre' tu zren nen neda'.

<sup>39</sup> Nadxa Jesús guzre' zéaje' xelate' caníladxa, na' guté' sudxú'ala lu xu, ne bchálajlene' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

<sup>40</sup> Nadxa bezrín Jesús naga zaj zra' benne' ca' dxusédené', na' blé'ene' benne' ca' dxelásié', na' guzre' Pedro:

—¿Quebe gúcale le'e quíchale bchigala nen neda' tu chí'idau'ze? <sup>41</sup> Le nnaze, ne le guchálajle Dios chee quebe gun zréaje da xriwe' le'e. Da li bénne'du xu'ule dxaca lázre'le'e na, san lu be'la' dxen chee dxate ni'a na'le.

<sup>42</sup> Da gudxupe' lasa guxíaj Jesús bchálajlene' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

<sup>43</sup> Ca gudé na' bezrine', ne belé'ene' benne' ca' dxusédené', dxelásié' lawe' da ba dxelezrude' lawe' dxelaca wásele'e. <sup>44</sup> Bca'ane' benne' ca', guzre' zéaje' bchálajlene' Dios da guxunne' lasa, na' gunnáqueze' ca da ba gunné' ca'an bache. <sup>45</sup> Nadxa bezrine' naga zaj zra' benne' ca' dxusédené', na' guzre' le':

—Le gase na'a, ne le xezí' lazre'. Ba bzin zra gate neda', Benne' Gulje' Bénneache, tea' lu na' benne' dul-la

ca'. <sup>46</sup> Le chasa, ne le chu'u. Ba za bénnea' dxudé' neda'.

**Dxeleché'e Jesús ca tu benne' wen da zrinna**

(Mr. 14.43-50; Lc. 22.47-53; Jn. 18.2-11)

<sup>47</sup> Ne dxuchálajte Jesús na' gate bzin Judas. Naque' tu benne' chazrinna ca', na' zá'acale benne' zante le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchaje ca' chee bxruze ca', ne benne' gula sina ca' chee judío ca'. <sup>48</sup> Judas, bénnea' dxudé' Jesús, ba blé'ene' benne' ca' ca tu da gune' da gulé'e na nu na' naca Jesús. Gunné':

—Bénnea' gunupa' neda', Le' na'. Le che'e ca tu benne' wen da zrinna.

<sup>49</sup> Nadxa bzin Judas lau Jesús, dxenné':

—Diuzre, Benne' dxusede.

Na' bnupé' Jesús.

<sup>50</sup> Bechebe Jesús:

—Ljwezra', ¿bi chee za'u?

Nadxa gulebiga benne' ca', gulele' Jesús, na' beleché'e Le' ca tu benne' wen da zrinna.

<sup>51</sup> Tu benne' ca' dxusede Jesús guléaje' xia chee', ne guchugue' chalá'a naga bi wen zrin chee bxruze blau.

<sup>52</sup> Nadxa Jesús guzre' le':

—Begú'u xia chiu' lu zre na, lawe' da xúgute benne' dxelute benne' nen xia nalá, cá'anqueze gate le'.

<sup>53</sup> ¿Quebe nézenu' wazéqueda' neda' naba' Xra', na' Le' sél-late' na'a naga zua' da zandxa ca chazrinna cue' gubáz chee xabáa, zaj naque' zánete tu tu cue'? <sup>54</sup> Na'a che ca'an guna', ¿ájazra gaca gaca na ca da naxúaj na lu xiche chee Dios, da dxenná na caní dxal-la' gaca na?

<sup>55</sup> Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' chee quélale neda', dxunle neda' ca tu benne' gubán.

Xúgute zra gudxe'a neda' lu xudau' dxusédeda' le'e, ne quebe gudélale neda'. <sup>56</sup> Xúgute da caní dxaca na chee gaca na ca da gulenná benne' ca' buluchálajle waláz chee Dios, da na' naxúaj na lu xiche chee Dios.

Nadxa xúgute benne' ca' dxusede Jesús bulucá'ane' Le' tuzé', buluxzrúnnuje'.

**Dxezrín Jesús lau benne' ca' chee xu'u lawe' blau chee judío ca'**

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Benne' ca' gulele' Jesús guleché'e Le' lau Caifás, bxruze blau, ga na' zaj nazraga benne' ca' dxuluxuzájle'e da bdxiruj be'e Moisés, nen benne' gula sina ca'.

<sup>58</sup> Pedro zéaje nawe' Jesús zítu'la, na' bzrine' chale'aj chee lizre bxruze blau, na' guxú'e, ne gudxé'e tu zren nen bi xa'aga chee lé'ene' ájala xexuzre da dxaca na'.

<sup>59</sup> Benne' xíchaje ca' chee bxruze ca', ne benne' gula sina ca', ne xúgute benne' ca' chee xu'u lawe' blau chee judío ca' belíajle' ájala xuluzrí'a xi'e Jesús, lácala naca na da wen lazre', chee xelezéquene' xuludé'e Le' gatié'.

<sup>60</sup> Quebe bi belezrelne', lácala bezrín benne' zan benne' gulenné' da wen lazre' chee Jesús. Naga xejsete na bezrín chupa benne' wen lazre'. <sup>61</sup> Dxe-lenné':

—Benne' nigá gunné': "Wazéqueda' neda' guchínna-ja' xudau' chee Dios, na' xexuna' na lawe' chunna zraze."

<sup>62</sup> Nadxa guxasa bxruze blau, na' guzre' Jesús:

—¿Quebe bi dxexechebu'? ¿Bizra da dxelenné' chiu' lue'?

<sup>63</sup> Jesús guzúe' zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nacu' lue' Cristo, Zri'ine Dios.

<sup>64</sup> Jesús guzre' le':

—Nácaqueza' ca dxennáu' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chalá'a xabéla chee Dios nen xel-la' szren chee', na' xelá'a lu beuj bza chee xabáa.

<sup>65</sup> Nadxa bxruze blau gucheze' zra lané' chee blé'ene' quebe nabague' zria, na' gunné':

—Benne' nigá dxenné' schanni' chee Dios.

¿Náchínnedxadxu benne' xechébe'? Ba bénquezle le'e ca dizra' schanni' dxenné'. <sup>66</sup> ¿Bi dxennale le'e?

Benne' ca' gulenné':

—Nabague' zria, ne dxal-la' gatié'.

<sup>67</sup> Nadxa buluzré'e zrene' lau Jesús, ne belú'e Le', na' xebal-le' belegape' dxu'a lawe'. <sup>68</sup> Na' gulé'e Le':

—¿Nácaquezu' Lue' Cristo? Gunné xa'a nu be' Lue'.

#### Dxenná Pedro quebe núnbe'e Jesús

(Mr. 14.66-72; Lc. 22.56-62; Jn. 18.15-18, 25-27)

<sup>69</sup> Dxácaté na' dxe' Pedro chalé'ajla, na' tu nu'ula wen zrin bzrine' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

<sup>70</sup> Pedro ben chúchue' xrtizre' lówela xúgute benne' ca', gunné':

—Quebe nezda' nu chee na' dxenníu'.

<sup>71</sup> Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zre'e na':

—Cá'anqueze benne' nigá dxedálene' Jesús, benne' Nazaret na'.

<sup>72</sup> Xecha lasa ben chúchue' Pedro xrtizre', na' bzétaje' Dios, gunné':

—Quebe núnbe'a benne' na'.

<sup>73</sup> Xetú chí'idau' guca belezrín benne' zaj zre'e na' lau Pedro, na' gulé'e le':

—Da li, tuze nácaquezu' nen bénnea' lawe' da xel-la' dxenné chiu' dxunna bea na lue'.

<sup>74</sup> Nadxa guzú lau Pedro dxuzría xi' cuínazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácaté na' gudxezre xjeaj. <sup>75</sup> Nadxa xeajsá lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele'e.

#### Dxeleché'e Jesús lau Pilato

(Mr. 15.1; Lc. 23.1-2; Jn. 18.28-32)

**27** Gate guxaní, xúgute benne' xíchaje ca' chee bxruze ca', ne benne' gula sina ca' chee benne' judío ca' belune' tuze dizra' ájala xelune' chee xelútie' Jesús. <sup>2</sup> Nadxa beleché'e Le' nadxáje', ne xeajlegu'e Le' lau Poncio Pilato, benne' dxenná be'e waláz chee xezr la xu Roma.

#### Ca guca gate gute Judas

<sup>3</sup> Nadxa Judas, bénnea' bde'e Jesús, gate guque bé'ene' ba buluzría xi'e Jesús, bexíajele'ene', na' bunézruje' da chi dxua dumí plata lau benne' xíchaje ca' chee bxruze ca', ne benne' gula sina ca'. <sup>4</sup> Dxe'e le':

—Neda' bēna' dul-la lawe' da bdea' tu benne' naque' du lazre' chee gatié'.

Belexechébe benne' xíchaje ca':

—¿Bizra naca cheentu' da nigá? Chiu' lue' naca da na'.

<sup>5</sup> Nadxa Judas buzalé' dumí na' lu xudau', ne bezé'e, na' xeajxelú'u du lbé'e.

<sup>6</sup> Benne' xíchaje ca' chee bxruze ca' buluxutupe' dumí na', dxelenné':

—Quebe gaca cú'udxu dumí nigá naga xu'u dumí chee xudau', lawe' da naca na lazruj chee benne' dxute benne'.

<sup>7</sup> Nadxa belune' tuze dizra' xelá'awe' tu xezr la xu nen dumí na' da nazí le na xezr la xu chee wen xesu' zruaga, chee gaca na tu lataj naga xelegache benne' zitu'.

<sup>8</sup> Chee le' na' nazí le xezr la xu na' Xezr La Xu Chee Dxen ca lu zra na'a zra. <sup>9</sup> Caní guca na chee gaca ca da gunná Jeremías, benne' bchálaje' waláz chee Dios, gunné': "Gulequé'e chi dxua dumí plata da naca na da zaca Le' da buluzúa benne' Israel. <sup>10</sup> Nen dumí na' belá'awe' xezr la xu chee benne' wen xesu' zruaga, cáteze gunná be'e Xrana' neda'."

#### Dxezrín Jesús lau Pilato

(Mr. 15.2-5; Lc. 23.3-5; Jn. 18.33-38)

<sup>11</sup> Guleché'e Jesús lau bénnea' dxenná be'e waláz chee xezr la xu Roma, na' le' bchébe' Jesús:

—¿Nacu' Lue' Wenná Bea chee judío ca'?

Jesús gunné':

—Ca' naca na, ca dxennáu' lue'.

<sup>12</sup> Gate benne' xíchaje ca' chee bxruze ca', ne benne' gula sina ca' gulawe' zria chee Jesús, na' Le' quebe bi bechébe'. <sup>13</sup> Nadxa gunná Pilato, dxé'e Jesús:

—¿Quebe dxennu' ca da dxelenná benne' caní chiu'?

<sup>14</sup> Jesús quebe bi bechébe'. Ca'an guca bebanne bénnea', ne quebe bezrela lazre' ájala nne'.

#### Dxelechuge' chee Jesús gatié'

(Mr. 15.6-20; Lc. 23.13-25; Jn. 18.38—19.16)

<sup>15</sup> Gate dxu'u laní na', bénnea' dxenná be'e na' xu'u lawe' dxusané' tu benne' wen da zrinnaj, nútetéze benne' dxelaca lazre' benne' ca'. <sup>16</sup> Ca lu zra na' xu'u tu

benne' lizre xia, benne' wénle'e da zrinna, nazí le' Barrabás. <sup>17</sup> Ca zaj nazraga benne' ca' na', Pilato bchebe' le':

—¿Nuzra dxaca lázrele gusana' neda'? ¿Gusana' Barrabás, che Jesús, bénea' le' Cristo?

<sup>18</sup> Caní gunné' lawe' da ba nézene' buludé'e Jesús lawe' le' lawe' da dxelaque' xa lazre' chee Jesús.

<sup>19</sup> Dxácaté na' dxe' Pilato naga dxuchi'e chee béneache, na' zru'ule' gusel-le' tu benne' xeajezre' Pilato: "Quebe guchixre chiu' da naca chee benne' xrlátaje na', lawe' da guneda' xela ba dxéle, da bzúale'e na neda' stébe ne chee Le'."

<sup>20</sup> Benne' xíchaje ca' chee bxruze ca', ne benne' gula sina ca' belegú'u xe'e benne' ca' chee xelenabe' la Barrabás, ne gate Jesús. <sup>21</sup> Bénea' dxenná be'e bchálajle' benne' ca' xecha lasa. Buchebe' le':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

<sup>22</sup> Pilato bchebe' benne' ca':

—¿Bizra guna' chee Jesús, benne' le' Cristo?

Xúgute' belexechebe':

—Bde'e xaga béguaj.

<sup>23</sup> Nadxa gunná Pilato, dxe'e benne' ca':

—¿Bizra da calela nune'?

Benne' ca' gulezú lawe' dxelebezre xe'e, gulenné':

—Bde'e xaga béguaj. Bde'e xaga béguaj.

<sup>24</sup> Gate Pilato guque béene' quebe bi séquene', na' benne' zan ca' dxeledábague' le', na' gunná béene' bla' nisa, na' gudibe ne'e lówela benne' ca', dxenné':

—Quebe bi dul-la nabaga' chee xel-la' gute chee benne' xrlátaje nigá. Naca na chee le'e.

<sup>25</sup> Xúgute' benne' ca' belexechebe':

—Netu', ne zrí'inentu' nabágantú' ca naca chee xel-la' gute chee'.

<sup>26</sup> Nadxa Pilato bsane' Barrabás, ne gunná béene' beleché'e Jesús chee xelu'e Le', na' bde'e Le' chee te'e xaga béguaj.

<sup>27</sup> Nadxa benne' dxjaque' wedil-la chee bénea' dxenná be'e guleché'e Jesús, ne gulegú'e Le' lu xu'u lawe'. Belexezraga ca naca benne' dxjaque' wedil-la naga ze Jesús. <sup>28</sup> Belequé'e zra lane', ne bulugácue' Le' tu ladxe' bzawe. <sup>29</sup> Buluzú'e xíchaje' tu da naca na zruze xaga xeche', ne buluguxre' Le' tu xaga ne'e xabéla. Nadxa buluzú zribe' lau Jesús, ne belún le' chee', dxelenné':

—Gaca xabáa chiu', Wenná Bea chee judío ca'.

<sup>30</sup> Cá'aqueze buluzré'e Le' zrene', na' gulequé'e xaga da nuxru Jesús, ne guline' na xíchaje'. <sup>31</sup> Ca gudé belún le' chee Jesús, na' belexegü'e ladxe' bzawe, na' buluxugácue' Le' zra lánaqueze'. Nadxa beleché'e Le' chee te'e xaga béguaj.

### Dxuludé'e Jesús xaga béguaj

(Mr. 15.21-32; Lc. 23.26-43; Jn. 19.17-27)

<sup>32</sup> Ca gusiá'que' na', belexezrage' tu benne' xezre Cirene, le' Simón, na' gulenná béene' le' bi'e xaga béguaj chee Jesús.

<sup>33</sup> Ca'an guca belezrine' tu lataj nazí le na Gólgota, da dxennadxu, Lataj Chee Zrita Xichaj Benne' Gate. <sup>34</sup> Na' bulunézruje' da xi'aj Jesús xrise uva wal-la da nachixre na da sla', san gate bxue Jesús ca naca na, quebe gu'e na.

<sup>35</sup> Ca bexuzre benne' dxjaca wedil-la buludé'e Le' xa-ga béguaj, na' gulebéaje' da gaca bea na chee xelexel'é'e ca naca zra lana Jesús. Ca'an guca guxá ca da gunná benne' bchálaje' waláz chee Dios, gunné':

"Belexel'é'e zra lana' leze'. Gulebéaje' da gaca bea na."

<sup>36</sup> Nadxa gulebé'e dxuluzuzre' Jesús. <sup>37</sup> Buluzrí'e xichaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

<sup>38</sup> Cá'aqueze buludé'e chupa benne' gubán tu zrennen Jesús le'e xaga béguaj ca', tue' chalá'a xabéla, ne xetúe' chalá'a xéglala ga da' xaga béguaj chee Jesús.

<sup>39</sup> Benne' dxeledé'e na' dxelún le' chee Jesús. Dxulutá xíchaje', <sup>40</sup> ne dxelenné':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nacu' Zrí'ine Dios, bexetaj le'e xaga béguaj na'.

<sup>41</sup> Cá'aqueze belún la chee' benne' xíchaje' ca' chee bxruze ca', ne benne' dxuluxuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

<sup>42</sup> —Bselé' benne' xula, san quebe dxezéquene' gusel'a cuine'. Che naque' Wenná Bea Chee Xezre Israel, dxal-la' xexétaje' le'e xaga béguaj, na' chéajledxu chee'. <sup>43</sup> Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zrí'ine Dios.

<sup>44</sup> Cá'aqueze gubán ca' zaj da' xaga béguaj ca' nen Jesús gulenné' schanni' chee Jesús.

### Ca guca gate gute Jesús

(Mr. 15.33-41; Lc. 23.44-49; Jn. 19.28-30)

<sup>45</sup> Nadxa ca naca xezr la xu na' guchul-la na. Guzú lau na wagubizra ca bzrinte' na ca dxedá chunna. <sup>46</sup> La ná'queze Jesús gudxezre xe'e, dxenné':

—Elí, Elí, ¿lama sabactani?

(Da nigá zéaje na: Dios chia', Dios chia', ¿bizr chee na' nusán lazru' neda'?)

<sup>47</sup> Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

<sup>48</sup> Dxácaté na' guzá' chegu tu benne' ca', xeajxrí'e tu da dxezrupe nisa, na' ca bsebisé' na nen nupe zichaj, na' bzu'e na lawe' tu xaga, ne bzrigue' na dxu'a Jesús chee xrupe' na. <sup>49</sup> Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

<sup>50</sup> Xecha lasa gudxezre xa'a Jesús, na' gutië'. <sup>51</sup> Lu zra ná'queze ladxe' da ze lu xudau' bdxuaj na chúpala, guzú lau na xíchaje, bedxúajte na dxe'ela. Guzrú' xezr la xu, na' xiaj xre ca' gulúzruqueze na. <sup>52</sup> Gulexalaj ba, na' belexebán benne' gate ca', benne' guléajlë' da naca cheë Dios. <sup>53</sup> Ca gudé bebán Jesús, na' benne' caní belexedxúajë' lu xedxu ba, ne belexexú'ë lu xezre lá'azxa Jerusalén, naga benne' zan belelé'engë' benne' ca'.

<sup>54</sup> Nadxa benne' dxenná be'ë lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'engë' guzrú', ne xezícadxa da ca'an gulaca, na' belezrébele'ë, dxelenné':

—Da lítegage benne' nigá guque' Zri'ine Dios.

<sup>55</sup> Nu'ula zan zaj zre'ë na' dxelenné'ë zítu'la, nu'ula ca' xjácalëne' Jesús gate bezé'ë ga nababa Galilea, ne gulácalëqueze' Lë'. <sup>56</sup> Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

#### Dxulucachë' Jesús lu xedxu ba

(Mr. 15.42-47; Lc. 23.50-56; Jn. 19.38-42)

<sup>57</sup> Ca guzú lau dxaca waxrinne, na' bla' tu benne' gunní'a lë' José, benne' xezre Arimatea, benne' dxéa-jlëqueze' cheë Jesús. <sup>58</sup> Benne' nigá guxiáje' xejchá-lajlëne' Pilato, na' benabe' bël-la' dxen cheë Jesús. Pilato gunná bé'engë' xulunézruje' lë' bël-la' dxen na'. <sup>59</sup> Nadxa José bequë'ë bël-la' dxen na', na' bchelë' na tu ladxe' da naxadxe. <sup>60</sup> Nadxa gulu'ë Lë' lu ba da naca na cheëqueze José na', da bene' tu lu xiaj. Gulexruë' tu xiaj blaga zren dxu'a ba cheë Jesús, na' bezé'ë ga na'. <sup>61</sup> Gulezrá' María Magdalena, ne xetú María, zaj dxe'ë le nna' dxu'a ba na'.

#### Dxulubia dxuluxe' ba cheë Jesús

<sup>62</sup> Zeaj zra xula, da naca na zra ca gudé zra bulucueze', na' benne' xíchaje ca' cheë bxruze ca', ne benne' xudau' fariseo ca' belezrine' lau Pilato. <sup>63</sup> Dxelé'ë lë':

—Xran, dxeajsá lázrentu' ca naca da gunná benne' wën lazre' na' gate na' zuë'. Gunné' gate gaca chunna zra, na' xebanë' ládujla benne' gate. <sup>64</sup> Cheë lë na', bdixruj be'engë' benne' ca' xulubia xuluxe' ba cheë' na' cadxa gaca chunna zra, cheë quebe xelélé' benne' ca' bsédenë' xedajlexebéajë' bël-la' dxen na' chizrela, na' te na' xuluzenne' bënneache ba bebanë' ládujla benne' gate. Che ca'an gaca, na' dizra' wën lazre' bzëbe nigá gun na da zrinnaj zrendxa ca da nedxu.

<sup>65</sup> Pilato guzre' benne' ca':

—Na' zaj zra' benne' dxjaque' wedil-la xuluzuzre' na. Le chjaca le'e, ne le guxúe xanne' ba na' ca së lau séquele.

<sup>66</sup> Nadxa xjaque', xejlëxúë' ba na'. Buluchichë' tu da gunna bea na che xalaj ba na', na' bulucá'anë' benne' dxjaca wedil-la ga na'.

#### Ca guca gate bebán Jesús

(Mr. 16.1-8; Lc. 24.1-12; Jn. 20.1-10)

**28** Ca gudé cheë zra dxulupá'ana judío ca', ca za dxaní' zra nedxu, na' María Magdalena, ne xetú María na' xjaque' xejlënné'ë ba cheë Jesús. <sup>2</sup> Chadite guzrú'le'ë na lawe' da betaj tu gubáz cheë xabáa cheë Xránadxu, na' bzrine' dxu'a ba na', ne bequë'ë xíajta'a zren na' da zrua na dxu'a ba na', na' gudxé'ë lawe na. <sup>3</sup> Gubáz na' dxácate legale', ne naca chiche zra lanë' ca bezxe'. <sup>4</sup> Gate belelé'ë benne' dxjaque' wedil-la gubáz cheë xabáa na', na' belezrízene' xel-la' dx-elezrebe, ne belexegá'anë' ca benne' gate ca'. <sup>5</sup> Nadxa gunná gubáz cheë xabáa na', dxë'ë nu'ula ca':

—Quebe zrébele. Nezdá' dxexílajle Jesús, bënnea' gudé'ë xaga béguaj. <sup>6</sup> Quebe zuë' nigá lawe' da ba bebanë', cáteze na' gunné'. Le da nna'le lu ba naga gulegú'ë Lë'. <sup>7</sup> Le cheajxáquezega, le cheajezre benne' ca' bsédenë' ba bebanë' ládujla benne' gate, na' chéajje' ga nababa Galilea nédxudxa ca le'e. Na' lé'ele Lë'. Da nigá naca na da nabaga'a xapa' le'e.

<sup>8</sup> Nadxa nu'ula ca' besía'que' dxu'a ba na', zeajxaca chégüë'. Dxelezrebe', ne dxelebe'ë. Zjaque' zea-jleguzre' benne' ca' bséde Jesús. <sup>9</sup> Dxácate na' Jesús bchague' nu'ula ca', ne bgape' lë' diuzre. Belezrine' lau Jesús, dxelúe lá'anë' Lë', ne bulunide' ni'a Jesús. <sup>10</sup> Lë' guzre' nu'ula ca':

—Quebe zrébele. Le chjaca, le cheajezre bi bícha'dau' ca' dxal-la' chjaque' naga nababa Galilea. Na' xelex-elé'engë' neda'.

#### Ca da gulenná benne' dxjaque' wedil-la

<sup>11</sup> Dxácate zjaca nu'ula ca', na' benne' ca' dxjaca wedil-la gulu'ë xezre, ne buluchálajlëne' benne' xíchaje ca' cheë bxruze ca' ca da guca. <sup>12</sup> Benne' xíchaje ca' buluchálajlëne' benne' gula sina ca' cheë xelunë' tuze dizra'. Nadxa bulunézruje' benne' dxjaque' wedil-la dumí zrentë. <sup>13</sup> Dxelenné':

—Le nna le'e belelá' benne' ca' bséde Jesús na' chizrela, dxácate dxásele le'e, na' belexexú'ë bël-la' dx-en cheë'. <sup>14</sup> Che benne' dxenná be'ë na' xenne' da nigá, netu' guchálajlentu' lë', ne gucá'ana cháwentu' cheë quebe bi gaca cheële le'e.

<sup>15</sup> Nadxa benne' dxjaque' wedil-la gulez' lu ne'ë dumí na', na' besía'que' belunë' ca bache zaj nézene'. Da nigá naca na ca dxelenná judío ca' zéajte lu zra na'a zra.

#### Jesús dxesel-lë' benne' gubáz cheë' ca'

(Mr. 16.14-18; Lc. 24.36-49; Jn. 20.19-23)

<sup>16</sup> Nadxa xjaca benne' chinéaj ca' bséde Jesús, na' belezrine' lu xi'a naga ba guzre Jesús lë'. <sup>17</sup> Gate belelé'engë' Jesús, na' bulucá'ana szrene' Lë'. Bal-lë' gulaca chupa lazre'. <sup>18</sup> Nadxa Jesús gubiguë' naga zaj zra' benne' ca', na' guzre' lë':

—Neda' ba nazí' lu na'a ca naca xel-la' dxenná bea xabáa, ne lu xezr la xu nigá. <sup>19</sup> Cheë lë na' le chjaca, le



cheajchálajle benne' zaj zre'e du ca naca xezr la xu nigá, ne le cheajsédenē' ca naca da bsédeda' le'e. Le guchúe' le' nisa lu La Xra', ne lu La Zrí'inē', ne lu La Be' Lá'azxa. <sup>20</sup> Le guséde-ne' xelaque' wezúa dizra' ca naca

da ba gunná be'eda' le'e, na' neda' tu súalezqueza' le'e xúgute zra cadxa cheajsé chee xezr la xu nigá. ¡Ca'an gaca na!

# San Marcos

**Da bchalaj Juan, benne' bchue' bèneache nisa**  
(Mt. 3.1-12; Lc. 3.1-9, 15-17; Jn. 1.19-28)

**1** Caní guzú lau dizra' chawe' ca naca chee Jesu-cristo, Zri'ine Dios.  
<sup>2</sup> Bzrin lazre' da bzuaj Isaías, benne' bchálajē' waláz chee Dios, ca da gunná Dios:  
 ¡Le nna'xque nigá!  
 Neda' dxešel-la' benne' gubáz chia', benne' cuía lawē' lau Lue'.  
 Bénnea' gupé'ē neza naga teu' chee ilúnbe'e bèneache Lue'.  
<sup>3</sup> Welénqueze chi'i benne' dxebezre xē'ē le'ē xixre' lawe' lataj.  
 Dxenné': "Le gupá'a neza naga te Xránadxu lu xichaj lázrdaule.  
 Le xebéaj li neza lase chee' ca'."  
<sup>4</sup> Caní guca lawe' da bla' Juan le'ē xixre' lawe' lataj, na' bchálajē' dizra' chee Dios, ne gunné' dxal-la' xeledxúa bèneache nisa, na' bchue' le' nisa, benne' ca' belexebí'i lazre' chee gunite lau Dios dul-la da zaj nabague'.  
<sup>5</sup> Ca'an guca, guledxúaj bèneache zan lu xēzre Jerusalén, ne xúgute xēzre ca' zaj nababa Judea, na' xjaque' naga zua Juan, na' Juan nigá bchue' benne' ca' nisa lu xegu Jordán, benne' ca' gulexruálepe' dul-la da zaj nabague'.  
<sup>6</sup> Caní guca zra lana Juan. Gucue' zra lanē' ladxe' xicha zra camello, bia dxelebía bèneache, ne tu xpádxue' xide bchela le'ē. Dxawē' biche xuaj, ne dxé'aje' bzri'na'dau' chee bēzudau'. <sup>7</sup> Ca dxuchálajē' dizra' chee Dios, dxenné':  
 —Gate te chia' neda', na' xida xetú benne', bēnea' nápaxē' xel-la dxenná bea ca neda'. Quebe naca chia' xáchua' chee lechja' zrelē'. <sup>8</sup> Da lítega, neda' bchua' le'e nisa. Le' gunē' da zéajē xel-la dxedxúa nisa nigá, guzúē' Be' Lá'azxa lu xichaj lázrdaule.

**Ca da guca gate gudxúa Jesús nisa**  
(Mt. 3.13-17; Lc. 3.21-22)

<sup>9</sup> Ca da guca lu zra ca', guzá' Jesús lu xēzre Nazaret chee ga nababa Galilea, na' bzrinē' lau Juan. Juan nigá bchue' Jesús nisa lu xegu Jordán. <sup>10</sup> Gate bdxuaj Jesús lu nisa, la blé'etēne' naxalaj xabáa, ne blé'ene' betaj Be' Lá'azxa. Dxulé'e lawe' ca tu bgúgudu chiche, na' bzrinē' ca li xichaj Jesús. <sup>11</sup> Ben tu chi'i da za xabáa, da dxenná na:  
 —Lue' nacu' Zri'ina'. Nazrí'ida' Lue', ne dxezaca ba lázre'ēda' Lue'.

**Dxaca lazre' Satanás da xriwē' gun ga бага Jesús dul-la**  
(Mt. 4.1-11; Lc. 4.1-13)

<sup>12</sup> Nadxa Be' Lá'azxa guché'ē Jesús le'ē xixre' lawe' lataj. <sup>13</sup> Guzúa Jesús le'ē xixre' lawe' lataj chua zra chua xēla. Na' bzrin Satanás da xriwē', ne guca lazre' na gun na бага Jesús dul-la. Guzúa Jesús naga zaj zra' be xixre' be snia, na' gubáz chee xabáa chee Dios gulá-calēne' Jesús.

**Jesús dxezú lawe' dxusédenē' bèneache**  
(Mt. 4.12-17; Lc. 4.14-15)

<sup>14</sup> Ca gudé guxú'u Juan lizre xia, na' bzrin Jesús lu xēzre ca' zaj nababa Galilea, ne dxuchálajlēne' bèneache dizra' chawe' ca dxenná bea Dios. <sup>15</sup> Gunná Jesús:

—Ba bzrin zra. Ba zua báguzē gate nna bea Dios xēzre la xu nigá. Chee le' na', le xebí'i lazre', ne le cheajlí lazre' dizra' chawe' nigá.

**Dxenné Jesús tapa benne' wezén bela chee xelaque Le' tuze**  
(Mt. 4.18-22; Lc. 5.1-11)

<sup>16</sup> Gate gudá Jesús dxu'a nísadau' chee Galilea, na' blé'ene' Simón, ne Andrés, biche Simón na'. Benne' caní dxuluzalē' xixruj bela chee' lu nísadau' lawe' da zaj naque' wezén bela. <sup>17</sup> Na' gunná Jesús:

—Le gun neda' tuze, na' guzúa' le'e gácale wēn zrin chia'. Cheajxribe bèneache ca dxunle dxezenle bela.

<sup>18</sup> La bulucá'anate' xixruj chee' ca', na' zjácālēne' Jesús.

<sup>19</sup> Nadxa gudé Jesús xelate' ca na'la, na' blé'ene' Jacobo, ne Juan, benne' ca' zaj naque' zri'ine Zebedeo. Zaj zre'ē lu da dxedá lawe' nísadau', dxelexexunē' xixruj bela chee' ca'. <sup>20</sup> Ca gunné Jesús Jacobo, ne Juan, na' la bulucá'anate' xre' Zebedeo ne wēn zrin chie' ca' zaj zre'ē lu da dxedá lawe' nísadau', na' zjácālēne' Jesús.

**Tu benne' xu'ē be' xriwē'**  
(Lc. 4.31-37)

<sup>21</sup> Gate gul-la na gulu'ē lu xēzre Capernaum, na' gate bzrin zra dxulupá'ana benne' judío ca', guxú'u Jesús lu xu'u naga dxelúe lá'ana judío ca' Dios, ne bsédenē' benne' ca' zaj zre'ē na'. <sup>22</sup> Belexebánene' ca naca da dxuséde Jesús le' lawe' da dxuchálajē' nen dutē xel-la dxenná bea, ne quegá ca dxuluchalaj benne' ca' dxu-

luxuzájle'e da nadxixruj bea Dios. <sup>23</sup> Nadxa bla' tu benne' xu'e be' xriwe' lu xu'u na', na' gudxezre xa'a na lu dxu'a bénnea'. <sup>24</sup> Gunná na:

—¿Bizra ná pantu' chiu', Jesús, benne' Nazaret? ¿Za'u guzría xi'u netu'? Ba nézquezda' nu nacu'. Benne' Lá'azxa chee' Dios nacu'.

<sup>25</sup> Jesús gudil-le' na, gunné':

—Zríze guzúa. Bedxúaj lu bel-la' dxen chee' benne' nigá.

<sup>26</sup> Nadxa be' xriwe' na' bxrízle'e na bénnea', ne gudxezre xá'ale'e na, na' bedxúaj na. <sup>27</sup> Belexebánel'e' xúgut'e' benne' zaj zre'e na, dxel'e' ljwezre':

—¿Bizra dizra' cube da nigá? Dute' xel-la dxenná bea chee' dxenná be'ene' be' xriwe' ca', na' dxuluzúa na dizra' chee'.

<sup>28</sup> La bzrílujt'e' dizra' chee' xel-la waca chee' Jesús du ca naca xezre ca' zaj nababa Galilea.

### Jesús dxexun'e' xrna' zru'ula Pedro

(Mt. 8.14-15; Lc. 4.38-39)

<sup>29</sup> Ca belexedxúaje' lu xu'u na' chee' judío ca', na' belezrine' lizre Simón, ne Andrés. Jacobo ne Juan dxelun'e' Jesús tu zren. <sup>30</sup> Lu xu'u na' de' xrna' zru'ula Simón, xu'e' da la. La buluchálajl'e' Jesús ca dxaca chee' nu'ula nigá. <sup>31</sup> Le' la béxrut'e' ne'e, bechise' le'. La bedxúajt'e' da la da xu'e, na' bseni'e' da gulawe'.

### Jesús dxexun'e' bèneache zan

(Mt. 8.16-17; Lc. 4.40-41)

<sup>32</sup> Ca gula guzré zra na', ca guzría gubizra, na' guleché'e' xúgut'e' benne' we' lau Jesús, ne benne' ca' zaj xu'e' be' xriwe'. <sup>33</sup> Ca naca benne' xezre gulebigue' dxa xu'u naga zua Jesús. <sup>34</sup> Jesús bexun'e' zánete' benne' we' ca zaj naca xízrawe' da xu'u tu tue', ne bebáje' zane' be' xriwe' zaj xu'u bèneache ca'. Quebe be'e' lataj be' xriwe' ca' xelenné na lawe' da zaj núnbea na Le'.

### Dxuchalaj Jesús lau bèneache zaj zre'e Galilea

(Lc. 4.42-44)

<sup>35</sup> Ca bebán Jesús bál-lala, ne nachúl-late, bedxúaje' guz'e' zéaje' tu lataj naga nadache' bèneache, na' bchálajl'e' Dios. <sup>36</sup> Simón Pedro, ne benne' ca' zaj zrál'e' le' belexéilaje' Jesús. <sup>37</sup> Ca xeajlexraque' Jesús, na' gulé'e' Le':

—Xúgut'e' bèneache dxelexéilaje' Lue'.

<sup>38</sup> Na' gunná Jesús:

—Chéajdxu xezre walizre ca' chee' guchálajl'e' na' benne' ca' xrtizra Dios. Chee' le' na' belja'.

<sup>39</sup> Lu xu'u ca' naga dxelúe' lá'ana judío ca' Dios, da ca' zaj zua tu tu xezre ca' chee' ga nababa Galilea, bchalaj Jesús dizra' chee' Dios, ne bebáje' xízrawe' xriwe' ca' da zaj xu'u benne' we' ca'.

### Jesús dxexun'e' tu benne' dxé'ene' xízrawe' guzru'

(Mt. 8.1-4; Lc. 5.12-16)

<sup>40</sup> Nadxa bzrin lau Jesús tu benne' dxé'ene' xízrawe' guzru', na' bzu zrib'e', ne guta' xuene' Le', dxenné':

—Che Lue' dxaca lazru', waca xexunu' neda'.

<sup>41</sup> Jesús bexache lazre' le', na' bli ne'e, gudan'e' le'. Dxenné':

—Dxaca lazra'. Na'a dxexacu'.

<sup>42</sup> Ca gunné' caní, la becuásate' xízrawe' na', na' begá'ane' chawe'. <sup>43</sup> Nadxa Jesús bsízrene' le', na' be-sel-le' le'. <sup>44</sup> Caní gunné':

—Quebe nu xu'u ca da guca chiu'. Guxíaj lau bxruze xeajlé'e' cuinu', ne bnezruj ca naca da gunná be'e Moisés xelún benne' ca' xelexexaque'. Caní gunu' chee' xelélé'ene' ba bexacu' na'a.

<sup>45</sup> Nadxa benne' nigá, ca bezé'e, guzú lawe' dxuchálajl'e' tu tu benne' ca guca chee' bexaque'. Ca'an guca, québedxa guca chu'u Jesús zaca bal-la lau lu xezre. Begá'ane' le'e' xixre' lawe' lataj. Bèneache chee' xúgut'e' xezre ca' belezrine' lau Jesús naga zue'.

### Jesús dxexun'e' tu benne' quebe gaca se'e

(Mt. 9.1-8; Lc. 5.17-26)

**2** Ca gudé chupa chunna zra, na' guxú'u Jesús xecha lasa lu xezre Capernaum. Belénne bèneache zua Jesús tu lu xu'u. <sup>2</sup> La belezrágate' benne' zante' naga zua Jesús. Ca'an guca, québedxa guque lu xu'u, ne dxa xu'u. Bchalaj Jesús xrtizra Dios. <sup>3</sup> Na' belezrín tapa benne' lu xu'u naga zua Jesús, zaj nu'e' tu benne' quebe gaca se'e. <sup>4</sup> Lawe' da quebe gulezéquene' xelezrine' lau Jesús, lawe' da zaj zra' bèneache zante' ga na', na' gulesáluje' chju'u chee' xu'u naga zua Jesús. Na' bululétaje' da'a da zrua benne' na' quebe gaca se'e. <sup>5</sup> Lawe' da dxeque be'e Jesús ca dxeleajl'e' lazre' benne' ca' Le', na' gunné', dxé'e' bènea' quebe gaca se'e:

—Zrí'ina'dau', ba nanite lau dul-la da nabagu'.

<sup>6</sup> Zaj dxé'e bal-la benne' ga na', benne' dxuluxuzájle'e' da nadxixruj bea Dios, na' gulenné lanze': <sup>7</sup> —¿Bizr chee' na' dxuchalaj caní benne' nigá? Dxucá'ana dítaje' Xránadxu Dios. ¿Núzraqueze gaca gunit'e' lau dul-la da zaj nabaga bèneache? Tuze Dios na'. <sup>8</sup> Dxeque be'e Jesús lu lázrdawe' ca dxelenné lane' chee', na' gunné':

—¿Bizr chee' na' dxé'quele caní? <sup>9</sup> ¿Bizra dizra' quebe naca na sté'bela xapa' benne' nigá quebe gaca se'e? ¿Naca na sté'be xapa' le', ba nanite lau dul-la nabagu'? Cabí. ¿U che sté'be xapa' le', bexasa, becá'a da denu', ne bexíaj? <sup>10</sup> Na'a, chee' nézele le'e neda', Benne' Gulje' Bèneache, napa' xel-la dxenná bea lu xezr la xu gunit'e' lawa' dul-la da zaj nabaga bèneache.

Na' gunná Jesús, dxé'e' bènea'.

<sup>11</sup> —Lue' dxapa', bexasa, becá'a da'a chiu', ne bexíaj lizru'.

<sup>12</sup> Ca'an guca, la bexásate', na' bequ'é'e' da'a chee', ne bedxúaje' lau xúgut'e' bèneache. Ca'an guca, xúgut'e' benne' ca' belexebánene', na' belúe' lá'ane' Xránadxu Dios. Dxelenné':

—Cabata' ne lé'edxu gaca na ca guca da nigá.

**Dxenné Jesús benne' le' Leví**

(Mt. 9.9-13; Lc. 5.27-32)

<sup>13</sup> Ca gudé na' bedxúaj Jesús zéajé' dxu'a nísadau', na' xúgutę bėnneache lu xęzre ca' belezrine' lau Lę'. Nadxa bsėdenę' benne' ca' xrtizra Dios. <sup>14</sup> Ca gudé Jesús na', ble'ene' Leví, zri'ine Alfeo, dxę'e lataj cheę wechizruj. Na' gunná Jesús, dxę'e le':

—Ben neda' tuze.

La guxásatę Leví, guxíajlęne' Jesús.

<sup>15</sup> Ca' guca, gate gudxé' Jesús dxawę' lizre Leví, na' zánęte benne' wechizruj, ne benne' dul-la ca' gulebé'e dxelágulęne' tu zren nen Jesús, ne benne' ca' dxusėdenę'. Caní naca lawe' da zjácalę benne' zantę Jesús.

<sup>16</sup> Nadxa benne' ca' dxuluxuzájłę'e da nadxixruj bea Dios, ne benne' fariseo ca', gate belelé'ene' ca' da dxun Jesús, dxágulęne' benne' wechizruj ca', ne benne' dul-la ca', na' gulenné', dxelé'e benne' ca' dxusęde Jesús:

—¿Bizra da nigá? Dxagu dxé'ajlęne' benne' wechizruj ca', ne benne' dul-la ca'.

<sup>17</sup> Ca ben Jesús da nigá, gunné':

—Benne' chawę' ca' quebe dxelechínęne' benne' dx-exún bėnneache. Benne' wę' ca' dxelechínęne' bėnnea'. Quegá bla'a dxennéa' benne' xrlátaje ca'. Benne' dul-la ca' dxennéa'.

**Ca dxal-la' xelún bėnneache gate dxelunę' gubasa**

(Mt. 9.14-17; Lc. 5.33-39)

<sup>18</sup> Ca guca lu zra na', belún gubasa benne' ca' dxusęde Juan, ne benne' ca' dxulusęde benne' fariseo ca'. Na' belezrín benne' ca', bedajleguezre' Jesús:

—¿Bizr cheę na' dxelún gubasa benne' ca' dxusęde Juan, ne benne' ca' dxulusęde benne' fariseo ca', na' benne' ca' dxusędenu' Lue' quebe dxelunę' gubasa? ¿Bizr cheę na'?

<sup>19</sup> Na' Jesús guzre' benne' ca':

—¿Waca xelún gubasa benne' zaj zrę'e laní cheę wechaga na' dxácatę na' zua benne' wechaga na' nen le'? Dxácatę na' zua wechaga na' nen le' quebe gaca xelunę' gubasa. <sup>20</sup> Wazrín tu zra gate dua benne' wechaga na'. Lu zra na' xelunę' gubasa.

<sup>21</sup> 'Quegá nu benne' xudé'e tu ladxe' cube le'e zradxu gula. Che ca'an gunę', ladxe' cube da xudé'e wazrube xu na da gula, na' wachėzadxa na. <sup>22</sup> Cá'anqueze, quegá nu benne' quę'e xrise uva wal-la cube lu bzude xide gula. Che ca'an gunę', na' xrise uva wal-la cube na' wacheza na bzude xide gula, na' walalaj xrise uva wal-la, ne cuía xi bzude xide na'. Xrise uva wal-la cube lu bzude xide cube dxal-la' chuzruj na.

**Benne' ca' dxusęde Jesús dxelíchaję' dau cheę zrua' xti-la zra dxulupá'ana judío ca'**

(Mt. 12.1-8; Lc. 6.1-5)

<sup>23</sup> Gate gudé Jesús naga zę zrua' xtila zra dxulupá'ana benne' judío ca', ná'atę na' benne' ca' dxusęde Jesús, ca' zaj xu'e neza, gulezú lawę' dxelíchaję' dau naga zria zrua' xtila. <sup>24</sup> Nadxa benne' fariseo ca' gulé'e Jesús:

—Gunná'xque. ¿Bizr cheę na' dxelunę' zrin da quebe dxal-la' xelunę' zra dxupá'anadxu?

<sup>25</sup> Jesús guzre' benne' ca':

—¿Cabata' ne gulábale ca' da bęn David gate gudunę', ne bxázrjene' da gagu le', ne da gugawę' benne' ca' zaj zráłęne' le'? <sup>26</sup> Guxú'e lu xu'u cheę Dios gate naca Abiatar bxruze blau, na' David gudawę' xeta xtila da dxelu'e lau Dios, da quebe dxal-la' gagu benne' xula, san tuze bxruze ca' zaj naca cheę xelawę' na. Na' bnézrujtę David da gulagu benne' ca' zráłęne' le' cheę xeta xtila na'.

<sup>27</sup> Cá'anqueze gunná Jesús, dxę'e benne' ca':

—Dios gudíxruję' zra dxupá'anadxu cheę gaca ba neza cheę bėnneache, quegá bęne' bėnneache cheę xelunę' zrin cheę zra dxupá'anadxu. <sup>28</sup> Cheę le' na', ne-da', Benne' Gulję' Bėnneache, naca' xrane zra dxupá'anadxu.

**Ca guca cheę tu benne' nazrinnaj ne'e**

(Mt. 12.9-14; Lc. 6.6-11)

**3** Gate guxú'u Jesús da xula lu xu'u naga dxelúe lá'ana judío ca' Dios, zę tu benne' biu nazrinnaj ne'e ga na'. <sup>2</sup> Judío ca' buluzuzre' Jesús che xexunę' benne' wę' nigá lu zra dxulupá'ane', cheę xelezėquenę' xelagu zria Jesús. <sup>3</sup> Nadxa gunná Jesús, dxę'e benne' biu na' nazrinnaj ne'e:

—Guxasa. Guzė laduj benne' caní.

<sup>4</sup> Nadxa gunaba Jesús lau judío ca', dxę'e le':

—¿Naca cheę zra dxupá'anadxu gundxu da xrlátaje, u che gundxu da caleła? ¿Waca gupá'adxu xel-la nabán cheę nu benne', u che guzría xidxu xel-la nabán cheę'?

Na' gulezúa zrise judío ca'. <sup>5</sup> Nadxa Jesús gunná zię benne' ca'. Bewí'inęne' ca' naca xel-la lázrdau zide' cheę'. Nadxa guzre' benne' nazrinnaj ne'e:

—Guchiluj na'u.

Guchiluj ne'e, na' bexaca na. <sup>6</sup> Ca'an guca, belexedxúaj benne' fariseo ca', na' belunę' xel-la wezría nen benne' ca' zaj dę'e Herodes ájala xelútię' Jesús.

**Bėnneache zan dxelezraguę' dxu'a nísadau'**

<sup>7</sup> Nadxa gucuasa Jesús laduj benne' ca', na' guxíaję' dxu'a nísadau' nen benne' ca' dxusėdenę'. Zjácalę benne' zan ca' Jesús, benne' cheę xęzre ca' zaj nababa Galilea. <sup>8</sup> Gate belén bėnneache ca' naca da zren ca' da dxun Jesús, belezrín benne' zan lau Lę', benne' cheę xęzre ca' zaj nababa Judea, ne benne' xęzre Jerusalén, ne benne' cheę xęzre ca' zaj nababa Idumea, ne benne' gusá'aque' xechalá'a xęgu Jordán, ne benne' gusá'aque' xęzre ca' zaj naxechaj na xęzre Tiro, ne xęzre Sidón. <sup>9</sup> Cheę le' na' gunná be'e Jesús benne' ca' dxusėdenę' xulucuezę' tu da dxedá lawe' nísadau' checa xuluchide' bėnneache zan Lę'. <sup>10</sup> Caní guca lawe' da bexún Jesús benne' zantę, na' benne' wę' ca' gulebiguę' lau le' cheę cheajletę' Lę'. <sup>11</sup> Gate be' xriwę' ca' zaj xu'u bėnneache belelé'e na Jesús, na' buluzú zribe na lau Lę', ne gulebezre xa'a na. Dxelenná na:

—Lue' nacu' Zri'ine Dios.

<sup>12</sup> Jesús gudil-le' be' xriwe' ca' chee quebe xululé'e na da naca Le'.

**Jesús dxenné' chazrinnu gubáz chee'**  
(Mt. 10.1-4; Lc. 6.12-16)

<sup>13</sup> Ca gudé na' guluén Jesús tu lu xi'a, na' gunné' benne' ca' guca lazre'. Na' gulebigue' lau Le'. <sup>14</sup> Bchague' chazrinnu benne' xeluné' Le' tuze, benne' sel-le' cheajlechálaje' xrtizra Dios. <sup>15</sup> Bzue' lu na' benne' caní xel-la dxenná bea chee xellexuné' benne' we' ca', ne chee xelxebéaje' be' xriwe' ca' lu bel-la' dxen chee bénneache ca'. <sup>16</sup> Benne' chazrinnu caní zaj le':

Simón, bénnea' bzua Jesús xetú le' Pedro,  
<sup>17</sup> ne Jacobo ne Juan, biche Jacobo, benne' ca' zaj naque' zri'ine Zebedeo. (Benne' chupa caní bzua Jesús le' Boanerges, da zéaje na benne' wal-la ca guziu'.)

<sup>18</sup> Bchague' Andrés ne Felipe, ne Bartolomé, ne Mateo,

ne Tomás, ne Jacobo zri'ine Alfeo, ne Tadeo,  
ne Simón, benne' dxue lázrele' chee lazrie',  
<sup>19</sup> ne Judas Iscariote, bénnea' xudéé' Jesús lu na' benne' ca' dxeledábuqe' Le'.

**Nu benne' dxenné' schanni' chee Be' Lá'azxa**  
(Mt. 12.22-32; Lc. 11.14-23; 12.10)

Ca gudé na' bzin Jesús tu lu xu'u nen benne' ca' dxusédené'. <sup>20</sup> Xecha lasa gulebiga bénneache zan naga zua Jesús, na' québedxa dxaca lataj xelawe'. <sup>21</sup> Gate belene benne' xrtia Jesús ca da dxun Le', na' belezrine' chee xellexchéle' le'. Dxelenné':

—Quebe zua xrlátaje xichaj lázrdawe'.

<sup>22</sup> Cá'anqueze benne' ca' dxuluxuzájle' da nadxixruj bea Dios, benne' gusá'aque' Jerusalén, dxelenné':

—Benne' nigá zrague' Beelzebú, xrane be' xriwe' ca', na' ne chee xrane be' xriwe' ca' dxebeáje' be' xriwe' ca'.

<sup>23</sup> Nadxa gunné' Jesús benne' ca', na' bchálajlene' le' tu da dxulé'e na. Dxenéné':

—¿Wazeque Satanás da xriwe' xebéaj cuine na?

<sup>24</sup> Che benne' dxeleenná bea xelxaque' chupa la'a, quebe díaqueze xel-la dxenná bea chee'. <sup>25</sup> Cá'anqueze che benne' zaj zre'e tu lu xu'u xelaque' chupa la'a, quebe xeledíaqueze benne' zaj zre'e lu xu'u na'.

<sup>26</sup> Cá'anqueze, che Satanás tábaga cuínaqueze na, ne xexaca na chupa la'a, quebe díaqueze na. Wadéqueze chee na.

<sup>27</sup> 'Quebe nu seque chu'u lizre benne' wal-la chee cuané' da de chee' che quebe guchéaje' le' nédxula. Nadxa seque' cuané' da de lizre benne' wal-la na'.

<sup>28</sup> 'Da li dxenná', dxapa' le'e: Xúgute dul-la da dxeleén bénneache, ne dizra' schanni' da dxeleenné', ájateze zaj naca na, gunite láuqueze Dios chee'. <sup>29</sup> Na'a, ca naca núteteze benne' nne' schanni' chee Be' Lá'azxa, cabata gunite lau Dios chee bénnea'. Webía xí'queze'.

<sup>30</sup> Caní gunná Jesús lawe' da dxeleenné':

—Zraga Jesús da xriwe'.

**Nu naca ca xrna Jesús, ne bi biche' ca'**  
(Mt. 12.46-50; Lc. 8.19-21)

<sup>31</sup> Ca gudé na' bzin xrna Jesús nen bi biche' ca'. Gulebeze' chalé'ajla, na' gulesel-le' tu benne' nne' Jesús.

<sup>32</sup> Benne' ca' zaj zre'e cuita Jesús gulé'le' le':

—Xrna'u ne bi bichu' ca' zaj ze' chalé'ajla, dxeleenné' Lue'.

<sup>33</sup> Gunná Jesús, dxé'e benne' ca':

—¿Nézele nuzra na' xrna'a, ne bi bicha' ca'?

<sup>34</sup> Nadxa gunná' Jesús benne' ca' zaj zre'e cuita Le', na' gunné':

—Benne' caní zaj zralene' neda' nigá zaj naque' ca xrnáqueza', ne bi bicha' ca'. <sup>35</sup> Caní naca na lawe' da xúgute benne' dxeluné' ca da dxaca lazre' Dios, benne' caní zaj naque' bi bicha' ca', ne bi zana' ca', ne xrna'a.

**Da dxulé'e na ca naca chee benne' dxaza dxa'ana**  
(Mt. 13.1-23; Lc. 8.4-15)

**4** Xetú lasa guzú lau Jesús dxusédené' benne' ca' dxu'a nísadau', na' belezraga bénneache zante naga zue'. Naxánle' benne', na' ben na ba xen guxú'u Jesús tu lu da dxedá lawe' nísadau' da dxe na', na' gudxé'le' lu'ule da dxedá lawe' nísadau', na' bénneache zan ca' gulezré'e dxu'a nísadau'. <sup>2</sup> Nadxa bchalaj Jesús da dxululé'e na, na' bsédené' benne' ca' da zante. Ca dxusédené' benne' ca', na' bchálaje' caní:

<sup>3</sup> —Le xene da nigá. Tu benne' dxaza dxa'ana zéaje' guza. <sup>4</sup> Ca zéaje' dxaze', na' xejlechaze bal-la bínnedu ca' dxu'a neza. Na' belezrín bxinne, ne guláguba' bínnedu caní. <sup>5</sup> Xezícadxa bínnedu ca' xejlechaze na lu xiaj naga quebe déteca xu. Bínnedu caní belezría na lawe' da quebe déteca xu. <sup>6</sup> Ca bdxuaj gubizra, na' bzezxe na le' na, na' lawe' da quebe zaj nun lue na lu da situj, gulebizre na. <sup>7</sup> Xezícadxa bínnedu ca' xejlechaze na naga dxelezría xixre' xeche'. Xixre' xeche' caní gulegúladxa na ca le' na, na' bululule na le' na, na' quebe gulebía na da gágudxu. <sup>8</sup> Xezícadxa bínnedu ca' xejlechaze na lu xu bebe. Belezría na cháwedau', na' belegula na, ne gulezríale' na da gágudxu. Bal-la na gulebía na chi dxua tu tu na. Xebal-la na gulebía na ga xun tu tu na. Xebal-la na gulebía na tu gaxúa tu tu na.

<sup>9</sup> Gunnadxa Jesús, dxé'e benne' ca':

—Che nu benne' zua nague', dxal-la' xenne' da nigá.

<sup>10</sup> Ca gudé na', ca gucuasa Jesús cuita benne' zan ca', na' gulenaba benne' ca' zralene' benne' ca' dxuséde Jesús bi zéaje ca naca da dxulé'e nigá. <sup>11</sup> Na' gunná Jesús, dxé'e benne' ca':

—Dios dxunne' le'e lataj nézele ca naca chee da naga chee da dxenná bea Le'. Na'a, ca naca chee benne' ca' zaj zre'e cúzrela, dxuchálajlena' le' dízra'ze da dxulé'e na. <sup>12</sup> Caní dxuna' lawe' da dxeleenné'e, na' quebe dxelaca lazre' xelélé'ene'. Dxeleenné', na' quebe dxelaca lazre' xeléajni'ine', chee quebe xelxebé'i lazre', na' chu'u xel-la wenite lau chee dul-la da za nabague'.

<sup>13</sup> Na' gunnadxa Jesús:

—¿Quebe dxéajni'ile ca naca da dxulé'e nigá?

¿Ájalaqueze chéajni'ile xezícadxa dizra' ca' da dxululé'e

na? <sup>14</sup> Benne' dxaza dxá'ane' naque' benne' dxuchálaje' xrtizra Dios. <sup>15</sup> Bal-la bèneache zaj naque' ca binnedu ca' xeailechaze na dxu'a neza. Dxelenne' xrtizra Dios, na' ca dxedé na', dxezrín Satanás, na' dxucuasa na dizra' nigá da zua na xichaj lázrdau benne' ca'.

<sup>16</sup> Benne' xula ca' zaj naque' ca binnedu ca' xeailechaze na lu xiaj. Ca dxelenne' xrtizra Dios, na' dxelebéle'ene' dxelezi'e na'. <sup>17</sup> Tu chí'idauze dxelune' caní. Gate dxeledé' xel-la zi', ne zua da dxedábaga le' ne chee' xrtizra Dios, na' dxelexeuase' lawe' da quebe guxaze xrtizra Dios lú'ulete' xichaj lázrdawe' ca guca chee' binnedu ca' quebe belún lue na lu xu situj. <sup>18</sup> Benne' xula ca' zaj naque' ca binnedu ca' xeailechaze na ládujla xixre' xeché' ca'. Dxelenne' xrtizra Dios. <sup>19</sup> Lawe' da dxelebe'dxe' gunne xue da naca chee' xezr la xu nigá dxezi' xel-la gunní'a le', na' dxelezá lazre' da zante' da dxelelé'ene'. Xúgute' da caní dxelú'u na xichaj lázrdau benne' caní, na' xuluxunite na dizra' da guxú'u xichaj lázrdawe', na' quebe gaca gun na ca da dxal-la' gun dizra' nigá. <sup>20</sup> Zaj zra' benne' dxelenne' xrtizra Dios, ne dxelezi' lu ne'e na. Bal-le' zaj naque' ca binnedu ca' gulebía na chí dxua tu tu na. Benne' xula zaj naque' ca binnedu ca' gulebía na ga xun tu tu na. Benne' xula zaj naque' ca binnedu ca' gulebía na tu gaxúa tu tu na.

#### Xúgute' da nagache gulé'e lawe na (Lc. 8.16-18)

<sup>21</sup> Cá'anqueze gunná Jesús, dxe'e benne' ca':

—¿Gúadxu xi', ne guzúadxu na zran xi'ina u che zran ga dxásedxu? Quebe gundxu ca', san guzúadxu na sibe chee' gusení na. <sup>22</sup> Xúgute' da nagache gulé'e lawe na' xúgute' da xu'u xichaj lázrdaudxu wénqueze na. <sup>23</sup> Che nu benne' zua nague', dxal-la' xenne' da nigá.

<sup>24</sup> Cá'anqueze gunná Jesús:

—¡Le xene xanne' ca da dxénele! Ca da dxudxíxrele, nen le' na' gudxíxrequeze Dios chee', na' gúnnadxe' le'e dxénele. <sup>25</sup> Caní gaca na, benne' nape' da naca chee' xrtizre'e, gunézrujdxé' chee', na' benne' quebe bi nape', ca da dauze da nape' xecá'ate' na.

#### Da dxulé'e na ca naca chee' binne da dxegula na

<sup>26</sup> Na' gunnáqueze Jesús:

—Da dxenná bea Dios naca na ca da dxaca gate tu benne' dxaze' binnedu ca' lu xu. <sup>27</sup> Dxásie' chizrela, dxase' te zra, na' binnedu caní dxelezi' na, ne dxelegula na, ne quegá nézene' ájala. <sup>28</sup> Dxaca na caní lawe' da nácaqueze ca da dxun xezr la xu. Nedxu dxebe' na xrelegue na, nadxa za dau, na' bzébeté dxebe' na binnedu ca' lu dau. <sup>29</sup> Gate ba gulegula xixredu caní, na' dxechugue' na lawe' da ba bzrin zra xequé'e na.

#### Da dxulé'e na ca naca chee' binne mostaza (Mt. 13.31-32; Lc. 13.18-19)

<sup>30</sup> Cá'anqueze gunná Jesús:

—¿Ájala gutil-la lébedxu da dxenná bea Dios, u che bila dizra' da dxulé'e na cá'adxu da gutil-la lébedxu le na? <sup>31</sup> Naca na ca tu binne mostaza da dxázadxu lu xu.

Binnedu nigá nácadxa cuide' ca da zaj nnita lu xezr la xu. <sup>32</sup> Gate ba gúzadxu na dxegula na, na' dxaca na da zrendxa ca xixre' ca' da zaj naca na ba dagu, na' dxebe' zruze na zren, na' dxácaté dxelebe' binnedu ca' zran zruza chee' na.

#### Ca bgune Jesús da dxulé'e na caní (Mt. 13.34-35)

<sup>33</sup> Caní bse' Jesús benne' ca' xrtizra Dios, na' bchálaje' zánete' da dxululé'e na caní, cadite' guléajni'ine'. <sup>34</sup> Quebe bchálaje' da xula. Tuze dizra' da dxulé'e na bchálajlene' benne' ca'. Bzájla'adxe' ca naca na benne' ca' dxusédené'.

#### Jesús dxebeche zri'e be' bdunu' (Mt. 8.23-27; Lc. 8.22-25)

<sup>35</sup> Lu zra ná'queze, ca gul-la chizrela, na' gunná Jesús, dxe'e benne' ca' dxusédené':

—Chéajdxu xecha la'a nísadau'.

<sup>36</sup> Besá'aque' naga zaj zra' benne' zan ca', na' guleché'e Jesús lu da dxedá lawe' nísadau' naga ba dxé'queze', na' gulennita xezícadxa da ca' dxeledá lawe' nísadau' ca' naga zaj zra' benne', na' xjácálene' le'. <sup>37</sup> Nadxa guzú lau dxaca tu be' bdunu' lu nísadau' na', na' dxu'ute' nisa lu da dxedá lawe' nísadau'. Caní guca guzú lau dxezra' nisa lu da dxedá lawe' nísadau'. <sup>38</sup> Jesús de' dxasi'e lu xcúgü'e naga nácadxa sibe lu da dxedá lawe' nísadau'. Na' bulusebané' Jesús, dxelé'e le':

—Benne' weséde, ¿quebe dxe'u gunne xue wátedxu nate ca na'a?

<sup>39</sup> Nadxa guxasa Jesús, na' bchálajlene' be' bdunu', ne nísadau'. Dxenné':

—¡Gudxé zri'! ¡Zrize guzúa!

Gudxé zri' be' bdunu', na' nísadau' guzúa zri na.

<sup>40</sup> Nadxa gunná Jesús, dxe'e benne' ca' dxusédené':

—¿Bizr chee' na' dxezrebe'le'e le'e? ¿Quebe dxeajlí lázrele Dios?

<sup>41</sup> Belezrebe'edxe', ne dxelé' ljwezre':

—¿Núzraqueze benne' nigá? Dxuluzúa dizra' be' bdunu', ne nísadau' chee'.

#### Tu benne' xezre Gadara, benne' xu'e be' xriwe' (Mt. 8.28-34; Lc. 8.26-39)

**5** Bezrín Jesús, tu zren nen benne' ca' dxusédené' xecha la'a nísadau' lu xezr la xu chee' benne' Gadara ca'. <sup>2</sup> Ca bedxúaj Jesús lu da dxedá lawe' nísadau', na' bzrin tu benne' xu'e be' xriwe' naga zua Jesús. Bedxúaje' lu bluaj naga zaj nagache benne' gate ca'. <sup>3</sup> Benne' biu nigá zúaqueze' lu bluaj na'. Quebe nu dxezúe guchéaj lebe' chalásaze, lácala nu guchéaj lebe' nen du xia. <sup>4</sup> Zane' lasa buluchéaje' lebe' nen du xia na'abe', ne ní'abe'. Bzúzrujbe' du xia ca', na' quegá nu guzeque nna bé'ene' lebe'. <sup>5</sup> Dxedáquezebe' te zra chizrela lu xi'a ca', ne lu bluaj ca' naga zaj nagache benne' gate. Dxebezre xa'abe', ne dxeajcházebe' lu xiaj ca', dxun we' cuínabe'. <sup>6</sup> Gate ble'ebe' zítu'la ba za

Jesús, na' guzá chégube', xeajzú zríbebe' lau Lẹ'. <sup>7</sup> Gunné zizraj be' xriwe' xu'ube', dxę na Jesús:

—¿Bizra dxaca chiu' nen neda', Jesús, Zri'ine Dios szrentę? Lu La Xránadxu Dios, dxata' xueda' Lue', quebe gudéu' neda' xel-la zi'.

<sup>8</sup> Caní gunná na lawe' da gunná Jesús, dxęę na:

—Lue', da xriwe', bedxúaj lu bel-la' dxen cheę benne' nigá.

<sup>9</sup> Nadxa gunaba Jesús, dxęę na:

—¿Bi leu'?

Na' bechebe na:

—Da Zan lea', lawe' da naxantu'.

<sup>10</sup> Guta' xue na Jesús cheę quebe xesel-lẹ' na, ne quebe gucuase' na zitu' lu xęzr la xu na'. <sup>11</sup> Zaj zra' gagu lu xi'a na' tu cue' cuche zaj zraba' dxeláguba'.

<sup>12</sup> Gulata' xue be' xriwe' ca' Jesús, gulenná na:

—Besel-la netu' lu cuche ca'. Bęna lataj chú'untu' lę-ba'.

<sup>13</sup> Nadxa Jesús bęę na lataj. Na' be' xriwe' ca' beledxúaj na lu bęnea', na' gulú'u na cuche ca'. Zaj nácaba' ca galaj gaxúa cuche ca', na' buludxixre cuína-ba' tu chejéa. Xeajlechástęba' lu nísadau', ne gulátęba' lu nisa na'.

<sup>14</sup> Benne' ca' dxuluxúę' cuche ca' buluxuzrúnnuje', na' xeajlezenne' benne' zaj zręę lu xęzre, ne benne' zaj zręę lęę xixre'. Na' belezrín benne' ca' naga zua Jesús, benne' ca' belenne' ca da ba guca. <sup>15</sup> Gate belezrín benne' ca' naga zua Jesús, na' belelé'ene' bęnea' guxú'ube' be' xriwe' ca', dxe'ebe' ga zua Jesús, nácube' tu ladze', ne ba bezúa xrlátaje lu xichaj lázrdaube', na' gulezrebe'. <sup>16</sup> Benne' ca' belelé'e ca naca da guca cheę benne' guxú'ube' be' xriwe' ca', ne ca guca cheę cuche ca' buluchálaje' cheę da ba guca. <sup>17</sup> Nadxa benne' xęzre ca' gulata' xuene' Jesús xedxúaje' lu xęzr la xu cheę'.

<sup>18</sup> Ca bexú'u Jesús lu da dxedá lawe' nísadau', na' bęnea' guxú'ube' be' xriwe' ca' guta' xuebe' Jesús guę' lataj chéajlębe' Lẹ'. <sup>19</sup> Quebe bę' Jesús lębe' lataj, san dxęę lębe', gunné':

—Bexiaj lazru', ne xeajchálaję xrtiu' ca' ca naca da zren ca' da bęn Xranu' nen lue', ne ca bexache lazre' lue'.

<sup>20</sup> Nadxa bezá'abe' zexíajbe', ne guzú laube' dxuchálajbe' lu xęzre ca' zaj nababa Decápolis ca naca da zren da bęn Jesús nen lębe'. Belexebánelęę xúgutę benne' zaj zręę xęzre ca'.

**Bi nu'ula cheę Jairo, ne nu'ula na' xeajté' zra lana Jesús**  
(Mt. 9.18-26; Lc. 8.40-56)

<sup>21</sup> Begüén Jesús lu da dxedá lawe' nísadau', na' bezrine' xecha la'a nísadau'. Belezrín benne' zan naga zę', na' Lẹ' begá'anę' dxu'a nísadau'. <sup>22</sup> Ca'an guca bzrin tu benne' xíchaję cheę xu'u naga dxelúe lá'ana judío ca' Dios, benne' lę' Jairo. Gate blé'ene' Jesús, na' bzu zribe' zran ni'ę. <sup>23</sup> Guta' xuene' Jesús, dxęę Lẹ':

—¿Bi nu'ula chia' ba dxátebe'! ¿Gudá, bzę na'u lębe' cheę xexácabe', ne xaca banbe'!

<sup>24</sup> Nadxa guxíaję Jesús bęnea', na' bęneache zan xjácálene' Lẹ', ne dxuluchíteę' Lẹ'. <sup>25</sup> Ládujla bęneache ca' za tu nu'ula quebe chawe' zuę', ba zeaj chazrinnu iza nape' wę' dxen. <sup>26</sup> Da zren da bulusaca benne' dxelexún bęneache ca' nu'ula nigá, na' bache bęn dítaję' xúgutę da nape'. Quegá bi gúcale na lę', san bzáladxu wę' cheę'. <sup>27</sup> Gate ben nú'ula' dxuluchalaj bęneache ca naca cheę Jesús, na' bzrine' cúzrula Jesús ládujla bęneache, na' xeajté' zra lana Jesús.

<sup>28</sup> Caní bęne' lawe' da gunné' lu xichaj lázrdawe': Cun cheajtaza' zra lana Jesús, na' xexácatea'. <sup>29</sup> La guléate xel-la wę' chię', ne la guque bé'etęne' ba bexaca bel-la' dxen cheę' cheę xízrawę' na'. <sup>30</sup> Gúquebe'e Jesús bęn zrin xel-la waca cheę'. Cheę lę na' bexéčaję', dxennęę bęneache ca', na' gunábene' lę':

—¿Nuzra bedajtá zra lana'?

<sup>31</sup> Nadxa benne' ca' dxusęde Jesús gulęę Lẹ':

—Dxelé'equęznu' bęneache zan dxuluchię' Lue'.

¿Bizr cheę na' dxenabu': "Nuzra bedajtá neda'?"

<sup>32</sup> Jesús guzúę' dxennęę cuitę' cheę lé'ene' nua' bedajtá Lẹ'.

<sup>33</sup> Nadxa guxíaj nu'ula nigá, dxezrzíę' dxezrebe' lawe' da nézene' ca da ba guca cheę', na' bzu zribe' lau Jesús, na' gunné' ca naca da li. <sup>34</sup> Nadxa gunná Jesús, dxęę nu'ula':

—Bi nú'uladau', ba bexacu' lawe' da guxeajlį lazru' neda'. Bexíaj, cútudxa zrebu'. Ba bexácateęquezu' cheę xízrawę' da guzxacu'.

<sup>35</sup> Ne dxuchálaję Jesús gate belezrín benne' gusá'aca lizre benne' xíchaję cheę xu'u naga dxelúe lá'ana judío ca' Dios, na' gulęę xra nú'uladau' na':

—Bi nú'uladau' chiu' ba gútebe'. ¿Bizr cheę na' dxunu' zędedxa benne' dxusęde nigá?

<sup>36</sup> Gate Jesús benne' ca da gulenná benne' caní, dxęę benne' xíchaję cheę xu'u na', gunné':

—Quebe zrebu'. Guxeajlį lazre' neda'.

<sup>37</sup> Quebe bęę lataj chjácále bęneache zan ca' Lẹ'. Tuze bęę lataj gusá'acalę Pedro, ne Jacobo, ne Juan, biche Jacobo nigá, nen Lẹ'. <sup>38</sup> Ca belezrine' lizre benne' xíchaję na', na' ble'e Jesús bęneache dxelún schaga. Dxelebezre benne', ne dxelebezre xa'ate'. <sup>39</sup> Nadxa guxú'u Jesús lu xu'u, na' dxęę benne' ca', gunné':

—¿Bizr cheę na' dxunle schaga? ¿Bizr cheę na' dxebézre? Quegá nate bidau' nu'ula. Dxásezebe'.

<sup>40</sup> Belún lala benne' ca' cheę'. Nadxa Jesús bebéaję' xúgutę benne' ca', na' guchęę xrabe', ne xrna bidau' nigá, ne benne' ca' zjácálene' Lẹ', na' guxúę naga de nú'uladu na'. <sup>41</sup> Bęxrue' na'be', ne guzrę' lębe':

—Bi nú'uladau', lue' dxapa': ¿Guxasa!

<sup>42</sup> La bexásate nú'uladu na', na' guzátębe' lawe' da ba zéajbe' chazrinnu iza. Na' benne' ca' zaj zręę lu xu'u na' belezrébelęę. <sup>43</sup> Jesús gunná bé'ene' benne' ca' cheę quebe nu xelęę ca da bęne'. Nadxa guzré' benne' ca' xulugawę' nú'uladu na'.

## Dxezrín Jesús lazrië' da nacan xezre Nazaret

(Mt. 13.53-58; Lc. 4.16-30)

6 Jesús bezé'e naga zuë', ne bezrine' lazrië', na' benne' ca' dxusédene' xjácálene' Le'. <sup>2</sup> Ca gula zra dxulupá'ana judío ca', na' bezú lau Jesús dxusédene' benne' ca' zaj zre'e lu xu'u naga dxelúe lá'ana judío ca' Dios. Bénneache zan belenne' cheë', ne belexe-bánene', dxelenné':

—¿Gazra bséde benne' nigá ca nácate? ¿Bizra xel-la sina da nunezruj Le', ne xel-la waca zren caní da dxune'? <sup>3</sup> ¿Quegá benne' nigá gubizre xaga, zri'ine María, na' benne' biche' ca' zaj naque' Jacobo, ne José, ne Judas, ne Simón, na' nu'ula zane' ca' cá'anqueze zaj zrálene' dxi'u?

Cheë le' na' quebe guléajle'e cheë Jesús. <sup>4</sup> Na' gunná Jesús, dxé'e benne' ca':

—Xúgutë benne' dxelape' ba lá'ana tu benne' dxuchálaje' waláz cheë Dios, san benne' waláxr cheë' ca', ne benne' xrtië' ca', ne benne' zaj zre'e xu'u lizre' quebe dxelape' le' ba lá'ana.

<sup>5</sup> Cheë le' na' quebe ben Jesús lazrië' na' netú xel-la waca zren. Tuze bexune' bál-laze benne' wë' gate na' guxrúa ne'e xichaj benne' ca'. <sup>6</sup> Bebane Jesús lawe' da quebe guléajle'e cheë'.

## Jesús dxusel-le' benne' ca' dxusédene' cheajlechálaje' xrtizra Dios

(Mt. 10.5-15; Lc. 9.1-6)

Ca gudé na' bedé Jesús xecha lasa xézredu ca' zaj nnita gáguze, na' bsédene' benne' zaj zre'e ga na'.

<sup>7</sup> Gunné' benne' chazrinnu dxusédene', ne guzú lawe' dxesel-le' le' chupa weaje', ne bnézruje' le' xel-la waca xulucuae' be' xriwe' ca' lu bel-la' dxen cheë bénneache ca'. <sup>8</sup> Gunná bé'ene' le' quebe bi xelu'e cheë la neza, con tuze xaga da xuluchiche'. Quebe xelu'e xixruj xeta, ne xeta, ne dumí. <sup>9</sup> Waca xululéaje' zrele', ne xelácuë' tu cueze zra lanë'. <sup>10</sup> Gunnadxa Jesús, dxé'e benne' ca':

—Gate na' chu'ule le'e tu lu xu'u cheë benne', waca xegá'ana'le lizre bénnea' ca' zrindxa zra xezá'ale lu xezre na'. <sup>11</sup> Che zrinle tu lu xezre naga quebe xuluxé lawe' le'e, ne quebe xelénene' cheële, waca xezá'ale, na' cuíbetële bxrte xu da dxedá' ní'ale. Da nigá gaca na tu da dxulé'e na zaj nabaga benne' xezre na' zria, benne' dxeledábaga' le'e. Da li dxennéa', lu zra guchi'a Dios cheë bénneache, waxache' gácadxa da ba xa' da xeledé benne' xezre Sodoma, ne benne' xezre Gomorra quézcala da xeledé benne' xezre ca' naga quebe buluzé nague' cheële.

<sup>12</sup> Nadxa gusá'aca benne' ca' dxuséde Jesús, na' buluchálajle'ne' bénneache cheë xelexebí'i lazre'. <sup>13</sup> Cá'anqueze belexebéaje' zánete be' xriwe' ca' lu bel-la' dxen cheë bénneache ca', na' gulegüë'e da za zane' benne' wë', na' belexexaue'.

## Ca gute Juan, benne' bchue' bénneache nisa

(Mt. 14.1-12; Lc. 9.7-9)

<sup>14</sup> Na' ben wenná bea Herodes ca naca da zren ca' da dxun Jesús lawe' da guzú dizra' cheë'. Bal-la benne' dxelenné':

—Juan, benne' bchue' bénneache nisa, bache bebane' ládujla benne' gate, na' cheë le' na' nape' xel-la waca zren nigá.

<sup>15</sup> Benne' xula dxelenné':

—Elías, bénnea' bchálaje' waláz cheë Dios benne' nigá.

Benne' xula dxelenné':

—Nácalje' bénnea' dxal-la' xelá' guchálaje' waláz cheë Dios, che nácalje' benne' gulasa, benne' bchálaje' waláz cheë Dios.

<sup>16</sup> Ca ben Herodes da caní, na' gunné':

—Benne' nigá naque' Juan, bénnea' gunná be'eda' neda' gulechugue' xíchaje'. Benne' nigá ba bebane' ládujla benne' gate.

<sup>17</sup> Caní gunná Herodes lawe' da gunná be'e le' buluzé' Juan na' lizre xia, ne buluchéaje' le' du xia, da na' bënë' lawe' da dxezrá'a Herodías le'. Herodías nigá guque' zru'ula Felipe, benne' biche Herodes. Herodes nigá bequë'e nu'ula' cheë guque' zru'ule'. <sup>18</sup> Gunná Juan, dxé'e Herodes:

—Quebe dxal-la' súa'enu' zru'ula bi bichu'.

<sup>19</sup> Cheë le' na' Herodías guzré'e Juan, ne guca lazre' gútete' le'. Quebe guca cheë' <sup>20</sup> lawe' da neze Herodes naca Juan nigá tu benne' xrlátaje, ne benne' naque' tuze nen Dios, na' bezrebe' le'. Cheë le' na' quebe be'e lataj Herodías na' gútete' Juan nigá, na' lácala quebe guxéajni'ine' ca naca xúgutë da bchalaj Juan, Herodes nigá bze nague' cheë' du lazre'. <sup>21</sup> Herodías na' bzrélene' ájala gune' ca da dxaca lazre' gate na' guxú'u laní ca gula la Herodes. Gulé'aj gulagu benne' xíchaje ca', ne benne' dxelenná be'e lu wedil-la, ne benne' zaj naque' blau lu xezre ca' zaj nababa Galilea. <sup>22</sup> Nadxa guxú'u bi nu'ula cheë Herodías na' lu xu'u naga dxelé'aj dxelawe', ne bxá'abe' lau benne' ca'. Bezaca ba lazre' Herodes ca bxá'abe', ne tuze ca belún benne' ca' zaj zra' dxelawe' tu zren nen le'. Gunná wenná bea Herodes, dxé'e nu'ula cuide' nigá:

—Gunaba neda' ca da dxedá'enu', na' gunna' na chiu'.

<sup>23</sup> Guchebe lazre' Herodes, ne bzétaje' Dios gunézruje' bíteteze da nábabe', lácala nábabe' gáchajte naga dxenná be'e le'.

<sup>24</sup> Nadxa nu'ula cuide' nigá bdxúajbe', xejchálajlebe' xrnabe', gunabe':

—¿Bizra naba'?

Gunná xrnabe':

—Gunaba xichaj Juan, bénnea' bchue' bénneache nisa.

<sup>25</sup> La guxu'ute nu'ula cuide' nigá naga zua wenná bea, na' gunabe', dxé'ëbe' le':

—Dxaca lazra' gunnu' neda' na'a tu lu xé'ena xichaj Juan, bénnea' bchue' bénneache nisa.



<sup>26</sup> Nadxa wenná bea nigá bewí'inele'ē, ne lawe' da ba bzétaje' Dios, na' belénete' benne' ca' da gunné', quebe guca lazre' guzrunē' ca' da gunaba bi nu'ula nigá.

<sup>27</sup> Chee' le' na' gusel-la wenná bea tu benne' dxeje' wedil-la, ne gunná bé'ene' le' cheajxrí'ē xichaj Juan na'.

<sup>28</sup> Guxíaj benne' nigá lu xu'u lizre xia, na' bdxixre' xichaj Juan na', ne bexu'ē na tu lu xé'ena. Bnézrujtē' na bi nu'ula na', na' lebe' bnézrujbe' na xrnabe'.

<sup>29</sup> Gate gulénneze benne' ca' da nigá, benne' ca' bsēde Juan, na' xea'jlexexrí'ē be'l-la' dxen chee', na' xea-jlecá'chete' na.

### Jesús dxugawe' chi xun gaxúa benne' biu

(Mt. 14.13-21; Lc. 9.10-17; Jn. 6.1-14)

<sup>30</sup> Ca gudé na' belexezrín benne' gubáz ca' chee' Jesús naga zua Le', ne buluzenne' Le' xúgute' ca da belunē', ne ca da bulusédenē' benne' ca' naga xjaque'. <sup>31</sup> Nadxa gunná Jesús, dxē'ē benne' ca':

—Le chu'u. Chéajdxu xezí' lázredxu chadite' naga xu'u lataj.

Gunné' caní lawe' da dxesá'aca benne' dxesá'aca, ne dxelexezrín benne' dxelexezrín, na' quebe dxelu'ē lataj xelawe'. <sup>32</sup> Nadxa Jesús ne benne' gubáz chee' ca' belexexú'ē leze' tu lu da dxedá lawe' nísadau', na' belezrine' tu lataj naga quebe nu chilá' benne'.

<sup>33</sup> Benne' zan ca' belelé'ene' ca' zjaque', ne belex-exúnbe'ē Jesús, na' gusá'aca chégüē' xjá'aque' na'. Benne' xúgute' xezre ca' belezrine' lataj na' nédxudxa ca Jesús. <sup>34</sup> Gate bedxúaj Jesús lu da dxedá lawe' nísadau', na' blé'ene' benne' zante', ne bexache lazre' le' lawe' da zaj zre'ē ca zrila' ca' quebe zua benne' dx-uxúē' leba'. Na' guzú lawe' dxusédenē' benne' ca' da zante'. <sup>35</sup> Ca gula guzré', belezrín benne' ca' dxusēde Jesús lau Le', na' gulé'ē Le':

—Ba dxaca waxrinne, na' quegá nu lizre benne' zua lataj nigá. <sup>36</sup> Besel-la benne' caní chee' cheajxaque' xezre ca' zaj nnita gálaze chee' xelez'ē xeta xelawe' lawe' da quebe bi dē nigá da xelawe'.

<sup>37</sup> Na' gunná Jesús, dxē'ē le':

—Le gunezruj le'e da xelawe'.

Na' gulenné', dxelé'ē Jesús:

—¿Waca chéajntu' cheajgá'untu' xeta xtila, quízrujn-tu' lazruj chee' chupa gaxúa zra chee' gugágudxu benne' zan caní?

<sup>38</sup> Na' gunná Jesús, dxē'ē le':

—¿Bal-la xeta xtila ná'pale? Le cheajnná'.

Ca gulénézene', na' gulenné', dxelé'ē Jesús:

—Gazxu' xeta xtila, ne chupa bélé'adau'.

<sup>39</sup> Nadxa gunná be'e Jesús gulebé'e xúgute' bēnneache ca' tu cue' weaj lu xrgu'ie xa'a. <sup>40</sup> Na' gulebé'ē tu cue' weaj, du tu gaxúē', du chi xunē'. <sup>41</sup> Nadxa Jesús bēxruē' gazxu' xeta xtila ca', ne da chupa bélé'adau'. Na' guchisa lawe' xabaala, gunabē' lau Dios gun la'azxe' na, na' bzúzruje' xeta xtila ca', ne bnézruje' na benne' ca' dxusédenē' chee' gulísiē' na chee' benne' ca'. Cá'an-queze gudísiē' da chupa bélé'adau' chee' xúgute' benne' ca'. <sup>42</sup> Na' gulagu xúgute' ne gulélajte'. <sup>43</sup> Nadxa bulux-utubē' ca da begá'ana chee' xeta xtila, ne chee' bélé'adu

ca', na' guca chazrinnu xcuite xca'a. <sup>44</sup> Benne' ca' gu-lawe' xeta xtila ca' zaj naque' chi xun gaxúa benne' biu.

### Dxezá Jesús lawe' nísadau'

(Mt. 14.22-27; Jn. 6.16-21)

<sup>45</sup> La gunná bé'ete' Jesús benne' ca' dxusédenē' gulu'ē lu da dxedá lawe' nísadau' chee' gulelague' nísadau' na' nédxudxa ca Le', chee' xelezrine' lu xezre Betsai-da dxá'cate' Le' dxuzé' dizra' bēnne' ca'. <sup>46</sup> Ca gudé bze' dizra' benne' ca', na' guzé'ē zéajē' lu xi'a zeajchálajlē'ē Dios. <sup>47</sup> Gate gula guxrínnequeze, ba zeaj da dxedá lawe' nísadau' na' gachaj lawe' nísadau', na' begá'ana Jesús tuzē' lu xu dxu'a nísadau'. <sup>48</sup> Gate blé'ene' ca dx-elezraga lawe' dxulusé'ē da dxedá lawe' nísadau' lawe' da za be' na', dxuzrí'i na da dxedá lawe' nísadau' na', na' gula balá' gubiga Jesús naga zaj zre'ē, dxezē'ē lawe' nísadau' na', ne guca lazre' téē' lau da dxedá lawe' nísadau' na'. <sup>49</sup> Gate belelé'ene' Le' zē'ē lawe' nísadau' na', gulé'quene' da dxedá dxēla, na' gulebezre xē'ē. <sup>50</sup> Belelé'e xúgute' ca dxezē'ē lawe' nísadau', na' belezré'bele'ē. Na' gunná Jesús, dxē'ē benne' ca' dxusé-denē':

—Ga zrēbele. Neda' nigá. Le gun chuchu lázrele.

<sup>51</sup> Nadxa guluén Jesús lu da dxedá lawe' nísadau' na-ga zaj zre'ē, na' guleza be' na'. Na' guleque zréajene', ne belexebánele'ēne', <sup>52</sup> lawe' da quebe ne xelájni'ine' ca naca xel-la waca zren da bēne' chee' xeta xtila ca', lawe' da ne dxun zide' xichaj lázrdawe'.

### Dxexún Jesús benne' we' ca' lu xezre Genesaret

(Mt. 14.34-36)

<sup>53</sup> Gate na' gulelague' nísadau', belezrine' lu xezr la xu chee' benne' xezre Genesaret, na' buluchéajē' xaga da dxedá lawe' nísadau' dxu'a nísadau' na'. <sup>54</sup> Ca beledxúajē' lu da dxedá lawe' nísadau', la belexexún-beate' bēnneache ca' Jesús. <sup>55</sup> La gusá'aca chégute' zjaque' lu xezre ca' xea'jlexrí'ē benne' we' ca' tu tu lu ta'a, na' zeajlegüē'ē le' naga zaj nézene' xedé Jesús. <sup>56</sup> Gátetēze xézredu ca', ne xezre ca', ne le'ē xixre' naga dxedé Jesús, na' buluzúē' benne' we' ca' du la neza, ne gulata' xuene' Jesús gunézruje' lataj cheajletaze' zra lanē', na' xúgute' benne' ca' xea'jletē' zra lanē' belexé'á-cate'.

### Da dxucá'ana sban bēnneache

(Mt. 15.1-20)

**7** Benne' fariseo ca' nen bal-la benne' dxuluxu-zájle'ē da bdxixruj be'e Moisés, benne' gusá'aque' Jerusalén, belezrine' lau Jesús. <sup>2</sup> Benne' caní belelé'ene' ca dxelún bal-la benne' dxusēde Jesús, dxelawe' xeta ne quebe zaj naxibe ne'ē ca dxelenná bea benne' xudau' ca'. Chee' le' na' gulenná benne' Jerusalén ca':

—Zaj naca sban na' benne' ca' dxusēde Jesús. Nadxa gulez'í tizre' le'.

<sup>3</sup> Caní gulenná benne' ca' lawe' da zjácale' benne' xudau' fariseo ca', ne xúgute' benne' judío ca' ca naca da belún xra xtau benne' ca', quebe dxelawe' xeta che quebe zaj naxibe ne'ē zane' lasa. <sup>4</sup> Gate zjaque' lawe'

xi'a wa'u, ca dxelexezrine' quebe dxelawe' xeta che quebe xelibe ne'e ca zaj nadxixruj bea benne' xudau' ca'. Cá'anqueze dēdxa da zantē da zjácālēnē', ca xex-adxe zriga' da dxelé'ajē', ne zruaga, ne zriga xé'ena, ne da naga dxelásiē'. <sup>5</sup> Nadxa benne' fariseo ca', ne benne' ca' dxuluxuzájle'ē da bdxixruj be'e Moisés gu-lenábene' Jesús:

—¿Bizr chee na' quebe zjácālē benne' ca' dxusédenu' ca naca da gulún benne' gula? Dxelawe' xeta, zaj naca sban ne'e.

<sup>6</sup> Na' bechebe Jesús:

—Láweze dxunle da xrlátaje. Lu lárdaule xu'ule da calela. Cháwedau' bchálajqueze Isaías ca nácale le'e gate na' bzuajē' caní:

Bénneache caní dxelúe lánē' neda' nen dxú'aze'. Xichaj lárzdawe' ca' zaj nacuasa na neda'.

<sup>7</sup> Níteze naca xel-la ba lánana da dxelu'e neda', lawe' da dxulusédene' da zaj nadxixruj bea bēneacheze.

<sup>8</sup> Caní naca xca', le'e dxuzúale chalá'ala ca da nadxixruj bea Dios, na' zéajlele ca naca da gulún bēneache ca dxíbele zruaga, ne zriga' chee, ne zánete da caní da dxunle.

<sup>9</sup> Na' gunnadxe', dxē'e benne' ca':

—Chalá'ala dxuzúale ca da nadxixruj bea Dios chee zéajlele ca naca da tu dxúnzquezle. <sup>10</sup> Caní gunná Moisés na': "Gudapa ba lánana xra xrna'u." Cá'anqueze gunné': "Che tu benne' nne' schanni' chee xre', che xrne'e, con gátequeze bēnea'." <sup>11</sup> Le'e dxennale, "Che tu benne' xē'e xra xrne'e: Corbán," da zéajē na, quebe gaca gácalēna' le'e lawe' da bache bnézruja' chee Dios ca naca da dē chia'. <sup>12</sup> Che ca'an dxenné', nadxa le'e québedxa dxu'ule le' lataj gácalēnē' xra xrne'e. <sup>13</sup> Gate dxunle caní dxuzúale chalá'ala xrtizra Dios, chee gunle ca da zéajlele. Na' zéajquezle dxunle zánete da zaj naca na caní.

<sup>14</sup> Xecha lasa gunné' Jesús bēneache ca', na' gunné', dxē'e le':

—Le guzé nágale xúgutēle, ne le chéajni'i. <sup>15</sup> Netú da dxe'aj dxagu benne' quebe seque gucá'ana na le' sban. Da dxdxuaj na lu xichaj lárzdau bēneache, le' na' dxucá'ana na le' sban. <sup>16</sup> Le'e zua nágale, le xene.

<sup>17</sup> Gate gucuasa Jesús naga zaj zra' benne' ca', na' guxú'e lu xu'u. Nadxa benne' ca' dxusédene' gu-lenábene' Le' ca naca chee da dxul'é nigá. <sup>18</sup> Nadxa gunná Jesús, dxē'e le':

—¿Cá'anqueze le'e quebe dxéajni'ile? ¿Quebe dxéajni'ile xúgutē da dxe'aj dxagu bēneache quebe seque gucá'ana na le' sban <sup>19</sup> lawe' da quebe dxu'u na lu xichaj lárzdawe'. Dxu'u na lu le'e, na' dxdxuaj na?

Cate' gunná Jesús caní blé'ene' zaj naca chawe' xúgutē da dxe'aj dxágudxu. <sup>20</sup> Na' gunnadxe':

—Ca naca da dxdxuaj na lu xichaj lárzdau bēneache, le' na' dxucá'ana na le' sban <sup>21</sup> lawe' da lu xichaj lárzdau bēnea' dxeledxúaj ca da calela da dxuwía lazre', ne dul-la da dxucá'ana ditaj xel-la wechaga na', ne dul-la chee da sban, ne wēte benne', <sup>22</sup> ne xel-la gubán, ne da dxezá lazre' gapa da naca chee benne'

xula, ne da calela ca', ne xel-la wezrí xē', ne da dxezá lazre' da sban, ne xel-la zre'e lazre', ne xel-la wechalaj dizra' bizruj, ne xel-la dxun szren cuina, ne xel-la dxuchalaj bigaze. <sup>23</sup> Xúgutē da calela caní dxeledxúaj na lu xichaj lárzdau bēneache, ne dxuluxrinnaj na le'.

### Tu nu'ula quebe naca judío dxeajlí lazre' Jesús

(Mt. 15.21-28)

<sup>24</sup> Na' bezá'a Jesús naga zuē', guxíajē' lu xēzre ca' zaj nababa xēzre Tiro, ne xēzre Sidón. Guxú'u Jesús tu lu xu'u, ne quegá guca lazre' nu xene. Quebe guca gachē'. <sup>25</sup> La gunézetē tu nu'ula zua Jesús na'. Nu'ula nigá zua tu zrínē' nu'ula, xu'ube' be' xriwē'. Bla' nu'ula' naga zua Jesús, ne bzu zribe' lawē'. <sup>26</sup> Nu'ula nigá quebe naque' nu'ula judío. Naque' nu'ula chee tu xēzre nababa xēzr la xu Sirofenicia. Bzrinē' lau Jesús, na' gunabe' Le' xebéajē' be' xriwē' da xu'u zrínē' nu'ula. <sup>27</sup> Gunná Jesús, dxē'e nu'ula':

—Bē' lataj xelagu nedxu zri'ine benne' lu xu'u, lawe' da quebe naca chawe' cúadxu xeta xtila chee bidu ca', ne gunézrujdxu na chee bécudu ca'.

<sup>28</sup> Na' gunná nu'ula':

—Awe', Xran, san bécudu ca' zaj zra' zran ga dxelágube' dxeláguquezba' xeta bizruj da dxuluzexruj bidu ca'.

<sup>29</sup> Nadxa gunná Jesús:

—Nē chee dizra' da ba gunnéu', bexíaj na'a. Bache bedxúaj be' xriwē' lu bē-la' dxen chee zri'inu' nu'ula.

<sup>30</sup> Gate bezrín nu'ula' lizre', na' blé'ene' zrínē' nu'ula dēbe' lu da naga dxásebe', na' be' xriwē' ba bedxúaj na lu bē-la' dxen cheebe'.

### Dxexún Jesús tu benne' nacuézruē', ne quebe dxaca nniē'

<sup>31</sup> Nadxa bedxúaj Jesús, bezé'e naga nababa xēzre Tiro, na' gudétiē' naga nababa xēzre Sidón, ne xēzre ca' zaj nababa Decápolis, na' bezrinē' dxu'a nísadau' chee xēzr la xu Galilea. <sup>32</sup> Nadxa bedajleguá' benne' ca' tu benne' nacuézruē', ne quebe dxaca nniē', na' gu-lenábē' Jesús xrúa ne'e benne' nigá. <sup>33</sup> Guché Jesús benne' nigá chalá'ala naga zaj zra' benne' ca', na' bdiē' zrube ne'e lu naga bēnea', na' bzre'e zrene', ne bte' lawe' luzre bēnea'. <sup>34</sup> Nadxa la gunná'tē' xabáa, ne gucá'a lazre', gunné':

—Efata.

Dizxa' nigá zéajē na: Bxalaj.

<sup>35</sup> Ca gunné' caní, na' bxalaj naga benne' cuesru nigá, ne bexaca luzre'. Nadxa guca bchálajē'. <sup>36</sup> Na' gunná Jesús, dxē'e benne' ca' quebe nu xel'é ca da bēnē'. Lácala gunná be'ene' le' caní, buluchílujdxē' dizra' ca da bēnē'. <sup>37</sup> Benne' ca' zaj zra' na' belexebánelē'ēnē', dxe-lenné':

—Xúgutē dxunē' cháwedau'. Dxexunē' benne' cuesru ca', na' dxeléntēnē', ne dxexunē' benne' ca' quebe dxaca nniē', na' dxelennétiē'.

**Dxugagu Jesús chua gaxúa benne' biu**

(Mt. 15.32-39)

8 Ca lu zra ca' zaj nazraga benne' zan, na' quebe bi de da xelawé'. Ca'an guca gunné Jesús benne' ca' dxusédene', na' guzre' le':

2 —Neda' dxexache lazra' benne' caní lawe' da bache guca chunna zra zaj zre'e nigá nen neda', ne quebe bi de da xelawé'. 3 Che ca' xesel-la' le' lizre' quebe xelawé', na' xelate ni'a ne'e la neza lawe' da zá'aca bal-le' zitu'.

4 Na' belexechébe benne' ca' dxuséde Jesús, dxelé'e Le':

—¿Ájazra gundxu gunézrujdxu da xelawé' nigá, ga quebe nu chilá' benne'?

5 Jesús bchébe' le':

—¿Bal-la xeta xtila nápa le'e?

Benne' ca' gulenné':

—Gazre na.

6 Nadxa gunná be'e Jesús xelebé' xúgute bénneache ca' lu xu. Nadxa guqu'é xeta xtila, ne guzre' Dios:

—Xcalenu'.

Nadxa búzruje' na, ne bnézruje' na benne' ca' dxusédene', na' benne' caní gulísie' na lówela xúgute bénneache ca'. 7 Zaj nápaqueze' tu chupa béladau'. Na Jesús gunabé' Dios guné' na chawe'. Nadxa gunná bé'ene' gulise benne' ca' le' na. 8 Gulagu xúgute bénneache ca', ne belezúale'e chawe'. Ca gudé na' bulusuzré'e gazre xcuite xca'a nen xeta bizruj da belegá'ana. 9 Benne' ca' gulawé' zaj naque' ca chua gaxúa benne' biu. Nadxa Jesús bze' benne' ca' dizra'. 10 Nadxa guxú'e lu da dxedá lawe' nísadau' nen benne' ca' dxusédene'. Xjaque' lu xezr la xu chee benne' xezre Dalmanuta.

**Dxelenabe' Jesús guné' tu xel-la waca**

(Mt. 16.1-4; Lc. 12.54-56)

11 Nadxa belezrín benne' xudau' fariseo ca' ga na', ne gulezú lawé' dxulutil-le' dizra' nen Jesús. Gulenabe' Jesús guné' tu xel-la waca da za xabáa, chee xenézene' bi xel-la waca napé'. 12 Nadxa Jesús gucá'a dxgua lazre', gunné':

—¿Bizr chee na' dxelenaba benne' caní guna' tu xel-la waca da za xabáa? Da li dxapa' le'e, québequeze bi xel-la waca guna' lau le'e.

13 Nadxa Jesús bca'ané' benne' ca', na' bexu'e lu da dxedá lawe' nísadau', dxexíaje' xechelá'a chee nísadau'.

**Da naca ca' cua zichaj chee xeta xtila**

(Mt. 16.5-12)

14 Gulal-la lazre' benne' ca' dxuséde Jesús xelu'e da xelawé', na' zaj nu'e tuze xeta xtila lu da dxedá lawe' nísadau'. 15 Nadxa Jesús gunná bé'ene', dxé'e benne' ca':

—¿Le nna'xque nigá! Le guxúe cuínale da naca cua zichaj chee xeta xtila chee benne' xudau' fariseo ca', ne ca naca cua zichaj chee xeta xtila chee Herodes.

16 Nadxa benne' ca' dxuséde Jesús gulé ljwezre':

—Le' dxenné' caní lawe' da quebe de xeta xtila gágudxu.

17 Dxeque be'e Jesús da dxelenné', na' guzre' le':

—¿Bizr chee na' dxennale quebe de xeta xtila gágudxu? ¿Quebe ne chéajni'ile ne quebe dxeque

be'ele? ¿Nácale'e zide' lázrdaule? 18 ¿Quebe dxelé'ele

nen xiaj laule, ne quebe dxenle nen nágale? ¿Quebe

dxeajsá lázrele? 19 Gate na' bgawa' chi xun gaxúa

benne' biu nen gazxu' xeta xtila, ¿bal-la xcuite xca'a xe-

ta bizruj da becá'ale?

Benne' ca' gulenné':

—Chazrinnu na.

20 Na' gunná Jesús:

—Na' gate na' bgawa' chua gaxúa benne' biu nen

gazre xeta xtila, ¿bal-la xcuite xca'a da zaj zrate

becá'ale?

Le' gulenné':

—Gazre na.

21 Nadxa Jesús guzre' benne' ca':

—¿Ne la gázqueze quebe dxéajni'ile?

**Jesús dxexungé' tu benne' la chul-la**

22 Ca gudé na' Jesús, ne benne' ca' dxusédene' belexezrine' lu xezre Betsaida, na' benne' Betsaida guleché'e

tu benne' la chul-la lau Jesús, na' gulata' xuene' Le'

guté' le'. 23 Jesús gudele' na' benne' la chul-la, ne be-

béaje' le' dxu'a xezre. Na' btupe' zrene' lu xiaj lawé', ne

guxrúa ne'e le'. Na' bchébe' le' chete dxelé'ene'.

24 Benne' la chul-la gunné'e, na' gunné':

—Dxelé'eda' benne' ca', zaj naque' ca weaj xaga, na'

dxesi'aque'.

25 Nadxa Jesús guxrúa ne'e xiaj lawé' da xula, na'

benne' na' gunná' dxgü'e. Na' bexaque', ne xúgute

bache dxelé'ene' cháwedau'. 26 Nadxa Jesús besel-le' le'

lizre', dxé'e le':

—Quebe chu'u lu xezre nigá, ne quebe nu xu'u caní.

**Pedro dxenné' naca Jesús benne' nasel-la Dios**

(Mt. 16.13-20; Lc. 9.18-21)

27 Ca gudé na' Jesús, ne benne' ca' dxusédene'

xjaque' lu xézredu ca' zaj nababa xezre Cesarea naga

dxenná bea Filipo. Dxácaté zaj xu'e neza bchébe Jesús

benne' ca':

—¿Nuzra na' dxelenná benne' naca' neda'?

28 Belexechébe':

—Bal-la benne' dxelenné' nacu' Juan, bénnea' bchu'e'

bénneache nisa. Benne' xula dxelenné' nacu' Elías,

bénnea' bchálaje' waláz chee Dios. Benne' xula dxelen-

né' nacu' tu benne' xula bchálaje' waláz chee Dios.

29 Nadxa Jesús bchébe' le':

—¿Gazra le'e? ¿Nuzra dxennale le'e naca' neda'?

Pedro gunné':

—Lue' nacu' Cristo, benne' nasel-la Dios.

30 Nadxa gunná be'e Jesús benne' ca'. Gunné':

—Quebe nu xe'e ca'.

**Dxuchalaj Jesús ca dxal-la' gatië'**

(Mt. 16.21-28; Lc. 9.22-27)

<sup>31</sup> Nadxa guzú lau Jesús dxulé'enë' benne' ca' ca dxal-la' sáca'le'ë Lë', Benne' Guljé' Bénneache, ne ca xelún benne' gula cheë judío ca', ne benne' xíchajë ca' cheë bxruze ca', ne benne' dxuluxuzájle'ë da nadxixruj bea Dios, xuluzúë' Lë' chalá'ala. Nadxa guzre' le' welútië' Lë', san xebanë' zra guxunne zra. <sup>32</sup> Da nigá guzre' le' caníqueze. Nadxa Pedro guché'ë Jesús chalá'ala, ne guzú lawë' dxedil-le' Lë'. <sup>33</sup> Jesús bexéchajë', ne gunné'ë benne' ca' dxusédenë', na' gudil-le' Pedro, dxë'ë le':

—Gucuasa cuita' nigá, lue', da xriwë'. Quebe dxéquenu' da nigá ca dxun Dios. Ca dxun bénneache dxunu'.

<sup>34</sup> Nadxa Jesús gunné' benne' ca' dxusédenë', ne xúgutë' bénneache ca', na' guzre' le':

—Che núlale dxaca lázrele gunle neda' tuze, dxal-la' guzúale chalá'ala xúgutë' da dxezá lázrele le'e, ne gácale ca tu benne' zéajë' cheë tē'ë xaga béguaj, na' gunle neda' tu zren. <sup>35</sup> Che tu benne' dxaca lazre' guselé' xel-la nabán cheë', benne' nigá gunitië' xel-la nabán cheë'. Bénnea' gunitië' xel-la nabán cheë' nē' chia' neda', ne nē' cheë dizra' chawë' chia', benne' nigá guselé' xel-la nabán cheë'. <sup>36</sup> Che tu benne' gapë' xúgutë' da naca cheë xëzr la xu nigá, na' gunitië' bénne'du xu'ë, ¿bízraqueze da ba neza gaca na cheë bénnea'?

<sup>37</sup> Quebe bi gaca gunezruj tu benne' cheë guselé' bénne'du xu'ë. <sup>38</sup> Che tu benne' gapa stu'ë chia' neda', ne cheë dizra' chawë' chia' lau bénne' caní, benne' dxulucá'ana Dios, ne dxelún dul-la, la gaze neda', Benne' Guljé' Bénneache, gapa stú'queza' cheë bénnea' gate xida' nen xel-la szren cheë Xra', ne nen gubáz cheë xabáa lá'azxa ca'.

**9** Cá'anqueze guzre Jesús benne' ca':

—Da li dxapa' le'e, zaj zra' nigá benne' quebe xelatië' nédxula ca xeledé'enë' xida xel-la dxenná bea cheë Dios nen xel-la waca cheë'.

**Ca guca gate bcha ca gunná' Jesús**

(Mt. 17.1-13; Lc. 9.28-36)

<sup>2</sup> Ca gudé xrupa zra, guché' Jesús Pedro, ne Jacobo, ne Juan, na' guxiájle'ë benne' canize tu lu xi'a sibe. Na' bcha ca gunná' Jesús lau benne' ca'. <sup>3</sup> Zra lana Jesús bexaca na chiche ca bezxe' da dxágutë' na laudxu. Quegá nu chilá' benne' lu xëzr la xu gaca quibë' zra lanë' cheë xegá'ana na chiche ca guca zra lana Jesús. <sup>4</sup> Na' benne' ca' dxuséde Jesús belelé'enë' Elías, ne Moisés, benne' gulate nédxudaute, dxuluchálajle'ë Jesús. <sup>5</sup> Pedro guzre' Jesús:

—Benne' weséde, cháwele'ë naca zradxu nigá. Gun-tu' chunna xu'u lágadau', tu chiu', ne tu cheë Moisés, ne tu cheë Elías.

<sup>6</sup> Caní gunná Pedro lawë' da dxelezrebe benne' ca' dxuséde Jesús, na' Pedro quebe nézenë' ca da dxenné'.

<sup>7</sup> Nadxa betaj tu beuj naga zaj zre'ë, da bcache na le', na' lu beuj na' belenne' tu chi'i benne', gunné':

—Benne' nigá naque' Zri'ina' nazrí'ite' lazra'. Le xen da dxenné'.

<sup>8</sup> Gate gulenné'ë, québedxa nu nalá' nen le', san tuze Jesús.

<sup>9</sup> Dxácatë dxelexétajë' lu xi'a na', gunná be'e Jesús benne' ca' quebe nu xuluchálajle'ë ca naca da belelé'enë' gate te na' xebán Benne' Guljé' Bénneache ládujla benne' gate. <sup>10</sup> Cheë le' na' gulezúë' zrize ca naca da ba guca. Buluchëbe ljwezre':

—¿Bizra zéajë da na', xebanë' ládujla benne' gate?

<sup>11</sup> Nadxa buluchëbe' Jesús:

—¿Bizr cheë na' dxelenná benne' ca' dxuluxuzájle'ë da nadxixruj bea Dios dxal-la' xelá' Elías nédxula ca Cristo?

<sup>12</sup> Bechëbe Jesús, na' guzre' le':

—Da li xelá' Elías nedxu, ne gucá'ana chawë' xúgutë. ¿Bizra dxenná da naxúaj na lu xiche cheë Dios ca gaca chia' neda', Benne' Guljé' Bénneache? Dxenná na da zan da saca', na' xuluzúa bénneache neda' chalá'ala.

<sup>13</sup> Neda' dxapa' le'e, ba bla' Elías, na' belunë' cheë' ca naca xúgutë' da gulaca lazre' ca da dxenná na lu xiche cheë Dios ca da dxal-la' gaca cheë'.

**Dxexún Jesús tu benne' cuide' xu'ube' be' xriwë'**

(Mt. 17.14-21; Lc. 9.37-43)

<sup>14</sup> Ca gudé na' belexezrine' naga zaj zra' xezícadxa benne' ca' dxuséde Jesús, na' belelé'enë' benne' zan zaj naxéchajë' le', ne zaj zráqueze na' benne' dxuluxuzájle'ë da nadxixruj bea Dios, na' dxulutíl-lalë'ë le' dizra'. <sup>15</sup> Gate belelé'enë' Jesús, na' xúgutë' belexebánenë', na' gusí'aca chégüë' naga zua Jesús, ne bulugapë' Lë' diuzre. <sup>16</sup> Ca'an guca, Jesús bchëbe' benne' ca':

—¿Bizra na' dxedíl-lalë'ë benne' ca'?

<sup>17</sup> Nadxa tu benne' zë' ga na' bechëbe':

—Benne' weséde, nachë'a zri'ina' nigá cheë xexunu'-be' lawë' da xu'ube' be' xriwë' da ba nun na lebe' bi quebe dxaca nnebe'. <sup>18</sup> Gátetëze na' dxu'ube' da xriwë', na' dxël-la na lebe', ne dxin na lebe' lu xu. Dxezrí'a bzri-na' xú'abe', ne dxagu lázxabe'. Cheë le' na' ba dxéxrujle'ëbe'. Ba gunaba benne' ca' dxusédenu' xelexebéajë' be' xriwë' na', san quebe gulezéquenë'.

<sup>19</sup> Bechëbe Jesús:

—Le'e, benne' quebe dxéajle'ë chia'. ¿Ájatë dxal-la' súalëna' le'e? ¿Ájatë dxal-la' gaca' benne' zren lazre' nen le'e? Le cheajxri' bi cuide' na' nigá.

<sup>20</sup> Na' xejlexrí'ë-be'. Gate be' xriwë' na' ble'e na Jesús, na' bën na gudel-la chuna' bi cuide' na', ne gudinna lebe' xu, na' dxebixre dxetúl-labe' lu xu, ne guzrí'a bzrina' dxú'abe'. <sup>21</sup> Nadxa bchëbe Jesús xrabe':

—¿Bátatë dxezácabe' caní?

Gunná xrabe':

—Gate nácatëbe' bidau'. <sup>22</sup> Zane' lasa be' xriwë' na' dxugú'u na lebe' lu xi', ne lu nisa cheë gute na lebe'. Che wazéquenu' bi gunu' cheëbe', bexache lazre' netu', ne gúcale netu'.

<sup>23</sup> Na' guzre Jesús le':

—Che wazéquenu' lue' chéajle'u chia', xúgute wazeque chee benne' dxéajle'e chia'.

<sup>24</sup> Nadxa xra bi cuide' nigá gunné' zizraj:

—Dxéajle'a chiu'. Gúcale neda' chee chéajledxa'.

<sup>25</sup> Gate ble'e Jesús dxelezraga benne' zan, na' gudil-le' be' xriwe' na', dxenné':

—Lue', be' xriwe', dxunu' benne' quebe dxaca nne', ne cuezru, neda' dxenná be'eda' lue' xedxúaju'. ¡Bsan bi cuide' nigá! ¡Québedxa xexú'u lu bel-la' dxen chebe'!

<sup>26</sup> Na' be' xriwe' na' gudxezre xa'a na, ne ben na gudel-la chuna' bi cuide' na', na' bedxúaj na. Na' begá'anabe' ca tu benne' gate. Ca'an guca, gulenná benne' zan ca':

—Ba gútebe'.

<sup>27</sup> Nadxa gucá'a Jesús na'be', bechise'-be'. Na' benne' cuide' na' bezebe'.

<sup>28</sup> Nadxa guxú'u Jesús tu lu xu'u, na' benne' ca' dxusédene' buluchébe' Le' naga zue' tuze':

—¿Bizr chee na' quebe guzéquentu' netu' xebéajntu' be' xriwe' na'?

<sup>29</sup> Nadxa Jesús guzre' benne' ca':

—Ca naca be' xriwe' caní séquele xebéajle na che ná bale lau Dios, ne gunle gubasa.

### Jesús dxuchálaje' da xula ca gaca gate gatie'

(Mt. 17.22-23; Lc. 9.43-45)

<sup>30</sup> Gate besí'aque' naga zaj zre'e, na' belexedée' naga nababa Galilea. Jesús quebe guca lazre' nu neze ga zue', <sup>31</sup> lawe' da dxuzéajni'ine' benne' ca' dxusédene', na' guzre' le':

—Zua tu benne' gudée' neda', Benne' Gulje' Bénneache, lu na' benne' ca' dxeledábague' neda', na' xelúti'e neda', san gate gaca chunna zra natia', na' xebana'.

<sup>32</sup> Benne' ca' quebe guléajni'ine' ca da dxé'e le', ne belezrebe' xuluchébe' Le'.

### Nu benne' naque' blau

(Mt. 18.1-5; Lc. 9.46-48)

<sup>33</sup> Nadxa belezrine' lu xezre Capernaum, na' gate zaj zre'e lu xu'u na', bchébe Jesús benne' ca' dxusédene':

—¿Bizra dizra' dxutíl-lalele ljawézrele za'le la neza?

<sup>34</sup> Gulezré'e zrize lawe' da bulutil-le' dizra' la neza na' che nulé' nácadxé' benne' blau. <sup>35</sup> Nadxa Jesús gudxé'e, na' gunné' benne' chazrinnu, benne' ca' dxusédene', na' guzre' le':

—Che núlale dxaca lázrele gácale benne' blau, dxalla' gácale ca benne' bzebe, ne gunle zrin chee xúgute benneache.

<sup>36</sup> Nadxa guqu'é'e tu bidau', na' bzu'e lebe' gachaj lawe' benne' ca'. Na' bnide'-be', ne guzre' benne' ca':

<sup>37</sup> —Benne' na' gape' ba lá'ana tu bidau' ca bidu nigá lawe' da nazrí'ine' neda', bennea' gape' ba lá'ana neda', na' bennea' gape' ba lá'ana neda', quegá tuza' neda' gape' ba lá'ana, cá'anqueze gape' ba lá'ana Xra' nasel-le' neda'.

### Benne' quebe dxedábague' dxi'u, dxácalene' dxi'u

(Lc. 9.49-50; Mt. 10.42)

<sup>38</sup> Nadxa Juan guzre' Jesús:

—Benne' Wesede, blé'entu' tu benne' dxebéaj'e be' xriwe' da xu'u benneache, dxuchíne'e Lau' Lue', san bennea' quebe dxun'e dxi'u tu zren. Chee le na' gúzrentu' le' québedxa gun'e ca'.

<sup>39</sup> Jesús guzre' benne' ca' dxusédene':

—Quebe bi xe'e le'. Che nu benne' gun'e tu xel-la waca, guchíne'e La' neda', benne' nigá quebe gaca nne' schanni' chia'. <sup>40</sup> Caní naca na lawe' da benne' quebe dxedábague' dxi'u, dxácalene' dxi'u. <sup>41</sup> Núteteze benne' gunne' le'e tu zriga' nisa ne chee La' neda' lawe' da nácale chia' neda', Cristo, da líqueze dxennía', wazí'queze' da dxal-la' si'e.

### Ca naca da dxun na dxi'u benne' dul-la

(Mt. 18.6-9; Lc. 17.1-2)

<sup>42</sup> Gunnadxa Jesús:

—Núteteze benne' gul'éne' tu bidau' chee gunbe' dul-la, bidu na' dxéajlebe' chia', cháwedxa guchéajdxu tu xiaj zi' i lba bennea', ne cheajchú'unadxu le' lu da situj chee nísadau'. <sup>43</sup> Che na'u dxun na gunu' dul-la, wendxa guchugu na'u na'. Cháwedxa xexú'u xabáa naga gaca banu' nen tuze na'u quézcala xexíaju' lataj ba xa' nen dxúpat'e na'u, naga quebe xexula xi' da zeza-cu'. <sup>44</sup> Lataj ba xa' na' quebe xelate bzuga', be dxeláguba' benne' ca' dxelune' da caléla, na' xi' na' cabata' xexúl-laqueze na. <sup>45</sup> Na' che ni'u dxun na gunu' dul-la, guchugu ni'u na'. Cháwedxa xexú'u xabáa naga gaca banu' nen tu ni'u, quézcala xexíaju' lataj ba xa' nen dxúpat'e ni'u, naga quebe xexula xi'. <sup>46</sup> Lataj ba xa' na' quebe xelate bzuga', be dxeláguba' benne' ca' dxelune' da caléla, na' xi' na' cabata' xexúl-laqueze na. <sup>47</sup> Che xiaj lau' dxun na gunu' dul-la, guleaj xiaj lau' na'. Cháwedxa xexú'u naga dxenná bea Dios nen tuze xiaj lau', quézcala xexíaju' lataj ba xa' nen dxúpat'e xiaj lau'. <sup>48</sup> Lataj ba xa' na' quebe xelate bzuga', be dxeláguba' benne' ca' dxelune' da caléla, na' xi' na' cabata' xexúl-laqueze na.

<sup>49</sup> 'Ca dxundxu gate dxugú'udxu zede' bēla' da guzáladxu lu xi' chee xegá'ana chawe' na, ca'an gaca chee xúgute benne'. Cá'anqueze dxugú'udxu zede' da dxuzéxedxu lau Dios. <sup>50</sup> Zede' na' naca na da chawe', san che xenite xel-la sna'a chee na, ¿ájala gundxu chee guchínedxu zede' na'? Le gaca le'e ca zede' chawe' na', ne le sua lu xel-la zri lázre' tule nen xetule.

### Ca naca chee benne' dxexel'é'e nen zru'ule'

(Mt. 19.1-12; Lc. 16.18)

**10** Nadxa bedxúaj Jesús xezre Capernaum, na' guxíaje' naga nababa Judea xechalá'a xegu Jordán naga dxalaj gubizra. Na' belezraga benneache zan naga zua Jesús, na' xecha lasa na' bsédene' le' cáqueze dxune'. <sup>2</sup> Nadxa bal-la benne' xudau' fariseo ca' belezrine' lau Jesús, na' buluchébe' Le' chee da gunne' Le' tu da quebe dxal-la' nne'. Buluchébe' Le':

—¿Waca tu benne' xel'é'e nen zru'ule'?

<sup>3</sup> Nadxa bechebe Jesús:

—¿Bizra gunná be'e Moisés le'e?

<sup>4</sup> Na' belexechebe benne' ca':

—Benna Moisés lataj gunézrujdxu zru'uladxu tu xiche da dxenná na dxelá'adxu, na' gusandxu le'.

<sup>5</sup> Nadxa Jesús guzre' le':

—Caní gunná be'e Moisés lawe' da zaj naca zizraj lázrdaule le'e. <sup>6</sup> Gate nédxudau' gate ben Dios xúgute da dxel'é'dxu, na' bene' bèneache benne' biu, ne nu'ula, na' gunné': <sup>7</sup> "Chee le na' benne' biu na' gusané' xruze xrne'e chee gaque' tuze nen zru'ule', <sup>8</sup> na' dxupe' xelaque' ca tuze benne'." Ca' naca na, québedxa zaj naca chupe', san tuze benne' zaj naque'. <sup>9</sup> Chee le na' netú benne' quebe dxal-la' xel'é'e da nuchaga Dios.

<sup>10</sup> Gate zaj zra' lu xu'u benne' ca' dxusede Jesús buluchebe' Le' xetú lasa ca naca chee da nigá. <sup>11</sup> Na' Jesús guzre' benne' ca':

—Che tu benne' xel'é'e nen zru'ule', ne xezúalene' nu'ula xula, dxíchuje' xrba chee wechaga na' lawe' da dxusebage' zru'ule' nedxu na' dul-la. <sup>12</sup> Cá'anqueze che tu nu'ula gusané' benne' chee', ne xezúalene' benne' xula, la gázqueze dxíchuje' xrba chee wechaga na' da dxusebage' benne' chee' dul-la.

#### Jesús dxenabe' Dios gun chawe'e bidu ca'

(Mt. 19.13-15; Lc. 18.15-17)

<sup>13</sup> Nadxa bèneache ca' guleché'e bidu chee' ca' lau Jesús chee xrua ne'e lebe', na' benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. <sup>14</sup> Gate ble'e Jesús da dxelune', na' bzre'e, ne guzre' le':

—Le güe bidu ca' lataj xelélá'abe' naga zua'. Quebe guzágale-be' lawe' da benne' zaj naque' ca bidu caní xelu'e naga dxenná bea Dios. <sup>15</sup> Da li dxapa' le'e, che tu benne' quebe gape' ba lá'ana da dxenná bea Dios ca dxelún bidu caní, cabata' chu'u bènea' naga dxenná bea Le'.

<sup>16</sup> Nadxa gucá'a Jesús bidu ca', ne bnide'-be'. Guxrúa ne'e lebe', na' gunabe' Dios gun chawe'e-be'.

#### Benne' cuide' nape' da gunní'a dxuchálajlene' Jesús

(Mt. 19.16-30; Lc. 18.18-30)

<sup>17</sup> Gate bexú'u Jesús neza, na' guzá chegu tu benne' biu, na' bzu zribe' lau Jesús, ne bchebe' Le':

—Benne' xrlátaje, bi dxal-la' guna' chee gapa' xel-la nabán zeajlí canna?

<sup>18</sup> Jesús guzre' le':

—¿Bizr chee na' dxu'u neda' xrlátaje? Québedxa nu chilá' naca xrlátaje. Tuze Dios naque' xrlátaje. <sup>19</sup> Nún-beaquezu' ca da bdxixruj bea Dios gate na' gunné': Quebe quichju' xrba chee wechaga na'.

Quebe gutiu' benne'.

Quebe cuanu' chee benne'.

Quebe nneu' chee nu benne' da quebe naca na.

Quebe gagu lanu'.

Gudapa ba lá'ana xra xrna'u.

<sup>20</sup> Nadxa bènea' bechebe':

—Benne' wesede, xúgute da caní dxuna' nácatea' bidau'.

<sup>21</sup> Na' Jesús gunné'e le' xrtandau', ne guzre' le':

—Tu da dxexá'zrjenu'. Guxíaj xeajete xúgute da napu', na' bnezruj benne' xache' ca' dumí chee na. Nadxa gapu' da gunní'a xabáa. Na' gudá, gacu' ca tu benne' zéajé' chee te'e xaga béguaj, ne ben neda' tuze.

<sup>22</sup> Gate bene' da nigá, na' benne' cuide' na' bewi'ine lázrele'e, na' bexíajé' dxewí'ine' lawe' da nácalé'e benne' gunní'a.

<sup>23</sup> Nadxa Jesús gunné'e ni naze, na' guzre' benne' ca' dxusédené':

—Stébeté naca chu'u benne' gunní'a naga dxenná bea Dios.

<sup>24</sup> Belexebánele'e benne' ca' dxusede Jesús ca naca dizra' gunná Jesús, na' Le' guzre' le' xetú lasa:

—Zrí'ina'dau', stébeté naca xelú'u naga dxenná bea Dios benne' dxuluxrén lazre' xel-la gunní'a. <sup>25</sup> Chadidxa te tu bea zren lu negue xeché' quézcala chu'u tu benne' gunní'a naga dxenná bea Dios.

<sup>26</sup> Gate belén benne' ca' dizra' nigá, na' belexebánele'ene', na' buluchebe ljwezre':

—¿Núzraqueze la xca'?

<sup>27</sup> Jesús gunné'e benne' ca', ne guzre' le':

—Quebe seque' nu bène' guné' da nigá, san Dios wazéquene'. Quebe bi de da quebe gaca gun Dios.

<sup>28</sup> Nadxa Pedro guzre' Jesús:

—Xránantu', netu' ba bcá'anantu' xúgute da nápan-tu', ne zéajlentu' Lue'.

<sup>29</sup> Na' bechebe Jesús:

—Da li dxapa' le'e, núteteze benne' gusané' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee' ne chia' neda', u ne chee dizra' chawe' chia', <sup>30</sup> benne' nigá si'e na'a lu xezr la xu nigá tu gaxúa cue' ca' da si'e, xu'u ca', ne benne' biche' ca', ne nu'ula zane' ca', ne xrne'e ca', ne xezr la xu chee' ca', na' weláu zi' xúzrequeze bèneache le'. Lu xezr la xu da za za' wazí'queze' xel-la nabán zeajlí canna. <sup>31</sup> Zánete' benne' zaj naca na'a benne' blau xelaque' ca benne' bzébe, na' zánete' benne' zaj naca na'a ca benne' bzébe xelaque' benne' blau.

#### Dxuchalaj Jesús xetú lasa ca gaca gate gatie'

(Mt. 20.17-19; Lc. 18.31-34)

<sup>32</sup> Gate zaj xu'e neza dxelegüene' zjaque' Jerusalén, na' Jesús zria lawe' lau benne' ca' dxusédené'. Dxelezrebe benne' ca', ne lu xel-la dxelezrebe zjácálene' Le'. Na' da xula gucá'a Jesús benne' chazrinnu ca' dxusédené', na' guzú lawe' dxé'e le' ca naca da dxal-la' gaca chee'. <sup>33</sup> Na' guzre' le':

—¡Le na' xque nigá! Dxezüendxu zéajdxu Jerusalén naga tu benne' gudé'e neda', Benne' Gulje' Bèneache, lu na' benne' xíchaje' ca' chee bxruze ca', ne lu na' benne' dxuluxuzájle'e da nadxixruj bea Dios, na' xelechuge' chia' chee gatia', na' wuludee' neda' lu na' benne' zitu' ca'. <sup>34</sup> Nadxa xelún le' chia' neda', ne xelu'e neda', ne xuluzré'e neda' zrene', na' xelutie' neda'. Gate gaca chunna zra xebana' ládujla benne' gate.

**Jacobo ne Juan dxelenabe' Jesús bi gunē' chee'**

(Mt. 20.20-28)

<sup>35</sup> Nadxa Jacobo ne Juan, zri'ine Zebedeo, belezrine' lau Jesús, na' gulé'ē Lē':  
—Benne' Wesēde, dxaca lázrentu' gunu' cheentu' da nábantū' Lue'.

<sup>36</sup> Nadxa bchebe Jesús lē':  
—¿Bi dxaca lázrele guna'?

<sup>37</sup> Na' belexechebe' Lē':  
—Benna netu' lataj cué'entu', tuntu' chalá'a xabela chiu', ne xetuntu' chalá'a xéglala chiu' naga nna be'u xabáa chiu'.

<sup>38</sup> Na' guzre Jesús lē':  
—Le'e quebe nézele da dxenábale. ¿Waca xí'ajle le'e da na' xi'aj neda', da zéajē na ca naca da sácadxu? ¿Waca chuale nisa ca chua' neda' nisa lu xel-la gute?

<sup>39</sup> Lē' belexechebe':  
—Wácantū'.

Na' Jesús guzre' lē':  
—Da li wé'ajle ca naca da na' xi'aj neda', ne chuale nisa ca chua' neda' nisa. <sup>40</sup> Chee' cué'ele chalá'a xabela chia' u chalá'a xéglala chia', quegá neda' gunna' na. Gaca chee' benne' ca' ba nucueza Dios chee'.

<sup>41</sup> Gate xechí benne' ca' dxusēde Jesús belenne' na, na' belezré'ē nen Jacobo ne Juan. <sup>42</sup> Jesús gunné' benne' ca', na' guzre' lē':

—Ba nézquezle ca dxelún benne' dxelenná be'e benne' xēzr la xu ca'. Dxelún cuine' xrane benne' xēzr la xu ca'. Benne' blau ládujla lē' dxezi'ē ba neza xel-la dxenná bea chee'. <sup>43</sup> Quebe gaca caní ládujla le'e. Che nu benne' dxaca lazre' gaque' benne' blau ládujla le'e, benne' nigá dxal-la' gunē' zrin chee' ljwezre', <sup>44</sup> na' che nu benne' ládujla le'e dxaca lazre' gaque' benne' xícha-jē, benne' nigá dxal-la' gaque' ca tu benne' nada'u chee' gunē' zrin chee' xúgute' ljwezre'. <sup>45</sup> Caní gaca na lawe' da cá'aqueze neda', Benne' Guljē' Bénneache, bla'a, quegá chee' xelún bēnneache zrin chia' neda'. Bla'a chee' guna' zrin chee' bēnneache, ne chee' guzúa' xel-la nabán chia' chee' guselá' benne' zan.

**Dxexún Jesús tu benne' la chul-la lē' Bartimeo**

(Mt. 20.29-34; Lc. 18.35-43)

<sup>46</sup> Nadxa belezrine' xēzre Jericó. Gate na' bedxúaj Jesús xēzre nigá nen benne' ca' dxusédenē', ne nen benne' zantē, na' zua tu benne' la chul-la lē' Bartimeo, zri'ine Timeo, dxe'ē dxu'a neza dxenabe' guna'. <sup>47</sup> Na' ca bēnne' dxdé Jesús, benne' Nazaret, ga na', na' benne' la chul-la nigá guzú lawe' dxenné' zizraj:

—¡Jesús, Zri'ine David, bexache lazre' neda'!

<sup>48</sup> Benne' zan ca' guledil-lē' lē' chee' suē' zrize, na' lē' zízrajdxu gunné':

—¡Zri'ine David, bexache lazre' neda'!

<sup>49</sup> Nadxa gugá Jesús, na' gunné':

—Le nne' lē'.

Na' gulenné' benne' la chul-la na', gulé'ē lē':

—Bdipa lazru'. Guxasa lawe' da dxenné' lue'.

<sup>50</sup> Nadxa bzalē' lazxe' naxrúa cuzre' chalá'ala, na' guxritiē' chee' zrine' lau Jesús. <sup>51</sup> Nadxa Jesús gunábene' lē':

—¿Bizra dxaca lazru' guna' chiu'?

Na' gunná benne' la chul-la:

—Benne' Wesēde, dxaca lazra' xexunu' xiaj lawa'.

<sup>52</sup> Na' Jesús guzre' lē':

—Waca xexíaju'. Bache bexacu' lawe' da guxéajlē'u chia'.

La ble'etē benne' la chul-la na', na' guxíajlēne' Jesús la neza.

**Dxu'u Jesús xēzre Jerusalén**

(Mt. 21.1-11; Lc. 19.28-40; Jn. 12.12-19)

**11** Gate belezrine' gáguzre naga dxe' xēzre Jerusalén, ne zaj xu'ē la neza naga zaj dxe' xēzre Betfagé, ne xēzre Betania zran xi'a chee' xaga olivo ca', na' Jesús gusel-lē' chupa benne' ca' dxusédenē', <sup>2</sup> na' guzre' lē':

—Le chjaca lu xézredau' da dxe' tu chi na', na' gate zrinle na', cheajxrácale tu burro da'ba' xaga, bea na' netú benne' quebe ne cuiē' lēba'. Le sezre-ba', ne le che'-ba' nigá. <sup>3</sup> Che nu benne' nabe' le'e bizr chee' na' dxesézrele-ba', xégale lē': "Xránadxu dxechine'-ba'", na' la xesél-la'tē' lēba'.

<sup>4</sup> Nadxa xjaque', ne xeailexraque' burro na' da'ba' xa-ga dxu'a dxa xu'u cuita neza, na' gulesézre'-ba'.

<sup>5</sup> Nadxa bal-la benne' zaj zre'ē na' gulé'ē lē':

—¿Bizra dxunle? ¿Bizr chee' na' dxesézrele búrrua'?

<sup>6</sup> Nadxa lē' gulé'ē benne' ca' ca ba gunnáqueze Jesús, na' belúē' lē' lataj. <sup>7</sup> La belexeche'ē'tē' búrrua' lau Jesús, na' buluzríē' zra lanē' cúzruba', na' guzría Jesús lēba'.

<sup>8</sup> Benne' zantē gulechíluje' xicha chee', ne xladxē' la neza, na' benne' xula gulechugue' zina' da gulíxruē' la neza.

<sup>9</sup> Na' benne' ca' zaj zriē' lawe', ne benne' ca' zjaque' bzebe, gulezú lawe' dxelenné' zizraj:

—¡Gaca ba! ¡Lá'azxa naca benne' zē'ē, nase-la Xránadxu Dios Lē'! <sup>10</sup> ¡Lá'azxa naca xel-la dxenná bea da za', xel-la dxenná bea chee' xradxu David! ¡Gaca ba Dios!

<sup>11</sup> Ca'an guca gate na' guxú'u Jesús xēzre Jerusalén, na' guxú'ē lu xudau'. Ca gudé gunné'ē xúgute' da zaj nnita du cuitē', na' bezé'ē zexíajē' xēzre Betania nen benne' chazrinnu ca' dxusédenē', lawe' da ba zeaj dx-ezré'.

**Jesús dxugu'ē de' xaga higo**

(Mt. 21.18-19)

<sup>12</sup> Gute xu zra xula gate na' gusá'aque' xēzre Betania, gudún Jesús. <sup>13</sup> Na' blé'ene' zítu'la dxe' tu xaga higo zria na laga', na' xeaínné'ē che zria da zixre lu xaga na', san quebe bi zria na. Lágaze zria na lawe' da quebe ne zrin zra cuía na da zixre. <sup>14</sup> Nadxa Jesús guzre' xaga higo na':

—Cabátadxa nu gagu da zixre chiu'.

Benne' ca' dxusēde Jesús belénqueze' na.

**Jesús dxexún lbe'ë lu xudau'**  
(Mt. 21.12-17; Lc. 19.45-48; Jn. 2.13-22)

<sup>15</sup> Ca gudé na' belexezrine' xezre Jerusalén. Ca guxú'u Jesús lu xudau', guzú lawe' dxulague' lu xudau' benne' zaj zre'ë wete, ne benne' zaj zre'ë wewa'u na'. Na' bdxixre' blaga chee' benne' weche'ë dumí chee' benne' zitu', ne bdxixre' naga dxelebé' benne' wete bgúgudu ca'. <sup>16</sup> Quebe be'ë lataj nu benne' xudéë' xua ca' lu xudau'. <sup>17</sup> Nadxa bsédené' bènneache ca', dxenné':

—Lu xiche lá'azxa dxenná Dios: “Lizra' gaca na tu xu'u naga xuluchálajle Dios benne' zá'aque' xúgute xezre.” Le'e ba nunle lizra' ca tu lizre benne' gubán ca'.

<sup>18</sup> Na' benne' xíchajë ca' chee' bxruze ca', ne benne' dxuluxuzájle'ë ca da nadxixruj bea Dios belenne', na' gulezú lawe' dxelexiluje' ájala gaca xelútetë' Jesús lawe' da dxelezrebe' Lë'. Ca'an guca lawe' da dxelexebane xúgute bènneache ca naca da dxusëde Jesús lë'.

<sup>19</sup> Ca gula chizrela, Jesús bezé'ë lu xezre.

**Dxebizre xaga higo**  
(Mt. 21.20-22)

<sup>20</sup> Ca gula zra xula che zílala, na' Jesús, ne benne' ca' dxusédené' belexedéë' na', na' belelé'ene' xaga higo na', ba nabizre na dutë lue na. <sup>21</sup> Nadxa xeajsá lazre Pedro, na' guzre' Jesús:

—Benne' wesëde, gunná'xque xaga higo nigá da gulú'u na de'. Bache gubizre na.

<sup>22</sup> Jesús gunné':

—Le cheajlí lazre Dios. <sup>23</sup> Da li dxapa' le'e, che nútetëzele nnale, xe'le xi'a nigá: “Cuasa lue' nigá, xea-jchú'u lu nísadau'”, ne che quebe dxun chupa lázrele, na' chéajlele waca da ba gunnale, na' gácaqueze na.

<sup>24</sup> Chee' lë na' dxapa' le'e, xúgute da ná'ale Dios gate dxuchálajle Lë', che chéajlele ba guzile na, ca'an gácaqueze. <sup>25</sup> Gate na' dxuchálajlele Dios, che dxezrá'ale nu benne', le gunité lau chee' bènnea' chee' cá'anqueze Xrale zuë' xabáa gunité lawe' dul-la da nabágale.

<sup>26</sup> Che quebe gunité laule chee' bènnea', Xrale zuë' xabáa quebe gunité lawe' dul-la da nabágale.

**Ca naca xel-la dxenná bea da napa Jesús**  
(Mt. 21.23-27; Lc. 20.1-8)

<sup>27</sup> Nadxa belexezrine' xezre Jerusalén, na' ca dxedá Jesús lë'aj xudau', na' gulebiga lau Lë' benne' xíchajë ca' chee' bxruze ca', ne benne' dxuluxuzájle'ë da nadxixruj bea Dios, ne benne' gula ca'. <sup>28</sup> Na' benne' caní gulenábené' Jesús:

—¿Bizra xel-la dxenná bea napu' dxunu' da caní? ¿Nuzra benna lue' xel-la dxenná bea nigá?

<sup>29</sup> Na' bechëbe Jesús:

—Cá'anqueze neda' dë tu da nábeda' le'e. Che xeché-bele chia', nadxa xapa' le'e ca naca xel-la dxenná bea da napa' dxuna' da caní. <sup>30</sup> ¿Nuzra gusel-la Juan bchuë' bènneache nisa? ¿Dios che bènneache? Le xechëbe na'a.

<sup>31</sup> Nadxa gulezú lau benne' ca' dxuluchálajle' leze', dx-elé ljwezre':

—Che xëdxu Lë', Dios gusel-lë' lë', na' nnáqueze': “¿Bizra chee' na' quebe guxéajlele chee'?” <sup>32</sup> Che nnadxu bènneache gulesel-lë' lë', dxal-la' zrëbedxu da xelún benne' xezre ca'.

Caní gulenné' lawe' da xúgute benne' xezre nigá dx-eléajle'ë guca Juan benne' bchálajë' waláz chee' Dios.

<sup>33</sup> Ca'an guca, gulenná benne' ca', dxelé'ë Jesús:

—Quebe nézentu'.

Nadxa gunná Jesús, dxë'ë lë':

—Cá'anqueze neda' quebe nnia' ca naca xel-la dxenná bea da napa' dxuna' da caní.

**Da dxulé'e na ca naca chee' benne' wen zrin quebe zaj naque' xrlátaje**  
(Mt. 21.33-46; Lc. 20.9-19)

**12** Nadxa guzú lau Jesús dxuchálajle'ë benne' ca' tu da dxulé'e na. Dxë'ë lë':

—Zua tu benne' bde'ë lba uva ca' lu xezr la xu chee', na' bënë' lë'aj chee' na. Bënë' tu xiaj lutju naga guchuchujë' uva ca', ne bënë' tu bdupa' naga cue' benne' guxú'ë da caní.

<sup>1</sup> Nadxa bdeë' xezr la xu chee' na' lu na' benne' wen zrin ca' chee' xelune' la'a lina chee' na, na' guzé'ë zéajë' xezre zitu'. <sup>2</sup> Ca gula zra chee' lina, na' gusel-lë' tu bi wen zrin chee' cheajxezri'ibe' lu na' benne' wen zrin ca' ca naca lina da dxal-la' xezí' benne' xranbe'. <sup>3</sup> Na' benne' wen zrin ca' gulel-lë'-be', ne buluzalje'-be', na' belexesel-lë'-be' dáchezebe'. <sup>4</sup> Nadxa xránabe' gusel-lë' bi wen zrin xula, na' bi nigá belú'ë-be' xiaj, ne gulelé'ë xíchajbe', ne bulucháchalëne'-be'. <sup>5</sup> Na' xránabe' na' gusel-lë' xetube', na' bi nigá belútetë benne' ca' lëbe'. Ca gudé na' xránabe' gusel-lë' bi zandxa bi xula, na' cá'anqueze belú'ë bál-labe', ne belútetë' xebál-labe'.

<sup>6</sup> Xránabe' zua tu zrí'ine' bi biu, bi nazrí'ile'ëne', na' naga bzébetë gusel-lë' zrí'ine' nigá, dxenné' lu xichaj lázrdawë': Dخال-la' xelape' ba lá'ana zri'ina'. <sup>7</sup> Benne' wen zrin ca' gulenné', dxelë ljwezre': “Bi nigá gueque chee'be' xezr la xu nigá. Gútetëdxu-be' na'a, na' dxí'u xegá'analexdu da nigá.” <sup>8</sup> Ca'an guca, gulel-lë'-be', ne belútetë'-be', na' gulebéajë' bël-la' dxen chee'be' lu xezr la xu na'.

<sup>9</sup> Nadxa Jesús gunábene' benne' xudau' ca':

—¿Ájazra gun xrane xezr la xu nigá? Walé'ë, na' gútetë' benne' wen zrin ca', na' gudéë' xezr la xu chee' lu na' benne' xula ca'. <sup>10</sup> Ba blábale da naxúaj na lu xiche chee' Dios. Dxenná na:

Xiaj na' da quebe buluchine benne' wen xu'u, xiaj na' naca na'a xiaj blau chee' xu'u.

<sup>11</sup> Da nigá ben Xránadxu, na' dxexebánedxu chee' na.

<sup>12</sup> Nadxa gulaca lazre' xelël-lë' Jesús lawe' da zaj nézene' bchálajë' da dxulé'e nigá chee' gulé'ene' ca zaj naca lë'. Quebe bi gulunë' lawe' da gulezrebe' bi xelún benne' xezre ca'. Chee' lë na' bulusanë' Jesús, besí'aque'.



**Da bchalaj Jesús chee da dxuchizruj xu'u lawe'**

(Mt. 22.15-22; Lc. 20.20-26)

<sup>13</sup> Ca gudé na' gulesel-le' lau Jesús bal-la benne' xudau' fariseo, ne benne' zaj de'e Herodes chee gulebéa-je' Le' dizra' chee xelezéquene' xelawe' Le' zria.

<sup>14</sup> Benne' caní belelé'e lau Jesús, na' gulé'e Le':

—Benne' wesede, ba nézentu' ca dxennáu' da li, ne quebe dxezi'u ca da dxelennaze bènneache, lawe' da quebe dxennáu' Lue' ca zaj naca cúzreze bènneache. Da li naca ca dxusédenu' bènneache da naca chee Dios. ¿Dxunna da nadxixruj bea Dios lataj quízrujdxu da dxuchizruj benne' dxenná bea Roma dxi'u, che cabí? ¿Dxal-la' quízrujdxu, che quebe quízrujdxu?

<sup>15</sup> Jesús dxéquebe'ene' quegá du lazre' dxelenábene' Le' da nigá, na' guzre' le':

—¿Bizr chee na' dxebéajle neda' dizra'? Le dajguá nigá tu dumí da dxízrujle chee le'eda' na.

<sup>16</sup> Na' bedajlegü'e na, na' ca ble'e Jesús le na, na' gunábene' le':

—¿Nu lau da' dumí nigá, ne nu la naxúaj na nigá? Na' gulé'e Le':

—Chee benne' dxenná bea Roma.

<sup>17</sup> Nadxa Jesús guzre' benne' ca':

—Le gunezruj chee benne' dxenná bea Roma da naca chee', na' le gunezruj chee Dios da naca chee Dios.

Na' belexebáne' ca naca da bchalaj Jesús.

**Da bchalaj Jesús ca xelexebán benne' gate**

(Mt. 22.23-33; Lc. 20.27-40)

<sup>18</sup> Nadxa belezrín lau Jesús bal-la benne' xudau' saduceo. Benne' caní dxelenné' quebe xelexebán benne' gate. Ca'an guca, gulenábene' Jesús caní:

<sup>19</sup> —Benne' wesede, Moisés bzuaje' cheedxu da nadxixruj bea nigá: "Che tu benne' biu gatie', ne xegá'ana zru'ule', na' quebe nu zua bi chee bènnea', na' benne' biche' dxal-la' xequé'e nu'ula na' gute benne' chee' chee sua zrí'ine bènnea' gutie'."

<sup>20</sup> Gulezrá' gazre benne' biche'. Benne' nedxu bchaga na'abe', na' gútebe' quebe nu zrí'inebe' zua. <sup>21</sup> Na' benne' gudxupe' bequé'e nu'ula na', na' cá'aqueze gutie' quebe nu zrí'ine' zúaqueze. Cá'aqueze guca chee benne' guxunne'. <sup>22</sup> Ca'an guca, benne' gazre caní gulezúalene' nu'ula na', na' netue' quebe nu zrí'ine' guzúa. Naga xejsete na gútete nu'ula'. <sup>23</sup> Na'a xca', gate na' xelexebán benne' gate, ¿nula benne' biu caní gaque' benne' chee nu'ula na', lawe' da gulezúale benne' gazre ca' le'?

<sup>24</sup> Nadxa Jesús guzre' benne' ca':

—Nanítele le'e lawe' da quebe núnbeale da naxúaj na lu xiche chee Dios, ne quebe nézele ca naca xel-la waca chee Dios. <sup>25</sup> Gate na' xelexebán benne' gate, québedxa xuluchaga ne'e, ne québedxa xuluchaga na' bi nu'ula ca'. Xelaque' ca zaj naca gubáz chee xabáa.

<sup>26</sup> Na'a, ca naca chee benne' gate che xelexebane', ¿quebe ne gulábale ca da naxúaj na lu xiche chee Moisés ca gunná Dios gate na' bchálajlene' Moisés tu

lu xágadau' da dxala xi? Gunná Dios caní: "Neda' naca' Dios chee Abraham, ne chee Isaac, ne chee Jacob."

<sup>27</sup> Dios naque' Dios, quegá chee benne' gate ca'.

Naque' Dios chee benne' ban ca'. Ca'an naca, álega nanítele le'e.

**Da nadxixruj bea Dios da naca blau**

(Mt. 22.34-40)

<sup>28</sup> Na' zéqueze tu benne' dxuxuzájle'e da nadxixruj bea Dios, na' benne' da dxuchalaj Jesús, ne nézene' bzri'e dizra' chawe', na' gunábene' Le':

—¿Bizra da nadxixruj be'e Dios naca na da blaudxa?

<sup>29</sup> Na' Jesús guzre' le':

—Da bdxixruj be'e da naca na da blaudxa ca xúgute dxenná na caní: Le xene benne' Israel. Xránadxu Dios tuze naque'. <sup>30</sup> Bzri'i Xranu' Dios du lazru', ne nen duté bènne' du xu'u, ne nen duté xichaj lárzda'u, ne nen duté xel-la wal-la da napu'. Da nigá naca da nadxixruj bea da blaudxa, <sup>31</sup> na' da nadxixruj bea gudxupe' nácaqueze na ca le na, da dxenná na caní: Bzri'i benne' xula ca nazrí'i cuinu'. Quebe zua xetú da nadxixruj bea da naca blaudxa ca da chupa caní.

<sup>32</sup> Nadxa gunná bènnea' dxuxuzájle'e da nadxixruj bea Dios, dxé'e Jesús:

—Ca'an xanne naca ca bechébu', Benne' dxusede. Da li naca ca dxennáu'. Zua tuze Dios, ne quebe nu zua xetú ca Le', <sup>33</sup> na' che zrí'idxu Dios du lárzredxu, ne nen duté xichaj lárzdaudxu, ne nen duté bènne' du xú'udxu, ne nen duté xel-la wal-la da nápadxu, ne che zrí'idxu benne' xula ca nazrí'i cuínadxu, da caní zaj zácadxa na ca xúgute be' xixre' ca' dxútedxu-ba' lau Dios, ne ca xúgute da dxuzéxedxu lu cugu chee Dios.

<sup>34</sup> Nadxa Jesús, ca benne' bchálaje' chawe', na' guzre' le':

—Xeláteze ne de na chee nna bea Dios xichaj lárzda'u.

Na' québedxa nu bexazre nábene' Le' dizra' ca'.

**¿Nu zrí'ine' naca Cristo?**

(Mt. 22.41-46; Lc. 20.41-44)

<sup>35</sup> Jesús dxusédené' benne' ca' lu xudau', na' gunné':

—¿Bizr chee na' dxelenná benne' dxuluxuzájle'e da nadxixruj bea Dios naca Cristo zrí'ine David? <sup>36</sup> David ná'queze ca bzéajni'i Be' Lá'azxa le', gunné':

Xránadxu Dios guzre' Xrana':

"Gudxé'e chalá'a xabela chia', ca zrin zra ba nuzúa' benne' dxeledábague' lue', chee na be'enu' le'."

<sup>37</sup> Che David ná'queze dxenné': "Xrana'", ¿ájala chee na' naque' zrí'ine'?

Benne' zan ca' du lazre' buluzé nague' chee'.

**Jesús dxulé'ene' zaj nachixre benne' ca' dxuluxuzájle'e da nadxixruj bea Dios**

(Mt. 23.1-36; Lc. 11.37-54; 20.45-47)

<sup>38</sup> Ca dxusede Jesús benne' ca', na' gunné':

—Le gapa chi'i cuínale chee benne' ca'an dxuluxuzájle'e da nadxixruj bea Dios. Benne' caní dx-

eledánene' dxelácue' zra lang' tunna, ne dxeledánene' xulugapa bèneache le' diuzre nen dizra' ba lá'ana lau bèneache ca'. <sup>39</sup> Benne' caní dxeledánene' dxelebé' latak blau lu xu'u naga dxelezraga benne' dxelúe lá'ané' Dios, ne dxeledánene' dxelebé' latak blau naga dxelawé' xrche'. <sup>40</sup> Benne' caní dxelegüé' lizre xrlataj nu'ula ca' ba gulate benne' cheé', na' cheé' xululé'e cuine' ca benne' xrlátaje, dxeluné' xel-la dxuluwizraj Dios tunna. Le' zaj nabágadxe' zria.

### Dumí da gulú'u nu'ula xache' ba gute benne' chie'

(Lc. 21.1-4)

<sup>41</sup> Tu lasa gate na' dxe' Jesús lu xudau' cuita naga dx-elegú'e dumí, na' dxenné'e ca dxelún benne' ca' dx-elegú'e dumí, ne ca dxelún benne' gunní'a ca', dx-elegú'e dumí zren. <sup>42</sup> Ca'an guca, bzin tu nu'ula xache' ba gute benne' chie', na' gulu'e chupa dumí lásedau' da quebe zaj zácate' can. <sup>43</sup> Nadxa gunné' Jesús benne' ca'an dxusédene', na' guzre' le':

—Da li dxapa' le'e, nu'ula xache' nigá bnézrujdxé' ca xúguté' benne' ca'an gulegú'e dumí. <sup>44</sup> Xúguté' benne' ca' gulegú'e da québedxa dxelechínne'. Nu'ula xache' nigá gulu'e ca naca da napé', da nunte' gawe'.

### Dxuchalaj Jesús ca gaca gate xrinnej xudau'

(Mt. 24.1-2; Lc. 21.5-6)

## 13 Gate bedxúaj Jesús lu xudau', na' tu benne' dxusédene' guzre' le':

—Benne' Weséde, gunná'xque ca zren naca xudau', ne xiaj xrtante' caní.

<sup>2</sup> Bechébe Jesús:

—¿Dxelé'enu' na'a ca zren naca xudau' nigá? Québedxa xegá'ana tu xiaj cuzru ljwezre nigá. Ca naca xudau' nigá wabía xí'queze na.

### Da xelunna bea na gate cheajsé cheé xezr la xu nigá

(Mt. 24.3-28; Lc. 21.7-24; 17.22-24)

<sup>3</sup> Nadxa xjaque' lu xi'a cheé xaga olivo ca', da zua na chalá'a ca li dxa xu'u xudau'. Gate dxe' Jesús ga na', na' Pedro, ne Jacobo, ne Juan, ne Andrés gulé'e Jesús leze':

<sup>4</sup> —Dxaca lázrentu' gulé'enu' netu' bata gaca caní. ¿Bizra da ca' xelunna bea na gaca xúguté' da caní?

<sup>5</sup> Na' bechébe Jesús:

—Le gapa chi'i cuínale cheé quebe nu si xé le'e, <sup>6</sup> lawe' da xeledá' benne' zante' xelún lu'a neda', welené' zaj naque' Cristo, na' welezí xé'e benne' zante'.

<sup>7</sup> 'Le'e, gate xénele gaca wedil-la, ne ba dxaca wedil-la, quebe zrébele. Cá'queze dxal-la' gaca na, san quegá ne zrin zra cheajsé cheé na, <sup>8</sup> lawe' da xeledíl-lalé benne' tu xezr la xu benne' xetú xezr la xu, na' tu xezre benne' tíl-lalé na xetú xezre. Wazrú' zánete' xezre, ne wata' gubina', ne wadxé'e na zraga bèneache. Da caní zaj naca na naga su lauze ca naca da xelezaca zi' bèneache.

<sup>9</sup> 'Le guxúe cuínale lawe' da xuludé'e le'e lu na' benne' xu'u lawe', na' xuluzaljé' le'e lu xu'u naga dxulucá'ana szrene' Dios. Xuludé'e le'e lau benne' xu'u lawe' ca', ne lau benne' dxelenná be'e lawe' da nácale

chia' neda'. Gate ca'an gaca, na' guchálajle chia' neda' lau benne' ca'. <sup>10</sup> Nédxudxa ca zrin zra cheajsé cheé na, dizra' chawe' chia' gaca lban cheé na lau bèneache zaj zré'e xúguté' xezr la xu. <sup>11</sup> Gate xeleché'e le'e cheé xuludé'e le'e lu na' benne' xu'u lawe' ca', quebe cue'le gunne xue bi nnale, ne quebe quilaj lázrele ájala guchálajle. Nnele ca da gunna Dios le'e zra na' lawe' da quegá le'eze nnele, san Be' Lá'azxa, Le' nne'. <sup>12</sup> Ca xelún bèneache lu zra na', xuludé'e bi biche' ca' lu na' benne' xelútié' lebe'. Cá'anqueze xelún xruze xrna' ca', xuludé'e zrí'inequeze'. Na' zrí'ine' ca' weledábagabe' xruze xrnabe', ne xelunbe' xelátié'. <sup>13</sup> Xúguté' bèneache xelezré'e le'e lawe' da nácale chia' neda'. Bèneache' zé tipe' ca zrindxa zra cheajsé cheé na, la bènea'.

<sup>14</sup> 'Daniel, bènea' bchálajé' waláz cheé Dios bzuajé' ca naca cheé da sban da guzrí'a xi na. Gate lé'ele le'e zria da nigá latak lá'azxa naga quebe dxal-la' cuía na, nadxa benne' zaj zré'e xezre ca' zaj nababa xezr la xu Judea dxal-la' xuluzrúnnujé', ne chjaque' lu xi'a zren. (Benne' dxulabé' da nigá dxal-la' cheajní'ine' da naca cheé na.) <sup>15</sup> Nu benne' zria chju'u lizre' lu zra na' quebe dxal-la' xexétaje' cheé bi xebéaje' lu xu'u. <sup>16</sup> Benne' zé le'e xixre' quebe dxal-la' xezrine' lizre' cheé xequé'e zra lané'. Dخال-la' xuluzrúnnujé' benne' caní. <sup>17</sup> Baxache' xelaca nu'ula zaj zué' zi'i, ne nu'ula ca' zaj nuxre' bidu dxe'ene lu zra na'. <sup>18</sup> Le naba lau Dios cheé quebe gaca beu' zaga gate na' dxal-la' guzrúnnujle, <sup>19</sup> lawe' da xelezaca zidxa bèneache lu zra ca'an ca da quebe ne xelezácate', gulala ben Xránadxu Dios xezr la xu nigá, ne québedxa xelezácadxe' ca'. <sup>20</sup> Che Xránadxu Dios quebe guzáchie' zra ca', québedxa nu láqueze', san ba bzachie' zra ca'an lawe' da nazrí'ine' bi cheé' ca', bi ca' ba gucá'a le'.

<sup>21</sup> 'Lu zra na', che nu benne' dxé'e le'e: "Le na' xque, nigá zua Cristo", u che nne': "Le na' xque, na' zé'", quebe chéajlele cheé'. <sup>22</sup> Welelá' benne' xelezí xé'e, benne' xeluné' lu'a Cristo, ne xeluné' lu'a xel-la waca cheé xabáa cheé xelezí xé'e bi ca' ba gucá'a Dios che xelezéquene'. <sup>23</sup> Le sua le'e ban lazre'. Neda' ba gucha' le'e xúguté' nédxuté' ca gaca na.

### Ca gaca gate xida Benne' Gulje' Bèneache

(Mt. 24.29-35, 42-44; Lc. 21.25-36)

<sup>24</sup> Nadxa gunná' Jesús:

—Lu zra ca', gate te zra cheé xel-la zi' caní, na' chul-la gubizra, ne québedxa gusení' beu'. <sup>25</sup> Belaj ca' xelexruj na zran xabáa, na' ca da zaj nalá' zaj zé tipa zran xabáa welezrízete' na. <sup>26</sup> Ca nadxa xeledé'ene' neda', Benne' Gulje' Bèneache, za'a lu beuj bza, napa' xel-la waca zren, ne da xabáa chia'. <sup>27</sup> Na' la sél-latea' gubáz cheé xabáa chia' ca' cheé xuluchague' benne' ca' gunní'a, benne' zaj zré'e dapa saca cheé xezr la xu nigá, benne' zitu' zá'aca nila, zá'aca na'la.

<sup>28</sup> 'Le guséde ca naca da dxulé'e na ca naca cheé xaga higo. Gate na' dxelexedxe'ene zruze na, ne zá'aca xrlegue na, na' ba nézele za beu' la. <sup>29</sup> Cá'anqueze, gate na' lé'ele ba dxelaca da caní, nézele ba zua gáguze zra cheajsé na, ne gácate' na. <sup>30</sup> Da li dxapa'

le'e, xúgute da caní gaca na nédxudxa ca xelate bèneache zaj zře'ē lu zra na'. <sup>31</sup> Xabáa ne xęzr la xu nigá wadé chee na. Xrtizra' nigá quebe te na ca'anze, san waca li na.

<sup>32</sup> 'Ca naca chee zra na', ne chee beu' na' quegá nu neze bata gaca na. Quebe zaj neze gubáz chee xabáa, ne Zrí'inequeze Dios quebe nézene'. Tuze Xradxu Dios nézene'.

<sup>33</sup> 'Chee lę na', le sua le'e ban lazre'. Le guxúe, ne le guchálajlę Dios lawe' da quebe nézele bátala zrin zra na'. <sup>34</sup> Gaca na ca guca chee tu benne' biu, benne' guzė'ę zéaję' zitu'. Gate na' za dxúaję' xu'u, na' dxudée' da nape' lu na' bi węn zrin chee' ca', ne dxunézruję' tu tube' zrin da xelunbe', ne dxusebague' benne' zę' dxa xu'u guxúe xánnie'. <sup>35</sup> Chee lę na', le sua le'e ban lazre' lawe' da quebe nézele le'e bátala xelá' xrane xu'u, che dxe xrinneze, che dxęla, che ca cuezre xjeaj, che che zílala, <sup>36</sup> ga gaze xelė'ę chadí dute, na' cheajxraque' le'e dxásele. <sup>37</sup> Ca da dxennia', dxapa' le'e, dxapa' xúgute benne': ¡Le sua ban lazre'!

#### Dxelexegá'ane' dizra' chee xelę-lę' Jesús

(Mt. 26.1-5; Lc. 22.1-2; Jn. 11.45-53)

**14** Xechupa zra za zrin chee xelunę' laní chee xulusá lazre' ca naca da bęn Dios gate na' bebéaję' benne' Israel ca' lu xęzr la xu Egipto, laní na' dxelawe' xeta xtila da quebe nachixre cua zichaj chee na. Na' benne' xíchaję' ca' chee bxruze ca', ne benne' dxuluxu-zájłę' da nadxiruj bea Dios belilaj lazre' ájala xelunę' chee xelę-lę' Jesús bagácheze chee xelútie' Lę'. <sup>2</sup> Na' gulenné':

—Quegá gundxu na lu laní, chee quebe dxe'ena zraga bèneache.

#### Tu nu'ula dxegü'ę da za xichaj Jesús

(Mt. 26.6-13; Jn. 12.1-8)

<sup>3</sup> Zua Jesús lu xęzre Betania, lu lizre tu benne' lę' Simón, benne' guzrįę' wę' guzru'. Dxácate zaj dxe'ę dxelawe' na', na' bzrin tu nu'ula nu'ę tu da dau' da naca na xiaj xrtan da nazí le na alabastro, ne nazratę na da za da dxelá zixre chee xiaj nardo, da zácale'ę na. Na' gulė'ę da dau' na', ne blálaję' da za na' xichaj Jesús. <sup>4</sup> Bal-la benne' ca', benne' zaj zře'ę na', belezrė'ę, na' gulenné', dxelę lįwezre':

—¿Bizr chee na' bęn ditaj nu'ula nigá da za na'? <sup>5</sup> Waca ta'u da na' chee sídxadxu ca lázrujdxu chee tu iza, chee gácaleđdxu benne' xache' ca'. Na' guledil-lę' nu'ula'.

<sup>6</sup> Na' Jesús guzre' lę':

—Quebe xęle nu'ula nigá ca'. ¿Bizr chee na' dxunle lę' zęde? Ca naca da bęn nu'ula nigá chia' neda' naca na da cháwełę'e. <sup>7</sup> Benne' xache' ca' tu zrázqueze' ládujla le'e. Waca gunle benne' ca' chawe' gate dxaca lázrele, san neda' quegá tu súaleza' le'e. <sup>8</sup> Nu'ula nigá bęne' ca da guzėquene', gulu'ę da za bęl-la' dxen chia' nédxula chee zra gate gachia' lu xędxu ba. <sup>9</sup> Da li dxapa' le'e, gáteteze na' gaca lban chee dizra' chawe' chia' lu xúgute xęzre zaj nnita xęzr la xu nigá, cá'anqueze

zráłajqueze ca naca da bęn nu'ula nigá, chee xulusá lazre' chee'.

#### Judas dxexegá'ane' dizra' gudėe' Jesús lu na' benne' ca' dxeledábague' Lę'

(Mt. 26.14-16; Lc. 22.3-6)

<sup>10</sup> Nadxa Judas Iscariote, tu benne' chazrinnu ca' dxusęde Jesús, guxíaję' xejchálajłene' benne' xíchaję ca' chee bxruze ca' chee xelxegá'ane' dizra' ájala gunę' gudėe' Jesús lu na' benne' ca'. <sup>11</sup> Ca belén benne' ca' ca gunná Judas, gulebėłęne', na' gulechebe lazre' xulunézruję' lę' dumí. Nadxa Judas guzú lawę' dxexíłaję' ájala gudėe' Jesús lu na' benne' ca'.

#### Da dxágudxu chee gusá lázredxu ca gute Jesús

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Zra nedxu chee laní gate dxelawe' xeta xtila da quebe nachixre cua zichaj chee na, ne dxelutię' zríładau' chee Laní Pascua, gate na' dxulusá lazre' ca guca gate bebéaj Dios benne' Israel ca' lu xęzr la xu Egipto, na' benne' ca' dxusęde Jesús buluchębe' Lę':

—¿Gazra dxaca lazru' chéajntu' cheajcuézentu' da gágudxu Laní Pascua?

<sup>13</sup> Nadxa Jesús gusel-lę' chupa benne' ca' dxusėdene'. Dxe'ę lę':

—Le chjaca lu xęzre Jerusalén, na' cheajxrácale tu benne' biu ze nu'ę tu dxe'e nisa. Le chjácłene', <sup>14</sup> na' naga xexu'ę, xęle benne' xrane xu'u na': "Benne' Weseđe cheędxu dxenné': ¿Gazra zua xu'u naga guna' Laní Pascua, chee gawa' tu zren nen benne' ca' dxusėdeda'?" <sup>15</sup> Nadxa gulė'ene' le'e tu xu'u zren da naca na gudxupe' cuía sibe da bache nabeza na. Na' gucuézale da gágudxu.

<sup>16</sup> Nadxa benne' ca' dxusėdene' belexedxúaję' gusá'aque', na' belezrine' xęzre Jerusalén. Na' guca xúgute ca da ba guzre Jesús lę', na' bulucueze' da xelawe' lu Laní Pascua.

<sup>17</sup> Ca gula chizrela, na' bzrin Jesús nen benne' chazrinnu ca' dxusėdene'. <sup>18</sup> Na' ca zaj dxe'ę dxelawe', na' gunná Jesús, dxe'ę lę':

—Da li dxapa' le'e, tu benne' ládujla le'e, benne' dxawe' tu zren nen neda', gudėe' neda' lu na' benne' ca' dxeledábague' neda'.

<sup>19</sup> Nadxa benne' ca' gulezúa xácheze', ne gulezú lawę' dxuluchębe' Jesús tu tuę':

—¿Neda' xca'?

Na' xetúe' cá'anqueze guzre' Lę':

—¿Neda' xca'?

<sup>20</sup> Nadxa bechębe Jesús, dxe'ę lę':

—Tu benne' ládujla le'e chazrínnulla, benne' dxawe' tu zren nen neda' lu xé'ena nigá. <sup>21</sup> Da li gatia' neda', Benne' Gulję' Bėnneache, ca da naxúaj na chia' lu xiche chee Dios. Baxache' naca chee benne' na' gudėe' neda' lu na' benne' ca' dxeledábague' neda'. Cháwedxa gaca chee bėnnea' la ca gúlaję'.

<sup>22</sup> Dxácate zaj zře'ę dxelawe', na' gucá'a Jesús xeta xtila, ne guzre' Dios: "Xcalenu'." Ca gudé bzúruję' na, na' bnézruję' na chee benne' ca', ne guzre' lę':

—Le gagu na. Da nigá dxulé'e na ca gaca chee bel-la' dxen chia'.

<sup>23</sup> Nadxa guqu'é tu da dxé'ajdxu, ne ca gudé guzre' Dios: "Xcalenu'", na' bnézruje' na benne' ca', na' xúgute' gulé'aje' late' weaj da na'. <sup>24</sup> Nadxa Jesús guzre' le':

—Da nigá zéaje na dxen chia' da dxucá'ana chawe na xel-la wezría cube. Dxen chia' nigá lalaj na ne chee benne' zan. <sup>25</sup> Da li dxapa' le'e, québedxa xí'aja' xrise uva caní ca zrindxa zra gate na' xí'aja' da cube naga dxenná bea Dios xabáa.

### Dxulé'e Jesús nna Pedro quebe núnbe'e Jesús

(Mt. 26.30-35; Lc. 22.31-34; Jn. 13.36-38)

<sup>26</sup> Ca gudé belul-le' da gaca ba Dios, na' belegüene' lu Xi'a Xaga Olivo Ca'. <sup>27</sup> Nadxa gunná Jesús, dxé'e le':

—Xúgutele le'e gusán lázrele neda' na'a xela lawe' da naxúaj na lu xiche chee Dios, dxenné': "Gutia' benne' dxuxúe' zrila' ca', na' zrila' ca' welase dínnajba'." <sup>28</sup> Gate te xebana' lu xédxu ba, wexá'a neda' nédxula ca le'e naga nababa Galilea.

<sup>29</sup> Nadxa Pedro guzre' Jesús:

—Láqueze xúgute' benne' caní xulusán lazre' Lue', neda' québequeze guna' ca'.

<sup>30</sup> Jesús guzre' le':

—Da li dxapa' lue', lu xela nigaze, nédxula ca za cuezre xjeaj chupa lasa, nnau' chunna lasa quebe núnbe'u neda'.

<sup>31</sup> Na' dxennáqueze Pedro na', gunné':

—Láqueze gatia' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute'.

### Jesús dxuchálajlene' Dios tu lataj nazí le na Getsemani

(Mt. 26.36-46; Lc. 22.39-46)

<sup>32</sup> Nadxa belezrine' tu lataj naga nazí le na Getsemani, na' gunná Jesús, dxé'e benne' ca' dxusédene':

—Le cueza nigá dxácaté cha'a cheajchálajlena' Dios.

<sup>33</sup> Nadxa Jesús guché'e Pedro, ne Jacobo, ne Juan, na' guzú lau dxezúa xáche'le'e. <sup>34</sup> Na' dxé'e benne' ca', dxenné':

—Ba dxunte na watia' lawe' da zua xáche'le'a. Le xegá'ana le'e nigá, ne le sua ban lazre'.

<sup>35</sup> Nadxa Jesús guz'é zéaje' xelate' ca na'la, na' guzúe' sudxú'ala, gunabé' Dios che gaca, quebe té'e xel-la zi' ca da dxal-la' saque' lu zra na'. <sup>36</sup> Ca dxuchálajlene' Dios na', gunné':

—Xrae, xúgute' wazéquenu' Lue'. Bselá neda' chee quebe saca zi'a lu da caní. Quebe gaca ca dxaca lázreza' neda', san ca dxaca lazru' Lue' gaca na.

<sup>37</sup> Nadxa bezrine' naga zaj zra' benne' ca'an dxusédene', ne xeajxraque' le' dxelási'e. Na' Jesús guzre' Pedro:

—Simón, ¿dxásequezu' nigá? ¿Quebe guzéquenu' gusebán lazru' tu chí'idau'ze? <sup>38</sup> Le sua ban lazre', ne le guchálajle Dios chee quebe gun zr'éaje da xriwe' le'e. Da li, lu xichaj lázrdaule dxaca lázrele gunle da xrláta-je, san lu belá' dxen chee dxate ni'a na'le.

<sup>39</sup> Nadxa Jesús guxíaje' da xula zeajchálajlene' Dios, na' tuze ca dxenné'. <sup>40</sup> Nadxa ca bezrine', xecha lasa xeajxraque' benne' ca'an dxusédene', dxelási'e lawe' da xu'u bchigala xiaj lawe'. Benne' caní quebe belexezrela lazre' bi xelé'e Le'. <sup>41</sup> Na' ca bezrín Jesús da guxunne' lasa, na' guzre' benne' ca':

—¡Le gase na'a, ne le xezí' lázre'! ¡Bache na! ¡Ba bzrin zra tea' neda', Benne' Gulje' Bénneache, lu na' benne' dul-la ca'! <sup>42</sup> ¡Le chasa! ¡Le chu'u na'a! ¡Ba za benne' gudé'e' neda' lu na' benne' ca' dxeledábage' neda'!

### Dxelé-le' Jesús

(Mt. 26.47-56; Lc. 22.47-53; Jn. 18.2-11)

<sup>43</sup> Dxácaté dxuchalaj Jesús caní, na' bzrin Judas, tu benne' nabábalene' benne' chazrinnu ca' dxuséde Jesús, na' zjácate benne' zan le', zaj nu'e xia nalá, ne xaga ca'. Zaj naque' benne' gulesel-la benne' xíchaje ca' chee bxruze ca', ne benne' ca' dxuluxuzájle'e da nadxiruj bea Dios, ne benne' gula sina ca'. <sup>44</sup> Judas, benne' dxudé'e Jesús lu na' benne' ca' dxeledábage' Le', ba blé'ene' benne' ca' tu da guné' da gaca bea na nule' naca Jesús, gunné':

—Bénnea' gunupa', benne' na' qué'l-lale. Le xeché'e, ne le guxúe xanne' chee quebe xelé'.

<sup>45</sup> Na' ca bzrine' na', gubigue' lau Jesús, ne dxé'e Le':

—Benne' Weséde.

Na' bnupe' Le'. <sup>46</sup> Nadxa benne' ca' gulé-le' Jesús, ne belexeché'e Le' ba nadxéaje'.

<sup>47</sup> Tu benne' dxune' Jesús tu zren guléaje' xia nalá chee', na' guchugue' naga tu bi wen zrin chee bxruze blau. <sup>48</sup> Nadxa Jesús guzre' benne' ca':

—¿Bdxuajle le'e zale nen xia nalá, ne xaga ca' chee qué'l-lale neda', dxugúnele neda' ca tu benne' gubán? <sup>49</sup> Xúgute' zra guzúa' neda' ládujla le'e dxusédeda' le'e lu xudau', na' cabata' gudé'l-lale neda'. Da nigá dxaca na chee gaca li ca da naxúaj na lu xiche chee Dios.

<sup>50</sup> Nadxa xúgute' benne' ca' dxuséde Jesús bulusán lazre' Le'. Buluzrúnnuje'.

### Dxuzrunnuj tu bi cuide'

<sup>51</sup> Tu bi cuide', bi zéajlebe' Jesús, ne nácube' tu ladxe' laga, gulé-la benne' ca' lebe'. <sup>52</sup> Na' bsanbe' ladxe' laga da nácube', na' bzurúnnujbe' gala xídezebe'.

### Dxezrín Jesús lau benne' ca' chee xu'u lawe' blau chee judío ca'

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Nadxa beleché'e Jesús lau bxruze blau, na' belezraga xúgute' benne' xíchaje ca' chee bxruze ca' ga na', ne benne' gula sina ca', ne benne' ca' dxuluxuzájle'e da nadxiruj bea Dios. <sup>54</sup> Pedro nawe' Jesús zítu'la, na' bzrine' chale'aj chee lizre bxruze blau, naga begá'ane' tu zren nen zruza ni'a na' benne' xu'u lawe' ca', dxuluxuché'e dxu'a xi'.

<sup>55</sup> Na' bxruze blau, ne xúgute' benne' chee xu'u lawe' blau chee judío ca' gulíl-laje' tu da gagu na zria Jesús chee xelezéquene' xuluzría xi'e Le' chee gatie', na'

quebe bi belezrélene'. <sup>56</sup> Benne' zante belún lazre' chee Jesús. Quebe bedxúaj dizra' chee' tuze ca dxelenné' tué' ne xetúe'. <sup>57</sup> Bal-le' belase', na' gulagu zría Jesús da wen lazre', dxelenné':

<sup>58</sup> —Netu' ba bennentu' chee', gunné': "Neda' guchín-naja' xudau' nigá da belún bènneache, na' ca gaca chunna zra xechisa' xetú xudau' da quebe xelún bènneache."

<sup>59</sup> Cá'anqueze quebe butil-le ca da dxelenné'.

<sup>60</sup> Nadxa bxruze blau guxase' ládujla xúgute benne' ca', na' bchebe' Jesús:

—¿Québequeze bi dizra' dxuxuzri'u Lue'? ¿Bizra da nigá dxelenné' chiu' Lue'?

<sup>61</sup> Jesús guzúe' zrire, ne gútuqueze bi dizra' buzri'e.

Na' bxruze blau bchebe' Le' xecha lasa, dxenné':

—¿Nacu' Lue' Cristo, Zri'ine Dios Lá'azxa?

<sup>62</sup> Na' gunná Jesús, dxé'e le':

—Awe', ca' naca'. Walé'ele neda', Benne' Gulje' Bénneache, dxe'a chalá'a xabéla chee Dios, nape' duté xel-la waca. Walé'ele neda' zezá'a lu beuj bza.

<sup>63</sup> Nadxa bxruze blau gucheze' zra lané', na' gunné':

—¿Núzradxa nachínedxu benne' xelagu zria Le'?

<sup>64</sup> Le'e bache bènquezle ca dxenné' schanni' chee Dios. ¿Bi dxennale le'e xca'?

Xúgute benne' ca' gulenné':

—Nabía xi'e dxal-la gati'e.

<sup>65</sup> Nadxa bal-la benne' ca' gulezú lawe' dxuluzré'e Le' zrene', na' bulucache' lau Jesús, ne buluzálaje' Le'. Dxelenné':

—Gunné xa'a nuzra dxue Lue'.

Na' benne' zruza ni'a na' benne' xu'u lawe' belú'e lau Jesús.

#### Dxenná Pedro quebe núnbe'e Jesús

(Mt. 26.69-75; Lc. 22.56-62; Jn. 18.15-18, 25-27)

<sup>66</sup> Pedro guzúe' lu chale'aj zri-la, na' bzin tu nu'ula wen zrin chee bxruze blau, <sup>67</sup> na' ca ble'ebe' Pedro dxe'e dxu'a xi' dxuxuché'e, na' gunná'abe' le', ne gúzrebe' le':

—Lue' dxdálequezu' Jesús, benne' Nazaret na'.

<sup>68</sup> Na' bechebe Pedro, dxenné':

—Quebe núnbe'a bènnea', ne quebe nezda' nu chee na' dxuchálaju'.

Na' bedxúaj Pedro chale'aj naga dxelu'e. Nadxa gudxezre xjeaj. <sup>69</sup> Nadxa nu'ula wen zrin chee bxruze blau na' gunná'abe' Pedro xecha lasa, na' gunabe', dxé'ebe' benne' ca' zaj zré'e na':

—Benne' nigá naque' tuze benne' ca'an.

<sup>70</sup> Pedro xecha lasa bzue' Jesús chalá'ala. Xetú chí'idau' benne' ca' zaj zré'e na' gulé'e Pedro xecha lasa:

—Da líqueze lue' nacu' tuze benne' ca'an lawe' da nacu' benne' chee xezre ca' zaj nababa Galilea. Ca dxuchálaju' naca bea na da na'.

<sup>71</sup> Nadxa Pedro guzú lawe' dxuzría xi' cuine', ne ben chúchue' xrtizre', gunné':

—Quebe núnbe'a bènnea' dxennale le'e ca'.

<sup>72</sup> Ca'an guca, gudxezre xjeaj da gudxupe' lasa.

Nadxa Pedro xeajsa' lazre' ca da guzre Jesús le', gunné': "Nédxudxa ca za cuezre xjeaj chupa lasa, lue' nnau' chunna lasa quebe núnbe'u neda'." Na' ca xeajsa' lazre' da nigá, gudxézrele'e.

#### Dxezrín Jesús lau Pilato

(Mt. 27.1-2, 11-14; Lc. 23.1-5; Jn. 18.28-38)

**15** Ca guxaní' che zila, na' benne' xíchaje ca' chee bxruze ca' belexedupe' nen benne' gula sina ca', ne benne' ca' dxuluxuzájle'e da nadxiruj bea Dios, ne xúgute benne' chee xu'u lawe' blau chee judío ca'. Guleché'e Jesús nadxéaje', na' buludé'e Le' lu na' Pilato. <sup>2</sup> Pilato gunábene' Jesús:

—¿Nacu' Lue' wenná bea chee judío ca'?

Na' bechebe Jesús:

—Ca' naca na, ca ba gunná'u lue'.

<sup>3</sup> Na' benne' xíchaje ca' chee bxruze ca' gulawe' zria Jesús da zante. <sup>4</sup> Nadxa Pilato gunábene' Jesús xecha lasa:

—¿Quebe bi dizra' dxuzri'u? Gunná'xque ca da zánete da dxelawe' zria Lue'.

<sup>5</sup> Jesús quebe bi dizra' ca buzri'e. Ca' guca, bebánele'e Pilato.

#### Dxelichaj be'e gate Jesús

(Mt. 27.15-31; Lc. 23.13-25; Jn. 18.38—19.16)

<sup>6</sup> Pilato zua tu da dxúnqueze' tu iza tu iza gate dxaca Laní Pascua. Dxusané' tu benne' xu'e lizre xia, núteteze benne' xelenaba bènneache ca' le'. <sup>7</sup> Lu xu'u lizre xia na' xu'u tu benne' le' Barrabás, benne' nunge' tu zren benne' ca' beluti'e benne' ca', gate na' gudíl-lalene' benne' Roma ca'. <sup>8</sup> Na' belezrín lau Pilato benne' xezre ca', ne gulezú lawe' dxelenabe' lau Pilato guné' ca dxúnqueze'. <sup>9</sup> Na' bechebe Pilato:

—¿Dxaca lázrele le'e gusana' bènnea' naque' wenná bea chee judío ca'?

<sup>10</sup> Caní gunná Pilato lawe' da dxeque be'enge' buludé'e benne' xíchaje ca' chee bxruze ca' Jesús lu ne'e lawe' da dxelaque' zre'e lazre' Le'. <sup>11</sup> Na' benne' xíchaje ca' chee bxruze ca' beleché'e benne' xezre ca', ne gulegú'u xel-le' le' chee xelexenabe' lau Pilato gusané' Barrabás. <sup>12</sup> Nadxa Pilato gunábene' benne' ca':

—¿Bi dxaca lázrele le'e guna' chee bènnea' naque' wenná bea chee judío ca'?

<sup>13</sup> Nadxa belexechebe', gulenné' zizraj:

—Bde'e xaga béguaj.

<sup>14</sup> Na' Pilato bchebe' benne' ca':

—¿Bizra da calela nun benne'?

Xecha lasa gulenné' zizraj:

—Bde'e xaga béguaj.

<sup>15</sup> Nadxa Pilato bsané' Barrabás lawe' da dxaca lazre' xegá'ane' chawe' nen benne' xezre ca'. Na' ca gudé na' bsebage' benne' ca' xeline' Jesús tu xide, na' bdee' Le' lu na' benne' ca' chee xuludé'e Le' xaga béguaj.

<sup>16</sup> Nadxa benne' dxjaque' wedil-la guleché'e Jesús lu chale'aj xu'u lawe', na' bulutupe' xúgute ljwezre' benne' dxjaque' wedil-la lataj na'. <sup>17</sup> Na' bulugácue'

Jesús tu ladxe' bzawe, ne buluzríe' xíchaje' tu da zaj nune' nen zruze xaga xeche'. <sup>18</sup> Nadxa gulezú lawe' dxelenné' zizraj:

—¡Gaca ba wenná bea chee judío ca'!

<sup>19</sup> Na' belúe' xichaj Jesús nen tu xia xtila, ne buluzré'e Le' zrene'. Na' buluzú zribé' lawe', dxelape' Le' ba lá'ana. <sup>20</sup> Ca gudé bulucá'ana dítaje' Le' caní, na' belexegu'e ladxe' bzawe, na' buluxugácue' Le' zra lá'anaqueze'. Nadxa belexebéaje' Le' chee chjaque' naga xuludé'e Le' xaga béguaj.

**Dxuludé'e Jesús xaga béguaj**  
(Mt. 27.32-44; Lc. 23.26-43; Jn. 19.17-27)

<sup>21</sup> Tu benne' chee xezre Cirene le' Simón, xra Alejandro, ne Rufo, zezé'e le'e xixre', na' ca bedé'e na', na' bulusebague' le' gu'e xaga béguaj chee Jesús.

<sup>22</sup> Guleché'e Jesús tu lataj nazí le na Gólgota, da zéaje na "Lataj Chee Zrita Xichaj Benne' Gate." <sup>23</sup> Nadxa bulunézruje' Jesús xrise uva wal-la da nachixre da sla' chee mirra. Jesús quebe gu'e na. <sup>24</sup> Nadxa buludé'e Le' xaga béguaj, na' benne' dxjaque' wedil-la gulebéaje' da gulé'e na nule' xelexale' zra lana Jesús, na' bila xelexúa tu tue'.

<sup>25</sup> Guca che zílala gate na' buludé'e Jesús xaga béguaj. <sup>26</sup> Buludé'e da naxúaj xichaj xaga béguaj chee Jesús da dxulé'e na da nabague', da naxúaj na caní: "Wenná Bea Chee Judío Ca'." <sup>27</sup> Cuita Jesús buludé'e le'e xaga béguaj ca' chupa benne' gubán, tue' chalá'a xabéla chee', ne xetúe' chalá'a xéglala chee'. <sup>28</sup> Ca'an guca, guca li ca da naxúaj na lu xiche chee Dios naga dxenné' caní: "Buluzue' Le' tu zren nen benne' wen da zrinnaj ca'."

<sup>29</sup> Na' benne' dxeledé'e na' gulenné' schanni' chee Jesús, ne buluté' xíchaje', dxelenné':

—Awe'. Guchínnaju' Lue' xudau' cheentu', na' gate gaca chunna zra, na' xechisu' na. <sup>30</sup> Bselá cuinu' na'a, ne bexetaj le'e xaga béguaj na'.

<sup>31</sup> Cá'anqueze belún benne' xíchaje' ca' chee bxruze ca', ne benne' dxuluxuzájle'e da nadxixruj bea Dios. Belún le' chee Jesús, dxelé' ljwezre':

—Benne' xula bselá benne, san Le' québequeze dxézéque' guselá cuine'. <sup>32</sup> Lue', Cristo, wenná bea chee benne' Israel, bexetaj le'e xaga béguaj na' chee le'entu', na' chéajlentu' chiu'.

Cá'anqueze belún benne' ca' zaj de'e le'e xaga béguaj ca' tu zren nen Jesús, gulenné' schanni' chee'.

**Dxate Jesús**  
(Mt. 27.45-56; Lc. 23.44-49; Jn. 19.28-30)

<sup>33</sup> Ca bzin wagubizra, na' guchul-la duté lu xezr la xu nigá tu chí'i wal-la gula. <sup>34</sup> Ca gudé na', na' gunná Jesús zizraj:

—Eloi, Eloi, ¿lama sabactani?

Da nigá zéaje na: "Dios chia', Dios chia', ¿bizr chee na' nusanu' neda'?"

<sup>35</sup> Bal-la benne' ca' zaj zre'e na' belenne' na, na' gulenné':

—Le xene. Dxenné' Elías, bénnea' bchálaje' waláz chee Dios.

<sup>36</sup> Nadxa tu benne' guzá chégü'e, na' xeajlá'awaje' lu xrise uva zichaj tu da dxezrupe na nisa, na' bzu'e na lawe' tu xia xtila da bcuene' dxu'a Jesús chee xi'aje', na' gunná benne' nigá:

—Cuézadxu. Guxúexquedxu che wida Elías chee xulétaje' Le'.

<sup>37</sup> Nadxa Jesús gudxezre xe'e, na' gútete'. <sup>38</sup> Ca ná'queze gudxeza ladxe' da ze lu xudau', guca na chú-pala. Gucá'a na dxa'la, bedxúajte na zri'la. <sup>39</sup> Na' benne' dxenná be'e lu wedil-la, benne' ze' lau Jesús, gate na' blé'ene' ca gudxezre xe'e, ne ca guca gútete', na' gunné':

—Da líqueze benne' nigá guque' Zri'ine Dios.

<sup>40</sup> Cá'anqueze zaj ze na' bal-la nu'ula dxelenné'e zitu'la. Ládujla nu'ula caní zaj ze María Magdalena, ne Salomé, ne María, xrna Jacobo cuide' ne José. <sup>41</sup> Nu'ula caní gusá'acalene' Jesús, ne gulácalene' Le' gate na' gudé' naga nababa Galilea. Cá'anqueze zaj ze na' zánedxa nu'ula xula, nu'ula ca' belezrine' Jerusalén tu zren nen Jesús.

**Dxulucache' Jesús lu xedxu ba**  
(Mt. 27.57-61; Lc. 23.50-56; Jn. 19.38-42)

<sup>42</sup> Ca za chizrela bzin José, benne' Arimatea ga na'. Benne' nigá naque' benne' blau ládujla benne' ca' chee xu'u lawe' blau chee judío ca'. Cá'anqueze le' dxebeze' zra la' Dios chee nna be'e. Lawe' da naca zra dxulucueze', zra nedxu chee zra dxulupá'ane', du lazre' guxú'e lau Pilato, na' gunabe' si'e lataj xexu'e Jesús.

<sup>44</sup> Bebánelé'e Pilato ca bennene' ba gute Jesús, na' gunné' benne' dxenná be'e lu wedil-la na' chee gunabe' che ba guca ca'. <sup>45</sup> Gate bénnea' dxenná be'e lu wedil-la gunné' ca'an guca, nadxa Pilato bnézruje' José lataj bexu'e Jesús. <sup>46</sup> Nadxa José guzi'e tu ladxe' xtila la-ga, na' bulétaje' Jesús, ne bulazre' Le' ladxe' xtila na'. Na' gúxrue' Jesús tu lu ba da ba gudene' le'e xiaj xre, na' bséxruje' ba na' nen tu xiaj zren. <sup>47</sup> María Magdalena, ne María, xrna José belelé'equezne' naga bulucache' Jesús.

**Dxexebán Jesús ládujla benne' gate**  
(Mt. 28.1-10; Lc. 24.1-12; Jn. 20.1-10)

**16** Ca gudé zra dxulupá'ane', na' María Magdalena, ne Salomé, ne María, xrna Jacobo, gulez'íe da dxelá zixre chee cheajlelu'e Jesús. <sup>2</sup> Na' bál-la'la zra nedxu chee da gazre zra belezrine' dxu'a ba gate na' za dxalaj gubizra. <sup>3</sup> Na' gulenné', dxelé' ljwezre':

—¿Nuzra cua xiaj da naxezxuj ba?

<sup>4</sup> Ca gulenné'e, na' belelé'ene' xiaj zren na' da buluséxruje' ba, ba nadúa na. <sup>5</sup> Ca gu'lu'e lu ba, na' belelé'ene' tu benne' dxe'e chalá'a xabéla, nácu'e zra lane' tunna da chiche, na' belezrebe'. <sup>6</sup> Na' gunná benne' nigá, dxé'e nu'ula ca':

—Quebe zrébele. Le'e dxexíajle Jesús, benne' Nazaret, bénnea' gudé'e le'e xaga béguaj. Bache bebán bénnea'. Québedxa xu'e nigá. Le nna' lataj naga

gulexrué' Lẹ'. <sup>7</sup> Le chjaca na'a, le cheajezre benne' ca' bsédené', ne Pedro cuía lau Jesús chéajé' naga nababa Galilea ca le'e. Na' xelé'equezle Lẹ' ca ba gunnáqueze'.

<sup>8</sup> Nadxa nu'ula ca' buluzrúnnuje', besí'aque' dxu'a ba lawe' da belezrébele'ẹ. Quebe nu guléqueze' ca da guca na lawe' da dxeleze'bele'ẹ.

### Jesús dxulé'e lau María Magdalena

(Jn. 20.11-18)

<sup>9</sup> Ca gudé bebán Jesús ládujla benne' gate ca guxaní' zra nedxu chee' da gazre zra, na' ble'e lawe' zate ca' María Magdalena, nu'ula na' bebéaj Jesús gazre be' xriwe' guxú'ẹ. <sup>10</sup> Nu'ula nigá guxíajé' xeajezre' benne' ca' gulaque' Jesús tuze, zaj zre'ẹ baxácheze, ne dxelebezre'. <sup>11</sup> Gate na' gulenne' nabán Jesús, na' ba ble'e nu'ula nigá Lẹ', quebe guléajlé'ẹ.

### Dxulé'e lau Jesús chupa benne' bsédené'

(Lc. 24.13-35)

<sup>12</sup> Ca gudé na' ble'e lau Jesús nazrala chupa benne' ca' bsédené' zaj xu'ẹ neza le'ẹ xixre'. <sup>13</sup> Benne' caní belexebi'ẹ, na' xeajleguezre' benne' xezícala. Cá'anqueze benne' caní quebe guléajlé'ẹ.

### Jesús dxusebague' benne' gubáz chee' ca' da dxal-la' xeluné'

(Mt. 28.16-20; Lc. 24.36-49; Jn. 20.19-23)

<sup>14</sup> Ca gudé dxa, na' ble'e lau Jesús chinéaj benne' ca' bsédené' ca zaj dxe'ẹ dxelawe', na' gudil-le' le' lawe' da

quebe guléajlé'ẹ ba bebane', ne lawe' da zaj naque' lázrdau zide' lawe' da quebe guléajlé'ẹ chee' benne' ca' belexelé'ene' Lẹ' ca gudé bebane'. <sup>15</sup> Na' gunné', dxé'ẹ benne' ca':

—Le chjaca du ca naca xezr la xu. Le cu'u lban chee' dizra' chawe' chia' chee' xelénqueze xúgute' bèneache. <sup>16</sup> Benne' chéajlé'ẹ, ne chue' nisa, la bènea', na' benne' quebe chéajlé'ẹ, wabía xi' bènea'. <sup>17</sup> Da dxelunna bea caní xululé'e benne' ca' xeléajlé'ẹ chia', xuluchínene' La neda' chee' xelxebéajé' be' xriwe'. Xuluchálajé' dizra' nazrala. <sup>18</sup> Welúxrué' bẹla' ca', ne che xelé'ajé' da gute benne', quebe bi xeléquene'. Cá'anqueze wuluxrúa ne'ẹ benne' quebe chawe' zaj zué', na' xellexaque'.

### Dxexepe Jesús xabáa

(Lc. 24.50-53)

<sup>19</sup> Ca gudé bchálaj Xránadxu Jesús nen benne' ca', na' Dios bechise' Lẹ' xabáa, na' gudxé'ẹ chalá'a xabẹla chee' Dios. <sup>20</sup> Nadxa benne' ca' guledxúajé', xeajlelu'ẹ lban chee' dizra' chawe' nigá du ca naca xezr la xu nigá. Léqueze Xránadxu gúcalené' le', na' bdxixruj be'ẹ dizra' chee' ne' chee' xel-la waca ca' da za xabáa da beluné'. ¡Ca'an gaca na!

# San Lucas

## Dizra' dxuchalaj San Lucas, dxęę Teófilo

**1** Benne' zan ba belunę' ca da gulezéquene' bu-luzúaję' cáteze naca da guca ládujla dxi'u, <sup>2</sup> cáteze na' gulé benne' ca', benne' belelé'ene' nédxudautę ca naca da guca na, na' buluchálaję' dizra' chawe' na'. <sup>3</sup> Cá'anqueze neda' ba bchi'a xánnia' xúgutę da ca' gu-laca na nédxudautę, na' dxéqueda' chawe' guzúaja' da nigá chiu' cáteze guca, bi nazrí'ite lazra', lue', Teófilo. <sup>4</sup> Dxuna' caní cheę nézenu' naca na da li ca da ba bul-ulé'ene' lue'.

## Gubáz cheę xabáa dxuzenne' ca galaj Juan, benne' guchúę' bėnneache nisa

<sup>5</sup> Gate na' naca Herodes wenná bea cheę xęzre ca' zaj nababa Judea, na' zua tu bxruze lę' Zacarías, benne' nababę' cue' bxruze ca' gunná be'e Abías ca ni'te. Zru'ula Zacarías na' lę' Elisabet, na' nácaqueze Zacarías na' zre sua benne' ca' gulebábale bxruze Aarón. <sup>6</sup> Zacarías ne zru'ule' Elisabet gulaque' xrlátaje lau Dios, ne dxelunę' ca zaj naca da bdxixruij bea Xránadxu, ne ca da naxúaj na lu da gunné'. Ca'an guca, quebe nu guzeque gagu zria lę' lau Dios. <sup>7</sup> Quebe nu zrí'ine' chilá', lawe' da naca Elisabet na' nu'ula wizre, na' dxúpatę' zaj bezúaleę gula.

<sup>8</sup> Tu zra, gate belexala bxruze ca' naga nababa Zacarías xelunę' zrin lu xel-la bxruze cheę' lau Dios, <sup>9</sup> cáteze naca da dxelún bxruze ca', na' bexala Zacarías chu'ę lu lataj lá'azxa cheę Xránadxu lu xudau' cheę guzeze xala. <sup>10</sup> Dxácate na' dxezxe xala na', ca naca benne' ca' zaj zra' chalé'ajla dxuluchálajlęne' Dios. <sup>11</sup> Nadxa ble'e lau tu gubáz cheę xabáa cheę Xránadxu, ze' chalá'a xabęla cheę cugu naga zría xala dxezxe na. <sup>12</sup> Ca ble'e Zacarías gubáz cheę xabáa na', guzúę' stębe, ne bzrébeleę.

<sup>13</sup> Gubáz cheę xabáa na' guzrę' lę':

—Zacarías, quebe zrebu', lawe' da ba ben Dios dizra' da dxuchálajlęnu' Lę', na' nu'ula chiu', Elisabet, walaj tu zrí'ine', bi na' guzú' labe' Juan. <sup>14</sup> Wabéle'ęnu', ne gaca chiu' tu da ba neza zrentę, na' benne' zan xelebene' lawe' da ba gulaj bidu na'. <sup>15</sup> Ca'an gaca lawe' da gaca zrí'inu' szrentę lau Dios. Quebe xí'ajbe' xrise uva wal-la, u da dxusuzre na bėnneache, na' gate gálajtębe' tu súalezqueze Be' Lá'azxa nen lębe'. <sup>16</sup> Nę cheę lębe' benne' zan xelxaque' bi cheę Xránadxu Dios. <sup>17</sup> Juan nigá quia laube' lau Xránadxu, na' Be' na', ne xel-la waca da gulezúale na Elías, bėnnea' bchálaję' waláz cheę Dios gate nate, xelezúale na lębe', cheę guzúabe' tuze

benne' ca' zaj naque' xra xrna nen zrí'ine', ne cheę gulé'ebe' benne' dxeledábague' Dios cheę xelunę' ca dxenná xrtizra' Dios. Ca'an gaca, gucá'ana cháwebe' bėnneache cheę xelezí' lu nęę Xránadxu.

<sup>18</sup> Zacarías na' bchębe' gubáz cheę xabáa: —¿Ájazra gaca nezda' gaca caní? Neda' ba nagúlale'a, ne cá'anqueze naca nu'ula chia'.

<sup>19</sup> Na' bechębe gubáz cheę xabáa na': —Neda' naca' Gabriel, ne naca' wen zrin cheę Dios. Lę' gusel-lę' neda' cheę guchálajlęna' lue', ne guzenda' lue' dizra' chawe' nigá. <sup>20</sup> Na'a, lawe' da quebe guxéajlę'u da gucha' lue', xegá'anu' quebe gaca nniú' cadxa galaj zrí'inu'. Caní gaca na ca zrintę zra cheę na.

<sup>21</sup> Dxácate na' zaj zra' benne' ca' chalé'ajla, dxelebeze' Zacarías, ne dxelexebánene' lawe' da dxezréle'ęne', quebe dxedxúaję' lu lataj lá'azxa. <sup>22</sup> Gate bedxúaj Zacarías, québedxa dxaca nnię'. Nadxa guleque bé'ene' ba ble'e Zacarías tu da ble'e Dios lę' lu lataj lá'azxa na'. Na' lę' bta ná'ase', lawe' da quebe dxaca nnię'.

<sup>23</sup> Ca xeajsę cheę zra ca' dxal-la' gun Zacarías zrin cheę xudau', na' bezé'ę zexíaję' lizre'. <sup>24</sup> Ca gudé na' zru'ule' Elisabet ba zue' zi'i, na' quebe bdxúaję' lataj bchina' chie' ca gazxu' beu', na' dxennę' lu lázrdawę': <sup>25</sup> "Xrana' Dios ba bęne' chia' da nigá cheę québedxa xuluzúa bėnneache neda' chalá'ala."

## Gubáz cheę xabáa dxuzenne' ca galaj Jesús

<sup>26</sup> Ca gudé xrupa beu' gate na' bchálajlę gubáz cheę xabáa na' Zacarías, na' Dios gusel-lę' lę' tu xęzre nababa Galilea nazí le na Nazaret, <sup>27</sup> cheę cheajchálajlęne' tu nu'ula cúide'dau' lębe' María. Lębe' ba zua guchaga na'be' benne' biu na' lę' José, benne' naque' zrí'ine zre sua wenná bea David.

<sup>28</sup> Gubáz cheę xabáa na' guxú'ę naga zua María na', na' guzrę' be':

—Padiuzre. Dios dxunę' lue' tu culuén. Xránadxu zúalęne' lue'. Dios ba bęne' tu da cháwedxa chiu' quézcala cheę xúgutę nu'ula ca'.

<sup>29</sup> Gate María na' ble'ebe' gubáz cheę xabáa na', bebánebe' ca naca dizra' na', na' gunabe' lu lázrdaube': ¿Bizr cheę na' dxugape' neda' diuzre caní?

<sup>30</sup> Nadxa gunná gubáz cheę xabáa na':

—María, quebe zrebu' lawe' da ba bzrué'enu' tu culuén da dxun Dios chiu' lue'. <sup>31</sup> Na'a, zua da gunna Dios chiu', na' galaj tu bidu biu chiu', na' guzú' labe' Jesús. <sup>32</sup> Lębe' gácabe' szren, na' xelennáqueze' naque' Zrí'ine Dios szrentę, na' Xránadxu Dios gunę' Lę' wenná bea



ca guca xra xrtawę' David, <sup>33</sup> cheę nna bé'etecaze' xęzr la xu Israel, na' xel-la dxenná bea cheę' quebe chea-jséqueze cheę na.

<sup>34</sup> Nadxa María bchébebe' gubáz cheę xabáa:

—¿Ájazra gaca da nigá, lawe' da quebe nu benne' biu zúalęna'?

<sup>35</sup> Gubáz cheę xabáa na' gunné':

—Be' Lá'azxa cheę Dios suę' xichaj lázrda'u, na' xel-la waca cheę Dios szrentę sua na nen lue'. Cheę lę na' bidu na' gálajbe' gácaquezebe' cheę Dios, na' sí'queze labe' Zri'ine Dios. <sup>36</sup> Cá'anqueze bila ljwezru' Elisabet wálajqueze bidu cheę' lácala ba naqueę' benne' gula. Ca'an naca, nu'ula na' gulenné' naqueę' wizre, ba zeaj xrupa beu' bnezruj Dios cheę'. <sup>37</sup> Quebe bi dę da quebe gaca gun Dios.

<sup>38</sup> Nadxa gunná María:

—Neda' nácaqueza' węn zrin cheę Xránadxu. Gun Dios chia' ca da ba gunnáu'.

Na' gubáz cheę xabáa na' bezé'e naga zua María na'.

### María zeajxúebe' Elisabet

<sup>39</sup> Ca lu zra na' María guzá'abe' zéajbe' tu xézredau' da zua na laduj xi'a ca' cheę ga nababa Judea. <sup>40</sup> Na' guxú'ube' lizre Zacarías, ne bgápabe' diuzre Elisabet. <sup>41</sup> Gate ben Elisabet dizra' da gunné' María, na' bidu na' xú'ube' lę'e Elisabet guxrítebe', na' guzúalę Be' Lá'azxa lę'.

<sup>42</sup> Nadxa gunné' tu chi'ę zizraj:

—Dios ba bęnę' tu da cháwedxa chiu' quézcala cheę xúgute' nu'ula ca', lawe' da ba zua da bęna Dios chiu'.

<sup>43</sup> ¿Núzraqueze naca' neda', za xrna Xrana' ga zua' neda'? <sup>44</sup> Cáteze benda' dizra' da gunnéu', na' guxríte bidu chia' lu lę'a lu xel-la dxebe' cheębe'. <sup>45</sup> Ba neza naca na chiu' guxéajlę'u lawe' da gaca li ca da gunná Xránadxu.

<sup>46</sup> Nadxa gunná María:

Bénne'du xu'a dxue lá'ana na Xrana'.

<sup>47</sup> Lázdawa' dxebe' na ca dxun Dios, weselá chia'.

<sup>48</sup> Lawe' da gudxé' Dios gunne xue chia', nácaqueza' węn zrin cheę'.

Na'a su lau na, xúgute' benne' xelenné' nazi'a tu culu-en zren cheę Dios.

<sup>49</sup> Dios Szrentę ba bęnę' tu da zrentę chia' neda'.

Cheę lę na' lá'azxa naca La Lę'.

<sup>50</sup> Lę' xexache lázrqueze' xúgute' benne' ca' dxelezre-be' Lę'.

<sup>51</sup> Da zrentę ba bęn Lę'.

Bzuę' zrila benne' ca' dxulucá'ana szren cuinę'.

<sup>52</sup> Bebéaję' benne' blau ca' lu lataj cheę',

ne bechise' benne' dxexruj lazre' ca'.

<sup>53</sup> Bnézrujlę'ę da gulagu benne' dxeledún,

na' benne' gunní'a ca' bca'ane' lę' cá'aze.

<sup>54</sup> Gúcalęę' benne' Israel, benne' węn zrin cheę' ca' lawe' da bezrí lázrqueze' lę',

<sup>55</sup> ca da guchebe lazre' cheę xra xrtáudxu ca', cheę Abraham, ne cheę benne' xrtię' ca' chadıa chacanna.

<sup>56</sup> María begá'analebe' Elisabet ca chunna beu', na' ca gudé na' bezrinbe' lızrebe'.

### Ca gulaj Juan, benne' bchuę' bęnneache nisa

<sup>57</sup> Ca gudé na' guxá' beu' cheę Elisabet na' cheę galaj bidu cheę', na' guzane' tu bi biu cheę'. <sup>58</sup> Benne' walızr cheę' ca', ne xrtia ljwezre' belezrine' dxelebeņę' nen lę', gate belenne' Dios bezrí lázrele'ę lę'. <sup>59</sup> Gate guca xrunu' zra, belezrine' cheę xelechúguę' lu xpélabe' da gulé'e na naca bę' bi cheę Dios, na' gulaca lazre' xuluzúę' labe' Zacarías ca lę xrabe'.

<sup>60</sup> Na' gunná xrnabe':

—Quebe gaca. Dخال-la' si' labe' Juan.

<sup>61</sup> Na' gulé'ę lę':

—¿Bizr cheę na'? Quebe nu chilá' xrtia ljwézrele lę' ca'.

<sup>62</sup> Na' buluchebe' xra bidu na', bulutá ne'ę cheę xenézene' ájazra guzúę' labe'. <sup>63</sup> Na' xrabe' na' gunabe' tu blágadau', na' bzuaję' lę'ę na: Juan si' labe'. Na' xúgute' benne' ca' belexebánene'. <sup>64</sup> Ca' guca Zacarías benné', na' guzú lawę' dxue lá'ane' Dios. <sup>65</sup> Ca belelé'ene' da nigá, xúgute' benne' walızr cheę' belexebánene', na' ca naca xęzre zaj nnita laduj xi'a ca ga nababa Judea, buluchálaję' ca da guca. <sup>66</sup> Xúgute' benne' belenne' na, gulezú lawę' dxelenné' lu lázrdawe', ne buluchebe ljwezre' tue' xetúę':

—¿Ájazraqueze gun bi nigá?

Naca bea na Xránadxu zúalęę'-be'.

### Ca da bil-la Zacarías

<sup>67</sup> Na' Be' Lá'azxa guzúalęę' Zacarías, xra bidu nigá, na' bchálaję' waláz cheę Dios, gunné':

<sup>68</sup> ¿Gaca ba Xránadxu, Dios cheę xęzre Israel!

Ba blę'ę naga zúadxu, bęnneache cheę', na' bselé' dxi'u.

<sup>69</sup> Ba gusel-lę' tu benne' wál-lalę'ę, weselá cheędxu.

Bęnnea' gulaj ládujla xrtia David, benne' węn zrin cheę'.

<sup>70</sup> Ca'an guchebe lazre' Dios lu dxu'a benne' ca' buluchálaję' waláz cheę' nédxudaute'.

<sup>71</sup> Guchebe lazre' guselé' dxi'u lu na' benne' dxelezre'ę dxi'u, ne lu na' benne' dxelecuđene' dxi'u.

<sup>72</sup> Xezrí lazre' xra xrtáudxu ca',

ne quebe gal-la lazre' xel-la wezríá lá'azxa cheę'.

<sup>73</sup> Da nigá naca na da guchebe lazre' Dios da bzua

chache' nen xra xrtáudxu Abraham,

da naca tu da gunnę' cheędxu dxi'u.

<sup>74</sup> Guchebe lazre' guselé' dxi'u lu na' benne' dxelezre'ę dxi'u

cheę gaca gundxu zrin cheę', ne quebe zrębedxu,

<sup>75</sup> ne gácadxu xrlátaje lau Lę', ne gácadxu bi

cheęqueze' xúgute' zra naca bandxu.

<sup>76</sup> Lue', zrí'ina'dau', sí'queze lau' bi guchálajqueze

waláz cheę Dios szrentę,

lawe' da quia lau' lau Xránadxu, salju' neza cheę Xránadxu,

<sup>77</sup> Guzénenu' bènneache chee', Le' gunité lawe' dul-la chee',

ne guselé' benne' ca'.

<sup>78</sup> Ca'an gaca lawe' da dxexezrí lazre' Dios dxi'u. Dxune' na'a dxalaj tu xi' chee' xabáa da dxusení' chee'dxu,

<sup>79</sup> na' gusení' na naga zaj zra' benne' zaj zře'ę lu na' xel-la gute,

chee' cu'u na dxi'u lu neza xrtantę lau Dios.

<sup>80</sup> Bidu na' bgúlabe', ne bgula bènne'du xu'ube' chawe' lu da naca chee' Dios. Guzúaquezbe' le'ę xixre' lawe' lataj cadxa bzrin zra ble'e laube' xęzre Israel.

### Ca guca gate gulaj Jesús

(Mt. 1.18-25)

**2** Ca lu zra na' gate dxenná bea Augusto, benne' xęzre Roma, benne' dxenná be'ę xúgute' cue' xęzr la xu, le' gunná bé'ene' xelú'u lu xiche xúgute' benne' zaj zře'ę xęzr la xu. <sup>2</sup> Da nigá naca da nédxudau' gulú'u bènneache lu xiche. Guca caní gate naca Cirenio benne' zaj xu'u lu ne'ę xęzre ca' zaj nababa Siria.

<sup>3</sup> Xúgute' bènneache dxun na ba xen chjaque' lu xęzre naga zaj nababe' chee' xelu'ę lu xiche. <sup>4</sup> Chee' le' na' José guz'ę lu xęzre Nazaret, da nababa Galilea, chee' bzrine' lu xęzre Belén, da nababa Judea, naga gulaj wenná bea David. Bzrin José na' lawe' da naque' xrtia David na'. <sup>5</sup> José guxíaje' Belén chee' chu'ę lu xiche tu zren nen María. María nigá ba nachébebe' guchaga ná'alębe' José, na' ba bnezruj Dios chee'be'. <sup>6</sup> Dxácatę na' zaj zře'ę lu xęzre Belén, na' bzrin zra san María bidu chee'. <sup>7</sup> Lu xęzre na' gulaj bidu nedxu chee', na' bchele'-be' ládxe'du ca', na' gúxrue'-be' xu'u naga dx-elún chi'ę da dxelagu bea ca', lawe' da quebe ga bzrela tu lataj lu xu'u naga che'ę.

### Dxuluchálajle' gubáz chee' xabáa benne' ca' dxuluxúę' zřila' ca'

<sup>8</sup> Gagu cuita xęzre Belén zaj zra' benne' ca' dxuluxúę' zřila' ca', dxelexegá'ane' le'ę xixre' chizrela, dxuluxúę' zřila' chee' ca'. <sup>9</sup> Naga zaj zře'ę ble'e lau tu gubáz chee' xabáa chee' Xránadxu. Na' xel-la naxaní' chee' Xránadxu Dios bsaní' na naga zaj zře'ę. Ca'an guca, belezrébele'ę. <sup>10</sup> Na' gubáz chee' xabáa na' guzre' le': —Quebe zrébele, lawe' da dxuzenla' le'e tu dizra' chawe'. Ne chee' dizra' nigá xelebéle'ę xúgute' bènneache. <sup>11</sup> Na'a, lu xęzre chee' David, ba gulaj tu bidau' gácabe' weselá chee'le. Bi nigá naque' Cristo, Xránadxu. <sup>12</sup> Da nigá gaca na tu da gunna bea na chee'le. Cheajxrácale bidu dxe'ene nigá, dxélabe' ládxe'du ca', ne dębe' tu xu'u naga dxelún chi'ę da xelagu bea ca'.

<sup>13</sup> Chadí lau, cuita gubáz chee' xabáa na' bulul'é lau zandxa gubáz chee' xabáa, dxelúe lán'ę' Dios, dxelen-é':

<sup>14</sup> ¡Gaca ba Dios na'ala, na' lu xęzr la xu nigá sua xel-la dxebeza zri lazre' chee' bènneache, benne' dxelunę' ca da dxaca lazre' Dios!

<sup>15</sup> Gate besí'aca gubáz chee' xabáa ca', zeajxaque' xabáa, nadxa benne' ca' dxuluxúę' zřila' gulezú lawe' dxelé' lįwezre' tuę' xetúę':

—Chéajxquedxu lu xęzre Belén cheajnnadxu da ba guca, ca da ba gunná Xránadxu Dios, guzre' dxi'u.

<sup>16</sup> Ca'an guca, besí'aca zęzruje', na' xejlexraque' María ne José, ne bidu dxe'ene na', dębe' xu'u naga dx-elún chi'ę da xelagu bea ca'. <sup>17</sup> Gate belelé'ene' bidu na', na' buluchálajle' benne' ca' ca da gunná gubáz chee' xabáa ca da naca chee' bidu na'. <sup>18</sup> Na' xúgute' benne' ca' belenne' da nigá belexebánele'ę' ca da gulenná benne' caní. <sup>19</sup> María bcache' da nigá lu xichaj lázrdawe', na' blaba lazre' ca naca da nigá. <sup>20</sup> Ca'an guca besí'aca benne' ca' dxuluxúe zřila', dxulucána szrene' Dios, ne dxelúe lán'ę' Le' ca naca xúgute' da belenne', ne da belelé'ene', lawe' da guca xúgute' ca da guzre gubáz chee' xabáa na' le'.

### Ca guca gate belú'ę bidu Jesús lu xudau'

<sup>21</sup> Ca guca xrunu' zra, na' gulechugue' tu lu xpęla bidu na' ca da nadxixruj bea na chee' Dios, na' belú'ę La bidu na' Jesús, cáteze naca da gunná gubáz chee' xabáa na', guzre' María nédxudxa ca za gu'ę bidu na'.

<sup>22</sup> Ca bzrin zra chee' xelunę' ca bdxixruj bea Moisés chee' xellexaxaque' chawe' lau Dios, na' belú'ę bidu na' lu xęzre Jerusalén chee' xuluzúę'-be' lu na' Xránadxu Dios. <sup>23</sup> Belunę' caní lawe' da ba naxúaj lu da nadxixruj bea Xránadxu Dios da dxenná na caní: Xúgute' bi biu, bi nedxu gálajbe' dxal-la' guzúale-be' chee' Xránadxu Dios. <sup>24</sup> Na' xjaque' xejlegu'ę dxen chee' bę xixre'du ca' lau Dios ca da dxenná da nadxixruj bea na chee' Xránadxu Dios, da dxenná na: Chupa bgugu, che chupa bxínnedau'.

<sup>25</sup> Ca lu zra na' zua tu benne' biu gula lu xęzre Jerusalén, le' Simeón. Naque' tu benne' chawe', na' dx-ue lán'anaqueze' Dios, ne dxebeze' benne' sel-la Dios chee' guselé' bènneache Israel. Zúale Be' Lán'azxa chee' Dios Simeón na'. <sup>26</sup> Be' Lán'azxa ba guzre' Simeón na' quebe gatię' cadxa lé'ene' Cristo, benne' na' sel-la Xránadxu Dios. <sup>27</sup> Simeón nigá guxíaje' lu xudau' lawe' da bsi' Be' Lán'azxa chee' Dios le'. Na' gate xra xrna bidu Jesús zaj nu'ę-be' lu xudau' chee' xelunę' chee'be' ca da bdxixruj be'e Moisés, <sup>28</sup> na' Simeón na' guquę'ę bidu na'. Bnide'-be', ne bę lán'ę' Dios, gunné':

<sup>29</sup> Xrana', na'a waca gunnu' lataj gatia' lu xel-la dxe-beza zri lazre'

lawe' da ba bęnu' ca da guchębe lazru' chia', naca' węn zrin chiu'.

<sup>30</sup> Nen xiaj láuqueza' ba ble'eda' Benne' Weselá,

<sup>31</sup> Bènnea' ba bzu' chee' gácalene' xúgute' bènneache.

<sup>32</sup> Le' naque' tu xi' da gusení' na chee' benne' quebe zaj nababe' Israel.

Ne chee' Le' gaca tu da ba neza chee' bènneache chiu', benne' Israel.

<sup>33</sup> José ne xrna Jesús belexebánele'ę' ca da gunná Simeón chee' bidu Jesús. <sup>34</sup> Nadxa Simeón gunabe' lau Dios gunę' chee' da chawe', na' guzre' María, xrna Jesús:

—¡Gunná'xque nigá! Bidu nigá, Dios nuzúe' lebe' chee gunbe' chee benne' Israel ca', cheajlecházie' benne' zanté lu na' da xriwe', na' benne' zanté xelexexase' lau Dios. Lebe' gácabe' tu da dxunna bea chee Dios, na' benne' zanté xuluzúe' lebe' chalá'ala. <sup>35</sup> Ne chee lebe' gul'é lau ca da dxejlesá lazre' tu tue'. Na' chiu' lue' da nigá gaca na ca tu xia nalá, da cheajsúa lu lázrda'u.

<sup>36</sup> Cá'anqueze zua na' tu nu'ula dxenné' waláz chee Dios, le' Ana. Nu'ula nigá naque' zri'ine Fanuel, ne xrtia Aser. Ba naque' nu'ula gúlale'e. Bchaga ne'e gate na' naque' nu'ula cuíde'te, na' guzúləne' benne' chee' gazre iza. <sup>37</sup> Na' begá'ane' tuzé', ne ba xu'e tapa lalaj tapa iza. Quebe becuase' xudau', na' dxune' zrin chee Xránadxu Dios te zra chizrela. Dxune' gubasa, ne dxuchálajlene' Dios. <sup>38</sup> Ana na' bzrínqueze' na', na' ca gudé guzre' Dios: "Xcalenu'", na' guzú lawe' dxuchálaje' chee bidu Jesús nen xúgute' benne' ca' dxelebeze' benne' na' sel-la Dios chee guselé' benne' Jerusalén ca'.

### Ca guca gate belexezrine' xezre Nazaret

<sup>39</sup> Ca belune' xúgute' ca da dxenná da nadxixruj bea Xránadxu, nadxa besiá'que' xjaque' naga nababa Galilea, na' belexezrine' xezre Nazaret da naca lazrie'. <sup>40</sup> Na' bidu Jesús bgúlabe', ne gúcadxabe' chuchu, ne gúcadxabe' bi naxéajni'i, na' Dios bca'ane' lebe' chawe'.

### Ca guca gate bzrin bidu Jesús lu xudau'

<sup>41</sup> Xra xrna' Jesús, tu tu iza dxjá'aque' xezre Jerusalén gate dxu'u laní chee xulusá lazre' benne' judío ca da ben Dios, bebéaje' xra xrtawe' ca' lu xezr la xu Egipto.

<sup>42</sup> Ca guque Jesús chazrinu iza, na' xjá'aque' xúgute' Jerusalén, ca dxelúnqueze' ca dxaca laní. <sup>43</sup> Ca gudé laní, na' besiá'que', na' bidu Jesús begá'anabe' Jerusalén, ne quebe guleque be'e xrnabe', ne José.

<sup>44</sup> Dxeléquene' Jesús zezabe' ládujla benne' zan ca', na' besiá'que' tu zra nez. Gate belexilje'-be' ládujla benne' xrtie' ca', ne benne' ca' zaj núnbe'e, <sup>45</sup> quebe belexezrélné'-be'. Ca'an guca belexebi'e zeajxá'aque' Jerusalén chee cheajlexedílje'-be' na'.

<sup>46</sup> Ca gudé guca chunna zra, nadxa belexezrélné'-be' lu xudau', dxe'ebe' ládujla benne' ca' dxuluxuzájle'e da nadxixruj bea Dios, na' dxenbe' ca dxelenné', ne dxuchébebe' benne' ca'. <sup>47</sup> Xúgute' benne' ca' dxelenne' dxelexebánene' chee'be' ca naca xel-la sina chee'be', ne ca naca da dxuchálajlebe' le'. <sup>48</sup> Gate belexé'e xra xrnabe' lebe', na' belexebánene'. Na' gunná xrnabe', dxé'e-be':

—Zri'ina', ¿bizr chee na' benu' caní nen netu'? Cadite stébe ba guzúantu' chiu' dxexílajntu' lue', xrau' ne neda'.

<sup>49</sup> Nadxa Jesús dxé'ebe' le':

—¿Bizr chee na' dxexílajle neda'? ¿Quebe nézele le'e dxal-la' guna' neda' da naca chee Xra'?

<sup>50</sup> Xra xrnabe' quebe guléajni'ine' ca da gúzrebe' le'.

<sup>51</sup> Nadxa bezálebe' le' zeajxá'aque' Nazaret, na' gúcaquezebe' bi wezúa dizra' chee xra xrnabe'. Na' xrnabe' bcache chawe' xúgute' da nigá lu lázrdawe'.

<sup>52</sup> Jesús zéajbe' dxegúlabe' lu bel-la' dxen chee'be', ne lu xichaj lázrdaube', na' dxedxúajquezebe' chawe' lau Dios, ne lau bénneache.

### Juan, benne' dxuchúe' bénneache nisa, dxuchálaje' xrtizra' Dios le'e xixre'

(Mt. 3.1-12; Mr. 1.1-8; Jn. 1.19-28)

**3** Iza chinu' ca dxenná bea Tiberio, benne' dxenná be'e ca naca xezr la xu, na' Poncio Pilato dxenná be'e naga nababa Judea, na' Herodes dxenná be'e naga nababa Galilea, na' Felipe, benne' biche Herodes, dxenná be'e naga nababa Iturea, ne Traconite, na' Lisaniás dxenná be'e naga nababa Abilinia. <sup>2</sup> Na' Anás, ne Caifás zaj naque' bxruze blau. Ca lu zra na' Dios bchálajlene' Juan, zri'ine Zacarías, naga zua Juan le'e xixre' lawe' lataj. <sup>3</sup> Juan na' gudé'e ca naca xézredu ca' zaj nnitan' chalá'a weaj xegu Jordán, na' dxé'e benne' ca' dxal-la' xelexebí'i lazre', ne xeledxúe' nisa chee gunite lau Dios chee xtul-le'. <sup>4</sup> Caní guca ca na' gunná Isaías, benne' bchálaje' waláz chee Dios, gunné':  
Nen tu chi'i bénnea' dxenné' zizraj le'e xixre' lawe' lataj. Dxenné':

Le gucueza neza naga te Xránadxu.

Le xulí chawe' neza lase chee'.

<sup>5</sup> Ca naca zrítdudu ca' le xuzrá na.

Ca naca xi'a ca', ne xí'adu ca' xelexaca na tu li.

Neza xúca'du ca' xelexelí na.

Neza da quebe nalí xelexaca na tu li.

<sup>6</sup> Ca naca bénneache xelexé'ene' Benne' Weselá sel-la Dios.

<sup>7</sup> Gate benne' ca' belexezrine' lau Juan chee xeledxúe' nisa, na' le' dxé'e benne' ca':

—Xrtia be'a snia. ¿Ble'e nu benne' le'e chee cuásale ca naca xel-la dxezrá'a chee Dios da ba za? <sup>8</sup> Le gun da gul'é na ba bebí'i lázrele, ne quebe nnale lu lázrdaule: Nácantu' xrtia ljwezre Abraham. Neda' dxapa' le'e, Dios wazéquene' xexune' xiaj caní xrtia Abraham. <sup>9</sup> Xa waga ba de cuásate na chee chugue' xaga ca', na' xúgute' xaga da quebe dxelebia na da zixre chawe' welechugue na, na' xuluzré'e na lu xi'.

<sup>10</sup> Nadxa benne' ca' buluchébe' le':

—¿Bi dxal-la' guntu'?

<sup>11</sup> Juan bechébe':

—Benne' de chupa zre' dxal-la' gunézruje' tu na benne' quebe de chee', na' benne' de da dxawe' dxal-la' gunézruje' da gagu bénnea' quebe bi de chee'.

<sup>12</sup> Cá'anqueze belexé' benne' wechizruj ca' chee xeledxúe' nisa, na' buluchébe' Juan:

—Benne' wesede, ¿bi da dxal-la' guntu' netu'?

<sup>13</sup> Juan guzre' le':

—Quebe guchízrujle da zrendxa ca da nadxixruj bea na.

<sup>14</sup> Cá'anqueze bal-la benne' dxjaque' wedil-la buluchébe' le':

—¿Gazra netu'? ¿Bi da dxal-la' guntu'?

Juan bechebe':

—Quebe guchébele benne', ne quebe gágule le' zria lu da wən lazre' chee' cuale dumí chee', na' le be nen cadite názrujle.

<sup>15</sup> Benne' zaj zře' na' zaj zué' stēbe, na' dxuluchebe' lu lázrdawe' che Juan na' naque' Cristo, benne' nasel-la Dios. <sup>16</sup> Juan na' gunné':

—Neda', da li dxuchúa' le'e nisa nen nisa. Wida tu benne' gune' da dxulé'e xel-la dxedxúa nisa nigá, guzúe' le'e Be' Lá'azxa, ne xi' chee'. Benne' nigá ná-padxé' xel-la dxenná bea ca neda', na' quebe naca chia' cuéaja' xel-la chee' da xu'u ni'e. <sup>17</sup> Ba nuxre' da dx-un be' chee', na' guchi'e naga dxine' zrua' xtila. Na' xu-tupe' zrua' xtila, guzrá' chawe' na lizre'. Guzezxe' xizre chee' na lu xi' da cabata' xul-la na.

<sup>18</sup> Ca naca dizra' nigá, ne xezícadxa dizra' zan bchá-lajle' benne' ca' ca naca dizra' chawe' chee' Dios.

<sup>19</sup> Juan gudil-le' Herodes, benne' dxenná be'e, lawe' da zúalene' Herodías, zru'ula Felipe, benne' biche Herodes na', ne lawe' da ba bene' da zante da calela. Nadxa Herodes <sup>20</sup> béndxaqueze' da calela, gulu'e Juan lizre xia.

#### Da guca gate gudxúa Jesús nisa

(Mt. 3.13-17; Mr. 1.9-11)

<sup>21</sup> Gate ne dxuchúa Juan na' bēneache nisa, cá-an-queze Jesús gudxúe' nisa, na' gate dxuchálajle' Dios, na' bxlaj xabáa, <sup>22</sup> na' betaj Be' Lá'azxa lawe' Jesús. Ble'e lawe' ca tu bgugu chiche, na' ben tu chi'e xabáa, dxenné':

—Lue' nacu' zri'ina' nazrí'ite lazra'. Dhezaca ba lázrele'na' Lue'.

#### Ca naca xra xrtau Jesucristo

(Mt. 1.1-17)

<sup>23</sup> Jesús nape' ca chi dxua iza gate guzú' lawe' dxune' zrin chee'. Dxeleque benne' naque' zri'ine José. Naca Jesús zre sua Elí, xra María.

<sup>24</sup> Elí na' guque' zri'ine Matat, Matat na' guque' zri'ine Leví, Leví na' guque' zri'ine Melqui, Melqui na' guque' zri'ine Jana, Jana na' guque' zri'ine xetú José.

<sup>25</sup> José nigá guque' zri'ine Matatías, Matatías na' guque' zri'ine Amós, Amós na' guque' zri'ine Nahum, Nahum na' guque' zri'ine Esli, Esli na' guque' zri'ine Nagai.

<sup>26</sup> Nagai na' guque' zri'ine Maat, Maat na' guque' zri'ine xetú Matatías, Matatías nigá guque' zri'ine Semei, Semei na' guque' zri'ine xetú José, José nigá guque' zri'ine Judá.

<sup>27</sup> Judá na' guque' zri'ine Joana, Joana na' guque' zri'ine Resa, Resa na' guque' zri'ine Zorobabel, Zorobabel na' guque' zri'ine Salatiel, Salatiel na' guque' zri'ine Neri.

<sup>28</sup> Neri na' guque' zri'ine xetú Melqui, Melqui nigá guque' zri'ine Adi, Adi na' guque' zri'ine Cosam, Cosam na' guque' zri'ine Elmodam, Elmodam na' guque' zri'ine Er,

<sup>29</sup> Er na' guque' zri'ine Josué, Josué na' guque' zri'ine Eliezer, Eliezer na' guque' zri'ine Jorim, Jorim na' guque' zri'ine xetú Matat, <sup>30</sup> Matat nigá guque' zri'ine xetú Leví, Leví nigá guque' zri'ine Simeón, Simeón na' guque' zri'ine xetú Judá, Judá nigá guque' zri'ine xetú José, José nigá guque' zri'ine Jonán, Jonán na' guque' zri'ine Eliaquim,

<sup>31</sup> Eliaquim na' guque' zri'ine Melea, Melea na' guque' zri'ine Mainán, Mainán na' guque' zri'ine Matata, Matata na' guque' zri'ine Natán, <sup>32</sup> Natán na' guque' zri'ine David, David na' guque' zri'ine Isaí, Isaí na' guque' zri'ine Obed, Obed na' guque' zri'ine Booz, Booz na' guque' zri'ine Salmón, Salmón na' guque' zri'ine Naasón.

<sup>33</sup> Naasón na' guque' zri'ine Aminadab, Aminadab na' guque' zri'ine Aram, Aram na' guque' zri'ine Esrom, Esrom na' guque' zri'ine Fares, Fares na' guque' zri'ine xetú Judá, <sup>34</sup> Judá nigá guque' zri'ine Jacob, Jacob na' guque' zri'ine Isaac, Isaac na' guque' zri'ine Abraham, Abraham na' guque' zri'ine Taré, Taré na' guque' zri'ine Nacor.

<sup>35</sup> Nacor na' guque' zri'ine Serug, Serug na' guque' zri'ine Ragau, Ragau na' guque' zri'ine Peleg, Peleg na' guque' zri'ine Heber, Heber na' guque' zri'ine Sala, <sup>36</sup> Sala na' guque' zri'ine Cainán, Cainán na' guque' zri'ine Arfaxad, Arfaxad na' guque' zri'ine Sem, Sem na' guque' zri'ine Noé, Noé na' guque' zri'ine Lamec,

<sup>37</sup> Lamec na' guque' zri'ine Matusalén, Matusalén na' guque' zri'ine Enoc, Enoc na' guque' zri'ine Jared, Jared na' guque' zri'ine Mahalaleel, Mahalaleel na' guque' zri'ine xetú Cainán.

<sup>38</sup> Cainán na' guque' zri'ine Enós, Enós na' guque' zri'ine Set, Set na' guque' zri'ine Adán, Adán na' guque' ca zri'inequeze Dios.

**Satanás da xriwe' dxilaj lazre' na ájala gusebaga na Jesús dul-la**  
(Mt. 4.1-11; Mr. 1.12-13)

**4** Jesús, zúale Be' Lá'azxa Le', bezé'e xegu Jordán, na' guché Be' Lá'azxa Le' le'e xixre' lawe' lataj.  
<sup>2</sup> Na' guzúe' chua zra, na' Satanás da xriwe' gudilaj lazre' na ájala si xe na Le'. Quebe bi gudagu Jesús da chua zra ca', na' ca' gudé na' guduné'. <sup>3</sup> Nadxa gunná da xriwe', guzre na Le':  
 —Che da li nacu' Lue' Zri'ine Dios, ben xelexaca xiaj caní xeta xtila.  
<sup>4</sup> Na' bechebe Jesús:  
 —Naxúajqueze na lu xiche chee Dios, dxenné':  
 Quegá nen xeta xtilaze gaca ban bènneache, san cá'anqueze nen xrtizra' Dios gaca ban bènneache.  
<sup>5</sup> Nadxa da xriwe' guché na Jesús tu xi'a sibe, na' chadite ble'e na Le' xúgute cue' xezr la xu da zaj nnita lu xezr la xu nigá, <sup>6</sup> na' guzre na Le':  
 —Neda' gunna' Lue' ca naca xel-la dxenná bea nigá, ne xel-la szren chee xúgute xezr la xu caní, lawe' da zaj xu'u da caní lu na'a neda', na' gunézruja' na nu dxaca lazra' gunézruja' na. <sup>7</sup> Gunna' na chiu' che lue' guzú zribu' lawa', ne gucá'ana szrenu' neda'.  
<sup>8</sup> Jesús bechebe':  
 —Gucuasa lue', Satanás, lawe' da dxenná xiche chee Dios, dxé'e bènneache: "Bca'ana szren Xranu' Dios, ne ben zrin chee tuze Le'."  
<sup>9</sup> Nadxa da xriwe' na' guché na Jesús lu xezre Jerusalén, na' bcuén na Le' xichaj ze'e xudau', na' guzre na Le':  
 —Che da li na' nacu' Zri'ine Dios, guxrite' nigá chea-jxezu' lu xu, <sup>10</sup> lawe' da lu xiche chee Dios dxenné':  
 Dios gusebague' gubáz chee xabáa chee' ca' xuluxue' Lue'.  
<sup>11</sup> Xelechísaqueze' Lue' nen ne'e, chee quebe gaca we' ni'u lawe' xiaj ca'.  
<sup>12</sup> Jesús bechebe':  
 —Cá'anqueze naxúaj na lu xiche chee Dios, dxé'e bènneache: "Quebe guchínenu' ca dxaca lazru' Xranu' Dios."  
<sup>13</sup> Gate da xriwe' québedxa bezrela lazre' na ájala gun zréaje na Jesús, na' becuasa na tu chí'i.

**Jesús dxuné' zrin chee' naga nababa Galilea**  
(Mt. 4.12-17; Mr. 1.14-15)

<sup>14</sup> Na' Jesús bezrine' Galilea, ba nápalé'e xel-la waca chee Be' Lá'azxa, na' ca naca xézredu ca' zaj nababa na' buluchálaj bènneache ca naca xel-la waca chee'.  
<sup>15</sup> Jesús bsédene' benne' ca' tu tu lu xudau' ca', na' xúgute' belúe lá'ané' Le'.

**Jesús dxexezrine' Nazaret**  
(Mt. 13.53-58; Mr. 6.1-6)

<sup>16</sup> Nadxa Jesús bezrine' Nazaret, xezre naga bgulé'. Lu zra dxulupá'ana benne' judío ca' guxú'e lu xu'u ga na' dxelezraga benne' judío ca', ca xu'u lawe' dxuné', chee gulabe' da naxúaj na lu xiche chee Dios. <sup>17</sup> Bu-

ludé'e Lu ne'e xiche naga naxúaj dizra' bzuaj Isaías, benne' bchálaje' waláz chee Dios, na' gate gusalaje' na, na' blabe' naga naxúaj da dxenná:

<sup>18</sup> Be' Lá'azxa chee Xránadxu zúalene' neda', lawe' da guqu'é'e neda' chee guchálajlana' benne' baxache' ca' dizra' chawe' chee'.  
 Gusel-le' neda' chee xexuna' benne' ca' quebe chawe' zaj zue',  
 ne chee guzenda' benne' ba zaj nadxéaje' lu da zrin-naj, waca xeledé',  
 ne chee xexuna' lau benne' la chul-la ca',  
 ne chee guselá' benne' dxelezaca zi'e,  
<sup>19</sup> ne chee guzenda' bènneache ba bzin zra Xránadxu Dios gucá'ané' le' chawe'.

<sup>20</sup> Nadxa Jesús butube' xiche na', na' bde'e na lu na' benne' dxuxúe' xu'u na', na' bebé'e. Xúgute benne' zaj zre'e lu xu'u na' dxelenné'e Le', <sup>21</sup> na' Jesús guzú lawe' dxé'e benne' ca':

—Na'a zra guca ca da naxúaj na laule le'e.

<sup>22</sup> Xúgute' gulenné' chawe' chee Jesús, ne belexebánene' ca naca dizra' chawe' da dxuchalaje'. Na' buluchébe ljwezre':

—¿Quegá benne' nigá zri'ine José?

<sup>23</sup> Jesús guzre' le':

—Da líqueze le'e wele neda' dizra' nigá: Lue', benne' dxexunu' benne' we' ca', bexún cuinu', ne xele neda':  
 Ca da bémentu' benu' lu xezre Capernaum, cá'anqueze ben na lázriu' nigá na'a.

<sup>24</sup> Nadxa gunná Jesús:

—Da li dxapa' le'e, tu benne' dxuchálaje' waláz chee Dios, quebe nu dxue le' ba lá'ana lazrie'. <sup>25</sup> Dxapa' le'e, gulezrá' nu'ula zan ba gulate benne' chee' lu xezr la xu Israel ca lu zra guzúa Elías, benne' bchálaje' waláz chee Dios, gate na' quebe guca xiuj chun iza xugachaj, ne gúcale'e gubina' ca naca xezr la xu na'. <sup>26</sup> Dios quebe gusel-le' Elías lau netú nu'ula, nate benne' chee', zue' xezr la xu Israel. Gusel-le' le' lau tu nu'ula, nate benne' chee', zue' lu xezre Sarepta, da zua na gagu naga dxe' xezre Sidón. <sup>27</sup> Cá'anqueze gulezrá' benne' zan benne' dxeledxé'ene' we' guzru' lu xezr la xu Israel ca lu zra guzúa Eliseo, benne' bchálaje' waláz chee Dios, na' netúe' quebe bexaque'. Tuze Naamán, benne' xezr la xu Siria bexaque'.

<sup>28</sup> Gate belén benne' ca' zaj zre'e xu'u na' da nigá, na' belezrá'ale'e. <sup>29</sup> Na' gulasé', ne belexebéaje' Jesús xezre na', na' beleché'e Le' dxu'a chjéaj naga zria xezre na', chee xuludxixre' Le' na'. <sup>30</sup> Na' Jesús bedé'e ládujla benne' ca', na' bezé'e zexíaje'.

**Jesús dxexune' tu benne' xu'e be' xriwe'**  
(Mr. 1.21-28)

<sup>31</sup> Nadxa Jesús bexíaje' Capernaum, tu xezre nababa Galilea, na' guzú lawe' dxusédene' benne' ca' lu zra lá'azxa chee judío ca'. <sup>32</sup> Belexebánene' ca naca da dxusédene', lawe' da dxuchálaje' ca tu benne' nape' xel-la dxenná bea.

<sup>33</sup> Lu xu'u na' zua tu benne' xu'e be' xriwe', na' dxebezre xe'e, <sup>34</sup> dxenné':

—Bsan netu'. ¿Bizr chee na' dxunu' netu' zede, Jesús, benne' Nazaret? ¿Za'u guzría xi'u netu'? Neda' núnbe'a Lue', ne nezda' nacu' benne' lá'azxa chee Dios.

<sup>35</sup> Jesús gudil-lé' be' xriwe' na', dxenné':

—Zrize guzúa. Bsan benne' biu nigá.

Nadxa be' xriwe' na' gudín na' bènnea' xu lau xúgute benne' ca', na' bedxúaj na lu xichaj lázrdau bènnea', ne quebe bi bèn na chee'. <sup>36</sup> Xúgute' belexebánene', na' gulé' ljwezre':

—¿Bizra dizra' da caní? Benne' nigá dxenná bé'ene' be' xriwe' ca' nen duté xel-la dxenná bea chee', ne nen xel-la waca, na' be' xriwe' ca' dxeledxúaj na.

<sup>37</sup> Na' buluchálaje' ca naca chee Jesús xúgute lu xezre ca' zaj nababa na'.

### Jesús dxexuné' xrna zru'ula Pedro

(Mt. 8.14-15; Mr. 1.29-31)

<sup>38</sup> Nadxa bedxúaj Jesús lu xu'u na', na' guxú'ē lizre Simón. Xrna zru'ula Simón na' quebe chawe' zue', xú'ulé'ē da la, na' gulata' xuene' Jesús xexuné' lé'.

<sup>39</sup> Jesús gubigué'ē cuité', na' gudil-lé' da la na', na' bedxúaj na. Ca ná'queze bexásate', na' guzú lawé' dxusení'ē da xelawé'.

### Jesús dxexuné' benne' zan quebe chawe' zaj zue'

(Mt. 8.16-17; Mr. 1.32-34)

<sup>40</sup> Ca dxebía gubizra, benne' ca' zaj nnita' benne' quebe chawe' zaj zue' lizre' belú'ē lé' lau Jesús, na' Lé' bze ne'ē tu tu benne' ca', ne bexuné' lé'. <sup>41</sup> Cá'anqueze zánete' be' xriwe' belexedxúaj na lu xichaj lázrdau benne' ca'. Dxelenná na:

—Lue' nacu' Zri'ine Dios.

Jesús gudil-lé' be' xriwe' ca'. Quebe be'ē na lataj xelenné na, lawe' da zaj neze na naca Lé' Cristo.

### Jesús dxuchálaje' naga nababa Galilea

(Mr. 1.35-39)

<sup>42</sup> Ca dxaní'sise', bdxuaj Jesús xezre na', guxíaje' naga xeajsúe' tuze'. Na' benne' ca' belexexílaje' Lé', na' belezrine' xuluzague' Lé' chee quebe zeze'ē. <sup>43</sup> Jesús gunné':

—Dxun na ba xen guzenda' bènneache xezícadxa xezrdu ca' ca dxenná bea Dios, lawe' da chee guna' caní gusel-lé' neda'.

<sup>44</sup> Ca'an guca gudá Jesús ca naca xezre ca' zaj nababa Galilea, na' bchálaje' lu xu'u naga dxelezraga judío ca' lu xezre ca'.

### Dxelezene' bela zan

(Mt. 4.18-22; Mr. 1.16-20)

**5** Gate zua Jesús dxu'a nísadau' chee Genesaret, na' belezrín benne' zan, ne buluchídeté' Lé', lawe' da dxelaca lazre' xelenne' xrtizra' Dios. <sup>2</sup> Jesús blé'ene' chupa da dxedá lawe' nísadau' lu nísadau' na', zaj zra' gáguze lu xu bizre, lawe' da ba belexedxúaj benne' wezén bela ca' lu'ule da dxedá lawe' nísadau', na' zaj zre'ē dxelexibe' xixruj chee' ca'. <sup>3</sup> Nadxa guxú'u Jesús tu lu da dxedá lawe' nísadau', da naca na chee Simón, na'

guzre' Simón guzrigue' na xelate' lu nísadau' na'. Jesús gudxé'ē lu da dxedá lawe' nísadau' na', na' guzú lawé' dxusédené' benne' ca'. <sup>4</sup> Ca bexuzre bchálaje', na' guzre' Simón:

—Bsa da dxedá lawe' nísadau' chiu' naga nácadxa situj nísadau', na' le guzal-la xixruj chee' na' chee senle bela.

<sup>5</sup> Simón bechebe':

—Benne' Weséde, bedú xela bentu' zrin, ne quebe bi bela ne sentu'. Lu dizra' chiu', na'a guzal-la' xixruj nigá.

<sup>6</sup> Ca beluné' ca gunná Jesús, na' bela zanté gulezene', na' gúcate wadxeza xixruj na'. <sup>7</sup> Nadxa bulutá ne'ē gu-lenné' benne' ljwezre' zaj zre'ē xetú lu da dxedá lawe' nísadau' chee xelácalene' lé'. Benne' ca' belezrine', na' bulusezrate' dxúpaté da dxedá lawe' nísadau' ca', na' gulácaté na zi'i, ne dxácaté welaze na lu nísadau'.

<sup>8</sup> Gate ble'e Simón Pedro da nigá, na' bzu zribe' lau Jesús, gunné':

—Gucuasa cuita' neda', Xran, lawe' da naca' neda' benne' dul-la.

<sup>9</sup> Caní gunná Simón lawe' da dxezrébele'ē ne chee da guca na, ne cá'anqueze dxelezrebe benne' ljwezre' ca', gate belelé'ene' bela zan ca'. <sup>10</sup> Cá'anqueze belezrebe Jacobo ne Juan, zri'ine Zebedeo, benne' zaj naque' ljwezre Simón na'. Jesús guzre' Simón:

—Quebe zrebu'. Ná'atēla su lau' senu' bènneache lu da naca chee Dios.

<sup>11</sup> Nadxa, ca belexebéaje' da dxedá lawe' nísadau' na' dxú'ela nísadau', na' bulucá'ane' ca naca da ca', na' zjá-calene' Jesús.

### Jesús dxexuné' tu benne' dxé'ene' we' guzru'

(Mt. 8.1-4; Mr. 1.40-45)

<sup>12</sup> Gate Jesús zue' tu xezre, na' bzrin tu benne' dxé'ene' we' guzru', na' ca blé'ene' Jesús, bzu zribe', ne gudíxrujté lawé' lu xu, na' bca'ana szrene' Lé', gunné':

—Xran, che dxaca lazru', waca xexunu' neda'.

<sup>13</sup> Nadxa Jesús bte'-be' nen ne'ē, gunné':

—Dxaca lazra'. Bache bexacu'.

Ca gunné' ca', we' guzru' na' bedxúajté na. <sup>14</sup> Jesús bsebage' bènnea' quebe nu xe'ē da nigá. Nadxa gunné':

—Guxíaj na'a, xeajlé'e cuinu' lau bxruze, ne gulú'u dumí chee xexádxu' lau Dios ca da gunná be'e Moisés chee xeleneze benne' ba bexacu' ca naca xízrawé' chiu'.

<sup>15</sup> Ca naca xel-la waca chee Jesús bzrílujdxu na, na' benne' zanté belezrague' lau Jesús chee xelenne' da dxuchálaje', ne chee xexuné' lé' ca naca xízrawé' chee'.

<sup>16</sup> Nadxa Jesús bezé'ē na', na' bzrine' naga quebe nu chilá' benne', na' bchálajlene' Dios.

### Jesús dxexuné' tu benne' naxrú'one ni'a ne'ē

(Mt. 9.1-8; Mr. 2.1-12)

<sup>17</sup> Tu zra zua Jesús dxusédené', na' bal-la benne' xudau' fariseo ca', ne benne' dxuluxuzájle'ē da nadxixruj be'e Moisés, zaj dxe'ē na', benne' zá'aque' ca naca xézredu ca' zaj nababa Galilea, ne xezre ca' zaj nababa

Judea, ne chee xezre Jerusalén, na' zúale xel-la waca chee Xránadxu Dios Jesús, na' bexune' benne' ca' quebe chawe' zaj zu'e'. <sup>18</sup> Nadxa belezrín tapa benne' zaj nu'e tu benne' zua zri ni'a ne'e, de'e tu lu blaga', na' gulaca lazre' xelégú'e le' lu xu'u chee xelíxru'e le' lau Jesús. <sup>19</sup> Quebe guca xelezrine' lau Jesús lawe' da zralé'e benne' zan ga na'. Nadxa gulegüene' chju'ula, ne gulesaluje' chju'u, na' bululétaje' benne' na' de' lu blaga' ládujla benne' zan ca' lau Jesús. <sup>20</sup> Gate ble'e Jesús ca dxeléajle benne' ca' chee', na' guzre' benne' quebe chawe' zu'e':

—Bénne'dau', ba bnite lawa' dul-la chiu'.

<sup>21</sup> Nadxa benne' ca' dxuluxuzájle'e da nadxixruj bea na, ne benne' xudau' fariseo ca' gulezú lawe' dxelenné' lu xichaj lázrdawe': ¿Nuzra benne' nigá, dxenné' schan-ni' chee Dios? Quebe nu benne' séquene' gunite lawe' dul-la chee bénneache. Tuzé Dios gaque'.

<sup>22</sup> Jesús dxéquebe'ene' da dxelenné' lu xichaj lázrdawe', na' guzre' benne' ca':

—¿Bizr chee na' dxéquele le'e caní? <sup>23</sup> ¿Bízrala na quebe naca na stébe guna', che xapa' benne' nigá: Ba bnite lawa' dul-la chiu', u che xapa' le': Guxasa bexíaj? <sup>24</sup> Gulé'eda' le'e neda', Benne' Gulje' Bénneache, napa' xel-la dxenná bea lu xezr la xu nigá chee gunite lawa' dul-la chee bénneache.

Nadxa guzre' benne' na' naxrú'üne ni'a ne'e:

—Lue' dxapa', bexasa, bexúa blaga' chiu', ne bexíaj.

<sup>25</sup> Ca gunné' ca', bexásate' benne' na' lau xúgute' benne' ca', na' bequ'é'e blaga' chee', ne bezé'e zexíaje' lizre' zeajxé lá'ane' Dios. <sup>26</sup> Xúgute' benne' ca' belexebánene', na' belúe lá'ane' Dios, ne nen xel-la dx-elezrebe gulenné':

—Na'a ble'edxu da dxebánequezdxu.

### Jesús dxenné' Leví

(Mt. 9.9-13; Mr. 2.13-17)

<sup>27</sup> Ca gudé na' bezá'a Jesús, na' blé'ene' tu benne' dx-uchizruje' waláz chee xezre Roma, le' Leví. Dxe'e naga dxuchízruje', na' guzre' le':

—Ben neda' tuze.

<sup>28</sup> Na' guxasa Leví, bca'ane' ca naca chee' ca', na' guxíajlene' Jesús.

<sup>29</sup> Ca gudé na', Leví gulu'e tu xrche' zrente' lizre' chee bca'ana szrene' Jesús, na' zralé'e'queze na' xezícadxa wechizruj ca', ne xezícadxa benne' zaj dxe'e dxágulene' benne' ca'. <sup>30</sup> Na' benne' xudau' fariseo ca', ne benne' ca' dxuluxuzájle'e da nadxixruj bea na gulezú lawe' dx-elez' tizre' benne' ca' dxusede Jesús, dxelé'e le':

—¿Bizr chee na' dxe'aj dxágulele benne' wechizruj caní, ne benne' dul-la ca'?

<sup>31</sup> Jesús bechebe':

—Quebe zaj nachine benne' zaj zua chawe' nu benne' dxexúne' le'. Benne' quebe chawe' zaj zu'e' dx-elechíne' le'. <sup>32</sup> Neda' quegá za'a dxenné'a' benne' xrlátaje. Za'a dxenné'a' benne' dul-la, chee xellexebí'i lazre'.

### Dxuluchebe' Jesús ca naca chee gubasa

(Mt. 9.14-17; Mr. 2.18-22)

<sup>33</sup> Nadxa buluchebe' Jesús:

—¿Bizr chee na' dxelúnle'e gubasa, ne dxuluchálajle Dios benne' ca' zjácálene' Juan, ne benne' ca' zjácálene' benne' xudau' fariseo ca', san benne' ca' dxusedenu' tu dxelé'aj dxeláguzqueze'?

<sup>34</sup> Jesús bechebe':

—¿Wazéquele xele benne' zaj zra' laní chee wechaga na' xelune' gubasa dxácate' na' zua benne' wechaga na' nen benne' ca'? <sup>35</sup> Wazrín zra gate wechaga na' na' xecuase' nen benne' ca'. Ca lu zra na' xelune' gubasa.

<sup>36</sup> Nadxa bchálajlene' le' ca naca da dxulé'e nigá:

—Quegá nu benne' cheze' tu zre' cube chee xudé'e na tu zre' gula. Che ca' guné', na' guzría xi'e ca naca zre' cube na', na' ladxé'du cube na' quebe gulé'e na cháwedau' nen ladxé' gula na'. <sup>37</sup> Cá'anqueze quebe gaca cá'adxu xrise uva cube lu bzude xide gula, lawe' da che ca' gundxu, xrise uva cube na' gutín na bzude xide gula, na' gaca ditje xrise uva na', ne bzude xide na'. <sup>38</sup> Chee le' na' dxal-la' cá'adxu xrise uva cube lu bzude xide cube, na' dxúpaté na' xegá'ana chawe' na. <sup>39</sup> Che tu benne' xí'aje' xrise uva wal-la gula, québedxa nna na chee' xí'aje' xrise uva cube, lawe' da dxenné': "Nétajdxu da gula na'."

### Benne' ca' dxusede Jesús dxelálaje' dau zrua' xtila lu zra lá'azxa chee judío ca'

(Mt. 12.1-8; Mr. 2.23-28)

**6** Tu lu zra lá'azxa chee judío ca', gudé Jesús naga naxaza zrua' xtila, na' benne' ca' dxusedene' zjaque' dxelálaje' dau zrua' xtila, na' dxelezrube na nen ne'e, ne dxelawe' zrua' xtila na'. <sup>2</sup> Nadxa benne' xudau' fariseo ca' buluchebe' le':

—¿Bizr chee na' dxunle le'e tu zrin da quebe naca na gunle zra lá'azxa cheedxu?

<sup>3</sup> Jesús bechebe':

—¿Quebe ne gulábale le'e ca ben David ne benne' ljwezre' ca' gate guledune'? <sup>4</sup> Guxú'u David na' tu lu xudau' chee Dios, ne guqué'e xeta xtila da gulú'u bxruze lau Dios, na' gudawe' na, ne bnézrujte' chee benne' ca' zjácálene' le', ne quebe naca chee' xelawe' xeta xtila na'. Tuzé bxruze ca' naca chee' xelawe' na.

<sup>5</sup> Cá'anqueze guzre Jesús benne' ca':

—Neda', Benne' Gulje' Bénneache, nápaqueza' xel-la dxenná bea ca naca chee zra lá'azxa.

### Jesús dxexune' benne' nazrinnaj ne'e

(Mt. 12.9-14; Mr. 3.1-6)

<sup>6</sup> Xetú lu zra lá'azxa chee judío ca', guxú'u Jesús tu lu xu'u, na' guzú lawe' dxusedene' benne' zaj nazrague' na'. Zua na' tu benne' nazrinnaj ne'e xabéla. <sup>7</sup> Benne' ca' dxuluxuzájle'e da nadxixruj bea na, ne benne' xudau' fariseo ca' dxuluzure' Jesús chee xelélé'ene' che xexún Jesús bénnea' lu zra lá'azxa chee', chee xelézquene' xelawe' zria Jesús. <sup>8</sup> Jesús ba nézene' ca da dxelegú'u lazre', na' guzre' bénnea' nazrinnaj ne'e:

—Guxasa, ne guzé laduj nigá.

Benne' na' guxasé', na' guzé' na'. <sup>9</sup> Nadxa gunná Jesús, guzre' benne' ca':

—Na'a guchęba' le'e tu: ¿Bízrala na' waca gundxu zra lá'azxa cheęle, da xrlátaje che da calęla? ¿Gucache cháwedxu xel-la nabán cheę tu benne', che guzría xidxu na?

<sup>10</sup> Nadxa Jesús gunéę benne' ca' zaj naxechaj Le', na' guzre' benne' we' na':

—Bli na'u nigá.

Benne' na' bene' ca', na' bexácatę neę na'. <sup>11</sup> Na' benne' ca' zaj zre'ę na' belezrá'alęę, na' gulezú lawę' dxuluchębe ljwezre' bi xelezéquene' xelune' cheę Jesús cheę xuluzría xi'ę Le'.

### Jesús dxequęę benne' chazrinnu ca' xelaquę' gubáz cheę'

(Mt. 10.1-4; Mr. 3.13-19)

<sup>12</sup> Ca lu zra na' Jesús guxiąje' tu lu xi'a xejchálajlene' Dios, na' guzúę' bedú xęla dxuchálajlene' Dios. <sup>13</sup> Ca guxaní' gunné' benne' ca' dxusédenę', ne guquęę' chazrinnu benne' ca', na' bzre'ę benne' ca' xelaquę' gubáz cheę'. <sup>14</sup> Benne' caní zaj naquę':

Simón, (bénnea' bzuę' le' Pedro),

Andrés, (benne' biche Simón na'),

Jacobo, Juan, Felipe, Bartolomé,

<sup>15</sup> Mateo, Tomás,

Jacobo, (zri'ine Alfeo),

Simón, (bénnea' dxedábage' benne' Roma ca')

<sup>16</sup> Judas, (benne' biche Jacobo), ne

Judas Iscariote, (bénnea' gudęę' Jesús lu na' benne' ca' dxeledábage' Le').

### Jesús dxusédenę' benne' zante

(Mt. 4.23-25)

<sup>17</sup> Jesús bdinne' lu xi'a na' nen benne' ca' dxusédenę', na' bzrinę' tu lache' nen benne' ca'. Benne' zan zaj zre'ę na' zaj nababe' xęzre ca' zaj nababa Judea, ne Jerusalén, nen benne' zaj nababe' Tiro, ne Sidón.

Benne' caní beleléę cheę xelenne' da dxuchalaj Jesús, ne cheę xexún Jesús le' ca naca xízrawę' dxeledxé'ene'.

<sup>18</sup> Cá'anqueze benne' ca' zaj xu'ę be' xriwę' belexaquę'.

<sup>19</sup> Xúgutę benne' ca' gulaca lazre' xulutę' Jesús lawe' da dxexún Le' xúgutę' nen xel-la waca cheę'.

### Benne' ca' naca da ba neza zren cheę', ne benne' ca' zaj naquę' baxache'

(Mt. 5.1-12)

<sup>20</sup> Nadxa Jesús gunnéę benne' ca' dxusédenę', na' guzre' le':

—Ba neza zrentę naca na cheęle le'e, dxéquebe'ele nácale benne' xache', lawe' da waxú'ule le'e naga dxenná bea Dios.

<sup>21</sup> 'Ba neza zrentę naca na cheęle le'e, dxedunle da dxunna Dios, lawe' da wélajquezle.

'Ba neza zrentę naca na cheęle le'e, dxebézrele ne cheę dula, lawe' da guzrízrequezle.

<sup>22</sup> 'Ba neza zrentę naca na cheęle le'e, gate xelecuide bėnneache le'e, ne gate xelexebéaje' le'e chalé'ajla, ne gate xelennę' schanni' cheęle, ne gate xulucá'ana ditje' lale ca tu da sban lawe' da nácale bi chia' neda', Benne' Gulje' Bėnneache. <sup>23</sup> Le béleę, ne le sua lu da ba neza lu zra na' lawe' da zrué'ele tu da zren lu xabáa cheę Dios. Cá'anqueze benne' xra xrtau benne' caní bulusaca zi'ę benne' ca' buluchálaję' waláz cheę Dios.

<sup>24</sup> 'Baxache' nácale le'e, benne' gunní'a, lawe' da ba nápale xel-la dxebé da naca cheę xęzr la xu nigá.

<sup>25</sup> 'Baxache' nácale le'e, nélajle na'a, lawe' da wadunle le'e.

'Baxache' nácale le'e dxuzrízrele na'a, lawe' da cuzre xáchele.

<sup>26</sup> 'Baxache' nácale le'e gate xúgutę bėnneache dxelennę' da chawe' cheęle, lawe' da ca' belún xra xrtáule, gulennę' da chawe' cheę benne' węn lazre' ca', benne' gulennę': "Netu' dxuchálajntu' waláz cheę Dios."

### Dxal-la' zrí'idxu benne' ca' dxelecuídenę' dxi'u

(Mt. 5.38-48; 7.12)

<sup>27</sup> Na' gunná Jesús:

—Dxapa' le'e dxénele chia', le zri'i benne' ca' dxelecuídenę' le'e, ne le gun chawe' cheę benne' ca' dx-elezzre'ę le'e. <sup>28</sup> Le nne' chawe' cheę benne' ca' dxelennę' calęla cheęle, ne le naba lau Dios gaca chawe' cheę benne' ca' dxelennę' schanni' cheęle. <sup>29</sup> Che nu benne' cape' xrágale, le guzęę xecha la'a, ne che nu benne' que'ę xicha cheęle, le güe lataj ca'ate' zrale. <sup>30</sup> Le gunezruj nütetęze benne' bi nabe' le'e, ne che nu benne' que'ę da naca cheęle, quebe xenábale na. <sup>31</sup> Le gun cheę bėnneache cáteze na' dxaca lázrele xelunę' cheęle.

<sup>32</sup> 'Che le'e nazri'ile tuze benne' ca' zaj nazrí'ine' le'e, ¿bízraqueze da chawe' dxunle? Cá'anqueze dxelún benne' ca' dxelunę' da calęla. <sup>33</sup> Che dxunle chawe' cheę tuze benne' ca' dxelunę' le'e chawe', ¿bízraqueze da chawe' dxunle? Cá'anqueze dxelún benne' węn da zrinnaj ca'. <sup>34</sup> Che bi dxusanle cheę tuze benne' ba nézele wexunne' na, ¿bízraqueze da chawe' dxunle? Cá'anqueze benne' węn da calęla ca' dxulusanę' da naca cheę' cheę benne' ca' dxelunę' da calęla, lawe' da zaj nézene' wulunęzruję benne' ca' le' na. <sup>35</sup> Dxal-la' zri'ile le'e benne' ca' dxelezzre'ę le'e, ne gunle da chawe' cheę', ne gusanle cheę benne' ca' da xelenabe' le'e, lácala quebe xellexunne' na. Che gunle ca', da zrendxa da si' lu na'le, ne gácale bi ca' cheę Dios szrentę, lawe' da naca Le' zri'i lazre' nen benne' ca' quebe dxelexeza-ca ba lazre', ne benne' węn da calęla ca'. <sup>36</sup> Le xezrí lazre' bėnneache ca dxun Dios, dxezrí lazre' le'e.

### Quebe guzúale chalá'ala le sa' ljwézrele

(Mt. 7.1-5)

<sup>37</sup> Na' gunná Jesús:

—Quebe guzúale chalá'ala le sa' ljwézrele, na' Dios quebe guzúę' le'e chalá'ala. Quebe bi nne' cheę le sa' ljwézrele, na' Dios quebe guchi'ę cheęle le'e. Le gunite lau cheę le sa' ljwézrele, na' Dios gunite lawę' cheęle



le'e. <sup>38</sup> Le gunezruj chee bënneache, na' Dios gunne' chee le'e. Dios cu'e lu xcuite chee tu xi'ina da nálate, ne da naxí'tequeze, ne guníbet'e' na, ne sua dí'atequeze na. Dios gudxíxrequeze' chee ca da dxudxíxre chee bënneache.

<sup>39</sup> Nadxa Jesús bchálaj'e da dxulé'e nigá, gunné':

—¿Waca tu benne' la chul-la cu'e neza xetú la chul-la? Che ca' guné', dxúpaté' xelebixre' tu lu xedxu. <sup>40</sup> Netú benne' dxuséde gácadxe' szren ca naca bënnea' dxusédené' le', na' gate xuzre gusédie', gaque' ca naca bënnea' bsédené' le'.

<sup>41</sup> ¿Bizr chee na' dxenná'u b'ébedu na' xu'u na xiaj lau le sa' ljwezru', ne quebe dxéquebe'enu' ca naca da zren da xu'u na xiaj lau' lue? <sup>42</sup> Che quebe dxéquebe'enu' ca naca da zren na' da xu'u na xiaj lau' lue', ¿ájazra dxunu' dxexázrenu' dxu'u le sa' ljwezru': "Bëna lataj xebéaja' b'ébedu na' xu'u na xiaj lau'?" Lue', benne' dxun láweze xrlátaje, bebéaj zá'teca lue' ca naca da zren da xu'u na xiaj lau', na' nadxa le'enu' cháwedau' xebéaju' b'ébedu na' xu'u na xiaj lau le sa' ljwezru'.

#### Naca bea tu benne' ne chee da dxuné'

(Mt. 7.17-20; 12.34-35)

Nadxa gunná Jesús: <sup>43</sup> —Tu xaga xrlátaje quebe cuía na da zixre caléla, na' xaga da quebe naca chawe' quebe gaca cuía na da zixre chawe'. <sup>44</sup> Tu tu xaga naca bea na ne chee da zixre da dxebia na. Quebe gaca guchíbedxu da zixre chee xaga higo tu lu xaga xeche', ne quebe guchíbedxu da zixre chee lba uva lu xeche' bisigá. <sup>45</sup> Benne' xrlátaje, da xrlátaje dxenné' bënnea' lawe' da naxaza da xrlátaje lu xichaj lázrdawe', na' benne' wen da caléla, da caléla dxenné' bënnea' lawe' da xu'u da caléla lu xichaj lázrdawe'. Dxu'e na' dxenné' na ca naca da xu'u lu xichaj lázrdawe'.

#### Dxuchalaj Jesús chee chupa lane xu'u

(Mt. 7.24-27)

Gunná Jesús: <sup>46</sup> —¿Bizr chee na' dxéle neda': "Xran, Xran", ne quebe dxunle ca da dxapa' le'e? <sup>47</sup> Xapa' le'e aja naca bënnea' zé'e nen neda', ne dxenne' xrtizra'a, ne dxuné' ca da dxapa' le'. <sup>48</sup> Naque' ca tu benne' bënë' tu xu'u. Da zren gudéne', na' bzrie' lane na lawe' xiaj xre. Gate bdxuaj xegu, na' xeaxchú'ule'e na le'e xu'u na', quebe bi guzeque' guné na xu'u na' lawe' da zria lane na lawe' xiaj xre. <sup>49</sup> Na' bënnea' dxenne' xrtizra'a, ne quebe dxuné' ca da dxapa' le', naque' ca tu benne' bënë' xu'u chee' lawe' xu dxeze, ne quebe guzalé' lane na, na' gate bdxuaj xegu na', ne xeaxchú'ule'e na le'e xu'u na', na' guché na le na, na' tu chí'izqueze bzria xi na le na.

#### Jesús dxexuné' bi wen zrin chee tu benne' Roma

(Mt. 8.5-13)

**7** Gate bexuzre bchálajle Jesús benne' ca', na' bezé'e zexíaj'e Capernaum. <sup>2</sup> Zua tu benne' Roma na', benne' dxenná be'e lu wedil-la, na' zua tu bi wen zrin chee' nazrí'ile'ene'-be', na' bi na' quebe chawe'

zúabe', ne dxaca wátebe'. <sup>3</sup> Gate ben benne' Roma na' ca da dxun Jesús, na' gusél-le' bal-la benne' gula sina chee judío ca', chee xeailegezre' Jesús xid'e' xexuné' bi wen zrin chee'. <sup>4</sup> Benne' gula ca' belezrine' lau Jesús, na' gulezú lawe' dxelata' xuené' Le', dxelenné':

—Benne' Roma nigá naca chee' gácalenu' le', <sup>5</sup> lawe' da dxape' ba lá'ana xezre cheedxu, na' léqueze' bënë' tu xu'u cheedxu ga dxezragadxu.

<sup>6</sup> Nadxa Jesús guxíajlene' benne' gula ca'. Gate belezrine' gagu naga zua lizre benne' Roma na', le' gusél-le' bal-la benne' ljwezre' xeailegezre' Jesús:

—Xran, quebe senu' gunne xue, lawe' da quebe naca chia' chu'u lizra'. <sup>7</sup> Chee le na' ne quebe bexazrda' né-da'queza' xedajdilja' Lue'. Cun gunnaze, na' xexaca bi wen zrin chia'. <sup>8</sup> Néda'queza' zua benne' dxenná bé'ene' neda', na' neda' dxenná be'eda' benne' dxjaca wedil-la. Che xapa' tu bënnea': Guxíaj, na' waxíajbe', ne che xapa' xetube': Gudá, na' wídabe', ne che nna be'eda' bi wen zrin chia' da gunbe', na' gunbe' na.

<sup>9</sup> Gate ben Jesús da nigá, na' bebánene', na' gunné'e benne' ca' zjácalle Le', gunné':

—Da li, quebe ne cheajxraca' tu benne' xezre Israel dxejlí lazre' neda' ca dxun benne' nigá.

<sup>10</sup> Gate belexezrín benne' ljwezre benne' Roma na' lizre', na' belelé'ene' ba bexaca bi wen zrin na'.

#### Jesús dxusebané' bi biu chee tu nu'ula ba gute benne' chie'

<sup>11</sup> Ca gudé na' Jesús guz'é zéaj'e tu xezre da nazí le na Naín, na' xjácalle Le' benne' ca' dxusédené', ne benne' zante. <sup>12</sup> Gate bzrine' gáguze naga zua xezre na', blé'ene' benne' zaj nu'e tu bi gate zeajlecaché'-be', na' naca be' bi tulicha' chee xrnabe', nu'ula na' ba gute benne' chie'. Benne' zan, benne' lazrie' zjácalle' le'.

<sup>13</sup> Gate Xránadxu blé'ene' nu'ula na', na' bexache lazre' le', ne guzre' le':

—Québedxa cuezru'.

<sup>14</sup> Nadxa gubiga Jesús dxu'a xi'ina xu'ube', na' bté' na. Na' benne' ca' zeajlexexu'e-be' gulague'. Na' Jesús guzre' bi gate na':

—Bidau', dxapa' lue', guxasa.

<sup>15</sup> Na' bi na' ba nate bexásabe' gudxe'be', na' bezú laube' dxuchálajbe'. Na' Jesús bunézruje'-be' lu na' xrnabe'. <sup>16</sup> Gate belelé'e benne' ca' da nigá, na' belezrebe', ne gulezú lawe' dxelúe lá'ane' Dios, dxelenné':

—Tu benne' zrente', benne' dxenné' waláz chee Dios, ba blé'e ládujla dxi'u.

Cá'anqueze dxelenné':

—Dios ba blé'e dxácalene' xezr chee'.

<sup>17</sup> Ca naca naga nababa Judea, ne xezre walíZR chee na belén bënneache ca naca xel-la waca chee Jesús.

#### Juan, bënnea' bchue' bënneache nisa dxesel-le' gubáz chee' lau Jesús

(Mt. 11.2-19)

<sup>18</sup> Naga xu'u Juan lizre xia, bënene' ca naca chee da nigá lawe' da benne' ca' zjácalle' Juan buluzenne' le' da dxaca na. Juan gunné' chupa benne' ca', <sup>19</sup> na'

gusel-le' le' lau Jesús chee cheajlechebe' Le' che da li naque' Cristo, bènea' dxal-la' xide', u che dxal-la' xebeze' benne' xula. <sup>20</sup> Nadxa benne' ca' gusel-la Juan belezrine' lau Jesús, na' gulé'e Le':

—Juan, bènea' bchue' bèneache nisa nasele' ne-tu' zedajchébentu' Lue' che Lue' na' nacu' Cristo, bènea' dxal-la' xide', u che dxal-la' cuézantu' benne' xula.

<sup>21</sup> Ca lu zra na' Jesús bexune' benne' zante' benne' we', ne benne' dxé'ene' xízrawe' da dxedá du zren, ne benne' ca' zaj xu'e be' xriwe', na' bexune' benne' la chul-la ca'. <sup>22</sup> Nadxa Jesús guzre' benne' ca' nasele Juan:

—Le cheajxaca, ne le xe Juan ca naca da ba ble'ele, ne da bénele. Benne' la chul-la ca' dxelexelé'ene', na' benne' zrinnaj ca' dxelexedé', na' benne' dxeledxé'ene' we' guzru' ba belexaque', na' benne' xache' ca' dxelene' né' dizra' chawe' chee Dios. <sup>23</sup> Ba neza zren naca na chee benne' quebe gusan lazre' neda'.

<sup>24</sup> Gate bes'aca benne' ca' gusel-la Juan, na' Jesús guzú lawe' dxuchálajlene' benne' zaj zre'e na' ca naca chee Juan na', dxenné':

—¿Bizra guxíajle le'e xeajjna'le le'e xixre' lawe' lataj? ¿Tu xia xtila da dxutá be'? <sup>25</sup> Che cabí, ¿bizra xeajjna'le? ¿Tu benne' nacu zra lane' da zácale'e? Ba nézquezle le'e benne' ca' dxelacu zra lane' da zácale'e, ne dxelé'aj dxelawe' da zácale'e zaj zre'e lizre benne' blau ca'. <sup>26</sup> Che cabí, ¿bizra xeajjna'le? ¿Tu benne' dxuchálaje' waláz chee Dios? Awe', ble'ele tu benne' nácadxe' szren ca tu benne' dxuchálaje' waláz chee Dios. <sup>27</sup> Juan nigá naque' bènea' naxúaj na chee' lu xiche chee Dios, dxenné':

Dxesel-la' gubáz chia' lau Lue',  
chee gucá'ana chawe' neza naga teu'.

<sup>28</sup> Dxapa' le'e, ládujla xúgute benne' quebe nu chilá' benne' dxuchálaje' waláz chee Dios nácadxe' szren ca Juan nigá. Na'a benne' nácadxe' dxexruj lazre' naga dxenná bea Dios nácadxe' blau ca Juan nigá.

<sup>29</sup> Na' gunná Jesús:

—Gate na' benne' dxexruj lazre' ca', ne benne' wechizruj ca' belenne' da dxuchalaj Juan, guleque bé'ene' Dios naque' xrlátaje, na' beledxúe' nisa lu na' Juan. <sup>30</sup> Benne' xudau' fariseo ca', ne benne' ca' dxuluxuzájle'e da nadxixruj bea na buluzúe' chalá'ala ca naca da dxaca lazre' Dios guné' chee', na' quebe beledxúe' nisa lu na' Juan.

<sup>31</sup> Na' gunná Xránadxu:

—¿Ájazra gutil-la lébeda' benne' zaj zre'e na'a zra? ¿Ájazra zaj naque'? <sup>32</sup> Zaj naque' ca bidu ca' dxelebe'be' dxelítajbe' lawe' xi'a, ne dxelebezre xa'abe', dxelebe' bidu ljwézrebe': "Bcuézrentu' bchiuj da bénele, san quebe bxá'ale. Bil-la xáchentu', san quebe gudxézrele."

<sup>33</sup> Caní zaj naca benne' ca' lawe' da bla' Juan, bènea' bchue' bèneache nisa, ne quebe gudawe' xeta, ne quebe gu'e xrise uva wal-la, na' gulenné' xu'e be' xriwe'. <sup>34</sup> Nadxa bla'a neda', Benne' Gulje' Bèneache, dxe'aj dxawa', na' dxelenné' naca' wagu xrata, ne benne' dxé'ajle'e, ne dxelenné' naca' ljwezre benne' dul-la ca', ne benne' wechizruj ca'. <sup>35</sup> Xel-la sina chee

Dios naca bea na ne chee da dxelún benne' ca' zaj napé' xel-la sina chee Dios.

### Da bchalaj Jesús lizre Simón, benne' xudau' fariseo

<sup>36</sup> Tu benne' xudau' fariseo gunné' Jesús cheajtawe' xeta lizre', na' Jesús guxíajle' lizre bènea', na' gudxé'e dxawe'. <sup>37</sup> Nadxa tu nu'ula dul-la chee xezre ná', gate benne' bzin Jesús dxawe' xeta lizre benne' fariseo na', na' bzin nu'ula na' ga na', nu'e tu da' naca na xiaj zaca, da nazráté na da dxelá zixre. <sup>38</sup> Gate bzin nu'ula na' naga zua Jesús, na' gudxé'e zran ni'e dxebezre', ne guzú lawe' dxibe' ni'a Jesús nen nisa dxebezre', ne bsebizre' ni'e nen xicha xíchaje', ne bnupé' ni'a Jesús, na' gulu'e na da dxelá zixre na'. <sup>39</sup> Na' benne' xudau' fariseo, bènea' gunné' Jesús lizre', gate blé'ene' da nigá, gunné' lu lázrdawe': "Chela benne' nigá da li naque' benne' dxuchálaje' waláz chee Dios, guéquebe'equeze' aja naca chee nu'ula nigá dxuté' ni'e, lawe' da naque' nu'ula dul-la." <sup>40</sup> Nadxa Jesús guzre' benne' fariseo na':

—Simón, de tu da guchálajlena' lue'.

Na' bechebe benne' fariseo na':

—Gunná, Benne' Wesede.

<sup>41</sup> Jesús gunné':

—Chupa benne' dxelal-le' dumí chee tu benne' tu dxusántezqueze' benne' dumí. Tue' dxal-le' chee' lazruj chee chupiza, na' xetúe' dxebage' lazruj chee chupa beu'. <sup>42</sup> Lawe' da quebe dxelezé'quene' xelexé'izruje' chee bènea', na' le' bnite lawe' chee dxúpaté benne' ca' ca naca da dxelebage' chee'. Na'a gunná, ¿nula benne' caní zrí'ixene' bènea'?

<sup>43</sup> Simón bechebe':

—Dxé'queda' bènea' bnite lawe' chee' da zrendxa.

Na' Jesús guzre' le':

—Da li dxennáu'.

<sup>44</sup> Nadxa Jesús gunné'e nu'ula na', na' guzre' Simón:

—¿Dxelé'enu' nu'ula nigá? Neda' guxu'a lizru', ne quebe nu'ula be'enu' quibe ni'a, san nu'ula nigá gudibe' ni'a nen nisa dxebezre', ne bsebizre' na nen xicha xíchaje'. <sup>45</sup> Quebe bnupu' neda', san nu'ula nigá, gate guxú'utea', quebe dxusané' dxunúpequeze' ni'a. <sup>46</sup> Quebe gulú'u da za xíchaja', san nu'ula nigá gulu'e ni'a da dxelále'e zixre. <sup>47</sup> Chee le' na' dxapa' lue', lawe' da nazrí'ile'ene' neda', da nigá naca bea na ba bnite lawa' chee' ca naca dul-la zan chee', san bènea' naca bábaze dul-la chee' da bnite lawa', láteze zrí'ine' neda'.

<sup>48</sup> Nadxa Jesús guzre' nu'ula':

—Dul-la chiu' ba bnite lawa'.

<sup>49</sup> Na' benne' ca' zaj zre'e nen Le', ne zaj dxe'e na' gulezú lawe' dxelenné' lu lázrdawe': "¿Nuzra benne' nigá, dxunite láuqueze' dul-la?"

<sup>50</sup> Jesús guzre' nu'ula na':

—Ba naláu' lawe' da guxéajle'u chia'. Bexíaj dute xel-la dxebeza zri lazre'.

### Nu'ula ca' belún zrin chee Jesús

8 Ca gudé da nigá, gudá Jesús zane' xezre, ne xézredu ca', dxusédené', ne dxuchálajé' ca' dxenná bea Dios. Benne' chazrinnu gubáz ca' zjácálené' Le'.<sup>2</sup> Cá'anqueze zjácále Le' bal-la nu'ula ca', benne' ca' bexuné' le' ca' naca xízrawé' chee', ne bebéajé' be' xriwé' ca' da zaj xu'e. Ládujla nu'ula ca' ziaj María Magdalena, nu'ula na' belexedxúaj gazre be' xriwé' lu xichaj lázrdawé'.<sup>3</sup> Ládujla le' ziajqueze Juana, zru'ula Chuza, benne' na' xu'u lu ne'e da napa Herodes. Cá'anqueze ládujla le' ziaj Susana, na' zjaca nu'ula zandxa na', nu'ula ca' dxelácalené' Jesús nen da zaj nape'.

Da dxulé'e na ca naca chee benne' dxaze' zrua' xtila  
(Mt. 13.1-9; Mr. 4.1-9)

<sup>4</sup> Benne' zan beledxúajé' lu xezre ca' chee xeledé'ene' Jesús, na' gate belezraga benne' zan naga zue', na' bchálajé' tu da dxulé'e na, dxé'e le':

<sup>5</sup> —Tu benne' dxaze' guzé'e zjaze' zrua' xtila. Ca zéajé' dxaze' na, bal-la bínnedu ca' xejlechaze na dxu'a neza, na' benne' ca' bululájajé' na, na' belezrín bxínnedau' guláguba' na. <sup>6</sup> Xebal-la bínnedu ca' xejlechaze na lu xiaj ca', na' gate bínnedu caní belezría na, chadite gulebizre na, lawe' da quebe gudxé' gupa'. <sup>7</sup> Xebal-la bínnedu ca' xejlechaze na naga zaj dxe' lue xeche', na' bululule xeche' ca' le' na. <sup>8</sup> Xebal-la bínnedu ca' xejlechaze na lu xu bebe, na' gate belegula na, na' gulezríale'e na. Bal-la na gulezría na tu gaxúa weaj.

Gate bexuzre bchalaj Jesús da nigá, na' gunné' zizraj: —¡Che le'e zua nágale, le xene!

Jesús dxenné' bizr chee na' dxuchálajé' da dxululé'e na  
(Mt. 13.10-17; Mr. 4.10-12)

<sup>9</sup> Nadxa benne' ca' dxuséde Jesús gulenábene' Le' bizra zéajé da dxulé'e nigá. <sup>10</sup> Jesús guzre' le':

—Dios dxuzéajni'ine' le'e ca naca da nagache chee xel-la dxenná bea chee', san benne' xula, dxuchálajle-na' le' da dxulé'e na caní, chee gate dxeledé'ene' xelaque' ca benne' quebe dxeledé'ene', ne gate dxelenne' quebe dxeléajni'ine'.

Jesús dxuxuzájle'e da dxulé'e na ca naca chee bènea' dxaze'  
(Mt. 13.18-23; Mr. 4.13-20)

<sup>11</sup> Na' gunná Jesús:

—Da nigá naca ca zéajé da dxulé'e na': Bínnedu ca' zéajé na xrtizra' Dios. <sup>12</sup> Bínnedu ca' xejlechaze na dxu'a neza zéajé na benne' ca' dxelenne' xrtizra' Dios, san za' da xriwé', na' dxegúa na dizra' na' lu xichaj lázrdau benne' ca', chee quebe xelájle'e, ne quebe xeledé'. <sup>13</sup> Bínnedu ca' xejlechaze na lu xiaj ca' zéajé na benne' ca' dxelenne' dizra' na', ne dxelezi'e na duté xel-la dxelébé, san quebe dxaze na lu xichaj lázrdawé'. Dxeléajle'e tu chí'idau'ze, na' gate dxeledé' lu da zi' da xa', na' dxulusán lazre' na. <sup>14</sup> Bínnedu ca' xejlechaze na naga zaj dxe' lue xeche' zéajé na benne' ca' dxelenne'

dizra' na', na' dxeajxaque', na' lawe' da dxeleze'ne' gunne xue da zante, ne dxelezé lazre' xel-la gunní'a, ne da xele'aj xelawé' da zácále'e, na' xúgute da caní dxulunité na dizra' na', na' quebe dxun na zrin lu xichaj lázrdawé'. <sup>15</sup> Na' bínnedu ca' xejlechaze na lu xu bebe zéajé na benne' ca' zua chawe', ne du lazre' lázrdawé', na' gate dxelenne' dizra' na', dxuluzúa chache' na, na' dxun zrin dizra' na' lu xichaj lázrdawé'.

Da dxulé'e na ca naca chee tu da dxegú'u lení'  
(Mr. 4.21-25)

<sup>16</sup> Gunná Jesús:

—Netú benne' che gugale' da dxegú'u lení', quebe gudúsie' na tu xi'ina, u zranle ga dxasie', san guzúe' na sibe, chee cu'u lení' na chee benne' zaj zre'e lu xu'u na'. <sup>17</sup> Quebe bi de da nagache' da quebe gulé'e lau na, ne quebe bi xu'u lu xichaj lázrdau bèneache da quebe gaca bea na, ne lá'tequeze na.

<sup>18</sup> 'Chee le' na', le xene xanne'. Tu benne' nazi'e xrtizra' Dios, wazidxé', san benne' quebe dxezi'e na, wegá'a ca da du dxé'quene' nape'.

Dxelezrín lau Jesús xrne'e, ne benne' biche' ca'  
(Mt. 12.46-50; Mr. 3.31-35)

<sup>19</sup> Nadxa xrna Jesús, ne benne' biche' ca' belezrine' naga zue', san quebe gulezé'quene' xelezrine' lau Le', lawe' da zrále'e benne' zan ga na'. <sup>20</sup> Tu benne' na' bzenne' Jesús, gunné':

—Xrna'u, ne bi bichu' ca' zaj zre'e chale'aj nigá, dxela-ca lazre' xuluchálajle' Lue'.

<sup>21</sup> Jesús guzre' le':

—Benne' ca' dxelenne' xrtizra' Dios, ne dxelune' ca dxenná na, benne' caní zaj naque' ca xrna'a, ne benne' bícha'dau' ca'.

Jesús dxuzúa zrie' be' bdunu', ne xejxruza chee nísadau'  
(Mt. 8.23-27; Mr. 4.35-41)

<sup>22</sup> Tu zra guxú'u Jesús tu lu da dxedá lawe' nísadau' nen benne' ca' dxusédené', na' guzre' le':

—Cheajdxu xecha la'a nísadau'.

Na' gusiá'que', <sup>23</sup> ne dxácaté zjaque' lu nísadau' na', guse Jesús. Na' guzú lau dxácalé'e be' bdunu' lu nísadau', na' guzú lau dxu'u nisa lu da dxedá lawe' nísadau' na', ne ba dxácaté waxaze na lu nísadau'.

<sup>24</sup> Nadxa bulusebané' Jesús, dxelé'e Le':

—¡Benne' Weséde! ¡Benne' Weséde! ¡Ba dxázedxu lu nisa nigá!

Nadxa guxasa Jesús, na' gudil-le' be' bdunu' na', ne nisa na', na' ca naca da ca' belezúa zri na. <sup>25</sup> Nadxa Jesús guzre' benne' ca' dxusédené':

—¿Quebe ne chéajle chee Dios?

Benne' ca' belezrebe', ne belexebánene', na' buluchébe ljwezre':

—¿Núzraqueze benne' nigá, dxenná bé'ene' be', ne nisa, na' dxuluzúa na dizra' chee'?

## Tu benne' Gadara xu'e be' xriwe'

(Mt. 8.28-34; Mr. 5.1-20)

<sup>26</sup> Nadxa belezrine' xecha la'a nisa lu xezr la xu chee xezre Gadara, chala'a ca'ala chee Galilea. <sup>27</sup> Gate bedxúaj Jesús lu da dxedá lawe' nísadau' na', na' bzrin tu benne' xezre na' lau Lē'. Zánete iza ba guca xu'u be' xriwe' ca' benne' nigá. Quebe gúcue' zra lane', ne quebe guzúe' netú lu xu'u, san xeajchu'e tu lu ba ca'.

<sup>28</sup> Gate blé'ene' Jesús, na' xeajzú zribe' lau Lē', na' gudxezre xē'e, dxenné':

—¿Bizr chee na' za'u naga zua', Jesús, Zri'ine Dios szrentē? Dxata' xueda' Lue' quebe gusaca zi'u neda'.

<sup>29</sup> Gunná na caní lawe' da ba gunná be'e Jesús be' xriwe' ca' xelexedxúaj na lu xichaj lázrdau benne' nigá. Zane' lasa be' xriwe' ca' ba gulēla na benne' nigá.

Benne' xezre na' gulēle' benne' nigá, ne buluchéaje' le' ni'a ne'e nen du xia, san le' bzúxuje' du xia na', na' be' xriwe' ca' guleché na le' le'e xixre' lawe' lataj. <sup>30</sup> Jesús bchebe' be' xriwe' ca':

—¿Bi lele'?

Na' bechebe le na:

—Neda' lea': Da Zan.

Ca' gunná na lawe' da xu'u be' xriwe' zante benne' na'. <sup>31</sup> Be' xriwe' ca' gulenaba na Jesús quebe sel-le' na lataj chul-la. <sup>32</sup> Lu xi'a naga zua Jesús, na' zralē'e cuche zan dxeláguba', na' be' xriwe' ca' gulata' xue na Jesús gu'e lataj da ca' cheajxezra' na lu cuche ca', na' bnezruj Jesús na lataj. <sup>33</sup> Nadxa be' xriwe' ca' belexedxúaj na lu xichaj lázrdau benne' na', na' gulú'u na lu cuche ca', na' xúgute' cuche ca' buluzrúnnujba', ne gulebixreba' dxu'a chjéa, na' xeajlecházeba' lu nísadau', naga gulépeba', guláteba'.

<sup>34</sup> Benne' ca' dxuluxúe' cuche ca', gate belelé'ene' ca da guca, na' buluzrúnnuje' lu xel-la dxelezrebe, na' gulē'e benne' zaj zre'e le'e xixre', ne benne' zaj zre'e lawe' xezre ca da guca. <sup>35</sup> Nadxa benne' ca' beledxúaje' xeajlenné'e ca da guca. Gate belezrine' naga zua Jesús, na' belelé'ene' bēnea' belexedxúaj be' xriwe' ca' lu xichaj lázrdawe', dxe'e zran ni'a Jesús, ba nácue' ladxe', ne ba bezúa chawe' xichaj lázrdawe', na' benne' ca' belezrebe'. <sup>36</sup> Na' benne' belelé'e ca da guca buluchá-ljēne' benne' xula ca' ca guca gate bexaca bēnea' guxú'e be' xriwe' ca'. <sup>37</sup> Gate belenne' caní, ca naca benne' zaj zre'e lu xezr la xu chee xezre Gadara gulezú lawe' dxelata' xúene' Jesús xezé'e lazrie', lawe' da dxelezrebele'e. Ca'an guca, guxú'u Jesús lu da dxedá lawe' nísadau', chee xezé'e xéaje'. <sup>38</sup> Bēnea' belexedxúaj be' xriwe' ca' lu xichaj lázrdawe' gunabe' lau Jesús gunézruje' lataj chéajlēne' Lē', san Jesús busebague' le' xegá'ane' lázrie', na' guzre' le':

<sup>39</sup> —Bexiaj lizru', na' bchalaj chee xúgute' ca da ba ben Dios chiu'.

Na' benne' na' bezé'e xezáje', na' bchálajlēne' benne' xezre ca' ca da ben Jesús chee le'.

## Jesús dxexune' bí nu'ula chee Jairo, ne tu nu'ula xeajté' zra lane'

(Mt. 9.18-26; Mr. 5.21-43)

<sup>40</sup> Gate bezrín Jesús xecha la'a dxu'a nísadau', benne' ca' zaj zre'e na' gulezú' lu ne'e Lē' nen dutē xel-la dxele-bé, lawe' da xúgute' dxelebeze' Lē'. <sup>41</sup> Nadxa bzrin tu benne' le' Jairo, benne' blau chee xu'u naga dxelezraga judío ca', na' bzu zribe' lau Jesús, ne guta' xúene' Lē' chéaje' lizre', <sup>42</sup> lawe' da zua tuze bi nu'ula chee'.

Xu'ube' chazrinnu iza, na' ba dxaca wátebe'. Gate guzú' Jesús zéaje', benne' zante zjácālene' Lē', ne buluchíde-te ljwezre'.

<sup>43</sup> Ládujla benne' ca' zeaj tu nu'ula quebe chawe' zu'e, na' chazrinnu iza ba zeaj dxé'ene' we' dxen da dxaca chee nu'ula ca'. Ba gudízruje' benne' dxelexún bēneache ca' xúgute' ca da gudape', na' quebe bi gulezéquene' xelune' chee xexaca nu'ula na'. <sup>44</sup> Nu'ula na' gubigüe' cúzrula Jesús, na' xeajté' zran ni'a zre', na' la ná'queze bexágate dxen da dxaca nu'ula na'.

<sup>45</sup> Nadxa Jesús bchebe':

—¿Nuzra bta neda'?

Xúgute' gulenné': "Quebe nu ne gutá Lue'", na' Pedro, ne benne' ljwezre' ca' gulenné':

—Benne' Wesēde, benne' caní dxuluchíde'e Lue', ne dxuluzrigue' Lue', na' dxuchébequezu', dxennáu':

"¿Nuzra bta neda'?"

<sup>46</sup> Jesús gunné':

—Tu benne' bte' neda' lawe' da gúquebe'eda' ben zrin xel-la waca chia' da bexún na tu benne'.

<sup>47</sup> Gate gúquebe'e nu'ula na' ba neze Jesús da guca, nadxa gudé'e dxezrizete', na' bzu zribe' lau Jesús, ne guxrúalepe' lau xúgute' benne' ca' bizr chee na' bte' Jesús, ne ca guca bexácate'. <sup>48</sup> Nadxa gunná Jesús, guzre' nu'ula na':

—Zrí'ina'dau', ba bexacu' lawe' da guxéajle'u chia'. Bexíaj na'a, dutē xel-la dxebeza zri lazre'.

<sup>49</sup> Ne dxuchálajte Jesús, bzrin tu benne' naga ze Jesús, benne' guzē'e lizre Jairo, benne' blau chee xu'u ga na' dxelezraga judío ca', na' guzre' Jairo:

—Ba gute bi nu'ula chiu'. Québedxa guzúa xuzru' Benne' Wesēde nigá.

<sup>50</sup> Gate ben Jesús ca gunné', na' guzre' Jairo:

—Quebe zrebu'. Con guxeajle. Bi nu'ula chiu' na' xexácabe'.

<sup>51</sup> Gate bzrin Jesús xu'u na', netú quebe be' lataj chú'ulē Lē', san tuze Pedro, ne Jacobo, ne Juan, ne xra xrna bi nu'ula na'. <sup>52</sup> Xúgute' benne' zaj zre'e na' dxele-bezre', ne dxelebezre xache' chee bi nu'ula na'. Jesús gunné':

—Quebe cuézrele. Bi nú'uladu nigá quebe nátebe'. Dxásezebe' na'.

<sup>53</sup> Na' benne' ca' buluzrizre' chee', lawe' da zaj nézquezne' ba gútebe'. <sup>54</sup> Nadxa Jesús guqué'e na' bi na', na' gunné' zizraj:

—¿Bi nu'ula, bexasa!

<sup>55</sup> Na' bebanbe', ne bexásatebe'. Na' Jesús busebague' le' xulunézruje' da gágube'. <sup>56</sup> Xra xrnabe'

belexebánele'ene'. Jesús busebague' le' quebe nu xel'é'e ca da guca.

**Jesús dxesel-le' benne' chazrinnu ca' xelune' xrchine'**  
(Mt. 10.5-15; Mr. 6.7-13)

**9** Jesús bchague' benne' chazrinnu ca' dxusédené', na' bnézruje' le' xel-la waca, ne xel-la dxenná bea chee' xelxebéaje' xúgute' cue' be' xriwe' ca' da zaj xu'u bèneache, ne chee' xellexune' benne' ca' zaj xu'e xízrawe'. <sup>2</sup> Na' gusel-le' le' chee' xuluzenne' bèneache ca dxenná bea Dios, ne chee' xellexune' benne' zaj xu'e xízrawe' ca'. <sup>3</sup> Na' guzre' le':

—Quebe bi gúale chee' la neza. Quebe gúale xaga da guchíchele, na' xixruj chee', ne da gágule, ne dumí. Le gua' tu cue'ze zra lánale. <sup>4</sup> Gáteteze xu'u naga chú'ule, le xegá'ana na' cadxa zrin zra xeza'ale lu xezre na'. <sup>5</sup> Naga quebe xelez'é dizra' guchálajle le', le xedxúaj xezre na', ne le cuibe bxrte xu da da' ní'ale, da gul'é'e na zaj nabague' zria lau Dios.

<sup>6</sup> Nadxa beledxúaje', na' ca naca xézredu ca' xea-jlechálaje' dizra' chawe' chee' Dios, ne belexexune' benne' zaj xu'e xízrawe' ca'.

**Ca guca gate gute Juan, benne' bchue' bèneache nisa**  
(Mt. 14.1-12; Mr. 6.14-29)

<sup>7</sup> Herodes, benne' dxenná be'ene' xezr la xu na', benne' ca naca xúgute' da dxun Jesús, na' guzúe' stébe lawe' da dxelenná bal-la benne' ba bebán Juan ládujla benne' gate. <sup>8</sup> Xebal-le' dxelenné' Elías, bènea' bchálaje' waláz chee' Dios ba bele'e, na' xebal-le' dxelenné' ba bebán tu benne' ca' buluchálaje' waláz chee' Dios ca ni'te'. <sup>9</sup> Herodes gunné':

—Néda'queza' gunná be'eda' nu gudxugu xichaj Juan. ¿Nuzra benne' nigá xca' da zanté dxenda' dxune'?

Nadxa Herodes bēne' ba xuzre lé'ene' Jesús.

**Jesús dxugawe' chi xun gaxúa benne'**  
(Mt. 14.13-21; Mr. 6.30-44; Jn. 6.1-14)

<sup>10</sup> Gate belexezrín benne' gubáz ca' chee' Jesús lau Le', na' gul'é'e Le' ca da ba belune'. Na' Jesús beche'e benne' ca', na' besiá'que' zeajxaque' tu lataj da nagá'ana zitu' naga zaj dxé' xezre ca', naga zua lu xezr la xu chee' xezre Betsaida. <sup>11</sup> Gate benne' xezre na' belenne' zua Jesús na', na' gusiá'que' zjaque' naga zua Le'. Na' Jesús guzú' lu ne'e benne' ca', ne bchálajlene' le' ca dxenná bea Dios, ne bexune' benne' zaj xu'e xízrawe' ca'.

<sup>12</sup> Gate guzú' lau zeaj dxezré', na' gulebiga benne' chazrinnu gubáz ca' chee' Jesús lau Le', na' gul'é'e Le':  
—Bze' benne' caní dizra' chee' chjaque' naga xelasié', ne xelíajé' da xelawe' xézredu ca' zaj nnita gagu, lawe' da ga zúadxu nigá quebe bi de.

<sup>13</sup> Jesús guzre' le':

—Le gunezruj le'e da xelawe'.

Nadxa benne' ca' bele'e Jesús:

—Quebe dēdxá cheentu' ca gáxzuga xeta xtíladau', ne chú'paga bela, u ¿wacheajxríquezentu' da xelagu catite benne' zan caní?

<sup>14</sup> Zaj zra ca chi xun gaxúa benne' biu ca' ga na'. Nadxa Jesús guzre' benne' ca' dxusédené':

—Le xē benne' ca' xelebé'e chi xun weaje' tu cue' tu cue'.

<sup>15</sup> Ca'an belune', na' gulebe'e xúgute'. <sup>16</sup> Nadxa Jesús guqu'é'e da gazxu' xeta xtila ca', ne chupa bela ca'. Na' guchisa lawe' xabaala, ne guzre' Dios "Xcalenu'", na' ca bexuzre bzúzruje' na, na' bnézruje' na benne' ca' dxusédené' chee' xelisié' na chee' benne' zan ca'.

<sup>17</sup> Xúgute' gulawe', ne belélaje'. Ca gudé na' buluzré'e chazrinnu ga' da bízrujdu ca' belexegá'ana na.

**Pedro dxenné' Jesús naque' Cristo**  
(Mt. 16.13-19; Mr. 8.27-29)

<sup>18</sup> Tu zra gate zua Jesús dxuchálajlene' Dios naga quebe zaj zra benne' zan ca', na' zrale' benne' ca' dxusédené' Le', na' Le' bchebe' benne' ca':

—¿Nuzra dxelenná benne' naca' neda'?

<sup>19</sup> Le' belexechebe':

—Bal-le' dxelenné' nacu' Juan, bènea' bchue' bèneache nisa, na' xebal-le' dxelenné' nacu' Elías, bènea' bchálaje' waláz chee' Dios, na' xebal-le' dxelenné' nacu' tu benne' ca' buluchálaje' waláz chee' Dios ca ni'ite', na' bebane'.

<sup>20</sup> Nadxa Jesús bchebe':

—Na' le'e, ¿nuzra dxennale naca'?

Na' gunná Pedro:

—Nacu' Cristo chee' Dios.

**Jesús dxuzenne' benne' ca' ca gaca gate gatie'**  
(Mt. 16.20-28; Mr. 8.30—9.1)

<sup>21</sup> Jesús bsebage' benne' ca' quebe nu xel'é'e ca'. <sup>22</sup> Na' guzre' le':

—Neda', Benne' Gulje' Bèneache, dxal-la' téle'a xel-la zi', na' benne' gula sina ca', ne benne' xíchaje' ca' chee' bxruze, ne benne' ca' dxuluxuzájle'e da nadxixruj bea na xuluzúe' neda' chalá'ala. Xelútie' neda', san gate gaca chunna zra, na' xebana'.

<sup>23</sup> Ca gudé na' guzre' ca naca benne' zaj zre'e na':

—Che nu benne' dxaca lazre' gague' neda' tuze, dxal-la' guzúe' chalá'ala xúgute' da naca chee', na' guné' neda' tuze xúgute' zra, lácala gate benne' na'. <sup>24</sup> Benne' dxaca lazre' gapa chi'e xel-la nabán chee', gunítie' na, san benne' gunítie' xel-la nabán chee' lawe' da naque' chia', wazru'éene' na. <sup>25</sup> ¿Bizra da ba neza gaca na chee' tu benne' che gape' ca naca da de lu xezr la xu nigá, san cuía xi' léqueze'? <sup>26</sup> Che nu benne' xedu'éene' chia' neda', ne chee' dizra' chia', cá'anqueze neda', Benne' Gulje' Bèneache, wedu'éeda' chee' bènea' gate za'a neda' chee' nna be'a nen xel-la szren chee' Xra', ne chee' gubáz lá'azxa chee' xabáa ca'. <sup>27</sup> Da li dxapa' le'e, bál-lale zrale nigá quebe gátele nédxudxa ca lé'ele zra nna bea Dios.

**Gate bcha lu'a lesaca Jesús**

(Mt. 17.1-8; Mr. 9.2-8)

<sup>28</sup> Ca guzre xi' gudé gunná Jesús da nigá, na' gu-luéné' tu lu xi'a chee' guchálajlene' Dios, na' xjácate Pedro, ne Jacobo, ne Juan Le'. <sup>29</sup> Dxácate dxuchálajlene' Dios, na' bcha lu'a lesaca Jesús, na' zra lané' bexaca na da chiche, ne guca tite na. <sup>30</sup> Nadxa bululé'e lau chupa benne' dxuluchálajlene' Jesús. Zaj naque' Moisés ne Elías. <sup>31</sup> Naga zele' Jesús benne' ca' gúcatite' legala, na' dxuluchálajlene' Jesús ca gaca gate gatié' Le' xezre Jerusalén. <sup>32</sup> Gulácale'e welase Pedro ne benne' ljwezre' ca', san bulusebán lazre', na' belelé'ene' ca naca xel-la szren chee' Jesús, ne chupa benne' ca' zaj zélé'ene' Jesús. <sup>33</sup> Gate benne' ca' belexesiáque' naga ze Jesús, na' Pedro gunné':

—Benne' Wesede, néquega zúadxu nigá. Benna ne-tu' lataj guntu' chunna xu'u lága'dau', tu chiu', ne tu chee' Moisés, ne tu chee' Elías.

Pedro quebe dxéquebe'ene' ca da dxenné'. <sup>34</sup> Dxácate dxenná Pedro caní, na' bla' tu beuj da gucu na naga zaj zré'e, na' belezrebe Pedro, ne benne' ljwezre' ca' gate gulezré'e lu beuj na'. <sup>35</sup> Na' belenne' chi'i nu dx-uchalaj lu beuj na', gunná:

—Bi nigá naque' Zri'ina', nazrí'ite' lazra'. Le xen da dx-uchálajbe'.

<sup>36</sup> Ca gudé belenne' chi'i na', na' belelé'ene' Jesús ba ze' tuze'. Na' benne' caní gulezúe' zrize, na' quebe nu gulé'e ca da belelé'ene'.

**Jesús dxexune' tu bi biu xu'ube' be' xriwe'**

(Mt. 17.14-21; Mr. 9.14-29)

<sup>37</sup> Gute xu, gate belexexétaje' lu xi'a na', na' benne' zan zjaque' zeajlexrígale' Jesús. <sup>38</sup> Nadxa tu benne' ca' gunné' zizraj, guzre' Jesús:

—Benne' Wesede, dxata' xueda' Lue' dajxú' bi biu chia' lawe' da tu lícha'te' bi chia' naca, <sup>39</sup> na' tu be' xriwe' dxaze na lebe', ne dxucuezre xa'a na lebe', ne dx-udxixre dxutula na lebe', na' dxebía bzrina' dxú'abe'. Dxusaca zi na lebe', ne quebe dxaca lazre' na gusán na lebe'. <sup>40</sup> Ba guta' xueda' benne' ca' dxusédenu' chee' xelxebéaje' na, san quebe gulezéquene'.

<sup>41</sup> Jesús bechebe':

—Le'e, benne' wen chupa lazre', ne wen da calela. ¿Ájate dxal-la' sála'ena' le'e? ¿Ájate dxal-la' guchaga lawa' nen le'e? Xeajxri' zri'inu' na' nigá.

<sup>42</sup> Gate bi cuide' na' ba zéajbe' gagu, na' be' xriwe' na' gudín na lebe' xu, ne bdxixre btula na lebe'. Na' Jesús gudil-le' be' xriwe' na', ne bexune' bi cuide' na', na' bdeé'-be' lu na' xrabe'. <sup>43</sup> Xúgute' benne' ca' belexebánene' ca naca xel-la szren chee' Dios.

**Jesús dxuzenne' benne' ca' xecha lasa ca gaca gate gatié'**

(Mt. 17.22-23; Mr. 9.30-32)

Dxácate na' xúgute' benne' ca' dxelxebánene' ca da dxun Jesús, Le' guzre' benne' ca' dxusédene':

<sup>44</sup> —Le xen xanne' da nigá, ne quebe gal-la lázrele na. Neda', Benne' Gulje' Bénneache, wuludé'e' neda' lu na' benneache.

<sup>45</sup> Benne' ca' dxusédene' quebe guléajni'ine' ca da dxenná Jesús lawe' da quebe ne gunézruj Dios lataj xeléajni'ine', na' belezrebe' xelenabe' Jesús guzéajni'ine' le' ca da na' gunné'.

**¿Nuzra naca blau?**

(Mt. 18.1-5; Mr. 9.33-37)

<sup>46</sup> Nadxa benne' ca' dxusede Jesús gulezú lawe' dxu-luchebe ljwezre' núzraqueze naca blau ládujla le'.

<sup>47</sup> Jesús gúquebe'ene' ca da dxelenné'. Nadxa guqué'e tu bi biú'dau', ne bze'-be' cuité', <sup>48</sup> na' guzre' benne' ca':

—Benne' gape' ba lá'ana tu bidu caní lawe' da nazrí'ine' neda', néda'queza' dxape' ba lá'ana, na' benne' dxape' ba lá'ana neda', dxápaqueze' ba lá'ana Dios, Bénnea' nasele' neda'. Cá'anqueze bennea' ná-cadxe' benne' dxexruj lazre' ládujla le'e, benne' nigá naque' benne' blau.

**Benne' quebe dxedábage' dxi'u zue' gácalene' dxi'u**

(Mr. 9.38-40)

<sup>49</sup> Nadxa Juan guzre' Jesús:

—Benne' Wesede, blé'entu' tu benne' dxuchínene' Lau', dxebéaje' be' xriwe' ca' lu xichaj lázrdau benne' ca', na' gúzrentu' le' quebe guné' ca' lawe' da quebe naque' dxi'u tuze.

<sup>50</sup> Jesús guzre' le':

—Quebe guzágale ca da dxune' lawe' da benne' quebe dxedábage' dxi'u zue' gácalene' dxi'u.

**Jesús dxedil-le' Jacobo ne Juan**

<sup>51</sup> Gate ba za zrin zra dxal-la' xexíaj Jesús xabáa, ben zi' lazre' chéaje' Jerusalén. <sup>52</sup> Na' gusél-le' gubáz chee' ca' xelebía lawe', na' benne' ca' xjaque' tu xézredau' nababa Samaria chee' cheajlecuéze' naga sua Jesús.

<sup>53</sup> Benne' Samaria ca' quebe gulaca lazre' xegá'ana Jesús na', lawe' da guleque bé'ene' zéaje' Jerusalén.

<sup>54</sup> Gate Jacobo ne Juan, benne' ca' dxusede Jesús, belelé'ene' da nigá, na' gulé'e Jesús:

—Xran, ¿dxaca lazru' nna béantu' xetaj xi' da za xabáa chee' guzría xi na benne' caní, ca ben Elías, bennea' bchálaje' waláz chee' Dios?

<sup>55</sup> Nadxa Jesús guné'e le', ne gudil-le' le', dxenné':

—Le'e quebe nézele nu be' zúale' le'e. <sup>56</sup> Caní naca lawe' da bla' neda', Benne' Gulje' Bénneache, quegá chee' guzría xi'a xel-la nabán chee' benneache, san chee' gucache chawa' le' na.

Nadxa xjaque' xetú xézredau'.

**Benne' dxelaca lazre' chjácálene' Jesús**

(Mt. 8.19-22)

<sup>57</sup> Ca zjaque' lu neza na', tu benne' biu guzre' Jesús:

—Xran, dxaca lazra' sála'ena' Lue' gáteteze chéaju'.

<sup>58</sup> Jesús bechebe':

—Beza ca' zaj zua bluaj cheeba', na' bxínnedu ca' zaj zria xrú'neba', san neda', Benne' Gulje' Bénneache, quebe bi de ga xrua xíchaja'.

<sup>59</sup> Na' Jesús guzre' xetú benne':

—Ben neda' tuze.

Benne' nigá gunné':

—Xran, benna neda' lataj cheajcáchea' xra'.

<sup>60</sup> Na' Jesús bechebe':

—Be lataj benne' ca' zaj naque' ca' benne' gate xulu-cache' ljwezre', na' lue', guxiáj, xeajchalaj ca dxenná bea Dios.

<sup>61</sup> Nadxa tu benne' xula guzre' Jesús:

—Xran, dxaca lazra' guna' Lue' tuze, san steca, benna neda' lataj xexá'a cheajzéa' dizra' benne' zaj zra' lizra'.

<sup>62</sup> Jesús guzre' benne' na':

—Benne' dxugá'ane' beze, na' nne'e cúzrulé', quebe gaca chee benna' gune' zrin chee da dxenná bea Dios.

### Jesús dxesel-le' benne' gaxún chi ca'

**10** Ca gudé na', Xránadxu guqu'é xegaxún chi benne' ca', na' gusél-le' chupa weaje' xelebía lawe' lau Le' xúguté xezre, ne xézredu ca' naga dxal-la' chéaje' Le'. <sup>2</sup> Guzre' benne' ca':

—Da li dxennéa', lina da zren naca na, na' benne' wen zrin bábaze zaj naque'. Chee le na' le naba lau Xrane zrin na' sel-le' benne' wen zrin ca' xelexequé' lina na'. <sup>3</sup> ¡Le hjaca! Le nna'xque, neda' dxesel-la' le'e, gácale ca zríla'du ca' ládujla becu' xi'a ca'. <sup>4</sup> Quebe gúale xixruj, ne dumí, ne zréale, ne quebe gagale la neza nu guchálajle. <sup>5</sup> Gate chu'ule tu lu xu'u, na' gugápale diuzre, nnale: "Xel-la dxebeza zri lazre' gaca chee benne' zaj zre'e lu xu'u nigá." <sup>6</sup> Che zaj zra' na' benne' dxebeza zri lazre', na' da gunábale gaca chee benne' ca', san che quebe nu chilá' naca caní, le naba quebe gaca da ba gunábale. <sup>7</sup> Le xegá'ana lu xu'u ná'queze, na' le xi'aj le gagu ca da xelunne' lawe' da benne' wen zrin quebe te le tuné'. Quebe cheajsúale tu xu'u xetú xu'u. <sup>8</sup> Gate zrinle tu xezre naga xelezi' lu ne'e le'e, le gagu ca da xelunne'. <sup>9</sup> Le xexún benne' zaj xu'e xízrawe' zaj zre'e na', na' le xe'e: "Xel-la dxenná bea chee Dios ba zua nen le'e." <sup>10</sup> Che zrinle tu xezre naga quebe xelezi' lu ne'e le'e, le xedxúaj la neza chee xezre na', na' nnale: <sup>11</sup> "Ca naca bxrtedu' da' ní'antu' dxexebíentu' na chee gaca tu da gul'é na le'e nabá-gale zria lau Dios. Dxal-la' nézele ba bla' ládujla le'e xel-la dxenná bea chee Dios." <sup>12</sup> Dxapa' le'e, ca lu zra guchi'a Dios, da xelezaca benne' zaj zre'e lu xezre nigá gácadxa na xel-la zi' ca da xelezaca benne' xezre Sodoma, xezre na' bzria xi' Dios.

**Da gaca chee xezre naga quebe belune' ca dxenná xrtizra' Dios**

(Mt. 11.20-24)

<sup>13</sup> Na' gunná Jesús:

—¡Edxugúa le'e, benne' xezre Corazín! ¡Edxugúa le'e, benne' xezre Betsaida! Chela lu xezre Tiro, ne lu xezre Sidón belelé'engé' ca naca xel-la waca chee xabáa da ba

gulaca ládujla le'e, gate na'te ba belexebí'i lazre', belácue' zra lané' tuzruj, ne buluzríe' de xíchaje'. <sup>14</sup> Lu zra guchi'a Dios da dxaca, na' sácadxale le'e xel-la zi' ca da xelezaca benne' Tiro, ne Sidón. <sup>15</sup> Na' le'e, benne' xezre Capernaum, ¿dxéquele waxásale zríntele xabáa? ¡Lataj chúl-lala xétajle!

<sup>16</sup> Nadxa guzre' benne' ca' dxusédené':

—Benne' xenne' chee le'e, chia' neda' xenne', na' benne' guzúe' le'e chalá'ala, neda' na' gusaque' ca', na' benne' guzúe' neda' chalá'ala, Dios, Bénnea' gusel-le' neda', guzúe' chalá'ala.

### Dxelexezrín benne' gaxún chi ca'

<sup>17</sup> Benne' gaxún chi ca' belexezrine' lu xel-la dxelebé, dxelenné':

—Xran, be' xriwe' ca' dxuluzúaqueze na dizra' chee tu' gate dxuchíntentu' Lau'.

<sup>18</sup> Jesús guzre' benne' ca':

—Ca' naca, na' neda' ble'eda' da xriwe' be' xruj na zran xabáa ca tu xesa da dxeajsúa na lu xu. <sup>19</sup> Neda' ba benna' le'e xel-la dxenná bea chee guléajle be snia ca', ne béxrujni, ne chee guchúchujle duté xel-la dxenná bea chee da xriwe', na' quebe bi seque gune na le'e.

<sup>20</sup> Quebe bele lawe' da dxelún be' xriwe' ca dxennale le'e, san le be lawe' da ba naxúaj lale xabáa na'la.

### Jesús dxebene'

(Mt. 11.25-27; 13.16-17)

<sup>21</sup> Lu zra ná'queze gubéle'e Jesús, zúale Be' Lá'azxa Le', na' gunné':

—Dxue lá'ana' Lue', Xrae, Xrane xabáa ne xezr la xu, lawe' da ba blé'enu' benna'du caní da bcácheu' chee benne' sina ca', ne benne' dxelájni'ine'. ¡Ca' naca, Xrae, lawe' da ca'an guca lazru' Lue'!

<sup>22</sup> 'Xra' ba benne' neda' xúguté. Quegá nu neze nu na' naca Zrí'ine', san tuze Xrá'queza', ne quegá nu neze nu na' naca Xra', san tuze Zrí'ine'queze', ne nu benne' ca' dxaca lazre' Zrí'ine' guzéajni'ine' le' Nu na' naca Xre'.

<sup>23</sup> Nadxa guné'e benne' ca' dxusédené', na' guzre' benne' cá'anze:

—Ba neza naca na chee benne' ca' dxelélé'engé' ca da dxelélé'le le'e, <sup>24</sup> lawe' da dxapa' le'e, záneté benne' ca', benne' buluchálaje' waláz chee Dios, ne benne' wenná bea ca' gulaca lazre' xelélé'engé' ca da dxelélé'le le'e, san quebe belelé'engé' na. Gulaca lazre' xelenne' ca da dxenle le'e, san quebe belenne' na.

**Da dxulé'e na ca ben benne' Samaria, benne' naque' chawe'**

<sup>25</sup> Nadxa tu benne' dxuxuzájle'e da nadxixruj bea Dios bdxúaje', ne guxiáje' xeajchálajlene' Jesús chee gaca guzúa zrie' Le', na' bchebe' Le':

—Benne' Weséde, ¿bizra dxal-la' guna' chee gata' chia' xel-la nabán da zeajlí canna?

<sup>26</sup> Jesús bechebe':

—¿Bizra da naxúaj na lu da nadxixruj bea Dios? ¿Aja dxéquenu' da dxulabu'?

<sup>27</sup> Bénnea' dxuxuzájle' da nadxixruj bea Dios bechebe':

—Bzri'i Xranu' Dios duté lárda'u, ne nen duté bènne'du xu'u, ne nen duté xel-la dxun zi' lazre' chiu', ne nen duté xel-la dxulaba lazre' chiu', na' bzri'i le sa' ljwezru' ca nazrí'i cuinu'.

<sup>28</sup> Nadxa gunná Jesús, guzre' le':

—Cháwe'le'e bechebu'. Che dxunu' caní, na' gapu' xel-la nabán na'.

<sup>29</sup> Bénnea' dxuxuzájle' da nadxixruj bea Dios guca lazre' gucá'ana chawe' cuine', na' guzre' Jesús:

—¿Nuzra na' le sa' lwezra'?

<sup>30</sup> Bechebe Jesús:

—Tu benne' guzé'e Jerusalén, bétaje' zíaje' Jericó. Lu neza na' xu'e, na' gulela gubán le', ne gulebane' ca naca da nape', ne zra lane'. Na' buluzálaje' le', ne besíá'que' zaj nucá'ane' le' ca benne' gate. <sup>31</sup> Nadxa gudé tu bxruze neza na', na' gate blé'ene' le', gudé'e' chalá'ala. <sup>32</sup> Cá'anqueze gudé na' tu benne' xrtia Leví, benne' dxune' zrin chee' xudau', na' gate blé'ene' bènnea', gudé'e' chalá'ala. <sup>33</sup> Nadxa tu benne' Samaria gudé'e' neza na', na' gate blé'ene' le' bexache lazre' le'. <sup>34</sup> Gubigué' cuita benne' na', ne btupe' tu da za lu we' chee', ne xrise uva wal-la, na' bchele' na ladxe'. Nadxa bcuene' le' cuzru bea chee', na' beche'e' le' tu lu xu'u naga xegá'ane', ne bxue' le' na'. <sup>35</sup> Zra xula, ca bezá' benne' Samaria na', na' guléaje' chupa dumí da bnéruzje' xrane xu'u na', ne guzre' le': "Bxue benne' nigá, na' che ba gucá'adxa xelate' dumí chiu', neda' xexunna' na gate xelá'a."

<sup>36</sup> Nadxa Jesús guzre' benne' dxuxuzájle' da nadxixruj bea Dios:

—¿Nula benne' chunna caní guque' le sa' ljwezre bènnea' gulela gubán ca'?

<sup>37</sup> Na' gunná bènnea' dxuxuzájle' da nadxixruj bea Dios:

—Bènnea' bexache lazre' le'.

Nadxa Jesús guzre' le':

—Bexíaj lue, na' gúnquezu' ca'.

### Jesús dxezrine' lizre Marta ne María

<sup>38</sup> Jesús bexu'e neza, na' bezrine' tu xézredau', na' lu xezre na' zua tu nu'ula le' Marta, na' gulu'e' Jesús lizre'.

<sup>39</sup> Marta na', zua tu bi bile' le' María, na' María na' gudxé'e' zran ni'a Jesús chee' xenne' da dxuchálaje'.

<sup>40</sup> Marta déle'e' da dxune', na' bzrine' lau Jesús, ne guzre' Le':

—Xran, ¿quebe dxexache lazru' neda' lawe' da dxucá'ana bi bila' neda' chee' guna' tuza' zrin cheentu'? Guzre-be' gácalebe' neda'.

<sup>41</sup> Jesús bechebe':

—Marta, Marta, dxexéle'enu' gunne xue, ne zu' stébe ca naca chee' da ca' dxunu', <sup>42</sup> san de tuze da dxun na ba xen nu gun. María ba bezrelne' da cháwedxa, na' netú benne' quebe seque' cue' na.

### Ca dxal-la' gundxu guchálajle'dxu Dios

(Mt. 6.9-15; 7.7-11)

**11** Tu zra Jesús bchálajle' Dios tu lataj, na' gate bexuzre bchálajle' Dios, na' tu benne' ca' dxusédené' guzre' Le':

—Xran, bséde netu' guchálajle' Dios, ca ben Juan, bsédené' benne' ca' zaj de'e' le'.

<sup>2</sup> Jesús gunné':

—Gate guchálajle' Dios, na' nnale:

Xrantu' Dios, zu' xabáa,

gaca lá'azxa Lau' Lue'.

Gudá nna be'u.

Gaca ca dxaca lazru' lu xezr la xu, ca da dxaca xabáa.

<sup>3</sup> Benna cheentu' da gáguntu' na'a zra.

<sup>4</sup> Bnrite lau dul-la cheentu' ca dxunite launtu' chee benne' ca' dxelune' cheentu' da caléla.

Quebe gu'u lataj da xriwe' cu'u na netu' neza chee na, na' bselá netu' lu na' da caléla.

<sup>5</sup> Nadxa Jesús guzre' benne' ca':

—Che tu benne' ládujla le'e zua tu ljwezre', na' che zrine' lizre benne' ljwezre' na' dxela, ne xe'e' le': "Bi ljwezra', guleaj neda' chunna xeta xtila <sup>6</sup> lawe' da zua tu bi ljwezra' za belá'tébe' lizra', na' quebe bi de' chia' gugawa'-be'." <sup>7</sup> ¿Wechebe benne' ljwezre' na', benne' xu'u lu xu'u: "Quebe gunu' neda' zede. Naxezxuj dxa xu'u chia', na' bi chia' zaj debe' nigá. Quebe gaca chasa' bi gunna' chiu'?" <sup>8</sup> Neda' dxapa' le'e, lálcala quebe chasé' bi gunézruje' le' lawe' da naque' ljwezre', san chasé' chee' québedxa guné' le' zede, na' gunézruje' le' ca naca da nachínnene'. <sup>9</sup> Caní dxapa' le'e:

Le naba, na' Dios gunné' chee'e.

Le xexilaj, na' xezrélele.

Le nne' dxu'a dxa xu'u, na' xalaj chee'e.

<sup>10</sup> Ca' naca na, lawe' da benne' dxenabe', na' si'e, ne benne' dxexilaje', na' xezrélene', ne benne' dxenné' dxu'a dxa xu'u, na' xalaj chee'.

<sup>11</sup> 'Che tu benne' ládujla le'e naque' xra xrna', ¿waca gunézruje' zrí'ine' tu xiaj che nábabe' tu xeta xtila?

¿Waca gunézruje'-be' tu bela' che nábabe' tu bela'?

<sup>12</sup> ¿Waca gunézruje'-be' tu bexrujni che nábabe' tu zri-ta? <sup>13</sup> Che le'e nácale benne' wen da caléla, na' nézele gunézruje' da chawe' chee' zrí'inele, ¿quebe nácadxa

Xrale zua xabáa li lazre' chee' gunné' chee' nu benne' nabe' Be' Lá'azxa?

**Dxelenné' napa Jesús xel-la dxenná bea chee' da xriwe'**

(Mt. 12.22-30; Mr. 3.19-27)

<sup>14</sup> Tu zra Jesús bebéaje' be' xriwe' lu xichaj lárda'u tu benne', da nucá'ana na le' quebe dxaca nnie', na' gate bedxúaj be' xriwe' na', na' benné' bènnea'. Na' benne' ca' belexebánene' chee' da nigá. <sup>15</sup> Na' bal-le' gulenné':

—Benne' nigá dxebéaje' be' xriwe' ca', dxuchínene' xel-la dxenná bea chee' Beelzebú, xrane be' xriwe' ca'.

<sup>16</sup> Xebal-la benne' gulaca lazre' gulé'e' Jesús xel-la waca chee', na' gulenabe' Le' guné' tu xel-la waca da za xabáa. <sup>17</sup> Le' nézene' ca da dxelaca lazre', na' guzre' benne' ca':



—Che benne' zaj zře'ë tu xezre xelaque' chupa la'a, ne xeledil-le', wabía xi' xezre na', na' che benne' tu lu xu'u xelaque' chupa la'a, cá'anqueze welebía xi' benne' ca'. <sup>18</sup> Cá'anqueze, che da xriwe' ca' xelaca na chupa la'a, ¿ájazra xegá'ana xel-la dxenná bea chee na? Da nigá dxapa' le'e lawe' da dxennéle dxebéaja' be' xriwe' ca', dxuchíneda' xel-la dxenná bea chee Beelzebú da xriwe'. <sup>19</sup> Che caní naca na, ¿nuzra dxunexruj xel-la dxenná bea benne' ca' dxusédele le'e chee xelexebéaje' be' xriwe' ca'? Chee le' na', benne' caníqueze dxululé'ene' dxequé zréajele. <sup>20</sup> Na'a che neda' dxebéaja' be' xriwe' ca', dxuchíneda' xel-la dxenná bea chee Dios, da li xel-la dxenná bea chee Dios ba bla' na ládujla le'e.

<sup>21</sup> 'Che tu benne' wal-la nape' da guchínene' lu wedil-la, ne dxuxéqueze' lizre', na' da zra lizre' napa chi'e na. <sup>22</sup> Che za' xetú benne' nácadxe' wal-la ca le', ne dxucul-le' le', nadxa que'e ca naca da dxuchínene' lu wedil-la, da na' dxuxrén lazre', na' quisie' da gudapa bénnea'.

<sup>23</sup> 'Benne' quebe zue' gácalene' neda', dxedábague' neda', na' benne' quebe dxexequé'e nen neda' dxúsela bénnea'.

#### Be' xriwe' da dxexezrín na lizre na

(Mt. 12.43-45)

<sup>24</sup> Gunná Jesús:

—Gate tu be' xriwe' dxedxuaj na lu xichaj lázrdau tu benne', dxedá na lataj naga nabizre dxexilaj na naga sua na xezí' lazre' na, na' gate quebe dxezrele na, na' dxenná na: "Wexá'a lizra' naga bezá'a." <sup>25</sup> Gate xezrín na, na' le'e na bénnea' naque' ca tu xu'u da nalúa lu'ule na, ne nabá'ate na. <sup>26</sup> Nadxa zexíaj na, zeajxezrín na xegazre be' xriwe' da zaj nácadxa na xriwe' ca le' na, na' ca naca da ca' xelú'u na xelezúa na lu xichaj lázrdau bénnea', na' naga cheajsete' chee benne' na' nácadxa da caléla chee' ca da guca chee' nédxula.

#### Da ba neza chee bénneache da naca na li lazre'

<sup>27</sup> Dxácaté Jesús dxenné' da caní, tu nu'ula ládujla benne' ca' gunné' zizraj:

—Ba neza zrenté naca na chee nu'ula na' guzane' Lue', ne bsegule' Lue'.

<sup>28</sup> Na' gunná Jesús:

—Ba neza zrendxa naca na chee benne' ca' dxelenne' ca da dxenná Dios, ne dxuné' ca dxenná dizra' na'.

#### Dxelenabe' Jesús gune' tu xel-la waca da za xabáa

(Mt. 12.38-42; Mr. 8.12)

<sup>29</sup> Benne' ca' ne zaj zře'ë cuita Jesús, na' Le' guzú lawe' dxuchálajlene' le', gunné':

—Benne' zaj zře'ë lu zra caní zaj naque' benne' wen da caléla, na' dxelenabe' neda' guna' tu xel-la waca da za xabáa, na' québedxa bi xeledé'ene' ca da ble'e Jonás, bénnea' bchálajle' waláz chee Dios. <sup>30</sup> Ca guca chee Jonás, guque' tu da ble'e na benne' gulezré'e lu xezre Nínive, cá'anqueze neda', Benne' Gulje' Bénneache,

gaca' tu da gulé'e na benne' zaj zře'ë lu zra na'a zra.

<sup>31</sup> Lu zra guchi'a Dios, gate Dios guchi'e chee benne' zaj zře'ë lu zra na'a zra, na' chasa nu'ula na' gunná bé'ene' xezr la xu da zua chalá'a naga dxedé gubizra beu' zaga ca', na' gulé'ene' zaj nabaga zria benne' caní, lawe' da nu'ula na' guzé'e zítu'te' chee xenne' ca naca xel-la sina chee Salomón, na' nigá zua tu Benne' nácadxe' blau ca Salomón na'. <sup>32</sup> Lu zra guchi'a Dios, gate Dios guchi'e chee benne' zaj zře'ë lu zra na'a zra, na' xelase' benne' ca' gulezré'e xezre Nínive, na' xululé'ene' zaj nabaga zria benne' caní, lawe' da benne' ca' gulezré'e xezre Nínive belexebí'i lazre' gate Jonás bchálajlene' benne' ca' xrtizra' Dios, na' nigá zua tu Benne' nácadxe' blau ca Jonás na'.

#### Da dxusení' lu xichaj lázrdaudxu

(Mt. 5.15; 6.22-23)

<sup>33</sup> Gunná Jesús:

—Netú benne' che dxugale' xi' chee', quebe guzúe' na tu naga nagache, ne quebe gudusie' na tu xi'ina, san guzúe' na sibe chee xeledé'e benne' ca' xelu'e lu xu'u na'. <sup>34</sup> Xiaj laudxu zaj naca na ca tu xi' da dxusení' na lu xichaj lázrdaudxu. Che xiaj lau' zaj naca na chawe', ca naca xichaj lázrdau xu'u na lení', na' che xiaj lau' quebe zaj naca na chawe', na' xu'u da chul-la lu xichaj lázrdau. <sup>35</sup> Bxue xanne' ca naca xi' da napu' chee quebe xexaca na da chul-la. <sup>36</sup> Che ca naca xichaj lázrdau xu'u na lení', na' quebe bi xu'u da chul-la, na' le'enu' chawe' xúgute' ca dxaca gate tu xi' dxusení' na lizru'.

#### Jesús dxedil-le' benne' xudau' ca'

(Mt. 23.1-36; Mr. 12.38-40; Lc. 20.45-47)

<sup>37</sup> Gate bexuzre bchalaj Jesús, na' tu benne' xudau' fariseo gunné' Le' cheajtawe' xeta lizre'. Na' guxú'u Jesús, gudxé'e dxawe'. <sup>38</sup> Na' benne' fariseo na' bebánene' gate blé'ene' Jesús quebe gudibe ne'e ca da zjácále benne' judío gate dxelawe' xeta. <sup>39</sup> Xránadxu guzre' le':

—Le'e, benne' fariseo, dxíbele cúzrela zriga', ne xé'ena, san lu'ule na, nazrátele ca naca da ba gulanle, ne da caléla da dxunle. <sup>40</sup> Le'e, benne' lázrdau zide', ¿quebe nézele Bénnea' bene' da zua cúzrela bénqueze' da zua lu'ula? <sup>41</sup> Le gunezruj benne' xache' ca' chee da nápale, na' ca nácale xegá'ana chawe'.

<sup>42</sup> 'Edxugúa le'e, benne' fariseo ca'! Le'e dxunézrujle Dios tu cue' chee da chi cue' chee xixru weaj, ne chee binne chee ruda, ne chee xúgute' xixre' cuan, san dxuzúale chalá'ala ca naca xel-la wen xrlátaje, ne xel-la zri'i lazre' chee Dios. Da caní dxal-la' gunle, ne quebe gusanle ca da ba dxunle.

<sup>43</sup> 'Edxugúa le'e, benne' fariseo ca'! Dxaca lázrele gápale lataj blau naga cue'le lu xu'u naga dxezrágale, ne dxaca lázrele xelapa benne' le'e ba lá'ana lawe' xi'a ca'.

<sup>44</sup> 'Edxugúa le'e, benne' dxuluxuzájla'a da nadxixruj bea na, ne le'e, benne' fariseo ca', benne' dxelúne' láweze da xrlátaje! Nácale ca xedxu ba ca' da quebe zaj

nalá, na' benne' ca' dxeledéé' lówela na, ne quebe zaj nézene' da dxululéaje'.

<sup>45</sup> Nadxa gunná tu benne' dxuxuzájle' da nadxixruj bea na, guzre' Jesús:

—Benne' Weséde, gate dxennáu' da nigá, dxenné-teu' ca' cheentu'.

<sup>46</sup> Na' Jesús gunné':

—¡Edxugúa le'e, benne' dxuluxuzájle' da nadxixruj bea na! Dxugúale bénneache xua da quebe xezeuéné', na' le'e netú zrube názele quebe dxaca lázrele gutale na.

<sup>47</sup> ¡Edxugúa le'e! Dxunle lu'a chee ba ca' chee benne' ca' buluchálaje' waláz chee Dios, benne' ca' belute xra xrtáule. <sup>48</sup> Ca da dxunle dxulé'e na nácale tuze nen da belún xra xrtáule ca'. Benne' ca' belutié' le', na' le'e dxunle lu'a chee ba chee' ca'.

<sup>49</sup> Chee le na' gunná Dios lu xel-la sina chee', gunné': "Wasel-la' naga zaj zra' benne' ca' benne' xelenné' waláz chia', ne gubáz chia' ca', na' bal-le' xelútié', na' xebal-le' xeláu zi' xúzrequeze' le'." <sup>50</sup> Dios gusebague' benne' zaj zre' lu zra na'a zra ca naca xel-la gute chee xúguté benne' ca' gulenné' waláz chee', benne' gultatíe' lu na' benne' ca' zaj zre' gate bente' xezr la xu, <sup>51</sup> gate na' tu benne' betíe' Abel, zri'ine Adán, ca bzrinté zra belutié' Zacarías gachaj lówela naga zua lucugu, ne naga zua lataj lázaxa. Ca'an dxapa' le'e, Dios gusebague' benne' zaj zre' lu zra na'a zra xel-la gute chee benne' ca'.

<sup>52</sup> ¡Edxugúa le'e, benne' dxuluxuzájla' da nadxixruj bea na! Xu'u lu na'le ca naca zren xia chee dxa xu'u naga za xel-la sina, san le'e quebe dxu'ule, ne quebe dxuele lataj xelú'u benne' dxelaca lazre' xelu'e na'.

<sup>53</sup> Gate Jesús guzre' benne' ca' da caní, na' benne' ca' dxuluxuzájle' da nadxixruj bea na, ne benne' fariseo ca' belezrá'ale' le', na' gulezú lawe' dxeluné' le' zede, na' da zanté da buluchébe' le', <sup>54</sup> na' buluzure' che bi nna Jesús chee xezeéquene' xelagu zrie' le'.

**Jesús dxenné' ca naca chee da naca xrlátaje lóweze**

**12** Ca lu zra na' belezraga zane gaxúa benne' ca', na' dxululéajte' ljwezre'. Na' guzú lau Jesús dxé'e benne' ca' dxusédene':

—Le guxúe xanne' cuínale ca naca cua zichaj chee xeta xtila chee benne' xudau' fariseo ca', da naca na da dxulé'e na lóweze da xrlátaje chee benne' ca'. <sup>2</sup> Quebe bi de da dxundxu bagácheze da quebe gulé'e lawe', ne quebe bi de da nagache da quebe nu neze. <sup>3</sup> Chee le na', xúguté da gunle lu da chul-la, xululé'e lawe' te zra, na' da gunle bagácheze lu xu'u naga naxézxujte dxa xu'u, wénqueze na lau xúguté bénneache.

**Nu dxal-la' zrébedxu**

(Mt. 10.28-31)

<sup>4</sup> Na' gunná Jesús:

—Dxapa' le'e, bi ljwézra'du ca', quebe dxal-la' zrébele benne' dxelute belá' dxen chee bénneache, san gate te na', québedxa xezeéquene' bi xeluné'. <sup>5</sup> Na'a dxapa' le'e nu dxal-la' zrébele. Le zrebe Bénnea' gate te xe-

qué'e xel-la nabán chee bénneache, nape' xel-la dxen-na bea gudé'e bénneache ca' lataj ba xa'. Awe', le' le zrebe.

<sup>6</sup> ¿Quebe ta'u gazxu' bxínnedau' lawe' chupa dumí lásedau'? Dios quebe dxal-la lazre' netú bxínnedu ca'. <sup>7</sup> Cá'anqueze xicha xíchajle le'e xúguté na zaj nababa na lau Dios. Chee le na' quebe zrébele. Zácadxale le'e ca be zanté bxínnedu ca'.

**Benne' dxelexechebe' zaj naque' chee Jesús**

(Mt. 10.32-33; 12.32; 10.19-20)

<sup>8</sup> Na' gunná Jesús:

—Dxapa' le'e, xúguté benne' xelexechebe' zaj naque' chia' neda' lau bénneache, cá'anqueze neda', Benne' Gulje' Bénneache, xechébequeza' chee benne' ca' lau gubáz chee xabáa ca' chee Dios, <sup>9</sup> san benne' ca' quebe xelexechebe' chia' lau bénneache, néda'queza' quebe xechéba' chee' lau gubáz chee xabáa ca' chee Dios.

<sup>10</sup> 'Che nu benne' bi nnie' chia' neda', Benne' Gulje' Bénneache, gunite lau Dios chee', na' benne' nnie' chee Be' Lázaxa, quebe gunite lau Dios chee bénnea'.

<sup>11</sup> 'Gate xelexé'e le'e lau benne' xíchajle chee xudau', u lau benne' dxuchi'e da dxaca, u lau benne' xu'u lawe', quebe cue'le gunne xue bi xechébele u bi nnale, <sup>12</sup> lawe' da gate zrin zra dxal-la' nnele, Be' Lázaxa gulé'ene' le'e da dxal-la' nnele.

**Da stébe chee xel-la gunní'a**

<sup>13</sup> Tu benne' ládujla benne' ca' guzre' Jesús:

—Benne' Weséde, guzre bi bicha' gúnnabe' chia' da xexal-la' chee da guca chee xrantu'.

<sup>14</sup> Jesús guzre'-be':

—Benne', ¿zua nu bzua neda' ca benne' dxuchi'e da dxaca u ca benne' le'e xezr la xu?

<sup>15</sup> Nadxa guzre' benne' ca':

—¡Le na' xque! ¡Le guxúe xanne' cuínale chee quebe gúcúdele! Xel-la nabán chee nu benne' quebe zua na lu da nápalé'e.

<sup>16</sup> Nadxa bchalaj Jesús da dxulé'e nigá, gunné':

—Guzúa tu benne' gunní'a, na' xezr la xu chee' bnézrujle' na. <sup>17</sup> Na' benne' gunní'a na' guzú lawe' dxenné': ¿Bizra guna'? Québedxa de naga guzrá'a lina chia' nigá. <sup>18</sup> Nadxa dxenné': "¡Ba nezda' ca da guna'! Guchínnaja' naga dxezrá' lina chia', chee guna' da zrí'adxa, na' guzrá'a na' ca naca lina chia' nigá, ne ca naca da ba napa'. <sup>19</sup> Nadxa nníqueza' néda'queza': Ba déle'e chiu' da zanté chee zane' iza. Bezí' lazre'. Gúe'e gudagu, ne gubé." <sup>20</sup> Na' Dios guzre' bénnea': "Lue', benne' zide', lu zre' na'a zre' gatiu', na' da nuzrá' chawu', quebe nézenu' nu chee gaca na." <sup>21</sup> Ca'an dxa-ca chee benne' dxutupe' xel-la gunní'a da gaca cheéqueze'. Naque' ca tu benne' xache' lau Dios.

**Dios dxuxé' bi chee' ca'**

(Mt. 6.25-34)

<sup>22</sup> Ca gudé na', Jesús guzre' benne' ca' dxusédene':

—Dxapa' le'e, quebe cue'le gunne xue ca naca da gágule chee gaca banle, ne ca naca zra lánale da gácule. <sup>23</sup> Xel-la nabán chee zácadxa na ca da gágule, na' bēl-la' dxen chee zácadxa na ca zra lánale. <sup>24</sup> Le nna'xque ca dxaca chee bxinnedu ca'. Quebe dxeláza-ba', ne quebe dxelélápaba', ne quebe zaj zua naga dxuluxzraba', na' Diósqueze' dxuxi'aj dxugawe'-ba'. Zácadxale le'e ca bxinnedu ca'. <sup>25</sup> ¿Núlale le'e séquele gusetunna cuínale xetú ben lawe' da dxebé'le'ele gunne xue? <sup>26</sup> Che quebe gaca gunle tu da naca da dauze, ¿bizr chee na' dxebe'le gunne xue chee da ca' xezícala?

<sup>27</sup> 'Le nna'xque ca dxelegula xiaj xrtandu ca'. Quebe dxelún na zrin, ne quebe dxelún na du ladxe', na' dxapa' le'e, wenná bea Salomón quebe gucu'e' da xrtandxa ca tu xiajdu caní. <sup>28</sup> Che Dios dxugacu'e' caní xíxre'du ca', da zaj zua na'a le'e xixre', na' wxre xelexe na, ¿quegá gundxe' chee le'e, benne' dxeléajle'e láteze chia'? <sup>29</sup> Chee le' na', quebe cue'le gunne xue ca naca da gágule, u ca naca da xí'ajle, ne quebe súale stēbe. <sup>30</sup> Ca' naca na, lawe' da ca naca benne' ca' zaj zre'e xezr la xu dxelexilaje' ca naca da caní, san le'e, zua Xrale xabáa ba nézene' nachínnele ca naca da caní. <sup>31</sup> Le cue' gunne xue nna bea Dios lu xichaj lázrdaule, na' sile ca naca da caní.

#### Da gunní'a da dxegú'u cháwedxu xabáa (Mt. 6.19-21)

<sup>32</sup> Na' gunná Jesús:

—Quebe zrébele, zríla'du chia', bábaze nácale le'e. Xrale Dios dxezaca ba lazre' gunne' chee lataj naga dxenná be'e. <sup>33</sup> Le gute da nácale, na' le gunezruj benne' xache' ca'. Ca'an gaca, guzrale na naga quebe te chee na, na' gápale da gunní'a xabáa da quebe xedú, naga quebe gaca chu'u gubán, ne quebe gaca xelú'u béadu ca' xuluteba' na. <sup>34</sup> Naga nuzúale xel-la gunní'a chee, na' súaqueze lázrdaule.

#### Dxal-la' gupá'a cuínadxu

<sup>35</sup> Na' gunná Jesús:

—Le gupá'a cuínale, ne le gugala xi' chee. <sup>36</sup> Le gaca ca benne' wēn zrin ca' dxelebeze' xranē' xezrine' lu laní chee wechaga na', na' nne' dxu'a dxa xu'u na'. <sup>37</sup> Ba neza zrentē naca na chee benne' wēn zrin ca', benne' ca' xedajxraca xranē' le' dxelenaze' gate xezrine'. Da li dxapa' le'e, xranē' na' cueche' benne' ca' xelawe', na' guzúa cuine' chee que'e da xelagu benne' wēn zrin ca'. <sup>38</sup> Lácala xezrine' dxela u dxaní'sise', che xedajxraque' le' dxelennaze', ba neza naca na chee benne' wēn zrin ca'. <sup>39</sup> Dxal-la' nézele da nigá, che xrane xu'u gunézene' bi zra zrin gubán, na' quebe gasie' chee quebe gu'e lataj quíduje' lizre' chee cuane' da nape'. <sup>40</sup> Cá'anqueze le'e, le sua ban lazre', lawe' da gate québela nézele, xelá'a neda', Benne' Gulje' Bénneache.

#### Benne' wēn zrin li lazre', ne benne' wēn zrin quebe naque' li lazre' (Mt. 24.45-51)

<sup>41</sup> Nadxa Pedro bchebe' Jesús:

—Xran, ¿bchálaju' da dxuléle nigá chee nétu'ze, che chee xúgute benne'?

<sup>42</sup> Xránadxu gunné':

—¿Nuzra naca wēn zrin li lazre', bēnea' dxucá'ana xranē' lu ne'e benne' zaj zra' lizre' chee gunézruje' da xelagu benne' ca' gate zrin zra chee na? <sup>43</sup> Ba neza naca na chee benne' wēn zrin na', gate xezrín xranē', xedajxraque' le' dxunē' ca da nabague'. <sup>44</sup> Da li dxapa' le'e, xranē' gucá'ane' lu ne'e xúgute da nape'. <sup>45</sup> Che benne' wēn zrin na' dxéquene' wazré xranē' xelé'e, ne su lawe' gusaca zī'e benne' wēn zrin xezica ca', ne nu'ula wēn zrin ca', ne su lawe' xi'aj gawe', ne súzrene', <sup>46</sup> nadxa xranē' xelé'e lu zra quebe dxebeze' le', ne lu zra quebe nézene', na' gusaca zī'le'e le', ne chugue' chee' saque' ca xelezaca benne' ca' quebe zaj naque' chee Dios.

<sup>47</sup> 'Benne' wēn zrin na' nézene' ca da dxaca lazre' xranē' san quebe nucueze', ne quebe dxuzú'e' dizra', benne' nigá gudé'e le' ba xa'. <sup>48</sup> Benne' wēn zrin na' quebe nézene' da na', ne dxunē' da dxusebaga na le' zria, benne' nigá té'e láteze xel-la zi'. Che tu benne' dx-ezī'le'e da dxunezruj Dios le', Dios wanábalé'e le', na' bēnea' Dios nuxrén lazre' le' da zrentē, Dios wanné xúle'e'ne' le'.

#### Dxelaca benne' chupa la'a ne chee Jesús (Mt. 10.34-36)

<sup>49</sup> Na' gunná Jesús:

—Neda' bla'a guzrena' xi' lu xezr la xu nigá, na' la guzreda' ba dxala xi' na'. <sup>50</sup> Dxal-la' chu'a lu xel-la gute ca dxu'u tu benne' lu nisa gate dxedxú'e' nisa, na' tēle'a xel-la zi' cadxa gácatequeze na. <sup>51</sup> ¿Dxéquele le'e za' neda' cu'a xel-la dxebeza zri lazre' lu xezr la xu nigá? Dxapa' le'e: Cabí. Za'a chee guna' benne' chupa la'a. <sup>52</sup> Na'a su lau, gazxu' benne' zaj zre'e tu xu'u xelaque' chupa la'a. Chunne' xeledábague' chupe', na' chupe' xeledábague' chunne'. <sup>53</sup> Xra tu bi biu tábague' bi biu chee', na' bi biu na' tábagabe' xrabe'. Xrna tu bi nu'ula tábague' bi nu'ula chee', na' bi nu'ula na' tábagabe' xrnabe'. Tau zrí'ine tu nu'ula tábague' zru'a lizre', na' zru'a lizre' na' tábague' tau zrí'ine'.

#### Da dxululé'e na ca da gaca lu zra na'a zra (Mt. 16.1-4; Mr. 8.11-13)

<sup>54</sup> Na' Jesús guzre' benne' ca':

—Gate le'e dxelé'ele da' beuj naga dxebí'a gubizra, na' dxennale, waca xiuj, ne ca' dxaca. <sup>55</sup> Gate dxaca be' za na chalá'a naga dxedé gubizra beu' zaga ca', na' dxennale waca da la, ne dxaca ca'. <sup>56</sup> Le'e, benne' dxunle láweze da xrlátaje. Le'e nézele nnale ca da gaca zran xabáa, ne lu xezr la xu nigá, san quebe dxézéquele xuzájla'ale da dxululé'e na ca gaca chee lu zra na'a zra.

Dxal-la' xezúadxu lu xel-la dxebeza zri lazre' nen  
benne' dxedábague' dxi'u  
(Mt. 5.25-26)

<sup>57</sup> Na' gunná Jesús:

—¿Bizr chee na' quebe dxeque be'ele da naca xrlátaje? <sup>58</sup> Che nu benne' dxaca lazre' guzúe' lue' lau benne' dxuchi'e, na' gate chéajlenu' le' chee zrinle lau bènea', bèn ba xen xezú' lu xel-la dxebeza zri lazre' nen bènea' dxácatę xu'ule neza, chee quebe che'e lue' lau bènea', na' bènea' gudęe' lue' lu na' benne' gusęzx-uje' lue' lizre xia. <sup>59</sup> Dxapa' lue' quebe xedxúaju' na' cadxa quízruju' ca da dxebagu'.

Dxal-la' xelexebí'i lazre' bèneache

**13** Ca lu zra na' belezrín bal-la benne' lau Jesús, na' buluzenne' Le' ca bèn Pilato, beńie' bal-la benne' Galilea, na' bchague' dxen chee benne' ca' nen dxen chee bę xixre', bea ca' ba belutie' chee xuluzrįe' dxen chee na lau Dios. <sup>2</sup> Na' Jesús guzre' le':

—¿Dxęquele le'e canį gulezaca benne' ca' lawe' da zaj nácadęe' benne' dul-la ca benne' ca' xezįcala zaj zre'e xęzre ca' zaj nababa Galilea? <sup>3</sup> Dxapa' le'e: Cabį, na' che quebe xebí'i lázrele le'e, xúgutęle le'e cuía xile.

<sup>4</sup> ¿Dxęquele le'e benne' chinu chunna ca' gulatie' gate guzrįa cha xu'u sibe le' da nazį le na Siloę zaj nabą-gadęe' dul-la ca xezįcala benne' ca' zaj zre'e xęzre Jerusalęn? <sup>5</sup> Dxapa' le'e: Cabį, na' che le'e quebe xebí'i lázrele, cá'aqueze le'e wabía xile.

Xaga higo da quebe dxebía na da zixre

<sup>6</sup> Nadxa Jesús bchálajlęe' benne' ca' da dxulęe nigá, dxennę':

—Tu benne' zua tu xaga higo chee' zua na lu xęzr la xu chee', na' xejnę'e na che zrįa na, na' quebe bi bezrélęe'. <sup>7</sup> Nadxa guzre' benne' dxun zrin lu xęzr la xu chee': "Gunná'xque, chun ízatę ba bida' dxenná'a che zrįa xaga nigá, ne quebe bi bezréleda'. ¡Guchugu na! ¿Bizr chee na' nulán na xęzr la xu nigá?" <sup>8</sup> Bènea' dxun zrin chee xęzr la xu na' bechebe': "Xran, bca'ana na xetú iza na'a. Guzúljdx'a' zran na, ne cua'a na bebe. <sup>9</sup> Nen da na', gúnnałja na, san che cabį, na' chugu' na."

Jesús dxexunę' tu nu'ula nalegu cuzre'

<sup>10</sup> Gate naca zra dxulupá'ana judío ca', na' zua Jesús tu lu xu'u naga dxelezraga judío ca' dxusędenę' benne' ca', <sup>11</sup> na' zua na' tu nu'ula xu'e wę' ba guca chinu chunna iza. Tu be' xriwe' nun na le' cuzru legu, na' quebe dxácaquezę' xelįe'. <sup>12</sup> Gate ble'e Jesús le', na' gunnę' le', ne guzre' le':

—Nu'ula, ba bexacu' chee xızrawę' chiu'.

<sup>13</sup> Nadxa guxrúa nę'e nu'ula na', na' la ná'queze nu'ula na' belite', na' guzú lawę' dxue lá'ane' Dios.

<sup>14</sup> Na' benne' xíčhaję chee xu'u na' bzre'e lawe' da bexún Jesús nu'ula na' lu zra dxulupá'ane', na' guzre' benne' zaj zre'e na':

—Xrupa zra dxal-la' gundxu zrin. Lu zra ca' waca xįdale xexácale, quegá lu zra dxupá'anadxu.

<sup>15</sup> Nadxa Xránadxu bechebe':

—Le'e, benne' dxelún láweze da xrlátaje, ¿quebe dxesęzrele le'e bęzre cheęle u burro cheęle lu zra dxupá'anadxu chjua'le-ba' xelę'ajba' nisa? <sup>16</sup> Nú'ula nigá naque' xrtia Abraham, na' da xriwe' nuchęaj na le' lu xızrawę' nigá ba zeaj chinu chunna iza, na' ¿quebe dxal-la' xebęaja' xızrawę' da nuchęaj na le' lu zra dxupá'anadxu?

<sup>17</sup> Gate gunná Jesús da nigá, xúgutę benne' dxeledábague' Le' belexeduęene', na' xúgutę benne' xezįcadxa gulebene' gate beleleęene' ca naca da zrente da dxun Jesús.

Da dxulęe na ca naca chee binnedau' chee mostaza  
(Mt. 13.31-32; Mr. 4.30-32)

<sup>18</sup> Nadxa gunná Jesús:

—¿Aja naca xel-la dxenná bea chee Dios, ne bi gutil-le lębede' na? <sup>19</sup> Naca na ca tu binnedau' chee mostaza, tu benne' dxazę' na lu xęzr la xu chee', na' dxegula na, ne dxácatę na ca tu xaga zren, na' bxinnedu ca' dxuluzrįaba' xrú'uneba' lu zruze na ca'.

Da dxulęe na ca naca chee cua zichaj chee xeta xtila  
(Mt. 13.33)

<sup>20</sup> Cá'aqueze gunná Jesús:

—¿Bizra gutil-le lębede' xel-la dxenná bea chee Dios? <sup>21</sup> Naca na ca cua zichaj chee xeta xtila tu nu'ula dxuchague' na chunna xaga de xezaj, na' dxuchazra na ca naca cua na'.

Dxa xu'u lechide'  
(Mt. 7.13-14, 21-23)

<sup>22</sup> Dxácatę xu'u Jesús neza zexįaję xęzre Jerusalęn, dxusędenę' bèneache lu xęzre ca', ne xęzredu ca' na-ga dxedęe'. <sup>23</sup> Na' bchebe tu benne' Le':

—Xran, ¿bábaze benne' xelęlą?

Bechebe Jesús:

<sup>24</sup> —Le gun ba xuzre chu'ule dxa xu'u lechide', lawe' da dxapa' le'e, benne' zan xelaca lazre' xelu'e na', na' quebe xelezęquenę'. <sup>25</sup> Ca te na' chasa xrane xu'u, ne gusęzxuje' dxa xu'u, na' le'e zrale chalę'ajla nnele dxu'a dxa xu'u na', nnale: "Xran, gusalaj chų'untu'." Na' le' xechębe': "Quebe nezda' ga benne' le'e." <sup>26</sup> Nadxa su láuqueze le'e nnale: "Gü'e gudágulęntu' lue', na' lue' bsędenu' lu neza cheęntu' ca'." <sup>27</sup> Le' xechębe': "Dxapa' le'e, quebe nezda' ga benne' le'e. Le cuasa cuita' neda', xúgutęle le'e dxunle da calęla." <sup>28</sup> Na' cuęzrele, ne xagu xá'atę lázxale gate lé'ele Abraham, ne Isaac, ne Jacob, ne xúgutę benne' ca' gulennę' waláz chee Dios, zaj zuę' naga dxenná bea Dios, na' le'e zrale chalę'ajla.

<sup>29</sup> Welęlą' benne' zaj zre'e dapa saca chee xęzr la xu nigá, na' xelębęe' xelawe' naga dxenná bea Dios.

<sup>30</sup> Nadxa bal-la benne' zaj naque' bzębedxa na'a xelaque' benne' blau, na' benne' zaj naque' blau na'a xelaque' bzębedxa.

## Dxebezre Jesús chee xezre Jerusalén

(Mt. 23.37-39)

<sup>31</sup> Lu zra ná'queze, belezrín lau Jesús bal-la benne' fariseo ca', na' gulé'le Lē':

—Bezá' nigá, lawe' da dxaca lazre' Herodes gutie' Lue'.

<sup>32</sup> Jesús bechebe':

—Le chjaca cheajguézrele benne' wilaj lazre' calela na': "Na'a, ne wxre xebéaja' be' xriwe' ca' lu xichaj lázrdau benne' ca', ne xexuna' benne' we' ca', na' wizraj sueda'." <sup>33</sup> Dxun na ba xen chéajlęna' neza chia' na'a, ne wxre, ne wizraj, lawe' da quebe gaca gate tu benne' dxenné' waláz chee Dios che quebe xelute benne' Jerusalén lē'.

<sup>34</sup> "Jerusalén, Jerusalén, le'e na' dxútele benne' dxe-lenné' waláz chee Dios, ne dxuzríale xiaj benne' gubáz ca' dxešel-la Dios. Zane' lasa guca lazra' gutupa' bi cheęle ca' ca dxun bedxuj, dxutúpaba' bédxujdu ca' zran xrílaba', san quebe guca lázrele. <sup>35</sup> ¡Le nna'xque, na'a! Lízrele le'e xegá'ana na cá'aze. Dxapa' le'e québedxa xelé'ele neda' ca zrindxa zra nnaale: ¡Lá'azxa naca Bénnea' zęęle lu La Xránadxu!"

Jesús dxexunę' tu benne' de xi' ca naca beł-la' dxen chee'

**14** Tu zra dxulupá'ana benne' judío ca' guxíaj Jesús zeajtawę' lize tu benne' blau chee benne' fariseo ca', na' benne' fariseo ca' dxuluzuzre' Jesús bi gunę'. <sup>2</sup> Zúaqueze lau Jesús tu benne' de xi' ca naca beł-la' dxen chee'. <sup>3</sup> Nadxa Jesús bchebe' benne' ca' dxuluxuzájle'ę da nadxixruj bea na, ne benne' fariseo ca', gunnę':

—¿Waca nu benne' xexunę' benne' we' lu zra dxupá'anadxu, che cabi'?

<sup>4</sup> Benne' ca' gulezúe' zrize. Nadxa Jesús guquęe' benne' we' na', ne bexunę' lę', na' guzre' lę' xexíaje'.

<sup>5</sup> Nadxa guzre' benne' fariseo ca':

—¿Núlale le'e, che bezre cheęle u bia cheęle bíxreba' tu lu xędxu, quebe xebéajle-ba' zra ná'queze lálcala naca zra dxupá'anadxu?

<sup>6</sup> Quebe bi guca xelexechebe'.

Benne' zaj zre'ę laní chee wechaga na'

<sup>7</sup> Gate ble'e Jesús ca dxelún benne' ca', dxelebé'ę lataj blaúdxu ga dxelawe', na' bchálaje' da dxulé'e na, dxenné':

<sup>8</sup> —Gate tu benne' dxenné' lue' laní chee wechaga na', quebe cue'u lataj blau, lawe' da che wazá tu benne' nácadxę' blau ca lue', <sup>9</sup> na' bénnea' gunnę' dxúpatęle xidę' xę'e lue': "Bnezruj lataj nigá benne' nigá." Nadxa gun na ba xen xexíaju' lataj bzébedxa lu xel-la stu'. <sup>10</sup> Na'a, gate nu benne' nne' lue', gudxé'e lataj bzébedxa, chee gate za bénnea' gunnę' lue', wanné': "Bi ljwezra', gudé nigala naga nácadxu blau." Ca'an gaca, xegá'anu' szren lau benne' ca' zaj zre'ę dx-elágulęne' lue'. <sup>11</sup> Benne' dxucá'ana szren cuine',

wexéxrujla bénnea', na' benne' dxucá'ana baxache' cuine' wegá'ana szrénqueze'.

<sup>12</sup> Nadxa Jesús guzre' benne' na' gunné' Lę':

—Gate gunézruju' tu zruue u tu xrche' quebe nneu' bi ljwezru' ca', ne bi bichu' ca', ne xrtia ljwezru', ne benne' walíZR chiu' ca' zaj napę' da gunní'a, lawe' da benne' caní welennéqueze' lue', na' zrué'equeznú' da xelexexunne' chiu'. <sup>13</sup> Gate dxunu' tu laní, gunné' benne' xache' ca', ne benne' zaj nadxugu ni'a ne'ę, ne benne' zrinnaj ca', ne benne' la chul-la ca'. <sup>14</sup> Caní gaca tu da ba neza chiu', lawe' da benne' caní quebe gaca xelexexunne' ca' chiu', na' wazrué'enu' lazrju' gate xelexebán benne' xrlátaje ca'.

Da dxulé'e na ca naca chee tu xrche' zren

<sup>15</sup> Gate ben tu benne' dxágulę Lę' da na', na' guzre' Jesús:

—Ba neza zrentę naca na chee benne' gawę' xeta na-ga dxenná bea Dios.

<sup>16</sup> Jesús guzre' lę':

—Tu benne' gulu'ę tu xrche' zren, na' gunné' benne' zan. <sup>17</sup> Ca bzrin zra xelawe' xrche' na', gusél-lę' wen zrin chee' chee cheajezre' benne' ca' gunné': "Le da, lawe' da ba nusení'a da gágudxu." <sup>18</sup> Xúgutę' gulezú lawę' dxelenabe' gu'ę lę' lataj quebe xelidę'. Benne' nedxu gunné': "Za bezítea' tu cue' xęzr la xu chia', na' dxal-la' cheajnná'a na. Dxata' xueda' lue' si zrenu' chia'." <sup>19</sup> Xetúe' gunné': "Za bezítea' gazxu' cue' beZR chia', na' guxúa' aja xelunba'. Dxata' xueda' lue' si zrenu' chia'." <sup>20</sup> Na' xetúe' gunné': "Za bchágate na'a, na' quebe gaca xida'." <sup>21</sup> Gate bezrín benne' wen zrin na', guzre' xranę' ca naca da nigá. Nadxa bzra'a xranę' na', na' guzre' wen zrin na': "Guxíaj na'a la neza ca', ne neza chee xezre nigá, na' xeaxrí' xúgutę benne' xache' ca', ne benne' zaj nadxugu ni'a ne'ę, ne benne' zrinnaj ca', ne benne' la chul-la ca'." <sup>22</sup> Ca gudé na' gunná benne' wen zrin na': "Xran, ba beņa' ca gunnáu', na' ne dędxu lataj." <sup>23</sup> Nadxa gunná xranę' na': "Guxíaj na'a la neza ca', ne neza lásedu ca', na' xeaxjén ba xen xelélé'ę, chee cha' lizra' nigá. <sup>24</sup> Dxapa' le'e, netú benne' ca' gunnéa' nédxula quebe xelawe' xrche' chia'."

Xel-la zi' da te benne' chéajlęne' Jesús

<sup>25</sup> Benne' zan zjácálęne' Jesús, na' Lę' bexéchaje', na' guzre' benne' ca':

<sup>26</sup> —Che nu benne' zęę naga zua', ne quebe guzúe' chalá'ala xre', ne xrne'ę, ne zru'ule', ne zrí'ine' ca', ne bi biche' ca', ne bi zanę' ca', ne xel-la nabán chee', quebe gaca gaque' neda' tuze. <sup>27</sup> Benne' quebe sál'lene' neda' lálcala dxal-la' te'ę xaga béguaj, quebe gaca gaque' neda' tuze. <sup>28</sup> Che tu benne' ládujla le'e dxaca lazre' gunę' tu xu'u sibe, ¿quebe cue'ę nedxu gunę' xrbaba chee' che wazúene' xuzrte' na? <sup>29</sup> Che quebe gunę' caní, ne che cueche' lane na, na' ca te na' quebe suene' xuzre' na, na' xúgutę benne' xelélé'ene' na xelézú lawę' xelún lę' chee bénnea', <sup>30</sup> na' xelenné': "Benne' nigá guzú lawę' dxunę' tu xu'u. Quebe guque' gunę' ca naca."

<sup>31</sup> Che tu benne' wenná bea dxal-la' cheajtíl-laləŋe' xetú benne' wenná bea, ¿quebe cue'e gunə' xrbaba chee' che wazúenə' nen tu gaxúa gaxúa benne' dxjaque' wedil-la cheajtíl-laləŋe' bənnea' za' nen chupa gaxúa gaxúa benne' dxjaque' wedil-la? <sup>32</sup> Che quebe séquenə', gate benne' wenná bea na' xetú ne zə'e zitu', na' sel-le' gubáz chee' ca' xelenabe' gata' xel-la dxebeza zri lazre'. <sup>33</sup> Ca' naca na, núteteze benne' ládujla le'e, che quebe gusanə' ca naca da nape', quebe gaca gaque' neda' tuze.

**Zede' da québedxa naca na sna'a**  
(Mt. 5.13; Mr. 9.50)

<sup>34</sup> Na' gunná Jesús:  
—Zede' naca na da chawe', san che québedxa naca na sna'a, ¿ájazra guchínedxu na? <sup>35</sup> Quebe gaca guchínedxu na, quegá chee' gucá'ana cháwedxu xəzr la xu, ne quegá chee' guchíxredxu bəbe, san dxal-la' chú'unadxu na. Benne' ca' zaj zua nague', dxal-la' xelenne'.

**Ca guca chee' tu zri'ine guníteba'**  
(Mt. 18.10-14)

**15** Benne' zantə benne' wechizruj waláz chee' Roma, ne benne' dul-la ca' gulebigue' naga zua Jesús chee' xelennə' da dxuchálaje'. <sup>2</sup> Chee' le' na' benne' fariseo ca', ne benne' dxuluxuzájle'e da nadxixruj bea na gulezí tizre' Jesús, gulenné':

—Benne' nigá dxunə' tu zren benne' dul-la ca', ne dxáguləŋe' le'.

<sup>3</sup> Nadxa bchalaj Jesús da dxulé'e na, gunné':

<sup>4</sup> —Nu benne' ládujla le'e, che nape' tu gaxúa zri'la, na' nite tuba', ¿quebe gucá'ane' xetápalalaj chənnu zri-la' ca', bea ca' zaj zra'ba' le'e xixre', na' se'e cheajdílaje' bea na' guníteba' cadxa xezrelne'-ba'? <sup>5</sup> Na' gate xezrelne'-ba', benə', na' xequé'e-ba' xexrúe'-ba' xə'a xəŋe'. <sup>6</sup> Na' ca xezrine' lizre', gutupe' ljwezre' ca', ne benne' walizre chee' ca'. Na' xə'e le': "Le be nen neda', lawe' da bezrelda' zri'la' chia' guníteba'."

<sup>7</sup> Na' gunná Jesús, dxə'e benne' ca':

—Cá'anqueze zúale'edxa xel-la dxebé xabáa gate tu benne' dul-la dxexebí'i lazre', quézcala chee' tápalalaj chənnu benne' xrlátaje ca' dxeléquene' quebe dxun na ba xen xelexebí'i lazre'.

**Ca guca chee' tu dumí da gunite**

<sup>8</sup> Nadxa Jesús bchálaje' xetú da dxulé'e na, dxə'e benne' ca':

—Tu nu'ula nape' chi dumí zaca, na' che nite tu na, nadxa guzúe' xi' chee' chee' gusaní na lu xu'u chee'. Nadxa su lawe' gulúe' lu xu'u chee', xexílaje' bínnalu ca xezrelne' dumí chee' da gunite na. <sup>9</sup> Na' ca xezrelne' dumí na', gutupe' nu'ula ljwezre' ca', ne nu'ula walíZR chee' ca', na' xə'e le': "Le be nen neda', lawe' da bache bezrelda' dumí chia' da gunite na."

<sup>10</sup> Na' gunná Jesús, dxə'e benne' ca':

—Cá'anqueze dxebé gubáz chee' xabáa ca' chee' Dios gate tu benne' dul-la dxexebí'i lazre'.

**Ca guca chee' zri'ine tu benne' gunítebe'**

<sup>11</sup> Nadxa Jesús bchálaje' xetú da dxulé'e na, dxə'e le':  
—Tu benne' zaj zra' chupa bi chee'. <sup>12</sup> Na' bi cuide' chee' gúzrebe' xrabe': "Xrae, bəna chia' da dxal-la' si'a chee' da naca chiu'." Nadxa xrabe' benə' gachaj da bnézruje' cha chee'be' tube', ne xetube'. <sup>13</sup> Ca gudé tu chupa zra, bi cuide' chee' bənnea' btúpabe' xúgutə da naca chee'be', na' guzabe' zitu', na' bzrinbe' xetú xəzr la xu. Na' bən dítajbe' dumí chee'be' lu da caləla da bəne'. <sup>14</sup> Na' ca gudache xúgutə dumí chee'be', bzrin tu gubina' lu xəzr la xu na', na' ləbe' gudunbe'. <sup>15</sup> Nadxa guzabe' xeajtíljabe' zrin gunbe' chee' tu benne' lu xəzr la xu na'. Benne' na' gusél-le'-be' le'e xixre' chee' chee' cheajxúbe' cuche chee' ca'. <sup>16</sup> Guca lázrebe' gágube' da caləla da dxelagu cuche ca'. Netú benne' quebe bi bnézruje' da gágube'. <sup>17</sup> Nadxa xeajsá lázrebe', dxennabe': "Benne' zantə, benne' wəŋ zrin zaj zre'e lizre xra', na' déle'e da dxelawə'. Neda' dxáte-queza' xel-la dxedún. <sup>18</sup> Webí'iza' xexá'a naga zua xra', na' xapa' le': Xrae, bəna' dul-la lau Dios, ne lau lue'. <sup>19</sup> Québedxa naca chia' gaca' zri'inu'. Bzua neda' ca tu benne' wəŋ zrin chiu'." <sup>20</sup> Nadxa begú'ube' neza, bezrinbe' lizre xrabe'.

'Tu chi na', ble'e xrabe' ləbe' ba zezabe', na' bexache lazre'-be'. Na' guzá chégüe' xeajchague'-be', na' bnide'-be', ne bnúpete'-be'. <sup>21</sup> Nadxa gunabe': "Xrae, bəna' dul-la lau Dios, ne lau lue'. Québedxa naca chia' gaca' zri'inu'." <sup>22</sup> Na' gunná xrabe', dxə'e benne' wəŋ zrin chee' ca': "Le cueaj zra lana' da zaca, ne le gugacu-be'. Le cu'u tu da naca oro zrube nabe', ne le cu'u xel-la ní'abe'. <sup>23</sup> Le cheajzrí' tu bəzre bə dxanne, na' gútele-ba'. Gágudxu, ne gundxu laní, <sup>24</sup> lawe' da bi chia' nigá guca chee'be' ca tu benne' ba gute, na' bebanbe'. Gunítebe', na' ba bezrágadxu-be'." Na' gulezú lawe' dxelunə' laní.

<sup>25</sup> 'Dxácate' na', zrí'ine' bi waca zúabe' le'e xixre' dxunbe' zrin. Na' chizrela' ca bezrinbe' gagu cuita xu'u lizre xrabe', na' benbe' dxaca wil-la, ne dxaca wexá'a. <sup>26</sup> Nadxa gunnébe' tu bi wəŋ zrin na', dxə'e'be' ləbe': "¿Bi dxaca nigá?" <sup>27</sup> Bi wəŋ zrin nigá cúnnabe': "Ba belá' bi bichu', na' xrau' gunná bé'ene' nu gute tu bəzre bə dxanne, lawe' da belabe' zúabe' zri'a chawe'." <sup>28</sup> Bzra'a bi waca na', na' quebe guca lázrebe' xexú'ube'. Nadxa bdxuaj xrabe', ne guta' xuenə' ləbe' xexú'ube'. <sup>29</sup> Na' cúnnabe', dxə'e'be' xrabe': "Nézqueznu' zane' iza ba bəna' zrin chiu', ne cabata' bcha'a lue', na' ne tu lasa quebe ne gunnu' chia' tu chíbudau' chee' guna' tu laní nen ljwezra' ca'. <sup>30</sup> Na'a belá' bi chiu' nigá, bi ba bən dítajbe' dumí chiu', guzúale'be' nu'ula dxeledá zraga ca', na' bəte lizu' bəzre bə dxanne nə chee' ləbe'." <sup>31</sup> Nadxa gunná xrabe', dxə'e'-be': "Zri'ina', lue' tu zúalezquezu' nen neda', na' xúgutə da də chia' naca na chiu'. <sup>32</sup> Na'a dxun na ba xen gundxu laní, ne bedxu, lawe' da bi bichu' gúcabe' ca tu benne' ba gute, ne naca banbe'. Gunítebe', na' ba bezrágadxu-be'."

## Benne' wən zrin blau quebe naque' xrlátaje

**16** Nadxa Jesús guzre' benne' ca' dxusédene': —Guzúa tu benne' gunnía, na' zua tu benne' wən zrin blau chee'. Na' bal-la benne' xeajleguezre' le' benne' wən zrin blau na' dxun dítajē da dē chee' xranē'. <sup>2</sup> Nadxa xranē' gunné' le', ne guzre' le': "¿Bizra da nigá dxelenné' chiu'? Blué'e neda' ca naca chee' zrin dxunu', lawe' da québedxa gaca gacu' wən zrin blau chia'." <sup>3</sup> Nadxa benne' wən zrin blau na' guzú lawe' dxenné' lu xichaj lázrdawe': ¿ájazra guna' na'a, lawe' da xebéaj xrana' neda' lu zrin chia'? Quebe suedá' guna' zrin le'ē xixre', ne wedué'eda' naba' guna'. <sup>4</sup> Na'a ba nezda' tu da guna' chee' xelezúa benne' xelezí' lu ne'ē neda' gate québedxa dē zrin chia'. <sup>5</sup> Nadxa gunné' tu tu benne' dxelal-le' chee' xranē' na'. Na' bchebē' benne' nedxu: "¿ájatē dxal-lu' chee' xrana'?" <sup>6</sup> Benne' na' bechebē': "Dxal-la' chee' tu gaxúa zruaga da za." Nadxa benne' wən zrin blau na' guzre' le': "Nigá dē xiche chiu'. Gudxé'e bexún xetú na, na' bzuaj na dxebagu' chi xun zruaga ca'." <sup>7</sup> Gudé na' bchebē' xetú benne' ca': "¿Gazra lue', ájatē dxebagu'?" Na' benne' nigá guzre' le': "Dxebagu' tu gaxúa bzude' zrua' xtila." Nadxa benne' wən zrin blau guzre' le': "Nigá dē xiche chiu'. Bēn xetú na, na' bzuaj na dxebagu' tápalalaje." <sup>8</sup> Xranē' gúquebe'ene' nácale'ē sina benne' wən zrin blau na' ca' bēne' da ca'.

Nadxa gunná Jesús:

—Ca' naca na, benne' zaj zre'ē na'a zra zaj nácadxe' sina lu da dxelunē' nen le sa' ljwezre' ca', ca zaj naca benne' zaj naque' chee' Dios.

<sup>9</sup> Neda' dxapa' le'e, le guchine xel-la gunnía chee' xezr la xu nigá chee' cha benne' ljwézrele, chee' gate te chee' xel-la gunnía na', na' sua nu si' lu na' le'e naga gaca banle chadía chacanna.

<sup>10</sup> Benne' dxuchínene' láteze lu dutē xel-la li lazre' chee', cá'anqueze guchínene' tu da zrendxa dutē xel-la li lazre' chee', na' benne' quebe naque' li lazre' ca dxuchínene' láteze, cá'anqueze quebe gague' li lazre' ca guchínene' tu da zrendxa. <sup>11</sup> Ca' naca na, che quebe nácale li lazre' ca dxuchínele xel-la gunnía chee' xezr la xu nigá, ¿nuzra guxrén lazre' le'e chee' guchínele xel-la gunnía li? <sup>12</sup> Che quebe nácale li lazre' ca dxuchínele da naca chee' benne' xula, ¿nuzra gunna le'e da gaca cheéqueze?

<sup>13</sup> Quebe gaca tu benne' wən zrin gunē' zrin chee' chupa xranē', lawe' da cuídenē' tue', na' xetúē' zrí'ine', u gague' li lazre' nen tue', na' xetúē' guzúē' chalá'ala. Quebe gaca nu gun zrin chee' Dios, ne chee' da gunnía da nape'.

<sup>14</sup> Benne' fariseo ca', benne' dxulucúdeē' dumí, ne dxuluzé nague' da dxenná Jesús, belún le' chee'.

<sup>15</sup> Nadxa gunná Jesús:

—Le'e dxulé'e cuínale xrlátaje lau bēneache ca', san Dios núnbe'ē lázrdau. Da dxeleque bēneache naca na xrlátaje, naca na da dxuzúa Dios chalá'ala.

## Da nadxiruj bea na, ne xel-la dxenná bea chee' Dios

<sup>16</sup> Na' gunná Jesús:

—Ca bzrin zra zua Juan gulenná bea da nadxiruj bea na, ne da bululé'e benne' ca' buluchálaje' waláz chee' Dios. Na'a, ca na'tē dxendxu dizra' chawe' ca gaca chú'udxu naga dxenná bea Dios, na' xúgutē benne' dxelunē' ba xuzre xelu'ē na'.

<sup>17</sup> Waca te chee' xabáa, ne chee' xezr la xu nigá, san quebe te chee' tu da naxúaj na lu da nadxiruj bea na.

## Benne' biu dxulusáne' nu'ula chee'

(Mt. 19.1-12; Mr. 10.1-12)

<sup>18</sup> Na' gunná Jesús:

—Che tu benne' biu gusanē' zru'ule', ne súalene' nu'ula xula, benne' biu nigá dxunē' dul-la dxáchajne' xrba chee' xel-la wechaga na', na' benne' biu zúalene' tu nu'ula ba bsan benne' chee' le', benne' nigá cá'anqueze dxunē' dul-la dxáchajne' xrba chee' xel-la wechaga na'.

## Tu benne' gunnía, ne tu benne' xache'

<sup>19</sup> Na' gunná Jesús:

—Guzúa tu benne' gunnía, gúcuē' zra lanē' da zaca, ne da zri'a xrtan, na' xúgutē zra bēne' laní zren.

<sup>20</sup> Cá'anqueze guzúa tu benne' xache' le' Lázaro, nazratē wē' lu be'la' dxen chee', na' dxeajché'ē lu xu dxu'a lizre benne' gunnía na'. <sup>21</sup> Benne' xache' nigá guzá lazre' gawē' ca da dxelexruj zranla ga dxelagu benne' gunnía na', na' bécudu ca' dxelelé'ēba' lu wē' ca' chee' Lázaro. <sup>22</sup> Bzrin zra gute benne' xache' na', na' belexeché' gubáz chee' xabáa ca' le' zeajxezúalene' Abraham lu lataj chawe' chee' Dios. Cá'anqueze gute benne' gunnía na', na' bulucache' le'. <sup>23</sup> Gate benne' gunnía na' dxezaca zi'ē lataj chul-la chee' benne' gate, na' guchisa lawē', na' blé'ene' Abraham zuē' zitu', ne Lázaro zúalene' le'. <sup>24</sup> Nadxa gudxezre xē'ē, gunné': "¡Xrae, Abraham, bexache lazre' neda', ne gusel-la Lázaro, cheajsebisē' tu zrube ne'ē, na' xidē' xucule' luzra' nigá! Dxezaca zi'a lu xi' nigá." <sup>25</sup> Na' Abraham gunné': "Bi chia', bsa lazre' gúcale'ē chawe' chiu' lu xezr la xu, san Lázaro gúcale'ē da zi' da xa' chee'. Na'a le' dxezi'ē da ba neza nigá, na' lue' dxezaca zi'u na'.

<sup>26</sup> Xetú da zua, zua tu chejéa zrentē laduj netu' ne le'e. Ca' naca na, che nu benne' zua nigá dxaca lazre' chéa-jē' naga zu', quebe gaca, ne quebe gaca benne' zua naga zu' xidē' naga zúantu' netu'." <sup>27</sup> Nadxa gunná benne' gunnía na': "Dxata' xueda' lue', xrae Abraham, sel-lu' Lázaro lizre xra', <sup>28</sup> naga zaj zra' gazxu' bi bícha'dau', chee' cheajchálajlne'-be', chee' quebe xelalá' lebe' nigá xelezaca zi'be' ca dxaca chia'." <sup>29</sup> Abraham gunné': "Zaj nape' da buluzúaj Moisés, ne benne' ca' buluchálaje' waláz chee' Dios. Dxal-la' xelená' xán-niē' da na' naxúaj na." <sup>30</sup> Benne' gunnía na' bechebē': "Awe', xrae Abraham, san che nu benne' ládujla benne' gate chéajē' cheajchálajlne' le', welexebí'i lazre'."

<sup>31</sup> Abraham gunné': "Che quebe xelenne' ca da gulenná bea na, ne xel-la dxenná bea chee' Dios

ná Moisés, ne benne' ca' buluchálaje' waláz chee Dios, québequeze xeléajle' che tu benne' xebane' ládujla benne' gate."

**Ca naca da dxun na ga nabágadxu dul-la**  
(Mt. 18.6-7, 21-22; Mr. 9.42)

**17** Jesús guzre' benne' ca' dxusédene':  
—Welezúaqueze da xelún na xelebaga bèneache dul-la, na' edxugúa bènea' guné' da gun na xebaga benne' xula dul-la. <sup>2</sup> Gácadxa chawe' chee bènea' che nu guchéaj xiaj xiche lbe', na' chu'e lu nísadau' naga gátete' quézcala guné' da gun na xebaga bidu caní dul-la. <sup>3</sup> Le guxúe xanne' cuínale.  
'Che le sa' ljwezru' guné' chiu' da caléla, bzéajni'ine', na' che xebí'i lazre', bnite lau chee'. <sup>4</sup> Lácala guné' chiu' da caléla gazre lasa tu zra, na' gazre lasa xide' xe'e lue': "Dxexebí'i lazra'", dxal-la' gunité lau' chee'.

**Xel-la waca chee xel-la dxeajlí lazre'**

<sup>5</sup> Benne' gubáz ca' chee Xránadxu gulé'e Le':  
—Ben ga cheajlí lázredxantu' Dios.

<sup>6</sup> Nadxa gunná Xránadxu:  
—Che le'e zrué'ele xel-la dxeajlí lazre', lácala naca na láteze ca tu binnedu chee mostaza, waca xe'e xaga zrenté nigá: "Gucuasa nigá, ne xeajsúa lu nísadau'," na' xaga na' guzúa na dizra' chee'e.

**Da dxal-la' gun benne' wen zrin**

<sup>7</sup> Che tu benne' ládujla le'e zua tu benne' wen zrin chee', na' xel'é'e le'e xixre' gate te gudé'e bezre u guxúe' béadu ca', ¿we'e benne' wen zrin na': "Gudé nigala, gudxé'e gagu'?" <sup>8</sup> Cabí, san nne': "Bcuesa da gawa', ne gusí' chawe' le'u chee gaca ca'u chia' da xi'aj gawa'. Te na' waca xi'aj gagu' lue'." <sup>9</sup> ¿We'e benne' wen zrin na': "Xcalenu'", lawe' da bené' da gunná be'e xrané' le'? Cabí. <sup>10</sup> Cá'anqueze le'e, gate xuzre gunle xúguté da gunná be'e Dios le'e, dxal-la' nnale: "Nácan-tu' benne' wen zrin quebe bi zaj zaca, lawe' da quebe bi ne guntu' da zréndxala ca naca da nabágantu'."

**Jesús dxexuné' chi benne' zaj de'e we' guzru'**

<sup>11</sup> Ca zexíaj Jesús zéaje' Jerusalén, gudé'e lu xezr la xu chee xezre ca' zaj nababa Samaria, ne xezre ca' zaj nababa Galilea. <sup>12</sup> Gate bzrine' tu xézredau', bedajlechaga Le' chi benne' zaj de'e we' guzru', na' belezé' zítu'la, <sup>13</sup> ne gulebezre xe'e, dxelenné':

—Jesús, Benne' Wesede, bexache lazre' netu'.

<sup>14</sup> Gate ble'e Jesús le', na' gunné':

—Le chjaca le cheajlué'e cuínale lau bxruze ca'.

Dxácaté zjaque' na', na' belexexaque' chee xízrawe' chee'. <sup>15</sup> Nadxa tu benne' ca', gate guque bé'ene' ba bexaque', na' bebi'e, dxue lá'ane' Dios du lazre'. <sup>16</sup> Bzu zribe' lau Jesús, ne gudíxrujte' lawe' lu xu, dxé'e Le': "Xcalenu'." Benne' nigá naque' tu benne' Samaria.

<sup>17</sup> Nadxa gunná Jesús:

—¿Quegá chie' na' belexexaque' lu xízrawe' na'? ¿Gazra na' xegué'? <sup>18</sup> ¿Tuze benne' zitu' nigá belá' güe lá'ane' Dios?

<sup>19</sup> Nadxa Jesús guzre' benne' na' bexaque':

—Bexasa, bexíaj. Ba bexacu' lawe' da guxéajle'u chia'.

**Ca la' xel-la dxenná bea chee Dios**  
(Mt. 24.23-28, 36-41)

<sup>20</sup> Benne' fariseo ca' buluchébe' Jesús bátala la' xel-la dxenná bea chee Dios, na' bechébe Le':

—Ca la' xel-la dxenná bea chee Dios quebe naca na da lé'ele. <sup>21</sup> Quegá nu nna: "Nigá zua na", u "Na' zua na", lawe' da ba zua lu'ule le'e xel-la dxenná bea chee Dios.

<sup>22</sup> Nadxa guzre' benne' ca' dxusédene':

—Wazrín zra gate le'e gaca lázrele lé'ele tu zra zua neda', Benne' Gulje' Bèneache, na' quebe lé'ele na.

<sup>23</sup> Che xelenná bèneache, xel'é'e le'e: "Nigá zue'", u: "Na' zue'", quebe chéajle, ne quebe gaule benne' ca'.

<sup>24</sup> Ca dxeajsúa xesa chalá'a zran xabáa, na' nalá'tequeze na xechalá'a zran xabáa, ca'an gaca gate xelá' neda', Benne' Gulje' Bèneache, lu zra xelá'a neda'. <sup>25</sup> Nédxula dxal-la' tèle'a xel-la zi', na' benne' zaj zré'e lu zra na'a zra xuluzúe' neda' chalá'ala. <sup>26</sup> Ca guca lu zra gate zua Noé, cá'anqueze gaca lu zra gate xelá'a neda', Benne' Gulje' Bèneache. <sup>27</sup> Lu zra na' zua Noé gulé'aj gulawe', ne buluchaga ne'e, ne bulunézruje' bi nu'ula chee' ca' lu xel-la wechaga na', cadxa bzrin zra guxú'u Noé lu da zren na' da dxedá lawe' nísadau', na' gúcale'e xiuj, na' gulate xúguté benne' ca'. <sup>28</sup> Cá'anqueze guca lu zra zua Lot, gulé'aj gulawe', ne gulá'awe', ne belútie', na' gulazé', ne beluné' lizre', <sup>29</sup> na' gate Lot bedxúaje' lu xezre Sodoma, na' ca dxaca gate dxaca xiuj, ca'an guca bexruj xi', ne da gache da dxuzéxzele'e zran xabáa, ne bzria xi na ca naca benne' ca'. <sup>30</sup> Ca'an gaca lu zra xelá'a neda', Benne' Gulje' Bèneache.

<sup>31</sup> "Lu zra na', che nu benne' ze' chju'u chee', na' da de chee' zra na lu xu'u chee' na', quebe dxal-la' chu'e cuéajé' na, na' che nu benne' zue' le'e xixre', quebe dxal-la' xezrine' lizre'. <sup>32</sup> Le cheajsá lazre' ca guca chee zru'ula Lot. <sup>33</sup> Benne' dxaca lazre' gapa chí'e xel-la nabán chee' gunitié' na, na' bènea' wde'e na, wazrué'e bènea' xel-la nabán.

<sup>34</sup> 'Dxapa' le'e, lu zre na', chupa benne' xelate' tu zren ga dxelase'. Tue' xeché'e, na' xetúe' xegá'ane'. <sup>35</sup> Chupa nu'ula xelexré'e dxelútue'. Tue' xeché'e, na' xetúe' xegá'ane'. <sup>36</sup> Chupa benne' xelexré'e le'e xixre'. Tue' xeché'e, na' xetúe' xegá'ane'.

<sup>37</sup> Gate belén benne' ca' da nigá, na' buluchébe' Jesús:

—¿Gazra gaca ca', Xran?

Le' bechébe':

—Naga de tu da nate, na' xeledúpaqueze laba ca'.



Da dxul'é na ca naca chee tu nu'ula ba gute benne' chee', ne benne' dxuchi'a da dxaca

**18** Jesús bchálaje' da dxul'é na ca naca chee guse'dene' benne' ca' dxal-la' xuluwírajtecaze' Dios, ne quebe xelexebigue'. <sup>2</sup> Na' guzre' benne' ca':

—Tu xezre guzúa tu benne' dxuchi'e da dxaca, na' quebe gudape' ba lá'ana Dios, ne cá'anqueze bèneache. <sup>3</sup> Lu xezre ná'queze guzúa tu nu'ula ba gute benne' chee'. Guxíaje' xejnabe' lau benne' dxuchi'e da dxaca chee' guchi'e da dxaca chee' nen tu benne' dxune' chee' da calela. <sup>4</sup> Zane' lásate' benne' dxuchi'e da dxaca quebe guca lazre' guchi'e chee' nu'ula na', san ca gudé na' gunné' lu xichaj lászrdawe': Lácala quebe dxapa' ba lá'ana Dios, ne cá'anqueze bèneache, <sup>5</sup> san lawe' da nu'ula nigá dxune' neda' zede, guchí'a chaza' da dxaca chee' chee' québedxa xide' gúnle'e neda' zede.

<sup>6</sup> Na' gunná Xránadxu:

—Caní na' gunná benne' wen da calela na', benne' dxuchi'e da dxaca. <sup>7</sup> ¿Quebe guchi'a Dios da dxaca chee' benne' ca' ba guqu'é, benne' ca' dxelenné' Le' te zra, ne chizrela? ¿Wazrene' xechébe' chee' benne' ca'? <sup>8</sup> Dxapa' le'e, Le' guchi'e da dxaca chee', ne quebe chene'. Gate xelá'a neda', Benne' Gulje' Bénneache, ¿wazréldxada' tu benne' lu xezr la xu nigá, benne' dxéajle'e chia'?

Da dxul'é na ca naca chee tu benne' fariseo, ne tu benne' wechizruj

<sup>9</sup> Jesús bchálaje' xetú da dxul'é na, chee' xelene benne' ca' dxeléquene' zaj naque' xrlátaje, san dxuluzé' chalá'ala le sa' ljwezre'. <sup>10</sup> Gunné':

—Chupa benne' xjaque' xudau' chee' xuluchálajlene' Dios. Tué' naque' benne' xudau' fariseo, na' xetúe' naque' wechizruj waláz chee' xezre zitu'. <sup>11</sup> Benne' xudau' na' guzé' dxuchálajlene' Dios, gunné': "Dios, xcalenu' quebe naca' ca benne' xula ca', zaj naque' gubán, ne benne' ca' dxelune' da calela, ne benne' dxelún dul-la dxeláchajne' xrba chee' wechaga na', ne quegá ca benne' wechizruj nigá. <sup>12</sup> Neda' dxuna' gubasa chupa lasa da gazre zra, ne dxunna' chiu' tu cue' chee' da chi cue' da dxezi'a." <sup>13</sup> Benne' wechizruj na' guzúe' dxu'a dxa xú'uze, ne quebe bexazrjne' chisa lawe' xabáa. Béle'e la chu'e, dxenné': "Dios, bexache lazre' neda', naca' benne' dul-la." <sup>14</sup> Dxapa' le'e, benne' wechizruj na' bezé'e xexíaje' lizre', ne bexaque' xrlátaje lau Dios, san quegá caní guca chee' benne' xudau' na'. Ca' guca lawe' da benne' dxucá'ana szren cuine' wexéxrujla bènea', san benne' dxucá'ana baxache' cuine' wegá'ana szrénqueze bènea'.

Jesús dxenabe' gaca chawe' chee' bidu ca'

(Mt. 19.13-15; Mr. 10.13-16)

<sup>15</sup> Belezrín benne' ca' zaj naché'e bidu ca' lau Jesús chee' guzé' ne'e lebe'. Gate belelé'e benne' ca' dxusede

Jesús da nigá, na' gulezú lawe' dxeledil-le' benne' ca'.

<sup>16</sup> Jesús gunné' benne' ca' dxusedene', na' dxé'e le':

—Le güe lataj xeelá' bidu ca' naga zua', ne quebe guzágale-be', lawe' da benne' zaj naque' ca' bidu caní welexu'e naga dxenná bea Dios. <sup>17</sup> Da li dxapa' le'e, benne' quebe si' lu ne'e nna bea Dios le' ca dxelún bidu caní, québequeze chu'e naga dxenná bea Dios.

Tu benne' cuide' naque' benne' gunní'a

(Mt. 19.16-30; Mr. 10.17-31)

<sup>18</sup> Tu benne' xíchaje' bchébe' Jesús:

—Benne' Wesede xrlátaje, ¿bi da dxal-la' guna' chee' zrué'eda' xel-la nabán zeajlí canna?

<sup>19</sup> Jesús guzre' le':

—¿Bizr chee' na' dxennáu' naca' xrlátaje? Netú benne' quebe naque' xrlátaje. Tuze Dios naque' xrlátaje.

<sup>20</sup> Lue' núnbe'u ca' zaj naca xrba chee' Dios:

Quebe gunu' dul-la da dxachaj na xrba chee' wechaga na'.

Quebe gutiu' benne'.

Quebe cuanu'.

Quebe nneu' chee' le sa' ljwezru' da quebe naca na.

Gudapa ba lá'ana xra xrna'u.

<sup>21</sup> Benne' na' guzre' Jesús:

—Xúgute' da caní dxuna' ne nácatea' bídau'te.

<sup>22</sup> Gate ben Jesús da nigá, na' guzre'-be':

—Ne dxexájrjenu' xetú da dxal-la' gunu'. Bete ca naca da de' chiu', na' bnezruj na chee' benne' xache' ca'. Nadxa gapu' xel-la gunní'a lu xabáa chee' Dios. Na' gudá sálenu' neda'.

<sup>23</sup> Gate benne' cuide' na' benne' da nigá, bewí'in-ele'ene' lawe' da nápalé'e da gunní'a. <sup>24</sup> Gate ble'e Jesús ca bewí'ine benne' na', gunné':

—Stébeté' naca chee' benne' gunní'a ca' xelexú'e naga dxenná bea Dios. <sup>25</sup> Chadídxala te tu bea zren lu negue' tu xeche' zriche quegala chu'u tu benne' gunní'a naga dxenná bea Dios.

<sup>26</sup> Na' benne' ca' dxelenne' gulenné':

—Che ca' naca na, ¿núzraqueze la?

<sup>27</sup> Jesús guzre' benne' ca':

—Da quebe gaca xelún bèneache, waca Dios gúnqueze' na.

<sup>28</sup> Na' gunná Pedro, guzre' Jesús:

—Xran, ba bsantu' ca da gudápantu' chee' zálentu' Lue'.

<sup>29</sup> Nadxa Jesús bechébe':

—Da li dxapa' le'e, núteteze benne' gusané' lizre', u xra xrne'e, u bi biche', bi zane' ca', u zru'ule', u zrí'ine' ca', chee' guné' zrin chee' xel-la dxenná bea chee' Dios, <sup>30</sup> benne' nigá wazi'e da zrendxa lu xezr la xu nigá, na' lu xezr la xu da za za' wazi'e xel-la nabán da zeajlí canna.

Jesús dxuchálaje' xecha lasa ca gaca gate gatie'

(Mt. 20.17-19; Mr. 10.32-34)

<sup>31</sup> Na' Jesús gunné' chalá'ala benne' chazrinna ca' dxusedene', na' guzre' le':

—Na'a zexíajdxu Jerusalén, naga gaca li ca naca da buluzúaj benne' ca' buluchálaję' waláz cheę Dios ca gaca chia' neda', Benne' Gulję' Bénneache. <sup>32</sup> Benne' zaj zřęę Jerusalén xuludęę' neda' lu na' benne' zitu' ca', na' xelún lę' chia', ne xelennęqueze' schanni' chia', ne wuluzráqueze' neda' zrenę'. <sup>33</sup> Welúequeze' neda', na' te na' xelútię' neda', na' zra guxunne' zra xebana' ládujla benne' gate.

<sup>34</sup> Benne' ca' quebe guléajni'ine' da nigá, ne quebe zaj nézene' bi cheę na' dxuchálajlęę' lę', lawe' da zaj naca da quebe guca xeléajni'iquezņę'.

### Tu benne' la chul-la, benne' zuę' xęzre Jericó

(Mt. 20.29-34; Mr. 10.46-52)

<sup>35</sup> Gate Jesús bzriņę' gagu naga zua xęzre Jericó, na' dxe' tu benne' la chul-la dxu'a neza dxenabę' guna'.

<sup>36</sup> Gate benne' dxeledę benne' zantę, na' benne' la chul-la na' bchębę' benne' ca' bizra na' dxaca na. <sup>37</sup> Na' gulęę lę':

—Jesús, benne' Nazaret dxedęę' nigá.

<sup>38</sup> Nadxa gudxęzre xa'a la chul-la na', gunnę':

—Jesús, Zri'ine David, bexache lazre' neda'!

<sup>39</sup> Benne' ca' zaj zria lawę' lau Jesús guledil-lę' benne' la chul-la na' cheę suę' zrize, san gudxęzre xá'adxa lę', dxennę':

—Zri'ine David, bexache lazre' neda'!

<sup>40</sup> Nadxa gugá Jesús, na' gunná bę'ene' xęajlexrię lę'. Gate blęę lau Jesús, na' Jesús bchębę' lę':

<sup>41</sup> —¿Bi dxaca lazru' guna' chiu'?

Bechębe la chul-la na':

—Xran, dxaca lazra' xelę'eda'.

<sup>42</sup> Jesús guzřę' lę':

—Gaca ca dxennáu'. Ba bexacu' lawe' da guxéajlę'u chia'.

<sup>43</sup> Zra ná'queze belę'e benne' la chul-la na', na' guxía-jlęę Jesús, dxue lá'anę' Dios. Xúgute benne' ca' belelę'ene' da nigá cá'anqueze belúe lá'anę' Dios.

### Jesús dxuchálajlęę' Zaqueo

**19** Nadxa Jesús guxúę xęzre Jericó, ne dxedęę' xęzre na'. <sup>2</sup> Lu xęzre na' zua tu benne' gunnía lę' Zaqueo. Naquę' xíchaję cheę benne' wechizruj ca'.

<sup>3</sup> Benne' nigá dxaca lazřę' gúnbe'ę Jesús, san quebe guca lé'ene' Lę' lawe' da zaj zra' benne' zantę na', na' Zaqueo na' quebe naquę' benne' tunna. <sup>4</sup> Nadxa guxíaj chęgüę' guzřía lawę', ne cheę gaca lé'ene' guluęę' tu lu xaga zren da zua gagu naga dxal-la' te Jesús. <sup>5</sup> Gate gudę Jesús na', gunnęę lu xaga na', ne guzřę lę':

—Zaqueo, bexétajche, lawe' da na'a dxun na ba xen xęgá'ana' lizru'.

<sup>6</sup> Nadxa Zaqueo na' bexétaję' chadí, na' nen dutę xel-la dxebe guz' lu neęę Jesús. <sup>7</sup> Gate belelę'e benne' ca' da nigá, xúgute' gulezú lawę' dxelezí tizřę' Jesús, dxelennę':

—Jesús bzriņę' begá'anę' lizre tu benne' dul-la.

<sup>8</sup> Nadxa Zaqueo na' guzřę', na' guzřę' Xránadxu:

—Gunná'xque, Xran, gunézruja' benne' xache' ca' gáchajtę ca da dę chia', na' che nu benne' bsaca zia' lę', xunézruja' tapa cue'la cheę'.

<sup>9</sup> Na' Jesús guzřę' lę':

—Na'a bla' xel-la weselá lu xu'u nigá, lawe' da ná-caqueze benne' nigá xrtia Abraham. <sup>10</sup> Ca' naca na lawe' da bla' neda', Benne' Gulję' Bénneache, cheę xexíaję, ne guselá' benne' ca' zaj nanítę'.

### Da dxulé'e na ca naca cheę chi dumí zaca

<sup>11</sup> Dxácatę na' dxuluzę naga benne' ca' dxenná Jesús da caní, na' bchálaję' tu da dxulé'e na lawe' da ba zuę' gáguzę xęzre Jerusalén, na' benne' ca' dxelęquęę' zra ná'queze nna bea Dios lu xęzr la xu nigá. <sup>12</sup> Nadxa guzřę' benne' ca':

—Guzúa tu benne' gunnía xrlátaję, na' dxal-la' chęaję' zitu' cheę xuluzúę' lę' gaquę' wenná bea, na' te na' xęzriņę' lazrię'. <sup>13</sup> Gate za seęę, gunnę' chi benne' węn zrin cheę', na' bnézruję' tu tu benne' ca' tuwéaj dumí zácálęę, ne guzřę' benne' ca': "Le guchine dumí nigá cadxa xelá'a." <sup>14</sup> Benne' zaj zřęę lázrię' dxelecuídęę' lę', na' gulesel-lę' bal-la benne' gubáz cheę' naga zęaję' cheę cheajleguęzřę' benne' zaj zřęę na': "Quebe dxaca lázrentu' gaca benne' nigá wenná bea cheęntu'." <sup>15</sup> Buluzúę lę' gaquę' wenná bea, na' bezriņę' lázrię'. Gate bezriņę' gunnę' benne' węn zrin ca' bnézruję' dumí, cheę nézene' ájatę bezí' tu tu benne' ca'. <sup>16</sup> Benne' nedxu bzriņę' lawę', na' gunnę': "Xran, dumí chiu' ba bezí na chi cue'la." <sup>17</sup> Wenná bea na' bechębę': "Chawe' bęnu'. Nacu' węn zrin xrlátaję. Lawe' da gucu' li lazre' lu late' da bęna' lue', na'a guna' lue' benne' nna be'ene' chi xęzre ca'." <sup>18</sup> Na' bzrin xetúę' lawę', na' gunnę': "Xran, dumí chiu' ba bezí na gazxu' cue'la."

<sup>19</sup> Cá'anqueze guzřę' benne' nigá: "Lue' gacu' benne' nna be'ene' gazxu' xęzre ca'." <sup>20</sup> Nadxa xetúę' bzriņę', na' gunnę': "Xran, nigá dę dumí chiu'. Bcache chawa'a na tu lu bazxu, <sup>21</sup> lawe' da bzreba' lue'. Nacu' tu benne' dxuzúa xuzre. Dxexeca'u da quebe guxru', ne dxexelapu' naga quebe guzu'." <sup>22</sup> Nadxa wenná bea na' guzřę' lę': "Węn zrin calęla. Ca dizra' da gunnėu' chuga' ca gaca chiu'. Che nézquezenu' naca' benne' dxuzúa xuzre, ne xecá'a da quebe guxrúa', ne dxelapa' naga quebe guza', <sup>23</sup> ¿bizr cheę na' quebe xju'u dumí chia' lu na' benne' xuluchínęę' na, cheę xezí' lu na'a neda' dumí chia' nen da gun xíchaję na, gate xezrina' neda' lizra'?" <sup>24</sup> Nadxa guzřę' benne' ca' zaj zřęę na': "Le xecá'a dumí na' lu neęę, na' le gunezruj na benne' nape' chi dumí ca'." <sup>25</sup> Benne' ca' gulęę lę': "Xran, ba nape' chi dumí." <sup>26</sup> Na' bechębę' wenná bea na': "Dxapa' le'e, benne' nape' wazidxę' da zrendxa, na benne' quebe nape', wecá'a ca da du nape'. <sup>27</sup> Na'a, ca naca cheę benne' ca' quebe gulaca lazřę' gaca' neda' wenná bea cheę', le cheajxrię nigá, ne le gutię' lawa' neda'."

### Jesús dxexu'ę Jerusalén

(Mt. 21.1-11; Mr. 11.1-11; Jn. 12.12-19)

<sup>28</sup> Ca gudę gunnę' da nigá, na' bexú'u Jesús neza zexíaję' Jerusalén. <sup>29</sup> Gate ba zua xęzriņę' xęzre

Betfagé, ne xezre Betania, ne zue' gáguze naga zua Xi'a Xaga Olivo, na' gusel-le' chupa benne' ca' dxusé-dene'. <sup>30</sup> Guzre' le':

—Le chjaca xézredu na' zua gáguze, na' ca zrinle na' lé'ele tu burru da'ba' xaga, be netú quebe nu ne cuía le'ba'. Le sezre-ba', na' le che'-ba' nigá. <sup>31</sup> Che nu naba le'e bizr chee na' dxesézrele-ba', le xe'e Xránadxu nachínene'-ba'.

<sup>32</sup> Na' gusiá'ca benne' ca', na' belelé'ene' xúgute naca na ca ba guzre Jesús le'. <sup>33</sup> Na' gate dxelesezre' búrrua', na' xránaba' buluchébe' le':

—¿Bizr chee na' dxesézrele búrrua'?

<sup>34</sup> Benne' chupa ca' belexechébe':

—Lawe' da nachine Xránadxu le'ba'.

<sup>35</sup> Na' beleché'e-ba' lau Jesús, na' belexrúe' xicha chee' cúzruba', na' buluzríe' Jesús cúzruba'. <sup>36</sup> Ca zeaj Jesús, xu'e neza zrie' búrrudu na', na' dxelechiluj benne' ca' xicha chee' la neza naga té'e'. <sup>37</sup> Gate bzrine' gagu naga naca létajla chee' Xi'a Xaga Olivo, xúgute benne' ca' zaj de'e Le' gulezú lawe' dxelebezre xe'e lu xel-la dxelebe', ne dxelúe lá'ane' Dios ca naca xúgute xel-la waca chee' xabáa da belelé'ene'. <sup>38</sup> Gulenné':

—La'azxa naca wenná bea, benne' za' waláz chee' Xránadxu Dios. Gaca xel-la dxebeza zri lazre' da za xabáa, ne gaca ba Dios.

<sup>39</sup> Nadxa bal-la benne' fariseo ca' zaj zra' ládujla benne' ca' gulé'e Jesús:

—Benne' Wesede, gudil-la benne' caní zaj de'e Lue'.

<sup>40</sup> Jesús bechébe':

—Dxapa' le'e, che benne' caní xelezúa zrie', xiaj caní xelebezre xa'a na.

<sup>41</sup> Gate bzrine' gagu xezre Jerusalén, ne ca blé'ene' na, na' gudxezre Jesús ca naca chee' na. <sup>42</sup> Na' gunné':

—La chéajni'ile lu zra chee'le nigá da gaca gunna chee'le xel-la dxebeza zri lazre'. Na'a da na' nagache na, na' quebe gaca lé'ele na. <sup>43</sup> Weleznín zra gaca chee'le da zrinnaj, gate benne' dxelecuídené' le'e xeléchaje' ze'e dxu'a xezre chee'le, ne xuluzague' le'e gáteteze na', <sup>44</sup> na' xuluchínnaje' xezre chee'le. Na' xelútié' ca naca benne' zaj zre'e nigá, na' quebe xuluxucá'ane' tu xiaj cuzru ljwezre na. Caní gaca chee'le lawe' da quebe gúquebe'ele zra bla' Dios chee' gá-caléne' le'e.

### Jesús dxucá'ana chawe' chale'aj xudau'

(Mt. 21.12-17; Mr. 11.15-19; Jn. 2.13-22)

<sup>45</sup> Nadxa guxú'u Jesús chale'aj xudau', na' guzú lawe' dxebeáje' na' benne' ca' dxelutié', ne dxelá'awe' na'.

<sup>46</sup> Na' guzre' benne' ca':

—Lu xiche chee' Dios dxenné': "Lizra' naca na xu'u na ga guchálajle neda'," na' le'e nunle na ca tu lizre gubán ca'.

<sup>47</sup> Tu zra tu zra Jesús dxusédené' benne' ca' zaj zra' chale'aj xudau'. Benne' xíchaje' ca' chee' bxruze, ne benne' dxuluxuzájle' da nadxixruj bea na, ne benne' xu'u lawe' chee' xezre na' dxelíljaje' ájala xeluné' xelútié' Le'. <sup>48</sup> Quebe belezréne' ájala xeluné', lawe' da dxu-

luzé naga xanne' xúgute benne' ca' Jesús, chee' xelenné' ca da dxenné'.

### Ca naca xel-la dxenná bea napa Jesús

(Mt. 21.23-27; Mr. 11.27-33)

**20** Tu zra gate zua Jesús chale'aj xudau' dxusé-dene' benne' ca', ne dxuchálajle' le' ca naca dizra' chawe' chee' Dios, na' beleznín na' benne' xíchaje' ca' chee' bxruze ca', ne benne' ca' dxuluxuzájle' da nadxixruj bea na, ne benne' gula sina ca', <sup>2</sup> na' gulé'e Le':

—Gunná bi xel-la dxenná bea napu' dxunu' da caní. ¿Nuzra benna lue' xel-la dxenná bea nigá?

<sup>3</sup> Na' gunná Jesús:

—Cá'anqueze neda' guchéba' le'e tu. Le xechébe chia'. <sup>4</sup> ¿Nuzra gusel-la Juan guchúe' bénneache nisa? ¿Dios che bénneache?

<sup>5</sup> Na' gulezú lawe' dxelé' ljwezre':

—¿Bizra nnadxu? Che nnadxu gusel-la Dios le', na' guchébe' dxi'u: "¿Bizr chee' na' quebe guxéajle chee'?" <sup>6</sup> Che xedxu Le', bénneache gulesel-le' le', benne' zaj zre'e nigá wuluzríe' dxi'u xiaj, lawe' da zaj neze xánnie' bchalaj Juan waláz chee' Dios.

<sup>7</sup> Nadxa belexechébe' quebe zaj nézene' nu gusel-la Juan bchue' bénneache nisa. <sup>8</sup> Na' Jesús guzre' benne' ca':

—Cá'anqueze neda' quebe xapa' le'e bi xel-la dxenná bea napa' dxuna' da caní.

### Da dxulé'e na ca naca chee' benne' wen zrin caléla ca'

(Mt. 21.33-44; Mr. 12.1-11)

<sup>9</sup> Na' guzú lau Jesús dxuchálajle' benne' ca' zaj zre'e na', dxuchálaje' da dxulé'e na, dxenné':

—Guzúa tu benne' bde'e lba uva lu xezr la xu chee', na' ca gudé na' bca'ane' na lu na' benne' wen zrin ca', na' guz'é na' zane' iza. <sup>10</sup> Gate bzrin zra xuluchibe' uva ca', na' gusel-le' tu bi wen zrin chee' zeajxenábabe' tu cue' chee' lina na' da dxal-la' xezi'e, san benne' wen zrin ca' buluzálaje'-be', na' belexesel-le'-be' cá'aze. <sup>11</sup> Nadxa xrane lina na' gusél-le' xetú bi wen zrin chee', na' cá'anqueze bi nigá bulucháchaléne'-be', ne buluzálaje'-be', na' belexesel-le'-be' cá'aze. <sup>12</sup> Xrane na' gusél-le' xetú bi wen zrin chee', na' benne' wen zrin ca', cá'anqueze beluné'-be' zi', na' belexebéaje'-be' lu lina na'.

<sup>13</sup> 'Naga xejche'te na, xrane na' gunné': "¿ájazra guna' Sel-la' zri'ina' nazrí'ite' lazra'. Gate xelélé'ene'-be' nalja xelape'-be' ba lá'ana." <sup>14</sup> Na' gate benne' wen zrin ca' belelé'ene'-be', na' gulé' ljwezre': "Bi nigá xezí' lu na'be' da de' chee' xránadxu. Gútedxu-be', chee' gá-cadxu xrane na dxí'unqueze." <sup>15</sup> Nadxa belexebéaje'-be' lu xezr la xu na', na' belutié'-be'.

Nadxa Jesús bchébe' benne' ca':

—¿Bizra gun xrane na' chee' benne' wen zrin ca'?

<sup>16</sup> Xelé'e, na' gutié' benne' wen zrin ca', na' gudé'e' xezr la xu na' lu na' benne' xula ca'.

Gate belén benne' ca' ca gunná Jesús, na' gulenné':

—Dios quebe gu'e lataj gaca ca'.

<sup>17</sup> Na' Jesús gunné'e benne' ca', na' gunné':

—¿Bizra zéaję da naxúaj na lu xiche cheę Dios? Dxen-  
né' caní:

Xiaj na' da buluzúa benne' węn xu'u ca' chalá'ala,  
le na' naca na xiaj blau.

<sup>18</sup> Núteteze benne' cheajchazię' lawe' xiaj na', na'  
chúzrujqueze bėnnea', na' che xiaj na' xexruj na lawe'  
nu benne', gútutę na le'.

### Ca naca cheę da dxuchizruj xęzre zi'tu'

(Mt. 21.45-46; 22.15-22; Mr. 12.13-17)

<sup>19</sup> Benne' xíchaję ca' cheę bxruze ca', ne benne' ca'  
dxuluxuzájleę da nadxixruj bea na gulaca lazre' xelęle'  
Jesús zra ná'queze, lawe' da guleque bé'ene' bchalaj  
Jesús da dxulé'e na ca zaj naca le', san belezrebe' da  
xelún bėnneache ca'. <sup>20</sup> Nadxa gulesel-le' benne' ca'  
xuluzuzre' Jesús, benne' xululé'e cuine' ca benne' xrlá-  
taje ca'. Benne' caní dxelaca lazre' xelebéaję' Jesús  
dizra' cheę xelezéquene' xuludęę' Le' lu na' bėnnea'  
dxenná be'e. <sup>21</sup> Cheę xelune' da nigá, buluchębe' Le':

—Benne' Wesęde, nézentu' dxennáu', ne dxusędenu'  
da naca li lazre', ne quebe dxuchi'u cheę bėnneache  
cáteze dxululé'e cuine', san lu da li dxusędenu' da naca  
cheę Dios. <sup>22</sup> Guzre netu', ¿naca na chawe' quízrujdxu  
da dxuchizruj César, bėnnea' dxenná bé'ene' dutę xęzr  
la xu, che cabí?

<sup>23</sup> Dxeque be'e Jesús ca naca da dxelaca lazre' xelune'  
cheę, na' guzre' benne' ca':

—¿Bizr cheę na' dxaca lázrele gun xálele neda'? <sup>24</sup> Le  
gulé'e neda' tu dumí. ¿Nuzra lu'a na' da na nigá, ne nu  
la naxúaj nigá?

Benne' ca' belexechebe':

—Cheę benne' dxenná bea na'.

<sup>25</sup> Nadxa gunná Jesús:

—Le gunezruj bėnnea' da naca cheę, na' le gunezruj  
Dios da naca cheę Dios.

<sup>26</sup> Quebe gulezéquene' xelún xálene' Jesús ca naca  
da bechebe' lau benne' ca'. Belexebánene' ca naca da  
bechebe', na' gulezúa zrie'.

### Ca gaca gate xelexebán benne' gate

(Mt. 22.23-33; Mr. 12.18-27)

<sup>27</sup> Ca gudé na' bal-la benne' xudau' saduceo ca'  
belezrine' lau Jesús. Benne' saduceo ca' dxeléquene'  
quebe xelexebán benne' gate, na' guléę Jesús:

<sup>28</sup> —Benne' Wesęde, Moisés bzúaję' cheęntu' che tu  
benne' gatię, ne gucá'ane' zru'ule', ne che quebe nu  
chilá' zrí'ine', na' bi biche bėnnea' dxal-la' guchaga  
na'abe' nen nu'ula na' gute benne' cheę' cheę galaj tu  
bidau' gácabe' ca zrí'ine bėnnea' ba gútee'. <sup>29</sup> Gulezrá'  
gazre benne' gulaque' zrí'ine tuze xre'. Bi nedxu bcha-  
ga na'abe' nen tu nu'ula, na' gútebe', quebe nu chilá' bi  
cheębe'. <sup>30</sup> Bi gudxupe' bchaga na'abe' nen nu'ula na',  
ne cá'anqueze gútebe' quebe nu chilá' bi cheębe'.

<sup>31</sup> Nadxa bi guxunne' bchaga na'abe' nen nu'ula na',  
na' cá'anqueze belún bi ca' xezica, na' bi gazre ca'  
gulátebe' quebe nu chilá' bi cheębe'. <sup>32</sup> Naga xeajche'te  
na, na' gute nu'ula na'. <sup>33</sup> Gate xelexebán benne' gate,

¿nula bi ca' gaca zrí'ulabe' nu'ula na', lawe' da ca naca  
bi gazre ca' buluchaga na'abe' nen nu'ula na'?

<sup>34</sup> Nadxa bechebe Jesús:

—Lu xęzr la xu nigá dxuluchaga na' benne' biu ca'  
nen nu'ula ca'. <sup>35</sup> Na' benne' ca' naca cheę' xelexexúę  
xęzr la xu da za za', ne cheę xelexebane' ládujla benne'  
gate, québedxa xuluchaga neęę, ne québedxa xu-  
lunézruję' zrí'ine' lu xel-la wechaga na'. <sup>36</sup> Ca'an gaca  
lawe' da quebe nu gátedxa na'. Xelaque' ca zaj naca  
gubáz cheę xabáa ca', ne xelaque' bi cheę Dios lawe'  
da belexebane'. <sup>37</sup> Moisésqueze, gate bzuję' ca guca  
cheę bisigá da guzúa na' xi', dxulé'ene' dxi'u dxal-la'  
xelexebán benne' gate. Naga naxúaj da nigá dxenná  
na ca naca cheę Dios, naque' Dios cheę Abraham, ne  
Dios cheę Isaac, ne Dios cheę Jacob. <sup>38</sup> Dios quebe  
naque' Dios cheę benne' gate ca'. Naque' Dios cheę  
benne' ban ca', lawe' da lau Le' zaj naca ban xúgute  
bėnneache.

<sup>39</sup> Nadxa bal-la benne' ca', benne' dxuluxuzájleę da  
nadxixruj bea na guléę Jesús:

—Cháwedau' dxennáu', Benne' Wesęde.

<sup>40</sup> Québedxa belexázrjne' bi xuluchębe' Jesús.

### ¿Nu benne' naca Cristo zrí'ine'?

(Mt. 22.41-46; Mr. 12.35-37)

<sup>41</sup> Jesús guzre' le':

—¿Bizr cheę na' dxennale le'e naca Cristo zri'ine  
David? <sup>42</sup> Davidqueze gunné' lu xiche naga zaj naxúaj  
salmo ca':

Xránadxu Dios guzre' Xrana':

"Gudxé'e cuita' xabeła chia',

<sup>43</sup> Cadxa guzúa' benne' dxelecuídene' lue' ca' zran  
ní'u."

<sup>44</sup> ¿ájazra cheę na' naca Cristo zri'ine David, na'  
Davidqueze dxęę Le': "Xran"?

### Jesús dxenné' cheę benne' ca' dxuluxuzájleę da nadx- ixruj bea na

(Mt. 23.1-36; Mr. 12.38-40; Lc. 11.37-54)

<sup>45</sup> Ca naca benne' ca' zaj zra' na' dxuluzé nague' cheę  
Jesús gate guzre' benne' ca' dxusędene':

<sup>46</sup> —Le guxúe xanne' cuínale cheę benne' ca' dxulux-  
uzájleę da nadxixruj bea na, lawe' da dxeledánene' dx-  
eledé' zaj nacue' zre' tunna, ne dxelaca lazre' xelapa  
bėnneache le' ba lá'ana lawe' xi'a ca', ne dxelebéę lu  
lataj blau ca' lu xu'u naga dxezragale, ne lataj blau ca'  
naga dxelawe' zrue. <sup>47</sup> Benne' caní dxelequęę ca naca  
lizre nu'ula ca' ba gulate benne' cheę, na' cheę xu-  
lucá'ana cuine' xrlátaje lau bėnneache ca' dxulu-  
lawízraję' Dios da tunna lu xu'u ca' naga dxezragale.  
Benne' caní xelezaca zídxaqueze'.

### Dumí da bnezruj tu nu'ula xache' ba gute benne' cheę'

(Mr. 12.41-44)

**21** Gate zua Jesús chale'aj xudau', blé'ene' benne'  
gunní'a ca' dxelegúę dumí lu xí'ina cheę xudau'.  
<sup>2</sup> Na' blé'ene' tu nu'ula naque' benne' xache', ne ba

gute benne' chee', gulu'e chupa dumída'u'. <sup>3</sup> Na' gunná Jesús:

—Da li dxapa' le'e, nu'ula xache' nigá gulú'udxe' da zrendxa ca benne' gunní'a caní, <sup>4</sup> lawe' da dxelegú'u benne' ca' chee' da dxutínneze na, san nu'ula nigá, lu xel-la baxache' chee' bnézruje' ca naca da nape' da nunte gawe'.

**Jesús dxuchálaje' ca gaca gate cuía xi' xudau'**  
(Mt. 24.1-2; Mr. 13.1-2)

<sup>5</sup> Bal-la benne' dxuluchálaje' ca naca chee' xudau' na', ne chee' xiaj xrtante da zaj zrále'e na ze'e xudau' na', ne chee' da xrtan da bulunezruj benne' chee' xudau' na'. Nadxa gunná Jesús, dxé'e le':

<sup>6</sup>—Wazrín zra gate xelebía xi' xúgute da caní dxelé'ele, ne quebe xegá'ana netú xiaj cuzru ljwezre na.

**Da xululé'e na gate cheajsé chee' xezr la xu nigá**  
(Mt. 24.3-28; Mr. 13.3-23)

<sup>7</sup> Nadxa benne' ca' buluchébe' Jesús:

—Benne' Wesede, ¿bata gaca da na'? ¿Bi gulé'e na gate ba za xelaca da caní?

<sup>8</sup> Jesús gunné':

—Le guxúe xanne' cuínale, ne quebe güele lataj nu si xé le'e, lawe' da xelalá' benne' zante benne' xulusí' cuine' La' neda', xelenné' zaj naque' Cristo, ne xelenné' ba bzin zra. Quebe chéajlele benne' ca'. <sup>9</sup> Gate xénele dxaca wedil-la, ne xeledábage' bèneache xu'u lawe', quebe zrèbele, lawe' da dxal-la' gaca da caní nedxu, san quebe ne zrin zra cheajsé chee' xezr la xu nigá.

<sup>10</sup> Nadxa guzre' benne' ca':

—Bèneache tu xezr la xu xeledíl-lale bèneache xetú xezr la xu, na' benne' tu xezre xeledíl-lale benne' xetú xezre. <sup>11</sup> Wazrú'le'eqe, ne gácale'e gubina', ne gáta'le'e xízrawe' du ca nácaqueze, na' zran xabáa lé'ele da guchébequeze na le'e, ne xel-la waca zri'a ca'.

<sup>12</sup> 'Nédxudxa gate quebe ne gaca da caní xelélaqueze' le'e, ne xeláu zi' xúzrequeze' le'e. Xeleché'e le'e lu xu'u ca' ga dxelezrague' chee' xelechugue' ca xelune' chee', na' xelegú'e le'e lizre xia, ne xeleché'e le'e lau benne' wenná bea ca', ne lau benne' xu'u lawe' ca' lawe' da nácale neda' tuze. <sup>13</sup> Gate gaca da caní gata' lataj guchálajlele benne' ca' ca naca chia' neda'. <sup>14</sup> Le guzúa chacha lázrdaule, quebe gucúzale nédxula da dxal-la' nnele, <sup>15</sup> lawe' da gunna' neda' le'e dizra', ne xel-la sina da quebe xelezeque benne' dxeledábage' le'e bi xelenné' chee' na. <sup>16</sup> Wuludéqueze bèneache le'e lu na' benne' dxeledábage' le'e. Caní xelúnqueze xra xrnale, ne bi bíchele, ne xrtia ljwézrele, ne bi ljwézrele ca'. Welútequeze' bál-lale le'e, <sup>17</sup> na' xúgute bèneache welecuídene' le'e lawe' da nácale neda' tuze, <sup>18</sup> san quebe nite tu xicha xíchajle lau Dios. <sup>19</sup> Che sua cháchale, na' gápale xel-la nabán.

<sup>20</sup> 'Gate lé'ele zaj naxechaj benne' dxjaque' wedil-la xezre Jerusalén, na' nézele ba za cuía xi' xezre nigá.

<sup>21</sup> Lu zra na', benne' zaj zre'e xezre ca' zaj nababa Judea dxal-la' xuluzrúnnuje' chjaque' lu xi'a ca', na' benne' zaj zre'e xezre Jerusalén dxal-la' xeledxúaje' na', na' benne'

zaj zre'e le'e xixre' quebe dxal-la' xelezezrine' xezre na'. <sup>22</sup> Lu zra ca' Dios gudé'e benne' ca' lu da zi' da xa', na' gaca li ca naca da naxúaj na lu xiche chee' Dios ca dxal-la' gaca chee' benne' ca'. <sup>23</sup> Edxugúa nu'ula zaj zue' zi'i lu zra ca', ne nu'ula ca' zaj nuxre' bidu dxelázrebe', lawe' da gáta'le'e da xelezaca bèneache ca', na' gaca tu da ba xa' zrenté chee' benne' ca'. <sup>24</sup> Bal-le' xelatie' lu wedil-la na', na' xebal-le' xeleché'e le' zaj nadxéaje' tu tu xezr la xu ca', na' benne' zitu' ca' xululéaje' xezre Jerusalén cadxa cheajsé chee' zra xelenná bea benne' zitu' ca'.

**Ca gaca gate xelá' Benne' Gulje' Bèneache**  
(Mt. 24.29-35, 42-44; Mr. 13.24-37)

<sup>25</sup> Na' gunná Jesús:

—Lu zra na' xelata' da xululé'e na lau gubizra, ne lau beu', ne lau belaj ca', na' lu xezr la xu xelezúa stébe benne' ca', ne xelezrebe' ca naca schaga' da gun nísadau', ne xeaxruza chee' na. <sup>26</sup> Benne' ca' xelate ni'a ne'e ne chee' xel-la dxelezrebe gate xulusá lazre' ca da dxal-la' gaca lu xezr la xu, ne ca naca da zaj zra' zran xabáa, da zaj napa xel-la waca xelezrízequeze na. <sup>27</sup> Lu zra na' xelélé'eqezne' neda', Benne' Gulje' Bèneache, xelá'a tu lu beuj, nen duté xel-la waca zren, ne da xabáa chia'. <sup>28</sup> Gate su lau gaca da caní, le gun dipa lázrele, ne le chisa xíchajle, lawe' da ba za zrin zra lale lu da dxaca chee'.

<sup>29</sup> Nadxa bchalaj Jesús tu da dxulé'e na, gunné':

—Le nna'xque xaga higo, u bíteteze xaga. <sup>30</sup> Gate lé'ele ba dxezría na laga' dxé'ene, nézquezle le'e ba za xaca beu' la. <sup>31</sup> Cá'anqueze, gate lé'ele gaca da caní, dxal-la' nézele ba zua gagu zra nna bea Dios.

<sup>32</sup> 'Da li dxapa' le'e, xúgute da caní xelaca na nédxudxa gate quebe ne xelate bèneache zaj zra' lu zra na'a zra. <sup>33</sup> Xabáa, ne xezr la xu weledé chee' na, san dizra' chia' quebe te chee' na.

<sup>34</sup> Le guxúe xanne' cuínale, quebe güele lataj xelú'u lu xichaj lázrdaule da caléla ca' ca naca xel-la dxagu xrata, ne xel-la dxezuzre, ne xel-la dxezá lazre' da naca chee' xezr la xu nigá, chee' quebe gácale ca tu benne' nachúl-lene' lu xichaj lázrdawe' gate zrin zra na', <sup>35</sup> ne chee' quebe gaca na ca tu da que'la na le'e, lawe' da caní gaca chee' xúgute benne' zaj zre'e lu xezr la xu nigá. <sup>36</sup> Le sua le'e ban lazre', ne le naba lau Dios chee' gaca lale lu da dxal-la' gaca lu xezr la xu nigá, ne chee' gaca gulé'e cuínale du lázrele lawa' neda', Benne' Gulje' Bèneache.

<sup>37</sup> Jesús bsédené' benne' ca' lu xudau' te zra, na' chizrela dxexíaje' lu Xi'a Xaga Olivo. <sup>38</sup> Xúgute benne' ca' belezrine' lu xudau' na' xugu' zila chee' xelenne' chee' Jesús.

**Dxelune' tuze dizra' xeléle' Jesús**

(Mt. 26.1-5, 14-16; Mr. 14.1-2, 10-11; Jn. 11.45-53)

**22** Ba zua gagu laní gate dxelawe' xeta xtila da quebe nachixre cua zichaj chee' xeta xtila, da naca na Laní Pascua gate dxulusá lazre' ca da ben Dios gate bebéaje' bèneache chee' lu xezr la xu Egipto.

<sup>2</sup> Lu zra ca' benne' xíchaję ca' cheę bxruze ca', ne benne' ca' dxuluxuzájle'ę da nadxixruj bea na belíaję' ájala xelunę' xelútię' Jesús bagácheze, lawe' da dx-elezrebe' da xelún benne' zan ca'.

<sup>3</sup> Nadxa guxú'u Satanás da xriwe' lu lázrdau Judas, bėnnea' cá'anqueze le' Iscariote. Naque' tu benne' chazrinnu gubáz ca' cheę Jesús. <sup>4</sup> Judas nigá guxíaję' xeajchálajlęne' benne' xíchaję ca' cheę bxruze ca', ne benne' blau ca' cheę xudau', na' bchálajlęne' benne' ca' ájala gunę' gudęe' Jesús lu na' benne' ca'. <sup>5</sup> Benne' caní gulebene', na' gulechebe lazre' xulunęzruje' le' dumí. <sup>6</sup> Judas na' guzi' lu ne'ę dumí na', na' guzú lawę' dxílaję' ájala gunę' gudęe' Jesús lu na' benne' ca' gate quebe nu chilá' benne'.

#### Da dxágudxu cheę cheajsá lazrdxu ca gute Xránadxu (Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup> Bzrin zra laní gate dxelawę' xeta xtila da quebe nachixre cua zichaj cheę xeta xtila, gate dxal-la' xelútię' zríla'dau' ca' cheę Laní Pascua. <sup>8</sup> Na' Jesús gusel-le' Pedro ne Juan, na' guzre'-be':

—Le chjaca, ne le gucuęza da gágudxu cheę Laní Pascua.

<sup>9</sup> Benne' caní buluchebe' Le':

—¿Ga dxaca lazru' gucuęzentu' na?

<sup>10</sup> Na' bechebe Jesusen':

—Gate chu'ule lu xęzre, na' xęzragale tu benne' biu zenu'ę tu dxe'e nisa. Le chjácálęne' xu'u naga xęzrinę', <sup>11</sup> na' le xę xrane xu'u na': "Benne' Wesęde dxę'ę lue': ¿Ga zua xu'u naga gágulęna' benne' ca' dxusędea' zríla'dau' cheę Laní Pascua?" <sup>12</sup> Nadxa gulęene' le'e tu xu'u zren da zua chupa cuia sibe, da bache nucá'ana chawe'. Le gucuęza da gágudxu na'.

<sup>13</sup> Benne' ca' xjaque', na' belezrélene' xúgutę ca da ba guzre Jesús le', na' bulucuezę' da xelawę' cheę Laní Pascua.

<sup>14</sup> Gate bzrin zra, Jesús ne benne' ca' dxusędene' gulezre'ę ga xelawę' na. <sup>15</sup> Nadxa gunná Jesús, dxę'ę benne' ca':

—Guzá lázrele'a gágulęna' le'e cheę Laní Pascua nigá nédxudxa ca quebe ne gatia'. <sup>16</sup> Dxapa' le'e québedxa gawa' da nigá cadxa gaca li na naga dxenná bea Dios.

<sup>17</sup> Nadxa guquę'ę tu zruágadau', na' guzre' Dios: "Xcalenu'", na' gunné':

—Le xi'aj late' weaj tu tule le'e. <sup>18</sup> Dxapa' le'e québedxa xí'aja' cheę nisa uva caní cadxa xida xel-la dxenná bea cheę Dios.

<sup>19</sup> Nadxa guquę'ę xeta xtila, ne guzre' Dios: "Xcalenu'", na' bzúzruje' na, ne bnęzruje' na benne' ca', dxennę':

—Da nigá naca na bel-la' dxen chia', da guzúa' waláz cheęle. Le gun da nigá cheę cheajsá lázrele chia' neda'.

<sup>20</sup> Cá'anqueze bęne' nen zruágadau' na' ca gudę gu-lawę' xrche', na' gunné':

—Zruágadau' nigá zęaję na xel-la wezría cube, da guzúa chúčhua' nen dxen chia', da gulálaja' waláz cheęle.

<sup>21</sup> 'Na'a, zrua na' benne' biu na' tu zren nen na'a ga zua da dxágadxu, bėnnea' gudęe' neda' lu na' benne' dxeledábague' neda'. <sup>22</sup> Neda', Benne' Gulje' Bėnneache, waxá'a lu neza da ble'e Dios neda' naga gatia', san edxugúa bėnnea' gudęe' neda' cheę gatia'.

<sup>23</sup> Nadxa benne' ca' dxusęde Jesús gulezú lawę' dxuluchebe ljwezre' nu na' gudę Jesús.

#### Dxuluchebe ljwezre' nule' gácadxe' blau

<sup>24</sup> Cá'anqueze buluchebe ljwezre' nule' gácadxe' benne' blau. <sup>25</sup> Na' Jesús guzre' le':

—Benne' wenná bea cheę xęzr la xu ca' dxelenná bėene' bėnneache ca xrane bėnneache ca', na' benne' xíchaję cheę benne' ca' dxelennę' zaj naque' benne' dx-elunę' da chawe' cheę benneáche ca'. <sup>26</sup> Le'e quebe dxal-la' gaque' ca benne' nácadxe' blau ládujla le'e dxal-la' gaque' ca benne' nácadxe' cuide', na' benne' dxenná be'ę dxal-la' gaque' ca benne' nada'u cheę ljwezre' ca'. <sup>27</sup> ¿Nu nácadxa blau, benne' dxe'ę dxawę', che benne' dxudęe' xel-la wagu? ¿Quebe naca bėnnea' dxe'ę dxawę'? Neda' zúalęna' le'e ca tu benne' dxunę' zrin cheęle.

<sup>28</sup> 'Le'e guzúalęquezle neda' gate neda' guzi' guzaca'. <sup>29</sup> Cheę le' na' dxunna' le'e lataj nna beale, ca bęn Xra', bęnne' na neda', <sup>30</sup> cheę xi'aj gágule ga naca chia' naga nna be'a neda', na' cue'le lataj blau ca' cheę guchí'ale cheę chazrinnu cue' xrtia Israel.

#### Jesús dxennę' Pedro nne' quebe núnbe'ę Le' (Mt. 26.31-35; Mr. 14.27-31; Jn. 13.36-38)

<sup>31</sup> Na' gunnáqueze Xránadxu:

—Simón, Simón, Satanás, da xriwe' ba gunaba na le'e cheę seque gudę na le'e lu dul-la ca dxun tu benne' dxudxixre dxutul-le' xizre za. <sup>32</sup> Neda' guta' xueda' Xra' gácalęne' lue' cheę quebe guníteu' xel-la dxea-jlí lazre chiu'. Na' lue', gate bache bexacu' dipa lazre', gúcalę le sa' ljwezru' ca' cheę xelezę chache'.

<sup>33</sup> Na' gunná Simón, guzre' Jesús:

—Xran, ba zúaqueza' sá'lęna' Lue' lizre xia, ne cheę gátequeza' nen Lue'.

<sup>34</sup> Jesús guzre' le':

—Pedro, dxapa' lue', ná'atęla ne dędxela cuezre xjeaj, lue' wannáu' chunna lasa quebe núnbe'u neda'.

#### Ba zua gagu zra si saca Jesús

<sup>35</sup> Nadxa Jesús bchebe' benne' ca':

—Gate gusel-la' le'e quebe bíale xixruj, ne naga cu'ule dumí, ne zréla, ¿bxázrjele bi da guchínnele? Benne' ca' belexechebe':

—Gutu bi dę.

<sup>36</sup> Nadxa guzre' benne' ca':

—Na'a, benne' nape' xixruj dxal-la' gu'ę na, ne naga dxugu'ę dumí. Bėnnea' quebe nape' xia da dxuluchínene' lu wedil-la, dxal-la' xexutię' xicha cheę', na' si'ę xia cheę'. <sup>37</sup> Dxapa' le'e dxal-la' gaca chia' né-daqueza' ca da naxúaj na lu xiche cheę Dios, dxennę':

“Gubabé' ca tu benne' wən da zrinnaŋ.” Xúgute da naxúaj na chia' dxal-la' gaca li na.

<sup>38</sup> Nadxa benne' ca' gulenné':

—Xran, nigá de chupa xia.

Le' bechebe':

—Da naze.

**Jesús dxuchálajlənē' Dios naga nazí le na Getsemani**

(Mt. 26.36-46; Mr. 14.32-42)

<sup>39</sup> Nadxa bedxúaj Jesús xu'u na', na' ca dxúnqueze', guxíajē' lu Xí'a Xaga Olivo, na' benne' ca' dxusédene' xjácálenē' Le'. <sup>40</sup> Gate belezrine' na', Jesús guzre' le':

—Le naba lau Dios chee quebe seque da xriwe' cu'u na le'e lu dul-la.

<sup>41</sup> Nadxa Jesús guzē' ca tu legu'una xiaj naga zaj zra' benne' ca', na' bzu zribē' bchálajlənē' Dios. <sup>42</sup> Gunne':

—Xrae, che dxaca lazru', bcuasa neda' ca naca da dxal-la' saca', da naca na ca tu da sla' da dxal-la' xí'aja', quegá gaca na ca dxaca lazra' neda', san ca dxaca lazru' Lue'.

<sup>43</sup> Nadxa ble'e lau naga zua Jesús tu gubáz chee xabáa, na' btipe' lazre' Jesús. <sup>44</sup> Gate ne dxezácalē'e, du lazre' bchálajlənē' Dios, na' xesa chee' guca na ca dxen dxeleznún na lu xu.

<sup>45</sup> Ca bexuzre bchálajlənē' Dios, na' bexase', na' bezrine' naga zaj zra' benne' ca' dxusédene', na' blé'ene' dxelase benne' ca', lu xel-la dxelexewi'ine lazre' chee'. <sup>46</sup> Nadxa guzre' benne' ca':

—¿Dxáselale le'e na'a? Le chasa, ne le naba lau Dios chee quebe seque da xriwe' cu'u na le'e lu dul-la.

**Dxelē' Jesús**

(Mt. 26.47-56; Mr. 14.43-50; Jn. 18.2-11)

<sup>47</sup> Ne dxuchálajtē Jesús gate belelá' benne' zan ca'.

Bénnea' le' Judas, tu benne' chazrinna ca', zē'e zria lawē' lau benne' ca', na' gubiguē' cuita Jesús chee gunupe' Le'. <sup>48</sup> Nadxa Jesús guzre' le':

—Judas, ¿dxunupu' neda', Benne' Gulje' Bénneache, chee gudéu' neda' lu na' benne' dxeledábague' neda'?

<sup>49</sup> Benne' ca' zrálenē' Jesús, ca belelé'ene' ca da dxaca, na' buluchēbe' Jesús:

—Xran, ¿guchínentu' xia?

<sup>50</sup> Tu benne' ca' dxedálē Jesús bene' zi' tu bi wən zrin chee bxruze blau, guchugue' nágabe' zua xabēla.

<sup>51</sup> Jesús gunné':

—Québedxa gunle ca'. Cá'anze.

Nadxa Jesús btē' naga bi wən zrin na', na' bexunē' na.

<sup>52</sup> Na' guzre' benne' xíchajē ca' chee bxruze, ne benne' blau ca' chee xudau', ne benne' gula sina ca', benne' zá'aque' xelechē'e Jesús, gunné':

—¿Blale le'e nen xia, ne xaga chee quélale neda' ca dxélale tu gubán? <sup>53</sup> Gate guzúa' neda' lu xudau' nen le'e tu zra tu zra, quebe bi benle le'e chia', san zra nigá naca na zra chee, gate dxenná bea da zua na lataj chul-la.

**Pedro dxenné' quebe núnbe'e Jesús**

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Nadxa gulē'e Jesús, na' guleché'e Le' lizre bxruze blau, na' Pedro zíajē' nawē' Le' zítu'la. <sup>55</sup> Na' gulebé'e guléchajē' xi' na', na' Pedro gudxé'e ládujla benne' ca'.

<sup>56</sup> Nadxa tu nu'ula wən zrin, gate blé'ene' Pedro dxē'e dxu'a xi' na', guzū'e dxenné'e le', na' gunné':

—Cá'anqueze benne' nigá guque' tuze len Jesús.

<sup>57</sup> Pedro gunné':

—Nu'ula, quebe núnbe'a bénnea'.

<sup>58</sup> Xetú chí'idau' guca, na' ble'e xetú benne' xula Pedro na', na' gunné':

—Cá'anqueze lue' nacu' tu zren benne' ca'.

Pedro gunné':

—Cabí. Quebe naca ca'.

<sup>59</sup> Xelate gudé na', xetú benne' ben chúchue' xrtizre', gunné':

—Da li, benne' nigá guque' tuze len Jesús, lawe' da naque' benne' Galilea.

<sup>60</sup> Nadxa gunná Pedro:

—Benne', quebe nezda' nu chee na' dxuchálaju'.

Dxácate na' ne dxuchálajtē Pedro ca', na' gudxezre xjeaj. <sup>61</sup> Nadxa Xránadxu bzechaj xíchajē', gunné'e Pedro, na' Pedro xeajsá lazre' ca da guzre Xránadxu le', gunné': “Ná'atēla ne dédxela cuezre xjeaj, lue' wannáu' chunna lasa quebe núnbe'u neda'.” <sup>62</sup> Nadxa bedxúaj Pedro, na' gudxezre xáche'le'e.

**Dxelún le' chee Jesús**

(Mt. 26.67-68; Mr. 14.65)

<sup>63</sup> Na' benne' ca' zaj nuxre' Jesús belún le' chee', na' buluczajē' Le'. <sup>64</sup> Bulucachē' lawē', na' belegapē' xraguē', dxelē'e Le':

—Gunné xa'a nu be Lue'.

<sup>65</sup> Da zan da gulenné', dxelenné' schanni' chee Jesús.

**Jesús dxezrine' lau benne' ca' chee xu'u lawe' blau chee judío ca'**

(Mt. 26.59-66; Mr. 14.55-64; Jn. 18.19-24)

<sup>66</sup> Gate naca te zra, na' belezraga benne' gula sina ca' chee judío ca', ne benne' xíchajē ca' chee bxruze ca', ne benne' ca' dxuluxuzájle'e da nadxixruj bea na, na' guleché'e Jesús lau benne' ca' chee xu'u lawe' blau chee judío ca'. Na' buluchēbe' Le':

<sup>67</sup> —Gunná, ¿nacu' lue' Cristo?

Na' bechebe Jesús:

—Che xapa' le'e: Awe', quebe chéajle, <sup>68</sup> na' che bi guchēba' le'e, quebe xechēbele chia', ne quebe gusanle neda'. <sup>69</sup> Ná'atēla neda', Benne' Gulje' Bénneache, cue'a chalá'a xabēla chee Dios nape' dutē xel-la waca.

<sup>70</sup> Nadxa xúgute' buluchēbe' Le':

—¿Nacu' Lue' Zri'ine Dios?

Jesús bechebe':

—Naca', ca dxennáquezle le'e.

<sup>71</sup> Nadxa gulenná benne' ca':

—¿Núzradxa chínnedxu bi nne' chee benne' nigá? Dxi'ukeze ba bédnedxu ca da gunnáqueze'.

**Jesús dxezrine' lau Pilato**

(Mt. 27.1-2, 11-14; Mr. 15.1-5; Jn. 18.28-38)

**23** Nadxa gulasa xúgutę benne' dxuluchi'e, na' guleché'e Jesús lau Pilato, benne' dxenná be'e waláz cheę Roma. <sup>2</sup> Na' gulezú lawę' dxelagu zrię' Jesús, dxelenné':

—Ble'entu' benne' nigá dxegú'u xel-le' bėnneache cheę xeledábage' xu'u lawe'. Dxenné' quebe dxal-la' quízrujntu' da dxuchizruj César, benne' Roma, na' cá'anqueze dxenné' naque' Cristo, Benne' Wenná Bea.

<sup>3</sup> Nadxa Pilato bchebe' Jesús:

—¿Nacu' Lue' Wenná Bea cheę judío ca'?

Na' bechebe Jesús:

—Ca' naca na, ca ba gunná'u lue'.

<sup>4</sup> Nadxa gunná Pilato, guzre' benne' xíchaję ca' cheę bxruze ca', ne bėnneache ca':

—Quebe bi da zrinnaj dxezrelda' nun benne' nigá.

<sup>5</sup> Benne' ca' belún chúchuę' dizra' cheę', gulenné':

—Dxegu'u xel-le' xúgutę benne' zaj zre'e xęzre ca' zaj nababa Judea cheę xeledábage' xu'u lawe'. Guzú lawę' dxunę' na naga nababa Galilea, na' na'a dxunę' na nigá.

**Jesús dxezrine' lau Herodes**

<sup>6</sup> Gate ben Pilato da nigá, na' bchebe' che naca Jesús benne' Galilea. <sup>7</sup> Gate gulę'e le' naca Jesús benne' Galilea, na' Pilato gusél-le' Le' lau Herodes, benne' dxenná be'e xęzre ca' zaj nababa Galilea, na' lu zra na' zuę' Jerusalén. <sup>8</sup> Gate ble'e Herodes Jesús, gubélé'ene', lawe' da bātate dxaca lazre' lé'ene' Le', lawe' da ba benne' dxuluchalaj bėnneache cheę Jesús, na' guca lazre' lé'ene' gun Jesús tu xel-la waca da za xabáa. <sup>9</sup> Da zantę da bchebe' Jesús, na' Le' quebe bi bechebe'.

<sup>10</sup> Zráqueze benne' xíchaję ca' cheę bxruze ca' na', nen benne' ca' dxuluxuzájle'e da nadxiruj bea na, na' belún chúchuę' dizra' cheę' da dxelagu zria Jesús.

<sup>11</sup> Nadxa Herodes, ne benne' cheę' ca' dxjaque' wedil-la buluzúę' Le' chalá'ala, na' cheę xelún le' cheę', bulugácuę' Le' ladxe' bzawe ca naca zra tu benne' wenná bea. Nadxa Herodes besel-le' Le' lau Pilato. <sup>12</sup> Lu zra na' Pilato, ne Herodes belexaque' tuze, lawe' da belezrá'a ljwezre' nédxute.

**Dxelechugue' cheę Jesús gatie'**

(Mt. 27.15-26; Mr. 15.6-15; Jn. 18.39—19.16)

<sup>13</sup> Nadxa Pilato bchague' benne' xíchaję ca' cheę bxruze ca', ne benne' xu'u lawe' ca', <sup>14</sup> na' guzre' benne' ca':

—Le'e guchęle benne' nigá za'le naga zua', dxennale dxegú'u xel-le' bėnneache cheę xeledábage' xu'u lawe'. Neda' ba bcheba' Le' laule le'e, na' quebe bi da zrinnaj dxezrelda' nunę' ca naca da dxennale cheę'.

<sup>15</sup> Cá'anqueze Herodes quebe bi da zrinnaj bzre'lene' da nun Jesús, na' budéę' Le' launtu'. Quebe bi ne gune' cheę chuga' cheę' gatie'. <sup>16</sup> Gudéa' Le' xel-la zi', na' gusánqueza' Le'.

<sup>17</sup> Dxácate dxaca laní na', Pilato dxal-la' gune' tu da dxelezaca ba lazre' bėnneache, gusanę' tu benne' xu'e lizre xia. <sup>18</sup> Xúgutę benne' ca' gulezú lawę' dxelebezre xę'e, dxelenné':

—¿Gate benne' nigá! ¡Bsan Barrabás na'!

<sup>19</sup> Barrabás nigá gulegú'e le' lizre xia lawe' da gudábage' xu'u lawe', na' bętie' tu benne'. <sup>20</sup> Pilato guca lazre' gusanę' Jesús, na' bchálajlene' benne' ca' xetú. <sup>21</sup> Na' benne' ca' gulebezre xę'e zízrajdx, dxelenné':

—¿Bde'e xaga béguaj! ¡Bde'e xaga béguaj!

<sup>22</sup> Da guxunne' lasa gunná Pilato:

—¿Bizra da zrinnaj nunę'? Quebe bi dxezrelda' da gudé na Le' gatie'. Gudéa' Le' xel-la zi', na' te na' gusana' Le'.

<sup>23</sup> Na' benne' ca' belún chúchuę' dizra' cheę' cheę tę'e xaga béguaj, ne gulebezre xá'atię', nen benne' xíchaję ca' cheę bxruze ca', cadxa guca ca da gulaca lazre'.

<sup>24</sup> Nadxa Pilato guchugue' cheę Jesús gaca cheę' ca da dxelaca lazre' benne' ca'. <sup>25</sup> Na' bsane' bėnnea' belenabe', xu'e lizre xia lawe' da gudábage' xu'u lawe', ne bętie' tu benne', na' bdeę' Jesús cheę gaca cheę' ca dxelaca lazre' benne' ca'.

**Dxuludé'e Jesús xaga béguaj**

(Mt. 27.32-44; Mr. 15.21-32; Jn. 19.17-27)

<sup>26</sup> Gate zjaque' zaj naché'e Jesús cheę xuludé'e Le' xaga béguaj, na' gulęle' tu benne' Cirene, le' Simón, zezé'e le'e xixre', na' bulugu'e le' xaga béguaj cheę Jesús, na' zéaję' cuzru Jesús na'.

<sup>27</sup> Na' xjácale Le' benne' zantę, ne nu'ula zan dxelebezre', na' dxelebezre xache' ne cheę da dxaca cheę Jesús. <sup>28</sup> Nadxa Jesús gunné'e nu'ula ca', na' guzre' le':

—Le'e, nu'ula Jerusalén, quebe cuézrele chia' neda'.

Le cuezre cheęqueze, ne cheę zrí'inele, <sup>29</sup> lawe' da zrin zra gate xelenné': "Ba neza zren naca na cheę nu'ula wizre, ne nu'ula ca' cabata' gulezúę' zi'i, ne nu'ula ca' cabata' bulugazre' bidau'." <sup>30</sup> Lu zra na' xelezú lau bėnneache xelę'e xi'a ca': "Le gugacu netu' xu'." Na' xelę'e xí'adu ca': "Le gucache netu'." <sup>31</sup> Che dxelunę' da caní chia' neda', naca' ca tu xaga ban, ¿gáhradxa xelunę' cheęle le'e, nácale ca xaga bizre ca'?

<sup>32</sup> Cá'anqueze guleché'e chupa benne' węn da zrinnaj cheę xelútię' le' tu zren nen Jesús. <sup>33</sup> Gate belezrine' lataj na' nazí le na, Calavera, da zéaję na, Xi'a Zrita Xíchajdxu, na' buludé'e Jesús xaga béguaj, ne cá'anqueze belunę' cheę benne' węn da zrinnaj ca', tuę' cuitę' xabęla, ne xetúę' cuitę' xęglala. <sup>34</sup> Ca dxuludé'e Le' xaga béguaj, na' gunná Jesús:

—Xrae, bnite lau cheę benne' caní lawe' da quebe zaj nézene' bi na' dxelunę'.

Na' benne' dxjaque' wedil-la gulebeje' da dxunna bea' cheę xelezı'e late' weaj zra lana Jesús. <sup>35</sup> Benne' ca' zaj zre'e na' dxelenné'e, ne benne' xu'u lawe' ca' belún le' cheę', dxelenné':

—Bselé' benne' xula ca'. Na'a dxal-la' guselá cuine' che da li naque' Cristo, Bėnnea' Gucá'a Dios.



<sup>36</sup> Cá'anqueze benne' dxjaque' wedil-la belún le' chee', na' gulebigue' cuita Jesús, ne buluxí'aje' Le' nupe zichaj. <sup>37</sup> Gulé'e Le':

—Che lue' nacu' Wenná Bea chee' judío ca', bselá cuinu'.

<sup>38</sup> Zua xichaj Jesús tu da naxúaj nen dizra' griego, ne dizra' latín, ne dizra' hebreo, da dxenná na:

—Wenná Bea chee' judío ca'.

<sup>39</sup> Tu benne' wən da zrinnaj, bēneea' de'e xaga béguaj bən le' chee' Jesús, dxenné':

—Che Lue' nacu' Cristo, bselá cuinu', ne bselatē ne-tu'.

<sup>40</sup> Na' xetú benne' wən da zrinnaj na' gudil-le' ljwezre'. Guzre' le':

—¿Quebe dxezrebu' Dios? Lue' dxezácaquezu' ca da gulechugue' chee' Le'. <sup>41</sup> Dxi'u dxezácadxu ca da dxál-la'queze sácadxu, lawe' da dxaca cheedxu da dxal-la' sidxu ca naca da zrinnaj da nundxu, san benne' nigá quebe bi da zrinnaj nune'.

<sup>42</sup> Nadxa gunné':

—Jesús, xeajsá lazre' neda' gate su lau' nna be'u.

<sup>43</sup> Na' bechebe Jesús:

—Da li dxapa' lue', ná'atēla súalequezu' neda' lu lataj chawe' chee' Dios.

#### Ca guca gate gute Jesús

(Mt. 27.45-56; Mr. 15.33-41; Jn. 19.28-30)

<sup>44</sup> Guca ca wagubizra. Nadxa ca naca lu xezr la xu guchul-la na cadxa bzrintē na dxedá' chunna. <sup>45</sup> Gubizra guchul-la na, na' ladxe' zē lu xudau' bdxuaj na chúpala. <sup>46</sup> Nadxa gudxezre xa'a Jesús, dxenné':

—Xrae, lu na'u dxegu'a be' xu'a.

Ca gunné' ca', na' gutiē'.

<sup>47</sup> Gate benne' dxenná bé'ene' benne' dxjaque' wedil-la blé'ene' ca da guca, na' bē lá'ane' Dios, gunné':

—Da li, benne' nigá quebe bi da zrinnaj bene'.

<sup>48</sup> Xúgute benne' ca' zaj zre'e na', gate belelé'ene' ca da guca, na' besiá'que' na', dxelu'e lachu'e. <sup>49</sup> Xúgute benne' ca' zaj núnbe'e Jesús, ne nu'ula ca' xjácálene' Jesús gate bezé'e Galilea, belexegá'ane' zítu'la dxelen-né'e da caní.

#### Dxulucache' Jesús

(Mt. 27.57-61; Mr. 15.42-47; Jn. 19.38-42)

<sup>50</sup> Zua tu benne' chawe' ne xrlátaje le' José, benne' xezre Arimatea chee' xezre ca' zaj nababa Judea. Nababe' xu'u lawe' blau chee' judío ca'. <sup>51</sup> José nigá dxebze' zra nna bea Dios, na' quebe bene' tuze ca da belún benne' xu'u lawe' blau ca'. <sup>52</sup> Benne' nigá guxiá-je' xeajchálajlene' Pilato, na' gunabe' latja gucache' Jesús. <sup>53</sup> Ca bexuzre buluxulétaje' Le' xaga béguaj, na' buluxuchelē' Le' tu ladxe', na' gulu'e Le' tu lu xedxu ba, da ba gudēne' tu le'e xi'a xiaj, naga quebe nu ne gácheque. <sup>54</sup> Naca na zra dxulucueze' chee' zra dxulupá'ane', da ba zua su lau na.

<sup>55</sup> Nu'ula ca' xjácálene' Jesús gate bezé'e xezre ca' zaj nababa Galilea, xjaque' na', ne belelé'ene' ba na', ne belené'e ájala zaj nagu'e Le' xedxu ba. <sup>56</sup> Gate belex-

ezrine' xu'u naga zaj zre'e, na' bulucueze' da du ca' dx-elelálē'e zixre, ne da zaj naca na ca za dxelalē'e na zixre. Belexezí' lazre' zra dxulupá'ane' cáteze naca da gunná bea Dios.

#### Ca guca gate bebán Jesús

(Mt. 28.1-10; Mr. 16.1-8; Jn. 20.1-10)

**24** Zra nedxu chee' da gazre zra, nu'ula ca' belezrine' dxu'a ba na' dxaní'sise', zaj nu'e ca naca da ca' dxelalá zixre da bulucueze', na' xebal-la nu'ula xjácálene' le'. <sup>2</sup> Gate belezrine' na', belelé'ene' xi-aj da guduse dxu'a ba na', québedxa naduse na naga guduse na. <sup>3</sup> Belú'e lu ba na', san quebe belexezrelne' Xránadxu Jesús na'. <sup>4</sup> Na' belezrebele'e, ne quebe zaj nézene' ájala xelune', na' belelé'ene' chupa benne' zaj zē' cuitē', zaj nacue' zra lanē' dxácatite na. <sup>5</sup> Nu'ula ca' belezú'e sudxú'ala lu xu, ne belezrebele'e. Na' benne' ca' gulé'e le':

—¿Bizr chee' na' dxexílajle le'e tu benne' naca banē' lálwela benne' gate? <sup>6</sup> Quebe zue' nigá, lawe' da ba be-banē'. Le gusá lázre' da bchálajlene' le'e gate ne zue' Galilea. <sup>7</sup> Gunné': "Benne' Guljē' Bēneache dxal-la' xuludé'e Le' lu na' benne' dul-la ca', na' xuludé'e Le' xaga béguaj, na' zra guxunne' zra xebanē'."

<sup>8</sup> Nadxa nu'ula ca' xeajlesá lazre' ca naca da gunná Jesús. <sup>9</sup> Ca gudé besiá'que' dxu'a ba na', na' belexezrine' lu xezre na', na' buluchálajlene' benne' chinéaj gubáz ca' chee' Jesús, ne xúgute benne' ca' xezica, ca naca da guca na'. <sup>10</sup> Nu'ula ca' xjaque' xeajlezenne' gubáz ca', zaj naque' María Magdalena, ne Juana, ne María xrna Jacobo, ne xebal-la nu'ula ca'. <sup>11</sup> Benne' gubáz ca' gulé'ene' da xálaze dxelenná nu'ula caní, na' quebe guléajle'e chee'.

<sup>12</sup> Nadxa bdxuaj Pedro, zeaj chégü'e dxu'a ba na', na' gate guné'e lu ba na', blé'ene' ladxe' da bedxela Jesús xu'u na chálá'ala, na' bezé'e zexíaje' xu'u naga guzē'e, dxexebánene' ca naca da guca.

#### Da guca lu neza da zeaj xezre Emaús

(Mr. 16.12-13)

<sup>13</sup> Lu zra ná'queze, zjaca chupa benne' ca' busede Jesús xezre Emaús, da naca na láte'ze zitu' naga zua Jerusalén. <sup>14</sup> Zjaque' dxuluchálaje' ca naca da guca lu zra ca'. <sup>15</sup> Dxácatē na' dxuluchálaje' caní, na' Jesús ná'queze gubigüe' cuita benne' ca', na' guzú lawe' zéajlene' le'. <sup>16</sup> Quebe belexúnbe'e Jesús, lawe' da guzúa tu da guxúa na xiaj lau benne' ca'. <sup>17</sup> Nadxa bchebe Jesús benne' ca':

—¿Bizra da na' dxuchálajle ljwézrele dxácatē xu'ule neza? ¿Bizr chee' na' zale dxewí'ine lázrele?

<sup>18</sup> Tu benne' ca' le' Cleofas bechebe':

—Xúgute benne' zaj nézene' ca da guca xezre Jerusalén lu zra caní. ¿Nacu' lue' benne' zitu' zu' Jerusalén, na' tuze lue' quebe nézenu' ca da guca na'?

<sup>19</sup> Nadxa Le' guzre' benne' ca':

—¿Bizra guca na'?

Gulé'e Le':

—Da guca chee Jesús, benne' Nazaret. Guque' tu benne' bchálaje' waláz chee Dios, na' xel-la waca zren ca' bene', ne bchálaje' dizra' lau Dios, ne lau xúgute bèneache. <sup>20</sup> Na' benne' xíchaje' ca' chee bxruze ca', ne benne' xu'u lawe' cheentu' ca' buludée' Le' chee gulechugue' chee' gatie', na' buludée' Le' xaga béguaj. <sup>21</sup> Netu' guleza lázrentu' Le' naque' Benne' dxal-la' guselé' xezr la xu Israel. Na'a, ba zeaj chunna zra guca da ca'. <sup>22</sup> Bal-la nu'ula ca' ládujla netu' buluzúaqueze' netu' lu da stébe, lawe' da xjaque' dxan'ísise' dxu'a ba chee' na', <sup>23</sup> na' gate quebe belexezrelne' Le', na' belexelée' naga zúantu', ne gulenné' belelé'ene' chupa gubáz chee' xabáa ca' bululée' lawe' nu'ula ca', na' gulée' le' nabán Jesús. <sup>24</sup> Nadxa bal-la benne' ljwézrentu' ca' xjaque' dxu'a ba na', na' belelé'ene' cáteze na' gulenná nu'ula ca', san quebe belelé'ene' Jesús.

<sup>25</sup> Nadxa gunná Jesús:

—Le'e quebe dxéajni'ile, na' ne naca zide' lázrdaule chee' quebe chéajlele xúgute da gulenná benne' ca' buluchálaje' waláz chee' Dios. <sup>26</sup> ¿Quebe dxal-la' saca Cristo da caní nédxudxa ca' xegá'ane' szren?

<sup>27</sup> Nadxa guzú lawe' dxuzéajni'ine' benne' ca' ca' naca xúgute da naxúaj lu xiche chee' Dios naga dxuchalaj na chee' Le'. Guzú lawe' lu xiche ca' chee' Moisés, na' ne zéajdxaqueze na lu xiche ca' chee' benne' ca' buluchálaje' waláz chee' Dios.

<sup>28</sup> Gate belezrine' lu xezre naga zjaque', Jesús bene' ca' benne' zeajteze' xu'e neza. <sup>29</sup> Na' benne' ca' buluxu-cá'ane' Le' xadía, dxelenné':

—Begá'analé netu', lawe' da ba zeaj dxezré', ne ba dxe' xrinnequeze na'a.

Nadxa Jesús guxú'ulene' benne' ca'. <sup>30</sup> Gate na' dxé'lene' le' dxelawe', guque'e xeta xtila, ne bzúzruje' na, na' guzre' Dios "Xcalenu", ne bnézruje' na benne' ca'. <sup>31</sup> La' ná'queze becuasa ca' naca da guxúa na xiaj lau benne' ca', na' belexúnbe'e Jesús, san la' ná'queze benite Le' lau benne' ca'. <sup>32</sup> Na' gulé' ljwezre':

—¿Quebe guzúa xel-la dxebe' lu lázrdaudxu gate ze'e dxuchálajlene' dxi'u tu neza, ne bzéajni'ine' dxi'u ca' naca da naxúaj lu xiche chee' Dios?

<sup>33</sup> Nadxa, ne québedxa gulezrene', belexegu'e neza, zeajxaque' Jerusalén, naga belelé'ene' zaj nazraga benne' chinéaj gubáz ca', ne benne' ljwezre' ca'.

<sup>34</sup> Benne' ca' zaj nazrague' na' gulée' benne' chupa ca':

—Da li bebán Xránadxu, na' Simón ba blé'ene' Le'.

<sup>35</sup> Nadxa benne' chupa ca' buluzenne' le' ca' naca da guca la neza, ne ca' belexúnbe'e Jesús gate bzúzruje' xeta xtila na'.

### Jesús dxulé'e lawe' benne' ca' xjácálene' Le'

(Mt. 28.16-20; Mr. 16.14-18; Jn. 20.19-23)

<sup>36</sup> Ne dxuluchálajte' caní gate ble'e lau Jesús gachaj lawe' benne' ca', na' bgape' le' diuzre, dxenné':

—Xela dxebeza zri lazre' súale na le'e.

<sup>37</sup> Na' benne' ca' belexruse', ne belezrébele'e. Guléquene' dxelelé'ene' bxinne dxela. <sup>38</sup> Na' Jesús guzre' benne' ca':

—¿Bizr chee' na' dxezrébele? ¿Bizr chee' na' dxaca chupa lázrele? <sup>39</sup> Le na' na'a caní, ne le na' ni'a. Né-da'queza' na'. Le gutá neda', ne le guxúe xque neda'. Tu bxinne dxela quebe napa na belá' zrita, ca' dxelé'ele le'e napa' neda'.

<sup>40</sup> Ca dxe'e benne' ca' da nigá, na' blé'ene' le' ne'e, ne ni'e. <sup>41</sup> Benne' ca' québequeze dxeléajle'e chee' lawe' da dxelebéle'ene', ne dxelexebánele'ene', na' guzre Jesús le':

—¿De late' da gawa' nigá?

<sup>42</sup> Nadxa bulunézruje' Le' late' belá' guzrúa xi', ne late' da zixre che' bezudau', <sup>43</sup> na' gucá'a Jesús da ca', ne gudawe' na lau benne' ca'. <sup>44</sup> Nadxa guzre' benne' ca':

—Da ba guca chia' naca na ca da gucha' le'e gate ne zúalequeza' le'e, gunnéa' dxal-la' gaca li ca' naca xúgute da naxúaj lu da bdxixruj be'e Moisés, ne lu xiche naga zaj naxúaj salmo ca', ne lu xiche ca' chee' benne' ca' buluchálaje' waláz chee' Dios.

<sup>45</sup> Nadxa bzéajni'ine' benne' ca' ca' da naxúaj lu xiche chee' Dios, <sup>46</sup> na' guzre' benne' ca':

—Caní naxúaj na dxal-la' gate Cristo, na' zra guxunne' zra dxal-la' xebane' ládujla benne' gate ca', <sup>47</sup> na' lu La Le' dxal-la' xuluchalaj bèneache lau xúgute xezr la xu ca'. Su lau gunle na lu xezre Jerusalén, xe'le bèneache dxal-la' xelexebí'i lazre' chee' gunite lau Dios dul-la zaj nabaga benne' ca'. <sup>48</sup> Le'e ná'cale benne' xelexechebe' da caní. <sup>49</sup> ¡Le nna'xque! Neda' sel-la' cheele ca' da guchebe lazre' Xra'. Le xegá'ana nigá lu xezre Jerusalén, cadxa si'le xel-la waca da za xabáa.

### Jesús dxexegüene' xabáa

(Mr. 16.19-20)

<sup>50</sup> Nadxa Jesús beche'e benne' ca', belexedxúaje' Jerusalén, xeajxaque' xezre Betania, na' guchisa na' Jesús, ne gunabe' gaca chawe' chee' benne' ca'. <sup>51</sup> Ne dxúntee' ca', na' bezé'e naga zaj zra' benne' ca', begüene' zexíaje' xabáa. <sup>52</sup> Ca' bexuzre belúe lá'ane' Le', besiá'que' zeajxaque' Jerusalén lu duté xel-la dxelebé, <sup>53</sup> na' gulezráqueze' chale'aj xudau' dxelúe lá'ane' Dios. Ca' naca na.

# San Juan

Bénnea' le' Xrtizra' Dios dxaque' bèneache

1 Gate guzú lau zua xúgute da de, ba zúaqueze Bénnea' le' Xrtizra' Dios, da zéaje na Benne' naque' duté da nácaqueze Dios, na' Bénnea' le' Xrtizra' Dios zúalene' Dios, ne nácaqueze' Dios. 2 Nédxudauté Benne' nigá zúalene' Dios. 3 Lu na' Benne' nigá ben Dios xúgute da de. Quebe bi de da quebe nun Le'. 4 Nácaqueze Le' xel-la' nabán, na' xel-la' nabán nigá naca na da dxusení na lu xichaj lázrdau bèneache chee xelaca bané'. 5 Xel-la' naxaní' nigá dxusení na lu da chul-la chee dul-la da zaj nabaga bèneache, na' da chul-la nigá quebe dxezeque na xusula na xel-la' naxaní' nigá.

6 Guzúa tu benne' le' Juan, gusel-la Dios benne'. 7 Benne' nigá ble'e chee bchálaje' ca naca chee Bénnea' naque' xel-la' naxaní' nigá, chee xelájle xúgute bèneache chee Bénnea' ne chee da dxenné'. 8 Juan nigá quebe naque' xel-la' naxaní' na'. Ble'e chee bchálaje' ca naca chee Bénnea' naque' xel-la' naxaní' nigá. 9 Xel-la' naxaní' li, da dxusení na lu xichaj lázrdau xúgute bèneache ba za' la' na lu xezr la xu nigá.

10 Bénnea' naque' Xrtizra' Dios zué' lu xezr la xu nigá, na' lácala ben Dios xezr la xu lu na' Bénnea', bèneache zaj zre'e lu xezr la xu quebe belexxúnbe'e Le'. 11 Ble'e naga zua da naca chee', na' benne' lazrié' ca' quebe gulez' lu ne'e Le'. 12 Benne' ca' gulez' lu ne'e Le', ne gulájle'e chee', be'e benne' caní lataj xelaque' bi ca' chee Dios. 13 Benne' caní québedxa zaj naque' ca zri'ine bèneacheze, bi ca' dxelálajbe' ne chee bèneache, u ne chee da dxezá lazre' tu benne'. Benne' caní zaj naque' bi ca' chee Dios ná'queze.

14 Bénnea' naque' Xrtizra' Dios gúlaje' ca tu bèneache, na' guzúe' ládujla dxi'u, zaj zúalé xel-la' zri'i lazre', ne da li Le'. Blé'entu' ca naca xel-la' szren chee', tu xel-la' szren da nunezruj Xradxu Dios chee Zrí'ine' tu licha'. 15 Juan bchálaje' ca naca chee Bénnea', gunné':

—Benne' nigá naque' Bénnea' bchálaja' neda' chee' gate gunnéa' Bénnea' ze'e te chia' neda' naque' szrendxa ca neda' lawe' da zúaqueze' nédxute ca neda'.

16 Xúgutedxu ba guzidxu xel-la' zri'i lazre' chee' da dxúnnaqueze Le'. 17 Bla' da nadxixruj bea Dios ládujla dxi'u lu na' Moisés, na' xel-la' zri'i lazre', ne da li belelá' na lu na' Jesucristo. 18 Netú benne' quebe ne lé'ene' Dios. Zrí'ine' tu licha', bi nazrí'ite lazre', benne' nigá guque' tuz ca nácaqueze Xre'.

Juan, benne' bchué' bèneache nisa, dxexechebe' chee Jesús

(Mt. 3.11-12; Mr. 1.7-8; Lc. 3.15-17)

19 Benne' xíchaje' ca' chee judío ca', benne' zaj zre'e Jerusalén, gulesel-le' bxruze ca', ne xrtia Leví, benne' ca' dxelune' zrin chee xudau', na' belezrine' lau Juan chee xuluchebe xánnie' le' nu naque'. 20 Bechebe Juan du lazre', gunné':

—Quebe naca' neda' Cristo. (Dizra' nigá zéaje na Benne' guchebe lazre' Dios sel-le'.)

21 Nadxa buluchebe' le':

—¿Nuzra nacu'? ¿Nacu' Elías, bènea' bchálaje' waláz chee Dios?

Bechebe Juan:

—Cabí.

Na' buluchébequeze' le':

—¿Nacu' bènea' dxal-la' le'e, ne guchalaje' waláz chee Dios, ca da gunná Moisés dxal-la' gaca na?

Le' bechebe':

—Cabí.

22 Nadxa buluchébedxaqueze' le':

—¿Nuzra nacu'? Dxun na ba xen gata' bi xeché'entu' chee benne' gulesel-le' netu'. ¿Bi dxennáquezu' nu nacu'?

23 Juan bechebe':

—Neda' naca' bènea' naxúaj na ca naca chee' lu xiche chee Dios, da dxenná: Wen chi'i tu benne' dxebze xe'e le'e xixre' lawe' lataj, dxenné': "Le salaj tu neza li naga te Xránadxu." Naquen cáteze gunná Isaías, bènea' bchalaje' waláz chee Dios.

24 Benne' xudau' fariseo ca' gulesel-le' benne' caní chee cheajlechálajle' Juan. 25 Le' buluchebe' le':

—Che lue' quebe nacu' Cristo, ne Elías, ne bènea' dxal-la' xedajchalaje' waláz chee Dios, ¿bi xel-la' dxenná bea napu' dxuchú' bèneache nisa?

26 Juan guzre' benne' ca':

—Neda' dxuchúa' bèneache nisa lu nísaze. Zua tu benne' ládujla le'e quebe nézele ca szren naque'.

27 Benne' nigá ze'e ca te chia' neda', na' zúaqueze' nédxudxa ca neda'. Quebe zaca' neda' cuéaja' zrele' da xu'u ni'e.

28 Xúgute da caní guca na lu xezr la xu chee xezre Betábara, da zua na chalá'a xegu Jordán naga dxalaj gubizra, naga zua Juan dxuchúe' bèneache nisa.

Jesús naque' Zríla'dau' chee Dios, be dxelutié' lau Dios ne chee xtul-le'

<sup>29</sup> Zra xula ble'e Juan dxezrín Jesús naga zué', na' gunné':

—¡Le nna'xque! Benne' nigá naque' Zríla'dau' chee Dios, cue' dul-la zaj nabaga bènneache. <sup>30</sup> Neda' bchálaja' ca naca chee' gate gunnéa': Te chia' neda' za tu benne' naque' szrendxa ca neda' lawe' da zúaqueze' nédxudauté ca neda'. <sup>31</sup> Neda'queza' quebe gunezda' nu naque'. Bla'a dxuchúa' bènneache nisa chee xeleneze xezre Israel nu Benne' naca Le'.

<sup>32</sup> Cá'anqueze gunná Juan:

—Neda' ble'eda' Be' Lá'azxa bétaje' xabáa ca tu bgugu chíchedau', ne begá'analene' Benne' nigá. <sup>33</sup> Neda' quebe ne nezda' nu naque'. Dios na' nasele' neda' chee guchúa' bènneache nisa, Le' guzre' neda': "Gate le'enu' Be' Lá'azxa xétaje' xegá'analene' tu benne', Benne' nigá gune' da zéaje' xel-la' dxedxúa nisa, guzúe' Be' Lá'azxa lu xichaj lárzdaule." <sup>34</sup> Na'a ba ble'eda' guca da nigá, ne dxexecheba' nácaqueze Benne' nigá Zrí'ine Dios.

#### Benne' nedxu ca' dxusede Jesús

<sup>35</sup> Zra xula zúaqueze na' Juan nen chupa benne' ca' dxusédené'. <sup>36</sup> Gate blé'ene' dxedé na' Jesús, na' gunná Juan:

—¡Le nna'xque! ¡Benne' nigá naque' Zríla'dau' chee Dios, bia gáteba' ne chee dul-la nabágadxu!

<sup>37</sup> Dxúpaté benne' ca' dxusede Juan belenne' ca da gunné', na' xjácálene' Jesús. <sup>38</sup> Nadxa bexechaj Jesús, gunné'e cúzrule', ne blé'ene' benne' ca' zá'aque' cúzrule', na' guzre' le':

—¿Bi dxexílajle?

Benne' caní gulé'e Jesús:

—Benne' Wesede, ¿gazra zu'?

<sup>39</sup> Jesús bechebe':

—Le da nna'le.

Nadxa xjácálene' Jesús, ne belelé'ene' naga zué', na' belexegá'analene' Le' zra na' lawe' da bache zeaj du dxedá' tapa.

<sup>40</sup> Tu benne' chupa ca', benne' belenne' ca da gunná Juan, ne xjácálene' Jesús, naque' Andrés, benne' biche Simón Pedro. <sup>41</sup> Andrés nigá la guxíajte' xeajdílaje' bi biche' Simón, na' guzre' le':

—Ba bezréntu' Mesías. (Dizra' nigá zéaje' na Cristo, Bénnea' guchebe lazre' Dios sel-le'.)

<sup>42</sup> Nadxa Andrés guché'e Simón naga zua Jesús, na' gate ble'e Jesús Simón na', na' guzre' le':

—Lue' nacu' Simón, zrí'ine Jonás. Si' lau' Cefas. (Dizra' hebreo nigá zéaje' na: Pedro, da zeaje' na: Xiaj.)

#### Jesús dxenné' Felipe ne Natanael

<sup>43</sup> Zra xula guca lazre' Jesús chéaje' naga nababa Galilea, na' bezrague' Felipe, ne guzre' le':

—Ben neda' tuze.

<sup>44</sup> Felipe nigá naque' benne' xezre Betsaida, da naca na lazre Andrés, ne Pedro. <sup>45</sup> Felipe guxíajte' xeajdílaje' Natanael, na' guzre' le':

—Ba bezréntu' Bénnea' bzuaj Moisés chee' lu xiche naga zaj naxúaj da nadxixruj bea na, ne cá'anqueze chee Benne' nigá buluzúaj benne' ca' buluchálaje' waláz chee Dios. Benne' nigá naque' Jesús, zrí'ine José, tu benne' xezre Nazaret.

<sup>46</sup> Na' gunná Natanael:

—¿Waca dxuaj tu da chawe' Nazaret?

Felipe bechebe':

—Gudá le'enu'.

<sup>47</sup> Gate ble'e Jesús za Natanael naga zué', gunné':

—Nigá za' tu benne' naca xánne' benne' Israel, benne' dxenné'queze' da dxéque'.

<sup>48</sup> Nadxa Natanael bchebe' Jesús:

—¿Ájazra naca núnbe'u neda'?

Jesús guzre' le':

—Ble'eda' lue' nédxudxa gate za nne Felipe lue', gate ze'u zran xaga higo.

<sup>49</sup> Nadxa Natanael guzre' Jesús:

—Benne' Wesede, Lue' nacu' Zrí'ine Dios. Lue' nacu' Wenná Bea cheentu', benne' Israel.

<sup>50</sup> Bechebe Jesús:

—¿Dxéajle' u chia' lawe' da gucha' lue' ble'eda' lue' zran xaga higo? Walé'enu' da zaj naca na da szrendxa ca da nigá. <sup>51</sup> Da li dxapa' le'e, walé'eezle le'e naxalaj xabáa, na' gubáz chee xabáa ca' chee Dios dxelétaje', ne dxexegüene' naga zua neda', Benne' Gulje' Bénneache.

#### Dxaca laní chee wechaga na' lu xezre Caná

**2** Zra guxunne zra, na' guca laní chee wechaga na' lu xezre Caná da nababa Galilea. Xrna Jesús zué' na', <sup>2</sup> na' zua nu gunné Jesús, ne benne' ca' dxusédené' lu laní na'. <sup>3</sup> Bebizre xrise uva wal-la, na' xrna Jesús guzre' le':

—Québedxa bi de xrise uva wal-la xelé'aje'.

<sup>4</sup> Jesús bechebe':

—Nú'uladau', ¿bizr chee na' dxu'u neda' caní? Quebe ne zrin zra gulé'e lau da naca'.

<sup>5</sup> Xrne' guzre' benne' wen zrin ca':

—Le gun ca naca da xe'e le'e.

<sup>6</sup> Zaj nnita xrupa xesu' xiaj na', da dxuluchine judío ca' gate dxelibe ni'a ne'e ca naca da zjácálene'. Tu tu xesu' xiaj ca' dxeluzru na chupa u chunna dxee nisa.

<sup>7</sup> Jesús guzre' benne' wen zrin ca':

—Le gusezrá nisa xesu' xiaj caní.

Gulegué'e nisa na, ne bulusuzrate' tu tu xesu' xiaj ca'.

<sup>8</sup> Nadxa Jesús guzre' benne' ca':

—Le ca'a na, na'a, ne le gua na lau benne' ze' dxu'a ga dxelawe'.

Ca'an belune'. <sup>9</sup> Bénnea' zué' dxu'a ga dxelawe' bxue' nisa na' da bexaca na xrise uva wal-la, ne quebe nézene' ga za na. Benne' wen zrin ca' zaj nézene' ga za na lawe' da gulegué'e nisa na'. Nadxa bénnea' zué' dxu'a ga dxelawe' gunné' benne' wechaga na', <sup>10</sup> na' guzre' le':

—Xúgutę benne' dxelebéaje' nedxu xrise uva wal-la nácadxa chawe', na' gate ba gulé'ajlęę benne' ca' zaj zřeę laní, nadxa dxelebéaje' xrise uva wal-la quebe zúateca chawe'. Lue' bcuézaquezu' xrise uva wal-la chawe' na', ne guléaju' na' na'a.

<sup>11</sup> Da nigá da bęn Jesús lu xęzre Caná da nababa Galilea naca na tu xel-la' waca zrentę da bęne' nedxu, da ble'e na xel-la' szren cheę, na' benne' ca' dxusé-dene' guléajlęę cheę'.

<sup>12</sup> Gudé na' Jesús bezéę zexíaje' xęzre Capernaum, zéajlę xrneęę Lę' nen benne' biche' ca', ne benne' ca' dxusédenę'. Na' gulezúę' na' zane' zra.

### Jesús dxucá'ana chawe' chale'aj xudau'

(Mt. 21.12-13; Mr. 11.15-18; Lc. 19.45-46)

<sup>13</sup> Na' Jesús guxíaje' xęzre Jerusalén lawe' da ba za Laní Pascua gate benne' judío ca' dxulusá lazre' ca bęn Dios, bebéaje' xra xrtawę' ca' lu xęzr la xu Egipto. <sup>14</sup> Lu xęzre Jerusalén blé'engę' lu chale'aj xudau' na' zaj zra' benne' dxelexutię' bęzre ca', ne zrila' ca', ne bgúgudu ca', béadu ca' dxelutię' lau Dios. Cá'anqueze blé'engę' na' benne' dxuluxuchéę' dumí cheę xęzr zitu' ca'.

<sup>15</sup> Gate ble'e Jesús da caní, na' bguęę du ca' da güęę benne' ca', na' bebéaje' ca naca benne' ca' tu zrentę nen bęzre cheę' ca', ne zrila' cheę' ca'. Na' gudxú'unę' lu xula dumí cheę benne' ca' dxuluxuchéę' dumí, ne bdxixre' blaga' ca' cheę benne' ca'. <sup>16</sup> Na' guzre' benne' ca' dxelexutię' bgúgudu ca':

—¡Le xebéaj da caní! Quebe gunle lizre Xra' ca tu lawe' xi'a.

<sup>17</sup> Nadxa benne' ca' dxusęde Jesús xejlesá lazre' da naxúaj na lu xiche cheę Dios, da dxenná na: Dxácatę zi lázrdawa' lawe' da dxé'le'a gunne xue cheę lizru'.

<sup>18</sup> Nadxa judío blau ca' buluchębe' Jesús:

—¿Bi xel-la' waca da za xabáa gulé'enu' netu' da gulé'e na napu' xel-la' dxenná bea dxunu' da caní?

<sup>19</sup> Bechębe Jesús:

—Le guzrí xi' xudau' nigá, na' neda', te chunna zra xechisa' na.

<sup>20</sup> Nadxa judío ca' gulé'ę Lę':

—Xrupe xun iza ba zeaj dxelunę' xudau' nigá, na' Lue', ¿xechisu' na chunna zraze?

<sup>21</sup> Bchalaj Jesús cheę xudau' na' da naca na bęl-la' dx-en cheę'. <sup>22</sup> Cheę lę na', gate bebán Jesús ládujla benne' gate, na' benne' ca' bsédenę' xejlesá lazre' ca da gunné', na' guléajlęę cheę da naxúaj na lu xiche cheę Dios ca naca cheę Jesús, ne cheę da guzre Jesús lę'.

### Jesús núnbe'ę xúgutę bęnneache

<sup>23</sup> Gate zua Jesús xęzre Jerusalén lu Laní Pascua cheę judío ca', na' benne' zan guléajlęę cheę' gate belelé'engę' ca naca xel-la' waca zren ca' da dxunę'.

<sup>24</sup> Jesús quebe bde cuinę' lu na' benne' ca' lawe' da nézquezne' quegá xúgutę benne' ca' dxeléajlęę cheę'.

<sup>25</sup> Quebe guchínengę' nu benne' xęęę Lę' ca zaj naca bęnneache lawe' da nézquezne' ca da zaj xu'u xichaj lázxdau bęnneache.

### Jesús dxuchálajlęę Nicodemo

**3** Zua tu benne' xudau' fariseo lę' Nicodemo.

Naque' benne' blau lówela benne' judío ca'.

<sup>2</sup> Benne' nigá guxíaje' xejjnęę Jesús chizrela, na' guzre' Lę':

—Benne' Wesęde, nézentu' Dios nasel-lę' Lue' cheę gusédenu' netu' lawe' da quebe nu benne' gaca gunę' ca zaj naca xel-la' waca zrentę da dxunu' Lue' che quebe zúalę Dios lę'.

<sup>3</sup> Nadxa Jesús guzre' lę':

—Da li dxapa' lue', nu benne' quebe gálaje' xecha lasa quebe gaca gaquę' tuze benne' ca' dxenná be'e Dios.

<sup>4</sup> Nicodemo bchębe' Jesús:

—¿Ájazra gaca xexalaj tu benne' ba naque' gula? ¿Waca xexu'ę lę'e xrneęę cheę gálaje' xetú?

<sup>5</sup> Jesús bechębe':

—Da li dxapa' lue', nu benne' quebe gálaje' nę cheę nisa cheę xrtizra' Dios, ne nę cheę Be' Lá'azxa, quebe gaca chu'ę naga dxenná bea Dios. <sup>6</sup> Benne' nálaje' lu ni'a lu na' bęnneache, naque' bęnneacheze. Nu benne' nálaje' nę cheę Be' Lá'azxa, naca ban bęnnea' nę cheę Be' Lá'azxa. <sup>7</sup> Quebe xebánenu' lawe' da dxapa' lue', dxun na ba xen gálaju' xecha lasa. <sup>8</sup> Gátetęze dxaca be'. Dxennu' ca schaga da dxun na, na' quebe nézenu' gala za na, ne gala zeaj na. Cá'anqueze naca cheę benne' zaj nálaje' nę cheę Be' Lá'azxa. Gaca le'enu' da ba nun Be' na' lu xichaj lázxdau bęnnea', na' quebe dx-elé'enu' ájala dxun Be' na'.

<sup>9</sup> Nadxa Nicodemo bchębe' Jesús:

—¿Ájazra gaca da caní?

<sup>10</sup> Bechębe Jesús:

—Lue' nacu' tu benne' wesęde blau ládujla benne' Israel ca', na' ¿quebe nézenu' da caní? <sup>11</sup> Da li dxapa' lue', netu' dxuchálajntu' ca naca da nézentu', ne dxex-echębentu' ca da blé'entu', na' le'e quebe dxéajlęle da dxentu' le'e. <sup>12</sup> Che quebe dxéajlęle chia' gate dx-uchálajlęna' le'e ca naca cheę da dxaca lu xęzr la xu nigá, ¿ájazra gaca chéajlęle chia' che guchálajlęna' le'e cheę da dxaca xabáa?

<sup>13</sup> Quebe ne cuen tu benne' xabáa cheę lé'engę' ca dxaca na'. Tuze Bęnnea' bétaje' xabáa, Bęnnea' naca' neda', Benne' Gulję' Bęnneache, naca' Bęnnea' zúaquezę' xabáa. <sup>14</sup> Ca bęn Moisés, bdeęę tu bęla' xia lęę xaga naga zua lęę xixre' lawe' lataj, cá'anqueze neda', Benne' Gulję' Bęnneache, wuludá'quezę' neda' tu lęę xaga, <sup>15</sup> cheę quebe xelebía xi' nu benne' xeléajlęę chia'. Zrué'e bęnnea' xel-la' nabán da zeajlí canna.

### Dios dxezr'i lazre' bęnneache

<sup>16</sup> Dios dxezr'i lázre'ęngę' bęnneache, na' cheę lę na' bdeę' Zrí'inę' tu licha' cheę quebe xelebía xi' nu benne' dxeléajlęę cheę'. Zrué'e bęnnea' xel-la' nabán da zeajlí canna. <sup>17</sup> Dios gusél-lę' Zrí'inę' lu xęzr la xu nigá, quegá cheę guzrí xi'ę bęnneache, san cheę guselé' bęnneache.

<sup>18</sup> Bénnea' dxéajlê'e chee Zri'ine Dios quebe naca chee' cuía xi'e, san nu benne' quebe dxéajlê'e chee' ba naca chee' cuía xi'e lawe' da quebe dxéajlê'e chee' Zri'ine Dios, bi tu licha' chee'. <sup>19</sup> Benne' ca' quebe dx-eléajlê'e chee' ba zaj naca chee' cuía xi'e lawe' da gate bla' xel-la' naxaní' lu xezr la xu nigá, beledánedxene' da chul-la ca xel-la' naxaní', lawe' da dxelunê' da calêla. <sup>20</sup> Xúgute benne' dxelunê' da calêla dxelecuídene' xel-la' naxaní', ne quebe dxelebigue' lu xel-la' naxaní', chee' quebe gaca bea da calêla da dxelunê'. <sup>21</sup> Benne' ca' dxelunê' ca naca da li dxelebigue' lu xel-la' naxaní' chee' gaca bea naca na chee' Dios da dxelunê'.

### Da gunná Juan, bénnea' bchuê' bénneache nisa

<sup>22</sup> Gudé na' guxíaj Jesús naga nababa Judea nen benne' ca' dxusédene', na' guzúe' na' zane' zra nen benne' ca', dxuluchúe' bénneache nisa. <sup>23</sup> Cá'anqueze zua Juan lu xezr la xu chee' xezre Enón da zua gáguze naga dx'e xezre Salím, dxuchúe' bénneache nisa lataj na' lawe' da déle'e na' nisa zila, na' belezrín benne' zan naga zua Juan, na' beledxúe' nisa. <sup>24</sup> Da nigá guca na nédxudxa gate quebe ne xelegú'e Juan lizre xia.

<sup>25</sup> Nadxa bal-la benne' zaj de'e Juan gulezú lawe' dxu-lutil-le' judío ca' dizra' ca naca chee' da dxucá'ana chawe na bénneache lau Dios. <sup>26</sup> Nadxa xeajleguezre' Juan:

—Benne' wesede, bénnea' blê'e naga zu' chala'a xegu Jordán naga dxalaj gubizra, bénnea' bchalajlenu' netu' chee', na'a dxuchúe' bénneache nisa, na' xúgute bénneache zjácálêne' Lê'.

<sup>27</sup> Nadxa Juan guzre' benne' ca':

—Quegá nu benne' gaca bi gapê' che quebe gunezruj Dios na chee'. <sup>28</sup> Le'e bénquezle gunnía' neda' quebe nácaqueza' neda' Cristo, Bénnea' guchêbe lazre' Dios sel-lê'. Naca' tu benne' nasel-la Dios chee' quia lawa' lau Lê'. <sup>29</sup> Lu laní chee' wechaga na', bénnea' si'e nu'ula wechaga na' naque' benne' wechaga na', na' benne' ljwezre benne' wechaga na', bénnea' zuê' na', ne dxenne' chee', dxebéle'êne' gate dxenne' da dx-uchalaj benne' wechaga na'. Cá'anqueze neda' dxe-béle'êda' lawe' da caní naca' ljwezre Cristo. <sup>30</sup> Lê' dxal-la' gácadxê' szren, na' neda' dxal-la' gácadxá' cá'aze.

### Ca naca chee' Bénnea' za' xabáa

<sup>31</sup> Na' gunná Juan:

—Bénnea' za' xabáa nácadxê' blau ca xúgute bénneache. Benne' naque' chee' xezr la xu nigá naque' bénneacheze, ne dxuchálajê' ca naca chee' da dxaca lu xezr la xu nigáze. Bénnea' zê'e xabáa nácadxê' szren ca xúgute bénneache. <sup>32</sup> Lê' dxuchálajê' ca naca chee' da ba blé'ene', ne da ba benne' xabaala, na' quebe dxéajlê' nu benne' chee' da dxennê'. <sup>33</sup> Che nu benne' dxéajlê'e chee', benne' nigá dxulé'ene' naca li ca da dxenná Dios. <sup>34</sup> Bénnea' nasel-la Dios dxuchálajê' xrtizra' Dios lawe' da dxunna Dios Lê' Be' Lá'azxa chee' dutê ca naque'. <sup>35</sup> Xradxu Dios nazrí'ine' Zrí'inequeze', ne ba bdeê' lu ne'e xúgute da de. <sup>36</sup> Nu benne' dxéajlê'e chee'

Zri'ine Dios napê' xel-la' nabán da zeajlí canna, na' benne' quebe dxuzúe' dizra' chee' Zri'ine Dios quebe gapê' xel-la' nabán caní. Wadêe' lu da ba xa' da gun Dios.

### Dxuchálajê Jesús tu nu'ula chee' tu xezre nababa na Samaria

<sup>4</sup> Benne' fariseo ca' belenne' zjácálê benne' zandxa Jesús ca benne' zjácálêne' Juan, na' dxuchúa Jesús benne' zandxa nisa ca benne' dxuchúa Juan nisa.

<sup>2</sup> Quebe dxuchúaqueze Jesús bénneache nisa. Benne' ca' dxusédene' dxuluchúe' bénneache nisa. <sup>3</sup> Gate guque be'e Jesús da nigá, na' bezê'e naga nababa Judea, xexíajê' naga nababa Galilea.

<sup>4</sup> Ca xu'u Jesús neza, ben na ba xen té'e naga nababa Samaria. <sup>5</sup> Ca'an guca, bzrine' tu xezre naga nababa Samaria nazí le na Sicar, da dx'e gáguze naga zua xezr la xu na' bnezruj Jacob chee' zrí'ine', bi lêbe' José. <sup>6</sup> Lu xezr la xu na' gudên Jacob, zre sua Abraham, tu beaj situj. Ba dxeajxreque Jesús xu'e neza, na' gudxê'e dxu'a beaj na'. Naca na zran wagubizra. <sup>7</sup> Benne' ca' dxusêde Jesús xjaque' lu xezre Sicar, xeajlegá'awe' da xelawe'. Dxácatê na' bzrin tu nu'ula Samaria dxu'a beaj na' zeajxri'e nisa, na' Jesús guzre' lê':

—Benna nisa xí'aja'.

<sup>9</sup> Nadxa nu'ula na' bechêbe':

—¿Ájazra naca, lue', benne' judío, dxenabu' neda' nisa, naca' nu'ula Samaria?

Caní gunné' lawe' da quebe zaj zra' chawe' benne' judío ca' nen benne' Samaria ca'. <sup>10</sup> Nadxa bechêbe Jesús:

—Chela nézenu' da dxunna Dios, ne nua' dxenabê' lue' nisa xí'ajê', lue' nábenú' neda', na' neda' gunna' lue' nisa da gunna na lue' xel-la' nabán.

<sup>11</sup> Na' nu'ula na' guzre' Lê':

—Benne', quebe bi nuxru' cuéaju' nisa, na' beaj nigá nácalê'e na situj. ¿Ájazra na' gunu' gunnu' neda' nisa chee' xel-la' nabán? <sup>12</sup> Xra xrtáuntu', Jacob, benne' netu' beaj nigá, naga güé'eqeze lê' nisa, ne naga gulé'ajqueze zrí'ine', ne bê xixre' chee'. ¿Nácadxu' szrendxa ca lê'?

<sup>13</sup> Jesús bechêbe':

—Xúgute benne' dxelé'ajê' nisa chee' beaj nigá welexebílequezne' nisa. <sup>14</sup> Nu benne' xí'ajê' nisa da gunézruja' neda', québedxa bílene' na, lawe' da nisa na' dxunézruja' neda' galaj na lu xichaj lázrdawe' ca tu beaj nisa da gunna na lê' xel-la' nabán da zeajlí canna.

<sup>15</sup> Nadxa nu'ula na' guzre' Lê':

—Benne', benne' neda' nisa na', chee' québedxa gun na ba xen xida' nigá xedajxr'a nisa.

<sup>16</sup> Na' Jesús guzre' nu'ula na':

—Guxíaj xeajnnê' benne' chiu', na' xídale nigá.

<sup>17</sup> Na' bechêbe nu'ula na':

—Quebe nu chilá' benne' chia'.

Nadxa Jesús guzre' lê':

—Da li dxennáu' quebe nu chilá' benne' chiu', <sup>18</sup> lawe' da ba guzúalênu' gazxu' benne', na' bénnea' zúalênu'

na'a quebe naque' benne' chiu'. Ca naca da nigá gun-náu' da li.

<sup>19</sup> Gate nu'ula' benne' da nigá, na' gunné':

—Xran, dxéqueda' nacu' lue' benne' dxuchalaje' waláz chee Dios. <sup>20</sup> Xra xrtáuntu' ca' bulucá'ana szrené' Dios lu xi'a nigá, na' le'e, benne' judío, dxennale dxun na ba xen gucá'ana szrendxu Dios xezre Jerusalén.

<sup>21</sup> Na' bechebe Jesús:

—Guxéajle' chia', nu'ula. Ba za zra gate le'e gucá'ana szrenle Xradxu Dios, ne quebe gun na ba xen xídale lu xi'a nigá, ne quebe gun na ba xen chéajle Jerusalén.

<sup>22</sup> Le'e, benne' Samaria, quebe núnbeale nua' dxucá'ana szrenle. Netu' núnbeantu' Nua' dxucá'ana szrentu', lawe' da za' benne' weselá ládujla benne' judío ca'. <sup>23</sup> Wazrín zra, ne ba dxezrín zra na', gate benne' ca' da li dxulucá'ana szrené' Xradxu Dios, xeluné' na ne chee Be' Lá'azxa, ne ne chee da li, lawe' da dxaca lazre' Xradxu Dios xulucá'ana szren bèneache Le' caní. <sup>24</sup> Dios naque' Be', na' benne' dxulucá'ana szrené' Le', dxun na ba xen xulucá'ana szrené' Le' ne chee Be' Lá'azxa, ne ne chee da li.

<sup>25</sup> Na' nu'ula na' guzre' Le':

—Neda' nezda' walá' benne' Mesías (da zéajé na Cristo), na' gate la' Le', na' guzéajni'ine' dxi'u ca naca xúgute.

<sup>26</sup> Jesús guzre' le':

—Neda' naca' Bénnea', dxuchálajle' lue'.

<sup>27</sup> Ca gunné' ca', na' belexezrín benne' ca' dxusede' na' belexebánene' lawe' da dxuchálajle' Jesús tu nu'ula Netúe' quebe bexázrjene' guchebe' Le' bi da dxaca lazre', u bizra cheen dxuchálajle' nu'ula na'.

<sup>28</sup> Nadxa nu'ula na' bca'ane' dxe'e chee' dxu'a beaj na', na' bezé'e xezíajé' xezre na' naga xezre' benne' ca':

<sup>29</sup> —Le da lé'ele tu benne' guzre' neda' xúgute da ba bēna'. ¿Quegá benne' nigá Cristo, Bénnea' sel-la Dios?

<sup>30</sup> Nadxa beledxúaj benne' ca' xezre na', zjaque' naga zua Jesús. <sup>31</sup> Dxácatē na', benne' ca' dxusede Jesús gulata' xuene' Le', gulenné':

—Benne' Wesēde, gudagu late'.

<sup>32</sup> Jesús guzre' benne' ca':

—De da dxawa', da quebe núnbeale le'e.

<sup>33</sup> Nadxa benne' ca' dxusede Jesús gulezú lawe' dxuluchēbe ljwezre', dxelenné':

—¿Núteca bedajgú'e da gudawē'?

<sup>34</sup> Jesús guzre' le':

—Xela wagu chia' naca na chee guna' da dxaca lazre' Xra', Bénnea' nasele' neda', ne chee gusexuzra' guna' zrin chee'. <sup>35</sup> Le'e dxennale: "Xetapa beu' xelápadxu." Neda' dxapa' le'e, le nna' bèneache zaj naque' ca tu lina, da bache naca na xelápadxu. <sup>36</sup> Benne' dxelape' dxezi'e lazruj chee', na' da dxelape' naca na chee xelapa bèneache xel-la' nabán da zezjí canna, chee sua xel-la' dxebe' benne' dxaza tu zren nen benne' ca' dxelape'. <sup>37</sup> Da li naca ca da dxelenná bèneache: Tu benne' dxaze', na' xetúe' dxelape'. <sup>38</sup> Neda' gusel-la' le'e xelápale naga quebe gúzale. Ca' naca na, benne' xula beluné' zrin gulaze', na' le'e dxezile ba neza zrin da belún benne' ca'.

<sup>39</sup> Benne' zan, benne' xezre na' naga nababa Samaria, guléajle'e chee Jesús ne chee xrtizra' nu'ula na', gunné': "Guzre' neda' xúgute da ba bēna'." <sup>40</sup> Gate belelé' benne' Samaria ca' naga zua Jesús, na' gulata' xuene' Le' xegá'ane' nen le', na' begá'ane' na' chupa zra. <sup>41</sup> Benne' zandxa guléajle'e chee Jesús gate belene' ca da dxenná Le'. <sup>42</sup> Nadxa gulé'e nu'ula na':

—Na'a dxéajle' chee' quegá tuze ne chee da guzru' lue' netu', na' cá'aqueze lawe' da bēnquezen-tu' netu' chee', na' nézentu' da li naque' Cristo, Bénnea' guselé' ca naca bēneache.

### Jesús dxexuné' zri'ine tu benne' wen zrin blau chee xu'u lawe'

<sup>43</sup> Gudé chupa zra bezá' Jesús xezre ca' zaj nababa Samaria, na' guzre' zéajé' naga nababa Galilea.

<sup>44</sup> Guxíajé' na' lawe' da gunnáqueze Jesús, gunné': "Tu benne' dxuchalaje' waláz chee Dios, quebe dxelapa benne' lazre' le' ba lá'ana." <sup>45</sup> Gate bezrine' naga nababa Galilea, benne' zaj zre'e na' belez' lu ne'e Le' du lazre', lawe' da xjácaqueze le' Laní Pascua da guca na Jerusalén, na' belélé'ene' xúgute da bēn Jesús lu laní na'.

<sup>46</sup> Nadxa bezrín Jesús xezre Caná naga nababa Galilea naga bēne' bexaca nisa xrise uva wal-la. Zua lu xezre Capernaum tu benne' wen zrin blau chee xu'u lawe', zua tu zri'ine' bi biu quebe chawe' zúabe'. <sup>47</sup> Gate ben benne' wen zrin blau nigá ba bezá' Jesús naga nababa Judea, ne ba bezrine' naga nababa Galilea, na' guxíajé' xezrine' Jesús, na' gutá' xuene' Le' chéajé' lize' xexuné' bi biu chee', bi na' ba zua gátebe'.

<sup>48</sup> Nadxa Jesús guzre' le':

—Le'e quebe chéajlele chia' che quebe lé'ele xel-la' waca chee xabáa da dxulé'eda'.

<sup>49</sup> Benne' wen zrin blau na' gunné':

—Xran, gudázega na'a quebe ne gate zri'ina'.

<sup>50</sup> Nadxa guzre Jesús le':

—Bexíaj lizru'. Naca ban bi chiu'.

Benne' wen zrin blau na' guxéajle'e chee da guzre Jesús lé', na' bezé'e xezíajé'. <sup>51</sup> Gate ba zua xezrine' lize', na' benne' wen zrin chee' xezre' xezríajé' le', na' gulé'e le':

—Naca ban zri'inu'.

<sup>52</sup> Nadxa bchebe' benne' ca' bātala guzú lau bexácabe', na' gulé'e le':

—Ná'aqueze dxedé wagubizra bedxúaj da la da xu'ube'.

<sup>53</sup> Nadxa benne' wen zrin blau na' bexúnene' guca na la' ná'queze gate guzre Jesús le': "Naca ban zri'inu'." Ca'an guca, le', ne xúgute benne' zaj zra' lize' guléajle'e chee Jesús.

<sup>54</sup> Da nigá naca na xel-la' waca zren da gudxupe' da bēn Jesús gate bezrine' naga nababa Galilea.

### Jesús dxexuné' tu benne' biu naga nazí le na Betesda

**5** Ca gudé na' guxú'u tu laní chee judío ca', na' bezrín Jesús xezre Jerusalén. <sup>2</sup> Lu xezre na',

gáguze naga zua dxa xu'u chee xezre da nazí le na Dxa Xu'u Chee Zrila' Ca', dxe' tu cue'la nisa nazí le na Betes-da lu dizra' hebreo, na' dxu'a nisa na' zaj nnita gazxu' lachila. <sup>3</sup> Lachila ca' zaj de benne' zan zaj xu'e we', benne' la chul-la ca', ne benne' zaj zua zri ni'a ne'e, ne benne' zrinna' ca'. Dxelebeze' ca bixre nisa na'. <sup>4</sup> Ca'an naca lawe' da djetaj tu gubáz chee xabáa bata gala, ne dxunibe' nisa na', na' benne' nedxu dxeajchu'e lu nisa na' ca dxedé dxunibe' na, dxexaque' chee biteteze xel-la' we' xu'e. <sup>5</sup> Zua tu benne' na' ba guca chinu chunne dxua iza xu'e we'. <sup>6</sup> Gate ble'e Jesús benne' nigá, ne dxeque bé'ene' ba guca zane' iza xu'e we' na', na' bchebe' le':

—¿Dxaca lazru' xexacu'?

<sup>7</sup> Benne' we' na' bechebe':

—Benne', quebe nu chilá' benne' cu'e neda' lu nisa na' ca dxedé dxe bixre na. Tu tu lasa gate dxaca lazra' chu'a, benne' xula dxu'e nédxudxa.

<sup>8</sup> Jesús guzre' le':

—¡Guxasa! Becá'a da'a chiu', ne bexiaj.

<sup>9</sup> La' ná'queze bexaca benne' we' na', na' bequ'e da'a chee', ne guzú lawe' dxedé'. Zra na' naca zra dx-ulupá'ana judío ca', <sup>10</sup> na' benne' judío ca' gulé'e bènea' bexaque':

—Na'a naca na zra dxupá'anadxu. Quebe naca na gu'u da'a chiu'.

<sup>11</sup> Na' benne' na' bechebe':

—Bé'nea' bexune' neda' guzre' neda': "Becá'a da'a chiu', ne bexiaj."

<sup>12</sup> Nadxa buluchebe' le':

—¿Nuzra na' guzre' lue': Becá'a da'a chiu', ne bexiaj?

<sup>13</sup> Benne' na' quebe nézene' nu bènea' bexune' le' lawe' da ba zexiaj Jesús lálwela benne' zan ca' zaj zre'e na'. <sup>14</sup> Ca gudé na' Jesús bezrague' bènea', dxedé' chale'aj xudau', na' guzre' le':

—¡Gunná'xque! Ba bexacu' na'a. Québedxa gunu' dul-la, chee quebe bi sacu' xetú da wál-ladxu.

<sup>15</sup> Nadxa benne' na' bezé'e zexiaje', na' bzenne' judío ca' bexún Jesús le'. <sup>16</sup> Chee le' na' benne' judío ca' gulá'u zi' xuzre' Jesús, ne gulaca lazre' xelúti'e le' lawe' da dxune' da caní lu zra dxulupá'ane'. <sup>17</sup> Jesús guzre' benne' ca':

—Dios, Xra', tu dxúnzqueze' zrin, na' neda' dxuna' zrin.

<sup>18</sup> Chee le' na' benne' judío ca' gulaca lázredxe' xelúti'e Jesús lawe' da quegá tuze dxuzú'e chálá'ala da nadxixruj bea na chee zra dxulupá'ane', na' cá'anqueze dxun cuine' ca Dios gate gunné' Dios nácaqueze' Xre'.

### Xel-la' dxenná bea da napa Zri'ine Dios

<sup>19</sup> Nadxa Jesús guzre' benne' judío ca':

—Da li dxapa' le'e, neda', Zri'ine Dios, quebe gaca bi guna' cheézqueza'. Tuze dxuna' da dxelé'eda' dxun Xra'. Xúgutē da dxun Xra', cá'anqueze dxuna' neda', Zri'ine'. <sup>20</sup> Dios, Xra', nazrí'ine' neda', Zri'ine', ne dxul'é'ene' neda' xúgutē da dxúnqueze' le', na' gul'é'ene' neda' da zaj nácadxa szren ca da ca' dxuna', na' xebánequeze le'e ca xelaca na. <sup>21</sup> Ca dxun Xradxu Dios,

dxusebanē' benne' gate, ne dxuxunézruje' xel-la' nabán chee', cá'anqueze neda', Zri'ine', dxuxunézruja' xel-la' nabán chee' benne' ca' dxaca lazra' xunézruja' na. <sup>22</sup> Xradxu Dios quebe dxuchi'e nu benne', san ba bēnne' neda', Zri'ine', xel-la' dxenná bea guchi'a da dxelún tu tu bēnneache, <sup>23</sup> chee xelapa xúgutē benne' neda', Zri'ine', ba lá'ana, cáteze na' dxelape' ba lá'ana Dios, Xra'. Nu benne' quebe dxape' ba lá'ana neda', Zri'ine', cá'anqueze quebe dxape' ba lá'ana Xradxu Dios nasel-le' neda'.

<sup>24</sup> Da li dxapa' le'e, benne' dxenne' da dxennéa' neda', ne dxéajle'e chee Dios nasel-le' neda', benne' nigá nape' xel-la' nabán da zeajlí canna, na' quebe cuía xi'e lawe' da ba bedxúaje' lu na' xel-la' gute, ne ba zue' lu xel-la' nabán. <sup>25</sup> Da li dxapa' le'e, wazrín zra, ne ba dx-ezrín zra na' gate benne' gate ca' xelenne' chi'a neda', Zri'ine Dios, na' benne' xuluzúa xrtizra' welaca bān-queze'. <sup>26</sup> Xráqueza' nape' xel-la' dxenná bea xunézruje' xel-la' nabán da naca na li lazre' chee bēnneache, ne cá'anqueze ba bēnne' neda', Zri'ine', xel-la' dxenná bea xunézruja' bēnneache xel-la' nabán caní, <sup>27</sup> ne ba bēnne' neda' xel-la' dxenná bea guchi'a chee bēnneache lawe' da naca' Benne' Gulje' Bēnneache. <sup>28</sup> Quebe xebánele chee da nigá lawe' da zrin zra gate xúgutē benne' gate xelenne' chi'a <sup>29</sup> xelexedxúaje' lu xēdxu ba. Benne' ca' belune' da xrlátaje xelexebane' chee xelape' xel-la' nabán da zeajlí canna. Benne' ca' belune' da calēla xelexebane' chee xelebía xi'e.

### Da dxelunna bea na napa Jesús xel-la' dxenná bea

<sup>30</sup> Na' gunná Jesús:

—Neda' quebe bi gaca guna' cheézqueza'. Neda' dxuchi'a chee bēnneache ca gunná bea Dios, Xra', neda', na' ca dxuchi'a naca na xrlátaje lawe' da quebe dxuna' ca da dxaca lázrequeza' neda'. Dxuna' ca da dxaca lazre' Xra', nasel-le' neda'. <sup>31</sup> Che neda' dxexecheba' da nácaze cheéqueza', da dxennéa' quebe naca na da dxunna bea na. <sup>32</sup> Zua tu benne' xula dxexechebe' da nácaqueze chia', na' da dxenné' naca na da dxunna bea na. <sup>33</sup> Le'e gusél-lale benne' xejlechebe' Juan, na' ca da bechebe' naca na da li. <sup>34</sup> Da dxunna bea na da dxuxrén lazra' neda' quebe naca na chee bēnneacheze. Dxapa' le'e da nigá chee lale le'e. <sup>35</sup> Juan na' guque' ca tu xi' da gula na, ne bsení na, na' le'e bezaca ba lázrele lu xi' na' tu chí'idau'. <sup>36</sup> Zua tu da dxunna bea na chia' neda', da nácadxa szren ca da bchalaj Juan. Da ca' dxuna' neda', da bsebaga Xra' neda' dxuna'. Da caní dxelunna bea na da li Dios, Xra', gusél-le' neda'. <sup>37</sup> Cá'anqueze Xra' nasel-le' neda' dxexechebe' chia'. Lácala ba bchalaj le', le'e quebe ne xénele chi'e, ne quebe ne lé'ele le', <sup>38</sup> ne quebe nuzúale dizra' chee' xichaj lázrdaule lawe' da quebe dxéajlele chia' neda', nasel-la Xra' neda'. <sup>39</sup> Le'e dxusédele du lázrele da naxúaj na lu xiche chee Dios lawe' da dxéquele xezrélele xel-la' nabán da zeajlí canna lu xiche na', na' da naxúaj na lu xiche chee Dios dxuchalaj na ca naca chia' neda'. <sup>40</sup> Le'e quebe dxaca lázrele xídale naga zua' neda' chee gápale xel-la' nabán na'.



<sup>41</sup> 'Neda' quebe dxezi'a xel-la' ba lá'ana ca da dxelun-na bèneache, da quebe naca na li lazre'. <sup>42</sup> Neda' núnbe'a le'e, ne nezda' quebe nazrí'ile Dios. <sup>43</sup> Bla'a neda' waláz chee Dios, Xra', na' le'e quebe dxezí' lu na'le neda'. Che za' tu benne' lu da naca cheézqueze', benne' na' wazí' lu na'le. <sup>44</sup> ¿Ájazra gaca chéajlele le'e chia' che dxunle zrin chee xelapa ljuwézrele le'e ba lá'ana, ne quebe dxue lázrele sile xel-la' ba lá'ana da dxunna Dios tu licha'? <sup>45</sup> Quebe guéquele néda'queza' gusebaga' le'e zria lau Dios, Xra'. Da gusebaga le'e zria naca na da ba gunná Moisésqueze, da na' dxuxrén lázrele guselá na le'e. <sup>46</sup> Che da li guxéajlele le'e chee da gunná Moisés, cá'anqueze chéajlele chia' neda' lawe' da bzuaj Moisés ca naca chia' neda'. <sup>47</sup> Na'a, che quebe dxéajlele chee da bzuaj le', ¿ájazra gaca chéajlele chee da dxapa' le'e?

### Jesús dxugawe' chi xun gaxúa benne' biu

(Mt. 14.13-21; Mr. 6.30-44; Lc. 9.10-17)

**6** Ca gudé na' guxíaj Jesús xecha la'a dxu'a nísadau' chee Galilea, da nazíqueze le na nísadau' chee Tiberias. <sup>2</sup> Benne' zanté zjácálené' Jesús lawe' da ba belelé'ene' xel-la' waca zren ca' da dxun Le', dxexuné' benne' we' ca'. <sup>3</sup> Nadxa Jesús guluéne' tu lu xi'a, na' gudxé' na' nen benne' ca' dxusédene'. <sup>4</sup> Ba zua gagu Laní Pascua chee judío ca'. <sup>5</sup> Gate ble'e Jesús benne' zan ca' zá'aque' zeaj nawe' Le', na' guzre' Felipe:

—¿Gazra cheajxidru da xelagu benne' zan caní?

<sup>6</sup> Gunná caní Jesús chee la' bi nna Felipe, lawe' da ba neze Jesús ca da gune'. <sup>7</sup> Nadxa bechebe Felipe:

—Che sidxu xeta xtila lazruj da sidxu chee chupa gaxúa zra, quebe gueque na xelezí' benne' caní late' weaj.

<sup>8</sup> Nadxa Andrés, xetú benne' ca' dxusede Jesús, ne naque' bi biche Simón Pedro, guzre' Jesús:

<sup>9</sup> —Zé tu bi cuide' nigá nápabe' gazxu' xeta xtila zrua' cebada, ne chupa bela. ¿Ájazra gun da nigá gueque na chee xúguté benne' caní?

<sup>10</sup> Nadxa gunná Jesús:

—Le xé xúguté' xelebé'e.

Naca lu daca lataj na', na' gulebé' ca du chi xun gaxúa benne' biu. <sup>11</sup> Nadxa gucá'a Jesús xeta xtila ca', na' ca gudé guzre' Dios "Xcalenu", bnézruje' na benne' ca' dxusédene', na' benne' caní gulísié' na láwele benne' zan ca' zaj dxe'e na'. Cá'anqueze ben Jesús chee bela ca', na' bnézruje' ca da gulaca lazre' benne' ca'.

<sup>12</sup> Gate gulélaje benne' ca', na' Jesús guzre' benne' ca' dxusédene':

—Le xutupa da bízrujdu ca' da dxexegá'ana na, chee quebe bi gaca díraje.

<sup>13</sup> Belexequé'e na, na' buluzré'e hazrinnu xcuite da bizruj ca' zaj nagá'ana na chee da gazxu' xeta xtila zrua' cebada ca'. <sup>14</sup> Nadxa benne' zan ca', gate belelé'ene' xel-la' waca zren nigá da ben Jesús, gulenne':

—Da li benne' nigá naque' bènea' guchálaje' waláz chee Dios, bènea' dxal-la' le'e.

<sup>15</sup> Guque bé'ene' Jesús dxelaca lazre' xeleché'e Le' xadí'a chee xuluzú'e Le' ca benne' wenná bea, na' bezé'e na', ne begüene' lu xi'a sibe na' chee sue' leze'.

### Jesús dxedé' lawe' nísadau'

(Mt. 14.22-27; Mr. 6.45-52)

<sup>16</sup> Gate ba za xrinne, benne' ca' dxusede Jesús beléta-je' dxu'a nísadau', <sup>17</sup> na' gulu'e lu da dxedá lawe' nísadau', ne gulezú lawe' zjaque' xeledé'e xechalá'a nísadau' chee xelezrine' xezre Capernaum. Ca guxinne, quebe ne xezrín Jesús na'. <sup>18</sup> Nadxa guzú lau dxaca tu be' bdunu' lawe' nísadau' na', na' xeaxruza chee nísadau' na' guxásale'e na'. <sup>19</sup> Gate ba guledé'e lu nísadau' na' catite sadxu tu chi'i zren, na' belelé'ene' Jesús ba dxezrine' naga ziaj da dxedá lawe' nísadau', dxezé'e lawe' nísadau', na' belezrebe'. <sup>20</sup> Nadxa Jesús guzre' benne' ca':

—Neda' na'. Quebe zrébele.

<sup>21</sup> Nadxa lu duté xel-la' dxelebé gulezí' lu ne'e Le' lu da dxedá lawe' nísadau' na', na' chadité belezrine' lu xezr la xu naga zjaque'.

### Benne' zan ca' dxexiláje' Jesús

<sup>22</sup> Zra xula benne' zan ca', benne' belexegá'ana xecha la'a nísadau', guleque bé'ene' ba zeajxaca benne' ca' dxusede Jesús lu da dxedá lawe' nísadau' tu licha' da dxe' chalá'a na', na' Jesús quebe guxíajlene' benne' ca'.

<sup>23</sup> Dxácaté na' xezícala da dxeledá lawe' nísadau', da ca' beledxúaj na xezre Tiberias, belezrín na tu lataj da zua gáguze naga gulawe' xeta xtila na' ca gudé guzre Xránadxu Dios: "Xcalenu'." <sup>24</sup> Chee le na' gate benne' zan ca' guleque bé'ene' québedxa zua Jesús na', ne cá'anqueze benne' ca' dxusédene', na' gulu'e lu da dxeledá lawe' nísadau', ne xjaque' xezre Capernaum zeajlexedílaje' Jesús.

### Jesús naque' xeta xtila da dxunna na xel-la' nabán li lazre'

<sup>25</sup> Gate benne' zan ca' belezrine' xecha la'a dxu'a nísadau', na' belexezraque' Jesús, ne buluchébe' Le':

—Benne' Weséde, ¿bata bla'u nigá?

<sup>26</sup> Jesús guzre' benne' ca':

—Da li dxapa' le'e, dxexiláje le'e neda' lawe' da gudágule, ne béljele, ne quegá lawe' da ble'ele xel-la' waca ca' da ble'eda' le'e. <sup>27</sup> Quebe cue'le gunne xue sile da gágule da te chee na. Le cue' gunne xue sile da gágule da zeajlí canna, da na' gunna na le'e xel-la' nabán da zeajlí canna. Da nigá naca na xel-la' wagu da gunna' neda', Benne' Gulje' Bèneache, le'e, lawe' da bzua Xra' Dios nen neda' da dxunna bea na naca' Zrí'ine'.

<sup>28</sup> Nadxa buluchébe' Le':

—¿Bi dxal-la' guntu' chee gaca ca da dxaca lazre' Dios guntu'?

<sup>29</sup> Jesús bechebe':

—Da dxaca lazre' Dios gunle naca na chéajlele chia' neda', naca' Bènea' gusel-la Dios.

<sup>30</sup> Nadxa buluchębe' Lę':

—¿Bizra xel-la' waca gunu' cheę le'entu' na, na' chęa-jlęntu chiu'? ¿Bizra dxunu'? <sup>31</sup> Xra xrtauntu' ca' gulawę' xeta maná le'ę xixre' lawe' lataj, ca naxúaj na lu xiche cheę Dios, dxenná na: Dios bgawę' benne' ca' xeta xtila da za xabáa.

<sup>32</sup> Bechębe Jesús:

—Da li dxapa' le'e, quegá Moisés na' bnęzruje' benne' ca' xeta xtila da za xabáa. Dios, Xra', dxunę' le'e xeta xtila da za xabáa da naca na li lazre'. <sup>33</sup> Xeta xtila na' da dxunna Dios le'e naca na Bénnea' bętaję' xabáa, ne dxunęzruje' cheę bęnneache xel-la' nabán li lazre'.

<sup>34</sup> Nadxa benne' ca' gulę'ę Lę':

—Xran, tu bęnnazqueze cheęntu' xeta xtila caní.

<sup>35</sup> Jesús guzre' benne' ca':

—Neda' naca' xeta xtila da dxunna na xel-la' nabán li lazre'. Benne' xide' naga zua' neda' cabátadxatune', na' benne' chęajle'ę chia' cabátadxatune'. <sup>36</sup> Naca na ca ba gucha' le'e. Le'e na' quebe dxęajle'ę chia', lácala ba ble'ele neda'. <sup>37</sup> Xúgute' benne' ca' dxunna Xra' neda', xelexe'ę lawa', na' benne' ca' xelexe'ę naga zua', quebe guzúa' benne' ca' chalá'ala. <sup>38</sup> Neda' guzá'a xabáa, quegá cheę guna' ca dxaca lázrequeza' neda'. Bla'a cheę guna' ca da dxaca lazre' Xra', gusel-le' neda'. <sup>39</sup> Da dxaca lazre' Xra', nasel-le' neda', naca na cheę quebe gunitia' netú benne' ca' ba bęnne' chia'. Nacan cheę gusebana' benne' ca' lu zra bęębe. <sup>40</sup> Da dxaca lazre' Xra', nasel-le' neda', naca na cheę xelapa bęnneache xel-la' nabán da zeajlí canna, xúgute' benne' ca' xelennę'ę neda', Zri'ine Dios, ne xelęajle'ę chia' neda', na' cheę gusebana' neda' benne' ca' lu zra bęębe na'.

<sup>41</sup> Gate belennę' da nigá, na' judío ca' gulezú lawę' dxelezí tizre' Jesús lawe' da gunné': "Neda' naca' xeta xtila da betaj xabáa." <sup>42</sup> Nadxa gulennę':

—¿Quegá benne' nigá zri'ine José? Dxi'u núnbeadxu xra xrnę'e. ¿Bizr cheę na' dxennę' bętaję' xabáa?

<sup>43</sup> Nadxa Jesús guzre' benne' ca':

—Québedxa si tízrale. <sup>44</sup> Quebe nu benne' gaca xide' naga zua' neda', che quebe xedajgúa Xra' nasel-le' neda' bęnnea', na' neda' gusebana' bęnnea' lu zra bęębe na'. <sup>45</sup> Lu xiche ca' naga naxúaj da gulenná benne' ca' buluchalaje' waláz cheę Dios, dxenná na: Dios gusędenę' xúgute' bęnneache. Ca' gaca na, xúgute' benne' ca' dxuluzę' nague' ca da dxusęde Xra', dxelexe'ę naga zua'.

<sup>46</sup> 'Quebe ne le'e nu benne' Xra'. Benne' tu licha', bęnnea' blęenę' Lę', naca bęnnea' guzę'ę naga zua Dios.

<sup>47</sup> Da li dxapa' le'e, nu benne' dxęajle'ę chia' neda' nape' xel-la' nabán da zeajlí canna. <sup>48</sup> Neda' naca' xeta xtila da dxunna na xel-la' nabán li lazre'. <sup>49</sup> Xra xrtáule ca' gulawę' xeta maná le'ę xixre' lawe' lataj, na' gudé na' xúgute' benne' ca' gulate'ę. <sup>50</sup> Xeta xtila nigá naca na da za xabáa, na' che nu benne' gawę' na, quebe gatię' tu chi'ize. <sup>51</sup> Néda'queza' naca' xeta xtila da dxunna na xel-la' nabán da za xabáa. Benne' gawę' xeta xtila nigá waca bąnqueze' chadía chacanna. Xeta xtila na' da dx-

unna' neda' naca na bęla' dxen cheęzqueza', da gunna' cheę xelaca bąnqueze bęnneache.

<sup>52</sup> Nadxa benne' judío ca' gulezú lawę' dxuluchębe ljwezre', dxeleennę':

—¿Ájazra gun benne' nigá, gunnę' dxi'u bęla' dxen cheęzqueze' cheę gągudxu na?

<sup>53</sup> Jesús guzre' benne' ca':

—Da li dxapa' le'e, che le'e quebe gągule bęla' dxen chia' neda', Benne' Gulje' Bęnneache, ne che quebe xí'ajle dxen chia', quebe gąpale xel-la' nabán li lazre'.

<sup>54</sup> Benne' dxawę' bęla' dxen chia', ne dxí'aje' dxen chia' nape' xel-la' nabán da zeajlí canna, na' neda' gusebana' bęnnea' lu zra bęębe na'. <sup>55</sup> Bęla' dxen chia' naca na xel-la' wagu li lazre' cheę bęnne'du xu'ule, na' dxen chia' naca na da xele'aj bęnneache da naca na li lazre'. <sup>56</sup> Benne' dxawę' bęla' dxen chia', ne dxí'aje' dxen chia', nague' neda' tuze, na' néda'queza' naca' bęnnea' tuze. <sup>57</sup> Xra' nasel-le' neda' xu'u lu ne'ę xel-la' nabán li lazre', na' neda' naca bana' ne cheę Lę'. Cá'anqueze bęnnea' dxawę' da naca chia' neda' gaca bąnqueze' ne chia' neda'. <sup>58</sup> Da nigá naca na xeta xtila da za xabáa. Xeta xtila nigá quebe naca na ca xeta maná da gulagu xra xrtáule ca', na' gudé na' gulate xúgute'. Benne' dxawę' xeta xtila nigá waca bąnqueze' chadía chacanna.

<sup>59</sup> Bęęde Jesús ca naca da caní naga zaj zra' benne' zan ca' lu xu'u naga dxelezraga bęnneache cheę xęzre Capernaum.

#### Ca naca dizra' na' da dxunna na xel-la' nabán da zeajlí canna

<sup>60</sup> Gate belén benne' zan ca' da nigá dxusęde Jesús, na' benne' ca' zjácale Jesús gulennę':

—Dizra' caní dxenná Jesús zaj nácale'ę na stębe sidxu. ¿Nuzra gaca gun caní?

<sup>61</sup> Guque bęenę' Jesús dxeleennę' cheę xrtizre', na' bchęębe' benne' ca':

—¿Dxuzúa dizra' nigá le'e stębe? <sup>62</sup> ¿Ájazra gunle checa' lé'ele neda', Benne' Gulje' Bęnneache, xegüena' xabáa naga zua' nédxute? <sup>63</sup> Be' naca na da dxunna xel-la' nabán li lazre'. Da naca na bęla' dxen quebe bi zaca na. Dizra' ca' da ba gucha' le'e zaj naca na cheę Be', ne zaj naca na da dxelunna na xel-la' nabán li lazre'. <sup>64</sup> Bál-lale le'e quebe dxęajle'ę chia'.

Caní gunná Jesús lawe' da nézene' nédxudate nu benne' ca' quebe dxelęajle'ę cheę, ne nua' gudé Lę' lu na' benne' guledábague' Lę'.

<sup>65</sup> Nadxa gunná Jesús: —Cheę le' na' gucha' le'e, quebe nu benne' gaca xide' naga zua' neda' che quebe xedajgúa Xra' bęnnea'.

<sup>66</sup> Lu zra ná'queze benne' zan ca', benne' xjácale'ę Jesús, québedxa xjácale'ę Lę'. <sup>67</sup> Nadxa Jesús bchęębe' benne' chazrinna ca' dxusędenę', gunné':

—¿Cá'anqueze le'e dxaca lázrele xexíajle?

<sup>68</sup> Bechębe Simón Pedro:

—Xran, ¿nuzra chęajlęntu'? Dizra' chiu' naca na da dxunna na xel-la' nabán da zeajlí canna. <sup>69</sup> Netu' dxęajlęntu' chiu', ne nézentu' nacu' Cristo, Zri'ine Dios ban.

<sup>70</sup> Jesús bechęębe':

—Neda' gucá'a le'e, benne' chazrinnu, na' tu benne' ládujla le'e xu'e da xriwe'.

<sup>71</sup> Da nigá gunná Jesús, bchálaje' ca naca chee Judas Iscariote, zri'ine tu benne' le' Simón, lawe' da gudé Judas nigá Jesús lu na' benne' guledábague' Le'. Naque' tu benne' chazrinnu ca' dxusede Jesús.

### Benne' biche Jesús quebe dxeláajle'e chee'

**7** Gudé na' gudé Jesús naga nababa Galilea. Quebe guca lazre' tee' naga nababa Judea lawe' da dxela- ca lazre' judío blau zaj zre'e na' xelúti'e Le'. <sup>2</sup> Ba za laní gate judío ca' dxelezú'e lu xu'u laga' ca'. <sup>3</sup> Chee le na' bi biche Jesús gulé'e Le':

—Quebe xegá'anú' nigáze. Bexíaj Judea, chee cá'an- queze benne' ca' dxeláajle' chiu' zaj zre'e na' gaca xeledé'ene' ca da dxunu'. <sup>4</sup> Che nu benne' dxaca lazre' xelúnbe'e bèneache le', quebe dxune' da ca' bagácheze. Lawe' da dxunu' Lue' da caní, ben na lau xúgute bèneache.

<sup>5</sup> Caní gulenné' lawe' da quebe dxeláajle' benne' biche' ca' chee Jesús. <sup>6</sup> Nadxa Jesús guzre' benne' ca':

—Quebe ne zrin zra cha'a na'. Chee le'e bíteteze zra waca chéajle. <sup>7</sup> Benne' ca' zaj naca chee xezr la xu nigá quebe gaca xeledúdené' le'e. Dxeledúdené' neda' lawe' da dxulé'eda' neda' naca da caléla da dxelún benne' ca'. <sup>8</sup> Le chjaca le'e laní na'. Quebe sa'a neda' na'a lawe' da quebe ne zrin zra cha'a.

<sup>9</sup> Ca gudé guzre Jesús benne' ca' da nigá, na' begá'ane' naga nababa Galilea na'.

### Jesús dxezrine' laní gate judío ca' dxelezú'e xu'u laga' ca'

<sup>10</sup> Ca gudé besiá'aca benne' biche Jesús, na' cá'an- queze Le' guxíaje' laní na'. Bagácheze guxíaje' chee quebe nu le'e Le'. <sup>11</sup> Benne' xíchaje' chee judío ca' belexíajle' Jesús lu laní na'. Dxelenné':

—¿Gazra zua bènea'?

<sup>12</sup> Ládujla benne' zan ca', benne' zan buluchálaje' ca naca chee Jesús. Bal-le' gulenné': "Naque' benne' xrlá- taje." Xebal-le' gulenné': "Quebe naque' xrlátaje lawe' da dxezí xé'e bèneache."

<sup>13</sup> Quebe nu benne' bchálaje' caníqueze ca naca chee' lawe' da dxelezrebe' da xelún benne' xíchaje' ca' chee judío ca'.

<sup>14</sup> Ba zeaj gachaj laní na' gate guxú'u Jesús lu chale'aj xudau', na' guzú lawe' dxusédene' benne' zaj zre'e na'.

<sup>15</sup> Belexebane benne' judío ca', dxelenné':

—¿Ájazra na' benne' nigá da zanté nézene', ne quebe bsédi'e chee xudau'?

<sup>16</sup> Bechebe Jesús:

—Da dxusédeda' neda' le'e quebe naca na cheézqueza'. Naca na chee Xra' nasele' le' neda'. <sup>17</sup> Che nu benne' dxaca lazre' guné' ca da dxaca lazre' Dios, na' wanézené' che da dxusédeda' naca na chee Dios, u che dxennéa' ca da naca cheézqueza'. <sup>18</sup> Benne' dx- uchálaje' da naca cheézqueze' dxune' na chee xelapa bèneache le' ba lá'ana. Bènea' dxue lazre' xelapa

bèneache ba lá'ana bènea' gusel-le' le', benne' nigá dxenné' da li, ne quebe bi dxenné' da naca na da wen lazre'.

<sup>19</sup> 'Moisésqueze benne' le'e da nadxixruj bea na, na' netule le'e quebe dxuzúale dizra' chee da nadxixruj bea na na'. ¿Bizr chee na' dxaca lázrele gútele neda'?

<sup>20</sup> Belexechebe benne' zan ca':

—Xu'u lue' be' xriwe'. ¿Núzraqueze dxaca lazre' gutie' lue'?

<sup>21</sup> Jesús guzre' benne' ca':

—Tu xel-la' waca bēna' lu zra dxupá'anale, na' xúgutele le'e dxebénele. <sup>22</sup> Moisés benne' da zéajlele, dxechúgule late' weaj bēla' chee bēl-la' dxen chee zri'inele bi biudu ca' chee xelexegá'anabe' xrlátaje lau Dios. Da nigá da dxunle quebe guzú lau na gate na' zua Moisés. Guzú lau na gate zaj zra' xra xrtau Moisés cá'anté. Chee le na' le'e dxechúgule late' bēla' chee bēl- la' dxen chee tu bi biúda' chee xegá'anabe' xrlátaje lau Dios lácala naca zra dxupá'anale. <sup>23</sup> Che caní dxun- le lu zra dxupá'anale chee quebe gusanle ca naca da bdxixruj be'e Moisés, ¿bizr chee na' dxezrá'ale neda' lawe' da bexuna' duté bēl-la' dxen chee tu benne' gate naca zra dxupá'anale? <sup>24</sup> Quebe guchí'ale le'e chee tu da dxun benne' ca naca da dxelé'ezele. Gate bi da guchí'ale, le gun na lu da naca xrlátaje.

### Jesús dxuchálaje' chee naga zé'e

<sup>25</sup> Nadxa bal-la benne' ca' zaj zre'e Jerusalén gulezú lawe' dxuluchēbe ljwezre':

—¿Quegá benne' nigá bènea' dxelexíajle' chee xelúti'e le'? <sup>26</sup> Nigá zue' dxuchálaje' lávela bèneache, na' quebe nu bi dxé Le'. ¿Zaj neze benne' xíchaje' ca' da li naca benne' nigá Cristo, Bènea' nasele-la Dios? <sup>27</sup> Ne- tu' nézentu' ga za' benne' nigá. Gate xida Cristo, quegá nu neze ga zé'e.

<sup>28</sup> Jesús zue' dxusédene' benne' ca' chale'aj xudau', na' gate benne' da nigá, na' gunné' zizraj:

—Dxennale núnbeale neda', ne dxennale nézele ga za'a. Bla'a nigá, quegá cheézqueza'. Bènea' nasele-le' neda' naque' li lazre', na' Bènea' quebe núnbeale le'e. <sup>29</sup> Neda' núnbe'a Le' lawe' da za'a naga zua Le', na' Le' gusél-le' neda'.

<sup>30</sup> Nadxa gulaca lazre' xel-le' Jesús. Quebe nu gudéla Le' lawe' da quebe ne zrin zra chee xelúti'e Le'.

<sup>31</sup> Benne' zan guléajle'e chee Jesús, na' gulenné':

—Gate xida Cristo, ¿gúnljadxé' xel-la' waca zrenté ca da dxun benne' nigá?

### Benne' fariseo ca' dxelesel-le' xra'aga wen zrin chee' chee xel-le' Jesús

<sup>32</sup> Benne' fariseo ca' belenne' ca da dxelenná bē- neache ca naca chee Jesús, na' le', ne benne' xíchaje' ca' chee bxruze ca' gulesel-le' xra'aga wen zrin chee xudau' chee xel-le' Jesús. <sup>33</sup> Nadxa gunná Jesús:

—Wazúalēna' le'e xetú chí'idau', na' xezrinqueza' na- ga zua Bènea' gusél-le' neda'. <sup>34</sup> Le'e wexíajle neda',

na' quebe xezrélele neda', lawe' da quebe gaca sa'le naga sua' neda'.

<sup>35</sup> Nadxa benne' judío ca' gulezú lawe' dxuluchebe ljwezre':

—¿Gazra cheaj benne' nigá, naga quebe gaca xezreldxu Le'? ¿Waxíaje' naga zaj zra' benne' judío ca' zaj nase dínnaje' ládujla benne' xezr la xu ca' chee gusédené' benne' quebe zaj naque' judío? <sup>36</sup> ¿Bizra zéaje' da nigá guzre' dxi'u: Wexílajle neda', na' quebe xezrélele neda' lawe' da quebe gaca sa'le naga sua' neda'?

**Jesús dxuchálaje' chee xegu nisa da dxunna xel-la' nabán li lazre'**

<sup>37</sup> Zra bzebe chee laní na' naca na zra blaudxa. Lu zra na' guzé Jesús, na' gunné' zizraj:

—Che nu benne' dxebílené', dxal-la' xide' naga zua' neda', na' xí'aje'. <sup>38</sup> Naca na ca naxúaj na lu xiche chee Dios, dxenné': "Benne' dxéajle'e chia', lu lázrdawe' galaj xegu nisa da gunna na xel-la' nabán."

<sup>39</sup> Da nigá gunná Jesús ca naca chee Be' Lá'azxa, Bénnea' xelez' benne' ca' xeléajle'e chee Jesús, lawe' da quebe ne la' Be' Lá'azxa lawe' da quebe ne xegá'ana szren Jesús naga zua Xre'.

**Bénneache dxelaque' chupa la'a**

<sup>40</sup> Bal-la bénneache, gate belenne' da nigá, gulenné':

—Da li benne' nigá naque' Bénnea' guchalaje' waláz chee Dios, Bénnea' dxal-la' xide'.

<sup>41</sup> Xebal-le' gulenné':

—Benne' nigá naque' Cristo, Benne' guchebe lazre' Dios sel-le'.

Xebal-le' gulenné':

—¿Waca Cristo benne' Galilea? <sup>42</sup> Lu da naxúaj na lu xiche chee Dios dxenná na gaca Cristo zri'ine zre sua David, ne gaque' benne' xezre Belén, xezre na' naga gulaj David.

<sup>43</sup> Ca'an guca, gulaca benne' ca' chupa la'a ne chee Jesús. <sup>44</sup> Bal-le' gulaca lazre' xel-le' Jesús, na' quebe nu beaxre gune' na.

**Benne' xíchaje' ca' chee judío ca' quebe dxeléajle'e chee Jesús**

<sup>45</sup> Xra'aga wen zrin ca' chee xudau' belexezrine' naga zaj zra' fariseo ca', ne benne' xíchaje' ca' chee bxruze ca', na' benne' caní buluchebe' xra'aga wen zrin ca':

—¿Bizr chee na' quebe guchele bénnea'?

<sup>46</sup> Belexechebe xra'aga wen zrin ca':

—Quebe ne guchalaj nu bénneache ca dxuchalaj benne' nigá.

<sup>47</sup> Nadxa fariseo ca' gulé'e xra'aga wen zrin ca':

—¿Cá'aqueze le'e bele lataj guz' xe'e le'e? <sup>48</sup> Quebe nu ne chéajle chee bénnea', benne' xíchaje' caní, ne cá'aqueze benne' fariseo ca'. <sup>49</sup> Benne' ca' dxeléajle'e chee bénnea' quebe zaj núnbe'e da nadxixruj bea na, ne zaj nabía xi'e.

<sup>50</sup> Nicodemo, bénnea' guxíaje' xeajnné'e Jesús chizrela naque' tu benne' fariseo ca', na' guzre' benne' ca':

<sup>51</sup> —Cateze dxenná da nadxixruj bea cheedxu quebe gaca guzría xidxu tu benne' che quebe ne xénedxu xechébe' chee nézedxu che bi da nabague'e.

<sup>52</sup> Nadxa belexechebe benne' ca':

—¿Nácaquezu' lue' benne' Galilea? Gunná' xanne' da naxúaj na lu xiche chee Dios, na' le'enu' netú benne' dxuchalaje' waláz chee Dios quebe ne gálaje' naga nababa Galilea, naga zaj zra' bénneache quebe zaj naca xánnie' judío.

<sup>53</sup> Nadxa tu tu benne' ca' xeajxaque' lizre'.

**8** Na' Jesús guz'é'e zéaje' lu Xi'a Xaga Olivo.

**Jesús dxuchálajle' tu nu'ula dxune' dul-la dxíchaje' xrba chee xel-la' nuchaga na'**

<sup>2</sup> Zra xula, gate guxaní', na' bezrín Jesús chale'aj xudau' na'. Xúgute' benne' ca' gulebigue' naga zua Jesús, na' Le' gudxé'e, ne guzú lawe' dxusédené' benne' ca'.

<sup>3</sup> Nadxa benne' ca' dxuluxuzájle'e da nadxixruj bea Dios, ne benne' fariseo ca' guleché'e tu nu'ula naga zua Jesús, belelé'ene' le' dxune' dul-la dxíchaje' xrba chee xel-la' nuchaga na'. Buluzé' nu'ula na' laduj benne' zaj zre'e na', <sup>4</sup> na' gulé'e Jesús:

—Benne' Wesede, nu'ula nigá blé'entu' le' dxune' dul-la dxíchaje' xrba chee xel-la' nuchaga na'. <sup>5</sup> Da bdxixruj be'e Moisés dxenná be'e netu' gútentu' nu'ula caní, güentu' le' xiaj. ¿Bizra dxennáu' Lue'?

<sup>6</sup> Caní gulenná benne' ca' chee xuludxixre' Jesús chee xelezéquene' xelagu zria Le'. Nadxa gudxé' luche Jesús, ne guzú lawe' dxuzúaje' lu xu nen zrube ne'e. <sup>7</sup> Benne' ca' buluchébequeze' Jesús, na' Le' bezé' dxé'e benne' ca':

—Nútetézlale le'e quebe nabágale dul-la, waca su laule güele nu'ula nigá xiaj.

<sup>8</sup> Na' bebé' luche Jesús, ne bzúajqueze' lu xu. <sup>9</sup> Benne' ca', gate belenne' da nigá, quebe bzua xichaj lázrdawe' le' zrize, na' belexedxúaje' tu weaje'. Belexedxúaj za'a benne' gúlaxda, na' ca belexedxúaj xúgute' benne' ca' dxelagu zrie' nu'ula', na' begá'ana Jesús tuzé' nen nu'ula na', ze' laduj benne' ca' dxuluzé' nague' chee'.

<sup>10</sup> Nadxa bezé' Jesús, ne gate québedxa nu benne' ca' ble'e Jesús, benne' dxulagu zrie' nu'ula na', nadxa guzre' le':

—Nu'ula, ¿gazra na' benne' ca' gulagu zrie' lue'?

¿Quebe nu chilá' benne' guzría xi'e lue'?

<sup>11</sup> Nu'ula na' gunné':

—Quebe nu chilá', Xran.

Nadxa Jesús guzre' nu'ula na':

—Cá'aqueze neda', quebe guzría xi'a lue'. Bexíaj, ne québedxa gunu' dul-la.

**Jesús dxusení'e lu xichaj lázxdau bénneache**

<sup>12</sup> Bchálajle' Jesús benne' ca' xecha lasa, gunné':

—Neda' naca' xel-la' naxaní' chee lu xichaj lázxdau bénneache. Benne' dxedálené' neda' gapé' xel-la' nax-

aní' nigá da gunezruj na le' xel-la' nabán li lazre', na' cabata' tadxe' lu da chul-la chee' dul-la da zaj nabague'.  
 13 Nadxa benne' fariseo ca' gulé' le' Lē':

—Lue' dxexechebu' cheézquezu', na' da dxexechebu' quebe bi zaca na.

14 Bechebe Jesús:

—Da dxexecheba' zaca na lácala néda'queza' dxexecheba' cheézqueza'. Neda' nezda' gala za'a, ne gala cha'a. Le'e quebe nézele gala za'a, ne gala cha'a. 15 Le'e dxuchí'ale cáteze dxenná xichaj lázrdaule. Bla'a neda', quegá chee' guchi'a ca da dxun nu benne'. 16 Che dxuchi'a, dxuchi'a cáteze naca na, lawe' da quebe dxuchi'a néda'za'. Xra' nasele-le' neda' dxuchi'e tu zren nen neda' ca naca da dxelún bēneache. 17 Lu da nadxixruj bea chee' le'e naxúaj gate zaj zra' chupa benne' dxelexechebe' tuz ca dxelenné', naca da li xrtizra' benne' ca'. 18 Néda'queza' dxexecheba' da naca cheézqueza', na' Xra' nasele-le' neda', cá'anqueze dxexechebe' chia'.

19 Nadxa benne' ca' buluchebe' Jesús:

—¿Ga na' Xrau'?

Jesús bechebe':

—Le'e quebe núnbeale da nácaqueza' neda', ne quebe núnbeaquezle Xra'. Chela da li núnbeale neda', cá'anqueze núnbeale Xra'.

20 Da caní bchalaj Jesús dxácatē na' dxusédenē' bēneache chale'aj xudau' naga zaj nnita xi'ina dumí chee xudau'. Quebe nu gudēla Le' lawe' da quebe ne zrin zra chee'.

**Dxenná Jesús: "Naga cha'a neda' quebe gaca sa'le le'e"**

21 Nadxa Jesús guzre' benne' ca':

—Wexá'a neda', na' le'e xexilajle neda', na' wátele lu dul-la nabágale, lawe' da naga cha'a neda', le'e quebe gaca sa'le.

22 Nadxa benne' judío ca' gulé' ljwezre':

—¿Gute cuine', ne chee' le' na' dxenné' quebe gaca chéajdxu naga cheaj Le'?

23 Nadxa Jesús guzre' benne' ca':

—Le'e nácale chee' zran xabáa nigá. Neda' naca' chee' xabáa na'la. Le'e nácale chee' xezr la xu nigá. Neda' quebe naca' chee' xezr la xu nigá. 24 Chee' le' na' gucha' le'e wátele lu dul-la nabágale, lawe' da che quebe dxéajlele zúaqueza' neda', wátele lu dul-la nabágale.

25 Nadxa benne' ca' buluchebe' Jesús:

—¿Nuzra nacu' Lue'?

Bechebe Jesús:

—Nácaqueza' ca ba gucha' le'e nédxudautē. 26 Déle'le' da dxal-la' nnia' chee'le, ne da dxal-la' guchi'a ca naca da dxunle. Bēneea' gusél-le' neda' dxenné' da li, na' da dxapa' bēneache naca na da ba benda' gunné' Le', lácala quebe dxezaca ba lázrele na.

27 Benne' ca' quebe guléajni'ine' dxuchálajle Jesús le' ca naca chee' Dios, Xre'. 28 Nadxa Jesús guzre' benne' ca':

—Gate le'e chísale sibe neda', Benne' Gulje' Bēneache, nadxa xúnbeale zúaqueza' neda', ne quebe bi dxuna' da naca cheézqueza'. Tuze dxennéa' ca da ba

ble'e Xra' neda'. 29 Bēneea' gusél-le' neda' zúalequeze' neda'. Xra' quebe nucá'ane' neda' tuza' lawe' da tu dxúnzqueza' ca da dxezaca ba lazre' Le'.

30 Ca gunná Jesús da caní, guléajle benne' zan chee'.

**Benne' zaj naque' chee' Dios, ne benne' ca' nuxru dul-la le'**

31 Nadxa Jesús guzre' benne' judío ca', benne' dxeléajle' chee':

—Che le'e se' típale lu da dxapa' le'e, da li nácale neda' tuze. 32 Gúnbeale da li, na' da li na' guselá na le'e.

33 Belexechebe benne' zan ca':

—Netu' nácantu' xrtia Abraham, ne quebe ne chú'untu' lu na' nu benne' ca' benne' zaj nada'u. ¿Bizr chee' na' dxennáu' Lue' lantu'?

34 Jesús guzre' benne' ca':

—Da li dxapa' le'e, xúgute' benne' dxelúnqueze' dul-la, dúl-laqueze na' nuxru na benne' ca'. 35 Nu benne' xu'e lu na' tu benne' ca' benne' nada'u quebe tu súazqueze' xu'u na'. Zrí'inequeze bēneea' wazúate-quezebe'. 36 Chee' le' na', che neda', Zrí'ine Xra', guselá le'e, da li láquezle le'e. 37 Nezda' nácale le'e xrtia Abraham. Na'a dxaca lázrele gútele neda' lawe' da quebe dxezí' lu na'le da dxapa' le'e. 38 Neda' dxuchálaja' ca naca da ble'e Xra' neda', na' le'e dxunle ca da guzre xráquezle le'e.

39 Belexechebe benne' ca':

—Xra xrtiantu' naca Abraham.

Na' Jesús guzre' benne' ca':

—Chela nácale da li xrtia Abraham, na' gunle ca da ben Abraham. 40 Lácala gucha' le'e da li da ble'e Xra' neda', le'e dxaca lázrele gútele neda'. Abraham cabata' bēne' da caní. 41 Le'e dxúnquezele ca da dxun xráquezle.

Nadxa benne' ca' gulé' le' Jesús:

—Netu' quebe nácantu' bi lan. Zua tuze Xrantu', Dios.

42 Nadxa Jesús guzre' benne' ca':

—Chela naca Dios da li Xrale, le'e wazrí'ile neda' lawe' da za'a neda' naga zua Dios, ne zúaqueza' nigá. Quebe za'a da naca cheézqueza'. Dios nasele-le' neda'. 43 ¿Bizr chee' na' quebe dxezéquele chéajni'ile da dxennéa'? Naca na lawe' da quebe dxaca lázrele xénele dizra' chia'. 44 Xráquezle le'e naca da xriwe'. Le'e nácale chee' da na', ne dxaca lázrele gunle ca da dxaca lazre' le' na. Da xriwe' na' naca na wete benne' nédxudautē. Cabata' dxenné na da li lawe' da quebe bi zua da li nen le' na. Gate dxun lazre' na, dxenné na cáteze naca na, lawe' da tu dxun lázrezqueze na, ne naca na da guzú lau na ben lazre' na. 45 Lácala dxapa' le'e da li, le'e quebe dxéajlele chia'. 46 ¿Núlale le'e séquele gulé'ele nabaga neda' tu dul-la? Che dxennéa' da li, ¿bizr chee' na' quebe dxéajlele chia'? 47 Benne' naque' chee' Dios dxenné' dizra' chee' Dios. Le'e quebe nácale chee' Dios. Chee' le' na' quebe dxaca lázrele xénele chee' Dios.

**Cristo ba zúaqueze' nédxudxa ca Abraham**

48 Nadxa benne' judío ca' gulé' le' Jesús:

—Da li dxennantu' gate dxennantu' nacu' benne' Samaria, ne xu'u be' xriwe'.

<sup>49</sup> Jesús bechebe':

—Quebe xu'a be' xriwe'. Neda' dxapa' ba lá'ana Xra' Dios, na' le'e dxuzúale neda' chalá'ala. <sup>50</sup> Quebe dxe'a gunne xue chee gápale neda' ba lá'ana, ne si' lu na'le neda'. Zua Benne' xabáa dxezá lazre' gápale neda' ba lá'ana, ne Le' dxuchi'e ca da dxunle. <sup>51</sup> Da li dxapa' le'e: Benne' dxuné' ca naca dizra' chia', cabata' gátequeze bénnea'.

<sup>52</sup> Nadxa benne' judío ca' belexechebe':

—Na'a nézquezentu' xu'u be' xriwe'. Ba gulátequeze Abraham, ne xúgute benne' ca' buluchálaje' waláz chee Dios, na' lue' dxennáu' benne' guné' ca naca dizra' chiu' cabata' gátequeze'. <sup>53</sup> ¿Nácadxu' szrendxa ca xra xrtáudxu Abraham? Gútequeze Le', ne cá'an-queze gulate benne' ca' buluchálaje' waláz chee Dios. ¿Bízraqueze dxugune cuinu'?

<sup>54</sup> Bechebe Jesús:

—Che neda' dxucá'ana cuina' ba lá'ana, quebe bi za-ca na. Benne' dxape' neda' ba lá'ana naque' Xra', Bénnea' dxennale le'e naque' Xrale. <sup>55</sup> Le'e quebe núnbeale Le'. Neda' núnbeaqueza' Le'. Chela dxennéa' quebe núnbe'a Le', naca' wen lazre' ca nácale le'e. Neda' da li núnbe'a Le', ne dxuna' ca da dxenné'. <sup>56</sup> Xra xrtáule Abraham, bénnea' gutie' nédxudauté, gubéle'ene' lawe' da dxal-la' lé'ene' zra zua neda'. Blé'ene' na, na' gubéle'ene'.

<sup>57</sup> Nadxa benne' judío ca' gulé'e Jesús:

—Québequeze ne su' chi xun iza, na' ¿dxennáu' blé'enu' Abraham?

<sup>58</sup> Jesús bechebe':

—Da li dxapa' le'e, nédxudauté gate quebe ne sua Abraham, báchequeze zua' neda'.

<sup>59</sup> Nadxa gulequ'é xiaj chee xelu'e Jesús, na' Le' bcache cuine'. Bdeé' ládujla benne' ca', na' bedxúaje' chale'aj xudau', ne bezé'e.

### Jesús dxexuné' tu benne' gúlaje' la chul-la

**9** Gate gudé Jesús tu lataj, na' blé'ene' tu benne' gúlaje' la chul-la. <sup>2</sup> Benne' ca' dxusede Jesús buluchébe' Le':

—Benne' Wesede, ¿bizr chee na' gulaj benne' nigá la chul-la? ¿Naca na lawe' da belún xra xrné'e dul-la, che lawe' da ben lé'queze' dul-la?

<sup>3</sup> Jesús guzre' benne' ca':

—Quebe naca na lawe' da ben le' dul-la, ne quebe naca na lawe' da belún xra xrné'e dul-la. Naca na chee gulé'e lau xel-la' szren chee Dios ne chee benne' nigá. <sup>4</sup> Dxácaté naca te zra dxal-la' guna' zrin chee Bénnea' nasel-le' neda' lawe' da ba za da chul-la gate netú benne' quebe seque' guné' zrin. <sup>5</sup> Dxácaté ne zua' neda' xezr la xu nigá, naca' xel-la' naxaní' chee bénneache.

<sup>6</sup> Ca gudé gunná Jesús da nigá, na' bzre'e zrene' lu xu, ne bene' guna' nen zrene' na', na' btupe' na xiaj lau benne' la chul-la na'. <sup>7</sup> Nadxa guzre' le':

—Guxíaj xejtibe lau' lu beaj nisa nazí le na Siloé. (Dizra' nigá zéaje na: Da Nasel-la Na.)

Benne' la chul-la na' guxíaje' xejtibe lawe', na' gate bezrine' ba dxelé'ene'. <sup>8</sup> Nadxa benne' walízr chee' ca', ne benne' ca' belelé'ene' le' nédxula, naque' la chul-la, gulenné':

—¿Quegá benne' nigá bénnea' dxebe'e dxenabe' guna'?

<sup>9</sup> Bal-le' gulenné':

—Le' na'.

Xebal-le' gulenné':

—Quegá le' na', na' ca'an ca dxenné'e.

Benne' ná'queze gunné':

—Neda' na'.

<sup>10</sup> Nadxa buluchébe' le':

—¿Ájazra na' ba dxelé'enu'?

<sup>11</sup> Bechebe bénnea':

—Bénnea' le' Jesús bene' guna', ne btupe' na xiaj lawa', na' gunné': "Guxíaj beaj nisa nazí le na Siloé, xejtibe lau'." Guxá'a na', na' gate gudiba' lawa', guca ble'eda'.

<sup>12</sup> Nadxa buluchébe' le':

—¿Ga na' zua bénnea'?

Le' guzre' benne' ca':

—Quebe nezda'.

### Benne' fariseo ca' dxuluchébe' bénnea' guque' la chul-la

<sup>13</sup> Nadxa benne' ca' guleché'e bénnea' guque' la chul-la lau benne' fariseo ca'. <sup>14</sup> Naca na zra dxulupá'ana judío ca' gate ben Jesús guna', ne btupe' na xiaj lau benne' la chul-la na'. <sup>15</sup> Chee le' na' benne' fariseo ca' buluchébe' bénnea' guque' la chul-la ájazra guca dxelé'ene'. Le' guzre' benne' ca':

—Bzrie' guna' xiaj lawa', na' bexiba' na, ne dxelé'eda'.

<sup>16</sup> Nadxa bal-la benne' judío ca' gulenné':

—Bénnea' bene' da nigá quebe naque' chee Dios lawe' da quebe dxape' ba lá'ana zra dxupá'anadxu. Na' xebal-le' gulenné':

—¿Ájazra na' dxuné' xel-la' waca zrenté caní che naque' benne' dul-la?

Ca'an guca, gulaca chupa la'a benne' fariseo ca'.

<sup>17</sup> Xecha lasa buluchébe' bénnea' guque' la chul-la:

—¿Bi dxennáu' lue' chee bénnea' bexuné' lue'?

Le' gunné':

—Neda' dxennéa' naque' benne' dxuchalaje' waláz chee Dios.

<sup>18</sup> Benne' judío ca' quebe guléajle'e guque' la chul-la, ne na'a dxelé'ene', na' gulenné' xra xrna bénnea' bexaque'. <sup>19</sup> Na' buluchébe' xra xrna bénnea':

—¿Nácaqueze benne' nigá zrí'inele, dxennale le'e gúlaje' la chul-la? ¿Ájazra na' dxaca dxelé'ene'?

<sup>20</sup> Belexechebe xra xrné'e:

—Nézentu' benne' nigá naque' zrí'inentu', ne gúlaje' la chul-la. <sup>21</sup> Quebe nézentu' aja guca dxelé'ene' na'a, ne quebe nézentu' nu bexún xiaj lawe'. Le guchebe le'. Ba nápaqueze' iza, ne waca xechébequeze'.

<sup>22</sup> Caní gulenná xra xrne'ē lu xel-la' dxelezrebe lawe' da ba zaj nun benne' xíchajē cheē judío ca' tuze dizra' xelexebéajē xu'u na' nútetēze benne' xechebē' Jesús naque' Cristo. <sup>23</sup> Cheē lē na' gulenná xra xrne'ē: "Le guchebe lē'. Ba nápaqueze' iza."

<sup>24</sup> Nadxa benne' judío ca' belenné' bēneea' guque' la chul-la, na' gulé'ē lē':

—¡Gunné da li lau Dios! Nézentu' naca benne' nigá benne' dul-la.

<sup>25</sup> Lē' bechebē':

—Quebe nezda' che naque' benne' dul-la, che cabí. Tuze da nezda'. Neda' guca' la chul-la, na' na'a dx-elé'eda'.

<sup>26</sup> Na' buluchébequeze' lē':

—¿Bizra bene' chiu'? ¿Ájazra bene' cheē bexune' xiaj lau'?

<sup>27</sup> Na' bechebe bēneea':

—Ba gucha' le'e, ne quebe dxénele chia'. ¿Bizr chee na' dxaca lázrele nnia' xetú? ¿Cá'anqueze le'e dxaca lázrele gácale Lē' tuze?

<sup>28</sup> Nadxa benne' judío ca' gulenné' schanni' cheē bēneea' guque' la chul-la, dxelenné':

—Lue' da'u bēneea', na' netu' da'ntu' Moisés. <sup>29</sup> Netu' nézentu' Dios bchálajlēne' Moisés. Quebe nézentu' ga benne' benne' nigá.

<sup>30</sup> Nadxa bēneea' bechebē':

—Da nigá naca na da dxebáneda'. Le'e quebe nézele ga bēneea', na' bexune' xiaj lawa'. <sup>31</sup> Nézquezdxu Dios quebe dxenne' cheē benne' dul-la. Tuze dxenne' cheē benne' ca' dxulucá'ana szrene' Lē', ne dxelune' ca da dxaca lazre' Lē'. <sup>32</sup> Quebe ne xendxu che nu benne' xexune' tu benne' gúlajē' la chul-la. <sup>33</sup> Chela benne' nigá quebe naque' cheē Dios, quebe gaca bi gunē'.

<sup>34</sup> Nadxa gulé'ē lē':

—Ca gúlajquezu' dxulé'e na nabagu' dul-la. Na'a, ¿dxaca lazru' guzējajni'inu' netu'?

Nadxa belexebéajē' lē' lu xu'u na'.

### Benne' zaj naque' la chul-la lu xichaj lázrdawe'

<sup>35</sup> Jesús benne' belexebéajē' bēneea' guque' la chul-la, na' gate bezraguē' lē', guzre' lē':

—¿Dxéajlē'u lue' cheē Zri'ine Dios?

<sup>36</sup> Benne' na' guzre' Jesús:

—Xran, guzre neda' Nu na', cheē chéajlē'a cheē'.

<sup>37</sup> Bechebe Jesús:

—Ba blé'equeznu' Lē'. Neda', dxuchálajlēna' lue' naca' Bēneea'.

<sup>38</sup> Nadxa benne' na' bzu zribē' lau Jesús, na' gunné':

—Dxéajlē'a chiu', Xran.

<sup>39</sup> Nadxa gunná Jesús:

—Neda' bla'a lu xēzr la xu nigá cheē guchi'a ca da dx-elún bēneache, cheē xeledé'e la chul-la ca', ne cheē xelexaca ca la chul-la benne' ca' dxelenné' dxeledé'ene'.

<sup>40</sup> Nadxa bal-la benne' fariseo ca', benne' zaj zre'ē nen Jesús, gate belenné' da nigá gunná Jesús, buluchēbē' Lē':

—¿Cá'anqueze netu' nácantu' la chul-la?

<sup>41</sup> Jesús bechebē':

—Chela nácale le'e la chul-la quebe nabágale ca naca dul-la da benle. Dxennale dxelé'ele, na' cheē lē na' nabágale dul-la.

### Dxuchalaj Jesús da dxulé'e na ca naca cheē le'aj cheē zriila' ca'

<sup>10</sup> Na' gunná Jesús:

—Da li dxapa' le'e, bēneea' quebe dxu'ē dxu'a dxa xu'u cheē le'aj cheē zriila' ca', na' dxu'ē naga xula, naque' gubán, ne tu dxebánzqueze'. <sup>2</sup> Bēneea' dxu'ē dxu'a dxa xu'u na' naque' benne' dxuxúequeze' zriila' ca'. <sup>3</sup> Bēneea' zuē' dxu'a dxa xu'u dxesálajē' cheē chu'u bēneea' dxuxúequeze'-ba', na' zriila' ca' dxelexúnbeaba' chi'ē. Benne' nigá dxu'ē la tu tu zriila' ca', ne dxebéajē'-ba' lu le'aj cheēba'. <sup>4</sup> Ca dxedé dxebéajē' xúguteba', na' dxebía lawe' lauba', na' zriila' ca' zjácáleba' Lē', lawe' da dxelexúnbeaba' chi'ē. <sup>5</sup> Quebe zjácáleba' tu benne' quebe zaj núnbeaba'. Dxuluzrúnnujba' lau benne' na' lawe' da quebe dxelexúnbeaba' chi'i benne' quebe zaj núnbeaba'.

<sup>6</sup> Bchálajlē Jesús benne' ca' da dxulé'e nigá, na' benne' ca' quebe guléajni'ine' bi zéajē da guzre Jesús lē'.

### Jesús naque' benne' chawe' dxuxúe' zriila' ca'

<sup>7</sup> Nadxa Jesús guzre' benne' ca' da xula:

—Da li dxapa' le'e, neda' naca' dxa xu'u naga dxelú'u bēneache zaj naque' ca zriila' chia' ca'. <sup>8</sup> Xúgute benne' dxuluxúe' zriila', benne' belelé'ē nédxudxa ca neda', gulaque' gubán, ne tu gulebánzqueze'. Zriila' ca' quebe beléneba' cheē benne' ca'. <sup>9</sup> Neda' naca' dxa xu'u. Bēneea' chu'ē ne chia' neda', láqueze bēneea'. Gaque' ca tu zriila' dxu'uba', ne dxuajba' le'aj cheēba', na' dxezréleba' zriédu dxáguba'.

<sup>10</sup> Benne' gubán ze'ē tuze cheē cuane'-ba', ne cheē gútete'-ba, ne cheē guzría xi'tē'-ba'. Neda' bla'a cheē gápale xel-la' nabán, ne cheē gapa xánnele na. <sup>11</sup> Neda' naca' benne' chawe' dxuxúa' zriila' ca'. Benne' chawe' dxuxúe' zriila' ca' dxuzúe' xel-la' nabán cheē cheē guselé' zriila' ca'. <sup>12</sup> Benne' dxuxúe'-ba' lawe' da dxezi'ē lazruj, gate dxelé'ene' za becu' xi'a, na' dxusanē' zriila' ca', ne dxuzrúnnuje', lawe' da quebe nácaqueze' benne' dxuxúe' lēba', na' zriila' ca' quebe zaj nácaba' bē cheézqueze'. <sup>13</sup> Benne' nigá dxuzrúnnuje' lawe' da dxunze' zrin cheē si'ē lázruje', na' quebe dxe'ē gunne xue cheēba'.

<sup>14</sup> Neda' naca' benne' chawe' dxuxúa' zriila' ca'. Cáteze núnbea Xra' neda', na' neda' núnbe'a Xra', cá'anqueze neda' núnbe'a zriila' chia' ca', na' lēba' zaj núnbeaba' neda'. Neda' dxuzúa' xel-la' nabán chia' cheē guselá' zriila' ca'. <sup>16</sup> Cá'anqueze zaj zra' zriila' chia' quebe zaj zra' lu le'aj nigá. Dxa-la' cheajxeri'a-ba'. Zriila' ca' xelunba' ca dxenná xrtizra', ne xelácaba' tu cueze, na' tuze benne' guxúe' lēba'.

<sup>17</sup> Xra' nazrí'ine' neda' lawe' da dxuzúa' xel-la' nabán chia', na' xecá'a na. <sup>18</sup> Quebe nu seque' cua xel-la' nabán chia'. Neda' xuzúa' na cáteze dxaca lázrequeza'

neda'. Napa' xel-la' dxenná bea guzúa' na, ne chee xecá'a na. Da nigá naca na da gunná be'e Xra' neda' guna'.

<sup>19</sup> Gate benne' judío ca' belenne' dizra' caní, na' gu-laque' chupa la'a xetú. <sup>20</sup> Benne' zan benne' ca' gulenné':

—¿Bizr chee na' dxuzé nágale chee benne' nigá? Xu'e be' xriwe', ne nadá xichaj lázrdawe'.

<sup>21</sup> Xebal-le' gulenné':

—Tu benne' xu'e be' xriwe' quebe séquene' guchá-laje' caní. ¿Waca tu be' xriwe' xexún na xiaj lau tu benne' la chul-la?

### Dxuluzúa benne' judío ca' Jesús chalá'ala

<sup>22</sup> Naca na beu' zaga, na' lu xezre Jerusalén zaj zué' laní gate dxulusá lazre' ca guca gate gulegú'e xudau' na' lu na' Dios. <sup>23</sup> Jesús dxedé' chale'aj xudau' na' naga naca lachila chee Salomón. <sup>24</sup> Nadxa benne' judío ca' guléchaje' Le', ne gulé'e Le':

—¿Bátalaqueze québedxa gunu' lue' chupa lázren-tu'? Che lue' nacu' Cristo, Bénnea' sel-la Dios, gunnáte-gala.

<sup>25</sup> Bechebe Jesús:

—Ba gucha' le'e, na' quebe guxéajlele chia'. Ca naca da dxuna' neda', ne dxuchíneda' xel-la' dxenná bea chee Xra', dxululé'e na nu naca' neda'. <sup>26</sup> Le'e quebe dxéajlele chia' lawe' da quebe nácale zrila' chia', ca ba gucha' le'e nédxula. <sup>27</sup> Zrila' chia' dxelxúnbeaba' chi'a, na' neda' núnbe'a-ba', na' leba' dxelauba' neda'.

<sup>28</sup> Benne' zaj naque' zrila' chia', dxunézruja' chee benne' ca' xel-la' nabán da zeajlí canna, ne cabá-ta'quezdxa xelebá xi'e, na' quebe nu seque' xecá'a le' lu na'a neda'. <sup>29</sup> Xra' benne' neda' benne' caní, na' Le' nácadxe' szren ca xúguté bèneache, na' quebe nu seque' xecá'a benne' ca' lu na' Xra'. <sup>30</sup> Neda', ne Xra' tuze nácantu'.

<sup>31</sup> Nadxa benne' judío ca' gulequ'é xiaj xetú chee xelúti'e Jesús. <sup>32</sup> Nadxa Jesús guzre' benne' ca':

—Ba bènqueza' da zan da chawe' laule le'e, dx-uchíneda' xel-la' waca chee Xra'. ¿Nula chee da chawe' caní güele neda' xiaj?

<sup>33</sup> Belexechebe benne' judío ca':

—Quebe güentu' lue' xiaj lawe' da nunu' da chawe'. Dxuntu' na lawe' da gunnéu' schanni' chee Dios. Lue' nacu' bèneache, na' dxun cuinu' Dios.

<sup>34</sup> Nadxa Jesús guzre' benne' ca':

—Lu da nadxixruj bea chee le'e naxúaj xrtizra' Dios, dxenná na: Le'e nácale dios ca'. <sup>35</sup> Quebe gaca tába-gadxu ca da naxúaj na lu xiche chee Dios, na' Diósqueze' gunné' chee benne' ca' gulezi'e xrtizre' zaj naque' dios ca'. <sup>36</sup> Che Dios bzué' neda', ne gusél-le' neda' lu xezr la xu nigá, ¿bizr chee na' dxennale le'e gunnéa' schanni' chee Dios lawe' da gunnéa' naca' Zri'ine Dios? <sup>37</sup> Che quebe dxuna' ca naca da dxun Xra', quebe chéajlele chia'. <sup>38</sup> Che dxuna' na, lácala quebe dxéajlele chia' ne chee da dxennéa', le chéajle chia' ne chee da ca' dxuna', chee nézele Xra' zúalene' neda', na' neda' zúalena' Xra'.

<sup>39</sup> Xetú lasa gulaca lazre' xel-le' Jesús, na' Le' gulé' lu na' benne' ca'.

<sup>40</sup> Nadxa bezrín Jesús dxu'a xegu Jordán chalá'a naga dxalaj gubizra, na' begá'ane' na', naga guzúa Juan nédxuté dxuchúe' bèneache nisa. <sup>41</sup> Benne' zan xjaque' xejlenné'e Jesús, na' gulenné':

—Juan, da li quebe bi xel-la' waca zren bene', na' xúguté da gunné' ca naca chee benne' nigá naca na da li.

<sup>42</sup> Benne' zan guléajle'e chee Jesús lataj na'.

### Ca guca gate gute Lázaro

**11** Zua tu benne' dxé'ene' le' Lázaro, benne' xezre Betania, da naca na lazre María, ne bi bilé' le'

Marta. <sup>2</sup> María nigá, bi zan Lázaro, benne' dxé'ene' na', naque' nu'ula na' gulu'e ni'a Jesús da na' dxelále'e zixre, ne bsebize' na nen xicha xíchaje'. <sup>3</sup> Dxúpaté nu'ula caní gulesel-le' benne' xaejzeze' Jesús:

—Xran, bènea' nazrí'inu' quebe chawe' zué'.

<sup>4</sup> Ca ben Jesús da nigá, na' gunné':

—Da dxé'ene' quebe naca na da gúte'e na le'. Naca na chee gulé'e lau na xel-la' szren chee Dios, ne cá'an-queze chee gulé'e lau na xel-la' szren chia' neda', Zri'ine Dios, ne chee xel-la' we' na'.

<sup>5</sup> Lácala nazrí'i Jesús Marta, ne bi bilé', ne Lázaro, <sup>6</sup> gate benne' quebe chawe' zua Lázaro na', begá'ane' naga zué' xechupa zra. <sup>7</sup> Ca gudé na' guzre' benne' ca' dxusédené':

—Le chu'u naga nababa Judea xetú.

<sup>8</sup> Nadxa benne' ca' gulé'e Le':

—Benne' Wesede, ná'asca benne' judío ca' zaj zre'e na' gulaca lazre' xelúti'e Lue' nen xiaj. ¿Dxaca lazru' chéaju' na' xetú?

<sup>9</sup> Jesús guzre' benne' ca':

—¿Quebe nun Dios duté te zra gate dxelún bèneache zrin? Che nu benne' dxedé' te zra, quebe chea-jchazie' lu da stébe lawe' da dxel'éne' xel-la' naxaní' da nuzúa Dios lu xezr la xu nigá. <sup>10</sup> Che nu benne' dxedé' chizrela, dxechégü'e' lawe' da quebe zúale' xel-la' naxaní' le'.

<sup>11</sup> Ca gudé na' guzre Jesús benne' ca':

—Benne' ljwézredxu Lázaro ba dxási'e'. Cha'a neda' cheajsebana' le'.

<sup>12</sup> Nadxa benne' ca' gulé'e Jesús:

—Xran, che dxási'e', wexaque'.

<sup>13</sup> Da nigá da gunná Jesús zéaje na ba gute Lázaro.

Benne' ca' dxusédené' gulé'quene' gunná Jesús dxáseze'. <sup>14</sup> Nadxa Jesús bzéajni'ine' benne' ca', gunné':

—Ba gútequeze Lázaro. <sup>15</sup> Dxebeda' lawe' da quebe zua' na'. Caní gácadxa chawe' chee le'e, chee chéajlele chia'. Le chu'u cheajnnadxu Lázaro.

<sup>16</sup> Nadxa Tomás, bènea' léqueze' bilide', guzre' xezí-cala benne' ca':

—Le chú'queze dxi'u chee gátedxu tu zren nen Jesús.



Jesús naque' benne' dxusebanē' benne' gate ca', ne benne' dxunne' dxi'u xel-la' nabán li lazre'

<sup>17</sup> Gate belezrine' xezre Betania, na' bene Jesús guda-pa zra bulucache' Lázaro. <sup>18</sup> Betania dxe' na gáguze naga dxe' Jerusalén, ca cadite sadxu tu chí'idau'ze zrindxu na', <sup>19</sup> na' benne' zan benne' judío ca' xjaque' xeajlenné'ē Marta ne María, na' xulunézruje' le' xel-la' zren lazre' lawe' da gute bi zane'. <sup>20</sup> Gate ben Marta ba za' Jesús, na' guzē'ē zeajxrigale' Le', na' María begá'ane' xu'u. <sup>21</sup> Marta guzre' Jesús:

—Xran, chela zu' nigá, quebe gute bi zana'. <sup>22</sup> Neda' nezda' Dios gunné' Lue' bíteteze da nabu'.

<sup>23</sup> Jesús gunné':

—Webán bi zanu'.

<sup>24</sup> Nadxa Marta guzre' Le':

—Nezda' webane' lu zra xelexebán benne' gate ca', zra bzebe na'.

<sup>25</sup> Nadxa gunná Jesús:

—Neda' naca' benne' dxusebanē' benne' gate ca', ne benne' dxunne' xel-la' nabán li lazre'. Nu benne' dxéajle'ē chia', lácala gatiē', webane', <sup>26</sup> na' xúgute benne' zaj naca banē', ne dxeléajle'ē chia', québequeze xelatiē' tu chí'ize. ¿Dxéajle'ē da nigá?

<sup>27</sup> Marta guzre' Jesús:

—Awe', Xran. Neda' dxéajle'a nacu' Cristo, Zri'ine Dios, Bénnea' guchebe lazre' Dios sel-le'.

**Jesús dxebezre' lawe' da zaj zua baxache' nu'ula ca'**

<sup>28</sup> Ca gudé gunná Marta da nigá, na' guxíaje' xeajzenne' bi bilē' María, na' guzre' le' zrize:

—Ba bla' Benne' dxusede, ne dxenné' lue'.

<sup>29</sup> Ca ben María da nigá, na' guxasē' guzē'ē, xeajnné'ē Jesús. <sup>30</sup> Jesús quebe ne chu'ē xezre na', na' zuē' naga bezraga Marta Le'. <sup>31</sup> Benne' judío ca' zaj zra' xu'u na' dxulunézruje' María xel-la' zren lazre', gate belelé'ene' guxasa María, ne chadí bdxúaje', na' xjácale benne' caní le', dxeléquene' zéaje' dxu'a ba zeajchezre' na'.

<sup>32</sup> Gate bzin María naga zua Jesús, na' bzu zribe' zran ni'a Jesús, gunné':

—Xran, chela zu' nigá, quebe gute bi zana'.

<sup>33</sup> Gate ble'e Jesús dxebezre María, ne cá'anqueze dx-elebezre judío ca', benne' zjácale'ē María, na' bexíajle'ēne', ne guzúē' stēbe lu lázrdawe'. <sup>34</sup> Na' bchebe' benne' ca':

—¿Ga bcáchele bénnea'?

Na' gulé'ē Le':

—Xran, gudá le'enu'.

<sup>35</sup> Na' gudxezre Jesús. <sup>36</sup> Nadxa gulenná benne' judío ca':

—Le nna'xque cátiē nazrí'ine' le'.

<sup>37</sup> Bal-la benne' ca' gulenné':

—Benne' nigá bexunē' benne' la chul-la. La zuē' nigá, ¿quebe guzéquene' ájala gunē' cheē quebe gute Lázaro?

**Jesús dxusebanē' Lázaro**

<sup>38</sup> Jesús guzúē' stēbe xetú, na' bzrine' dxu'a ba. Ba na' naca na tu blauj, na' da' tu xiaj ta'a dxu'e na. <sup>39</sup> Gunná Jesús:

—Le xecá'a xiaj nigá.

Marta, bi zan benne' gate na' guzre' Jesús:

—Xran, ba dxelá bénnea' tula, lawe' da ba guca tapa zra na'a gutiē'.

<sup>40</sup> Na' Jesús gunné':

—¿Quebe gucha' lue' che chéajle'u chia', walé'enu' xel-la' szren cheē Dios?

<sup>41</sup> Nadxa belexequē'ē xiaj ta'a na'. Jesús gunné'ē xabáa, gunné':

—Xrae, dxapa' Lue': "Xcalenu'" lawe' da ba bennu' chia'. <sup>42</sup> Neda' nezda' tu dxénzquezenu' chia'. Dxennéa' da nigá cheē gaca tu da ba neza cheē benne' caní, cheē xeléajle'ē chiu' nase-lu' neda'.

<sup>43</sup> Ca gudé gunné' da nigá, na' gunné' zizraj:

—¿Lázaro, bedxúaj nigá!

<sup>44</sup> Bedxúaj benne' gate na', nadxéaj ni'a ne'ē nen ládxe'dau' da buluchele' ni'a ne'ē, na' lawe' dxela na ladxe'. Jesús guzre' benne' ca':

—Le xesezre', ne le gusanē' xexíaje'.

**Benne' dxeledábage' Jesús dxelunē' tuze dizra' xelēle' Le'**

(Mt. 26.1-5; Mr. 14.1-2; Lc. 22.1-2)

<sup>45</sup> Nadxa guléajle' benne' zan cheē Jesús, benne' judío ca' xjácale María, ne belelé'ene' ca da ben Jesús. <sup>46</sup> Bal-la benne' ca' xjaque' xeajlechálajlengē' benne' fariseo ca', na' buluzenne' le' ca da ben Jesús. <sup>47</sup> Nadxa fariseo ca', ne benne' xíchaje' ca' cheē bxruze ca' belezrague' nen benne' xu'u lawe' blau cheē judío ca', na' gulenné':

—¿Ájazra gundxu? Benne' nigá dxúnle'ē xel-la' waca da za xabáa. <sup>48</sup> Che ca' güedxu Le' lataj, xúgute bēneache xeleajlé'ē cheē cheē xuluzúē' Le' ca wenná bea, na' xelalá' benne' Roma ca', benne' zjaque' wedilla, na' xuluzría xi'ē xudau' cheēdxu, ne xezr la xu cheēdxu.

<sup>49</sup> Nadxa tu benne' le' Caifás, bxruze blau iza na', guzre' benne' ca':

—Le'e québequeze bi nézele, <sup>50</sup> ne quebe dxequē be'ele gácadxa chawe' cheēdxu gate' tuze benne' ne cheē xezre nigá, ne quegala ca naca xezr la xu nigá cuía xi na.

<sup>51</sup> (Quegá gunná Caifás da nigá cheézqueze'. Lawe' da naque' bxruze blau iza na', bchálaje' waláz cheē Dios, gunné' gate' Jesús ne cheē xezr la xu judío.

<sup>52</sup> Quegá gatiē' tuze ne cheē xezr la xu naze. Cá'anqueze cheē xutupe' lu na' Dios xúgute benne' zaj naque' cheē Dios, benne' zaj nase dinnaje', benne' ca' zaj nababe' xúgute cue' xezr la xu.) <sup>53</sup> Ca'an guca, ca lu zra na'tē benne' judío wenná bea ca' belunē' tuze dizra' xelútiē' Jesús.

<sup>54</sup> Cheē le' na' Jesús québedxa gudé' naga zaj zra' benne' wenná bea ca' cheē judío ca', na' guzē'ē naga nababa Judea, na' guxíaje' xezre Efraín naga zua

gáguze tu le'e xixre' lawe' lataj. Begá'ane' xezre na' nen benne' ca' dxusédene'.

<sup>55</sup> Ba zua gáguze zrin Laní Pascua chee judío ca', na' benne' zan chee xezre ca' xjaque' Jerusalén chee xulucá'ana chawe' cuine' nédxudxa ca' zrin Laní Pascua.

<sup>56</sup> Guledé' dxelexilaje' Jesús, na' gate zaj zre'e chale'aj xudau' na', buluchébe ljwezre':

—¿Ajazra dxéquele? ¿Wide' laní, che quebe xide'?

<sup>57</sup> Benne' fariseo ca', ne benne' xíchaje' ca' chee bxruze ca' ba gulebéaje' dizra' che nu benne' ca' nézene' ga zua Jesús, na' xel'é'e benne' ca' chee gaca xelél-le' Le'.

### María dxugu'e da dxelá zixre ni'a Jesús

(Mt. 26.6-13; Mr. 14.3-9)

**12** Xrupa zra nédxudxa gate za chu'u Laní Pascua chee judío ca', guxíaj Jesús xezre Betania naga zua Lázaro, bénnea' bsebán Jesús ládujla benne' gate'. <sup>2</sup> Lu xezre na' beluné' tu xrche', chee gulape' ba lá'ana Jesús. Marta bde'e' xel-la' wagu, na' Lázaro dxé'lene' benne' ca' dxelá'gule' Jesús. <sup>3</sup> Nadxa María guqu'é'e' tu xia da za da dxelá'le'e' zixre, da naca na chee dusén lase, da zácale'e' na, na' gulu'e' da za na' ni'a Jesús, ne bsebize' na nen xicha xíchaje'. Ca naca benne' zaj zra' xu'u na' gulelé'ene' ca dxelá da zixre na'. <sup>4</sup> Nadxa Judas Iscariote, zri'ine Simón, tu benne' ca' dxusede Jesús, ne naque' bénnea' gudé'e' Jesús lu na' benne' guledábague' Le', gunné':

<sup>5</sup> —¿Bizr chee na' quebe gudá'u da zixre na', na' sídxu na dumí lazruj chee chunna gaxúa zra chee gá-calédxu benne' xache' ca'?

<sup>6</sup> Quebe gunná Judas da nigá lawe' da dxe'e' gunne xue chee benne' xache' ca'. Naque' gubán, ne nu'e' bzude dumí chee benne' ca' dxusede Jesús, ne dxe-bane' late' weaj dumí na' da dxuluzré'e' lu bzude na'.

<sup>7</sup> Nadxa Jesús guzre' Judas na':

—Bé lataj nu'ula nigá lawe' da bene' da nigá chee dxucá'ana chawe' neda' chee gate xulucache' neda' lu xédxu ba. <sup>8</sup> Benne' xache' ca' tu zrázqueze' ládujla le'e. Neda' quebe tu súazqueza' nen le'e.

### Dxeluné' tuze dizra' xelúti'e' Lázaro

<sup>9</sup> Zane' benne' judío ca' belenne' zua Jesús xezre Betania, na' xjaque' na', quegá tuze zeajlenné'e' Jesús. Cá'anqueze zeajlenné'e' Lázaro, bénnea' bsebán Jesús ládujla benne' gate ca'. <sup>10</sup> Nadxa benne' xíchaje' ca' chee bxruze ca' beluné' tuze dizra' cá'anqueze xelúti'e' Lázaro, <sup>11</sup> lawe' da ne chee Lázaro benne' zan benne' judío ca' dxelebéaj xíchaje' bxruze ca' chee xeajlé'e' chee Jesús.

### Dxexú'u Jesús Jerusalén

(Mt. 21.1-11; Mr. 11.1-11; Lc. 19.28-40)

<sup>12</sup> Benne' zan ba zjaca Jerusalén, zjaque' Laní Pascua na', na' zra xula belenne' ba za' Jesús lu xezre na'.

<sup>13</sup> Nadxa gulechugu'e' zina', na' xjaque' xeajlexrígale' Jesús, ne dxelenné' zizraj:

—¡Gaca ba lá'azxa Dios! ¡Ba neza zrente naca na chee Benne' zé'e' waláz chee Xránadxu Dios! ¡Ba neza zrente naca na chee Wenná Bea chee xezre Israel!

<sup>14</sup> Jesús xeajxraque' tu burro, na' guzri'e'-ba', ca naxúaj na lu xiche chee Dios, dxenná na:

<sup>15</sup> Quebe zr'ébele le'e, benne' zre'e' xezre Sión. Le nna'xque, ba za' Wenná Bea chee'e.

Zri'e' tu burro.

<sup>16</sup> Nédxute' benne' ca' dxusede Jesús quebe guléa-jni'ine' da na' dxaca na. Ca gudé na', gate begá'ana szren Jesús lau Dios, na' xeajlesá lazre' xúgute' da caní zaj naxúaj na lu xiche chee Dios ca naca chee Jesús, na' ca'an guca chee'.

<sup>17</sup> Benne' ca' zaj zre'e' nen Jesús gate gunné' Lázaro lu xédxu ba, ne bsebané' le' ládujla benne' gate, buluzenne' bénneache Jerusalén ca da guca na'. <sup>18</sup> Chee le' na' benne' caní xeajlexrígale' Jesús lawe' da belenne' ca naca xel-la' waca zrente da bene'. <sup>19</sup> Nadxa benne' fariseo ca' gulé ljwezre':

—Ba dxel'é'ele quebe séquedxu bi gundxu. Ca naca bénneache dxeluné' Le' tuze.

### Dxelexilaj benne' griego ca' Jesús

<sup>20</sup> Zaj zra' bal-la benne' griego ca' ládujla benne' ca' belezrine' Jerusalén chee xulucá'ana szrene' Dios lu laní na'. <sup>21</sup> Benne' caní belezrine' lau Felipe, benne' Bet-saida chee ga nababa Galilea, ne naque' Jesús tuze, na' gulata' xuene' le', dxelenné':

—Benne', dxaca lázrentu' le'entu' Jesús.

<sup>22</sup> Felipe guxíaje' xeajezre' Andrés caní, na' xjaca dxupe' xeajleguezre' Jesús ca'. <sup>23</sup> Nadxa Jesús guzre' benne' dxupa ca':

—Ba bzrin zra xegá'ana szrena' neda', Benne' Gulje' Bénneache. <sup>24</sup> Da li dxapa' le'e, tu binne zrua' xtila wegá'ana na tuze na che quebe xexruj na lu xu, ne gacu na xu. Che gacu na xu, na' gunna na lina. Caní dxal-la' gaca chia' neda'. <sup>25</sup> Benne' dxe'e' gunne xue gapa chi'e' xel-la' nabán chee' gunitie' na. Bénnea' dxuzú'e' chalá'ala xel-la' nabán chee' lu xezr la xu nigá, gapa chi'e' na, ne zrué'ene' xel-la' nabán da zeajlí canna. <sup>26</sup> Che nu benne' dxaca lazre' guné' zrin chia', dxal-la' gague' neda' tuze, na' gáteteze sua' neda', na' súaqueze benne' dxuné' zrin chia'. Che nu benne' dxuné' zrin chia', Xra' gape' le' ba lá'ana.

### Jesús dxuchálaje' ca gaca gate gatie'

<sup>27</sup> Gunná Jesús:

—Na'a stébele'e' zua'. ¿Bizra nnia'? ¿Nnia': Xrae, bselá neda' lu da dxal-la' gaca chia' na'a? Belájqueza' chee gaca chia' da caní. <sup>28</sup> Xrae, bca'ana szren lau'.

Nadxa ben tu chi'i benne' dxenné' xabáa:

—Ba bca'ana szrena' na, ne gucá'ana szrena' na xetú.

<sup>29</sup> Benne' ca' zre'e' na' dxelenné' gulenné' guziu' gunné'. Xebal-le' gulenné':

—Tu gubáz chee xabáa bchálajlene' Le'.

<sup>30</sup> Nadxa Jesús guzre' benne' ca':

—Quegá gunné chi'e na' ne chia' neda'. Gunné na ne che'e le'e. <sup>31</sup> Na'a ba bzin zra guchi'a Dios chee bèneache zre'e xezr la xu nigá, na' na'a cueaj Dios chalá'ala da xriwe', da na' dxenná bea na lu xezr la xu nigá, chee québedxa nna bea na. <sup>32</sup> Gate xelechise' neda' lu xezr la xu nigá le'e xaga béguaj, na' neda' nnia' xúgute' bèneache chee xelaque' neda' tuze.

<sup>33</sup> Gate gunné' caní, ble'e Jesús ca gatie'. <sup>34</sup> Nadxa benne' zan ca' gulé'e Jesús:

—Netu' bémentu' ca da naxúaj na lu xiche chee da nadxixruj bea na da dxenná na waca bánqueze Cristo chadía chacanna. ¿Bizr chee na' dxennáu' Benne' Gulje' Bèneache xelechise' Le'? ¿Nuzra na' Benne' Gulje' Bèneache?

<sup>35</sup> Nadxa Jesús guzre' benne' ca':

—Xetú chí'idauze xel-la' naxaní' sua na ládujla le'e. Le ta na'a dxácaté ne zua xel-la' naxaní' nen le'e, chee quebe xrinne, lawe' da benne' dxedé' lu da chul-la quebe nézene' ga zéaje'. <sup>36</sup> Le cheajlé chee xel-la' naxaní' da naca' neda' dxácaté zua xel-la' naxaní' nen le'e, chee gácale tuze xel-la' naxaní' na'.

Ca gudé gunná Jesús da nigá, na' bezé'e bcache cuine' lau benne' ca'.

#### Benne' judío ca' quebe dxeajlé'e chee Jesús

<sup>37</sup> Lácala ble'e Jesús zane' xel-la' waca zrenté lau benne' judío ca', quegá xúgute' guleajlé'e chee', <sup>38</sup> lawe' da ben na ba xen guca ca da gunná Isaías, benne' bchálaje' waláz chee Dios, gunné':

Xran, ¿nuzra guxeajlé chee dizra' cheedxu?

¿Nuzra na' ble'e Xránadxu xel-la' waca chee'?

<sup>39</sup> Ca'an guca, quebe guca xeleajlé'e chee' lawe' da caní gunnáqueze Isaías na':

<sup>40</sup> Dios bene' benne' ca' la chul-la, ne bene' zide' lázrdawe',

chee quebe xelélé'ene' nen xiaj lawe',

ne quebe xeléajni'ine' lu xichaj lázrdawe',

ne quebe xelélé'e lawa' neda' chee xexuna' le'.

<sup>41</sup> Isaías na' gunné' da nigá lawe' da blé'ene' xel-la' szren chee Jesús, ne bchálaje' ca naca chee'.

<sup>42</sup> Zane' benne' judío ca' guléajlé'e chee Jesús, ne cá'anqueze bal-la benne' xíchaje' ca'. Quebe belexechebe' lówela bèneache lawe' da belezrebe' da xelún benne' fariseo ca', chee quebe xelxebéaje' le' xu'u naga dxelezrague'. <sup>43</sup> Caní belune' lawe' da beledánedxene' xel-la' ba lá'ana da dxelúe bèneache le' ca xel-la' ba lá'ana da dxue Dios le'.

#### Dizra' chee Jesús guchi'a na chee da dxelún bèneache

<sup>44</sup> Jesús gunné' zizraj:

—Benne' dxéajlé'e chia', quegá cheeza' dxéajlé'e, cá'anqueze dxéajlé'e chee Xra' nasele' neda'. <sup>45</sup> Bènea' dxelé'ene' neda', dxelé'equene' Xra' nasele' neda'. <sup>46</sup> Neda', xel-la' naxaní', bla'a lu xezr la xu nigá chee québedxa xelxegá'ana benne' dxeléajlé'e chia' lu da chul-la. <sup>47</sup> Che nu benne' dxenne' dizra' chia', ne quebe dxune' ca naca na, quegá neda' guzría xi'a le',

lawe' da quebe bla'a neda' chee guzría xi'a bèneache. Bla'a chee guselá' benne' ca'. <sup>48</sup> Benne' dxuzúe' neda' chalá'ala, ne quebe dxune' ca naca dizra' chia', ba zua da guzría xi na le'. Dizra' da ba gunnéa' naca na da guzría xi na bènea' lu zra bzebe na'. <sup>49</sup> Caní gaca na lawe' da quebe dxuchálaje' cheézqueza', lawe' da Xra' nasele' neda' ba gunná bé'ene' neda' bi dxal-la' nnia', ne bi dxal-la' gusédeda'. <sup>50</sup> Neda' nezda' gunná be'e Xra' neda' caní chee xelezeque bèneache xelape' xel-la' nabán da zeajlí canna. Ca'an naca, da dxennéa' neda', dxennéa' na ca gunná be'e Xra' neda'.

#### Jesús dxibe' ni'a benne' ca' dxusédené'

**13** Naca na zra nedxu gate za chu'u Laní Pascua chee judío ca'. Jesús ba nézene' ba bzin zra xezé'e lu xezr la xu nigá chee xexiaje' naga zua Xre'. Nazrí'iquezne' benne' zaj naca chee', benne' zaj zre'e xezr la xu, na' na'a ba zua gulé'ene' benne' ca' tu da zrendxa da gulé'e na nazrí'ine' le'.

<sup>2</sup> Da xriwe' ba nagú'u na xichaj lázxdau Judas Iscariote, zri'ine Simón, ca dxal-la' guné' chee gudé' Jesús lu na' benne' guledábague' Le'. Nézqueze Jesús ze'e naga zua Dios, ne dxal-la' xezrine' naga zua Dios, na' Xre' ba bnézruje' Le' duté xel-la' dxenná bea. Chee le na', gate dxelawe' xrche', guxasa Jesús, na' gudúe' ladxe' naxrúa cuzre', ne bnase' tu ladxe' dxu'a le'e.

<sup>5</sup> Nadxa gudé'e nisa tu zriga xia zren, ne guzú lawe' dxibe' ni'a benne' ca' dxusédené', na' bsebize' ni'e nen ladxe' na' da nunase' dxu'a le'e.

<sup>6</sup> Ca bzrine' chee quibe' ni'a Simón Pedro, le' guzre' Jesús:

—Xran, ¿Lue' quíbequezu' ni'a?

<sup>7</sup> Jesús bechebe':

—Na'a quebe dxéajni'inu' da dxuna'. Te na'a chéajni'inu' na.

<sup>8</sup> Pedro guzre' Le':

—Cabata' quibu' ni'a.

Jesús guzre' le':

—Che quebe quiba' ni'u, quebe gaca gacu' neda' tuze.

<sup>9</sup> Na' Simón Pedro guzre' Jesús:

—Xran, quegá tuze ni'a quibu'. Cá'anqueze na'a, ne xíchaja'.

<sup>10</sup> Jesús guzre' le':

—Benne' ba bexuzrte guzje', tuze ni'e dxal-la' chadxelawe' da ba naxádxeze'. Le'e ba naxádxele, san quegá xúgutele.

<sup>11</sup> Gunná Jesús: "Quegá xúgutele", lawe' da nézene' nu na' gudé' Le' lu na' benne' dxeledábague' Le'.

<sup>12</sup> Ca gudé gudibe Jesús ni'a benne' ca', na' bexrúe' ladxe' chee' cuzre', ne bebe'e ga dxelawe', na' guzre' benne' ca':

—¿Dxéajni'ile le'e da ba bēna'? <sup>13</sup> Le'e dxéle neda':

Benne' Weséde, ne: Xran, na' caní dxal-la' nnale lawe' da caní naca'. <sup>14</sup> Che neda', Benne' Weséde chee, ne Xránale, ba gudiba' ní'ale, cá'anqueze le'e dxal-la' quíbele ni'a ljwézrele tule xetule. <sup>15</sup> Neda' ba ble'eda' le'e tu da dxulé'e na, chee gunle le'e ca da bēna' neda'.

<sup>16</sup> Da li dxapa' le'e, tu benne' wən zrin quebe nácadxe' szren ca xranē', na' tu benne' gubáz quebe nácadxe' szren ca benne' nasel-le' le'. <sup>17</sup> Che dxéajni'ile da caní, ne dxunle ca zaj naca na, gaca chee'le tu da ba neza.

<sup>18</sup> 'Quebe dxuchálaja' chee' xúgutēle le'e. Neda' núnbe'a benne' ca' gucá'a, san dxal-la' gaca ca naxúaj na lu xiche chee' Dios, dxenná na: Benne' dxágulē neda' ba gudábague' neda' chee' gudéē' neda'. <sup>19</sup> Dxapa' le'e da nigá na'a, nédxula gate quebe ne gaca na, chee' gate gaca na, na' chéajlele le'e zúaqueza' neda'. <sup>20</sup> Da li dxapa' le'e: Benne' dxezí' lu ne'e Bénnea' dxusel-le' neda', neda' na' dxezí' lu ne'e, na' benne' dxezí' lu ne'e neda', dxezí' lu ne'e Xra' nasel-le' neda'.

### Dxenná Jesús gudé Judas Le' lu na' benne' dx- eledábague' Le'

(Mt. 26.20-25; Mr. 14.17-21; Lc. 22.21-23)

<sup>21</sup> Ca gudé gunná Jesús da nigá, na' guzúē' stēbe lu xichaj lázrdawē', na' bzéajni'ine' benne' ca', gunné':  
—Da li dxapa' le'e, tu benne' ládujla le'e gudéē' neda' lu na' benne' ca' dxeledábague' neda'.

<sup>22</sup> Nadxa benne' ca' dxusēde Jesús gulezú lawē' dxelenná' ljawezre', ne quebe zaj nézene' nu chee' na' dxuchalaj Jesús. <sup>23</sup> Tu benne' ca' dxusēde Jesús, bénnea' nazrí'ile'e Jesús le', zuē' cuita Jesús naga dxelawē' xrche', <sup>24</sup> na' Simón Pedro bene' tu da dxunna bea lau bénnea' chee' guchēbe' Jesús nu chee' na' dxenné' caní. <sup>25</sup> Nadxa bénnea' de'e cuita Jesús bchēbe' Le':

—Xran, ¿nuzra na'?

<sup>26</sup> Bechēbe Jesús:

—Gusebisa' late' xeta xtila, na' bénnea' gunézruja' na, benne' ná'queze'.

Nadxa Jesús bsebise' late' xeta xtila, na' bnézruje' na chee' Judas Iscariote, zri'ine Simón. <sup>27</sup> Ca gucá'a Judas xeta xtila na', na' da xriwe' guxú'utē na lu xichaj lázrdawē'. Nadxa Jesús guzre' le':

—Da dxal-la' gunu', bēntega na.

<sup>28</sup> Benne' ca' zaj zre'e dxelawē' na' quebe guléajni'ine' bizr chee' na' guzre' Judas na' caní. <sup>29</sup> Lawe' da nua Judas bzude' dumí, bal-le' guléquene' Jesús guzre' le' bi si'e chee' laní na', u bi gunézruje' benne' xache' ca'.

<sup>30</sup> Ca gudé gudagu Judas xeta xtila na', na' bdxúajē'. Ba guxrinne.

### Da nadxiruj bea cube

<sup>31</sup> Ca gudé bdxuaj Judas, gunná Jesús:

—Na'a gulé'e lau xel-la' szren chia' neda', Benne' Gulje' Bénneache, na' xegá'ana szren Dios ne' chia' neda'.

<sup>32</sup> Che neda', Benne' Gulje' Bénneache, dxulé'eda' ca naca xel-la' szren chee' Dios, na' Dios gulé'ene' ca naca xel-la' szren chia' neda', ne la gúntēqueze' na. <sup>33</sup> Le'e, bidu chia' ca', québedxa sua' scha' nen le'e. Le'e wexíla-jle neda', san ca gucha' benne' judío ca', dxapa' le'e na'a, quebe gaca sa'le le'e naga cha'a neda'. <sup>34</sup> Tu da cube dxixruj be'eda' le'e. Le zri'i le sa' ljawezrele tule xetule ca neda' nazrí'ida' le'e. Caní dxal-la' zri'i ljawezrele tule xetule. <sup>35</sup> Che nazrí'i ljawezrele tule xetule, na' xúgutē bénneache xeleque bé'ene' nácalle neda' tuze.

### Jesús dxenné' nna Pedro quebe núnbe'e Le'

(Mt. 26.31-35; Mr. 14.27-31; Lc. 22.31-34)

<sup>36</sup> Simón Pedro bchēbe' Jesús:

—Xran, ¿gazra chéaju'?

Bechēbe Jesús:

—Naga cha'a neda', quebe gaca sál'enu' neda' na'a. Te na'a wadéquezu' naga tea' neda'.

<sup>37</sup> Nadxa gunná Pedro:

—Xran, ¿bizr chee' na' quebe gaca sál'ena' Lue' na'a? Zúaqueza' guzú'a' xel-la' nabán chia' chee' guna' Lue' tuze.

<sup>38</sup> Jesús bechēbe':

—¿Zúaquezu' guzú' xel-la' nabán chiu' chee' gacu' neda' tuze? Da li dxapa' lue', nédxudxa ca cuzre xjeaj, lue' wannáquezu' chunna lasa quebe núnbe'u neda'.

Jesús naque' neza da dxezrín na naga zua Xradxu Dios

**14** Gunná Jesús:

—Quebe cuele le'e gunne xue. Le guxrén lazre' Dios, ne le guxrén lazre' neda'. <sup>2</sup> Lizre Xra' déle'e lataj naga súale. Chela quebe naca na caní, neda' ba gucha' le'e. Wexá'a cheajxecueza' lataj chee'le. <sup>3</sup> Ca te xexá'a cheajxecueza' lataj chee'le, na' wexelájqueza' xetú chee' xedajxezri'a le'e súale neda', chee' súale le'e naga súaqueza' neda'. <sup>4</sup> Le'e nézele naga cha'a, ne núnbeale neza na'.

<sup>5</sup> Tomás guzre' Jesús:

—Xran, quebe nézentu' ga chéaju'. ¿Ájazra guntu' gúnbeantu' neza na'?

<sup>6</sup> Jesús bechēbe':

—Neda' naca' neza na', ne naca' da li, ne naca' xel-la' nabán. Tuze ne' chia' neda' waca zrinle naga zua Xra'.

<sup>7</sup> Chela núnbeale neda', cá'anqueze núnbeale Xra'.

Ná'atēla núnbeale Le' lawe' da ba dxelé'ele Le'.

<sup>8</sup> Nadxa Felipe guzre' Jesús:

—Xran, ble'e netu' Xrau', xetú da ná'tēze.

<sup>9</sup> Bechēbe Jesús:

—Felipe, scha' ba guzúalēna' le'e, na' ¿quebe ne gúnbe'u neda'? Benne' dxelé'ene' neda', dxelé'equezene' Xra'. Chee' le' na', ¿bizr chee' na' dxenabu' neda' gulé'eda' le'e Xra'? <sup>10</sup> ¿Quebe dxéajle'u zúalēna' Xra', na' Xra' zúalēne' neda'? Da dxapa' le'e, quegá dxennéa' na' cheézqueza'. Xra', Bénnea' zúalēne' neda', Léqueze' na' dxunē' zrin chee' lu na'a neda'. <sup>11</sup> Le chéajlele zúalēna' Xra', na' Xra' zúalēne' neda', u che cabí dxéajlele ca da dxennéa', le chéajle' chia' ne' chee' da ca' dxuna'. <sup>12</sup> Da li dxapa' le'e, benne' dxéajle'e chia', gúnqueze' ca da dxuna' neda', na' gunē' da zaj nácadxa zren ca da caní dxuna' lawe' da xexá'a neda' naga zua Xra'. <sup>13</sup> Xúgutē da nábale le'e lu La' neda', neda' guna' na, chee' gulé'eda' neda' xel-la' szren chee' Xra'. <sup>14</sup> Néda'queza' guna' bítēteze da nábale lu La' neda'.

### Jesús dxechebe lazre' sel-le' Be' Lá'azxa

<sup>15</sup> Gunná Jesús:

—Che le'e nazrí'ile neda', le guzúa dizra' ca naca da dxixruj be'eda' le'e. <sup>16</sup> Neda' gata' xueda' Xra' sel-le' cheęle xetú Benne' gácalequeze' le'e, ne súalętecaze' le'e. <sup>17</sup> Benne' nigá naque' Be' Lá'azxa gulé'ene' le'e ca naca da li. Benne' zaj naca cheę xęzr la xu nigá quebe xelezéquene' xelezí' lu neęę Le' lawe' da quebe gaca xeledé'ene' Le', ne quebe zaj núnbe'ę Le'. Le'e núnbeale Le' lawe' da zúalęne' le'e, ne súaqueze' lu xichaj lázr-daule. <sup>18</sup> Quebe gucá'ana' le'e ca bi wezębe ca'. Welá'queza' súalęna' le'e. <sup>19</sup> Xetú chí'idau' bėnneache ca' quėbedxa xeledé'ene' neda', san le'e welé'ele neda'. Le'e tu gaca bānzquezele lawe' da tu naca bānzqueza' neda'. <sup>20</sup> Lu zra na' guėquebe'ele neda' zúalęna' Xra', na' le'e zúalele neda', na' neda' zúalęna' le'e. <sup>21</sup> Benne' nézene' ca naca da nadxixruj bea na nuna' neda', ne dxune' na, dxulé'ene' nazrí'iqueze' neda'. Xra' zrí'ine' benne' nazrí'ine' neda', na' cá'anqueze neda' zrí'ida' bėnnea', ne gulé'e lawa' le'.

<sup>22</sup> Judas, quegá bėnnea' le' Iscariote, guzre' Jesús:

—Xran, ¿bizr cheę na' gulé'e lau' netu', ne quegá gulé'e lau' lau' bėnneache zaj zre'ę xęzr la xu nigá?

<sup>23</sup> Jesús bechebę':

—Benne' nazrí'ine' neda' dxune' ca naca da dxennéa', na' Xra' zrí'ine' bėnnea', na' neda' ne Xra' xedajsúalęntu' le'. <sup>24</sup> Benne' quebe nazrí'ine' neda' quebe dxune' ca da dxennéa'. Ca naca dizra' da dxénele quebe zaj naca na cheęzqueza'. Zaj naca na cheę Xra' nasel-le' neda'.

<sup>25</sup> 'Dxapa' le'e xúgutę da caní dxácatę ne zúalęna' le'e, <sup>26</sup> na' Be' Lá'azxa, Bėnnea' sel-la Xra' lu La' neda' cheę gácalene' le'e, Le' gulé'ene' le'e xúgutę, ne gusá'queze' lázrele ca naca xúgutę da ba gucha' le'e.

<sup>27</sup> 'Xel-la' dxebeza zri lazre' dxuca'ana' cheęle. Dxunna' le'e xel-la' dxebeza zri lazre' chia'. Quebe dxunna' na ca dxelunna bėnneache xel-la' dxebeza zri lazre'. Quebe cuele gunne xue, ne quebe zrébele. <sup>28</sup> Ba bėnele gunnéa' wexá'a, ne welá'a súalęna' le'e xetú. Chela da li nazrí'ile neda', suale xel-la' dxebe, lawe' da xexá'a naga zua Xra', na' nácadxa Le' szren ca neda'. <sup>29</sup> Da nigá dxapa' le'e na'a nédxula gate quebe ne gaca na, cheę gate gaca na, na' chėjlele cheę da dxennéa'.

<sup>30</sup> 'Québedxa guchálajęteca' le'e da zren lawe' da ba za' da xriwe', da na' dxenná bea na lu xęzr la xu nigá. Da na' quebe seque na bi gune na neda'. <sup>31</sup> Caní dxal-la' gaca cheę xeleneze bėnneache neda' nazrí'ida' Xra', ne dxuna' ca da gunná bė'ene' neda'. ¡Le chasa! ¡Le xebú'u nigá!

**Jesús dxuchálaje' cheę lba uva ne cheę zruze na ca'**

**15** Gunná Jesús:

—Neda' naca' ca tu lba uva da naca na li lazre', na' Xra' naque' ca tu benne' dxá'ane' na. <sup>2</sup> Le' dxechugue' zruze na ca' da quebe dxelebía na da zixre, ne dxun chí'ę zruze na ca' da dxelebía na da zixre cheę xeledíadxa na. <sup>3</sup> Le'e nácale ca zruze na ca' da ba nun chí'ę, ne cheę dizra' da ba gucha' le'e. <sup>4</sup> Le súaqueze gácale neda' tuze ca neda' tu zúalęzqueza' le'e. Tu zruze xaga quebe gaca cuía na da zixre cheęzqueze na

che quebe súalęqueze na xaga na'. Cá'anqueze le'e quebe bi gaca gunle che quebe tu gácazquezele neda' tuze.

<sup>5</sup> 'Neda' naca' bzrigu lba uva, na' le'e nácale zruze na ca'. Bėnnea' naque' neda' tuze, na' neda' naca' le' tuze, naque' ca tu zruze na da dxeblále'ę na da zixre, lawe' da quebe bi seque' gunle che quebe gácale neda' tuze. <sup>6</sup> Benne' quebe súatequeze' nen neda' gaque' ca tu zruze na da dxugu na, na' bizre na. Xuluxutupe' zruze na bizre ca', ne xuluzré'ę na lu xi'.

<sup>7</sup> 'Che le'e súatequezele neda' tuze, ne quebe gusanle dizra' chia', waca nácale ca da dxaca lázrele, na' sile na. <sup>8</sup> Xra' dxegá'ana szrene' gate nácale ca zruze na ca' da dxeblále'ę na da zixre, ne caní gaca bea na nácale neda' tuze. <sup>9</sup> Neda' nazrí'ida' le'e ca nazrí'i Xra' neda'. Cheę le' na' le súaquezele lu xel-la' zri'i lazre' chia'. <sup>10</sup> Che gunle ca da dxixruj be'eda' le'e, na' súatequezele lu xel-la' zri'i lazre' chia', ca dxuna' neda', dxuna' ca bdxixruj be'e Xra' neda', ne zúatequeza' lu xel-la' zri'i lazre' cheę'.

<sup>11</sup> 'Neda' dxuchálajęna' le'e caní cheę súale lu xel-la' dxebe' chia', ne cheę gaca du lazre' xel-la' dxebe' cheęle. <sup>12</sup> Caní naca da dxixruj be'eda' le'e: Le zri'i le sa' ljęwėzrele tule xetule ca neda' nazrí'ida' le'e. <sup>13</sup> Xel-la' zri'i lazre' da naca szrendxa naca bea na che tu benne' guzúę' xel-la' nabán cheę' cheę gácalene' bi ljęwezre' ca'. <sup>14</sup> Le'e nácale bi ljęwezra' che dxunle ca da dxixruj be'eda' le'e. <sup>15</sup> Québedxa xapa' le'e nácale bi węn zrin chia' lawe' da quebe neze bi węn zrin bi da gun xránabe'. Dxapa' le'e nácale bi ljęwezra' lawe' da ba bzenda' le'e xúgutę da guzre Xra' neda'. <sup>16</sup> Le'e quebe gunnéle neda'. Neda' gunnéa' le'e, ne ba nuzúa' le'e cheę gácale ca zruze lba na' da dxeblále'ę na da zixre, na' tu súazqueze da zixre na'. Che gunle caní, na' Xra' gunnę' le'e xúgutę da nácale lu La' neda'. <sup>17</sup> Da nigá naca na da dxixruj be'eda' le'e: Le zri'i le sa' ljęwėzrele tule xetule.

**Bėnneache cheę xęzr la xu nigá dxelecuídene' Jesús, ne cá'anqueze benne' cheę' ca'**

<sup>18</sup> Nadxa gunná Jesús:

—Che bėnneache dxelecuídene' le'e, dxal-la' cheajsá lázrele belecuídequeze' neda' nédxute. <sup>19</sup> Chela nácale le'e cheę xęzr la xu nigá, na' xelezrí'i bėnneache le'e ca zaj nazrí'ine' le sa' ljęwezre' ca'. Neda' ba gucá'a le'e ládujla bėnneache cheę xęzr la xu nigá, na' cheę le' na' dxelecuide bėnneache le'e lawe' da quėbedxa nácale xęzr la xu nigá tuze. <sup>20</sup> Le gusá lázrele da gucha' le'e, gunnéa': Netú benne' węn zrin quebe nácadxe' szren ca xranę'. Che guláu zi' xuzre' neda', cá'anqueze xelau zi' xuzre' le'e, na' che belune' ca dxenná dizra' chia', cá'anqueze xelune' ca dxenná dizra' cheęle le'e.

<sup>21</sup> Xúgutę da caní xelune' cheęle lawe' da nácale chia', ne lawe' da quebe zaj núnbe'ę Xra' nasel-le' neda'.

<sup>22</sup> 'Chela quebe bla'a neda', ne bchálajęna' benne' ca', quebe bi dul-la zaj nabague'. Na'a zaj nabágaqueze' dul-la <sup>23</sup> lawe' da nu benne' dxecuídene' neda', cá'anqueze dxecuídene' Xra'. <sup>24</sup> Chela quebe bėna' ne-

da' xel-la' waca zren ca' lówela benne' ca' ca da netú benne' quebe ne guné', na' quebe bi dul-la xelebágué'. Lácala ba belelé'ene' da ca', dxelecuídené' neda', ne dxelecuídené' Xra'. <sup>25</sup> Da nigá dxaca na cheé gaca li ca naxúaj na lu da nadxixruj bea na da zjácale benne' ca'. Dxenná na: Belecuídené' neda' ne quebe bi da calela bēna' cheé benne' ca'.

<sup>26</sup> Gate xida Bénnea' gácalēné' le'e, Bénnea' naque' Be' Lá'azxa, ne dxulé'ene' da li, Bénnea' sel-la' neda' waláz cheé Xra', Léqueze' xechēbe' ca naca chia' neda'. <sup>27</sup> Cá'anqueze le'e wechébequezle ca naca chia' neda' lawe' da zúalele neda' nédxudautē.

**16** Gunná Jesús:

—Dxapa' le'e da caní cheé quebe gusán lázrele da naca chia'. <sup>2</sup> Welexebéajé' le'e lu xu'u naga dx-elezraguē', na' zrin zra gate nūteteze benne' gutiē' le'e guéquene' guné' zrin cheé Dios. <sup>3</sup> Caní xeluné' lawe' da quebe ne xelúnbe'e Xra', ne neda'. <sup>4</sup> Dxapa' le'e da nigá cheé gate zrin zra na', na' cheajsá lázrele ba gucha' le'e da nigá.

### Da dxun Be' Lá'azxa

Nadxa gunná Jesús:

—Quebe gucha' le'e da nigá nédxutē lawe' da zúalequeza' le'e. <sup>5</sup> Na'a wexá'a cheajxezúalēna' Xra' nasel-lē' neda', na' netule le'e quebe dxuchébele neda' ga cha'a. <sup>6</sup> Dxewí'ine lázrele lawe' da gucha' le'e da caní. <sup>7</sup> Na'a dxapa' le'e da li: Cháwe'dxa gaca chee le'e che xexá'a neda' lawe' da che quebe xexá'a, quebe xida Be' Lá'azxa xedajsúalēné' le'e, Bénnea' gácalēné' le'e. Che xexá'a neda', sel-la' Lē' chee. <sup>8</sup> Gate xida Lē', na' gulé'ene' bēneache zaj naque' benne' dul-la, ne quebe dxeluné' da xrlátaje, na' Dios guzrí'a xi'e benne' caní. <sup>9</sup> Zaj naque' benne' dul-la lawe' da quebe dxeléajlē' chia' neda'. <sup>10</sup> Xeleque bé'ene' quebe dxeluné' da xrlátaje lawe' da xexá'a neda' naga zua Xra', na' le'e québedxa lé'ele neda'. <sup>11</sup> Xeleque bé'ene' Dios guzrí'a xi'e lē' lawe' da ba guchuguē' cheé da xriwē', da na' dxenná bea na lu xēzr la xu nigá.

<sup>12</sup> Ne délé'ē da dxal-la' xapa' le'e, san le'e quebe gaca chéajni'ile na na'a. <sup>13</sup> Gate xida Be' Lá'azxa, Bénnea' dxulé'ene' da li, Lē' gulé'ene' le'e ca naca xúgutē da li lawe' da quebe guchálajē' cheézqueze'. Wanné' xúgutē da xénene', na' guzéajni'ine' le'e ca da dxal-la' gaca na. <sup>14</sup> Lē' gucá'ana szrené' neda' lawe' da wazi'ē cheé da naca chia' neda', na' guzéajni'ine' na le'e. <sup>15</sup> Xúgutē da napa Xra', cheéqueza' naca na, na' cheé lē' na' gunné'a', wazi' Be' Lá'azxa da naca chia', na' guzéajni'ine' na le'e.

**Xel-la' dxelewí'ine lazre' cheé benne' ca' xexaca na xel-la' dxelebé**

<sup>16</sup> Gunná Jesús:

—Xetú chí'idau', na' le'e québedxa lé'ele neda', na' xetú chí'i, na' xelé'ele neda' lawe' da xexá'a neda' naga zua Xra'.

<sup>17</sup> Nadxa bal-la benne' ca' dxusēde Jesús buluchēbe ljwezre':

—¿Bizra zéaje da nigá? Dxē'ē dxi'u, xetú chí'idau' québedxa lé'edxu Lē', na' xetú chí'i, na' xelé'edxu Lē' lawe' da xexáje' naga zua Xre'. <sup>18</sup> ¿Bi zéaje da na', xetú chí'idau'? Quebe dxéajni'idxu bi cheé dxuchálajē'.

<sup>19</sup> Guque be'e Jesús dxelaca lazre' xuluchēbe' Lē', na' guzre' benne' ca':

—Neda' gucha' le'e, xetú chí'idau' québedxa lé'ele neda', na' xetú chí'i, na' xelé'ele neda'. ¿Da nigá na' dx-uchēbe ljwézrele? <sup>20</sup> Da li dxapa' le'e, wabézrele le'e, ne xewí'ine lázrele, san bēneache cheé xēzr la xu nigá xelebene'. Lácala le'e xewí'ine lázrele, xel-la' dxewí'ine lazre' chee le'e xexaca na xel-la' dxebé. <sup>21</sup> Gate tu nu'ula zua sané' bidau' zué' stēbe lawe' da ba bzrin zra sua xel-la' dxudía cheé'. Gate te galaj bidu na', na' québedxa dxeajsá lazre' da guzaque' lawe' da dxe-bélé'ene' cheé bidu na' ba gúlajbe'. <sup>22</sup> Cá'anqueze le'e zúale stēbe na'a, san neda' welá'queza' xedajxenná'a le'e, na' lu xichaj lázrdaule súdequeze xel-la' dxebé, da naca na tu xel-la' dxebé da quebe nu seque' cua.

<sup>23</sup> Lu zra na' québedxa bi guchébele neda'. Da li dxapa' le'e, Xra' gunné' le'e xúgutē da nábale lu La' neda'. <sup>24</sup> Nédxula quebe bi gunábale lu La' neda'. Na'a le naba, na' si'le, cheé súalē'ēle xel-la' dxebé.

**Jesús guchuchuj guléaje' da dxaca lu xēzr la xu nigá**

<sup>25</sup> Gunná Jesús:

—Ba gucha' le'e da caní nen dizra' ca' da dxululé'e na. Wazrín zra gate québedxa guchálajlēna' le'e da naca da dxulé'e na. Guchálajlēna' le'e caníqueze da naca cheé Xra'. <sup>26</sup> Lu zra na' nábale Xra' lu La' neda', na' quebe dxenné'a' neda' gata' xueda' Xra' waláz chee le', <sup>27</sup> lawe' da Xrá'queze nazrí'ine' le'e. Nazrí'ine' le'e lawe' da nazrí'ile le'e neda', ne dxéajlēle chia' za'a naga zua Dios. <sup>28</sup> Guzá'a lau Xra' cheé bla'a lu xēzr la xu nigá cheé xexá'a naga zua Xra'.

<sup>29</sup> Nadxa benne' ca' dxusēde Jesús gulé'ē Lē':

—Na'a dxuchálajlēnu' netu' caníqueze. Quebe dx-uchínenu' dizra' ca' da dxululé'e na. <sup>30</sup> Na'a dxeque bé'entu' nézenu' xúgutē da ca', na' quebe dxal-la' nu guchēbe Lue'. Cheé lē' na' dxéajlentu' chiu' za'u naga zua Dios.

<sup>31</sup> Jesús guzre' benne' ca':

—¿Dxéajlēle chia' na'a? <sup>32</sup> Za' zra, ne ba naca zra ná'queze gate le'e gase dinnajle ca'ale xrneza cha chee le', na' gucá'anale neda' tuza'. Quebe zúaqueza' tuza' lawe' da zúale Xra' neda'. <sup>33</sup> Dxapa' le'e da nigá cheé gápale xel-la' dxebeza zri lazre' lawe' da nácale neda' tuze. Lu xēzr la xu nigá dxun na ba xen si sácale. Le gun chuchu lázrdaule, lawe' da ba bchuchuj bléaja' da dxaca lu xēzr la xu nigá.

**Jesús dxenabē' Dios xucá'ana chawē'ē benne' ca' dx-eléajlē'ē chee'**

**17** Ca gudé gunné' da nigá, na' Jesús gunné'ē xabáa, dxenné':

—Xrae, ba bzrin zra. Bca'ana szren neda', Zri'inu', cheé cá'anqueze neda', Zri'inu', gucá'ana szrena' Lue'.

<sup>2</sup> Lue' ba bennu' neda', Zri'inu', xel-la' dxenná bea chee nna be'eda' xúgute bènneache, chee gunézruja' xel-la' nabán da zeajlí canna chee xúgute benne' ca' bennu' neda'. <sup>3</sup> Xel-la' nabán da zeajlí canna naca na chee xelúnbe'e Lue', nacu' Dios tu licha', ne li lazre', na' chee xelúnbe'e neda', Jesucristo, Bénnea' gusel-lu' Lue'.

<sup>4</sup> 'Neda' ba bca'ana szrena' Lue' lu xęzr la xu nigá, ne ba bexuzre bęna' da bdxixruj be'enu' neda'. <sup>5</sup> Na'a, Xrae, bęna neda' xel-la' szren lau Lue', da naca na xel-la' szren na' da guca na chia' naga zu' Lue' nédxudaute gate za gata' xęzr la xu nigá.

<sup>6</sup> 'Benne' ca' guca'u Lue' ládujla bènneache, benne' ca' bennu' neda', neda' ba bzéajni'ida' le' Nu nacu' Lue'. Gulaque' chiu', na' Lue' bennu' neda' benne' ca', na' ba belunę' ca dxenná xrtizru'. <sup>7</sup> Na'a zaj nézene' xúgute da bennu' neda' za na naga zu' Lue'. <sup>8</sup> Ba bnézruja' chee benne' caní dizra' chiu' da bennu' neda', na' benne' caní ba gulezí' lu ne'e na. Ba guleque béene' da li neda' za'a naga zu' Lue', ne ba guléajle'e chiu', gusel-lu' neda'.

<sup>9</sup> 'Neda' dxata' xueda' Lue' gaca chawe' chee benne' caní. Quebe dxata' xueda' Lue' ne chee benne' ca' zaj naque' chee xęzr la xu nigá. Dxenaba' Lue' ne chee benne' ca' bennu' neda', lawe' da zaj naque' chiu'.

<sup>10</sup> Xúgute da naca chia' naca na chiu', na' da naca chiu' naca na chia' neda', na' xel-la' szren chia' dxulé'e lawe' na ne chee benne' caní.

<sup>11</sup> 'Neda' québedxa sua' lu xęzr la xu nigá, san benne' caní xelxegá'anę' lu xęzr la xu nigá, na' neda' wezá'a nigá, ne xedajxézualęqueza' Lue'. Xrae Lá'azxa, lu xel-la' dxenná bea chiu' bxue benne' caní, benne' ca' bennu' neda', chee xelácaqueze' tuze ca nácadxu dxi'u tuze, Lue' ne neda'. <sup>12</sup> Gate ne zua' neda' lu xęzr la xu nigá, bxua' benne' caní nen xel-la' dxenná bea chiu', benne' caní bennu' neda', ne bcache chawa' le'. Netú benne' caní quebe gunite, san tuze bęnea' ba naníte-queze', na' caní guca na chee guca li ca naxúaj na lu xi-che chiu'.

<sup>13</sup> 'Na'a ba zezá'a naga zu' Lue'. Dxácatę ne zua' lu xęzr la xu nigá dxennéa' da caní chee xelápalę'e benne' caní xel-la' dxebe' ca da nápaqueza' neda'.

<sup>14</sup> Neda' bnézruja' benne' caní dizra' chiu'. Bénneache chee xęzr la xu nigá dxelecuídenę' benne' caní lawe' da québedxa zaj naque' tuze nen benne' ca' chee xęzr la xu nigá, ca na' neda' quebe naca' tuze nen da naca chee xęzr la xu nigá. <sup>15</sup> Quebe dxenaba' Lue' xeca'u benne' caní lu xęzr la xu nigá. Dxenaba' guzrá chawu' benne' caní chee quebe seque' da xriwe' bi gun na chee' le'. <sup>16</sup> Ca neda' quebe naca' chee xęzr la xu nigá, cá'anqueze benne' caní quebe zaj naque' chee xęzr la xu nigá. <sup>17</sup> Bzua benne' caní chee xelaque' cheéquezu' Lue' ne chee da li. Dizra' chiu' naca na da li. <sup>18</sup> Ca gusel-lu' Lue' neda' ládujla bènneache zaj naque' chee xęzr la xu nigá, cá'anqueze neda' dxusel-le' benne' caní ládujla bènneache zaj naque' chee xęzr la xu nigá. <sup>19</sup> Ne chee benne' caní nuzúa cuina' cheéquezu' Lue', chee cá'anqueze benne' caní xelaque' cheéquezu' Lue' ne chee da li.

<sup>20</sup> 'Dxata' xueda' Lue', quegaze chee benne' caní, san cá'anqueze chee benne' ca' xeléajle'e chia' gate xelen-ņę' da xuluchalaj benne' caní. <sup>21</sup> Dxenaba' Lue' chee xelaca xúgute benne' caní túzqueze, ca Lue', Xrae, nácaquezu' neda' tuze, ne neda' nácaqueza' Lue' tuze, ne chee xelaca benne' caní tuze nen dxi'u, chee xeléajle bènneache zaj naca chee xęzr la xu nigá Lue' gusel-lu' neda'. <sup>22</sup> Neda' ba bnézruja' chee benne' caní xel-la' szren na' da bennu' neda' chee xelaque' tuze ca nácaquezdXu tuze dxi'u. <sup>23</sup> Neda' súalęna' benne' caní, na' Lue' súalęnu' neda', chee xelácaqueze benne' caní tuze, na' caní xeleque be'e bènneache Lue' gusel-lu' neda', ne nazrí'inu' benne' caní cáteze nazrí'inu' neda'.

<sup>24</sup> 'Xrae, Lue' bennu' neda' benne' caní, na' dxaca lazra' xelézualęne' neda' naga sua' neda', chee xelélé'ene' xel-la' szren da ba bennu' neda', lawe' da nazrí'inu' neda' nédxudaute gate quebe ne gunu' xęzr la xu nigá. <sup>25</sup> Xrae chawe', benne' zaj naque' chee xęzr la xu nigá quebe zaj núnbe'e Lue', san neda' núnbe'a Lue', na' benne' caní ba zaj nézene' Lue' gusel-lu' neda'. <sup>26</sup> Neda' bzéajni'ida' benne' caní Nu nacu' Lue', ne zúaqueza' dxuzéajni'ida' le' chee sua xel-la' zri'i lazre' dxéquenu' Lue' neda' lu xichaj lázrdau benne' caní, ne chee súalę néda'queza' le'.

#### Dxelęle' Jesús

(Mt. 26.47-56; Mr. 14.43-50; Lc. 22.47-53)

**18** Ca gudé gunná Jesús da caní, na' bdxúaje' nen benne' ca' dxusédenę' chee chjaque' xecha la'a xęgu Cedrón. Lataj na' zéle'e xaga olivo naga guxú'u Jesús nen benne' ca'. <sup>2</sup> Cá'anqueze Judas, bęnea' dxudéę' Jesús lu na' benne' ca' dxeledábague' Le', núnbe'e lataj na' lawe' da zane' lasa guxíaj Jesús na' nen benne' ca' dxusédenę'. <sup>3</sup> Ca' guca, bzrin Judas na' nen tu cue' benne' ca' dxjaque' wedil-la, ne nen bal-la benne' xra'aga węn zrin chee xudau', benne' ca' gulesel-la benne' xíchaje' ca' chee bxrau' ca', ne benne' fariseo ca'. Zaj nu'e xaga, ne xia ca', ne xi' ca', ne xi' xedxe. <sup>4</sup> Jesús ba nézene' ca da gaca chee', na' chee le' na' bdxúaje' lau benne' ca', na' bchebe' le':

—¿Nuzra dxexílajle?

<sup>5</sup> Belexechebe benne' ca':

—Jesús, benne' Nazaret.

Jesús bechebe':

—Neda' na'.

Judas, bęnea' dxudéę' Jesús lu na' benne' ca' zúaqueze' ládujla benne' ca'. <sup>6</sup> Gate gunná Jesús: Neda' na', na' benne' ca' belexebigue' lau Jesús, ne xeaļlec-hazte' lu xu. <sup>7</sup> Nadxa Jesús bchebe' benne' ca' da xula:

—¿Nuzra dxexílajle?

Gulenná benne' ca':

—Jesús, benne' Nazaret.

<sup>8</sup> Nadxa guzre Jesús benne' ca':

—Ba gucha' le'e neda' na'. Che dxexílajle neda', le güe benne' caní lataj cheajxaque'.

<sup>9</sup> Ca guca da nigá guca li ca gunná Jesús, gunné': "Benne' ca' bęna Xra' neda', netu'e quebe bnitia'."

<sup>10</sup> Nadxa Simón Pedro, ne nu'e xia, guléaje' na, na'

guchugue' naga da zua xabela chee Malco, wen zrin chee bxruze blau. <sup>11</sup> Jesús guzre' Pedro:

—Begú'u xia chiu' lu zre na. Ca da ba nun Xra' si' saca' neda', ¿quebe dxal-la' saca' na?

**Jesús dxerine' lau bxruze blau**

(Mt. 26.57-58; Mr. 14.53-54; Lc. 22.54)

<sup>12</sup> Nadxa benne' dxjaca wedil-la, ne benne' dxenná be'ene' le', ne benne' xra'aga wen zrin chee judío ca' gulél-le' Jesús, ne buluchéaje' Le'. <sup>13</sup> Nadxa guleché'e Jesús lizre Anás. Anás nigá naque' xrtau zri'ine Caifás, bènnea' naque' bxruze blau iza na'. <sup>14</sup> Caifás nigá naque' bènnea' guzre' judío blau ca' gácadxa chawe' gate tuze benne' waláz chee xezr la xu chee'.

**Pedro dxenné' quebe núnbe'e Jesús**

(Mt. 26.69-70; Mr. 14.66-68; Lc. 22.55-57)

<sup>15</sup> Simón Pedro, ne xetú benne' ca' dxusede Jesús zjaque' zeajnawe' Jesús. Benne' ljwezre Pedro nigá núnbea bxruze blau le'. Ca'an guca, benne' nigá guxú'ulene' Jesús chale'aj lizre bxruze blau na'. <sup>16</sup> Pedro begá'ane' dxu'a dxa xu'u da zua chale'aj na'. Chee le' na' bdxuaj bènnea' núnbea bxruze blau le', na' bchála-jlene' nu'ula zua dxu'a dxa xu'u na', na' gulu'e Pedro chale'aj na'. <sup>17</sup> Nadxa nu'ula na' zua dxu'a dxa xu'u bchebe' Pedro:

—¿Quebe nacu' lue' tuze nen benne' Nazaret na'?

Pedro bechebe':

—Quebe naca'.

<sup>18</sup> Lawe' da dxun na zaga, benne' wen zrin ca', ne benne' xra'aga wen zrin chee bxruze ca' ba zaj nabeque' xi', ne zaj ze' dxu'a xi' na' dxexezré'ene'. Pedro ze' nen benne' ca', dxexezré'ene' dxu'a xi' na'.

**Bxruze blau dxuchebe' Jesús**

(Mt. 26.59-66; Mr. 14.55-64; Lc. 22.66-71)

<sup>19</sup> Bxruze blau guzú lawe' dxuchebe' Jesús nuca benne' ca' zaj naque' benne' dxusedene', ne bi da dxusedene' le'. <sup>20</sup> Jesús guzre' le':

—Neda' ba bchálajqueza' lówela xúgute bènneache. Bsédequeza' lu xu'u ca', ne lu xu'u naga dxelezraga xúgute benne' judío ca'. Quebe bi bchálaja' bagácheze. <sup>21</sup> ¿Bizr chee na' dxuchebu' neda'? Bchebe benne' ca' ba belenne' chia', na' le' xelenné' bi da bchálajlena' le'. Benne' ca' zaj nézene' da ba gunnéa'.

<sup>22</sup> Gate gunná Jesús da nigá, na' tu benne' xra'aga wen zrin chee xudau', benne' ze' na', gudape' xraga Jesús, na' gunné':

—¿Caní dxexechebu' lau bxruze blau nigá?

<sup>23</sup> Jesús bechebe':

—Che gunnéa' tu da caléla, gunná ájala naca na. Che da gunnéa' naca na xrlátaje, ¿bizr chee na' dxu'u neda'?

<sup>24</sup> Nadxa Anás gusel-le' Jesús, zaj nadxéaj ne'e, lau Caifás, bxruze blau.

**Pedro dxenné' xecha lasa quebe núnbe'e Jesús**

(Mt. 26.71-75; Mr. 14.69-72; Lc. 22.58-62)

<sup>25</sup> Dxácate na' ze Pedro dxu'a xi' na' dxexezré'ene', na' gulé'e le':

—¿Quebe nacu' lue' tu benne' ca' zaj naque' tuze nen bènnea'?

Na' Pedro gunné':

—Quebe naca'.

<sup>26</sup> Nadxa tu benne' wen zrin chee bxruze blau, benne' naque' xrtia bènnea' guchugu Pedro nague', bchebe' le':

—¿Quegá ble'eda' lue' nen bènnea' naga zaj ze xaga olivo ca'?

<sup>27</sup> Pedro gunné' xecha lasa:

—Quebe núnbe'a bènnea'.

La' ná'queze gudxeze xjeaj.

**Jesús dxerine' lau Pilato**

(Mt. 27.1-2, 11-14; Mr. 15.1-5; Lc. 23.1-5)

<sup>28</sup> Nadxa belexebéaje' Jesús lizre Caifás, na' guleché'e Le' xu'u lizre benne' xu'u lu ne'e xezr la xu na' waláz chee Roma. Ba dxezú lau dxan'isise', na' benne' judío ca' quebe gulu'e xu'u na' chee quebe xelexegá'ane' sban, lawe' da che xelu'e na', quebe gaca xelawe' xrche' chee Laní Pascua. <sup>29</sup> Chee le' na' bdxuaj Pilato bchálajlene' benne' ca', na' guzre' le':

—¿Bizra da zria dxágule benne' nigá?

<sup>30</sup> Belexechebe benne' ca':

—Chela ca naque' tu benne' wen da zrinnaj, quebe gudentu' le' lau'.

<sup>31</sup> Nadxa Pilato guzre' benne' ca':

—Le xeché'e, ne le guchi'a chee' cáteze naca da nadxixruj bea chee.

Belexechebe benne' judío ca':

—Netu', benne' judío, quebe naca cheentu' nu gú-tentu'.

<sup>32</sup> Ca'an guca, guca li ca naca da ba gunná Jesús ca gatié'. <sup>33</sup> Pilato bexu'e xu'u na', na' gunné' Jesús, ne bchebe' Le':

—¿Nacu' Lue' Wenná Bea chee judío ca'?

<sup>34</sup> Jesús gunné':

—¿Dxenabu' da nigá lue'zqueze, u lawe' da nu guzre lue' ca naca chia'?

<sup>35</sup> Pilato bechebe':

—¿Naca' neda' judío? Benne' xezr la xu chiu', ne benne' xíchaje ca' chee bxruze ca' buludé'e lue' lawa' neda'. ¿Bizra benu'?

<sup>36</sup> Nadxa bechebe Jesús:

—Naga dxenná be'a quebe naca na chee xezr la xu nigá. Chela naca na chee xezr la xu nigá, na' benne' ca' zaj naque' neda' tuze welásaqueze' chee quebe tea' neda' lu na' benne' judío caní. Naga dxenná be'a quebe naca na nigá.

<sup>37</sup> Nadxa guzre Pilato Jesús:

—¿Nacu' Lue' wenná bea?

Bechebe Jesús:



—Naca' wenna' bea, cáteze dxennáu' lue'. Neda' gúla-ja', ne bla'a lu xezr la xu nigá chee nnia' da li. Xúgute benne' ca' dxeluné' ca dxenná dizra' chee da li dxelen-  
ne' da dxennéa' neda'.

<sup>38</sup> Pilato gunné':

—¿Bizra na' da li?

**Dxelechugue' chee Jesús gatie'**  
(Mt. 27.15-31; Mr. 15.6-20; Lc. 23.13-25)

Ca gudé bchebe Pilato Jesús caní, na' bdxúaje' xetú. Bchálajlene' benne' judío ca', na' guzre' le':

—Neda' quebe bi da calela dxezrelda' nun benne' nigá. <sup>39</sup> Le'e zua tu da zéajlele. Gusana' neda' tu benne' xu'u lizre xia lu Laní Pascua nigá. ¿Dxaca lázrele gusana' wenna' bea chee judío ca'?

<sup>40</sup> Nadxa xúgute' gulenné' zizraj:

—¿Quegá benne' nigá! ¡Bsan Barrabás!

Barrabás na' naque' gubán.

**19** Nadxa Pilato guqué'e Jesús, na' bdxixruj béene' xelu'e Le' xide'. <sup>2</sup> Benne' dxjaque' wedil-la buluzié' xichaj Jesús tu da' beluné' zruze xaga xeche', ne bulugácue' Le' tu ladxe' bzawe. <sup>3</sup> Nadxa guléchaje' Le', dxelenné':

—¿Gaca ba lue', wenna' bea chee judío ca'!

Nadxa belú'e dxu'a lau Jesús.

<sup>4</sup> Nadxa bdxuaj Pilato da xula, ne guzre' benne' ca':

—¿Le nna'xque! Dxebéaja' benne' nigá chee nézele quebe dxezrelda' bi da zrinnaj nabague'.

<sup>5</sup> Bdxuaj Jesús zria xíchaje' da naca zruze xaga xeche', ne nacue' ladxe' bzawe na'. Nadxa Pilato guzre' benne' ca':

—Nigá zua bènnea'.

<sup>6</sup> Gate benne' xíchaje' ca' chee bxruze ca', ne xra'aga wen zrin chee' ca' belelé'ene' Jesús, na' gulezú lawe' dxelenné' zizraj:

—¿Bde'e xaga béguaj! ¡Bde'e xaga béguaj!

Pilato guzre' benne' ca':

—Le che'e, ne le gudé'e xaga béguaj lé'equeze, lawe' da quebe dxezrelda' bi da zrinnaj nabague'.

<sup>7</sup> Na' benne' judío ca' belexechébe':

—Netu' nápantu' tu da nadxixruj bea na, ne ca dxenná na dxal-la' gatie' lawe' da dxun cuine' Zri'ine Dios.

<sup>8</sup> Gate ben Pilato da nigá, na' bezrébedxe'. <sup>9</sup> Bexu'e xu'u na', na' bchebe' Jesús:

—¿Gazra benne' Lue'?

Quebe bi bechebe Jesús.

<sup>10</sup> Nadxa guzre Pilato Le':

—¿Quebe dxexechebu' chia'? ¿Quebe nézenu' Lue' napa' neda' xel-la' dxenná bea gudá'a Lue' xaga béguaj, ne napa' xel-la' dxenná bea gusana' Lue'?

<sup>11</sup> Bechebe Jesús:

—Quebe bi xel-la' dxenná bea napu' bi gunu' chia' chela ca benna Dios lue' xel-la' dxenná bea nigá. Chee le na', bènnea' bde'e neda' lu na'u dul-la zrendxa nabague' ca lue'.

<sup>12</sup> Lu zra na'te gudilaj lazre' Pilato ájala guné' gusané' Jesús, san benne' judío ca' gulenné' zizraj:

—Che gusanu' benne' nigá, quebe nacu' César tuze, bènnea' dxenná bea Roma. Nu benne' dxun cuine' wenna' bea dxdéabague' César.

<sup>13</sup> Nadxa Pilato, gate benne' da nigá, bdxixruj béene' xelexebéaje' Jesús, na' gudxé'e lataj blau chee', da zua lataj na' nazí le na Gabata nen dizra' hebreo, da zéaje na chale'aj xiaj ta'a. <sup>14</sup> Naca na zra za zrin Laní Pascua, ca du wagubizra. Nadxa Pilato guzre' benne' judío ca':

—Nigá zua wenna' bea chee.

<sup>15</sup> Na' benne' ca' gulenné' zizraj:

—¿Gatie'! ¡Gatie'! ¡Bde'e xaga béguaj!

Pilato guzre' benne' ca':

—¿Gudá'a wenna' bea chee xaga béguaj?

Belexechébe benne' xíchaje' ca' chee bxruze ca':

—Netu' zua tuze wenna' bea cheentu'. ¡César!

<sup>16</sup> Nadxa Pilato bde'e Jesús lu na' benne' ca' chee te'e xaga béguaj, na' guleché'e Jesús.

**Jesús dxdé'e xaga béguaj**  
(Mt. 27.32-44; Mr. 15.21-32; Lc. 23.26-43)

<sup>17</sup> Na' bdxuaj Jesús nu'e xaga béguaj chee chéaje' lataj na' nazí le na Zrita Xichaj Benne' Gate, na' nen dizra' hebreo nazí le na Gólgota. <sup>18</sup> Buludé'e Jesús xaga béguaj lataj na', na' tu zren nen Jesús buludé'e xechupa benne' xaga béguaj ca' chalá'a weaj naga da' Jesús.

<sup>19</sup> Pilato bdxixruj béene' buluzú'e le'e xaga béguaj xichaj Jesús da dxenná na: Jesús, Benne' Nazaret, Wenna' Bea Chee Judío Ca'. <sup>20</sup> Zane' benne' judío ca' bululabe' da na' lawe' da zua lataj na' naga buludé'e Jesús xaga béguaj gáguze naga dxe' xezre na', na' da na' naxúaj na nen dizra' hebreo, ne nen dizra' griego, ne nen dizra' latín. <sup>21</sup> Chee le na' benne' xíchaje' ca' chee bxruze chee judío ca' gulé'e Pilato:

—Quebe guzúaju' na: Wenna' Bea Chee Judío Ca'. Bzuaj na: Le' Gunné' Naque' Wenna' Bea Chee Judío Ca'.

<sup>22</sup> Bechebe Pilato:

—Da bzuaja', ba naxúajqueze na.

<sup>23</sup> Ca gudé buludá' benne' dxjaque' wedil-la Jesús xaga béguaj, na' belexequé'e zra lane', ne belebeque' na tapa cue', tu cue' weaj chee tu tu benne' dxjaque' wedil-la. Belecá'aqueze' ladxe' dxexrúa cuzre' da quebe nadía na. Tu ca nácheze na. <sup>24</sup> Chee le na' benne' dxjaque' wedil-la gulé' ljwezre':

—Quebe chézadxu na. Cwéajdxu da gunna bea na chee la' nu xala le na.

Ca'an guca, guca li da naxúaj na lu xiche chee Dios, da dxenná na: Belexelé'e zra lana', ne guléaje' da gunna bea na chee le na. Caní belún benne' dxjaque' wedil-la.

<sup>25</sup> Gáguze naga zua xaga béguaj chee Jesús ze xrna Jesús nen bi bila xrne'e, ne María, zru'ula Cleofas, ne María Magdalena. <sup>26</sup> Gate ble'e Jesús xrne'e, ne cuita xrne'e na' ze Juan, benne' bsede Jesús, bènnea' nazri'idxe', na' guzre' xrne'e:

—Nú'uladau', na' ze zri'inu'.

<sup>27</sup> Nadxa guzre Jesús bènnea':

—Na' ze xrna'u.

Zra na'te benne' nigá beche'e nu'ula na' lizre'.

### Dxate Jesús

(Mt. 27.45-56; Mr. 15.33-41; Lc. 23.44-49)

<sup>28</sup> Ca gudé gunná Jesús da nigá, lawe' da nézene' xúgute na ba guca li, ne chee guca li ca naxúaj na lu xiche chee Dios, gunné':

—Dxebíleda'.

<sup>29</sup> Zua na' tu dxe'e nupe zichaj, na' bulusubise' tu da dxezrupe na nupe zichaj na', ne buluzúe' na lawe' tu xia tunna, na' buluzúe' na dxu'a Jesús. <sup>30</sup> Na' Jesús guzrupe' nupe zichaj na', na' gunné':

—Ba guca li ca naca na.

Nadxa bse dxu'a xíchaje', gutie'.

### Tu benne' dxeje' wedil-la dxechizie' xia lachú'u Jesús

<sup>31</sup> Naca na zra za zrin Laní Pascua, na' judío ca' quebe gulaca lazre' xelexegá'ana benne' ca' le'e xaga béguaj ca' lu zra dxulupá'ane' lawe' da naca zra na' tu zra blau. Chee le' na' gulenabe' lau Pilato dxixruj bé'ene' xelíchaje' ni'a benne' ca' zaj de'e xaga béguaj ca', ne xelexequé'e le' le'e xaga béguaj ca'. <sup>32</sup> Nadxa tu benne' ca' dxjaque' wedil-la gudíchaje' ni'a benne' nedxu na', ne cá'anqueze chee benne' xetú de'e cuita Jesús. <sup>33</sup> Gate bzrine' naga da' Jesús, blé'ene' ba gutie', na' chee le' na' quebe gudíchaje' ni'e.

<sup>34</sup> Tu benne' ca' dxjaque' wedil-la guchizie' xia chee' lachú'u Jesús, na' bdxuaj dxen, ne nisa na'. <sup>35</sup> Benne' dxuchalaj da nigá naque' benne' blé'ene' na, ne dxuchálaje' da li, ne nézene' dxenné' da li, chee cá'anqueze le'e chéajlele chee Jesús. <sup>36</sup> Da caní guca na chee guca li ca da naxúaj na lu xiche chee Dios, da dxenná na: Quebe gulíchaje' netú zrita chee'. <sup>37</sup> Xetú da naxúaj na lu xiche chee Dios dxenná na: Welelé'ene' bénnea' belune' we'.

### Dxulucache' Jesús

(Mt. 27.57-61; Mr. 15.42-47; Lc. 23.50-56)

<sup>38</sup> Ca gudé na' José, benne' xezre Arimatea, xeajnabe' Pilato gu'e le' lataj xexu'e Jesús. José naque' tu benne' guque' Jesús tuze, san bagácheze lawe' da bzrebe' judío blau ca'. Pilato be'e le' lataj, na' bexu'e Jesús. <sup>39</sup> Cá'anqueze Nicodemo, bénnea' xeajchálajlene' Jesús chizrela, bzrine' na', nu'e tu gaxúa xiaj nedxe, ne tu da dxelále'e zixre. <sup>40</sup> Nadxa José, ne Nicodemo belexequé'e Jesús, na' buluchele' Le' ladxe' nen nedxe na' ca naca da zjácalle benne' judío ca' da dxelune' chee benne' gate', gate na' dxulucache' le'. <sup>41</sup> Lataj na' naga buludé'e Jesús xaga béguaj zua tu lataj naga zaj ze xaga ca', na' lálwela lataj na' zua tu ba cube le'e xiaj na', naga quebe nu ne ch'ú'queze benne' gate'. <sup>42</sup> Lu ba na' belegu'e Jesús lawe' da zua ba na' gáguze, ne lawe' da ba dxebí'a gubizra, ne ba zua su lau zra dxulupá'ana judío ca'.

### Jesús dxexebang'e ládujla benne' gate

(Mt. 28.1-10; Mr. 16.1-8; Lc. 24.1-12)

**20** Zra nedxu, guxíaj María Magdalena dxu'a ba na' dxaní'sise', gate ne nachúl-late, na' blé'ene' québedxa naduse xiaj dxu'a ba na'. <sup>2</sup> Nadxa bexíaj chégüe' naga zua Simón Pedro nen xetú benne' bsede Jesús, bénnea' bzri'idxe' Jesús, na' guzre' benne' ca':

—Ba belequ'é Xránadxu lu ba na', ne quebe nézen-tu' ga xeajlelú'e Le'.

<sup>3</sup> Nadxa Pedro, ne bénnea' xetú beledxúaje' zjaque' dxu'a ba na'. <sup>4</sup> Dxúpaté' zjaca chégüe' tu zren, san bénnea' xetú guzá chégudxe' ca Pedro, ne bzrine' nédxudxa dxu'a ba na'. <sup>5</sup> Na' xeajsé' su dxú'ala xeajnné'e lu ba na', na' blé'ene' ladxe' da buluchele' Jesús xu'u na na', san quebe guxú'e lu ba na'. <sup>6</sup> Ca gudé na', bzrin Simón Pedro, na' guxú'e lu ba na'. Cá'anqueze le' blé'ene' ladxe' na' xu'u na na', <sup>7</sup> ne blé'ene' ladxe' da buluchele' xichaj Jesús, quebe xu'u na tu zren nen ladxe' da bedxela na le'. Nadube na, dxe' na chálá'ala. <sup>8</sup> Nadxa cá'anqueze guxú'u bénnea' xetú, bénnea' bzrin nedxu dxu'a ba na', na' blé'ene' ladxe' ca', ne guxéajle'e. <sup>9</sup> Quebe ne xeléajni'ine' da naxúaj na lu xiche chee Dios da dxenná na xebán Jesús ládujla benne' gate'. <sup>10</sup> Nadxa benne' ca' bsede Jesús belexezrine' xu'u naga zaj zre'e.

### Jesús dxulé'e lawe' María Magdalena

(Mr. 16.9-11)

<sup>11</sup> María begá'ane' dxu'a ba na', dxebezre'. Ca dxebezre' na', na' gulégüe' dxenné'e lu ba na', <sup>12</sup> na' blé'ene' chupa gubáz chee xabáa zaj nácu'e zra lane' chiche, zaj dxe'e naga guxú'u Jesús. Tue' dxe'e naga guzrua xichaj Jesús, na' xetú'e dxe'e zeaj zranle ga guzrua ni'a Le'. <sup>13</sup> Na' buluchébe gubáz chee xabáa ca' María na':

—Nu'ula, ¿bizr chee na' dxebezru'?

Le' guzre' gubáz chee xabáa ca':

—Lawe' da belú'e Xrana', ne quebe nezda' ga xeajlelú'e Le'.

<sup>14</sup> Caní dxenné', na' bzéchaj xíchaje', ne blé'ene' Jesús ze' ca'ala, san quebe nézene' che Jesús na'. <sup>15</sup> Nadxa Jesús bchébe' María na':

—Nú'uladau', ¿bizr chee na' dxebezru'? ¿Nu dxéila-ju'?

María gúquene' naque' benne' dxá'ane' xaga ca' zaj ze na', na' guzre' Le':

—Benne', che lue' bi'u Le', gunná ga xeajlú'u Le', chee cheajzezri'a Le'.

<sup>16</sup> Nadxa Jesús guzre' nu'ula na':

—María.

María na' bexéchaje', ne guzre' Le' nen dizra' hebreo: —¡Raboni!

Dizra' nigá zéaje na: Benne' Dxusede.

<sup>17</sup> Jesús guzre' María na':

—Bsan neda' lawe' da quebe ne xegüéna' naga zua Xra'. Bexíaj, xeajxezre bi bícha'dau' ca', benne' ca'

bsédeda', xegüéna' naga zua Xra', ne nácaqueze' Xrale. Naque' Dios chia', ne Dios chee.

<sup>18</sup> Nadxa bexíaj María Magdalena, xeajzenne' benne' ca' bséde Jesús ba blé'ene' Jesús, na' Le' guzre' le' da caní.

### Jesús dxulé'e lawe' benne' ca' bsédene'

(Mt. 28.16-20; Mr. 16.14-18; Lc. 24.36-49)

<sup>19</sup> Lu zra ná'queze, da naca na zra nedxu chee da gazre zra, na' chizrela zaj nazraga benne' ca' bséde Jesús, ne zaj nuséxujé' dxa xu'u ca' lawe' da dxelezre-be' judío blau ca'. Na' guxú'u Jesús, guzé' laduj benne' ca', na' bgape' benne' ca' diuzre, dxenné':

—Le gapa xel-la' dxebeza zri lazre'.

<sup>20</sup> Ca gudé gunná Jesús da nigá, na' blé'ene' benne' ca' ne'e, ne le'e naga gudé xia na'. Benne' ca' bséde Jesús gulebé'ene' gate belelé'ene' Xránadxu. <sup>21</sup> Nadxa Jesús guzre' benne' ca' xecha lasa:

—Le gapa xel-la' dxebeza zri lazre'. Cáteze gusel-la Xra' neda', cá'anqueze dxusel-la' neda' le'e.

<sup>22</sup> Nadxa blube' lau benne' ca' ne guzre' le':

—Le si' Be' Lá'axxa chee Dios. <sup>23</sup> Benne' ca' dxunite laule le'e chee dul-la zaj nabague' ba bnite lau Dios chee', na' benne' ca' quebe dxunite laule le'e chee dul-la zaj nabague', quebe bunitite lau Dios chee'.

### Tomás dxelé'ene' Xránadxu ba bebane'

<sup>24</sup> Tomás, tu benne' chazrinna ca' bséde Jesús, bènea' le' Bi Lide', quebe zué' nen benne' ca' xezícadxa gate ble'e lau Jesús. <sup>25</sup> Ca gudé na' gulé'e Tomás na':

—Ba blé'entu' Xránadxu.

Gunná Tomás:

—Che quebe le'eda' ne'e naga guledé bdiduj ca', ne gudéa' zrube na'a lu xedxu chee bdiduj ca', ne gudéa' na'a le'e naga gudé xia na', québequeze chéajle'a.

<sup>26</sup> Ca guca xrunu' zra, benne' ca' bséde Jesús zaj nazrâgaqueze' lu xu'u na' xetú lasa, na' zua Tomás nen benne' ca'. Nadxa, lácala zaj naxeexuj dxa xu'u ca', ble'e lau Jesús lau benne' ca', ne guzé' laduj le', na' bgape' le' diuzre, gunné':

—Le gapa xel-la' dxebeza zri lazre'.

<sup>27</sup> Nadxa Jesús guzre' Tomás:

—Bde zrube na'u nigá, ne gunná' na'a nigá. Benna na'u, bde na le'a nigá. Québedxa gun chupa lazru', san guxéajle.

<sup>28</sup> Nadxa bechebe Tomás:

—Xrana', ne Dios chia'.

<sup>29</sup> Jesús guzre' le':

—Tomás, na'a dxéajle'u lawe' da ba blé'enu' neda'. Ba neza zrenté naca na chee benne' ca' dxeléajle'e chia' lácala quebe ne xeelé'ene' neda'.

### Da dxaca lazre' Juan gun xiche nigá

<sup>30</sup> Jesús bene' da zandxa xel-la' waca zrenté lau benne' ca' bsédene' da quebe zaj naxúaj na lu xiche nigá. <sup>31</sup> Da caní zaj naxúaj na chee chéajle le'e chee

Jesús, naque' Cristo nase-la Dios, ne Zri'ine Dios, ne chee gápale xel-la' nabán lawe' da dxéajle chee'.

### Jesús dxulé'e lawe' gazre benne' ca' bsédene'

**21** Ca gudé na' Jesús ble'e lawe' lau benne' ca' bsédene' dxu'a nísadau' chee Tiberias. Caní guca na. <sup>2</sup> Zaj nazraga Simón Pedro, ne Tomás, bènea' lé'queze' Bi Lide', ne Natanael, benne' xezre Caná da nababa Galilea, ne chupa zri'ine Zebedeo, ne xechupa benne' ca' bséde Jesús. <sup>3</sup> Simón Pedro guzre' benne' ca':

—Cheajsendxa' bela.

Benne' ca' gulenné':

—Cá'anqueze netu' wazá'lentú' lue'.

Nadxa xjaque', na' gulu'e tu lu da dxedá lawe' nísadau'. Xela na' quebe nu bela gulezénqueze'. <sup>4</sup> Ca guzú lau dxaní'sise', ble'e lau Jesús dxu'a nísadau' na'. Benne' ca' bsédene' quebe zaj nézene' che Jesús na'.

<sup>5</sup> Nadxa Jesús guzre' benne' ca':

—Bénne'dau', ¿quebe nu bela ne senle?

Belexechebe benne' ca':

—Quebe bi ne sentu'-ba'.

<sup>6</sup> Nadxa guzre Jesús benne' ca':

—Le guzala xixruj na' chalá'a xabéla chee da dxedá lawe' nísadau' na', na' senle bela.

Ca' belune', na' ca dxelexequé'e xixruj na' quebe dx-elexegué'ene' na lawe' da nazraté na bela zan. <sup>7</sup> Nadxa bènea' nazrí'idxa Jesús guzre' Pedro:

—Xránadxu na'.

Ca ben Simón Pedro naca Xránadxu, na' bexázíe' ladxe' dxexrúa cuzre' lawe' da nagü'e na, na' bexétaje' lu nisa. <sup>8</sup> Xezícadxa benne' ca' belexezrine' dxu'a nísadau' na', zaj zre'e lu da dxedá lawe' nísadau', dx-elexezrube xue' xixruj na' nazraté na bela ca' lawe' da dxe' da dxedá lawe' nísadau' na' lu nísadau' ca tu le gu'una xiaj. <sup>9</sup> Gate belexétaje' lu xu bizre, na' belelé'ene' ba dxe' xi', ne ba zrua tu bela lawe' xi' na', na' de' na' xeta xtila. <sup>10</sup> Nadxa Jesús guzre' benne' ca':

—Le cheajxrí' tu chupa bela ca', be za guzéntele.

<sup>11</sup> Begüén Simón Pedro lu da dxedá lawe' nísadau' na', ne bezrube xue' xixruj na' dxu'a nísadau' na'te, nazraté na bela zri'a, tu gaxúa chi'inu xunba', na' lácala naca tu cá'antéba' quebe gudxeza xixruj na'. <sup>12</sup> Nadxa guzre Jesús benne' ca':

—Le da gágule xrsila.

Netú benne' ca' quebe dxelexázrene' xuluchebe' Le' nu Le', lawe' da zaj nézene' naque' Xránadxu. <sup>13</sup> Nadxa Jesús guqué'e xeta xtila na', na' bnézruje' na benne' ca', ne cá'anqueze bene' chee bela ca'.

<sup>14</sup> Da nigá naca na da guxunne' lasa ble'e lau Jesús lau benne' ca' bsédene' ca gudé bebane' ládujla benne' gate.

### Jesús dxuchálajle' Simón Pedro

<sup>15</sup> Ca gudé gulawe' xrsila, na' Jesús bchebe' Simón Pedro:

—Simón, zri'ine Jonás, ¿nazrí'idxenu' neda' ca benne' caní?

Bechebe Pedro:

—Awe', Xran, nézenu' dxelé'eda' Lue' chawe'.

Na' Jesús guzre' le':

—Bxue zríla' du chia' ca'.

<sup>16</sup> Nadxa Jesús bchebe' le' da xula:

—Simón, zri'ine Jonás, ¿nazrí'inu' neda'?

Pedro bechebe':

—Awe', Xran, Lue' nézenu' dxelé'eda' Lue' chawe'.

Jesús guzre' le':

—Bxue zríla' chia' ca'.

<sup>17</sup> Da guxunne' lasa Jesús bchebe' le':

—Simón, zri'ine Jonás, ¿dxelé'enu' neda' chawe'?

Pedro bewi'ine lazre' lawe' da bchebe Jesús le' da guxunne' lasa che dxelé'ene' le' chawe', na' guzre' Jesús:

—Xran, Lue' nézquezenu' xúgutę. Lue' nézenu' dxelé'eda' Lue' chawe'.

Na' Jesús guzre' le':

—Bxue zríla' chia' ca'. <sup>18</sup> Da li dxapa' lue', gate ne nacu' benne' cuide' gucu' zra lanu', ne guxíaju' naga dxaca lazru'. Gate bache nacu' benne' gula, chilju' na'u, na' benne' xula gugácuę' lue', ne che'e lue' naga quebe gaca lazru' chéaju'.

<sup>19</sup> Gate gunná Jesús da nigá, dxuzéajni'ine' benne' ca' ca dxal-la' gate' Pedro cheę gucá'ana szrene' Dios. Ca gudé na' Jesús guzre' le':

—Ben neda' tuze.

#### Da gaca cheę bénnea' nazrí'idxa Jesús

<sup>20</sup> Gate bexechaj Pedro, blé'ene' bénnea' nazrí'idxa Jesús zéaję nawe' le', naque' bénnea' dxe'e cuita Jesús gate na' gulawe' xrche' na', ne bchebe' Jesús: "Xran, ¿nuzra na' gudé Lue' lu na' benne' ca' dxeledábague' lue'?" <sup>21</sup> Gate Pedro blé'ene' bénnea', na' bchebe' Jesús:

—Xran, ¿gazra benne' nigá? ¿Aja gaca cheę'?

<sup>22</sup> Jesús bechebe':

—Che neda' dxaca lazra' xegá'anę' nigá ca zrindxa zra xelá'a neda', ¿naca na chiu' lue' nézenu'? Lue', ben neda' tuze.

<sup>23</sup> Belén benne' ca' zaj de'e Jesús quebe gate benne' na'. Jesús quebe guzre' le' quebe gatię'. Guzre' le': "Che neda' dxaca lazra' xegá'anę' ca zrindxa zra xelá'a neda', ¿naca na chiu' lue' nézenu'?"

<sup>24</sup> Benne' nigá naque' benne' dxexechębe' cheę da nigá, ne ba nuzúaje' na. Nézentu' dxenné' da li.

<sup>25</sup> Cá'anqueze ne zaj dedxa da zante da ben Jesús, na' chela xuaj tu tu na, dxéqueda' quebe gueque lu xęzr la xu nigá cha' xiche ca' dxal-la' guzúajdxu. Ca' naca na.

# Los Hechos

## Dios nachebe lazre' sel-le' Be' Lá'azxa

**1** Lue', Teófilo, bzuaja' chiu' lu xiche nedxu ca naca xúgute da guzú lau Jesús dxune', ne dxusédene' nédxudate, <sup>2</sup> cadxa begüéne' xabáa. Gate za xezé'e xexíaje' xabáa guqu'é gubáz chee' ca', na' zúale Be' Lá'azxa Le' guzre' benne' ca' ca da dxal-la' xelune'. <sup>3</sup> Ca gudé gutie', Jesús ná'queze ble'e lawe' benne' ca', ne lawe' chua zra ble'e lawe' benne' ca', na' blé'ene' da zan da dxelunna bea na naca bane', ne bchálajlene' benne' ca' ca dxal-la' nna bea Dios.

<sup>4</sup> Gate ne zúale Jesús benne' gubáz ca', gunné xuene' le' quebe xesí'aque' xezre Jerusalén. Na' guzre' benne' ca':

—Le cueza ca da guchebe lazre' Xra' gunné' chee, ca gunníqueza' neda'. <sup>5</sup> Da li Juan bchue' bèneache nisa, san lu zra caní gaca chee ca da zéaje xel-la' dxedxúa nisa, xida Be' Lá'azxa xedajsúe' lu xichaj lázr-daule.

## Jesús dxegüéne' xabáa

<sup>6</sup> Gate na' zaj nazrague' nen Jesús, na' buluchebe' Le':  
—Xran, ¿güe Dios lataj nna béaqueze xezre Israel lu zra caní?

<sup>7</sup> Na' bechebe Jesús:

—Quebe naca chee nézele bátala, u bi zra gun Dios da ca' tuze Le' nape' xel-la' waca guné'. <sup>8</sup> Gate xida Be' Lá'azxa súalene' le'e, sile xel-la' waca, na' chéajle cheajchálajle da naca chia' lu xezre Jerusalén, ne ca naca naga nababa Judea, ne naga nababa Samaria, ne ca náaqueze xezr la xu nigá.

<sup>9</sup> Ca gudé gunné' da nigá, ne dxácaté dxelenná' benne' ca' Le', begüén Jesús xabáa, na' ca bexu'e tu lu beuj benite Jesús lau benne' ca'. <sup>10</sup> Ne zaj zra' benne' ca' dxelenné' dxácaté dxegüén Jesús, belelá' chupa benne' zaj nácue' ladxe' chiche lau benne' ca', <sup>11</sup> na' gulé'e benne' gubáz ca':

—Le'e, benne' Galilea, ¿bizr chee na' zele dxenna'le xabáa? Jesús nigáqueze begüéne' zexíaje' xabáa, bezé'e ládujla le'e, welé'e xetú cáqueze ble'ele Le' zexíaje'.

## Dxelequ'é Matías chee xedé'e waláz chee Judas

<sup>12</sup> Nadxa besí'aca benne' gubáz ca' lu Xi'a Xaga Olivo, ne belexezrine' Jerusalén, da quebe naca na zitu', san dxé' cátitete da dxunna da nadxixruj bea na lataj xesí'aque' lu zra dxulupá'ane'. <sup>13</sup> Gate belexezrine' lu xezre na', belexegüéne' xu'u sibe naga zaj zue'. Benne'

caní zaj naque' Pedro, ne Jacobo, ne Juan, ne Andrés, ne Felipe, ne Tomás, ne Bartolomé, ne Mateo, ne Jacobo zri'ine Alfeo, ne Simón, bènea' dxedábague' benne' Roma ca', ne Judas, zri'ine Jacobo. <sup>14</sup> Xúgute benne' caní tu dxelezrágazqueze' nen benne' biche Jesús, ne María xrna Jesús, ne xebal-la nu'ula ca', chee xuluchálajlene' Dios.

<sup>15</sup> Lu zra ca' Pedro guzé' laduj bi bíchedxu ca', zaj naque' ca tu gaxúa galaj bèneache, na' guzre' le':

<sup>16</sup> —Le'e, bi bícha'dau', ben na ba xen guca li ca da gunná Be' Lá'azxa lu xiche chee Dios, da na' gunná David waláz chee Dios ca naca da dxal-la' gaca chee Judas, bènea' guché'e benne' ca' gulel-le' Jesús. <sup>17</sup> Judas nigá guzálene' dxi'u tu zren, ne guque' dxi'u tuze lu zrin nigá. <sup>18</sup> Bxa'u tu cue' xezr la xu ca naca lazruj chee Judas, da guz' lu ne'e chee da caléla da bene'. Na' benne' nigá xeajházie' suxíchajla, ne gutín le'e, na' bdxuaj ca naca zrájlué'. <sup>19</sup> Xúgute benne' zaj zre'e Jerusalén belenne' da nigá, na' buluzúe' la xezr la xu na' Acéldama, da zéaje na: Xezr La Xu Chee Dxen.

<sup>20</sup> Guca li ca da dxal-la' gaca chee' lawe' da naxúaj lu xiche lá'azxa naga zaj naxúaj salmo ca', da dxenná na:

Xegá'ana cá'aze lizre',  
ne quebe nu chilá' sua na'.

Cá'anqueze dxenná na:

Xetú benne' té'e waláz chee'.

<sup>21</sup> 'Zaj zra' nigá benne' ca' gusá'acalene' dxi'u ca naca dxácaté guzúale Jesús dxi'u. <sup>22</sup> Guzú lau na gate bchua Juan Jesús nisa, cadxa bzrin zra begüéne' xabáa. Dxun na ba xen tu benne' caní gague' dxi'u tuze chee xechébe' ca guca gate bebán Jesús lu xel-la' gute.

<sup>23</sup> Nadxa gulebéaje' chupa benne' ca', José ne Matías. José na' léqueze' Barsabás ne léqueze' Justo. <sup>24</sup> Buluchálajlene' Dios, gulenné':

—Xran, Lue' nézqueznu' ca naca da xu'u lu xichaj lázxdau xúgute bèneache. Ble'e netu' nula benne' chupa caní ba nabéaju' Lue', <sup>25</sup> chee gague' gubáz chiu', ne xedé'e waláz chee Judas, bènea' bnitie' da naca chee' lawe' da bene' dul-la, na' bexíaje' lataj naga naca chee'.

<sup>26</sup> Nadxa gulebéaje' da gaca bea na, na' bexala Matías, na' gúcate' tuze benne' chinéaj gubáz ca'.

## Ca guca gate bla' Be' Lá'azxa

**2** Ca bzrin zra Pentecostés, xúgute benne' ca' dx-eléajle'e chee Jesús zaj nazrague' tuze lataj. <sup>2</sup> Ca' guca, belenne' tu schaga da za' lu be' zran xabáa, ca dxun tu be' bdunu', na' belén na xúgute benne' zaj

zre'e lu xu'u naga zaj dxe'e. <sup>3</sup> Nadxa belelé'ene' lu be' xi' ca', da dxelala, na' xeajlezúa na xíchaj tu tu benne' ca'. <sup>4</sup> Nadxa guzúalētequeze Be' Lá'azxa xúgutē benne' ca', na' tu tuē' gulezú lawē' dxuluchálajē' dizra' nazrala cáteze dxuchine Be' Lá'azxa lē'.

<sup>5</sup> Ca lu zra ca' zaj zra' xezre Jerusalén benne' judío ca' dxulucá'ana szrénqueze' Dios. Benne' caní zá'aque' xúgutē xezr la xu zaj dxe' lu xezr la xu nigá. <sup>6</sup> Ca belene' bēneache ca naca schaga na' da dxaca na, na' belexezrague', ne quebe zaj nézene' bi na', lawe' da dxelén tu tu benne' ca' dizra' cha chee' da dxuluchalaj benne' ca' dxelájle'e chee' Jesús. <sup>7</sup> Na' belexe-bánele'ene', ne belexruse', ne gulé ljwezre' tuē' xetúe':

—Zaj naca benne' Galilea xúgutē benne' caní dxuluchálajē'. <sup>8</sup> ¿Ájazra na' dxendxu dxuluchálajē' dizra' cha cheedxu dxi'u? <sup>9</sup> Zradxu dxi'u nigá, nácadxu benne' xezr la xu Partia, ne benne' xezr la xu Media, ne benne' xezr la xu Elam, ne benne' xezr la xu Mesopotamia, ne benne' chee' nababa Judea, ne benne' chee' naga nababa Capadocia, ne benne' chee' naga nababa Ponto, ne benne' chee' naga nababa Asia, <sup>10</sup> ne benne' chee' naga nababa Frigia, ne benne' chee' naga nababa Panfilia, ne benne' xezr la xu Egipto, ne benne' chee' xezr la xu Africa da zua dēd-edxa chee' xezre Cirene. Cá'anqueze zaj zra' benne' xezr la xu Roma nigá. Bal-la benne' Roma ca' zaj naque' benne' judío, benne' gulálajē' ca', ne benne' zaj nazi'e ca naca da nadxiruj bea chee' benne' judío ca'. <sup>11</sup> Cá'anqueze nácadxu benne' xezr la xu Creta, ne benne' xezr la xu Arabia. Xúgutēdxu dxendxu lu dizra' cha cheedxu dxuluchalaj benne' caní ca naca da zren ca' da dxun Dios.

<sup>12</sup> Xúgutē' belexebánene', ne quebe zaj nézene' bi da dxaca na', na' gulenaba ljwezre' tuē' xetúe':

—¿Bizra zéajē da nigá?

<sup>13</sup> Benne' xula ca' belún lē', gulenné':

—Dxelezuzre benne' caní.

#### Da bchalaj Pedro lau benne' ca'

<sup>14</sup> Nadxa guxasa Pedro nen benne' chinéaj gubáz chee' Cristo, na' zizraj bchálajlēne' bēneache zaj zra' na'. Dxe'e lē':

—Le'e, benne' Judea, ne xúgutēle le'e nazrágale xezre Jerusalén. Dخال-la' nézele le'e da nigá. Le xen xanne' ca naca da xapa' le'e. <sup>15</sup> Netu' quebe dxezúren-tu' ca dxéquele le'e. Za gudete' xrsila na'a. Netú benne' quebe dxezúrene' ca ná'queze. <sup>16</sup> Da nigá naca da gunnáqueze Joel, bēnea' bchálajē' waláz chee' Dios gate na' gunné':

<sup>17</sup> Caní dxenná Dios: "Lu zra bzēbe wasél-laqueza' Be' Lá'azxa chia' chee' súalēne' xúgutē bēneache. Zrí'inele bi biu ne bi nu'ula welennéquezebe' waláz chia' neda'.

Bi cuide' ca' welelé'equezebe' ca da gulé'eda'-be'. Na' benne' gula ca' welennéquezene' xēla.

<sup>18</sup> Ca lu zra na' guzúaqueza' Be' Lá'azxa chia' nen bi wēn zrin chia' ca', benne' biu ne nu'ula ca', na' guchálajquezebe' waláz chia' neda'.

<sup>19</sup> Lu be' zran xabáa gulé'equezda' xel-la' waca chia', na' lu xezr la xu dxe'ela gulé'eda' da xelunna bea na, dxen, ne xi', ne zren da naca ca beuj gasaj."

<sup>20</sup> Gubizra xechul-la na,

na' beu' xexaca na xrna ca dxen nedxu ca za zrin zra xelá' Xránadxu.

Zra na' gaca na tu zra chee' da xebánedxu ne zra na' walé'equezdXu xel-la' szren chee' Dios.

<sup>21</sup> Nadxa xelélé' xúgutē benne' ca' xelenné' Xránadxu lu xel-la' dxeleajlí lazre' chee'.

<sup>22</sup> 'Chee' lē na', le'e, benne' Israel, le xen ca da xapa' le'e. Jesús, benne' Nazaret, guque' tu benne' bedxúajē' xrlátajē lau xúgutēle le'e ne chee' da bēn Dios laule le'e. Lu na' Jesús Dios blé'ene' da zan da dxebánedxu, ne xel-la' waca ca', ne da dxelunna bea na ca ba nézquezle le'e. <sup>23</sup> Gate Dios be'e lataj tu benne' bdee' Lē' lu na'le le'e cáteze bache núnqueze' nedxu, nadxa le'e gudél-lale Lē', na' bētele Lē' gate na' bdele Lē' lu na' benne' ca' dxelunē' da calēla, benne' ca' buludé'e Lē' xaga béguaj naga gutiē'. <sup>24</sup> Nadxa Dios bsebanē' Lē', bebéajē' Lē' lu xel-la' gute. Quebe guxú'u ájala xegá'anē' chalásaze lu xel-la' gute na'. <sup>25</sup> Ca naca da nigá bchalaj wenná bea David ca naca chee' Jesús na', gate gunné':

Belé'equezda' Xrana' lawa' nigá.

Lē' zue' cuita' xabēla, chee' quebe bi guchebe na neda'.

<sup>26</sup> Chee' lē na' gubélé'e'eda', ne bil-la' lu xel-la' dxebé chia'.

Chee' lē na' guxrén lázrequeza' Lē' gate gatia',

<sup>27</sup> lawe' da quebe xucá'anaquezu' neda' lu lataj chee' benne' gate.

Quebe güéquezu' lataj guzru bēl-la' dxen chia' neda', naca' benne' wēn zrin chiu', ne benne' nazrí'inu'.

<sup>28</sup> Blé'equezenu' neda' ca dxal-la' guna' chee' zrué'eda' xel-la' nabán,

na' gúnna'le'u neda' xel-la' dxebé lawe' da zúalēnu' neda'.

<sup>29</sup> 'Le'e, bi bícha'dau'. Naca bea na gute xra xrtáudxu David, na' bulucachē' lē' lu xēdxu ba chee' da zúaqueze na na'a nagá zúadxu. <sup>30</sup> David na' guque' tu benne' bchálajē' waláz chee' Dios, ne gunézene' ca da nachēbe lázrequeze Dios gunē'. Gunné' liē' tu benne' zri'ine zre sua David na' gaque' Cristo, Bēnea' nna béaqueze', xequé'e lawe' chee' David. <sup>31</sup> Ca' guca, David nigá belé'equezne' nedxu ca naca da dxal-la' gaca chee' Cristo, na' bchálajē' ca guca gate bebán Cristo, gunné': "Benne' nigá quebe xegá'anaqueze' lataj chee' benne' gate, ne quebe gúzruqueze bēl-la' dxen chee'." <sup>32</sup> Caní guca, Dios bsebanē' Jesús nigá, na' netu' dxex-eché'bentu' da li ca guca da nigá. <sup>33</sup> Ca' guca, Dios bzuē' Jesús lu xabáa chee' nen xel-la' waca chee', na' be'e Lē' lataj gusel-lē' Be' Lá'azxa chee' nigá ca nachēbe lázrequeze' nedxu gunē', na' xúgutē da caní dxelélé'le le'e, ne dxenle zaj naca na da dxun Be' Lá'azxa na'. <sup>34</sup> David na' quebe begüéne' xabáa, san lé'queze' gunē':

Xránadxu Dios guzre' Xrana':

“Gudxe'e cuita' xabēla nigá  
<sup>35</sup> ca zrindxa zra guzúa' benne' dxedábague' lue' chee  
 nna be'enu le'.”

<sup>36</sup> Xúgutele le'e, benne' Israel, dxal-la' nézquezle da  
 nigá: Jesús nigá, bēneea' bda'le le'e xaga béguaj, Dios  
 ba nune' Le' Xránale ne Cristo cheēle, Benne' guselé'  
 le'e.

<sup>37</sup> Gate benne' ca' belenne' da nigá, na' belexewí'ine  
 lazre', na' buluchebe' Pedro, ne benne' gubáz ca' chee  
 Jesús, dxelé'ē le':

—Benne' bíchentu', ¿ájazra dxal-la' guntu' xca'?

<sup>38</sup> Nadxa gunná Pedro:

—Le xebí'i lazre' lau Dios, ne le chua nisa tu tule chee  
 gácale Jesucristo tuze, chee gunita lau Le' cheēle le'e  
 ca naca dul-la da nabágale. Ca' gaca, nadxa Dios sél-  
 laqueze' Be' Lá'azxa chee' chee súalene' le'e. <sup>39</sup> Da nigá  
 nachēbe lazre' Dios naca na cheēle le'e, ne chee zrí'in-  
 ele, ne chee xúgute benne' zaj zre'ē zitu', xúgute  
 benne' ca' dxaca lazre' Dios nne'.

<sup>40</sup> Ca naca dizra' nigá, ne xezícaladx dizra' da bchalaj  
 Pedro, bzéajni'ine' benne' ca', na' gunné':

—Le la ládujla benne' wēn da calēla caní.

<sup>41</sup> Ca'an guca, benne' ca' guléajle'ē chee da bchalaj  
 Pedro belexedxúe' nisa, na' lu zra na' belaca tuze ca  
 chi dxua gaxúa benne' nen benne' ca' ba dxeléajle'ē  
 chee Jesús. <sup>42</sup> Na' xúgute benne' ca' gulezúa típaqueze'  
 ca da dxulusēde benne' gubáz chee Jesús le', na'  
 gulezúe' tuze nen le sa' ljwezre' chee bululáwizre' Dios,  
 ne buluzrague' chee xelawe' da dxusá lázredxu ca gu-  
 ca gate gute Cristo.

**Ca belún benne' nedxu ca', benne' guleajlí lazre' Cristo**

<sup>43</sup> Xúgute benne' ca' gulezrebe' gate beledé'ene' xel-  
 la' waca zantē, ne da dxelunna bea na da dxelún  
 benne' gubáz chee Jesús. <sup>44</sup> Xúgute benne' ca' dxeléa-  
 jle'ē chee Jesús gulaque' tuze, ne bulunézruje' da de  
 chee' tuē' xetúe'. <sup>45</sup> Belutiē' xúgute da zaj nape', ne bu-  
 lunézruje' dumí na' chee benne' ca' ca da dxelaxzr-  
 jene'. <sup>46</sup> Xugu' zra belexezrague' lu xudau', ne cá'an-  
 queze lu lizre cha chee', chee xelawe' da dxusá  
 lázredxu ca guca gate gute Cristo. Gulawe' tu zrentē lu  
 xel-la' dxelebe', ne dutē xel-la' dxelxruj lazre' chee'.

<sup>47</sup> Belúe lánē' Dios, na' xúgute bēneache guléquene'  
 benne' ca' ba lánē. Tu zra tu zra Xránadxu bzane'  
 benne' ca' chee Cristo ca dxelezí' lu ne'ē tu tuē' Cristo.

**Dxexaca tu benne' zrinnaj**

**3** Tu zra xjaque' Pedro ne Juan lu xudau' dxexedá'  
 chunna, da naca na gate dxululáwizraj bēneache  
 Dios lu xudau'. <sup>2</sup> Tu zra tu zra zua tu benne' na' naque'  
 zrinnaj ca nálajtē'. Dxelechē' benne' ljwezre' le' xudau'  
 na', ne dxelebeche' le' dxu'a dxa xu'u na' nazí le na: Da  
 Xrtantē, chee nabe' guna' chee benne' dxelu'e na'.

<sup>3</sup> Gate benne' zrinnaj nigá blé'ene' Pedro ne Juan, dx-  
 elu'e xudau', na' gunabe' guna' lau benne' caní.

<sup>4</sup> Nadxa Pedro ne Juan gulenné'ē le', na' Pedro guzre'  
 benne' na':

—Gunná' netu'.

<sup>5</sup> Benne' na' gunná' xánne' le' lawe' da dxéquene' bi  
 xulunezruje' le'. <sup>6</sup> Pedro guzre' le':

—Quebe bi de chia' dumí plata ne dumí oro. Da na-  
 pa' gunna' lue'. Lu La Jesucristo, benne' Nazaret, gux-  
 asa gudá.

<sup>7</sup> Nadxa Pedro guqu'ē na' benne' zrinnaj na' da zua  
 xabēla, ne bechise' le', na' ca bene' caní, belexezúa  
 chacha ni'e, ne béchajdu chee' ca'. <sup>8</sup> Nadxa benne' zrin-  
 naj na' guxritiē' tu, na' guzé', ne guzú lawe' dxedé'.  
 Guxú'ē nen benne' ca' xudau', dxedé', dxexritiē', ne dx-  
 ue lánē' Dios. <sup>9</sup> Xúgute benne' zaj zre'ē na' beledé'ene'  
 le' dxedé', ne dxue lánē' Dios. <sup>10</sup> Belexebánene', ne  
 belezrebe' ca da beledé'ene' guca na, lawe' da zaj  
 núnbe'ē benne' zrinnaj na', ne zaj nézene' naque' bēn-  
 nea' dxebé'ē dxenabe' guna' ga dxelexú'u bēneache  
 xudau', da na' nazí le na Da Xrtantē.

**Da bchalaj Pedro la chila da nazí le na La Chila Chee  
 Salomón**

<sup>11</sup> Benne' zrinnaj na', benne' ba bexaque', quebe  
 bšanē' na' Pedro ne Juan, na' xúgute benne' dxelexe-  
 bánene', ne xjaque' naga nazí le na La Chila Chee Sa-  
 lomón, naga zaj zra' Pedro ne Juan. <sup>12</sup> Gate ble'e Pedro  
 da nigá, na' guzre' benne' ca':

—Le'e, benne' Israel, ¿bizr chee na' dxebánele le'e?  
 ¿Bizr chee na' dxenná'le netu' caní, ne dxéquele netu'  
 bexuntu' benne' nigá, na' dxexedé' ne chee xel-la' wa-  
 ca cheentu', u ne chee xel-la' benne' xudau' cheentu'?  
<sup>13</sup> ¡Cabí! Dios chee xra xrtáudxu Abraham, ne Isaac, ne  
 Jacob bca'ana szrene' Zrí'ine', Jesús, Bēneea' bdele le'e  
 lu na' benne' xu'u lawe'. Gate guca lazre' Pilato gusanē'  
 Le', le'e quebe guca lánzele. <sup>14</sup> Bzúale chalá'ala Benne'  
 na' naque' lánzele ne xrlátaje, na' gunábale la tu  
 benne' wēn da zrinnaj. <sup>15</sup> Ca'an guca, bētele le'e Bēn-  
 nea' dxunne' bēneache xel-la' nabán, san Dios bse-  
 banē' Le' ládujla benne' gate, na' netu' dxexeché'entu'  
 chee da nigá. <sup>16</sup> Guca lu La Jesús nigáqueze, u nnadxu  
 guca na lawe' da guxéajle chee La Jesús, chee bezí' le  
 dipa benne' nigá dxelé'ele, ne núnbeale le'. Lawe' da  
 guxéajle'ē chee Jesús, ba bexácatequeze' ca dxelé'ele  
 le'e xúgutele.

<sup>17</sup> Le'e, Bi bicha', nezda' gate le'e, ne benne' xíchaje  
 ca' chee bētele Jesús, quebe guque be'ele ca da dx-  
 unle. <sup>18</sup> Dios bene' guca caní chee guca li ca da ba gun-  
 né' nédxute gate buluchalaj waláz chee' benne' ca', na'  
 gulenné' dxal-la' si' saca Cristo chee Dios. <sup>19</sup> Chee le  
 na', le xebí'i lánzele, ne le xexaca Dios tuze, chee  
 xusule' dul-la nabágale. Nadxa Xránadxu Dios gunné'  
 le'e lataj xexaca chawe' xíchaj lánzraule. <sup>20</sup> Sel-le'  
 chee Jesús, Bēneea' guchēbe lazre' sel-le' chee  
 nédxudautē. <sup>21</sup> Lu zra caní Jesucristo dxal-la' xegá'ane'  
 xabáa cadxa gucá'ana chawe' Dios xúgute da dxaca, ca  
 na' gunné' lu dxu'a benne' ca' buluchálaje' waláz chee'  
 nédxudautē. <sup>22</sup> Ca' naca na, lawe' da gunná Moisés,  
 guzre' xra xrtáudxu ca': “Sel-la Xránadxu Dios chee tu  
 benne' guchálaje' waláz chee'. Gaque' tu benne' ládu-  
 jla bi bíchele ca', na' sel-le' le' chee ca gusel-le' neda'.

Le xen xanne' xúgutę da xę'e le'e, <sup>23</sup> lawe' da welebía xi' xúgutę benne' quebe xelapa Lę' ba lá'ana, na' cuase' benne' ca' ládujla xęzre Israel."

<sup>24</sup> Xúgutę benne' ca', benne' buluchálaję' waláz cheę Dios, guzú lau na gate zua Samuel, ne zeaj na, buluchálaję' cheę zra caní. <sup>25</sup> Le'e dxezile ca da gulenná benne' ca' buluchálaję' waláz cheę Dios, ne nácale tuze lu xel-la' wezría da bęn Dios nen xra xrtáule ca', ca guzre' Abraham: "Lu na' benne' zri'ine zre su' gaca chawe' cheę xúgutę bęnneache zaj zre'ę lu xęzr la xu." <sup>26</sup> Gate Dios bsebanę' Zrí'ine', gusel-le' Lę' nedxu laule le'e cheę gaca chawe' cheęle, cheę gusanle tu tule le'e da calęla da dxunle.

#### Pedro ne Juan dxelezrine' lau benne' xu'u lawe' ca'

**4** Pedro ne Juan ne dxuluchálajęne' benne' ca' gate belezrín na' bxruze ca', ne benne' xu'u lu ne'ę bi xra'aga cheę xudau', ne benne' saduceo ca'. <sup>2</sup> Dxeleze'ę lawe' da dxulusęde Pedro, ne Juan benne' ca', dxelennę' welexebán benne' gate lawe' da bebán Jesús. <sup>3</sup> Nadxa gulęle-le' Pedro ne Juan, na' gulechę'e lę' lizre xia ca zrindxa zra xula lawe' da ba dxezre' zra na'. <sup>4</sup> Gulęajlę' benne' zan ládujla benne' ca' belęnne' da bchalaj Pedro, na' cátime benne' ca' dxelęajlę'ę cheę Jesús zaj naque' ca gazxu' cue' chi gaxúa benne' biu.

<sup>5</sup> Zra xula na' benne' xíchaję ca' cheę judío ca', ne benne' gula sina ca', ne benne' ca' dxuluxuzájłę'ę da nadxixruj bea na, belezraguę' lu xęzre Jerusalén <sup>6</sup> nen Anás, bxruze blau, ne Caifás, ne Juan, ne Alejandro, ne xúgutę benne' xrtia bxruze blau ca'. <sup>7</sup> Nadxa gulenná be'e xęajlexrí'ę Pedro ne Juan, na' buluzę' lę' laduj naga zaj zre'ę, na' buluchebe' lę':

—¿Bi xel-la' dxenná bea, u nu lu La dxunle da caní?

<sup>8</sup> Nadxa Pedro, zúalequeze Be' Lá'azxa lę', guzre' benne' ca':

—Le'e, benne' xíchaję ca' cheę bxruze, ne benne' gula sina ca', <sup>9</sup> le'e dxuchębele netu' cheę tu da chawe' da guca cheę tu benne' wę', cheę nézele ájala guca bęxaca bęnnea'. <sup>10</sup> Dxuzentu' xúgutęle le'e cheę xeleneze xúgutę benne' Israel, benne' nigá zę' lau xúgutęle le'e, ba bęxaque' lu La Jesucristo, Benne' Nazaret, Bęnnea' bda'le le'e lę'ę xaga bęguaj, na' Dios bsebanę' Lę' ládujla benne' gate. <sup>11</sup> Jesús nigá naque' xiaj na', le'e, benne' węn xu'u bzúale chalá'ala, san na'a Léqueze' naque' xiaj blau cheę xu'u. <sup>12</sup> Quebe nu chilá' bęnneache seque' guselę' dxi'u lawe' da quebe ne gunna Dios xetú La bęnneache lu xęzr la xu nigá, benne' séquene' guselę' dxi'u.

<sup>13</sup> Gate benne' xu'u lawe' belelé'ene' Pedro ne Juan dxuluchálaję' du lazre', ne dxeleque bé'ene' quebe zaj nazędię' lu na' bxruze ca', san zaj naque' benne' zre'ę cá'aze, na' belexebáne benne' xíchaję ca', san guleque bé'ene' zaj naque' benne' guledálęne' Jesús. <sup>14</sup> Cá'anqueze bęnnea' bęxaque' zę' na' nen Pedro ne Juan, na' cheę lę' na' quebe gulezéquene' bi xelennę' cheę'.

<sup>15</sup> Nadxa gulenná be'ę belexedxúaj benne' gubáz ca' ládujla lę'. Cate' belexegá'ana lęze' buluchebe lįwezre', <sup>16</sup> dxelennę':

—¿Ájazra gundxu cheę benne' caní? Xúgutę benne' zaj zre'ę Jerusalén zaj nézene' belunę' xel-la' waca zren nigá, na' quebe gaca tábagadxu na. <sup>17</sup> Na'a, cheę quębedxa zriluj da nigá lówela bęnneache, guxrúsadxu benne' caní cheę quębedxa nu xuluchálajęne' lu La Jesús.

<sup>18</sup> Nadxa gulenná be'ę belexezrín Pedro ne Juan, na' gulenná bé'ene' lę' quębedxa nu xuluchálajęne', ne quebe nu xulusędenę' lu La Jesús. <sup>19</sup> Pedro ne Juan belexechebe':

—Le nna' le'e che naca xrlátaję lau Dios guzúazrantu' xrtızrale le'e, quęzcala xrtızra' Dios. <sup>20</sup> Netu' quebe gaca gusanu' gucháljantu' ca naca da blęentu', ne da bęnentu'.

<sup>21</sup> Nadxa benne' xu'u lawe' ca' buluxruse' Pedro ne Juan, san bulusanę' lę'. Quebe belezrelnę' ájala xelunę' xuluzaca zi'ę lę' lawe' da dxelúe lá'ana xúgutę bęnneache Dios ca naca da ba guca. <sup>22</sup> Bęnnea' bęxaque' ne cheę xel-la' waca zren nigá ba gudęę' chua iza.

#### Benne' ca' dxelęajlę'ę cheę Jesús dxelenabe' lau Dios gunęzruję' lę' xel-la' dxuluxrén lazre'

<sup>23</sup> Gate bulusanę' Pedro ne Juan, benne' caní xjaque' naga zaj zra' benne' lįwezre', na' buluzenne' lę' ca naca xúgutę da gulenná benne' xíchaję ca' cheę bxruze ca', ne benne' gula sina ca'. <sup>24</sup> Gate belennę' da caní, xúgutę' buluchálajęne' Dios, gulennę':

—Xránantu', Lue' nacu' Dios. Bęnu' xabáa, ne xęzr la xu, ne nísadau', ne xúgutę da zaj nnita lataj ca'. <sup>25</sup> Lue', lu na' Be' Lá'azxa, ne lu dxu'a David, benne' węn zrin chiu', gunnáu':

¿Bizr cheę na' dxelasa bęnneache xęzr la xu ca', na' bęnneache dxelegú'u lazre' da quebe bi zaj zaca?

<sup>26</sup> Benne' wenná bea ca' cheę xęzr la xu gulunę' tuz, na' benne' blau ca' cheę xęzr ca' belezraguę' cheę xeledábaguę'ę Xránadxu Dios, ne Cristo cheę'.

<sup>27</sup> 'Da li, Herodes. ne Poncio Pilato belezraguę' lu xęzre nigá nen benne' zitu' ca', ne nen benne' Israel ca', na' guledábaguę' Zri'inu' Lá'azxa, Jesús, Bęnnea' bzúaquezu' Lue'. <sup>28</sup> Ca'an guca, benne' ca' belunę' xúgutę ca da ba núnquezu' Lue' dxal-la' gaca na.

<sup>29</sup> Na'a, Xran, gunná' ca dxuluxruse' netu', ne bęnna netu', węn zrin chiu' ca', xel-la' dxuxrén lazre' cheę guchálajntu' xrtızru', ne quebe zrébentu', <sup>30</sup> ne bęnna netu' xel-la' waca chiu' cheę gaca xęxuntu' benne' wę' ca', ne cheę guntu' xel-la' waca cheę xabáa lu La Zri'inu' Lá'azxa Jesús. ¡Ca'an gaca!

<sup>31</sup> Gate bęxuzre buluchálajęne' Dios, lu lataj naga zaj nazraguę' guzrú', na' xúgutę' guzúalę Be' Lá'azxa lę', na' buluchálaję' xrtızra' Dios dutę xel-la' dxuluxrén lazre' cheę'.

#### Xúgutę' dxelunę' tuze ca naca da zaj nape'

<sup>32</sup> Benne' zan ca', benne' dxelęajlę'ę cheę Jesús gulaque' tuze lu xichaj lázrdawę'. Netúę' quebe gunné' cheęę' naca da nape'. Xúgutę da zaj nape' zaj nunę' tuze. <sup>33</sup> Benne' gubáz ca' cheę Jesús, nen dutę xel-la'



dxelenná bea buluchálajqueze' ca guca gate bebán Xránadxu Jesús, na' Dios bene' guca chawe' chee xúgute benne' ca'. <sup>34</sup> Quebe nu guzúa ládujla benne' ca' bi bxázejene' lawe' da caní belún xúgute benne' zaj nape' xezr la xu ca' u xu'u ca'. Belutié' na, na' belúe dumí na', <sup>35</sup> ne xeajlenéruje' na lu na' benne' gubáz ca', chee xelexele'e na tu tu benne' ca' ca da dx-elechínene'. <sup>36</sup> Zua ládujla benne' ca' tu benne' xrtia Leví le' José, benne' gúlaje' Chipre da naca tu xezr la xudau' naxechaj nísadau' le' na. Benne' nigá, buluzúa gubáz ca' le' Bernabé, da zéaje na benne' dxexúe zrene'. <sup>37</sup> Benne' nigá beti'e tu xezr la xu da nape', na' bi'e dumí na', ne bnéruje' na lu na' benne' gubáz ca'.

#### Dul-la da belún Ananías ne Safira

**5** Xetú benne' le' Ananías nen zru'ule' Safira, beti'e tu xezr la xu chee'. <sup>2</sup> Benne' nigá bequ'e late' dumí na', na' da beg'anaze bi'e lau benne' gubáz ca', ne gunné' ca naca na'. Zru'ule' ca naca na nézene'.

<sup>3</sup> Nadxa guzre Pedro le':

—Ananías, ¿bizr chee na' be'u lataj Satanás guxú'u na lu xichaj lárda'u chee si x'e'u Be' Lá'azxa, na' beca'u late' chiu' ca naca da guzi'u chee xezr la xu na'?

<sup>4</sup> ¿Quebe guca xezr la xu na' chiu'? Na' gate beti'u na, ¿quebe guca dumí na' chiu'? ¿Ájazra guca ben'u da nigá? Dios guz' x'e'u, quegá bénneache.

<sup>5</sup> Ca ben Ananías da nigá, na' guzré'e gútete'. Xúgute benne' belén da nigá belezrébele'e. <sup>6</sup> Nadxa gulebiga bal-la bi cuide' ca', ne buluchélabe' le' tu ladxe', na' belúabe' le' cheajlecáchebe' le' lu ba.

<sup>7</sup> Ca guca chunna hora gudé na', guxú'u zru'ula Ananías na', ne quebe nézene' bi ba guca. <sup>8</sup> Pedro bchebe' le':

—Gunná, ¿b'étele le'e xezr la xu na' ca dxennale guzile na?

Gunná Safira na':

—Awe', ca naca na'.

<sup>9</sup> Nadxa Pedro guzre' le':

—¿Bizr chee na' benle le'e tuze dizra' gúquele si x'ele Be' Lá'azxa? Chale'aj na' ba zesí'aca bi ca' xea-jlecáchebe' benne' chiu', na' na'a xelúatequezebe' lue'.

<sup>10</sup> La' ná'queze nu'ula na' guzré'e gútete' zran ni'a Pedro. Gate belú'u benne' cuide' ca', na' belelé'ebe' le' ba guti'e, na' belexebéajbe' le' xeaajlecáchebe' le' cuita ba chee benne' chee'. <sup>11</sup> Xúgute benne' ca' zaj nazrague' na', ne xúgute bénneache, benne' belén da caní belezrébele'e.

#### Benne' gubáz ca' dxelúnle'e xel-la' waca chee xabáa

<sup>12</sup> Benne' gubáz ca' belúnle'e xel-la' waca chee xabáa, ne da dxelunna bea na lau benne' ca', na' xúgute' belezrague' La Chila Chee Salomón, da naca na chee xudau'. <sup>13</sup> Netú benne' ca', benne' quebe dxelájl'e chee Jesús, quebe belexázrene' guné' benne' ca' tuze, san xúgute bénneache belape' benne' caní ba lá'ana. <sup>14</sup> Benne' zandxa gulezú lawe' dxelájl'e chee Xránadxu, benne' biu ne nu'ula ca'. <sup>15</sup> Ca' guca na, bele-

béaje' benne' we' ca', zaj de' lu da dxeláta'ne', ne da'a chee', na' gulíxru'e le' la neza ca' chee gate te Pedro na', na' te zru'la chee' lawe' benne' ca'. <sup>16</sup> Cá'aqueze benne' xezre walizre ca' belelé'e lu xezre Jerusalén, zaj nu'e benne' we' chee' ca', ne benne' ca' zaj xu'e be' xri-we' ca', na' xúgute' belexexaque'.

#### Benne' gubáz ca' dxelu'e lizre xia

<sup>17</sup> Nadxa bxruze blau, ne benne' saduceo ca' zaj zúalene' le', gulaque' xa lazre', <sup>18</sup> na' gulel-le' benne' gubáz ca', ne buluzré'e le' lizre xia. <sup>19</sup> Na' tu gubáz chee xabáa chee Xránadxu gusalaje' dxa xu'u chee lizre xia na' chizrela, na' bebéaje' benne' ca', ne dx'e le':

<sup>20</sup> —Le chjaca, ne le cheajsé lu xudau', ne le guzén benne' ca' ca naca chee xel-la' nabán cube nigá.

<sup>21</sup> Ca belenne' da nigá, zra xula belú'e chila xudau' che zílala, na' gulezú lawe' dxulusédené' benne' zaj zre'e na'.

Dxácaté na', bxruze blau na', ne benne' zralene' le', buluchague' benne' ca' chee xu'u lawe' blau, ne benne' gula sina ca' chee xezre Israel, na' gulenná be'e xelexebéaje' gubáz ca' zaj xu'e lizre xia. <sup>22</sup> Gate belezrín bi xra'aga chee xudau' na', quebe nu belelé'ene' lu xu'u lizre xia, na' belexezrine', ne buluzenne' benne' ca', <sup>23</sup> dxelenné':

—Gate bzrintu' lizre xia na', naxezxuj tipa na, na' benne' dxjaque' wedil-la zaj zre'e dxu'a dxa xu'u na', ne dxuluxúe' na, san gate gusalajntu' na, quebe nu bezré-lentu' lu xu'u na'.

<sup>24</sup> Gate bxruze blau, ne benne' xíchaje ca' chee bxruze ca', ne xíchaje chee bi xra'aga ca', belenne' da nigá, na' buluchebe ljwezre' ga cheajsé da nigá. <sup>25</sup> La' ná'queze bzrin tu benne' guzre' le':

—Benne' ca' bzra'le le'e lizre xia zaj zre'e lu chila xudau', dxulusédené' bénneache.

<sup>26</sup> Nadxa benne' xíchaje chee bi xra'aga chee xudau' guxíajlene' bi xra'aga ca', na' xeaajlexrí'e gubáz ca'. Quebe bi belúnene' le' lawe' da belezrebe' bi xelún benne' ca' dxelenne' chee gubáz ca', lawe' da dx-eléquene' xelu'e le' xiaj. <sup>27</sup> Gate xeaajlexrí'e gubáz ca', na' buluzré'e le' lau benne' xu'u lawe' blau, na' gunná bxruze blau na', dx'e' benne' gubáz ca':

<sup>28</sup> —Netu' bzrúnantu' le'e quebe guchálajledxale bénneache lu la bénnea'. ¿Bizra na' benle? Ba bzenle ca naca benne' zaj zre'e xezre Jerusalén ca naca da dxusédele, ne dxaca lázrele gusebágale netu' xel-la' gute chee benne' na'.

<sup>29</sup> Nadxa belexechebe Pedro, ne xezícadxa benne' gubáz ca':

—Dxala' guzúantu' xrtizra' Dios, quegá xrtizra' bénneache. <sup>30</sup> Dios chee xra xrtáudxu ca' bsebané' Jesús, Bénéa' b'étele le'e bda'ale le' xaga béguaj. <sup>31</sup> Dios bca'ana szrene' le' chalá'a xabéla chee', ne bene' le' Benne' Blau, ne Weselá, chee gata' lataj chee benne' Israel xelexebí'i lazre' chee gunite lau Dios dul-la chee'. <sup>32</sup> Chee le' na' netu' dxexechébentu', ne cá'aqueze dx-un Be' Lá'azxa. Dios dxunéruje' Be' Lá'azxa benne' dxuluzúe' dizra' chee'.

<sup>33</sup> Gate belenne' da nigá, na' belezré'e, ne gulaca lazre' xelúti'e gubáz ca'. <sup>34</sup> Ládujla benne' xu'u lawe' ca' zua tu benne' fariseo le' Gamaliel. Naque' benne' dxuzúzajle'e da nadxiruj bea na, na' dxelápal'e bèneache le' ba lá'ana. Benne' nigá guzé', na' gunná bé'ene' xelexebéaj'e gubáz ca' ch'alé'ajla tu chí'idau'. <sup>35</sup> Nadxa guzre' benne' xu'u lawe' ca':

—Le'e, benne' Israel, le guxúe xanne' ca gunle chee benne' caní. <sup>36</sup> Le gusá lazre', bache guca zane' iza, gudábaga Teudas xu'u lawe', gunné' naque' tu benne' blau, na' xjácalle ca tapa gaxúa benne' biu le'. Na' belutie' le', na' xúgut'e benne' ca' gulaca le' tuze belexase dinnaje' ca', na' gudé chee da na'. <sup>37</sup> Gudé na', lu zra gate belú'u bèneache xiche, na' bla' Judas, benne' Galilea, na' benne' zan xjácalle' le'. Cá'anqueze belutie' bènea', na' xúgut'e benne' gulede'e le' belexase dinnaje'. <sup>38</sup> Chee le' na', le gusán benne' caní, ne quebe guchixre chee nen benne' ca'. Che da nigá naca na da dxun beneácheze, wadé chee na. <sup>39</sup> Che naca na da dxun Dios, quebe séquele le'e guzría xile na. Le guxúe xanne' chee quebe tíl-lal'e Dios.

<sup>40</sup> Xúgut'e belexaque' tuze. Nadxa gulenná be'e belú'u gubáz ca' da xula, na' ca belú'u benne' ca', na' buluzrun'e le' québedxa nu xuluchálajle benne' ca' lu La Jesús. Gudé na' bulusan'e le'. <sup>41</sup> Na' benne' gubáz ca' belexedxúaj'e naga zaj zra' benne' xu'u lawe' ca', dxelebé'le'ene' lawe' da be' Dios lataj gulede'e xel-la' zi' lawe' da zaj naque' Jesús tuze. <sup>42</sup> Quebe bulusan'e dxuluchálaj'e, ne dxuluséden'e bèneache ca naca chee Jesucristo xúgut'e zra, lu chila xudau', ne lu xu'u ca'.

#### Dxuluzúe' gazre benne' xelune' zrin chee benne' zaj de'e Cristo

**6** Lu zra ca', gate zaj dxan benne' ca' zaj de'e Jesús, na' benne' ca' dxelenné' dizra' griego gulawe' zria benne' ca' dxelenné' dizra' hebreo. Dxelenné' quebe nu dxunexruj xanne' da xeláw nu'ula ba gulate benne' chee' zaj zre'e ládujla le' gate dxelísie' xel-la' wagu tu zra tu zra. <sup>2</sup> Nadxa benne' gubáz ca' buluchague' ca naca benne' ca' dxeléajle'e chee Jesús, na' gulé'e le': —Quebe naca xrlátaje gusantu' guchálajntu' xrtizra' Dios chee gudentu' xel-la' wagu. <sup>3</sup> Chee le' na', biche ljwézrentu', le quilaj gazre benne' lówela le'e, benne' zaj naque' du lazre', ne dxeléajni'ine', ne zúale Be' Lá'azxa le', na' le gusebague' zrin nigá. <sup>4</sup> Netu' tu guchálajlezquezentu' Dios, ne gusédentu' bèneache xrtizra' Dios.

<sup>5</sup> Xúgut'e gulaza lazre', na' gulequé'e Esteban, tu benne' dxéajle'e dut'e lázrdawe' chee Jesús, ne zúale Be' Lá'azxa le'. Cá'anqueze gulequé'e Felipe, ne Prócoro, ne Nicanor, ne Timón, ne Parmenas, ne Nicolás, tu benne' xezre Antioquia, benne' nédxute' bexaque' tuze benne' judío ca'. <sup>6</sup> Na' guleché'e benne' caní lau benne' gubáz ca', na' le' bululáwizre' Dios, ne buluzé ne'e lawe' benne' gazre caní.

<sup>7</sup> Xrtizra' Dios zeaj dxezriluj na, na' benne' ca' dxeléajle chee Jesús guxánle'e lu xezre Jerusalén, na' bxruze zan chee judío ca' guléajle'e chee'.

#### Dxel'e-le' Esteban

<sup>8</sup> Esteban, tu benne' nápal'e xel-la' waca, ne naque' chawe' lau Dios, bēne' xel-la' waca ca' chee xabáa, ne da dxelunna bea na chee da ca' lau bēneache ca'.

<sup>9</sup> Nadxa bal-la benne' chee xu'u naga dxelezraga bēneache ca', nazí le na Xu'u Chee Benne' Québedxa Zaj Nada'u, benne' xezre Cirene ca', ne benne' xezre Alejandría ca', ne benne' chee ga nababa Cilicia, ne Asia, gulezú lawe' dxulutíl-lalēne' Esteban dizra'. <sup>10</sup> Quebe gulezéquene' bi xelenné' chee xrtizra' Esteban lawe' da bchálaj'e nen dut'e xel-la' sina chee Be' Lá'azxa.

<sup>11</sup> Nadxa gulíruje' bal-la benne' ca' chee xelenné' belenne' gunné' Esteban dizra' schanni' chee Moisés, ne chee Dios. <sup>12</sup> Caní belune', ne gulu'e xel-le' bēneache ca', ne benne' gula sina ca', ne benne' dxuluzúzajle'e da nadxiruj bea na, na' gulebía di'e Esteban. Gulele-le' le', ne guleché'e le' lau benne' xu'u lawe' blau. <sup>13</sup> Cá'anqueze gulíraj'e benne' wēn lazre' xelenné' chee Esteban, na' gulenné':

—Benne' nigá quebe dxusan'e dxenné' schanni' chee xudau' lá'azxa nigá, ne chee da bdxiruj bea Dios. <sup>14</sup> Ba bentu' gunné' ca gun Jesús, benne' Nazaret, dxenné' guzría xi'e xudau' nigá, ne guché'e ca naca da zéajlédxu da bca'ana Moisés.

<sup>15</sup> Nadxa benne' xu'u lawe' ca', ne xúgut'e benne' zaj zre'e na', gate gulenné'e Esteban, belélé'ene' lawe', naca na ca lau tu gubáz chee xabáa.

#### Dxexechēbe Esteban lau benne' xu'u lawe' ca'

**7** Nadxa bxruze blau bchebe' Esteban:

—¿Zaj naca da li da caní?

<sup>2</sup> Na' Esteban bechebe':

—Le'e, benne' gula, ne le'e biche ljwezra', le xene. Xradxu zu'e xabáa ble'e lawe' lau xra xrtáudxu Abraham gate ne zu'e lu xezr la xu Mesopotamia, nédxudxa gate quebe ne xezé'e cheajxézúe xezre Harán.

<sup>3</sup> Dios guzre' le': "Bsan lázriu' ne xúgut'e xrtia ljwezru', na' guxíaj lu xezr la xu da gulé'eda' lue'." <sup>4</sup> Nadxa Abraham guzé'e lu xezr la xu Caldea, xeajsúe' xezre Harán. Ca gudé gute xra Abraham, Dios guché'e Abraham lu xezr la xu nigá, naga zrale le'e na'a. <sup>5</sup> Dios quebe bi bnézruje' chee Abraham naga sue' lu xezr la xu nigá, ne naga gune' lize', san guchēbe lazre' gunézruje' le' xezr la xu nigá, na' gate te gate le', na' gaca na chee zrí'ine', lácala lu zra na' quebe ne galaj nu zri'ine Abraham. <sup>6</sup> Cá'anqueze Dios guzre' le' xelezúa zri'ine zre sue' ca benne' zitu' tu lu xezr la xu chee benne' xula, ne xelaque' benne' zaj nada'u, na' xuluzálaj'e le' tapa gaxúa iza. <sup>7</sup> Cá'anqueze guzre Dios le': "Neda' chuga' ca gaca chee xezr la xu na' guchine na zri'ine zre su', na' te na' xelexedxúaj'e ga na', ne xelúe lá'ane' neda' lu xezr la xu nigá." <sup>8</sup> Dios bēne' tu xel-la' wezría nen Abraham, na' gunná bé'ene' le' chugu latedu weaj bēla' chee benne' biu ca' lu bēl-la' dxen chee', tu da guzúa chuchu na xel-la' wezría na'. Chee le' na' gate gulaj Isaac, zri'ine Abraham, guchugue' latedau' bēla' chee

beł-la' dxen cheę Isaac gate gúquebe' xrunu' zra, na' cá'anqueze beń Isaac cheę zrí'ine', Jacob, ne cá'anqueze beń Jacob cheę zrí'ine' ca', benne' ca' gulaque' xra chazrinnu cue' benne' Israel.

<sup>9</sup> Zrí'ine Jacob na', benne' ca' zaj naque' xra xrtáudxu, gulaque' xa lazre' cheę bi biche' José, na' belutię-be' cheę chu'ube' lu na' benne' guchíneń'-be' lu xęzr la xu Egipto. Dios guzúaleńe' José, <sup>10</sup> na' bselé'-be' lu xúgute da zi' da xa'. Bnézruje'-be' xel-la' dxéajni'i, na' beń Dios bezaca ba lázrele Faraón José na'. Faraón nigá guque' wenná bea lu xęzr la xu Egipto, na' bzuę' José gácabe' benne' xu'u lu ne'ę xęzr la xu Egipto na', ne benne' walizre Faraón na'.

<sup>11</sup> Nadxa guca gubina' du ca naca xęzr la xu Egipto, ne ca naca xęzr la xu Canaán, na' xra xrtáudxu ca' quebe bi belezréleńe' da xelawe'. <sup>12</sup> Gate ben Jacob de zrua' xtila lu xęzr la xu Egipto, na' gusel-le' na' zrí'ine' ca', benne' ca' zaj naque' xra xrtáudxu. Da nigá guca na da nedxu lasa xjaque' Egipto. <sup>13</sup> Da gudxupe' lasa xjaque' na', José ble'e lawe' benne' biche' ca', na' ca'an guca guneze wenná bea cheę Egipto ga benne' José na'. <sup>14</sup> Nadxa José gunná bé'ene' xejlexrí'ę xre', ne ca naca xrtia ljawezre', zaj naque' ga xun chínue'. <sup>15</sup> Ca'an guca, Jacob xejśúe' Egipto naga gutię', ne naga gulátequeze xra xrtáudxu ca'. <sup>16</sup> Ca gudé na' belú'ę beł-la' dxen gate cheę benne' ca' lu xęzre Siquem, naga bulucache' le' lu ba da zua na lu xęzr la xu na' da guzi' Abraham nen dumí da gudízruje' bi ca' zri'ine Hamor lu xęzre Siquem na'.

<sup>17</sup> Gate ba zua gagu zra gaca li da guchebe lazre' Dios da na' beń chúchue' lau Abraham, na' benne' Israel zaj zre'ę xęzr la xu Egipto gulánle'ę. <sup>18</sup> Nadxa guzú lau dxenná bea tu wenná bea lu xęzr la xu Egipto, benne' quebe núnbe'ę José. <sup>19</sup> Wenná bea nigá guzi xę'ę benne' ljawézredxu, ne bzálaje' xra xrtáudxu ca', na' gunná bé'ene' le' cheajlecá'ane'-be' bidu dxene cheę' ca' cheę xelátebe'. <sup>20</sup> Lu zra ca' gulaj Moisés, ne gúcabe' tu bidau' bezaca ba lazre' Dios cheębe', na' xra xrnabe' bulusegule'-be' lizre' chunna beu'. <sup>21</sup> Gate bzin zra zxał-la' cheajlega'ane'-be', na' bi nu'ula cheę wenná bea na' bequę'ę-be', ne bsegule'-be' ca zrí'inequeze'. <sup>22</sup> Cheę le' na', Moisés guzúdebe' ca naca xel-la' sina cheę Egipto, na' gúcabe' tu benne' nape' xel-la' dxenná bea ca naca da gunné', ne da beńe'.

<sup>23</sup> Gate bzrię' chua iza, Moisés guca lazre' cheajnné'ę benne' ljawezre', benne' Israel ca'. <sup>24</sup> Blé'ene' tu benne' Egipto dxu'ę tu benne' Israel. Cheę gúcaleńe' benne' na', ne cheę bebéaj lazre' bėńnea', beńie' benne' Egipto na'. <sup>25</sup> Moisés gúquene' benne' lazrię', benne' Israel ca', xeleque bé'ene' Dios guselé' benne' ca' ne cheę le'. Benne' ca' quebe guleque bé'ene' na. <sup>26</sup> Zra xula Moisés blé'ene' chupa benne' Israel dxeledil-le', na' lawe' da guca lazre' xelezrá zrię' benne' ca', na' guzre' le': "Le'e nácale biche ljawézrele. ¿Bizr cheę na' dxue ljawézrele?" <sup>27</sup> Nadxa benne' na' dxu'ę benne' ljawezre' bzrięe' Moisés, na' guzre' le': "¿Nu bzua lue' ca benne' xíchaję cheęntu' cheę guchi'u ca da dxuntu?" <sup>28</sup> ¿Dxaca lazru' gutiu' neda' ca beńu' neaje, beńiu' benne' Egipto

na'?" <sup>29</sup> Ca ben Moisés da nigá, na' bzrúnnaje' zexiáje' lu xęzr la xu cheę benne' Madián ca'. Na' guzúe' ca tu benne' zitu', na' bchaga ná'leńe' nu'ula, na' gulaj chupa zrí'ine'.

<sup>30</sup> Ca gudé chua iza, gate zuę' le'ę xixre' lawe' lataj da zua na gagu lu xi'a Sinaí, na' ble'e lau tu gubáz cheę xabáa le' tu lu xi' da dxu' lu xeche' bisigá. <sup>31</sup> Moisés bzrebe' ca naca da blé'ene', san gate gubiguę' cheę le'e xáńneńe', benne' chi'i Xránadxu, dxenné': <sup>32</sup> "Neda' naca' Dios cheę xra xrtu' ca', Dios cheę Abraham, ne Dios cheę Isaac, ne Dios cheę Jacob." Nadxa Moisés guzú lau dxezrízię' lu xel-la' dxezrebe, na' quebe bexázrjene' nne'ę. <sup>33</sup> Xránadxu guzre' le': "Guleaj zrelu' xu'u ni'u lawe' da naca lázaxa lataj naga dxeléajju'.

<sup>34</sup> Neda' ba ble'eda' ca naca da dxelezaca zi' bėńneache chia' zaj zre'ę lu xęzr la xu Egipto. Dxenda' ca dxelebezre xache', ne ba bla'a cheę guselá' benne' ca'. Gudá lue', sel-la' lue' lu xęzr la xu Egipto."

<sup>35</sup> Lácala benne' ca' buluzúe' Moisés chalá'ala, gulé'ę le': "¿Nu bzua lue' ca benne' xíchaję cheęntu' cheę guchi'u ca da dxuntu?" Dios gusel-le' le' ca benne' xíchaję, ne benne' guselá le', ne cheę gubáz cheę xabáa na' ble'e lawe' le' lu xeche' bisigá. <sup>36</sup> Moisés na' bebéaję xra xrtáudxu ca' lu xęzr la xu Egipto, ne beńe' xel-la' waca ca', ne da gulunna bea na da beńe' lu xęzr la xu na', ne lu nísadau' Xrna, ne le'ę xixre' lawe' lataj da chua iza na'. <sup>37</sup> Moisés nigáqueze guzre' benne' Israel ca': "Dios sel-le' tu benne' guchálaje' waláz cheę', benne' gálaje' ládujla xrtia ljawézrele le'e, ca gusel-le' neda'. Cheę Le' le xen." <sup>38</sup> Cá'anqueze Moisés nigá, bėńnea' guzúale benne' ca' le'ę xixre' lawe' lataj, tu zren nen gubáz cheę xabáa na' bchálajle le' lu xi'a Sinaí, guzúaleńe' xra xrtáudxu ca', ne guzi'ę dizra' cheę xel-la' nabán cheę bdeę' na cheęntu'.

<sup>39</sup> Xra xrtáudxu ca' quebe gulaca lazre' xuluzúa dizra' cheę Moisés, san buluzúe' le' chalá'ala, ne gulaca lazre' xelezreńe' Egipto. <sup>40</sup> Gate cabí zuę' Moisés ga na' gulé'ę Aarón: "Dxaca lázrentu' gunu' dios ca' cheę xelebía lawe' launtu', lawe' da quebe nézentu' bi guca cheę Moisés, bėńnea' bebéaję netu' lu xęzr la xu Egipto."

<sup>41</sup> Nadxa belune' tu bedáu' guca na ca tu bėzredau', ne belutię' be xixre'du ca' lau bedáu' na', ne gulebene' cheę da zaj nune'. <sup>42</sup> Nadxa Dios becuase' nen benne' ca', na' be'ę le' lataj belúe lán'ę' belaj zaj zria zran xabáa. Ca'an naxúaj na lu xiche cheę benne' ca' buluchálaje' waláz cheę Dios. Dxelenné':

Le'e, benne' Israel ca', ¿guzríale-ba' chia' neda' be xixre'du ca' bėtele

dute' chua iza gate na' guzúale le'ę xixre' lawe' lataj?

<sup>43</sup> Cabí! Bíale xudau' xide zra be xixre' cheę dios cheęle, Moloc,

ne xudau' cheę belaj nazí le na Renfán, dios cheęle, bedáu' ca' bėńquezle le'e cheę be lán'ale na.

Cheę le' na' cuéaja' le'e lu xęzr la xu cheęle, ne sel-la' le'e dédedxa ca naga dxu' Babilonia.

<sup>44</sup> Le'ę xixre' lawe' lataj na' xra xrtáudxu ca' belune' tu xudau' xide naga buluzrá chawę' blaga' xiaj naga naxúaj da nadxixruj bea na. Belune' na ca naca da

ble'e Dios Moisés, gate guzre' le' gunē' na ca naca da na' ba blé'engē'. <sup>45</sup> Zri'ine xra xrtáudxu ca' belexaca lu ne'e xudau' xide na', na' belú'e na gate belezrine' lu xezr la xu nigá nen Josué, chee belequ'e'e xezr la xu nigá lu na' benne' xezr la xu ca' zaj zre'e nigá, benne' ca' Dios bebéaje' le' chee bnézruje' xezr la xu nigá chee xra xrtáudxu ca'. Ca'an guca ca bzrinte' zra ca' zua David. <sup>46</sup> Wenná bea David na', Dios bezaca ba lazre' chee', na' guca lazre' David gunē' tu xudau' naga sua Dios chee Jacob. <sup>47</sup> Salomón, zri'ine David, benē' lizre Dios na'. <sup>48</sup> Dios szrentē quebe zuē' lu xudau' ca' da zaj nun bēneache. Caní gunná tu benne' bchálaje' waláz chee Dios, gunné':

<sup>49</sup> Xabáa naca lataj naga dxe'a,

na' xezr la xu naca na naga nuléaj ni'a.

¿Ájazra naca xu'u gunle le'e chia'? dxenná Xránadxu.

¿Ájazra naca lataj naga dxal-la' xezí' lazra'?

<sup>50</sup> ¿Quegá neda' bēnqueza' da ca'?

<sup>51</sup> Nadxa gunná Esteban:

—Le'e nácaquezle lázxdau zide', ne zria nágale, ne lázrdaule ca zaj naca chee benne' quebe zaj núnbe'e Dios, quebe dzezile xrtizre'. Dxedábagaquezle Be' Lá'azxa. Nácale ca gulaca xra xrtáule ca'. <sup>52</sup> Xra xrtáule ca' buluzría xi'e xúgutē benne' ca' buluchálaje' waláz chee Dios. Belutiē' benne' ca' buluchálaje' nédxudaute ca dxal-la' gaca chee benne' xrlátaje nigá, na' gate blé'e, lé'equezle bdele Le' lu na' benne' ca' guledábague' Le', ne bétele Le'. <sup>53</sup> Le'e guzile da nadxixruj bea na da bēna gubáz chee xabáa dxi'u, san quebe dxuzúale dizra' chee na.

#### Dxelutiē' Esteban

<sup>54</sup> Gate belén benne' ca' da caní, na' gulagu lazxe' lu xel-la' dxelezrá'a Esteban. <sup>55</sup> Nadxa Esteban, zúale Be' Lá'azxa le', gunné'e xabáa, ne blé'engē' xel-la' szren chee Dios, na' Jesús ze' chalá'a xabēla chee Dios.

<sup>56</sup> Nadxa gunné':

—Le nna'xque, dxelé'eda' naxalaj xabáa, na' Benne' Gulje' Bēneache ze' chalá'a xabēla chee Dios.

<sup>57</sup> Benne' ca' buluséxruje' nague', na' gulebezre xe'e, ne xeajlechía che'e Esteban na'. <sup>58</sup> Na' belebéaje' le' lu xezre na', naga belú'e le' xiaj. Na' benne' ca' gulenné' chee Esteban bulucá'ane' zra lanē' lu na' tu benne' cuide' le' Saulo. <sup>59</sup> Dxácatē dxuluzríe' le' xiaj, Esteban na' bláwizre' Dios, gunné':

—Xrana' Jesús, bezí' lu na'u be' nácaqueza'.

<sup>60</sup> Gudé na' bzu zribe', na' gunné' zizraj:

—Xran, quebe gusebagu' benne' caní dul-la nigá.

Ca bexuzre gunné' ca', na' gutie'.

**Saulo dxenáu zi' xuzre' benne' ca' dxeléajle'e chee Jesús**

**8** Saulo guque' tuze nen benne' ca' belutiē' Esteban.

Lu zra ná'queze gulezú lawē' dxelau zi' xuzre' benne' ca' dxeléajle'e chee Jesús, benne' ca' zaj zre'e xezre Jerusalén. Xúgutē' belexase dínnaje' ca naca xezre ca'

zaj nababa Judea, ne xezre ca' zaj nababa Samaria.

Benne' gubáz ca' belexegá'ane' xezre Jerusalén na'.

<sup>2</sup> Bal-la benne' ca' zaj naque' chee Dios bulucache' Esteban na', ne gulebézrele'e chee'. <sup>3</sup> Dxácatē na' Saulo dxenáu zi' xuzre' benne' ca' dxeléajle'e chee Jesús, na' guxú'e tu tu xu'u chee cheajxrube xue' benne' ca', ne cheajlu'e le' lizre xia.

**Dxuluchálaje' dizra' chawe' chee Jesús naga nababa Samaria**

<sup>4</sup> Benne' ca' chee Cristo, benne' buluzrúnnuje' Jerusalén, buluchálaje' dizra' chawe' chee Jesús gáteteze na' zjaque'. <sup>5</sup> Felipe, tue' benne' ca', guxiáje' tu xezre naga nababa Samaria, na' guzú lawē' dxuchálajle' benne' ca' ca naca chee Cristo. <sup>6</sup> Benne' ca' zaj nazrague' belén xánnene' ca da dxuchalaj Felipe, ne belelé'equenze' ca naca xel-la' waca ca' da dxunge'. <sup>7</sup> Benne' zan, benne' zaj xu'e be' xriwe' belexexaque', na' be' xriwe' ca' belexedxúaj na lu xichaj lázrdau benne' ca', dxelebezre xa'a na, na' benne' zan benne' zaj zua zri ni'a ne'e, ne benne' zrinnaj ca' belexexaque'. <sup>8</sup> Ca'an guca, gulebéle'e xúgutē benne' ca' lu xezre na'.

<sup>9</sup> Zua na' tu benne' le' Simón, nédxute guque' benne' wazrá', ne guzú xe'e benne' Samaria ca', dxenné' naque' tu benne' szren. <sup>10</sup> Xúgutē' belén xánnene' chee', benne' cazraze ca', ne benne' blau ca', gulenné':

—Benne' nigá nape' xel-la' szren chee Dios.

<sup>11</sup> Gulape' le' ba lá'ana lawē' da lu xel-la' wazrá' chee' na' guzú xe'e benne' ca' zane' iza. <sup>12</sup> Gate guléajle'e chee dizra' chawe' da dxuchalaj Felipe ca dxenná bea Dios, ne ca naca chee La Jesucristo, xúgutē', benne' biu, ne nu'ula ca', beledxúe' nisa. <sup>13</sup> Cá'anqueze Simón na' guxiáje'e chee Jesús, ne gudxúe' nisa, na' guzú lawē' zéajle'e Felipe, na' dxexebánnene' ca naca xel-la' waca da za xabáa da dxun Felipe.

<sup>14</sup> Gate benne' gubáz ca' chee Jesús, benne' zaj zre'e Jerusalén, belenné' gulezú' lu na' benne' Samaria ca' xrtizra' Dios, na' gulesel-le' Pedro ne Juan na'. <sup>15</sup> Gate belezrine' na', na' belenabe' law Dios chee benne' Samaria ca' dxeléajle'e chee Jesús chee xelez'ie' Be' Lá'azxa. <sup>16</sup> Quebe ne xida Be' Lá'azxa súalene' netú benne' ca'. Tuze beledxúaze' nisa lu La Xránadxu Jesús. <sup>17</sup> Nadxa Pedro ne Juan buluzé ne'e lawē' benne' ca', na' gulez'ie' Be' Lá'azxa.

<sup>18</sup> Gate ble'e Simón bla' Be' Lá'azxa gate gubáz ca' buluzé ne'e benne' ca', na' guca lazre' gunézruje' gubáz ca' dumí, <sup>19</sup> gunné':

—Le gunna neda' xel-la' waca nigá chee gate guzéa' na'a lawē' nüteteze benne', na' si'e Be' Lá'azxa.

<sup>20</sup> Nadxa guzre Pedro le':

—Wabía xi' dumí chiu' na' nen lue' lawē' da dxéquenu' wazéquenu' ga'u nen dumí ca da dxúnnaze Dios. <sup>21</sup> Quebe naca chiu', ne quebe napu' lataj lu da nigá lawē' da quebe naca xrlátaje xichaj lázrda'u lau Dios. <sup>22</sup> Bsan ca naca da calēla chiu' nigá, ne guta' xue Dios chee gunitē lawē' chiu' ca da gúquenu' lu xichaj lázrda'u. <sup>23</sup> Dxeque be'eda' nazrate xichaj lázrda'u da calēla, na' da calēla na' nuchéaj na lue'.

<sup>24</sup> Na' bechebe Simón:

—Le gata' xue Xránadxu chia' neda', chee quebe gaca chia' ca da gunnáu'.

<sup>25</sup> Ca gudé belexechebe' chee Jesús, ne buluchálaje' dizra' chee Dios, na' benne' gubáz ca' buluzenne' bèneache dizra' chawe' chee Jesús lu xézredu ca' zaj nababa Samaria, na' ca gudé na' belexezrine' Jerusalén.

### Felipe dxuchálajlene' tu benne' chee xezr la xu Etiopía

<sup>26</sup> Gudé na' guzre tu gubáz chee xabáa chee Xránadxu Felipe:

—Guxasa, guxíaj chalá'a naga dxedé gubizra beu' za-ga ca', naga zrua neza chee Jerusalén da zeaj xezre Gaza, da dxedé na le'e xixre' lawe' lataj.

<sup>27</sup> Felipe guxase', na' guzé'e zéaje', na' la neza na' bezrague' tu benne' Etiopía. Benne' nigá naque' wizre, ne naque' benne' szren xu'u lu ne'e xel-la' gunní'a chee Candace, nu'ula na' dxenná bé'ene' xezr la xu Etiopía. Ba guxíaj benne' nigá Jerusalén chee be lán'ane' Dios.

<sup>28</sup> Na'a zexíaje' Etiopía na', dxe'e lu carreta chee' da dxelecá'a bzrina', ne dxulabe' xiche naga zaj naxúaj xrtizra' Isaías, benne' bchálaje' waláz chee Dios. <sup>29</sup> Nadxa gunná Be' Lá'azxa, guzre' Felipe:

—Gubiga gagu cuita carreta na'.

<sup>30</sup> Gate gubiga Felipe na' benne' dxulaba bènnea' xiche chee Isaías, na' bchebe' le':

—¿Dxéajni'inu' ca naca da dxulabu'?

<sup>31</sup> Benne' biu na' guzre' le':

—¿Ájazra gaca chéajni'ida' che quebe nu chilá' guzéajni'i neda'?

Na' guzre' Felipe cuene' cué'lene' le'.

<sup>32</sup> Naga dxulabe' lu xiche chee Dios dxenná na caní: Beleché'e le' naga gati'e ca tu zríla'dau', na' ca zríla' na' dxátaba' zrize lau benne' ca' dxuluchibe' zraba',

ca' bènqueze le', quebe bi gunné'.

<sup>33</sup> Bulucá'ana ditje' le', ne quebe belú'e lataj nu guchi'a chee',

ne quebe nu gaca guchálaje' ca naca chee zri'ine zre sue',

lawe' da beluti'e le'.

<sup>34</sup> Na' benne' Etiopía na' bchebe' Felipe:

—Gunná, ¿nuzra chee dxenná benne' nigá, cheéqueze' na', che chee xetú benne' xula?

<sup>35</sup> Nadxa guzú lau Felipe bzéajni'ine' le' ca naca naga dxulabe', ne bchálajlene' le' dizra' chawe' ca naca chee Jesús. <sup>36</sup> Gate guledé'e tu naga de nisa, na' gunná benne' Etiopía na':

—Nigá de nisa. ¿Quebe gaca chua' nisa, zra?

<sup>37</sup> Felipe guzre' le':

—Che dxéajle'u duté lázrda'u, waca.

Benne' na' bechebe':

—Dxéajle'a naca Jesucristo Zri'ine Dios.

<sup>38</sup> Nadxa gunná bé'ene' guleza carreta na', na' dxúpaté' gulu'e lu nisa, na' Felipe bchue' le' nisa. <sup>39</sup> Gate belexedxúaje' lu nisa na', na' Be' chee Xránadxu beche'e Felipe naga xula. Benne' Etiopía na' québedxa

blé'ene' le', na' bexu'e neza chee' duté xel-la' dxebe'.

<sup>40</sup> Felipe na' guque bé'ene' ba zue' xezre Azoto, na' gudé'e tu tu xezre dxuchálaje' dizra' chawe' ca naca chee Jesús cadxa bezrine' Cesarea.

### Saulo dxexaque' benne' chee Jesús

(Hch. 22.6-16; 26.12-18)

**9** Dxácate na' Saulo quebe dxusane' dxune' ba xuzre gutie' benne' ca' dxeléajle'e chee Xránadxu. Chee guné' caní guxíaje' xeajchálajlene' bxruze blau.

<sup>2</sup> Gunabe' xiche da dxulé'e na nape' xel-la' dxenná bea da gu'e chéaje' xudau' ca' zaj nnita xezre Damasco, chee séquene' cheaxedíajle' benne' ca' dxeléajle'e chee dizra' chawe' chee Jesús, ne che'e le', benne' biu, ne nu'ula ca', chee guzré'e le' lizre xia lu xezre Jerusalén. <sup>3</sup> Na' gate ne xu'e neza zéaje', ne ca ba zua zrine' xezre Damasco, na' bsaní' tu xi' naga zéaje' da za' xabáa. <sup>4</sup> Saulo xeajcházije' lu xu, na' benne' chi'i tu benne' dxe'e le':

—Saulo, Saulo, ¿bizr chee na' nau zi' xuzru' neda'?

<sup>5</sup> Nadxa Saulo bchebe':

—¿Nuzra Lue', Xran?

Na' bènnea' bechebe':

—Neda' naca' Jesús, benne' na' nau zi' xuzru'. Lue'ze dxun zi' cuinu', ca dxun beze gate dxulíbeba' lawe' xá-gala da dxádu'e'-ba'.

<sup>6</sup> Nadxa Saulo dxezrizque' dxezrebe', gunné':

—Xran, ¿bi dxaca lazru' guna'?

Na' Xránadxu guzre' le':

—Guxasa, guxú'u lu xezre, na' xeléqueze' lue' da dxal-la' gunu'.

<sup>7</sup> Benne' ca' zjácale Saulo belezrebe'e lawe' da belenne' chi'i benne' na', san quebe nu belelé'ene'.

<sup>8</sup> Nadxa Saulo bexase' lu xu na', na' gate guxá' lawe', quebe guca lé'ene'. Ca' guca, belequé'e ne'e, ne guleché'e le' lu xezre Damasco. <sup>9</sup> Guzú'e na' chunna zra quebe dxelé'ene', ne quebe bi güe'e gudawe'.

<sup>10</sup> Lu xezre Damasco na' zua tu benne' dxéajle'e chee Jesús le' Ananías, na' Xránadxu ble'e lawe' le' tu lu da ble'e le', na' guzre' le':

—Ananías.

Na' le' bechebe':

—Nigá zua', Xran.

<sup>11</sup> Nadxa gunná Xránadxu, dxe'e le':

—Guxasa, guxíaj neza da nazí le na: Neza Li, na' lizre Judas guchebu' chee tu benne' Tarso, le' Saulo. Benne' nigá dxuláwizre' Dios. <sup>12</sup> Tu lu da blé'ene', ba blé'ene' tu benne' le' Ananías chu'e guzé ne'e le' chee xelé'ene'.

<sup>13</sup> Gate benne' da nigá, na' gunná Ananías:

—Xran, benne' zan ba buluzenne' neda' chee benne' nigá, ne chee xúguté da calela da dxune' chee benne' ca' dxeléajle'e chiu' Lue' lu xezre Jerusalén. <sup>14</sup> Na'a ble'e nigá nape' xel-la' dxenná bea chee benne' xíchaje' ca' chee bxruze ca', chee che'e lizre xia xúguté benne' dxelenné' Dios lu Lau' Lue'.

<sup>15</sup> Na' Xránadxu guzre' le':

—Guxíaj. Neda' ba gucá'a benne' na' chee cheajzene' benne' xezr la xu ca', ne benne' wenná bea ca', ne

benne' Israel ca', ca naca chia' neda'. <sup>16</sup> Neda' gulé'eda' le' ca naca da zante da saque'e ne chia' neda'.

<sup>17</sup> Nadxa Ananías guz'é'e zéaje' xu'u naga zua Saulo. Gate guxú'e na', guxrúa ne'e lawe' le', na' guzre' le':

—Saulo, bicha'. Xránadxu Jesús, Bénnea' ble'e lawe' lue' la neza naga za'u, nasele' neda' chee xel'é'enu', ne chee súale Be' Lá'azxa lue'.

<sup>18</sup> Ca' guca beléxrujté lu xiaj lawe' da zaj naca ca xrlacu bela, na' bel'é'ene'. Na' bexasa Saulo, ne gudxúate' nisa. <sup>19</sup> Gudé na' gudawe', ne bedipe'. Begá'ane' tu chupa zra nen benne' Damasco ca' dxeléajle'e chee Jesús.

### Saulo dxuchálaje' chee Jesús lu xezre Damasco

<sup>20</sup> Nadxa guzú lau Saulo dxuchálaje' chee Jesús lu xu'u ga dxelezraga judío ca' zaj nrite' Damasco, dxenné' Jesús naque' Zri'ine Dios. <sup>21</sup> Xúgute benne' beléne'e chee' belexebáne'e', dxelenné':

—¿Quegá benne' nigá bénnea' gudáu zi' xuzre' benne' ca' zaj zre'e Jerusalén, benne' ca' dxelenné' Dios lu La Jesús? ¿Quegá léqueze' na' ble'e nigá chee che'e benne' ca' xezre Jerusalén chee gudé'e le' lu na' benne' xíchaje' ca' chee bxruze ca'?

<sup>22</sup> Saulo bchálajdxé' du lazre' chee Jesús, ne dxulé'ene' Jesús naque' Cristo chee Dios, na' bzua zri'e' benne' judío ca' zaj zre'e Damasco.

### Saulo dxelé' lu na' benne' judío ca'

<sup>23</sup> Ca gudé zane' zra, benne' judío ca' belune' tuze dizra' xelútie' Saulo. <sup>24</sup> Gunezne' le' da nigá. Te zra ne chizrela gulebeza benne' judío ca' dxu'a dxa xu'u ca' naga dxelexedxúaj bènneache xezre na', chee xelútie' le'. <sup>25</sup> Nadxa benne' ca' dxeléajle'e chee Jesús gulegú'e Saulo tu lu xcuite lba zren, na' buluxulé'taje' le' chizrela le'e ze'e da naxechaj na xezre. Ca' guca, gulá Saulo.

### Saulo dxezrine' Jerusalén

<sup>26</sup> Gate bezrín Saulo Jerusalén, guca lazre' guné' tuze benne' ca' dxeléajle'e chee Jesús, san benne' ca' dxelezrebe' le' lawe' da quebe dxeléajle'e ba dxéajle'e Saulo chee Jesús. <sup>27</sup> Bernabé guché'e Saulo, ne bze' le' lau benne' gubáz ca' chee Jesús. Na' bchálajle Bernabé gubáz ca' ca ble'e Saulo Xránadxu la neza, ne ca ben Xránadxu bchálajle' Saulo, ne ca bchalaj Saulo du lazre' lu xezre Damasco nen xel-la' dxenná bea chee La Jesús. <sup>28</sup> Nadxa Saulo begá'ane' Jerusalén, dxedálene' benne' ca'. <sup>29</sup> Bchalaj Saulo du lazre' lu La Xránadxu, dxuchálajle' benne' ca' dxelenné' dizra' griego, san benne' caní gulaca lazre' xelútie' le'. <sup>30</sup> Gate guleque be'e biche l'wézredxu da caní, na' guleché'e Saulo lu xezre Cesarea, na' lu xezre na' gulesel-le' le' xezre Tarso.

<sup>31</sup> Nadxa benne' ca' dxelezrague' lu La Jesús tu tu xezre zaj nababa Judea, ne Galilea, ne Samaria, gulebeza zri lazre', ne beledipa lazre'. Xel-la' dxelezrebe gu-laque' Xránadxu tuze, na' lawe' da gúcale Be' Lá'azxa le', gulane'.

### Pedro dxexuné' Eneas

<sup>32</sup> Gate dxedá Pedro dxejnné'e biche l'wézredxu ca', na' guxíajqueze' xejnné'e benne' ca' dxeléajle'e chee Jesús lu xezre Lida. <sup>33</sup> Na' bezrague' tu benne' le' Eneas, bache guca xrunu' iza de' lu da'a lawe' da naque' benne' zrinna'. <sup>34</sup> Na' gunná Pedro, dxé'e le':

—Eneas, Jesucristo ba bexuné' lue'. Bexasa, ne butube da'a chiu'.

Na' bexasate Eneas na'. <sup>35</sup> Belelé'e xúgute benne' le', benne' zaj zre'e xezre Lida, ne xezre Sarón, na' belexaque' chee Xránadxu.

### Dorcax dxexebané' ládujla benne' gate

<sup>36</sup> Lu zra na' zua tu nu'ula le' Tabita lu xezre Jope. Dxéajle'e chee Jesús. Lu dizra' griego le' Dorcas. Nu'ula nigá dxúnqueze' da xrlátaje, ne dxácalene' benne' xache' ca'. <sup>37</sup> Lu zra ca' guxú'u Dorcas xel-la' we', na' gutie'. Na' bulugazje' le', ne belexru'e le' tu lu xu'u naga zua gudxupe' cuía dxala. <sup>38</sup> Xezre Jope na' zua na gagu naga zua xezre Lida naga zua Pedro, na' lawe' da zaj neze benne' Jope ca' zue' na', na' gulesel-le' chupa benne' biu cheajleguezre' le':

—Gudázega xezre Jope.

<sup>39</sup> Nadxa Pedro guxíajle'ne' benne' ca'. Gate bzrine' na', na' beleché'e le' naga zrua Dorcas na', na' xúgute nu'ula ca' ba zaj nate benne' chie' zaj naxéchaje' Pedro dxelebezre', ne dxululé'ene' le' zra nu'ula, ne zra benne' biu, da ca' ben Dorcas na' gate ne zue' nen benne' ca'. <sup>40</sup> Nadxa guleaj Pedro xúgute benne' ca', na' bzu zribe' bchálajle'ne' Dios. Na' gunné'e nu'ula gate na', gunné':

—Tabita, bexasa.

Nadxa nu'ula na' bexá' lawe', na' gate blé'ene' Pedro, bexase' gudxé'e. <sup>41</sup> Na' Pedro bequé'e ne'e, bechise' le'. Nadxa gunné' biche l'wézredxu ca', ne nu'ula ca' ba gute benne' biu chee', na' blé'ene' benne' ca' le' naca bané'. <sup>42</sup> Ca guca da nigá belén ca naca benne' zaj zre'e xezre Jope, na' benne' zan guléajle'e chee Xránadxu.

<sup>43</sup> Pedro begá'ane' zane' zra lu xezre na' lize Simón, tu benne' dxucá'ana chawe' xide zra be xixre'.

### Pedro ne Cornelio

**10** Zua lu xezre Cesarea tu benne' le' Cornelio, benne' dxenná be'e lu wedil-la tu cue' benne' nazí le na Benne' Italia Zjaque' Wedil-la. <sup>2</sup> Benne' nigá, ne benne' zaj zre'e lize' dxulucá'ana szrene' Dios, ne dxelezrebe' le'. Cá'anqueze dxunézrujle'e dumí dxácalene' benne' judío ca', ne tu dxuchálajle'zqueze' Dios. <sup>3</sup> Tu zra gate dxedá chunna ble'e Cornelio tu da ble'e Dios le', na' blé'ene' cátequeze guxú'u tu gubáz chee xabáa naga zue', na' guzre' le':

—Cornelio.

<sup>4</sup> Cornelio guzú'e dxenné'e gubáz chee xabáa na' dute xel-la' dxezrebe, na' bchebe' le':

—¿Bizra na', Xran?

Nadxa gunná gubáz chee xabáa, guzre' le':

—Dios ba benne' da dxuláwizru' Lē', ne nézene' ca da dxunu' dxácalenu' benne' xache' ca'. <sup>5</sup> Gusel-la benne' chjaque' xezre Jope, cheajlenné' Simón, bénnea' léqueze' Pedro. <sup>6</sup> Zue' lizre xetú benne' lē' Simón, benne' dxucá'ana chawe' xide zra be xixre', na' zua lizre' dxu'a nísadau'. Pedro na' xe'e lue' ca da dxal-la' gunu'.

<sup>7</sup> Gate bezá' gubáz chee xabáa na' bchálajlene' lē', na' gunné' Cornelio chupa bi wen zrin chee', ne tu benne' dxeje' wedil-la, ne dxape' Dios ba lá'ana, ne zúaqueze' lizre Cornelio na'. <sup>8</sup> Na' bchálajlene' benne' ca' ca naca da ba guca, na' ca gudé na' gusel-le' lē' chjaque' xezre Jope.

<sup>9</sup> Zra xula, dxácatē zaj xu'e benne' ca' neza, ne ba dxezrine' gagu naga dxe' Jope, na' guluén Pedro chju'u sibe du wagubizra chee guchálajlene' Dios. <sup>10</sup> Ba dxedúnle'e, ne guca lazre' gawe', na' dxácatē ne dxulu-cueze' da gawe', blé'ene' tu da ble'e Dios lē'. <sup>11</sup> Blé'ene' naxalaj xabáa, ne dxtaj lu xezr la xu da naca na ca tu ladxe' zren nadxéaj na dápate' la'a chee na. <sup>12</sup> Lawe' ladxe' na' zaj zria xúgute' cue' be xixre', be zria tapa ni'a na'ba', ne be snia ca', ne be zua xrila ca'. <sup>13</sup> Nadxa benne' tu chi'i benne' dxe'e lē':

—Guxasa, Pedro. Be'e tu bea ca' chee gagu'-ba'.

<sup>14</sup> Pedro bechebe':

—Cabí, Xran. Neda' cabata' ne gawa' da quebe nun Dios gagu bénneache, ne quegá da naca na sban.

<sup>15</sup> Benne' na' bchálaje' da xula, dxe'e lē':

—Da ba nucá'ana chawe' Dios, quebe nnau' lue' naca na sban.

<sup>16</sup> Da nigá guca na chunna lasa, na' ladxe' na' beguén na xabáala. <sup>17</sup> Dxácatē dxe' Pedro dxulaba lazre' bi zéajē ca naca da blé'ene', na' belezrín benne' ca' nase-la Cornelio dxu'a dxa xu'u, dxuluchebe' ga zua lizre Simón. <sup>18</sup> Gate belezrine' lizre Simón na', na' gulenné' zizraj, dxelenabe' che zua xu'u na' tu benne' lē' Simón, bénnea' léqueze' Pedro. <sup>19</sup> Gate Pedro ne dxulaba lazre' ca naca da blé'ene', na' Be' Lá'azxa guzre' lē':

—Gunná'xque, chunna benne' dxelexilaje' lue'.

<sup>20</sup> Guxasa, bexetaj. Guxíajle benne' ca', ne quebe gun chupa lazru' lawe' da nase-la' neda' benne' ca'.

<sup>21</sup> Nadxa Pedro bexétaje' naga zaj zra' benne' ca' nase-la Cornelio, na' guzre' lē':

—Neda' na' dxexilaje' le'e. ¿Bizra chee za'le?

<sup>22</sup> Benne' ca' belexechebe':

—Za'ntu' waláz chee Cornelio, benne' dxenná be'e lu wedil-la. Naque' benne' xrlátaje, ne dxezrebe' Dios, na' xúgute' benne' judío ca' dxelape' lē' ba lá'ana, ne zaj nazrí'ine' lē'. Tu gubáz chee xabáa chee Dios guzre' lē' dxal-la' sel-le' benne' xedajlenné' lue' xidu' lizre' chee xenne' ca da dxal-la' xu'u lē'.

<sup>23</sup> Nadxa Pedro bzre'e benne' ca' xu'u na', na' belexegá'ane' nen lē' xela na'. Zra xula guxíajle Pedro benne' ca', na' xjácale bal-la biche ljwézredxu lē', benne' zaj zre'e Jope.

<sup>24</sup> Zra gudxupe' zra belezrine' xezre Cesarea naga zua Cornelio dxebeze' lē', ne zrale bal-la benne' xrtie' lē', ne xezicadxa benne' ljwezre', benne' ca' gunné'. <sup>25</sup> Gate

bzrin Pedro chale'aj, bdxuaj Cornelio guz' lu ne'e lē'. Bzu zribe' lau Pedro chee gucá'ana szrene' lē'. <sup>26</sup> Pedro bechise' lē', dxenné':

—Guzé. La gázqueze neda' naca' bénneache ca lue'.

<sup>27</sup> Dxácatē dxuchálajle Pedro Cornelio, gulu'e lu xu'ula, na' blé'ene' benne' zan zaj nazrage' na'.

<sup>28</sup> Nadxa gunná Pedro, dxe'e lē':

—Nézquezle le'e quebe dxunna da nadxixruj bea chee judío ca' neda' lataj gaca' tuze nen benne' quebe zaj naque' judío u chu'a lizre'. Na'a Dios ba blé'ene' neda' quebe dxal-la' nnia' chee netú benne', quebe nnia' naque' sban, u naque' benne' quebe gapa' ba lá'ana.

<sup>29</sup> Chee lē' na', gate gulenné' neda', la guzá'tea', ne quebe ben chupa lazra'. Dxaca lazra' nezda' bi chee na' gunnele neda'.

<sup>30</sup> Nadxa bechebe Cornelio:

—Ba zeaj tapa zra ca zúadxu na'a, zua lizra' nigá dxuna' gubasa, ne dxuchálajlene' Dios, gate ble'e lau tu benne' neda', nacue' zra lanē' da dxácatite na.

<sup>31</sup> Benne' na' guzre' neda': "Cornelio, Dios ba benne' da dxuchálajlene' Lē', na' nézene' ca da dxunu' dxácalenu' benne' xache' ca'. <sup>32</sup> Gusel-la benne' chjaque' xezre Jope, cheajlexri'e Simón, bénnea' léqueze' Pedro. Zue' lizre xetú benne' lē' Simón, benne' dxucá'ana chawe' xide zra be xixre' ca', na' zua lizre' dxu'a nísadau'. Gate xide' nigá, na' guchálajlene' lue'." <sup>33</sup> Ca'an guca, gusel-latea' benne' ca' bedajlexedilaje' lue', na' benu' da chawe' bla'u nigá. Na'a xúgutentu' zrantu' nigá lau Dios, ne dxaca lázrentu' xénentu' xúgute' ca da gunná be'e Xránadxu lue' guchálajlene' netu'.

### Da bchalaj Pedro lizre Cornelio

<sup>34</sup> Nadxa guzú lau Pedro dxuchálaje', dxenné':

—Na'a dxéajni'ida' Dios quebe dxebeaje' bál-laze bénneache, <sup>35</sup> Na' xúgute' xezr la xu Dios dxezi' lu ne'e benne' ca' dxelezrebe Lē', ne dxelunē' da xrlátaje.

<sup>36</sup> Dios bchálajlene' zri'ine zre sua Israel ca', ne bchálaje' dizra' chawe' chee xel-la' dxebeza zri lazre', da dxezidxu ne chee Jesucristo, Bénnea' naque' Xrana xúgute' bénneache. <sup>37</sup> Le'e ba nézquezle ca naca da guca du ca naca lu xezr la xu chee benne' judío ca', da guzú lau na naga nababa Galilea ca gudé bchalaj Juan xrtizra' Dios, ne bchue' bénneache nisa. <sup>38</sup> Nézele ca ben Dios, bnézruje' Jesús, benne' Nazaret, xel-la' waca chee Be' Lá'azxa, ne ca gudá Lē' dxunē' da chawe', ne dxexunē' xúgute' benne' dxelezaca zi'e lu na' da xriwe'. Da nigá bene' lawe' da guzúale Dios Lē'. <sup>39</sup> Netu' dxexeché'entu' chee da caní, xúgute' da ben Jesús naga nababa Galilea, ne da bene' lu xezre Jerusalén. Gudé na' belutie' Lē', gate buludé'e Lē' xaga béguaj, <sup>40</sup> na' Dios bsebane' Lē' gate guca chunna zra, na' be'e lataj ble'e lau Jesús netu'. <sup>41</sup> Quebe ble'e lawe' xúgute' bénneache, san launtu' nétu'ze, nácantu' benne' ca' guleaj Dios nédxudautē chee xeché'entu' chee da caní. Netu' gū'e gudáguntu' nen Lē' gate gudé bebane' ládujla benne' gate. <sup>42</sup> Gusel-le' netu' guchálajlentu' bénneache, ne xeché'entu' ca da nun Dios, nuzú'e Jesús nigá chee guchi'e chee benne' ban ca', ne chee benne'

gate ca'. <sup>43</sup> La gázqueze nédxudaute gulenná xúgute benne' ca' buluchálaje' waláz chee Dios, buluchálaje' ca dxal-la' gaca chee Jesús, gulenné' xúgute benne' xeléajle'e chee Jesús, na' ne chee Le' Dios gunite lawe' xtul-la benne' ca'.

#### Benne' quebe zaj naque' judío dxelezi'e Be' Lá'azxa

<sup>44</sup> Ne dxuchalaj Pedro gate bzin Be' Lá'azxa beda- jsúalene' xúgute benne' ca' dxelenne' da dxuchalaj Pedro. <sup>45</sup> Benne' judío ca' dxelájl'e chee Jesús, benne' ca' zá'acalene' Pedro, belexebáne' gate guleque bé'ene' ba zúale Be' Lá'azxa benne' ca' quebe zaj naque' judío. <sup>46</sup> Dxeleque bé'ene' na lawe' da belenne' dxuluchalaj benne' ca' dizra' chee benne' xula, ne dx-elúe lá'ane' Dios. <sup>47</sup> Nadxa gunná Pedro:

—¿Waca nnadxa quebe dxal-la' xeledxúa benne' caní nisa, benne' ca' bache gulez'íe Be' Lá'azxa ca bentu' ne- tu'?

<sup>48</sup> Nadxa gunná bea Pedro xeledxúa benne' ca' nisa lu La Jesucristo. Gudé na', benne' ca' gulata' xuene' Pedro xegá'ane' nen le' tu chupa zra.

#### Pedro dxuzenne' benne' gubáz ca' zaj zre'e Jerusalén ca naca da bene'

**11** Benne' gubáz ca', ne biche l'jwézredxu ca' zaj zre'e Jerusalén belenne' ba gulez'í' lu na' benne' quebe zaj naque' judío dizra' chee Dios. <sup>2</sup> Gate bezrín Pedro xezre Jerusalén, gulez'í' tizra' benne' ca' le', benne' ca' dxelenné' dxal-la' chugu late' bela' chee benne' ca' zaj naque' chee Dios. <sup>3</sup> Benne' caní buluchébe' Pedro:

—¿Bizr chee na' guxíaju' xeajsúalenu' benne' ca' quebe zaj naque' judío, ne gudágulenu' le'?

<sup>4</sup> Nadxa Pedro bzenne' benne' ca' xúgute da guca cha chee na, gunné':

<sup>5</sup> —Neda' zua' lu xezre Jope, na' gate dxuchálajl'ena' Dios, ble'eda' tu da ble'e Dios neda'. Ble'eda' tu ladxe' zren nadxéaj dápaté' la'a chee na, da dxetaj na xabáa, ne bedajsé' na lawa'. <sup>6</sup> Gate gunná' xánnia' chee ble'eda' bi na' zaj zria na lawe', ble'eda' be xixre', be zria tapa ni'a na'ba', ne be snia ca', ne bea ca' zaj zua xrílabá'. <sup>7</sup> Na' benda' tu chi'i benne' guzre' neda': "Gux-asa Pedro, b'ete tu bea ca', na' gagu'-ba'." <sup>8</sup> Neda' gunnéa': Cabí, Xran, lawe' da cabata' ne gawa' neda' tu da quebe nun Dios gagu' b'enneache, ne quegá da naca sban. <sup>9</sup> Nadxa b'ennea' dxenné' xabáa gunné' neda' da xula, na' guzre' neda': "Da ba nucá'ana chawe' Dios, quebe nnau' lue' naca na sban." <sup>10</sup> Da nigá guca na chunna lasa, na' ca gudé na' xúgute da ca' belexegúen na xabáa. <sup>11</sup> Lu zra ná'queze belelá' chunna benne' lu xu'u naga zua', benne' ca' gusel-la tu benne' zua Ce-sarea chee zedajlexedilaj neda'. <sup>12</sup> Be' Lá'azxa gunná bé'ene' neda' chéajl'ena' benne' ca', ne quebe gun chupa lazra'. La gázqueze gusiá'cale' xrupa benne' biche l'jwézredxu caní neda'. Xúgutentu' guxú'untu' lizre tu benne'. <sup>13</sup> Le' bchálajl'ene' netu' ca blé'ene' lizre tu gubáz chee xabáa, ze ni'e, ne guzre' le': "Gusel-la

benne' chjaca xezre Jope chee cheajlenné' Simón, benne' lé'queze' Pedro. <sup>14</sup> Benne' nigá x'e'e lue' aja gunu' chee lau' lue', ne xelélé' xúgute benne' zaj zre'e lizru'." <sup>15</sup> Gate guzú' lawa' dxuchálajl'ena' benne' ca', na' bzin Be' Lá'azxa guzúalene' benne' ca', ca ble'e guzúalene' dxi'u nédxudaute. <sup>16</sup> Nadxa xeajsá lazra' ca gunná Xránadxu, gunné': "Da li Juan bchue' b'enneache nisa, na' gaca chee da zéaje xel-la' dxedxúa nisa, súale Be' Lá'azxa le'e." <sup>17</sup> Che Dios bnézruje' chee benne' ca' ca b'enne' dxi'u, guxéajl'edxu chee Xránadxu Jesucristo, ¿nuzra naca' neda' chee tábaga' Dios?

<sup>18</sup> Nadxa gate biche l'jwézredxu ca' zaj zre'e Jerusalén belenne' da caní, na' gulezúa zrie', ne gulezú lawe' dx-elúe lá'ane' Dios, dxelenné':

—Ca' naca, la gázqueze dxunna Dios lataj benne' quebe zaj naque' judío xelexeb'í' lazre' chee xelezi'e xel-la' nabán zeajlí canna.

#### Benne' dxelájl'e chee Jesús zaj zre'e xezre Antioquía

<sup>19</sup> Gate beluti'e Esteban, na' belau zi' xuzre' xezícala benne' dxelájl'e chee Jesús, na' bal-le' buluzrúnnaje', xjaque' xezre Fenicia, ne lu xu Chipre, ne xezre Antioquía. Gate belezrine' lataj ca', na' buluchálaje' dizra' chee Jesús lau benne' judío cá'aze, ne quegá lau benne' quebe zaj naque' judío. <sup>20</sup> Nadxa bal-la benne' dxelájl'e chee Jesús, benne' Chipre, ne benne' Cirene, belelé'e xezre Antioquía, na' buluchálajl'ene' benne' ca' quebe zaj naque' judío, ne buluzenne' le' dizra' chawe' ca naca chee Xránadxu Jesús. <sup>21</sup> Xel-la' waca chee Xránadxu guzúale na benne' ca', na' ca'an guca, benne' zan belexexaque' chee Xránadxu.

<sup>22</sup> Gate belén benne' ca' da nigá, benne' dxelájl'e chee Jesús zaj zre'e Jerusalén, na' gulesel-le' Bernabé xezre Antioquía. <sup>23</sup> Gate bzin Bernabé na', blé'ene' ca da chawe' da dxun Dios chee benne' ca', na' gubéle'ene'. Na' bsízrene' xúgute benne' ca' chee xelezúa chúchue' lu da naca chee Xránadxu. <sup>24</sup> Bernabé naque' benne' xrlátaje, na' zúale Be' Lá'azxa le', ne duté lázrdawe' dxéajle'e chee Jesús. Ca'an guca, ne chee le' guléajle' benne' zan chee Xránadxu.

<sup>25</sup> Gudé na' guxíaj Bernabé xezre Tarso, zeajxedílaje' Saulo, na' gate bezrelne' le', beche'e le' Antioquía.

<sup>26</sup> Gulezúe' na' tu iza naxá' nen benne' ca' dxelájl'e chee Jesús, na' bulusédené' benne' zan. Lu xezre Antioquía na' guca na da nedxu gulé'e benne' ca' dxelájl'e chee Xránadxu, Benne' Cristiano.

<sup>27</sup> Ca lu zra ca', bal-la benne' dxelenné' waláz chee Dios besía'que' Jerusalén, xjaque' Antioquía. <sup>28</sup> Tu benne' ca' le' Agabo guzé' l'áwela biche l'jwézredxu ca', na' ca da bnezruj Be' Lá'azxa le', gunné' waca tu gubina' zren du ca naca xezr la xu, na' gubina' nigá guca na gate naca Claudio benne' dxenná bé'ene' ca naca xezr la xu Roma. <sup>29</sup> Nadxa benne' ca' dxelájl'e chee Jesús, benne' zaj zre'e Antioquía belún zi' lazre' xelesel-le' da gácale' na biche l'jwézredxu zaj zre'e xezre ca' zaj naba-ba Judea, ca da xezezeque' tu tue' xulunézruje'. <sup>30</sup> Ca'an belune', na' belesel-le' tu guna' lau benne' gula ca'



chee Cristo zaj zře'e Judea, na' Bernabé ne Saulo belú'e na na'.

### Dxelutie' Jacobo ne dxelegú'e Pedro lizre xia

**12** Lu zra ca' guzú lau wenná bea Herodes nau zi' xuzre' bal-la benne' ca' dxeléajle'e chee Jesús. <sup>2</sup> Gunná bé'ene' belutie' Jacobo, biche Juan nen xia nalá. <sup>3</sup> Gate ble'e Herodes dxelexezaca ba lazre' benne' judío ca' ca naca da bene', na' gudel-le' Pedro. Da nigá guca na lu zra laní ca' gate dxelawe' xeta xtila da quebe nachixre na cua zichaj chee xeta xtila. <sup>4</sup> Ca gudé gudel-le' Pedro, na' gulu'e le' lizre xia naga buluxúe tapa cue' benne' dxjaca wedil-la le', zaj naca tapa benne' zeje' wedil-la tu cue' tu cue'. Herodes guca lazre' guzúe' Pedro lau benne' xezre ca' te laní. <sup>5</sup> Ca'an guca xu'u Pedro lizre xia naga dxuluxúe xánnie' le', na' benne' biche ljwézredxu ca' buluchálajlequeze' Dios du lazre'.

### Dios dxuselé' Pedro lizre xia

<sup>6</sup> Dxela xanne' ca za chaní' zra xula gate dxal-la' guzúa Herodes le' lau benne' xezre ca', Pedro de' dxásie' laduj chupa benne' dxjaque' wedil-la, nadxéaje' chupa du xia, na' xebal-la benne' dxjaca wedil-la zaj zře'e dxu'a dxa xu'u dxuluxúe' lizre xia na'. <sup>7</sup> Nadxa ble'e lau tu gubáz chee xabáa chee Xránadxu, na' ca naca lizre xia na' guxaní'. Na' gubáz chee xabáa na' bte' le'e Pedro, ne bsebané' le', na' guzre' le':

—Guxásache.

Ca'an guca, du xia ca' belexexezre na na' Pedro. <sup>8</sup> Na' gunná gubáz chee xabáa na', guzre' le':

—Besí le'u, ne buléaj zrelu'.

Gate bexuzre ben Pedro da na', na' guzre gubáz chee xabáa na' le':

—Guxrúa xicha chiu' cuxru', ne gudále neda'.

<sup>9</sup> Pedro bedxúaje' cuzru gubáz chee xabáa na', ne quebe nézene' che naca da li che cabí ca da dxun gubáz chee xabáa na'. Dxéquené' dxelé'ene' tu da dxulé'e Dios le'. <sup>10</sup> Belexedé'e naga zaj zra' benne' dxjaque' wedil-la nedxu ca', ne naga zaj zra' benne' gudxupe' benne' dxjaque' wedil-la, na' gate belexezrine' dxu'a dxa xu'u xia da dxedxuaj zraj la nézala, dxa xu'u na' leze na bxalaj na. Belexedxúaje', na' ca gudé besí'aque' belezrine' xetú neza xula chee xezr na', na' bca'ana gubáz chee xabáa na' leze'. <sup>11</sup> Nadxa guque be'e Pedro ba bedxúaje', na' guzá' lazre', gunné': Na'a dxelé'eda' naca na da li. Xrana' gusel-le' gubáz chee xabáa chee' chee bselé' neda' lu na' Herodes, ne lu xúguté da gulaca lazre' judío ca' xeluné' chia'.

<sup>12</sup> Da nigá dxulaba lazre' Pedro gate bzrine' lizre María, xrna Juan, bi na' léquezebe' Marcos, na' lu xu'u na' zaj nazraga benne' zan dxelenabe' Dios gácalene' Pedro. <sup>13</sup> Gate gunné Pedro dxu'a dxa xu'u na', bzrin na' tu bi nu'ula lebe' Rode zeajnabe' nu na'. <sup>14</sup> Gate bexúnbeabe' chi'i Pedro, quebe gusalajbe' dxa xu'u. Xel-la' dxebé cheebe' zexíaj chégube' naga zaj nazraga

benne' ca' chee zeajézrebe' benne' ca' ze Pedro dxu'a dxa xu'u. <sup>15</sup> Nadxa benne' ca' gulé'e bi nu'ula na':

—Nadá xichaj lázrda'u.

Bi nu'ula na' ben chúchube' xrtízrabe'. Benne' ca' gu-lenné':

—Quebe le' na'. Be' guxu'e na'.

<sup>16</sup> Dxácaté na' ze Pedro tu dxennézqueze' dxu'a dxa xu'u. Na' gate gulesálaje', ne belelé'ene' Pedro, na' belexebánené'. <sup>17</sup> Pedro guchisa ne'e chee xelezúa benne' ca' zrize, na' bchálajlene' benne' ca' ca ben Xránadxu bebéaje' le' lizre xia. Na' guzre' benne' ca':

—Le guzén Jacobo, ne biche ljwézredxu ca' ca naca da nigá.

Nadxa bezé'e zexíaje' naga xula.

<sup>18</sup> Gate guxaní', gulezúale'e stébe benne' dxjaque' wedil-la ca' lawe' da quebe zaj nézene' aja guca chee Pedro. <sup>19</sup> Herodes gunná bé'ene' xelxilaj benne' dxjaca wedil-la Pedro, na' lawe' da quebe belexezrelne' le', na' gunáb xánnie' benne' dxjaque' wedil-la bi guca, na' gudé na' gunná bé'ene' xelate benne' ca' dxjaque' wedil-la. Ca gudé na' guzá' Herodes xezre ca' zaj naba-ba Judea, guxíaje' xejúsúe' xezre Cesarea.

### Dxate Herodes

<sup>20</sup> Herodes dxezré'e benne' ca' zaj zře'e xezre Tiro, ne xezre Sidón. Benne' chee xezre ca' beluné' tuze dizra' chee cheajlelé'e cuine' lau Herodes na'. Beluné' Blasto benne' ljwezre'. Naque' tu benne' blau chee wenná bea Herodes, na' gulesel-le' le' lau Herodes na' chee nabe' le' sua zri ca naca da dxaca chee Herodes nen benne' ca'. Caní beluné' lawe' da nédxuté dxelagu benne' xezre Tiro, ne Sidón da guzá' xezre Cesarea naga zua Herodes. <sup>21</sup> Nadxa Herodes bzue' tu zra xelezrín benne' ca' lawe'. Lu zra na' Herodes gucué' zra lané' da zácále'e, na' gudxé'e lataj blau chee', ne bchálajlene' benne' zan ca'. <sup>22</sup> Nadxa benne' zan ca' gulezú lawe' dxelenné' zizraj:

—iBenne' nigá dxuchálaje' quebe naque' beniáchezel; iDios na'!

<sup>23</sup> Zra na'té tu gubáz chee xabáa chee Xránadxu gulu'e Herodes tu xízrawe' lawe' da guzi'e xel-la' ba lá'ana da dxal-la' si' Dios, na' guzré'e bzuga', ne gútete'.

<sup>24</sup> Bzriluj dizra' chawe' chee Xránadxu, na' benne' ca' buluchálaje' ca naca na gáteteze na'.

<sup>25</sup> Gate belezúe Bernabé, ne Saulo zrin dxeluné' lu xezre Jerusalén, besí'aque' xezre na', zaj naché'e Juan, bi na' léquezebe' Marcos.

### Bernabé ne Saulo dxelezú lawe' dxeledé' dxuluchálaje' dizra' chee Dios

**13** Ládujla benne' ca' zaj nazraga chee Cristo lu xezre Antioquía zaj zra' benne' ca' dxelenné' waláz chee Dios, ne benne' ca' dxulusédené' bénneache xrtizra' Dios. Ládujla benne' caní zaj zua Bernabé, ne Simón, bénnea' léqueze' benne' gasaj, ne Lucio, benne' xezre Cirene, ne Manaén, benne' gúalabe' Herodes, benne' xu'u lu ne'e xezr la xu Galilea na', ne

Saulo. <sup>2</sup> Tu zra gate benne' caní zaj zre'e dxelúe lá'ane' Dios, ne dxelune' gubasa, Be' Lá'azxa gunné':

—Le cueaj Bernabé, ne Saulo chee xelune' zrin na' da gunnéa' le' xelune'.

<sup>3</sup> Chee le na', ca gudé buluchálajlene' Dios, ne belune' gubasa, na' buluzé ne'e lawe' benne' ca', ne buluzé' le' dizra'.

#### Dxupa benne' gubáz ca' dxuluchálaje' dizra' chee Dios lu xezr la xu Chipre

<sup>4</sup> Gudé na', ca gusel-la Be' Lá'azxa le', na' Bernabé, ne Saulo xjaque' xezre Seleucia naga gulu'e tu lu da dxedá lawe' nísadau' chee chjaque' lu xezr la xu da naxechaj nísadau' da nazí le na Chipre. <sup>5</sup> Gate belezrine' na', na' belexedxúaje' lu da dxedá lawe' nísadau' naga zua xezre Salamina, na' gulezú lawe' dxuluchálaje' dizra' chee Dios lu xudau' ca' chee benne' judío ca'. Juan zéajlequezebe' gubáz ca' chee gácalebe' le'. <sup>6</sup> Na' guledé' xúgute xézredu ca' da zaj nnita lu xezr la xu na', na' belezrine' xezre Pafos. Na' belexezrague' tu benne' judío le' Barjesús, naque' benne' wazrá'. Naque' tu benne' wen lazre' dxenné' dxuchálaje' waláz chee Dios. <sup>7</sup> Benne' wazrá' nigá zue' nen Sergio Paulo, benne' xu'u lu ne'e xezr la xu na', ne naque' benne' sina. Benne' xu'u lu ne'e xezr la xu na' gusel-le' benne' xejnné' Bernabé, ne Saulo lawe' da dxaca lazre' xenne' dizra' chee Dios. <sup>8</sup> Na' benne' wazrá' na', léqueze' Elimas gudábage' gubáz ca' lawe' da guca lazre' quebe chéajle chee Jesús benne' xu'u lu ne'e xezr la xu na'. <sup>9</sup> Nadxa Saulo, bènea' léqueze' Pablo, zúale Be' Lá'azxa le', gunná' dxugüe' le', <sup>10</sup> na' guzre' le':

—Guzrí xé, benne' wen da calela. Zri'ine da xriwe', ne benne' dxusezuxj xrneza xúgute bèneache. ¿Bizr chee na' quebe dxusanu' dxuséxuju' neza chee benne' ca' dxelaca lazre' chjácálene' Xránantu'? <sup>11</sup> Na'a, Xránantu' gudé' lue' ba xa'. Xegá'anu' la chul-la, na' tu chí'iqueze quebe le'enu' xel-la' naxaní' chee gubizra.

Benne' na' guzúe' lu da chul-la, na' guzú lawe' dxílaje' nu xecá'a ne'e lawe' da québedxa dxelé'ene'. <sup>12</sup> Gate ble'e benne' xu'u lu ne'e xezr la xu na' da nigá, na' guxéajle'e chee Jesús lawe' da bebánene' ca naca da dxuséde Pablo ca naca chee Xránadxu.

#### Pablo ne Bernabé dxelezrine' xezre Antioquia da naba-ba xezr la xu Pisidia

<sup>13</sup> Pablo ne benne' ljwezre' ca' belú'e tu lu da dxedá lawe' nísadau' lu xezre Pafos na', na' belezrine' xezre Perge da nababa na xezr la xu Panfilia. Lu xezre na' Juan bsanbe' gubáz ca', na' bexíajbe' xezre Jerusalén. <sup>14</sup> Gudé na' gubáz ca' besiá'que' Perge, na' belezrine' xezre Antioquia da nababa na xezr la xu Pisidia. Lu xezre na', gate naca zra dxulupá'ana judío ca', gulu'e xudau' chee judío ca', na' gulebé'e. <sup>15</sup> Nadxa, ca gudé bululabe' lu xiche naga naxúaj da bdxixruj bea Moisés, ne da gulenná benne' ca' buluchálaje' waláz chee Dios, na' benne' xíchaje' ca' chee xudau' na' gulesel-le' benne' xejezre' Pablo, ne Bernabé:

—Le'e, biche ljwézrentu', che nápale dizra' da guzéa-jni'ile netu', waca nnele na na'a.

<sup>16</sup> Nadxa Pablo guxase', na' guchisa ne'e chee xelezúa zri benne' ca', na' gunné':

—Le xene le'e, benne' Israel, ne le'e dxezrébele Dios.

<sup>17</sup> Dios chee xezre Israel guqu'é'e xra xrtáudxu ca', na' bene' benne' ca' tu cue' benne' zante gate ne zaj zre'e ca benne' zitu' ca' lu xezr la xu Egipto, na' ca gudé na' bebéaje' le' lu xezr la xu na' duté xel-la' waca chee'.

<sup>18</sup> Dios bchaga lawe' benne' ca' chua iza le'e xixre' lawe' lataj, <sup>19</sup> na' bzria xi'e gazre cue' bèneache gulezúa lu xezr la xu Canaán, chee bnézruje' xra xrtáudxu ca' xezr la xu chee benne' ca'. <sup>20</sup> Gudé na', lawe' tapa gaxúa xu gachaj iza gunná be'e Dios benne' ca' lu na' benne' ca' buluchi'e chee', cadxa bzrin zra zua Samuel, benne' bchálaje' waláz chee Dios. <sup>21</sup> Nadxa benne' ca' gulenabe' Dios sua tu benne' gaque' wenna' bea chee', na' Dios bzue' wenna' bea tu benne' le' Saúl, zri'ine Cis, tu benne' chee tu cue' benne' judío zaj naque' zri'ine zre sua Benjamín. Saúl nigá guque' wenna' bea lawe' chua iza. <sup>22</sup> Gudé na' Dios begüe' Saúl lataj chee', na' bzue' David gaque' wenna' bea chee', na' chee benne' nigá gunné':

“Nezda' David, zri'ine Isaí, naque' tu benne' dxuné' da dxezaca ba lazra', ne gune' xúgute da dxaca lazra'.” <sup>23</sup> Tu benne' zri'ine zre sua David nigá naca Jesús, bènea' bzua Dios chee guselé' benne' Israel ca', ca ba guchebe lazre' chee David. <sup>24</sup> Nédxudxa gate za xida Jesús, Juan bchálajlene' ca naca benne' Israel ca', guzre' benne' ca' dxal-la' xelexebí'i lazre', ne xelexedxúe' nisa. <sup>25</sup> Na' gate ba za cheajsé chee Juan, na' gunné': “Neda' quebe naca' bènea' dxéquele naca', san ca te chia' neda' za xetú benne' quebe naca chia' neda' cuéaja' zrele' da xu'u ni'e.”

<sup>26</sup> Le'e, biche ljwezra', zri'ine zre sua Abraham, ne le'e dxezrébele Dios. Dios nasele' chee dizra' nigá chee lale. <sup>27</sup> Benne' ca' gulezrá' Jerusalén, ne benne' blau chee' ca', quebe belexúnbe'e nu na' Jesús, ne quebe guléajni'ine' dizra' da buluchalaj benne' ca' buluchálaje' waláz chee Dios da dxelenne' xúgute zra dxulupá'ane'.

Ca' guca, benne' ca' belún líqueze' ca naca da naxúaj na chee Jesús gate gulechugue' chee' gatie'. <sup>28</sup> Lácala quebe belezrelne' tu da nabaga Jesús chee xelútie' le', gulenabe' lau Pilato nna bé'ene' gatie'. <sup>29</sup> Nadxa, gate gudé belune' xúgute da naxúaj na lu xiche chee Dios ca naca da dxal-la' gaca chee Jesús, na' buluxulétaje' le' xaga béguaj, ne bulucache' le'.

<sup>30</sup> Nadxa Dios bsebané' le' ládujla benne' gate. <sup>31</sup> Lu zane' zra Jesús ble'e lawe' benne' ca' guledálene' le' gate bezé'e Galilea dxeaje' Jerusalén, na' na'a, benne' caní dxelexechebe' ca naca chee' lau bèneache.

<sup>32</sup> Cá'aqueze netu' dxuzénentu' le'e dizra' chawe' ca naca da guchebe lazre' Dios lau xra xrtáudxu ca'.

<sup>33</sup> Ben li'e' ca naca da guchebe lazre' cheedxu dxi'u, nácadxu zri'ine zre sua benne' ca', gate bsebané' Jesús, ca naxúaj gudxupe' salmo, dxenné': “Lue' nacu' zri'ina'. Neda' bzua' Lue' na'a.” <sup>34</sup> Dios blé'ene' gusebané' le' ládujla benne' gate, chee quebe guzru bel-la' dxen chee' gate gunné' lu xiche chee': “Gunna' le'e da chawe' da

guchebe lazra' lau David." <sup>35</sup> Cá'anqueze dxenné' xetú lu salmo: "Quebe gu'u lataj guzru bel-la' dxen chee wen zrin chiu', bi nazri'ite lazru'." <sup>36</sup> Da li David bene' zrin chee benne' ca' zaj zre'e gate zua le', ca gunná be'e Dios le', san ca gudé na' gutie', na' bulucache' le' naga belegache xra xrtawe' ca', na' guzru bel-la' dxen chee'. <sup>37</sup> Quebe guzru bel-la' dxen chee Bénnea' bse-bán Dios Le'. <sup>38</sup> Biche ljwezra', dxuzenda' le'e, dxal-la' nézele Dios gunité lawe' chee dul-la chee ne chee Jesús. <sup>39</sup> Ne chee Le', xúguté benne' dxelejilí lazre' Le', Dios dxunité lawe' chee benne' ca' ca naca xúguté da quebe guca gunité lawe' chee' lácala beluné' ca naca da bdxixruj be'e Moisés. <sup>40</sup> Le guxúe xanne' cuínale chee quebe gaca chee ca naca da buluzúaj benne' ca' buluchálaje' waláz chee Dios, gate gulenné':

<sup>41</sup> Le nna', le'e, benne' wen la, ne le xebane, ne le xente,

lawe' da guna' neda', Dios chee, lu zra chee, tu da naca da zrenté, da quebe chéajlele lácala nu guzén le'e.

<sup>42</sup> Gate Pablo ne benne' ljwezre' ca' belexedxúaje' lu xudau' chee judío ca', na' benne' ca' quebe zaj nálaje' judío gulenabe' le' guchálajlene' le' chee da caní gate zrin xetú zra dxulupá'ane'. <sup>43</sup> Gate belexedxúaje' lu xudau' na', benne' zan benne' judío ca', ne benne' ca' belexaque' judío, ne dxeluné' da naca chee Dios, xjácálene' Pablo ne Bernabé. Gubáz caní buluzéajni'ine' benne' ca' dxal-la' xelezúa chache' lu xel-la' zri'i lazre' chee Dios.

<sup>44</sup> Guledé xrunu' zra gate naca zra dxulupá'ane', belezraga ca nácaqueze benne' zaj zre'e xezre na' chee xelenné' dizra' chee Dios. <sup>45</sup> Gate benne' judío ca' belelé'ene' benne' zanté zaj nazrague' na', na' belaque' xa lazre' ne gulezú lawe' dxelenné' chee da dxenná Pablo, ne gulenné' schanni' chee'. <sup>46</sup> Nadxa Pablo ne Bernabé gulenné' du lazre', gulé'e benne' judío ca':

—Ben na ba xen bzénentu' le'e nedxu dizra' chee Dios, le'e nácale judío, san lawe' da quebe dxaca lázrele xénele, ne da dxunle dxulé'e na quebe naca chee gápale xel-la' nabán zeajilí canna, chee le' na' chéajntu' na'a chálajlentu' benne' quebe zaj naque' judío. <sup>47</sup> Caní guntu' lawe' da caní gunná bea Xránadxu gate gunné':

Bzua' Lue' ca tu xi' da gusení na benne' xezr la xu ca', ne chee gacu' weselá chee bèneache zaj zre'e ca naca xezr la xu.

<sup>48</sup> Gate belenne' da nigá, benne' quebe zaj naque' judío gulebé'lene', na' gulezú lawe' dxelenné' xrlátaje naca dizra' chee Xránadxu, na' guléajle xúguté benne' ca' ba nabéaj Dios chee xelape' xel-la' nabán zeajilí canna. <sup>49</sup> Ca' guca, bzriluj dizra' chee Dios du ca naca lu xezre ca' zaj nababa na'. <sup>50</sup> Benne' judío ca' buluchálajlene' bal-la nu'ula blau ca' zjácálene' da dxulusédené' chee Dios, ne benne' biu blau ca' chee xezre, na' gulegú'u xel-le' benne' ca' chee xeláu zi' xuzre' Pablo, ne Bernabé, ne chee xuluxulague' le' naga nababa na'. <sup>51</sup> Nadxa gubáz ca' belexebibe' bxrte xu da zeajzria na zrelé' da dxulé'e na zaj nabaga benne' ca' zria, na'

xjaque' lu xezre Iconio. <sup>52</sup> Gulebé'le benne' zaj zre'e Antioquia na', benne' dxeléajle' chee Jesús, zualé Be Lá'azxa le'.

#### Da belún Pablo ne Bernabé lu xezre Iconio

**14** Gate belezrin Pablo ne Bernabé xezre Iconio, na' belú'e tu zrenté lu xudau' chee judío ca', na' ca buluchálaje' dizra' chee Dios, benne' zanté guléajle' chee Jesús, benne' judío ca', ne benne' quebe zaj naque' judío. <sup>2</sup> Nadxa benne' judío ca', benne' quebe dxeléajle' chee Jesús belegú'u xel-le' benne' quebe zaj naque' judío chee xelecúidené' biche ljwézredxu ca'. <sup>3</sup> Lácala beluné' caní, benne' gubáz ca' gulezúaqueze' na' zane' zra, ne du lazre' buluchálaje' dizra' chee Dios, dxuluxrén lazre' Xránadxu, na' Xránadxu bzua chúchué' ca da dxelenná benne' gubáz ca' ca naca xel-la' zri'i lazre' chee Dios, na' Le' bnézruje' gubáz ca' xel-la' dxenná bea xeluné' xel-la' waca ca' chee xabáa ne da dxelunna bea na naca da li da dxelenné'. <sup>4</sup> Benne' ca' zaj zre'e xezre na' gulaque' chupa la'a. Bal-le' beledé'e judío ca', na' xebal-le' beledé'e gubáz ca' chee Jesús. <sup>5</sup> Nadxa benne' judío ca', ne benne' quebe zaj naque' judío beluné' tuze dizra' nen benne' xu'u lawe' ca' chee gulenné' schanni' chee benne' gubáz ca', na' gulaca lazre' xuluzríe' le' xiaj. <sup>6</sup> Pablo ne Bernabé, gate belenne' ca', buluzrúnaje' zjaque' naga zaj dxe' xezre Listra, ne xezre Derbe, da zaj nababa Licaonia, na' guledé'e ca naca xézredu ca' chee xezre ca' zaj nababa na', <sup>7</sup> na' buluchálaje' na' ca naca dizra' chawe' chee Jesús.

#### Dxuluzríe' Pablo xiaj lu xezre Listra

<sup>8</sup> Lu xezre Listra zua tu benne' nazrinnaj ni'e. Dxe'e na' lawe' da gúlaje' nazrinnaj ni'e, ne quebe dxácaqueze se'e. <sup>9</sup> Benne' nigá dxenne' da dxuchalaj Pablo, na' Pablo gunné'e benne' zrinnaj na', na' guque bé'ene' napé' xel-la' dxeajilí lazre' chee xexaque'. <sup>10</sup> Nadxa Pablo gunné' zizraj:

—Guzé ni'u.

Benne' na' guxase' guzete', na' guzú lawe' dxedé'. <sup>11</sup> Gate belelé'e benne' ca' da ben Pablo, na' gulezú lawe' dxelenné' zizraj nen dizra' walazre' chee benne' Licaonia, dxelenné':

—Dios ca' zaj naca ca bèneache ba belelé'e naga zúadxu.

<sup>12</sup> Dxelenné' naca Bernabé dios Júpiter, ne naca Pablo dios Mercurio lawe' da dxuchálajqueze Pablo.

<sup>13</sup> Na' bxruze chee dios Júpiter, zua xudau' chee na ca dxú'udxu xezre na', guché'e bezre ca' ne xiaj zaj nuzé'e na du, na' bxruze na', ne benne' zan ca' gulaca lazre' xuluxucá'ana szrene' benne' gubáz ca', ne xelútie' bezr ca' lau benne' gubáz ca' ca dxelúnqueze benne' xezre Listra na' chee dios chee'. <sup>14</sup> Gate guleque be'e Bernabé ne Pablo, benne' gubáz ca', na' gulecheze' zra lané' da dxulé'e na dxelezrebe' bi gun Dios, na' gulu'e lálwela benne' ca', dxelenné' zizraj:

<sup>15</sup> —Le'e, benne', ¿bizr chee na' dxunle da nigá? Netu' nácantu' bénneache ca lé'equeze, ne za'ntu' nigá chee xentu' le'e dxal-la' gusanle québedxa gunle da caní da quebe bi zaca na, ne chéajlele chee Dios ban, Bénnea' bene' xabáa ne xezr la xu, ne nísadau', ne xúgutę da de lu'ule na. <sup>16</sup> Lu iza da ba guledé Dios be'e lataj xúgutę bénneache guledé' lu xrneza cha chee', na' belune' ca da gulaca lazre', <sup>17</sup> lácala blé'equezne' benne' ca' nu naca Le' ne chee da chawe' da dxune' chee benne' ca'. Le' dxusel-la' xiuj cheedxu ne ca naca lina xrtante, ne dxunne' da dxechinedxu da gágudxu, ne chee bedxu.

<sup>18</sup> Lácala gulenná gubáz ca' da nigá, gúcale'e na stebe buluzague' benne' ca' chee quebe xelútię' bejr ca' lau le' chee xuluxucá'ana szrene' le'.

<sup>19</sup> Gudé na' belezrín bal-la benne' judío, benne' Antioquía, ne benne' Iconio, na' belegú'u xel-le' bénneache ca', na' buluzrįę' Pablo xiaj. Gulęquenę' ba belutię' Pablo, na' gulezrube xue' le' belebéaję' le' xezre na'.

<sup>20</sup> Gate benne' ca' dxelėjle'e chee Jesús belezrague' zaj naxęchaję' naga de' Pablo, na' bexasa le', ne bexu'e xezre na', na' zra xula bezá'lene' Bernabé, zjaque' xezre Derbe.

<sup>21</sup> Ca gudé bchálaję' dizra' chawe' chee Jesús lu xezre Derbe, naga benne' zante gulezı' lu ne'e dizra' chee Dios, na' gubáz ca' belexedęę' xezre Listra, ne xezre Iconio, ne xezre Antioquía. <sup>22</sup> Lu xezre caní belún chache' lázrdau benne' ca' dxelėjle'e chee Jesús, ne bulusızrene' le' chjácálne' da naca chee Dios, dxelę'e le':

—Benne' xelu'e naga dxenná bea Dios, xel-la' zi' zrente xeledęę'.

<sup>23</sup> La gázqueze buluzúę' benne' gula ca' chee xuluxúę' tu tu cue' benne' ca' dxelėjle'e chee Jesús, na' ca gudé na' buluzrįę' benne' ca' lu na' Xránadxu, Bénnea' ba gulėjle'e chee'.

#### Pablo ne Bernabé dxelęezrine' lu xezre Antioquía da nababa Siria

<sup>24</sup> Ca gudé na' belexedęę' naga nababa Pisidia, na' belezrine' naga nababa Panfilia. <sup>25</sup> Buluchálaję' dizra' chee Dios lu xezre Perge, na' ca gudé na' xjaque' xezre Atalia. <sup>26</sup> Na' belexú'e da dxedá lawe' nísadau', na' belezrine' xezre Antioquía, naga zaj zra' benne' belegu'e gubáz ca' lu na' Dios chee xelune' zrin na', da ba belezuene' na'a. <sup>27</sup> Gate belezrine' Antioquía na', na' bulutupe' benne' ca' dxelėjle'e chee Jesús, ne buluzenne' benne' ca' xúgutę da ba ben Dios, bchínene' gubáz ca', ne ca ben Xránadxu, be'e benne' quebe zaj naque' judío lataj xelėjle'e chee Jesús. <sup>28</sup> Na' Pablo, ne Bernabé belexegá'ane' na' zane' beu' nen benne' ca' dxelėjle'e chee Jesús.

#### Gubáz ca' chee Jesús dxelęezrague' Jerusalén

**15** Ca lu zra ca', bal-la benne' gusiá'que' xezre ca' zaj nababa Judea, ne belezrine' xezre Antioquía na', na' gulezú lawe' dxelę'e biche ljęwzredxu ca' dxal-

la' chugu late' weaj be'a chee be-la' dxen chee benne' biu ca' chee xelélé', ca gunná bea Moisés. <sup>2</sup> Pablo ne Bernabé bulutıl-lale'e le' dizra', na' naga xejche'tę na, biche ljęwzredxu ca' buluzúę' Pablo, ne Bernabé, ne xezícala benne' ca' chee chjaque' Jerusalén chee chea-ļlechálaję' chee da nigá nen benne' gubáz ca', ne benne' gula ca' chee cue' benne' dxelėjle'e chee Jesús zaj zre'e Jerusalén.

<sup>3</sup> Benne' dxelėjle'e chee Jesús, benne' zaj zre'e Antioquía, belexegu'e benne' caní neza, na' belexedęę' xezre ca' zaj nababa Fenicia, ne xezre ca' zaj nababa Samaria, na' dxuluzenne' benne' xęzredu ca' ca belún benne' quebe zaj naque' judío, ba belexexaque' chee Dios, na' xúgutę biche ljęwzredxu belebé'lene' gate belenne' da nigá.

<sup>4</sup> Gate Pablo ne Bernabé belexezrine' Jerusalén, na' benne' ca' dxelėjle'e chee Jesús ne benne' gubáz ca', ne benne' gula ca' gulezı' lu ne'e le', na' Pablo ne Bernabé buluzenne' le' ca naca da ben Dios lu na' le'. <sup>5</sup> Bal-la benne' fariseo ca', benne' ba gulėjle'e chee Jesús, gulezı' gulennę':

—Dxun na ba xen chugu late' weaj be'a chee be-la' dxen chee benne' biu ca', benne' ba gulėjle'e chee Jesús, benne' quebe zaj naque' judío, ne nna be'edxu le' xuluzúę' dizra' da bdxixruj be'e Moisés.

<sup>6</sup> Nadxa belezraga benne' gubáz ca' ne benne' gula ca', benne' dxelėjle'e chee Cristo, chee xulucá'ana chawe' da na' dxaca. <sup>7</sup> Ca gudé buluchálaję ljęwezre' chee da nigá, na' Pedro guxase', ne guzre' benne' ca':

—Biche ljęwezra', nézquezle le'e Dios guquę'e neda' nédxutę láduļla le'e chee guzenda' benne' quebe zaj naque' judío dizra' chawe' ca naca chee Jesús, chee xelėjle' benne' ca' chee Le'. <sup>8</sup> Dios nézene' ca naca da xu'u lu xichaj lázxdau bénneache, na' blé'ene' dxezı' lu ne'e benne' ca', lawe' da bnęzruje' benne' ca' Be' Lá'azxa ca bene' cheedxu dxi'u. <sup>9</sup> Dios quebe dxuchę'e ca zrı'ine' tudxu xetudxu lawe' da bca'ana cháwequeze' lázxdau benne' ca' guleajlı lazre' Jesús. <sup>10</sup> Na'a, ¿bizr chee na' dxaca lázrele le'e guchale ca da ba ben Dios, dxuzúale tu xua' lawe' benne' ca' dxelėjle'e chee Jesús, da quebe gaca gúadxu dxi'u, ne quebe guca xelúa xra xrtáudxu na? <sup>11</sup> Na'a, dxęajledxu dxi'u bache naladxu ne chee xel-la' zri'i lazre' chee Xránadxu Jesús, ne cá'aqueze zaj nalá benne' ca'.

<sup>12</sup> Nadxa xúgutę' gulezúa zrię', ne buluzę nague' dxácatę dxuchalaj Pablo ne Bernabé ca naca da ben Dios, bene' da zan da dxelunna bea na naca li xrtizre' nen xel-la' waca ca' da za xabáa, da ca' bene' lu na' Pablo ne Bernabé lówela benne' ca' quebe zaj naque' judío.

<sup>13</sup> Gate bexuzre buluchálaję', na' gunná Jacobo:

—Biche ljęwezra', le xene chia'. <sup>14</sup> Simón Pedro bzenne' dxi'u ca ben Dios, be'e lataj benne' ca' quebe zaj naca judío xelęexaque' chee' da nedxu lasa, bequę'e láduļla benne' ca' bénneache xelęexaque' chee'. <sup>15</sup> Da na' guca naca na tuze nen da buluzúaj benne' ca' buluchálaję' waláz chee Dios, da na' naxúaj na lu xiche chee Dios, dxennę':

<sup>16</sup> Te nigá xelá'a

na' xechisa' ca naca lizre David da nazre'e.

Gucá'ana chawa' da nagá'ana chee na,  
na' xechísaqueza' na,

<sup>17</sup> chee xelexíaj xúgute benne' xezica ca' Xrané' Dios,  
ne cá'anqueze xelún xúgute benne' zaj zra' xezr la xu  
ca',

benne' ca' xelenne' chee La' neda'.

<sup>18</sup> Ca' dxenná Xránadxu, bl'éne' da nigá nédxudaute.

<sup>19</sup> Chee le na' dxapa' le'e quebe dxal-la' gunle zede  
benne' quebe zaj naque' judío, benne' ca' dxelexe-  
aque' chee Dios. <sup>20</sup> Dخال-la' guzúajntu' chee benne' ca'  
dxal-la' xulusane' da naca chee bedáu' xaga ca' u  
bedáu' xiaj, ne quebe dxal-la' xelune' dul-la chee da  
dxucá'ana sban bénneache, ne quebe dxal-la' xelawe'  
bela' chee be xixre', be quebe bdxuaj dxen, ne quebe  
dxal-la' xelawe' dxen cheeba'. <sup>21</sup> Caní dxal-la' xelune'  
lawe' da ca ni'i zaj zra' benne' tu tu xezre, benne' dxu-  
luzenne' bénneache ca naca da bdxixruj bea Moisés,  
da na' dxululabe' lu xudau' ca' chee benne' judío ca' tu  
tu zra ca' dxulupáne'.

<sup>22</sup> Nadxa benne' gubáz ca', ne benne' gula ca', ne  
xúgute benne' dxelájle'e chee Jesús belune' tuze  
dizra' xelexe' bal-la benne' ca' ládujla le' ne xelesel-  
le' le' xezre Antioquia nen Pablo, ne Bernabé. Bele-  
que'e Judas, bénnea' léqueze' Barsabás, ne Silas. Chu-  
pa benne' caní zaj naque' benne' blau ládujla biche  
ljwézredxu ca'. <sup>23</sup> Bulugúe'e benne' ca' tu xiche da  
dxenná na: "Netu', benne' gubáz zrantu' nigá, ne  
benne' gula zrantu' nigá, ne biche ljwézrele zrantu'  
nigá, dxugápantu' le'e diuzre, biche ljwézrentu' quebe  
nácale judío, zrale xezre Antioquia, ne le'e zrale xezre  
ca' zaj nababa Siria, ne xezre ca' zaj nababa Cilicia.

<sup>24</sup> Ba bémentu' bal-la benne' ba besiá'que' nigá, ne  
quebe nasél-lantu' netu' le', na' belune' le'e zede nen  
dizra' da buluchálaje', ne belún zréajene' le'e, dxelen-  
né' dxal-la' chugu late' weaj bela' chee bel-la' dxen  
chee, benne' biu ca', ne chéajle' ca naca da bdxixruj  
be'e Moisés. <sup>25</sup> Chee le na' dxéquentu' naca xrlátaje  
cá'antu' bal-la benne' ládujla netu' chee xelexe' xeda-  
jlenné'e le'e nen biche ljwézredxu Bernabé ne Pablo,  
benne' ca' nazri'i lázre'entu'. <sup>26</sup> Benne' caní belune'  
zrin chee Xránadxu Jesucristo, xjaque' lu da stébe na-  
ga gulaca lazre' bénneache xelúti'e le'. <sup>27</sup> Ca' naca na,  
dxesél-lantu' naga zúale Judas ne Silas, na' benne' caní  
xuluchálajlene' le'e ca naca chee da nigá. <sup>28</sup> Guque Be'  
Lá'azxa xrlátaje, ne cá'anqueze netu' gúquentu' xrláta-  
je quebe bi xua' guzúantu' lawe' le'e, san da canize dx-  
un na ba xen gunle. <sup>29</sup> Dخال-la' gusanle da naca chee  
bedáu' xaga, ne bedáu' xiaj ca', ne quebe dxal-la' gun-  
le dul-la chee da dxucá'ana sban bénneache, ne quebe  
dxal-la' gágule bela' chee be xixre', be quebe bdxuaj  
dxen, ne quebe dxal-la' gágule dxen cheeba'. Che gun-  
le ca naca da nadxixruj bea caní, gunle xrlátaje. Dx-  
enábantu' lau Dios gaca chawe' chee.

<sup>30</sup> Nadxa benne' ca' gulesel-le' xjaque' xezre Antio-  
quia. Na' buluchague' benne' ca' zaj naque' chee Dios,  
ne bulunézruje' le' xiche na'. <sup>31</sup> Gate biche ljwézredxu  
ca' bululabe' na, na' gulebé'ene' lawe' da dxue zren

na le'. <sup>32</sup> Judas ne Silas zaj naque' benne' dxelenné'  
waláz chee Dios. Chee le na' buluchálajlene' biche  
ljwézredxu ca', belúe zrene' le', ne bulutipe' lazre' le'.

<sup>33</sup> Gate gudé guca tu chi'i zaj zre'e na', na' benne'  
bíchedxu ca' buluzé' benne' ca' dizra', ne gulenabe'  
Dios sua xel-la' dxebeza zri lazre' nen benne' ca', chee  
xesí'aque' xelexezrine' naga zaj zra' benne' ca' gulesel-  
le' le'. <sup>34</sup> Silas gúquene' xrlátaje xegáne' na'. <sup>35</sup> Cá'an-  
queze Pablo, ne Bernabé belexegáne' lu xezre Antio-  
quia, na' tu zren nen benne' zandxa gulezúe' dxulusé-  
dené' bénneache, ne dxuluchálaje' ca naca dizra' chee  
Xránadxu.

### Dxezú lau Pablo zéaje' zitu' da gudxupe' lasa guchála- je' chee Jesús

<sup>36</sup> Ca gudé na', Pablo guzre' Bernabé:

—Xu'u xecha lasa cheajnnadxu biche ljwézredxu ca'  
zaj zre'e xúgute xezre ca' naga xeajchálajdxu dizra'  
chee Xránadxu, chee cheajnnadxu aja dxaca zaj zre'e.

<sup>37</sup> Bernabé guca lazre' che'e Juan nen le', bi na'  
léquezebe' Marcos, <sup>38</sup> san Pablo quebe guzáza lazre'  
che'e-be' lawe' da bsanbe' benne' ca' gate zaj zre'e  
xezre ca' zaj nababa Panfilia, ne québedxa guxíajlebe'  
le' lu zrin chee Xránadxu. <sup>39</sup> Na' Pablo, ne Bernabé bu-  
lutil-la ljwezre' dizra'. Ca'an guca, belexela'a cha chee'.  
Bernabé guché'e Marcos, na' gulu'e tu lu da dxedá  
lawe' nísadau', na' xjaque' Chipre. <sup>40</sup> Na' Pablo guqu'e  
Silas, na' ca gudé biche ljwézredxu ca' belegúe'e Pablo  
ne Silas lu na' Xránadxu chee guné' da chawe' chee  
benne' ca', <sup>41</sup> na' gusiá'que', ne guledé'e xezre ca' zaj  
nababa Siria, ne xezre ca' zaj nababa Cilicia, na' bulu-  
tipe' lazre' bi bíchedxu ca'.

### Timoteo dxéajlebe' Pablo ne Bernabé

**16** Pablo ne Silas belezrine' xezre Derbe, ne xezre  
Listra naga belexezrague' tu benne' cuide' dxéa-  
jlebe' chee Jesús, lebe' Timoteo, zri'ine tu nu'ula judío  
dxéajle'e chee Jesús, san xrabe' naque' benne' griego.

<sup>2</sup> Bi bíchedxu zaj zre'e xezre Listra, ne xezre Iconio dxe-  
lenné' xrlátaje dxgua dxunbe'. <sup>3</sup> Pablo guca lazre' chéa-  
jle' Timoteo le', na' guchugue' late' bela' chee bel-la' dx-  
en chee' ca dxenná bea da bdxixruj be'e Moisés,  
chee quebe xelexe' benne' judío ca' zaj zre'e naga  
nababa na lawe' da zaj neze xúgute benne' ca' naca  
xra Timoteo benne' griego. <sup>4</sup> Lu xúgute xezre naga dx-  
eledé'e buluzenne' benne' bíchedxu ca' ca naca da zaj  
nadxixruj bea na belún benne' gubáz ca', ne benne'  
gula ca' zaj zre'e Jerusalén. <sup>5</sup> Ca'an guca bi bíchedxu ca'  
gulezúa chúchue' ca dxeleajli lazre' Jesús, na' benne'  
ca' dxelájle'e chee', tu zra tu zra zeajte dxelane'.

### Dxele'e Pablo tu da ble'e Dios le', dxel'éne' tu benne' Macedonia

<sup>6</sup> Be' Lá'azxa quebe be'e benne' gubáz ca' lataj xu-  
luchálaje' dizra' chee Dios naga nababa Asia. Chee le  
na' guledé'e naga nababa Frigia, ne xezre ca' zaj naba-  
ba Galacia. <sup>7</sup> Belezrine' naga nazraga xezre ca' zaj

nababa Misia. Gulaca lazre' chjaque' naga nababa Binitinia, san Be' Lá'azxa chee Jesús quebe be'e le' lataj. <sup>8</sup> Nadxa guledé' naga nababa Misia, na' belezrine' xezre Troas. <sup>9</sup> Lu xezre na' Pablo blé'ene' tu da ba ble'e Dios le' chizrela, blé'ene' tu benne' biu chee ga nababa Macedonia, ze' dxata' xuene' Pablo, dxenné': "Gudá Macedonia nigá, gácalenu' netu'." <sup>10</sup> Gate ble'e Pablo da nigá, na' benne' ca', ne neda', Lucas, la gudíajntu' ájala guntu' chee cháajntu' ga nababa Macedonia lawe' da gúquequezentu' Dios dxenné' netu' chee cheajchálajntu' benne' ca' dizra' chawe' ca naca chee Jesús.

### Pablo ne Silas dxelezrine' ciudad Filipos

<sup>11</sup> Lu xezre Troas na' guxú'untu' tu lu da dxedá lawe' nísadau', na' guxéajntu' tu xezre la xu da naxechaj nísadau', nazí le na Samotracia, na' zra xula bzrintu' xezre Neápolis. <sup>12</sup> Beza'ntu' Neápolis, na' bzrintu' xezre Filipos, da naca tu xezre naga zaj zra' benne' Roma, ne naca xezre blau ga nababa Macedonia. Lu xezre na' guzúantu' tu chupa zra. <sup>13</sup> Gate naca zra dxulupá'ana judío ca', na' bdxúajntu' dxu'a xezre na', ne bzrintu' dxu'a xegu naga zaj nabéaje' dxeajlechálajlene' Dios. Gudxe'ntu' na' ne bchálajntu' nu'ula ca' zaj nazrague' na' ca naca dizra' chawe' ca naca chee Jesús. <sup>14</sup> Tu nu'ula ca' le' Lidia, naque' nu'ula chee xezre Tiatira, nu'ula dxute' ladxe' zaca da naca bzawe. Nu'ula nigá zéajlene' da naca chee Dios, na' benne' cheentu', na' Xránadxu bzani'e lázrdawe' chee guzú' lu ne'e da dxuchalaj Pablo. <sup>15</sup> Na' bdxue nisa nu'ula nigá nen benne' zaj zre'e lizre'. Gudé na' guta' xuene' netu', gunné':  
—Che le'e dxéquele da li dxeajlí lazra' Xránadxu, le da súale lizra'.

Na' bene' ba xuzre begá'anantu' na'.

<sup>16</sup> Tu zra gate zéajntu' naga zeajchálajntu' Dios, bezrágantu' tu bi nu'ula cuide' xu'ube' be' xriwe', ne dxenné' xa'abe' ne chee be' xriwe' na'. Bi nu'ula nigá xú'ube' lu na' benne' ca' dxuluchínene' lebe' xadía, na' xránabe' ca' dxelezilé' dumí da dxezibe', dxenné' xa'abe'. <sup>17</sup> Bi nu'ula nigá guzú' laube' za'be' cuzru Pablo ne netu', dxennabe' zizraj:

—Benne' caní dxeluné' zrin chee Dios szrenté, ne dxuluzenne' le'e ájala gunle lale.

<sup>18</sup> Zane' zra benbe' caní cadxa guque Pablo zede, na' bexéchaje', ne guzre' be' xriwe' da xu'ube':

—Lu La Jesucristo dxenná be'eda' lue' xedxúaju' lu bel-la' dxen chee bi nu'ula nigá.

Na' be' xriwe' na' bedxúajté na.

<sup>19</sup> Gate benne' ca' dxuluchínene'-be' xadía guleque bé'ene' québedxa bi xelexezí'e ne cheebe', na' gulel-le' Pablo ne Silas, na' guleché'e benne' caní lau benne' xu'u lawe' naga zua chale'aj xu'u lawe' blau. <sup>20</sup> Na' buluzúe' benne' caní lau benne' xu'u lawe' ca', na' gulenné':

—Benne' caní zaj naque' judío ne dxelún zréajene' benne' zaj zre'e xezre cheedxu, <sup>21</sup> ne dxulusédené' ca naca da zjácálene', da quebe gaca sidxu, ne quebe gaca gundxu na lawe' da nábabadxu Roma.

<sup>22</sup> Nadxa benne' zaj zre'e xezre na' guledábague' Pablo ne Silas, na' benne' xu'u lawe' na' gulenná be'e xelexéchaje' zra lana Pablo ne Silas, ne xelu'e le' zrise. <sup>23</sup> Ca gudé belúele'e le', na' buluzré'e le' lizre xia, ne gulenná bé'ene' benne' xu'u lu ne'e lizre xia na' guxúe xánnie' benne' ca'. <sup>24</sup> Gate benne' ca' gulenná be'e, na' bzre'e le' zane' lézxdxa ne bzre'e ni'a benne' ca' lu xedxu chee cuaga da dxuxru na ni'e.

<sup>25</sup> Gate gula dxela Pablo ne Silas dxuluchálajlene' Dios, ne dxelul-le' da dxelúe lá'ane' Dios, na' xezícadxa benne' zaj zre'e lizre xia dxuluzé' nague' chee'. <sup>26</sup> La' na'té guzrú'le'e da bxrize na ca naca lizre xia, na' belexalaj xúgute' dxa xu'u ca', ne belexezre du xia da zaj nadxéaj ni'a xúgute' benne' ca' zaj zre'e lizre xia. <sup>27</sup> Na' benne' xu'u lu ne'e lizre xia na' bebane', ne gate blé'ene' zaj naxalaj dxa xu'u ca' chee lizre xia, gúlaje' xia chee xute cuine' lawe' da dxéquene' ba buluxuzrúnnaj benne' ca' zaj zre'e lizre xia. <sup>28</sup> Pablo gudxezre xé'e, guzre' le':

—Quebe bi gune cuinu'. Xúgutentu' zúantu' nigá.

<sup>29</sup> Nadxa benne' na' xu'u lu ne'e lizre xia gunabe' tu xi', na' guxú'u chégü'e, dxezrízequeze' xel-la' dxezrebe, na' bzu zribe' lau Pablo ne Silas. <sup>30</sup> Nadxa guléaje' benne' ca' ne bchebe' le':

—Le'e, benne', ¿bizra dxal-la' guna' chee la'?

<sup>31</sup> Benne' ca' belexechébe':

—Guxéajle chee Xránadxu Jesucristo, na' lau', ne cá'anqueze benne' zaj zre'e lizru'.

<sup>32</sup> Na' buluchálajlene' le', ne xúgute' benne' zaj zre'e lizre' ca naca dizra' chee Xránadxu. <sup>33</sup> Lu xela ná'queze benne' na' xu'u lu ne'e lizre xia gudibe' we' chee Pablo ne Silas, na' ca gudé na', le' ne xúgute' benne' zaj zre'e lizre' guledxúe' nisa. <sup>34</sup> Ca gudé na' beché'e Pablo ne Silas lizre', na' bnézruje' da gulawe', na' le' ne benne' zaj zre'e lizre' gulebé'ene' lawe' da ba guléajle'e chee Dios.

<sup>35</sup> Che zílala benne' xu'u lawe' ca' gulesel-le' bi xra'aga lau benne' na' xu'u lu ne'e lizre xia, ne gulenná bé'ene' le' gusané' Pablo ne Silas. <sup>36</sup> Nadxa benne' na' xu'u lu ne'e lizre xia guzre' Pablo:

—Benne' xu'u lawe' ca' gulenná bé'ene' neda' gusana' le'e. Na'a waca xedxúajle du lázrele.

<sup>37</sup> Pablo guzre' bi xra'aga ca':

—Netu' nabáabantu' Roma, na' belú'e netu' lávela benne' xezre ca', ne quebe ne xuluchí'e cheentu', na' buluzré'e netu' lizre xia. Na'a ¿dxeléquene' xulusane' netu' bagácheze? Quebe gaca. Xelída léqueze' xelexebéaje' netu'.

<sup>38</sup> Bi xra'aga ca' xeajlexezénnebe' benne' xu'u lawe' ca', na' benne' caní belezrebe' gate guleque bé'ene' Pablo ne Silas zaj nababe' Roma. <sup>39</sup> Na' xjaque' lizre xia na', ne gulenabe' Pablo ne Silas xelexí zrene' chee'. Nadxa belexebéaje' le', ne gulata' xuene' le' xelexedxúaje' xezre na'. <sup>40</sup> Gate Pablo ne Silas belexedxúaje' lizre xia na', na' xjaque' lizre Lidia, na' ca gudé buluchálajlene' biche ljwézredxu ca', ne bulutipe' lazre', na' besía'que'.

Benne' zaj zře'ę xęzre Tesalónica dxeledábague' Pablo

**17** Nadxa Pablo ne Silas guledée' xęzre Anfípolis, ne xęzre Apolonia, na' belezrine' xęzre Tesalónica, naga zua tu xudau' cheę judío ca'. <sup>2</sup> Pablo guxíaję' xudau' na', na' ca dxúnqueze' bchálajlęne' benne' ca' tu tu zra dxulupá'ane' du chunna da gazre zra. <sup>3</sup> Ca da naxúaj na lu xiche cheę Dios, bzéajni'ine' le' ben na ba xen Cristo guzı guzaque', ne gutię', na' ca gudé na' ben na ba xen bebane' ládujla benne' gate. Na' guzre' benne' ca':

—Jesús nigáqueze, bėnnea' dxuzenda' le'e cheę', naque' Cristo, Bėnnea' guchebe lazre' Dios sel-le'.

<sup>4</sup> Nadxa bal-la benne' judío ca' guléajle'ę cheę Jesús, ne gulaque' tuze Pablo ne Silas. La gázqueze guléajle' benne' zan benne' griego, ne nu'ula zan zaj naque' nu'ula blau. <sup>5</sup> Benne' judío ca', benne' quebe dxeléajle'ę cheę Jesús gulaque' xa lazre' cheę Pablo, na' buluchague' bal-la benne' ca' dxelune' da calęla dxeledaze', ne bulutupa ljwezre', na' buluzúe' stębe ca naca benne' xęzre. Gulu'ę xadía lizre Jasón, dxelxílaję' Pablo ne Silas, cheę xebeáaję' le', ne xuludé' le' lu na' benne' xęzre ca'. <sup>6</sup> Gate quebe belexzrelnę' Pablo ne Silas lu xu'u na', nadxa beleché'ę xadía Jasón ne xebal-la biche ljwézredxu ca' lau benne' xu'u lawe' ca' cheę xęzre, na' dxelebezre xę'e, dxelenné':

—Benne' ca', benne' ba belún zréajenę' ca naca benne' zaj zře'ę xęzr la xu, cá'aqueze ba belelé'ę nigá. <sup>7</sup> Jasón nigá ba gulu'ę benne' ca' lizre'. Ca naca benne' ca' dxeledábague' da bdxixruj bea César lawe' da dxelenné' zua xetú wenná bea, tu benne' le' Jesús.

<sup>8</sup> Gate belenné' da canı, na' benne' xęzre ca', ne benne' xu'u lawe' ca' gulezúe' stębe. <sup>9</sup> Jasón, ne biche ljwézredxu ca' bulucá'ane' dumı cheę gulezı'ę lataj, na' benne' xu'u lawe' ca' bulusanę' le'.

#### Pablo ne Silas dxelezrine' xęzre Berea

<sup>10</sup> Nadxa biche ljwézredxu gulé'ę Pablo ne Silas cheę xesı'aque' chizrela, cheę chjaque' xęzre Berea. Gate belezrine' na', na' belú'ę lu xudau' cheę judío ca'.

<sup>11</sup> Benne' judío canı zaj nácadxe' zren lazre' ca benne' Tesalónica ca' lawe' da du lazre' gulezı'ę dizra' cheę Dios, na' tu zra tu zra dxululabe' lu xiche cheę Dios cheę xuluxúe' che naca da li da dxelé'ę le'. <sup>12</sup> Ca'an guca, benne' zan benne' judío ca' guléajle'ę cheę Jesús, ne cá'aqueze benne' griego. Benne' zan guléajle'ę, nu'ula blau ca', ne benne' biu ca'. <sup>13</sup> Gate benne' judío ca' zaj zře'ę xęzre Tesalónica guleque bé'ene' dxuchalaj Pablo dizra' cheę Dios lu xęzre Berea, na' belezrine' na', ne gulegú'u xel-le' bėnneache cheę xeledábague' Pablo ne Silas. <sup>14</sup> Biche ljwézredxu ca' la gulesél-la'tę' Pablo chéaję' dxu'a nısadau', na' Silas ne Timoteo belexegá'ane' lu xęzre Berea. <sup>15</sup> Benne' ca' zjácálne' Pablo beleché'ę le' lu xęzre Atenas. Nadxa benne' ca' belexezrine' lazrie', ne gulé'ę Silas, ne Timoteo chjácazegue' naga zua Pablo.

Da dxun Pablo lu xęzre Atenas

<sup>16</sup> Dxácate' na' Pablo dxebeze' Silas ne Timoteo naga zue' lu xęzre Atenas, na' guzúale'ę stębe gate blé'ene' ca naca xęzre na', ni' naze nıtale'ę bedáu' xıaj. <sup>17</sup> Cheę le' na' bchálaję' lu xudau' cheę judío ca' nen benne' judío ca', ne xezıcala benne' ca' zjácálne' da naca cheę Dios, na' tu zra tu zra bchálajlęne' benne' ca' zaj zře'ę lawe' xi'a. <sup>18</sup> Bal-la benne' zjácálne' ca naca da dxuluse' benne' ca' zaj le' benne' epicureo, ne benne' estoico gulezú lawe' dxuluchálajlęne' Pablo. Bal-le' gulenné':

—¿Bizra xęga benne' wechalaj nigá dxi'u?

Na' xebal-le' gulenné':

—Dxéquentu' naque' benne' dxuse dizra' cheę dios zıtu' ca'.

Ca'an gulenné' lawe' da dxuchalaj Pablo dizra' chawe' ca naca cheę Jesús, ne ca naca cheę xel-la' dxexebán.

<sup>19</sup> Nadxa guleché'ę Pablo lu lataj nazı le na Areópago, naga dxelezrąaqueze' bi xuluzén ljwezre'. Na' buluchębe' Pablo:

—¿Waca guzėnenu' netu' ca naca da cube nigá da dxusėdenu' bėnneache? <sup>20</sup> Lue' dxuchálaju' dizra' da quebe ne xėnentu', na' dxaca lázrentu' nézentu' bi zéaję ca naca da canı.

<sup>21</sup> Canı gulenné' lawe' da dxuluzé' nágaze, ne dxuluchálajze ca naca tu dizra' cube xúgute' benne' Atenas, ne benne' zıtu' ca' zaj zře'ę xęzre na'.

<sup>22</sup> Nadxa Pablo guzı'ę laduj benne' ca' zaj zře'ę Areópago na', na' guzre' le':

—Le'e, benne' Atenas, ca naca xúgute' da dxelé'eda', dxulé'ę na dxápale'ęle ba lá'ana dios cheęle ca', <sup>23</sup> lawe' da gate gudá' neda' gunná'a ca zaj naca xudau' ca' naga dxue lá'anale dios cheęle ca', na' ble'eda' tu xudáudau' naga naxúaj dizra' canı: Cheę Dios Quebe Nu Núnbea. Na'a, Dios na' dxue lá'anale le'e, ne quebe núnbeale le', cheę Dios na' dxuchálajlęna' le'e.

<sup>24</sup> 'Naque' Dios na' bęne' xęzr la xu nigá, ne xúgute' da dę lawe na. Naque' Xrane xabáa, ne Xrane xęzr la xu nigá. Quebe zue' xudau' da nun ni'a na' bėnneache.

<sup>25</sup> Quebe nachınene' bi da gaca xelún bėnneache cheę le' lawe' da dxunna Dios ná'queze xúgute' dxu xel-la' nabán, ne be' da dxeca'adxu, ne xúgute' da dę.

<sup>26</sup> 'Tuze benne' bęne' naque' xra xúgute' cue' xęzr la xu ca' cheę che'ę du gabı'i xęzr la xu, na' blé'ene' zra, ne lataj naga dxal-la' xelezrę'ę, <sup>27</sup> cheę xelexılaję' Dios cheę ájala xelexezrelne' le' lácala quebe xelúnbea xánnie' le', san da li Dios quebe zue' zıtu' naga zua tu tudxu dxi'u. <sup>28</sup> Ne cheę Dios nigá naca bandxu, ne dxedadxu, ne zradxu. Naca ca gulenná bal-la benne' wıla cheęle, gulenné': "Nácadxu xrtıa Dios." <sup>29</sup> Che nácadxu xrtıa Dios, quebe dxal-la' guéquedxu naca Dios ca tu bedáu' oro, u tu bedáu' plata, u tu bedáu' xıaj, da zaj nun bėnneache cáteze dxululaba lázrequeze'.

<sup>30</sup> Dios bzue' chalá'ala da belún bėnneache ca ni'tę lu xel-la' quebe zaj neze cheę', san na'a dxenná bé'ene' xúgute' benne' gáteteze zaj zře'ę xelexebı'i lazre'.

<sup>31</sup> Dios ba nuzúe' tu zra gate guchi'ę cheę xúgute' bėn-

neache lu da xrlátaje chee' lu na' tu benne' ba gucá'a le', na' chee' da nigá bzué' tu da dxunna bea na gate bsebané' bènea' ládujla benne' gate.

<sup>32</sup> Gate benne' ca' belenne' dizra' nigá ca naca chee' tu benne' bebané' ládujla benne' gate, na' bal-le' belún le' chee', ne xebal-le' gulenné':

—Waca guchálajlenu' netu' ca naca da nigá xetú zra.

<sup>33</sup> Nadxa Pablo bezé'e naga zaj zra' benne' ca'. <sup>34</sup> Bal-la benne' ca' guléajle'e chee' Jesús, na' gulaque' Pablo tuze. Ládujla benne' caní zua Dionisio, benne' naque' tuze nen benne' dxelezrague' Areópago na', ne tu nu'ula le' Dámaris, ne xebal-la benne' ca'.

### Pablo dxezrine' xezre Corinto

**18** Gudé na' bezá' Pablo xezre Atenas, bexíaje' xezre Corinto. <sup>2</sup> Lu xezre na' xeajxraque' tu benne' judío le' Aquilo, naque' benne' nababé' tu xezre nababa Ponto. Láteze ba guca belexezrín Aquilo, ne zru'ule' Priscila ga na'. Benne' caní besía'que' xezr la xu Italia lawe' da gunná bea César Claudio xelexedxúaj xúgute' benne' judío ca' xezre Roma. Pablo guxíaje' xeajnné'e Aquilo ne Priscila, <sup>3</sup> na' lawe' da tuze ca naca zrin da dxelún Pablo ne Aquilo, dxeluné' xu'u xide zra be xixre' da dxelútié' chee' benne' dxjaca wedil-la, na' begá'ana Pablo nen benne' caní chee' xeluné' tu zren zrin. <sup>4</sup> Tu zra tu zra gate naca zra dxulupá'ana judío ca', Pablo zéaje' lu xudáudau' chee' judío ca' naga bchálaje', ne blé'ene' benne' ca', benne' judío, ne benne' quebe zaj naque' judío, Jesús naque' Cristo, Bénnea' guchebe lazre' Dios sel-le'.

<sup>5</sup> Gate belezrín Silas, ne Timoteo ga na', gudé belexesí'aque' xezre ca' zaj nababa Macedonia, na' Pablo tu dxuchálajzqueze' dizra' chee' Dios, ne dxulé'ene' benne' judío ca' da li Jesús naque' Cristo, bènea' nasel-la Dios, bènea' dxelebeza judío ca'. <sup>6</sup> Benne' judío ca' gulezú lawe' dxeledábage' Pablo, ne dxelené' schanni' chee'. Nadxa Pablo guzribé' gabán chee' da dxulé'e na dxebeaj xíchaje' benne' ca', dxenné':

—Le'e nabágale chee' xel-la' gute chee' bène'du xu'ule. Québedxa nabaga' neda' chee' na lawe' da ba bzenda' le'e dizra' chawe' chee' Cristo. Ná'atela guchálajlenu' benne' quebe zaj naque' judío.

<sup>7</sup> Bezé'e lu xudáudau' na', na' bezrine' lizre tu benne' le' Justo, benne' dxucá'ana szrene' Dios ne zua lizre' cuita xudáudau' chee' judío ca'. <sup>8</sup> Na' Crispo, benne' xíchaje' chee' xudáudau' chee' judío ca', ne ca naca benne' zaj zré'e lizre' guléajle'e chee' Xránadxu. Cá'an-queze benne' zan benne' Corinto, gate belenne' dizra' chee' Dios, guléajle'e ne guledxúe' nisa. <sup>9</sup> Nadxa Xránadxu ble'e lawe' Pablo tu zre' tu lu da ble'e Dios le', ne guzre' le':

—Quebe zrebu'. Bchálajteze, ne quebe sua zriuu'.

<sup>10</sup> Neda' zúalena' lue', na' quebe nu seque' bi gune lue' lawe' da zaj zrále'e benne' zaj naque' chia' lu xezre nigá.

<sup>11</sup> Ca'an guca, begá'ana Pablo tu iza xugachaj lu xezre Corinto, dxusédené' benne' ca' dizra' chee' Dios.

<sup>12</sup> Lu zra ca' gate naca Galión benne' xu'u lu ne'e xezr la xu na' naga nababa Acaya, waláz chee' Roma, na' benne' judío ca' guledábage' Pablo. Belech'é le' xu'u lawe', <sup>13</sup> ne gulé'e benne' xu'u lu ne'e xezr la xu na':

—Benne' nigá dxedé' dxegú'u xel-le' bèneache chee' xelúe lá'ane' Dios, ne xeluné' tu da dxedábage da nadxixruj bea cheentu'.

<sup>14</sup> Pablo ba zue' guchálaje' gate Galión guzre' benne' judío ca':

—Chela naca na chee' tu da dxuzúa chalá'ala da bdxixruj bea César u chee' tu da zrinnaj zren, na' gun na ba xen xenda' ca da dxennale le'e, benne' judío.

<sup>15</sup> Lawe' da naca na chee' dízra'ze, ne chee' la tu benne', ne chee' da nadxixruj bea na cheézele, le gucá'ana chawe' na lé'equeze, lawe' da quebe dxaca lazra' neda' guchi'e da dxaca chee' da ca'.

<sup>16</sup> Nadxa bebéaje' benne' ca' lu xu'u lawe' na'.

<sup>17</sup> Nadxa xúgute' benne' griego gulel-le' Sóstenes, benne' xíchaje' chee' xudáudau' chee' judío ca', ne belú'e le' lau benne' xu'u lu ne'e xezr la xu na', le' Galión. Galión na' quebe be' lazre'e chee' da na'.

### Pablo dxezrine' xezre Antioquia, na' dxezú lawe' zéaje' da guxunne' lasa zéaje' wen zrin chee' Cristo

<sup>18</sup> Pablo begá'ane' xezre na' xezane' zra. Gudé na' bze' biche ljwézredxu ca' dizra', na' guxú'e tu lu da dxedá lawe' nísadau' zéaje' naga nababa Siria tu zren nen Priscila ne Aquilo. Lu xezre Cencrea nédxudxa gate za chu'e lu da dxedá lawe' nísadau', Pablo bzuate' xídeze xíchaje', da dxunna bea na zua tu da nachebe lazre' guné' lau Dios. <sup>19</sup> Gate belezrine' lu xezre Efeso, Pablo bsane' Priscila ne Aquilo, na' guxíaje' lu xudáudau' chee' judío ca', ne bchálajlenu' judío ca' zaj nazrague' na'. <sup>20</sup> Benne' ca' gulata' xuene' le' xegá'anadxe' xetú chi'i, na' le' quebe guca lazre'.

<sup>21</sup> Nadxa Pablo bze' benne' ca' dizra', dxenné':

—Dxun na ba xen xezrina' sua' Jerusalén chee' súaqueza' lu laní da ba za'. Welá'aqueza' xedajnná'a le'e che gunna Dios lataj.

Na' guxú'e lu da dxedá lawe' nísadau', ne bezé'e Efeso na'. <sup>22</sup> Gate bezrine' xezre Cesarea, Pablo guxíaje' Jerusalén xeajape' diuzre benne' ca' dxeléajle'e chee' Jesús, na' gudé na' guxíaje' xezre Antioquia. <sup>23</sup> Ca gudé guzú'e na' tu chi'i, na' bezé'e na', gudé'e tu tu xézredu ca' zaj nababa Galacia, ne xezre ca' zaj nababa Frigia, dxutipé' lazre' benne' ca' dxeléajle'e chee' Jesús.

### Apolos dxuchálaje' dizra' chee' Dios lu xezre Efeso

<sup>24</sup> Ca lu zra ca' tu benne' judío le' Apolos bzrine' lu xezre Efeso, naque' benne' xezre Alejandría, lu xu Egipto. Naque' tu benne' nupá'ale'e xrtizre', ne núnbeale'e da naxúaj na lu xiche chee' Dios. <sup>25</sup> Naxéajni'ilé'ene' ca naca chee' Xránadxu, ne duté' lázrdawe' dxuchálaje', dxusédené' cáteze naca chee' Jesús, lácala dxusédezené' xel-la' dxuchúa nisa ca ben Juan. <sup>26</sup> Apolos guzú lawe' dxusédené' benne' ca' zaj zré'e xudáudau' chee' judío ca' du lazre'. Gate belén Priscila, ne



Aquilo chee', na' guleché'e le' chala'ala, ne buluzéa-jni'idxenē' le' cáteze naca dizra' chee Dios. <sup>27</sup> Ca gudé na', gate guca lazre' Apolos chéaje' naga nababa Acaya, bi bíchedxu ca' bulutipe' lazre', ne buluzuaje' tu xiche chee benne' ca' dxeléajle'e chee Jesús zaj zře'e xezre ca' zaj nababa Acaya na' chee xezezi' lu ne'e Apolos na'. Gate bzrin le' naga nababa Acaya, gúcalē'e'enne' benne' ca', na' Dios be'e le' lataj guléajle'e chee Jesús. <sup>28</sup> Apolos blé'ene' lau xúgute' benne' ca' ca dxeleque zréaje benne' judío ca', ne blé'ene' ne chee da naxúaj na lu xiche chee Dios Jesús naque' Cristo, Bénnea' nase-la Dios, Bénnea' dxelebeza judío ca'.

### Pablo dxezrine' xezre Efeso

**19** Dxácatē zua Apolos lu xezre Corinto, na' gudé Pablo xézredu ca' zaj dxe' laduj xi'a ca', na' bzrine' lu xezre Efeso naga xeajxraque' bal-la benne' dxeléajle'e chee Jesús. <sup>2</sup> Na' bchebe' benne' ca':

—¿Guzi'le le'e Be' Lá'azxa gate guxéajle'e? Belexechebe':

—Ne quebe xénentu' che zua Be' Lá'azxa.

<sup>3</sup> Nadxa Pablo bchebe' benne' ca':

—¿Bi xel-la' dxedxúa nisa guzi'le le'e?

Benne' ca' belexechebe':

—Xela dxuchúa nisa ca' ben Juan.

<sup>4</sup> Na' gunná Pablo, guzre' benne' ca':

—Awe', Juan bchuē' nisa benne' ca' belexebí'i lazre', san guzre' benne' ca' dxal-la' xeléajle'e chee Bénnea' xide' ca' te chee le', da zéaje na, chee Jesús, Bénnea' naque' Cristo, nase-la Dios.

<sup>5</sup> Gate belenne' da nigá, na' beledxúe' nisa lu La Xránadxu Jesús. <sup>6</sup> Gate bze na' Pablo benne' ca', na' guzúale Be' Lá'azxa le', na' gulenné' dizra' chee benne' zitu' da quebe bulusēde', ne buluchálaje' waláz chee Dios. <sup>7</sup> Benne' caní zaj naca chazrinnue'.

<sup>8</sup> Lawe' chunna beu' dxeaj Pablo lu xu'u ca' naga buluzraga judío ca' naga bchálajle' benne' ca' dizra' chee Dios, ne blé'ene' benne' ca' naca da li da dxuchálaje' ca' naca xel-la' dxenná bea chee Dios. <sup>9</sup> Bal-le' belún zide' lázrdawe', ne quebe gulaca lazre' xeléajle'e chee Jesús, na' gulenné' schanni' chee dizra' chawe' ca' naca chee Jesús lávela benne' ca'. Nadxa Pablo bezé'e naga zaj zra' benne' ca', ne guché'e benne' ca' dxeléajle'e chee Jesús lu xu'u ga dxusēde tu benne' le' Tirano, na' lu xu'u na' bchálajle' benne' ca' tu zra tu zra. <sup>10</sup> Ca' bene' lawe' chupa iza, na' ca'an guca xúgute' benne' zaj zře'e xezre ca' zaj nababa Asia belenne' dizra' chee Xránadxu Jesús, benne' judío ca', ne benne' quebe zaj naque' judío. <sup>11</sup> Dios bene' xel-la' waca zri'a ca' lu na' Pablo lu zra ca'. <sup>12</sup> Ca'an guca, gulequē'e ladxe' ca' da dxuchéaj xichaj Pablo, ne ladxe' ca' da bde'e lachu'e, na' belú'e na naga zaj de' benne' we' ca', na' benne' caní belexexaque' ca' naca xízrawe' da zaj nape', na' be' xriwe' ca' belexedxúaj na lu bel-la' dxen chee benne' ca'.

<sup>13</sup> Bal-la benne' judío ca', benne' dxeledé' dxelexe-béaje' be' xriwe' ca' lu xichaj lázxdau benne' ca', gulaca

lazre' xuluchínene' La Xránadxu Jesús chee xelexebéaje' na, na' gulé'e be' xriwe' ca':

—Dxenná bé'entu' le'e xedxúajle lu xichaj lázxdau benne' nigá lu La Jesucristo, Bénnea' dxuchalaj Pablo chee'.

<sup>14</sup> Caní belún gazre benne' zaj naque' zri'ine tu benne' judío le' Esceva, naque' tu benne' xichaje chee bxruze ca'. <sup>15</sup> Gate belune' caní, be' xriwe' na' bechebe na chee':

—Núnbe'a Jesús, ne nezda' nua' Pablo, san le'e, ¿nuzra le'e?

<sup>16</sup> Gate gunná na da nigá, na' benne' biu na' xu'e be' xriwe' na', guxritie' guzria che'e benne' ca', na' dute xel-la' wal-la chee' buculē' xúgute' benne' ca', na' bé'le'e benne' ca' cadxa buluzrúnnuje' lu xu'u na' gala' xízeze, ne dxelaque' dxen. <sup>17</sup> Xúgute' benne' zaj zře'e xezre Efeso, benne' judío ca', ne benne' quebe zaj naque' judío, belenne' ca' guca da nigá, na' chee le' na' belezrébele'e, ne bulucá'ana szrene' La Xránadxu Jesús.

<sup>18</sup> Cá'anqueze benne' zan lávela benne' ca' dxeléajle'e chee Jesús belelé'e dxelexrúalepe' da calela da belune', <sup>19</sup> na' benne' zan, benne' belúne' xel-la' wazrá', zaj nu'e xiche chee wazrá', na' buluzezxe' na lau xúgute' benne' ca'. Gate bululabe' ca' gulezaca xiche ca', na' gulénézene' gulezaca na ca' gazxu gaxúa cue' tu gaxúa dumí plata. <sup>20</sup> Ca'an guca, guxíaj bzriluj dizra' chee Xránadxu, ne ble'e na xel-la' waca chee na.

<sup>21</sup> Gudé na' Pablo guca lazre' tée' xézredu ca' zaj nababa Macedonia, ne Acaya, na' te na' chéaje' xezre Jerusalén. Gunné' ca' te chéaje' Jerusalén, na' dxal-la' cheajte' xezre Roma. <sup>22</sup> Nadxa gusel-le' chupa benne' dxelácale le', Timoteo ne Erasto, naga nababa Macedonia, dxácatē begá'ana le' xetú chí'i naga nababa Asia.

### Benne' xezre Efeso dxeledábage' Pablo

<sup>23</sup> Ca lu zra na' benne' zan guledábage' dizra' chawe' ca' naca chee Jesús, <sup>24</sup> da na' guca na ne chee tu benne' le' Demetrio, benne' gubizre plata. Benne' nigá dxunē' níchudu ca' da zaj naca plata ca' xudau' chee dios nu'ula le' Diana, na' benne' ca' dxelúnle' le' zrin nigá dxelezi'le'e dumí. <sup>25</sup> Demetrio na' bhague' benne' caní tu zren nen xezica benne' dxelunē' zrin caní, na' guzre' benne' ca':

—Le'e, benne', nézquezle lu zrin nigá dxaca cheedxu da cháwele'e, <sup>26</sup> na' ca' dxelé'eezle le'e ne dxenle, Pablo nigá dxedé' dxenné' dios ca' da zaj nun bēneache quebe zaj naca na dios, na' caní ba bsēdenē' benne' zan, quegá Efeso nigáze, san du ca' nababa Asia. <sup>27</sup> Da nigá nácale'e na stēbe cheedxu, lawe' da ca' naca zrin cheedxu nigá nazruzre cuía xi na, ne la gaze xudau' chee dios nu'ula Diana nazruzre nite xel-la' nuzé chee na, na' caní xegá'ana ditaj ca' naca xel-la' szren chee dios nu'ula, bēne' dxelúe lávela ca' naca benne' zaj zře'e ga nababa Asia, ne du ca' naca bēneache zaj zře'e xezr la xu.

<sup>28</sup> Gate belenne' da nigá, na' belezrá'ale'e benne' ca', ne gulebezre xē'e, dxeleenné':

—¡Ga'ana szren Diana, dios cheędxu, benne' Efeso!  
<sup>29</sup> Na' ca naca benne' zaj zřeę xęzre na' guleque zréa-  
 jene'. Guleęę Gayo, ne Aristarco, benne' Macedonia dx-  
 edeláęę Pablo, na' gulezrube xuę' benne' caní  
 chale'aj xu'u lawe'. <sup>30</sup> Pablo guca lazre' chu'ę na' cheę  
 guchálajęę' benne' ca', san bi bíchedxu ca' quebe  
 gulegú'ę le' lataj. <sup>31</sup> Cá'anqueze bal-la benne' xu'u lawe'  
 cheę xęzre ca' zaj nababa Asia gulesel-le' benne' xea-  
 jzre' Pablo quebe dxal-la' chu'ę na'. <sup>32</sup> Dxácatę na', na-  
 ga zaj nazraga benne' ca', bal-le' gulebezre xę'e, tu da  
 dxelenné', na' xebal-le' dxelebezre xę'e, dxelenné' da  
 xula, lawe' da beledxé'ena zraga benne' zan, na'  
 benne' zantę quebe zaj nézene' bizr cheę na' zaj  
 nazraguę' na'. <sup>33</sup> Nadxa benne' judío ca' buluzúę' Ale-  
 jandro lau benne' ca' cheę guzėjni'ine' le' ca naca da  
 nigá, na' le' guchisa neę cheę xelezúa zri benne' ca'  
 lawe' da guca lazre' guchálajęę' benne' zan ca' da gá-  
 calę na' judío ca'. <sup>34</sup> Gate benne' zan ca' guleque béene'  
 naque' benne' judío, na' gulebezre xa'a xúgute' ca chu-  
 pa hora, dxelenné':

—¡Ga'ana szren Diana, dios cheędxu, benne' Efeso!  
<sup>35</sup> Nadxa benne' dxuzúaje' ne cheę xęzre na', gate ba  
 bzua zrie' benne' zan ca', gunné':

—Le'e, benne' Efeso. Ca naca béneache zaj zra' xęzr  
 la xu nigá zaj nézene' benne' zaj zřeę xęzre Efeso nigá  
 zaj nabaguę' xuluxúę' xudau' cheę dios nu'ula Diana,  
 ne bedáu' cheę da bexruj na zran xabáa. <sup>36</sup> Quebe nu  
 seque' tábaga' da nigá. Cheę le' na' le sua zrize, ne  
 quebe bi gunle da quebe ne guxúe xánnele. <sup>37</sup> Benne'  
 caní nach'e le nigá quebe bi da calela ne xelunę', ne  
 quebe bi schanni' ne xelenné' cheę dios nu'ula cheęle.  
<sup>38</sup> Che Demetrio, ne benne' ca' dxelunę' zrin nen le' dx-  
 elaca lazre' xelagu zria cheę tu benne', zaj zra' benne'  
 dxuluchi'ę da dxaca, ne zaj zua xu'u lawe' ca' naga  
 gaca xelawę' zría cheę benne' ca'. <sup>39</sup> Na' che le'e bi xetú  
 da ná bale, dxal-la' ná bale na naga zaj nazraga benne'  
 xu'u lawe' ca dxenná bea da bdxixruj bea César. <sup>40</sup> Na'a  
 zúadxu stębe ga gaze nu gagu zria cheędxu ca naca  
 da bęndxu, xelenné' dxedábagadxu xu'u lawe' lawe' da  
 quebe seque' bi xechébedxu che nu gagu zria dx'u ne  
 cheę da guca na'a.

<sup>41</sup> Ca gudé gunné' da nigá, na' bze' benne' zan ca'  
 dizra'.

### Pablo dxedęę' ga nababa Macedonia ne Grecia

**20** Gate gudé guca da stębe na' lu xęzre Efeso, na'  
 Pablo btupe' benne' ca' dxelájle' cheę Jesús  
 cheę guzėjni'ine' le'. Nadxa bze' benne' ca' dizra', ne  
 bnide' le', na' guzėje zėję xęzre ca' zaj nababa Mace-  
 donia. <sup>2</sup> Xejné'ę bíchedxu ca' zaj zřeę xúgute' xęzre  
 ca', ne btípale'ę lazre' benne' ca' ne cheę dizra' da  
 bchálajęę' le'. Ca gudé na' bezrine' naga nababa Gre-  
 cia. <sup>3</sup> Begá'ane' na' chunna beu', na' gudé na' gate ba  
 zuate' chu'ę tu lu da dxedá lawe' nísadau' chėję xęzre  
 ca' zaj nababa Siria, guque béene' ba zaj nun judío ca'  
 ca da xelunę' cheę. Cheę le' na' gulú'u bi'ę xezėje ni'ę  
 tée' naga nababa Macedonia. <sup>4</sup> Belún le' tuze Sópater,  
 benne' xęzre Berea, ne Aristarco, ne Segundo, benne'

xęzre Tesalónica na', ne Gayo, benne' xęzre Derbe, ne  
 Timoteo, ne Tíquico, ne Trófimo, benne' ca' cheę xęzre  
 ca' zaj nababa Asia. <sup>5</sup> Bi bíchedxu caní gulebía lawe'  
 launtu', neda', Lucas, ne xezícadxa ljwezre Pablo, na'  
 gulebeze' netu' lu xęzre Troas. <sup>6</sup> Netu', gate gudé laní  
 gate dxelagu benne' judío xeta xtila da quebe nachixre  
 cua zichaj cheę na, guxú'untu' tu lu da dxedá lawe'  
 nísadau', na' beza'ntu' xęzre Filipos. Zra gazxu' zra na'  
 xejzrentu' bi bíchedxu ca' lu xęzre Troas, naga  
 guzúantu' gazre zra.

### Da bęn Pablo lu xęzre Troas

<sup>7</sup> Zra nedxu cheę da gazre zra bezrágantu' cheę gá-  
 guntu' da dxusá lázredxu ca guca gate gute Xránadxu,  
 na' Pablo bsédenę' bi bíchedxu ca'. Bęn na ba xen  
 xeza'ntu' zra xula, na' cheę le' na' bchálajqueze Pablo  
 cadxa bzrintę dxęla. <sup>8</sup> Nazrágantu' tu xu'u da zua chun-  
 na cuía sibe, na' zaj zėje xi' da dxulusení na. <sup>9</sup> Tu bi  
 cuide' zríabe' ga dxu'u lení, na' gate Pablo bsetún-  
 nadxę' xrtizre', na' guca wásele'ę bi cuide' na', na' naga  
 xejchetę na, na' dxásętebe' gubíxrebe' chunna cuía  
 sibe, na' xejlechise'-be' ba nátebe'. <sup>10</sup> Nadxa betaj  
 Pablo, na' gulęgüę' bequę'e-be', ne bnide'-be'. Nadxa  
 guzre' bi bíchedxu ca':

—Quebe zrébele. Nabanbe'.

<sup>11</sup> Nadxa Pablo begüene' bezrine' chunna cuía sibe  
 na'. Na' bzúruje' xeta xtila gudawę', na' bezú lawe' dx-  
 uchálaję' cadxa guxani'tę. Zra na' bezėje na'. <sup>12</sup> Nadxa  
 bíchedxu ca' belexechėje bi na' gubíxrebe' ba bexaca  
 banbe', na' xúgute' gulezúę' lu xel-la' dxelezrén lazre'.

### Pablo dxexeze'ę xęzre Troas xezrine' xęzre Mileto

<sup>13</sup> Netu' guzría launtu' lau Pablo, na' guxu'untu' lu da  
 dxedá lawe' nísadau', na' bzrintu' xęzre Asón naga  
 xezrágantu' Pablo ca ba nun le' lawe' da guca lazre'  
 zėję ní'aze'. <sup>14</sup> Gate bezrágantu' le' lu xęzre Asón, na'  
 guxú'ę lu da dxedá lawe' nísadau' naga xu'untu', na'  
 guxájntu' xęzre Mitilene. <sup>15</sup> Beza'ntu' na', na' zra xula  
 bedentu' le nna' xęzre Quío, na' xetú zra, zra xula  
 bezrintu' lu xęzre Samos. Na' guzúantu' xęzre Trogilio  
 naga bezí' lázrentu', na' zra xula bzrintu' xęzre Mileto.  
<sup>16</sup> Ca' bęntu' cheę quebe guzré'tęcantu' naga nababa  
 Asia. Cheę le' na' Pablo quebe guca lazre' chėję' Efeso  
 lawe' da guca lazre' xezrinze' lu xęzre Jerusalén cheę  
 sue' na' lu zra Pentecostés che ba guca.

### Pablo dxuchálajęę' benne' gula dxelájle'ę cheę Jesús, benne' zaj zřeę Efeso

<sup>17</sup> Ca zrantu' lu xęzre Mileto, Pablo gusel-le' tu benne'  
 cheajnné' benne' gula ca' dxelájle'ę cheę Jesús zaj  
 zřeę xęzre Efeso. <sup>18</sup> Gate belelá' benne' ca', Pablo  
 guzre' le':

—Le'e nézquezle ca bęna' neda' xúgute' zra ca gudé  
 bla'a ga nababa Asia. <sup>19</sup> Xúgute' zra guzúa' lówela le'e  
 dxuna' zrin cheę Xránadxu dutę xel-la' dxexruj lazre',  
 ne zane' lasa gudxezra', na' gudéa' lu zane' da guzxa-  
 ca' ca naca da gulaca lazre' benne' judío ca' xelunę'

chia'. <sup>20</sup> Bchálajlęna' le'e xúgute da naca na xrlátaje, ne bsédeda' le'e lówela benne' zan, ne lízrquezle.

<sup>21</sup> Benne' zaj naque' judío, ne benne' quebe zaj naca judío, gúchequeza' benne' ca' dxal-la' xelexebí'i lazre' lau Dios, ne xeléajle'e cheę Xránadxu Jesucristo. <sup>22</sup> Na'a zexá'a Jerusalén, ca dxenná be'e Be' Lá'azxa neda', ne quebe nezda' bi gaca chia' na'. <sup>23</sup> Tuze da nezda', lu xúgute xęzre ca' naga dxedéa', Be' Lá'azxa dxęę neda' dxal-la' chu'a lizre xia, ne tea' zane' xel-la' zi'. <sup>24</sup> Quebe dxebe'a gunne xue cheę da nigá, ne quebe bi zaca xel-la' nabán chia', san tuze che gaca chéajlęna' ca naca da dxuna', ne cheę gusexúzrqueza' guna' ca naca da nusebaga Xránadxu Jesús neda', guchálaja' dizra' chawe' ca nazrí'i Dios dxi'u.

<sup>25</sup> 'Nézquezda' netule le'e, ba bchálajlęna' le'e ca dxenná bea Dios, québedxa lé'ele neda'. <sup>26</sup> Cheę le na', dxaca lazra' xapa' le'e na'a, quebe nabaga' zria ne cheę tule le'e, <sup>27</sup> lawe' da ba bzenda' le'e ca naca da dxaca lazre' Dios gunę, ne quebe bi bcá'ana' da quebe bzéajni'ida' le'e. <sup>28</sup> Cheę le na', le guxúe cuínale, ne le guxúe ca naca benne' ca' nácale tuze, benne' ca' Be' Lá'azxa ba nuzúę' le'e ládujla le' cheę chu'u lu na'le guxuele benne' ca' zaj nazrague' cheę Xránadxu, benne' ca' naxá'awenę' nen dxen cheéqueze'. <sup>29</sup> Nezda' gate xezá'a neda' xelélé' bal-la benne' xelaca lazre' guzría xi'e benne' zaj nazraga cheę Xránadxu ca dxelún becu' xi'a, be snia ca' dxuluzría xiba' zrila' ca'. <sup>30</sup> Ládujla le'e welelá' bal-la benne' xulusédene' da węn lazre', ne quegá da li, cheę chjácále benne' ca' dxeléajle'e cheę Jesús le'. <sup>31</sup> Cheę le na', le guxúe cuínale. Le gusá' lázrele ca bęna' chun iza, te zra ne chizrela quebe bšana' bzéajni'ida' le'e tu tule le'e, ne gudxézretea'.

<sup>32</sup> 'Na'a, biche ljwezra', dxuzúa' le'e lu na' Dios, ne lu dizra' cheę xel-la' zri'i lazre' cheę, da napa na xel-la' waca cheę gun na le'e benne' chuchu lazre', ne cheę guzúa na le'e lówela xúgute benne' ca' ba guleaj Dios cheéqueze'. <sup>33</sup> Quebe guca lazra' neda' si'a chia' dumí ne zra lana nu benne'. <sup>34</sup> Nézquezle le'e ca bęna', bęna' zrin nen ni'a ná'queza' cheę guta' da guchínneda' neda', ne da gulechinne benne' ca' gulaque' neda' tuze. <sup>35</sup> Blé'equezda' le'e, ca'an dxal-la' gunle zrin cheę séquele gácalele benne' dxelexazrje. Bsa lázrele xrtizra' Xránadxu Jesús, gate gunné': "Ba neza zrendxa naca na cheę benne' dxunezruj, quézcala cheę benne' si' lu ne'e."

<sup>36</sup> Ca gudé gunná Pablo da nigá, na' bzu zribe', ne bchálajlęne' Dios nen xúgute benne' ca'. <sup>37</sup> Xúgute' gulebezre', na' bulunidę, ne bulunupe' Pablo. <sup>38</sup> Belexewí'inele'ęne' lawe' da guzre' le' québedxa xelélé'ęne' le'. Na' xjácálene' le' naga bexu'e lu da dxedá lawe' nísadau'.

### Pablo dxezrine' xęzre Jerusalén

**21** Gate beza'ntu' naga zaj zra' bi bíchedxu ca', na' bexú'untu' lu da dxedá lawe' nísadau', na' bexía-jtecentu' naga dxe' xęzre Cos, na' zra xula gudentu' naga dxe' xęzre Rodas, na' gudé na' bzrintu' xęzre Pátara. <sup>2</sup> Lu xęzre Pátara xeajxrácantu' tu da dxedá lawe'

nísadau' da zeaj na naga nababa Fenicia. Na' guxu'untu' lu da dxedá lawe' nísadau' nigá, na' beza'ntu' na'.

<sup>3</sup> Gate gudentu' naga dxe' xęzr la xu Chipre, blé'entu' na chala'a xéglala, na' bexiajteczentu', bzrintu' lu xęzre ca' zaj nababa Siria. Lu xęzre Tiro bęn na ba xen xuluxulétaje' xua' da nua da dxedá lawe' nísadau' na', na' cheę le na' bzrintu' na'. <sup>4</sup> Na' bezrágantu' benne' ca' dxeléajle'e cheę Jesús, benne' zaj zre'e xęzre Tiro na', na' begá'anantu' nen benne' ca' gazre zra. Benne' caní, lawe' da bzéajni'i Be' Lá'azxa le' da gaca, gulé'e Pablo quebe dxal-la' chéaje' Jerusalén. <sup>5</sup> Gate gudé guca gazre zra ca', na' zua xezan'tu' na'. Xúgute benne' ca' dxeléajle'e cheę Xránadxu, ne zru'ule' ca', ne bidu cheę ca' gusá'acalęne' netu' bedxúajtęntu' xęzre na', na' dxu'a nísadau' na' bzu zríbentu' bchálajlęntu' Dios. <sup>6</sup> Nadxa bzę ljwézrentu' dizra', ne bnídatę ljwézrentu'. Nadxa bexú'untu' lu da dxedá lawe' nísadau', na' bi bíchedxu ca' belexezrine' lizre'.

<sup>7</sup> Beza'ntu' Tiro, gudentu' lu nísadau', ne bzrintęntu' xęzre Tolemaida, naga bgápantu' bi bíchedxu ca' diuzre, ne begá'anantu' nen benne' ca' tu zra. <sup>8</sup> Zra xula Pablo, ne netu' zralęntu' le' bezá'ntu' na', na' bzrintu' xęzre Cesarea. Na' bzrintu' lizre Felipe, benne' dxedá dxuchálaje' dizra' cheę Dios. Naque' tu benne' gazre, benne' ca' buluzúa gubáz ca' xelunę' zrin cheę Jesús. Begá'anantu' nen benne' nigá. <sup>9</sup> Felipe na' zaj zra' tapa zrí'ine' nu'ula quebe ne xuluchaga na'abe', ne dxuluchálajbe' waláz cheę Dios. <sup>10</sup> Guzúantu' na' zane' zra gate bla' tu benne' le' Agabo cheę xęzre ca' zaj nababa Judea. Naque' benne' dxuchálaje' waláz cheę Dios. <sup>11</sup> Agabo na' bide' bedajnné'e netu'. Guqué'e bazxu dxu'a le'e cheę Pablo, na' bchéaje' na ni'a na' cuine', dxenné':

—Be' Lá'azxa dxenné' judío ca' lu xęzre Jerusalén xuluchéaj caní benne' xrane bazxu dxu'a le'e nigá, na' xuludéę le' lu na' benne' zitu' ca'.

<sup>12</sup> Gate bentu' netu', ne benne' Cesarea da nigá, na' guta' xuentu' Pablo quebe chéaje' Jerusalén. <sup>13</sup> Pablo bechebę':

—¿Bizr cheę na' dxebézrele, ne dxuzúale neda' xel-la' dxewí'ine lazre'? Ba zúaqueza', quegá tuze xuluchéaje' neda', san la gázqueze zua' cheę gatia' lu xęzre Jerusalén ne cheę Xránadxu Jesús.

<sup>14</sup> Gate guque bé'entu' quebe séquentu' guzágantu' Pablo, na' québedxa bi gúzrentu' le', dxennantu':

—Gaca ca dxaca lazre' Xránadxu.

<sup>15</sup> Gudé na' bsení'antu' cheęntu', na' guxíaajntu' Jerusalén. <sup>16</sup> Na' gusiá'acale bal-la benne' netu', benne' Cesarea dxeléajle'e cheę Jesús, na' ládujla benne' ca' zua tu benne' Chipre le' Mnasón, zane' iza ba zeaj dxéajle'e cheę Jesús, na' lizre benne' nigá dxal-la' zrin-tu' súantu'.

### Pablo zeajnné'e Jacobo

<sup>17</sup> Gate bzrintu' Jerusalén, bi bíchedxu ca' belezí' lu ne'e netu' dutę xel-la' dxelebe'. <sup>18</sup> Zra xula Pablo guxía-jlęne' netu' xeajnná'ntu' Jacobo, na' zaj zrá'queze na' xúgute benne' gula ca' dxeléajle'e cheę Jesús. <sup>19</sup> Pablo

bgape' le' diuzre, na' bzenne' benne' ca' tu tu da ben Dios lu na' le' ládujla benne' quebe zaj naque' judío.

<sup>20</sup> Gate belenne' ca', na' belúe lá'ane' Dios. Nadxa gulé'e Pablo:

—Chawe' naca na, bi bícha'dau'. Dxelé'equezenu' zane gaxúa benne' judío dxeléajle'e chee Jesús, na' xúgute' dxelenné' dxun na ba xen chéajledxu da bdxixruj bea Moisés. <sup>21</sup> Zaj zra' benne' ba gulé'e benne' judío caní lue' dxusédenu' xúgute' benne' judío zaj zre'e zitu' québedxa xelune' ca da gunná be'e Moisés, ne quebe xelechugue' late' béla'dau' chee bel-la' dxen chee bidu biu chee' ca', ne quebe chjácalene' ca naca da zéajledxu dxi'u dxundxu. <sup>22</sup> ¿Ájala dxal-la' gundxu? Benne' judío caní welezrague' gate xelenne' ba bla'u. <sup>23</sup> Cháwedxa gunu' da caní: Zaj zra' tapa benne' lávela dxi'u dxal-la' xelune' tu da zaj nachébe lazre' lau Dios. <sup>24</sup> Guché' benne' caní chjá'acalene' lue', ne bca'ana chawe' cuinu' lau Dios nen benne' caní, na' gudizruj ca naca da dxal-la' xelízruje' benne' guchibe' xicha xichaj benne' caní. Ca'an gaca, xúgute' benne' xeque bé'ene' quebe naca da li ca da gulenné' chiu', san la gázqueze lue' dxunu' xúgute' ca da dxenná da nadixruj bea na. <sup>25</sup> Ca naca chee' benne' ca' quebe zaj naque' judío, ba bzúajntu' chee' quebe dxun na ba xen xelune' da caní, san tuze dxal-la' xulusane' da naca chee' bedáu' xiaj xaga ca', ne quebe xelawe' dxen chee be xixre' ca', ne quebe xelawe' béla' chee be xixre', be quebe bdxuaj dxen, ne quebe xelune' dul-la chee da dxucá'ana sban bénneache.

#### Dxelé'e Pablo lu xudau'

<sup>26</sup> Nadxa Pablo guché'e tapa benne' ca', na' zra xula bca'ana chawe' cuine' lau Dios nen benne' ca', na' belexú'e lu xudau' chee buluzenne' bxruze ca' gate xexuzre zra ca' chee da dxulucá'ana chawe' cuine' lau Dios, gate na' tu tué' dxal-la' xelegú'e guna'.

<sup>27</sup> Gate ba zua xuzre da gazre zra, na' bal-la judío ca', benne' zá'aca xezre ca' zaj nababa Asia, belélé'ene' Pablo lu xudau' na', na' buluchague' ca naca benne' ca' zaj zre'e na', na' gulebía che'e Pablo. <sup>28</sup> Dxelenné' zizraj:

—Benne' Israel, le gácale netu'. Benne' nigá dxedé' gáteteze dxusédene' xúgute' bénneache xuluzú'e chálá'ala xezr la xu cheedxu, ne da bdxixruj be'e Moisés, ne xudau' nigá, ne ba guzre'e lu xudau' nigá bal-la benne' griego. Dxucá'ana dítajé' lataj lá'azxa nigá.

<sup>29</sup> Caní gulenné' lawe' da ba belélé'ene' Pablo lu xezre na' nen Trófimo, tu benne' xezre Efeso, na' dxelé'quene' gulú'u Pablo le' lu xudau'.

<sup>30</sup> Ca naca benne' zaj zre'e xezre na' beledxé'ena zrague', ne zá'aca chégü'e'. Nadxa gulel-le' Pablo, ne gulezrube xue' le' chale'aj xudau' na', na' buluséxuje' dxa xu'u chee na. <sup>31</sup> Ba zuate xelúti'e Pablo gate benne' Roma dxenná be'e lu wedil-la benne' ba dxeledxé'ena zraga ca naca benne' zaj zre'e xezre Jerusalén. <sup>32</sup> Nadxa benne' nigá bchague' benne' dxjaque' wedil-la nen benne' dxenná bé'ene' le', na' xjaca chégü'e' naga zaj nazraga benne' zan ca'. Gate benne' ca' belélé'ene'

benne' na' dxenná be'e lu wedil-la, na' bulusané' québedxa buluzálaje' Pablo. <sup>33</sup> Nadxa gubiga' benne' na' dxenná be'e lu wedil-la, na' gudél-le' Pablo, ne gunná bé'ene' xuluchéaje' le' chupa du xia. Gudé na' bchēbe' benne' ca' nua' benne' nigá, ne bi ba bēne'.

<sup>34</sup> Benne' ca' gulebezre xē'e da zan da gulenné'. Ca'an guca benne' dxenná be'e lu wedil-la quebe bi guxéa-jni'ine' lawe' da dxelúnle'e schaga'. Nadxa gunná bé'ene' xeleché'e Pablo xu'u naga zaj zra' benne' dxjaque' wedil-la, benne' zan ca'. <sup>35</sup> Gate belezrine' dxa xu'u naga zaj zra' benne' dxjaque' wedil-la, na' benne' dxjaque' wedil-la belexú'e Pablo lu na'ze' lawe' da dxelúele'e benne' zan ca' Pablo, <sup>36</sup> na' xúgute' zá'aque' cuzre na' dxelenné' zizraj:

—Gate bēne'a'.

#### Pablo dxexechēbe' lau benne' zan ca'

<sup>37</sup> Gate dxelegú'e Pablo lu xu'u naga zaj zra' benne' dxjaque' wedil-la, le' guzre' benne' na' dxenná bé'ene' le':

—¿Waca bi nnia'?

Na' bchebe bēne'a' le':

—¿Waca nneu' dizra' griego? <sup>38</sup> ¿Quebe nacu' lue' benne' Egipto na' ba zeaj tu chupa iza btupe' benne' ca' guledábague' xu'u lawe', na' guché'e tapa gaxúa benne' dxeluti'e benne', xeajzre'e le' le'e xixre' lawe' lataj?

<sup>39</sup> Nadxa Pablo guzre' benne' na':

—Neda' naca' benne' judío, ne nababa' tu xezre blau chee ga nababa Cilicia. Ben culuén gunu' neda' lataj guchálajlēna' benne' zan caní.

<sup>40</sup> Benne' na' be'e le' lataj, na' Pablo guzé' lachila chee xu'u na', na' guchisa ne'e chee xelezúa zri benne' zan ca'. Gate gudxé' zri, na' bchálajlēne' le' dizra' hebreo, dxenné':

**22** —Le'e, benne' gula, ne le'e, bi bicha', le xen ca da xapa' le'e da dxexechēba' chee.

<sup>2</sup> Gate belenne' dxuchálajle Pablo le' dizra' hebreo, na' gulezúadxe' zrize, na' Pablo guzre' le':

<sup>3</sup> —Neda' naca' judío. Gúlaja' xezre Tarso naga naba-ba Cilicia, na' bgula' Jerusalén nigá, na' Gamaliel bsé-dene' neda' cáteze naca da nadixruj bea na chee xra xrtáudxu ca'. Tu dxue lárezqueza' dxuna' da naca chee Dios cáteze dxunle le'e na'a. <sup>4</sup> Nédxute' gudáu zi' xuzra' benne' ca' dxeléajle'e chee Jesús, ne bētequeza' bal-le', ne guché'a benne' biu, ne nu'ula chee, na' bzra'a le' lize xia. <sup>5</sup> Bxruze blau, ne xúgute' benne' gula sina waca xelexechébequeze' belunne' neda' xiche chee bi'a na lau bi bíchedxu judío ca' zaj zre'e xezre Damasco. Guxá'a na' xeajxedilja' naga zaj zra' benne' ca' dxeléajle'e chee Jesús chee ché'a benne' ca' Jerusalén nigá, chee xeledé'e' ba xa'.

<sup>6</sup> Gate zexá'a xu'a neza, ne ba zua zrina' Damasco, ca du wagubizra gúcatite' tu xi' naga zexá'a da za' xabáa. <sup>7</sup> Na' xeajchazia' lu xu, ne benda' chi'i tu benne' guzre' neda': "Saulo, Saulo, ¿bizr chee na' nau zi' xuzru' ne-da'?" <sup>8</sup> Nadxa bchēba' le': ¿Núzraqueze lue', Xran? Na' guzre' neda': "Neda' naca' Jesús, benne' Nazaret, bēn-

nea' nau zi' xuzru' lue'." <sup>9</sup> Benne' ca' zráleṅe' neda' belelé'ene' xi' na', ne belezrebe', san quebe belenne' chi'i bēnnea' gunné' neda'. <sup>10</sup> Nadxa gunnéa': ¿Bi dxal-la' guna', Xran? Na' Xránadxu gunné': "Guxasa, ne guxíajteze Damasco, ga na' zua benne' xelé'ē lue' ca da dxal-la' gunu'." <sup>11</sup> Benne' ca' zjácáleṅe' neda' belequé'ē na'a zeajntu' Damasco lawe' da bca'ana xi' na' neda' la chul-la.

<sup>12</sup> Zua na' tu benne' le' Ananías, benne' dxune' du lazre' ca naca da bdxixruj be'e Moisés, na' xúgute benne' judío zaj zre'ē Damasco dxelenné' cháwelle'ē ca dxune'. <sup>13</sup> Ananías na' ble'ē naga zua' neda', na' guzre' neda': "Bicha' Saulo, na'a xele'enu'." Lu zra ná'queze belé'etēda', ne ble'eda' benne' na'. <sup>14</sup> Nadxa guzre' neda': "Dios chee xra xrtáudxu guqué'ē lue' nédxute chee gúnbe'u ca naca da dxaca lazre' Le', ne chee le'enu' Benne' xrlátaje chee Dios, ne xennu' chi'i Bēnnea'. <sup>15</sup> Lue' guchálaju' da naca chee Le' lau ca naca bēnneache zaj zre'ē lu xezr la xu, ne guzennu' benne' ca' ca naca da blé'enu', ne da bennu'. <sup>16</sup> Na'a, ¿bizr chee na' dxezrenu'? Guxasa, gudxúa nisa, ne bxren lazre' chee Xránu' Dios chee cuee' dul-la chiu'."

<sup>17</sup> Gate bezrina' Jerusalén, guxá'a lu xudau' xea-jchálajleṅa' Dios, na' ble'eda' tu da ble'e Dios neda'. <sup>18</sup> Ble'eda' Xránadxu, na' guzre' neda': "Bdxuajche Jerusalén nigá lawe' da quebe xelez'í'ē ca naca da guchálaju' chia'." <sup>19</sup> Nadxa gucha' Le': Xran, zaj nézquezne' guxá'a neda' xúgute xu'u naga dxelezraga judío ca', ne xeaxri'a benne' ca' dxeléajle'ē chiu', na' bzra'a le' lizre xia, ne bzálajqueza' benne' ca', <sup>20</sup> na' gate belútiē' Esteban, benne' wēn zrin chiu', na' zéqueza' neda' naca' tuze nen benne' ca' belútiē' le'. <sup>21</sup> Xránadxu guzre' neda': "Guxíaj, lawe' da sel-la' lue' zitu' naga zaj zra' benne' quebe zaj naque' judío."

#### Da bēn benne' dxenná be'ē lu wedil-la

<sup>22</sup> Dizra' caní belenne', san lu dizra' nigá gulezú lawe' dxelebezre xē'ē, dxelenné':

—¿Gate benne' nigá! ¡Québedxa dxal-la' gaca banē'!

<sup>23</sup> Na' gulebezre xá'aqueze', ne buluzalē' sibe zra lanē', ne belequé'ē bxrte xu da buluzalē' sibe. <sup>24</sup> Chee le' na' benne' na' dxenná be'ē lu wedil-la gunná bé'ene' xelejú'ē Pablo lu xu'ula, ne xelu'ē le' chee nne' da li, bizr chee na' gulebezre xa'a benne' zan ca' chee le'.

<sup>25</sup> Gate bexuzre buluchéajē' na' Pablo, chee xelu'ē le', Pablo guzre' tu benne' dxeajē' wedil-la zue' na':

—¿Naca chee le' e güele tu benne' nababē' Roma, ne quebe ne guchí'ale aja naca chee'?

<sup>26</sup> Gate ben benne' dxeajē' wedil-la da nigá, na' guxíajē' xeahezre' benne' dxenná be'ē lu wedil-la:

—Guxúe xánniu' bi na' gunu', lawe' da nababa Roma benne' nigá.

<sup>27</sup> Nadxa benne' nigá gubiguē' naga zē Pablo, na' bchebe' le':

—¿Da li na' nababu' Roma?

Pablo bechebe':

—Awe'.

<sup>28</sup> Na' benne' dxenná be'ē lu wedil-la gunné':

—Neda' da zrente gudízruja' chee gubaba' Roma. Na' Pablo gunné':

—Neda' nabábaqueza' Roma gate gúlajtea'.

<sup>29</sup> Gate belenne' da nigá, na' benne' ca' ba zaj zē xelu'ē Pablo belexeuase' cuita le', na' la gaze benne' na' dxenná be'ē lu wedil-la, gate guque bé'ene' nababa Pablo Roma, bzrebe' lawe' da nuchéajē' le' du xia.

#### Pablo dxezrine' lau benne' xu'u lawe' blau ca' chee judío ca'

<sup>30</sup> Zra xula, benne' na' dxenná be'ē lu wedil-la guca lazre' nézene' bi chee na' dxelagu zria judío ca' Pablo, na' bequé'ē du xia na' nadxéaj na' Pablo, na' gunná bé'ene' xelezraga benne' xíchajē ca' chee bxruze, ne xúgute benne' xu'u lawe' blau. Nadxa guléajē' Pablo, na' bzē' le' lau benne' ca'.

**23** Pablo gunné'ē benne' xu'u lawe' blau ca', na' guzre' le':

—Le'e, bi bicha', ca naca xúgute da ba bēna' neda', zua zri xichaj lázrdawa' lau Dios.

<sup>2</sup> Nadxa Ananías, bxruze blau, gunná bé'ene' benne' zaj zē na' xelegapē' dxu'a Pablo. <sup>3</sup> Na' Pablo bechebe':

—Dios güe'ē lue', benne' dxun láweze da xrlátaje. Dxe'u na' chee guchi'u chia' neda' ca dxenná bea da nadxixruj bea Dios. ¿Bizr chee na' dxunu' da dxedába-ga da bdxixruje', dxenná be'enu' xelu'ē neda'?

<sup>4</sup> Benne' ca' zaj zre'ē na' gulé'ē Pablo:

—¿Caní schanni' dxennáu' chee bxruze blau chee Dios?

<sup>5</sup> Pablo gunné':

—Le'e, bi bicha', quebe gunezda' che benne' nigá naque' bxruze blau lawe' da dxenná lu xiche chee Dios: Quebe nneu' schanni' chee benne' dxenná be'ē lázriu'.

<sup>6</sup> Nadxa guque bé'ene' Pablo bal-le' benne' xu'u lawe' zaj naque' benne' saduceo ca', na' xebal-le' zaj naque' benne' fariseo ca', na' gunné' zizraj:

—Le'e, bi bicha', neda' naca' fariseo, ne xrtia' zaj nauē' fariseo ca', na' dxuchí'ale ca naca chia' lawe' da dxebeza lazra' xelexebán benne' gate.

<sup>7</sup> Gate gunná Pablo da nigá, na' benne' fariseo ca', ne benne' saduceo ca' gulezú lawe' dxulutil-la ljwezre' dizra', na' gulaca chupa la'a ca naca benne' ca'. <sup>8</sup> Ca'an guca lawe' da dxelenná saduceo ca' quebe xelexebán benne' gate, ne quebe nu chilá' gubáz chee xabáa ca', ne quebe nu chilá' bēnne'du xu'u bēnneache, san benne' fariseo ca' dxeléajle'ē dxata' xúgute da ca'.

<sup>9</sup> Xúgute' gulebezre xē'ē, na' gulezé bal-la benne' dxu-luxuzájle'ē da nadxixruj bea na, benne' zaj naque' fariseo, na' gulenné':

—Benne' nigá quebe bi da calela ne gunē'. Che nu bēnnedu xu'u bēnneache, u tu gubáz chee xabáa ba gunné' le', quebe dxal-la' nne'dxu chee Dios.

<sup>10</sup> Na' bulutíl-lalē'ē ljwezre' dizra', na' benne' na' dxenná be'ē lu wedil-la bzrebe' xelel-le' Pablo xuluzúruje' le'. Chee le' na' gunná bé'ene' benne' dxjaca wedil-la xelexebéajē' le' lálwela benne' ca', ne xelexeché'ē le' lu xu'u na' naga zaj zra' benne' dxjaque' wedil-la.

<sup>11</sup> Xela xula, Xránadxu ble'e lawe' Pablo, na' guzre' le':  
—Ben dipa lazru', Pablo, lawe' da ca bchálajquezu'  
chia' Jerusalén nigá, ca'an dxál-la'queze guchálaju'  
chia' lu xezre Roma.

### Zaj nun benne' judío ca xelunę' xelútię' Pablo

<sup>12</sup> Zra xula bal-la benne' judío ca' belunę' tuze dizra'  
xelútię' Pablo. Gulenné':

—Dios cu'ę dxi'u de' che bi xi'aj gágudxu, ne quebe  
ne gútedxu Pablo.

<sup>13</sup> Nadé chua benne' biu ca' zaj nachebe lazre' xelunę'  
da nigá. <sup>14</sup> Benne' caní xjaque' lau benne' xíchaję ca'  
cheę bxruze ca', ne benne' gula sina ca', na' gulenné':

—Netu' ba guchębe lázrentu' lau Dios cu'ę netu' de'  
che bi gáguntu', ne quebe ne gútentu' Pablo. <sup>15</sup> Na'a,  
le'e, ne xezícadxa benne' xu'u lawe' blau ca' dxal-la'  
nábale benne' dxenná be'ę lu wedil-la xedajlegüęę  
Pablo wxre zila laule le'e, xęle bėnnea' dxaca lázrele  
guchębe xánnele Pablo, na' netu' sę cuásantu' gúten-  
tu' le' quėbela ne xidę' nigá.

<sup>16</sup> Zri'ine bi zan Pablo benbe' ca naca da nigá, na'  
guxíajbe' naga zua Pablo cheajęzrebe' le'. <sup>17</sup> Nadxa  
Pablo gunné' tu benne' xu'u lu ne'ę benne' ca' dxjaque'  
wedil-la, na' guzre' le':

—Guchę' bi cuide' nigá lau benne' xíchaję chiu' lawe'  
da dę da dxal-la' xębe' le'.

<sup>18</sup> Na' benne' na' xu'u lu ne'ę benne' ca' dxjaque'  
wedil-la guchę'e-be' lau xranę', na' guzre' le':

—Pablo, bėnnea' nadxęaję' gunné' neda', na' gun-  
abe' xedajgu'a bi cuide' nigá naga zu' lawe' da dę da  
dxal-la' xębe' lue'.

<sup>19</sup> Benne' xíchaję na' guquęę na' bi cuide' na', na'  
guchę'e-be' chalá'ala, ne bchebe' be':

—¿Bi dxaca lazru' xu'u neda'?

<sup>20</sup> Na' gunná bi cuide' na', gúzrebe' le':

—Benne' judío ca' ba zaj nunę' tuze dizra' xelenabę'  
lue' chę'u Pablo wxre zila lau benne' xu'u lawe' blau  
ca', xelenné' dxelaca lazre' xuluchębe xánnię' le'.

<sup>21</sup> Quebe chęajlę'u cheę benne' ca' lawe' da nadé chua  
benne' ca' xelebeze' le' bagácheze, ne ba gulechębe  
lazre' lau Dios Le' cu'ę benne' ca' de' che bi xele'aj  
xelawę', ne quebe ne xelútię' Pablo. Na'a ba zaj zuę'  
dxelebeze' xrtizru'.

<sup>22</sup> Nadxa benne' xíchaję na' bze' bi cuide' na' dizra',  
na' guzre' be' quebe nu xębe' ba xęajęzrebe' le' caní.

### Dxelesel-le' Pablo lau Félix, benne' xu'u lu ne'ę xezr la xu na'

<sup>23</sup> Benne' xíchaję na' gunné' chupa benne' cheę',  
benne' xu'u lu ne'ę benne' ca' dxjaque' wedil-la, na'  
gunná bė'ene' le' xulucueze' chupa gaxúa benne' dx-  
jaque' wedil-la, benne' sa'aca ni'ę, ne ga xun chi benne'  
dxjaque' wedil-la, benne' xelebía bzrina', ne chupa  
gaxúa benne' dxjaque' wedil-la, benne' xelu'ę xia tun-  
na, cheę chjaque' lu xezre Cesarea dxedá' ga chizrela.

<sup>24</sup> La gázqueze gunná bė'ene' xulucueze' bzrina' cuía  
Pablo, ne gunná bė'ene' xelechęę le' cháwedau' lau

Félix, benne' xu'u lu ne'ę xezr la xu na' waláz cheę Ro-  
ma. <sup>25</sup> Gusel-le' tu xiche da belúa benne' dxjaque'  
wedil-la. Caní naxúaj na:

<sup>26</sup> Neda' Claudio, dxugapa' lue' diuzre Félix, benne'  
xu'u lu na'u xezr la xu nigá. <sup>27</sup> Benne' judío ca' gulę-le'  
benne' nigá ná'tega na'a cheę xelútię' le'. Gate gunez-  
da' neda' nababę' Roma, na' guxíajlęna' benne' chia'  
ca', benne' dxjaque' wedil-la, xęajselá' le'. <sup>28</sup> Guca lazra'  
nezda' bi dxelagu zria le', na' guchę'a le' lau benne'  
xu'u lawe' ca' cheę judío ca'. <sup>29</sup> Na' gunezda' dxelagu  
zria le' da naca cheę da nadxixruj bea cheę judío ca',  
san quebe naca na cheę xelútię' le', ne cheę chu'ę lizre  
xia. <sup>30</sup> Gate benda' ca ba zaj nun judío ca' cheę xelútię'  
le', na' dxusel-la' le' naga zu', ne ba gucha' benne' ca'  
dxelagu zria le' waca xelawę' le' zria lau lue'. Gaca xrlá-  
taje chiu'.

<sup>31</sup> Nadxa benne' dxjaque' wedil-la belunę' ca gunná  
be'e benne' xíchaję cheę', na' belechęę Pablo chizrela,  
na' belezrinę' xezre Antípatris. <sup>32</sup> Zra xula benne' dxjaca  
wedil-la, benne' ca' dxeledá' ní'aze, belexezrinę'  
Jerusalén, na' benne' dxjaque' wedil-la zaj zrię' bzrina'  
belechęę Pablo naga dxal-la' zrinę'. <sup>33</sup> Gate belezrinę'  
xezre Cesarea, na' bulunézruję' benne' xu'u lu ne'ę xezr  
la xu na' xiche na', ne buludęę' Pablo lu ne'ę. <sup>34</sup> Ca bex-  
uzre blabę' xiche na', na' benne' xu'u lu ne'ę xezr la xu  
na' bchebe' ga benne' Pablo. Gate benne' naque'  
benne' cheę xezre nababa Cilicia, <sup>35</sup> na' guzre' le':

—Guchi'a cheę da dxaca chiu' gate xeledá' benne' ca'  
dxelagu zria lue'.

Nadxa gunná bė'ene' cha benne' dxjaca wedil-la xu-  
luxúę' Pablo naga zua xu'u lawe' cheę Herodes.

### Pablo dxuzri'ę dizra' da dxácale na le' lau Félix

**24** Ca gudé gazxu' zra, Ananías, bxruze blau,  
bzrinę' xezre Cesarea nen bal-la benne' gula sina  
ca', ne tu benne' dxenné' waláz cheę benne' ca', le' Tér-  
tulo. Benne' caní belezrinę' lau benne' xu'u lu ne'ę xezr  
la xu na' cheę xelagu zria Pablo. <sup>2</sup> Gate xęajlexríę'  
Pablo, na' guzú lau Tértulo dxawę' xria Pablo, dxęę  
Félix:

—Xcalenu' lue', benne' xu'u lu na'u xezr la xu nigá,  
lawe' da zúantu' xel-la' dxebeza zri lazre', na' da chawe'  
dxgua dxaca na cheętu', na' ca dxenná be'enu' netu'  
lu xel-la' sina chiu' dxexedxúaj na chawe'. <sup>3</sup> Xúgutę da  
nigá dxezí'queze lu na'ntu' gátetęze na', ne dxętu' lue'  
xcalén cuinu', Félix. <sup>4</sup> Cheę quėbedxa guntu' lue' zėde-  
tę, dxata' xueda' lue' gun zren lazru' xennu' cheętu'  
tu chí'idau'. <sup>5</sup> Dxenná'antu' benne' nigá dxúnlęę da  
calela, ne gátetęze na' lu xezr la xu nigá dxunę' benne'  
judío chupa la'a, ne naque' benne' xíchaję cheę benne'  
ca' zaj da' tu benne' Nazaret. <sup>6</sup> Benne' nigá guca lazre'  
guzúę' chalá'ala xudau' cheętu', na' netu' gudęl-lantu'  
le', ne guca lázrentu' guchí'antu' da naca cheę' ca  
nadxixruj bea na cheętu'. <sup>7</sup> Na' Lisias, benne' dxenná  
be'ę lu wedil-la, bequęę le' lu na'ntu' xadía. <sup>8</sup> Na' gun-  
né' che zaj zra benne' xelagu zrię' Le', dxal-la' xelelęę  
lau lue'. Lue' gaca guchębu' benne' nigá, na' nėzenu'  
naca da li zria dxáguntu' le'.

<sup>9</sup> Benne' judío ca' zaj zře'ę na' gulenné' naca da li xúgute' da ca'. <sup>10</sup> Nadxa benne' xu'u lu ne'ę xęzr la xu na' guchisa ne'ę cheę guchalaj Pablo, na' gunná Pablo:

—Dxebéle'ęda' dxunu' neda' lataj xecheba' lau lue', lawe' da nezda' naca xrlátaje ca dxuchi'u da dxaca cheę xęzr la xu cheętu' ba zeaj zane' iza. <sup>11</sup> Lué'queze waca chéajni'inu' ba zeaj chazrinnu zraze bla'a Jerusalén cheę güe lá'ana' Dios. <sup>12</sup> Quebe belelé'ęne' neda' nu gutil-la' dizra', ne quebe nu benne' guché'ena' zraga lu xudau' blau, ne lu xezícala xu'u ca', ne lu neza ca' cheę xęzre na'. <sup>13</sup> Benne' caní quebe xelezéquene' xululé'ęne' naca da li ca zaj naca da dx-elawę' neda' zria. <sup>14</sup> Tu da dxexechęba', dxucá'ana szrena' Dios cheę xra xrtáudxu ca', dxuna' ca da dxelenná benne' caní naca na da węn lazre', lawe' da dxéajle'a xúgute' da naxúaj na lu xiche cheę da nadxixruj bea na, ne cheę benne' ca' buluchálaje' waláz cheę Dios. <sup>15</sup> Neda' dxebeza lázrqueza' ca da gun Dios, ca dxelebeza lazre' benne' caní, dxebeza lázrentu' Dios gusebanę' benne' gate ca', benne' xrlátaje, ne benne' ca' dxelunę' da calęla. <sup>16</sup> Cheę le' na' dxue lazra' sua zri xi-chaj lázrdawa' lau Dios, ne lau bęnneache ca'.

<sup>17</sup> Ca gudé gudá' xęzre xula ca' zane' iza, na' bezrina' lazria' cheę gunézruja' da gácalę na benne' xache' ca', ne cu'a guna' lau Dios. <sup>18</sup> Da nigá dxuna' neda' gate bal-la benne' judío cheę xęzre ca' zaj nababa Asia belexezraguę' neda' lu xudau' ca gudé bca'ana chawe' cuina' cáteze naca da zéajlętu', san quebe nu benne' bchaga', ne quebe nu benne' guché'ena' zraga. <sup>19</sup> Benne' caní dxal-la' xelélé'ę nigá cheę xelawę' neda' zria che bi zua dxelaca cheę' nen neda', <sup>20</sup> san che quebe bi dę, na' benne' caní zaj zře'ę nigá dxal-la' xelenné' che bi belezréne' da dxebaga' gate zua' lau benne' xu'u lawe' blau ca' cheę judío ca'. <sup>21</sup> Tuze da bęna' gate zua' lau benne' ca', gunnéa' zizraj: Na'a dxuch'ále chia' lawe' da dxeajlí lazra' xelexebán benne' gate.

<sup>22</sup> Gate Félix benne' da nigá, na' bca'ane' na cá'aze lawe' da neze xanne' le' ca naca cheę benne' ca' dx-eléajle'ę cheę Jesús, na' guzre' benne' ca':

—Gate xida Lisias, benne' dxenná be'ę lu wedil-la, na' chéajni'idxeda' cheę da nigá dxaca cheęle.

<sup>23</sup> Nadxa Félix gunná bé'ęne' benne' dxenná be'ę lu wedil-la, ne benne' ca' dxenná be'ęne' xelexegu'ę Pablo lu xu'u lawe' na', na' xelu'ę le' lataj bi gunę', ne xelu'ę lataj benne' ljwezre Pablo cheajlenné'ę le', ne bi xelunę' cheę'.

<sup>24</sup> Gudé tu chupa zra Félix belé'ę xetú nen zru'ule' Drusila, nu'ula judío, na' gunná bé'ęne' bzin Pablo cheę guchálajlęne' le' ca naca xel-la' dxeajlí lazre' cheę' cheę Jesucristo. <sup>25</sup> Gate Pablo bchálajlęne' le' ca dxal-la' gundxu da xrlátaje, ne nna be'e cuínadxu, na' zrin zra guchi'a Dios cheędxu gate cheajsé cheę xęzr la xu, na' bzrebe Félix, ne guzre' Pablo:

—Bexíaj na'a. Gate nalátaja', na' nnéqueza' lue'.

<sup>26</sup> La gaze dxaca lazre' Félix gunezruj Pablo le' dumí cheę gusanę' le'. Cheę le' na' gunnéle'ę Pablo cheę guchálajlęne' le'. <sup>27</sup> Ca' guca, gudé chupa iza, na' Félix

bedxúaje' xrlátaje' ga xu'u lu ne'ę xęzr la xu na', na' bedé tu benne' le' Porcio Festo waláz cheę Félix. Félix bca'ane' Pablo lizre xia lawe' da guca lazre' xegá'ane' chawe' lau judío ca'.

### Pablo dxexechębe' lau Festo

**25** Nadxa Festo bzrine' xęzre Cesarea cheę si' lu ne'ę gaquę' benne' xu'u lu ne'ę xęzr la xu na', na' gate guca chunna zra, guxíaje' Jerusalén. <sup>2</sup> Lu xęzre na' belezrín benne' xíchaję ca' cheę bxruze ca', ne benne' judío blau ca' lau le', ne gulawę' zria Pablo. <sup>3</sup> Gulata' xuene' benne' xu'u lu ne'ę xęzr la xu na' sel-le' benne' cheajlexezri'ę Pablo cheę xęzrine' Jerusalén. Benne' judío ca' ba zaj nunę' xelútię' Pablo la neza gate zezé'ę na'. <sup>4</sup> Bechebe Festo ba xu'u Pablo lizre xia lu xęzre Cesarea, na' léqueze' ba nunę' chéaję' na' xetú chupa zra. <sup>5</sup> Na' guzre' benne' ca':

—Benne' ca' zaj zře'ę lówela le'e, benne' zaj nape' xel-la' dxenná bea, dxal-la' chjácálęne' neda' Cesarea, na' che benne' na' zua bi da calęla da bęne', waca gágule le' zria.

<sup>6</sup> Festo begá'ane' Jerusalén ca du xrunu' ga chi zraze, na' bezrine' Cesarea. Zra xula gudxé'ę lataj blau cheę', ne gunná bé'ęne' xeajlexrí'ę Pablo. <sup>7</sup> Gate bzin Pablo lau benne' xu'u lu ne'ę xęzr la xu na', na' gulebiga judío ca' zá'aca Jerusalén, ne gulágule'ę zria Pablo, san quebe guca xululé'ęne' naca na da li. <sup>8</sup> Nadxa Pablo bechebe' waláz cheę', gunné':

—Neda' quebe bi da calęla ne guna', quegá cheę da nadxixruj bea cheę judío ca', ne quegá cheę xudau' cheę', ne quegá cheę César.

<sup>9</sup> Festo guca lazre' xegá'ane' xrlátaje lau benne' judío ca', na' bchebe' Pablo:

—¿Dxaca lazru' chéaju' Jerusalén cheę guchi'a neda' ca naca chiu' na'?

<sup>10</sup> Pablo bechebe':

—Zua' lau xu'u lawe' da nuzúa César naga dxal-la' zri'a ca naca chia'. Lue' nézqueznu' quebe bi da zrinnaj ne guna' cheę benne' judío ca'. <sup>11</sup> Che ba bęna' tu da zrinnaj da dxun na gútele neda', waca gútele neda'. Che quebe bi dę naca na da li ca naca zria da dxelawę' neda', quebe nu napa xel-la' dxenná bea gudé'ę neda' lu na' benne' ca'. Dxenaba' zri'a chia' lau César.

<sup>12</sup> Ca gudé bchálajlęne' benne' dxuluzéajni'i le', na' Festo guzre' Pablo:

—Ba gunabu' zri'a chiu' lau César. Chéaju' lau César.

### Pablo dxezrine' lau Agripa, benne' wenná bea

<sup>13</sup> Ca gudé zane' zra Agripa, benne' wenná bea, ne bi zane' belezrine' Cesarea cheę xulugape' Festo diuzre.

<sup>14</sup> Gulezúę' na' tu chupa zra, na' Festo bzenne' Agripa, benne' wenná bea na' ca naca cheę Pablo. Guzre' le':

—Zua tu benne' nigá, benne' bca'ana Félix lizre xia.

<sup>15</sup> Gate guzúa' xęzre Jerusalén, na' benne' xíchaję ca' cheę bxruze ca', ne benne' gula sina ca' cheę judío ca' gulenné' cheę benne' nigá, ne gulenabe' neda' chuga' cheę' gatie'. <sup>16</sup> Neda' becheba' benne' ca', gunniá'

benne' xu'u lawe' chee Roma quebe nu benne' dx-  
elechugue' chee' gatie' che quebe zrine' lau benne' ca'  
dxelawe' le' zria chee xechebe' waláz chee'. <sup>17</sup> Chee le  
na', gate belelá' benne' ca' nigá, quebe guzreda', na'  
zra xula gudxe'a lataj blau chia', ne gunná be'eda' bla'  
benne' na'. <sup>18</sup> Benne' ca' gulawe' le' zria quebe bi gu-  
lenné' chee' ca da gúqueda' neda'. <sup>19</sup> Laze láweze da  
gulenné' chee' naca na ca naca da dxeléajle'e chee  
Dios, ne chee tu benne' le' Jesús, benne' gute, san  
dxenná Pablo naca bane'. <sup>20</sup> Quebe bezréleda' ájala gu-  
na' chee da na', na' bcheba' Pablo che dxaca lazre'  
chéajje' Jerusalén chee zri'a ca naca chee' na'. <sup>21</sup> Nadxa  
le' gunabe' zri'a chee' lau César Augusto, na' gunná  
be'eda' xegá'ane' lizre xia cadxa séqueda' sel-la' le' lau  
César.

<sup>22</sup> Nadxa gunná Agripa, dxé'e Festo:

—La gaze neda' dxaca lazra' xenda' chee benne'  
nigá.

Na' bechebe Festo:

—Wxre xennu' chee'.

<sup>23</sup> Zra xula, gate belezrín Agripa, ne Berenice ga na',  
belú'e lu duté xel-la' szren nen benne' dxenná be'e lu  
wedil-la, ne benne' blau ca' chee xezre. Na' Festo gun-  
ná bé'ene' xejlexrí'e Pablo, <sup>24</sup> na' gunné':

—Agripa, benne' wenná bea, ne le'e, nazrágale nigá  
nen netu'. Nigá zua benne' na'. Benne' zan, benne'  
judío zaj zre'e Jerusalén, ne benne' zaj zre'e Cesarea  
nigá, gulenné' chee' benne' nigá, na' tu gulézqueze' ne-  
da' dxal-la' gatie'. <sup>25</sup> Neda' dxéqueda' quebe bi bene'  
da gudé na le' gatie', san léqueze' gunabe' zri'a chee'  
lau César. Chee le' na' ba nuna' chee' sel-la' le' lau  
César. <sup>26</sup> Quebe bi de da guzúaja' chee Xrana' César ca  
naca chee' benne' nigá. Chee le' na' dxuzúa' benne'  
nigá laule le'e, ne da naca bláunqueze, dxuzúa' le' lau  
lue', wenná bea Agripa, chee guchebu' le' chee gata'  
late' da guzúaja' ca naca chee'. <sup>27</sup> Dxéqueda' quebe  
naca chawe' sel-la' tu benne' nadxéajje' du xia, ne  
quebe nnia' bi da zria nape'.

**Pablo dxexechebe' lau Agripa, benne' wenná bea**

**26** Nadxa gunná wenná bea Agripa, guzre' Pablo:  
—Waca xechebu'.

Na' Pablo guchisa ne'e, ne guzú lawe' dxuchálaje',  
dxenné':

<sup>2</sup> —Dxebéle'eda' dxunu' neda' lataj dxuchálaja' lau  
lue', wenná bea Agripa, chee xecheba' ca da gulenná  
benne' judío chia' neda', <sup>3</sup> ne da naca blaudxa, lawe' da  
nézqueznu' lue' ca naca da zéajlentu' netu', benne'  
judío ca', ne ca naca dizra' dxutil-la ljwézrentu'. Chee le'  
na' dxenaba' lue' xennu' chia' duté xel-la' zren lazre'  
chiu'.

<sup>4</sup> Xúgute benne' judío ca' zaj nézene' ca bēna' lazria',  
ne lu xezre Jerusalén gate nácatea' bidau'te. <sup>5</sup> Zaj  
nézqueze benne' ca', ne waca xelxechebe' che dxela-  
ca lazre', ca nácatea' benne' cuide'te, naca' fariseo.  
Benne' fariseo ca' zjácalēdxē' ca naca chee' da dxeléajle'  
judío ca' chee' Dios. <sup>6</sup> Na'a lawe' da dxebeza lazra' guse-  
bán Dios benne' gate ca', ca guchebe lazre' chee xra

xrtáuntu' ca', benne' ca' buluzúe' neda' lau xu'u lawe'.  
<sup>7</sup> Dxelebeza lazre' chazrinnu cue' zri'ine zre sua Israel  
xelélé'ene' gaca ca naca da nigá guchebe lazre' Dios,  
na' chee le' na' dxulucá'ana szrene' Dios, ne dxelune'  
zrin chee' te zra ne chizrela. Na'a, wenná bea Agripa,  
benne' judío ca' dxelawe' neda' zria lawe' da dxebeza  
lazra' ca naca da caníqueze da nachebe lazre' Dios.

<sup>8</sup> ¿Quebe dxéajle'u gusebán Dios benne' gate ca'?

<sup>9</sup> 'Néda'queza' nédxute' gúqueda' da zan da dxal-la'  
guna' chee' benne' ca' dxeléajle'e chee Jesús, benne'  
Nazaret. <sup>10</sup> Caní bēna' lu xezre Jerusalén. Lu xel-la'  
dxenná bea chee' benne' xíchaje' ca' chee bxruze ca',  
benne' zan bzra'a lizre xia, benne' dxeléajle'e chee  
Jesús, na' gate belúti'e' benne' ca' neda' bēnqueza' tuze  
benne' ca' belúti'e' le'. <sup>11</sup> Zane' lásate' bdea' benne' ca'  
ba xa' chee xulusane' xel-la' dxeleajl' lazre' chee'. Caní  
bēna' xúgute' lu xu'u ca' naga dxelezraga judío ca', na'  
lu xel-la' dxezrá'a chia' benne' ca', gudáu zi' xuzra'  
benne' ca' zaj zre'e lu xezre zitu' ca'.

<sup>12</sup> 'Chee' guna' da nigá zexá'a xezre Damasco, zaj  
nasel-la benne' xíchaje' ca' chee bxruze ca' neda' nen  
xel-la' dxenná bea chee'. <sup>13</sup> Ca zexá'a xu'a neza na', du  
wagubizra ble'eda' tu xi' da za' xabáa da nácadxa ca  
xel-la' dxenná' chee' gubizra, na' gusení na naga zexá'a  
neda' nen benne' zjácalēne' neda'. <sup>14</sup> Nadxa xúgute'ntu'  
xeajcházentu' lu xu, na' bēnda' chi'i tu benne' gunné'  
dizra' hebreo, guzre' neda': "Saulo, Saulo, ¿bizr chee'  
na' nau zi' xuzru' neda'? Lue'ze dxun zi' cuinu' ca dxun  
bezre gate dxulíbeba' lawe' xágala da dxáduē'-ba'."

<sup>15</sup> Nadxa gunnéa': ¿Nuzra Lue', Xran? na' Xránadxu  
guzre' neda': "Neda' naca' Jesús, bēneea' nau zi' xuzru'."

<sup>16</sup> Bexasa, guzē, lawe' da ble'e lawa' lue' chee' gunu'  
zrin chia', ne chee' xechebu' ca naca da ba blé'enu', ne  
ca naca da za le'enu' gate te na'a. <sup>17</sup> Guselá' lue' lu na'  
benne' judío ca', ne lu na' benne' zitu' ca' naga dxusel-  
la' lue' na'a. <sup>18</sup> Dxusel-la' lue' lau benne' ca' chee' sálaju'  
xij lau benne' ca' chee' xulusane' da naca chee' da  
chul-la, na' xelune' da naca chee' xel-la' naxaní', ne  
chee' xelaxedxúaje' lu na' da xriwe', ne xelxú'e lu na'  
Dios, ne chee' xeléajle'e chia' neda', na' xunite lau Dios  
ca naca dul-la chee', ne gaca chee' tu da xelape' lówela  
benne' ca' ba gucá'a Dios."

<sup>19</sup> 'Ca' guca, wenná bea Agripa. Bzua' dizra' ca naca  
da ble'e Dios neda' da naca chee' xabáa. <sup>20</sup> Nedxu  
bchálaja' dizra' chee' Dios lau benne' zaj zre'e xezre  
Damasco, na' gudé na' lau benne' zaj zre'e Jerusalén,  
ne ca naca naga nababa Judea, ne lau benne' ca'  
quebe zaj naque' judío. Gucha' benne' ca' dxal-la'  
xelxebí'i lazre', ne xelxexaque' chee' Dios, na' xelune'  
da xelunna bea na ca da ba zaj naque'. <sup>21</sup> Chee le' na'  
benne' judío ca' gulel-le' neda' lu xudau', ne gulaca  
lazre' xelúti'e' neda'. <sup>22</sup> Dios dxácalēne' neda', na' ze  
chúchuqueza' lu zra na'a zra, dxuchálajlēna' xúgute'  
benne' ca naca chee' Dios, benne' cá'aze ca', ne benne'  
blau ca'. Dxapa' benne' ca' tuze ca naca da gulenná  
benne' ca' buluchálaje' waláz chee' Dios, ne da gunná  
Moisés dxal-la' gaca. <sup>23</sup> Gulenné' Cristo dxal-la' si'  
saque', na' ca te gatie' dxal-la' xebane' ládujla benne'



gate nédxudxa ca xúgutę benne' ca', na' gulenné' xelén benne' judío ca', ne benne' quebe zaj naque' judío ca naca cheę xel-la' naxaní' cheę Dios, da dxulé'e na le' ca gaca xelexé'.

**Pablo dxaca lazre' guzėjni'ine' Agripa gaque' benne' cheę Cristo**

<sup>24</sup> Gate gunná Pablo da caní, na' gunná zizraj Festo: —Nadá xichaj lázrda'u, Pablo. Lawe' da dxusédele'u, na' nadá xichaj lázrda'u.

<sup>25</sup> Pablo bechebe': —Quebe nadá xichaj lázrdawa', dxapa' cuinu' Festo. Da dxenné'a naca na da gaca chéajlędxu, ne da li. <sup>26</sup> Nigá zua wenná bea Agripa. Nézele'ęne' ca naca cheę da caní, na' cheę le' na' dxuchálaja' dutę xel-la' dxuxrén lazre' chia' lawe'. Nézquezda' le' nézene' ca naca da nigá lawe' da dxuchálaja' ca naca cheę da quebe guca na bagácheze. <sup>27</sup> ¿Dxéajle'u lue', wenná bea Agripa, ca naca da gulenná benne' ca' buluchálaje' waláz cheę Dios? Nezdá' dxéajle'u.

<sup>28</sup> Nadxa gunná Agripa: —Xeláteze guzėjni'inu' neda' gaca' cheę Cristo.

<sup>29</sup> Nadxa gunná Pablo: —Che xeláteze u che da zrendxa dxenaba' gun Dios, quegá lue'ze, san cá'anqueze xúgutę benne' dxellenę' chia' na'a, xelaque' ca néda'queza', san quebe xeledxéaje' du xia.

<sup>30</sup> Ca gudé gunná Pablo da nigá, na' gulexasa wenná bea, ne benne' xu'u lu ne'e xęzr la xu na' tu zren nen Berenice, ne xúgutę benne' ca' zaj dxe'e na'.

<sup>31</sup> Belexedxúaje' cheęze' cheę xuluchálajle' ljwezre' ca naca cheę da nigá. Na' gulenné', dxelé' ljwezre':

—Benne' nigá quebe bi da calęla ne gunę' da gudé na le' gatię', ne quebe dxal-la' chu'e lizre xia.

<sup>32</sup> Na' gunná Agripa, guzre' Festo:

—Waca gusandxu benne' nigá chela quebe gunabe' zri'a cheę' lau César.

**Dxelesel-le' Pablo lu xęzre Roma**

**27** Gate ba zaj nune' xelesel-le' netu' lu xęzr la xu Italia, na' Pablo, ne xezícala benne' ca' zaj zre'e lizre xia, buludé'e le' lu na' tu benne' dxenná bé'ene' lu wedil-la le' Julio, benne' yu'u lu ne'e tu cue' benne' dxjaque' wedil-la nazí le na Benne' Cheę Augusto Dxjaque' Wedil-la. <sup>2</sup> Na' guxú'untu' tu lu da dxedá lawe' nísadau' cheę xęzre Adramitio, da ba zua te na xęzre-du ca' cheę ga nababa Asia. Zúalequeze Aristarco netu', tu benne' xęzre Tesalónica cheę ga nababa Macedonia. <sup>3</sup> Zra xula bzrintu' xęzre Sidón, naga Julio bęnle'e da chawe' cheę Pablo, na' be'e le' lataj xejjnne'e bi bíchedxu ca' cheę bi belune' cheę'. <sup>4</sup> Gate beza'ntu' xęzre Sidón, na' gudentu' naga dxe' xęzr la xu Chipre da naxechaj nísadau'. Blé'entu' na chalá'a xęglala lawe' da dxaca be' da quebe dxue na da dxedá lawe' nísadau' lataj cheaj na lizra lidau'. <sup>5</sup> Gudentu' lu nísadau' le nna' xęzre ca' zaj nababa Cilicia, ne Panfilia, na' bzrintu' xęzre Mira da nababa Licia.

<sup>6</sup> Lu xęzre na' benne' dxenná be'e lu wedil-la bezrague' tu da dxedá lawe' nísadau' cheę xęzre Alejandro da zeaj na xęzr la xu Italia, na' bzre'e netu' lawle cheę zeajntu' Italia na'. <sup>7</sup> Zane' zra zėjntu' chawe' lazre', na' stébele'e bzrintu' le nna' xęzre Gnido. Lawe' da ne za be' na' dxedábaga na da dxedá lawe' nísadau', na' gudentu' le nna' Salmón, ne guxéchajntu' naga dxe' xęzr la xu Creta da naxechaj nísadau'. <sup>8</sup> Stébele'e gudentu' chalá'ala naga dxe' Creta na', na' bzrintu' tu xęzredau' nazí le na Buenos Puertos, da zua gagu naga zua xęzre Lasea.

<sup>9</sup> Záne'tę zra bnítentu' xu'untu' da dxedá lawe' nísadau' na', na' ba naca stębe zėjntu' lu nísadau' na' lawe' da ba dxexú'udxu beu' zaga. Cheę le' na' bzėjni'i Pablo benne' ca'. <sup>10</sup> Dxenné':

—Le'e, benne', dxelé'eda' wácale'e stębe naga zéajdxu na'a, na' wabía xi' da dxedá lawe' nísadau' nigá ne xua da nua na, na' zrúzetę cuía xidxu dxí'u.

<sup>11</sup> Benne' dxenná be'e lu wedil-la guxéajlędxę' cheę xrane da dxedá lawe' nísadau' na', ne cheę benne' xu'u na lu ne'e, ca cheę Pablo. <sup>12</sup> Na' lawe' da quebe naca lataj na' chawe' súadxu na' beu' zaga ca', na' xúgutę' guléquene' nácadxa chawe' xezá' da dxedá lawe' nísadau' na' cheę xexéaj na Fenice, tu xęzre cheę Creta na', da dxe' chalá'a cheę xęzr la xu Creta naga dxebía gubizra, na' xegá'anadxu na' beu' zaga ca'.

**Dxaca be' bdunu' lu nísadau'**

<sup>13</sup> Nadxa guzú lau dxaca lase be' da za' chalá'a naga dxedé gubizra beu' zaga, na' guléquene' waca chéajtęzentu' lu nísadau', na' gudentu' gáguze lu xęzr la xu Creta na'. <sup>14</sup> Nadxa chíteze guca guzú lau dxácale'e be' bdunu' da za' chalá'a ga za' be' zaga. <sup>15</sup> Be' na' guzú lau dxuzriga na chalá'ala da dxedá lawe' nísadau' na', na' lawe' da québedxa guca chéajdxantu' naga za' be' na' bęn na ba xen bęntu' lataj bzriga na da dxedá lawe' nísadau' na'. <sup>16</sup> Na' gudentu' cúzrela tu xęzr la xudau' naxechaj nísadau' da nazí le na Clauda, naga québedxa dxácatę na be' na' wal-la, na' stébele'e gúquentu' bcuentu' da dau' da dxedá lawe' nísadau' da nazrube xu da zren na' xu'untu', na' bzuantu' na lu da zren da dxedá lawe' nísadau' na'. <sup>17</sup> Ca gudé bulucuenę' da dau' na', na' buludé'e du zri'a ca' zran da dxedá lawe' nísadau' na' da xeluxru chacha na. Nadxa, lawe' da belezrebe' chaze da dxedá lawe' nísadau' na' lu xuzre' naga nazí le Sirte, na' bululétaje' ladxe' ca' da dxelecá'a be' lu da dxedá lawe' nísadau' na', na' belúe lataj be' na' bzriga na len. <sup>18</sup> Zra xula, lawe' da ne dxácale'e be' bdunu', gulezú lawe' dxeledxú'une' xua ca' lu nísadau', da nua da dxedá lawe' nísadau' na'. <sup>19</sup> Zra guxunne' zra nen ná'quezentu' gudxú'unantu' lu nísadau' da dxuluchínene' cheę da dxedá lawe' nísadau' na'. <sup>20</sup> Zane' zra quebe blé'entu' gubizra ne belaj ca', ne ca naca be' bdunu' zren na' ne dxuzriga na da dxedá lawe' nísadau' na', na' québedxa guleza lázrentu' láquezentu'.

<sup>21</sup> Zane' zra gudentu' quebe náguntu', na' guzé Pablo lávela benne' ca', ne gunné':

—Le'e, benne', cháwedxa la guca cheedxu la benle da gucha' le'e, na' quebe bedxúajdxu lu xęzr la xu Cre-ta, ne quebe bi guque da dxedá lawe' nísadau' nigá, na' xua' da nua na quebe guzrí'a xi'. <sup>22</sup> Na'a, quebe guchebe lázrele. Netudxu dxi'u quebe cuía xidxu, lácala cuía xi' da dxedá lawe' nísadau' nigá. <sup>23</sup> Ba dxęle ble'e lau tu gubáz cheę xabáa cheę Dios neda'. Naca' cheę Dios nigá ne dxuna' zrin cheę'. <sup>24</sup> Gubáz na' guzre' neda': "Quebe zrebu', Pablo, lawe' da dxun na ba xen zrinu' lau César, na' ne' chiu' lue' Dios guselé' lu xel-la' gute xúgutę benne' zaj zra' nen lue' lu da dxedá lawe' nísadau' nigá." <sup>25</sup> Cheę le' na', benne', le gun dipa lázrele, lawe' da dxuxrén lazra' Dios, ne nezda' waca ca gunná gubáz cheę xabáa na' bchálajlęne' neda'. <sup>26</sup> Na'a dxun na ba xen cheajchaze da dxedá lawe' nísadau' nigá tu lu xęzr la xu da naxečaj nísadau'.

<sup>27</sup> Ca gudé chinu' zra gate naca chizrela, ne zrantu' lu nísadau' nazí le na Adria, na' be' na' dxaca dxuzriga na da dxedá lawe' nísadau' quela ca'ala, na' dxęla guleque be'e benne' ca' dxulusá da dxedá lawe' nísadau' na' ba dxezrín na dxu'a xu bizre. <sup>28</sup> Na' buludxixre' cáttite situj dxę' nisa na', na' dxę' na galaj esa. Na' xetú chí'idau' gudé buludxixre' da xula, na' dxę' na chinu' ésaze.

<sup>29</sup> Belezrebe' cheajtá da dxedá lawe' nísadau' na' xiaj, na' buluzalę' tapa xia da nácalę'e zii' zran nisa zeaj zranla da dxedá lawe' nísadau' na', na' gulebeze' chaní dudxuze dxelezrebe'. <sup>30</sup> Nadxa benne' ca' dxulusá da dxedá lawe' nísadau' na' gulęquene' selexedxúaje' lu da dxedá lawe' nísadau' na', na' gulezú lawę' dxululę-taje' da dau' na' zria lawe' da zren na' dxedá lawe' nísadau', dxelunę' ca benne' xuluzáladxa xia da guxrú na da dxedá lawe' nísadau' zren na' da zeaj laula na. <sup>31</sup> Pablo bzenne' benne' dxenná be'e lu wedil-la, ne benne' dxjaque' wedil-la, dxennę':

—Che quebe xelegá'ana benne' caní lu da dxedá lawe' nísadau', quebe lale le'e.

<sup>32</sup> Nadxa benne' dxjaque' wedil-la gulechugę' du zri'a da nadxęaj da dau' na', na' belú'e na lataj bexruj na lu nísadau'.

<sup>33</sup> Ca guxanísise' bzęajni'i Pablo xúgutę benne' ca' dxal-la' xelawę' xeta, gunné':

—Ba zeaj chinu' zra quebe dxásele ne quebe dxágule. <sup>34</sup> Dxata' xueda' le'e gágule. Da nigá dxun na ba xen cheę lale. Netudxu dxi'u quebe cuía xi' netú xicha xíčajdxu.

<sup>35</sup> Ca gunné' caní, Pablo guquę'e tu xeta xtila, na' guzre' Dios: "Xcalenu'", lau xúgutę benne' ca'. Nadxa bzúzruje' na, na' guzú lawę' dxawę'. <sup>36</sup> Nadxa xúgutę' belún dipa lazre', na' gulezú lau dxelawę'. <sup>37</sup> Cáttite netu' zrantu' lu da dxedá lawe' nísadau' na' nácantu' chupa gaxúa ga xun chinu' tuntu'. <sup>38</sup> Ca gudé gulawę' cáttite guléljene', na' buluzalę' zrua' xtila lu nísadau' cheę bezrá' da dxedá lawe' nísadau' na'.

#### Dxebía xi' da zren da dxedá lawe' nísadau'

<sup>39</sup> Gate guxaní, benne' ca' dxulusá da dxedá lawe' nísadau' na' quebe belexúnbe'e xęzr la xu na' da zua na le nna' naga zaj zre'e. Belelé'ene' naga dxexú'u

nísadau' gachaj lówela xęzr la xu na', na' dxu'e na' naca lache'. Na' gulaca lazre' xuluxudęe' da dxedá lawe' nísadau' laduj na'. <sup>40</sup> Gulechugę' du zri'a ca' zaj nacá'a xia ca', ne bulucá'ane' xia ca' lu nísadau'. Gulesęzre' du zri'a da nadxęaj ne'e xaga da dxuzęčaj na da dxedá lawe' nísadau'. Nadxa gulechise' ladxe' da dxecá'a be' da zeaj lówela da dxedá lawe' nísadau', na' da dxedá lawe' nísadau' na' guzú lau dxębiga na naga naca lache'. <sup>41</sup> Bzrin na naga dxęzraga nisa na' dxupa la'a, na' da dxedá lawe' nísadau' na' guxaze na lu xuzre' da dxę' zran nisa na'. Zeaj lówela da dxedá lawe' nísadau', na' begá'ana na chalásaze lu xuzre' na', ne quębedxa gulezęquene' xulutę' na. Da zeaj zranla guzú lau dxuzruj na lawe' da dxęajęle'e xęajxruza cheę nísadau' na' zran da dxedá lawe' nísadau' na'. <sup>42</sup> Benne' dxjaque' wedil-la gulaca lazre' xelútie' benne' zaj nadxęaje' cheę quebe xuluxuzrúnnuje' xęezrúe' lawe' nisa na'.

<sup>43</sup> Benne' dxenná be'e lu wedil-la guca lazre' guselę' Pablo, na' quebe be'e lataj benne' dxjaque' wedil-la xelútie' benne' ca'. Na' gunná bé'ene' benne' ca' dxęlaque' dxelezrúe' nisa cheajlexęrtie' lu nisa na' cheę xęlexezrine' lu xu bizre. <sup>44</sup> Benne' ca' xezícala, bal-le' gulequę'e blaga', ne xebal-le' gulequę'e blaga' bizruj cheę da dxedá lawe' nísadau' na', na' caní guca, xúgutę' belexezrine' lu xu bizre.

#### Da ben Pablo lu xęzr la xu na' nazí le na Malta

**28** Ca gulá xúgutęntu', na' gunęzentu' xęzr la xu na' da naxečaj nísadau' nazí le na Malta.

<sup>2</sup> Benne' zaj zre'e na' belúnle'e netu' cháwedau'. Gulebéche'le'e xi' lawe' da dxúnle'e zaga, ne dxaca xiuj, na' gulennę' netu' cheajęntu' dxu'a xi' cheę xęzre'entu'.

<sup>3</sup> Nadxa Pablo guquę'e tu xrunu zruze xaga, na' ca dxuzre'e na lu xi', bedxúaj tu bęla' da na' dxuzrúnnujba' lu da la na', na' gudagu xa'aba' na' Pablo. <sup>4</sup> Gate belelé'e benne' ca' zaj zre'e lu xęzr la xu na', nal-la' bęla' na' na' Pablo, na' gulę ljwezre':

—Benne' nigá naque' węte benne' lawe' da lálcala gulę' lu nísadau', quebe dxue lataj dios na' nazí'i le' Xrlátaje gaca ban le'.

<sup>5</sup> Pablo guzribę' bęla' na' lu xi', ne quebe bi gúquene'.

<sup>6</sup> Xúgutę' gulebeze' cheę gata' xi' na' Pablo u che'e gatię'. Ca gudé gulebeze' tu chí'i wal-la, ne belelé'ene' quebe bi gúquene', na' buluchę'e ca da dxelęquene', ne gulezú lawę' dxelennę' naca Pablo tu dios.

<sup>7</sup> Gágutę naga zrantu' de xęzr la xu cheę benne' blau cheę xęzr la xu na', le' Publio. Benne' nigá guzú' lu ne'e netu', ne bxúelę'e netu' cháwedau' lawe' chunna zra.

<sup>8</sup> Xra Publio deze', quebe chawe' zuę', na' xu'e da la, ne dxaque' xízrawę' dxen. Pablo guxíaje' xęajnnę'e le', na' ca gudé bchálajlęne' Dios, bzę ne'e lawe' le', na' bęxaque'. <sup>9</sup> Gate belennę' da nigá, na' benne' ca' xezícadxa, benne' wę' ca' zaj zre'e xęzr la xu na', belezrine' lau Pablo, na' belexaęe'. <sup>10</sup> Gulápale'e netu' ba lálana, na' ca gudé na', gate ba zua chú'untu' da xula tu lu da dxedá lawe' nísadau', belunne' xúgutę da nachínnentu'.

## Pablo dxezrine' xezre Roma

<sup>11</sup> Ca gudé guca chunna beu' zúantu' lu xezr la xu na', na' bexú'untu' tu lu da dxedá lawe' nísadau' da gudxé' na' na' dxácate' naca beu' zaga ca'. Naca na tu da dxedá lawe' nísadau' chee xezre Alejandría, na' luzrgue da dxedá lawe' nísadau' na' zaj da bedáu' chee dios bi lide' ca' zaj le' Cástor ne Pólux. <sup>12</sup> Bzrintu' dxu'a xezre Siracusa naga begá'anantu' chunna zra. <sup>13</sup> Gate beza'ntu' na', na' gudentu' dxu'a xezr la xu na', ne bzrintu' xezre Regio. Zra xula dxaca be' da za' chalá'a naga dxedé gubizra beu' zaga ca', na' zra gudxupe' zra bzrintu' xezre Puteoli. <sup>14</sup> Lu xezre na' bezrágantu' bal-la bi bíchedxu, benne' gulenné' netu' lizre' xegá'analentu' le' xrunu' zra, na' ca gudé na' guza'ntu' ní'antu' zéajntu' Roma. <sup>15</sup> Bi bíchedxu zaj zra' Roma ba belenne' cheentu', na' beledxúaje' xezre na', bedajlechague' netu' tu xézredau' nazí le na Xi'a Chee Apio, na' xebal-le' belezrague' netu' tu lataj nazí le na Chunna Xú'udau'. Gate ble'e Pablo bi bíchedxu ca', na' guzre' Dios: "Xcalenu'", ne ben dipa lazre'. <sup>16</sup> Gate bzrintu' Roma, benne' dxenná be'e lu wedil-la bdee' benne' zaj nadxéaje' lu na' benne' xíchaje chee bi xra'aga ca', san be'e lataj Pablo sue' cheeze' nen tu benne' dxéaje' wedil-la, benne' guxúe' le' chee quebe xuzrúnnuje'.

## Pablo dxuchálaje' chee Jesús lu xezre Roma

<sup>17</sup> Ca gudé chunna zra Pablo gusel-le' benne' xejné' benne' judío blau ca' zaj zre'e Roma, na' gate belezrague', guzre' benne' ca':

—Le'e, bi bicha'. Neda' quebe gudábaga' judío ca', ne quebe gudábaga' da xjácate' xra xrtáudxu ca', san benne' judío ca' zaj zre'e Jerusalén buludée' neda' lu na' benne' Roma ca'. <sup>18</sup> Gate benne' Roma zaj zre'e na' buluchébe' neda', gulaca lazre' xulusane' neda' lawe' da quebe belezrelne' bi da bēna' da gun na xelechugue' chia' gatia'. <sup>19</sup> Judío ca' guledábague', na' ben na ba xen gunaba' neda' zri'a chia' lau César. Quebe nacan chee gawa' zria benne' lázredxu. <sup>20</sup> Chee le' na' gunnéa' le'e chee le'eda' le'e, ne guchálajlēna' le'e lawe' da naca ne chee da dxebeza lázredxu dxi'u, benne' Israel, zua' nigá nadxéaja' xia.

<sup>21</sup> Nadxa gulé'e le':

—Netu' quebe bi xiche ne si' lu na'ntu' da za na Judea ca naca chiu' lue', na' netú bi bíchedxu, benne' judío, benne' ba bele'e nigá bezé'e Judea, quebe bi da calēla dxenné' bēnu'. <sup>22</sup> Dxaca lázrentu' xénentu' ca da dxéquenu' lue' lawe' da nézentu' gáteteze na' dxelenné' chee benne' ca' dxeléajle'e dizra' cube nigá.

<sup>23</sup> Buluzúe' tu zra gate xelezrague', na' lu zra na' benne' zan belezrague' naga zua Pablo. Bchálajlēne' benne' ca' ca naca xel-la' dxenná bea chee Dios che zílatēla guxrínnele'e. Bēne' ba xuzre guzėjni'ine' benne' ca' ca naca chee Jesús ne chee da bdxixruj be'e Moisés, ne ne chee da buluzúaj benne' ca' buluchálaje' waláz chee Dios. <sup>24</sup> Bal-le' gulez'e xrtizra' Pablo, san xebal-le' quebe guléajle'e. <sup>25</sup> Quebe beluné' tuze dizra', na' gulezú lawe' dxelexedxúaje'. Nadxa gunná Pablo:

—Da li naca da gunná Be' Lá'azxa, guzre' xra xrtáudxu ca' lu dxu'a Isaías, bēneea' bchalaje' waláz chee Dios, gunné':

<sup>26</sup> Guxíaj, xejze' benne' ca':

Da li wenle le'e san quebe cheejni'ile.  
Da li walé'ele, ne quebe guebe be'ele.

<sup>27</sup> Zaj naca zide' lázxdau benne' caní,  
ne quebe dxelenne' chawe'.

Zaj naxezxuj xiaj lawe'  
chee quebe xelelé'ene' nen xiaj lawe',  
ne quebe xelēne' nen nague',  
ne quebe xelėjni'ine' nen lázrdawe',  
ne quebe xelxelé'e lawa' neda' chee xexuna' neda' le'.

<sup>28</sup> 'Dxal-la' nézele le'e, na'a ne da za za' xel-la' weselá chee Dios guchálajlentu' benne' quebe zaj naque' judío, na' benne' ca' xelez'e na.

<sup>29</sup> Gate gunná Pablo da nigá, na' besiá'aca judío ca', dxuluchébele'e ljwezre'.

<sup>30</sup> Pablo guzúe' chupa iza lu xu'u da dxízruje', ne dx-ez' lu ne'e xúgutē benne' dxedajlenné'e le'. <sup>31</sup> Du lazre' bchálaje' ca naca xel-la' dxenná bea chee Dios, ne bsé-dene' ca naca chee Xránadxu Jesucristo, na' netú quebe nu blale' le'.

# Romanos

Pablo dxugape' diuzre bi chee Cristo zaj zrabe' Roma

**1** Neda', Pablo, naca' wen zrin chee Jesucristo. Dios bláwizre' neda' chee gaca' gubáz chee', ne guqué'e neda' chee guzenda' bèneache dizra' chawe' chee'.

<sup>2</sup> Dios guchebe lazre' sel-le' dizra' chawe' nigá gate nate lu dizra' lá'azxa chee' lu na' benne' ca' buluchá-laje' waláz chee'. <sup>3</sup> Dizra' chawe' nigá dxulé'e na ca naca chee Xránadxu Jesucristo, Zri'ine Dios. Lu bela' dxen chee' naque' zri'ine zre sua wenná bea David. <sup>4</sup> Lu be' nácaqueze' da naca na lá'azxa, naque' Zri'ine Dios. Dios blé'ene' naca caní gate bsebané' Le' ládujla benne' gate ne chee xel-la waca chee'. <sup>5</sup> Ne chee Zri'in-e' Dios nunné' netu' lataj nácantú' gubáz chee' chee xelezrá' benne' ládujla xúgute cue' xezr la xu, benne' xelejilí lazre' Cristo, ne xuluzúe' dizra' chee' chee gaca ba La Le'. <sup>6</sup> Ládujla benne' caní zrale le'e chee gácale bi chee Jesucristo.

<sup>7</sup> Dxuzúaja' chee xúgutele le'e dxéajlele chee Cristo, zrale xezre Roma. Dios nazri'ine' le'e, ne bláwizre' le'e chee gácale bi cheéqueze'. Dxenaba' Xradxu Dios, ne Xránadxu Jesucristo guné' chawe' chee, ne gunné' le'e xel-la dxebeza zri lazre'.

Pablo dxaca lazre' chéaje' xezre Roma

<sup>8</sup> Da naca blaudxa, ne chee Jesucristo dxapa' Dios chia' xcalené' ca naca chee xúgutele lawe' da dxezralaj ca dxeajilí lázrele Cristo du gabí'i xezr la xu. <sup>9</sup> Duté lázrdawa' dxuna' zrin chee Dios, dxuzenda' bèneache dizra' chawe' chee Zri'ine'. Le' nézquezne' dxeajsá lázrqueza' le'e gate dxuchálajlena' Le'. <sup>10</sup> Dxata' xúeda' Dios, che naca da dxaca lazre' Le', chee ájala gunné' neda' lataj xedajnná'a le'e <sup>11</sup> lawe' da dxaca lazra' le'eda' le'e ne gunna' le'e lataj si'le da naca chee Be' Lá'azxa, chee se cháchadxale. <sup>12</sup> Caní gutipa lázredxu tudxu xetudxu lu xel-la dxeajilí lazre' cheedxu.

<sup>13</sup> Bi bícha'dau', dxaca lazra' nézele zane' lasa guca lazra' xida' xedajnná'a le'e, san dxácaté ca' dxecuasa na. Dxaca lázrele'a xida' chee guna' zrin gusededa' da naca chee Cristo ládujla le'e, cáteze ba bena' ládujla xezicadxa bèneache zaj zre'e lu xezr la xu nigá.

<sup>14</sup> Nabaga' guna' zrin caní ládujla xúgute bèneache, che zaj naque' benne' blau u ca zaj naque', u che zaj naque' benne' zaj naxéajni'i u ca zaj naque'. <sup>15</sup> Chee le na', neda' ba zúaqueza' guzenda' le'e zrale xezre Roma dizra' chawe' chee Cristo.

Xel-la waca chee dizra' chawe' chee Cristo

<sup>16</sup> Quebe dxedué'eda' chee dizra' chawe' chee Cristo lawe' da napa na xel-la waca chee Dios chee guselá na xúgute benne' dxelejilí lazre' le na, nédxula benne' judío ca', san cá'anqueze benne' quebe zaj naque' judío. <sup>17</sup> Dizra' chawe' nigá dxulé'e na dxi'u nagá'anadxu chawe' lau Dios che dxeajilí lázredxu le na, chee cheajilí lázredxu Le' ca naxúaj na lu dizra' lá'azxa, da dxenná na: Benne' nagá'ane' chawe' lau Dios gata' chee' xel-la nabán li lazre' che dxeajilí lazre' Le'.

Dul-la da zaj nabaga bèneache

<sup>18</sup> Ba ble'e Dios lu xabáa chee' ca guné', gudé' xel-la zi' xúgute benne' dxuluzúe' chalá'ala Dios, ne benne' wen da calela, benne' dxuluzague' da li ne chee da calela da dxelune'. <sup>19</sup> Zaj nézquezne' ca gaca xelúnbea bèneache da naca chee Dios lawe' da Léqueze Dios na' bache blé'ene' na zaca ba lau. <sup>20</sup> Da quebe gaca lé'edxu chee Dios gaca gúnbeadxu na ne chee da ca' da ben Dios. Gate benté' xezr la xu dxunna bea na nácaqueze Dios, ne nápaqueze' xel-la waca. Chee le na' quebe bi de xuludé'ene'. <sup>21</sup> Lácala zaj núnbe'e ca naca Dios, quebe ne xelape' Le' ba lá'ana ca Dios, ne quebe ne xelé'e Le'; Xcalenu', san dxuludé lazre' da níteze, na' gulechul-la xichaj lázrdawe' lawe' da zaj naque' benne' zide'. <sup>22</sup> Lácala dxeléquene' zaj naxéajni'ingé', da li zaj naque' benne' xala, <sup>23</sup> lawe' da buluzúe' chalá'ala Dios xabáa, Bénéa' quebe dxedé chee', ne dxelúe lá'ane' bedáu' xiaj xaga zaj naca na lu'a bèneache dxelate, ne lu'a bea ca' zaj zua xrila, ne lu'a be snia, ne lu'a be xixre' be zria tapa ni'a na'ba'.

<sup>24</sup> Chee le na' Dios ba guleaj xíchaje' benne' ca' chee xelune' xúgute da sban da dxelezá lazre', na' bulucá'ana ditaj cuine' tue' xetue', <sup>25</sup> lawe' da buluzúe' chalá'ala xel-la li chee Dios, na' gulez' lu ne'e da wen lazre', ne belúe lá'ane', ne belecá'ana szrene' da ca' nun Dios, ne quegá Diosqueze, Bénéa' dxal-la' güe lá'anaquezdxu. ¡Ca'an gaca na!

<sup>26</sup> Chee le na' Dios ba guleaj xíchaje' benne' ca' chee xelune' da dxelezá lazre' da ca' xedué'edxu. Cá'anqueze nu'ula buluzúe' chalá'ala xel-la zúale benne' chee', ne dxelune' da quebe zaj naca chee' xelune'.

<sup>27</sup> Cá'anqueze belún benne' biu, buluzúe' chalá'ala xel-la zúale zru'ule', ne dxelune' da sban da dxelezá lazre' tue' xetue', ne dxelune' da ca' xedué'edxu tue' xetue',

na' dxeledéé' xel-la zi' lu bel-la' dxen chee' ne chee' da sban da dxeluné'.

<sup>28</sup> Lawe' da québedxa gulaca lazre' xelexúnbe'e Dios, Le' guleaj xíchajé' benne' ca' chee' xuludé lazre' da caléla, ne chee' xeluné' da quebe dxal-la' xeluné'.

<sup>29</sup> Dxeluné' xúgute' da caléla.

Dxulucá'ana ditjé' bèneache.

Dxeluné' da quebe naca xrlátaje.

Zaj naque' benne' wecude'.

Dxeluné' da zrinnaj.

Zaj naque' benne' xa lazre'.

Dxelutje' benne'.

Dxelíljaje' da ba xa'.

Dxelezí xé'e.

Dxeledanne' da xálaze.

Dxuluchálaje' dizra' bizruj.

<sup>30</sup> Dxelenné' schanni' chee' ljwezre'.

Dxelecuídené' Dios.

Zaj naque' benne' wenné wal-la.

Dxulucá'ana szren cuine'.

Zaj naque' benne' wezé cua.

Dxelalaj lazre' bícala da sban.

Quebe dxuluzúé' dizra' chee' xra xrné'e.

<sup>31</sup> Zaj naque' benne' lázrdau zide'.

Dxulunite' xrtizre'.

Quebe zaj naque' zri'i lazre'.

Quebe dxulunite lawe' chee' ljwezre'.

Quebe dxelexache lazre' chee' ljwezre'.

<sup>32</sup> Zaj nézené' Dios guzría xi'e bèneache, na' benne' dxeluné' da caní dxal-la' xelátje'.

Benne' caní tu dxelúnzqueze' na,

ne dxelexezaca ba lazre' nen benne' dxeluné' da caníqueze.

**Dios dxuchi'e chee' bèneache cáteze da zaj nune'**

**2** Chee' le' na' québedxa bi de' da gudé'enu', lue' dxuchi'u da dxun benne' xula, núteteze nacu'. Gate dxuchi'u da dxun benne' xula, na' dxule'enu' nabagu' zria, lawe' da dxuchi'u da dxun benne' xula, ne cá'anqueze dxunu' lue'. <sup>2</sup> Nézquezdxu dxuchi'a Dios cáteze da naca na gate dxenné' zaj nabaga zria benne' ca' dxelún da caní. <sup>3</sup> ¿Dxéquenu' lue' wadé gun ca'aze chiu' gate Dios nne' zaj nabaga zria bèneache, lue' na' dxennáu' zaj nabaga zria benne' dxelún da caní, ne cá'anqueze dxunu' lue'? <sup>4</sup> ¿Dxuzú' chalá'ala xel-la zri'i lazre', ne xel-la zren lazre' zren chee' Dios, ne quebe nézenu' lu xel-la zri'i lazre' chee' dxunne' lue' lataj xebi'i lazru'? <sup>5</sup> Nacu' lázrdau zide', ne quebe dxexebi'i lazru'. Chee' le' na' dxuzanu' da si sacu' lu zra na' gate Dios nne' zaj nabaga zria benne' ca' dxeluné' da caléla. Naca xrlátaje guné' da caní. <sup>6</sup> Lu zra na' gunné' ca da dxal-la' si' tu tudxu cáteze naca da bendxu. <sup>7</sup> Xel-la nabán zeajlí canna gunna Le' xúgute' benne' dxelaca lazre' xelezje' lu na' Dios da xabáa, ne xel-la ba lá'ana, ne da zaj naca na da chadía chacanna ne chee' da chawe' da tu dxelúnzqueze'. <sup>8</sup> Lu xel-la dxezra'a chee' nne' zaj nabaga zria xúgute' benne' zre'e lazre' ca', benne' quebe dxuluzúé' dizra' da li, san dxuluzúé'

dizra' da wen lazre'. <sup>9</sup> Gusaca zi'e, ne gudéé' lu da ba xa' xúgute' benne' dxeluné' da caléla. Ga su lau guné' caní chee' benne' judío ca', ne cá'anqueze guné' chee' benne' quebe zaj naque' judío. <sup>10</sup> Da xabáa, ne da ba lá'ana, ne xel-la dxebeza zri lazre' gunné' xúgute' benne' dxeluné' da chawe'. Ga su lau guné' caní chee' benne' judío ca', ne cá'anqueze guné' chee' benne' quebe zaj naque' judío.

<sup>11</sup> Dios tuze ca dxuchi'e da dxelún xúgute' bèneache, <sup>12</sup> na' benne' dxeluné' dul-la, ne quebe zaj núnbe'e da bdxixruj be'e Moisés welebía xi'e lácala quebe belúnbe'e da nadxixruj bea na, na' benne' dxeluné' dul-la lácala zaj núnbe'e da bdxixruj be'e Moisés welebía xi'e ne chee' da nadxixruj bea na na'. <sup>13</sup> Quebe zaj nagá'ana chawe' lau Dios benne' dxelénzené' da nadxixruj bea na, san zaj nagá'ana chawe' lau Dios benne' dxuluzúé' dizra' da nadxixruj bea na. <sup>14</sup> Benne' zitu' ca', benne' quebe zaj núnbe'e da bdxixruj be'e Moisés, gate dxeluné' ca dxenná da nadxixruj bea na na', lácala quebe zaj núnbe'e da nadxixruj bea na, naca chee' cáteze zua da nadxixruj bea na lu xíchaj lázrdawe'.

<sup>15</sup> Caní naquen lawe' da ca dxeluné' dxulé'e na zua xíchaj lázrdawe' ca naca da nadxixruj bea na, na' naca na ca naca da bdxixruj be'e Moisés. Xíchaj lázrdawe' dxunna bea na chee' da nigá, na' da dxelegú'u lazre' guzría xi na le', u xecá'a na le' <sup>16</sup> lu zra na' gate Dios guchi'e xúgute' da nagache' chee' xúgute' bèneache lu na' Jesucristo cáteze dxenná dizra' chawe' na' da dxuzenda' bèneache.

**Ca naca chee' benne' judío ca' ne da bdxixruj be'e Moisés**

<sup>17</sup> Dxennáu' nacu' judío, ne dxenné'enu' da bdxixruj be'e Moisés, ne dxucá'ana szren cuinu' lawe' da núnbe'u Dios chiu'. <sup>18</sup> Nézenu' da dxaca lazre' Dios, na' da gunná bé'ene' dxulé'e na lue' gunu' da nácadxa chawe'. <sup>19</sup> Dxuxrén lazru' cuinu' waca gulé'enu' ca da xelún benne' zaj naque' ca lo chul-la, ne gusení'u benne' zaj zra' lu da chul-la. <sup>20</sup> Dxéquenu' waca guzéajni'inu' benne' quebe zaj naxéajni'e, ne gusé'enu' benne' quebe ne cheajni'e lawe' da naca da nadxixruj bea na da napu' tu da dxulé'e na dxi'u chee' gúnbead-xu da li. <sup>21</sup> Lue' dxusé'enu' benne' xula. ¿Bizr chee' na' quebe dxuséde cuinu'? Lue' dxuzennu' benne' quebe dxal-la' cuandxu. ¿Bizr chee' na' dxebanu' lue'? <sup>22</sup> Lue' dxennáu' quebe dxal-la' súa'ledxu zru'ula benne' xula. ¿Bizr chee' na' dxunu' lue' ca'? Lue' dxecuí'enu' bedáu' xiaj xaga. ¿Bizr chee' na' dxebanu' lue' da gunní'a da de lu xudau' ca' chee' bedáu' xiaj xaga ca'? <sup>23</sup> Dxucá'ana szren cuinu' lawe' da núnbe'u da nadxixruj bea na, san dxucá'ana ditju' Dios lawe' da quebe dxunu' lue' ca da dxenná bea da nadxixruj bea na. <sup>24</sup> Naxúaj lu dizra' lá'azxa da dxenná na: Benne' quebe zaj naque' judío dxelenné' schanni' chee' Dios ne chee' da caléla da dxunle le'e.

<sup>25</sup> Da li da nadxugu lu be'la' chiu' da dxulé'e na nacu' bi chee' Dios, naca na tu da chawe' che dxunu' ca da dxenná bea da bdxixruj be'e Moisés, san che quebe

dxunu' ca dxenná na, nacu' ca tu benne' quebe nadxugu lu bēla' chee' da na' dxulé'e na. <sup>26</sup> Che benne' quebe nadxugu lu bēla' chee' dxunē' ca nadxixruj bea na, naque' ca tu benne' nadxúguqueze lu bēla' chee' da na', lácala quebe naca caní chee'. <sup>27</sup> Benne' quebe nadxugu lu bēla' chee' da na' dxulé'e na, san dxunē' da nadxixruj bea na, da na' dxunē' dxulé'e na nabagu' zria lue', lawe' da quebe dxunu' da dxenná bea da nadxixruj bea na, lácala zua lu na'u da nadxixruj bea na, ne nadxugu lu bēla' chiu' da na'. <sup>28</sup> Quebe naca xanne' judío bēnea' naque' caní cúzreze, ne quebe naca xanne' da nadxugu na lu bēla' chee' benne' da naca na cúzreze, lu bēla'ze. <sup>29</sup> Benne' naca xánniē' judío naque' bēnea' naque' judío lu xichaj lázrdawe', ne da naca xanne' da nadxugu lu bēla' chee' benne' naca na da zua na lázrdawe'. Quebe nácaqueze na nen dízra'ze san naca na chee' be' chee'. Benne' caní dxelezi'e xel-la ba lá'ana, quegá chee' bēneache, san chee' Dios.

**3** ¿Bizra da ba neza naca na chee' benne' lawe' da nadxugu lu bēla' chee' da na' dxulé'e na? <sup>2</sup> Ná-calē'e na, ne zánete' ca naca na. Da nédxute, Dios bdeē' dízra' chee' lu na' benne' judío ca'. <sup>3</sup> ¿Bizra xca'? Che bal-la benne' judío ca' quebe zaj naque' li lazre', ¿nnadxu chee' da na' quebe naca Dios li lazre'? <sup>4</sup> ¡Cabata! Dios dxúnqueze' ca naca da li lácala xúgute' bēneache zaj naque' wēn lazre', lawe' da naxúaj lu dízra' lá'azxa da dxenná Dios. Dxenné':

Nacu' xrlátaje ca da dxennáu',  
na' wegá'anaquezu' xrlátaje gate xuluchi'e ca da dxunu'.

<sup>5</sup> Che da calēla da dxundxu dxulé'e na naca Dios xrlátaje, ¿Bízraqueze nnadxu? (Dxuchálaja' ca da dxuluchalaj bēneache.) ¿Naca Dios benne' quebe naca xrlátaje lawe' da dxudē' dxi'u xel-la zi'? <sup>6</sup> ¡Cabata! Chela naca Dios Benne' quebe dxun da xrlátaje, ¿ájazra gunē' guchi'e ca da dxelún bēneache?

<sup>7</sup> Che da wēn lazre' da dxuna' gun na chee' xegá'ana zrendxa da li da dxun Dios, ¿bizr chee' na' dxuchi'e chia' neda', dxenné' naca' benne' dul-la? <sup>8</sup> Che naca na caní, ¿bizr chee' na' quebe gundxu da calēla chee' gulé'e laudxa da xrlátaje? Da nigá naca na da dxelenná bal-la benne' dxundxu, benne' ca' dxelún da calēla, ne dxelenné' schanni' chee'dxu. Xrlátaje naca Dios nne' zaj nabaga zria benne' caní.

### Xúgute'dxu nabágadxu dul-la

<sup>9</sup> ¿Bizra xca'? Dxi'u, benne' judío, ¿nácadxadxu xrlátaje ca xezícadxa benne' ca'? ¡Cabata! Bache blé'entu' zaj nabaga dul-la benne' judío, ne cá'anqueze xezícadxa benne' ca'. <sup>10</sup> Naxúaj lu xiche lá'azxa da dxenná na:

Quebe nu chilá' benne' xrlátaje, netú guē'.

<sup>11</sup> Quebe nu chilá' benne' dxéajni'ine'.

Quebe nu chilá' benne' dxéilaje' Dios.

<sup>12</sup> Xúgute' dxeledé' calēla. Xúgute' zaj nanítie'.

Quebe nu chilá' benne' dxunē' da xrlátaje, netú guē'.

<sup>13</sup> Da dxelenné'queze' naca na ca tu da sgute, ca tu ba da naxálajze.

Nen luzre' ca' dxelezi' xē'e.

Xrtizre' zaj naca na ca nisa snia chee' bēla' da dxe na zran lázxaba'.

<sup>14</sup> Tu dxelenné'zqueze' dízra' schanni', ne dízra' zi'.

<sup>15</sup> Chadite' dxelútie' bēneache.

<sup>16</sup> Gáteteze dxeledé' dxuluzría xi'e, ne dxulusaca zi'e.

<sup>17</sup> Quebe zaj nézene' ájala xelebeza zri lazre'.

<sup>18</sup> Quebe dxelezrebe' Dios.

<sup>19</sup> NezdXu xúgute' ca da dxenná da nadxixruj bea gula na' da bzuaj Moisés, dxe na benne' ca' zaj xu'e lu na' da nadxixruj bea na na', chee' xelezúa zri xúgute', ne chee' xelxúnbea xúgute' bēneache zaj nabaguē' zria lau Dios. <sup>20</sup> Netú benne' quebe xegá'anē' xrlátaje lau Dios lawe' da nunē' da dxenná bea da nadxixruj bea na, lawe' da dxulé'eze da nadxixruj bea na dxi'u ná-cadXu benne' dul-la.

### Xelelá bēneache che xeléajl'e chee' Cristo

<sup>21</sup> Na'a, dxunna bea na ca gaca xegá'anadXu xrlátaje lau Dios, da quebe naca na ne chee' da nadxixruj bea na, lácala lu da nadxixruj bea na, ne lu da buluzúaj benne' ca' gulenné' waláz chee' Dios dxuluchalaj na ca naca chee' da nigá. <sup>22</sup> Nagá'anadXu xrlátaje lau Dios caní che dxeajlí lázredXu Jesucristo, ne cá'anqueze gaca chee' xúgute' bēneache xeleajlí lazre' Le'. Tuz ca naca chee' bēneache <sup>23</sup> lawe' da zaj nun xúgute' bēneache dul-la, ne quebe zaj naca chee' xelxú'e lu xabáa chee' Dios. <sup>24</sup> Lu da chawe' chee' Dios, cá'aze nunē' chee' xegá'anadXu xrlátaje lau Le' lawe' da bexa'u Jesucristo dxi'u lu dul-la da nabágadXu. <sup>25</sup> Dios bzuē' Jesucristo gutie' ne chee' xtúl-ladXu chee' xegá'anadXu xrlátaje lau Le' che dxeajlí lázredXu da bēn Le'. Da nigá guca na chee' ble'e Dios naque' xrlátaje lácala lu xel-la zren lazre' chee' bdeē' cá'aze ca naca dul-la da bēndXu nédxute. <sup>26</sup> Gúcaqueze da nigá chee' gulé'e lawe' naca Dios xrlátaje na'a, ne gácaqueze' xrlátaje gate gucá'anē' xrlátaje benne' ca' dxeleajlí lazre' Jesús.

<sup>27</sup> Na'a, ¿waca gucá'ana szren cuínadXu? ¡Cabata! ¿Bizr chee' na'? Naca na lawe' da nagá'anadXu xrlátaje, quegá lawe' da bēndXu ca nadxixruj bea na, san lawe' da guxeajlí lázredXu Cristo. <sup>28</sup> Ca'an naca, dxunna bea na nagá'ana xrlátaje tu benne' lau Dios lawe' da dxeajlí lazre' Cristo, ne quegá lawe' da nunē' ca da nadxixruj bea na.

<sup>29</sup> ¿Naca Dios chee'ze benne' judío ca'? ¿Quegá ná-caqueze' Dios chee' benne' ca' quebe zaj naque' judío? Da li nácaqueze' Dios chee' benne' ca' <sup>30</sup> lawe' da zua tuze Dios, na' Le' gucá'anē' xrlátaje benne' ca' zaj nadxugu lu bēla' chee' da na' dxunna bea na che dxeleajlí lazre' Cristo, ne cá'anqueze gucá'anē' xrlátaje benne' ca' quebe zaj nadxugu lu bēla' chee' da na', che dxeleajlí lazre' Cristo. <sup>31</sup> Na'a che dxucá'ana Dios xrlátaje benne' dxeleajlí lázreze', ¿naca da nadxixruj bea na tu da québedxa zaca? ¡Cabata! Che dxéajlē'dxu chee' Cristo dxúnquezdXu ca dxenná da nadxixruj bea na.

### Da dxulé'e da guca chee Abraham

4 ¿Bízraqueze nnadxu chee da ba neza da guca na chee xra xrtáudxu Abraham? <sup>2</sup> Che Abraham bega'ane' xrlátaje lau Dios ne chee tu da bene', waca gucá'ana szren cuine' san quegá lau Dios. <sup>3</sup> ¿Bízraqueze naxúaj na lu dizra' lá'azxa? Dxenná na: Abraham guxeajlí lazre' Dios, na' Dios guz' lu ne'e le' ca tu benne' xrlátaje. <sup>4</sup> Che nu benne' dxune' zrin, lazruj da si'e quebe naca na tu da dxunézrujedxu, san naca na tu da nabágaquezdxu chee'. <sup>5</sup> Che nu benne' quebe bi nune', san dxeajlí lázreze' Dios, Bénnea' dxucá'ane' xrlátaje benne' dul-la, nacan lawe' da dxez' lu na' Dios xel-la dxeajlí lazre' chee' chee xuca'ane' le' xrlátaje. <sup>6</sup> Cá'anqueze bchalaj David ca naca chee benne' naca da ba neza chee' lawe' da dxucá'ana Dios le' xrlátaje lácala quebe bi nune' chee xegá'ane' xrlátaje. <sup>7</sup> Gunná David:

Ba neza zrente naca na chee benne' ca' ba bunité lau Dios chee' da zrinnaj da zaj nune', ne gudé' cá'aze dul-la da belún benne' ca'. <sup>8</sup> Ba neza zrenté naca na chee benne' ca' quebe dxusebaga Xránadxu le' dul-la da belune'. <sup>9</sup> ¿Naca ba neza nigá cheeze benne' ca' zaj nadxugu lu belá' chee' da na' dxulé'e na, u che nácaqueze na chee benne' ca' quebe zaj nadxugu lu belá' chee' da na'? Bache blé'entu' bca'ana Dios Abraham xrlátaje lawe' da guxeajlí lazre' Le'. <sup>10</sup> ¿Bátazra bca'ane' le' xrlátaje? ¿Guca na ca gudé gudxugu lu belá' chee Abraham da na' dxulé'e na, u che nédxula? Quebe guca na ca gudé na', san nédxula guca na. <sup>11</sup> Gudxugu da na' lu belá' chee Abraham ca tu da dxunna bea na chee gulé'e na nagá'ane' xrlátaje lau Dios lawe' da guxeajlí lazre' Dios gate na' quebe ne chugu da na' lu belá' chee'. Ca'an guca, naca Abraham xra xúgute benne' dxeleajlí lazre' Dios, ne quebe zaj nadxugu da na' lu belá' chee'. Cá'anqueze dxucá'ana Dios le' xrlátaje lawe' da dxeleajlí lazre' Le'. <sup>12</sup> Da li naca Abraham xra benne' ca' zaj nadxugu da na' lu belá' chee', na' cá'anqueze dxeleajlí lazre' Dios ca ben xradxu Abraham gate na' quebe ne chugu lu belá' chee' da na'.

### Dxezidxu da guchebe lazre' Dios che dxeajlí lázredxu Cristo

<sup>13</sup> Dios guchebe lazre' chee Abraham, ne chee zri'ine zre su'e gaca chee benne' ca' xezr la xu nigá. Quebe guchebe lazre' na chee' lawe' da nune' ca dxenná bea da nadxiruj bea na, san lawe' da bega'ane' xrlátaje lau Dios gate guxeajlí lazre' Le'. <sup>14</sup> Che xezr la xu nigá gaca na tuze chee benne' ca' dxelune' ca da dxenná bea da nadxiruj bea na, dácheze nagá'ana xel-la dxeajlí lazre', ne québedxa zaca da guchebe lazre' Dios. <sup>15</sup> Lu da nadxiruj bea na xelebía xi' bènneache, san naga quebe ne zrin da nadxiruj bea na, quebe bi zaj nabaga bènneache chee da nadxiruj bea na na'. <sup>16</sup> Ca' naca na, dxez' lu nnadxu da guchebe lazre' Dios ne chee xel-la dxeajlí lazre' cheedxu Le', chee

gaca na tu da sidxu cá'aze, ne chee gaca na tu da súatequeze chee xúgute zri'ine zre sua Abraham. Ca' naca na, quegá naca na cheeze benne' ca' dxelune' ca da nadxiruj bea na, san cá'anqueze naca na chee benne' ca' dxeleajlí lazre' Dios ca ben Abraham. Ca' naca na, le' naque' xra xúgutedxu <sup>17</sup> lau Dios, Bénnea' guxeajlí lazre' Abraham Le'. Naca na ca da naxúaj na lu dizra' lá'azxa, dxenná na:

Nuna' lue' xra bènneache zánete cue' xezr la xu. Dios na' dxu'e xel-la nabán chee benne' ca' zaj nate, ne dxuchálaje' chee da quebe ne sua ca dxuchálaje' chee da ba zua.

<sup>18</sup> Abraham guxeajlí lazre' Dios, ne guleza lazre' si'e da guchebe lazre' Dios, lácala ba gudé chee si'e da dxebeza lazre'. Ca'an guca, guque' xra bènneache zánete cue' xezr la xu cáteze ba guzre Dios le', gunné': "Canite chan zri'ine zre su'." <sup>19</sup> Abraham ba zu'e' ca tu gaxúa iza, san quebe gute ni'a ne'e lu xel-la dxeajlí lazre' chee' gate xeajsá lazre' zaj naque' ca benne' ba zaj nate, le' ne zru'ule' Sara, ne naca Sara nu'ula wizre. <sup>20</sup> Quebe ben chupa lazre', san bxren lazre' da guchebe lazre' Dios chee', na' gudápadxe' xel-la dxeajlí lazre', ne bxren lázredxe'. Bca'ana szrene' Dios, <sup>21</sup> ne bente-queze' neza napa Dios xel-la waca guné' xúgute ca da guchebe lazre'. <sup>22</sup> Chee le' na' Dios guz' lu ne'e xel-la dxeajlí lazre' chee' chee bca'ane' le' xrlátaje.

<sup>23</sup> Gate dxenná na: "Dios guz' lu ne'e xel-la dxeajlí lazre' chee'", quebe guxuaj na chee tuze Abraham <sup>24</sup> san cá'anqueze cheedxu dxi'u lawe' da si' lu na' Dios xel-la dxeajlí lazre' cheedxu che dxeajlí lázredxu Bénnea' bsebané' Xránadxu Jesucristo ládujla benne' gate, <sup>25</sup> na' naca Jesús Bénnea' bde Dios Le' chee gutie' ne chee dul-la da nabágadxu dxi'u, ne bsebané' Le' chee xegá'anadxu xrlátaje lau Dios.

### Da naca cheedxu lawe' da nagá'anadxu xrlátaje lau Dios

5 Che nagá'anadxu xrlátaje lau Dios lawe' da dxeajlí lázredxu Cristo zúadxu xrlátaje nen Dios ne chee Xránadxu Jesucristo. <sup>2</sup> Cá'anqueze lawe' da dxeajlí lázredxu Cristo, ne chee Le' dxezidxu da xrlátaje chee Dios da tu dxeajlézquezdxu, ne dxebéle'edxu lawe' da dxebeza lázredxu sidxu da xabáa chee Dios. <sup>3</sup> Quegaze da nigá, san cá'anqueze dxebéle'edxu gate dxededxu xel-la zi', lawe' da nézedxu xel-la zi' da dxededxu dxun na dxi'u zren lazre', <sup>4</sup> na' xel-la zren lazre' dxucá'ana na dxi'u xrlátaje lau Dios, na' gate nagá'anadxu xrlátaje dxebeza lázredxu. <sup>5</sup> Quebe naca tu da dácheze da na' dxebeza lázredxu lawe' da ba nuzúa Dios lu lázraudxu xel-la zri'i lazre' chee' ne chee Be' Lá'azxa, Bénnea' ba nunna Dios dxi'u.

<sup>6</sup> Gate na' quebe guzéquedxu guselá cuínadxu, lu zra blé'equeze Dios, gute Cristo waláz chee benne' wen da zrinnaj ca'. <sup>7</sup> Stébele'e naca che nu benne' gatié' waláz chee tu benne' xrlátaje, lácala wexázrelja tu benne' gatié' waláz chee tu benne' naque' duté li lazre'. <sup>8</sup> Dios dxulé'ene' dxi'u ca nazrí'ile'ene' dxi'u lawe' da gute Cristo waláz cheedxu gate ne nácadxu benne' dul-la.

<sup>9</sup> Na'a nagá'anadxu xrlátaje lau Dios lawe' da gute Cristo waláz cheędxu, ne ba nácaqueze cheędxu ladxu ne cheę Le' lu da zi' da xa', da za za' lu zra ni'. <sup>10</sup> Gate na' ne dxecuı́dedxu Dios, Le' bexunę' dxi'u tuze nen Le' lawe' da gute Cristo waláz cheędxu, na' na'a lawe' da nácadxu tuze nen Dios ba nácaqueze cheędxu ladxu ne cheę xel-la nabán cheę Cristo da zúale na dxi'u. <sup>11</sup> Quegá tuze da nigá, san cá'anqueze dxebéleędxu lu da naca cheę Dios ne cheę Xránadxu Jesucristo, ne ne cheę Le' nácadxu tuze nen Dios.

#### Da nun Adán, na' da nun Cristo

<sup>12</sup> Ca guca, guxú'u dul-la lu xęzr la xu nigá ne cheę da bęn tuze benne', na' bla' xel-la gute ne cheę dul-la, ca'an guca gulú'u bęnneache lu na' xel-la gute lawe' da zaj nun xúgute' dul-la. <sup>13</sup> Nédxula ca bla' da nadxixruj bea na, ba zaj nun bęnneache dul-la lu xęzr la xu nigá, lácala quebe dxusebaga Dios bęnneache dul-la gate quebe ne zrin da nadxixruj bea na. <sup>14</sup> Ca guzú lau lu zra zua Adán ca bzin zra zua Moisés, gulú'u bęnneache lu na' xel-la gute, benne' ca' zaj nunę' dul-la, lácala quebe belunę' dul-la ca da bęn Adán, bęnnea' gudichje' da gunná be'e Dios, na' Adán na' naque' tu da dxulé'eze na ca naca Bęnnea' dxal-la' xide', Le' Cristo.

<sup>15</sup> Da zrinnaj da bęn Adán quebe gaca dí-lalębe na ca da dxunna Dios dxi'u. Ne cheę da zrinnaj da bęn tuze benne', gulate benne' zantę, san xel-la weselá da nunna Dios dxi'u cá'aze ne cheę xetuze benne', Jesucristo, naca na da zréndxaqueze, ne naca na da ba neza cheę benne' zantę. <sup>16</sup> Da zrinnaj na' da bęn tuze benne' quebe gaca dí-lalębe na ca da dxunna Dios dxi'u lawe' da ne cheę tuze da zrinnaj, zaj nabaga zria bęnneache, san da dxunna Dios dxi'u naca na cheę xelexegá'ana xrlátaje benne' zantę benne' zaj nune' da zrinnaj. <sup>17</sup> Ne cheę da zrinnaj da bęn tuze benne' gulú'u bęnneache lu na' xel-la gute, na' benne' ca' zaj nazí' lu neę da dxunna Dios cá'aze, ne zaj nagá'ane' xrlátaje lau Le' ba zaj nalé' lu na' dul-la, ne dxelezéquenę' xelenná be'e cuinę' lu xel-la nabán cheę ne cheę da nun xetuze benne', Jesucristo.

<sup>18</sup> Ca guca zaj nabaga zria xúgute bęnneache ne cheę da zrinnaj da bęn tuze benne', Adán, cá'anqueze ne cheę da xrlátaje da bęn xetuze benne', Jesucristo, belexexaca bęnneache xrlátaje cheę xelaca banę'. <sup>19</sup> Ca guca belexexaca bęnneache zantę benne' dul-la lawe' da quebe bzua dizra' tuze benne', cá'anqueze lawe' da bzua dizra' xetuze benne', xelexegá'ana benne' zantę xrlátaje lau Dios.

<sup>20</sup> Bzua Dios da nadxixruj bea na cheę gunná bęadxu na da naca dul-la, na' gate dul-la guxánleę na, ca' guzrendxa xel-la zri'i lazre' cheę Dios. <sup>21</sup> Ca naca zua lu na' dul-la gute na bęnneache, cá'anqueze zua lu na' xel-la zri'i lazre' cheę Dios gucá'ana na dxi'u xrlátaje lau Dios cheę gaca bandxu chadía chacanna ne cheę Xránadxu Jesucristo.

#### Nácadxu ca benne' gate ca' cheę québedxa gundxu dul-la, na' naca bandxu nen Cristo

**6** ¿Bízraqueze nnadxu? ¿Gúndxadxu dul-la cheę gulé'e lówedxa xel-la zri'i lazre' cheę Dios? <sup>2</sup> ¡Cabata! Ba nácadxu ca benne' gate cheę québedxa gundxu dul-la. ¿Ájazra gúndxadxu dul-la? <sup>3</sup> ¿Quebe nézele le'e, xúguteđxu dxi'u ba nadxúadxu nisa cheę gácadxu tuze nen Jesucristo, naca na ca ba nátedxu tu zren nen Le' lu da nadxúadxu nisa? <sup>4</sup> Ca' naca na, ne cheę da nadxúadxu nisa naca ca bgáchedxu tu zren nen Le', ne nátedxu cheę xebandxu, ne súadxu tu lu xel-la nabán cube cáteze guca cheę Cristo, bebanę' ládujla benne' gate ne cheę xel-la waca xabáa cheę Xre'.

<sup>5</sup> Che gúcadxu tuze nen Cristo lu xel-la gute, cá'anqueze gácadxu tuze nen Le' lu xel-la dxexebán cheę'. <sup>6</sup> Nezdxu da gúcadxu gate nate ba gudá na le'e xaga bęguaj tu zren nen Le' cheę cuía xi' benne' dul-la da gúcadxu cheę québedxa gundxu zrin cheę dul-la ca benne' zaj nada'u cheęn. <sup>7</sup> Tu benne' ba nate, ba bedxúaje' lu na' dul-la. <sup>8</sup> Che ba gútedxu tu zren nen Cristo, dxuxrén lázredxu gaca bánquezdxu tu zren nen Le' <sup>9</sup> lawe' da nezdxu quebe gate Cristo da xula lawe' da ba bebanę' ládujla benne' gate, na' québedxa xu'e lu na' xel-la gute. <sup>10</sup> Gate gute Cristo, tu lásaze gutię' ne cheę dul-la waláz cheę xúgute bęnneache, san na'a naca banę', na' lu na' Dios naca banę'. <sup>11</sup> Cá'anqueze le'e, le gueque nácale benne' gate cheę québedxa gunle dul-la, san naca banle lu na' Dios tu zren nen Xránadxu Jesucristo.

<sup>12</sup> Cheę le na' québedxa güele lataj nna be'e dul-la bęla' dxen cheęle da dxal-la' gate, cheę québedxa gun na gunle da dxezá lazre' bęla' dxen cheęle. <sup>13</sup> Quebe guzúa cuínale lu na' dul-la cheę guchine na le'e lu da caleła, san le guzúa cuínale lu na' Dios, gácale ca benne' belexebán ládujla benne' gate, cheę guchínene' le'e lu da xrlátaje. <sup>14</sup> Québedxa gaca dul-la nna be'e na le'e lawe' da québedxa xu'ule lu na' da nadxixruj bea na, san xu'ule lu na' xel-la zri'i lazre' cheę Dios.

#### Tu da dxulé'e na ca naca cheę benne' zaj nada'u

<sup>15</sup> ¿Bizra xca'? ¿Gundxu dul-la lawe' da québedxa xú'udxu lu na' da nadxixruj bea na, san xú'udxu lu na' xel-la zri'i lazre' cheę Dios? ¡Cabata! <sup>16</sup> Ba nézquezle che guzúa cuínale lu na' tu xránale ca benne' zaj nada'u cheę guzúale dizra' cheę', nadxa nácale benne' zaj nada'u cheę xránale, ne dxun na ba xen guzúale dizra' cheę'. Cá'anqueze naca cheęle le'e che guzúale dizra' cheę dul-la, da gunna na le'e xel-la gute, u che guzúale dizra' cheę Dios, cheę gácale xrlátaje. <sup>17</sup> Xcalén Dios, lácala gúcale ca benne' zaj nada'u lu na' dul-la, na'a du lázrele dxuzúale dizra' cheę dizra' li na', lu da na' bzua cuínale. <sup>18</sup> Gate bedxúajle le'e lu na' dul-la, bexácale wen zrin cheę da xrlátaje. <sup>19</sup> (Dxuchálajęna' le'e ca dxuluchalaj bęnneache lawe' da lu bęla' dxen cheęle quebe gaca chéajni'ile ca naca da nigá.) Cáteze bęnle gate na' bzua cuínale lu na' da sban, ne lu na' da zrin-



naj chee gunle da zrinnaj, cá'aqueze le gun na'a, le guzúa cuínale lu na' da xrlátaje chee gácaquezle bi chee Dios.

<sup>20</sup> Gate ne nácale ca benne' zaj nada'u lu na' dul-la, quebe ben na ba xen gunle da xrlátaje. <sup>21</sup> Na'a ¿bizra da ba neza guca chee da ca' dxexedué'ele chee na'a? Da ca' benle nédxute guché na le'e lu xel-la gute. <sup>22</sup> Na'a nadxúajle lu na' dul-la, ne ba nácale wen zrin chee Dios chee gácaquezle bi chee Dios da naché na le'e lu xel-la nabán da zeajlí canna. <sup>23</sup> Benne' dxuné' dul-la dzezi'e lazruj chee' da naca na xel-la gute, san da dxúnnaze Dios dxi'u naca na xel-la nabán da zeajlí canna tu zren nen Xránadxu Jesucristo.

#### Tu da dxulé'e na ca naca chee xel-la wechaga na'

**7** Bi bícha'dau', le'e núnbeale da nadxiruj bea na, zaj xu'u lu na' da nadxiruj bea na bèneache tuze dxácaté ne zaj naca bané'. <sup>2</sup> Ca naca da nigá, tu nu'ula nuchaga na' xu'e lu na' benne' chee' ne chee da nadxiruj bea na dxácaté zue' nabané', san che gate benne' chee', na' xedxúaj zru'ule' lu na' da nadxiruj bea na na'. <sup>3</sup> Ca' naca na, che nu'ula na' súalene' benne' xula dxácaté ne nabán benne' chee', guné' dul-la gáchajne' xrba chee xel-la nuchaga na', san che benne' chee' na' gatie', xedxúaj zru'ule' lu na' da nadxiruj bea na na', na' waca xuchaga ná'lene' benne' xula, ne quebe guné' dul-la da gáchajne' xrba chee xel-la nuchaga na'.

<sup>4</sup> Cá'aqueze naca chee le'e, bi bícha'dau', le'e zrá-gale bel-la' dxen chee Cristo, ba nácale ca benne' gate, ne québedxa xu'ule lu na' da bdxiruj be'e Moisés, chee gácale ca zru'ula benne' xula. Na'a nácale ca zru'ula Cristo, Bénnea' bebané' ládujla benne' gate, chee gácadxu bi guchine Dios. <sup>5</sup> Dxácaté na' béndxu da naca chee bel-la' dxen cheedxu, da nadxiruj bea na ble'e na dxi'u naca dul-la da béndxu ca da dxezá lazre' bel-la' dxen cheedxu, na' da na' guché na dxi'u lu xel-la gute. <sup>6</sup> Na'a ba nácadxu ca benne' zaj nate, na' ba bedxúajdxu lu na' da nadxiruj bea na da gunná be'e na dxi'u, chee gaca gundxu zrin chee Dios lu xel-la nabán cube da dxunna Be' Lá'azxa dxi'u, ne quegá gundxu zrin na' lu da nadxiruj bea gula da naxúaj na.

#### Dul-la da zúale neda'

<sup>7</sup> ¿Bizra nnadxu xca'? ¿Dxun da nadxiruj bea na nácadxu benne' dul-la? ¿Cabata! Quebe gunezda' da naca na dul-la chela ca ble'e da nadxiruj bea na neda'. Quebe gunezda' naca dul-la sa lazra' da naca chee nu benne' chela ca gunná da nadxiruj bea na: Quebe sa lazru' da naca chee nu benne'. <sup>8</sup> Ble'e da nadxiruj bea na neda' da naca dul-la, na' guque be'eda' zúale'e zánete da calela lu xichaj lázrdawa' da guzá lazra', lawe' da gate quebe ne gúnbe'a da nadxiruj bea na, guca dul-la chia' tu da nagache lawa' neda'. <sup>9</sup> Guzúa tu zra gate quebe ne la' da nadxiruj bea, na' gúqueda' naca bana' neda', san gate benda' da na' gunná be'e na neda', bénbe'a da naca dul-la, na' guque be'eda'

nabaga' zria, ne dxal-la' gatia'. <sup>10</sup> Ca'an guca, da nadxiruj bea na' naca na chee gunna na neda' xel-la nabán, san guca na chia' ca tu da bête neda' <sup>11</sup> lawe' da ble'e da nadxiruj bea na' neda' da naca na dul-la, da na' guzi xé na neda', na' ne chee da nadxiruj bea na' guque be'eda' nabaga' zria, ne dxal-la' gatia'.

<sup>12</sup> Ca' naca na, da li naca lá'azxa da nadxiruj bea na. Da nadxiruj bea na' naca na lá'azxa, ne xrlátaje, ne chawe'. <sup>13</sup> ¿Ájazra naca da nigá? ¿Bête da nadxiruj bea xrlátaje na' neda'? ¿Cabata! Dul-la na' bête na neda', na' caní guque be'eda' naca na dul-la. Da nigá guque be'eda' ne chee da nadxiruj bea xrlátaje na', na' caní ble'e da nadxiruj bea na' da sbánle'e naca dul-la.

<sup>14</sup> Nezdxa da nadxiruj bea na naca na da benna Be' Lá'azxa chee Dios dxi'u, san lu bel-la' dxen chia' naca' ca tu benne' nada'u, na' da naca' dxun na guna' dul-la.

<sup>15</sup> Neda' quebe dxéajni'ida' da dxaca chia' lawe' da quebe dxuna' da dxaca lazra' guna', san da dxecuíde-da' naca na da dxuna'. <sup>16</sup> Che dxuna' da calela da quebe dxaca lazra' guna', da na' dxenná da nadxiruj bea na naca na dul-la, na' nezda' xrlátaje naca da nadxiruj bea na. <sup>17</sup> Ca' naca na, quegá neda' dxuna' da na', san dul-la da zúale neda', le na' dxun na ca'.

<sup>18</sup> Nezdxa' quebe bi zúale bel-la' dxen chia' da naca xrlátaje, lawe' da dxezá lazra' guna' da xrlátaje, san quebe dxezéqueda' guna' na. <sup>19</sup> Quebe dxuna' da xrlátaje da dxaca lazra' guna', san dxuna' da calela da quebe dxaca lazra' guna'. <sup>20</sup> Chee le na', che dxuna' da quebe dxaca lazra' guna', quebe naca neda' dxuna' na, san dul-la da zúale neda' dxun na ca'.

<sup>21</sup> Caní naca da dxaca chia': Gate dxaca lazra' guna' da xrlátaje, dxulé'e lawe zúale da calela neda'. <sup>22</sup> Lu xichaj lázrdawa' dxedáneda' da nadxiruj bea Dios, <sup>23</sup> san dxeque be'eda' lu bel-la' dxen chia' zua tu da dxedábaga na ca da dxaca lazra', da naca da nadxiruj bea dul-la da zúale bel-la' dxen chia', na' dxenná be'e na neda'.

<sup>24</sup> ¿Edxugúa neda! ¿Nu guselá neda' lu bel-la' dxen chia' da naché na neda' lu xel-la gute? <sup>25</sup> Xcalén Dios, Le' guné' na ne chee Xránadxu Jesucristo. Ca' naca, lu xichaj lázrdawa' dxuzúa cuina' lu na' Dios, san lu bel-la' dxen chia' naca' ca tu benne' nada'u lu na' da nadxiruj bea dul-la.

#### Xel-la nabán da dxunna Be' Lá'azxa chee Dios dxi'u

**8** Na'a, quebe zaj nabía xi' benne' ca' zaj naque' tuze nen Jesucristo, benne' ca' québedxa dxeluné' da calela cáteze dxenná bea bel-la' dxen chee', san dxeluné' da xrlátaje cáteze dxenná bea Be' Lá'azxa. <sup>2</sup> Da nadxiruj bea na da dxunna Be' Lá'azxa, Bénnea' dxunne' dxi'u xel-la nabán lawe' da nácadxu tuze nen Jesucristo, ba bselá na neda' lu na' da bdxiruj be'e Moisés da dxulé'e na neda' naca' benne' dul-la, ne nabaga' zria, ne dxal-la' gatia'. <sup>3</sup> Ba ben Dios da quebe guca gun da bdxiruj be'e Moisés, ba gudúe' dul-la da zaj nabaga bèneache. Da nadxiruj bea na quebe guca gun na gundxu da xrlátaje lawe' da nate ni'a na' bel-la' dxen cheedxu. Chee le na' Dios gusel-le' Zrí'in-

equeze', na' guque' bèneache ca naca beła' dxen cheędxu da xu'u na lu na' dul-la, cheę gutię' ne cheę dul-la cheędxu, lawe' da nabágadxu zria gátedxu ne cheę dul-la da zúale beła' dxen cheędxu. <sup>4</sup> Caní beņe' cheę gaca gundxu da nadxixruj bea na, dxi'u québedxa dxundxu ca dxenná bea beła' dxen cheędxu, san dxundxu ca dxenná bea Be' Lá'azxa.

<sup>5</sup> Benne' dxelune' ca dxenná bea beła' dxen cheę' zaj dxe'e gunne xue da naca cheę beła' dxen cheę', san benne' dxelune' ca dxenná bea Be' Lá'azxa zaj dxe'e gunne xue da naca cheę Be' Lá'azxa. <sup>6</sup> Benne' zaj dxe'e gunne xue da naca cheę beła' dxen cheę' weláte-queze', san benne' ca' zaj dxe'e gunne xue da naca cheę Be' Lá'azxa xelaca banę', ne xelebeza zri lazre'.

<sup>7</sup> Benne' zaj dxe'e gunne xue cheę beła' dxen cheę' dx-elecuídenę' Dios, lawe' da quebe dxelaca lazre', ne quebe gaca xuluzúa cuine' lu na' da nadxixruj bea Le'. <sup>8</sup> Cheę le' na' benne' dxelune' ca da dxezá lazre' beła' dxen cheę' quebe gaca xelune' da dxezaca ba lazre' Dios.

<sup>9</sup> Le'e quebe dxunle ca dxenná bea beła' dxen cheęle, san dxunle ca dxenná bea Be' Lá'azxa, lawe' da ba zúale Be' Lá'azxa cheę Dios le'e. Benne' quebe zúale Be' Lá'azxa le', Be' da nase-la Cristo, quebe naque' bi cheę Cristo. <sup>10</sup> Lácala zua Cristo lu xichaj lázrdaule, lu beła' dxen cheęle dxal-la' gátele, san lu xichaj lázrdaule ba xu'ule tu xel-la nabán cube lawe' da bca'ana Dios le'e xrlátaje. <sup>11</sup> Che zúale Be' Lá'azxa le'e, Be' cheę Dios, Bénnea' bsebanę' Jesucristo ládujla benne' gate, Léqueze Dios na', Bénnea' bsebanę' Le', gunne' xel-la nabán cube cheę beła' dxen cheęle da gátequeze na. Da nigá gunę' ne cheę Be' Lá'azxa cheę Dios, Bénnea' zue' xichaj lázrdaule.

<sup>12</sup> Ca' naca na, bi bícha'dau', nabágadxu tu da gundxu, san quegá cheę gundxu ca dxenná bea beła' dxen cheędxu. <sup>13</sup> Che gundxu ca dxenná bea beła' dxen cheędxu, gátequezdxu, san che ne cheę Be' Lá'azxa guzúadxu chalá'ala da dxun beła' dxen cheędxu, na' gaca bandxu.

<sup>14</sup> Xúgute benne' ca' dxelún ca dxulé'e Be' Lá'azxa le', benne' caní zaj naque' bi cheę Dios. <sup>15</sup> Be' Lá'azxa da guzi' lu na'le quebe dxugu'e le'e lu xel-la dxezrebe ca benne' zaj nada'u, san dxunę' nácale bi cheę Dios. Ne cheę Be' Lá'azxa nigá dxennędxu: "Xrae", gate dx-uláwizredxu Dios. <sup>16</sup> Léqueze Be' Lá'azxa nigá dxex-echébelęne' be' nácadxu, dxenné' nácadxu bi cheę Dios. <sup>17</sup> Che nácadxu bi cheę' ca', gácaqueze cheędxu da naca cheę Dios. Gaca cheędxu da dxal-la' gaca cheę Cristo che gudedxu xel-la zi' tu zren nen Le', cheę xegá'ana szrendxu tu zren nen Le'.

<sup>18</sup> Dxéqueda' ca xel-la zi' da dxededxu na'a quebe gutíl-lelebe na ca da xabáa da sidxu lu zra da za za'.

<sup>19</sup> Da dxelezá lazre', ne da dxelebeza xúgute da nun Dios naca na cheę gulé'e Dios bi zaj naca be' bi cheę' ca'. <sup>20</sup> Ca naca da nun Dios belexaca na dácheze, quegá ca gulaca lazre' le' na, san lawe' da núnqueze Dios gaca na ca'. Beņe' zua da dxelebeza lazre na <sup>21</sup> lawe' da xeledxúaj ca da nun Dios lu na' da dxuzríja

xi' le' na, cheę gaca ba neza cheę na tu zren nen bi ca' zaj naca bi ca' cheę Dios lu xel-la weselá cheębe' da naca xabáa. <sup>22</sup> Nézquezdxu, ca zrin na'a zra, xúgute da nun Dios dxelebezre we' na, ne dxeledé na xel-la zi' ca tu nu'ula zue' xel-la dxudía cheę sanę' bidau'. <sup>23</sup> Quegá tuze da na' nun Dios dxedé na xel-la zi', san cá'an-queze dxi'u dxededxu xel-la zi', dxi'u na' ba zúale Be' Lá'azxa dxi'u, da naca cheędxu tu da dxunna bea na da dxal-la' sidxu. Cá'anqueze dxi'u dxebezre lázredxu dxá-cate na' dxebézadxu zra gulé'e Dios nácadxu bi cheę' ca', gate na' gunne' cheędxu tu beła' dxen cube. <sup>24</sup> Lu da dxebeza lázredxu guládxu, san che gaca lé'edxu da dxebeza lázredxu, québedxa naca na tu da dxebeza lázredxu. Tu da ba dxelé'edxu, québedxa dxun na ba xen cueza lázredxu na. <sup>25</sup> Che da dxebeza lázredxu naca na tu da quebe gaca lé'edxu, dxun na ba xen cuézadxu na lu dute xel-la zren lazre' cheędxu.

<sup>26</sup> Cá'anqueze Be' Lá'azxa dxácalęne' dxi'u lu xel-la nate ni'a na' cheędxu. Quebe nezdXu guchálajlędxu Dios ca dxal-la' gundxu, san Léqueze Be' Lá'azxa dxue lazre' lau Dios waláz cheędxu, ne dxebezre lazre' ca da quebe dxezeque' nu nne. <sup>27</sup> Dios, Bénnea' dxennę'e da zua xichaj lázrdaudxu nézene' da dxaca lazre' nne Be' Lá'azxa lawe' da dxue lazre' Be' Lá'azxa lau Dios cáteze naca da dxaca lazre' Dios waláz cheę bi zaj naca be' cheę'.

#### Nácadxadxu wal-la ca tu benne' dxezrué'ene'

<sup>28</sup> NezdXu dxuchine Dios xúgute da dxaca cheędxu cheę gucá'ana na dxi'u chawe', dxi'u na' nazrí'idxu Le', na' Le' bláwizre' dxi'u ca naca da nune' gunę'. <sup>29</sup> Benne' ca' bēnbea Dios nédxudaute, ben Le' nédxudaute xelaque' ca naca Zrí'inequeze', cheę gaca Zrí'ine' na' Benne' blau ládujla zánete bi biche'. <sup>30</sup> Benne' ca' ben Dios nédxudaute ca xelaque', cá'anqueze bláwizre' le', na' benne' ca' bláwizre', cá'anqueze bca'anę' le' xrlátaje, na' benne' ca' bca'anę' xrlátaje, cá'anqueze bca'ana szrēnqueze' le'.

<sup>31</sup> ¿Bizra nnadxu cheę da caní? Che caní dxácale Dios dxi'u, ¿nuzra benne' seque' tábague' dxi'u? <sup>32</sup> Dios quebe bezúene' zi' gunne' dxi'u Zrí'inequeze', san bdeę' Le' cheę gútię' waláz cheędxu. ¿Quebe gunne' cheędxu xúgute da ca' tu zren nen Zrí'ine'? <sup>33</sup> ¿Nuzra seque' bi nne cheę benne' ca' ba gucá'a Dios le'? Léqueze Dios na' bca'anę' benne' ca' xrlátaje. <sup>34</sup> ¿Nuzra benne' seque' nne' zaj nabaga zria benne' ca'? Léqueze Cristo gutię' waláz cheędxu, ne da naca na blaudxa, naque' Bénnea' bebán ládujla benne' gate, na' zue' chalá'a xabęla cheę Dios, ga dxue lazre' lau Le' waláz cheędxu. <sup>35</sup> ¿Nuzra seque' xecá'a dxi'u lu na' Cristo, Bénnea' nazrí'ine' dxi'u? ¿Wazeque' xel-la zi', u xel-la xache', u da nau zi' xuzre na dxi'u, u xel-la dxedún, u da dxugúa zra lánadxu, u da stębe, u xel-la gute?

<sup>36</sup> Naca na ca da naxúaj na lu dizra' lá'azxa, dxenná na:

Lawe' da nácantu' bi chiu' zúaquezentu' gátentu' xúgute zra.

Dxelune' netu' ca zríla'dau' ba zaj zúaba' cheę xelútię'-ba'.

<sup>37</sup> Lu xúgute da caní nácadxadxu szren ca benne' dx-elezrué'ene', ne chee Bénnea' bzri'ine' dxi'u. <sup>38</sup> Chee le na' dxuxrén lazra' quebe bi de da seque' gucuasa na dxi'u lu na' Dios, Bénnea' nazrí'ine' dxi'u.

Ne xel-la gute, ne xel-la nabán, ne gubáz chee xabáa ca', ne be' xriwe' dxelenná bea, ne xel-la waca chee be' xriwe' ca', ne da dxaca na'a, ne da za za', <sup>39</sup> ne da zua xabáa, ne da zua lu xezr la xu, ne xetú da nun Dios, quebe seque' xecá'a na dxi'u lu xel-la zri'i lazre' chee Dios, da blé'ene' dxi'u gate bdee' Xránadxu Jesucristo waláz cheedxu.

### Dios guqué'e benne' Israel ca'

**9** Dxennia' da li ca bi chee Cristo, ne quebe dxun lazra', na' xichaj lázrdawa' ne chee Be' Lá'azxa dxe na neda' naca na da li. <sup>2</sup> Dxexíaje lázrele'eda', ne tu zúzqueze xel-la dxudía lu lázrdawa', <sup>3</sup> na' dxezá lázrtea' cuía xi'a neda', ne xecuasa' nen Cristo, la naca da nigá da gácale na bi bícha'dau' ca', benne' waláxr chia', benne' judío. <sup>4</sup> Benne' caní zaj naque' zri'ine zre sua Israel, na' Dios guz'í lu ne'e benne' caní ca bi chee' ca'. Dios guzú'e ládujla benne' ca' lu da xabáa chee', ne bēne' tu xel-la wezría nen benne' ca', ne bnéruje' le' da nadxixruj bea na da bzuaj Moisés, ne xel-la wil-la chee xudau', ne da nachebe lazre'. <sup>5</sup> Zaj naque' zri'ine zre zua xra xrtáudxu ca', na' ládujla benne' waláxr chee' ca', lu belá' dxen chee' bla' Cristo, Bénnea' naque' Dios lawe' xúgute da de, ne gaca báqueze' chadía chacanna. ¡Ca' gaca na!

<sup>6</sup> Quebe nnadxu quebe dxun Dios da dxenná xrtizre', san da naca na, quegá xúgute zri'ine zre sua Israel zaj nababa benne' Israel ca' chee Dios. <sup>7</sup> Quegá xúgute zri'ine zre sua Abraham zaj naca xánnie' zri'inequeze', san naca na ca guzre Dios le', gunné': "Lu zri'ine zre sua Isaac xelaca zri'ine zre su'." <sup>8</sup> Da nigá dxul'é na dxi'u quebe nu naca bi chee Dios cáteze nálajbe', san zaj naca bi chee' benne' ca' zaj nálaje' ca naca da guchebe lazre' Dios. <sup>9</sup> Ca naca da guchebe lazre' Dios da gunné' chee Abraham naca na da nigá: Lu zra da ba gunnía' xida', na' Sara chiu' sane' tu zri'inu'.

<sup>10</sup> Quegá tuze da nigá, san cá'anqueze gate Rebeca guzrá' chupa zri'ine' naca tuze xrabe', Isáac, xra xrtáudxu, <sup>11</sup> ne gate bi ca' quebe ne xelálajbe', ne quebe ne xelunbe' da xrlátaje u da calela, Dios guzre' Rebeca: "Bi waca chiu' gácabe' wēn zrin chee bi cuide'." Da nigá naca na tuze nen da naxúaj lu dizra' lá'azxa, da dxenná na: Bzri'ida' Jacob, ne quegá Esaú. Ca' guca na, begá'ana chawe' da xu'u lu na' Dios chee gudxé'e' ca naca da núnqueze', benne' ca' dxaca lazre' guláwizre', ne quebe dxuché'e' ca da zaj nune'.

<sup>14</sup> ¿Bízraqueze nnadxu? ¿Naca Dios Benne' quebe dxun da xrlátaje? ¡Cabata! <sup>15</sup> Guzre' Moisés: "Wezrí lazra' benne' dxaca lazra', ne wexache lazra' benne' dxaca lazra'." <sup>16</sup> Ca' naca na, quebe naca lawe' da dxaca lázredxu, ne quegá lawe' da dxun zi' lázredxu, san

naca na lawe' da dxexache lazre' Dios dxi'u. <sup>17</sup> Lu dizra' lá'azxa Dios dxe'e' wenná bea chee xezr la xu Egipto: "Bēna' lue' wenná bea chee gulé'eda' ne chiu' lue' xel-la waca chia', ne chee xelúnbea bēneache La neda' du gabí'i xezr la xu." <sup>18</sup> Ca' naca na, Dios dxexache lazre' benne' dxaca lazre', ne cá'anqueze dxu'e' lataj gaque' zizraj lazre' benne' dxaca lazre' gu'e' lataj gaque' zizraj lazre'.

<sup>19</sup> Na'a xi'u neda': Che caní naca na, ¿bizr chee na' dx-ugapa Dios bēneache dul-la? ¿Núzraqueze seque' tábaga ca da dxaca lazre' Le'? <sup>20</sup> Lue', benne', ¿nuzra nacu' lue' chee gutil-lu' Dios dizra'? ¿Waca tu xesu' xē na benne' bēne' le' na: ¿Bizr chēe na' bēnu' neda' caní? <sup>21</sup> Benne' wēn xesu' zruaga na' wazéquene' gun'e' chee guna' na' ca dxaca lazre'. Wazéquene' gun'e' chee gun-a' ná'queze tu xesu' da zácadxa, ne tu xesu' da xálaze. <sup>22</sup> ¿Bizra nnáquezdXu che Dios guca lazre' gulé'ene' dxi'u ca dxuzría xi'e bēneache, ne ca naca xel-la waca chee', na' lu xel-la zren lazre' chee' bchaga lawe' chee benne' ca' lácala dxal-la' xeledé'e' le' xel-la zi', na' xele-bía xítēqueze'?

<sup>23</sup> Bēne' na chee blé'ene' ca naca xel-la szren chee da xabáa chee' lu da naca cheedxu dxi'u, nácadxu benne' dxexache lazre' Le', ne bequé'e' dxi'u nédxute chee gaca cheedxu xabáa na' da nucueza Le'. <sup>24</sup> Dios bláwizre' dxi'u ládujla benne' judío, ne ládujla benne' quebe zaj naque' judío. <sup>25</sup> Naca na ca naxúaj na lu dizra' lá'azxa ca gunná Oseas, gunné':

Benne' ca' quebe zaj naque' bi chia', xapa' le' bi chia', na' benne' quebe bzri'ida', xapa' le' bi nazri'ite' lazra'.

<sup>26</sup> Lu lataj naga gucha'-be': Quebe nácale bi chia', ná'queze xapa' le' bi chee Dios ban.

<sup>27</sup> Ca naca chee benne' Israel ca', Isaías dxenné': "Lá-cala zaj naxán zri'ine zre sua Israel ca naxán xuzre' dxe' dxu'a tu xegu zren, bábaze benne' ca' xelex-egá'ane' chee xeledé'", <sup>28</sup> lawe' da gun Xránadxu ca dxenná xrtizre', guzría xi'e zezr la xu nigá lu da naca xrlátaje, ne chadite. <sup>29</sup> Naca na ca gunná lé'queze Isaías na' gate nate, gunné':

Chela Xránadxu, Xrana zánete' gubáz chee xabáa, quebe bca'ane' zri'ine zre súadxu ca',

na' xenítedxu ca guca chee xezre Sodoma, ne chee xezre Gomorra.

### Benne' judío ca', ne dizra' chawe'

<sup>30</sup> ¿Bízraqueze nnadxu? Benne' quebe zaj naque' judío, ne quebe belexexílaj lazre' xelexegá'ane' xrlátaje lau Dios, zaj naque' benne' belexegá'ane' xrlátaje lau Dios, da zéaje na, belexegá'ane' xrlátaje lawe' da guleajlí lazre' Cristo. <sup>31</sup> Benne' Israel ca', benne' belun'e' ca dxenná da nadxixruj bea na da dxal-la' xucá'ana na le' xrlátaje lau Dios, quebe gulezéquene' xelexegá'ane' xrlátaje lawe' Le'. <sup>32</sup> ¿Bizr chee na'? Naca na lawe' da quebe belun'e' ba xuzre xelexegá'ane' xrlátaje ne chee xel-la dxeajlí lazre' chee', san gulaca lazre' xelex-egá'ane' xrlátaje ne chee da belúnqueze' le'. Chee le' na' xea'jlecházie' lawe' xiaj da dxelechegu bēneache,

da na' naca Cristo <sup>33</sup> ca da dxenná Dios lu dizra' lá'azxa chee', dxenné':

Neda' dxuzúa' lu xezre Sión tu benne' naque' xiaj da dxelechegu bènneache.

Nu benne' cheajlí lazre' Le' quebe xedué'equezne'.

**10** Le'e, bi bícha'dau', da dxezá lazra', ne da dxenaba' Dios guné' chee' benne' Israel ca' naca na chee' xelélé'. <sup>2</sup> Ca naca chee' benne' ca', da li dxelebile lazre' da naca chee' Dios, san quebe naca na chee' xel-la sina li. <sup>3</sup> Quebe zaj nézene' ca xrlátaje dxucá'ana Dios bènneache, san dxelaca lazre' xulucá'ana xrlátaje cuine', ne quebe dxelezi' lu ne'e ca xrlátaje dxucá'ana Dios bènneache. <sup>4</sup> Cristo dxuné' da dxaca lazre' Dios gun da nadxiruj bea na, lawe' da dxucá'ana Cristo xrlátaje xúgute' bènneache dxeleajlí lazre' Le'.

<sup>5</sup> Ca naca chee' da dxucá'ana xrlátaje bènneache lau Dios da naca na ne chee' da nadxiruj bea na, bzuaj Moisés caní: Benne' dxuné' ca naca da dxenná da nadxiruj bea na gaca bané' ne chee' le na. <sup>6</sup> Ca naca chee' da dxucá'ana xrlátaje bènneache lau Dios da naca na ne chee' xel-la dxeajlí lazre' dxenná na caní: Quebe nnau' lu lazrda'u: "¿Núzraqueze benne' cuéne' xabáa?" (da naca na chee' gulétaje' Cristo), <sup>7</sup> ne quebe nnau': "¿Núzraqueze benne' xétaje' lataj chul-la chee' benne' gate ca'?" (da naca na chee' xebéaje' Cristo lá-dujla benne' gate.) <sup>8</sup> ¿Bizra da na' dxenná na: Dizra' na' zua na gágute' naga zu', lu dxu'u ne lu lazrda'u? Dizra' nigá naca na dizra' chawe' da dxuzénentu' bènneache chee' xeléajle'e chee' Cristo. <sup>9</sup> Che nen dxu'u dxennáu' naca Cristo Xranu', ne che lu lazrda'u dxeajlí lazru' Dios bsebané' Le' ládujla benne' gate, nadxa lau'. <sup>10</sup> Lu lázrdaudxu dxeajlí lázredxu chee' xegá'anadxu xrlátaje lau Dios, ne nen dxú'adxu dxexechébedxu nácadxu chee' Cristo chee' ladxu.

<sup>11</sup> Lu dizra' lá'azxa dxenná na: Nu benne' dxeajlí lazre' Le' quebe xedué'ene'. <sup>12</sup> Dios quebe dxebéé' benne' judío ca', u benne' quebe zaj naque' Xrana xúgute' bènneache, na' dxunézrujle'e xúgute' benne' ca' dxululáwizre' Le'. <sup>13</sup> Naca na ca da dxenná na: Xúgute' benne' dxululáwizre' La Xránadxu xelélé'. <sup>14</sup> Na'a ¿ájazra xululáwizre' Le' che quebe ne xeléajle'e chee'? ¿Ájazra xeléajle'e chee' che quebe ne xelenne' nu dxuchalaj chee'? ¿Ájazra xelenne' che quebe nu chilá' benne' guzenne' le'? <sup>15</sup> ¿Ájazra xuluzenne' bènneache che quebe nu nase-la le'? Naca na ca dxenná dizra' lá'azxa, dxenná na: Xrtante' naca lau Dios da dxelún benne' dxeledé' dxuluzenne' bènneache dizra' chee' xel-la dxebeza zri lazre', ne dizra' chawe'.

<sup>16</sup> Quegá xúgute' bènneache dxelezi' lu ne'e dizra' chawe' nigá. Naca na ca gunná Isaías, gunné': "Xran, ¿zua nu benne' ba guxéajle'e ca da dxuchálajntu'?"

<sup>17</sup> Ca' naca na, dxéajledxu chee' gate dxénedxu, na' da dxal-la' xénedxu naca na da gunná Cristo.

<sup>18</sup> Na'a dxenaba': ¿Quebe ne xelenne'? Da li ba belenne'. Lu dizra' lá'azxa dxenná na:

Da dxuluzén benne' caní bache belén bènneache du ca naca

xezr la xu nigá.

Dizra' chee' benne' caní bache belén bènneache du gabí'i xezr la xu.

<sup>19</sup> Xecha lasa dxenaba': ¿Quebe ne xeleque be'e benne' Israel ca da gunná Dios? Za'a Moisés bzuaje' ca gunná Dios, gunné':

Neda' guna' gácale benne' se lazre' chee' tu xezre benne'

quebe ne xelaque' tu xezre.

Guna' zrá'ale tu xezre benne' quebe ne xeléajni'ine'.

<sup>20</sup> Gudé na' bzuaj Isaías ca gunná Dios, gunné':

Benne' quebe belexilaje' neda' belexezreléne' neda'.

Ble'e lawa' benne' ca' quebe bululáwizre' neda'.

<sup>21</sup> Ca naca chee' benne' Israel, gunná Dios: "Tu dxuláwizrazqueza' benne' quebe dxuluzúe' dizra', ne dxeledábage' xrtizra'."

### Nu benne' Israel ca' zaj nalé'

**11** Na'a dxenaba': ¿Ba bzua Dios chalá'ala xezre chee', benne' Israel ca', tu chí'izqueze? ¿Cabata! Néda'queza' naca' benne' Israel. Neda' nabábalena' zri'ine zre sua Abraham, ne nabábalena' zri'ine zre sua Benjamín. <sup>2</sup> Gate nate Dios guz' lu ne'e benne' Israel ca', na' na'a quebe nuzúe' benne' ca' chalá'ala. ¿Quebe nézele le'e da dxenná dizra' lá'azxa ca naca chee' Elías, bènnea' bchálaje' waláz chee' Dios, gate na' gudawe' zria benne' Israel ca' lau Dios? Gunné': <sup>3</sup> "Xran, ba belútié' benne' buluchálaje' waláz chiu', ne buluzría xi'e lataj lá'azxa chiu' ca', na' tuza' neda' nagá'ana', na' cá'anqueze neda' dxelaca lazre' xelútié'." <sup>4</sup> Dios bechebe', guzre' Elías: "Ba gucá'a chia' ga xun chi gaxúa benne' quebe ne xuluzúa zribé' lau bedáu' xiaj xaga le na Baal." <sup>5</sup> Cá'anqueze na'a ba begá'ana tu cue' benne' ca', benne' ba gucá'a Dios chee' lu xel-la zri'i lazre' chee'. <sup>6</sup> Na'a, che naca na ne chee' xel-la zri'i lazre' chee' Dios, quebe naca na ne chee' da gaca gun nu benne', lawe' da la guca na ca', na' xel-la zri'i lazre' chee' Dios quebe naca na xel-la zri'i lazre'.

<sup>7</sup> ¿Bizra xca'? Benne' Israel ca' quebe belezrué'ene' da dxelexilaje', san benne' ca' gucá'a Dios le' belezrué'ene' na, san xezícadxa benne' ca' gulaque' benne' zide'.

<sup>8</sup> Naca ca dxenná dizra' lá'azxa, dxenná na: Dios be'e lataj gulaca benne' ca' lázrdau zide'. Be'e le' lataj gulaque' ca benne' la chul-la, ne ca benne' cwezru' ca', na' caní zaj naque' na'a. <sup>9</sup> Cá'anqueze gunná David, gunné':

Ca naca laní chee' benne' ca' ben xelaca na ca tu xralaj,

u ca tu da que'la na le'

chee' cheajlecházie', na' gudé Dios le' lu da ba xa'.

<sup>10</sup> Xiaj lawe' xelechul-la na chee' québedxa xelélé'ene', na' xelélé'güe' chadía chacanna zran xua da naca na dul-la chee'.

### Ca zaj nalá benne' quebe zaj naque' judío

<sup>11</sup> Na'a dxenaba': ¿Tu chí'ize belenite benne' judío ca' gate xeajlecházie'? ¿Cabata! Gate benne' judío ca'

guledábage' xrtizra Dios, guta' lataj xeledá benne' quebe zaj naque' judío, chee xelezúa benne' judío ca' lu xel-la dxezá lazre'. <sup>12</sup> Na'a, che da zrinna' da belún benne' judío ca' ben na guca tu da ba neza chee xúgute' bèneache, ne che gate belenitié' guca na tu da ba neza chee benne' quebe zaj naque' judío, gaca na tu da ba neza zrendxa gate xelexú'u xúgute' benne' judío ca' lu na' Dios.

<sup>13</sup> De tu da dxal-la' xapa' le'e, núlale quebe nácale benne' judío. Lawe' da gusel-la Dios neda' chee guzen-da' benne' quebe zaj naque' judío xrtizre', dxé'le'a gunne xue chee zrin nabaga' guna'. <sup>14</sup> Dxaca lazra' guna' xelezúa lu xel-la dxezá lazre' bal-la benne' walá'zr chia' chee xeledé'. <sup>15</sup> Che gate bzua Dios chalá'ala benne' judío ca', belexaca tuze nen Dios benne' quebe zaj naque' judío, ¿ájazra gaca gate xelexaca benne' judío ca' tuze nen Dios? Gaca na ca xelexaca bané' lá-dujla benne' gate. <sup>16</sup> Che guzúadxu lau Dios xeta nedxu chee cua, na' nácaqueze chee' duté' cua na'. Na' che naca chee Dios lue xaga, zaj nácaqueze chee' ca naca zruze xaga na'.

<sup>17</sup> Benne' judío ca' zaj naque' ca zruzequeze tu xaga olivo, san bal-la zruze guledxugu na, na' lue' beda'u walá'z chee zruze ca', ne nacu' ca tu zruze xaga olivo xixre'. Ca'an guca, gucu' tuze nen lue xaga olivo chawe' na', ne dxezi'u ba neza xel-la nabán chee xaga olivo na'. <sup>18</sup> Quebe gucá'ana szren cuinu' lawe' zruzequeze xaga olivo na'. Che dxucá'ana szren cuinu', naca be'e quebe dxugagu' lue' lue xaga na', san luéqueze na' dxugagu' na lue'.

<sup>19</sup> Wannáu': Awe', guledxugu zruze ca' chee chea-jxedá'a neda' le'e xaga olivo na'. <sup>20</sup> Ca'an naca, san guledxugu na lawe' da quebe guléajle'e chee Dios, na' lue' bedá'azu' le'e xaga na' lawe' da dxéajle'u. Ca'an naca, quebe gucá'ana szren cuinu', san bxue xanne' cuinu'. <sup>21</sup> Che Dios quebe bnite lawe' chee benne' ca' zaj naque' ca zruzequeze xaga na', na' bebéajle' le', cá'anqueze quebe gunite lawe' chiu' lue', na' xebéajle' lue'. <sup>22</sup> Le nna'xque ca xrlátaje naca Dios, na' cá'anqueze ca snia naque'. Guque' snia nen benne' ca' xea-jlecházie', na' naque' chawe' nen lue'. Dxun na ba xen tu gúnzquezu' ca dxal-la' gunu' chee tu sí'zquezu' da chawe' chee', lawe' da che quebe gunu' caní, cá'anqueze wegüé' lue'. <sup>23</sup> Che benne' judío ca' xelexexéaj lazre', na' xelexaque' tuze nen xaga olivo na', lawe' da napa Dios xel-la waca xuné' le' tuze. <sup>24</sup> Lue' quebe nacu' judío, san guchugue' lue' le'e tu xaga olivo xixre', na' bexuné' lue' tuze nen xaga olivo chawe' na', da quebe nu dxun. Benne' judío ca', benne' zaj naque' ca zruzequeze xaga olivo chawe' na', gácadxa chawe' xexuné' le' tuze nen xaga olivo cheéqueze' na'.

#### Ca xelexú'u benne' judío lu na' Dios

<sup>25</sup> Le'e, bi bícha'dau', dxaca lazra' chéajni'ile chee da nagache nigá, chee quebe guéquele nácale benne' sina. Benne' Israel ca' zaj naque' benne' lázrdau zide' tu chí'idauze, ca zrin zra xelexú'u lu na' Dios xúgute' benne' quebe zaj naque' judío. <sup>26</sup> Gate gaca na, nadxa

xeledá xúgute' benne' Israel ca' lawe' da naxúaj lu dizra' lá'azxa da dxenná na:

Benne' weselá ze'e Sión,  
na' cue' da calela da zaj nabaga zri'ine zre sua Jacob.  
<sup>27</sup> Da nigá gaca xel-la wezría guna' nen benne' ca', gate neda' cua' dul-la chee'.

<sup>28</sup> Ca naca chee dizra' chawe' chee Cristo, zaj naca benne' judío ca' ca benne' dxelecuídené' Dios chee gaca da ba neza chee le'e, san Dios ne nazrí'ine' benne' ca' lawe' da guqu'é'e xra xrtawe' ca'. <sup>29</sup> Ca da dx-unna Dios, quebe xequ'é'e na, ne quebe dxuzúé' chalá'ala nu ba bláwizre'. <sup>30</sup> Le'e nédxute' gudábagale xrtizra Dios, san na'a, lawe' da guledábage benne' judío ca' xrtizre', Dios dxexache lazre' le'e. <sup>31</sup> Cá'anqueze na'a, benne' judío ca' dxeledábage' xrtizra Dios, san naca na chee xexache lazre' Dios le' ca dxexache lazre' le'e. <sup>32</sup> Dios be' lataj xúgute' guledábage' xrtizre' chee gaca xexache lazre' xúgute'.

<sup>33</sup> Szrenté naca xel-la gunní'a chee xel-la sina, ne xel-la dxéajni'i chee Dios. Quebe séquedxu chéajni'idxu ca da dxuchi'e, ne quebe gaca gúnbea xánnedxu da dx-uné'. <sup>34</sup> ¿Núzraqueze gaca chéajni'i ca da xu'u xichaj lázrdau Xránadxu? ¿Núzraqueze gaca guzéajni'i le'?

<sup>35</sup> ¿Núzraqueze benne' bi bnézruje' chee Xránadxu, chee gun na ba xen bi xuzri'e chee bènea'? <sup>36</sup> Xúgute' da dxel'é'dxu zá'aca na lu na' Dios, na' le' bené' da ca', ne zaj naca na chee Léqueze'. ¡Gaca ba Dios chadía chacanna! ¡Ca'an gaca na!

#### Da dxal-la' gun benne' naque' bi chee Dios

**12** Ca'an naca, bi bícha'dau', lu xel-la dxexache lazre' chee Dios, dxata' xúeda' le'e guzúa cuínale lu na' Dios ca tu guna' ban, da naca na lá'azxa, ne da xezaca ba lazre' Dios. Da nigá naca na tu da gucá'ana szrene Dios da dxal-la' gunle. <sup>2</sup> Québedxa gunle ca dx-elún bèneache chee xezr la xu nigá, san le guchá cuínale chee caní zra duté' ca naca lu xichaj lázrdau. Ca'an gaca, gúnbeale da dxaca lazre' Dios gunle, da na' naca xrlátaje, ne da dxezaca ba lazre' Dios, ne da naca na li lazre'.

<sup>3</sup> Ne chee da nusebaga Dios neda' lu da chawe' chee' dxapa' xúgutele le'e quebe nu benne' dxal-la' gucá'ana cuine' szrendxa ca dxal-la' guné', san dxal-la' guxúé' ca da naque' lu xel-la dxexruj lazre', cáteze naca xel-la dx-eajlí lazre' da nunezruj Dios le'. <sup>4</sup> Ca naca chee bel-la' dxen cheedxu, zánete da napa na, na' xúgute' da ca' quebe dxelún na tuze zrin, <sup>5</sup> cá'anqueze dxi'u, láqueze naxandxu, nácadxu ca tuze bel-la' dxen chee Cristo, ne nácadxu tuze tudxu xetudxu ca zaj naca da ca' napa tu bel-la' dxen chee nu benne'.

<sup>6</sup> Dios nunne' dxi'u cha cheedxu ca da gaca gundxu ca da dxaca lazre' gunné' tu tudxu. Dخال-la' guchine xánnedxu ca da nunne' dxi'u.

Che nunne' dxi'u chee guchálajdxu waláz chee', dxal-la' gundxu na duté' xel-la dxeajlí lazre' da ná-padxu.

<sup>7</sup> Che nunne' dxi'u chee gundxu zrin chee ljwézredxu, dxal-la' gundxu na cháwe'dau'.

Che nunne' dxi'u chee gusededxu benneache, dxal-la' gusede xannedxu le'.

<sup>8</sup> Che nunne' dxi'u chee gutipadxu lazre' benneache, dxal-la' gutipa xannedxu lazre' le'.

Che nunne' dxi'u chee bi gunézrujdxu, dxal-la' gundxu na du lázredxu.

Che nunne' dxi'u chee nne xuedxu, dxal-la' guxúe xannedxu ca dxundxu na.

Che nunne' dxi'u gácaleđdxu benne' xache' ca', dxal-la' gundxu na dutę xel-la dxebe' cheedxu.

<sup>9</sup> Le zri'i ljuwézrele du lázrele tule xetule.

Le guzúa chalála'ala da caleła, ne le gun da xrlátaje.

<sup>10</sup> Dخال-la' zri'i ljuwézrele tule xetule ca nazri'ile bi bíchequezle.

Le gapa ba lánana ljuwézrele, ne le güe lataj tule xetule.

<sup>11</sup> Le gun zi' lázrele, ne quebe gácale zrawede, na' le gun zrin chee Xránadxu dutę lázrdaule.

<sup>12</sup> Le sua xel-la dxebe' lu da dxebeza lázrele.

Le gaca dxexruj lazre' gate dxedele xel-la zi'.

Le guchálajlezeze Xránadxu.

<sup>13</sup> Le gunezruj da dxelexazrje benne' ca' zaj naque' bi chee Dios.

Le si' lu na'le du lázrele benne' ca' zá'aque' dxelenabe' le'e.

<sup>14</sup> Le naba da chawe' chee benne' ca' zaj nau zi' xuzre' le'e.

Le naba da xrlátaje chee', ne quebe ná bale da caleła chee benne' ca'.

<sup>15</sup> Le be nen benne' dxelebe', ne le xexache lazre' benne' ca' dxelebezre xache'.

<sup>16</sup> Le gaca tuze nen ljuwézrele tule xetule.

Quebe gucá'ana szren cuínale, san le gaca tuze nen benne' dxexruj lazre' ca'.

Quebe guéquele ba ná pale dutę xel-la sina.

<sup>17</sup> Quebe xebi'ile da caleła chee benne' nune' chee da caleła.

Le gun ba xuzre gunle da xrlátaje lau xúgute' benneache.

<sup>18</sup> Che naca chee, le gun naga ze lau séquele cueza zri lázrele nen xúgute' benneache. <sup>19</sup> Bi bícha'dau' nazri'ite lazra', quebe xebéaj lázrele, san le güe lataj Dios xebéaj lazre', lawe' da naxúaj lu dizra' lánazxa da dxenná na: Chia' neda' naca xebéaj lazra'. "Neda' xebi' chee benneache," dxenná Xránadxu. <sup>20</sup> Cá'anqueze dxenná na: Che dxedún benne' dxecuđene' lue', bnezruj da gawe', na' che dxeбіlene', bnezruj da xí'aje', lawe' da gate dxunle caní, xedué'e bennea'. <sup>21</sup> Quebe gu'u lataj da caleła nna be'e na lue', san gunná be'e da caleła ne chee da xrlátaje da dxunu'.

**13** Xúgutedxu dxal-la' guzúadxu dizra' chee benne' xu'u lawe', lawe' da quebe nu chilá' benne' xu'u lawe' che quebe nunna Dios le' xel-la dxenná bea chee'. Benne' xu'u lawe' ca' zaj naque' benne' nuzúa Dios. <sup>2</sup> Chee le na' nu benne' dxedábague' benne' xu'u lawe' dxedábague' ca da nun Dios. Benne' dxeledábague' caní zaj nabague' zria, na' Dios xuzri'e chee' da xexal-le'. <sup>3</sup> Benne' ca' dxelenná be'e quebe nuzúa Dios le' chee xuluchebe' benne' dxelune' da x-

látaje, san chee xuluchebe' benne' dxelune' da caleła. ¿Dxaca lazru' quebe zrebu' benne' xu'u lawe'? Ben da xrlátaje, na' benne' xu'u lawe' ca' xelape' ba lánana lue' <sup>4</sup> lawe' da zaj naque' wen zrin chee Dios chee xelune' chiu' da xrlátaje. Che dxunu' da caleła, dxal-la' zrebu' lawe' da quegá dácheze zaj nape' xel-la dxenná bea xelxebe'e chee benneache lawe' da zaj naque' wen zrin chee Dios chee xuluzúe' lu da ba xa' benne' ca' dxelune' da caleła. <sup>5</sup> Chee le na', dxun na ba xen guzúadxu dizra' chee benne' xu'u lawe', quegá tuze chee quebe xuluzúe' dxi'u lu da ba xa', san lawe' da nezdxu naca na da nadxixruj bea Dios. <sup>6</sup> Chee le na' dxízruje da dxebágale chee xu'u lawe', lawe' da zaj naca benne' xu'u lawe' wen zrin chee Dios, ne dxelún xánnie' zrin chee' na'.

<sup>7</sup> Le quizruj xúgute' benneache ca da nabágale chee'. Da nabágale chee benne' wechizruj, le quizruj da nabágale.

Da nabágale chee xu'u lawe', le quizruj na.

Benne' dxal-la' gápale ba lánana, le gape' ba lánana.

Benne' dxal-la' gucá'ana szrenle, le gucá'ane' szren.

<sup>8</sup> Quebe dxal-la' cue zria chee nen nu benne' san tuze chee zri'ile le' ca dxal-la' gunle chee le sa' ljuwézrele tule xetule. Che gunle da nigá, na' gunle da nadxixruj bea na. <sup>9</sup> Naga zaj naxúaj da nadxixruj be'e Dios dxenná na:

Quebe súalenu' zru'ula benne' xula.

Quebe gutiu' benne'.

Quebe cuanu'.

Quebe gun lazru' chee benne'.

Quebe sa lazru' da naca chee benne'.

Xúgute' da nadxixruj bea caní, ne xúgute' da nadxixruj bea xezícadxa dxun bennea' dxuzúe' dizra' da nadxixruj bea na' dxenná na: Bzri'i le sa' ljuwezru' ca nazri' cuinu'. <sup>10</sup> Bennea' nazri'ine' le sa' ljuwezre' quebe dxune' da caleła chee le sa' ljuwezre' na'. Ca'an naca, bennea' nazri'ine' le sa' ljuwezre' dxuzúe' dizra' chee da nadxixruj bea na.

<sup>11</sup> Ca naca da caní, le guxúe xanne' ca naca zra zúadxu na'a lawe' da ba bzin zra xebandxu lu bchigala lawe' da ba zua gágudxa zra ladxu lu da nácadxu ca guzúa na gate na' guzú lau dxéajledxu. <sup>12</sup> Ba dxedé chee da chul-la, ne ba za te zra. Chee le na' dxal-la' gusandxu da dxelún benneache lu da chul-la, na' gácadxu ca tu benne' zeje' wedil-la dxacu zra lanę' xia, chee tadxu lu xel-la naxaní' chee Dios.

<sup>13</sup> Dخال-la' tadxu li lazre' ca dxal-la' tadxu te zra.

Quebe dxal-la' xí'ajdxu da dxuzuzre na benneache, ne quebe gagu xrátadxu.

Quebe gundxu da sban, ne da caleła.

Quebe tíl-laledxu le sa' ljuwézredxu, ne quebe gácadxu xa lazre'.

<sup>14</sup> Xránadxu Jesucristo gácaqueze' ca zra lánadxu xia, na' quebe gundxu da dxezá lazre' be'a' dxen cheedxu.

#### Quebe si tizru' biche ljuwezru'

**14** Che tu bi bíchedxu quebe ne se cháchabe' lu xel-la dxeajlí lazre', le si' lu na'le lebe', san quegá

chee gutíl-lalele lebe' dizra' ca naca da quebe dxun na ba xen. <sup>2</sup> Ca naca na, zaj zra' benne' dxelejíl lazre' naca chee' xelawe' bal-la bi de, san zaj zra' benne' xezí-cadxa quebe ne xelezé chache' lu xel-la dxeajíl lazre', na' dxeléquene' waca xelawe' tuze xixre' cuan. <sup>3</sup> Benne' dxawe' xúgute' da ca' quebe dxal-la' guzúe' chalá'ala bènea' nadxúaj nadxeze da dxawe', na' benne' nadxúaj nadxeze da dxawe' quebe dxal-la' si tizre' bènea' dxawe' bal-la bi de, lawe' da nazí' lu na' Dios bènea'. <sup>4</sup> ¿Nuzra nacu' lue' dxezí tizru' wen zrin chee' Xránadxu? Che xegá'ane' xrlátaje, u che quegá, naca na da nabaga Xránadxu. Xegá'ane' xrlátaje lawe' da napa Xránadxu xel-la waca chee' gucá'ane' le' xrlátaje.

<sup>5</sup> Caní naca xetú. Zaj zra' benne' dxulupá'anadxé' tu zra ca xetú zra, na' zaj zra' benne' dxeléquene' tuz ca zaj naca xúgute' zra. Tu tudxu dxal-la' se cháchadxu lu xichaj lázrdaudxu ca naca da caní. <sup>6</sup> Benne' dxupá'ane' tu zra dxuné' na chee' gape' ba lá'ana Xránadxu, na' bènea' quebe dxupá'ane' zra na' dxuné' ca' chee' gape' ba lá'ana Xránadxu. Benne' dxawe' bal-la bi de dxuné' na chee' gape' ba lá'ana Xránadxu lawe' da dxé'e Dios: Xcalenu', na' bènea' nadxúaj nadxeze da dxawe' dxuné' na chee' gape' ba lá'ana Xránadxu, na' cá'anqueze dxé'e Dios: Xcalenu'.

<sup>7</sup> Netudxu dxi'u naca bandxu chee' gundxu da naca cheézedxu, ne quegá gátedxu lu da naca cheézedxu.

<sup>8</sup> Che naca bandxu, naca na chee' gaca ba Xránadxu. Ca' naca na, che gaca bandxu, u che gátedxu nácadxu bi chee' Xránadxu. <sup>9</sup> Cristo guti'e, ne bebané' chee' gaque' Xrana benne' gate ca', ne Xrana benne' ban ca'.

<sup>10</sup> Na'a lue', ¿bizr chee' na' quebe dxelé'enu' chawe' ca da dxun le sa' ljwezru', bi bíchedxu? ¿Bizr chee' na' dxuzú' le' chalá'ala? Xúgutedxu dxal-la' zrindxu lau Cristo chee' guchi'e ca da nundxu tu tudxu. <sup>11</sup> Naxúaj lu xiche lá'azxa da dxenná na:

Dxenná Xránadxu: "Dxuzetaj cuina' dxennía':

Xúgute' bèneache xuluzú zribe' lawa'.

Xúgute' xelexechebe' lawe' lau naca' Dios."

<sup>12</sup> Ca'an naca, tu tudxu dxi'u dxun na ba xen gulé'edxu ca da nundxu lau Dios.

<sup>13</sup> Chee le na' québedxa dxal-la' si tízradxu tudxu xetudxu. Le gun ba xuzre quebe bi gunle da gun na ga chegu bi bíchele, u da gun na cheajcházie' lu dul-la.

<sup>14</sup> Dxuxrén lazra' Xránadxu Jesús, ne nezda' quebe bi da dxágudxu nácaqueze sban, san che tu bi bíchedxu dxéquebe' de tu da dxágudxu da naca na sban, chee lebe' naca na da sban. <sup>15</sup> Che ne chee' da dxagu' lue', dxunu' dxeajchaze bi bichu', quebe dxunu' da naca chee' xel-la zri'i lazre'. Quebe gunu' cuía xi' tu benne', bènea' gute Cristo waláz chee', lawe' da dxaca lazru' lue' gagu' bi xel-la wagu. <sup>16</sup> Quebe bi gunle da güe lataj nu nne schanní' chee' da dxéquele naca na da xrlátaje.

<sup>17</sup> Chee súadxu naga dxenná be'e Dios dxi'u quebe naca na chee' da dxágudxu, u chee' da dxí'ajdxu, san naca na chee' xegá'anadxu xrlátaje lau Dios, ne chee' gápadxu xel-la dxebeza zri lazre', ne chee' súadxu xel-la dxebe', da ca' nápadxu ne chee' Be' Lá'azxa. <sup>18</sup> Nu

benne' dxuné' zrin chee' Cristo caní dxuné' da dxezaca ba lazre' Dios, na' dxelapa bèneache le' ba lá'ana.

<sup>19</sup> Ca' naca na, dxal-la' gundxu da dxulusá na xel-la dxebeza zri lazre', ne da dxuluzúa chacha na dxi'u.

<sup>20</sup> Quebe guzría xi'u da nun Dios lu xichaj lázrdau le sa' ljwezru' ne chee' da dxagu'. Da li xúgute' da dxágudxu zaj naca na xrlátaje, san quebe naca xrlátaje bi gágudxu da gun na cheajchaze benne' xula lu dul-la.

<sup>21</sup> Xrlátaje naca quebe gágudxu bela', ne quebe xí'ajdxu xrise uva wal-la, ne quebe bi gundxu da gun na cheajchaze bi bíchedxu lu dul-la, u da guzría xi na xel-la dxeajíl lazre' chee'. <sup>22</sup> Che napu' xel-la dxeajíl lazre' bi gaca gunu', dxal-la' gunu' na lué'queze lau Dios. Ba neza naca na chee' benne' quebe guzría xi' cuine' ne chee' da dxéquene' naca na da xrlátaje guné'.

<sup>23</sup> Bènea' dxawe' da dxéquene' quebe dxal-la' gawe', nabague' zria gate dxawe' na lawe' da dxawe' da quebe dxeajíl lazre' naca chee' gawe'. Xúgute' da dxundxu zaj naca dul-la che quebe dxuxrén lázredxu zaj naca na xrlátaje.

**Ben da dxezaca ba lazre' bi bichu', ne quegá da dxezaca ba lázrezu' lue'**

**15** Dxi'u ba ze cháchadxu lu xel-la dxeajíl lazre' dxal-la' gácalédxu benne' quebe ne se chache' lu xel-la dxeajíl lazre', ne quebe gundxu da dxezaca ba lázredxu dxí'uze. <sup>2</sup> Tu tudxu dxal-la' gundxu da dxezaca ba lazre' bi bíchedxu lu da gun na chawe' cheebe', ne lu da gusegula na lebe' lu xel-la dxeajíl lazre' cheebe'. <sup>3</sup> Crístoqueze quebe bene' da dxezaca ba lazre' leze', san guca chee' ca naxúaj na lu dizra' lá'azxa, dxenná na: Benne' ca' gulenné' schanni' chiu' Lue', Dios, guca na ca gulenné' schanni' chia' neda'. <sup>4</sup> Xúgute' da naxúaj nédxudauté lu dizra' lá'azxa zaj naxúaj na chee' guzéajni'i na dxi'u, chee' gápadxu xel-la dxebeza lazre' ne chee' xel-la zren lazre', ne xel-la dxexúe zren, da ca' nápadxu ne chee' da ca' zaj naxúaj na. <sup>5</sup> Dxenaba' lau Dios, Bènea' dxunne' dxi'u xel-la zren lazre', ne dxexúe zrene' dxi'u, chee' gácaléne' le'e chee' gácale tuze tule xetule ne chee' Jesucristo, <sup>6</sup> chee' gunle xúgutele tu zren güe lá'anale Dios, Xra Xránadxu Jesucristo.

**Dxelén benne' quebe zaj naque' judío dizra' chawe'**

<sup>7</sup> Ca'an naca, chee' gaca ba Dios, le si' lu na'le ljwézrele tule xetule ca ben Cristo, guz' lu ne'e dxi'u.

<sup>8</sup> Ca da dxennéa' neda', dxennéa' bla' Cristo, ne bene' zrin chee' benne' judío ca', chee' bene' ca da guchebe lazre' Dios lau xra xrtáudxu ca', ne caní blé'ene' naca Dios li lazre'. <sup>9</sup> Cá'anqueze ble'e chee' xelúe lá'ana Dios benne' ca' quebe zaj naque' judío lawe' da dxexache lazre' bèneache, ca da naxúaj na caní chee' Cristo lu dizra' lá'azxa, dxenné':

Güe lá'ana' lue', Dios, lau benne' xezr la xu ca', ne tu gul-lazqueza' da xelapa ba lá'ana Lue'.

<sup>10</sup> Cá'anqueze dxenná na:

Le be, le'e, bèneache duté xezr la xu nen benne' zaj naque' bi chee' Dios.

<sup>11</sup> Cá'anqueze dxenná na:

Le güe lá'ana Xránadxu,  
le'e, bèneache chee xúgute xęzr la xu,  
ne le guchalaj chee xel-la szren chee',  
le'e, xúgute bèneache.

<sup>12</sup> Cá'anqueze bchalaj Isaías ca naca chee Cristo, gun-  
né':

Welá'queze tu zri'ine zre sua Isaí,  
Bénnea' nna bé'ene' xúgute cue' xęzr la xu,  
na' benne' ca' xelebeza lazre' Lę'.

<sup>13</sup> Dxenaba' Dios, Bénnea' dxunne' dxi'u xel-la dxe-  
beza lazre', chee gúnnałe'e le'e xel-la dxebe', ne xel-la  
dxebeza zri lazre' lawe' da dxeajlı lázrele Lę', chee gá-  
pale'equezle xel-la dxebeza lazre' ne chee xel-la waca  
chee Be' Lá'azxa.

<sup>14</sup> Le'e, bi bícha'dau', dxuxrén lazra' nápałe'e da  
chawe', ne núnbeale xúgute chee gaca guzėjni'ile  
ljwézrele tule xetule. <sup>15</sup> Lu xiche nigá bechugu lazra'  
guzújaja' chee da caní chee quebe gal-la lázrele na. Dx-  
una' na ne chee da bsebaga Dios neda' lu da chawe'  
chee'. <sup>16</sup> Caní guna' zrin chee Jesucristo lądujla benne'  
quebe zaj naque' judío. Zrin dxuna' naca na chee  
guzenda' bèneache dizra' chawe' chee Dios chee  
guzrá'a benne' quebe zaj naque' judío lau Dios ca tu  
guna' da dxezaca ba lazre' Lę'. Xelaque' benne' lá'azxa  
ne chee Be' Lá'azxa.

<sup>17</sup> Lu da naca' chee Jesucristo waca xezaca ba lazra' lu  
zrin dxuna' chee Dios <sup>18</sup> lawe' da quebe dxedxugu  
lazra' guchálaja', san tuze ca naca da nun Cristo ne  
chia' neda', chee guna' xuluzúa benne' quebe zaj  
naque' judío xrtizra Dios. Da nigá beña' ne chee da  
bchálaja', ne da beña', <sup>19</sup> ne ne chee xel-la waca chee  
da ble'e Dios, nen xel-la waca chee xabáa, ne ne chee  
xel-la waca chee Be' Lá'azxa. Caní bchálaja' dizra'  
chawe' chee Cristo du ca naca xęzr la xu. Guzú lawa'  
dxuna' na xęzre Jerusalén, bzrintea' naga nababa Ilíri-  
co. <sup>20</sup> Caní naca, beña' ba xuzre bchálaja' dizra' chawe'  
naga quebe ne xelenne' La Cristo, chee quebe guna'  
zrin naga ba zaj nun zrin xezícadxa benne', <sup>21</sup> na', ca  
dxenná dizra' lá'azxa:

Xelélé'e benne' ca' quebe ne zrin nu benne' guzenne'  
lę' chee Cristo,

na' benne' ca' quebe ne xelén chee Lę' xelėjni'ine da  
naca chee'.

#### Pablo dxugú'u be'e chėjje' xęzre Roma

<sup>22</sup> Chee guzenda' le'e da caní, da zan lasa guca lazra'  
xedajnná'a le'e zrale xęzre Roma, san quebe guca  
chia'. <sup>23</sup> Na'a, ba bexuzre beña' zrin nigá, ne lawe' da  
zánete' iza ba guca lazra' xida' súalęna' le'e, <sup>24</sup> dxebeza  
lazra' tea' xedajnná'a le'e gate cha'a lu xęzr la xu Es-  
paña. Gate te sua' xel-la dxebe' nen le'e dxebeza lazra'  
xusi'ile neda' neza, na' cha'a ná'ala. <sup>25</sup> Na'a cha'a  
Jerusalén, gu'a late' da gácale' na bi bíchedxu zaj zře'e  
na', <sup>26</sup> lawe' da bi bíchedxu zaj zře'e xęzre ca' zaj naba-  
ba Macedonia, ne xęzre ca' zaj nababa Acaya  
guléquene' naca xrlátaje bulutube' dumí da xelesel-lę'  
chee bi bíchedxu zaj naque' baxache', zaj zrabe'

Jerusalén. <sup>27</sup> Guléquene' naca xrlátaje xelune' da nigá,  
na' caní naca na lawe' da dxelebague' chee benne' ca',  
lawe' da benne' judío ca', benne' dxelėjle'e chee  
Cristo, bulunézruje' chee benne' quebe zaj naque'  
judío chee da zaj nape' chee Dios, na' benne' caní dxal-  
la' xulunézruje' chee benne' judío ca' chee da zaj nape'  
chee xęzr la xu nigá. <sup>28</sup> Caní naca, gate xexuzre guna'  
da nigá, ne ba bnézruja' lę' dumí nigá, na' cha'a lu xęzr  
la xu España, na' ca teza' xedajnná'a le'e. <sup>29</sup> Dxuxrén  
lazra' gate xida' naga zrale le'e, gúale'a da chawe' chee  
dizra' chawe' chee Cristo.

<sup>30</sup> Le'e, bi bícha'dau', dxata' xúeda' le'e ne chee Xrá-  
nadxu Jesucristo, ne ne chee xel-la zri'i lazre' da dxun-  
na Be' Lá'azxa dxi'u, chee gácale tuze nen neda'  
guchálajłędxu Dios chee gácale' neda'. <sup>31</sup> Le naba  
Dios chee guselé' neda' lu na' benne' quebe dxelėjle'e  
chee Cristo naga nababa Judea, ne chee xelezi' du  
lazre' bi bíchedxu zaj zře'e Jerusalén dumí nigá da nu'a,  
<sup>32</sup> na' che naca da dxaca lazre' Dios, la'a lu dutę xel-la  
dxebe' xedajnná'a le'e, ne chee xezi' lazra' naga zrale  
le'e. <sup>33</sup> Dxenaba' Dios, Bénnea' dxunne' dxi'u xel-la dxe-  
beza zri lazre', súalęne' xúgutele le'e. ¡Ca'an gaca na!

#### Pablo dxugape' diuzre bi bíchedxu ca'

**16** Dxegu'a lu na'le nu'ula zandxu Febe, nu'ula na'  
ba beņe' zrin chee Cristo lądujla bi bíchedxu zaj  
zře'e xęzre Cencrea. <sup>2</sup> Le si' lu na'le lę' cháwedau' lu La  
Xránadxu, ca dxal-la' gaca lądujla bi bíchedxu dxelėja-  
jle'e chee Cristo, na' le gácale'ne' bíteteze da dxexázr-  
jene', lawe' da ba gúcale lę' benne' zan, ne né-  
da'queza'.

<sup>3</sup> Le gugapa diuzre Priscila ne Aquilo, benne' belún  
zrin chee Jesucristo tu zren nen neda'. <sup>4</sup> Benne' caní  
buluzúe' xel-la nabán chee' lu da stebe chee gúcale'ne'  
neda'. Ca' naca na, dxapa' benne' ca' xcalenle, ne  
quegaze neda', san cá'anqueze dxelún xúgute bi  
bíchedxu quebe zaj naque' judío. <sup>5</sup> Le gugapa diuzre bi  
bíchedxu ca' dxeleżrágabe' lizre Priscila, ne Aquilo. Le  
gugapa diuzre Epeneto, benne' ljwezra' nazri'ite' lazra'.  
Lę' guque' benne' nedxu naga nababa Acaya guxėja-  
jle'e chee Cristo. <sup>6</sup> Le gugapa diuzre María, nu'ula na'  
ba beņle'e zrin lądujla le'e. <sup>7</sup> Le gugapa diuzre benne'  
walázr chia', Andrónico, ne Junias, benne' ca' gulaque'  
ljwezra' lizre xia. Zaj naque' benne' blau lądujla benne'  
gubáz ca' chee Cristo, na' gulėjle'e chee Cristo nédx-  
udxa ca neda'.

<sup>8</sup> Le gugapa diuzre Amplias, benne' ljwezra' nazri'ite'  
lazra' lu La Xránadxu. <sup>9</sup> Le gugapa diuzre Urbano,  
benne' ljwezra' lu zrin chee Jesucristo, ne le gugapa di-  
uzre Estaquis, benne' nazri'ite' lazra'. <sup>10</sup> Le gugapa di-  
uzre Apeles, benne' blé'ene' da zan lasa ca dxeajlı  
lazre' Cristo. Cá'anqueze le gugapa diuzre Aristóbulu,  
benne' xrtia'. <sup>11</sup> Le gugapa diuzre Herodión, benne'  
walázr chia', ne Narciso, benne' xrtia', benne' dxelėja-  
jle'e chee Xránadxu. <sup>12</sup> Le gugapa diuzre Trifena ne Tri-  
fosa, nu'ula ca' dxelune' zrin chee Xránadxu, ne le gu-  
gapa diuzre Pérsida, bi zandxu nazri'ite' lazrdxu, nu'ula  
na' ba beņle'e zrin chee Xránadxu. <sup>13</sup> Le gugapa diuzre



Rufo, benne' blau dxéajlęę cheę Xránadxu, ne xrnęę, nu'ula na' naque' ca xrnáqueza'. <sup>14</sup> Le gugapa diuzre Asíncrito, ne Flegonte, ne Hermas, ne Patrobas, ne Hermes, ne bi bíchedxu ca' zráłęę' le'. <sup>15</sup> Cá'anqueze le gugapa diuzre Filólogo, ne Julia, ne Nereo, ne nu'ula zane', ne Olimpas, ne xúgute' bi bíchedxu dxeleajlí lazre' Cristo, benne' zráłęę' benne' caní.

<sup>16</sup> Le gugapa diuzre Ijwézrele tule xetule, gunídate Ijwézrele. Xúgute' cue' bi bíchedxu dxulugape' le'e diuzre.

<sup>17</sup> Le'e, bi bícha'dau', dxata' xúeda' le'e, nna' xánnele benne' ca' dxelunę' chupa la'a bi bíchedxu ca', ne dxelunę' dxeajlecházie' benne' ca', na' dxulusédenę' da dxedábaga na ca da nusédele. Le cuasa naga zaj zra' benne' ca' <sup>18</sup> lawe' da quebe dxelún benne' ca' zrin cheę Xránadxu Jesucristo. Dxelunę' ca da dxezaca ba lazre' bęla' dxen cheęqueze', ne dxelezí xęę benneáchedu ca' quebe ne xeleneze xánnie' ca naca dizra' chawe'. Benne' wen lazre' ca' cadite zaj nupéę, ne zaj nézene' da dxuluchálaje'. <sup>19</sup> Xúgute' bėnneache zaj nézene' ca ba bzúale xtizra' Dios. Cheę le' na' dxebeda', ne dxaca lazra' gácale ban lazre' gunle da xrlátaje, na' quegá gunle da calęla. <sup>20</sup> Dios, Bėnnea' dxunne' dxí'u xel-la dxebeza zri lazre' ba zúaqueze' gácalęę' le'e, cheę guchúchujle Satanás da xriwe'. Dxenaba' lau Xránadxu Jesucristo gunę' gaca chawe' cheęle.

<sup>21</sup> Bi bíchedxu Timoteo dxugápabe' le'e diuzre. Ná-cabe' Ijwezra' lu zrin cheę Cristo. Cá'anqueze dxulu-

gape' le'e diuzre benne' walázr chia' Lucio, ne Jasón, ne Sosípater.

<sup>22</sup> Neda', Tercio, dxuzúaja' xtizra' Pablo caní, dxugapa' le'e diuzre lu La Xránadxu.

<sup>23</sup> Gayo dxugape' le'e diuzre, bėnnea' zua' lizre', na' dxunne' lizre' naga dxelezraga xúgute' benne' bíchedxu caní. Cá'anqueze dxulugape' le'e diuzre Erasto, benne' xu'u lu neęę dumí cheę xęzre, ne bi bíchedxu Cuarto.

<sup>24</sup> Dxenaba' Xránadxu Jesucristo gunę' gaca chawe' cheę xúgutele le'e. ¡Ca'an gaca na!

### Pablo dxue lá'ane' Dios

<sup>25</sup> Na'a, dxue lá'anantu' Dios, Bėnnea' séquene' guzė cháchadxę' le'e lu dizra' chawe' da dxuzenda' bėnneache, ne lu da dxusédeda' ca naca cheę Jesucristo. Da nigá naca na tuze nen da ble'e Dios cheę da nache da gulú'u chawe' bagácheze nédxudate, <sup>26</sup> san na'a ba ble'e lawe' na ne cheę dizra' lá'azxa da buluzúaj benne' ca' buluchálaje' waláz cheę Dios, ca da bdxixruj be'e Dios chadía chacanna. Ba ble'e lau dizra' chawe' nigá na'a lau benne' xúgute' xęzr la xu cheę xeléajlęę cheę na, ne xuluzúę' dizra' cheę na.

<sup>27</sup> Dios, Benne' tu licha', ne Benne' sina, gaca ba Le' chadía chacanna ne cheę Jesucristo. ¡Ca'an gaca na!

# 1 Corintios

Pablo dxuzúaje' chee bíchedxu zaj zře'e xezre Corinto

**1** Neda', Pablo, naca' benne' bláwizra Dios chee gaca' gubáz chee Jesucristo. Naca na da guca lazre' Dios gaca'. Tu zren nen bíchedxu Sóstenes <sup>2</sup> dxuzúaja' da nigá chee le'e, bi bicha', zrágale chee Dios lu xezre Corinto. Nácale bi chee Dios lawe' da nácale tuze nen Jesucristo. Dios ba bláwizre' le'e chee gácale bi cheequeze' tu zren nen xúgutę benne' ca' zaj zře'e du ca naca xezr la xu, ne dxululáwizre' La Xránadxu Jesucristo, Bénnea' naque' Xrane benne' ca', ne Xránadxu dxi'u. <sup>3</sup> Dxenaba' Xradxu Dios, ne Xránadxu Jesucristo gunne' le'e xel-la dxebeza zri lazre', ne gun chawe'e le'e.

**Da chawe' da nápadxu ne chee Cristo**

<sup>4</sup> Dxápequeza' Dios: Xcalenu', ca naca chee ne chee da chawe' da benna Dios le'e ne chee Jesucristo. <sup>5</sup> Lawe' da nácale tuze nen Cristo, Dios ba benne' le'e xel-la gunní'a zante' da naca chee Be' Lá'azxa chee', lu da dxuchálajle, ne lu da nézele. <sup>6</sup> Ca' naca na, da dxuchálajdxu ca naca chee Cristo ba guca na li chee le'e. <sup>7</sup> Ca' naca na, quebe bi dxexárjele ca da dxunna Dios dxi'u dxácatę dxebézadxu zra xelá' Xránadxu Jesucristo. <sup>8</sup> Le' guxru chache' le'e ca zrin zra bzebe, chee quebe nu benne' gaca gusebáguę le'e zría gate xelá' Xránadxu Jesucristo. <sup>9</sup> Dios tu dxúnzqueze' ca da nachebe lazre', naque' Bénnea' bláwizre' le'e chee gácale tuze nen Zrí'ine', Xránadxu Jesucristo.

**Dxaca chupa la'a bi chee Cristo**

<sup>10</sup> Bi bicha', dxata' xúeda' le'e lu La Xránadxu Jesucristo, chee gácale tuze, ne quebe gácale chupa la'a. Le gaca xanne' tuze, ne tuze da cu'u xichaj lárdaule, ne da gunle. <sup>11</sup> Da nigá dxapa' le'e, bi bicha', lawe' da buluzén benne' xrtia Cloé neda' dxutíl-lale dizra'. <sup>12</sup> Da nigá zéaje na nácale chupa la'a, na' bál-lale dxennale: Netu' da'ntu' Pablo. Xezícale' dxennale: Netu' da'ntu' Apolos. Xezícale dxennale: Netu' da'ntu' Pedro. Xezícale dxennale: Netu' da'ntu' Cristo. <sup>13</sup> ¿Dxéquele naca Cristo chupa la'a? ¿Dxéquele gudá'a neda', Pablo, le'e xaga béguaj waláz chee? ¿Bedxúale le'e nisa lu la Pablo? <sup>14</sup> Xcalén Dios quebe núlale le'e bchua' nisa san tuze Crispo, ne Gayo <sup>15</sup> lawe' da quebe nu gaca nna: Lu la Pablo gudxúa' nisa. <sup>16</sup> Cá'anqueze bchua' nisa benne' xrtia Estéfanos, san quebe dxejásá lazra' che nu xetú bchua' nisa. <sup>17</sup> Cristo quebe gusel-le' neda' nu guchúa' nisa, san chee guzenda' bénneache dizra'

chawe' chee', quegá nen dizra' sina, chee quebe gaca dácheze da ben Cristo gate gutię le'e xaga béguaj.

**Cristo naque' xel-la waca, ne xel-la sina chee Dios**

<sup>18</sup> Dizra' ca gute Cristo le'e xaga béguaj naca na ca tu da xálaze lau benne' xelebía xi'e, san cheedxu dxi'u, nápadxu xel-la weselá, dizra' nigá napa na xel-la waca chee Dios. <sup>19</sup> Naca na ca naxúaj na lu dizra' lá'azxa.

**Dxenná Dios:**

Guzría xi'a xel-la sina chee benne' sina ca', ne guzúa' chalá'ala xel-la naxéajni'i chee benne' dxeléajni'ine'.

<sup>20</sup> ¿Gazra nagá'ana benne' sina na'a? ¿Waca guselá cuine'? ¿Gazra nagá'ana benne' dxusédene' bénneache? ¿Gazra nagá'ana benne' dxuchálaje' ca naca da dxaca lu xezr la xu nigá? Ca naca xel-la sina chee xezr la xu nigá, Dios ba nune' na tu da xálaze lawe' da tuze Le' gaca guselé' bénneache. <sup>21</sup> Dios nézene' xúgutę. Quebe be'e lataj bénneache xelúnbe'e Le' ne chee xel-la sina chee bénneache. Bezaca ba lazre' Dios ne chee dizra' nigá bselé' benne' ca' dxuluxrén lazre' Le', lálcala zaj zra' benne' dxeléquene' naca dizra' nigá tu da xálaze.

<sup>22</sup> Benne' judío ca' dxelaca lazre' xelélé'ene' xel-la waca da za xabáa, na' benne' griego ca' dxelalexíajle' xel-la sina, <sup>23</sup> san dxi'u dxuzendxu bénneache ca naca chee Cristo, ca gutię le'e xaga béguaj. Benne' judío dxelaxedué' chee dizra' nigá, na' benne' quebe zaj naque' judío dxeléquene' naca na tu da ca zeaje na. <sup>24</sup> Na'a, benne' ca' ba bláwizra Dios, benne' judío ca', ne benne' quebe zaj naque' judío, Cristo nácaqueze' xel-la waca, ne xel-la sina chee Dios. <sup>25</sup> Da dxeleque bénneache naca tu da xálaze chee Dios nácadxa na sina ca xel-la sina chee bénneache, na' da dxeleque bénneache naca na tu da naca bea nate ni'a na' Dios nápadxa na xel-la waca ca xel-la waca chee bénneache. <sup>26</sup> Le'e, bi bicha', dxal-la' gueque be'ele ba bláwizra Dios le'e lálcala bábaze le'e nácale sina lau bénneache chee xezr la xu nigá, ne bábaze le'e nácale xel-la dxenná bea, u nácale xrtia benne' zaj naque' blau. <sup>27</sup> Dios ba guquę'e benne' ca' dxeleque bénneache zaj naque' benne' xálaze, chee xelaxedué'e benne' sina ca', ne ba guquę'e benne' ca' dxeleque bénneache zaj nate ni'a ne'e, chee xelaxedué'e benne' wal-la ca'. <sup>28</sup> Dios ba guquę'e benne' ca' quebe zaj naque' blau, ne benne' ca' zaj nuzúa' bénneache chalá'ala, benne' ca' quebe nu zaj naque', chee guzaguę naze benne' zaj naque' blau, <sup>29</sup> chee quebe nu seque' gucá'ana szren cuina lau Dios.

<sup>30</sup> Diósqueze ba nune' le'e tuze nen Jesucristo, ne nune' naca Cristo Benne' dxunna dxi'u xel-la sina, ne Benne' gucá'ana dxi'u xrlátaje, ne Benne' dxuzúe' dxi'u lu na' Dios, ne benne' dxexá'awe' dxi'u. <sup>31</sup> Ca' naca na ca da naxúaj na lu dizra' lá'azxa, da dxenná na: Che nu benne' dxaca lazre' nu gucá'ana szrene', dxal-la' gucá'ana szrene' Xránadxu.

### Dizra' ca naca chee Cristo, gudé'e xaga béguaj

**2** Na'a, bi bícha'dau', gate bedajchálajlena' le'e da li chee Dios, quebe bchíneda' dizra' sina, ne dizra' zaca. <sup>2</sup> Gate ne zúalena' le'e quebe guca lazra' guchálaja' chee bila da xetú san tuze chee Jesucristo, Bénnea' gudé'e xaga béguaj. <sup>3</sup> Gate guzúalena' le'e ne nátete ni'a na'a, ne guzrízetea' lawe' da bzreba' quebe guca guna' da nusebaga' Cristo neda'. <sup>4</sup> Gate bchálajlena' le'e, ne bzenda' le'e dizra' chawe', quebe guca lazra' guna' chéajle chee' nen dizra' sina chee bénneache da guchálaja', san bēna' guxéajle chee' ne chee Be' Lá'azxa, ne ne chee xel-la waca chee Dios <sup>5</sup> chee gá-pale xel-la dxeajlí lazre' da naca na ne chee xel-la waca chee Dios, ne quegá ne chee xel-la sina chee bénneache.

### Dios dxulé'e cuine' ne chee Be' Lá'azxa

<sup>6</sup> Dxuchálajntu' dizra' sina lau benne' ca' ba zaj zē chache' lu xel-la dxeajlí lazre' chee'. Xel-la sina nigá quebe naca na xel-la sina chee xēzr la xu nigá, ne chee benne' dxelenná be'e lu xēzr la xu nigá, benne' ca' xeledé chie'. <sup>7</sup> Dxuchálajntu' xel-la sina nagache chee Dios, da na' bzua Dios nédxudautē ca bene' xēzr la xu nigá, chee ladxu chadía chacanna. <sup>8</sup> Netú benne' ca', benne' dxelenná be'e lu xēzr la xu nigá, quebe guléajni'ine' da nigá, lawe' da la guléajni'ine' na quebe buludé'e Xránadxu, Benne' xabáa, le'e xaga béguaj. <sup>9</sup> Naca na ca da naxúaj na lu dizra' lá'azxa, dxenná na: Dios ba nucueze' chee benne' ca' zaj nazrí'ine' Le' da ca' quebe nu ne le'e, ne quebe nu ne xen, ne da quebe nu ne cu'u lazre'.

<sup>10</sup> Da caní zaj naca na da ble'e Dios dxi'u ne chee Be' Lá'azxa nasel-la Le', lawe' da dxelé'e Be' Lá'azxa xúgute da de, ne dutē da xu'u na lu xichaj lázrdau Diósqueze.

<sup>11</sup> Ládujla bénneache, ¿nu seque' neze da xu'u lu xichaj lázrdau xetú benne', san tuze be' da nacaqueze? Cá'anqueze, tuze Be' Lá'azxa chee Dios nézene' da xu'u lu xichaj lázrdau Dios. <sup>12</sup> Be' Lá'azxa da xú'udxu quebe naca na chee xēzr la xu nigá. Nazidxu Be' Lá'azxa da dxunna Dios dxi'u chee chéajni'idxu da ca' ba nunna Dios dxi'u. <sup>13</sup> Dxuchálajntu' ca naca da caní nen dizra' da bsēde Be' Lá'azxa chee Dios netu', ne quegá nen dizra' da bsēdentu' lu xel-la sina cheentu'. Ca' naca na, dxuzéajni'intu' benne' zaj nazi'e Be' Lá'azxa chee Dios da nusēde Be' Lá'azxa nigá dxi'u.

<sup>14</sup> Nu benne' quebe nazi'e Be' Lá'azxa chee Dios quebe dxezí' lu ne'e da zaj naca na chee Be' Lá'azxa chee Dios, lawe' da dxéque' zaj naca na tu da xálaze. Quebe dxezeque' chéajni'ine' na lawe' da zaj naca na

da dxéajni'idxu tuze ne chee Be' Lá'azxa. <sup>15</sup> Bénnea' nazi'e Be' Lá'azxa chee Dios dxezéque' chéajni'ine' xúgute da dxulé'e Be' Lá'azxa le'. Benne' quebe zúale Be' Lá'azxa le', quebe séque' chéajni'ine' da dxusēde Be' Lá'azxa dxi'u. <sup>16</sup> Naxúaj lu dizra' lá'azxa da dxenná na: ¿Nuzra ba guxéajni'i da xu'u xichaj lázrdau Xránadxu? ¿Nuzra benne' séque' guzéajni'ine' Dios? Dxi'u nazidxu ca da xu'u xichaj lázrdau Cristo.

### Benne' dxelune' tu zren Dios lu zrin chee'

**3** Na'a, le'e, bi bícha'dau', quebe guca guchálajlena' le'e ca dxuchálajlena' benne' ca' zúale Be' Lá'azxa chee Dios le', san bchálajlena' le'e ca dxuchálajlena' benne' ca' quebe zúale Be' Lá'azxa le', lawe' da ne nácale ca bidu ca' lu da naca chee Cristo. <sup>2</sup> Bsēdeda' le'e da quebe zaj naca na stēbe da naca na ca da dxugáudxu bidu dxe'ene, bidu ne dxázrebe', ne quebe gaca gágube' xel-la wagu da naca na zibaj, lawe' da quebe ne séquele chéajni'ile da zaj naca na stēbe. Cá'anqueze na'a quebe ne séquele chéajni'ile na <sup>3</sup> lawe' da ne nácale ca zaj naca benne' cun ca nalaje'. Dxácatē ne xu'ule xel-la zre lazre', ne dxutil-la ljwézrele dizra' ne nácale chupa la'a, ne nácale ca zaj naca benne' cun ca nálaje', ne dxunle cáteze dxelún xúgute bénneache. <sup>4</sup> Dxácatē ne dxennale: Netu' da'ntu' Pablo, na' xezícale dxennale: Netu' da'ntu' Apolos, ne dxunle ca dxelún benne' cun ca nálaje'.

<sup>5</sup> Na'a, ¿nuzra na' Pablo? ¿Nuzra na' Apolos? Nácantu' wēn zrin chee Dios, na' ne chee netu' guxéajle chee Xránadxu. Tu tuntu' bentu' zrin chee Xránadxu da bléene' netu'. <sup>6</sup> Neda' guza' binnedu ca' lu xichaj lázrdau, bchálajlena' le'e xrtizra Dios, na' Apolos gudile' na, san Dios bsegulé' na. <sup>7</sup> Ca' naca na, ne benne' dxaze', ne benne' dxile' na, quebe bi zaque', san Dios na' dxunē' xúgute, lawe' da dxusegulé' da du ca'. <sup>8</sup> Benne' dxelaze', ne benne' dxelile' zaj naque' lébetē, san Dios quízruje' tu tu benne' caní ca naca zrin da belune'. <sup>9</sup> Nácantu' wēn zrin tu zren nen Dios, na' le'e nácale ca tu xēzr la xu naga dxun Dios zrin.

Cá'anqueze nácale ca tu xu'u da dxun Dios. <sup>10</sup> Neda' naca' ca tu wēn xu'u blau, na' Dios benne' neda' lataj gulecha' lane na, na' benne' xula dxusegulé' ze'e na'. Tu tu benne' dxal-la' guxúe xánnie' ca dxusegulé' na. <sup>11</sup> Québedxa nu seque' cueche' xetú lane ca da ba dxe', da na' naca na Jesucristoqueze, <sup>12</sup> san waca nu benne' gusegulé' lawe' na da zaca na ca oro, ne plata, ne xiaj da zaj zaca, u waca gusegulé' lawe' na da quebe zaca na ca blaga', ne xizre, ne luaj laga'. <sup>13</sup> Zrin da nun tu tu benne' gulé'eezeze lawe' na lu zra guchi'a Dios, lawe' da lu zra na' la' tu xi', na' lu xi' na' gulé'e lawe' na ca naca zrin nun tu tudxu. <sup>14</sup> Che nu benne' nune' tu zrin da quebe chezxe na lu xi', na' wazi'e lazruj chee'. <sup>15</sup> Che chezxe zrin na', ca naca na nite na, san léqueze' walé', ca tu benne' dxexedxúaje' lu xi'.

<sup>16</sup> ¿Quebe nézele le'e nácale xudau' chee Dios, na' Be' Lá'azxa chee Dios zuē' lu xichaj lázrdau? <sup>17</sup> Che nu benne' gucá'ana dítajē' xudau' nigá chee Dios, Dios

guzría xi'ë Bénnea' lawe' da naca lá'azxa xudau' chee Dios, na' lé'eqeuzle nácale xudau' na'.

<sup>18</sup> Quebe si xë cuínale. Che núlale dxéquele nácale benne' sina lu da naca chee xëzr la xu nigá, dxal-la' xun cuínale ca tu benne' quebe bi dxaque', chee gunna Dios le'e xel-la sina li. <sup>19</sup> Xel-la sina chee xëzr la xu nigá naca na tu da xálaze lau Dios. Naxúaj lu dizra' lá'azxa da dxenná na: Dios dxun zréajane' benne' sina ca' lu xel-la sina da zaj nápaqueze'. <sup>20</sup> Cá'anqueze dxenná na: Xránadxu nézene' quebe bi zaca da dxululaba lazre' benne' sina ca'. <sup>21</sup> Chee le na' quebe nu benne' dxal-la' gun szren cuine' lawe' da de'ë tu benne', lawe' da Dios dxunne' le'e xúgute' da ca' dxechínnele.

<sup>22</sup> Pablo, ne Apolos, ne Pedro, ne xëzr la xu nigá, ne xel-la nabán, ne xel-la gute, ne na'a zra, ne da za za', ne xúgute' da ca' zaj naca na chee gaca da chawe' chee, <sup>23</sup> na' lé'eqeuzle xu'ule lu na' Cristo, na' Cristo xu'ë lu na' Xradxu Dios.

### Zrin dxelún benne' gubáz chee Cristo

**4** Ca' naca na, dxal-la' guéquele nácazentu' wën zrin chee Cristo, ne nabágantu' gusédentu' bënneache da zaj nagache chee Dios. <sup>2</sup> Na'a, benne' nabague' tu zrin, dxun na ba xen gaque' li lazre'. <sup>3</sup> Neda' quebe dxe'a gunne xue bi dxéquele naca' neda', u bi dxeleque bënneache naca'. Quebe gaca nnia' xrlátaje u quegá chee da nuna' <sup>4</sup> lawe' da lácala quebe dxagu na zria neda' lázrdawa', da nigá quebe dxulé'e na quebe nabaga' zria. Xránadxu naque' Benne' dxuchi'ë ca da dxuna'. <sup>5</sup> Ca' naca na, quebe guchí'ale chee da ca' che quebe ne zrin zra. Le cueza zra xelá' Xránadxu, na' xebéajë' lu xel-la naxaní' ca naca da nagache lu da chul-la. Xránadxu gulé'engë' ca naca da dxulaba lázredxu, na' Dios gulé'engë' chawe' tu tudxu ca da dxal-la' sidxu.

<sup>6</sup> Le'e, bi bicha', dxuchálajlëna' le'e da caní chee gaca chawe' chee, dxuzúa' ca tu da gulé'e na le'e Apolos, ne néda'queza'. Dxennía' da nigá chee gusédele në chee netu' chee quebe gundxale ca da dxue lataj dizra' lá'azxa le'e, ne chee quebe gucá'ana szren cuínale, ne chee quebe guzúale chalá'ala le sa' l'jwézrele. <sup>7</sup> ¿Nuzra nun lue' blaudxa ca xezícadxa benne'? ¿Bizra napu' da quebe nunna Dios lue'? Che Le' bënne' chiu' da na', ¿bizr chee na' dxucá'ana szren cuinu', dxéquenu' lué'queze gudilju' da na'?

<sup>8</sup> ¿Nácale le'e benne' gunní'a? ¿Nápale xúgute' da dxechínele? ¿Dxequele nácale wenná bea lácala quebe nácantu' netu' wenná bea? Xrlátaje dxgua la nácaquezele wenná bea chee guntu' netu' le'e tu zren lu xel-la dxenná bea chee. <sup>9</sup> Dxéqueda' Dios nuzúe' netu', benne' gubáz chee', lu lataj bzëbe. Nácantu' ca benne' ba zaj nabía xi' chee gátentu'. Nácantu' ca tu da dxuzé na lau bënneache, na' dxelenná' gubáz chee xabáa ca', ne bënneache netu'. <sup>10</sup> Dxeleque bënneache nácantu' netu' tu da xálaze lawe' da dxuntu' zrin chee Cristo, san le'e dxéquele dxéajni'i xánnele da zaj naca chee Cristo. Dxeleque bënneache nate ni'a na'ntu' netu' san le'e dxéquele nácale le'e benne' wal-la. Dxuluzúa bën-

neache netu' chalá'ala, san dxelape' le'e ba lá'ana. <sup>11</sup> Ga bzrintë lu zra na'a zra dxeduntu', ne dxebilentu', ne nãcantu' gala xídeze, na' bënneache dxulucháchalëne' netu', ne quebe zua lízrentu'. <sup>12</sup> Dxexedú lázrentu' dxuntu' zrin. Dxelenné bënneache schanni' cheentu', san netu' dxexechëbentu' dizra' chawe'. Zaj nau zi' xuzre' netu' san dxuchaga launtu' na. <sup>13</sup> Dxelenné' schanni' cheentu', san netu' dxuchálajlentu' le' da li dutë xel-la zren lazre' cheentu'. Dxelune' netu' ca tu xizre bëbe, ne ca tu da ba guca ditaj chee bënneache ca lu zra na'a zra.

<sup>14</sup> Quegá dxuzúaja' chee da nigá chee xedué'ele, san chee guzéajni'ida' le'e, nácale ca bi chia' nazri'itë lazra'. <sup>15</sup> Lácala zaj zúale le'e gaxúa gaxúane benne' dxulusédenë' le'e ca naca chee Cristo, quebe nu zua xetú xrale. Néda'queza' naca' xrale lu xel-la dxeajlí lazre' chee Cristo lawe' da bzenda' le'e dizra' chawe' chee Jesucristo. <sup>16</sup> Ca' naca na, dxata' xúeda' le'e gunle ca dxuna' neda'.

<sup>17</sup> Chee le na' dxusel-la' Timoteo xedajná'abe' le'e, ná-cabe' ca bi li lazre' chia' nazri'itë lazra', lu da naca chee Xránadxu. Lebe' gusá'abe' lázrele ca dxuna' lu da naca chee Cristo, ne ca naca da dxusédeda' bënneache gáteteze na', ne lau xúgute' cue' bi chee Cristo. <sup>18</sup> Bál-lale le'e ba nucá'ana szren cuínale lawe' da dxéquele quebe xida' xedajnnaba' le'e, <sup>19</sup> san dxebeza lazra' xídazequeza' xedajnná'a le'e che gunna Xránadxu lataj. Nadxa le'eda' da dxelezeque' xelún benne' ca' dxulucá'ana szren cuine', ne quegá tuze da dxelenné'. <sup>20</sup> Che dxenná be'e Dios dxi'u quebe naca na chee tu da dxuchálajzedxu. Lécaze' ba nunne' dxi'u xel-la waca chee'. <sup>21</sup> ¿Bizra dxaca lázrele le'e? ¿Dxaca lázrele gun na ba xen gudéa' le'e xel-la zi', u che xida' xedajnná'a le'e lu xel-la zri'i lazre', ne xel-la dxexruj lazre'?

### Pablo dxuchi'ë chee tu da sban

**5** Ba benda' zua tu benne' ládujla le'e nune' ca zru'ule' xrna zię'. Da nigá naca na tu da sbánle'ë da quebe ne xelún benne' quebe zaj núnbe'engë' Dios. <sup>2</sup> Ca naca da na' le'e ne dxucá'ana szren cuínale. Dخال-la' cuezre xáchele. Bénnea' nune' da nigá dxal-la' xebéajle le' ládujla le'e. <sup>3</sup> Quebe zua' neda' naga zúale lu bëla' dxen chia', san naca cáteze zúalëna' le'e lu be' nácaqueza', na' ba bchi'a chee bënnea' nune' dul-la nigá ca tu benne' zúalëtequeze le'e. <sup>4</sup> Le zraga le'e lu La Xránadxu Jesucristo, na' gaca na cáteze neda' súałëna' le'e lu be' nácaqueza', na' xel-la waca chee Xránadxu Jesús sualë na le'e. <sup>5</sup> Nadxa dxal-la' xudele bënnea' lu na' Satanás da xriwe', na' lácala cuía xi' bëla' dxen chee' na' be' nácaqueze' la na lu zra xelá' Xránadxu Jesús.

<sup>6</sup> Quebe dxal-la' gucá'ana szren cuínale ca naca da dxunle. ¿Quebe núnbeale dizra' na' dxenná na: Láteze cua zichaj dxuchazra na ca naca cua na'? <sup>7</sup> Le xebéaj chalá'ala cua zichaj gula na' da dxuxrinnaj na le'e, chee gácale ca tu xeta xtla da dxágudxu Laní Pascua, da dxundxu nen cua cube da quebe nachixre na cua zichaj, ca da li nácale le'e. Crístoqueze gutie' waláz cheedxu. Naque' cheedxu zrila', bë dxelutië' laní pascua. <sup>8</sup> Ca'

naca na, dxal-la' gupá'adxu Laní Pascua cheędxu lu da naca du lazre', ne lu da li, da ca' zaj naca na ca xeta xti-la da quebe nachixre na cua zichaj. Quebe gupá'adxu na lu da calęla, ne lu da zrinnaj, da ca' zaj naca na ca cua zichaj gula na'.

<sup>9</sup> Lu da bzuaja' cheęle nédxudxa gucha' le'e quebe guchixre cheęle nen benne' ca' dxelunę' da sban.

<sup>10</sup> Quebe gucha' le'e xecuásatequezele cheę benne' zaj zre'ę xęzr la xu nigá, benne' dxelunę' da sban, ne benne' wecude' ca', ne benne' gubán ca', ne benne' dxelúe lá'ane' bedáu' xiaj xaga ca', lawe' da cheę quebe guchixre cheęle nen benne' caní, dxun na ba xen xedxúajle xęzr la xu nigá. <sup>11</sup> Da guca lazra' xapa' le'e naca na cheę quebe guchixre cheęle nen netú benne' dxennę' naque' bíchedxu, san dxunę' da sban, u naque' benne' wecude', u dxue lá'ane' bedáu' xiaj xaga, u dxutupe' dizra' bizruj, u dxí'aje', u naque' gubán. Quebe dxal-la' gágulele benne' caní. <sup>12</sup> Quegá naca chia' guchi'a cheę benne' dxeledá cúzrela. Dios guchi'e cheę benne' ca'. Le'e dxal-la' guchí'ale cheę benne' zaj naque' bi bíchedxu. Cheę le na' le xebéaj benne' dul-la na' ládujla le'e.

#### Zria da dxelagu ljwezre bi ca' cheę Cristo

**6** Gate tule le'e zua da dxaca cheęle nen xetule le'e, ¿bizr cheę na' dxeajle lau benne' dxuchi'e da dxaca, na' quebe dxéajle'e cheę Cristo, ne quebe dxeajle lau bi bíchele? <sup>2</sup> ¿Quebe nézele le'e, benne' zaj naca bi cheę Dios xuluchí'e ca da dxelún bénneache cheę xęzr la xu nigá? Che le'e guchí'ale cheę bénneache lu xęzr la xu nigá, ¿quebe naca cheęle guchí'ale cheę tu da dauze? <sup>3</sup> ¿Quebe nézele le'e guchí'adxu cheę gubáz cheę xabáa ca'? Cá'anqueze dxal-la' guchí'adxu da naca cheę xęzr la xu nigá. <sup>4</sup> Che le'e zua da dxaca cheęle lu xęzr la xu nigá, ¿bizr cheę na' dxeajle lau benne' ca' quebe nu zaj naque' ládujla bi bíchedxu ca' cheę xuluchí'e cheę da na'? <sup>5</sup> Da nigá dxapa' le'e cheę gapa stu'le. ¿Quebe nu chilá' ládujla le'e nu bíchedxu, benne' naxéajni'ine' cheę guchi'e tu da dxaca cheę bi bíchedxu ca'? <sup>6</sup> ¿Dxun na ba xen tu bi bíchedxu cheajtágube' zria da dxaca cheębe' nen benne' ljwézrebe' lau tu benne' dxuchi'e da dxaca, na' quebe naque' bi cheę Dios?

<sup>7</sup> Che zua da dxedíl-lalele biche ljwézrele, naca na tu zria da ba nabágale. ¿Bizr cheę na' quebe dxucá'anale na cá'aze? ¿Bizr cheę na' quebe dxuele lataj nu benne' cuanę' cheęle? <sup>8</sup> Le'e dxunle da quebe naca na xrlátaje, ne dxebanle, na' dxunle caní cheę bi bíchele.

<sup>9</sup> ¿Quebe nézele le'e, quebe xelexú'u benne' węn da calęla naga dxenná bea Dios? Quebe güele lataj nu si xę le'e. Quebe xelexú'u naga dxenná bea Dios benne' ca' dxelunę' da sban, ne benne' ca' dxelúe lá'ane' bedáu' xiaj xaga, ne benne' ca' dxelezúalęne' zru'ula benne' xula, ne benne' ca' dxeledálęne' ljwezre biue', ne benne' gubán ca', ne benne' wecude' ca', ne benne' ca' dxelé'aje', ne benne' ca' dxulutupe' dizra' bizruj, ne benne' ca' dxulucache lane'. <sup>11</sup> Caní gúcale bál-lale le'e, san na'a bache bexádxele lu xichaj lázrdaule, ne nuzúa

cuínale lu na' Dios, na' nazí' lu ne'ę le'e lu La Xránadxu Jesús ne cheę Be' Lá'azxa cheę Dios cheędxu.

#### Naca lá'azxa bęla' dxen cheędxu

<sup>12</sup> Da li naca da dxelennę': Nápadxu lataj gundxu da dxaca lazre' tu tudxu. Quegá xúgutę na naca na da ba neza. Awe', napa tu benne' lataj gunę' da dxaca lazre', san quebe dxal-la' gu'e lataj bi da nna be'e na le'.

<sup>13</sup> Naca da li da dxelennę': Xela wagu naca na cheę le'ędxu, na' le'ędxu naca na cheę xel-la wagu, san Dios gusexuzre' dxúpatę na. Quebe naca bęla' dxen cheędxu cheę gun na da sban. Bęla' dxen cheędxu naca na da gunézrujdxu cheę Xránadxu, na' Xránadxu naque' Bénnea' guchínene' bęla' dxen cheędxu lu da xrlátaje. <sup>14</sup> Ca bęn Dios bsebanę' Xránadxu ládujla benne' gate ca', cá'anqueze gusebanę' dxi'u nen xel-la waca cheę'.

<sup>15</sup> ¿Quebe nézele le'e bęla' dxen cheęle naca na cheę Cristo? ¿Wacá'a tu da naca na bęla' dxen cheę Cristo, ne guchaga' na nen bęla' dxen cheę tu nu'ula węn da sban? ¿Cabata! <sup>16</sup> ¿Quebe nézele le'e gate tu benne' biu dxuchague' tu nu'ula węn da sban dxúpatę' zaj naque' ca tuze bęla' dxen? Naxúaj lu dizra' lá'azxa da dxenná na: Dxúpatę' xelexaque' tuze bęla' dxen. <sup>17</sup> Gate tu benne' dxuchague' Xránadxu, dxelexaque' tuze be'.

<sup>18</sup> Le guzrunnaj cheę da sban. Zaj nita dul-la xula da dxun benne' da quebe dxulucá'ana ditaj na bęla' dxen cheę', san benne' dxuchague' nu'ula quebe naca zru'ule' dxunę' dul-la lu bęla' dxen cheęqueze'.

<sup>19</sup> ¿Quebe nézele le'e naca bęla' dxen cheęle xudau' cheę Be' Lá'azxa, Bénnea' nunna Dios le'e, na' Be' Lá'azxa zuę' xichaj lázrdaule? Quebe nácale xrana bęla' dxen cheęle, <sup>20</sup> lawe' da guzí' Dios le na nen tu lazruj zrentę. Cheę le na', dxal-la' gápale ba lá'ana Dios nen bęla' dxen cheęle, ne nen be' nácaquezle, lawe' da dxúpatę na' zaj naca na cheę Dios.

#### Ca naca cheę xel-la dxuchaga na'

**7** Na'a xechęba' ca zaj naca da bchébele neda'. Da li naca xrlátaje quebe guchaga na' tu benne'.

<sup>2</sup> Lawe' da dxácale'e da sban naga zúale, tu tu benne' biu dxal-la' súalęne' nu'ula cheęqueze', na' tu tu nu'ula dxal-la' súalęne' benne' biu cheęqueze'. <sup>3</sup> Benne' biu dxal-la' gunę' nen zru'ule' da nabague' cheę zru'ule', na' cá'anqueze nu'ula dxal-la' gunę' nen benne' biu cheę' da nabague' cheę benne' cheę'. <sup>4</sup> Nu'ula na' quebe naque' xrana bęla' dxen cheę', san naca na cheę benne' biu cheę'. Cá'anqueze benne' biu quebe naque' xrana bęla' dxen cheę', san naca na cheę zru'ule'.

<sup>5</sup> Quebe dxal-la' xeledábaga ljwezre', san tuze gate xelezúe' xel-la wezría tu chí'idauze cheę xuluzúa cuine' lau Dios cheę xuluchálajle' Lę'. Te na' dxal-la' xuluchaga ljwezre' cheę quebe seque' Satanás nna be'e na le' che quebe xelezéquene' xelenná be'e cuine'.

<sup>6</sup> Da nigá dxapa' le'e naca na tu da dxue le'e lataj. Quebe naca na tu da nadxixruj bea na. <sup>7</sup> Neda' dxezá lazra' súale xúgutęle ca zua' neda', san Dios ba nunne'

tu tudxu da gaca gundxu. Tu da nunne' tudxu, na' da xula xetudxu.

<sup>8</sup> Dxapa' benne' wegú, ne nu'ula wezebe, naca xrlátaje xelexegá'ane' cá'aze ca zua' neda'. <sup>9</sup> Che quebe xelexequene' xelenná be'e cuine', waca xuluchaga ne'e, lawe' da nácadxa xrlátaje xuluchaga ne'e quézcala xeledé'e' ba xa' lu bēla' dxen chee'.

<sup>10</sup> Benne' zaj nuchaga ne'e dxapa' nu'ula quebe gusanē' benne' biu chee'. Quebe naca cheeza' da nadxixruj bea nigá, san naca na da dxun Xránadxu. <sup>11</sup> Che nu nu'ula gusanē' benne' biu chee', dxal-la' xegá'ane' cá'aze, u xexaque' tuze nen benne' biu chee' na'. Cá'anqueze benne' biu quebe dxal-la' gusanē' zru'ulē'.

<sup>12</sup> Dxapa' xezícadxa benne' néda'queza', quegá Xránadxu, che zru'ula tu bi bíchedxu quebe dxéajle'e chee Xránadxu, dxéquene' xrlátaje zúalēne' benne' chee', bi bíchedxu na' quebe dxal-la' gusanē' le'. <sup>13</sup> Che benne' biu chee' tu nu'ula zandxu quebe dxéajle'e chee Xránadxu, san dxéquene' xrlátaje zúalēne' zru'ulē', nu'ula zandxu na' quebe dxal-la' gusanē' benne' biu chee' na'. <sup>14</sup> Benne' biu na' quebe dxéajle'e chee Xránadxu naque' ca tu bi chee Dios lawe' da nuchague' zru'ulē' dxéajle'e chee Xránadxu, na' nu'ula na' quebe dxéajle'e chee Xránadxu naque' ca tu bi chee Dios lawe' da nuchague' benne' biu chee' dxéajle'e chee Xránadxu. La quebe naca na caní, zrí'inele le'e xelácabe' ca zri'ine benne' quebe zaj naque' chee Dios, san da li zaj ná-cabe' ca bi chee Dios. <sup>15</sup> Che benne' biu na' u zru'ulē', benne' quebe dxéajle'e chee Xránadxu, dxaca lázrte-queze' gusanē' ljwezre', waca na. Che caní dxaca chee tu bi bíchedxu u chee tu bi zandxu, nape' lataj lawe' da gunné Dios dxi'u chee cueza zri lázredxu. <sup>16</sup> Che quebe gaca caní, quebe nézenu' lue', nu'ula, che wazéquenu' cu'u benne' biu chiu' lu na' Cristo, na' lue', benne' biu, quebe nézenu' che wazéquenu' cu'u zru'ulu' lu na' Cristo.

<sup>17</sup> Ájateze naca, tu tudxu dxal-la' gundxu ca naca da nunna Xránadxu dxi'u, ne xegá'anadxu cáteze nácadxu gate gunné Dios dxi'u. Caní dxapa' xúgutē cue' bi chee Cristo. <sup>18</sup> Che Dios dxenné' tu benne' biu nadxugu lu bēla' chee' da dxulé'e na naque' bi chee Dios, benne' nigá dxal-la' xegá'ane' ca', na' che dxenné Dios tu benne' quebe nadxugu lu bēla' chee' da na', quebe dxal-la' chugu lu bēla' chee' da na'. <sup>19</sup> Quebe bi naca che nadxugu da na' lu bēla' cheedxu, u quebe. Da dxun na ba xen naca gundxu da dxaca lazre' Dios. <sup>20</sup> Tu tudxu dxal-la' xegá'anadxu cáteze nácadxu gate Dios dxenné' dxi'u chee gácadxu bi chee'. <sup>21</sup> Che gucu' benne' nada'u gate Dios gunné' lue', quebe cue'u gunne xue, san che gapu' lataj gacu' benne' quebe nada'u, dxal-la' guchínenu' na. <sup>22</sup> Bénnea' guque' benne' nada'u gate gunné Xránadxu le' naque' ca benne' quebe nada'u chee gunē' zrin chee Xránadxu, na' cá'anqueze bénnea' quebe naque' benne' nada'u gate gunné Xránadxu le', naque' ca benne' nada'u chee Xránadxu. <sup>23</sup> Dios ba ná'awe' le'e nen tu lazruj zrentē. Quebe güele lataj nu benne' gunē' le'e benne' zaj nada'u.

<sup>24</sup> Ca' naca na, bi bicha', tu tudxu dxal-la' xegá'anadxu lau Dios cáteze nácadxu gate gunné' dxi'u.

<sup>25</sup> Ca naca chee benne' ca' quebe zaj nuchaga ne'e quebe bi gunná be'e Xránadxu neda', san dxapa' le'e ca da dxéqueda', na' waca guxrén lázrele neda' lawe' da bexache lazre' Xránadxu neda'. <sup>26</sup> Dxéqueda' neda' dxal-la' xegá'ana tu benne' biu cáteze naque' lawe' da zúadxu zra stébele'e. <sup>27</sup> Che nuchagu' nu'ula quebe cuasu' le', na' che quebe nuchagu' nu'ula, quebe guchaga na'u. <sup>28</sup> Che guchaga na'u, quebe gunu' dul-la, na' che tu nú'uladau' guchaga na'abe', quebe gunbe' dul-la. Benne' ca' dxuluchaga ne'e welezúe' stēbe lu zra caní, na' dxaca lazra' quebe súale stēbe caní.

<sup>29</sup> Bi bícha'dau', da nigá dxaca lazra' xapa' le'e. Xelátega ne de súadxu lu xēzr la xu nigá. Ná'atēla benne' zaj nuchaga ne'e dxal-la' gunē' da naca chee Cristo ca dxelún benne' quebe zaj nuchaga ne'e. <sup>30</sup> Benne' dxelebezre xache' dxal-la' xelunē' da naca chee Cristo ca dxelún benne' quebe zaj naque' baxache'. Benne' zaj zra laní dxal-la' xelunē' da naca chee Cristo ca dxelún benne' quebe zaj zue' xel-la dxebé, na' benne' dxelá'awe' dxal-la' xelunē' da naca chee Cristo ca dxelún benne' quebe zaj nape' da na' dxelá'awe'. <sup>31</sup> Benne' dxelezi'e ba neza lu xēzr la xu nigá dxal-la' xelunē' da naca chee Cristo ca dxelún benne' quebe dxelezi'e ba neza na, lawe' da ba dxexuzre lazre' xēzr la xu nigá.

<sup>32</sup> Dxaca lazra' quebe bi cue'le gunne xue. Gate tu benne' biu nácabē' wegú dxe'ebē' gunne xue da naca chee Xránadxu chee gunbe' da dxezaca ba lazre' Xránadxu. <sup>33</sup> Gate ba nuchaga ne'e, dxe'e gunne xue da naca chee xēzr la xu nigá chee gunē' da dxezaca ba lazre' zru'ulē'. <sup>34</sup> Cá'anqueze dxaca chee nu'ula zua benne' biu chee', ne nu'ula wegú. Nu'ula wegú dxe'ebē' gunne xue da naca chee Xránadxu chee chu'ubē' lu na' Dios dutē bēla' dxen chee'be', ne dutē be' chee'be', san nu'ula zua benne' biu chee' dxe'e gunne xue da naca chee xēzr la xu nigá chee gunē' da xezaca ba lazre' benne' chee'.

<sup>35</sup> Dxapa' le'e da nigá chee gaca chawe' chee'le, ne quebe chee nna be'eda' le'e, san chee gunle da xrlátaje, ne da li, chee chu'ule du lázrele lu na' Xránadxu.

<sup>36</sup> Che nu benne' dxéquene' nácadxa xrlátaje guchaga na' zrí'ine' nu'ula lawe' da ba dxedé xel-la cuide' chee'be', ne naca da dxal-la' gunbe', dxal-la' gunē' da dxéquene' naca xrlátaje. Waca guchaga na'abe'. Quebe naca na dul-la. <sup>37</sup> Che nu benne' quebe dxéquene' dxun na ba xen, ne che nape' lataj gunē' da dxaca lazre', ne che ba nune' lu xichaj lázrdawe' xegá'ana zrí'ine' nu'ula wegú, dxunē' da xrlátaje. <sup>38</sup> Ca' naca na, benne' dxu'e lataj guchaga na'abe' zrí'ine' nu'ula, dxunē' da xrlátaje, na' bénnea' quebe dxu'e lataj dxunē' da nácadxa xrlátaje.

<sup>39</sup> Nu'ula zua benne' biu chee' nuchague' bénnea' ne chee da nadxixruj bea na dxácatē ne zue' nabanē', san che gate benne' chee', de lataj nu'ula na' guchaga ne'e nen núteteze benne' biu, san dxun na ba xen dxéajle'e chee Xránadxu. <sup>40</sup> Gácadxa chee' da ba neza che

xegá'ane' cá'aze. Caní dxéqueda' neda', ne dxéqueda' dxun Be' Lá'azxa chee Dios neda' tuze.

**Xel-la wagu da zaj nuzúa bénneache lau bedáu' xiaj xaga**

**8** Na'a guchálaja' ca naca chee xel-la wagu da zaj nuzúa bénneache lau bedáu' xiaj xaga. Da li xúgute dxu nápadxu xel-la dxéajni'i ca naca da nigá. Xel-la dxéajni'i dxun na dxi'u benne' dxulucá'ana szren cuina, san xel-la zri'i lazre' dxusegula na dxi'u lu xel-la dxeajlí lazre' chee dxu. <sup>2</sup> Che nu benne' dxéquene' nape' dutę xel-la dxéajni'i, quebe ne chéajni'ine' ca dxal-la' chéajni'ine'. <sup>3</sup> Che nu benne' nazrí'ine' Dios, Dios ba nazí' lu ne'e bénnea'.

<sup>4</sup> Na'a, ca naca chee xel-la wagu da zaj nuzúa bénneache lau bedáu' xiaj xaga, nezdxu quebe bi naca tu bedáu' xiaj xaga lu xęzr la xu nigá, ne tuze Bénnea' naque' Dios. <sup>5</sup> Lácala zaj zra' xabáa, ne xęzr la xu nigá da zantę da dxeleque bénneache zaj naca na dios, ne chee benne' caní zantę dios zaj zra na, ne zantę xranę' zaj zra na, <sup>6</sup> chee dxu dxi'u che nácadxu chee Cristo, tuze Bénnea' naque' Dios, Bénnea' naque' Xradxu. Xradxu Dios bene' xúgute da de, na' dxi'u zúadxu chee guchínene' dxi'u. Cá'anqueze tuze Bénnea' naque' Xránadxu, Jesucristo. Ne chee Le' guzrá' xúgute da de, na' zúadxu dxi'u ne chee Le'.

<sup>7</sup> Quegá xúgute bi chee Cristo zaj nézene' da nigá. Bal-la benne' caní gulú'u lawe' belúe lá'ane' bedáu' xiaj xaga, na' gate dxelawe' xel-la wagu na', dxeléquene' naca na tu da naca na chee bedáu', na' lawe' da quebe zaj zę chache' lu xichaj lázrdawe', dxeléquene' zaj nabague' zria ne chee da dxelawe'. <sup>8</sup> Da na' dxágudxu quebe dxucá'anadxu na dxi'u xrlátaje lau Dios, lawe' da quebe nácadxadxu xrlátaje che dxágudxu, ne quebe nácadxadxu calęla che quebe dxágudxu. <sup>9</sup> Le guxúe xanne' cuinale ca naca lataj da nápaie bi gágule chee quebe guzría xile tu benne' quebe zę chache' lu xel-la dxeajlí lazre' chee'. <sup>10</sup> Ca' naca na, che lue' nézenu' da nigá, na' che cue'u gagu' tu naga zra' bedáu' xiaj xaga, na' che tu bi bíchedxu, benne' quebe zę chache' lu xel-la dxeajlí lazre' chee', lé'ene' lue' dxe'u dxagu' na', na' bi bíchedxu na' wexázrquezne' cue'e gawe' da na' zaj nuzúa bénneache lau tu dios quebe bi naca. <sup>11</sup> Ca' naca na, lue', lawe' da napu' xel-la dxéajni'i, guzría xi'u tu bi bichu' quebe zę chache' lu xel-la dxeajlí lazre' chee', na' naque' benne' gute Cristo waláz chee'. <sup>12</sup> Ca' naca na, gate dxuzría xile bi bíchedxu quebe zaj zę chache' lu xel-la dxeajlí lazre' chee', dxunle dul-la da dxuzúa Cristoqueze chalá'ala. <sup>13</sup> Chee le na', che guzría xi'a tu bi bicha' ne chee da dxawa', nácadxa chawe' cabátadxa gawa' bęla' chee quebe guzría xi'a le'.

**Da naca chee tu benne' gubáz chee Cristo**

**9** Naca chia' naca' gubáz chee Cristo, ne napa' lataj bi guna' lawe' da ble'eda' Xránadxu Jesús, na' nácale le'e bi chee Cristo ne chee zrin bęna' chee'. <sup>2</sup> Che

dxeleque xezícadxa benne' quebe naca' gubáz chee Cristo, san dxun na ba xen guéquele le'e naca' gubáz chee' lawe' da dxunna bea da nácale chee Xránadxu da li naca' gubáz chee'.

<sup>3</sup> Da nigá naca na da dxapa' benne' ca' dxelezí tizre' neda': <sup>4</sup> Naca chia' si' lu na'a da xi'aj gawa' ne chee zrin da dxuna'. <sup>5</sup> Cá'anqueze naca chia' guchaga na'a tu nu'ula zandxu chee chéajlęne' neda' ca dxelún xezícadxa benne' gubáz chee Cristo, ne benne' bíchequeze Xránadxu, ne Pedro. <sup>6</sup> ¿Dxequele tuze Bernabé, ne neda' dxal-la' guntu' zrin chee gata' da xi'aj gáguntu' gate dxuzéentu' bénneache dizra' chawe'? <sup>7</sup> ¿Nuzra benne' gaque' benne' zeje' wedil-la che quebe nu quizruj le'? ¿Nuzra benne' dxaze' lba uva che quebe gawe' na'? ¿Nuzra benne' gusegule' zri'la' che quebe xequé'e xicha zra'ba'? <sup>8</sup> Quebe dxal-la' guéquele dxapa' le'e da nigá néda'queza', lawe' da caníqueze dxenná na lu da bdxixruj be'e Moisés. <sup>9</sup> Naxúaj lu da nadxixruj bea na da dxenná Dios: Quebe cu'ule xixruj dxu'a bęzre, bę dxíchuba' zrua' xtila. Quebe gunná Dios da nigá lawe' da dxue lazre' chee bęzre cá'aze. <sup>10</sup> Gunnę' na ne chee dxu dxi'u. Naxúaj da nadxixruj bea nigá chee gaca da ba neza chee dxu, lawe' da benne' dxugá'ane' bęzre, ne benne' dxine' dxal-la' xelebeza lazre' xelexezi'e ca naca da gunna lina da xelaze'. <sup>11</sup> Na'a, che netu' ba gúzantu' lu xichaj lázrdaule da naca na chee Be' Lá'azxa, ¿quebe dxal-la' si' lu na'ntu' látedauze da naca chee lu xęzr la xu nigá? <sup>12</sup> Che xezícadxa benne' naca chee' xelezi' lu ne'e da naca chee, ¿gázradxa netu'?

Quebe ne guchínentu' da nigá naca na cheentu'. Bchaga launtu' xúgute chee quebe guzágantu' ca naca dizra' chawe' chee Cristo. <sup>13</sup> Ba nézele benne' dxelunę' zrin chee xudau' dxelawe' chee da xu'u lu xudau' na', na' benne' dxelunę' zrin chee lu cugu naga dxelutię' be xixre'du ca' lau Dios dxelawe' bęla' chee béadu ca'. <sup>14</sup> Cá'anqueze ba nun Xránadxu chee benne' dxuluchalaje' dizra' chawe', xelezi'e ba neza zrin da dxelunę'. <sup>15</sup> Cabata' guchíneda' netú da caní zaj naca na chia', ne quebe dxuzúaja' da nigá chee gúnnale neda' late'. Gaca lázredxa' gatia' quézcala nu gucuasa da ba neza da napa'.

<sup>16</sup> Quebe dxal-la' gucá'ana szren cuina' lawe' da dxuzenda' bénneache dizra' chawe' chee Cristo, lawe' da dxun na ba xen guna' na. Baxache' naca' che quebe guzenda' bénneache dizra' chawe' nigá. <sup>17</sup> Chee le na', che dxuna' na lawe' da naca na da dxaca lazra' guna', ba de lazruj chia'. Na'a, che dxuna' na xadíaze, naca na tu da nusebaga Dios neda'. <sup>18</sup> Ca' naca na, lazruj da dxezi'a naca na da ba neza napa' gate dxuzenda' bénneache dizra' chawe' chee Cristo, ne quebe bi dxuchízruja' benne' ca'. Ca' naca na, quebe dxuchíneda' da naca na chia' lawe' da dxuna' zrin nigá.

<sup>19</sup> Lácala quebe naca' benne' nada'u chee nu benne', ba nun cuina' ca tu benne' nada'u chee xúgute bénneache, chee séqueda' cu'a benne' zandxa lu na' Cristo. <sup>20</sup> Gate zua' ládujla benne' judío ca', dxun cuina' benne' judío chee cu'a le' lu na' Cristo. Ca' naca na, lá-

dujla benne' zaj xu'e lu na' da nadxixruj bea na dxun cuina' ca tu benne' xu'e lu na' da nadxixruj bea na, chee cu'a le' lu na' Cristo lácala da li quebe xu'a lu na' da nadxixruj bea na na'. <sup>21</sup> Xetú na'a, chee séqueda' cu'a lu na' Cristo benne' ca' quebe zaj xu'e lu na' da bdxixruj be'e Moisés, dxun cuina' ca tu benne' quebe xu'e lu na' da nadxixruj bea na na', lácala da li xu'a lu na' da nadxixruj bea na chee Dios lawe' da xu'a lu na' da nadxixruj bea na chee Cristo. <sup>22</sup> Gate zua' ládujla benne' ca' quebe zaj ze chache' lu xel-la dxeajlí lazre' chee' dxun cuina' ca zaj naca benne' ca' chee séqueda' cu'a le' lu na' Cristo. Ca' naca na, dxun cuina' ca naca tu tu benne' ca' chee ájatezla séqueda' cu'a bal-la benne' ca' lu na' Cristo. <sup>23</sup> Dxuna' xúgute' da nigá ne chee dizra' chawe' chee Cristo chee gapa' tu da ba neza chee na.

<sup>24</sup> Ba nézqueze le'e tu lu da huitaj benne' zan dxesí'aca chégu'e na' tuze' dxezrué'ene' lataj blau. Le sa'aca chegu le'e chee zrué'ele da dxunna Cristo. <sup>25</sup> Xúgute' benne' ca' dxulupá'a cuine' chee xelu'e da huitaj, dxuluzúe' chalá'ala xúgute' da dxun na caléla chee'. Benne' caní dxelune' da caní chee xezezí' lu ne'e tu da guzúe' xíchaje' da naca na laga' da québequeze si bea, san dxi'u dxundxu zrin chee zrué'dxu da zeajlí canna. <sup>26</sup> Neda' quebe dxezá chégua' ájatezla, ne quebe dxedil-la' ca tu benne' dxu'e lu be'ze gate dxedil-le'. <sup>27</sup> Neda' dxudéa' xel-la zi' be'la' dxen chia', ne dxenná be'eda' na, chee quebe gunitia' neda' da naca chia' lu zrin nigá, ca te na' ba bsédeda' benne' xula ca'.

**Da dxuzéajni'i na dxi'u ca naca chee bedáu' xiaj xaga ca'**

**10** Dxaca lazra' nézele, bi bícha'dau', ca guca chee xra xrtáudxu ca' xjácálene' Moisés. Dios guché'e xúgute' benne' ca' ne chee beuj bza na', na' xúgute' guledé'e ládujla nísadau' da nazí le na Xrna. <sup>2</sup> Ca' naca na, waca nnadxu xúgute' beledxúe' nisa lu nísadau' na', ne gulaque' tuze nen Moisés gate guledálene' beuj bza na'. <sup>3</sup> Cá'anqueze xúgute' gulawe' tuze xel-la wagu da bnezruj Dios le', <sup>4</sup> ne gule'aj xúgute' tuze nisa da bnezruj Dios le', lawe' da gulé'aje' nisa na' bedxúaj na xiaj xre na'. Xiaj xre nigá dxulé'e na ca naca Crístoqueze, Bénnea' guxéajlene' benne' ca' le'e xixre' lawe' lataj na'. <sup>5</sup> Benne' zan benne' ca' quebe belune' da bezaca ba lazre' Dios, na' chee le' na' gulatié' le'e xixre' lawe' lataj.

<sup>6</sup> Xúgute' da caní guca na chee guzéajni'i na dxi'u chee quebe sa lázredxu da caléla ca', ca belún benne' ca'. <sup>7</sup> Chee le' na' quebe gucá'ana szrenle bedáu' xiaj xaga ca' ca belún bal-la benne' ca', ca naxúaj na lu dizra' lá'azxa, dxenná na: Bénneache gulebé'e, ne gule'aj gulawe' lau bedáu' xiaj xaga, na' belexasé' chee buluxé'e. <sup>8</sup> Quebe dxal-la' gundxu da sban ca belún bal-la benne' ca', na' tu zraze gulate chupa gaxúa chi dxua gaxue'. <sup>9</sup> Quebe dxal-la' guchínedxu xel-la zren lazre' chee Xránadxu chee gundxu da caléla ca belún bal-la benne' ca', na' gulatié', gate gulí'ina be'la' le'.

<sup>10</sup> Quebe nnele chee Dios ca gulenné bal-la benne' ca',

na' gubáz chee xabáa chee xel-la gute bēte' benne' ca'.

<sup>11</sup> Xúgute' da caní gulezaca xra xrtáudxu, na' zaj naxúaj na lu dizra' lá'azxa chee guzéajni'i na dxi'u, zúadxu lu zra bzebe caní. <sup>12</sup> Ca' naca na, nu benne' dxéquene' ze chache' lu da naca chee Dios dxal-la' guxúe xanne' cuine' chee quebe cheajcházie'. <sup>13</sup> Da dxelún zréaje le'e naca na tuze ca da dxelún zréaje xúgute' bénneache, na' waca guxrén lázrele Dios lawe' da quebe gu'e lataj bi gun zréaje le'e da quebe séquele guchaga laule, na' gate gaca tu da gun zréaje na le'e, Dios gunne' le'e ájala gunle chee lale lu da na', chee séquele guchaga laule na.

<sup>14</sup> Chee le' na', bi bicha' nazri'ite lazra', québedxa gucá'ana szrenle bedáu' xiaj xaga ca'. <sup>15</sup> Dxuchálajlene' le'e ca dxuchálajlene' benne' dxeléajni'ine', na' lé'equeze waca guchí'ale chee da dxapa' le'e. <sup>16</sup> Gate dxágadxu da dxucube na ca guca gate gute Xránadxu, dxápaxu ba lá'ana Dios. Gate dxí'ajdxu xrisa uva lá'azxa, da nigá dxulé'e na dxezidxu ba neza dxen chee Cristo da gulalaj na le'e xaga béguaj. Xeta xtila na' da dxuzúzrujdxu dxulé'e na xezidxu ba neza be'la' dxen chee Cristo da bde'e waláz cheedxu le'e xaga béguaj.

<sup>17</sup> Lácala naxandxu, xúgute'dxu dxágudxu tu xeta xtilaqueze da naca na tuze, da na' dxulé'e na nácadxu ca tuze be'la' dxen chee Cristo.

<sup>18</sup> Le nna'xque ca zaj naca benne' Israel ca'. Benne' caní, benne' dxelawe' da dxuluzré'e lu cugu chee Dios dxelezi'e ba neza lu cugu na'. <sup>19</sup> Quebe dxennía' naca tu bedáu' xiaj xaga tu da zaca, na' be'la' da dxuluzrí'a bénneache lau bedáu' xiaj xaga quebe zácadxa ca bíteteze xetú be'la'. <sup>20</sup> Dxennía' da dxuluzrí'a lau bedáu' xiaj xaga benne' ca' quebe zaj núnbe'e Dios, dxuluzrí'e na lau be' xriwe' ca' ne quegá lau Dios, na' quebe dxaca lazra' gunle tuze be' xriwe' ca'. <sup>21</sup> Quebe gaca xí'ajle da na' dxulé'e na nácale Xránadxu tuze, ne xí'ajtele da gulé'e na nácale tuze be' xriwe' ca', ne quebe gaca gágule da naca na chee Xránadxu, ne gágutele da naca na chee be' xriwe' ca'. <sup>22</sup> ¿Dxaca lázrele xewine lazre' Xránadxu lawe' da dxusandxu Le'? ¿Dxéquele le'e nácadxu benne' wáladxa ca Le'?

**Da naca cheedxu gundxu, ne ca naca xel-la zri'i lazre'**

<sup>23</sup> Da li naca da na' dxelenná bénneache, dxelenné': Naca chia' guna' da dxaca lazra'. Quegá xúgute' naca na da sidxu ba neza. Naca chee nu benne' guné' ca dxaca lazre' san quegá xúgute' gusegula na le' lu xel-la dxeajlí lazre' chee'. <sup>24</sup> Dخال-la' gundxu da gaca chawe' chee benne' xula, ne quegá da gaca na chawe' cheézedxu.

<sup>25</sup> Le gagu le'e ca naca da dxeda'u lawe' xi'a, ne quebe naba xúzrele chee na chee quebe sua stēbe xichaj lázrdaule, <sup>26</sup> lawe' da zaj naca chee Xránadxu xezr la xu nigá, ne xúgute' da ca' zaj zra' lu xezr la xu.

<sup>27</sup> Che nu benne', benne' quebe dxéajle'e chee Xránadxu, dxenné' le'e gágule xeta, na' che dxaca lázrele chéajle, le gagu xúgute' da guzrí'e laule, ne quebe naba xúzrele chee na chee quebe sua stēbe xichaj lázrdaule. <sup>28</sup> Che nna nu benne' zúalé le'e, na' xe'e le'e:



“Bela' nigá bache guzría na lau bedáu' xiaj xaga”, quebe gágule na, chee quebe guzúale stêbe bënnea' gunné' ca', ne chee quebe sua stêbe xichaj lázrdaule. <sup>29</sup> Dxennía' da nigá chee xichaj lázrdau benne' zúalene' lue', ne quegá chee xichaj lázrdau' lué'queze.

Waca naba xuzre tu benne': “¿Bizr chee na' dxuchi'u da naca chia' lawe' da sua stêbe xichaj lázrdau benne' xula? <sup>30</sup> Che dxapa' Dios: Xcalenu' chee da dxawa', ¿bizr chee na' xelezí tizre' neda' chee da dxawa'?”

<sup>31</sup> Chee le na', che dxágule u dxí'ajle, u bíteteze da dxunle, le gun xúgute chee gaca ba Dios. <sup>32</sup> Quebe bi gunle da guzúa na stêbe benne' xula, quegá benne' judío ca', ne quegá benne' quebe zaj naque' judío, ne quegá nu benne' naque' bi chee Dios. <sup>33</sup> Neda' dxuna' ba xuzre guna' da xelezaca ba lazre' xúgute bënneache ca naca xúgute da dxuna'. Quebe dxuna' da gaca chawe' cheeza' san da gaca chawe' chee xezícadxa bënneache chee xelelé'.

**11** Le gun ca dxuna' neda', ca neda' dxúnqueza' ca ben Cristo.

### Da dxelún nu'ula naga zaj nazraga bi chee Cristo

<sup>2</sup> Bi bicha', dxapa' le'e ba lá'ana lawe' da dxeajsá lázrequezle neda', ne dxunle ca naca da bzéajni'ida' le'e. <sup>3</sup> Na'a dxaca lazra' chéajni'ile naca Cristo xíchaje chee tu tu benne' biu, na' benne' biu naque' xíchaje chee zru'ule', ca naca Dios, naque' xíchaje chee Cristo. <sup>4</sup> Che tu benne' biu gugácué' xíchaje' gate dxuchálajlêne' Dios naga zaj nadupa bi chee Cristo, u gate dxuchálajlê' waláz chee Dios, naca na tu xel-la stu' chee Bënnea' naque' xíchaje'. <sup>5</sup> Che tu nu'ula quebe gugácué' xíchaje' gate dxuchálajlêne' Dios, u gate dxuchálajlê' waláz chee Dios, naca na tu xel-la stu' chee', lawe' da dxun cuine' ca tu benne' biu. Lébezqueze naca na chugue' xíchaje'. <sup>6</sup> Che tu nu'ula quebe gugacu xíchaje', nácadxa xrlátaje chugue' tu chí'ize ca naca xicha xíchaje'. Na' che naca na tu xel-la stu' chee nu'ula che chugue' xíchaje', u che guzúe' zrígaze xíchaje' ca dxun tu benne' biu, dxal-la' gugacu xíchaje' naga zaj nazraga bi chee Cristo. <sup>7</sup> Benne' biu quebe dxal-la' gugacu xíchaje' lawe' da naque' lu'a le saca Dios, na' da naque' dxulé'e na ca naca xel-la szren chee Dios. Da naca nu'ula dxulé'e na ca naca xel-la szren chee benne' biu. <sup>8</sup> Gate ben Dios benne' biu, quebe bi guléaje' le' lu bela' dxen chee nu'ula, san guléaje' lu bela' dxen chee benne' biu da na' bexune' nu'ula na'. <sup>9</sup> Dios bene' nu'ula na' chee nna be'e benne' biu le', ne quegá bene' benne' biu chee nna be'e nu'ula le'. <sup>10</sup> Chee le na' nu'ula dxal-la' guzúe' xíchaje' tu da dxulé'e na zua nu dxenná be'e le' chee quebe gun zréajene' gubáz chee xabáa ca' chee Dios. <sup>11</sup> Lu da nácadxu chee Cristo, benne' biu dxechinne' nu'ula, ne cá'anqueze dxechín nu'ula benne' biu. <sup>12</sup> Da li Dios guléaje' nu'ula na' lu bela' dxen chee benne' biu, na' cá'anqueze benne' biu dxálaje' chee nu'ula, na' xúgutedxu zadxu lu na' Dios.

<sup>13</sup> Le nna'xque le'e che naca xrlátaje che tu nu'ula guchálajlêne' Dios, ne quebe gugacu xíchaje'. <sup>14</sup> Da nácaquezdxu dxulé'e na dxí'u naca tu xel-la stu' che

benne' biu se tunna xicha xíchaje', <sup>15</sup> na' naca tu da ba lá'ana chee nu'ula se na tunna, lawe' da nunna Dios le' xicha xíchaje' tunna chee gugacu na xíchaje'. <sup>16</sup> Na'a che nu benne' dxaca lazre' gutil-le' dizra' ca naca da nigá, dxal-la' nézene' quegá dxí'u ne quegá benne' zaj nazraga chee Cristo quebe núnbeadxu xetú da xula.

### Da dxelún benne', gate dxelawe' da naca chee Xránadxu

<sup>17</sup> Ca naca chee da nigá quebe dxapa' le'e ba lá'ana lawe' da dxaca da calela chee gate nazrágale, ne quegá da chawe'. <sup>18</sup> Da néxuteca, dxulé'e neda' gate dxezrágale chee güe lá'anale Dios nácale chupa la'a. Dxéqueda' naca da li da dxelenné'. <sup>19</sup> Dxál-la'queze gácale chupa la'a chee gulé'e lawe' nu benne' ládujla le'e da li naque' bi chee Cristo. <sup>20</sup> Chee le na' gate dxezrágale le'e chee gágule da naca chee Xránadxu, da li québedxa naca na chee Xránadxu. <sup>21</sup> Gate dxezrín zra dxágule, tu tule le'e dxebia' lau chee dxecá'ale xel-la wagu cha chee, na' bál-lale le'e dxegá'anale dxedunle, na' xezícadxale dxezúzrele. <sup>22</sup> ¿Quebe bi de chee naga xi'aj gágule? Ca'an dxunle, dxuzúale chalá'ala bi ca' chee Dios, ne dxugu'ule xel-la stu' benne' ca' quebe bi de chee'. ¿Bízraqueze xapa' le'e? ¿Dxal-la' gapa' le'e ba lá'ana? ¿Cabata'!

### Da dxágudxu da naca chee Xránadxu

(Mt. 26.26-29; Mr. 14.22-25; Lc. 22.14-20)

<sup>23</sup> Xránaquezdxu bzéajni'ine' neda' da nigá bsédeda' le'e: Lu zre' ná'queze gate Judas bdeé' Xránadxu Jesús lu na' benne' guledábague' Le', na' Jesús guqu'é xeta xtila, <sup>24</sup> na' gudé guzre' Dios: Xcalenu', bzúzruje' na, na' gunné': “Le gagu. Xeta xtila nigá dxulé'e na ca gaca chee bel-la' dxen chia' lu da na' saca zi'a waláz chee. Le gun da nigá chee cheajsá lázrele neda'.” <sup>25</sup> Cá'anqueze, gudé gulawe', guqu'é xrisa uva, na' gunné': “Xrisa uva nigá dxulé'e na ca naca da dxuzé chacha na xel-la wezría cube da naca na dxen chia'. Tu tu lasa xí'ajle na, le gun na chee cheajsá lázrele neda'.” <sup>26</sup> Ca' naca na, ca zrin zra xelá' Xránadxu, gulé'ele ca guca gate gute Xránadxu tu tu lasa gate gágule xeta xtila nigá, ne xí'ajle xrisa uva nigá.

### Ca dxal-la' gágudxu da naca chee Xránadxu

<sup>27</sup> Ca' naca na, núteteze benne' gawe' xeta xtila nigá, u xí'aje' xrisa uva chee Xránadxu, ne quebe dxape' ba lá'ana na, na' dxune' dul-la da dxuzúa bela' dxen chee Xránadxu chalá'ala. <sup>28</sup> Chee le na' tu tudxu dxal-la' guxúe xánnedxu xichaj lázrdaudxu gate za gágudxu xeta xtila nigá, ne za xí'ajdxu xrisa uva nigá, <sup>29</sup> lawe' da che xi'aj gágudxu, ne quebe dxéqedxu dxulé'e na ca naca bela' dxen chee Xránadxu, na' da xi'aj gágudxu gun na bágadxu zria. <sup>30</sup> Chee le na' benne' zan ládujla le'e quebe chawe' zaj zué', ne zaj nate ni'a ne'e, na' bal-la benne' ládujla le'e ba gulatié'. <sup>31</sup> Che guxúe xanne' cuínadxu, quebe gun na ba xen guchi'a Xránadxu cheedxu caní. <sup>32</sup> Gate Xránadxu dxuchi'é cheedxu, dx-

udée' dxi'u xel-la zi' chee quebe cuía xidxu nen benne' zaj zre'e xezr la xu nigá.

<sup>33</sup> Ca' naca na, bi bicha'. Gate dxezragale chee gágule da naca chee Xránadxu, le cueza ljuézrele tule xetule chee bi gágule. <sup>34</sup> Che núlale dxedunle, le gagu lu xu'u lízrquezle, chee quebe gun na ba xen guzría xi' Dios le'e gate na' nazragale. Xezícadxa da ca' dxelaca chee gucá'ana' chawe' gate xida' xedajnná'a le'e.

### Xel-la waca ca' da dxunna Be' Lá'azxa tu tudxu dxi'u

**12** Bi bicha', zaj de da dxaca lazra' chéajni'ile ca naca chee xel-la waca ca' da dxunna Be' Lá'azxa tu tudxu dxi'u.

<sup>2</sup> Ba nézquezle gate na' quebe ne chéajlele chee Xránadxu, be'ele lataj gulezrube xue' le'e chee xeajé lá'anale bedáu' xiaj xaga ca', da quebe dxelenné na.

<sup>3</sup> Chee le na' dxaca lazra' nézele che zua nu benne' nne': Nabía xi' Jesús, quebe dxuchálaje' ne chee Be' Lá'azxa chee Dios. Na' netú benne' gaca nne': Jesús naque' Xrana', che quebe dxuchálaje' ne chee Be' Lá'azxa.

<sup>4</sup> Zaj nazrá' xel-la waca ca' da gaca si' lu nnadxu, q san tuze naca Be' Lá'azxa, Bénnea' dxunne' dxi'u na.

<sup>5</sup> Zaj nazrá' ca gaca gundxu zrin, san tuze naca Xránadxu, Bénnea' dxundxu zrin chee'.

<sup>6</sup> Zaj nazrá' ca da gaca gundxu, san tuze naca Dios, Bénnea' dxunne' dxi'u xel-la waca gundxu na.

<sup>7</sup> Dios dxunne' cha cheedxu tu xel-la waca chee Be' Lá'azxa chee gaca da ba neza chee xúgutēdxu.

<sup>8</sup> Ne chee Be' Lá'azxa dxunne' bal-la benne' xel-la waca xuluchálaje' dutē xel-la sina, na' xebal-le' ne chee Be' ná'queze dxunne' le' xel-la waca xuluchálaje' dutē xel-la naxéajni'i.

<sup>9</sup> Xebal-le' dxelezi'e xel-la dxeajlí lazre' ne chee Be' ná'queze, na' xebal-le' dxelezi'e xel-la waca chee xelexunē' benne' we' ca'.

<sup>10</sup> Xebal-le' dxelezi'e xel-la waca xelunē' xel-la waca ca' chee xabáa,

na' xebal-le' dxelezi'e xel-la waca chee xuluchálaje' waláz chee Dios.

Xebal-le', Dios dxunne' le' xel-la waca xelenézenē' nu be' dxuchalaj na lu dxu'a bēneache.

Xebal-le' dxelezi'e xel-la waca xuluchálaje' dizra' nazrá', da quebe naca xrtízrqueze',

na' xebal-le' dxelezi'e xel-la waca xuluxuzájle'e dizra' nazrá' na'.

<sup>11</sup> Xúgutē da caní dxun tuze Be' ná'queze, Bénnea' dxunne' cha cheedxu xel-la waca caní cáteze da dxaca lázrequeze'.

### Xúgutēdxu nuchágadxu tuze be'la' dxen

<sup>12</sup> Zua cheedxu tu be'la' dxen da napa na zánete cue'. Dxi'u, dxéajlēdxu chee Cristo, nácadxu ca tuze be'la' dxen chee Cristo. <sup>13</sup> Xúgutēdxu dxi'u, che nácadxu benne' judío, u benne' quebe nácadxu judío, ne che

nácadxu benne' zaj nada'u, u benne' quebe zaj nada'u, gate gudxúadxu nisa da dxulé'e na nácadxu Cristo tuze, cá'anqueze bexácadxu ca tuze be'la' dxen, da na' ben tuze Be' Lá'azxa, na' Diosqueze benne' dxi'u lataj sidxu tuze Be' ná'queze.

<sup>14</sup> Tu be'la' dxen quebe naca na tu cue'ze, san naca na zane' cue'. <sup>15</sup> Che ní'adxu nna na: Quebe naca' na'u, ne chee le na' quebe naca' chee be'la' dxen chiu', quegá da ni gun na québedxa naca na chee be'la' dxen na'.

<sup>16</sup> Na' che nágadxu nna na: Quebe naca' lau', ne chee le na' quebe naca' chee be'la' dxen chiu', quegá da ni gun na québedxa naca na chee be'la' dxen na'. <sup>17</sup> Che dutē be'la' dxen cheedxu naca na laudxu, ¿ájazra gundxu xendxu? Che dutē be'la' dxen cheedxu naca na nágadxu, ¿ájazra gundxu lé'edxu? <sup>18</sup> Dios nuzúe' cha chee cue' be'la' dxen na' naga dxaca lazre' le'. <sup>19</sup> Che dutē na' naca na tuze cue', ¿gazra zúaqueze be'la' dxen na'? <sup>20</sup> Ca naca na, lácala naca na zane' cue', tuze be'la' dxen naca na.

<sup>21</sup> Xia laudxu quebe dxal-la' xē na nadxu: Quebe nachinda' lue', ne quebe dxal-la' nna xíchajdxu, xē na ní'adxu: Quebe nachinda' le'e. <sup>22</sup> Da naca na, da zaj naca chee be'la' dxen cheedxu da dxéquedxu quebe zaj nácateca na blau, zaj naca na da dxechínedxadxu, <sup>23</sup> Da zaj naca na chee be'la' dxen cheedxu da quebe dxápadxu ba lá'ana zaj naca na da dxugacu xánnedxadxu. Da ca' dxéquedxadxu quebe dxal-la' gulé'edxu zaj naca na da dxucáchedxu, <sup>24</sup> da quebe dxun na ba xen gundxu chee da ca' gaca gulé'edxu. Ca' naca na, Dios bene' be'la' dxen cheedxu chee gápadxadxu ba lá'ana da ca' dxéquedxu quebe nácateca na da gápadxu ba lá'ana, <sup>25</sup> chee quebe gaca chupa la'a be'la' dxen cheedxu. Tu tu cue' chee be'la' dxen cue' na gunne xue chee ljwezre na. <sup>26</sup> Che dxedé xel-la zi' tu da naca na chee be'la' dxen cheedxu, xúgutē da ca' dxeledé na xel-la zi', na' che tu da na' gaca da ba neza chee na, na' xúgutē da ca' dxelebe' na tu zren.

<sup>27</sup> Ca' naca na, le'e nácale be'la' dxen chee Cristo, na' tu tule nácale ca tu tu cue' chee be'la' dxen chee' na'.

<sup>28</sup> Ca' naca na, Dios nunézruje' lataj blau chee bal-la benne' ládujla bi chee Cristo. Lu lataj blau nuzré'e benne' gubáz chee' ca', na' lu lataj gudxupe' nuzré'e benne' dxuluchálaje' waláz chee', na' lu lataj guxunne' nuzré'e benne' dxulusédenē' bi chee' ca', na' gudé na' nuzré'e benne' dxelunē' xel-la waca da za xabáa. Gudé na' nuzré'e benne' ca' dxelexunē' benne' we' ca', ne benne' ca' dxelácalēne' bi chee' ca', ne benne' ca' dxelenná be'e, ne benne' ca' dxuluchálaje' dizra' nazrá' da quebe zaj nézenē'. <sup>29</sup> ¿Zaj naca xúgutē' benne' gubáz chee'? ¿Dxuluchalaj xúgutē' waláz chee'? ¿Dxulusēde xúgutē' bi chee' ca'? ¿Dxelún xúgutē' xel-la waca chee xabáa? <sup>30</sup> ¿Dxelexún xúgutē' benne' we' ca'? ¿Dxuluchalaj xúgutē' dizra' nazrá' da quebe naca xrtizre'? ¿Dxuluxuzájla'a xúgutē' dizra' nazrá' na'? ¿Cabí! <sup>31</sup> Le gun ba xuzre si' lu na'le chee Dios xel-la waca ca' da nácadxa chawe'. Na'a gulé'eda' le'e tu da cháwedxa.

## Xel-la zri'i lazre' li

**13** Che dxuchálaja' dizra' chee benne', ne chee gubáz chee xabáa ca', san quebe napa' xel-la zri'i lazre' li, quebe nácadxa' ca tu xide da dxenné na, u ca tu xia da dxenné na. <sup>2</sup> Che dxuchálaja' waláz chee Dios, ne che nezda' xúgutę da zaj nagache, ne dxéajni'ida' xúgutę da dxelaca, ne napa' xel-la dxeajlí lazre' chee séqueda' gucuasa' xi'a ca', san che quebe napa' xel-la zri'i lazre' li, quebe nu nácaqueza'. <sup>3</sup> Che quísia' xúgutę da dę chia', ne che guzúa' bęla' dxen chia' chee chezxe na, san che quebe napa' xel-la zri'i lazre' li, quebe bi da ba neza naca na chia'.

<sup>4</sup> Bénnea' nape' xel-la zri'i lazre' li:

Naque' zren lazre'.

Naque' zri'i lazre', ne quebe naque' xa lazre'.

Quebe dxucá'ana szren cuine', ne quebe dxuzęcu'ę.

<sup>5</sup> Quebe dxunę' da caleła,

ne quebe naque' zre'e lazre'.

Quebe dxezre'ę, ne quebe dxu'u lazre'.

<sup>6</sup> Quebe dxebene' gate nu benne' dxeajcházie' lu dul-la,

san dxebene' lu da li.

<sup>7</sup> Dxuchaga lawę' xúgutę da dxaca nen dutę xel-la dx-eajlí lazre' chee',

ne dutę xel-la dxebaza lazre' chee',

ne dutę xel-la zren lazre' chee'.

<sup>8</sup> Xel-la zri'i lazre' li quebe te chee na. Wazrín zra gate québedxa chínedxu nu benne' guchálajłęna' dxi'u waláz chee Dios, ne benne' dxéajni'ine' xúgutę. <sup>9</sup> Na'a dxéajni'idxu látédauze, ne látédauze dxuchálajdxu waláz chee Dios. <sup>10</sup> Zrin zra gate na' chéajni'idxu dutę ca naca, na' te chee da na' naca na látédauze.

<sup>11</sup> Gate ne naca' bidau' bchálaja' ca bidau', ne gulaba lazra' ca bidau', ne bchi'a ca bidau', san gate guca' benne' waca, bzua' chalá'ala da zaj naca chee bidau'.

<sup>12</sup> Cá'anqueze na'a quebe dxelé'edxu cátequeze, ne da dxelé'edxu zę zrul-la, san lu zra na' lé'edxu cátequeze.

Na'a látédauze núnbe'a, san lu zra na' gúnbe'a cátequeze ca dxun Dios, núnbe'tequeze' neda'. <sup>13</sup> Ca' naca na, xel-la dxeajlí lazre', ne xel-la dxebaza lazre', ne xel-la zri'i lazre' li xelezúaqueze na chadía chacanna, san da blaudxa chee da caní naca na xel-la zri'i lazre' li.

**Ca naca chee nu benne' dxuchálaje' dizra' nazrá' da quebe naca na xrtizre'**

**14** Le gun ba xuzre gápale xel-la zri'i lazre' li, ne cá'anqueze le naba Dios gunne' le'e xel-la waca ca' chee Be' Lá'azxa, ne da naca blaudxa, chee gaca guchálajle waláz chee Dios. <sup>2</sup> Bénnea' dxuchálaje' dizra' nazrá' da quebe naca na xrtizre' dxuchálajłęna' Dios, quegá nen bénneache, lawe' da quegá nu dxéajni'i da dxenné'. Dxuchálaje' ne chee Be' Lá'azxa da zaj nagache. <sup>3</sup> Bénnea' dxuchálaje' waláz chee Dios dxuchálajłęna' bénneache chee gusegule' benne' ca' lu da naca chee Dios, ne chee ne xúne'-be', ne chee xue zrene'-be'. <sup>4</sup> Bénnea' dxuchálaje' dizra' nazrá' na'

dxusegula cuine', san bénnea' dxuchálaje' waláz chee Dios dxusegule' bi ca' chee Cristo lu da naca chee Dios.

<sup>5</sup> Dxaca lazra' gapa xúgutęle xel-la waca guchálajle dizra' nazrá', san dxaca lázredxa' gaca guchálajle waláz chee Dios, lawe' da nácadxa chawe' guchálajle waláz chee Dios quézcala guchálajle dizra' nazrá', che quebe zua nu benne' xuzájłę'ę dizra' nazrá' na' chee xelegula bi chee Cristo lu da naca chee Dios. <sup>6</sup> Chee le' na', bi bícha'dau', che xida' xedajnná'a le'e, ne guchálajłęna' le'e dizra' nazrá', žbizra da ba neza gaca na chee che quebe guchálajłęna' le'e tu da ba ble'e Dios neda', u tu da bzéajni'ine' neda', u tu da guchálaja' waláz chee Dios, u tu da guzéajni'ida' le'e?

<sup>7</sup> Nná'xquedxu ca da ca' dxelenné na da quebe zaj naca bane na ca bchiuj, ne bihuel-la. Che quebe gaca chéajni'idxu da dxelenné na, quebe gaca nezdxu ca da dxelul-la na. <sup>8</sup> Gate dxaca wedil-la, che quebe dxebezre luzu da dxulucuezre' cátequeze, quebe nu se lu wedil-la. <sup>9</sup> Cá'anqueze dxaca chee le'e. Che quebe guchálaja' dizra' da dxéajni'ile, žájazra gaca nézele da dxenní'a? Guchálaja' lu be'. <sup>10</sup> Da zante dizra' nazrá' zaj dę lu xęzr la xu nigá, ne da li xúgutę na zaj zéaję na. <sup>11</sup> Na'a che quebe dxéajni'ida' dizra' dxuchálajłę tu benne' neda', gaca' ca tu benne' zitu' lau bénnea', na' le' gaque' ca tu benne' zitu' lawa' neda'. <sup>12</sup> Chee le' na', lawe' da dxaca lázrele si' lu na'le xel-la waca ca' da dxunna Be' Lá'azxa dxi'u, le gun ba xuzre si' lu na'le da ca' xulusegula na bi ca' chee Cristo lu da naca chee Dios.

<sup>13</sup> Ca' naca na, bénnea' dxuchálaje' dizra' nazrá' dxal-la' naba lau Dios gunne' le' xel-la waca xuzájłę'ę dizra' nazrá' na'. <sup>14</sup> Che guchálajłęna' Dios tu dizra' nazrá'la, da li dxuchálajłęna' le' lu be' nácaqueza', san quebe bi da ba neza naca na chee xel-la dxéajni'i chia'. <sup>15</sup> žBizra da dxal-la' guna' xca'? Dخال-la' guchálajłęna' Dios lu be' nácaqueza', ne cá'anqueze nen xel-la dxéajni'i chia'. Dخال-la' gul-la' chee Dios lu be' nácaqueza', ne cá'anqueze nen xel-la dxéajni'i chia'. <sup>16</sup> Che dxue la'anuu' Dios tuze lu be' nácaquezu', na' benne' ljwezru' dxenne' chiu' quebe gaca gunę' tu zren lue' gate dxu'u Dios: Xcalenu', lawe' da quebe dxéajni'ine' da dxennáu'.

<sup>17</sup> Da dxuchálajłęnu' Dios nácale'ę na chawe', san bénnea' dxenne' quebe dxegule' lu da naca chee Dios.

<sup>18</sup> Dxapa' Dios: Xcalęne' lawe' da dxuchálajdxu' dizra' nazrá' ca xúgutęle le'e, <sup>19</sup> san naga zaj nazraga bi chee Cristo dxaca lázredxa' guchálaja' gázxuze dizra' da xeléajni'ibe' chee gusédeda'-be', quézcala guchálaja' chi mila dizra' nazrá' da quebe gaca xeléajni'ibe'.

<sup>20</sup> Bi bícha'dau'. Quebe gulaba lázrele ca bidau'. Le gaca ca bidau' chee quebe gunle da caleła, san le gaca benne' wal-la chee gulaba lázrele cháwe'dau'.

<sup>21</sup> Naxúaj lu xiche lá'azxa chee da dxenná bea Dios, da dxenná na: Guchálajłęna' benne' xęzr la xu nigá nen dizra' nazrá', ne lu dxu'a benne' zitu' ca', san ne caní quebe xelenne' chia'. Caní dxenná Xránadxu. <sup>22</sup> Ca' naca na, xel-la waca chee guchálajdxu dizra' nazrá' naca na tu da dxulé'e na lau benne' quebe dxeléajłę'ę chee Dios, ne quegá lau benne' dxeléajłę'ę chee'.

<sup>23</sup> Na'a, gate nazrágale, che xúgutęle dxuchálajle dizra'

nazrá', na' che xelexú'u benne' quebe zaj nazédené', u benne' quebe dxeléalje'e chee Dios, ¿quebe xelenné' zaj nadá xichaj lázrdaule? <sup>24</sup> Na'a che dxuchalaj xúgutele waláz chee Dios, na' che chu'u tu benne' quebe dxéajle'e chee Dios, u tu benne' quebe nazédené', na' guéquene' nabague' dul-la, na' léqueze' guchi'a cuine' gate xenne' da dxennale xúgutele. <sup>25</sup> Ca' gaca na, da zaj nagache xichaj lázrdawe' xululé'e lau na, na' guzúa zribé', ne güe lá'ane' Dios, na' nne' da li zúale Dios le'e.

<sup>26</sup> Ca' naca na, bi bícha'dau', gate dxezragale, bál-lale le'e nápaie salmo ca', ne xebál-lale nápaie da gusédele ljwézrele, ne xebál-lale nápaie tu da ble'e Dios le'e, ne xebál-lale nápaie tu dizra' nazrá' da guchálajle, ne xebál-lale nápaie xel-la waca xuzájla'ale dizra' nazrá' na'. Cháwe'dau' naca na, san xúgute da ca' dxal-la' xulusegula na bi ca' chee Cristo lu da naca chee Dios. <sup>27</sup> Gate guchálajle dizra' nazrá', waca xuluchalaj chupa benne', u chunna benne', ne tuwéaj tuwéajle, na' tu benne' dxal-la' xuzájle'e da dxennale. <sup>28</sup> Na'a che quebe nu chilá' benne' xuzájle'e dizra' nazrá' na', gácadxa chawe' quebe bi da nne' naga nazrágale. Tu tule dxal-la' nnale lé'eezle, ne nen Dios. <sup>29</sup> Cá'unqueze benne' dxuluchálaje' waláz chee Dios waca xelenné' chupa chúnnaze', na' xezicadxale dxal-la' guchí'ale da na' dxenné'. <sup>30</sup> Che dxulé'e Dios xetú benne' dxe'e na' tu dizra', na' bènnea' dxuchálaje' dxal-la' gusané' ca da dxuchálaje'. <sup>31</sup> Xúgutele le'e waca guchálajle waláz chee Dios tuwéaj tuwéajle chee chéajni' xúgutele, ne sile da gun chacha na le'e. <sup>32</sup> Benne' ca' dxuluchálaje' waláz chee Dios dxun na ba xen nna bé'ene' be' nácaqueze', <sup>33</sup> lawe' da naca Dios Bènnea' dxunne' dxi'u xel-la dxebeza zri lazre', ne quebe dxun zréajene' bènneache.

Ca zaj xu'u lau xúgute cue' bi bíchedxu, bi chee Dios, <sup>34</sup> dxal-la' xelexúa zrize nu'ula ca' naga nazrágale, lawe' da quebe naca chee' xuluchálaje'. Dخال-la' xuluzúe' dizra' ca naxúaj na lu da nadxixruj bea Dios. <sup>35</sup> Che dxelaca lazre' bi xeléajni'ine', dxal-la' xuluchébe' benne' cha chee' lize tu tue' lawe' da quebe dxulé'e na chawe' tu nu'ula guchálaje' naga nazrágale.

<sup>36</sup> Dخال-la' gueque be'ele quebe guzú lau xrtizra Dios sua na ládujla le'e, ne quegá le'eze nazí' lu na'le na. <sup>37</sup> Che nu benne' dxéquene' naque' benne' dxuchálaje' waláz chee Dios, u zúale Be' Lá'azxa le', dxal-la' gueque bé'ene' da nigá dxuzúaja' chee naca na tu da gunná be'e Xránadxu. <sup>38</sup> Che quebe dxaca lazre' gueque bé'ene' da nigá, quebe dxal-la' si' lu na'le bènnea'.

<sup>39</sup> Ca' naca na, bi bícha'dau', le gun ba xuzre guchálajle waláz chee Dios, ne quebe guzágale bènnea' dxuchálaje' dizra' nazrá'la. <sup>40</sup> Xúgute da caní dxal-la' gunle duté ba lá'ana, ne ca dxal-la' gaca na.

#### Ca bebán Cristo ládujla benne' gate

**15** Na'a, bi bícha'dau', dxuzenda' le'e dizra' chawe' da ba bzenda' le'e, da na' guzú' lu na'le, ne da da'le le'e. <sup>2</sup> Ne chee dizra' chawe' nigá nalale che dxéa-

ljele chee da bzenda' le'e, ne che quebe guca dácheze xel-la dxeajlí lazre' chee.

<sup>3</sup> Da naca blaudxa, bzéajni'ida' le'e da guzú' lu na'a, gute Cristo ne chee dul-la da nabágadxu ca naxúaj na lu dizra' lá'azxa, <sup>4</sup> na' bulucache' Le', na' bebane' zra guxunne' zra ca naxúajqueze na lu dizra' lá'azxa, <sup>5</sup> na' ble'e lawe' lau Pedro, na' gudé na' ble'e lawe' lau benne' gubáz chee' ca'. <sup>6</sup> Gudé na' ble'e lawe' lau bi bíchedxu zaj nácadxe' ca gazxu' gaxúa benne' zaj nazrague' tu zren, na' benne' zan, benne' ca' ne zaj naca bané', láqueze benne' zan, benne' ca' ba gulatíe'. <sup>7</sup> Gudé na' ble'e lawe' lau Jacobo, na' gudé na' ble'e lawe' lau xúgute benne' gubáz chee' ca'.

<sup>8</sup> Bzébedxa, ca gudé chee xúgute da na', ble'e lawe' lawa' neda', lálcala neda' naca' ca tu bidau', bi gúlajbe' ba gudé beu' cheebe'. <sup>9</sup> Neda' naca' benne' bzébedxa chee xúgute benne' gubáz chee' Cristo, ne quebe naca chia' si' la' gubáz chee' Cristo lawe' da gudáu zi' xuzra' bi ca' chee Dios. <sup>10</sup> Naca' da naca' lawe' da guca Dios zri'i lazre' nen neda', na' quebe guca dácheze xel-la zri'i lazre' chee' nen neda', lawe' da ba nundxa' zrin ca xúgute benne' gubáz ca', láqueze quegá neda' nuna' na, san Dios bchínene' neda'. <sup>11</sup> Quebe zácadxa na che naca neda', u che naca benne' ca', da nigá naca na dizra' bzénentu' bènneache, ne naca na da guxéajlele.

#### Ca xelexebán benne' gate

<sup>12</sup> Che da dxuzénentu' bènneache dxenná na bebán Cristo ládujla benne' gate, ¿ájazra naca na bál-lale le'e dxennale quebe xelexebán benne' gate? <sup>13</sup> Che quebe xelexebán benne' gate, Crístoqueze quebe bebane' ládujla benne' gate, <sup>14</sup> na' che quebe bebán Cristo ládujla benne' gate, dácheze naca da dxuzénentu' bènneache, ne dácheze naca da dxeajlí lázrele chee Cristo. <sup>15</sup> Che caní naca na dxexechébentu' chee Dios da wen lazre' lawe' da dxennantu' bsebán Dios Cristo, na' che quebe xelexebán benne' gate, quebe bsebán Dios Cristo. <sup>16</sup> Che quebe xelexebán benne' gate, Crístoqueze quebe bebane', <sup>17</sup> na' che quebe bebán Cristo, dácheze naca da dxeajlí lázrele chee', na' ne nabágale dul-la. <sup>18</sup> Che caní naca na, cá'unqueze benne' zaj nate, benne' ca' guleajlí lazre' Cristo zaj nanítequeze'. <sup>19</sup> Che da dxebeza lázrentu' da naca chee Cristo naca na cheeze xezr la xu nigá, nácadxu baxáchedxa ca xúgute bènneache.

<sup>20</sup> Na'a da li bebán Cristo ládujla benne' gate. Le' naque' benne' nedxu bebane' ládujla benne' gate quézcala xúgute benne' ca' dxal-la' xelexebane'. <sup>21</sup> Ca guca, bla' xel-la gute lu xezr la xu nigá ne chee tuze benne', cá'unqueze ne chee tuze benne' bla' xel-la dxexebán chee benne' gate. <sup>22</sup> Ca naca dxelate xúgute bènneache lawe' da zaj naque' tuze nen Adán, cá'unqueze xúgute benne' zaj naca tuze nen Cristo xelape' xel-la nabán li lazre'. <sup>23</sup> Xelexebán tu tue' gate xelexexale', nédxula bebán Cristo ca tu lina nedxu, na' gudé na', gate xelá' Cristo xelexebán benne' zaj naque' bi chee' ca'. <sup>24</sup> Nadxa cheajsé chee xezr la xu nigá gate guzría xi' Cristo xúgute da dxelenná bea, ne xúgute da

dxeliruj bea na, ne xúgute da zaj napa xel-la waca, na' gudé' xel-la dxenná bea chee' lu na' Xradxu Dios.

<sup>25</sup> Dxun na ba xen nna bea Cristo ca zrin zra ba nuzúa Dios zran ni'e xúgute benne' guledábague' Le', <sup>26</sup> na' da bzébedxa da cuía xi' naca na xel-la gute. <sup>27</sup> Ba nuzúa Dios xúgute zran ni'a Cristo, san gate dxenná na nuzúe' xúgute zran ni'e, dxaca bea na quebe zua Dios ládujla da ca', lawe' da Léqueze' naque' Bénnea' bzué' xúgute zran ni'a Cristo. <sup>28</sup> Gate ba zua xúgute lu na' Cristo, nadxa Crístoqueze, Bénnea' naque' Zrí'in-equeze Dios guzúa cuine' lu na' Dios, Bénnea' bdeé' xúgute lu na' Le'. Ca' naca na, Dios gaque' blau lawe' xúgute da de.

<sup>29</sup> Xetú da dxaca, zaj zua benne' dxeledxúe' nisa waláz chee benne' zaj nate. ¿Bizr chee na' dxeluné' caní chee quebe xelexebán benne' gate? ¿Bizr chee na' dxeledxúe' nisa waláz chee benne' gate?

<sup>30</sup> Cá'aqueze, ¿bizr chee na' zúatequezdxu dxi'u lu da stébe? <sup>31</sup> Xúgute zra zua' lu da stébe chee xel-la gute. Dxapa' le'e, bi bicha', da li naca da nigá ne chee da ba neza da napa' ne chee lu da nácadxu nen Xránadxu Jesucristo. <sup>32</sup> Che ca tu bénneacheze gudíl-lale-na' benne' zaj naca ca be snia ca' lu xezre Efeso ¿bizra da ba neza naca na chia'? Che quebe xelexebán benne' gate dxal-la' gundxu ca dxelenná bénneache, dxelen-né': "Xi'aj gágudxu lawe' da wxre gátedxu."

<sup>33</sup> Quebe güele lataj nu si xé le'e. Naca cáteze dxenná na:

Che gácadxu tuze benne' ca' dxeluné' da calela, tu zrénequeze gundxu da calela.

<sup>34</sup> Le guxúe xanne' cuínale, ne quebe gunle dul-la, lawe' da bál-lale le'e quebe núnbea xánnele Dios. Da nigá dxapa' le'e chee gápale xel-la stu'.

<sup>35</sup> Guchébe nu benne' neda': Ájazra xelexebán benne' gate? ¿Ájazra gaca bēla' dxen chee'? <sup>36</sup> Da nigá naca na tu da xálaze, lawe' da gate dxázadxu tu binne, dxun na ba xen cuía xi' binnedu na' chee gaca na tu xágadau'.

<sup>37</sup> Da na' dxázadxu quebe naca na da xelá', san tu binnedauze naca na, che naca na zrua' xtila u xetú binnedau'. <sup>38</sup> Te na' gun Dios chee binnedu na' tu xágadau' cáteze dxaca lázrequeze', na' chee tu tu binnedau' dxuné' tu tu xágadau' cáteze zaj naca binnedu ca'. <sup>39</sup> Quegá xúgute bēla' dxen tuz ca zaj naca na. Tuze ca naca bēla' dxen chee bénneache, ne xetuze ca naca bēla' dxen chee bē xixre' ca', na' xetuze ca naca bēla' dxen chee bxinnedu ca', ne xetuze bēla' dxen chee bela ca'. <sup>40</sup> Cá'aqueze zaj naca bēla' dxen chee xabáa, ne bēla' dxen da zaj naca na chee xezr la xu nigá. Xel-la xrtan chee da zaj naca chee xabáa nazrá' ca xel-la xrtan chee da zaj naca chee xezr la xu.

<sup>41</sup> Xel-la naxaní' chee gubizra nazrá' ca xel-la naxaní' chee beu', ne cá'aqueze nazrá' ca xel-la naxaní' chee belaj ca', na' ládujla belaj ca', xel-la naxaní' chee tu belaj nazrá' ca xel-la naxaní' chee xetú belaj. <sup>42</sup> Cá'aqueze dxaca chee benne' ca' xelexebané' ládujla benne' gate. Dxucáchedxu lu ba tu da guzru', na' xebán tu da québedxa gate. <sup>43</sup> Dxucáchedxu tu da xálaze, na' xebán tu da xabáa. Dxucáchedxu tu da nate

ni'a na', na' xebán tu da wál-lale'e. <sup>44</sup> Dxucáchedxu tu bēla' dxen chee beniácheze, na' xebán tu bēla' dxen da naca na chee be' nácaquezdxu. Che zua tu bēla' dxen da naca na bénneacheze, cá'aqueze zua tu bēla' dxen da naca na chee be' nácaquezdxu.

<sup>45</sup> Cá'aqueze caní naxúaj lu dizra' lá'azxa da dxenná na: Benne' nedxu Adán guque' bénneache ban, na' Adán, benne' bzébe, naque' Be' da dxunna xel-la nabán. <sup>46</sup> Bénnea' naque' Be' quebe ble'e nedxu, san bénnea' naque' bénneacheze. Gudé na' bla' Bénnea' naque' Be'. <sup>47</sup> Benne' nedxu guque' xu bxrte, ne guque' chee xezr la xu nigá, na' Benne' gudxupe' naque' Xránadxu, Benne' chee xabáa. <sup>48</sup> Bēla' dxen ca' chee xezr la xu nigá zaj naca na ca guca bénnea' guque' xu bxrte, na' bēla' dxen ca' da zaj naca na chee xabáa zaj naca na ca Bénnea' naque' chee xabáa. <sup>49</sup> Ca naca, nácadxu ca Bénnea' guque' xu bxrte, cá'aqueze gácadxu ca Bénnea' naque' chee xabáa.

<sup>50</sup> Dxaca lazra' xapa' le'e, bi bicha'dau', bēla' dxen cheedxu da naca na xu bxrte quebe gaca chu'u na naga dxenná bea Dios lawe' da na' guzru quebe gaca zraga na da na' si bea chadía chacanna. <sup>51</sup> Dxapa' le'e tu da nagache nédxute: Quegá xúgutedxu gátedxu, san xúgutedxu sidxu tu bēla' dxen cube. <sup>52</sup> Chadite gaca na, ca dxun benne' guchudie' xexraté lawe', gate xendxu chi'i luzu da dxulucuezre' da bzébe. Cuézre-queze luzu da dxulucuezre', na' xelexebán benne' gate naga cabátadxa xelatie', na' dxi'u sidxu tu bēla' dxen cube. <sup>53</sup> Bēla' dxen cheedxu da guzru dxal-la' xexaca na tu da québedxa guzru, na' bēla' dxen cheedxu da gate dxal-la' xexaca na tu bēla' dxen da québedxa gate. <sup>54</sup> Gate bēla' dxen cheedxu da guzru ba bexaca na da québedxa guzru, ne bēla' dxen cheedxu da gate ba bexaca na tu da québedxa gate, nadxa gaca li da naxúaj na lu dizra' lá'azxa, da dxenná na: Ba beladxu lu na' xel-la gute.

<sup>55</sup> Lue', xel-la gute, ¿ga na' xel-la waca chiu' chee gunu' netu' we'?

Lue', xel-la gute, ¿ga na' da zrué'enu'?

<sup>56</sup> Da dxunna xel-la gute xel-la waca chee gun na dxi'u we' naca na dul-la, na' da nadxiruj bea da gula na' naca na da dxunna na dul-la xel-la waca chee gudé na dxi'u lu xel-la gute. <sup>57</sup> Na'a, xcalén Dios, Bénnea' dxunne' dxi'u xel-la waca chee zrué'dxu lu dul-la, ne lu xel-la gute ne chee Xránadxu Jesucristo.

<sup>58</sup> Chee le na', bi bicha' nazri'ite lazra', le se chacha, ne le súateze lu zrin dxúndxale chee Xránadxu lawe' da nézele quebe naca dácheze zrin dxunle tu zren nen Xránadxu.

**Dumí da gutúpale chee gácalele bíchedxu ca'**

**16** Ca naca chee dumí gutúpale chee gácalele bi bíchedxu ca', le gun na cáteze bzéajni'ida' xúgute cue' bi chee Cristo zaj zra' xezre ca' zaj nababa Galacia. <sup>2</sup> Tu tu zra nedxu chee da gazre zra tu tule le'e dxal-la' gúnnale late' weaj ca da dxezile, na' cu'u cháwele na chee quebe gun na ba xen gúnnale dumí gate xida'. <sup>3</sup> Gate na' xelá'a, sel-la' xezre Jerusalén

benne' ca' cuele, na' gunézruja' lẹ' tu xiche chee xelu'e dumí na' chee bi bíchedxu zaj zře' na'. <sup>4</sup> Che gata' lataj cha'a, na' sá'acalequeze' neda'.

#### Da dxugú'u bea Pablo gune'

<sup>5</sup> Lu neza chia' dxun na ba xen tea' naga nababa xezr la xu Macedonia, na' xelá'a xezre Corinto ca te na'.

<sup>6</sup> Wegá'analja' nen le'e tu chi'i, u che ba guca, na' sua' nen le'e dutę beu' zaga ca', na' le'e waca gácalęle neda' lu neza chia' naga dxal-la' cha'a. <sup>7</sup> Quebe dxaca lazra' xedajnná'a le'e ca teza', san dxebeza lazra' súaqueza' tu chi'i nen le'e, che gunna Xránadxu lataj. <sup>8</sup> Na'a xegá'ana' lu xezre Efeso nigá ca zrin zra Pentecostés, <sup>9</sup> lawe' da napa' lataj guna' tu zrin zren chee Xránadxu da gulé'etę lawe na, lácala naxán benne' ca' dx-eledábaguę'.

<sup>10</sup> Che ba bla' Timoteo, le gun ba xuzre suabe' xel-la dxebe' nen le'e, ne quebe bi cué'ebe' gunne xue, lawe' da dxunbe' zrin chee Xránadxu cáteze dxun neda'.

<sup>11</sup> Chee lę na' netule le'e quebe guzúale-be' chalá'ala, san le gácalę-be' chee xexu'ube' neza lu xel-la dxebeza zri lazre' chee xedajnná'abe' neda', lawe' da dxebeza'-be' tu zren nen bi bíchedxu caní.

<sup>12</sup> Ca naca chee bíchedxu Apolos, guta' xúle'ęda' lę' chee chéajlę' bi bíchedxu ca' xedajlenné'ę le'e, san quebe guca lazre' se'ę na'a. Wide' gate gape' lataj.

#### Dxulugapa lįwezre' diuzre

<sup>13</sup> Le sua ban lazre'. Le sę chacha lu xel-la dxeajlí lazre' cheęle. Le sę ca zę benne' biu. Le gaca benne'

wal-la. <sup>14</sup> Dutę xel-la zri'i lazre' le gun xúgutę da dxunle.

<sup>15</sup> Na'a, bi bícha'dau', ba nézquezle gulaca xrtía Estéfanos benne' nedxu naga nababa Acaya gulezí' lu ne'ę dizra' chawe' chee Cristo, na' buluzúa cuine' chee xelá-calęę' bi bíchedxu ca', bi chee Cristo. <sup>16</sup> Dxaca lazra' guzúa cuinale lu na' benne' caní, ne lu na' xúgutę benne' dxelácalę lįwézredxu, ne dxelún zrin chee Cristo. <sup>17</sup> Zua' xel-la dxebe' lawe' da belelá' Estéfanos, ne Fortunato, ne Acaico, lawe' da belunę' chia' da quebe guzéquele gunle le'e lawe' da zrale zitu'.

<sup>18</sup> Belún chúchue' be' nácaqueza', ne be' nácaquezle le'e. Dxun na ba xen si' lu na'le benne' caní.

<sup>19</sup> Xúgutę cue' bi chee Cristo naga nababa xezr la xu Asia dxulugapa le'e diuzre. Aquilo ne Priscila, ne bi bíchedxu ca' dxelezraga lu xu'u lizre' dxulugápale'ę le'e diuzre lu La Xránadxu. <sup>20</sup> Xúgutę bíchedxu nigá dxulugape' le'e diuzre. Le gugapa diuzre lįwézrele tule xetule, ne le gunida lįwézrele.

<sup>21</sup> Neda', Pablo, dxuzúaja' da dxugapa' le'e diuzre nen ná'aqueza'.

<sup>22</sup> Che nu benne' quebe nazrí'ine' Xránadxu Jesucristo, cuía xi' bėnnea'. ¡Gudá Xránantu'!

<sup>23</sup> Dxenaba' Xránadxu Jesucristo gun cháwe'ę le'e.

<sup>24</sup> Dxusel-la' chee xúgutęle xel-la nazrí'i chia' lu La Jesucristo. ¡Ca'an gaca na!

## 2 Corintios

Pablo dxuzúaję cheę bi bíchedxu zaj zre'ę xęzre Corinto

**1** Neda', Pablo, naca' gubáz cheę Jesucristo lawe' da naca na da dxaca lazre' Dios. Tu zren nen bíchedxu Timoteo dxuzúaja' da nigá cheęle le'e, bi bícha'dau', zrágale cheę Dios lu xęzre Corinto. Cá'anqueze dxuzúaja' da nigá cheę xúgute' bi cheę Dios zaj zre'ę xęzre ca' zaj nababa xęzr la xu Acaya. <sup>2</sup> Dxenaba' Xradxu Dios, ne Xránadxu Jesucristo gun chawe'ę le'e, ne gunnę' le'e xel-la dxebeza zri lazre'.

Da ca' guzí guzaca' Pablo

<sup>3</sup> Dxue lá'anantu' Dios, Xra Xránadxu Jesucristo, lawe' da naque' Xradxu dxexache lazre' dxi'u, ne Dios dxexúe zrene' dxi'u. <sup>4</sup> Dios dxexúe zrénzeze' dxi'u ca naca xúgute' xel-la zi' da dxededxu, cheę cá'anqueze dxi'u gaca xexúe zrendxu benne' ca' dxeledę' xel-la zi', na' xue zrendxu le' cáteze da ba nun Dios cheędxu dxi'u. <sup>5</sup> Lawe' da dxededxu xel-la zi' zren ca da gudé Cristo, cá'anqueze ne cheę Cristo zua Nu dxexúe zrénzeze dxi'u, Léqueze Dios. <sup>6</sup> Cheę le' na', che dxedentu' netu' xel-la zi', naca na cheę sua Nu xexúe zren le'e, ne cheę lale, na' caní gaca guchaga laule lu dutę xel-la zren lazre' cheęle xel-la zi' ca' da dxededxu dxi'u. <sup>7</sup> Dxuxrén lázrele'ęntu' le'e, lawe' da nézentu' ca dxedele xel-la zi' tu zren nen netu', cá'anqueze sua Nu xexúe zren le'e tu zren nen netu', Léqueze Dios.

<sup>8</sup> Bi bicha', dxaca lázrentu' nézele ca naca xel-la zi' zren da gudentu' naga nababa Asia. Guca na tu xel-la zi' zrendxa ca da gaca guchaga launtu', na' québedxa guleza lázrentu' lantu'. <sup>9</sup> Gúquentu' ba zua gagu xelute benne' ca' netu'. Guca cheęntu' da nigá cheę bzéajni'i na netu' guxrén lázrentu' Dios, ne quegá guxrén lazre' cuínantu'. <sup>10</sup> Dios bselé' netu', na' ne dxuselé' netu' lu da stębe zren nigá cheę xel-la gute, na' dxebeza lázrentu' Le' guseláqueze' netu' <sup>11</sup> che le'e gácalele netu', nábadxu Dios gácalene' netu'. Che benne' zan xelenabe' Dios gácalene' netu', na' benne' zan xelęę Dios: Xcalenu', cheę da chawe' ca' da gun Dios cheęntu'.

Bizr cheę na' Pablo guzrene' chéaje' Corinto

<sup>12</sup> Naca tu da ba neza da nápantu' da zua na lawe' da dxę xichaj lázrdauntu' netu' ba gudantu' lu da lá'azxa, ne du lázrentu', lu xęzr la xu nigá, ne ládujla le'e. Dios lu xel-la zri'i lazre' cheę' gúcalene' netu' cheę bęntu' caní, ne quebe bęntu' na lu xel-la sina cheęzquezentu'.

<sup>13</sup> Lu da dxuzúajntu' cheęle quebe bi de da quebe gaca gulábale, ne chéajni'ile, na' dxaca lazra' chéajni'i xánnele <sup>14</sup> ca ba guxéajni'ile late', cheę lu zra xelá' Xránadxu Jesús, gácantu' netu' tu da ba neza cheęle le'e, ca le'e gácale tu da ba neza cheęntu'.

<sup>15</sup> Lawe' da dxuxrén lazra' gaca caní, bechugu lazra' xida' nédxula xedajnná'a le'e cheę gaca tu da ba neza cheęle, na' xedajnná'a le'e chupa lasa, <sup>16</sup> lawe' da bechugu lazra' xedajnná'a le'e gate tea' cha'a xęzre ca' zaj nababa Macedonia, na' te na', gate zezá'a lu xęzre ca' zaj nababa Macedonia, xedajnná'a le'e xetú. Ca' gaca na, le'e gaca gácalele neda' cha'a xęzre ca' zaj nababa Judea. <sup>17</sup> ¿Quebe naca' du lazra' gate dxechugu lazra' caní? ¿Dxéquele le'e naca' ca tu benne' cheę xęzr la xu nigá, na' dxennía': Awe', cabí, gate dxechugu lazra' da guna'? <sup>18</sup> Dios nézquezne' neda', ne Silvano, ne Timoteo, quebe dxęntu' le'e: Awe', cabí. <sup>19</sup> Naca na caní lawe' da Jesucristo, Zri'ine Dios, Bénnea' bzénten-tu' le'e ca naca cheę', cabata' gunné': Awe', cabí. Nen Cristo nácaqueze da li xrtizra Dios, <sup>20</sup> lawe' da ne cheę Le' dxelaca li xúgute' da guchebe lazre' Dios. Cheę le' na', gate dxue lá'anantu' Dios, dxennantu': ;Ca'an naca na! ne cheę Jesucristo. <sup>21</sup> Dios naque' Bénnea' ba nuzé chúchue' netu', ne le'e lu da naca cheę Cristo, ne ba guquęę dxi'u, <sup>22</sup> ne ba nuzúe' cheędxu tu da dxulé'e na nácadxu bi cheę Le', lawe' da ba nuzúe' Be' Lá'azxa lu xichaj lázrdaudxu, da dxunna bea na sidxu da naca cheę'.

<sup>23</sup> Che quebe ne xida' Corinto ca bechugu lazra', neze Dios naca na cheę gaca' zren lazre' nen le'e, ne che quebe naca caní, dxenaba' Dios xequęę xel-la nabán chia'. <sup>24</sup> Quebe naca na lawe' da dxaca lázrentu' nna bé'entu' le'e da dxal-la' chéajlele, lawe' da ba ze cháchale lu da dxéajlele. Dxaca lázrentu' bédxale lu da naca cheę Cristo.

**2** Cheę le' na' bechugu lazra' quebe xida' xedajnná'a le'e lu da baxache'. <sup>2</sup> Che neda' guzúa' le'e lu da baxache', ¿núzraqueze guzúa neda' lu xel-la dxebe? Tuze le'e, benne' ca' ba bzua' lu da baxache'. <sup>3</sup> Cheę le' na' bzuaaja' cheęle ca da bęna' lawe' da quebe guca lazra' xida' cheę guzúale neda' lu da baxache', le'e na' dxal-la' guzúale neda' lu xel-la dxebe. Bxren lazra' che neda' zua' lu xel-la dxebe, cá'anqueze le'e súale lu xel-la dxebe. <sup>4</sup> Gate bzuaaja' cheęle da na' guzúle'ęda' gunne xue, ne guzúa' lu da zi' da xa', ne cá'anqueze gudxézrele'ęqueza', san quebe bzuaaja' da na' cheę guzúa' le'e lu da baxache', san cheę nézele nazrí'ile'ęda' le'e.

### Ca dxal-la' xulunite lawe' chee bénnea' bene' da calela

<sup>5</sup> Che nu benne' ba bzue' neda' lu da baxache', quegá chia' néda'ze bene' na, san cá'anqueze waca nnadxu, bzue' xúgutele lu da baxache'. Dxenní'a: Waca nnadxu, chee quebe gácatęca' snia. <sup>6</sup> Ca xel-la zi' da bdele bēnnea' gate na' bzrágale, ba nácale'ęqueze da na'. <sup>7</sup> Ca' naca na, na'a dxal-la' gunité laule chee bénnea', ne xue zrenle le', chee quebe gunitię' xel-la dxebeza lazre' chee' ne chee da baxache' zren da dxedęe'. <sup>8</sup> Chee le' na' dxata' xueda' le'e gulé'ele le' xecha lasa ca nazrí'ile'ęle le'. <sup>9</sup> Bzujaja' nédxula chee'le ca naca da nigá chee gulé'e lawe' che nácale wezúe dizra' lu xúgute da dxaca. <sup>10</sup> Na'a, nu benne' dxunite laule chee', cá'anqueze neda' dxunite lawa' chee'. Ca da bnite lawa' neda', che naca na tu da dxal-la' gunité lawa', ba bnite lawa' na ne chee'le le'e lau Cristo <sup>11</sup> chee quebe seque' Satanás nna be'e na dxi'u, na' ba nézquezdxu ca da dxun na.

### Pablo dxezé' gunne xue lu xęzre Troas

<sup>12</sup> Gate bzrina' xęzre Troas chee guzenda' bēnneache dizra' chawe' chee Cristo, gutá'le'ęe lataj chia' guna' zrin chee Xránadxu. <sup>13</sup> Guzúale'a gunne xue lawe' da quebe bezrela' bi bíchedxu Tito ga na'. Chee le' na' bzea' dizra' benne' ca' zaj zre'ęe na', na' guxá'a xęzr la xu Macedonia.

### Dxezrué'dxu ne chee Cristo

<sup>14</sup> Xcalén Dios, Bēnnea' dxeché'tequeze' dxi'u lu neza guxú'u Jesucristo lu da bzrué'ene', ne dxulé'e lawe' ne chee'dxu dxi'u dizra' chee' ca tu da dxelá zixre da dxezriluj gátetęze na. <sup>15</sup> Dxi'u nácadxu ca da dxelá zixre da dxuzúa Cristo lau Dios, ne dxezriluj na ládujla benne' ca' xelelé', ne ládujla benne' ca' xelebía xi'ę. <sup>16</sup> Lau benne' ca' xelebía xi'ę da dxelá nigá naca na ca tu da dxute bēnneache, san lau benne' ca' xelelé' naca na tu da dxunezruj na bēnneache xel-la nabán. ¿Nu benne' naca chee' gaque' caní? <sup>17</sup> Netu' quebe dxedantu' dxútentu' dizra' chee Dios, ne quebe dxuchantu' na ca dxelún benne' zante. Lawe' da dxen Dios, dxuchálajntu' du lázrentu', ca benne' nase-la Dios, ne ca węn zrin chee Cristo.

### Dizra' chee xel-la wezría cube

**3** Gate dxennantu' da nigá, ¿dxéquele dxezú launtu' xecha lasa dxennęntu' chawe' da naca cheęzquezęntu'? ¿Dxun na ba xen gulé'entu' le'e tu xiche da dxulé'e na nácantu' xrlátaje, u nábantu' chee'le tu xiche caní, ca dxelún bal-la benne'? <sup>2</sup> ¡Cabí! Lawe' da nácaquezle le'e ca tu xiche da dxulé'e na nácantu' xrlátaje, da naxúaj na lu xichaj lázrdauntu', na' xúgute bēnneache gaca xelexúnbe'ęe na, ne xululabę' na. <sup>3</sup> Le'e nácale ca tu xiche da nuzúaj Cristo, ne da dxulé'e launtu' netu'. Nácale ca tu da naxúaj na da quebe naca na tu lu xiche, san ne chee Be' Lázaxa chee Dios ban, tu da quebe naxúaj na lu blaga xiaj, san lu lázrdaudxu.

<sup>4</sup> Ne chee Cristo dxuxrén lázrentu' Dios, <sup>5</sup> quegá chee bi gaca guntu' da naca cheęzquezęntu', san, ca naca da gaca guntu' naca na chee Dios. <sup>6</sup> Le' ba nunęe' netu' guntu' zrin chee' ne chee tu xel-la wezría cube da quebe naca na ne chee tu da naxúaj na, san da naca na ne chee Be' Lázaxa chee'. Da nadxixruj bea na da naxúaj na dxuzría xi na dxi'u, san Be' Lázaxa na' dxun-na dxi'u xel-la nabán.

<sup>7</sup> Da bdxixruj be'e Moisés na' bxuaj na le'ęe xiaj blaga', ne bla' nen tu da bsení'le'ęe, na' québedxa belezúe benne' Israel ca' xelené'ęe lau Moisés, lawe' da gúcatite legala le'ęe dxu'a lawe', na' xel-la naxaní' na' bexul-la na chawe lazre'. Che lu xel-la naxaní' zren bla' da nadxixruj bea na, da dxuzría xi na dxi'u, <sup>8</sup> da zrenle'ędxu naca xel-la naxaní' chee dizra' chawe' na' da nusá Be' Lázaxa chee'dxu. <sup>9</sup> Che da nadxixruj bea na da dxuzría xi na dxi'u guca na tu da xabáa zrentę, na' tu da xabáa zrenle'ędxu naca dizra' chawe' na' da dxucá'ana na dxi'u xrlátaje lau Dios. <sup>10</sup> Lácala che da nadxixruj bea na nédxula guca na tu da xabáa, na'a quebe bi naca xabáa chee na lau dizra' chawe' nigá da naca na tu da xabáa zrenle'ędxu. <sup>11</sup> Che guca tu da xabáa chee da na' guzí bea na tu chí'idauze, napa na tu da xabáa zrenle'ędxu da na' si bea na chadía chacanna.

<sup>12</sup> Lawe' da dxuxrén lázrentu' naca na caní, du lázrentu' dxuchálajntu' dizra' chawe' na'. <sup>13</sup> Quebe dxuntu' ca bęn Moisés, bgacu lawe' tu ladxe' chee quebe xelelé'e benne' Israel ca' xexul-la xel-la naxaní' na' da quebe guzí bea na. <sup>14</sup> Benne' Israel ca' quebe guléajni'ine'. Ne na'a zra, gate dxululabę' xel-la wezría gula na', ladxe' ná'queze quebe dxue na le' lataj xeléajni'ine', lawe' da quebe ne xedúa na, na' gaca xedúa na tuze ne chee Cristo. <sup>15</sup> Na'a zra, gate dxululabę' dizra' chee Moisés, zua ca tu ladxe' da dxucache na xichaj lázrdawe'. <sup>16</sup> Gate tu benne' xexaque' chee Xránadxu, xedúa ladxe' na' lu xichaj lázrdawe', <sup>17</sup> lawe' da naca Xránadxu Be' na', na' naga zua Be' chee Xránadxu, na' dę xel-la weselá lu na' da nadxixruj bea na chee Moisés na'. <sup>18</sup> Chee le' na' xúgute'dxu dxi'u, lawe' da quebe da' laudxu tu ladxe', nácadxu ca tu wana' da dxulé'e na da xabáa chee Xránadxu, na' dxí'ueze, tu tu lasa gate dxelé'dxu da xabáa chee' dxexácadxadxu ca naca Cristo, lawe' da tu tu lasa na' nápadxadxu da xabáa chee'. Da nigá dxun Be' chee Xránadxu, na dxuché'ęe dxi'u lu xichaj lázrdaudxu.

**4** Ca' naca na, cabata' dxate ni'a nantu' lawe' da lu xel-la dxexache lazre' chee', Dios ba nusebague' netu' zrin nigá chee Cristo da dxuntu'. <sup>2</sup> Ba nuzúantu' chalá'ala da dxelún bēnneache bagácheze, ne da dxeđué'entu' ca zaj naca na. Quebe bi dxuntu' da węn lazre', ne quebe dxuchantu' dizra' chee Dios, san dxenęntu' tuze da li, na' caní dxuzúa cuínantu' lu na' xichaj lázrdau xúgute bēnneache lau Dios. <sup>3</sup> Che dizra' chawe' da dxuzé'entu' bēnneache ne nagache na, naca na caní tuze lau benne' ca' xelebía xi'ę. <sup>4</sup> Lawe' da quebe dxeléajle'ęe chee Cristo, na' da xriwę', da na' naca na dios chee xęzr la xu nigá ba nun chul-la na xichaj lázrdawe' chee quebe xelelé'ene' xel-la naxaní'



cheę dizra' chawe' cheę xabáa cheę Cristo, Bénnea' naque' lu'a lesaca Dios. <sup>5</sup> Quebe dxuzéntenú' bėnneache ca naca cheęzquezentu', san ca naca cheę Jesucristo. Dxennantu' naque' Xránadxu, na' ca naca cheęntu' dxennantu' nácantu' wėn zrin cheęle lawe' da nazrí'intu' Jesús. <sup>6</sup> Dios ná'queze, Bénnea' gunná beę guxaní' xi' na' lu da chul-la, naque' Benne' ba beņe' guxaní' xi' cheę' lu xichaj lázrdaudxu, cheę gaca gúnbeadxu da xabáa cheę Dios da dxácatite legala na dxu'a lau Jesucristo.

### Dxundxu xúgutę ne cheę xel-la dxeajlí lazre' cheędxu

<sup>7</sup> Da xabáa nigá nápantu' lu bėla' dxen cheęntu', da naca na ca tu xesu' xu, cheę gaca bea za xel-la waca zren nigá lu na' Dios, ne quegá cheęzquezentu'. <sup>8</sup> Cheę lę na':

Láqueze zúantu' lu da stėbele'ę, quebe dxezėntu' gunne xue.

Láqueze dxezėntu' gunne xue, tu dxebeza lázrequezentu' gácalę Dios netu'.

<sup>9</sup> Láqueze zaj nau zi' xuzrę' netu', quebe dxusán Dios netu'.

Láqueze dxeline' netu' xu, quebe dxebía xintu'.

<sup>10</sup> Gáteteze dxéajntu' naca tuze bėla' dxen cheęntu' nen xel-la gute cheę Jesús cheę gulé'e lau lu bėla' dxen cheęntu' xel-la nabán cheę Jesús. <sup>11</sup> Dxácatę naca bantú' zúantu' cheę gátentu' xúgutę zra ne cheę Jesús, cheę gulé'e lau xel-la nabán cheę Jesús lu bėla' dxen cheęntu' da gate. <sup>12</sup> Ca' naca na, lácala tu zúazquezentu' lu da stėbe cheę xel-la gute da nigá, dxun na sua tu xel-la nabán cube cheęle.

<sup>13</sup> Naxúaj lu dizra' lá'azxa da dxenná na: Guxéajle'a, na' cheę lę na' bchálaja', na' cá'anqueze netu', lu xel-la dxeajlí lazre' caníqueze, dxéajle'entu', ne dxuchálajntu', <sup>14</sup> lawe' da nézentu' Dios, Bénnea' bsebanę' Xránadxu Jesús ládujla benne' gate, cá'anqueze gusebanę' dxi'u tu zren nen Jesús, na' tu zren nen le'e, xeché'ę dxi'u lau Lę'. <sup>15</sup> Xúgutę da nigá guzaca zintu' cheę gaca tu da ba neza cheęle, cheę gaca na, gate xelezí' benne' zantę xel-la xrlátaje cheę Dios, cá'anqueze benne' zantę xelé'ę Lę': Xcalenu', cheę gaca ba cheę Dios.

<sup>16</sup> Cheę lę na', cabata' dxate ni'a nadxu. Láqueze dxęrxu bėla' dxen cheędxu, Dios dxuxucubę' be' nácaquezdxu tu zra tu zra. <sup>17</sup> Da dxezácadxu lu xęzr la xu nigá naca na tu da dauze, da teze cheę na, na' nusá na cheędxu tu xabáa chadía chacanna da szrentę, ne da cháwedxa. <sup>18</sup> Quebe nná'adxu ca da dxelé'edxu, san nná'adxu da quebe nalá', lawe' da quebe dxelezí' bea da ca' dxelé'edxu, san da ca' quebe dxelé'edxu dxelezí' bea na chadía chacanna.

**5** Bėla' dxen cheędxu naca na ca tu xu'u lizre be' nácaquezdxu. Bėla' dxen cheędxu naca na ca tu xu'u da quebe si bea na, na' gate gátędxu Dios ba nuczeę' cheędxu xabáa tu xu'u da zea jlí canna, da nun Diósqueze, ne quegá bėnneache. <sup>2</sup> Da li dxácatę naca bandxu lu bėla' dxen nigá dxebezre wę'dxu lawe' da dxaca lázredxu cheajchú'udxu bėla' dxen cube na' da gunna Dios dxi'u xabáa. <sup>3</sup> Quebe xegá'ana cá'aze be'

nácaquezdxu xabáa. Cheajchú'u na bėla' dxen cube na'. <sup>4</sup> Dxácatę ne naca bandxu lu xu'u nigá da naca na bėla' dxen cheędxu, dxebezre wę'dxu, ne dxededxu xel-la zi'. Quebe nácaze na lawe' da dxaca lázredxu gusandxu bėla' dxen gula cheędxu nigá. Dxaca lázredxu cheajchú'udxu bėla' dxen cube, na' ca'an gaca xenite bėla' dxen cheędxu da dxal-la' gate, na' la' bėla' dxen cube cheędxu da gaca ban na chadía chacanna. <sup>5</sup> Bénnea' ba nune' dxi'u cheę gaca cheędxu caní naque' Dios, Bénnea' ba nunņę' dxi'u Be' Lá'azxa ca tu da dxunna bea na dxal-la' sidxu tu bėla' dxen cube xabáa.

<sup>6</sup> Ca' naca na, dxuxrėn lázretequezdxu Dios. Ba nezdxu dxácatę naca bandxu lu bėla' dxen nigá zúadxu zítu'la naga zua lízredxu, da naca na, quebe zúalędxu Xránadxu, <sup>7</sup> na' dxedadxu ne cheę xel-la dx-eajlí lazre' cheędxu, quegá ne cheę da dxelé'edxu. <sup>8</sup> Dxuxrėn lázredxu Dios, ne dxaca lázredxadxu gusandxu xel-la nabán cheędxu lu bėla' dxen nigá cheę chéajdxu cheajsúalędxu Xránadxu. <sup>9</sup> Cheę lę na' dxundxu ba xuzre gúntequezdxu da zezaca ba lazre' Xránadxu, che nagá'anadxu lu bėla' dxen cheędxu nigá, u che cheajchú'udxu bėla' dxen cube, da zua na xabáa, <sup>10</sup> lawe' da xúgutędxu dxun na ba xen xezrindxu lau Cristo cheę guchi'ę ca da nundxu tu tudxu, cheę si' lu nadxu ca da xáladxu, cáteze naca da xrlátaje, u da calęla da ba bęndxu gate ne zúadxu lu bėla' dxen cheędxu nigá.

### Dizra' da dxexún dxi'u tuze nen Dios

<sup>11</sup> Cheę lę na', lawe' da núnbeantu' ca dxal-la' zrėbedxu Xránadxu, dxuntu' ba xuzre guntu' xelélé bėnneache. Dios ba nézene' da nácantu', na' dxebeza lazra' cá'anqueze le'e nézele na. <sup>12</sup> Quegá dxennęntu' xrlátaje cheęzquezentu', san dxúnnantu' le'e lataj gápale netu' ba lá'ana, cheę gaca xechébele cheę benne' ca' dxulucá'ana szren cuine' ca naca da zaj naque' cúzreze, ne quegá ca naca da zaj naque' lu xichaj lázrdawę'. <sup>13</sup> Che dxeleque bėnneache nadá xichaj lázrdawę' naca na cheę guntu' zrin cheę Dios, na' che quebe nadá xichaj lázrdawę' naca na cheę gaca tu da ba neza cheęle le'e. <sup>14</sup> Xel-la zri'i lazre' cheę Cristo dxusebaga na netu' lawe' da nézentu' che tu benne' gutię' waláz cheę xúgutę bėnneache, na' ba gulate xúgutę'. <sup>15</sup> Cristo gutię' waláz cheę xúgutę bėnneache, cheę benne' ca' zaj naca banę' québedxa xelaca banę' cheęzqueze', san cheę Lę', Bénnea' gutię', ne bebanę' waláz cheę benne' ca'. <sup>16</sup> Cheę lę na', québedxa nna'ntu' ca naca da nácaqueze tu benne' lu xęzr la xu nigá, na' láqueze nédxula gunna'ntu' Cristo cáteze gúcaqueze' lu xęzr la xu nigá, na'a québedxa nna'ntu' Lę' caní. <sup>17</sup> Ca' naca, che tu benne' naque' tuze nen Cristo, naque' tu benne' cube. Da gula ca' cheę benne' nigá ba guledé cheę na, na' xúgutę na zaj naca na cube.

<sup>18</sup> Xúgutę da caní dxun Dios, Bénnea' bexunę' dxi'u tuze nen Lęqueze' ne cheę Cristo, na' bsebaguę' dxi'u guzendxu bėnneache ca gaca xelexaque' tuze nen Dios. <sup>19</sup> Gate gute Cristo, Dios guzúalęqueze' Lę', ne bexunę' bėnneache cheę xęzr la xu nigá tuze nen Lę', ne quebe gunnę'ę ca zaj naca dul-la zaj nabaga bėn-

neache ca', na' bsebage' dxi'u guzendxu bénneache dizra' da dxexún dxi'u tuze nen Dios. <sup>20</sup> Ca' naca na, ná-cantu' gubáz chee Dios ne chee Cristo, na' naca na cáteze Diósqueze dxata' xuene' le'e lu dxúa'antu', na' dxata' xuentu' le'e lu La Cristo, le xexaca tuze nen Dios. <sup>21</sup> Cristo netú dul-la ca bene', san ne cheedxu dxi'u, Dios bdee' Le' chee gutie' le'e xaga béguaj ca tu benne' dul-la, chee xexácadxu benne' xrlátaje lau Dios ne chee da ben Cristo.

**6** Ca' naca na, ca wen zrin tu zren nen Dios dxata' xuentu' le'e chee quebe guzúale chalá'ala xel-la zri'i lazre' chee Dios, <sup>2</sup> lawe' da lu dizra' lá'azxa dxenné':

Tu zra dzezaca ba lazra' benda' chiu', na' lu zra chee xel-la weselá gúcaləna' lue'. Na'a naca na zra dzezaca ba lazre' xenne' cheele, ne guselé' le'e.

<sup>3</sup> Quebe bi dxuntu' da gun na quebe xeléajle' bénneache chee Cristo, chee quebe nu nne calela chee zrin dxuntu'. <sup>4</sup> Ca naca xúgute' da dxuntu', dxaca lázrentu' gulé'entu' bénneache nácantu' wen zrin chee Dios,

ne chee xel-la dxebeza zren lazre' cheentu' gate dx-uchaga launtu' da dzezácantu',

ne da dxexájrjentu', ne da zaj naca stəbe cheentu', <sup>5</sup> ca buluzálaje' netu', ne gulegu'e netu' lizre xia.

Guledábage' netu' san bēnle'entu' zrin.

Zane' lasa quebe gúsentu', ne quebe bi gudáguntu'.

<sup>6</sup> Cá'anqueze blé'entu' da nácantu'

ne chee tu xel-la nabán li lazre' cheentu',

ne ne chee da li da núnbeantu',

ne ne chee xel-la zren lazre' cheentu',

ne xel-la zri'i lazre' cheentu',

ne ne chee Be' Lá'azxa, Bénnea' zúaləne' netu',

ne ne chee xel-la nazrí'i cheentu' da naca na du lazre',

<sup>7</sup> ne ne chee dizra' li da dxuzé'entu' bénneache,

ne ne chee xel-la waca chee Dios da zúale' na netu'.

Bchínentu' da zaj naca ca xia chee wedil-la chee da xrlátaje chee gudíl-lantu', ne chee gudentu' chalá'ala da

zaj naca ca xia chee wedil-la chee benne' ca' dx-

eledábage' netu'.

<sup>8</sup> Zua gate dxelape' netu' ba lá'ana',

ne zua gate dxuluzúe' netu' chalá'ala.

Zua gate dxelenné' cheentu' da xrlátaje,

ne zua gate dxelenné' cheentu' da calela.

Zua gate dxelenné' nácantu' wen lazre',

ne zua gate dxelenné' dxennentu' da li.

<sup>9</sup> Zua gate quebe nu dxuzé' naga netu',

ne zua gate dxuluzé' naga xánne' netu'.

Zua gate zúantu' lu da stəbe chee xel-la gute, san ne

naca bantu'.

Zua gate dxuludé' netu' xel-la zi', san quebe ne xelu-

tie' netu'.

<sup>10</sup> Láqueze zúantu' lu da baxache', zúatequezentu' lu

xel-la dxebe'.

Lácala nácantu' benne' xache', ba nuntu' benne' zan

benne' gunní'a.

Láqueze quebe bi núantu', xúgute' nápantu'.

<sup>11</sup> Bi bíchentu', benne' Corinto, ba bchálajntu' du lázrentu'. Ba blé'entu' le'e ca nazrí'i lázrentu' le'e. <sup>12</sup> Tu zúazqueze xel-la zri'i lazre' cheentu', na' le'e na' quebe nazrí'ile netu' du lázrele. <sup>13</sup> Dxata' xueda' le'e ca dxun tu benne' dxata' xuene' bi cheéqueze' chee gulé'ele neda' du lázrele xel-la nazrí'i da zua na lu xichaj lázrdaule cáteze bəna' neda'.

### Nácadxu xudau' chee Dios ban

<sup>14</sup> Quebe gunle tuze nen benne' quebe dxeléajle'e chee Cristo, da gaca na ca chacué' bezre gu'una, be quebe zaj nadíl-leba'.

¿Ájazra gun da xrlátaje gaca na tuze nen da calela?

¿Ájazra gun xel-la naxaní' gaca na tuze nen da chul-la?

<sup>15</sup> ¿Ájazra gun Cristo gaque' tuze nen Satanás?

¿Ájazra gun benne' dxéajle'e chee Cristo gaque' tuze nen benne'

quebe dxéajle'e chee'?

<sup>16</sup> ¿Ájazra gun xudau' chee Dios gaca na tuze nen

bedáu' xiaj xaga?

Lé'equeze nácale xudau' chee Dios ban cáteze gunná Diósqueze:

Súaləna' le', ne táləna' benne' ca'.

Gaca' Dios chee benne' ca', na' le' xelaque' benne' xezre chia'.

<sup>17</sup> Chee le' na', cá'anqueze gunné':

Le xedxúaj ládujla benne' ca', ne le cuasa na', dxenná Xránadxu.

Quebe gutale da sban.

Nadxa si' lu na'a le'e <sup>18</sup> ne gaca' Xrale le'e,

na' le'e gácale zri'ina' bi biu, ne zri'ina' bi nu'ula.

Caní dxenná Xránadxu, Bénnea' nape' duté xel-la waca.

**7** Ca' naca na, bi bícha'dau' nazri'ite' lazra', da caní zaj naca na da guchəbe lazre' Dios cheedxu. Chee

le' na' dxal-la' guxúe xanne' cuínadxu chee quebe güedxu lataj netú da sban gudxén na dxi'u lu bəla' dx-

en cheedxu, ne lu be' nácaquezdxu, na' lawe' da dx-

ezrébedxu Dios dxal-la' guzúa cuínadxu lu na' Dios

duté ca nácadxu.

### Ca belexebí'i lazre' benne' Corinto

<sup>2</sup> Le si' lu na'le netu'. Quebe bi da calela ne guntu' chee nu benne' ládujla le'e, ne quebe nu ne guchántu',

ne quebe nu ne si xəntu'. <sup>3</sup> Quebe dxennía' da nigá

chee gusebaga' le'e zria, san naca na ca ba gucha' le'e

nédxula, le'e zúale lu lázrdawa' che gaca bana', u che

gatie' tu zrente' nen le'e. <sup>4</sup> Du lazra' dxuchálajləna' le'e,

ne zua' lu da ba neza ne cheele le'e. Lu xúgute' da dx-

ezácantu' zua da dxexúe zrénlə'e neda', na' dxebélé'e-

da'.

<sup>5</sup> Da li, gate bzrintu' naga nababa Macedonia, quebe

bezi' lázrentu'. Guzúantu' lu da stəbe gáteteze, lawe'

da gáteteze gudentu' guledábaga bénneache netu',

na' lu lázrdauntu' bezrébentu'. <sup>6</sup> Nadxa Dios, Bénnea'

dxexúe zrene' benne' zaj nate ni'a ne'e, bexúe zrene'

netu' ne chee Tito lawe' da bezrinbe' naga zúantu', <sup>7</sup> ne quegá tuze lawe' da bla'be', san cá'anqueze lawe' da bexúe zrenle lebe'. Gúzrebe' netu' ca dxezá lázrele lé'ele netu', ne bzenbe' netu' ca lu da baxache' zúale, ne ca gunne xue dxezele neda', na' chee le na' gubéle'edxada'.

<sup>8</sup> Láqueze da bzuaja' chee bzua na le'e lu da baxache', quebe dxebezre lazra' chee da na'. Láqueze gudxezre lazra' nédxula gate guque be'eda' bzua na le'e lu da baxache' tu chí'idau', <sup>9</sup> na'a dxebeda', quegá lawe' da guzúale lu da baxache', san lawe' da ben da baxache' na' bexíaje lázrele. Le'e bchaga laule da baxache' na' ca da bezaca ba lazre' Dios, na' da bzuaja' chee quebe bi da calela ben na chee. <sup>10</sup> Da baxache' da dxuchaga laudxu ca da dxezaca ba lazre' Dios dxun na dxebí'i lázredxu chee ladxu, na' quebe dxal-la' cuezre lázredxu chee na. Che xegá'anadxu lu da baxache' ca dxelún benneache chee xezr la xu nigá, na' tu chí'ize gátedxu. <sup>11</sup> Le'e bchaga laule da baxache' da guca na chee ne chee da bzuaja', ne benle ca da dxezaca ba lazre' Dios, na' le nna'xque na'a:

Bzua na le'e gunne xue ca naca da guca,  
ne ben na ble'ele ca da benle.

Bcha'a na le'e, ne bchebe na le'e.

Nadxa guzé lázrele lé'ele neda',  
ne guzúale gudele xel-la zi' bennea' ben da calela na'.  
Ca naca xúgutę da nigá ble'ele quebe nabágale zria  
chee dul-la nigá. <sup>12</sup> Ca' naca na, gate bzuaja' chee da  
na', quebe guca na lawe' da gudxe'a gunne xue chee  
bennea' benę da calela na', ne quegá lawe' da gudxe'a  
gunne xue chee bennea' guca na chee', san bena' na  
chee gueque be'ele lau Dios ca dxele gunne xue  
cheentu'. <sup>13</sup> Chee le na' guca da bexúe zren na netu'.

Da naca tu da zrendxa, gubéle'entu' gate blé'entu'  
zúale Tito xel-la dxebe, lawe' da xúgutęle le'e bexúe  
zrenle-be'. <sup>14</sup> Láqueze bca'ana szrena' le'e lau Tito,  
quebe dxedué'eda', lawe' da cáteze naca da li ca naca  
xúgutę da bchálajlena' le'e, cá'anqueze guca da li da  
bena' gate bca'ana szrena' le'e lau Tito. <sup>15</sup> Nazrí'idxabe'  
le'e gate dxajsa lázrebe' ca benle xúgutęle le'e, benle  
cáteze gunábabe' le'e, ne ca guzú' lu na'le lebe' lu dutę  
xel-la dxexruj lazre', ne lu xel-la dxezrebe. <sup>16</sup> Dxebeda'  
lawe' da dxuxrén lazre' xánnia' le'e.

### Da dxunézrujdxu du lázredxu

**8** Na'a, bi bicha', dxaca lazra' guzenda' le'e ca ble'e  
lau xel-la zri'i lazre' chee Dios ne chee xúgutę cue'  
bi chee Cristo zaj nnita' lu xezr la xu Macedonia.

<sup>2</sup> Láqueze guledéę tu xel-la zi' zren gulebéle'ęquezne',  
na' láqueze zaj nácaleę benne' xache', du lazre' bu-  
lunézruje' da zaj de chee', na' belunę ca benne' gun-  
ní'a ca'. <sup>3</sup> Dxexechęba' du lazre' bulunézruje' xúgutę da  
gulezéquene', ne da zrendxa ca da gulezéquene'. <sup>4</sup> Gu-  
lata' xuenę netu' güentu' le' lataj xelunę tu zren ben-  
neache dxelácalęne' bi bíchedxu ca' dxelexázrjene'.

<sup>5</sup> Belundxę ca da guleza lázrentu', lawe' da belunna  
cuínaqueze', nédxula chee Xránadxu, na' gudé na'  
cheentu' netu', cáteze dxaca lazre' Dios. <sup>6</sup> Ca' naca na,

guta' xúentu' Tito gusexuzre' gutupe' da gunézruje  
le'e, da na' guzú lawe' dxutupe' gate nate. <sup>7</sup> Le'e dxún-  
le'ęle ca naca da dxunle, ca dxeajlí lázrele Dios, ne ca  
dxusédele bi chee Cristo, ne ca naca da naxéajni'ile, ne  
ca du lázrele dxunle xúgutę, ne ca nazrí'ile netu'. Ca'  
naca na, cá'anqueze dxal-la' gúnle'ęle ca gunle zrin  
chawe' nigá.

<sup>8</sup> Quebe dxapa' le'e da nigá ca tu da dxenná be'eda'  
le'e. Dxaca lazra' nézele ca du lazre' dxelún xezicadxa  
benneache zrin nigá, dxulunézruje' dumí, chee  
gueque be'ele che naca li lazre' xel-la zri'i lazre' chee.  
<sup>9</sup> Ba nézquezle ca naca xel-la zri'i lazre' chee Xránadxu  
Jesucristo. Naque' benne' gunní'a, san ben cuine'  
benne' xache' lawe' da bzrí'ine' le'e, chee gácale le'e  
benne' gunní'a lu da naca chee Cristo lawe' da gudé  
Le' lu xel-la xache'.

<sup>10</sup> Chee gaca da ba neza chee dxapa' le'e da  
dxéqueda' ca naca da nigá. Gudú iza guzú laule, quegá  
dxúnzele, san du lázrele dxunle da nigá, dxunézruje  
dumí. <sup>11</sup> Na'a, le gúnteze na chee xexuzrte gunle na,  
gunle na du lázrele cáteze guzú laule dxunle nédxute,  
gunézruje ca da du de chee. <sup>12</sup> Che da li dxaca lazre'  
tu benne' gunézruje', Dios xezaca ba lazre' na che  
gunézruje' ca da nape', ne quegá dxenabe' da quebe  
napa bennea'.

<sup>13</sup> Quebe dxennía' da nigá chee xexácale le'e xache'  
chee gácalele benne' xula. <sup>14</sup> Naca na chee gápale lé-  
betę. Na'a nápałe chee gunézruje ca da dxelexazrje  
benne' xula ca', na' xetú lasa xelapa benne' ca' da  
xelunne' chee gate bi xázrjele le'e. Caní gápale lébete  
<sup>15</sup> cáteze naxúaj na lu dizra' lá'azxa, dxenná na: Bén-  
nea' nápałe quebe bi begá'ana chee', na' bennea'  
nape' láteze quebe bi bexázrjene'.

### Tito ne bi ljwezre' ca'

<sup>16</sup> Xcalén Dios, Bénnea' bzuę lu lázrdau Tito suę'  
gunne xue chee le'e ca zua' neda'. <sup>17</sup> Guzú' lu neę da  
bsebaga' le', na' lawe' da zúaqueze' gunne xue chee  
le'e, ba bezéę chee xidę xedajnnéę le'e lawe' da dxaca  
lázrequeze le'.

<sup>18</sup> Tu zren nen Tito nasél-lantu' tu bi bíchedxu, tu  
benne' dxelennę chawe' chee xúgutę cue' bi chee  
Cristo, ca naca zrin xrlátaje da nune' chee dizra' chawe'  
chee Cristo. <sup>19</sup> Quegá tuze da nigá, san xúgutę cue' bi  
chee Cristo gulequęę bi bíchedxu níqueze chee  
sálęne' netu' chee gácalęne' netu' lu zrin nigá da dxun-  
tu' dxutúbentu' dumí da gácale na benne' xache' ca'  
chee gaca ba Xránadxu, ne chee gulé'e lau du lázrele  
dxunle zrin chawe' nigá. <sup>20</sup> Caní dxuntu' chee quebe nu  
benne' si tizre' netu' ca dxuchínentu' dumí zrentę nigá  
da dxulunezruj bi bíchedxu ca'. <sup>21</sup> Dxuntu' ba xuzre  
guntu' zrin nigá lu dutę xel-la li lazre' cheentu', quegá  
tuze lau Xránadxu, san cá'anqueze lau xúgutę ben-  
neache.

<sup>22</sup> Tu zren nen benne' caní nasél-lantu' xetú bi  
bíchedxu, tu benne' da zánete lasa ba blé'ene' netu' du  
lazre' dxunę zrin chee Cristo, na' na'a du lázredxę dx-  
unę zrin nigá lawe' da dxuxrén lazre' le'e. <sup>23</sup> Che nu

benne' guchebe le'e ca naca chee Tito, le xe'e nacabe' bi ljwezra', ne dxunbe' zrin tu zren nen neda' chee gunbe' zrin chee. Che nu guchebe le'e ca naca chee xezicadxa bi bíchedxu ca' zeajzrague' Tito, le xe'e zaj naque' benne' gulesel-la xúgute cue' bi chee Cristo, ne dxelape' ba lá'ana Cristo. <sup>24</sup> Chee le na', chee xeleneze xúgute cue' bi chee Cristo, le gulé'e le' nazri'ile le', na' naca cheentu' xucá'ana szrentu' le'e.

#### Da dxulunézuje' chee bi bíchedxu ca'

**9** Ca naca chee dumí da gunézruje chee bi ca' chee Cristo, quebe dxun na ba xen guzúaja' chee, <sup>2</sup> lawe' da ba nezda' ca dxaca lázrele gunle na. Dxezaca ba lazra' dxapa' bi bíchedxu zaj zre'e xezre ca' zaj naba-ba xezr la xu Macedonia, le'e zrle xezre ca' zaj nababa Acaya, gudú iza ba zúatequezele bi gunézruje, na' benne' zante benne' Macedonia du lazre' dxulunézuje' lawe' da dxunézuje le'e du lázrele. <sup>3</sup> Dxusel-la' bi bíchedxu caní chee quebe gaca tu da wen lazre' ca da chawe' da ba gunnía' ca dxunle le'e da nigá, ne chee súatezle bi gunézruje, ca ba gucha' benne' caní, <sup>4</sup> ne che sa'aca bal-la benne' Macedonia tu zren nen neda' chee quebe xeléléne' quebe zúatequezele le'e bi gunézruje. Chela gaca na caní xedué'entu' lawe' da bxren lázrentu' le'e caní, na' da zrendxa ca dxal-la' xedué'ele le'e. <sup>5</sup> Chee le na' gúqueda' dxun na ba xen naba' bi bíchedxu ca' xelide' xedajlennabe' le'e nédxula, ne chee xelácalene' le'e gutúpale da guchebe lázrele nédxula gunézruje. Ca' gaca na, dumí da gutúpale wata'queze na chee gulé'e na naca tu da dxaca lázrele gunle, ne quegá tu da gunne xúentu' le'e.

<sup>6</sup> Le nna'xque da nigá: Bénnea' dxaze' láteze, cá'anqueze láteze xezi'e, na' bénnea' dxázale'e, cá'anqueze xezí'ile'e. <sup>7</sup> Tu tu benne' dxal-la' gunézuje' cáteze da ba nune' lu lázrdawe', quegá ca tu benne' quebe dxezaca ba lazre', u xadíaze, lawe' da nazri'i Dios benne' dxunézuje' duté xel-la dxebe. <sup>8</sup> Wazeque' Dios gúnnale'e le'e ca naca xúgute da chawe', chee gata' chee xúgute da nachínele, ne gápale bi gunézruje chee gunle xúgute zrin xrlátaje. <sup>9</sup> Naxúaj lu dizra' lá'azxa da dxenná na:

Du lazre' bnézuje' chee benne' xache' ca'.

Ca zaj naca zrin xrlátaje nune' xelegá'anatequeze na.

<sup>10</sup> Dios, Bénnea' dxunézuje' bínnedu ca' da dxázadxu, ne dxunne' da dxi'aj dxágudxu, gunne' le'e xúgute da nachínele chee gázale, na' gusegule' na chee gúnnale'equeze na lina chee zrin chawe' da gunle. <sup>11</sup> Ca' gaca na, gata'le'e chee xel-la gunnía' ca' chee séquele gunézruje du lázrele, na' dumí na' sél-lale lu na'ntu' netu' gun na xelé bi bíchedxu ca' Dios: Xcalenu'. <sup>12</sup> Ca' naca na, gate gunézrujdxu bi bíchedxu ca' dumí nigá da gácale na le', quegá tuze dxunézuju dxu tu da dxelechínnene' san cá'anqueze dxundxu xelé'e Dios: Xcalenu'. <sup>13</sup> Xelúe lá'ane' Dios lawe' da da nigá dxunézuje gulé'e na dxuzúale dizra' chee dizra' chawe' chee Cristo. Cá'anqueze xelúe lá'ane' Dios ne chee da gunézruje du lázrele da gácale na le', ne xúgute cue' bi chee Cristo. <sup>14</sup> Chee le na' benne' ca' xe-

lenabe' chee lau Dios, ne xelezrí'ile'ene' le'e ne chee xel-la zri'i lazre' zren da gulé'e lau Dios ne chee le'e. <sup>15</sup> Xcalén Dios lawe' da nunne' dxi'u tu da zrenté da quebe séquedxu xuzájla'adxu.

#### Xel-la dxenná bea napa Pablo lawe' da naque' gubáz chee Cristo

**10** Neda', Pablo, dxuzenda' le'e da nigá ne chee xel-la dxexruj lazre', ne xel-la zri'i lazre' chee Cristo. Dxelenné' naca' benne' zren lazre' gate zúalena' le'e, na' gate zua' zitu' nácale'a benne' snia. <sup>2</sup> Dxata' xueda' le'e quebe gunle, gate xida' xedajnná'a le'e, gaca' benne' snia nen bal-la benne' ládujla le'e, benne' ca' dxelenné' dxuntu' zrin chee Cristo lu bela' dxenze cheentu', na' zúaqueza' tíl-laqueza' benne' ca'. <sup>3</sup> Láqueze nácantu' bela' dxen quebe dxedíl-lantu' lu bela' dxenze cheentu', <sup>4</sup> lawe' da quebe zaj naca chee bela' dxenze da dxuchíntu' lu wedil-la cheentu', san zaj napa na xel-la waca chee Dios chee séquentu' guzrí'a xintu' da wal-la ca' chee nu na' dxedábaga' netu'. <sup>5</sup> Ca'an naca, dxuzrí'a xintu' da dxusebaga bénnea' dxi'u, ne da dxuzúe' lu xel-la dxucá'ana szren cuina chee quebe xelúnbea bénneache Dios. Xúgute da zaj xu'u lu xichaj bénneache dxuzúantu' lu na' Cristo chee xuluzúe' dizra' chee'. <sup>6</sup> Zúatequezentu' gudentu' xel-la zi' xúgute benne' ca' quebe dxuluzúe' dizra' chee' gate na' ba dxuzúale dizra' chee' du lázrele.

<sup>7</sup> Le'e dxenna'le benne' ca' cáteze da zaj naque' cúzreze. Che nu benne' dxéque' da li naque' bi chee Cristo, dxal-la' gueque bé'ene' cáteze na' naca le' bi chee Cristo, cá'anqueze nácantu' netu' bi chee Cristo. <sup>8</sup> Láqueze dxuchínedxada' ca dxal-la' guna' xel-la dxenná bea cheentu', quebe dxedué'eda' lawe' da nunna Cristo netu' xel-la dxenná bea na' chee séquentu' gusegúlantu' le'e lu da naca chee Dios, ne quegá chee guzrí'a xintu' le'e. <sup>9</sup> Quebe dxaca lazra' guéquele le'e dxaca lazra' gucheba' le'e ne chee da dxuzúaja' chee. <sup>10</sup> Dxelenné' xiche ca' da dxusel-la' zaj naca na snia, ne wal-la, san néda'queza' naca' benne' nate ni'a na', ne ca dxuchálaja' quebe zácateca. <sup>11</sup> Bénnea' dxenné' da nigá dxal-la' gueque bé'ene' cáteze naca' lu dizra' dxuzúaja' gate ne zua' zitu', cá'anqueze gaca' lu da guna' gate na' súalena' le'e.

<sup>12</sup> Quebe dxexázrentu' gutil-le lébentu', u gulé'e cuínantu' ca zaj naca bal-la benne' ca' dxulucá'ana szren cuine'. Dxeluné' tu da xálaze gate dxelenné'e ca da zaj nácaqueze', ne dxulutil-le lebe ljwezre'. <sup>13</sup> Quebe gucá'ana szren cuínantu' lu da quebe naca cheentu'. Dios naque' Bénnea' gulé'ene' netu' naga ze lau guntu' zrin, na' Le' benne' netu' lataj blantu' naga zrle le'e lu xezre Corinto. <sup>14</sup> Chee le na' quebe dxedxúajntu' naga ze lau cheentu', cáteze gaca na che quebe ne zrintu' naga zrle le'e nédxute. Netu' nácantu' benne' nedxu blantu' naga zrle le'e núantu' dizra' chawe' chee Cristo. <sup>15</sup> Quebe dxucá'ana szren cuínantu' lu zrin da zaj nun benne' xula, san dxebeza lázrentu' cáteze gula xel-la dxeajlí lazre' chee, waca gúndxantu' zrin ládujla le'e gusegúlantu' xel-la dxeajlí lazre' chee, san

guntu' na lu'ule da naca cheętu'. <sup>16</sup> Te na' dxebeza lázrentu' tédxantu' ca naga zrale cheę guzémentu' bėneache zaj zřeę ga na' dizra' chawe' cheę Cristo, ne quebe chų'untu' naga ba zaj nun zrin xezícadxa benne' ca', cheę quebe gucá'ana szren cuínantu' lu da ba zaj nune'.

<sup>17</sup> Che nu benne' dxaca lazře' nu gucá'ana szreę', dxal-la' gucá'ana szreę' Xránadxu. <sup>18</sup> Bėnnea' dxexedxúaj xrlátaje, quebe naque' benne' dxucá'ana szren cuine', san naque' bėnnea' dxucá'ana szren Xránadxu le'.

### Ca naca cheę Pablo, ne benne' gubáz ca' quebe nasel-la Cristo le'

**11** Le guchaga lau neda' cheę nnia' late' da ca zeaje na. Ájatęze naca na, le guchaga lau neda', <sup>2</sup> lawe' da dxé'le'a gunne xue cheęle le'e lu da nusebaga Dios neda', ne lawe' da ba nachębe lazra' cheęle gácale zru'ula Cristo, dxaca lazra' gudéa' le'e lau Le' ca tu nu'ula cuide'dau' du lazre' sųalębe' benne' cheębe'.

<sup>3</sup> Ca bęn bęla' gula na' guzı' xęba' Eva nen xel-la neze cheęba', dxezreba' güele lataj nu si xę le'e, na' cuásale lu xichaj lázrdaule cheę québedxa gácale du lázrele cheę Cristo. <sup>4</sup> Le'e dxuchaga laule benne' ca' zá'aque' dxuluchálaje' cheę tu Jesús, benne' nazrá' ca Bėnnea' bzémentu' le'e cheę Le', ne du lázrele dxezı' lu na'le tu be' da nazrá' ca Be' na' da ba guzı' lu na'le, ne dxezı' lu na'le tu dizra' da nazrá' ca naca dizra' chawe' da ba guzı' lu na'le. <sup>5</sup> Dxéqueda' quebe zaca' neda' látezdxaca benne' gubáz zren ca', benne' ca' zėjlele le'e.

<sup>6</sup> Láqueze quebe gaca guchálaja' xrtándau', dxéajni'ida' da na' dxuchálaja' cheę na, na' blémentu' canı' naca na lu xųgute da ba bentu'.

<sup>7</sup> ¿Bęna' tu da calęla gate bzenda' le'e dizra' chawe' cheę Cristo, ne quebe bi bchızruja' le'e, na' bęn cuina' dxexrux lazre' cheę xegá'ana szrenle le'e? <sup>8</sup> Guca na ca gudawa' dumı' cheę xezícadxa cue' bi cheę Cristo gate guzı'a da belunęe' neda' cheę bęna' zrin ga zųale le'e. <sup>9</sup> Gate na' guzųalęna' le'e, ne bxázřjeda', quebe bi guzı' lu na'a da naca cheęle, san bi bıchedxu zá'aque' xęzr la xu Macedonia belunęe' neda' ca da guchınneda'. Bęna' ba xuzre quebe bi gunábeda' le'e, na' cá'anqueze guna'. <sup>10</sup> Lawe' da núnbe'a da li cheę Cristo, quebe zua nu benne' naga nababa xęzr la xu Acaya gaca guzague' neda' cheę québedxa gucá'ana szren cuina' cheę da nigá dxuna'. <sup>11</sup> ¿Bizr cheę na' dxennıa' canı'? ¿Naca na lawe' da quebe nazrı'ida' le'e? Nézqueze Dios nazrı'ida' le'e.

<sup>12</sup> Gúnqueza' ca dxuna' cheę quebe gata' lataj cheę benne' ca' dxelaca lazře' xulucá'ana szren cuine' lawe' da dxeléquenę' dxelunę' zrin cáteze dxuntu' netu'.

<sup>13</sup> Benne' canı' zaj naque' gubáz quebe nasel-la Cristo. Dxelezı' xęę bėnneache, ne dxululé'e cuine' ca gubáz cheę Cristo. <sup>14</sup> Quebe naca da nigá da xebánedxu lawe' da Satanásqueze dxulé'e cuina na ca tu gubáz cheę xabáa zue' lu xel-la naxanı' cheę Dios, <sup>15</sup> na' cheę le' na' dxululé'e cuine' ca benne' dxelún da xrlátaje. Benne'

canı' xelebıa xię ca ba naca cheę benne' dxelún da canı'.

### Da guzaca Pablo lawe' da naque' gubáz cheę Cristo

<sup>16</sup> Xecha lasa dxapa' le'e, quebe nu benne' dxal-la' guéquenę' nadá xichaj lázrdawa'. Che ca'an dxéquele le'e, le gunna neda' lataj guchálajęna' le'e ca tu benne' nadá xichaj lázrdawe', cheę gaca gucá'ana szren cuina'. <sup>17</sup> Quebe dxapa' le'e da nigá lu xel-la dxenná bea cheę Xránadxu. Guchálaja' ca tu benne' nadá xichaj lázrdawe', nnia' tu da gucá'ana szren cuina'. <sup>18</sup> Lawe' da zaj zra' benne' zantę dxulucá'ana szren cuine' lu da zaj naque' cheę xęzr la xu nigá, cá'anqueze neda' gucá'ana szren cuina'. <sup>19</sup> Lawe' da nácalęęle benne' sina dxuchaga laule du lázrele benne' zaj nadá xichaj lázrdawe'. <sup>20</sup> Dxuchaga laule benne' ca' dxelxunę' le'e ca benne' zaj nada'u, ne benne' ca' dxuluchínenę' le'e, ne benne' ca' dxelenná bė'enę' le'e, ne benne' ca' dxuluzųę' le'e chalá'ala, ne benne' ca' dxelęgapę' xraga laule. <sup>21</sup> Láqueze dxedué'eda' dxennıa' da nigá, quebe guca' benne' dxechugu lazre' cheę guna' ca dxelún xezícadxa benne'. Na'a gaca' lazre' dxugu guna' canı'.

Ba dxelechugu lazre' benne' xezícadxa dxulucá'ana szren cuine'.

Cá'anqueze neda' xechugu lazra' guna' na, láqueze naca

tu da ca zeaje da dxennıa'.

<sup>22</sup> ¿Zaj naque' benne' hebreo?

Cá'anqueze neda' naca' benne' hebreo.

¿Zaj naque' benne' Israel? Cá'anqueze neda'.

¿Zaj naque' zri'ine zre sua Abraham? Cá'anqueze naca' neda'.

<sup>23</sup> ¿Zaj naque' węn zrin cheę Cristo?

Nácadxa' neda' węn zrin cheę' ca benne' ca', lálcala dxuchálaja' ca tu benne' nadá xichaj lázrdawe' gate

dxennıa' da nigá.

Ba bęndxa' zrin ca benne' ca'.

Ba buluzálajdxaca bėnneache neda' ca nu bzálaj benne' ca'.

Ba gulegu'udxa bėnneache neda' lızre xia ca belunę' cheę benne' ca',

na' zane' lásate ba guzúa' lu da stębe cheę xel-la gute.

<sup>24</sup> Gazxu' lasa ba belúe benne' judıo ca' neda' xide chęnnu dxua weaj.

<sup>25</sup> Chunna lasa beline' neda' xaga. Tu lasa belúę neda' xiaj.

Chunna lasa guxaze da dxedá lawe' nısadau' da xu'a lu nisa.

Tu lasa, tu zra tu xęla guxu'a lu nısadau'.

<sup>26</sup> Zane' lásate guxu'a neza, ne guzúa' lu da stębe:

Cheę xęgu ca', ne cheę gubán ca'.

Cheę benne' walázr chia' ca', ne cheę benne' zıtu' ca'.

Guzúa' lu da stębe lu xęzre, ne leę xıxre', ne lu nısadau',

ne ládujla benne' wen lazre' dxelenné' zaj naque' bi bíchedxu.

<sup>27</sup> Benle'a zrin, ne guzúa' lu da zi' da xa'.

Zane' lásate quebe gusia' dxela.

Gudúnle'a, ne gubílele'eda', na' zane' lásate bēna' gubasa.

Catite bexaga', ne bexázejda' zra lana' gacua'.

<sup>28</sup> Da zrendxa ca da caní, ne xezícadxa da guzraca'.

Xúgute zra dxéqueda' zi' lawe' da zua' gunne xue chee

xúgute cue' bi chee Cristo.

<sup>29</sup> Che nu benne' nate ni'a ne'e lu xel-la dxeajlí lazre' chee',

cá'aqueze neda' dxéqueda' nate ni'a ná'aqueza'.

Che nu benne' dxeluné' dxeajchaze', néda'queze dxa-ca' tul-la.

<sup>30</sup> Che dxun na ba xen gucá'ana szren cuina',

gucá'ana szren cuina' chee da ca' dxululé'e na nate ni'a na'a.

<sup>31</sup> Dios, Xra Xránadxu Jesucristo, Bénnea' naca chee' güe lá'anatequezdxu le', nézene' dxenní'a da li. <sup>32</sup> Gate guzúa' xezre Damasco, benne' wnná bea na' dxune' zrin chee wenná bea Aretas bzre'e benne' dxuluxúe' dxa xu'u chee xezre na', chee xel-le' neda'. <sup>33</sup> Na' bi bíchedxu ca' bululetje' neda' tu lu xcuite xia ga dxu'u lení' chee xu'u lu ze'e da naxechaj na xezre na'. Ca' guca na, gulá' lu na' benne' ca'.

#### Da ca' Dios blé'ene' Pablo

**12** Da li quebe dxal-la' gucá'ana szren cuina', san guchálaja' chee da ca' ble'e Xránadxu neda', ne da ca' ble'eda' ca naca chee'. <sup>2</sup> Neda', ca tu benne' dxéajle chee Cristo, ba zeaj chidá' iza guché Dios neda' xabáa guxunne'. Quebe nezda' che guxá'a na' duté bēla' dxen chia', u che cabí. Dios nézene'. <sup>3</sup> Nezda' néda'queza', che zua' lu bēla' dxen chia', u che cabí, quebe nezda', tuze Dios nézene'. <sup>4</sup> Guché Dios neda' tu xabáa chee', naga benda' dizra' bagache da quebe naca chee bēneache xelenné' ca zaj naca na. <sup>5</sup> Waca gucá'ana szrena' tu benne' caní, san quebe gucá'ana szren cuínaqueza', che quebe naca na chee xel-la nate ni'a na' chia'. <sup>6</sup> Láqueze che gaca lazra' gucá'ana szren cuina' quebe gaca na tu da xálaze, lawe' da gaca na tu da li. Quebe guna' na chee quebe nu guéquene' nácadxa' ca da gaca lé'ene' naca', u ca da gaca xenne' da dxenní'a.

<sup>7</sup> Da caní ble'e Xránadxu neda' gulaca na da xebánele'edxu, na' chee quebe gucá'ana szren cuina', guca chia' ca tu xeche' naxaze lu bēla' dxen chia' da dxuchine Satanás chee guzalaj na neda'. <sup>8</sup> Chunna lasa guta' xueda' Xránadxu gucuase' da dzezaca'. <sup>9</sup> Xránadxu guzre' neda': "Xela zri'i lazre' chia' naca na duté da dxechínenu' lawe' da dxulé'edxa lau xel-la waca chia' nen benne' nate ni'a ne'e." Ca' naca, dxebeda' lawe' da nate ni'a na'a chee gulé'e lau lu bēla' dxen chia' xel-la waca chee Cristo. <sup>10</sup> Chee le' na' dxebeda' ca naca xel-la nate ni'a na' chia', ne ca naca dizra' schanni' ca' dxelenná bēneache chia', ne ca naca da ca' dx-

exázejda', ne gate zaj nau zi' xuzre' bēneache neda', ne ca naca da ba xa' ca' da dxedéa' ne chee Cristo, lawe' da gate nátedxa ni'a na'a, dxéqueda' nácadxa' benne' wal-la.

#### Pablo dxe'e gunne xue chee bi chee Cristo zaj zre'e Corinto

<sup>11</sup> Guca' ca tu benne' nadá xichaj lázrdawe' gate bca'ana szren cuina' caní, san le'e benle bēna' na. Le'e na' dxal-la' gucá'anale neda' szren lawe' da quebe zaca' látezdxca ca benne' gubáz zren ca', benne' ca' dxéajlele, láqueze quebe bi zaca' neda'. <sup>12</sup> Zrin bēna' ládujla le'e lu duté xel-la zren lazre' chia' ble'e na da li naca' gubáz chee Cristo ne chee da dxelunna bea na, ne xel-la waca ca' chee xabáa, ne da ca' dxexebánedxu.

<sup>13</sup> ¿Dxéquele le'e nácale látezdxca blau ca xezícadxa cue' bi chee Cristo lawe' da guz' lu na'a da belunne' chia', na' quebe guz' lu na'a da zaj naca chee? Le gunite lau neda' che naca tu da calela quebe bēna' le'e lataj bi gúnnale chia'.

<sup>14</sup> Na'a ba zua' xida' xedajnná'a le'e da guxunne' lasa, ne quebe si' lu na'a da zaj naca na chee. Quebe dxexílaja' da nácale, san lé'eequeze, lawe' da dxal-la' xulucude xruze xrna' dumí da xulunézruje' zrí'ine', ne quegá xulucude zrí'ine' da xulunézruje' xra xrnabe'. <sup>15</sup> Du lazra' guchíneda' dumí chia' chee gaca chawe' chee bēne'du xu'ule, láqueze dxéqueda' gate nazrí'idxeda' le'e, látezdxca nazri'ile le'e neda'.

<sup>16</sup> Bal-la benne', láqueze zaj nézene' quebe bi guz' lu na'a da zaj naca na chee, dxelenné' gudē-la' le'e lu da wen lazre'. <sup>17</sup> ¿Guz' xē'a le'e lu na' tu benne' gusel-la' chee? <sup>18</sup> Guta' xueda' Tito xídabe' xedajnná'abe' le'e, ne gusel-la' nen lebe' xetú bi bíchedxu. ¿Guz' xē Tito le'e? ¿Quebe bēntu' tuze ca bēntu' ládujla le'e neda', ne Tito, na' nen tuze Be' Lá'azxa?

<sup>19</sup> Bi bicha' nazri'ite lazra', ¿dxéquele dxucá'ana cuí'nantu' xrlátaje laule le'e? Dxuchálajēntu' le'e lau Dios, ne lu La Xránadxu Jesucristo. Xúgute da caní dxennan-tu' chee gúlale lu da naca chee Dios. <sup>20</sup> Dzezreba' gate xida' xedajnná'a le'e, walé'eda' le'e quebe nácale cáteze dxaca lazra' gácale, na' le'e walé'ele neda' quebe naca' da dxaca lázrele gaca'. Dzezreba' dxedíl-lalēle ljwézrele, ne nácale xa lazre', ne dzezrá'ale ljwézrele, ne nácale zide lazre', ne nácale wetupa dizra' bizruj, ne dxez' tízrale ljwézrele, ne dxucá'ana szren cuínale, ne dxunle da calela. <sup>21</sup> Dzezreba' gate xida' xedajnná'a le'e, Dios guné' xedué'eda' ne chee le'e, da gucuezre na neda' ne chee zánele le'e, benne' ca' dxeluntequeze' dul-la, ne quebe dxulusane' dxeluné' da sban, ne da dxulucá'ana sban ljwezre', ne da calela da tu dxelúnzqueze'.

#### Dizra' bzebe

**13** Da nigá naca na da guxunne' lasa xida' xedajnná'a le'e. Xúgute dxulé'e lawe na naca na da li ne chee dizra' chee chupa u chunna benne' xellexechebe'.

<sup>2</sup> Benne' ca' beluné' dul-la nédxula, ne xúgutele le'e,

dxácatę ne zua' zitu' naga zrle, dxuzenda' le'e da xula ca da gucha' le'e gate bedajnná'a le'e da gudxupe' lasa, che xida' xedajnná'a le'e da xula quebe gudéa' cá'aze ca da ba nunle. <sup>3</sup> Nadxa lé'ele da gulé'e na dxenné Cristo lu dxu'a neda', na' Lę' quebe nate ni'a nę'e lu da gunę' cheęle, san naque' benne' wal-la ládujla le'e. <sup>4</sup> Da li gudé'e xaga béguaj ca tu benne' nate ni'a nę'e, san naca banę' nę cheę xel-la waca cheę Dios. Cá'anqueze netu' nate ni'a nantu' ca da guca cheę', san lawe' da nácantu' tuze nen Lę' gaca bantu' nę cheę xel-la waca cheę Dios cheę guntu' zrin cheęle le'e.

<sup>5</sup> Le guxúe xanne' cuínale cheę gueque be'ele che da li dxeajlí lázrele Cristo. Le guxúequeze cuínale. ¿Quebe dxeque be'ele zua Jesucristo xichaj lázrdaule, che da li dxeajlí lázrele Lę'? <sup>6</sup> Dxebeza lazra' gueque be'ele quebe naca' neda' benne' węn lazre' lu da naca' cheę Cristo. <sup>7</sup> Dxenábantu' lau Dios cheę quebe bi da caleła gunle, quegá cheę gulé'entu' dxennantu' da li, san cheę gunle le'e da xrlátaje, láqueze dxéquele le'e quebe dxennantu' da li. <sup>8</sup> Quebe bi gaca guntu' da

dxedábaga na da li, san tuze da dxácale na da li.

<sup>9</sup> Cheę lę na' dxebentu' gate nate ni'a nantu', che le'e nácale benne' wal-la, na' nábaquezentu' Dios cheę gácale dutę da dxal-la' xelaca bi cheę Dios. <sup>10</sup> Dxuzúaja' cheęle da nigá nédxula ca xida' xedajnná'a le'e, cheę quebe gun na ba xen gate xida', gácale'a benne' snia ca guchíneda' xel-la dxenná bea chia', da bęna Xránadxu neda' cheę séqueda' gusegula' le'e lu da naca cheę Dios, ne quegá cheę guzría xi'a le'e.

<sup>11</sup> Na'a, bi bicha', le sua xel-la dxebé. Le gaca dutę da dxal-la' xelaca bi cheę Dios. Le xue zren lјwézrele. Le gaca tuze tule xetule, ne le sua xel-la dxebeza zri lazre', na' Dios, Bénnea' dxunęę dxi'u xel-la dxebeza zri lazre', ne nazr'ine' dxi'u súalęę' le'e. <sup>12</sup> Le gugapa diuzre lјwézrele tule xetule, ne le gunida lјwézrele.

<sup>13</sup> Xúgutę bi bíchedxu, bi cheę Cristo dxulugape' le'e diuzre.

<sup>14</sup> Dxaca lazra' gucá'ana Xránadxu Jesucristo le'e chawe', ne zri'i Dios le'e, ne sua tuze Be' Lá'azxa nen le'e. ¡Ca'an gaca na!

# Gálatas

## Dizra' da bzuaj Pablo chee bi chee Cristo zaj zře'e xezr la xu Galacia

**1** Neda', Pablo, naca' gubáz chee Cristo. Quebe gulesel-la bėnneache neda', ne quegá buluzúa bėnneache neda' gaca' gubáz. Caní bėnqueze Jesucristo chia', ne Xradxu Dios, Bėnnea' bsebanė' Jesús ládujla benne' gate. <sup>2</sup> Xúgute benne' bíchedxu zráleņe' neda' zaj naque' neda' tuze. Neda' dxuzúaja' dizra' nigá chee xúgute cue' benne' bíchedxu zaj zře'e xezre ca' zaj nnita' xezr la xu Galacia. <sup>3</sup> Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'. <sup>4</sup> Jesucristo bzane cuine' chee gutie' ne chee dul-la da nabágadxu, chee bselé' dxi'u lu da naca chee xezr la xu nigá da naca na da calėla. Bėne' da guca lazre' Xradxu Dios. <sup>5</sup> ĴGaca báqueze Dios chadía chacanna! ĴCa'an gaca na!

### Quebe de xetú dizra' chawe' chee Dios

<sup>6</sup> Dxexebánele'ėda' chee le'e lawe' da dxebeáj xíchajte Dios, Bėnnea' gunné' le'e chee si' lu na'le da dxunna Cristo, na' dxezí' lu na'le tu dizra' nazrala ca naca dizra' chawe' chee Cristo. <sup>7</sup> Da li quebe bi de xetú dizra' chawe', san zaj zra' bal-la benne' dxelún zréajene' le'e, ne dxelaca lazre' xuluchuque' dizra' chawe' chee Cristo. <sup>8</sup> Che nu benne' dxuzenne' le'e xetú dizra' da nazrala ca naca dizra' chawe' da ba bzėnentu' le'e, dxenaba' lau Dios cue'e bėnnea' de', lácala naca neda', u naca tu gubáz chee xabáa. <sup>9</sup> Báchequeze bzenda' le'e, ne dxuzenda' le'e da xula, che nu benne' guzenne' le'e tu dizra' da nazrala ca naca dizra' chawe' da ba guzí' lu na'le, dxenaba' lau Dios cue'e bėnnea' de'.

<sup>10</sup> Gate dxennia' da nigá, ĴDxaca lazra' xegá'ana' xrlátaje lau bėnneache, u che lau Dios? ĴDxaca lazra' guna' da xelezaca ba lazre' bėnneache? Che ca'an dxaca lazra' guna' da dxelezaca ba lazre' bėnneache, quebe naca' wėn zrin chee Cristo.

### Ca bexaca Pablo gubáz chee Cristo

<sup>11</sup> Dxuzėajni'ida' le'e, bi bicha', dizra' chawe' da dxuzenda' bėnneache, na' quebe naca na tu da gulaj na lu xíchaj lázrdau bėnneache. <sup>12</sup> Quebe nu benne' bėne' na neda', ne quegá nu benne' bsėdene' neda' le' na, san Léqueze Jesucristo bzenne' na neda'.

<sup>13</sup> Ba bėnquezle ca bėna' neda' nédxula gate na' nazí' lu na'a xel-la benne' xudau' chee judío ca', ca gudáu zi' xuzra' bi chee Dios zaj nácabe' bi chee Cristo, ne bėn zi' lazra' guzría xi'a-be'. <sup>14</sup> Lu xel-la benne' xudau' chee

judío ca', neda' ba bzrué'edxeda' ca xúgute bi walázc chia', bi ljwezra' ca', lawe' da bė lázredxa' gapa' ca da xjácale xra xrtawa' ca'. <sup>15</sup> Dios guquė'e neda' nédxula gate za gálaja', na' lu xel-la zri'i lazre' chee' gunné' neda'. Nadxa gate guca lazre' Le', <sup>16</sup> blėene' neda' Zrí'ine', chee guzenda' benne' ca' quebe zaj naque' judío ca naca chee Zrí'ine'. Gate guca da nigá, quebe nu benne' gunábeda', <sup>17</sup> ne quebe guxá'a Jerusalén cheajnábada' benne' zaj naque' gubáz chee Cristo nédxudxa ca neda'. Guxá'a naga nababa xezr la xu Arabia, na' gudé na' bezrina' xezre Damasco.

<sup>18</sup> Gudé chun iza guxá'a Jerusalén, chee xeajchálajle-na' Pedro, na' begá'analėna' le' xta' gubizra. <sup>19</sup> Quebe nu ble'eda' xetú benne' gubáz chee Cristo, san tuze Jacobo, bi biche Xránadxu. <sup>20</sup> Ne chee La Dios dxapa' le'e, da li naca da nigá dxuzúaja' chee le'e.

<sup>21</sup> Ca gudé na' guxá'a xezre ca' zaj nababa xezr la xu Siria, ne xezre ca' zaj nababa xezr la xu Cilicia.

<sup>22</sup> Benne' bíchedxu ca', bi chee Cristo zaj zře'e xezr la xu Judea quebe zaj nunbe'e neda'. <sup>23</sup> Belėzene' nu dxenná: "Bėnnea' nédxula gudáu zi' xuzre' dxi'u, na'a dxuchálaje' dizra' chawe' chee xel-la dxeajlí lazre' Cristo, da na' guca lazre' guzría xi'e nédxute." <sup>24</sup> Na'a dxelúe láneg' Dios ca da belenne' ca naca chia'.

### Benne' gubáz ca' dxelezí' lu ne'e Pablo

**2** Ca gudé chidá' iza guxá'a xecha lasa Jerusalén nen Bernabé, na' bėn bi Tito neda' tu zren. <sup>2</sup> Guxá'a na' lawe' da ble'e Dios neda' dxal-la' cha'a na'. Na' cheėzela bchálajle'na' benne' ca' zaj naque' blau ládujla bi chee Cristo, ne bzenda' le' dizra' chawe' da dxuchálaja' ládujla benne' ca' quebe zaj naque' judío. Bėna' caní chee nezda' quebe guca dácheze zrin da ba bėna', ne da dxuna'. <sup>3</sup> Gulezí' lu ne'e zrin nuna', na' quebe nu gunná be'e Tito, bi zálėbe' neda', chugu lu bėla' chee be' da gulė'e na nácabe' bi chee Dios, lácala quebe nácabe' judío. <sup>4</sup> Bal-la benne' quebe zaj naque' du lazre' benne' bíchedxu, benne' gulu'e ládújla dxi'u lu da wėn lazre', gulaca lazre' chugu da gulė'e na lu bėla' chee Tito. Benne' caní gulu'e ládújla dxi'u chee xelenėzene' ájala xelegúe' lataj da nazidxu lu na' Jesucristo, chee xuluxuzúe' dxi'u ca benne' zaj nada'u lu da bdxixruj bea Moisés. <sup>5</sup> Ne chiteze quebe bentu' le' lataj xelegú'u xel-le' netu' lawe' da guca lázrentu' xegá'analė le'e da li dizra' chawe' chee Cristo.

<sup>6</sup> Benne' ca' zaj naque' blau quebe bi da cube bulusebague' netu'. Da zaj naque' quebe bi naca na chia' lawe' da quebe xuchí'a Dios ca da nalá' láweze chee



bénneache. <sup>7</sup> Quebe bi bulusebague' neda', lawe' da belexúnbe'e Diósqueze bsebage' neda' guzenda' benne' ca' quebe zaj naque' judío dizra' chawe', cáteze bsebage' Pedro guzenne' benne' judío ca' dizra' chawe'. <sup>8</sup> Léqueze Dios na', Bénnea' bzué' Pedro gubáz chee' ládujla benne' judío ca', cá'aqueze bzué' neda' gaca' gubáz chee' ládujla benne' quebe zaj naque' judío.

<sup>9</sup> Chee le na', Jacobo, ne Pedro, ne Juan, benne' zaj naque' blaudxa, belexúnbe'e ben Dios neda' culuén nigá, na' gulezi' lu ne'e neda', ne Bernabé, na' belune' tuze dizra' cheajzentu' netu' benne' ca' quebe zaj naque' judío dizra' chawe', dxácaté na' le' xuluzenne' na benne' judío ca'. <sup>10</sup> Túteze da gulenábene' netu' xexache lázrentu' benne' xache' ca', da na' dxue lazra' dxuna'.

### Pablo dxedil-le' Pedro lu xezre Antioquia

<sup>11</sup> Gate bla' Pedro xezre Antioquia gudil-la' le' caníqueze lawe' da gunegue lazre'. <sup>12</sup> Nédxuté gudágulene' benne' ca' quebe zaj naque' judío cadxa belelá' bal-la benne' gusel-la Jacobo. Nadxa bebigue'e chalá'ala, ne bsañe' québedxa gudágulene' benne' ca' lawe' da bzrebe' judío ca', benne' ca' zaj nadxugu lu be'la' chee' da dxulé'e na. <sup>13</sup> Nadxa xezícadxa judío ca' zaj naque' bi chee Cristo belune' tu zren Pedro lu da dxune' láweze. Caní belune', na' ca' benté Bernabé tu zren benne' ca' lu da na' dxelune' láweze. <sup>14</sup> Gate ble'eda' neda' quebe dxelune' cáteze naca chee da li chee dizra' chawe' chee Cristo, na' gucha' Pedro lau xúguté benne' ca': Lue' nacu' judío, na' benu' ca tu benne' quebe naque' judío, ne quebe benu' ca tu benne' judío. ¿Bizr chee na' dxenná be'enu' benne' quebe zaj naque' judío xelune' ca dxelún benne' judío?

### Benne' judío xeledé' che dxeajlí lazre' Cristo ca dxaca chee xezícadxa benne'

<sup>15</sup> Cá'aqueze gucha'-ne': Dxi'u nácadxa benne' judío lawe' da nálajdxu ca', ne quebe nácadxa benne' dul-la ca benne' zaj nababa xezícadxa xezr la xu ca'.

<sup>16</sup> Nézedxu netú benne' quebe xegá'ane' xrlátaje lau Dios lawe' da nune' da bdxixruj be'e Moisés, san tuze che dxeajlí lazre' Jesucristo. Chee le na' cá'aqueze dxi'u dxeajlí lázredxu Cristo chee xegá'anadxu xrlátaje lau Dios ne chee xel-la dxeajlí lazre' cheedxu Cristo, ne quegá lawe' da bendxu ca nadxixruj bea na. Netú benne' quebe xegá'ane' xrlátaje lau Dios lawe' da nune' da nadxixruj bea na.

<sup>17</sup> Na'a, che dxi'u dxuxrén lázredxu nagá'anadxu xrlátaje lau Dios ne chee Cristo, ne che zua da dxulé'e na ne nácadxa benne' dul-la, ¿nnadxu Cristo dxunne' dxi'u lataj gundxu dul-la lawe' da québedxa dxenná be'e da bdxixruj be'e Moisés dxi'u? ¿Cabata! <sup>18</sup> Che dxuchínnaja' tu, na' che te na' xexuna' na, na' nabaga' zria. <sup>19</sup> Ba naca' ca tu benne' gate lu da naca chee da nadxixruj bea na. Da nadxixruj béaqueze ble'e na neda' naca' ca tu benne' gate, chee gaca bana' ne chee

da nun Dios. <sup>20</sup> Ba naca' ca tu benne' gate lawe' da naca chia' ca naca chee tu benne' gudá' xaga béguaj tu zren nen Cristo. Chee le na', québedxa naca bana' neda'. Cristo naca bané' lu xichaj lázrdawa'. Xel-la nabán da napa' lu be'la' dxen chia', napa' na ne chee xel-la dxeajlí lazre' chia' Zri'ine Dios, Bénnea' bzri'ine' neda', ne bzane cuine', gutié' waláz chia' neda'.

<sup>21</sup> Quebe dxaca lazra' guzúa' chalá'ala xel-la zri'i lazre' chee Dios. Che nu benne' gaca xegá'ane' xrlátaje lau Dios lawe' da nune' da nadxixruj bea na, na' dácheze guca da ben Cristo gate gutié'.

### Dxezidxu Be' Lá'azxa ne chee xel-la dxeajlí lazre'

**3** Bi bicha', zrale Galacia, nácale le'e benne' xala ca'. ¿Zua nu benne' dxezi' xe'e le'e chee québedxa guzúale dizra' chee da li? Ba blé'entu' le'e caníqueze Jesucristo, ca gudé'e le'e xaga béguaj. <sup>2</sup> Le xexque neda': ¿Guzile Be' Lá'azxa lawe' da benle da bdxixruj be'e Moisés, u lawe' da guxeajlele chee da bénnele? <sup>3</sup> ¿Ájala chee na' nácale benne' xala? ¿Dxéquele gunle gácale duté da na' guzú laule gácale ne chee Be' Lá'azxa? <sup>4</sup> ¿Dácheze gudele zánete xel-la zi' ca'? Dxaca lazra' quebe guca na níteze. <sup>5</sup> Gate Dios dxunne' le'e Be' Lá'azxa chee', ne dxune' xel-la waca ca' chee xabáa ládujla le'e, ¿dxune' na lawe' da dxunle ca nadxixruj bea na, u lawe' da guxeajlele chee dizra' chawe' da bennele?

<sup>6</sup> Abraham guxeajlí lazre' Dios, na' Dios guz' lu ne'e da nigá ca tu da bca'ana le' xlátaje. <sup>7</sup> Chee le na' dxalla' nézele, benne' ca' da li zaj naque' zri'ine zre sua Abraham zaj naque' benne' dxeleajlí lazre' Dios.

<sup>8</sup> Naxúaj na lu dizra' lá'azxa ca naca da nigá. Lawe' da neze Dios nédxuté gucá'ane' xlátaje benne' quebe zaj naque' judío, benne' xeleajlí lazre' Le', na' guzre' Abraham nédxuté dizra' chawe' nigá, gunné': "Gaca chawe' chee benne' duté xezr la xu ne' chiu' lue'." <sup>9</sup> Ca'an naca, dxaca chawe' chee benne' dxeleajlí lazre' Dios tu zren nen Abraham, bénnea' guxeajlí lazre' Dios.

<sup>10</sup> Benne' ca' dxuluxrén lazre' zaj nagá'ane' xrlátaje lau Dios lawe' da zaj nune' ca da nadxixruj be'e Moisés zaj xu'e de' lawe' da naxúaj lu dizra' lá'azxa da dxenná na: Zaj xu'u de' xúguté benne' quebe dxelúnqueze' xúguté da nadxixruj bea na, da na' naxúaj na lu xiche lá'azxa. <sup>11</sup> Dxunna bea na netú benne' quebe xegá'ane' xrlátaje lau Dios lawe' da nune' da nadxixruj bea na lawe' da naxúaj lu xiche lá'azxa da dxenná na: Bénnea' nagá'ane' xrlátaje lau Dios gata' chee' xel-la nabán li lazre' che dxeajlí lazre' Dios. <sup>12</sup> Bénnea' dxune' ca bdxixruj be'e Moisés quebe dxune' na ne chee xel-la dxeajlí lazre' chee' lawe' da naxúaj da dxenná na: Benne' dxune' xúguté da caní gaca bané' ne chee le na.

<sup>13</sup> Cristo bselé' dxi'u lu de' da xu'u nu quebe dxun da nadxixruj bea na lawe' da guxú'unqueze' de' waláz cheedxu cáteze naxúaj lu dizra' lá'azxa da dxenná na: Xu'u de' bénnea' de'e le'e xaga. <sup>14</sup> Da nigá guca na chee gaca gun Dios xrlátaje benne' ca' quebe zaj naque' benne' judío, da na' guchebe lazre' guné' lau Abraham ne chee Jesucristo, na' chee si' lu nnadxu

xúgutędxu Be' Lá'azxa ne cheę xel-la dxeajlí lazre' cheędxu ca da guchebe lazre' Dios.

### Da naca cheę da nadxiruj bea na, ne da naca cheę da guchebe lazre' Dios

<sup>15</sup> Bi bicha', dxulé'eda' le'e ca da dxaca cheę bénneache. Gate tu benne' dxunę' tu xel-la wezría, ne ba bzuajte' láqueze' lawe na, netú benne' quebe gaca guchinnaje' na, ne quebe bi gaca gudęę cheę na. <sup>16</sup> Dios guchebe lazre' da gunę' cheę Abraham, ne cheę zri'ine zre suę'. Quebe dxenná na: Cheę zri'ine zre suę' ca', da naca na cheę benne' zan, san dxenná na: Cheę zri'ine zre su', da naca na cheę tuze benne', bénnea' naque' Cristo. <sup>17</sup> Da dxennia' naca na da nigá: Dios bęne' tu xel-la wezría nen Abraham, ne bca'ana chawe' na. Cheę le na', da bdxiruj be'e Moisés da bla' na ca gudé tapa gaxúa chi dxua iza quebe gaca guchinnaj na xel-la wezría na', u xucá'ana na dácheze da guchebe lazre' Dios. <sup>18</sup> Che dxezidxu da dxunna Dios che dxundxu ca da bdxiruj be'e Moisés, quebe naca na tu da nachębe lazre' Dios, san da li Dios guchebe lazre' gunęzruje' na cá'aze cheę Abraham. <sup>19</sup> Na'a xca', ħbizra dxun da bdxiruj be'e Moisés? Dios bnęzruje' da na' gudé na' cheę gulé'e na ca naca xtul-la bénneache cadxa xelá' zri'ine zre sua Abraham na', Bénnea' guchebe lazre' Dios gunę' da xrlátaje cheę'. Dios gusel-le' da gunná bé'ene' lu na' gubáz cheę xabáa cheę', na' Moisés guque' benne' dxudé dizra' cheę. <sup>20</sup> Quebe dxun na ba xen nu benne' gudé dizra' gate naca na cheę tuze benne', na' Dios naque' tuze, Bénnea' guchebe lazre' cheę Abraham ca da gunę'.

### Da dxun da bdxiruj be'e Moisés

<sup>21</sup> ħNnadxu dxedábaga da bdxiruj be'e Moisés da na' guchebe lazre' Dios? ħCabata'! Che da nadxiruj bea na da bnezruj Dios gaca gunna na xel-la nabán cheę bénneache, na' gaca xegá'ana xrlátaje lau Dios tu benne' che gunę' ca da nadxiruj bea na na'. <sup>22</sup> Dxenná na lu dizra' lá'azxa, xúgutę bénneache zaj nabague' dul-la cheę gaca xelezí' lu neę da guchebe lazre' Dios gunnę' benne' ca' xeleajlí lazre' Jesucristo.

<sup>23</sup> Nédxudxa ca bzin zra gaca nu cheajlí lazre' Cristo, ne cheę da nadxiruj bea na, xúgutędxu, benne' judío, gúcadxu ca benne' zaj xu'e lizre xia, lawe' da xadíaze bęndxu ca dxenná da nadxiruj bea na, na' gulęzadxu ca bzin zra guca cheajlí lázredxu Cristo. <sup>24</sup> Da nadxiruj bea na gunná be'e na dxi'u, ca dxun tu benne' dxusegule' bidau' cheę benne' xula cadxa bzin zra bla' Cristo, cheę xegá'anadxu xrlátaje lau Dios gate guxeajlí lázredxu Cristo. <sup>25</sup> Na'a lawe' da ba bzin zra gaca cheajlí lázredxu Cristo, québedxa xú'udxu lu na' da nadxiruj bea na da naca na cheędxu ca tu benne' dxusegule' bidau'.

<sup>26</sup> Xúgutęle na' dxeajlí lázrele Jesucristo nácale tuze nen Le'. Cheę le na' nácale bi cheę Dios. <sup>27</sup> Xúgutęle le'e na' gudxúale nisa cheę gácale tuze nen Cristo, Le'

naque' cheęle ca tu ladxe' nácale. <sup>28</sup> Québedxa dxel'é Dios le'e ca benne' judío, u benne' quebe naque' judío, u ca benne' nada'u, u benne' quebe nada'u, u ca benne' biu, u nu'ula. Dxel'éneę' le'e, naca xúgutęle ca tuze beł-la' dxen lawe' da nácale tuze nen Jesucristo. <sup>29</sup> Che nácale bi cheę Cristo, da li nácale zre sua Abraham, na' gaca cheęle da guchebe lazre' Dios gunę'.

**4** Da dxaca lazra' nnia' naca na da nigá: Dxácatę ne naca bidau' bi na' gaca cheębe' da naca cheę xrabe', nácabę' ca bi nada'u xu'ube' lu na' xránabe', lácala da li gácabe' xrane xúgutę da dę lizre xrabe'.

<sup>2</sup> Xu'ube' lu na' benne' dxulusędene'-'be', ne lu na' benne' ca' xu'u lu neę da naca cheębe', cadxa zrin zra gulé'e xrabe' da li nácabę' zrí'ine'. <sup>3</sup> Cá'anqueze dxaca cheędxu. Gate ne nácadxu ca bidau', xú'udxu lu na' xúgutę da dxelenná bea na lu xęzr la xu nigá. <sup>4</sup> Gate bzin zra ba ble'e lau Dios, na' gusel-le' Zrí'ine', gúlajbe' ne cheę tu nu'ula, na' guxúę lu na' da bdxiruj be'e Moisés. <sup>5</sup> Bleę bselé' benne' zaj xu'e lu na' da nadxiruj bea na, cheę gaca si' lu na' Dios dxi'u ca zrí'ineęze'.

<sup>6</sup> Lawe' da ba nácale bi cheę Dios, Le' gusel-le' Be' Lá'azxa cheę Zrí'ine' lu xichaj lázrdaule, na' dxenná Be' na': "Abba", da zéaję na: Xrae. <sup>7</sup> Ca'an naca, ba nácadxu bi cheę Dios, ne québedxa nácadxu ca benne' zaj nada'u lu na' da bdxiruj be'e Moisés. Na' lawe' da nácadxu bi cheę', Dios gunnę' dxi'u da dę cheęn'. Caní naca lawe' da nácadxu Cristo tuze.

### Pablo dxeę gunne xue cheę bi ca' cheę Cristo

<sup>8</sup> Da líqueze, gate quebe ne gúnbeale Dios, gúcale benne' zaj nada'u cheę dios ca', da' quebe zaj nácaqueze dios. <sup>9</sup> Na'a gate ba núnbeale Dios, u nnadxu, Dios na' núnbeę le'e, ħájazra gunle xexú'ule xecha lasa lu na' da dxelenná bea na lu xęzr la xu nigá, da ca' quebe zaj zaca? <sup>10</sup> Le'e ne dxapa ba lá'anale bal-la zra ca', ne bal-la beu' ca', ne tu tu iza ca'. <sup>11</sup> Dxezrebele'a bęna' zrin níteze ládujla le'e gate bzenda' le'e dizra' chawe' cheę Cristo.

<sup>12</sup> Bi bícha'dau', dxata' xúeda' le'e gácale ca naca' neda', québedxa xu'a lu na' da nadxiruj bea na, lawe' da gúcaqueza' neda' ca nácale le'e. Quegá bi da calęla bęnle chia' neda'. <sup>13</sup> Ba nézquezle gate nédxudau' bzenda' le'e dizra' chawe' cheę Cristo. Guca na gate na' guxu'a tu xízrawę'. <sup>14</sup> Xízrawę' na' guca na da gusegute na le'e, san le'e quebe begútele neda', ne quebe bzúale neda' chalá'ala, san guzí' lu na'le neda' ca tu gubáz cheę xabáa cheę Dios, u ca náqueza' Jesucristo. <sup>15</sup> ħBizra guca cheę xel-la dxebe' da guzúale? Waca nnia' tu da xecá'ana le'e chawe', la naca da guzúquele gunle, bebéajtele xiaj láuquezele, cheę gúnale na neda'. <sup>16</sup> Na'a, ħbexaca' ca tu benne' dxecuđene' le'e lawe' da gucha' le'e da li?

<sup>17</sup> Benne' ca' dxelaca lazre' chugu lu beła' cheęle da na' dxulé'e na, dxeę gunne xue cheęle le'e, san quegá cheę xegá'anale chawe'. Da dxelaca lazre' naca na xu-lucuasę' le'e nen netu' cheę cuele gunne xue cheę le'. <sup>18</sup> Naca chawe' cuedxu gunne xue cheę benne' xula cheę xegá'anę' chawe', ne quegaze gate zúalęna' le'e.

<sup>19</sup> Zrí'ina'dau', naca chia' ca zua' lu xel-la dxudía ne cheęle ca dxaca cheę tu nu'ula ba zua sane' bidau', ne wabédxequeza' gunne xue cheęle cadxa gulé'e lau da li dxenná bea Cristo lu xichaj lázrdaule. <sup>20</sup> Dxezé lazra' súalęna' le'e ná'aqueze cheę gaca guchálajęna' le'e zezícadxa dizra' lawe' da dxezí'ale'a gunne xue.

### Da dxusede dxi'u ca guca cheę Sara, ne cheę Agar

<sup>21</sup> Le'e na', dxaca lázrele chu'ule lu na' da bdxixruj be'e Moisés, le xechébeque da nigá: ¿Quebe ne xénnele ca dxenná da nadxixruj bea na? <sup>22</sup> Dxenná na gulezrá' chupa zri'ine Abraham. Tube' gúcabe' zri'ine zrí'ulaqueze', nu'ula quebe nada'u. <sup>23</sup> Zri'ine nu'ula nada'u gúlajbe' cáteze dxelalaj xúgute' bidau', na' zri'ine nu'ula quebe nada'u gúlajbe' cheę guca li ca da guchebe lazre' Dios. <sup>24</sup> Da nigá naca na ca tu da dxulé'e na. Dxúpatę nu'ula caní dxululé'ene' ca zaj naca chupa xel-la wezrí'a. Tu xel-la wezrí'a nigá naca na da bnezruj Dios Moisés lu xi'a Sinaí, da na' dxulé'e Agar. Benne' ca' zaj xu'ę lu na' xel-la wezrí'a nigá dxelálaję' ca benne' zaj nada'u. <sup>25</sup> Cá'anqueze dxulé'e Agar da naca cheę xi'a Sinaí da zua na ga nababa Arabia, Cá'anqueze xi'a nigá dxulé'e na ca naca Jerusalén lu zra na'a zra lawe' da zaj naca benne' cheę xęzre nigá ca benne' zaj nada'u tu zren nen zrí'ine' ca'. <sup>26</sup> Benne' zaj nababę' Jerusalén cheę xabáa quebe zaj naque' benne' zaj nada'u, na' dxi'u nácadxu ca zri'ine benne' ca'. <sup>27</sup> Lu dizra' lá'azxa, naxúaj na ca naca cheę benne' zaj nababa Jerusalén cheę xabáa na', da dxenná na:

Gubé lue', nu'ula wizre, lue' quebe nu chilá' zri'inu'.  
Gudxęzre xa'a lu xel-la dxebé, lue' quebe núbbe'u xel-la dxudía

cheę xel-la dxezán bidau'.  
Nu'ula quebe guzán bidau' gate guque' cuide' waxandxa zrí'ine'  
quézcala zri'ine nu'ula zúalęne' benne' cheę'.

<sup>28</sup> Le'e, bi bícha'dau', nácadxu ca Isaac. Nácadxu zri'ine Abraham, bi ca' guchebe lazre' Dios gunézruje' lę'. <sup>29</sup> Na'a ca guca lu zra na', Ismael, zri'ine Abraham na', bi gúlajbe' ca dxelalaj xúgute' bidau', gudáu zi' xúzrebe' Isaac, zri'ine Abraham na', bi gúlajbe' ne cheę Be' cheę Dios, cá'anqueze dxaca na na'a. <sup>30</sup> Na'a ¿bizra dxenná dizra' lá'azxa? Dxenná na: Bebéaj chalá'ala nu'ula nada'u tu zren nen zrí'ine' lawe' da quebe gaca cheę zri'ine nu'ula nada'u sibe' da dxal-la' si' zri'ine nu'ula quebe nada'u. <sup>31</sup> Ca' naca na, bi bícha', quebe nácadxu ca Ismael, zri'ine nu'ula nada'u, san nácadxu ca Isaac, zri'ine zru'ula Abraham, nu'ula quebe nada'u.

### Le sua chuchu lu xel-la weselá

**5** Cristo bselé' dxi'u lu na' da nadxixruj bea na cheę gácadxu ca benne' quebe zaj nada'u. Le sua chuchu lu xel-la weselá da ba guzile, ne québedxa xexú'ule lu na' da na' dxun na le'e benne' zaj nada'u.

<sup>2</sup> Le xene da dxapa' le'e. Neda', Pablo, dxapa' le'e, che güele lataj chugu lu bęla' cheęle da na' dxulé'e na, quebe bi da ba neza gaca cheęle da naca cheę Cristo.

<sup>3</sup> Dxaca lazra' xapa' le'e xecha lasa, che nu benne' chugu lu bęla' cheę' da na' dxulé'e na, dxun na ba xen gun bęnnea' xúgute' da bdxixruj be'e Moisés. <sup>4</sup> Le'e na' dxéquele nagá'anale xrlátaje lau Dios lawe' da nunle ca nadxixruj bea na, ba bcá'anale da naca cheę Cristo, ne dxexebéaj cuínale lu xel-la zri'i lazre' cheę Dios.

<sup>5</sup> Dxi'u, ne cheę Be' Lá'azxa, ne lawe' da dxeajlí lázredxu Cristo, dxuxrén lázredxu nagá'anadxu xrlátaje lau Dios. <sup>6</sup> Che nácadxu tuze nen Cristo, quebe bi da ba neza gaca na cheędxu che chugu lu bęla' cheędxu da na' dxulé'e na, u che quebe chugu na. Da ba neza naca na cheędxu che dxeajlí lázredxu Cristo, na' xel-la dxeajlí lazre' cheędxu dxuzú'a na dxi'u lu xel-la zri'i lazre'.

<sup>7</sup> Da xrlátaje bęnquezele. ¿Nuzra gulú'u xel-la le'e cheę québedxa guzúale dizra' da li? <sup>8</sup> Quegá Dios bęne' da na'. Nácaqueze Lę' Bęnnea' bláwizre' le'e. <sup>9</sup> Quebe gal-la lázrele da dxenná na: Láteze cua xichaj dxuchazra na ca naca cua. <sup>10</sup> Dxuxrén lazra' Xránadxu ca naca cheęle le'e, quebe guzúale chalá'ala da nigá dxuchá'ala'. Dios gudęę' lu da ba xa' bęnnea' dxun zréajene' le'e, núteteze naque'.

<sup>11</sup> Da naca chia', bi bícha', la xapa' neda' bęnneache dxal-la' chugu lu bęla' cheę' da na' dxulé'e na, quegá weláu zi' xuzre benne' judío neda' lawe' da che dxuna' da caní quebe xelaque' tula che cu'a lban cheę xaga bęguaj cheę Cristo. <sup>12</sup> Na'a ca naca cheę benne' ca', benne' dxelún zréajene' le'e, ne dxelenné' dxal-la' chugu lu bęla' cheęle da na' dxulé'e na, dxaca lazra' chugu ca da zaj naca benne' ca' cheę québedxa xelún zréajene' le'e.

<sup>13</sup> Bi bícha'dau', Dios bláwizre' le'e cheę gácale benne' quebe zaj nada'u, ne québedxa xu'ule lu na' da bdxixruj be'e Moisés. Quebe guchínele da nácale cheę gunle ca da dxezá lázrele. Le gun cuínale ca benne' zaj nada'u, cheę gunle zrin cheę le sa' ljęwézrele tule xetule lu xel-la zri'i lazre' cheęle. <sup>14</sup> Xúgute' da nadxixruj bea na dxun bęnnea' dxuzúe' dizra' da na' dxenná na: Bzri'i le sa' ljęwezru' cáteze nazrí'i cuinu'. <sup>15</sup> Che dxunle ca dxelún bę xixre' ca', ne dxun zi' ljęwézrele, ne dxasa ljęwézrele tule xetule, le guxúe ga guzrí'a xi' cuínale.

### Da dxundxu cáteze dxezá lazre' bęla' dxen cheędxu, ne da dxundxu cáteze dxezá lazre' Be' Lá'azxa

<sup>16</sup> Da nigá dxapa' le'e: Le gun cáteze dxulé'e Be' Lá'azxa le'e, na' quebe gunle cáteze dxezá lazre' bęla' dxen cheęle. <sup>17</sup> Da dxezá lazre' bęla' dxen cheędxu dxedíl-lalę na da dxezá lazre' Be' Lá'azxa, na' da dxezá lazre' Be' Lá'azxa dxedíl-lalę na da dxezá lazre' bęla' dxen cheędxu. Dxúpatę da caní dxeledíl-lalę ljęwezre na, na' cheę lę na' quebe gaca gunle da dxaca lázrele gunle. <sup>18</sup> Che dxunle ca da dxulé'e Be' Lá'azxa le'e, québedxa xu'ule lu na' da nadxixruj bea na.

<sup>19</sup> Zaj nulé'e láuqueze da dxelún benne' ca' dxelunę' cáteze da dxezá lazre' bęla' dxen cheę':

Deledálęne' nu'ula xula.  
Dulucá'ana dítaję' le sa' ljęwezre'  
Dxelunę' da sban, ne da schanni'.

<sup>20</sup> Dxelúe szrenę' bedau' xiaj xaga, ne dxelunę' xel-la wazrá'.

Dxelecuídenę' le sa' ljwezre', ne dxeleze'ęe.

Dxelaque' wide', ne dxeleze'á'a xíchaję'.

Dxelennę' cheę ljwezre'.

Dxelebéaj xichaj ljwezre' tuę' xetuę', ne dxelaque' chupa la'a.

<sup>21</sup> Dxelaque' xa lazre', ne dxelutie' benne'.

Dxelezúzrenę', ne dxeledanne' da caleła da dxelunę' lu laní ca'.

Zánete da dxelundxe' bi cheę da caní. Che le na' dxapa' le'e ca bęnqueza' nędxute, benne' dxelunę' da caní quebe xelexúę' naga dxenná bea Dios.

<sup>22</sup> Da dxelún benne' ca' dxelunę' cáteze da dxulé'e Be' Lá'azxa le' zaj naca na caní:

Zaj nazrí'ine' le sa' ljwezre', ne zaj nape' xel-la dxebe.

Dxelebeza zri lazre', ne zaj naque' zren lazre'.

Zaj naque' zri'i lazre', ne dxelunę' da zri'a chawe'.

Zaj naque' li lazre'.

<sup>23</sup> Zaj naque' dxexruj lazre', ne dxelenná be'e cuine'.

Quebe de da nadxiruj bea na da dxę na dxi'u quebe gundxu da caní. <sup>24</sup> Benne' ca' zaj naque' bi cheę Cristo ba buludęę le'e xaga bęguaj beła' dxen cheę' nen xúgutę da dzezá lazre na. <sup>25</sup> Che naca bandxu ne cheę Be' Lá'azxa, dxal-la' gundxu ca da dxulé'e Be' Lá'azxa dxi'u.

<sup>26</sup> Quebe dxal-la' gucá'ana szren cuínadxu, ne quebe gácadxu wide' tudxu xetudxu, ne quebe sua da xa lazre' ládujla dxi'u.

#### Le gácale le sa' ljwézrele tule xetule

**6** Bi bícha'dau', che nu benne' ládujla le'e nunę' dul-la, le'e na' dxedálele Be' Lá'azxa dxal-la' gácalele bęneea' cheę xezę chúchue'. Dخال-la' gácale dxexruj lazre' gunle da nigá cheę quebe güele lataj da xriwe' cu'u xel-la na le'e. <sup>2</sup> Le gácale le sa' ljwézrele tule xetule lu da naca xua cheęle, na' caní gunle ca nadxiruj be'e Cristo.

<sup>3</sup> Che nu benne' dxéquenę' naque' benne' blau, ne quebe nu naque', dxezi xęzqueze cuine'. <sup>4</sup> Tu tu benne' dxal-la' na' xánnie' da dxúnqueze', na' che nagá'ana xrlátaje da dxunę', waca xape' ba lá'ana da dxúnqueze', ne quegá da bęn xetú benne'. <sup>5</sup> De tu xua da nabá-gadxu cheę Cristo, da dxal-la' gua tu tu benne'.

<sup>6</sup> Benne' zua nu dxusede le' ca naca xrtizra Dios dxal-la' gunęzruje' late' da naca cheę' cheę bęneea'.

<sup>7</sup> Quebe si xę cuínale: Netú benne' gaca quítajlenę' Dios. Da dxaza bęneache, léqueze na xelape'. <sup>8</sup> Che dxunę' da dzezá lazre' beła' dxen cheę', da xezię naca na xel-la gute, na' che dxunę' da dzezá lazre' Be' Lá'azxa, da xezię naca na xel-la nabán zeajlí canna.

<sup>9</sup> Ca' nacan xca', quebe gusandxu gundxu da xrlátaje lawe' da che quebe gate lazrdxu, lu zra na' quizruj Dios dxi'u, na' xezidxu lazruj cheędxu. <sup>10</sup> Cheę le na', gate nazidxu lataj, dxal-la' gundxu da xrlátaje cheę le sa' ljwézredxu, ne da dxundxa na ba xen, gundxu da xrlátaje cheę le sa' ljwézredxu dxeleajlí lazre' Cristo.

#### Da bzuaj Pablo nen ná'queze'

<sup>11</sup> Le nna'xque cadite da zri'a naca da nigá dxuzúaja' cheęle nen ná'queza'. <sup>12</sup> Benne' ca' dxelaca lazre' chugu lu beła' cheęle da na' dxulé'e na, dxelunę' na cheę xelexegá'ane' chawe' lau bęneache, ne cheę quebe xeláu zi' xuzre' le' lawe' da dxuluchálaje' dizra' cheę da bęn Cristo le'e xaga bęguaj. <sup>13</sup> Benne' caní, benne' zaj nadxugu lu beła' cheę' da na' dxulé'e na quebe dxelunę' xúgutę ca da nadxiruj bea na. Dxelaca lazre' chugu lu beła' cheęle da na' dxulé'e na cheę gaca xulucá'ana szren cuine' ca naca da belunę' cheęle.

<sup>14</sup> Quebe dxaca lazra' xucá'ana szren cuina' cheę tu da bęna', san tuze cheę da bęn Xránadxu Jesucristo le'e xaga bęguaj. Ne cheę le' naca xęzr la xu nigá ca tu da gate chia' neda', na' neda' naca' ca tu benne' gate. Québedxa dzezá lazra' da naca cheę xęzr la xu. <sup>15</sup> Che nácadxu tuze nen Cristo, quebe bi da ba neza gaca na cheędxu che nadxugu lu beła' cheędxu da na' dxulé'e na, u che quebe nadxugu na. Da ba neza naca na cheędxu che nácadxu benne' cube lu xichaj lázr-daudxu. <sup>16</sup> Dxenaba' lau Dios gunęzruje' xel-la dxebeza zri lazre' cheę xúgutę benne' ca' zaj naque' benne' cube caní, ne xexache lazre' benne' ca' da li zaj naque' bi cheę'.

<sup>17</sup> Lawe' da zaj zria lu beł-la' dxen chia' xizra' da dxululé'e na naca' wen zrin cheę Cristo quebe nu benne' dxal-la' gulálenę' neda' na'a, ne lu da za za'.

<sup>18</sup> Le'e, bi bícha'dau', dxenaba' lau Xránadxu Jesucristo gunę' chawe' cheę xúgutęle. Ca'an gaca na.

# Efesios

Pablo dxugape' diuzre bi chee Cristo zaj zre'e xezre Efeso

**1** Neda', Pablo, naca' gubáz chee Jesucristo lawe' da guca lazre' Dios gaca' caní. Dxuzúaja' da nigá chee le'e, nácale bi chee Dios, ne dxeajlí lázrele Jesucristo, na' zrale xezre Éfeso. <sup>2</sup> Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'.

Ca naca da chawe' da dxezi' lu nnadxu ne chee Cristo

<sup>3</sup> Dxue lá'anadxu Dios, Xra Xránadxu Jesucristo lawe' da ba bene' cheedxu ca naca xúgutę da chawe' chee Be' Lá'azxa da zá'aca xabáa lawe' da nácadxu bi chee Cristo. <sup>4</sup> Dios guquęę dxi'u chee gácadxu bi chee Cristo gate quebe ne guntę' xezr la xu, chee gácadxu benne' lá'azxa, ne du lazre' lau Le'. <sup>5</sup> Lawe' da bzri'ine' dxi'u, bene' cheedxu gate nate si' lu ne'e dxi'u ca bi cheequeze' ne chee Jesucristo, cáteze da guca lazre' gunę'. <sup>6</sup> Chee le na', tu dxue lá'anazquezdxu Dios ne chee xel-la xrlátaje chee' da naca na szrentę. Lu xel-la xrlátaje chee' na' gúcaleņę dxi'u lawe' da nácadxu tuze nen Zrí'ine', bi nazri'ite lazre'. <sup>7</sup> Ne chee Zrí'ine' na' naxáawene' dxi'u nen dxen cheequeze', na' lu xel-la zri'i lazre' zren chee' bnite lawe' cheedxu dxi'u ca naca dul-la da nabágadxu. <sup>8</sup> Dios nazrí'ile'ęne' dxi'u, ne dxunne' dxi'u xel-la sina, ne xel-la dxéajni'i, <sup>9</sup> na' bzéajni'ine' dxi'u ca naca da dxaca lazre' da bgache na, da na' lu xel-la zri'i lazre' chee' ba núnqueze' gunę' ne chee Cristo. <sup>10</sup> Nuchague' xúgutę da zaj zua na xabáa, ne xezr la xu, chee xelú'u na lu na' Cristo, da gusexúze' gunę' gate zrin zra chee na.

<sup>11</sup> Ne chee Cristo Dios guquęę dxi'u chee' gate nate, chee si' lu nnadxu da xáladxu da gunna Le', ca da ba núnqueze Dios, Bénnea' dxunę' xúgutę da dxeque Le' xrlátaje. <sup>12</sup> Caní bene' chee gácadxu tu da gucá'ana szren na xel-la szren chee', nácadxu dxi'u benne' nedxu dxebeza lázredxu Cristo. <sup>13</sup> Cá'anqueze le'e, gate benle dizra' li, da naca na dizra' chawe' chee da ben Cristo, bselé' le'e. Guxeajlí lázrele Le', na' Dios bzuę' Be' Lá'azxa lu xichaj lázrdaule ca tu da dxunna bea na nácale bi chee', ca guchebe lazre' gunę'. <sup>14</sup> Be' Lá'azxa na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi chee' ca', chee güe lá'anaquezdxu Le' ca naca xel-la szren chee'.

Dxenaba Pablo gunezruj Dios xel-la sina chee bi ca' chee Cristo

<sup>15</sup> Chee le na' gate benda' ca dxeajlí lázrele Cristo, ne ca nazri'ile xúgutę bi ca' chee Dios, <sup>16</sup> dxápaqueza' Dios; Xcalenu', ca naca chee le'e gate dxuchálajle'na' Dios, ne dxeajsá lázrqueza' le'e. <sup>17</sup> Dxenaba' Dios chee Xránadxu Jesucristo, naque' Xradxu zuę' xabáa, gunne' le'e xel-la sina lu be' nácaquezle da gulé'e na le'e gúnbea xánnele Le'. <sup>18</sup> Dxenaba' lau Dios guzéajni'ine' xichaj lázrdaule le'e chee nézele ca naca da dxebeza lázredxu da bláwizre' dxi'u sidxu, ne ca naca xel-la gunní'a chee xel-la szren da gunezruj Dios bi chee ca', <sup>19</sup> ne ca naca xel-la waca zrentę chee' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu dutę xel-la dxenná bea zren chee' <sup>20</sup> gate bsebanę' Cristo ládujla benne' gate ca', ne guleche' Le' chalá'a xabęla chee' xabáa, <sup>21</sup> ne bzuę' Le' chee nna bé'ene' xúgutę benne' blau xabáa, ne xúgutę benne' dxelenná bea xabáa, ne xúgutę benne' zaj napa xel-la waca, ne xúgutę benne' zaj naca xrane, ne xúgutę da dxelenná bea na lu zra na'a zra, ne lu da za za'. <sup>22</sup> Bzuę' xúgutę da zaj zua lu na' Cristo, ne bzuę' Le' gaque' benne' xichaję chee bi chee ca' ca naca xúgutę da dxelunę'. <sup>23</sup> Benne' caní zaj naque' ca be'la' dxen chee Cristo, da dxulé'e na dutę ca nácaqueze Le', Bénnea' dxusexuzre' dxucá'ana chawe' ca naca xúgutę da zaj zua.

Naca bandxu lawe' da nazrí'i Dios dxi'u

**2** Gate nate gúcale ca benne' gate lu xichaj lázrdaule ne chee da cale'la ca', ne dul-la ca' <sup>2</sup> da benle gate ne dxunle ca dxelún benneache zaj zre'e xezr la xu nigá, benne' dxelunę' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzúę' dizra' chee Dios.

<sup>3</sup> Cá'anqueze dxi'u, xúgutędxu bendxu caní gate nate, gate bendxu cáteze da guzá lázredxu, ne bendxu ca da gunná be'la' dxen cheedxu, ne ca da gunná xichaj lázrdaudxu. Chee le na' guca na cheedxu sidxu da zi' da xa' chee Dios ca gunę' chee xezícadxa benne' ca', <sup>4</sup> san Dios bexache lázrele'e dxi'u, ne bzri'ile'ęne' dxi'u, <sup>5</sup> na' benne' dxi'u xel-la nabán tu zren nen Cristo gate ne nátedxu lu xichaj lázrdaudxu ne chee dul-la da nabágadxu. Naladxu ne chee xel-la xrlátaje chee Dios.

<sup>6</sup> Cá'anqueze bsebán Dios dxi'u tu zren nen Jesucristo, ne guleche' dxi'u tu zren nen Le' xabáa. <sup>7</sup> Bene' caní chee gulé'ene' lu zra da za za' ca nazrí'ile'ęne' dxi'u, ne

ca naca da cháwele'e beñe' cheedxu ne chee Jesu-cristo. <sup>8</sup> Lu xel-la xrlátaje chee Dios bselé' le'e lawe' da guxeajlí lázrele Cristo. Quebe naca na ne chee bi da beñle le'e, san naca na tu da beñ Dios cá'aze ne chee. <sup>9</sup> Quebe nalá nu benne' ne chee bi da dxúnqueze', chee quebe nu benne' gucá'ana szren cuine'. <sup>10</sup> Dios beñe' dxi'u, na' bexune' dxi'u tuze nen Jesucristo chee gundxu da xrlátaje ca' da ba nun Le' gundxu gate nate.

### Nácadxu tuze ne chee Cristo

<sup>11</sup> Le gusá lázrele ca gúcale le'e gate nate. Quebe nácale benne' judío, benne' ca' dxelechugue' lu beł-la' dx-en chee' da na' dxulé'e na zaj nababe' chee Dios, ne zaj nazí le' benne' zaj nadxugu, na' dxelenné' chee nácale benne' quebe zaj nadxugu. <sup>12</sup> Lu zra ca' quebe guzúale Cristo le'e. Quebe beñle tuze benne' Israel ca', ne quebe bēnbeale ca naca xel-la wezría da beñ Dios, ne ca naca da guchebe lazre' Dios. Guzúale lu xezr la xu nigá, ne quebe bi guleza lázrele, ne quebe bēnbeale Dios. Gate nate guzrale zítu'la naga zua Dios. <sup>13</sup> Na'a ne chee Cristo Dios ba bzué' le'e gágute lawe' da gute Cristo waláz chee. <sup>14</sup> Léqueze Cristo beñe' dxi'u xel-la dxebeza zri lazre', ne bexune' dxi'u tuze, ne-tu', benne' judío ca', ne le'e, benne' quebe zaj naque' judío, ne bzria xi'e xel-la dxezrá'a da beñ na dxi'u chupa la'a, da guca na ca tu ze'e. <sup>15</sup> Gate gute Jesús waláz cheedxu guchugue' da nadxiruj bea na da naca na da gunná Dios gundxu, ne da ca' dxelenná bea na, na' bexune' dxúpatē xezre ca' tuze xezre cube da nababa na chee'. Caní gudíxruje' xel-la dxebeza zri lazre' cheedxu. <sup>16</sup> Caní guca ne chee xel-la gute chee Cristo le'e xaga béguaj, guchugue' naze xel-la dxezrá'a ljwezre chee dxúpatē xezr ca', na' bexune' dxúpatē tuze beł-la' dxen, ne bexune' le' tuze nen Dios.

<sup>17</sup> Bla' Cristo, ne bzenne' le'e dizra' chawe' chee', le'e quebe nácale judío, na' guzrale zitu' naga zua Dios, ne le'e nácale judío, na' guzrale gagu naga zua Dios, <sup>18</sup> na' ne chee Cristo, xúgute' dxu, benne' judío ca', ne benne' quebe zaj naque' judío, dxebígadxu lau Xradxu Dios ne chee Be' Lá'azxa. <sup>19</sup> Chee le' na' le'e, benne' quebe nácale judío, québedxa nácale ca benne' zitu' tu lu xezr la xu da quebe naca na chee, san nácale benne' walazre' ca xúgute' benne' ca' zaj nababa chee Dios. Nabábale Zri'ine Dios. <sup>20</sup> Nácale ca tu xu'u zren da zria na lawe' lane da gulixruj benne' gubáz ca' chee Cristo, ne benne' ca' buluchálaje' waláz chee Dios, na' Jesucristo nácaqueze' xiaj blau chee lane xu'u na'. <sup>21</sup> Lawe' lane nigá da naca Cristo, dutē xu'u na' dxegula na tu li chee gaca na tu xudau' lá'azxa chee Xránadxu. <sup>22</sup> Cá'anqueze le'e, lawe' da nácale Cristo tuze, xu'ule lu xu'u na' naga zua Dios ne chee Be' Lá'azxa chee'.

**Pablo dxuzenne' benne' quebe zaj naque' judío dizra' chawe'**

**3** Chee le' na' neda', Pablo, dxuzú zriba' lau Dios. Xu'a lizre xia lawe' da dxuna' zrin chee Jesucristo

chee gaca chawe' chee le'e, quebe nácale judío. <sup>2</sup> Ba nézele ca beñ Dios lu xel-la xrlátaje chee', bsebage' neda' guchálaje' dizra' chawe' chee Cristo ládujla le'e. <sup>3</sup> Lu da ble'e Dios neda' bzéajni'ine' neda' tu da nagache chee' ca da bzuaja' chee nedxu. <sup>4</sup> Gate gulábale na weque bé'equezele núnbe'a da nagache ca naca chee Cristo. <sup>5</sup> Guca na tu da nagache gate nate. Dios quebe bzéajni'ine' na bēneache, san na'a ne chee Be' Lá'azxa chee' ba bléene' na benne' gubáz lá'azxa ca', na' benne' ca' dxuluchálaje' waláz chee'. <sup>6</sup> Caní naca da nagache na': Ne chee dizra' chawe' chee Cristo benne' quebe zaj naque' judío welezí'queze' da gunezruj Dios le' ca da xelezí' benne' judío ca', ne zaj naque' tuze beł-la' dxen, ne xelezí'queze' tu zren da nachēbe lazre' Dios ne chee Jesucristo.

<sup>7</sup> Dios beñe' neda' wēn zrin chee dizra' chawe' na' ne chee tu da bēnnaze' neda', bchínene' xel-la waca zren chee'. <sup>8</sup> Neda' nácadxa' benne' baxáche ca xúgute' benne' zaj naca bi chee Dios. Beñe' neda' tu culuén zren chee guzenda' benne' quebe zaj naque' judío dizra' chawe' ca naca xel-la gunní'a zrentē chee Cristo. <sup>9</sup> Bsebage' neda' guzéajni'ida' xúgute' bēneache ca da nun Dios gune' da bgache gate nate, na' naca Dios Bēne' beñe' xúgute' da zaj zua, <sup>10</sup> chee xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrentē chee Dios. Xelúnbe'e na ne chee benne' ca' zaj naca bi chee Cristo. <sup>11</sup> Da nigá beñ Dios ca da nunē' gate nate gusexuzre' ne chee Xránadxu Jesucristo. <sup>12</sup> Ne chee Cristo waca bígadxu lau Dios du lázredxu, ne dutē xel-la dxuxrén lazre' cheedxu lawe' da dxeajlí lázredxu Le'. <sup>13</sup> Chee le' na' dx-ata' xúeda' le'e quebe gate ni'a na'le lawe' da dxedéa' xel-la zi' ne chee le'e. Xel-la zi' da dxedéa' neda' gaca na chee tu da ba neza.

### Xel-la zri'i lazre' chee Cristo

<sup>14</sup> Chee le' na' dxuzú zriba' lau Xra Xránadxu Jesucristo, <sup>15</sup> Bēne' dxuzúe' la cha chee benne' zaj zre'e xabáa, ne xezr la xu. <sup>16</sup> Dxenaba' lau Xradxu, ca naca xel-la gunní'a zrentē chee' guzē tipe' le'e nen xel-la waca chee' lu xichaj lázrdaule ne chee Be' Lá'azxa chee', <sup>17</sup> chee sua Cristo lázrdaule ne chee xel-la dxeajlí lazre' chee, ne se cháchale lu xel-la zri'i lazre', ca tu xaga da nudé lue na sítujla, <sup>18</sup> chee seque' chéajni'ile tu zren nen xúgute' bi chee' ca nazriluj, ne ca natunna, ne ca nasituj, ne ca nasibe xel-la zri'i lazre' chee Cristo. <sup>19</sup> Dxenaba' lau Dios gúnbeale xel-la zri'i lazre' na', lálcala ca-bata' séquedxu gúnbeadxu dutē ca naca na. Caní dx-enaba' Le' chee suale' le'e dutē da nácaqueze Dios.

<sup>20</sup> Na'a, gaca báqueze Dios, Bēne' nape' xel-la waca gúnle'equeze' da zrendxa ca da dxenábaxu, u ca da dxéquedxu, ne chee xel-la waca chee' da dxun na zrin lu xichaj lázrdaudxu. <sup>21</sup> Gaca ba Dios ládujla benne' zaj naque' bi chee Cristo ne chee Jesucristo xúgute' iza chadía chacanna. ¡Ca'an gaca na!

## Nácadxu tuze ne chee Be' Lá'azxa

4 Chee le na' dxata' xúeda' le'e, neda', xu'a lizre xia lawe' da dxuna' zrin chee Xránadxu, chee gunle da xrlátaje ca dxal-la' xelún bènneache ba gucá'a Dios le', ca gucá'aqueze' le'e. <sup>2</sup> Le gaca dxexruj lazre', ne zri'i lazre'. Le cueza lazre', ne le cue' gunne xue chee tule xetule lu xel-la zri'i lazre' chee. <sup>3</sup> Le gun ba xuzre gácaquezle tuze, guchínele xel-la waca chee Be' Lá'azxa lu xel-la dxebeza zri lazre' da na' dxun na le'e tuze.

<sup>4</sup> Tuze naca belá' dxen chee Cristo da nácadxu. Tuze naca Be' Lá'azxa, Nu na' zúalene' tu tudxu. Tuze da dxuxrén lázredxu, da na' sidxu lu na' Dios.

<sup>5</sup> Tuze Bénnea' naque' Xránadxu.

Tuze da dxeajlí lázredxu.

Tuze ca dxedxúadxu nisa.

<sup>6</sup> Tuze Bénnea' naque' Dios, ne Xra xúgutędxu.

Le' naque' Benne' xíchaję xúgutędxu.

Dxulé'e cuine' lu da dxundxu xúgutędxu.

Zúaqueze' lu xichaj lázrdau xúgutędxu.

<sup>7</sup> Tu tudxu nasidxu tu xel-la waca cha cheędxu ca da nunna Cristo dxi'u.

<sup>8</sup> Naca na ca naxúaj na lu dizra' lá'azxa, dxenná na: Begüene' xabáa, gate gudé bzétaje' benne' guledábague' Le'.

Na' bnézruje' bènneache xel-la waca ca'.

<sup>9</sup> ¿Bi zéaję na, dxenná na: Begüene'? Zéaję na nédxu-la bétaje' lu xęzr la xu nigá. <sup>10</sup> Bénnea' bétaje' nácaqueze' Bénnea' begüene' lu da blaudxa lu xabáa chee gaca bea na xu'u lu ne'e xúgutę da de, <sup>11</sup> na' benne' cha cheędxu xel-la waca chee:

Gaca bál-ladxu benne' gubáz chee'.

Gaca guzendxu xezícadxu bènneache dizra' chawe' chee'.

Gácadxu xezícadxu benne' dxuxúedxu bi chee' ca'.

Na' gusédedxu-be' xezícadxu.

<sup>12</sup> Ca'an bęne' chee bpa'adxę' bi chee' ca' chee xelunbe' zrin xulucá'anabe' xrlátaje bènneache ca' zaj naque' zruza ni'a na' Cristo:

<sup>13</sup> Chee gácadxu tuze ca dxéajlędxu,

ne ca núnbeadxu Zri'ine Dios,

chee gácadxu benne' du lazre',

chee gácadxu cáteze nácaqueze Cristo.

<sup>14</sup> Caní nacan chee québedxa gácadxu ca bidu ca', bi ca' dxelezibe' bíteteze dizra' da zaj naca na ca tu be' da zeaj na nila na'la, ne québedxa güedxu lataj xelún zréaje benne' węn da zrinnaj ca' dxi'u, chee quebe xelezí xęę dxi'u chee gundxu da calela. <sup>15</sup> Lu xel-la zri'i lazre' dxal-la' guchálajdxu da li chee gácadxu cáteze nácaqueze Cristo, Bénnea' naque' xichaj bel-la' dxen da nácadxu dxi'u. <sup>16</sup> Le' dxune' tuze xúgutę ni'a na' zaj zria bel-la' dxen chee' chee gaca na tu bel-la' dxen nazá'ate chee na, ne chee xelún zrin xúgutę ni'a na' ca' chee gula bel-la' dxen na', ne gaca na chawe' lu xel-la zri'i lazre'.

## Xel-la nabán cube da dxunna Cristo dxi'u

<sup>17</sup> Da nigá dxapa' le'e, ne dxusebaga' le'e waláz chee Xránadxu chee québedxa gunle ca dxelún bènneache quebe zaj núnbe'e Dios, benne' ca' dxelune' cáteze dx-eléquene' xrlátaje, <sup>18</sup> benne' ca' zaj nachul-la xichaj lázrdawe'. Benne' caní quebe zaj nape' xel-la nabán li lazre' da dxunna Dios bènneache:

Zaj nachul-la nanítene', ne zaj naca zide' lázrdawe'.

<sup>19</sup> Québedxa dxelexedué'ene'.

Belezanne cuine' dxelune' da schanni'.

Du lazre' dxelune' xúgutę da sban.

<sup>20</sup> Quegá caní nazédele le'e chee Cristo, <sup>21</sup> che da li xca' bènnele da dxuchalaj Le', ne nusédenę' le'e ca naca da li da zúalę Jesús. <sup>22</sup> Ca naca da bęnle nédxula, le guzúa chalá'ala da gúcale lawe' da guzrinnajle lu da sban da guzá lázrele.

<sup>23</sup> Dخال-la' gácale benne' cube lu xichaj lázrdau.

<sup>24</sup> Dخال-la' gunle da naca chee benne' cube na' da bęn Dios le'e

chee gunle da naca na xlátaje, ne da li da naca na lá'azxa.

<sup>25</sup> Chee le na' québedxa gun lázrele.

Le nęę da li tule xetule lawe' da nácadxu ni'a na' tuze bel-la' dxen chee Cristo.

<sup>26</sup> Che dxezrá'ale, quebe dxal-la' gunle dul-la, ne quebe zrá'ale scha'.

<sup>27</sup> Quebe güele da xriwe' lataj guchixre chee na le'e.

<sup>28</sup> Bénnea' guque' gubán québedxa dxal-la' cuane'.

Dخال-la' gunę' tu zrin chawe' nen ni'a ná'queze' chee gape' da gunézruje' benne' dxelexázrjene'.

<sup>29</sup> Quebe nęęle dizra' calela. Le guchalaj da naca na xrlátaje chee xelezé tipa benne' xelennę', ne xelezíę na ba neza. <sup>30</sup> Quebe guzúa xáchele Be' Lá'azxa chee Dios, lawe' da zúalę Be' le'e chee gaca bea na nácale bi chee Dios ca zrindxa zra xezí' lu ne'e dxi'u.

<sup>31</sup> Le guzúa chalá'ala:

Xel-la dxeuide', ne xel-la dxezrá'a, ne xel-la xichaj zra'a,

ne xel-la wetil-la dizra', ne xel-la wechacha, ne xúgutę da zrinnaj.

<sup>32</sup> Dخال-la' gácale du lazre', ne xache lázrele tule xetule,

ne gunite laule chee tule xetule ca bęn Dios,

bnite lawę' chee le'e lawe' da nácale bi chee Cristo.

## Ca dxal-la' xelaca bi ca' chee Dios

5 Lawe' da nácale bi cheequeze Dios, bi nazri'ine', le gun ba xuzre gácale cáteze nácaqueze Le'. <sup>2</sup> Le zri'i le sa' ljwézrele tule xetule cáteze bęn Cristo, bzri'ine' dxi'u, ne bzanne cuine' waláz cheędxu ca tu zríla'dau', béadu dxelute benne' lau Dios chee xedúa xtul-le'. Gate gute Cristo le'e xaga béguaj, guca ca tu da dxelá zixre lau Dios da dxelegú'u bènneache lau Le'.

<sup>3</sup> Lawe' da nácale bi chee Dios, québedxa dxal-la' guchálajle chee da dxucá'ana ditaj na bènneache, ne chee da sban ca', ne chee xel-la wecude' da de.

<sup>4</sup> Quebe guchálajle dizra' schanni', ne dizra' bize, ne dizra' calęla, da quebe dxulucá'ana na chawe' bėnneache, san dxal-la' xėquezle Dios: "Xcalenu'." <sup>5</sup> Ba nėzquezle quebe chu'u naga dxenná bea Cristo nen Dios netú benne' dxucá'ana dítaję bėnneache, u tu benne' dxunę' da sban, u tu benne' dxucúdię' da de, da naca na ca dxucá'ana szrenę' bedau' xiaj xaga.

<sup>6</sup> Quebe güele lataj nu si xę le'e nen dizra' xala, lawe' da nę cheę da nigá dxesel-la Dios da dxusaca zi na benne' ca' quebe dxuluzúę' dizra' cheę'. <sup>7</sup> Quebe gunle tu zren benne' dxelunę' da caní.

<sup>8</sup> Nėdxutę guzúale lu da chul-la, na' na'a zrágale xel-la naxaní' lawe' da nácale bi cheę Xránadxu. Cheę le na', le gun da naca na cheę xel-la naxaní', <sup>9</sup> da na' naca xel-la dxucá'ana chawe' lįwėzredxu, ne da xlátaję, ne da li. <sup>10</sup> Le gun zi' lázrele nėzele gunle da dxezaca ba lazre' Xránadxu. <sup>11</sup> Quebe gunle tu zren benne' dxelunę' da calęla, da ca' naca cheę da chul-la, san le til-la da ca' <sup>12</sup> lawe' da naca na tu da xeduédxu guchálajzedxu cheę da dxelún benne' ca' bagácheze. <sup>13</sup> Gate dxeledxúaj da caní lu da chul-la, ne zaj xu'u na lu xel-la naxaní', gulé'e lawe' ca zaj naca xúgutę da caní, lawe' da dxulé'e lawe' xel-la naxaní' xúgutę. <sup>14</sup> Ca naca da caní dxenná na:

Bebán, lue' dxásiu'.

Bexasa ládujla benne' gate,  
na' gusení' Cristo lu xichaj lazra'u.

<sup>15</sup> Cheę le na', le guxúe xanne' ca da dxunle. Quebe gunle ca dxelún benne' zaj nachul-la nanítene', san le gun ca dxelún benne' zaj naxėjni'ine'. <sup>16</sup> Le guchine chawe' zra caní lawe' da dxácaleę da zrinnaj lu zra na'a zra. <sup>17</sup> Quebe gácale benne' xala, san le gun zi' lázrele chėjni'ile da dxaca lazre' Xránadxu gundxu. <sup>18</sup> Quebe súzele, da na' dxuxrinnaj na bėnneache, san du lázrele le si' Be' Lá'azxa. <sup>19</sup> Le guchálajle le sa' lįwėzrele tule xetule nen Salmo ca', ne nen da dxúl-lale, ne nen da du dxúl-lale da dxunna Be' Lá'azxa le'e. Du lázrele le gul-la, ne le güe lá'ana Xránadxu. <sup>20</sup> Le xėqueze Xradxu Dios: "Xcalenu'", cheę xúgutę lu La Xránadxu Jesu-cristo.

#### Ca dxal-la' xelún bi cheę Cristo nen lįwėzrebe'

<sup>21</sup> Le gaca dxexruj lazre' tule xetule, ne le gapa ba lá'ana Dios.

<sup>22</sup> Nu'ula dxal-la' gaquę' dxexruj lazre' lau benne' cheę', cáteze dxal-la' gaquę' lau Xránadxu, <sup>23</sup> lawe' da naca benne' biu xíchaję cheę zru'ule', cáteze naca Cristo xíchaję cheę bi cheę' ca'. Cristo naquę' Benne' weselá cheę bi cheę' ca', bi zaj naca bę' ca bę-la' dxen cheęqueze'. <sup>24</sup> Cáteze zaj naca dxexruj lazre' bi cheę' ca' lau Cristo, cá'anqueze nu'ula dxal-la' gaquę' dxexruj lazre' lau benne' cheę' lu xúgutę.

<sup>25</sup> Benne' biu dxal-la' zrí'ine' zru'ule' cáteze bęn Cristo, bzri'ine' bi cheę' ca', ne bzánene' xel-la nabán cheę' nę cheębe'. <sup>26</sup> Caní bęne' cheę bebėję'-be' cheęqueze', ne bęn chi'e-be' nę cheę dizra' cheę', da guca na ca dxun benne' dxexibe' bi cheę' nen nisa, <sup>27</sup> cheę guzúe'-be' lau Lę', xelácabe' bi xabáa, ne quebe

bi da sban zaj nápabe', ne netú da zrinnaj, ne netú da naca na ca da ca', san xelácabe' lá'azxa, ne du lazre'.

<sup>28</sup> Cá'anqueze benne' biu dxal-la' zrí'ine' zru'ule' cáteze nazri'ine' bęl-la' dxen cheęqueze'. Benne' nazri'ine' zru'ule' nazrí'i cuine'. <sup>29</sup> Netú benne' quebe dxecuídene' bęl-la' dxen cheęqueze', san dxugawę' na, ne dxuxúe' na, ca dxúnqueze Cristo cheę bi cheę' ca' <sup>30</sup> lawe' da zaj nácabe' ca bęl-la' dxen cheęqueze', na' dxi'u nácadxu ca ni'a na' bęl-la' dxen cheę', ne nácadxu ca bęla' dxen cheę', ne zrita cheę'. <sup>31</sup> Cheę le na' tu benne' biu dxal-la' gusanę' xra xrnę'e cheę gaquę' tuze nen zru'ule', na' dxúpatę' xelaquę' ca tuze benne'. <sup>32</sup> Da nigá naca na tu da zren da nagache, na' dxennía' da caní ca naca cheę Cristo nen bi cheę' ca'. <sup>33</sup> Cá'anqueze tu tule le'e dxal-la' zrí'ile zru'ulale cáteze nazrí'i cuínale, na' nu'ula dxal-la' gape' ba lá'ana benne' cheę'.

**6** Le'e, bi cuide', lawe' da nácale bi cheę Xránadxu, dxal-la' guzúale dizra' xruze xrna cheęle, da naca na xlátaję. <sup>2</sup> Da nadxixruj bea nedxu da zraga na tu da guchębe lazre' Dios naca na da dxenná na: Gudapa ba lá'ana xra xrna'u, <sup>3</sup> cheę gaca chawe' chiu', ne cheę su' scha' lu xęzr la xu.

<sup>4</sup> Le'e, xruze xrna', quebe guchá'ale zrí'inele. Le gusegula-be' lu xel-la dxenná bea cheę Xránadxu, ne le gusina-be' da naca cheę Lę'.

<sup>5</sup> Le'e, benne' nada'u, le guzúa dizra' cheę benne' zaj naquę' xránale lu xęzr la xu nigá, ne le gapa le' ba lá'ana, ne le zrebe le', ne du lázrele le gaca cheę', cáteze dxuzúale dizra' cheę Cristo. <sup>6</sup> Le gun zrin cheę xránale ca', quegaze gate dxelenná'te' le'e, ca dxelún benne' ca' dxelaca lazre' xelezaca ba lazre' bėnneache cheę'. Le gun zrin na' cáteze dxunle zrin cheę Cristo, gunle du lázrele da dxaca lazre' Dios. <sup>7</sup> Le gun zrin cheę xránale du lázrele, cáteze dxunle zrin cheę Xránadxu, ne quegaze cheę bėnneache. <sup>8</sup> Ba nėzquezle tu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaję da nunę'.

<sup>9</sup> Le'e, xrana benne' ca', cá'anqueze le gun le'e nen benne' węn zrin cheęle ca', ne quebe guzálajle le' lawe' da nėzele zua Bėnnea' xabáa naquę' Xrana benne' ca', ne Xránale le'e, na' Lę' quebe dxebėję' cha cheę bėnneache.

#### Zra lana bi cheę Cristo da dxácale lębe' lu wedil-la

<sup>10</sup> Na'a, bi bícha'dau', le gaca chuchu nę cheę Xránadxu nen xel-la wala zren cheę'. <sup>11</sup> Le gaca ca benne' zjaquę' wedil-la zaj nácuę' zra lanę' xia da na' dxunna Dios le'e, cheę gaca sę chúchule lau xúgutę da dxuzę da xriwę' laule cheę si xę na le'e. <sup>12</sup> Quegá dxedíl-lalędxu bėnneache zaj naquę' bęla' dxen. Dxedíl-lalędxu xel-la dxenná bea cheę da xriwę' da dxeledá na lu be', ne dxedíl-lalędxu be' xriwę' ca', da dxelenná bea na, ne be' xriwę' ca' dxę na lįwėzre ca' da xelún na, ne be' xriwę' ca' xu'u lu na' na xęzr la xu chul-la nigá. <sup>13</sup> Cheę le na', le gaca ca benne' zjaquę' wedil-la zaj nacuę' zra lanę' xia da dxunna Dios le'e, cheę séquele súale wedil-la lu zra che da xriwę', na' ca te na' xegá'ana chúchule. <sup>14</sup> Le sę chuchu xca', sualę le'e da li



ca tu bazxu da nacá'a na lęęle, ne suale le'e da xlátaje ca tu xia da da' lachu'le. <sup>15</sup> Le gaca sina cheę guchálajle dizra' chawe' cheę xel-la dxebeza zri lazre', da gaca na cheęle ca tu cue' zréle. <sup>16</sup> Da dxun na ba xen, le gapa xel-la dxeajlí lazre', da gaca na cheęle ca tu da xegapa na, da xusula na xúgutę da zaj nalá na zaj zua na xi' da dxuzala da xriwe'. <sup>17</sup> Xel-la weselá gaca na cheęle ca tu lapa xia da gucache xíchajle, na' xrtizra Dios gaca na cheęle ca tu xia da gunna Be' Lá'azxa le'e. <sup>18</sup> Gate ne dxunle da caní dxal-la' guchálajlele Dios, gata' xúele, ne ná bale lau Lę' ne cheę Be' Lá'azxa. Cheę gaca gunle da caní dxal-la' súale ban lazre', ne quebe gate ni'a na'le, na' ná bale Dios cheę gácalęne' xúgutę bi cheę ca'. <sup>19</sup> Cá'anqueze le naba Lę' waláz chia' neda' cheę gunęe' neda' dizra' da guchálaja', cheę xazrda' guzen-da' bęneache dizra' chawe' cheę'. <sup>20</sup> Dios beņe' neda'

gubáz cheę dizra' chawe' cheę', na' cheę lę na' xu'a lizre xia na'a. Le naba Lę' gácalęne' neda' cheę xazrda' guchálaja' dizra' chawe' cheę' ca dxal-la' guna'.

#### Pablo dxugape' diuzre le sa' ljwezre'

<sup>21</sup> Tíquico, bi bíchedxu nazri'ite lazrdxu, bi li lazre' lu zrin cheę Xránadxu, guzenbe' le'e da dxaca chia' nigá, ne da dxuna'. <sup>22</sup> Cheę lę na' dxusel-la'-be' lau le'e cheę guzenbe' le'e ca zúantu', ne cheę gutípabe' lázrele.

<sup>23</sup> Dxenaba' lau Xradxu Dios, ne lau Xránadxu Jesu-cristo gunézruje' bi bíchedxu ca' zaj zreęe' na' xel-la dxe-beza zri lazre', ne xel-la zri'i lazre', ne xel-la dxeajlí lazre', <sup>24</sup> na' gunęe' chawe' xúgutę benne' ca' du lazre' zaj nazri'ine' Xránadxu Jesucristo. Ca'an gaca na.

# Filipenses

## Pablo dxugape' diuzre bi bíchedxu ca' zaj zře'ę xezre Filipos

**1** Neda' Pablo, ne Timoteo nácantu' wen zrin cheę Jesucristo. Dxuzúaja' da nigá cheęle le'e, bi bíchentú', ne cheęle le'e, dxuxúele bi cheę Cristo, ne le'e, zaj xu'u lu na'le bi cheę Cristo, ne zrale xezre Filipos. Nabábale cheę Dios, ne nácale tuze nen Jesucristo. <sup>2</sup> Dxenábantu' lau Xradxu Dios, ne lau Xránadxu Jesucristo gunę' cheęle da xrlátaje, ne gunnę' le'e xel-la dxebeza zri lazre'.

### Da dxenaba Pablo gun Dios cheę bi ca' cheę Cristo

<sup>3</sup> Tu tu lasa dxajsá lazra' le'e dxapa' Dios chia': Xcalenu'. <sup>4</sup> Gate dxuchálajęna' Dios, dutę xel-la dxebé dxenábaqueza' bi gun Le' cheę xúgutele le'e. <sup>5</sup> Caní dxuna' lawe' da dxundxu zrin tu zren cheę dizra' chawe' cheę Cristo gate guzú lau núnbe'tu' na bzrintę lu zra na'a zra. <sup>6</sup> Dxuxrén lazra' Dios, Bénnea' guzú lawe' dxunę' tu zrin chawe' lu xichaj lázrdaule le'e, gúnqueze' na ca zrintę zra xelá' Jesucristo. <sup>7</sup> Naca xrlátaje dxéque-da' neda' caní cheę xúgutele le'e, lawe' da nazrí'ile'ęda' le'e, ne dxezidxu tu zren da chawe' ca' dxunna Dios dxi'u. Dxácatę ne xu'a lizre xia nigá, ne gate na' gudíl-lalęna' bėnneache ca' dizra', benne' ca' guledábague' dizra' chawe' cheę Cristo, ba ble'ęda' benne' ca' naca na da li. <sup>8</sup> Dios nézquezene' nazrí'ile'ęda' le'e, lu dutę xel-la zri'i lazre' da dxunna Jesucristo neda'. <sup>9</sup> Dxenaba' lau Dios gunę' zrí'idxa ljwézrele, ne gápale'ęquezle xel-la sina, ne xel-la dxéajni'i lu xúgute da dxunle, <sup>10</sup> cheę nézele cuele da cháwedxa, cheę gácale du lazre', ne quebe bi gata' da gagu na zria cheęle lu zra na' xelá' Cristo. <sup>11</sup> Caní gaca, da ca' dxunle xululé'e na da xrlátaje da dxun Jesucristo lu xichaj lázrdaule, cheę gaca ba lá'ana Dios, ne xegá'ana szrėnqueze'.

### Dxenná Pablo: Che naca bana', Cristo dxuchínene' neda'

<sup>12</sup> Le'e, bi bícha'dau', dxaca lazra' nézele ca da ca' guzraca' gulácale na neda' cheę bchálaja' dizra' chawe' cheę Cristo. <sup>13</sup> Caní guca, xúgute benne' xra'aga xu'u lawe', ne xezícadxa benne' ca' zaj zře'ę xu'u lawe' na' zaj nézene' xu'a lizre xia lawe' da dxuna' zrin cheę Cristo. <sup>14</sup> Lawe' da xu'a neda' lizre xia nigá, chaze xúgute bi bíchedxu ca' dxuluxrén lázredxe' Xránadxu, na' dxuluchálaje' du lazre' dizra' cheę Dios, ne quebe dxelezrebe'.

<sup>15</sup> Da li bal-la benne' ca' dxuluchálaje' ca naca cheę Cristo lawe' da zaj naque' zře'e lazre', ne zaj naque' wil-la dizra'. Xezícadxa benne' caní dxuluchálaje' na dutę xel-la li lazre' cheę'. <sup>16</sup> Benne' nedxu ca' dxuluchálaje' da naca cheę Cristo cheę xulucá'ana szren cuine', ne quegá du lazre', lawe' da dxelaca lazre' súadxa da guzúa na neda' stębe dxácatę xu'a lizre xia nigá.

<sup>17</sup> Xezícadxa benne' ca' dxelunę' na dutę xel-la zri'i lazre' cheę', lawe' da zaj nézene' nuzúa cuina' guzėajni'ida' benne' ca' dxeledábague' dizra' chawe' cheę Cristo. <sup>18</sup> ¿Bizra xca'? Ájatezla dxelunę', che dxuluchálaje' du lazre', u quebe dxuluchálaje' du lazre', dxuluchálaje' cheę Cristo, na' dxebeda', ne wabėquezda'

<sup>19</sup> lawe' da nezda' lu xúgute da caní wedxúaj na chawe' chia' neda', lawe' da dxenábale le'e lau Dios chia' neda', na' gácale Be' Lá'azxa neda', Bénnea' gusel-le' Jesucristo cheędxu. <sup>20</sup> Dxaca lazra', ne dxuxrén lazra' quebe xedu'ęda' neda', séquęda' guchálaja' du lazra' cheę xeledé' bėnneache zúalędxa xel-la szren cheę Cristo neda' na'a, ca zúalęqueze na neda', che gaca bana', u che gatia'. <sup>21</sup> Chia' neda', che naca bana', Cristo dxuchínene' neda', ne che gatia' wazrue'ęda' da cháwedxa. <sup>22</sup> Che xedxúaj na chawe' cheę zrin cheę Xránadxu che naca bana', quebe nezda' bila na ca'a.

<sup>23</sup> Naca na stębe chia' neda' bila da caní ca'a. Dxaca lazra' gatia' cheę cheajsúalęna' Cristo, da gácadxa chawe' chia' neda', <sup>24</sup> san che naca bana' nácadxa chawe' cheęle le'e. <sup>25</sup> Lawe' da nuxrén lazra' naca caní, nezda' wazúalędxa' le'e cheę se cháchadxale lu da naca cheę Cristo, ne cheę bėquezdxale. <sup>26</sup> Cheę le' na' bėdxale lu da naca cheę Cristo ne' chia' neda' gate súalęna' le'e.

<sup>27</sup> Dxun na ba xen gunle da dxuzėajni'i dizra' chawe' cheę Cristo le'e, na' che xedajnná'a le'e, u che sua' zitu', wenda' ze' cháchale, ne nácale tuze, dxunle tu zren zrin cheę Cristo cheę xeleajlí lazre' bėnneache dizra' chawe' cheę'. <sup>28</sup> Quebe zrėbele benne' ca' dxeledábague' le'e. Ca dxunle gulé'e na le' xelebía xi'ę, na' nalale le'e lawe' da bselá Dios le'e. <sup>29</sup> Tu da zrentę naca da dxunna Dios le'e gate gunle zrin cheę Cristo, quegaze chėajlele cheę', na' cá'anneze che tele xel-la zi' ne cheę Le'. <sup>30</sup> Le'e dxunle neda' tu zren dxedíl-lalędxa da zaj naca da calęla. Blė'ęquezle gate nate ca gudíl-lalęna' na, na' na'a dxenle ca dxedíl-lalęna' na.

### Xel-la dxexruj lazre', ne xel-la szren cheę Cristo

**2** Cristo dxutipe' lázrele, na' xel-la zri'i lazre' cheę' dxuzúa na le'e lu da ba neza, na' Be' Lá'azxa cheę'

zúalene' le'e, na' nápaie xel-la zri'i lazre', ne xel-la dxexache lazre' chee'. <sup>2</sup> Chee le na' le gun ga béle'eda', gaca tuze ca da dxéquele, ne gácale tuze lu xel-la zri'i lazre' chee, ne gunle tuze lu xichaj lázrdaule. <sup>3</sup> Quebe bi gunle chee xulucá'ana szren bèneache le'e, ne chee gaca gucá'ana szren cuínale, san duté xel-la dxexruj lazre' chee dxal-la' guéquele nácadxa blau le sa' ljuwézrele ca le'e. <sup>4</sup> Netule le'e quebe dxal-la' gunle ca da gácalen le'eze. Le gun da gácalen na xezícadxa bèneache.

<sup>5</sup> Dخال-la' si' lu na'le da gaca na chee ca ben Jesucristo. <sup>6</sup> Lácala naque' ca nácaqueze Dios, quebe gúquene' dxal-la' guné' ba xuzre xegá'anaqueze' ca Dios. <sup>7</sup> Bzue' chalá'ala da nápaqueze', ne ben cuine' ca tu benne' nada'u, guque' bèneache. <sup>8</sup> Gate ba naque' bèneache, guque' dxexruj lazre', na' bzue' dizra' chee Dios ca bzrinté gutié', lácala gutié' ca tu benne' wen da caléla le'e xaga béguaj. <sup>9</sup> Chee le na' Dios bca'ana szrénle'e Le', ne bzue' tu Le' da naca szrendxa ca xúguté la xezícadxa, <sup>10</sup> chee gate xelenne' La Jesús, na' xuluzú zribe lau Le' xúguté benne' zaj zre'e xabáa, ne xez la xu nigá, ne zran xez la xu nigá, <sup>11</sup> ne chee xelexechébe xúguté' naca Jesucristo Xránadxu, chee gaca ba lá'ana Xradxu Dios.

#### Bi chee Cristo zaj nácabe' ca xi' da dxulusení na

<sup>12</sup> Chee le na', le'e, bi bicha' nazri'ite lazra', ca na' benle le'e, bzúaquezle dizra' chee Dios gate na' zúalena' le'e, le guzúadxa dizra' chee Dios na'a gate zua' zitu'. Duté xel-la dxexruj lazre', ne duté xel-la dxezrebe le gun zrin chee zrué'ele duté ca naca xel-la weselá chee, <sup>13</sup> lawe' da dxun Dios zrin lu xichaj lázrdaule chee sa lázrele gunle da xrlátaje da dxaca lazre' Le', ne chee séquele gunle na.

<sup>14</sup> Le gun xúguté da dxunle, ne quebe gáchajele, ne quebe gutil-la dizra' ljuwézrele <sup>15</sup> chee gácale li lazre', ne quebe nu nne chee. Gácale bi chee Dios du lazre' ládujla bèneache zaj naque' benne' dxelún da caléla, ne gácale ca belaj ca' dxulusení na lu xez la xu naga nachul-la na, <sup>16</sup> ne guchálajle benne' ca' dizra' da nua na xel-la nabán. Che gunle caní, neda' wezaca ba lazra' chee gate xelá' Cristo, lawe' da wanezda' quebe ben zi' lazra' dácheze, ne quebe bena' zrin níteze. <sup>17</sup> Béle'eda' lácala gun na ba xen gatia' chee gaca li lazre' xel-la dxejlí lazre' chee lau Dios. Bzua cuínale lu na' Dios ca tu guna' da gúnnale chee', na' chee le na' béle'eqezda' tu zren nen xúgutéle le'e. <sup>18</sup> Le béquezle le'e, ne le gun tuze neda' lu xel-la dxebé chia'.

#### Ca naca chee Timoteo, ne Epafrodito

<sup>19</sup> Che naca da dxaca lazre' Xránadxu Jesús, dxebeza lazra' sél-lazequeza' Timoteo xedajnná'abe' le'e, chee beda' gate xelabe', ne guzenbe' neda' chee le'e. <sup>20</sup> Quebe nu chilá' xetú benne' guéquene' chee ca da dxéqueda' neda'. Tuze Timoteo dxeebe' gunne xue chee gaca chawe' chee le'e. <sup>21</sup> Xúguté benne' ca' xezícala zaj dxee' gunne xue da zaj naca chee'z', ne quebe

zaj dxee' gunne xue da naca chee Jesucristo. <sup>22</sup> Le'e nézquezle ca da xrlátaje dxun Timoteo, ne ca benbe' zrin tu zren nen neda'. Dxuchálajntu' dizra' chawe' chee Cristo, na' dxunbe' ca dxun tu bi dxácalebe' xrabe'. <sup>23</sup> Caní naca, dxebeza lazra' sel-la'-be' gate nezda' ca gaca chia'. <sup>24</sup> Dxuxrén lazra' Xránadxu, néda'queza' xida' xedajnná'a le'e.

<sup>25</sup> Cá'anqueze dxéqueda' dxun na ba xen sel-la' Epafrodito, bi bíchedxu. Dxunbe' zrin tu zren nen neda', dxedil-lalentu' da caléla. Lé'eqezle gusél-lale bi nigá chee gácalenbe' neda', ne xu'a lizre xia nigá. <sup>26</sup> Dxezá lázrele'ebe' xedajnná'abe' le'e, ne zúale'ebe' stébe lawe' da nézebe' bénele quebe chawe' guzúabe'. <sup>27</sup> Da li quebe chawe' guzúabe', ne bache gátebe', san Dios bexache lazre' lebe', ne quegá tuze lebe', cá'anqueze neda' chee quebe xewine lázredxa' ca da dxaca chia' na'a. <sup>28</sup> Chee le na' dxezá lázredxa' sel-la' lebe' chee bele le'e gate xel'é'ele lebe', ne chee québedxa xewine lazra' neda'. <sup>29</sup> Le xezí' lu na'le lebe' duté xel-la dxebé, ca bi bíchele lu da naca chee Xránadxu, ne le gápaqueze ba lá'ana benne' ca' zaj naque' ca lebe', <sup>30</sup> lawe' da guzúa gátebe' dxunbe' zrin chee Cristo. Bzuabe' lu da stébe xel-la nabán chee' chee gunbe' zrin chia' da quebe guzéquele le'e gunle.

#### Da naca chawe' da naca na du lazre'

**3** Na'a, bi bicha', le be lu da naca chee Xránadxu. Quebe naca na zede chia' neda' guzúaja' chee xecha lasa ca da ba bzúajqueza', lawe' da dxun na ba xen guna' da nigá chee. <sup>2</sup> Le guxúe cuínale chee benne' ca' dxelune' da caléla, ne zaj naque' ca becu', benne' ca' dxelechugue' lu bel-la' dxen da na' naca bea na benne' zaj naque' chee Dios. <sup>3</sup> Dxi'u nácadxu benne' nápaquezdxu da dxunna bea na nácadxu chee Dios, ne dxue lá'anadxu Dios ne chee Be' Lá'azxa, ne dxebedxu lawe' da nácadxu bi chee Jesucristo. Quebe dxuxrén lázredxu da dxundxu, <sup>4</sup> lácala neda' wazéqueda' guxrén lazra' da ca' nuna'. Che nu benne' dxéquene' waca guxrén lazre' ca da ba nune', wazéquedxa' neda'. <sup>5</sup> Gate gúqueda' xrunu' zra gulechugue' lu bel-la' dxen chia' da na' dxulé' na naca' chee Dios lawe' da naca' benne' Israel, ne xrtia Benjamín. Naca' da li benne' hebreo. Guca' benne' fariseo ca buzájla'a da bdxixruj be'e Moisés. <sup>6</sup> Gudxéle'a gunne xue da naca chee Dios ca bzrinté gudáu zi' xuzra' benne' ca' zaj nácabe' bi chee Jesús. Ca naca da xlátaje da napa tu benne' dxune' ca dxenná da nadxixruj bea na, quebe nu benne' guzéquene' bi nnie' chia'. <sup>7</sup> Xúguté da ca' gúqueda' gate nate zaj zácale'e na, na'a dxéqueda' da ca' quebe bi zaj zaca na, lawe' da nazrí'idxeda' Cristo. <sup>8</sup> Da li dxéqueda' xúguté da ca' ca tu da nite lawe' da zácadxa Xrana' Jesucristo. Lawe' da nazrí'ida' Le' ba bzua' chalá'ala xúguté da gudapa', ne dxéqueda' da ca' ca tu da níteze chee si'a da ba neza da dxunna Cristo, <sup>9</sup> chee gaca' tuze nen Le', quegá lawe' da guca' xlátaje ne chee da nadxixruj bea na na', san lawe' da ble'e Dios neda' xlátaje lawe' da dxejlí lazra' Cristo, na' Dios dxel'é'ene' xlátaje xúguté

benne' dxeleajlí lazre' Cristo. <sup>10</sup> Da dxaca lazra' naca na gúnbeadxá' Cristo, ne súalę xel-la waca neda' da bsebán na Lę', ne tea' xel-la zi' ca da gudęę' Lę', ne gudę cuina' lu na' Dios lácala dxal-la' gatia' ca gute Cristo, <sup>11</sup> na' dxebeza lazra' xebana' ládujla benne' gate ca'.

#### Pablo dxun zi' lazre' gusexuzre' gunę' zrin cheę Cristo

<sup>12</sup> Quebe dxennía' ba bzrué'eda' xúgute da caní, u ba naca' dutę xlátaje, san dxun zi' lazra' cheę zrué'eda' da na' bláwizra Jesucristo neda' cheę zrué'eda'. <sup>13</sup> Le'e, bi bicha', quebe dxennía' ba bzrué'eda' da nigá, san tuze da dxuna', dxuzúa' chalá'ala da ba gudę, ne dxun zi' lazra' cheę zrué'eda' da za za', <sup>14</sup> cheę gusexuzra' guna' zrin da dxuna', cheę zrué'eda' da na' bláwizra Dios dxi'u sidxu lu xabáa cheę' lawe' da nácadxu bi cheę Jesucristo.

<sup>15</sup> Caní dxal-la' guéquedxu dxi'u, zę cháchadxu ca naca da dxeajlí lázredxu. Che quebe dxéquele caní cheę bíteęęe da caní, Dios guzėjani'ine' le'e ca naca cheę na. <sup>16</sup> Tuze ca dxal-la' guéquedxu, ne tuze ca dxal-la' gundxu lu da ca' ba bzrué'edxu.

<sup>17</sup> Le'e, bi bícha'dau', le gun ca dxuna' neda', ne le nna' ca dxelún benne' ca', dxelunę' ca da blé'entu' le'e. <sup>18</sup> Zane' lasa ba gucha' le'e, ne na'a dxebézrtea' dxapa' le'e, zráłęę bi bíchedxu dxelunę' ca dxelún benne' dxuluzúę' chalá'ala da bęn Cristo lęęę xaga béguaj. <sup>19</sup> Ca gaca cheę benne' ca' lu zra bzebe, xelebía xi'ę. Zaj nunę' dios cheę da dxelé'aj dxelawę', ne dxulucá'ana szren cuine' cheę da na' dxal-la' xelapa stu'ę. Zaj dxe'e gunne xue da naca cheę xęzr la xu nigaze. <sup>20</sup> Dxi'u nácadxu benne' zaj nababę' xabáa, ne dxebézadxu zra xelá' benne' weselá cheędxu, Xránadxu Jesucristo, zęę xabáa. <sup>21</sup> Lę' xegüę' bęl-la' dxen cheędxu da dxeledę cheę na, ne gunę' na ca naca bęl-la' dxen xabáa cheę', guchínene' xel-la waca cheę' da napę' cheę nna bé'ene' xúgute da zaj zua.

#### Dxal-la' béquezdxu lu da naca cheę Xránadxu

**4** Cheę lę na' le'e, bi nazri'ite lazra', le sę chacha lu da naca cheę Xránadxu. Le'e, bi bícha'dau' nazri'ite lazra', dxezá lázrełę'a le'eda' le'e, lawe' da dxebeda' ca nácale le'e, na' lawe' da bęna' neda' nácale bi cheę Cristo dxal-la' si'a tu da gunna Dios neda'.

<sup>2</sup> Dxata' xueda' Evodia, ne Síntique xelaque' tuze, lawe' da zaj naque' bila ne cheę Xránadxu. <sup>3</sup> Na'a lue', bi ljwezra' li lazre', dxata' xueda' lue' gácalęnu' nu'ula zandxu caní, nu'ula belúnłęę' neda' zrin cheę dizra' chawe' cheę Cristo. Belunę' zrin na' tu zren nen Clemente, ne kezícadxa benne' ca' belúnłęę' neda' zrin. La benne' caní zaj naxúaj na lu xiche cheę xel-la nabán zeajlí canna.

<sup>4</sup> Le béqueze lu da naca cheę Xránadxu. Xecha lasa dxennía': Le be. <sup>5</sup> Dxaca lazra' xeleque be'e xúgute bęnneache nácale zren lazre'. Ba zua bagu zra xelá' Xránadxu.

<sup>6</sup> Quebe bi cuele gunne xue, san le guchálajłęqueze Dios ca naca cheę da ca'. Le naba na lau Dios, na' le

xęę: Xcalenu'. <sup>7</sup> Nadxa gunna Dios le'e xel-la dxebeza zri lazre', da naca na szrendxa ca da seque' gúnbea bęnneache, na' guzúa chuchu na xichaj lázrdaule ne cheę Jesucristo.

#### Le gulaba lazre' ca naca da xrlátaje

<sup>8</sup> Na'a, bi bicha', le gulaba lazre' ca naca xúgute da zaj naca li, ne xúgute da zaj napa na ba lá'ana, ne xúgute da zaj naca na li lazre', ne xúgute da zaj naca na du lazre', ne xúgute da dxezaca ba lazre' Dios, ne xúgute da dxulucá'ana na bęnneache xrlátaje. Che zua tu da naca xrlátaje, u da dxal-la' gucá'ana szrendxu, le gulaba lazre' da caní.

<sup>9</sup> Le gun ca naca da bsédeda' le'e, ne da bzėjani'ida' le'e, ne da bzenda' le'e, ne da ble'eda' le'e, na' súalę Dios le'e, Bęnnea' dxunę' dxi'u xel-la dxebeza zri lazre'.

#### Da gulesel-la benne' Filipos ca' cheę Pablo

<sup>10</sup> Dxebéłęęda' ne cheę Xránadxu, lawe' da dxajsá lázrele neda'. Quebe dxennía' ba gul-la lázrele neda', san quebe guta' lataj gácalęle neda'. <sup>11</sup> Quebe dxennía' da nigá lawe' da bi dxexájrjeda', lawe' da ba bsęde Xránadxu neda' sua' xel-la dxebé ájateęe dxaca chia'.

<sup>12</sup> Ba gudęa' xel-la xache', ne cá'anqueze xel-la gunní'a. Nazédia' dxuchaga lawa' xúgute da dxaca chia', che nęljada', u che dxeduna', che nápalę'a, u che quebe bi napa'. <sup>13</sup> Xúgute wazéqueda' guchaga lawa' lawe' da dxuzę tipa Cristo neda'. <sup>14</sup> Bęnle da xrlátaje, gúcalele neda' ne cheę da gusél-lale chia'.

<sup>15</sup> Ba nézquezle le'e, benne' Filipos, ca guca gate guzú lawa' dxuchálaja' dizra' chawe' cheę Cristo nigá. Gate bezá'a xęzre ca' zaj nababa xęzr la xu Macedonia, le'eze gusél-lale chia' dumí cheę da guzi' lu na'le.

<sup>16</sup> Gate guzúa' xęzre Tesalónica, chupa chunna lasa gusél-lale dumí chia' cheę quebe bi xájrjeda'. <sup>17</sup> Quebe dxennía' da nigá lawe' da dxaca lazra' bi gúnnae chia', san dxaca lazra' gácadxa da ba neza cheęle le'e lau Dios. <sup>18</sup> Ba guzi'a xúgute da gusél-lale, na' dęłęę chia'. Ca naca da gusélal-le chia' lu na' Epafrodito, da zrendxa guca na ca da bexájrjeda'. Da na' gusél-lale naca na ca tu guna' da dxelá zixre na lau Dios, u tu da bzúale lau Dios da dxezaca ba lazre'. <sup>19</sup> Dios chia' gunę' le'e xúgute da dxexájrjele, cheę xel-la gunní'a cheę xabáa cheę' ne cheę Jesucristo. <sup>20</sup> Gaca ba Xradxu Dios chadía chacanna. ¡Ca'an gaca na!

#### Pablo dxuzę dizra' benne' Filipos ca'

<sup>21</sup> Waláz chia' neda' le gugapa diuzre lu La Jesucristo xúgute benne' zaj nababę' cheę Dios. Bi bíchedxu ca' zaj zúalę neda' dxulugapę' le'e diuzre. <sup>22</sup> Xúgute bi bíchedxu zaj zre'e nigá, benne' zaj nababę' cheę Dios, ne bi bíchedxu zaj zręę lizre bęnnea' dxenná bé'ene' xęzr la xu Roma, dxulugapę' le'e diuzre.

<sup>23</sup> Dxenaba' lau Xránadxu Jesucristo gunę' da chawe'  
cheę xúgutęle le'e. Ca'an gaca na.

# Colosenses

## Pablo dxugape' diuzre bi bíchedxu zaj zre'e xezre Colosas

1 Neda', Pablo, naca' gubáz chee Jesucristo lawe' da naca da dxaca lazre Dios, na' zúale bi bíchedxu Timoteo neda'. 2 Dxuzúaja' da nigá chee le'e zrale xezre Colosas, ne nabábale chee Dios, ne dxeajlí lázrele Cristo. Dxenaba' Xradxu Dios guné' da chawe' chee le'e, ne gunné' le'e xel-la dxebeza zri lazre'.

### Da dxenaba Pablo lau Dios chee bi bíchedxu ca'

3 Dxéquezentu' Dios, Xra Xránadxu Jesucristo: Xcalenu' ca naca chee gate dxuchálajentu' Le'. 4 Ba bémentu' ca dxeajlí lázrele Cristo, ne ca nazri'ile xúgute bi ca' chee Dios. 5 Caní dxunle lawe' da dxebeza lázrele da nucueza Dios chee xabáa, na' guzú laule dxunle ca naca da nigá gate guzile dizra' chawe' da naca na da li. 6 Dizra' chawe' nigá bla na ládujla le'e ca bla na duté xezr la xu nigá, na' dxezriluj na, ne dxun na zrin duté xezr la xu ca dxun na ládujla le'e, gate béntete ca nazrí'i Dios bénneache, ne gunézele naca na da li. 7 Da nigá ble'e Epafras le'e. Naque' bi bíchedxu nazrí'i lázredxu, ne ba bénqueze' zrin nen netu', ne naque' chee le'e tu benne' wən zrin li lazre' chee Cristo. 8 Epafras nigá bzenne' netu' ca dxaca chee le'e, ne ca nazrí'i ljwézrele ne chee Be' Lá'azxa.

9 Chee le' na', zra gunézentu' da nigá, dxuchálajlequezentu' Dios chee le'e, ne dxenábantu' Le' guzėjni'ine' le'e ca naca da dxaca lazre', ne gunné' le'e duté xel-la sina, ne duté xel-la dxėjni'i da dxunna Be' Lá'azxa dxi'u. 10 Caní dxenábantu' Le' chee gaca gunle ca dxal-la' xelún bi ca' chee Xránadxu, ne gunle ca da dxezaca ba lazre' Le', gunle xúgute da naca da xrlátaje, ne gúnbeadxaquezle Dios. 11 Dxenábantu' Le' guzúa chache' le'e lu xel-la waca da naca chee xel-la szren chee' chee séquele guchaga laule xúgute da dxaca chee lu duté xel-la zren lazre' chee, ne duté xel-la dxebe. 12 Dخال-la' xele Dios: Xcalenu', lawe' da bzua Dios dxi'u chee sidxu da nucueze' cheedxu, chee súadxu lu xel-la naxaní' chee', lawe' da nácadxu bi chee Le'. 13 Dios bselé' dxi'u lu xel-la dxenná bea chee da chul-la, na' bzué' dxi'u naga dxenná bea Zrí'ine' nazrí'ite' lazre'. 14 Zrí'ine' nácaqueze' Bénnea' bselé' dxi'u gate gutie' waláz cheedxu, chee bnite lau Dios dul-la gubágadxu.

## Bexácadxu tuze nen Dios lawe' da gute Cristo

15 Ca naca Jesús, dxulé'e na dxi'u ca nácaqueze Dios, Bénnea' quebe gaca lé'edxu, ne naque' chee Dios ca tu bi nedxu chee bénneache, bi nácadxabe' blau ca xúgute da ben Dios. 16 Ne chee Le' ben Dios xúgute da zaj zua xabáa, ne da zaj zua xezr la xu nigá, da ca' dx-elé'edxu, ne da ca' quebe gaca lé'edxu, che zaj naca na be' ca' zaj naca na blau, u be' ca' dxelenná bea na, u be' ca' zaj napa na xel-la szren, u be' ca' zaj napa na xel-la waca, xúgute na ben Dios ne chee Le', na' chee Le' zaj naca na. 17 Cristo ba zúaqueze' nédxute ca xúgute da zaj zua, na' ne chee Le' xúgute da ca' dxelún na ca zaj naca chee na. 18 Xúgute benne' zaj naque' bi chee Cristo zaj naque' ca tuze bel-la' dxen, na' Crísto-queze naque' xichaj bel-la' dxen na' da nácadxu. Le' bzué' bel-la' dxen na', ne Le' naque' Benne' bebán nédxute ládujla benne' gate ca' chee gaque' Benne' blau lu xúgute da zaj zua. 19 Caní naca na lawe' da gu-ca lazre' Dios súale Cristo duté da nácaqueze Dios. 20 Cá'anqueze guca lazre' Dios ne chee Cristo xexuné' tuze nen Le' xúgute da zaj zua, ca da zaj zua na lu xezr la xu, ne da zaj zua na xabáa. Bexuné' dxi'u tuze nen Le' ne chee xel-la gute chee Cristo le'e xaga béguaj.

21 Nédxute le'e gúcale ca benne' zitu' lau Dios, ne bzá'ale Dios lu xichaj lázrdaule, ne benle xúgute da calela, san na'a Dios ba bexuné' le'e tuze nen Le', 22 ne chee da ben Cristo gate gutie' le'e xaga béguaj lu bel'a dxen chee'. Da nigá ben Le' chee gaca guzúe' le'e lau Le', gácale benne' lá'azxa, ne du lazre', ne quebe bi nabágale da calela. 23 Chee gaca caní dxal-la' se cháchale, ne sua típale ca dxeajlí lázrele Cristo, ne quebe gusanle ca da dxebeza lázrele, da na' nápa le lawe' da dxėjlele dizra' chawe' chee Cristo. Dizra' chawe' nigá nene na duté xezr la xu, na' nuzúa Dios neda', Pablo, benne' wən zrin chee', chee guchálaja' dizra' chawe' nigá.

### Zrin dxun Pablo chee bi ca' chee Cristo

24 Na'a dxebeda' lu xel-la zi' da dxedéa' ne chee le'e, lawe' da dxuzá lawa' lu bel-la' dxen chia' ca da dxezaca Cristo ne chee bi chee' ca', benne' ca' zaj naque' ca bel-la' dxen cheéqueze'. 25 Bzua Cristo neda' ca benne' wən zrin chee bi chee' ca', ne chee da bláwizra Dios neda' guna', gácaləna' le'e, na' guchálaja' dutequeze da naca dizra' chee Dios, 26 ne chee guzėjni'ida' bénneache ca da nagache, da na' nagache nédxute, san na'a Dios ba bléne' bi chee' ca' ca naca na. 27 Guca

lazre' Dios gul'éene' benne' ca' ca naca xel-la gunní'a zren chee' da na' nagache nédxute, da gunézruje' benne' ca' quebe zaj naque' judío. Da na' nagache nédxute naca na caní: Cristo zue' xichaj lázrdaule, na' chee' le' na' dxebeza lázredxu súadxu xabáa chee'.

<sup>28</sup> Netu' dxuchálajntu' ca naca chee' Cristo. Dxuzéajni'intu' xúgute' bèneache, ne dxusédentu' xúgute', chee' xeleajni'i xánnene' chee' xelaca xúgute' bèneache du lazre' lau Dios ne chee' Jesucristo. <sup>29</sup> Chee' gaca caní dxuna' neda' zrin, dxuchíneda' duté xel-la waca chee' Cristo, da dxun na zrin lu xichaj lázrdawa'.

**2** Dxaca lazra' nézele le'e dxúnle'a zrin, dxe'a gunne xue le'n Dios da naca chee' le'e, ne da naca chee' bi bíchedxu ca' ca' zaj zre'e Laodicea, ne da naca chee' xúgute' bi bíchedxu ca' quebe ne xelélé'ene' neda' caníqueze. <sup>2</sup> Dxaca lazra' xeledipa lazre', ne xelaque' tuze lu xel-la zri'i lazre', ne xelaque' benne' gunní'a lu xichaj lázrdawe', chee' xelúnbe'e da nagache chee' Xradxu Dios da nácaqueze Cristo. <sup>3</sup> Lu na' Le' zaj de ca naca xel-la gunní'a chee' xel-la sina, ne xel-la dxéajni'i. <sup>4</sup> Dxapa' le'e da nigá chee' quebe xelezi xé le'e benne' ca' zaj neze xrgúe' ca dxuluchálaje'. <sup>5</sup> Lácala quebe zúaletea' le'e caníqueze, naca na cáteze zúalena' le'e lu be' nácaqueza', na' dxebe'e'eda' dxenda' dxunle da xlátaje, ne zé cháchale ca dxeajlí lázrele Cristo.

<sup>6</sup> Chee' le' na', ca benle, guz' lu na'le Xránadxu Jesucristo, cá'anqueze dxal-la' gunle súalele Le'. <sup>7</sup> Dxal-la' gácale ca tu xaga da dxudé lue na sítuja lu da naca chee' Cristo. Cá'anqueze dxal-la' gácale ca tu xu'u da dxe' lane lu da naca chee' Le', chee' se cháchale ca dxeajlí lázrele Le', ca blé'entu' le'e, na' dxál-la'queze xe'le Dios: Xcalenu'.

#### Xel-la nabán cube da dxunna Cristo dxi'u

<sup>8</sup> Le guxúe cuínale. Quebe güele lataj xelezi xé benne' ca' le'e, xuluchínene' xel-la sina chee' bèneache, ne dizra' caléla, ca naca da dxulusédequeze bèneache, ne ca zaj naca da ca' dxácaqueze lu xezr la xu nigá, ne quegá ca naca chee' Cristo.

<sup>9</sup> Duté ca naca Dios nácaqueze Cristo.

<sup>10</sup> Nápa le'e xúgute' da naca chee' lawe' da nácaquezele bel-la' dxen chee' Le'.

Le' dxenná be'ene' xúgute' be' da dxelenná bea na, ne xúgute' be' da zaj napa na xel-la waca.

<sup>11</sup> Cá'anqueze, lawe' da nácale tuze nen Cristo nácale bi chee' Dios. Quebe guca chee' ca da na' belúnqueze benne' judío ca', gulechugue' late' bel-la' dxen chee' bi biu chee' ca', da na' dxulé'e na zaj náca' chee' Dios. Bedúa duté da naca chee' bela' dxen chee' da naca sban, da guca na ne chee' da ben Cristo lu xichaj lázrdaule. Be'ne' nácale bi chee' Dios. <sup>12</sup> Gate gudxúale nisa guca chee' ca guca chee' Cristo gate bgache' lu xedxu ba, na' cá'anqueze guca chee' ca guca chee' Le' gate bebane' ládujla benne' gate. Caní guca chee' lawe' da guxeajlí lázrele xel-la waca chee' Dios, Bènea' bsebane' Cristo ládujla benne' gate ca'. <sup>13</sup> Gate nate gúcale le'e ca benne' gate lu dul-la da gubágale, ne lu bela' dxen sban chee' da quebe ne xedúa na. Na'a

Dios ba nunne' le'e xel-la nabán tu zren nen Cristo, ne ba bnite lawe' xúgute' dul-la da gubágale. <sup>14</sup> Dios bzria xi'e ca naca da nabágadxu chee' xúgute' da nadxixruj bea na da gula da buluzría xi na dxi'u. Bebéaje' na chálá'ala, ne bdé'e na le'e xaga béguaj ca tu da gubaga' Cristo. <sup>15</sup> Gate gute Cristo le'e xaga béguaj begü'e ca naca xel-la dxenná bea, ne xel-la waca chee' be' xriwe' ca', na' blé'ene' da ca' lávela gubáz chee' xabáa ca' lawe' da gunná bé'ene' na.

#### Le sa lazre' da ca' zaj de na xabáa

<sup>16</sup> Chee' le' na', quebe nu dxal-la' si tizra' le'e ca naca da dxe'aj da dxágule, ne ca zaj naca zra laní, ne ca naca laní chee' beu' dxe'ene, ne ca zaj naca zra dxupá'ana. <sup>17</sup> Xúgute' da caní zaj naca na ca tu zrúl-laze chee' da zaj zéajé da ca'. <sup>18</sup> Quebe güele lataj nu cua da nucueza Dios chee' le'e, ne chee' da dxululé'e benne' ca', benne' dxeléquene' zaj naque' dxexruj lazre' lawe' da dxulucá'ana szrene' gubáz chee' xabáa ca', ne dxuluchálaje' chee' da quebe ne xelélé'ene', ne dxulucá'ana szren cuine' ca naca xel-la sina chee' bèneacheze da zaj nape'. <sup>19</sup> Quebe zaj de'e Cristo, Bènea' naque' xichaj bel-la' dxen da nácadxu dxi'u, na' Le' dxusegule' duté bel-la' dxen na', ne dxugawe' na, ne dxuné' na tuze du ca naca na, chee' gaca na ca dxaca lazre' Dios.

<sup>20</sup> Naca chee' ca naca chee' tu benne' ba nate lawe' da nácale bel-la' dxen chee' Cristo, chee' québedxa gunle ca zaj naca da ca' dxácaqueze lu xezr la xu nigá. Na'a, zbizr chee' na' dxedale ca benne' ne zaj nácaqueze' chee' xezr la xu nigá, ne dxunle ca da dxelenná bea bèneache. <sup>21</sup> Dxelenné': Quebe guchínenu' da nigá. Quebe gagu' da ca'. Quebe chajtáu' da na'. <sup>22</sup> Xúgute' da nadxixruj bea caní dxuluchalaj na chee' da ca' dxeledé chee' na gate dxuchínedxu na, ne zaj nácaze na da dxelenná bea bèneache, ne da dxuluséde bèneache. <sup>23</sup> Da li dxeleque bèneache zaj naca na sina da nadxixruj bea caní, lawe' da dxuluséde na bèneache xelúe lá'ane' Dios, ne xelaque' dxexruj lazre', ne xelenná be'ene' bel-la' dxen chee'. Quebe bi culuén zaj napa na chee' xelenná be'e na xel-la dxezá lazre' sban ca' chee' bèneache.

**3** Le'e nácale ca benne' ba belexebán tu zren nen Cristo. Chee' le' na' le sa lazre' da zaj zua xabáa, naga dxe' Cristo chálá'a xabéla chee' Dios. <sup>2</sup> Le gulaba lazre' chee' da zaj de xabáa, quegá chee' da zaj de lu xezr la xu. <sup>3</sup> Nácale ca benne' ba zaj nate, na' xel-la nabán chee'le nuzúa chawe' Dios naga zua Cristo. <sup>4</sup> Cristo nácaqueze xel-la nabán cheedxu, na' gate xelá' Le', cá'anqueze le'e gunle tu zren Le' lu xel-la szren chee'.

#### Xel-la nabán gula ne xel-la nabán cube

<sup>5</sup> Chee' le' na', le xebéaj ca tu da nate xúgute' da zaj zua lu xichaj lázrdaule da zaj naca na chee' xezr la xu nigá, ca naca xel-la dxichaj na xrba chee' xel-la nuchaga na', ne da sban, ne xel-la dxezá lazre' da sban ne da caléla ca', ne xel-la dxucude', lawe' da naca da dxu-

cude bèneache ca dios cheequeze'. <sup>6</sup> Xúgute da caní dxelún benne' quebe dxuluzúe' dizra' chee Dios, na' chee le na' gudé Dios benne' ca' lu da ba xa'. <sup>7</sup> Cá'anqueze le'e bēnle xúgute da caní gate nate. <sup>8</sup> Na'a, québedxa gunle xúgute da caní:

Xel-la dxezra'a, ne xel-la xichaj zra'a, ne xel-la dxe-cuide ljwezre.

Québedxa nnele dizra' schanni'.

Québedxa gucháchale ljwézrele.

<sup>9</sup> Quebe si xē ljwézrele tule xetule, lawe' da ba bzúale chalá'ala da gúcale nédxute, ne ca naca da bēnle.

<sup>10</sup> Nácale ca benne' cube, lawe' da dxuxucube Dios le'e chee gácale ca nácaqueze Dios, Bénnea' bēne' le'e, ca zrindxa gúnbea xánnele Le'. <sup>11</sup> Lau Dios québedxa bi zaca che nácadxu benne' griego, che benne' judío, u che nácadxu benne' zaj nadxugu lu bēl-la' dxen chee' da dxulé'e na zaj nababe' chee Dios, che benne' quebe zaj nape' da na' dxulé'e na, u che nácadxu benne' zitu', che benne' ca' zaj zre'e xi'a xegu ca', u che nácadxu benne' zaj nada'u, che benne' quebe zaj nada'u. Da zaca na naca na che naca Cristo benne' xichajdxu, ne che zue' lu xichaj lázrdaudxu.

<sup>12</sup> Dios nazri'ine' le'e, ne guqué'e le'e chee gácale bi chee' ca'. Chee le na' le gaca:

Benne' dxexache lazre', ne benne' zri'i lazre',  
ne benne' dxexruj lazre', ne benne' chawe' lazre',  
ne benne' zren lazre'.

<sup>13</sup> Le gácale ljwézrele tule xetule,  
ne le gunite lau chee' tule xetule,  
che núlale dxezra'a ljwézrele.

Ca bēn Cristo, bnite lawe' chee',  
cá'anqueze le gun le'e chee ljwézrele.

<sup>14</sup> Da dxundxa na ba xen, le zri'i ljwézrele lawe' da naca xel-la zri'i lazre' da dxun na dxi'u tuze, ne li lazre'.

<sup>15</sup> Xel-la dxebeza zri lazre' da dxunna Dios dxi'u dxal-la' nna bea na lu xichaj lázrdaudxu, lawe' da bláwizra Dios le'e chee súale lu xel-la dxebeza zri lazre' chee', ne gácale ca tuze bēl-la' dxen. Cá'anqueze dxal-la' xēle Dios: Xcalenu'.

<sup>16</sup> Dizra' chee Cristo dxal-la' guzúa xánnele lu xichaj lázrdaule chee séquele guzėjni'ile, ne guszre ljwézrele nen dutē xel-la sina chee Dios. Lu dutē xel-la dxezaca ba lazre' le gul-la lau Dios salmo ca', ne da dxue lá'anale Dios, ne da ca' dxuzúa Be' Lá'azxa xichaj lázrdaule. <sup>17</sup> Bíteteze da gunle, u da nnale, le gun xúgute na lu La Xránadxu Jesús, ne xēle Xradxu Dios: Xcalenu', ne chee Le'.

**Ca dxal-la' xelún benne' ca' zaj naque' bi chee Cristo**

<sup>18</sup> Le'e, nu'ula, le guzúa dizra' chee benne' chee chee, lawe' da naca na da dxal-la' xelún benne' dxeajlí lazre' Xránadxu.

<sup>19</sup> Le'e, benne' biu, le zri'i zrú'ulale, ne quebe xexitaj lázrele le'.

<sup>20</sup> Le'e, bi cuide', le guzúa dizra' chee xra xrnale lu xúgute da dxelenné', chee gunle da dxezaca ba lazre' Xránadxu.

<sup>21</sup> Le'e, xruze xrna', quebe tételale xel-la snia nen zri'inele, chee quebe xelate ni'a na'be'.

<sup>22</sup> Le'e, benne' zaj nada'u, le guzúa dizra' xúgute da xelenná xránale lu xēzr la xu nigá, quegaze gate dxe-lenná'tee', chee xeléquene' le'e xrlátaje, san le gun da ca' du lázrele, ne le zrebe Dios. <sup>23</sup> Bíteteze da gunle, le gun na du lázrele, ca nu benne' dxune' zrin chee Xránadxu, ne quegá zrin chee beniácheze. <sup>24</sup> Lácala dxunle zrin nigá chee bèneache, nézele gunna Xránadxu lazruj chee da dxal-la' sile lu zra na', lawe' da dxunle zrin chee Cristo, Bénnea' nácaqueze' Xránale. <sup>25</sup> Nu benne' dxune' da calēla, wazi'e lazruj chee da calēla nune' lawe' da quebe dxuchá Dios ca da dxune' chee tu xetú benne'.

**4** Le'e, benne' nácale xrane bèneache, dxal-la' gácale xlátaje, ne li lazre' ca dxuchínele benne' ca' ná'ule. Le gusá lázrele, cá'anqueze le'e, zua Xránale xabáa.

<sup>2</sup> Le'e, bi bícha'dau', le guchálajlequeze Dios, súale ban lazre', ne xēle Dios: Xcalenu'. <sup>3</sup> Cá'anqueze, le naba lau Dios waláz cheentu', chee gácale Xránadxu netu' chee séquentu' guchálajntu' xrtizre', ne guzėjni'intu' bèneache ca naca da nagache ca naca chee Cristo. Lawe' da dxuna' da caní ne xu'a lizre xia nigá. <sup>4</sup> Le naba lau Dios chee séqueda' guzėjni'i xánnele' bèneache ca dxal-la' guna'.

<sup>5</sup> Le gaca sina ca dxunle chee benne' ca' quebe dxeleajlí lazre' Cristo, guchine xánnele zra ca' dxunna Dios le'e. <sup>6</sup> Dizra' dxuchálajle dxal-la' gaca na xrlátaje, ne da xelexezaca ba lazre' bèneache, na' dxal-la' nézele ca xechébele chee tu tu benne' ca' gate bi dxelenábene' le'e.

**Dxulugapa diuzre bi bíchedxu ca' ljwezre'**

<sup>7</sup> Tíquico, bi bíchedxu nazri'i lázredxu guzenbe' le'e ca naca da dxaca chia'. Nácabē' tu bi li lazre' dxácalēnbe' neda', ne dxunbe' zrin chee Xránadxu tu zren nen neda'. <sup>8</sup> Chee le na', dxusel-la'-be' naga zúale, chee guzenbe' le'e ca dxaca cheentu', ne chee gutípabe' lázrele. <sup>9</sup> Cá'anqueze zėjajle Onésimo lebe', naque' bíchedxu li lazre', benne' nazri'i lázredxu, ne naque' benne' walázr chee. Benne' caní xuluzenne' le'e ca naca da dxaca nigá.

<sup>10</sup> Aristarco, benne' xú'ulēne' neda' lizre xia, dxugape' le'e diuzre, ne cá'anqueze dxun Marcos, bi xrtia Bernabē. Ba bzėjni'ida' le'e ca dxun Marcos. Che waza'be' xedajnná'abe' le'e, le si' lu na'le lebe' cháwe'dau'.

<sup>11</sup> Cá'anqueze bēnnea' le' Jesús dxugape' le'e diuzre, bēnnea' léqueze' Justo. Benne' zan benne' judío dxeleajlí lazre' Cristo, san benne' canize ládujla benne' judío ca' dxelunē' zrin tu zren nen neda', na' dxuzėnen-tu' bèneache ca xelezėquene' xelu'e naga dxenná bea Dios, na' dxuluzúe' neda' tu lu da ba neza zrentē. <sup>12</sup> Dxugapa Epafras le'e diuzre. Naque' wēn zrin chee Cristo, ne benne' walázr cheequezele. Dxenábaqueze' lau Dios chee le'e chee sē cháchale, ne guzúa cuínale du lázrele chee gunle da dxaca lazre' Dios. <sup>13</sup> Neda' dxexcheba' chee Epafras, dxe'e gunne xue chee le'e, ne



cheḗ bi bíchedxu zaj zřeḗ xęzre Laodicea, ne xęzre Hierápolis. <sup>14</sup> Dxugapa le'e diuzre Lucas, bénnea' dxexuneḗ benne' wę' ca', ne naqueḗ benne' nazr'í' lazra'. Cá'anqueze dxugapa Demas le'e diuzre.

<sup>15</sup> Le gugapa diuzre bi bíchedxu zaj zřeḗ xęzre Laodicea. Cá'anqueze le gugapa diuzre Ninfas, ne bi bíchedxu ca' dxelezraguḗ' lizreḗ'. <sup>16</sup> Ca te gulábale le'e xiche nigá, le sel-la na cheḗ xululaba bi bíchedxu ca'

zaj zřeḗ Laodicea na. Cá'anqueze le gulaba le'e xiche da ze za na Laodicea. <sup>17</sup> Le xę Arquipo da nigá: Bxue xanne' gunu' cháwe'dau' ca naca zrin cheḗ Xránadxu da bzueḗ lu na'u.

<sup>18</sup> Neda' Pablo dxuzúaja' da nigá nen ná'aqueza'. Dxugapa' le'e diuzre. Le gusá lázrele xu'a lizre xia. Dxenaba' lau Dios gunę' cheḗle da chawe'. ¡Ca'an gaca na!

# 1 Tesalonicenses

## Pablo dxugape' diuzre bi bíchedxu ca'

**1** Neda', Pablo, ne Silvano, ne Timoteo dxugápantu' le'e diuzre. Dxuzúaja' da nigá cheęle le'e, bi bicha', nazrágale cheę Cristo lu xęzre Tesalónica, ne nabábale cheę Xradxu Dios, ne cheę Xránadxu Jesucristo. Dxena-ba' lau Xradxu Dios ne lau Xránadxu Jesucristo guņę' cheęle da xrlátaje, ne gunņę' le'e xel-la dxebeza zri lazre'.

## Ca dxelejilí lazre' benne' Tesalónica Cristo

**2** Dxequezentu' Dios xcalenu' ca naca cheę xúgutele le'e, ne dxenábantu' gaca da chawe' cheęle le'e gate dxuchálajlęntu' Le'. **3** Lau Xradxu Dios dxeajsá lázrentu' ca benle zrin dutę lu xel-la dxeajilí lazre' cheęle, ne ca benle zrin cheę Cristo lu dutę xel-la zri'i lazre' cheęle, ne ca zę cháchale ca dxebeza lázrele súdele Xránadxu Jesucristo. **4** Le'e, bi bicha', Dios nazri'ine' le'e, na' nézentu' gucá'a Le' le'e. **5** Gate bchálajntu' dizra' chawe' cheę Cristo naga zúale, quebe bentu' na nen dízra'ze, san nen dutę xel-la waca cheę Be' Lá'azxa bchálajntu', ne lu dutę xel-la dxuxrén lazre' cheęntu'. Nézquezle ca bentu' zrin nigá ládujla le'e lawe' da nazrí'ile'ęntu' le'e.

**6** Le'e bénquezle ca bentu' netu', ne ca ben Xránadxu, na' guzile dizra' na' lu dutę xel-la dxebe' cheęle da ben-na Be' Lá'azxa le'e, lácala gudéle'ęle xel-la zi'. **7** Caní gu-ca, nácale tu da dxulé'e na ca dxal-la' xelaca xúgute benne' dxelejilí lazre' Cristo naga nababa Macedonia, ne naga nababa Acaya. **8** Caní guca, bzenle le'e benne' ca' dizra' cheę Xránadxu. Na'a quegá tuze benne' zaj zre'ę Macedonia, ne Acaya, san cá'anqueze benne' ca' zaj zre'ę xúgute xęzre zaj nézene' ca dxeajilí lázrele Dios, na' québedxa dxun na ba xen guzénentu' le'. **9** Benne' caníqueze dxuluchálaje' ca guca gate bedajnná'antu' le'e ne ca guzú' lu na'le netu', ne ca bsanle bedau' xiaj xaga ca' cheę bábale cheę Dios, na' guzú laule dxunle zrin cheę Dios ban, Benne' li. **10** Cá'anqueze dxuluchálaje' ca dxebe'zale zra xelá' Jesús, zę'e xabáa. Le' naque' Zri'ine Dios, na' Dios bsebanę' Le' ládujla benne' gate ca'. Léqueze' guselé' dxi'u lu da ba xa' zrentę da za za' da sel-la Dios lu dutę xel-la dxezrá'a cheę'.

## Zrin ben Pablo lu xęzre Tesalónica

**2** Le'e, bi bicha', ba nézquezle le'e da bentu' gate na' bedajnná'antu' le'e quebe guca na zrin nite. **2** Nézquezle ca belún benne' zaj zre'ę xęzre Filipos, bu-lucháchalęne' netu', ne buluzalję' netu' gate na' za

xedajnná'antu' le'e, na' Dios bęxru chache' netu' cheę bchálajntu' dizra' chawe' cheę Cristo naga zúale, lácala buluzaga benne' zan netu'. **3** Quebe guque zréajentu' ca bchálajntu', ne quegá bi da calęla guca lázrentu' guntu', ne quegá guca lázrentu' si xęntu' le'e. **4** Dx-uchálajquezentu' ca dxaca lazre' Dios lawe' da bxren lazre' netu', ne bsebage' netu' guchálajntu' dizra' chawe' cheę Cristo. Caní dxuchálajntu', quegá cheę xelexezaca ba lazre' bénneache san cheę xezaca ba lazre' Dios, Bénnea' dxenná'teę da zua xichaj lázr-daudxu. **5** Nézquezle le'e cabata' ne xęntu' le'e dizra' gúladau' da gucá'ana szren na le'e, ne quegá bi gun-nantu' cheę bi gúnnale netu'. Dios nézquezene' naca na da li. **6** Cabata' ne gaca lázrentu' xelapa bénneache netu' ba lá'ana, le'e u benne' xula, lácala wazéquentu' nna bé'entu' le'e bi gúnnale netu' lawe' da nácantu' gubáz cheę Cristo. **7** Bentu' le'e xrtandau' ca dxun tu nu'ula dxusegule' zrí'ine'. **8** Nazrí'ile'ęntu' le'e, la guzré-mentu' gúnnatęntu' le'e, quegaze dizra' cheę Dios, san cá'anqueze xel-la nabán cheęntu'. Caní nazrí'ile'ęntu' le'e. **9** Le'e, bi bicha', nézquezle ca bentu' zrin du lázren-tu' cheę gata' da xe'aj gáguntu'. Bentu' zrin te zra ne chizrela cheę quebe bi gusaca zi'ntu' le'e dxácate bchálajlęntu' le'e dizra' cheę Dios.

**10** Le'e dxexechébequezle, ne cá'anqueze Dios nézene' ca bentu' gate na' zúalęntu' le'e, gúcantu' li lazre', ne xlátaje, na' quebe nu guzeque' nu nņę cheęntu'. **11** Cá'anqueze nézquezle ca bentu', bsízrentu' tu tule le'e, ne btípantu' lázrele ca dxun tu xra bidau' cheę zrí'ine'. **12** Gunná bé'entu' le'e gunle ca dxal-la' xelún benne' zaj naque' bi cheę Dios, Bénnea' dx-uláwizre' le'e cheę chu'ule naga dxenná be'ę lu dutę xel-la szren cheę'.

**13** Cheę le' na' dxéquezentu' Dios xcalenu' lawe' da benle ca naca dizra' cheę Dios da bchálajntu', ne guzile na ca dizra' cheę Dios, ne quegá ca dizra' cheę ben-neácheze. Da li naca na dizra' cheę Dios, ne dxun na zrin lu xichaj lázrdaule le'e, na' dxeajilí lázrele Le' cheę gácale cheę Dios dutę ca nácale. **14** Le'e, bi bicha', gate gudele xel-la zi' cheę da belún benne' waláwr cheęle, guca cheęle ca guca cheę benne' zaj nababa cheę Dios naga nababa Judea, benne' ca' zaj naque' bi cheę Cristo, lawe' da cá'anqueze guledé' xel-la zi' cheę da belún benne' waláwr cheę' ca', benne' judío. **15** Benne' judío caní belutię' Xránadxu Jesús, ca belún benne' judío ca' gate nate, belutię' benne' ca' gulenné' waláz cheę Dios, na' benne' caní gulebeaje' netu' lázrentu'. Quebe dxelunę' da dxezaca ba lazre' Dios, ne dx-eledábague' xúgute bénneache, **16** na' gate dxaca

lázrentu' guchálajlentu' benne' quebe zaj naque' judío chee xeledé', quebe dxelunne' netu' lataj. Caní dx-elune', dxuluzandxe' dul-la da zaj nabague'. Na'a, ba be' Dios lataj dxaca da ba xa' zrente' chee benne' ca'.

### Pablo dxezá lazre' cheajnné' bíchedxu zaj zre'e xezre Tesalónica

<sup>17</sup> Le'e, bi bicha', gate becuásentu' naga zúale tu chi'i, lácala québedxa blé'entu' le'e, nuzúaquezentu' le'e lu lárdauntu', ne guzá lázrele'entu' xedajnná'antu' le'e. <sup>18</sup> Guca lázrentu' xídanu', na' neda', Pablo, guca lazra' xida' tu chupa lasa, na' bzaga Satanás neda'. <sup>19</sup> ¿Bizra da na' dxunna na netu' xel-la dxebeza lazre', ne xel-la dxebe', ne da dxuzúa na netu' lu da ba neza, ne da dxunna bea na zua da si'ntu' lu na' Dios? Lé'equeze gácale da caní lu zra xelá' Xránadxu Jesucristo. <sup>20</sup> Awe'. Da nácale le'e gun na si'ntu' da xabáa lau Dios, ne súantu' lu da ba neza.

**3** Nadxa gate québedxa guca guchaga launtu' lawe' da quebe bi bémentu' ca dxaca chee, na' gúquentu' xegá'ana chúpantu' lu xezre Atenas, <sup>2</sup> na' sél-lantu' bi bíchedxu Timoteo xedajnná'abe' le'e, lawe' da naca lebe' tu bi wen zrin chee Dios, ne ba benbe' zrin tu zren nen netu', bchálajntu' dizra' chawe' chee Cristo, na' wazéquebe' guzú' cháchabe' le'e, ne gutí-pabe' lázrele ca dxeajlí lázrele Cristo, <sup>3</sup> chee quebe gate ni'a na'le lawe' da dxedentu' lu da stébe caní. Le'e nézquezle dxal-la' tedxu xel-la zi' caní. <sup>4</sup> Gate ne zúalentu' le'e bzéajni'intu' le'e wadéquezdxu lu da zi' da xa', na' ca'an guca, ca ba nézquezle. <sup>5</sup> Chee le' na', gate québedxa bzúeda' guchaga lawa' lawe' da quebe bi benda' chee, na' gusel-la' nu bedajnaba le'e ájala dxaca chee lu xel-la dxeajlí lazre' chee Cristo, lawe' da bzreba' ga gaze xucuasa da xriwe' le'e lu neza chee Dios, na' gaca níteze zrin bentu' ga na'.

<sup>6</sup> Na'a ba belá' Timoteo ga ni zúantu', ze zabe' Tesalónica, ne ze núabe' dizra' chawe' ca naca xel-la dxeajlí lazre', ne xel-la zri'i lazre' chee. Dxebe' netu' dxeajsá lárquezle le'e netu' nen duté xel-la zri'i lazre', ne dxezá lázrele'le lé'ele netu', ca netu' dxaca lázrentu' le'entu' le'e. <sup>7</sup> Chee le' na', bi bicha', dxácaté dxedentu' lu da stébe caní, ne lu da zi' da xa', zúantu' xel-la dxebe' lawe' da nézentu' zé cháchale ca dxeajlí lázrele Cristo. <sup>8</sup> Na'a naca cheentu' ca naca chee tu benne' bezúateé' chawe' lawe' da nézentu' zé cháchale lu da naca chee Xránadxu. <sup>9</sup> ¿Ájazra guntu' xéle'entu' Dios: Xcalenu' ca dxal-la' guntu' waláz chee le'e, ne ca naca xel-la dxebe' nápantu' lau Dios ne chee le'e? <sup>10</sup> Te zra, ne chizrela dxata' xúentu' Dios gunne' netu' lataj xedajnná'quezentu' le'e, chee gácadxale li lazre' ca dxeajlí lázrele Cristo.

<sup>11</sup> Dxenábantu' lau Xradxu Dios, ne lau Xránadxu Jesucristo gácalene' netu' chee séquentu' xedajnná'antu' le'e. <sup>12</sup> Dxenábantu' Le' chee zrí'idxa ljawézrele tule xetule, ne chee zrí'idxale xúguté bénneache ca nazrí'intu' netu' le'e. <sup>13</sup> Dxenábantu' Le' guzúa chúchue' lárdaule, chee gácale benne' li lazre', ne benne' lázaxa lau

Xradxu Dios lu zra na' gate xelá' Xránadxu Jesús nen xúguté bi chee Le'.

### Dxal-la' gundxu da dxezaca ba lazre' Dios

**4** Le'e, bi bicha', dxata' xúentu' le'e, ne dxusebágan-tu' le'e da nigá lu La Xránadxu Jesús. Le gúndx-aqueze da blé'entu' le'e gunle, da na' dxezaca ba lazre' Dios.

<sup>2</sup> Nézquezle le'e da bzéajni'intu' le'e ne chee Xránadxu Jesús. <sup>3</sup> Da dxaca lazre' Dios naca na guzúa cuí-nale lu na' Le', ne québedxa gunle da sban, <sup>4</sup> na' súaalele zrí'ulaquezele tu tule le'e lu xel-la lázaxa chee Xránadxu, ne gápale le' ba lázana, <sup>5</sup> ne quebe súaale lu xel-la dxezá lazre' chee da sban ca dxelún benne' quebe zaj nunbe'e Dios. <sup>6</sup> Ca naca chee da nigá, netule le'e quebe dxal-la' si xe'le bi bíchele, quebe gunle da sban chee', lawe' da xebéaj lazre' Xránadxu chee xúguté benne' dxeluné' da caní, ca ba bzéajni'intu' le'e. <sup>7</sup> Dios bláwizre' dxi'u chee gundxu da xrlátaje, ne quegá gundxu da sban. <sup>8</sup> Caní naca, che nu benne' dxuzúé' chalá'ala ca naca da nigá, quegá tuze bénneache dxuzúé' chalá'ala, san Diósqueze dxuzúé' chalá'ala, Bénnea' nunne' dxi'u Be' Lázaxa.

<sup>9</sup> Ca dxal-la' zri'i ljawézrele quebe dxun na ba xen guzúaja' chee, lawe' da ba blé'equeze Dios le'e chee zri'i ljawézrele tule xetule. <sup>10</sup> Caníqueze dxal-la' zri'ile xúguté bi bíchedxu zaj zre'e xezre ca' zaj nababa xezre la xu Macedonia. Dxata' xuentu' le'e, bi bicha', chee zrí'idxa ljawézrele. <sup>11</sup> Le gun ba xuzre súaale lu xel-la dxebeza zri lazre', ne gunle da naca cheézquezele, ne gunle zrin nen ni'a na'le ca ba guzrentu' le'e, <sup>12</sup> chee xelapa benne' xula le'e ba lázana, ne chee quebe bi xázrjele le'e.

### Ca gaca zra xelá' Xránadxu

<sup>13</sup> Le'e, bi bicha', dxaca lázrentu' nézele ca naca chee bi bíchele zaj nate, chee quebe xewine lázrele ca dxelún xezícadxa benne' ca' quebe bi dxelebeza lazre'.

<sup>14</sup> Dxéajlédxu gute Jesús, ne bebane' ládújla benne' gate, ne cá'anqueze dxéajlédxu Dios gusebane' benne' gate ca' guleajlí lazre' Jesús, chee xelezúalene' Le'.

<sup>15</sup> Chee le' na' dxentu' le'e da na' ble'e Xránadxu, gunné': Dxi'u naca bandxu gate xelá' Xránadxu, quebe cheajsúalédxu Le' nédxula ca benne' ca' zaj nate.

<sup>16</sup> Xránaquezdxu zé'e xabáa, na' cuezre xe'e nen duté xel-la dxenná bea chee', na' xendxu chi'i gubáz blau chee xabáa, ne chi'i luzu da dxulucuezre' waláz chee Dios. Nadxa benne' gate ca', benne' guléajle'e chee Cristo xelexebánqueze' za'a le'. <sup>17</sup> Te na', dxi'u na' naca bandxu xeché'e dxi'u tu zren nen benne' ca' ládújla beuj chee xezrágadxu Xránadxu lu be'. Ca'an gaca súalédxu Xránadxu chadía chacanna. <sup>18</sup> Chee le' na' le gutipa lázrele tule xetule nen dizra' caní.

**5** Na'a, ca naca chee bi zra, u bi iza xelá' Xránadxu, quebe dxun na ba xen guzúaja' chee, bi bicha'. <sup>2</sup> Ba nézquezle le'e zrin zra xelá' Xránadxu gate qué-bela nu dxebeza Le', ca za tu benne' gubán chizrela.

<sup>3</sup> Gate dxelenná bënneache: Cháwelleḡ dxaca cheḡdxu, ne quebe bi dxuchixre cheḡ, nadxa za da guzríá xi na benne' ca', ca za xel-la dxudía cheḡ tu nu'ula gate zuḡ' zi'i, ne quebe xeleeḡ lu da na'. <sup>4</sup> Le'e, bi bicha', quebe zúale lu da chul-la, cheḡ quebe gaca cheḡle lu zra na' xelá' Xránadxu ca dxaca cheḡ tu benne' dxu'u gubán lizre'. <sup>5</sup> Xúguteḡle le'e dxunle xrlátaje, da naca cheḡ xel-la naxaní', ne cheḡ te zra. Quebe dxundxu da calḡla, da naca cheḡ chizrela, ne cheḡ da chul-la. <sup>6</sup> Cheḡ le na' quebe dxal-la' gácadxu ca benne' la wase' ca dxelún benne' xula, san dxal-la' gácadxu ban lazre', ne guzéajni'i cuínadxu. <sup>7</sup> Benne' dxelase, chizrela dxelásie', ne benne' dxelezuzre, chizrela dxelezúzrequeḡ'. <sup>8</sup> Nácadxu dxi'u cheḡ te zra, na' dxal-la' guzéajni'i cuínaquezdXu. Che dxeajlí lázredxu Xránadxu, ne zri'idxu Le', da nigá gaca na cheḡdxu ca tu zra lana benne' zeje' wedil-la da naca na xia. Cá'anqueze che dxebeza lázredxu ladxu, da nigá gaca na cheḡdxu ca tu lapa xia ca da dxuzúa tu benne' zeje' wedil-la xíchaje'. <sup>9</sup> Dios quebe beḡe' cheḡdxu tedxu lu da ba xa' da sel-le' lu xel-la dxezrá'a cheḡ. Beḡe' cheḡdxu zrué'edxu xel-la weselá ne cheḡ Xránadxu Jesucristo. <sup>10</sup> Jesucristo gutie' waláz cheḡdxu cheḡ gaca bandxu tu zren nen Le', che naca bandxu, u che ba nátedxu gate zrin zra na'. <sup>11</sup> Cheḡ le na' le gutipa lázrele, ne le guzḡ chacha ljuwézrele tule xetule, ca ba dxúnquezle.

**Pablo dxuzéajni'ineḡ bi bíchedxu ca'**

<sup>12</sup> Le'e, bi bicha', dxata' xúentu' le'e gápale ba lá'ana benne' dxelunḡ' zrin ládujla le'e, benne' ca' gucá'a Xránadxu cheḡ xelenná be'eneḡ' le'e, ne xulusédeneḡ' le'e. <sup>13</sup> Dخال-la' gápale benne' ca' ba lá'ana, ne zri'ile le' lawe' da dxelunḡ' zrin cheḡ Dios. Le sua lu xel-la dxebeza zri lazre' tule xetule. <sup>14</sup> Cá'anqueze dxusebágantu' le'e, bi bicha', gusízrele benne' ca' quebe dxelaca lazreḡ' xelunḡ' zrin, ne gutipa

lázrele benne' ca' dxelate ni'a neḡe, ne gácaleḡle benne' quebe zaj ze' chacha, ne gácale zren lazre' nen xúguteḡ bënneache.

<sup>15</sup> Le guxúe xanne' cuínale cheḡ quebe gunle da calḡla cheḡ nu benne' dxunḡ' cheḡle da calḡla, san le gun ba xuzre gúnquezle da xrlátaje, tule xetule, ne cheḡ xúguteḡ bënneache.

<sup>16</sup> Le béquezele.

<sup>17</sup> Le guchálajlequezele Dios.

<sup>18</sup> Le xeḡ Dios: Xcalenu' ca naca xúguteḡ da dxaca cheḡle.

Dخال-la' gunle da nigá lawe' da naca na da dxaca lázrqueze Dios gunle le'e, lawe' da nácale bi cheḡ Jesucristo.

<sup>19</sup> Quebe guzágale da dxun Be' Lá'azxa.

<sup>20</sup> Quebe guzúale chalá'ala dizra' da nunezruj Be' Lá'azxa nu bi bíchedxu ca'.

<sup>21</sup> Le guchi'a xanne' xúguteḡ da ca', na' le si' da naca na xrlátaje.

<sup>22</sup> Le cuasa lu xúguteḡ da quebe naca na xrlátaje.

<sup>23</sup> Dios dxunḡe' dxi'u xel-la dxebeza zri lazre'. Dxenaba' lau Le' gunḡe' le'e benne' lá'azxaqueze, ne guxúe' be' nácaquezele, ne bënne'du xu'ule, ne beḡ-la' dxen cheḡle cheḡ gácale du lazre' lu zra na' xelá' Xránadxu Jesucristo. <sup>24</sup> Bënnea' bláwizreḡ' le'e naqueḡ' li lazre', na' Le' gunḡe' xúguteḡ da caní.

**Pablo dxuzḡe' dizra' bi bíchedxu ca'**

<sup>25</sup> Le'e, bi bicha', le naba lau Dios gácal-lene' netu'.

<sup>26</sup> Le gugapa diuzre xúguteḡ bi bíchedxu ca', ne gunídale le'.

<sup>27</sup> Lau Xránadxu dxusebaga' le'e gulábale xiche nigá lálwela xúguteḡ bi bíchedxu ca'.

<sup>28</sup> Dxenaba' lau Xránadxu Jesucristo gunḡe' cheḡle da chawe'. ¡Ca'an gaca na!

## 2 Tesalonicenses

Pablo dxugape' diuzre bi bíchedxu ca'

**1** Neda', Pablo, nen Silvano, ne Timoteo, dxugápan-tu' le'e diuzre. Dxuzúaja' da nigá cheęle le'e, bi bícha'dau', nazrágale cheę Cristo lu xęzre Tesalónica, ne nácale bi cheę Xradxu Dios, ne cheę Xránadxu Jesucristo. <sup>2</sup> Dxenaba' lau Xradxu Dios, ne lau Xránadxu Jesucristo gunę' cheęle da chawe', ne gunnę' le'e xel-la dxebeza zri lazre'.

**Dios guchię da belún benne' dul-la ca' gate xelá' Cristo**

<sup>3</sup> Le'e, bi bícha'dau', dxal-la' xęquezentu' Dios: Xcalenu' ca naca cheęle, da dxal-la' guntu' lawe' da ba dxegula xel-la dxeajlí lazre' cheęle, ne ba zúadxa xel-la nazrí'i lazre' len ljęwézrele tule xetule. <sup>4</sup> Cheę le na' dxuchálajntu' ca naca cheęle le'e lówela bi ca' cheę Cristo. Dxuchálajntu' ca dxuchaga laule da dxelún benne' ca' zaj nau zi' xuzrę' le'e, ne ca naca xel-la zi' da dxedele, san nácale zren lazre', ne dxeajlí lázrele Dios. <sup>5</sup> Da nigá dxulé'e na xlátaję naca Dios ca dxuchię da dxelún bėnneache, dxenné' naca cheęle chu'ule naga dxenná bea Lę' lawe' da dxedele xel-la zi' cheę la' xel-la dxenná bea cheę'.

<sup>6</sup> Xlátaję naca gudé Dios benne' ca' xel-la zi', benne' ca' dxuludéę' le'e xel-la zi' na'a, <sup>7</sup> na' guzúę' le'e naga xezí' lázrele cheę xel-la zi' da dxedele na'a. Xezí lázrele tu zren nen netu' gate xelá' Xránadxu Jesús, zęę xabáa nen gubáz blau ca' cheę xabáa cheę'. <sup>8</sup> Zęę nu'ę xi' cheę gudéę' lu da ba xa' benne' ca' quebe dx-elxúnbe'ę Dios, ne quebe dxuluzúę' dizra' ca dxenná dizra' chawe' cheę Xránadxu Jesucristo. <sup>9</sup> Benne' caní xelecuasę' naga zua Xránadxu lu xel-la szren cheę', ne xel-la dxenná bea cheę', na' xeledéę' xel-la zi' cheę da ba xa' chadía chacanna. <sup>10</sup> Caní gaca gate xelá' Xránadxu lu zra na' cheę xulucá'ana szren benne' cheę' ca' Lę', na' benne' ca' dxeajlí lazrę' Lę' xelape' Lę' ba lánana. Le'e gunle benne' ca' tu zren lawe' da guxéajlele cheę da bechébentu'.

<sup>11</sup> Cheę le na' tu dxuchálajlequezentu' Dios ca naca cheęle, ne dxenábantu' Lę' gaca cheęle sile da na' bláwizrę' le'e sile. Cá'anqueze dxenábantu' lau Dios guchínenę' xel-la waca cheę' cheę gaca gunle ca naca xúgute da xrlátaję da dxezá lázrele, ne xúgute zrin dx-unle ne cheę xel-la dxeajlí lazre' cheęle. <sup>12</sup> Caní gunle, gucá'ana szrenle La Xránadxu Jesucristo, na' Lę' gape' le'e ba lánana ne cheę xel-la xrlátaję cheę Dios cheędxu, ne cheę Xránadxu Jesucristo.

Benne' xriwe'

**2** Le'e, bi bícha', ca naca cheę zra xelá' Xránadxu Jesucristo cheę xutuę' dxi'u cheę Lę', dxata' xúentu' le'e <sup>2</sup> cheę quebe guchale ca dxéquele, ne quebe súale stębe cheę bi dizra' xuluchalaj bėnneache lálcala xelenné' naca na da dxunezruj Be' Lázxa le', u cheę xetú bila dizra' xénele, u cheę bi xiche xelenné' naca na da gusél-lantu' netu', che dxenná na ba belá' Xránadxu. <sup>3</sup> Quebe güele lataj nu si xę le'e, lawe' da xelélá' bėnneache xelebéaj xíchaję' Dios, ne la' bėnnea' dxedábague' Dios nédxula gate zrin zra xelá' Xránadxu. Bėnnea' dxedábague' Dios, na' ba naca cheę' cuía xíqueze', <sup>4</sup> na' tábague' xúgute da naca cheę Dios, ne xúgute da dxulucá'ana szren bėnneache. Gucá'ana szren cuinę' ca zrintę cheajché'ę lu xudau' cheę Dios, ne gun cuinę' ca Diósqueze.

<sup>5</sup> ¿Quebe dxeajsá lázrele gúchequeza' le'e da nigá gate na' zúalęna' le'e? <sup>6</sup> Le'e ba nézele Nu Benne' nuzague' bėnnea' dxedábague' Dios cheę quebe le'ę gate quebe ne zrin zra le'ę. <sup>7</sup> Ba dxun zrin xel-la waca da nagache cheę da calęla, san zua Nu Benne' nuzague' le na na'a, ca zrin zra xecuasa Bėnnea' nuzague' le na. <sup>8</sup> Nadxa la' bėnnea' dxedábague' Dios, na' Xránadxu Jesús gutię' le', guchínenę' be' da dxuaj na dxu'ę, ne guzría xi'ę le', guchínenę' xel-la naxaní' cheę zra zęę. <sup>9</sup> Benne' xriwe' na' zęę ne cheę xel-la dxenná bea cheę Satanás, na' lu dutę xel-la waca cheę na gunę' da ca' xelunna bea na, ne xel-la waca ca' da zaj naca na węn lazre', <sup>10</sup> ne guchínenę' xúgute da calęla ca' cheę si xęę benne' ca' xelebía xi'ę, benne' ca' quebe gulaca lazrę' xelezıę da li cheę xelélé'. <sup>11</sup> Cheę le na' Dios dxu'ę lataj si xę da calęla benne' ca' cheę xeléajle'ę cheę da węn lazre', <sup>12</sup> cheę xelebía xi' xúgute benne' ca' quebe gulaca lazrę' xeléajle'ę cheę da li, san dxeledánedxenę' da naca da calęla.

**Dios guquęę dxi'u cheę ladxu**

<sup>13</sup> Netu' tu dxál-la'queze xęntu' Dios: Xcalenu' ca naca cheęle le'e, bi bícha'dau', nazrí'i Xránadxu le'e, lawe' da gucá'a Dios le'e nédxute cheę lale. Be' Lázxa ba nunę' le'e cheę Dios lawe' da dxéajlele cheę da li. <sup>14</sup> Cheę gaca cheęle da nigá Dios ba bláwizrę' le'e ne cheę dizra' chawe' da dxuchálajntu', cheę zrué'ele xel-la szren cheę Xránadxu Jesucristo.

<sup>15</sup> Cheę le na', bi bícha'dau', le sę chacha, ne quebe gal-la lázrele da ca' bzéajni'intu' le'e caníqueze, ne cá'anqueze lu xiche. <sup>16</sup> Dxenaba' lau Xránadxu Jesu-

criso, ne lau Xradxu Dios, Bénnea' lu dutę xel-la xrlátaje cheę' bzri'ine' dxi'u, ne ba benne' dxi'u xel-la dxexúe zren cheę' tu chi'i gaze, ne tu xel-la dxebeza lazre' li. <sup>17</sup> Dxenaba' Lę' gutipe' lázrele, ne guzé chúchuę' le'e cheę nnale, ne gunle xúgutę da xrlátaje.

**Pablo dxennę xúene' bíchedxu ca' xelenabe' Dios gácalęne' lę'**

**3** Na'a, bi bícha'dau', le naba Dios gácalęne' netu', cheę zrinzega dizra' cheę Xránadxu xúgutę xęzre ca', ne cheę xelezí'ę na dutę lu xel-la ba lá'ana, ca guca ládujla le'e. <sup>2</sup> Le nábaquezle cheę ladxu lu na' benne' ca' dxelune' da calęla, ne lu na' benne' sban ca', lawe' da quegá xúgutę benne' dxeleajlí lazre' Cristo. <sup>3</sup> Xránadxu naquę' li lazre', na' Lę' guzé chachę' le'e, ne guxúę' le'e cheę quebe bi da calęla gaca na cheęle. <sup>4</sup> Dxuxrén lázrentu' Xránadxu gácalęne' le'e cheę gunle ca da dxęnentu' le'e, ca ba dxúnquezle. <sup>5</sup> Dxenábantu' lau Xránadxu gácalęne' le'e cheę gápale xel-la zri'i lazre' da gunna Dios le'e, ne gápale xel-la zren lazre' da gunna Cristo le'e.

**Dxal-la' gundxu zrin**

<sup>6</sup> Le'e, bi bícha'dau', lu La Xránadxu Jesucristo dxęnentu' le'e quebe gunle tuze nýtetęze bi bíchedxu quebe dxaca lazre' gunę' zrin, ne quebe dxune' ca da bsędentu' le'e. <sup>7</sup> Ba nézele dxal-la' gunle zrin ca bęntu' netu' gate na' zúalęntu' le'e. <sup>8</sup> Quebe nu cheę gudá-

guntu' cá'aze che nadxu quebe gudízrujntu' na. Bénle'ęquezentu' zrin te zra, ne chizrela cheę quebe bsaca zi'ntu' le'e da gáguntu'. <sup>9</sup> Nácaqueze cheęntu' nábantú' le'e da gáguntu', san bęntu' zrin cheę blé'entu' le'e dxal-la' gunle ca bęnquezentu' netu'. <sup>10</sup> Gate na' zúalęntu' le'e, bđentu' lu na'le da nadxixruj bea nigá: Benne' quebe dxaca lazre' gunę' zrin ca'an gunę' quebe gawę'. <sup>11</sup> Ba bęnentu' bál-lale le'e quebe dxunle zrin, na' dxedázele dxuchixre cheęle da dxaca cheę benne' xula. <sup>12</sup> Benne' caní dxixruj be'entu', ne dxusebágantu' lę' lau Xránadxu Jesucristo cheę xelune' zrin du lazre' cheę gata' da xele'aj xelawę'.

<sup>13</sup> Le'e, bi bícha', le gun da xrlátaje, ne quebe cheajtá lázrele. <sup>14</sup> Che nu benne' quebe dxuzúę' dizra' ca da dxennantu' lu xiche nigá, le nna' nu bénnea', ne quebe gunle lę' tuze, cheę gapa stuę'. <sup>15</sup> Quebe zrá'ale lę', san le guzėjni'i lę' ca bi bíchele.

**Pablo dxuzę' dizra' bi bíchedxu ca'**

<sup>16</sup> Xránadxu naquę' Bénnea' dxunne' dxi'u xel-la dxebeza zri lazre'. Dxenaba' lau Lę' gúnnaqueze' le'e xel-la dxebeza zri lazre' lu xúgutę da dxunle, ne súalęne' xúgutęle le'e.

<sup>17</sup> Neda', Pablo nen ná'aqueza' dxuzúaja' cheęle da nigá. Da nigá dxunna bea na xúgutę xiche da dxuzúajqueza' neda'. Caní dxuzúaja'. <sup>18</sup> Dxenaba' lau Xránadxu Jesucristo gunę' da chawe' cheę xúgutęle le'e. Ca'an gaca na.

# 1 Timoteo

Pablo dxugape' diuzre Timoteo

**1** Neda', Pablo, naca' gubáz chee Jesucristo lawe' da caní bdxixruj bea Dios, Xra Xránadxu Jesucristo, weselá cheedxu, Bénnea' dxebeza lázredxu xelá'tee'. <sup>2</sup> Dxuzúaja' da nigá chiu' lue', Timoteo, nacu' ca zrí'inequeza' lawe' da dxeajlí lazru' Cristo. Dxenaba' Xradxu Dios, ne Xránadxu Jesucristo gunē' chiu' da chawe', ne xexache lazre' lue', ne gunne' lue' xel-la dxebeza zri lazre'.

**Pablo dxusízrenē' Timoteo ca naca chee benne' ca' dxulúsedene' da wēn lazre'**

<sup>3</sup> Ca ba guta' xúeda' lue' gate na' bezá'a naga zu', ne bexá'a naga nababa xēzr la xu Macedonia, begá'ana lu xēzre Efeso chee nne xúenu' benne' ca' zaj zre'ē na' québedxa xulúsedene' da wēn lazre', <sup>4</sup> ne québedxa xululapa ne'ē dizra' dxuluzaze benne' ca' ca zaj naca zánete' xra xrtawe' ca'. Dizra' caní dxulutil-la na bēneache. Quebe naca na da xelácale na bēneache chee xelezé chache' ca dxeajlí lazre' Dios. Caní dxenē' xúeda' lue' xecha lasa.

<sup>5</sup> Dxennē' xúeda' lue' gunu' caní chee xelezrí'i ljwezre' dutē lázrdawe', chee quebe bi sua da gagu na zria lázrdawe' ca', ne gaca du lazre' ca dxeajlí lazre' Cristo.

<sup>6</sup> Bal-la benne' ca' belexecuase' lu da caní, na' ba zaj nazi'ē dizra' xálaze. <sup>7</sup> Dxelaca lazre' xuluxuzájle'ē da nadxixruj bea Dios, ne quebe dxeléajni'ine' da dxulúhálajqueze', ne ca naca da ca' dxuluxrén lazre'.

<sup>8</sup> Nezdxu da nadxixruj bea na naca na xrlátaje che nu benne' dxuchínene' na ca naca chee na. <sup>9</sup> Dxal-la' gusá lázredxu quebe bzua Dios da nadxixruj bea na chee nna be'e na benne' xrlátaje ca', san chee nna be'e na benne' ca' dxelunē' da calēla, ne benne' ca' quebe dxuluzé' xrtizre'ē, ne benne' ca' dxelunē' da zrinnaj, ne benne' wēn dul-la ca', ne benne' ca' quebe dxelape' Dios ba lá'ana, ne quebe dxelapa ba lá'ana da naca chee Dios, ne benne' ca' dxelute xra xrna', ne benne' ca' dxelutiē' benne', <sup>10</sup> ne benne' ca' dxelunē' da sban, ne benne' biu ca', benne' dxulugunē' ljwezre biue' ca nu'ula, ne benne' dxelebanē' benne' ca' chee xelutiē' le' lu na' benne' xula, ne benne' ca' dxelún lazre', ne benne' ca' dxelexechebe' da wēn lazre', ne benne' ca' dxuluchuque' da li. <sup>11</sup> Caní naca da dxulú'e dizra' chawe' da bsebagá Dios neda'. Naque' Dios xabáa, Benne' szrentē.

Pablo dxē'ē Dios: Xcalenu'

<sup>12</sup> Dxapa' Xránadxu Jesucristo: Xcalenu'. Naque' Bénnea' benne' neda' xel-la waca chee guna' da nigá, lawe' da dxelé'ene' neda' xlátaje, na' nuzú'ē neda' lu zrin chee'. <sup>13</sup> Xúgutē da caní ba bene' chia' lácala gunniá' schanni' chee Cristo gate nate, ne gudáu zi' xuzra' bi chee' ca', ne ben la' chee benne' ca'. Dios bexache lazre' neda' lawe' da quebe ne cheajlí lazra' Cristo, ne quebe guxéajni'ida' da na' bēna'. <sup>14</sup> Chee le' na' Xránadxu, dutē lu xel-la zri' i lazre' zren chee' bnite lawe' chia', ne benne' neda' xel-la dxeajlí lazre', ne xel-la zri' i lazre' da nápadxu lawe' da nácadxu bi chee Jesucristo.

<sup>15</sup> Da nigá naca na da li, na' xúgutē bēneache dxal-la' xeléajle'ē chee na. Caní dxenná na: Jesucristo ble'ē lu xēzr la xu nigá chee guselé' benne' dul-la ca', na' neda' nácadxa' benne' dul-la ca xúgutē benne' ca'.

<sup>16</sup> Chee le' na' Dios bexache lazre' neda' chee gulé'ē Cristo ca szren naca xel-la zren lazre' chee' nen neda', nácale'a benne' dul-la, chee gaca' neda' tu da gulé'ē na lau xúgutē benne' ca' xelajlí lazre' Cristo, na' xelape' xel-la nabán chadía chacanna. <sup>17</sup> Chee le' na' dxal-la' gápadxu ba lá'ana, ne güe lá'anadxu Bénnea' nna béaqueze' chadía chacanna. ¡Cabata' gatiē', ne quebe gaca lé'edxu Le', ne naque' Dios tu licha', ne sina! ¡Gaca ba Le' chadía chacanna! ¡Ca'an gaca na!

<sup>18</sup> Lue', bi chia', Timoteo, dxusebaga' lue' su' wedil-la chee tíl-lalēnu' da naca chee da calēla, ca da buluchalaj nédxutē benne' ca', benne' gulennē' waláz chee Dios ca dxal-la' gunu' lue'. <sup>19</sup> Bēxru tipa xel-la dxeajlí lazre' chiu', chee quebe bi sua da gulale na lu xichaj lazrda'u. Bal-la benne' ca' quebe belunē' caní, na' buluzú'ē chalá'ala xel-la dxeajlí lazre' chee'. <sup>20</sup> Caní guca chee Himeneo, ne chee Alejandro, benne' ca' bdea' neda' lu na' Satanás chee xulúsēdie' quebe xelennē' schanni' chee Dios.

**Ca dxal-la' guchálajledxu Dios**

**2** Da dxundxa na ba xen dxennē' xúeda' lue', dxal-la' ná bale lau Dios gácalenē' bēneache, ne guchálajlele Dios, ne gucá'ana szrenle Le', ne ná bale Dios gunnē' le'e da dxexázrjele, ne xēle Dios: Xcalenu'. Dxal-la' gunle caní, guchálajlele Dios da naca na chee xúgutē bēneache. <sup>2</sup> Cá'anqueze dxal-la' ná bale Le' gácalenē' benne' xichje ca', benne' dxelenná be'ene' bēneache, ne benne' xu'u lawe' ca' chee chadxu chawe', ne súadxu lu xel-la dxebeza zri lazre', ne guzúa cuí-nadxu lu na' Dios du lázredxu, ne gápadxu ba lá'ana

bénneache. <sup>3</sup> Da nigá naca na xrlátaje, ne da dzezaca ba lazre' Dios, weselá cheędxu, <sup>4</sup> lawe' da dxaca lazre' Lę' xeelá xúgute' bénneache, ne xelúnbe'e da li. <sup>5</sup> Zua tuze Dios, ne zua tuze wenaba cheę bénneache lau Dios, Bénnea' naque' Jesucristo, ne cá'aqueze ben cuine' bénneache. <sup>6</sup> Jesucristo bzua cuine' lu xel-la gute cheę bexá'awe' xúgute' bénneache, na' blé'ene' da na' ca bzin zra cheę na. <sup>7</sup> Cheę lę na' bzue' neda' gubáz cheę' cheę cu'a lban, ne gulé'eda' benne' ca' quebe zaj naque' judío dxal-la' xeleajlí lazre' Cristo, ne xelune' ca naca da li. Lau Cristo dxexečęba', ne quebe dxun lazra'.

<sup>8</sup> Cheę lę na' dxaca lazra' xuluchálaję xúgute' bėnneache Dios gáteteze na', ne xelechisa ne'e dute' xel-la li lazre' cheę' lau Dios, ne quebe xelezre'e' lįwezre', ne quebe xeledíl-lalęne' lįwezre' ca'. <sup>9</sup> Nu'ula ca' dxal-la' xelácuę' da naca xlátaje, ne ca naca cheę da dxelúe lechítaje cuine' dxal-la' gaca na xel-la dxexruj lazre', ne xel-la du lazre', ne quegá ca dxulupá'a xíchaje', ne quegá lechítaje da naca na oro, ne quegá bga ca', ne quegá zra lanę' da zácale'e na. <sup>10</sup> Dخال-la' xelún nu'ula ca' ba zaj nuzúu cuine' lu na' Dios. <sup>11</sup> Nu'ula ca' dute' lu xel-la dxexruj lazre' cheę' dxal-la' xuluzé nague' gate nu dxusęde xrtizra Dios, ne quebe xelenné' cheę na. <sup>12</sup> Quebe dxunna' lataj nu'ula gusędene' benne' biu ca', ne quebe nna be'ene' lę', san dxal-la' sue' zrize. <sup>13</sup> Caní naca na lawe' da ben Dios teca Adán, na' gudé na' bene' Eva, nu'ula cheę Adán na'. <sup>14</sup> Adán, quebe guzí xę da xriwe' lę', san guzí xę na Eva, nu'ula na', na' gudé guzí xę na lę', na' bene' dul-la. <sup>15</sup> Tu nu'ula gape' xel-la weselá che dxezanę' bidu ca', ne cheajlí lazre' Dios, ne nazri'ine' Lę', ne nuzúu cuine' lu na' Dios, ne gaque' dxexruj lazre'.

### Ca dxal-la' xelaca benne' ca' dxulusędene' bi ca' cheę Cristo

**3** Da líqueze naca da nigá: Che nu benne' dzezá lazre' gaque' benne' gusędene' bi ca' cheę Cristo, tu zrin xrlátaje dxaca lazre' gunę'. <sup>2</sup> Tu benne' dxusędene' bi ca' cheę Cristo:

Dخال-la' gaque' benne' quebe bi zua da dxunite na lę'.

Dخال-la' súałęne' tuze nu'ula.

Dخال-la' gaque' benne' dxuzęajni'i cuine',

ne benne' dxenná be'e cuine',

ne benne' nape' ba lá'ana.

Dخال-la' si' lu ne'e benne' xelezrine' lizre'.

Dخال-la' gaque' benne' dxaca dxusędene' bénneache.

<sup>3</sup> Quebe dxal-la' xé'aje' da guzuzre na lę',

ne quebe gutil-le' nu benne',

ne quebe sa lazre' dumí.

Dخال-la' gaque' benne' dxexruj lazre', ne zren lazre'.

<sup>4</sup> Dخال-la' nézene' nna be'ene' benne' zaj zre'e lizre',

ne gulé'ene' zrí'ine' ca' xelácabe' wezúu dizra',

ne xelápabe' ba lá'ana xra xrnabe'.

<sup>5</sup> Che nu benne' quebe nézene' ájala nna be'ene' benne' zaj zre'e lizre', zájazra gunę' gusędene' bi ca' cheę Dios? <sup>6</sup> Benne' dxusędene' bi ca' cheę Cristo

quebe dxal-la' gaque' benne' za dxúnbeate dizra' cheę Cristo, cheę quebe gucá'ana szren cuine', cheę quebe cuía xi'e ca guzríu xi' da xriwe'. <sup>7</sup> Cá'aqueze dxal-la' gaque' benne' nape' ba lá'ana lówela benne' quebe zaj naque' cheę Cristo, cheę quebe gata' lataj nu guzúu lę' chalá'ala, na' cheę quebe chu'e lu na' da xriwe'.

### Ca dxal-la' xelaca benne' dxelácalęne' bi ca' cheę Cristo

<sup>8</sup> Cá'aqueze benne' ca' dxelácalęne' bi ca' cheę Cristo:

Dخال-la' xelaque' benne' zaj nape' ba lá'ana, ne benne' li lazre'.

Quebe dxal-la' xelé'aje' da guzuzre na lę',

ne quebe xelaque' benne' dxulucudeę'.

<sup>9</sup> Dخال-la' xelapa xánne' da zácale'e cheę da dxeajlí lázredxu,

ne quebe bi sua da gagu na zríu cheę' lu xichaj lázrdawe'.

<sup>10</sup> Dخال-la' guxúe xánnele ca dxeledé'.

Te na', che quebe bi zua da dxagu na zria cheę', waca xelácalęne' bi ca' cheę Cristo. <sup>11</sup> Zru'ula benne' caní:

Dخال-la' xelaque' benne' zaj nape' ba lá'ana,

ne quebe xelaque' wetupa dizra' bizruj.

Dخال-la' xelaque' du lazre', ne li lazre' ca naca xúgute da dxelune'.

<sup>12</sup> Tu benne' dxácalęne' bi ca' cheę Cristo dxal-la' súałęne' tuze nu'ula, ne dxal-la' nézene' nna be'ene' zrí'ine' ca', ne benne' zaj zre'e lizre'. <sup>13</sup> Benne' ca' dxelácalęne' bi ca' cheę Cristo, che dxelune' cháwedau' zrin cheę', welezru'éne' xel-la ba lá'ana, na' xelezęquedxene' xuluchálaje' du lazre' ca dxeajlí lázredxu Jesucristo.

### Tu da ble'e Dios dxi'u ca naca da zęajłędxu

<sup>14</sup> Dxebeza lazra' xídazequeza' xedajnná'a lue', na' dxuzúaja' chiu' da nigá <sup>15</sup> cheę chęajni'inu' che dxezreda', ca dxal-la' gunu' lądujla benne' ca' zaj nababe' cheę Dios, benne' ca' ba bláwizra Dios ban, ne zaj nuxru chache' da li, ne dxuluxúe xánne' na. <sup>16</sup> Da li tu da zrentę naca da nigá ble'e Dios dxi'u ca naca da zęajłędxu:

Dios ble'e nigá, ne guque' bénneache.

Be' Lá'azxa blé'ene' naque' xlátaje.

Belelé'e gubáz cheę xabáa ca' Lę'.

Benne' dute' xęzr la xu belenne' ca naca cheę'.

Guleajlí lazre' benne' zaj zre'e dute' xęzr la xu nigá Lę'.

Dios bezi'e Lę' xabáa.

### Ca naca cheę benne' ca' dxuluzúe' chalá'ala xel-la dx-eajlí lazre' cheę'

**4** Be' Lá'azxa ba bdxixruj lię' wazrín zra xulusán bal-la benne' xel-la dxeajlí lazre' cheę', na' chjácáłęne' be' ca' xelezí xę na lę', ne xelezí'e ca da xululé'e be' xriwe' ca'. <sup>2</sup> Xuluzé nague' ca da xulusęde benne' węn lazre' ca', benne' dxelún lóweze da xrlátaje, ne québedxa zaj zua xel-la dxeléquebe'e xichaj lázrdawe', ne zaj naque' lázrdau zizraj, na' quebe zaj nape' xel-la



stu' gate dxelún lazre'. <sup>3</sup> Benne' caní quebe dxelu'e lat-ja nu guchaga na', ne cá'aqueze nu xe'aj gagu bal-la da dxágudxu, lácala ben Dios da ca' chee xelagu benne' ca' dxelejíl lazre' Le', ne benne' ca' zaj núnbe'e da li, ne xelé'e Le'; Xcalenu'. <sup>4</sup> Xúgutē da ben Dios naca na chawe', ne quebe dxal-la' bi guzúadxu chalá'ala, san dxal-la' sidxu na, ne xēdxu Dios; Xcalenu', <sup>5</sup> lawe' da naca chawe' lau Dios bíteteze da dxágudxu che dx-undxu ca dxenná xrtizre', ne che nábadxu Le' gune' gaca na da chawe'.

### Benne' wēn zrin xrlátaje chee Jesucristo

<sup>6</sup> Che dxusédenu' bi bíchedxu ca' da caní, nacu' bi wēn zrin chawe' chee Jesucristo, na' nazí lu na'u dizra' chee Dios, ne ca naca da dxusédedxu, da na' zéajlenu'. <sup>7</sup> Quebe gulapa na'u da dxuluzaze bēneache, ne dizra' xálaze. Bzazraj cuinu' lu da naca chee Dios. <sup>8</sup> Che dxuzazraj cuinu' ca naca lu be'l-la' dxen chiu' wá-calēqueze na lue' late', san che dxuzazraj cuinu' lu da naca chee Dios, wácalē na lue' lu xúgutē da dxunu', na' naca na da sidxu ba neza lu xēzr la xu nigá, ne cá'aqueze lu xēzr la xu da za za'. <sup>9</sup> Da li naca da nigá, na' xúgutē bēneache dxal-la' xeléajle'e chee na. <sup>10</sup> Chee le' na' dxudé xel-la' zi' cuínadxu dxundxu zrin lawe' da dxebeza lázredxu Dios ban, Bēnea' naque' weselá chee xúgutē bēneache, na' dxuselé' benne' ca' dxeajíl lazre' Le'.

<sup>11</sup> Da caní dxal-la' gusédenu' bēneache, ne nne xuenu' le' xelunē' na. <sup>12</sup> Quebe gu'u lataj nu guzúa lue' chalá'ala lawe' da nacu' benne' cuide', san dxal-la' gacu' tu da gulé'e na benne' ca' dxelejíl lazre' Cristo ca dxal-la' xelunē'. Gulé'e na le':

Nē chee da dxuchálaju',  
ne nē chee da dxunu',  
ne ca nazri'inu' le sa' ljwezru',  
ne ca naca Be' Lá'azxa zúalēne' lue',  
ne ca dxeajíl lazru' Cristo,  
ne ca nacu' du lazre'.

<sup>13</sup> Dxácatē xida' neda', ben zi' lazru' gulabu' xiche lá'azxa lávela bēneache, ne gutipu' lazre' bi bíchedxu ca', ne guzējajni'inu' le'. <sup>14</sup> Quebe gusanu' xel-la waca da bēna Dios lue' gate buluzé na' benne' gula ca' xichju', ne gulenné' ca da ble'e Be' Lá'azxa le' ca naca zrin chee Xránadxu da dxal-la' gunu'.

<sup>15</sup> Ben da caní du lazru' chee xelélé'e xúgutē bēneache nápaquezu' da naca chee Dios. <sup>16</sup> Bxue xanne' cuinu', ne ca da dxusédenu', ne guzē chacha lu zrin chiu'. Che gunu' da caní, na' guseláqueze cuinu', ne guseláquezu' benne' ca' xelennē' da guchálaju'.

### Ca dxal-la' xelaca benne' ca' dxelejíl lazre' Cristo

**5** Quebe cun til-lu' tu benne' gula, san bzéajni'i le' ca xráquezu'. <sup>2</sup> Gúcalē nu'ula gula ca' ca xrnáquezu'. Gúcalē nu'ula cuide' ca' ca bi zánquezu', dutē lu xel-la dxapa ba lá'ana chiu'.

<sup>3</sup> Gúcalē nu'ula ba nate benne' chee', nu'ula' quebe nu xrtiē' zradxa. <sup>4</sup> Che tu nu'ula ba gute benne' chee' ne zaj zra' zr'ine', u zre suē', lebe' dxal-la' xelunbe' ca da zaj nabágabe' chee xelácalēbe' benne' zaj naca xrtíaquezbe', ne xelunbe' ca da zaj nabágabe' chee xra xrnabe', lawe' da naca na xrlátaje, ne da dxezaca ba lazre' Dios. <sup>5</sup> Nu'ula da li québedxa nu chilá' chee' dxebeza lazre' Dios, ne dxuchálajlēne' Dios te zra, ne chizrela. <sup>6</sup> Nu'ula caní, che dxunē' ca da dxezaca ba lazre' léqueze', naque' ca benne' ba nate. <sup>7</sup> Bdxixruj be'e benne' ca' xelunē' caní, chee quebe gun na ba xen nu til-la le'. <sup>8</sup> Che nu benne' quebe dxebé'e gunne xue chee benne' ca' zaj naque' tuze, ne da dxun na ba xen che quebe dxácalēne' xrtíaqueze', ba bsane' xel-la dxeajíl lazre' chee', ne nácadxē' benne' wēn da zrinna' ca tu benne' quebe ne chéajle'e chee Dios.

<sup>9</sup> Lu xiche naga zria la nu'ula ca' quebe nu chilá' chee', benne' dxácalēle, dxal-la' guzúajle la nu'ula caní, nu'ula na' ba gudé'e ga xun iza, ne guzúa tuze benne' chee'. <sup>10</sup> Dخال-la' gaque' nu'ula ba bēnlē'e da xrlátaje ca da caní:

Che ba bsegulē' zr'ine' ca'.  
Che ba guzí' lu nē'e benne' bíchedxu belezrín lize'.  
Che ba gúcalēne' benne' caní dutē lu xel-la dxexruj lazre' chee'.

Che ba gúcalēne' benne' dxedé'e xel-la zi'.  
Che bi xetú da xrlátaje ba bēne'.

<sup>11</sup> Quebe guzríale lu xiche na' nu'ula caní che quebe ne xelezrē' ga xun iza lawe' da gagaze xucuasa xel-la dxelezá lazre' chee' le' lu da naca chee Cristo, na' xelaca lazre' xuluchaga nē'e xecha lasa, <sup>12</sup> na' xelebague' zria lawe' da bulusanē' ca da gulechēbe lazre' chee Cristo. <sup>13</sup> Cá'aqueze che dxeledé' tu tu xu'u, xelaque' zrawēde, ne quegaze zrawēde, san cá'aqueze xelaque' wetupa dizra' bizruj, na' xuluchixre chee' lu xúgutē da xelennē', ne xelenné' da quebe dxal-la' xelenné'. <sup>14</sup> Chee le' na' dxaca lazra' xuluxuchaga nē'e che ne zaj naque' nu'ula cuide', ne xelezrá zr'ine', ne xuluxúe' lize', chee quebe xelezr' lataj xelezr' tizra benne' ca' dxelezre'e dxi'u. <sup>15</sup> Bal-la nu'ula caní ba belexecuase' chee Cristo, ne zjácālēne' da xriwē'.

<sup>16</sup> Che nu benne' dxeajíl lazre' Cristo, benne' biu, u nu'ula, che zua xrtiē' naque' nu'ula ba gute benne' chee', dxal-la' gácalēne' le' chee quebe xelebaga bi ca' chee Cristo da nigá, na' benne' caní welezeque' xelácalēne' nu'ula caní québedxa nu chilá' chee'.

<sup>17</sup> Che zaj zra' benne' gula ca' dxulusédene' cháwedau' bi ca' chee Cristo, dxal-la' gápale'le benne' ca' ba lá'ana, na' dxundxa na ba xen gápale ba lá'ana benne' gula ca' dxuluchálajlequeze' le'e dizra' chee Dios, ne dxulusédene' le'e. <sup>18</sup> Lu xiche lá'azxa dxenná na: Quebe cu'ule xixruj dxu'a beze, bē dxíchujba' zrua' xtila. Cá'aqueze dxenná na: Benne' wēn zrin dxal-la' si'e xrlázruje'.

<sup>19</sup> Quebe guzē' nagu' che nu gagu zria chee tu benne' gula chee xudau' che quebe xelélé' chupa u chunna benne' xelēxchēbe'. <sup>20</sup> Benne' ca' dxelúnqueze' dul-la, dxal-la' til-lu' benne' ca' lávela xúgutē bi ca' chee

Cristo, chee xelezrebe xezícadxa benne' ca'. <sup>21</sup> Lau Dios, ne lau Xránadxu Jesucristo, ne lau gubáz blau ca' chee xabáa chee', dxusebaga' lue' chee gunu' da caní. Dxenné xueda' lue' quebe cueu' ca zaj naca benne', ne quebe gucha'u ca gunu' chee tu tu benne'. <sup>22</sup> Quebe xexúbenu' nu la guzúateu' lu zrin chee Cristo chee quebe bagu' dul-la chee benne' xula. Quebe gulapa na'u ne tu da calęla.

<sup>23</sup> Lawe' da quebe chawe' zua lę'u, ne tu lize dxaca na, quębedxa xę'aju' nısaze, san güe'e late' xrise uva wal-la.

<sup>24</sup> Zaj nalá' dul-la chee bal-la benne' gate quebe nu ne guchi'a ca da zaj nune', san dul-la da zaj nun xezícadxa benne' ca' xululę'e lawe na te na'. <sup>25</sup> Cá'unqueze zaj nalá' da xrlátaje da zaj nun bal-la benne', ne che zra da xrlátaje da quebe zaj nalá', quebe gaca tu xelegáchequeze na.

**6** Benne' zaj nada'u dxal-la' xelápale'ę ba lá'ana xranę' ca' chee quebe nu nne schanni' chee Dios, ne chee da dxusędedxu. <sup>2</sup> Che benne' zaj nada'u, zaj zra' xranę' ca' dxelejłi lazre' Cristo, quebe dxal-la' xuluzúę' lę' chalá'ala lawe' da zaj naque' benne' biche', san dxal-la' xelunę' zrin da nácadxa xrlátaje chee xranę' ca' dxelezi'ę ba neza zrin na', lawe' da dxelejłi lazre' Cristo, ne zaj naque' benne' biche' zaj nazri'ine'. Bzęajni'i benne' ca' da nigá ne bsizre lę'.

#### Da calęla da dxulusęde benne', ne xel-la gunnı'a li

<sup>3</sup> Che nu benne' dxusędene' da zaj naca calęla da quebe zaj naca na tuze ca da bsęde Xránadxu Jesucristo, ne ca da dxusęde da dxęajłedxu chee Dios, <sup>4</sup> benne' nigá dxucá'ana szren cuinę', ne quebe bi nézene'. Dxezá lázrele'ę gutil-le' benne' dizra' ca naca chee tu tu dizra' ca'. Benne' dxelún caní:

Dxelaque' benne' xre lazre', ne dxeledil-le',

ne dxulucháchalę ljwezre',

ne dxeléquene' dxun le sa' ljwezre' da calęla,

<sup>5</sup> ne tu lize dxulutil-la dizra' ljwezre',

ne zaj naque' benne' zaj nazrinnaj lu xichaj lázrdawe', ne quebe zaj nunbe'ę da li.

Dxeléquene' zrin dxundxu chee Cristo naca na tu da waca xuluchínene' chee xelaque' benne' gunnı'a. Quebe gunu' tuze benne' caní. <sup>6</sup> Da li da zęajłedxu chee Cristo naca na tu da gunnı'a zren, na' caní nácaqueze chee tuze bęneea' dxezaca ba lazre' ca da nape'. <sup>7</sup> Quebe bi núadxu gate gúlajdxu lu xęzr la xu nigá, ne quebe bi xexúadxu gate xezá'adxu nigá, <sup>8</sup> san che dę da gágudxu, ne zra lánadxu, dxal-la' xezaca ba lázredxu nen da ca'. <sup>9</sup> Benne' ca' dxelaca lazre' xelaque' gunnı'a, cheajlecházie' lu na' da xriwe', na' cheajlechu'e

lu xralaj chee lę na, chee xelezá lazre' da xálaze, da dxulucá'ana ditaj na bęneache, ne dxelegú'u na bęneache lu da ba xa' naga xelebía xi'ę. <sup>10</sup> Benne' nazri'ine' dumí dxunę' xúgutę da calęla, na' zaj zra' bal-la benne' gulezá lazre' na, na' bulusanę' xel-la dxelejłi lazre' chee', na' ba gulezı' lataj xel-la dxudía lu lázrdawe'.

#### Da dxusizre Pablo Timoteo

<sup>11</sup> Lue', węn zrin chee Dios, gucuasa lu da caní. Bęn da naca xlátaje, ne bzua cuinu' lu na' Dios, ne guxeajłi lazre' Cristo, ne bzri'i Lę', ne guca zren lazre', ne dxexruj lazre'. <sup>12</sup> Gudıl-lalę da xriwe', guchínenu' xel-la dxęajłi lazre' chiu'. Bęxru tipa xel-la nabán da chadıa chacanna lawe' da bláwizra Dios lue' chee gapu' da nigá, na' ba blę'enu' ca dxeajłi lazru' Cristo lávela zane' benne' dxelexechebe' chee na. <sup>13</sup> Na'a, lau Dios, Bęneea' nuzúę' xel-la nabán chee xúgutę da naca ban, ne lau Jesucristo, Bęneea' cá'unqueze blę'ene' da naque', ne bechebe' chee na lau Poncio Pilato, dxenné xueda' lue'. <sup>14</sup> Guzú' dizra' ca da dxapa' lue', ne quebe gucha'u na. Dخال-la' gunu' na chee quebe nu seque' bi nne chiu' ca zrin zra xelá' Xránadxu Jesucristo. <sup>15</sup> Ca zrin zra chee na Dios sel-le' Lę'. Naque' Dios tu licha', na' Benne' Lá'azxa dxenná be'ę. Naque' Wenná bea, Benne' dxenná be'ene' wenná bea ca', ne naque' Xrana xúgutę benne' zaj naque' xrana bęneache. <sup>16</sup> Tuze Dios quebe gatie', ne zuę' lu xel-la naxanı' naga quebe nu seque' cheaj. Netú bęneache quebe ne lé'ene' Lę', ne quebe nu gaca le'e Lę'. Chee Lę' naca xel-la ba lá'ana, ne xel-la dxenná bea chadıa chacanna. ¡Ca'an gaca na!

<sup>17</sup> Gunnę xue benne' zaj naque' gunnı'a lu xęzr la xu nigá chee quebe xulucá'ana szren cuinę', ne quebe xuluxrén lazre' xel-la gunnı'a chee', lawe' da quebe naca na da chadıa chacanna. Dخال-la' xuluxrén lazre' Dios ban, Bęneea' dxúnnałę dxi'u xúgutę da dxechínedxu chee sidxu da ba neza. <sup>18</sup> Gunnę xue benne' caní xelunę' da xrlátaje, ne xelaque' benne' gunnı'a lu da xrlátaje da xelunę', ne bi xulunęzruje' benne' xache' ca', ne xulunęzrujle'ę na. <sup>19</sup> Caní gaca, xelezrué'ene' xel-la gunnı'a da gaca na tu da guzúa chacha na lę' lu zra da za za', ne xelape' xel-la nabán da zeajłi canna.

<sup>20</sup> Lue', Timoteo, bxue xanne da nuzúa Dios lu na'u. Quebe guzę' nagu' dizra' xálaze chee xęzr la xu nigá, da na' dxelenná bal-la benne' naca na xel-la sina. Da nigá naca na da węn lazre'. <sup>21</sup> Bal-la benne' gulezı'ę na, na' bulusanę' xel-la dxelejłi lazre' chee'. Dxenábeda' Dios gunę' da chawe' chiu'. ¡Ca'an gaca na!

## 2 Timoteo

### Pablo dxugape' diuzre Timoteo

**1** Neda', Pablo, naca' gubáz chee Jesucristo lawe' da guca lazre' Dios gaca' caní, chee cu'a lban ca naca xel-la nabán da guchēbe lazre' Dios gunne' chee benne' ca' zaj naque' bi chee Jesucristo. <sup>2</sup> Dxuzúaja' da nigá chiu' lue' Timoteo, bi chia' nazrí'i lazra', na' dxenaba' Xradxu Dios, ne Xránadxu Jesucristo gunē' da chawe' chiu', ne xexache lazre' lue', ne gunne' chiu' xel-la dxebeza zri lazre'.

### Pablo dxusízreng' Timoteo chee gunbe' zrin chee Cristo

<sup>3</sup> Te zra ne chizrela gate dxuchálajlęna' Dios, ne dxearjsá lazra' lue', dxápequeza' Dios: Xcalenu', Bénnea' dxuna' zrin chee', ne quebe bi zua da dxagu na zria lu xichaj lázrdawa'. Dxuna' zrin na' ca belúnqueze xra xrtawa' ca'. <sup>4</sup> Dxeajsá lázrqueza' ca gudxezru' gate na' bezá'a naga zu', ne dxaca lázrele'a xel'éda' lue' chee gápale'a xel-la dxebé. <sup>5</sup> Cá'anqueze dxeajsá lazra' xel-la dxeajlí lazre' li da napu'. Xrna'u gula, Loida, ne xrna'u, Eunice gulape' xel-la dxeajlí lazre' caní, na' nuxrén lazra' lue' nápaquezu' na.

<sup>6</sup> Chee le' na' dxuzéajni'ida' lue' guchínenu' ca da bęna Dios lue' gate na' bzea' na'a xichju', ne gunaba' gun Dios da chawe' chiu'. <sup>7</sup> Be' Lá'azxa bęna Dios dxi'u quebe dxunę' dxi'u bi zra chebe, san dxunę' dxi'u xel-la wal-la, ne xel-la zri'i lazre', ne dxunę' dxi'u benne' dxenná be'e cuina. <sup>8</sup> Chee le' na' quebe gapa stu' ca naca chee Xránadxu, ne cá'anqueze ca naca chia' neda', xu'a lizre xia nigá lawe' da dxuna' zrin chee Cristo, san bchaga lau lue' xel-la zi' da dxeledé benne' ca' dxuluchálaję' dizra' chawe' chee Jesús, na' Dios gutípaqueze' lazru'. <sup>9</sup> Dios bselé' dxi'u, ne bláwizre' dxi'u chee guzúa cuínadxu lu na' Le', quegá lawe' da bęndxu tu da xrlátaje, san lawe' da guca lázrequeze Le' gaca na caní, ne lawe' da bzri'ine' dxi'u, nazrágadxu chee Cristo. Dios bzri'ine' dxi'u gate quebe ne gunte' xęzr la xu nigá, <sup>10</sup> na' blé'eng' xel-la zri'i lazre' nigá na'a, lawe' da gusel-le' Jesucristo, weselá cheędxu, na' bzria xi'e xel-la dxenná bea chee xel-la gute, ne blé'eng' bęneache ca gaca xelezí' lu ne'e xel-la nabán chadía chacanna, ca dxennáqueze dizra' chawe' da dxuchálajdxu.

<sup>11</sup> Dios bzue' neda' chee guchálaję' ca naca dizra' chawe' nigá, ne bęne' neda' benne' gubáz chee' chee gusédeda' benne' quebe zaj naque' judío. <sup>12</sup> Chee le' na' dxedéa' xel-la zi' caní. Quebe dxapa stu'a ne chee da nigá, lawe' da núnbe'a Bénnea' nuxrén lazra', ne

nezda' nape' xel-la waca cu'u chawe' da nuzúa' lu ne'e ca zrindxa zra na'.

<sup>13</sup> Bexru tipa ca naca dizra' da bsédeda' lue', ne quebe gusanu' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo. <sup>14</sup> Ne chee xel-la waca chee Be' Lá'azxa, Bénnea' zuę' xichaj lázrdaudxu, bęxru tipa da na' nuzúa Dios lu na'u.

<sup>15</sup> Ba nézenu' ca belún xúgute' bi bíchedxu zaj zre'e naga nababa Asia. Gulebéaj xíchaję' neda'. Cá'anqueze Figelo, ne Hermógenes belunę' tu zren benne' ca'.

<sup>16</sup> Dxenaba' Xránadxu xexache lazre' benne' zaj zre'e lizre Onesíforo. Gúcale le' neda' zane' lásaqueze, ne quebe gudapa stuę' chia' neda', xu'a lizre xia. <sup>17</sup> Gate ble'e xęzre Roma, bexílaję' neda', na' bezrélenę' neda'. <sup>18</sup> Dxenaba' Xránadxu xexache lazre' le' lu zra ná' gate xelá' Le'. Ba nézenu' ca gúcalele'eng' dxi'u lu xęzre Efe-so.

### Benne' węn zrin du lazre' chee Jesucristo

**2** Lue', zri'ina', guzé tipa ne chee da xrlátaje da nápadxu lawe' da nácadxu bi chee Jesucristo. <sup>2</sup> Ca da bennu' bchálaję' lówela benne' zan, benne' belex-echebe' naca na da li, bzua na lu na' benne' zaj naque' li lazre', benne' xelezéquene' xulusédene' na benne' xula.

<sup>3</sup> Lue' dxal-la' gacu' benne' węn zrin du lazre' chee Jesucristo, guchaga lau' xel-la zi' ca tu benne' zeje' wedil-la. <sup>4</sup> Netú benne' zeje' wedil-la, benne' xu'e lu zrin chee xranę', quebe dxunę' zrin xula, lawe' da dxaca lazre' xezaca ba lazre' xranę' chię'. <sup>5</sup> Cá'anqueze, benne' xu'e lu witaj quebe zrue'eng' da xexale' che quebe quitaję' ca naca chee na. <sup>6</sup> Cá'anqueze benne' dxaza dxa'ana, benne' dxúnle'e zrin, dxal-la' xezí' lu ne'e lina chee'. <sup>7</sup> Blaba lazre' ca da dxapa' lue', na' Xránadxu guzéajni'ine' lue' xúgute' na.

<sup>8</sup> Bsa lazre' ca naca chee Jesucristo, guquę' xrtia David, ne bebanę' ládujla benne' gate, ca dxenná dizra' chawe' da dxuchálaję' neda'. <sup>9</sup> Ne chee dizra' chawe' nigá dxedéa' xel-la zi', ne xu'a lizre xia nigá ca tu benne' węn da zrinna, san dizra' chee Dios quebe nu seque' cu'u le' na lizre xia. <sup>10</sup> Chee le' na' xúgute' da ca' dxuchaga lawa' ne chee benne' ca' ba gucá'a Dios le', chee cá'anqueze benne' ca' xelezé' ne chee Jesucristo, ne xelexexú'e lu xabáa chadía chacanna.

<sup>11</sup> Da nigá naca na da li: Che nuzúa cuínadxu gátedxu ca bzua cuina Le', cá'anqueze waca bandxu nen Le'.

<sup>12</sup> Che dxededxu xel-la zi',

na' nna béaquezdxu tu zren nen Le'.  
 Che quebe xechébedxu nácadxu bi chee Le',  
 cá'anqueze Le' quebe xechébe' nácadxu bi chee'.  
<sup>13</sup> Che dxi'u quebe nácadxu li lazre',  
 Le' nácaqueze' li lazre'.  
 Dios québequeze guché'ē ca naque'.

#### Tu benne' wēn zrin du lazre'

<sup>14</sup> Bsa lazre' bi bíchedxu ca', ne bsizre le' lu La Xrá-nadxu québedxa xulutil-la dizra' ljwezre'. Xel-la dxutil-la dizra' ljwezre quebe bi culuén napa na, san dxuxrin-naj na xichaj lázrdau benne' ca' dxelénne' na. <sup>15</sup> Ben ba xuzre gacu' wēn zrin du lazre' lau Dios, na' quebe gaca xel-la stu' chiu', lawe' da dxuchínenu' xrlátaje dizra' li. <sup>16</sup> Quebe gulapa na'u dizra' xálaze, ne dizra' sban da dxuluchálajze bénneache, da ca' dxulucuasa na bénneache lu da naca chee Dios. <sup>17</sup> Dizra' sban caní dxuluxrin-naj na xichaj lázrdau bénneache ca dxun tu wē' da dxuzru na lu bēl-la' dxen cheedxu. Caní guca chee Himeneo, ne Fileto, <sup>18</sup> benne' ca' gulecuase' lu xel-la li, na' dxelenné' ba belexebán benne' gate, na' dxuluxrín-najē' xel-la dxeajlí lazre' chee bal-la benne'. <sup>19</sup> Dios ba gudixruj bi'ē xrtizre' da naca na ca tu lane xu'u chee xel-la dxeajlí lazre' cheedxu, da dxenná caní: Xránadxu núnbe'ē bi chie' ca' Cá'anqueze dxenná na: Xúgute bi ca' chee Cristo québedxa dxal-la' xelune' da calēla.

<sup>20</sup> Tu lu xu'u zaca, quegá zra' tuze zriga xé'ena da zaj naca na oro ne plata, san cá'anqueze zaj zra' da zaj naca na xiaj ne xu. Dxuluchínene' da ca' zaj zácadxa lu da zaca, na' xezícadxa da ca' dxuluchínene' ájateze.

<sup>21</sup> Nácadxu ca zriga xé'ena ca'. Che nu benne' dxaca lazre' gaque' ca tu da zaca, chee gaque' benne' gu-chine Xránadxu lu zrin xrlátaje chee', dxal-la' xexadxe' ca naca da calēla ca'.

<sup>22</sup> Bxue xanne' cuinu' ca zaj naca da ca' dxelezá lazre' benne' cuide' ca', ne quebe gusanu' da xrlátaje da dxunu', ne ca dxeajlí lazru' Cristo, ne ca nazri'inu' Le', ne ca dxebeza zri lazru', da ca' dxunu' tu zren nen xúgute benne' ca' du lazre' dxululáwizre' Xránadxu. <sup>23</sup> Quebe gulapa na'u dizra' xálaze, ne dizra' quebe zeaj xrlátaje, lawe' da nézenu' dxuluzúa na bénneache lu da ba xa'.

<sup>24</sup> Benne' wēn zrin chee Xránadxu:

Quebe dxal-la' tíl-lalēne' benne'.  
 Dخال-la' gaque' zri'i lazre' nen xúgute bénneache.  
 Dخال-la' gaque' benne' dxezeque' gusédene' bénneache.

Dخال-la' gaque' zren lazre',

<sup>25</sup> ne dutē xel-la dxexruj lazre' gusízrene' benne' dxelune' da calēla.

Caní dxal-la' gune' che ba benla Dios xelexexéaje lazre' benne' ca chee xelúnbe'ē da li, <sup>26</sup> na' xeelé' lu xralaj chee da xriwē', naga nuzrá na le', na' dxelune' ca da dxenná le' na.

#### Ca xelaca bénneache lu zra bzebe

**3** Cá'anqueze dxal-la' nézele lu zra bzebe ni' gaca na stēbe chee bénneache. <sup>2</sup> Bénneache ca' xel-laque':

Benne' xelezrí'ize cuina, ne xelezrí'ine' dumí.

Xulucá'ana szren cuine',

ne xulucá'ana cuine' ca benne' blau ca'.

Xelenné' schanni' chee Dios,

ne quebe xuluzúe' dizra' chee xra xrne'ē.

Xelaque' benne' quebe dxelezí le',

ne benne' quebe dxelapa ba lá'ana Dios.

<sup>3</sup> Quebe xelaque' zri'i lazre',

ne quebe xelexexache lazre' ljwezre'.

Xelenné' chee ljwezre', ne quebe xelenná be'e cuine'.

Xelaque' benne' snia ca', ne xuluzúe' chalá'ala da

naca xrlátaje.

<sup>4</sup> Quebe xelaque' li lazre' nen ljwezre'.

Xelaque' benne' dxelexube.

Xeléquene' zaj naque' benne' szrentē.

Xelexezaca ba lázredxene' da ca' dxeledánene' quéz-cala da naca chee Dios.

<sup>5</sup> Lácala xululé'e cuine' ca benne' zaj naque' chee Dios,

quebe súale le' xel-la waca chee Dios.

Quebe gunu' tu zren benne' ca'. <sup>6</sup> Ca zaj naca benne' caní zaj naca benne' ca' zjaque' tu tu xu'u, ne dxelezí xe'ē nu'ula quebe zaj zię' du lazre', ne zaj zua da dxagu na zria lázrdawe' da naca chee xtul-le'. Xel-la dxelezá lazre' chee nu'ula caní nazrube xu na le'. <sup>7</sup> Lácala tu dxulusedezqueze' chee xel-la li, cabata' dxeléa-jni'iquezne' na. <sup>8</sup> Ca belún Janes ne Jambres, benne' wazrá' ca', benne' ca' guledábague' Moisés, cá'anqueze dxelún benne' caní, dxeledábague' xel-la li. Zaj nazrinnaj xichaj lázrdawe', ne belexecuase' lu xel-la dxeajlí lazre' chee Dios. <sup>9</sup> Quebe bi xelezrué'e benne' caní, lawe' da xeleeque bé'eequeze xúgute bénneache zaj naque' benne' xálaze, ca gulaca benne' chupa ca' guledábague' Moisés.

#### Da bzebe da dxusebaga Pablo Timoteo

<sup>10</sup> Ba benu':

Ca da bzéajni'ida' bénneache, ne blé'eequeznu' ca bēn-queza'.

Nézenu' da dxaca lazra' guna', ne ca dxeajlí lazra' Cristo.

Bchaga lawa' da guxzaca', ne nazrí'ida' xúgute bēnneache.

Nézenu' ca naca xel-la zren lazre' chia'.

<sup>11</sup> Blé'enu' ca guláu zi' xuzre' neda', ne ca gudéa' xel-la zi'.

Nézenu' xúgute da guzraca' lu xezre Antioquía, ne xezre Iconio, ne xezre Listra.

Guláu zi' xuzre benne' ca' neda', na' Xránadxu bselé' neda' lu xúgute da ca'.

<sup>12</sup> Xúgute benne' ca', benne' dxelaca lazre' xelúnqueze' ca da dxenná Jesucristo, weláu zi' xúzrequeze

bénneache le'. <sup>13</sup> Benne' ca' dxeluné' da calela, ne benne' dxelezí xē'ē welúndxaqueze' da calela. Xelezí xē'ē bénneache, na' benne' xula xelezí xē'ē benne' caní.

<sup>14</sup> Lue', guzé chacha ca da ba naxéajni'inu', da na' nuxrén lazru'. Nézqueznu' nu bsēde lue', <sup>15</sup> na' ne ná-cateu' bídau'tē ba núnbe'u da dxenná lu xiche lá'azxa, da dxezeque na guzéajni'i na lue', cheē lau' lawe' da dxeajlí lazru' Jesucristo. <sup>16</sup> Xúgutē da naxúaj na lu xiche lá'azxa naca na da bzéajni'i Dios benne' ca' zaj naque' bi cheē Le', ne naca na da dxuzéajni'i na dxi'u, ne da dxedil-la na benne' dxeluné' da calela, ne da dxusizre na dxi'u, ne da dxulé'e na dxi'u ca dxal-la' gundxu da xrlátaje, <sup>17</sup> cheē gaca du lazre' bi cheē Dios, na' gácabe' bi nazēde xanne cheē gunbe' xúgutē da xrlátaje.

**4** Lau Dios, ne lau Xránadxu Jesucristo, Bénnea' guchi'ē cheē benne' ban ca', ne cheē benne' gate ca' gate zē'ē xedajnná be'ē, dxusebaga' lue' <sup>2</sup> guchá-laju' dízra' cheē Dios, ne gunu' ba xuzre guchálaju' che xuluzé naga bénneache, ca xuluzé nague'. Bzéajni'i benne' ca' dutē xel-la zren lazre' chiu', ne ble'e le' ca da zaj nabague'. Gudil-la, ne bsizre benne' ca'. <sup>3</sup> Caní dxal-la' gunu' lawe' da wazrín zra québedxa xuluzé naga bénneache cheē xel-la li da dxusédedxu. Ca dxelezá lázrqueze le', xulunné' zane' benne' xulusédené' le' ca da dxelaca lázreze le' xelenne'. <sup>4</sup> Québedxa xuluzé nague' da li. Wuluzé nague' dízra' da dxuluzaze bénneache. <sup>5</sup> Na' lue', bzéajni'i cuinu' lu xúgutē da caní. Bchaga lau xel-la zi' da teu'. Bzua cuinu' cheē guchálaju' dízra' chawe' cheē Cristo, ne ben zrin da nabagu' cheē Cristo.

<sup>6</sup> Ba bzrin zra guzúa' xel-la nabán chia' lu na' Dios, lawe' da ba zua bagu xelutiē neda'. <sup>7</sup> Du lazra' gudábaga' benne' ca' guledábaguē' da naca cheē Cristo. Tu bēnzqueza' ca naca da li cheē', ne ba bexuzre bēna' da bsebaga Cristo neda' guna'. <sup>8</sup> Lawe' da bēna' da xrlátaje, na'a ba dxebeza da dxexala' neda', da na' gunna Xránadxu neda' lu zra na', ne quegá tuza' neda' gunnē' na. Cá'anqueze gunézruje' na cheē benne' ca' dutē xel-la zri'i lazre' cheē' dxelebeze' zra xelé'ē.

### Pablo dxulé'ene' Timoteo ca dxal-la' gunbe'

<sup>9</sup> Ben ba xuzre xídazeu' xedajnná'u neda'. <sup>10</sup> Ba guleaj xichaj Demas neda' lawe' da dxedánedxabe' da naca cheē xēzr la xu nigá, ne ba zexíajbe' Tesalónica. Crescente ba gusel-la'-be' zexíajbe' naga nababa Galicia, na' Tito gusel-la'-be' naga nababa Dalmacia. <sup>11</sup> Tuze Lucas zúalebe' neda'. Bexilaj Marcos, na' guché'-be' tu zrén len lue', lawe' da wazéquebe' gácalebe' neda' lu zrin cheē Cristo. <sup>12</sup> Tíquico gusel-la'-be' lu xēzre Efeso. <sup>13</sup> Gate xidu', gúagu' gabán chia' da nucá'ana' xēzre Troas lizre Carpo. Cá'anqueze gu'u xiche ca' bcá'ana' ga na', ne da dxuntē na ba xen gu'u xiche ca' zaj naca na xide.

<sup>14</sup> Alejandro, benne' gubizre xia bsaca' zí'le'ē neda'. Xránadxu gunézruje' lazruj cheē' ca da bēne'. <sup>15</sup> Bxue xanne cuinu' cheē benne' nigá lawe' da ba gudábagale'ē dízra' da dxuchálajdxu.

<sup>16</sup> Da nedxu lasa gate becheba' ca naca chia' lau benne' xu'u lawe' ca', netú benne' quebe gúcale'ē neda'. Xúgutē' buluzá' xíchaje' neda'. <sup>17</sup> Gúcale' Xránadxu neda', ne btipe' lazra' cheē guzéqueda' bchálaja' dízra' chawe' lau xúgutē benne' ca' quebe zaj naque' judío. Ca'an guca bselá Xránadxu neda' lu na' benne' ca', ca dxun benne' dxuselé' béadu ca' lu dxu'a bezre xixre', <sup>18</sup> na' guseláqueze' neda' lu xúgutē da calela, ne guxúequeze' neda' ca zrin zra xezrina' xabáa naga dxenná bea Le'. ¡Gaca báqueze Le'! ¡Ca'an gaca na!

### Benne' cheē Cristo dxulugapa diuzre ljwezre'

<sup>19</sup> Dxugapa' diuzre Priscila, ne Aquilo, ne benne' zaj zra' lizre Onesíforo. <sup>20</sup> Erasto begá'anabe' xēzre Corinto, na' bcá'ana' Trófimo lu xēzre Mileto lawe' da quebe chawe' zúabe'. <sup>21</sup> Ben ba xuzre xidu' nigá dxácatē quebe ne chú'udxu beu' zaga. Eubulo, ne Pudente, ne Lino, ne Claudia, ne xúgutē bi bíchedxu zaj zre'ē nigá dxulugape' lue' diuzre.

<sup>22</sup> Dxenaba' Xránadxu Jesucristo súde'ē lue', ne dxenaba' Dios gunē' da chawe' cheē xúgutēle le'e. ¡Ca'an gaca na!

# Tito

## Pablo dxugape' Tito diuzre

**1** Neda', Pablo, naca' wən zrin chee Dios, ne gubáz chee Jesucristo chee guzėjni'ida' benne' ca' ba gucá'a Dios chee xeleajlí lazre' Cristo, ne xelúnbe'e da naca li lazre' chee da naca chee Dios, <sup>2</sup> ne chee xelebeza lazre' xel-la nabán chadía chacanna, da guchebe lazre' Dios gunne' cheedxu gate za gunte' xęzr la xu nigá. Dios quebe dxun lazre', <sup>3</sup> na' na'a, ca ba bzrin zra chee na, ba bzėjni'ine' dxi'u ca naca xrtizre' ne chee da bxrize' Dios neda' cu'a lban chee na. Dios nácaqueze' weselá cheedxu. <sup>4</sup> Dxuzúaja' da nigá chiu', Tito. Nacu' ca zrí'inequeza' lawe' da dxeajlí lázredxu Cristo. Dxenaba' lau Xradxu Dios, ne lau Xránadxu Jesucristo, Benne' weselá cheedxu, gunę' chiu' da cháwedau', ne xexache lazre' lue', ne gunne' lue' xel-la dxebeza zri lazre'.

## Zrin da dxun Tito lu xęzr la xu Creta

<sup>5</sup> Bcá'ana' lue' lu xęzr la xu Creta da naxechaj nisa chee gucá'ana chawu' da quebe begá'ana chawe' ládujla bíchedu ca', ne chee gunnitu' benne' gula chee xudau' tu tu xęzredu ca', cáteze bxriseda' lue' gunu'. <sup>6</sup> Tu benne' gula chee xudau':

Dxal-la' gaque' benne' quebe bi zua da gagu na chie'.  
Dxal-la' súalęne' tuze nu'ula.

Zrí'ine' dxal-la' xelácabe' bi ba dxėjlí lázrebe' Cristo.  
Quebe bi da zrinnej dxelún zrí'ine' ca',  
ne quebe gaca nu gagu zria chee da dxelunbe'.

<sup>7</sup> Lawe' da xu'u lu ne'e zrin chee Dios, tu benne' dxuxúe' benne' zaj nababe' chee Cristo:

Dxal-la' gaque' benne' quebe bi zua da gagu na zria chee'.

Quebe dxal-la' gaque' benne' dxucá'ana szren cuine'.

Quebe dxal-la' gaque' benne' xichaj zra'a.

Quebe dxal-la' gaque' benne' dxé'aje' da dxuzuzre na le'.

Quebe dxal-la' gaque' benne' dxedíl-lalęne' bėneache.

Quebe dxal-la' gaque' benne' dxucúdeę'.

<sup>8</sup> Dxal-la' súateze' si' lu ne'e benne' zjaque' lizre'.

Dxal-la' gunę' da naca cháwedau'.

Dxal-la' gaque' benne' nna be'e cuine'.

Dxal-la' gaque' benne' xrlátaje.

Dxal-la' gaque' benne' nuzúa cuine' chee Dios.

Dxal-la' gaque' benne' dxuzėjni'i cuine'.

<sup>9</sup> Dxal-la' gaque' benne' nuzúa cuine' chee dizra' li.

Dizra' li naca na da bsęde nu benne' le' chee séquene' gusızreņe' benne' xubla ne chee da li da dxusędene', ne chee séquene' guzexruje' lazre' benne' ca' dxelennę' chee da li na'.

<sup>10</sup> Caní dxal-la' gunę' lawe' da zrále'e benne' dxelennę' chee dizra' li, benne' dxelezí xę'e benne' xubla lu da xala da dxlennę'. Zane' benne' Israel dxelunę' caní.

<sup>11</sup> Dxal-la' guzúa zriu' benne' dxelunę' da caní lawe' da dxuluxrinnaje' xichaj lázxdau xúgute benne' zaj zra' tu tu xu'u naga dxelú'e chee xulusędene' da quebe naca xrlátaje. Dxelunę' caní chee xelezi' lu ne'e dumí. Da nigá da dxelunę' naca na da caleła.

<sup>12</sup> Tu benne' Creta naga zu', benne' gunnę' waláz chee xudau' chee benne' ca', gunnę': "Benne' Creta zaj nácaqueze' wən lazre', ne zaj naque' ca be snia ca', ne zaj naque' benne' wagu xrata', ne zrawęde." <sup>13</sup> Da li gunnę'. Chee le' na' gudíl-laqueze benne' ca' chee xelaque' li lazre' ca dxelejli lazre' Cristo, <sup>14</sup> ne chee quebe xuluzę nague' dizra' da dxuluzaze benne' Israel ca', ne ca naca da nadxixruj bea ca' da dxelún benne' ca' dxuluzúe' chalá'ala dizra' li.

<sup>15</sup> Xúgute naca na xrlátaje chee benne' ca' zaj naca xrlátaje xichaj lázrdawe', san chee benne' ca' dxelunę' da sban, ne québedxa dxelėjle'e chee Cristo, quebe bi de da naca xrlátaje. Zaj nazrinnaj xichaj lázrdawe'.

<sup>16</sup> Benne' caní dxelennę' zaj núnbe'ene' Dios, san da dxelunę' dxulé'e na quebe naca da li da dxelennę'. Zaj naque' benne' wən da sban, ne benne' wən da caleła, ne quebe xelezėquene' xelunę' tu da xrlátaje.

**2** Dxal-la' guchálaju' da ca' dxusęde na dxi'u da naca li.

<sup>2</sup> Benne' gula chee xudau':

Dxal-la' xelaque' benne' dxelenná bé'e cuine'.

Dxal-la' xelaque' benne' du lazre'.

Dxal-la' xelaque' benne' dxuluzėjni'i cuine'.

Dxal-la' xelaque' li lazre' ca dxlejli lazre' Cristo,

ne ca zaj nazrí'ine' Le',

ne ca naca xel-la zren lazre' chee'.

<sup>3</sup> Cá'anqueze nu'ula gula ca' chee xudau':

Dxal-la' dxelapa ba lá'ana Dios ca naca xúgute da dxelunę'.

Quebe dxal-la' xelaque' benne' dxulutupe' dizra' bizruj.

Quebe dxal-la' xelaque' benne' dxelėjle'e da xuzuzre na le'.

Dxal-la' xulusędene' da naca xrlataje

<sup>4</sup> chee gaca xulusędene' nu'ula cuide' ca'

chee xelezrí'ine' benne' chee' ca', ne zrí'ine' ca',

<sup>5</sup> ne chee xelenná be'e cuine',

ne xelaque' du lazre',  
ne xulupęę lizre',  
ne xuluzúę' dizra' cheę benne' cheę'.  
Caní dxal-la' xelunę' cheę quebe nu nne' schanní' cheę  
xrtizra' Dios.

<sup>6</sup> Cá'anqueze bsizre bi cuide' ca' cheę xelenná be'e  
cuínabe'. <sup>7</sup> Ca naca da xrlátaje dxunu' lue' dxal-la'  
gulé'e na benne' ca' ca dxal-la' xelunę'. Gate dxuséde-  
nu' benne' ca' dxal-la' gacu' li lazre', ne du lazre'. <sup>8</sup> Dx-  
al-la' guchálaju' da naca li lazre' cheę quebe nu seque'  
si tizra le' na. Che gunu' caní, na' che nu benne' nnie'  
cheęle, wedué'eqezne', lawe' da quebe sua tu da  
caleła da dxunle.

<sup>9</sup> Bzėjni'i benne' ca' zaj nada'u cheę xuluzúę' dizra'  
cheę xranę' ca naca xúgute' da xelę xranę' le'. Dخال-la'  
xelunę' da xelexezaca ba lazre' xranę', ne quebe  
xelennę' lau xranę'. <sup>10</sup> Quebe dxal-la' xelebanę' da  
naca cheę xranę', san dxal-la' xelaque' li lazre', cheę  
xelélé'e benne' ca da dxelún benne' caní, na' xelennę'  
chawe' cheę xrtizra' Dios, Benne' weselá cheędxu.

<sup>11</sup> Dios ba blé'ene' ca naca da chawe' cheę' cheę  
xelélé' xúgute' bėnneache. <sup>12</sup> Da xrlátaje cheę Dios  
dxuséde na dxi'u cheę québedxa gundxu da caleła, ne  
ca naca xel-la dxezá lazre' da caleła, san cheę nna be'e  
cuínadxu, ne gácadxu du lazre', ne gápadxu ba lá'ana  
Dios lu xęzr la xu nigá <sup>13</sup> dxácatę ne dxebézadxu zra  
xelá' Dios szren, ne weselá cheędxu Jesucristo nen xel-  
la szren cheę', da na' dxebeza lázredxu. <sup>14</sup> Le' bzua  
cuinę' lu na' benne' ca' belútię' Le' waláz cheędxu dxi'u  
cheę bselé' dxi'u lu xúgute' da zrinnaj, na' bca'ana  
chawę' dxi'u cheę gácadxu bi cheęqueze', ne cheę  
gundxu da xrlátaje du lázredxu.

<sup>15</sup> Da caní dxal-la' gusédenu' benne' ca'. Gudil-la  
benne' ca', ne bsizre-ne' dutę xel-la dxenná bea chiu'.  
Quebe bi da caleła gunu' cheę quebe nu si tizra lue'.

#### Da dxal-la' xelún benne' zaj nababę' cheę Cristo

**3** Bsa lazre' benne' bíchedxu ca' cheę xelunę' ca dx-  
uluchixruj benne' ca' dxelenná bé'ene', ne benne'  
xu'u lawe', ne cheę xuluzúę' dizra' cheę benne' ca', ne  
cheę xeluzúę' xelunę' xúgute' da xrlátaje. <sup>2</sup> Quebe dxal-  
la' xelennę' cheę nu benne', san dxal-la' xelaque' zren  
lazre', ne zri'i lazre', ne dxexruj lazre' lau xúgute' bėn-  
neache. <sup>3</sup> Cá'anqueze dxi'u gate nate gúcadxu benne'  
xala, ne quebe bzúadxu dizra' cheę Dios. Gudadxu  
caleła, na' gunná be'e bęla' dxen cheędxu dxi'u, cheę

bęndxu ca naca xúgute' da guzá lázredxu, ne da beza-  
ca ba lázredxu. Bęndxu da zrinnaj, ne gúcadxu xa  
lazre'. Belecuide bėnneache dxi'u, na' bzrá'adxu  
ljwézredxu tudxu xetudxu. <sup>4</sup> Gate Dios, weselá  
cheędxu, blé'ene' da naca chawe' cheę', ne xel-la zri'i  
lazre' cheę', <sup>5</sup> na' bselé' dxi'u, quegá lawe' da bęndxu  
dxi'u tu da xrlátaje, san lawe' da bexache lazre' dxi'u.  
Bselé' dxi'u ne cheę da gudibe na dxi'u gate na'  
bexálajdxu, na' bucube Be' Lá'azxa cheę' dxi'u. <sup>6</sup> Ne  
cheę Jesucristo, weselá cheędxu, Dios ba núnnałęę  
dxi'u Be' Lá'azxa cheę', <sup>7</sup> cheę ne cheę da naca chawe'  
cheę' gácadxu xrlátaje lau Le', ne zrué'dxu xel-la  
nabán chadía chacanna da dxebeza lázredxu. <sup>8</sup> Da caní  
zaj naca na da li. Dxaca lazra' gusízrequeznu' benne'  
ca' ca naca da caní cheę xelebé' gunne xue xelún  
benne' ca' da chawe', benne' ca' dxelėjle' cheę Dios.  
Da caní zaj naca na da xrlátaje, ne da gaca xuluchine  
xúgute' bėnneache. <sup>9</sup> Quebe gulapa na'u dizra' xala ca',  
ne dizra' dxuluzaze bėnneache ca naca cheę zra  
xrtawę', ne dizra' da dxun na bėnneache chupa la'a, ne  
da dxulutil-la bėnneache da naca cheę da bchixruj be'e  
Moisés. Da caní quebe culún zaj napa na. Dácheze  
naca na.

<sup>10</sup> Che nu benne' dxunę' le'e chupa la'a, bsizre-ne' tu  
chupa lasa, ne che quebe dxennę' ca dxu'u le', bebéa-  
je' ládujla le'e <sup>11</sup> lawe' da nézenu' nazrinnaj xichaj lázx-  
dau benne' caní, na' dul-la dxelúnqueze' ba nuzría xi  
na le'.

#### Da dxal-la' gun Tito

<sup>12</sup> Gate sel-la' Artemas u Tíquico naga zu', bęn bax-  
uzre xidu' xedajna'u neda' lu xęzre Nicopolis lawe' da  
bache nuna' sua' nigá beu' zaga ca'. <sup>13</sup> Gúcale Zenas,  
benne' wedé dizra', ne Apolos, ca da séquenu'. Bnezruj  
benne' ca' ca da zaj nachínene' cheę chjaque' lu neza  
cheę', na' quebe bi xelexázrjene'. <sup>14</sup> Cá'anqueze benne'  
zaj nabábalęne' dxi'u dxal-la' xulusédię' xelunę' da  
chawe', cheę xelácalęne' benne' dxelexázrjene', cheę  
xelaque' benne' guchine Cristo.

#### Pablo dxuzę' Tito dizra'

<sup>15</sup> Xúgute' benne' zráłęne' neda' dxulugape' lue' di-  
uzre. Bgape diuzre benne' ca' zaj nazrí'ine' dxi'u lu da  
naca cheę Cristo. Dxenaba' Dios gun chawęę xúgutele  
le'e. ¡Ca'an gaca na!

# Filemón

## Pablo dxugape' diuzre Filemón

**1** Neda', Pablo, xu'a lizre xia lawe' da dxuna' zrin chee Jesucristo, nen bi bíchedxu Timoteo. Dxugá-pantu' lue' diuzre, Filemón, benne' nazrí'ite lázrentu'. Nacu' bi ljuézrentu' lu zrin chee Cristo. <sup>2</sup> Dxugapa' diuzre benne' bíchedxu ca' dxelezague' lizru', ne nu'ula zandxu Apia, ne Arquipo, bi ljuézredxu nácabe' benne' zeje' wedil-la chee Cristo. <sup>3</sup> Dxenaba' Xradxu Dios ne Xránadxu Jesucristo gunē' da chawe' chee, ne gunne' le'e xel-la' dxebeza zri lazre'.

## Ca naca chee Filemón

<sup>4</sup> Dxápequeza' Dios xcalenu' gate dxuchálajlęna' Lę' ne dxeajsá lázrqueza' lue', <sup>5</sup> lawe' da ba benda' ca nazri'inu' Xránadxu Jesucristo ne ca dxeajlí lazru' Lę', ne ca nazri'inu' xúgutę bi ca' chee Dios. <sup>6</sup> Dxenaba' lau Dios guzájni'ine' benne' ca' dxeajlí lazre' Lę' ne chee xel-la' dxeajlí lazre' chiu', ca naca xúgutę da chawe' ca' da nápadxu ne chee Jesucristo. <sup>7</sup> Xel-la' zri'i lazre' chiu', bi bicha', dxúnnale'ę na neda' xel-la' dxebe', ne dxutipa na lazra', ca dxutipa na lazre' xúgutę bi chee Dios.

## Pablo dxenabe' Filemón tu da gunē' chee Onésimo, bi na'u Filemón

<sup>8</sup> Chee lę na', lácala xu'u lu na'a nna be'eda' lue' ca dxal-la' gunu' lawe' da naca' gubáz chee Cristo, <sup>9</sup> dxata' xúeda' lue' lu xel-la' zri'i lazre' cheedxu, neda', Pablo, benne' gula, ne xu'a lizre xia lawe' da dxuna' zrin chee Cristo. <sup>10</sup> Dxata' xúeda' lue' tu da gunu' chee Onésimo, bi nácabe' ca zrí'inequeza' lu da naca chee Cristo, neda', xu'a lizre xia nigá.

<sup>11</sup> Gate nate Onésimo, bi na'u lue' gúcabe' tu bi węn da calęla, san na'a nácabe' węn zrin lí lazre' chiu' lue', ne chia' neda'. <sup>12</sup> Dxesel-la'-be' naga zu'. Bezí' lu na'u-

be', nácabe' bi nazrí'ite lazra'. <sup>13</sup> Guzá lazra' neda' xegá'analebe' neda' nigá chee gunbe' zrin chia' neda' waláz chiu' lue' dxácatę ne xu'a lizre xia lawe' da dxuna' zrin chee dizra' chawe'. <sup>14</sup> Quebe dxaca lazra' bi guna' che quebe naca na da nnau' lue', chee gácalęnu' neda' lawe' da naca na ca dxaca lazru' lue', ne quegá lawe' da dxenná be'eda' lue'. <sup>15</sup> Becuasa Onésimo nen lue' tu chí'idau', san na'a súaletequezebe' lue', <sup>16</sup> quegá ca tu bi na'u lue', san gácabe' tu bi cháwedxa ca tu bi na'u lue', da zéaję na, gácabe' tu bi bichu' nazri'ite lazru'. Neda' nazrí'ile'ęda'-be', san lue' dxal-la' zrí'idxenu'-be', quegaze ca bėnneacheze, san cá'anqueze ca bi bíchedxu, bi chee Cristo.

<sup>17</sup> Chee lę na', che dxėquenu' neda' ca bi ljwezru', bezí' lu na'u-be' ca dxezí' lu na'u neda'. <sup>18</sup> Che bi da calęla ba bęnbe' chiu', u che bi dxál-labe' chiu', neda' quízruja' na. <sup>19</sup> Neda', Pablo, dxuzúaja' da nigá nen ná'aqueza': Neda' quízruja' na, lácala neda' la gusá'a lazru' lue' dxál-laquezu' chia' cuínquezu'. <sup>20</sup> Lue', bi bicha', dxata' xúeda' lue' lu La Xránadxu, bęn da guzú'a na neda' lu da ba neza.

<sup>21</sup> Dxuzúaja' chiu' lawe' da nuxrén lazra' gunu' ca da dxapa' lue', ne nezda' gundxu' ca da dxenaba' lue'.

<sup>22</sup> Cá'anqueze bcueza latja naga sua' neda' lawe' da dxebeza lazra' gun Dios da dxenábale Lę', gunne' neda' lataj xida' xedajnná'a le'e.

## Bi chee Cristo dxulugápabe' diuzre Filemón

<sup>23</sup> Epafra, bi ljwezra', xú'ulebe' neda' lizre xia lawe' da dxunbe' zrin chee Jesucristo, <sup>24</sup> ne Marcos, ne Aristarco, ne Demas, ne Lucas, bi ca' dxelácalębe' neda' lu zrin chee Cristo dxulugápabe' lue' diuzre.

<sup>25</sup> Dxenaba' lau Xránadxu Jesucristo gunē' da chawe' chee le'e. Ca'an gaca na.



# Hebreos

## Dios ba bchálajlene' dxi'u lu dxu'a Zrí'inequeze'

**1** Dios bchálajlene' xra xrtáudxu ca' gate nate zane' lasa, ne zane' ca bchálaje' lu dxu'a benne' ca' bu-luchálaje' waláz chee'. <sup>2</sup> Na'a, lu zra caní, Dios ba bchálajlene' dxi'u lu dxu'a Zrí'inequeze'. Dios bene' xezr la xu nigá lu na' Zrí'ine' nigá, ne ba bene' naca chee' xúgute' da ca' bene'. <sup>3</sup> Zrí'ine Dios nigá naque' Benne' dxulé'ene' ca naca xel-la' szren chee' Dios, ne naque' ca da nácaqueze Dios, na' nuxre' xúgute' da ca' nune', dxuchínene' dizra' chee' da nápalé'e na xel-la' waca. Gate ba gudúe' dul-la da nabágadxu xeajxedxé'e chala'a xabe'la chee' lataj blau chee' Dios xabáa.

### Zrí'ine Dios nácadxe' blau ca gubáz chee' xabáa ca'

<sup>4</sup> Zrí'ine Dios nácadxe' blau ca gubáz chee' xabáa ca' chee' Dios, ca naca La Cristo da bzua Dios, nácadxa na blau ca la gubáz chee' xabáa ca'. <sup>5</sup> Dios cabata' guzre' tu gubáz chee' xabáa ca guzre' Cristo, gunné':  
Lue' nacu' Zrí'ina'.

Neda' nácaqueza' Xrau' na'a zra.  
Cá'anqueze cabata' guzre' tu gubáz chee' xabáa ca gunné' chee' Cristo:

Neda' gaca' Xre',  
na' Le' gaque' Zrí'ina'.

<sup>6</sup> Gate bzué' Zrí'ine' lu xezr la xu nigá, gunné':  
Xúgute' gubáz chee' xabáa ca' xelue lá'ane' Le'.

<sup>7</sup> Ca naca chee' gubáz chee' xabáa ca', Dios gunné':  
Dsesel-le' gubáz chee' ca' ca tu be' da dxaca,  
ne dxuchínene' gubáz wen zrin chee' ca' ca tu xi'.

<sup>8</sup> Ca naca chee' Zrí'ine', gunná Dios:  
Lataj blau chiu' lue', Dios, zúate'queze.

Xel-la' dxenná bea chiu' naca na xlátaje.  
<sup>9</sup> Nazri'inu' da xlátaje, ne dxezra'u da cale'la.  
Chee' le' na' Dios chiu' ba bennadxe' Lue'  
xel-la dxebe' ca da bnézruje' bi ljwezru' ca'.

<sup>10</sup> Cá'anqueze guzre' Le':  
Lue', Xran, nédxudauté' benu' xezr la xu.  
Nen xel-la' waca chiu' benu' xabáa.

<sup>11</sup> Da caní weledé chee' na, san Lue' súate'quezu'.  
Xúgute' da caní welaca gula ca zra lana bennache.

<sup>12</sup> Na' xutubu' na ca tu ladxe',  
ne gucha'u na ca dxun tu benne' dxuché'e zra lané'.  
Lue' zúaquezu' chadía chacanna,  
na' xel-la' nabán chiu' quebe téqueze chee' na.

<sup>13</sup> Dios cabata' guzre' tu gubáz chee' xabáa ca guzre'  
Zrí'ine', gunné':

Gudxe'e chala'a xabe'la chia',

cadxa guzúa' benne' ca' dxeledábage' Lue' zran ni'u.  
<sup>14</sup> Xúgute' gubáz chee' xabáa ca' zaj naque' be' ca' dx-elún zrin chee' Dios, na' dxele-le' gubáz chee' xabáa ca' chee' xelácalene' benne' ca' dxelezi'e xel-la' weselá.

### Quebe dxal-la' guzúadxu chala'ala xel-la' weselá

**2** Chee' le' na' dxal-la' nna' xánnedxu dizra' da ba bendxu chee' quebe cuásadxu lu neza chee' xel-la' li. <sup>2</sup> Dizra' da gusel-la Dios gate nate lu na' gubáz chee' xabáa ca' guca na li lazre', na' xúgute' benne' ca' buluzúe' na chala'ala, ne quebe buluzúe' dizra' ca da gunná Dios, Dios bde'e le' xel-la' zi' ca da dxal-la' xelezi'e.

<sup>3</sup> ¿Ájazra gaca ladxu che guzúadxu chala'ala tu xel-la' weselá zren caní? Xránaquezdxu bchálaje' chee' xel-la' weselá nigá nédxute', na' gudé na' buluchálaj benne' ca' belenne' na, na' gulenne' naca na da li laudxu dxi'u.

<sup>4</sup> Cá'anqueze ba bzua chacha Dios na ne chee' da dx-elunna bea na, ne ne chee' da zren ca' ben Dios, ne ne chee' xel-la' waca zan ca', ne ne chee' Be' Lá'azxa, Bénénea' benné' dxi'u xel-la' waca ca', ca da guca lázre-queze Le'.

### Jesucristo ben cuine' ca nácadxu dxi'u

<sup>5</sup> Dios quebe bzué' lu na' gubáz chee' xabáa ca' xezr la xu da za za', chee' da na' dxuchálajdxu na'a. <sup>6</sup> Naca na ca naxúaj na lu xiche lá'azxa, ca da gunná tu benne':

¿Ájazra naca bennache che Lue', Dios, dxeajsá lazru' chee'?

¿Ájazra naca bennache, che Lue' dxe'u gunne xue chee' le'?

<sup>7</sup> Tu chí'idau'ze bzu' bennache látezdxa ca gubáz chee' xabáa ca'.

Nunu' chee' si'e xel-la' szren, ne xel-la' ba lá'ana, ne bzu' lu ne'e xúgute' da benu'.

<sup>8</sup> Xúgute' ba bzu' na zran ni'a le'.

Caní naca, gate Dios bzué' xúgute' zran ni'a bennache, quebe bi de' da quebe guzúa' na dizra' chee' bennache, na' quebe ne xuluzúa' ca naca da ca' dizra' chee'. <sup>9</sup> Na'a dxelé'edxu Jesús, Bénénea' bzua Dios guque' tu chí'idau' látezdxa ca gubáz chee' xabáa ca'. Dios gúnené' gate Jesús waláz chee' xúgute' bennache lawe' da nazri'ine' bennache, na' na'a nunézruje' Le' xel-la' szren, ne xel-la' ba lá'ana lawe' da gudé' lu xel-la' gute zi xa'.

<sup>10</sup> Dios bene' xúgute' da zaj zua, na' zaj zua na chee' gaca ba Le'. Le' dxaca lazre' xelezi' xúgute' bi chee' ca naca xel-la' szren chee'. Chee' le' na' ben na ba xen ben

Dios naca Jesucristo dutę weselá cheedxu, ne cheę da zi' da xa' da gudęę' cheę séquene' gusel' bęnneache chadıa chacanna. <sup>11</sup> Benne' canı dxeęúa Jesús dul-la da zaj nabague', na' benne' canı, ne Lęqueze' zaj naque' bi ca' cheę tuze Xradxu. Cheę le na' quebe dxedu'e Jesús nne' cheę benne' ca', zaj naque' bi biche'. <sup>12</sup> Naca na ca dxenná lu xiche lá'azxa:

Guchálajqueza' da naca chiu' Lue' lówela bicha' ca', na' gúl-laqueza' da güe lá'ana' Lue' ládujla benne' ca' zaj nazrague' lau Lue'.

<sup>13</sup> Cá'anqueze dxenná xiche lá'azxa:

Neda' guxrén lazra' Dios.

Cá'anqueze dxenná na:

Nigá zua' nen bi chia' ca', bi ca' benne' Dios neda'.

<sup>14</sup> Lawe' da zaj naca beła' dxen benne' ca' zaj naque' bi cheę', Lę' ben cuine' beła' dxen cheę guzėquene' gutię', ne canı benę' cheę séquene' guzrıa xi'e da xriwe', da na' napa na xel-la' dxenná bea gute na bęnneache. <sup>15</sup> Canı guca bselé' xúgute' benne' gulaque' ca benne' zaj nada'u xúgute' iza zaj naca bane' lawe' da belezrebe' xel-la' gute. <sup>16</sup> Da li quebe ble'e nigá cheę gácalęne' gubáz cheę xabáa ca', san naca na ca dxenná xiche lá'azxa: Ble'e cheę gácalęne' benne' zaj naque' zrı'ine zre sua Abraham. <sup>17</sup> Cheę le na' ben na ba xen guque' dutę ca zaj naca bi biche' ca', cheę séquene' gaque' lau Dios tu bxruze blau naque' li lazre', ne dxexache lazre' bęnneache, ne cheę séquene' gun cuine' tu da dxeęúa na dul-la zaj nabaga bęnneache. <sup>18</sup> Lawe' da gudęęe Lę' xel-la' zi' gate guca lazre Satanás gun zréaje Lę', dxezėquene' na'a gácalęne' benne' ca' dxun zréaje da xriwe' le'.

### Jesús nácadęe' blau ca Moisés

**3** Le'e, benne' bícha'dau', nácale bi cheę Dios, lawe' da nácale benne' ca' ba gunné Dios, le nna' xanne' Jesucristo, Bęnnea' gusel-la Dios cheę gaque' bxruze blau cheę da dxéajlędxu. <sup>2</sup> Jesús nigá guque' li lazre' lau Dios, Bęnnea' bzuę' Lę' lu zrin na' da ba benę', ca guca Moisés, guque' li lazre' lu zrin na' benę' lau benne' ca' gulaque' bi cheę Dios. <sup>3</sup> Jesús dxal-la' sidęe' xel-la' ba lá'ana ca da si' Moisés, ca dxaca cheę benne' dxunę' tu xu'u, dxezıdęe' xel-la' ba lá'ana ca da dxezı' xu'u náqueze. <sup>4</sup> Tu tu xu'u naca na da ben benne', san Dios nunę' xúgute' da zaj zua. <sup>5</sup> Ca węn zrin cheę Dios guca Moisés li lazre' lu zrin na' benę' lau benne' ca' gulaque' bi cheę Dios, na' bchálaję' ca naca da nne' Dios ca te na'. <sup>6</sup> Cristo naque' li lazre' ca Zrı'inequeze Dios laudxu dxi'u. Nácadxu ca lızre Dios che se cháchadxu lu da dxuxrén lázredxu ca zrındxa zra cheajsę cheędxu, ne dxebele'ędxu lu da dxebeza lázredxu.

### Bi ca' cheę Dios xelexezı' lazre' naga zua Dios

<sup>7</sup> Canı naca, naca na ca da dxenná Be' Lá'azxa lu xiche lá'azxa, dxennę':

Na'a, che le'e dxenle ca da dxenná Dios,

<sup>8</sup> quebe gácale lázrdau zide' ca gulaca benne' ca' guledábague' Dios,

na' belunę' Dios zęde le'e xixre' lawe' lataj.

<sup>9</sup> Belún xra xrtaule ca' neda' zęde cheę guna' ca gunnıa',

lácala belele'ene' da bena' lówela chua iza.

<sup>10</sup> Cheę le na' bzra'a xichja' benne' ca',

na' gunnıa': Tu dxelebėaj xıchajzqueze benne' canı neda',

ne dxeledábague' ca naca da bdxıruja'.

<sup>11</sup> Cheę le na' bzra'a xichja' benne' ca', ne bzua chúchua' da gucha' benne' ca',

gunnıa' quebe xelexú'e naga xelexezı' lazre' naga zúaqueza' neda'.

<sup>12</sup> Le'e, benne' bícha'dau', le guxúe cuınale cheę quebe gaca lázrdau zide' netule le'e, quebe cuásale lau Dios ban lawe' da quebe dxéajlęle cheę Lę'. <sup>13</sup> Le gutıpa lázrele tule xetule tu zra tu zra, dxácatę ne zúadxu lu zra da nunna Dios dxi'u, cheę quebe si xę dul-la netule le'e, na' gácale lázrdau zide'. <sup>14</sup> Che se cháchadxu ca zrin zra cheajsę cheędxu ca naca da dxuxrén lázrequezdxu nédxute, na'a nácadxu bi cheę Cristo.

<sup>15</sup> Naca na ca dxenná na lu xiche lá'azxa:

Na'a, che le'e dxenle ca da dxenná Dios, quebe gácale lázrdau zide' ca gulaca benne' ca' guledábague' Dios.

<sup>16</sup> ¿Nuzra benne' ca' belenęe' dizra' cheę Dios, na' ca gudę na' guledábague' Dios? Zaj naca xúgute' benne' ca' bebėaj Moisés lu xęzr la xu Egipto. <sup>17</sup> ¿Nuzra benne' ca' bzra'a Dios le' lówela chua iza? Zaj naca benne' ca' belún dul-la, na' gulátie' le'e xixre' lawe' lataj. <sup>18</sup> ¿Nuzra benne' ca' bzua chuchu Dios xrtızre' gate guzre' le' quebe xelexú'e naga xelexezı' lazre' naga zua Lę'? Zaj naca benne' ca' guledábague' xrtızra Dios. <sup>19</sup> Na'a dxelė'dxu quebe guca xelexú'e lawe' da quebe gulėajlęle cheę Lę'.

**4** Canı naca, dxácatę ne zua cheędxu da nachębe lazre' Dios cheę xexú'udxu naga xezı' lázredxu naga zua Dios, dxal-la' guxúe cuınadxu gagáze nule le'e quebe xexú'ule. <sup>2</sup> Cá'anqueze dxi'u ba bendxu dizra' chawe' cheę Dios ca da belén benne' ca', san benne' ca' quebe bi da ba neza gulezı'e cheę dizra' da belenęe' lawe' da quebe gulėajlęle cheę na. <sup>3</sup> Dxi'u ba guxėajlędxu, na' chú'udxu naga xezı' lázredxu, ca da gunná Dios gate gunné':

Cheę le na' bzra'a xichja' benne' ca',

na' bzua chúchua' da gucha' benne' ca', gunnıa':

Quebe xelexú'e naga xelexezı' lazre' naga zua neda'.

Canı gunná Dios lácala ba bsexuzre' zrin cheę' gate na' bęntę' xęzr la xu, <sup>4</sup> lawe' da naxúaj na lu xiche lá'azxa ca naca cheę zra gazre', dxenná na:

Lu zra gazre bezı' lazre' Dios lu zrin da benę'.

<sup>5</sup> Xetú dizra' da naxúaj na lu xiche lá'azxa dxenná na:

Quebe xelexú'e naga xelexezı' lazre' naga zua neda'.

<sup>6</sup> Benne' ca' belenęe' dizra' chawe' nigá cheę Dios nédxute quebe belexú'e lawe' da quebe buluzú'e dizra' ca naca da gunná Dios. Na'a ne zaj zra' benne' dxal-la' xelexú'unqueze' naga xelexezı' lazre'. <sup>7</sup> Cheę le na' Dios ba gulėaję' xetú zra, gunné': Na'a zra. Canı naca lawe' da dxuchálaję Dios dxi'u dxuchınenę' dizra' da gunná

David gudé na', da naxúaj na lu xiche lá'azxa naga dxenná na:

Na'a, che le'e dxenle ca da dxenná Dios, quebe gácale lázrdau zide'.

<sup>8</sup> Chela belexezí' lazre' benne' ca' be Josué lataj gulu'e xezr la xu na', quegá guchálajdxa Dios chee xetú zra.

<sup>9</sup> Caní naca na, de lataj xelú'u bi ca' chee Dios naga xelexe' lazre' naga zua Dios, <sup>10</sup> lawe' da xezí' lazre' lu zrin dxun nu benne' chu'e naga xezí' lazre' naga zua Dios, ca ben Dios, bezí' lazre' lu zrin ben Le'. <sup>11</sup> Dخال-la' gun zi lázredxu séquedxu chú'udxu naga xezí' lázredxu gagáze nu benne' gun'e ca belún benne' ca' quebe guléajle'e.

<sup>12</sup> Dizra' chee Dios naca na da bane, ne napa na xel-la' waca. Naládxa na ca tu xia da nalá na dxupa la'ate, ne dxaze na naga dxelezraga bènne'du xú'udxu, ne be nácaquezdxa, ne dxaze na lu xichaj lázrdau bènneache, na' dxuchi'a na ca naca da dxugú'u bea bènneache ne ca da dxéquene' gun'e'. <sup>13</sup> Quebe bi de da ben Dios da seque' gucache cuina na lau Dios. Xúgute zaj nalá' na, ne zaj naxalaj na lau Bénnea' dxal-la' xulé'edxu Le' ca da bændxu.

#### Jesús naque' bxruze blau zrente

<sup>14</sup> Jesús, Zri'ine Dios naque' bxruze blau zrente cheedxu, Bénnea' ba bexu'e lau Dios. Chee le na' dxal-la' se típadxu lu da dxéajlédxu chee Dios. <sup>15</sup> Bxruze blau cheedxu wazéquene' xexache lazre' dxi'u che dxi'u dxate ni'a nadxu lu xel-la' dxeajlí lazre' cheedxu, lawe' da gudéqueze Le' lu xel-la' zi' ca' gate guca lazre da xriwe' gun zréaje na Le', ca da dxededxu dxi'u na'a, na' Le' quebe bēne' dul-la. <sup>16</sup> Chee le na' dxal-la' bí-gadxu du lázredxu lu lataj blau chee Dios cheedxu, Bénnea' nazri'ine' dxi'u, chee xexache lazre' dxi'u, ne dutē xel-la' xrlátaje chee' gácalēne' dxi'u gate nachinedxu nu gácale dxi'u.

**5** Tu tu bxruze blau dxecá'a Dios ládujla bènneache, ne dxuzúe' le' chee gun'e' zrin lau Dios waláz chee bènneache ca', ne cu'e guna' lau Dios, ne gutie' béadu ca' ne chee dul-la zaj nabaga' bènneache. <sup>2</sup> Cá'anqueze bxruze blau nigá dxate ni'a ne'e lu da ca' dxune' ca da dxaca cheedxu dxi'u. Chee le na' wape' xel-la' zren lazre' chee benne' ca' quebe dxeléajni'ine', ne dxelunē' da calela, <sup>3</sup> na' lawe' da dxate ni'a ne'e, dxal-la' gutie' béadu ca' ne chee dul-la da nabágaqueze', cáteze dxunē' ne chee dul-la da zaj nabaga xezícadxa bènneache.

<sup>4</sup> Quebe nu gaca gun cuina bxruze blau, san Diósqueze dxenné' bènnea', ne dxunézruje' le' xel-la' szren na', ca bēne' chee Aarón. <sup>5</sup> Cá'anqueze naca na chee Cristo, quebe bzua cuine' bxruze blau, san Dios be'e Le' xel-la' szren na' ca da guzre' Le': Lue' nacu' Zri'ina'.

Neda' nácaqueza' Xrau' na'a.

<sup>6</sup> Cá'anqueze naxúaj na lu xiche lá'azxa ca guzre' Le': Lue' nacu' bxruze blau chadía chacanna ca gúcaqueze Melquisedec.

<sup>7</sup> Gate zua Cristo lu xezr la xu nigá, bchálajlēne' Dios, ne guta' xuene' Dios nen chi'e zizraj, ne gudxézrele'e, lawe' da napa Dios xel-la' waca guselé' Le' lu xel-la' gute, na' Dios benne' chee' lawe' da gudape' Xre' ba lá'ana. <sup>8</sup> Ca'an guca, lácala naca Cristo Zri'ine Dios, bsédie' guque' wezúa dizra' ne chee xel-la' zi' da gudé'e', <sup>9</sup> na' gate guque' dutē Weselá cheedxu ne chee da caní, nadxa guzéquene' bselé' bènneache chadía chacanna, benne' ca' dxuluzúe' dizra' chee', <sup>10</sup> na' Dios bzuē' Le' bxruze blau ca gúcaqueze Melquisedec.

#### Quebe dxal-la' gusandxu xel-la' dxeajlí lazre' cheedxu

<sup>11</sup> Déle'e da dxal-la' guchálaja' ca naca chee da nigá, san naca na stebe guzéajni'ida' le'e na'a, lawe' da quebe ne gaca chéajni'ile na. <sup>12</sup> Zane' iza ba guca dxéajle chee Cristo, na' ba gul-la' gusédele benne' xula ca naca chee Le', san dxun na ba xen nu guzéajni' le'e da xula da quebe nácateca stebe ca naca dizra' chee Dios. Ne nácale ca bidau' ne dxázrebe' nizre'. Quebe ne gaca gágule xel-la' wagu chee benne' waca. <sup>13</sup> Benne' ca' zaj naca ca bidau' ne dxázrebe' nizre' zaj naque' benne' ca' quebe ne xuluchínene' dizra' chee xel-la' li. <sup>14</sup> Xel-la' wagu chee benne' waca naca na chee benne' ca' ba zaj nézene' xelexúnbe'e da naca da xrlátaje, ne da naca da calela.

**6** Chee le na' québedxa dxal-la' gusédedxu ca da bsédedxu nédxute ca naca chee Cristo, san chéajtezedxu gusédedxu da naca chee' chee gácadxu benne' waca. Québedxa bi dxal-la' guchálajdxa chee da du ca' da bsédedxu nédxute, ca dxal-la' xexéaje lázredxu chee da ca' bændxu da zaj nua na xel-la' gute, ne ca dxal-la' chéajlédxu chee Dios, <sup>2</sup> ne ca dxal-la' xedxúadxu nisa, ne ca dxal-la' xuluzé ne'e xichajdxa, ne ca xelexebán benne' gate, ne ca gun Dios, guchi'e da nun tu tu bènneache chee gudé' benne' ca' dx-elunē' da calela lu lataj ba xa' chadía chacanna. <sup>3</sup> Chee le na' chéajtedxu lu da naca chee Cristo, che Dios gunne' dxi'u lataj.

<sup>4</sup> Benne' ca' ba gulezí'e ca naca xel-la' naxaní' chee Dios, ne ba gulezú lawe' xelúnbe'e da dxunna Dios, ne ba gulezí'e Be' Lá'azxa, <sup>5</sup> ne ba gulezú lawe' xelúnbe'e da xrlátaje ca' chee Dios ca naca da xelezí'e lu xezr la xu da za za', <sup>6</sup> na' te na' che xuluzúe' Dios chalá'ala, québedxa gaca xelexexéaje lazre' lawe' da gaca na ca xuludé'e Cristo le'e xaga begúaj da xula, ne dxelún le' chee' lávela xúgute bènneache. <sup>7</sup> Zaj naque' ca xezr la xu da dxezí na nisa xiuj. Che xezr la xu na' dxunna lina chawe' chee benne' dxelunē' na zrin, naca na da dxun chawe' Dios, <sup>8</sup> san che dxachuj na xeche', ne xixre' da quebe bi culuén napa na, quebe bi zaca xezr la xu na', san naca na tu da xu'u de', na' naga chéajsetē chezxe na.

#### Xel-la' dxebeza lazre' da nápadxu

<sup>9</sup> Le'e, benne' bícha'dau', lácala dxuchálajntu' caní, dxuxrén lázrentu' ca naca chee le'e wazile le'e da

chawe' chee xel-la' weselá. <sup>10</sup> Dios dxune' da xlátaje, ne quebe gal-la lazre' ca naca zrin da ba benle, ne ca bzri'ile Le' gate gúcalele benne' bíchedxu ca', ne ca da tu dxúnzquezle. <sup>11</sup> Dxaca lázrentu' chéajteze tu tule gunle da caní duté lázrdaule ca zrin zra cheajsé chee, chee zrué'ele da dxebeza lázrele. <sup>12</sup> Quebe dxaca lázrentu' xewédele. Dxaca lázrentu' gunle le'e ca belún benne' ca' guleajlí lazre' Dios, ne gulaque' zren lazre', na' gulezíte ca da guchébe lazre' Dios gunézruje' chee'. <sup>13</sup> Gate guchébe lazre' Dios bi gunézruje' chee' Abraham, na' bzétajqueze cuine' lawe' da québedxa nu zua nácadxa szren ca Le', nu guzétaje', <sup>14</sup> gunné': "Da li gúnqueza' da chawe' chiu' lue', ne guzánqueza' zri'ine zre su'." <sup>15</sup> Abraham gulezíte duté xel-la' zren lazre', na' chee le' na' guzi'ę da guchébe lazre' Dios gunézruje' chee'. <sup>16</sup> Gate nu dxuluzetaj bėnneache, dxuluzétaje' benne' nácadxe' szren ca léqueze', ne gate bi dxuluzía chúchue', ne dxuluzétaje' Dios, québedxa bi de da bi xelenné'. <sup>17</sup> Chee le' na' Dios bzua chúchue' da guchébe lazre', ne bzetaj cuine', lawe' da guca lazre' gulé'ene' benne' ca' xelezíte da guchébe lazre', Le' guné' ca naca da guchébe lazre', ne quebe guché'ę ca guné'. <sup>18</sup> Caní naca, da chupa caní quebe gaca cha na, na' lu da caní Dios quebe gaca gun lazre', ne ne chee da ca' Dios ba nunne' dxi'u tu da gun na dxi'u dipa lazre', dxi'u na' ba nézedxu dxuxúe Le' dxi'u, ne nuxrén lázredxu si' lu nnadxu da dxebeza lázredxu ca naca da gunné' dxi'u. <sup>19</sup> Da nigá dxebeza lázredxu nuxru chacha na bėnne'du xú'udxu ca dxun tu xia da dxuxru chacha na tu da dxedá lawe' nísadau' gate zria na lawe' nísadau'. Da na' dxebeza lázredxu zúale na Cristo cuzru ladxe' da ze lu xudau' da zua xabáa, <sup>20</sup> naga guxú'u Jesús waláz cheedxu chee gusalaje' neza naga tedxu, na' Le' naque' tu bxruze blau chadía chacanna ca guca Melquisedec.

### Jesús naque' bxruze blau ca guca Melquisedec

**7** Melquisedec nigá guque' wenná bea chee xezre Salem, ne bxruze chee Dios szrentę. Gate ze za' Abraham lu wedil-la gate bzétaje' benne' wenná bea ca', na' Melquisedec nigá xeajchague' le', ne gunabe' lau Dios guné' da chawe' chee Abraham, <sup>2</sup> na' Abraham bnézruje' chee le' tu cue' chee da chi cue' ca' ca naca da bzrué'ene' lu wedil-la na'. La Melquisedec zéaje na wenná bea xlátaje, ne lawe' da guque' benne' wenná bea chee xezre Salem, da zéaje na xel-la' dxebeza zri lazre', le' zéajequeze na wenná bea chee xel-la' dxebeza zri lazre'. <sup>3</sup> Quebe naxúaj na zua xre', ne xrne'ę, ne xra xrtawe', ne quebe naxúaj na che gúlaje', ne che gutię'. Caní naca na, da guca Melquisedec dxulé'e na ca naca chee Zri'ine Dios, naque' bxruze blau chadía chacanna.

<sup>4</sup> Le na' xque na'a ca szren guca Melquisedec, che bnezruj xra xrtáudxu Abraham chee le' tu cue' chee da chi cue' chee da guqué'ę lu na' wenná bea ca' lu wedil-la na'. <sup>5</sup> Ca naca da bdxixruj bea Moisés, bxruze ca', benne' ca' zaj naque' xrtia Leví dxal-la' xelezíte tu cue' chee da chi cue' ca' da xelizruj benne' Israel ca', benne'

zaj naque' xrtia ljwezre', lácala zaj naque' zri'ine zre sua Abraham ca zaj nácaqueze benne' ca'.

<sup>6</sup> Melquisedec, benne' quebe naque' xrtia Leví guzi'ę tu cue' chee da chi cue' ca' da gudizruj Abraham, bėnnea' dxal-la' si'ę da guchébe lazre' Dios. Cá'anqueze Melquisedec gunabe' lau Dios guné' da chawe' chee Abraham, <sup>7</sup> na' dxelenná xúgute bėnneache nácadxa blau bėnnea' dxenabe' lau Dios guné' chawe' chee benne' xula ca' quézcala bėnnea' si'ę da chawe' na' dxenabe'. <sup>8</sup> Na'a benne' ca' dxelezi'ę tu cue' chee da chi cue' ca' zaj naque' benne' dxelate, san ca naca chee Melquisedec, naque' ca tu benne' naca bánqueze' lawe' da quebe naxúaj na lu xiche lá'azxa che gutię'. <sup>9</sup> Ca naca chee Leví, ne ca naca chee xúgute bxruze ca' zaj naque' zri'ine zre sua Leví na', benne' ca' dxelezi'ę na'a tu cue' chee da chi cue' ca', wácaqueze nnadxu cá'anqueze benne' caní gulízruje' chee Melquisedec tu cue' chee da chi cue' gate na' bezrague' Abraham, <sup>10</sup> lawe' da wazeque' nnadxu ne zaj zua zri'ine zre sua Abraham lu beł-la' dxen chee', benne' quebe ne xelalaj gate na' bdxuaj Melquisedec xeajchague' Abraham na'.

<sup>11</sup> Benne' Israel ca' gulezíte lu ne'ę da bdxixruj bea Dios lu na' bxruze ca' zaj naque' xrtia Leví. Chela guzeque' da belún bxruze ca' gun na li lazre' benne' ca' buluzúe' dizra' chee da bdxixruj bea Dios na', na' quebe ben na ba xen la' xetú bxruze ca guca Melquisedec, ne quegá ca guca Aarón. <sup>12</sup> Che xezrá' ca dxal-la' gaca bxruze na', na' dxál-la'queze xezrá' da nadxixruj bea na'. <sup>13</sup> Xránadxu, Bėnnea' naxúaj na chee' gaque' bxruze ca guca Melquisedec, nababe' xetú cue' xrtia Israel ca', benne' ca' netue' quebe ne gaque' bxruze. <sup>14</sup> Naca bea na nababa Xránadxu xrtia Judá, na' Moisés quebe gunné' xelaca benne' caní bxruze.

<sup>15</sup> Da nigá naca béadxa na che bxruze cube na' dxal-la' gaque' ca guca Melquisedec, <sup>16</sup> ne bxruze cube nigá quebe gaque' bxruze ne chee tu da nadxixruj bea da dxenná na nu xrtia dxal-la' gaque'. Gaque' bxruze lawe' da nape' xel-la' waca chee tu xel-la' nabán da quebe te chee na. <sup>17</sup> Naca chee' ca da dxenná Dios: Lue' nacu' bxruze chadía chacanna ca da guca Melquisedec.

<sup>18</sup> Caní guca, bedxúaj chalá'ala da bdxixruj bea Dios gate nate lawe' da quebe guzeque' bi gun na, ne quebe bi culuén gudapa na, <sup>19</sup> lawe' da quebe guca da gunná bea Moisés gun na bėnneache li lazre'. Na'a nápadxu tu xel-la' dxebeza lazre' da cháwedxa, na' ne chee na dxebigadxu lau Dios.

<sup>20</sup> Gate Dios bėne' Jesús bxruze, bzetaj cuine'.

<sup>21</sup> Quebe bzetaj cuine' gate bzue' xezícadxa bxruze ca'. Gate bėne' Jesús bxruze bzetaj cuine' ca da naxúaj na lu xiche lá'azxa, dxenná na:

Xránadxu Dios bzetaj cuine', ne quebe guché'ę xrtizre'.

Gunné': "Lue' nacu' bxruze chadía chacanna ca da guca Melquisedec."

<sup>22</sup> Chee le na' Jesús dxun chúchue' tu xel-la' wezría da nácadxa chawe' ca da nedxu. <sup>23</sup> Xezícadxa bxruze ca', benne' gulezrá' nédxula ben na ba xen gulaque' benne' zan lawe' da gulate tu tué', na' quebe guca xeledíe'. <sup>24</sup> Jesús naque' tu bxruze chadía chacanna lawe' da quebe gatie'. <sup>25</sup> Chee le na' dxezéquene' guselé' chadía chacanna benne' ca' xelegíe' lau Dios ne chee Le', lawe' da naca ban Le' chadía chacanna chee gudé' dizra' chee benne' ca' lau Dios.

<sup>26</sup> Jesús naque' bxruze blau, bxruze na' dxechéndxu. Naque' lá'azxa, ne quebe bi da calela bene', ne quebe nabague' dul-la. Quebe naque' tuze ca zaj naca benne' dul-la, na' Dios naca'ana szrendxe' Le' ca xúgute' da zaj zua xabáa. <sup>27</sup> Quebe naque' ca xezícadxa bxruze ca', benne' ca' ben na ba xen belutie' béadu ca' tu zra tu zra, béadu ca' buluzúe' nedxu ne chee xtúl-laqueze', na' ca gudé' na' buluzúe' béadu xula ca' ne chee xtul-la bèneache. Jesús tu lásaze bzua cuine' ne chee dul-la zaj nabaga xúgute' bèneache. <sup>28</sup> Da bdxixruj bea Moisés dxuzá na bxruze blau ca' zaj naque' benne' quebe zaj naque' li lazre'. Gate Dios bzetaj cuine' ca gudé' bla' da nadxixruj bea na', bzue' tu bxruze blau naque' Zrí'inequeze', Bènea' ben Dios naque' tu bxruze blau li lazre' chadía chacanna.

#### Jesús naque' bxruze blau cheedxu

**8** Da naca blaudxa chee da caní dxennantu' naca na da nigá: Zua tu bxruze blau cheedxu caní, Bènea' dxe'e chalá'a xabéla chee lataj blau chee Dios xabáa, <sup>2</sup> ne naque' bxruze blau dxune' zrin lu lataj lá'azxa li, da ben Xránadxu, quegá bèneache. <sup>3</sup> Xúgute' bxruze blau nuzúa Dios le' chee xelegú'e guna' lau Dios, ne xelútie' béadu ca' lau Dios. Chee le na' dxun na ba xen bi guzúa Cristo lau Dios. <sup>4</sup> La zua Cristo xezr la xu nigá, quebe gaque' bxruze lawe' da ne zaj zra' bxruze ca' dxelegú'e guna' ca nadxixruj bea da bde Moisés. <sup>5</sup> Zrin dxelún bxruze caní naca na ca tu da dxulé'eze na, ne ca tu zrláze chee da na' zua xabáa. NezdXu naca na tu da dxulé'eze lawe' da gunná Dios, guzre' Moisés gate ba zué' guné' lataj lá'azxa: "Bxue xanne' gunu' xúgute' na cáteze naca da ble'eda' lue' lu xi'a na'." <sup>6</sup> Na'a bxruze blau cheedxu nigá dxune' tu zrin zácadxa lawe' da naque' wedé dizra' chee tu xel-la' wezría cháwedxa, da nun Dios ne chee da ca' guchébe lazre' da zaj naca na cháwedxa.

<sup>7</sup> La guca li lazre' xel-la' wezría da bene' nedxu, quebe ben na ba xen guné' xel-la' wezría gudxupe' na'. <sup>8</sup> Gate Dios gudil-le' benne' ca' zaj naque' bi che, gunné':

Dxenná Xránale: Wazrín zra gate guna' tu xel-la' wezría cube nen benne' Israel ca', ne benne' Judá ca'.

<sup>9</sup> Quebe gaca na ca guca xel-la' wezría da bēna' nen xra xrtaulé ca' gate becá'a ne'e, ne bebéaja' benne' ca' lu xezr la xu Egipto. Caní guna' lawe' da quebe buluzúe' dizra' xel-la' wezría da nuna', na' chee le na' guleaj xichja' benne' ca'.

Da ni dxenná Xránale.

<sup>10</sup> Xel-la' wezría guna' nen benne' Israel ca' ca te chee lu zra caní gaca na caní, dxenná Xránale: Guzúa' da gudxixruj be'a lu xichaj lázrdau benne' ca', ne guzúaja' na lu lázrdawe'.

Nadxa gaca' neda' Dios chee benne' ca', na' le' xelaque' bi chia' ca'.

<sup>11</sup> Quebe gun na ba xen xulusede ljwezre', ne quegá nu benne' xé'e bi biche': Bēnbea Xránadxu. Xúgute' xelúnbe'e neda', benne' cá'aze, ne benne' blau.

<sup>12</sup> Gunité lawa' chee benne' ca' ca naca da calela da zaj nune', ne québedxa cheajsá lazra' chee dul-la da zaj nune'.

<sup>13</sup> Gate dxuchalaj Dios chee tu xel-la' wezría cube, naca na lawe' da ba gunné' chee da nedxu naca na da gula, na' da ba dxaca na da gula, ne da gulasa la xenítete' na.

#### Lataj lá'azxa da zua lu xezr la xu, ne da zua xabáa

**9** Gate ne zua xel-la' wezría nedxu, zaj de da nadxixruj bea ca dxal-la' xelún bxruze ca' tu lu xudau' da zua xezr la xu nigá. <sup>2</sup> Xudau' nedxu caní guca na tu xu'u xide zren. Lu lataj nedxu chee xudau' na' da nazí le na Lataj Lá'azxa zaj zua da dxusa'ní, ne tu ta'a naga zria xeta xtila lá'azxa. <sup>3</sup> Cuzre naga ze ladxe' gudxupe' zua xetú lataj da nazí le na Lataj Lá'azxa Blau. <sup>4</sup> Lu lataj nigá zaj zua tu tá'adau' naga xezxe xala, ne tu xi'ina chee xel-la' wezría da nun Dios, da nacu na oro du ca nácaqueze na. Lu'ule xi'ina na' xu'u tu zruágadau' xu'u na xeta maná. Cá'anqueze lu'ule na xu'u xágadau' da bexru Aarón da na' bezría na, ne zaj xu'u na xiaj ca' naga zaj naxúaj dizra' chee xel-la' wezría. <sup>5</sup> Lawe' xi'ina nigá zaj zua gubáz chee xabáa ca' zaj naca na oro, da dxululé'e na zua Dios na', na' zaj nugacu xrile na naga dxuluzríe' dxen ne chee dul-la zaj nabaga bèneache. Québedxa séquentu' guchálajntu' ca naca chee da caní na'a.

<sup>6</sup> Gate ba nagá'ana chawe' da caní, na' bxruze ca' dxelú'queze' lu lataj nedxu chee lataj lá'azxa chee xelune' zrin chee xel-la' bxruze chee'. <sup>7</sup> Lu lataj gudxupe' dxu'u tuze bxruze blau tu lásaze tu tu iza, na' gate dxu'e na' dxun na ba xen gu'e dxen chee béadu ca' da guzríe' ne chee dul-la nabáaqueze', ne ne chee dul-la zaj nabaga bèneache ca'. <sup>8</sup> Be' Lá'azxa dxuzéajni'ine' dxi'u quebe naxalaj neza chee chú'udxu Lataj Lá'azxa Blau na' dxácaté dxelune' zrin chee xel-la' bxruze chee' lu lataj nedxu chee lataj lá'azxa na'. <sup>9</sup> Xúgute' da caní zaj naca na da dxululé'eze, da dxaca lu zra na'a zra, lawe' da guna' ca', ne dxen chee béadu ca' da dxuluzúa bxruze ca' lau Dios quebe gaca xelún na bèneache duté li lazre'. <sup>10</sup> Da caní zaj naca na chee da dxel'éaj dxelawe', ne chee da dxulucá'ana chawe' cuine', ne chee da nadxixruj bea ca naca chee bēla' dxen chee bèneache, da ca' bzua Dios ca zrindxa zra guché'e da ca'.

<sup>11</sup> Na'a ba bla' Cristo, ne naca Le' bxruze blau chee da xrlátaje ca' da ba belelá'. Lataj Lá'azxa naga dxun Le'

zrin ca bxrúze blau naca na blaudxa, ne da li lászredxa. Quebe naca na tu da zaj nun bénneache, da zéaje na, quebe naca na chee xezr la xu nigá. <sup>12</sup> Cristo ba guxúe Lataj Lá'azxa Blau, quegá chee guzúe' dxen chee béadu ca', ne chee među ca', san chee guzúe' dxen cheéqueze', na' guxúe' ga na' tu lászaze lawe' da ba bene' xel-la' weselá chadía chacanna cheedxu dxi'u. <sup>13</sup> Da li dxen chee bežre, ne chee béadu ca', ne de chee bézređu ca', bea ca' dxuluzežre' lu ta'a chee Dios, da ca' dxuluzré'e xichaj benne' ca' zaj naque' sban, zaj napa na xel-la' waca xelibe na benne' ca' cúzreze, ne chee xulucá'ana chawe na le' lau Dios. <sup>14</sup> Che caní naca na, wazéquedxa dxen chee Cristo, Bénnea' bzua cuine' lau Dios ne chee Be' Lá'azxa duté xel-la' li lazre' chee', na' dxen chee' na' dxibe na xichaj lászrdaudxu chee da bendxu da nua na xel-la' gute, chee séquedxu gundxu zrin chee Dios ban.

<sup>15</sup> Chee le na' naca Jesucristo wedé dizra' chee tu xel-la' wezrí cube. Xel-la' gute chee Cristo dxun na zrin chee gaca gunité lau Dios cheedxu ca naca dul-la da bendxu gate ne zúadxu lu xel-la' wezrí nedxu, na' na'a benne' ca' ba gunné Dios waca xelezi'e ca naca da ca' guchebe lazre' Dios, da zaj naca na chadía chacanna. <sup>16</sup> Gate tu benne' dxune' tu xiche da dxelá'a na da de chee', dxun na ba xen gulé'edxu ba nate bénnea' chee gundxu ca dxenná xiche na'. <sup>17</sup> Xiche na' quebe bi seque na dxácaté ne naca ban benne' bene' na, san gate ba gute bénnea', na' seque na. <sup>18</sup> Chee le na', xel-la' wezrí nedxu na' guzúa chuchu na ne chee dxen da buluzríe' na. <sup>19</sup> Moisés blabe' xúguté da nadxiruj bea da zaj naxúaj na lu dizra' chee Dios lau xúguté bénneache, na' ca gudé na' guqu'é'e zrila' da nadxé na da xrna, ne tu zruze xaga hisopo, na' gusebišé' na dxen chee među ca', ne dxen chee béadu ca', ne nisa, na' bzre'e na lawe' xiche naga naxúaj xtizra Dios, ne bzre'e na bénneache ca'. <sup>20</sup> Nadxa guzre' benne' ca': "Dxen nigá naca na da dxuzúa chuchu na xel-la' wezrí da nun Dios nen le'e." <sup>21</sup> Cá'anqueze bzra Moisés dxen lu lataj lá'azxa, ne lu xúguté da dxuluchínene' lu zrin da dxelún bxrúze ca'. <sup>22</sup> Ca naca da bdxiruj bea Dios, dxal-la' xulucá'ana chawe' xúguté da ca' nen dxen, na' che quebe nu gulalaj dxen, Dios quebe gunité lawe' chee bénneache ca naca dul-la da zaj nabague'.

#### Dxen chee Jesucristo dxegúa na dul-la

<sup>23</sup> Caní ben na ba xen xulucá'ana chawe' da ca' zaj naca na da dxululé'eze na ca zaj naca da zaj zua xabáa, na' da ca' zaj zua xabáa dxun na ba xen xulucá'ana chawe' na nen tu da zácadxa. <sup>24</sup> Cristo quebe guxúe lu lataj lá'azxa da zaj nun bénneache, da na' naca na tu da dxulé'eze ca naca lataj lá'azxa li da zua xabáa, san guxúe xabáqueze, naga zue' na'a lau Dios, dxudé' dizra' cheedxu dxi'u. <sup>25</sup> Bxrúze blau chee benne' judío ca' dxu'e lu lataj lá'azxa blau tu iza tu iza chee guzúe' ga na' dxen da quebe naca cheéqueze'. Na'a Cristo quebe dxuzúa cuine' zane' lasa. <sup>26</sup> La ben na ba xen guzúa cuine' zane' lasa, cá'anqueze zane' lasa gati'e da gudé bene' xezr la xu nigá. Na'a, gate ba bzrin zra dxa-

ca li ca da guchebe lazre' Dios, Cristo ba ble'e tu lászaze, na' bzua cuine' chee cue' dul-la zaj nabaga bénneache. <sup>27</sup> Ca dxun na ba xen xelate xúguté bénneache tu lászaze, na' te na' Dios guchi'e da zaj nun tu tu'e', <sup>28</sup> cá'anqueze Cristo bzua cuine' chee gutie' tu lászaze chee gudúe' dul-la zaj nabaga' benne' zante'. Te nigá xel'é'e da gudxupe', quegádxa chee cue' dul-la, san chee xedajselé' xúguté benne' dxelebeze' Le'.

**10** Da nadxiruj bea da bde Moisés guca na ca tu zrúl-laze chee da chawe' ca' da dxal-la' xelalá', ne quegá naca na léqueze na. Chee le na' da ca' buluzúa bxrúze ca' lau Dios ca nadxiruj bea na', da ca' buluzúe' tu iza tu iza, quebe gulezeque na xelún na benne' ca' li lazre', benne' ca' gulebigue' lau Dios. <sup>2</sup> La guzeque' da nadxiruj bea na' gun na benne' ca' li lazre', québedxa nu guzúa da ca' lau Dios lawe' da la guladxe benne' ca' lu dul-la zaj nabague', québedxa zaj nabague' dul-la. <sup>3</sup> Na'a da ca' buluzúe' lau Dios tu iza tu iza bulusá na lazre' chee dul-la da zaj nabague', <sup>4</sup> lawe' da quebe guzeque' dxen chee bežre ca', ne dxen chee béadu ca' cua na dul-la zaj nabaga bénneache.

<sup>5</sup> Chee le na', gate bla' Cristo lu xezr la xu nigá, guzre' Dios:

Quebe dxaca lazru' guna', ne béadu ca' nu gute leba' lau'.

Na'a ba benu' bel-la' dxen chia' nigá.

<sup>6</sup> Quebe dxezaca ba lazru' béadu ca' dxuluzežre' lau', ne béadu ca' dxelutie' lau' chee cua na dul-la zaj nabague'.

<sup>7</sup> Nadxa gunnía': "Nigá za'a neda' chee guna' ca da nnau' Lue', Dios,

ca naxúaj na chia' neda' lu xiche lá'azxa."

<sup>8</sup> Nédxula gunné': "Quebe dxaca lazru', ne quebe dxezaca ba lazru' guna', ne béadu ca' nu gute leba' lau', ne béadu ca' dxuluzežre' lau', ne béadu ca' dxelutie' lau' chee cua na dul-la zaj nabaga bénneache." Caní gunné' lácala zaj naca na da nadxiruj bea na xuluzúe' na lau Dios. <sup>9</sup> Ca gudé na' gunné': "Nigá za'a neda' chee guna' ca da nnau' Lue', Dios." Da nigá zéaje na gudé' lu waláz chee da ca' buluzúa bxrúze ca' lau Dios, gate bzua cuine' lau Dios ne chee dul-la zaj nabaga bénneache. <sup>10</sup> Dios ba bca'ana chawe' dxi'u lu dul-la nabágadxu lawe' da ben Cristo ca da gunná Dios gate bde cuine' lau Dios tu lászaze gate gutie' le'e xaga begúaj.

<sup>11</sup> Xúguté bxrúze judío dxelune' zrin lau Dios tu zra tu zra, ne zane' lasa dxuluzríe' lau Dios da cá'anqueze lácala da ca' cabata' xelezeque na xelegúa na dul-la chee bénneache. <sup>12</sup> Jesucristo bzrie' lau Dios tuze da dxugúa na dul-la, na' gudé na' gudx'é'e chalá'a xabela chee Dios. <sup>13</sup> Zue' na'a dxebeze' zra gate guzúa Dios benne' ca' dxeledábague' chee' zran ni'e. <sup>14</sup> Caní dxune' lawe' da bca'ana chawe' chadía chacanna benne' ca' zaj naque' bi chee Dios. Caní bene' gate bzua cuine' lau Dios tu lászaze. <sup>15</sup> Caníqueze dxenná Be' Lá'azxa lawe' da gunné' nédxula:

<sup>16</sup> Caní naca xel-la' wezrí guna' nen benne' Israel ca' ca te chee lu zra caní, dxenná Xránale:

Guzúa' da nadxixruj bea na' lu xichaj lázrdau benne' ca',

ne guzúaja' na lu lázrdawe'.

<sup>17</sup> Ca gudé na' dxenné':

Cabátadxa cheajsá lazra' chee dul-la da zaj nabague', ne chee da calela ca' da zaj nune'.

<sup>18</sup> Ca'an naca, gate Dios ba bnite lawe' chee bénneache ca naca dul-la da zaj nabague', québedxa dxun na ba xen bi xuluzúe' lau Dios chee cua na dul-la ca'.

### Dxal-la' bígadxu lau Dios

<sup>19</sup> Chee le na', benne' bícha'dau', waca chú'udxu lu lataj lá'azxa blau duté lázrdaudxu ne chee dxen chee Jesucristo da blalje'. <sup>20</sup> Dxezrindxu lau Dios, dxededxu tu neza cube, da quebe naca na ca da xjácale bxruze ca' lu lataj lá'azxa. Dxededxu neza da naca Crístoqueze, Bénnea' zúale Dios xabáa. <sup>21</sup> Jesús naque' bxruze blau cheedxu, ne zaj xu'u lu ne'e bénneache chee Dios. <sup>22</sup> Chee le na' dxal-la' bígadxu lau Dios duté lázrdaudxu ne duté xel-la' dxeajlí lazre' li, lawe' da bca'ana chawe' Le' lázrdaudxu chee québedxa sua da stébe lu xichaj lázrdaudxu ca naca chee dul-la, ne naca cheedxu cáteze ba gudibe' bel-la' dxen cheedxu nen da naca ca tu nisa chawe'. <sup>23</sup> Dxal-la' sua cháchadxu ca naca da dxebeza lázredxu chee da dxéajlédxu, ne quebe guchadxu ca dxundxu, lawe' da gun Dios ca da guchebe lazre' guné' cheedxu. <sup>24</sup> Dxal-la' quilaj lázredxu ca gundxu gácale ljwézredxu tudxu xetudxu chee zri'i ljwézredxu, ne gundxu da xrlátaje. <sup>25</sup> Quebe dxal-la' gusandxu xezrágadxu lau Dios ca dxelún bal-la benne'. Dxal-la' gutipa lazre' ljwézredxu tudxu xetudxu, na' gúndxadxu caní na'a lawe' da dxelé'edxu ba za bagu zra xelá' Xránadxu.

<sup>26</sup> Che núnbeadxu ca naca xel-la' li chee Dios, ne chéajdxadxu gundxu dul-la, québedxa bi de da cua na dul-la bágadxu. <sup>27</sup> Lu xel-la' dxezrebe súadxu da naca chee zra guchi'a Dios, ne chee xi' da guzría xi na benne' ca' dxeledábage' chee Dios. <sup>28</sup> Gate nu benne' bzué' chalá'ala da gunná bea Mnoisés, ne gulezrá' chupa u chunna benne' belexechebe' chee da ben bénnea', na' belutié' bénnea', ne quebe belexache lazre' le'. <sup>29</sup> Tu da stébe zrendxa dxal-la' xelezi' benne' ca' dxuluzúe' chalá'ala Zri'ine Dios, ne dxulucá'ana dítajé' dxen chee', da blalje', dxen na' dxuzúa chuchu na xel-la' wezría chee Dios, ne dxucá'ana chawe na benne' ca', na' dxelenné' schanni' chee Be' Lá'azxa chee Dios, Bénnea' nazri'ine' le'. <sup>30</sup> Ba núnbeadxu Xránadxu, Bénnea' gunnáqueze': "Neda' xebéaj lazra' bénneache. Neda' gunézruja' lazruj chee benne' ca'." Cá'anqueze gunné': "Xránale guchi'e chee bénneache chee'." <sup>31</sup> Da dxal-la' xelezrebe bénneache naca da stébe da gun Dios benne' ca'. <sup>32</sup> Le gusá lázrele le'e iza da ba guledé, gate za guzítele xel-la' naxaní' chee Dios, na' duté xel-la' zren lazre' bchaga laule xel-la' zi' da gudele. <sup>33</sup> Bál-lale le'e bulucháchalene', ne belúe' le'e lávela bénneache, na' xebál-lale le'e guzáca'le gate guná'ale benne' ca' guledé' xel-la' zi' caní. <sup>34</sup> Bexache lázrele benne' gulezrá' lizre xia, ne duté xel-la' dxebé bchaga laule da

belune' gate gulequ'é ca da nápale, lawe' da nézele nápale xabáa da zácadxa na, ne da naca na da chadía chacanna. <sup>35</sup> Quebe gusanle ca da dxuxrén lázrele, lawe' da nusá xel-la' dxuxrén lazre' chee tu da zren da sí'le. <sup>36</sup> Le'e dxal-la' gácale zren lazre' chee gunle ca da nna Dios, na' síle ca da guchebe lazre' Dios gunné' chee. <sup>37</sup> Naca na ca dxenná xiche lá'azxa:

Xátedauze de,

na' xelá' Bénnea' dxal-la' xelá', ne quebe chene'.

<sup>38</sup> Benne' naque' xlátaje lawa' neda',

gata' chee' xel-la' nabán li lazre' lawe' da dxéajle'e chia',

na' che cueaj xíchaje' neda' quebe xezaca ba lazra' nen bénnea'.

<sup>39</sup> Na'a dxi'u quebe nácadxu tuze nen benne' ca' dxelebéaj xíchaje' Dios, ne xelebía xi'e. Nácadxu tuze nen benne' dxeléajle'e chee Dios, na' xelélé bénne'du zaj xu'e.

### Xel-la' dxeajlí lazre'

**11** Che nápadxu xel-la' dxeajlí lazre' dxuxrén lazrdxu sidxu da dxebézadxu, ne nézquezdxu naca da li da quebe dxelé'edxu. <sup>2</sup> Xra xrtáudxu ca' belexegá'ane' xrlátaje lau Dios lawe' da guléajle'e chee'.

<sup>3</sup> Lu xel-la' dxeajlí lazre' cheedxu nezdxu ben Dios xezr la xu nigá, bchínene' dizra' chee', na' ca naca da dxelé'edxu na'a ben Dios le na nen da quebe nalá' gate nate.

<sup>4</sup> Abel, lu xel-la' dxeajlí lazre' chee', bzué' lau Dios tu guna' da zácadxa na ca da bzua Caín, na' chee le na' Dios gunné' naca xlátaje Abel, ne guzi'e guna' chee'. Ca'an naca, lácala ba gute Abel, ne dxusédené' dxi'u ne chee da bene' lawe' da gudape' xel-la' dxeajlí lazre'.

<sup>5</sup> Enoc, lu xel-la' dxeajlí lazre' chee', Dios beche'e le'. Quebe gutié', na' québedxa nu ble'e le' lawe' da beché Dios le'. Naxúaj na lu xiche lá'azxa da dxenná na, gate quebe ne xeché Dios le', ben Enoc ca da bezaca ba lazre' Dios. <sup>6</sup> Quebe gaca nu gun da xezaca ba lazre' Dios che quebe dxeajlí lazre' le'. Bénnea' dxebigue' lau Dios, dxun na ba xen chéajle'e zua Dios, ne xunézruje' chee benne' ca' dxelexilaje' le'.

<sup>7</sup> Noé, lu xel-la' dxeajlí lazre' chee', gate Dios guzre' le' nédxula ca da dxal-la' gaca, bzué' dizra' chee Dios, ne bene' tu da zren da dxedá lawe' nísadau' chee xelélé xrtié' ca'. Guxeajlí lazre' Noé Dios, san gulebía xi' bénneache zaj zré'e xezr la xu na', lawe' da quebe guleajlí lazre' Dios. Dios bca'ane' Noé xrlátaje lawe' da guxeajlí lazre' le'.

<sup>8</sup> Abraham, lu xel-la' dxeajlí lazre' chee', gate Dios gunné' le', bzué' dizra', ne guzé'e zéaje' tu lu xezr la xu da guchebe lazre' Dios gunézruje' chee'. Bdxuaje' lázrie', ne quebe nézene' naga zéaje'. <sup>9</sup> Lawe' da guxeajlí lazre' Dios, guzúa Abraham lu xezr la xu na' da guchebe lazre' Dios gunézruje' chee', naga naca xezr la xu chee benne' zitu' ca'. Guzúe' tu lu xu'u ladxe', ne cá'anqueze ben Isaac, ne Jacob, benne' ca', cá'anqueze Dios guchebe lazre' xelezi'e da na' gunezruj Dios le'.

<sup>10</sup> Caní ben Abraham lawe' da guleza lazre' chu'e lu xezre na' da quebe te chee na, da na' guleche Dios, ne da ben Léqueze'.

<sup>11</sup> Cá'anqueze Sara, lácala ba nácalé'e benne' gula, ne quebe nu bi chee' dxalaj, san xel-la' dxeajlí lazre' chee' guque' xrna bidau'. Guzúa tu bi biu chee' lawe' da guxeajlí lazre' Dios guné' ca da guchebe lazre'. <sup>12</sup> Caní guca, Abraham, lácala ba gúxrulé'e, guxánlé'e zri'ine zre sue' ca naxán xuzre' da zaj dxe' dxu'a tu yegu zren, da quebe nazeque' gulábadxu.

<sup>13</sup> Xúguté benne' caní gulate'e, ne quebe ne xelezí'e da ca' nachébe lazre' Dios, san lawe' da guleajlí lazre' Dios, belelé'ene' na zítu'la, na' belexezaca ba lázreléne' na. Caní bululé'ene' gulaque' ca benne' zitu', benne' guledeze lu xezr la xu nigá. <sup>14</sup> Benne' dxuluchálaje' caní dxululé'ene' dxeledé' dxelexílaje' tu lazrié'. <sup>15</sup> La buluwía lazre' ca naca xezr la xu naga gusá'aque', na' waca xelexezrine' na'. <sup>16</sup> Gulaca lazre' tu lazrié' da naca na cháwe'dxa, da na' naca na lazrié' da zua xabáa. Chee le na' Dios quebe dxexedué'ene' gate dxelenná benne' ca' naque' Dios chee', na' nucueze' tu xezre naga xelexúa benne' ca'.

<sup>17</sup> Gate guca lazre' Dios nézene' ca naca xel-la' dxeajlí lazre' chee' Abraham, na' lu xel-la' dxeajlí lazre' chee' guché'e Isaac chee' gutié'-be' lau Dios. Ba zue' gutié' bi tu licha' chee' lácala ba nachébe lazre' Dios, gunné': <sup>18</sup> "Ne chee' Isaac wazrále'e zri'ine zre su'." <sup>19</sup> Abraham bxren lazre' Dios wazéquene' gusebané' benne' gate, na' waca nnadxu bezí' lu ne'e zrí'ine' Isaac ládujla benne' gate.

<sup>20</sup> Isaac, lu xel-la' dxeajlí lazre' chee', guchebe lazre' xelezí' zrí'ine' Jacob, ne Esaú da xrlátaje ca'. <sup>21</sup> Jacob, lu xel-la' dxeajlí lazre' chee', gate zua gatié', guchebe lazre' xelezí' tu tu zri'ine José da xrlátaje ca', ne be lá'ane' Dios, nuchiche tipe' xágadu nuxre'. <sup>22</sup> José, lu xel-la' dxeajlí lazre' chee', gate ba zua gatié' gunné' welexedxúaj benne' Israel ca' lu xezr la xu Egipto, ne bdxixruj be'e ca dxal-la' xeluné' chee' zrita xu'e.

<sup>23</sup> Gate gulaj Moisés, xra xrne'e, lu xel-la' dxeajlí lazre' chee' bulucaché' lebe' lawe' chunna beu', lawe' da belelé'ene' naca bidu na' xrtanlé'e, ne quebe belezrebe' benne' wenná bea, bénnea' bdxixruj be'e xelate bidu ca'. <sup>24</sup> Moisés, lu xel-la' dxeajlí lazre' chee', gate guque' benne' waca, quebe guca lazre' gaque' zri'ine nu'ula zri'ine benne' wenná bea chee' xezr la xu Egipto, <sup>25</sup> san guca lázredxe' té'e xel-la' zi' nen bi ca' chee' Dios quézcala sue' tu chí'idau' lu da ba neza chee' da naca dul-la. <sup>26</sup> Gúquene' nácadxa chawe' gate belún lala bénneache chee' ca da guca chee' Cristo, quézcala gape' ca naca da gunní'a chee' xezr la xu Egipto, lawe' da dxenné'e da gunezruj Dios le'. <sup>27</sup> Moisés, lu xel-la' dxeajlí lazre' chee', bedxúaje' lu xezr la xu Egipto, ne quebe bezrebe' xel-la' dxezrá'a chee' benne' wenná bea, na' guzúa chúchue' ca tu benne' dxelé'ene' Dios, Bénnea' quebe gaca nu le'e.

<sup>28</sup> Moisés, lu xel-la' dxeajlí lazre' chee', bené' Laní Pas-cua gate na' bdxixruj be'e xuluzrá benne' Israel ca' dx-en le'e xaga dxa xu'u chee' quebe gute gubáz chee'

xabáa chee' xel-la' gute netú zri'ine benne' Israel ca', bi biu nedxu. <sup>29</sup> Benne' Israel ca', lu xel-la' dxeajlí lazre' chee', beledé' lu Nísadau' Xrna ca benne' dxeledé lu xu bizre, san gate gulú'u benne' Egipto ca' naga ba guledé benne' ca', na' bezraga nisa na', na' gulebé' chí'i benne' Egipto ca', na' gulate'e.

<sup>30</sup> Benne' Israel ca', lu xel-la' dxeajlí lazre' chee', guzré'e ze'e da naxechaj na xezre Jericó ca gudé guledé benne' Israel ca' bezúate xezre na' tu tu lasa du gazre zra. <sup>31</sup> Rahab, nu'ula dxez' lu ne'e benne' zaj xu'e neza, lu xel-la' dxeajlí lazre' chee', quebe gutié' tu zren nen benne' Jericó ca', benne' quebe buluzúa dizra' chee' Dios, lawe' da gudapa le' ba lá'ana benne' Israel ca', benne' xeajlenná' lane' xezre na'.

<sup>32</sup> ¿Bízradxa nnia'? Québedxa bi lataj napa' guchálaja' ca ben Gedeón, ne ca ben Barac, ne ca ben Sansón, ne ca ben Jefté, ne ca ben David, ne ca ben Samuel, ne ca belún benne' ca' gulenné' waláz chee' Dios. <sup>33</sup> Benne' ca' lu xel-la' dxeajlí lazre' chee' gulez'í'e xezr la xu ca' chee' benne' xula, ne gulenná be'ene' cháwe'dau' benne' waláz chee' ca', na' gulez'í'e da guchebe lazre' Dios, lawe' da gúcaléne' le'.

Belelé' lu dxu'a bezre xixre' ca'.

<sup>34</sup> Buluxusulé' xi' da dxéneaca.

Belelé' lu xia nalá.

Benne' ca' zaj nate ni'a na' belexaque' dipa lazre'. Gulaque' benne' wala lu wedil-la, ne gulaca lu ne'e da guta' chee' benne' ca' guledábague' le'.

<sup>35</sup> Nu'ula ca' belez'í' lu ne'e benne' gate chee' ca', benne' belexebáne'.

Xebal-le' gulátie' gate buludé'e le' ba xa', lawe' da quebe belú'e lataj nu gusán le', chee' xelexrué'ene' xel-la' dxexebán chee' xelexi'e xetú xel-la' nabán da naca na da li.

<sup>36</sup> Xebal-le' belún le' chee',

na' xebal-le' belú'e le',

na' xebal-le' buluchéaje' le' du xia ne gulegu'e le' lizre xia.

<sup>37</sup> Belutie' xebal-le' nen xiaj,

na' xebal-le' gulecheze' le' nen xia.

Xebal-le' buludé'e le' lu da stébe ca',

na' xebal-le' belutie' nen xia nalá.

Xebal-le' guledé'e nila na'la,

zaj nacue' zra zrila' ne zra béadu ca'.

Baxache' gulaque', na' guledé'e lu da zi' da xa',

na' buluzaljé' le'.

<sup>38</sup> Bénneache zaj zra' lu xezr la xu nigá quebe zaj naca chee' xelexi'e ba neza chee' benne' caní. Tu guledázqueze' le'e xixre', ne lu xi'a ca', ne lu bluaj ca', ne lu bluaj xu ca'. <sup>39</sup> Xúguté benne' ca' bca'ana chawe' Dios le' lawe' da guleajlí lazre' le', san quebe ne xelexi'e ca naca da guchebe lazre' Dios, <sup>40</sup> lawe' da nucueza Dios tu da nácadxa chawe' cheedxu dxi'u, chee' xelexaca benne' ca' li lazre' tu zren nen dxi'u.

#### Dxal-la' nna'dxu Jesús

**12** Lawe' da zaj naxéchaj benne' zanté dxi'u, benne' ca' ba bululé'ene' ca guléajlé'e chee' Dios,



dxal-la' guzúadxu chalá'ala xúgute da dxululale na dxi'u, ne dul-la da naxel-la na dxi'u, na' lu dutę xel-la' zren lazre' cheędxu gundxu zrin cheę Dios, da naca na ca dxezá' chęgudxu cheę zrué'eledxu da dxelé'edxu tu chi na'. <sup>2</sup> Dxal-la' nna'dxu Jesús, Bénnea' dxune' ná-padxu xel-la' dxeajlí lazre', ne dxune' li lazre' xel-la' dx-eajlí lazre' na'. Jesús gudéę' xel-la' zi' le'ę xaga begúaj, ne quebe bedué'ene' lawe' da guné'ę xel-la' dxebé na' da dxebeza na Le', na' gudxé'ę chalá'a xabela cheę lataj blau cheę Dios.

<sup>3</sup> Le nna' xanne' ca da ben Jesús, gudéle'ę xel-la' zi' da bulusaca benne' dul-la ca' Le'. Cheę le' na' quebe cha-jxręquele gunle zrin cheę', ne quebe gute lázrele. <sup>4</sup> Ba gudíl-lalele dul-la, na' quebe ne gátele lu wedil-la na'. <sup>5</sup> Quebe gal-la lázrele le'e ca dxun Dios, dxuzéajni'ine' le'e ca zrí'inequeze', gate dxenné':

Zrí'ina', quebe guzú' chalá'ala da dxun Xranu' gate dxusízreņ' lue',  
ne quebe gate lazru' gate dxedil-le' lue'.

<sup>6</sup> Xránadxu dxusízreņ' bi ca' nazrí'ine',  
na' xúgute bi dxezí' lu ne'ę ca zrí'inequeze' dxudéę'-be' xel-la' zi'.

<sup>7</sup> Le guchaga lau le'e xel-la' zi' da dxedele, lawe' da dxuxúe Dios le'e ca zrí'inequeze'. ¿Zra bi quebe dxu-sizre xrabe' lebe'? <sup>8</sup> Che Dios quebe dxusízreņ' le'e ca dxusízreņ' xúgute bi cheę' ca', quebe nácale zrí'in-equeze Le'. Nácale ca bi lan ca'. <sup>9</sup> Gate ne nácadxu bidau', bulusizre xra xrnadxu dxi'u, na' gudápadxu le' ba lá'ana. Dxal-la' guzúadxu dizra' Xradxu zue' xabáa, na' gaca bandxu. <sup>10</sup> Xra xrnadxu bulusízreņ' dxi'u tu chí'idauze ca da guléqueņ' chawe', san Dios dxusízreņ' dxi'u cheę gaca tu da ba neza cheędxu da naca na li lazre', cheę gácadxu lá'azxa ca naca lá'azxa Léqueze'. <sup>11</sup> Da li quebe dxedánnedxu da dxusizre xradxu dxi'u, san dxéquedxu zi', na' dxedé na', che dxéajni'idxu ca da dxusízreņ' dxi'u, na' gundxu da xr-látaje ca', ne cueza zri lázredxu lau Dios.

### Quebe dxal-la' guzúadxu chalá'ala da dxenná Dios

<sup>12</sup> Cheę le' na' le guzazraj na'le, ne zríbele da ba dxe-late ni'a na', <sup>13</sup> ne le sa' lu neza da zaj naca na li, cheę quebe chegu ní'ale da quebe zaj zua chacha, ne cheę xelexaca chacha na.

<sup>14</sup> Le gun ba xuzre suale lu xel-la' dxebeza zri lazre' nen xúgute bęnneache, ne le gaca li lazre' lau Dios. Che quebe gunle caní, quebe gaca lé'elele Xránadxu. <sup>15</sup> Le guxúe xanne' cheę quebe gusanle da chawe' ca' dxunna Dios le'e, ne cheę quebe gaca netule le'e ca tu xixre' sla' da dxulala na, ne dxuxrinnaj na da xezícala. <sup>16</sup> Le guxúe xanne' cheę quebe gunle da sban, ne quebe guzúale chalá'ala ca da dxunna Dios, ca ben Esaú, bénnea' bsane' xúgute da gunezruj xre' le' cheę guzi'ę tu cueze xel-la' wagu. <sup>17</sup> Ba nézele ca da guca gudé na', gate guca lazre' Esaú na' si'ę da chawe' da naba xre' lau Dios, na' xre' bzue' le' chalá'ala, ne lácala gudxézrelę'ę, quebe guca xuché'ę ca da ba bęne'.

<sup>18</sup> Quebe dxaca cheęle ca da guca cheę benne' Israel ca', gulebigue' naga zua tu xi'a, da na' wazeque' nu

guchiche, ne naga dxala na xi', naga zua da chul-la, ne dxe' zren, ne dxaca be' bđunu'. <sup>19</sup> Belenne' gudxezre luzu da dxulucuezre', ne chi'i Dios bchálajleņ' le'. Benne' ca' belenne' chi'i Dios na' gulata' xúene' québedxa guchálajleņ' le'. <sup>20</sup> Ca'an guca lawe' da quebe gulezéqueņ' xuluchaga lawe' ca naca da bdx-ixruj be'e Dios, gunné': "Che tu béadauze guléajba' lu xi'a na', dxal-la' xelútie'-ba' nen xiaj u nen tu xia nalá xéche'ze." <sup>21</sup> Da na' belélé'ene' bchébele'ę na le', na' Moisés gunné': "Dxezrízetea' xel-la' dxezrebe."

<sup>22</sup> Na'a le'e ba nabícale naga zua xi'a lá'azxa da nazí le na Sión, ne lu xęzre cheę Dios ban, da naca na Jerusalén da zua xabáa, ne naga zaj zra' gázxue gázx-ue gubáz cheę xabáa, <sup>23</sup> ne naga zaj nazraga benne' ca' gulaca bi cheę Dios nédxute, benne' ca' ba zaj naxúaj le' xabáa, ne lau Dios, Bénnea' guchi'ę cheę xúgute bęnneache, ne naga zaj zra' be' gulácaqueze benne' ca' ba nun Dios le' li lazre', <sup>24</sup> ne lau Jesús, Benne' wedé dizra' cheę xel-la' wezría cube, ne naga bzre'ę dxen da dxuchalaj na da cháwedxa ca da bcha-laj dxen cheę Abel.

<sup>25</sup> Cheę le' na', le guxúe xanne' cuínale cheę quebe guzúale chalá'ala Bénnea' dxuchálajleņ' dxi'u. Quebe belegache benne' ca' buluzúe' chalá'ala Dios gate na' bchálajleņ' le' lu xęzr la xu nigá, ne quebe gáchedxu dxi'u che guzúadxu chalá'ala Bénnea' dxuchálajleņ' dxi'u, zue' xabáa. <sup>26</sup> Lu zra na' gate gunná Dios, na' guzrú' xęzr la xu nigá. Na'a dxenné': "Xetú lásaze guni-ba' quegaze xęzr la xu nigá, san cá'anqueze xabáa."

<sup>27</sup> Gate gunné': "Xetú lásaze", zéaje na xecá'a Dios ca naca da dxeledá, da ca' bęne', na' xegá'ana da quebe seque' nu gutá. <sup>28</sup> Dxal-la' xędxu Dios: Xcalenu' lawe' da gunne' dxi'u tu lataj naga dxenná bea Le' da quebe seque' nu gutá. Dxal-la' güe lá'anadxu Dios du lázredxu ne dutę xel-la' ba lá'ana, ca da dxezaca ba lazre', <sup>29</sup> lawe' da naca Dios cheędxu ca tu xi' da guzría xi na da sban.

### Da dxezaca ba lazre' Dios

**13** Quebe gusanle ca nazrí'i ljwézrele tule xetule ca bíchequezle. <sup>2</sup> Le gusá lázrele dxal-la' si' lu na'le benne' zá'aque' lízrele, lawe' da gate belún caní bal-la benne', gulezí' lu ne'ę gubáz cheę xabáa ca', ne quebe guleque be'ene'.

<sup>3</sup> Le gusá lázrele gácalele benne' zaj xu'ę lizre xia, gun cuínale ca benne' xú'unqueze lizre xia nen benne' ca'. Le gusá lázrele gácalele benne' ca' dxeledéę' xel-la' zi', gun cuínale ca benne' dxeledéqueze' xel-la' zi'.

<sup>4</sup> Xúgutele dxal-la' gápale ba lá'ana xel-la' wechaga na', ne gunle da xlátaje lu xel-la' wechaga na' cheęle, lawe' da guchi'a Dios cheę benne' ca' dxuluzúe' chalá'ala xel-la' wechaga na' cheę', ne cheę benne' ca' dxelune' da sban.

<sup>5</sup> Quebe sa lázrele xel-la' gunní'a. Le xezaca ba lázrele ca da nácale lawe' da ba gunná Dios: "Cabata' gusana' lue', ne quebe cueaj xíchajqueza' lue'." <sup>6</sup> Caní naca, du lázredxu waca nnadxu:

Xrana' Dios dxácaleņ' neda'.

Quebe zreba' bi da gusaca bënneache neda'.

<sup>7</sup> Le gusá lázrele gácale benne' ca' dxuluxúe' le'e, ne dxuluchálajlęne' le'e dizra' cheę Dios. Le na' xque ca da dxelúnę', ne le chéajlę cheę Dios ca dxelún benne' ca'.

<sup>8</sup> Túzqueze ca naca Jesucristo neaje, ne na'a zra, ne chadía chacanna. <sup>9</sup> Quebe sile ca da dxuluchalaj benne' dxulusédenę' da quebe naca na ca da naxúaj na lu xiche lá'azxa cheę Dios. Cháwedxa naca guzúa chuchu lázrdaudxu lu xel-la' zri'i lazre' cheę Dios, ne quebe chéajlędxu da dxeledxixruj bea benne' ca naca da dxal-la' xi'aj gágudxu, lawe' da benne' ca' zjácálęne' da ca' cabata' ne xelezí' ba neza ne cheę da ca'.

<sup>10</sup> Bxruze judío ca' gulawe' béadu ca' belutię' lataj lá'azxa. Quebe zaj naca cheę' xelawe' guna' da dx-ugú'udxu dxi'u cheę Dios. <sup>11</sup> Bxruze blau judío bzrię' dxen cheę béadu ca' lu lataj lá'azxa blau ca tu guna' da dxegúa na dul-la. Buluzexę' da nagá'ana cheę béadu ca' cúzrela xęzre. <sup>12</sup> Cá'anqueze gute Jesús cúzrela xęzre na' cheę bca'ana chawe' bënneache ne cheę dx-en cheęqueze'. <sup>13</sup> Le dxuaj, gundxu tu zren Cristo, lácala xuluzúa bënneache dxi'u chalá'ala ca belunę' cheę Le'. <sup>14</sup> Lu xęzr la xu nigá quebe de cheędxu tu xęzre da súateęqueze. Dxebézadxu tu da za za'. <sup>15</sup> Cheę le na' tu dxál-lazqueze güe lá'anadxu Dios nen dxú'aquezdxu ne cheę Jesucristo, da naca na ca tu guna' da dx-ugú'udxu cheę Dios. <sup>16</sup> Dxa-la' gusá lázredxu gundxu da xrlátaje, ne bi gunézrujdxu cheę benne' ca' quebe bi zaj nape', lawe' da dxezaca ba lazre' Dios le na.

<sup>17</sup> Le guzúa dizra' cheę benne' ca' dxuluxúe' le'e, ne le gun ca da dxelennę'. Benne' caní dxuluxúe' bënne'du

xu'ule, ne xuluxudęe' lau Dios ca da zaj nunę'. Che gunle caní, na' benne' caní welunę' zrin cheę' du lazre', ne quebe xelezúa xache', lawe' da che quebe gunle caní, quebe bi da ba neza gaca na cheęle.

<sup>18</sup> Le naba lau Dios gaca chawe' cheętu'. Quebe bi zua lu lázrdauntu' da dxagu na zria netu' lawe' da dx-un zi' lázrentu' guntu' da xrlátaje ca naca xúgute da dxuntu'. <sup>19</sup> Dxenaba' le'e ná bale lau Dios gunę' neda' lataj xídazega' súalęna' le'e naga zúale.

<sup>20</sup> Dxenaba' lau Dios, Bënnea' dxunne' dxi'u xel-la' dxebeza zri lazre', ne bsebanę' Xránadxu Jesucristo ládujla benne' gate. Léqueze' naque' Benne' Blau Dx-uxúe' Dxi'u, nácadxu zri la' cheę', na' caní naque' lawe' da blalję' dxen cheę' da bzua chuchu na xel-la' wezría chadía chacanna da bęne'. <sup>21</sup> Dxenaba' Dios gunę' le'e li lazre' cheę séquele gunle da xrlátaje ca da dxaca lazre' Le', ne gunę' cheętu' ca da dxaca lazre' ne cheę Jesucristo. ¡Gaca ba Cristo chadía chacanna! ¡Ca'an gaca na!

<sup>22</sup> Le'e, benne' bícha'dau', dxata' xueda' le'e gácale zren lazre' ca naca dizra' caní, da dxulusizre na le'e, na' látega da du nigá dxuzúaja' cheęle. <sup>23</sup> Dxuzenda' le'e ba bedxúaj bi bíchedxu Timoteo lizre xia, ne che xelá' zéębe', na' che'a-be' gate xedajnná'a le'e.

<sup>24</sup> Le gugapa diuzre xúgute benne' ca' dxuluchálajlęne' le'e dizra' cheę Dios, ne le gugapa diuzre xúgute benne' bíchedxu ca'. Benne' zaj zreę xęzr la xu Italia nigá dxulugape' le'e diuzre.

<sup>25</sup> Dxenaba' lau Dios gunę' da chawe' cheę xúgutele le'e. ¡Ca'an gaca na!

# Santiago

## Santiago dxuzuaje' chee' benne' ca' zaj nadxúaje' lazre'

**1** Neda', Jacobo, naca' wən zrin chee' Dios, ne chee' Xránadxu Jesucristo. Dxugapa' le'e diuzre. Nácale chazrinnu cue' zri'ine zre sua Ísrael, ne nase dínnajle du gabí'i xezr la xu nigá.

### Xel-la' sina da za lu na' Dios

<sup>2</sup> Benne' bícha'dau', dxal-la' béle'ele gate dxedele zane cue' da stēbe ca', <sup>3</sup> lawe' da nézele gate dxedé xel-la' dxeajlí lazre' chee' lu da stēbe, da nigá dx-undxa na le'e zren lazre'. <sup>4</sup> Le gun ba xuzre gaca li lazre' xel-la' zren lazre' chee' gácale benne' xrlátaje ne li lazre', ne quebe bi xázrjele.

<sup>5</sup> Che núlale le'e dxexárjele xel-la' sina, le naba na lau Dios, na' Lē' gunne' na le'e, lawe' da dxunézrujle' Dios chee' xúgutē bēneache, ne quebe dxexezúene' zi'. <sup>6</sup> Dخال-la' nábale nen dutē xel-la' dxeajlí lazre' chee', ne quebe gun chupa lázrele. Benne' dxun chupa lazre' naque' ca xeajxruza chee' nísadau' da dxua be' nila na'la. <sup>7</sup> Benne' dxunē' caní, ne quebe zrize dx-ezúa lázrdawē', ne quebe tuz ca dxun xichaj lázrdawē' quebe dxal-la' guéquene' bi da xunexruj Xránadxu chee'.

<sup>9</sup> Tu benne' bíchedxu naque' baxache' dxal-la' bene' lawe' da guzúa Dios lē' ca tu benne' zaca. <sup>10</sup> Benne' nape' xel-la' gunní'a dxal-la' bene' gate gun Dios lē' dx-exruj lazre' lawe' da naca benne' gunní'a ca tu xiaj xixre' da quebe dxezí béateca na. <sup>11</sup> Gate dxalaj gu-bizra, ne dxennále' na, na' dxebizre xixre' na', na' dx-exruj xiaj chee' na, na' dxedé xel-la' xrtan chee' na. Cá'anqueze gaca chee' benne' gunní'a, xenitiē' dxácate na' dxezí' lu ne'e xel-la' gunní'a.

### Ca naca chee' da stēbe ca' da dxededxu

<sup>12</sup> Ba neza naca na chee' benne' dxuchaga lawe' da stēbe ca' dutē xel-la' zren lazre' chee', lawe' da che ba bedxúaje' chawe' lu da stēbe da dxedé', na' si' lu ne'e da nachēbe lazre' Dios gunézruje' chee' benne' ca' zaj nazri'ine' Lē'. <sup>13</sup> Gate nu benne' zua da dxegú'u xel-la' na lē' chee' gunē' da calēla, quebe dxal-la' guéquene' dxuzúa Dios da na' dxegú'u xel-la' na lē', lawe' da quebe bi de' da seque' xegú'u xel-la' na Dios chee' gunē' da calēla, ne quebe bi guzúa Dios da xegú'u xel-la' na dxi'u chee' gundxu da calēla. <sup>14</sup> Tu benne' zua da dxegú'u xel-la' na lē' chee' gunē' da calēla gate xel-la' dxezá lazre' da calēla chee' dxecá'a na lē', ne dxenná be'e na lē'. <sup>15</sup> Nadxa ca naca xel-la' dxezá lazre' da

calēla caní dxuluzán na dul-la, na' gate ba guzeque' zua dul-la na', na' dxute na bēneea'.

<sup>16</sup> Benne' bícha'dau' nazri'ite' lazra', quebe güele lataj nu si xē le'e. <sup>17</sup> Xúgutē da zaj naca xrlátaje ne da zaj naca li lazre' da dxezidxu zá'aca na xabáa lu na' Dios, Bēneea' bene' da ca' dxulusení na zran xabáa. Dios quegá dxuchá cuine', ne quebe dxuché' ca dxunē'. <sup>18</sup> Ca naca da guca lazre' Dios, ba benne' dxi'u xel-la' nabán. Bchínene' dizra' li chee', chee' gácadxu ca tu lina nedxu chee', chee' da ba ben Lē'.

### Xel-la' dxucá'ana szren Dios da naca na li lazre'

<sup>19</sup> Chee' lē' na', benne' bícha'dau' nazri'ite' lazra', tu tule le'e dxal-la' gácale ban lazre' chee' xénele, san dx-al-la' cueza lázrele ca da nne' ne quebe la' zrá'atele.

<sup>20</sup> Tu benne' xichaj zra'a quebe dxunē' da dxezaca ba lazre' Dios. <sup>21</sup> Chee' lē' na', le gusán xúgutē da sban ne ca naca da calēla da dxanle' na, na' dutē xel-la' dx-exruj lazre' chee' le si' ca naca dizra' chee' Dios da ba naxaza na lu xichaj lázrdawē', lawe' da wazeque' dizra' na' guselá na bēne' du xu'ule.

<sup>22</sup> Le gun ca da dxulé'e dizra' na' le'e, ne quegá xénezele na. Benne' dxénzene' na dxezí' xēze cuine'. <sup>23</sup> Bēneea' dxénzene' dizra' na', ne quebe dxunē' ca dxenná na, naque' ca tu benne' dxenné' lawe' tu lu wana'. <sup>24</sup> Dxenné' ca naque', na' gate ze xeajze' na', na' dxal-la' lazre' ca naque'. <sup>25</sup> Benne' dxenná' xánnie' ca da bdxixruj be'e Dios da naca na li lazre', ne da dxuselá na dxi'u, ne dxusé'die' ca naca na, ne quegá dxénzene' na, quebe dxal-la' lazre' na. Che dxunē' ca naca na, benne' nigá gaca tu da ba neza chee' lu xúgutē da dxunē'.

<sup>26</sup> Che nu benne' dxéquene' naque' benne' dxucá'ana szren Dios, ne quebe dxezéquene' nna be'ene' luzre', benne' nigá dxezí' xēze cuine', na' ca naca xel-la' dx-ucá'ana szren Dios chee' dácheze naca na. <sup>27</sup> Xel-la' dx-ucá'ana szren Dios da naca na du lazre', ne da naca na da dxezaca ba lazre' Xradxu Dios naca na caní: Gá-calēdxu bidu ca' zaj nazebe, ne nu'ula ca' ba zaj nate benne' biu chee' gate zaj zuē' lu da zi' da xa', ne quebe gundxu ca naca da sban chee' xezr la xu nigá.

### Quebe guchale ca gunle chee' tu tu benne'

**2** Benne' bícha'dau', le'e dxéajlele chee' Xránadxu, Benne' xabáa Jesucristo, quebe dxal-la' guchale ca gunle chee' tu tu benne'. <sup>2</sup> Che chu'u tu benne' naga nazrágale, ne nácuē' zra lanē' da zaca, ne xu'u da naca na oro lu xrube ne'e, na' cá'anqueze che chu'u tu

benne' xache', ne nácuę' zra lanę' tuzruj, <sup>3</sup> na' che dx-elé'ele cháwedau' bēneā' nácuę' zra lanę' da zaca, ne dxele le': "Gudxe'e nigala naga nácadxa na chawe'", na' dxele benne' xache' na': "Xeajsé na'la, u gudxe'e lu xu ná'teže." <sup>4</sup> Che dxunle caní, dxuchale ca dxunle cheę tu tu benne', ne dxuchí'ale ca zaj naca bēneache, quebe naca xrlátaje xichaj lázrdaule.

<sup>5</sup> Benne' bícha'dau' nazri'itę lazra', le xen da nigá: Dios ba guquęę benne' ca' zaj naquę' benne' xache' lu xęzr la xu nigá cheę xelaquę' benne' gunnía' lu xel-la' dxeajlí lazre', ne cheę xelezí' lu neę' da nucueza Dios naga dxenná bea Le', da na' guchebe lazre' Le' gunézruje' cheę benne' ca' zaj nazri'ine' Le'. <sup>6</sup> Le'e dx-uzúale chalá'ala benne' xache' ca'. ¿Quegá benne' gunnía' ca' benne' dxuluchínene' le'e, ne dxelechę' le'e lau benne' xulawe' ca'? <sup>7</sup> ¿Quegá benne' gunnía' ca' benne' dxelenné' schanni' cheę da xrlátaje ca nazí' lale, dxennale nácale bi cheę Cristo?

<sup>8</sup> Che da li dxunle ca dxenná da nadxixruj be'e Dios, da nácadxa blau ca da naxúaj na lu xiche lá'azxa, dxenná na: Bzri'i biche ljwezru' ca nazri'i cuinu', xrlátaje dxunle. <sup>9</sup> Na'a che dxuchale ca dxunle cheę tu tu benne', dul-la dxunle, ne nabágale zria lawe' da quebe dxunle du ca bdxixruj be'e Dios. <sup>10</sup> Che tu benne' dxunę' ca zaj naca da nadxixruj be'e Dios, san che dxenéguene' ca naca tuze da nadxixruj be'ene', naca na cáteze nabague' zria ca zaj naca xúgutę da nadxixruj be'e Dios. <sup>11</sup> Léqueze Dios gunné': "Quebe gunle dul-la da dxichaj na xrba cheę xel-la' wechaga na'", cá'anqueze gunné': "Quebe gútele benne'." Caní naca, che tu benne' quebe dxunę' dul-la da dxichaj na xrba cheę xel-la' wechaga na', san che dxutie' benne', ba gunéguene' ca da nadxixruj be'e Dios. <sup>12</sup> Le'e dxal-la' guchálajle, ne gunle ca dxal-la' xelún benne' ca' guchi'a Dios ca da dxelunę', benne' ca' zaj nalá lu na' da gunná bea Le'. <sup>13</sup> Benne' ca' quebe dxelexexache lazre' cheę benne' xula, Dios guchi'e ca da dxelún benne' ca', ne quebe xexache lazre' cheę benne' ca', san benne' ca' dxelexexache lazre' cheę benne' xula quebe bi zria xebeague' gate Dios guchi'e ca da zaj nun benne' caní.

#### Ca naca cheę xel-la' dxeajlí lazre', ne cheę zrin dx-undxu

<sup>14</sup> Le'e, benne' bícha'dau', ¿bizra culuén gapa na che tu benne' dxenné' dxeajlí lazre' Cristo, na' quebe bi dxunę' da dxácalęn nu benne' dxexázejne'? ¿Wazeque' xel-la' dxeajlí lazre' na' guselá na le'? <sup>15</sup> Che zra' benne' bíchedxu u nu'ula zandxu, benne' quebe bi zaj dę zra lanę' u da xelawe', <sup>16</sup> na' che núlale le'e xele benne' ca': "Bexiajzé cháwedau'. Nazré'enu', ne gágugu' szri'", san che quebe bi gunézrujle ca da dxexázejne', ¿bizra culuén gapa da na' gunnále? <sup>17</sup> Caní naca na cheę xel-la' dxeajlí lazre'. Che quebe bi zaj dę da chawe' da xululé'e na che dxeajlí lazre' bēneā' Cristo, xel-la' dxeajlí lazre' cheę' naca na ca tu da gate.

<sup>18</sup> Wannalja nu benne': Lue' dxennáu' dxéajle'u cheę Cristo, na' neda' dxuna' da chawe' ca'. Ble'e neda'

dxéajle'u cheę Cristo ne quebe dxunu' da chawe' ca', na' neda' gulé'eda' lue' dxeajlí lazra' Cristo ne cheę da chawe' ca' da dxuna'. <sup>19</sup> Dxéajle'u lue' zua tuze Dios. Nácaqueze na ca'. Cá'anqueze da xriwe' ca' dxeléajle na, ne dxelezrize na lu xel-la' dxelezrebe. <sup>20</sup> Lue', benne' xala, ¿dxaca lazru' gulé'eda' lue' naca xel-la' dxeajlí lazre' ca tu da gate che nu benne' dxeajlí lazre' Cristo na' quebe bi zaj dę da chawe' da xelunna bea na? <sup>21</sup> ¿Ájazra guca cheę xra xrtáudxu Abraham guquę' benne' xrlátaje lau Dios? Guca na ne cheę da bęne' gate guxúę' zrí'ine' Isaac lu bdupa xiaj cheę guzezxe'-be'. <sup>22</sup> ¿Quebe dxele'enu'? Ca da bęn Abraham dxulé'e na guxéajlí lazre' Dios, na' xel-la' dxeajlí lazre' cheę' guca na du lazre' ne cheę da bęne'. <sup>23</sup> Caní guca li ca da dxenná na lu xiche lá'azxa: Abraham guxéajle' cheę Dios, na' Dios blé'ene' le' benne' xrlátaje. Na' bchálaje' ca naca cheę Abraham, gunné': "Bi zrágaqueza', Abraham."

<sup>24</sup> Na'a dxelé'ele Dios dxezí' lu neę' tu benne' ne cheę da chawe' da dxunę', ne quegá tuze lawe' da dxeajlí lazre' Le'. <sup>25</sup> Cá'anqueze guca cheę Rahab, nu'ula węn da sban. Nu'ula nigá gulu'e lizre' benne' ca' gusel-la Josué, na' bsi'e benne' ca' neza xula cheę belelé' lu na' benne' ca' dxjaquę' wedil-la, na' ne cheę da bęne', Dios guzí' lu neę' nu'ula na'. <sup>26</sup> Ca naca cheę bęla' dxen cheędxu, che ba bedxúaj be' cheę na, ba nate na, cá'anqueze naca cheę xel-la' dxeajlí lazre' cheędxu. Che quebe bi zaj dę da chawe' da xululé'e na dxeajlí lazrdxu Cristo, naca na ca tu da gate.

#### Ca naca cheę lúzredxu

**3** Benne' bícha'dau', quebe dxal-la' gun cuínale benne' dxulusęde dizra' cheę Dios, lawe' da nézele ca gun Dios, guchi'a xánnedxe' cheę da dx-undxu dxí'u, dxuchálajdxu xrtizre'. <sup>2</sup> Xúgutędxu dxúnle'ędxu da calęla. Che nu benne' quebe bi da calęla dxunę' ca naca da dxuchálaje', naquę' benne' li lazre', na' wazéquene' nna be'ene' ca nácaqueze bęla' dxen cheę'. <sup>3</sup> Gate dxugú'udxu xia dxu'a bzrina' cheę gunba' da dxaca lazrdxu, wazéquedxu nna be'edxu dutęba'. <sup>4</sup> Le na' xque ca naca cheę da ca' dxeledán lawe' nísadau'. Lácala zaj naca na da zri'a, na' be' da dxuzri-ga na le' na dxácalę' na, benne' dxusé'ę na dx-uchínene' tu xágadauze, na' dxenná be'ene' na cheę cheaj na naga dxaca lazre' le'. <sup>5</sup> Cá'anqueze naca cheę lúzredxu. Naca na tu da dauze da naca cheę bęla' dxen cheędxu, na' da zrentę da dxenná na. Tu xí'dauze waca guzezxe na tu xi'a zren. <sup>6</sup> Lúzredxu naca na ca tu xi'. Lúzredxu naca na ca tu xęzr la xu sban da zua lu bęla' dxen cheędxu, ne dxuxrinnaj na du ca nácadxu. Zúale ca tu xi' lúzredxu da za' lataj ba xa', ne naca na ca tu da dxegú'u na xi' ca naca xúgutę da dxundxu. <sup>7</sup> Wazeque' nu benne' nna bé'ene' xúgutę bę xixre' ca', ne bę zaj zua xrila, ne bę snia ca', ne bę zaj zra' lu nísadau', ne ba gunná bé'ene'-ba'. <sup>8</sup> Quebe nu benne' dxezéquene' nna bé'ene' dutę da dxenná luzre'. Naca na tu da calęla da quebe dxue na lataj nu nna be'e le' na, ne naca na ca tu bę snia, bę dxúteba' bēneache ca'. <sup>9</sup> Nen

lúzredxu níqueze dxue lá'anadxu Xradxu Dios, ne nen le na dxennéquezdru da caleļa cheę benneache, benne' ca' nun Dios na' lu'a le saca Léqueze'. <sup>10</sup> Lu dxú'adxu ná'queze dxeledxúaj da xrlátaje ne da caleļa. Benne' bícha'dau', da nigá quebe dxal-la' gaca na ca'. <sup>11</sup> ¿Waca galaj nisa chawe' ne nisa sla' lu tuze beaj? <sup>12</sup> Benne' bícha'dau', ¿waca tu xaga higo cuía na da zixre cheę xaga olivo? ¿Waca tu lba uva cuía na da zixre cheę xaga higo? Cá'anqueze, tu beaj quebe gaca gunna na nisa xene', ne nisa zri lazre'.

#### Xel-la' sina da naca li lazre'

<sup>13</sup> Che zua tu benne' ládujla le'e naque' benne' sina, ne dxéajni'inę', dxal-la' gulé'eng' na nę cheę da chawe' da dxunę' dutę xel-la' dxexruj lazre' cheę da dxunezruj xel-la' sina le'. <sup>14</sup> Che zua lu lázrdaule xel-la' zre'e lazre' ne xel-la' xa lazre', quebe dxal-la' gucá'ana szren cuínale ca naca xel-la' sina cheęle lawe' da caní nęęle da węn lazre' cheę da naca da li. <sup>15</sup> Xel-la' sina caní quebe naca na cheę Dios. Naca na cheę xęzr la xu nigá, ne cheę benneache, ne za na lu na' da xriwe'. <sup>16</sup> Naga zua xel-la' zre'e lazre' ne xel-la' xa lazre', na' zaj zra' benne' wechacha ca', ne dxelunę' xúgutę da caleļa. <sup>17</sup> Benne' zaj napę' xel-la' sina da dxunna Dios zaj naque' du lazre', ne zren lazre', ne dxe'ene lazre', ne dxexruj lazre'. Dxelexache lazre' ljwezre', ne dxelunę' da chawe'. Zaj naque' li lazre' ne quebe dxelunę' cúzreze da chawe'. <sup>18</sup> Benne' dxelebeche zrię' da ba xa' dxelunę' tu zrin da naca ca tu binne da dxunna na da chawe'.

#### Ca naca cheę benne' zaj nazri'inę' da zaj naca cheę xęzr la xu nigá

**4** ¿Bizr cheę na' dxedíl-lale ne dxe' da ba xa' ládujla le'e? Dxaca caní lawe' da dxezá lázrele da zaj naca cheę da caleļa, da dxuluzúa na le'e lu da ba xa'. <sup>2</sup> Le'e dxaca lázrele bi gápale, na' lawe' da quebe dxezrué'ele na, na' dxútele benne'. Dxezá lázrele tu da sile, na' lawe' da quebe dxezéquele sile na, na' dxedíl-lale ljwézrele, ne dxebéquele da ba xa'. Quebe dxezile ca da dxezá lázrele lawe' da quebe dxenábale na lau Dios. <sup>3</sup> Che dxenábale na, quebe dxezile na lawe' da dxenábale na caleļa, lawe' da dxedánele na cheę guchínele na ca da dxaca lázrele. <sup>4</sup> Le'e, benne' quebe nácale li lazre', ¿quebe nézele che nu benne' dxedánneę' da caleļa da de lu xęzr la xu nigá, benne' nigá dxecuídenę' Dios? Nútęęze benne' dxaca lazre' si'ę ba neza ca da dxaca lu xęzr la xu nigá naque' benne' dxecuídenę' Dios. <sup>5</sup> Cheę le na' dxenná xiche lá'azxa: Be' da nuzúa Dios lázrdaudxu cadite dxe'ę gunne xue cheędxu. <sup>6</sup> Dios dxácalędxenę' dxi'u lu xel-la' xrlátaje cheę', ca dxenná xiche lá'azxa: Dios dxezré'ę benne' ca' dxulucá'ana szren cuina, na' dutę xel-la' xrlátaje cheę' dxácalęne' benne' dxexruj lazre' ca'. <sup>7</sup> Le guzúa dizra' cheę Dios. Le til-la da xriwe', na' le na xuzrunnuj na naga zrale. <sup>8</sup> Le biga lau Dios, na' le' biguę' naga zúale le'e.

Le'e, benne' dul-la, le gupá'a cuínale cheę dul-la da nabágale.

Le'e, benne' quebe nazri'ile Dios du lázrele, le gaca benne' du lazre'.

<sup>9</sup> Le guzua ba xa' lázre'le.

Le cuezre, ne le gaca xache' lazre'.

Québedxa guzrízrele, na' le cuezre.

Québedxa bele, ne le xewine lazre'.

<sup>10</sup> Le gaca dxexruj lazre' lau Xránadxu, na' le' gucá'ana szrenę' le'e.

#### Quebe dxal-la' guchí'adxu ca da dxun tu benne' bíchedxu

<sup>11</sup> Le'e, benne' bícha'dau', quebe nęęle cheę ljwézrele tule xetule. Benne' dxennę' cheę tu benne' bíchedxu, u dxuchi'ę ca da dxun bennea', naque' benne' dxennę' caleļa cheę da bdxixruj be'e Dios, ne dxebéę' ca zaj naca da bdxixruj be'e Dios. Che dxebéu' ca zaj naca da bdxixruj be'e Dios, dxun cuinu' ca benne' dxuchi'ę da dxaca, ne quebe dxuzú' dizra' da bdxixruj be'ę. <sup>12</sup> Zua tuze Dios, Bénéa' bdxixruj be'ę da ca', ne dxuchi'ę da dxaca, na' Léqueze' wazéquene' guselé' dxi'u, ne guzría xi'ę dxi'u. Lue', ¿núzraqueze nacu', dxuchi'u da dxun benne' xula?

#### Quebe nezdxu bi gaca wxre

<sup>13</sup> Na'a, le xene da nigá, le'e dxennale: Na'a u wxre chéajdxu tu xęzre ne cheajsúadxu na' tu iza. Gá'udxu, ne gútedxu cheę gucúdedxu dumí. <sup>14</sup> Quebe nézele ca da gaca wxre. ¿Ájazra naca cheę xel-la' nabán cheędxu? Naca na ca tu beuj da dxebé' tu chi'i, na' chadí dxenite na. <sup>15</sup> Da dxal-la' guchálajle naca caní: Che Xránadxu dxaca lazre', gaca bandxu ne gundxu da nigá u da na'. <sup>16</sup> Le'e dxucá'ana szren cuínale ca da dxuchálajle. Xel-la' dxucá'ana szren cuina caní naca na da caleļa. <sup>17</sup> Che nu benne' ba nézene' ca da chawe' da dxal-la' gunę', na' quebe dxunę' na, na' bágale'ę dul-la.

#### Santiago dxusízrenę' benne' gunní'a ca'

**5** Le xene da nigá, le'e, benne' gunní'a. Le cuezre ne le xewine lazre' ca naca da zi' da xa' da lé'ele. <sup>2</sup> Ca naca xel-la' gunní'a cheęle ba zaj nuzru na, na' zra lánale zaca ba zaj nagu béadu ca' le na. <sup>3</sup> Ca naca oro cheęle ne plata cheęle, ba gulezén xrche'ę na, na' lawe' da quebe bchínele da gunní'a cheęle lu da xrlátaje, da caní dxululé'e na nabágale zria lau Dios, na' le' gudęę' le'e lu da ba xa'. Caní gaca cheęle lawe' da btúbele xel-la' gunní'a cheę gápale na gate ba dxéxrule. <sup>4</sup> Quebe gudízrujle ca naca cheę na benne' ca' belexelape' lina cheęle, na' dxelawe' zria cheę da quebe gudízrujle, na' Xránadxu, Bénéa' napę' dutę xel-la' dxenná bea, ba benne' ca naca zria da dxelagu benne' ca' cheęle le'e. <sup>5</sup> Lu xęzr la xu nigá ba guzile ba neza xel-la' gunní'a cheęle ne xúgutę da zaca ca', ne guzrenle ca tu bęzre dxánnele'ę, na' ba dxezrín zra xelútię'-ba'. <sup>6</sup> Le'e ba bzria xile, ne ba bétele benne' quebe bi da caleļa zaj nunę', na' benne' ca' quebe guledábaguę' le'e.

**Dxal-la' gácadxu benne' zren lazre' ne guchálajlędxu  
Dios**

<sup>7</sup> Cheę lę na', benne' bícha'dau', le gaca zren lazre' ca zrindxa zra xelá' Xránadxu. Benne' dxaza dxa'ana dxal-la' cuezę' dutę xel-la' zren lazre' cheę' ca zrindxa zra xelá' xiuj ba ne xiuj lina, cheę xezí' lu neę lina chawe' cheę'. <sup>8</sup> Cá'anqueze le gaca zren lazre', ne quebe gute lázrele, lawe' da ba zua gagu zra xelá' Xránadxu. <sup>9</sup> Le'e, benne' bícha'dau', quebe gágule zria cheę ljawézrele, cheę quebe guchi'a Dios cheę da dxunle, lawe' da zua gágutę zra xelá' Dios, Bénnea' dxuchi'ę da dxaca.

<sup>10</sup> Le'e, benne' bícha'dau', le gusá lázrele ca guca cheę benne' ca' gulenné' waláz cheę Dios, gulaque' zren lazre' lácala guledé' xel-la' zi'. <sup>11</sup> Dxennadxu guca da ba neza zren cheę benne' ca' buluchaga lawe' xel-la' zi' ca'. Le'e ba benle ca benne' zren lazre' guca Job, ne ba nézele ca da chawe' ben Dios cheę' ca gudé na'. Xránadxu naque' zri'i lazre', ne dxexache lazre' dxi'u.

<sup>12</sup> Da dxundxa na ba xen, benne' bícha'dau', quebe guzétajle xabáa, ne quebe guzétajle da zua xęzr la xu nigá, ne quebe bi da xula guzétajle. Gate nnale: Awe', le nnaze: Awe', ne gate nnale: Cabí, le nnaze: Cabí, cheę quebe guzría xi' Dios le'e.

<sup>13</sup> Che núlale dxedele lu da zi' da xa', dxal-la' guchálajlęnle Dios. Che nu benne' zuę' xel-la' dxebé, dxal-la' gul-lę' da güe lá'anę' Dios. <sup>14</sup> Che nu benne' quebe chawe' zuę', dxal-la' nne' benne' gula ca' dxuluxúę' bi cheę Cristo, cheę xelenabe' lau Dios xexunę' benne' we' na', ne xelegú'ę lę' da za lu La Xránadxu. <sup>15</sup> Gate dxuluchálajlęnę' Dios dutę xel-la' dxeleajlí lazre' cheę', na' xexaca benne' we' na', na' Xránadxu xechise' lę', ne che bi dul-la nunę', na' gunitę lau Dios cheę bénnea'. <sup>16</sup> Cheę lę na', le xrúalepe lau ljawézrele tule xetule dul-la da nunle, ne le guchálajlę Dios cheę tule xetule, cheę xexunę' le'e. Da dxenaba benne' xrlátaję du lazre' lau Dios wazrué'ene' na'. <sup>17</sup> Elías, bénnea' gunné' waláz cheę Dios, guque' tu bėnneache ca dxi'u, na' gate gunabe' lau Dios cheę quebe gaca xiuj, na' quebe guca xiuj lu xęzr la xu dutę chun iza xugachaj. <sup>18</sup> Gudé na', gate gunabe' lau Dios da xula, na' belá' xiuj, na' xęzr la xu na' bėnna na lina.

<sup>19</sup> Le'e, benne' bícha'dau', che nu benne' ládujla le'e dxecuase' lu da li, na' che núlale le'e xegu'ule lę' lu xel-la' li, <sup>20</sup> dxal-la' nézele, nótetęze benne' xucuase' tu benne' dul-la lu neza calęla da zeajlęnę', guselé' bėnne'du xu'u benne' dul-la na' lu xel-la' gute, na' xunite lau Dios dul-la zan da nabaga bėnnea'.

# 1 San Pedro

Dizra' gusel-la Pedro chee benne' ca' gucá'a Jesús, ne zaj nase dínnaje'

**1** Neda', Pedro, naca' benne' gubáz chee Jesucristo. Dxuzúaja' da nigá chee le'e naxúajle lázrele, ne zrale xezre ca' zaj nababa Ponto, ne xezre ca' zaj nababa Galacia, ne xezre ca' zaj nababa Capadocia, ne xezre ca' zaj nababa Asia, ne xezre ca' zaj nababa Bitinia. <sup>2</sup>Xradxu Dios ba guqué'e le'e ca da gunné' gate nate. Ne chee Be' Lá'azxa ba gucá'a Dios le'e chee guzúale dizra' chee', ne chee chádxele lu dxen chee Jesucristo. Dxenaba' lau Dios gúnna'le'e le'e da chawe', ne xel-la' dxebeza zri lazre'.

## Ca da dxebeza lázredxu

<sup>3</sup>Dxue lá'anadxu Dios, Xra Xránadxu Jesucristo. Lawe' da dxexache lázre'le'e dxi'u ba bñe' cheedxu bexálajdxu lawe' da bebán Jesucristo ládujla benne' gate. Da nigá nuzaga na dxi'u chee cueza lázredxu, <sup>4</sup>ne gun na sile ca da nucueza Dios chee xabáa, da na' quebe cuia xi na, ne quebe xexúe na, ne quebe te chee na. <sup>5</sup>Lawe' da dxéajle chee Dios, Le' guxre' le'e nen xel-la' waca chee' ca zrindxa zra na' sile du ca naca xel-la' weselá da nucueze' cheedxu, na' gulé'ene' na lu zra bzebe ni'.

<sup>6</sup>Chee le na' dxebé'le'e lácala dxun na ba xen tele xel-la' zi' tu chí'idau'. <sup>7</sup>Xel-la' dxeajlí lazre' chee gaca chee na ca dxaca chee oro da dxedé na lu xi' chee xegá'ana chawe' na. Caní naca chee xel-la' dxeajlí lazre' chee, gate ba gudé na lu xel-la' zi', na' xegá'ana na da zácadxa chee sile xel-la' szren, ne xel-la' ba lá'ana lu zra na' gate xelá' Jesucristo.

<sup>8</sup>Le'e nazri'ile Jesucristo lácala quebe ne lé'ele Le', na' lawe' da nuxrén lázrele Le' lácala quebe ne xelé'ele Le', dxebé'le'e. Ca naca xel-la' dxebe' chee naca na da zrente da quebe séquentu' xuzájla'antu' <sup>9</sup>lawe' da nalá benne'du xu'ule lawe' da dxéajle chee Dios. <sup>10</sup>Lu iza da ba guledé gate nate, benne' ca' gulenné' waláz chee Dios buluxúe xánnie', ne belexebéajni'e ca naca chee xel-la' weselá nigá, na' buluchálaje' ca naca xel-la' chawe' chee Dios da gunné' le'e. <sup>11</sup>Be' Lá'azxa, Bénnea' gusel-la Cristo, bzéajni'ine' benne' ca' buluchálaje' waláz chee Dios gate nate ca da saca Cristo, ne ca naca xel-la' szren da si'e te na', na' benne' ca' belexexí'aje' nuzra benne' nigá, ne bátala gaca da dxenná Be' Lá'azxa, Bénnea' zúale le'. <sup>12</sup>Dios bzéajni'ine' benne' ca' ca naca chee da na' dxuluchálaje', gunné' quebe naca na chee lé'queze', san naca na cheedxu

dxi'u. Na'a, da nigá naca dizra' chawe' da ba bñe'le, da buluchalaj benne' ca' ne chee Be' Lá'azxa, Bénnea' ze'e xabáa. Da caní gulaca lazre' gubáz chee xabáa xeléajni'ine'.

## Dios dxenné' dxi'u chee gácadxu bi lá'azxa chee'

<sup>13</sup>Chee le na', le guxúe xanne' ca da gunle. Tu dxál-lazqueze gunle da xrlátaje. Duté lázrdaule le guxrén lazre' xel-la' chawe' chee Dios, ne le cueza da gunné' le'e lu zra na' gate xelá' Jesucristo. <sup>14</sup>Lawe' da nácale bi chee Dios, le guzúale dizra' chee', ne québedxa gunle ca da guzúale lázrele gate quebe ne gúnbeale Dios. <sup>15</sup>Na'a, le ta lu xel-la' lá'azxa chee' lawe' da naca Dios lá'azxa, Bénnea' gunné' le'e. <sup>16</sup>Cá'anqueze naxúajqueze na lu xiche lá'azxa chee', dxenné': "Le gaca lá'azxa, lawe' da naca' neda' lá'azxa."

<sup>17</sup>Che dxennale le'e naca Dios Xrale, na' Le' dxuchi'e ca da dxelún benneache, dxal-la' zrébele Le' dxácate ne zúale lu xezr la xu nigá. <sup>18</sup>Dios ba bselé' le'e lu da benle gate na' guxíajle ca da belún xra xrtaule, da cale'la, na' ba nézqueze quebe guca na ne chee tu da dxuzru na ca oro, ne plata. <sup>19</sup>Bselé' le'e ne chee dxen zácá'le chee Cristo, Bénnea' bzua cuine' lau Dios ca tu zríla'dau' du lazre', ne quebe nadxenba', be dxeluti'e chee xunite lau Dios dul-la zaj nabague'. <sup>20</sup>Cristo ba nácaqueze chee' gate nate saque' da nigá, na' ble'e lu zra caní chee gaca chawe' chee. <sup>21</sup>Ne chee Cristo dxéajle chee Dios, Bénnea' bsebané' Le' ládujla benne' gate, ne bca'ane' Le' szren. Chee le na' dxéajle chee Dios, ne dxuxrén lázrele Le'.

<sup>22</sup>Na'a, ba bzúale dizra' chee xel-la' li ne chee Be' Lá'azxa, chee zri'ile duté lázrdaule benne' zaj nababé' dxi'u. Chee le na' dxal-la' zri'ile ljwézrele tule xetule duté lázrdaule, ne duté xel-la' wala chee. <sup>23</sup>Caní naca na lawe' da ba bexálajle, quegá chee benneache, benne' dxelate. Nálajle ne chee dizra' chee Dios, da naca ban na, ne da zua na chadía chacanna. <sup>24</sup>Caní naca na lawe' da naxúaj na lu xiche lá'azxa, da dxenná na:

Xúgute benneache zaj naque' ca xixre', na' xel-la' szren chee' naca na ca xiaj chee xixre'du ca'. Xixre' na' dxebizre na, na' xiaj chee na dxexruj na.

<sup>25</sup>Dizra' chee Xránadxu zúatequeze na chadía chacanna.

Dizra' nigá ba benle le'e ne chee dizra' chawe' da dxuchálajntu'.

**2** Chee le na', québedxa gunle da cale'la. Québedxa nu si xele, ne quebe gunle láweze da xrlátaje.

Québedxa gácale xa lazre', ne quebe bi nnele chee ljwézrele. <sup>2</sup> Cáteze dxeledane bidu dxe'ene ca' nizre', ca' le gane xrtizra Dios, da naca na du lazre', chee gun na se cháchale, ne lale lu na' dul-la. <sup>3</sup> Che da li ba guzú laule nézele naca Xránadxu chawe', na' gaca lázrele sídxale xrtizre'.

### Cristo naque' ca xiaj xre ban

<sup>4</sup> Le biga lau Xránadxu, Bénnea' naque' ca xiaj xre ban. Bénneache buluzúe' Le' chalá'ala, san lau Dios naque' tu xiaj chawe' da zácale'e na. <sup>5</sup> Cá'anqueze le'e nácale ca xiaj ban ca'. Le güe Dios lataj guchínene' le'e chee guné' tu xudau' chee Be' Lá'azxa chee', gácale bxruze chee Dios chee guzúale lau Dios ca da dxunna Be' Lá'azxa le'e. Da nigá waca gunle ne chee Jesucristo, da xezaca ba lazre' Dios. <sup>6</sup> Chee le na' lu xiche lá'azxa dxenná Dios:

Neda' nuzúa' lu xezre lá'azxa tu benne' naque' ca tu xiaj blau chee xu'u, da naca na tu xiaj du lazre', ne da zácale'e na, na' nu benne' chéajle'e chee Le' quebe gaca xel-la' stu chee'.

<sup>7</sup> Chee le le'e dxéajle chee', xiaj nigá zácale'e na, san chee benne' ca' quebe dxéajle'e naca na ca da dxenná xiche lá'azxa:

Xiaj na' buluzúa benne' wen xu'u ca' chalá'ala, le na' naca na xiaj blau.

<sup>8</sup> Cá'anqueze naca na ca dxenná xiche lá'azxa:

Naque' tu xiaj da dxehegu bénneache, na' lawe' le na' dxéajlecházie'.

Caní naca na, dxéajlecházie' lawe' da quebe dxelezi'e dizra' chee Dios. Dios ba núnqueze' gaca caní chee benne' ca'.

### Benne' zaj naque' bi chee Dios

<sup>9</sup> Le'e nácale benne' ba gucá'a Dios. Nácale bxuze lu zrin chee Benne' Wenná Bea, Jesús. Nácale tu xezre lá'azxa chee Dios, na' Le' naxá'awene' le'e chee guzenle bénneache ca naca xel-la' szren chee Dios. Le' gunné' le'e chee xedxúajle lu da chul-la, na' súa'le lu xel-la' naxaní' li lazre' chee'. <sup>10</sup> Gate nate quebe nu bexache lazre' le'e, san na'a Díosqueze' dxexache lazre' le'e.

### Zúale chee gunle zrin chee Dios

<sup>11</sup> Bi bicha' nazri'ite' lazra', dxata' xueda' le'e, nácale ca benne' zaj zre'e zitu' naga zua lazre', chee quebe gunle ca da dxenná bela' dxen chee, da dxedíl-lale na bénne'du xu'ule. <sup>12</sup> Ca da dxunle, dxal-la' gaca na xrlátaje lau bénneache quebe zaj núnbe'e Dios. Caní gaca na, lácala na'a dxelenné' chee, dxelenné' nácale benne' ca' dxeluné' da zrinna, na' welelé'eqezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bénneache.

<sup>13</sup> Lawe' da nácale bi chee Xránadxu, le guzúa dizra' ca da dxenná benne' xu'u lawe', bénnea' buluzúa benne' xezre ca'. Le guzúa dizra' chee benne' nape' xel-

la' dxenná bea zren, <sup>14</sup> ne chee benne' dxelenná bea, benne' ca' nasel-la le' chee xuludé' xel-la' zi' benne' ca' dxeluné' da zrinna, ne xelu'e ba lá'ana benne' ca' dxeluné' da xrlátaje. <sup>15</sup> Dios dxaca lazre' gunle le'e da xrlátaje chee guzúa zrile benne' ca' quebe zaj naxéajni'ine', gate dxelenné' calela chee dizra' chawe' da nazile.

<sup>16</sup> Le gaca ca benne' quebe zaj nada'u, san quebe guchínele da na' nazile, quebe gunle da calela. Le gaca ca benne' ca' dxenná be'e Dios. <sup>17</sup> Le gapa ba lá'ana xúgute' bénneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

### Ca da guzaca zi' Cristo dxuzéajni'i na dxi'u

<sup>18</sup> Le'e, bi wen zrin, le guzúa dizra' chee xránale dute xel-la' ba lá'ana, quegaze chee benne' zaj naque' zri'i lazre', ne dxelebe'e gunne xue chee, san cá'anqueze gunle chee benne' snia ca' zaj naque' xránale. <sup>19</sup> Naca na tu da xrlátaje che guchaga laudxu xel-la' zi' da dxulusaca bénneache dxi'u gate dxundxu da nezdxu naca na da dxezaca ba lazre' Dios. <sup>20</sup> Che dxunle tu da calela, na' dxulusaca zi'e le'e, ¿bizra da ba neza gaca na chee? Na'a, che dxedele xel-la' zi' lawe' da dxunle da xrlátaje, ne dxuchaga laule na dute xel-la' zren lazre' chee, da nigá naca na xrlátaje lau Dios. <sup>21</sup> Dios gunné' le'e chee tele xel-la' zi' caní, lawe' da gudé Cristo xel-la' zi' waláz chee le'e, da dxuzéajni'i na le'e gunle ca da ben Le'.

<sup>22</sup> Le' quebe bene' dul-la, ne quebe nu guzú xe'e.

<sup>23</sup> Gate bulucháchalene' Le', quebe bi dizra' schanni' bechebe'.

Gate buludé' Le' xel-la' zi', Le' quebe bexéchaje'. Bzua cuine' lu na' Dios, Bénnea' dxuchi'e ca da naca na. <sup>24</sup> Biá'queze Cristo na' lu bela' dxen chee' ca naca dul-la chee dxu gate gudé'e le'e xaga begúaj, chee gácadxu ca benne' gate, québedxa gundxu dul-la, na' gaca bandxu chee gundxu da xrlátaje.

Le' guzríe' we' chee xexácale le'e chawe'.

<sup>25</sup> Le'e gudale gate nate ca zri'la' zaj naníteba'.

Na'a ba bela'le lau Cristo, Bénnea' dxuxúe' le'e ca dxun tu benne' dxuxúe' zríla'du ca', ne dxe'e gunne xue chee bénne'du xú'ule.

### Ca dxal-la' xelún benne' zaj nuchaga na'

**3** Cá'anqueze le'e, nu'ula nuchaga na'le, le guzúa dizra' chee benne' chee, na' che núlale zua benne' biu chee quebe dxéajle'e xrtizra Dios, xexúnbe'e naca na da li gate lé'ene' da xrlátaje da dxun zru'ule', ne quebe gun na ba xen bi guchalaj zru'ule', <sup>2</sup> lawe' da lé'ezene' da xrlátaje dxuné' lawe' da naque' xrlátaje, ne dxape' le' ba lá'ana. <sup>3</sup> Ca lechítaje chee tu nu'ula quebe dxal-la' gaca na cúzreze ca xel-la' dxupá'a xicha xíchaje', ne lechítaje da naca na oro, ne zra lané' da zácale'e. <sup>4</sup> Lechítaje chee' dxal-la' gaca na lu xichaj lázrdawe', da naca na tu da xrtan da quebe te chee na. Da xrtan nigá naca na tu be' dxexruj lazre', ne zren lazre', da na' zácale'e na lau Dios. <sup>5</sup> Cá'anqueze guca



lechítaje chee nu'ula ca' gulaque' bi chee Dios gate nate. Nu'ula ca' buluxrén lazre' Dios, ne buluzúe' dizra' chee benne' chee'. <sup>6</sup> Cá'anqueze guca Sara, bzué' dizra' chee Abraham, na' guzre' le': "Xran." Le'e wácaquezle ca guca Sara na' che gunle da xrlátaje, ne quebe bi guchebe lázrele.

<sup>7</sup> Cá'anqueze le'e, benne' biu, zúalele nu'ula, le gaca dxexruj lazre' nen zrú'ulale. Le gapa ba lá'ana zrú'ulale lawe' da quebe zaj naque' benne' wal-la ca le'e, ne cá'anqueze zaj nape' xel-la' nabán ca da nunna Dios le'e duté xel-la' chawe' chee'. Dxal-la' gunle caní chee quebe bi guzaga na le'e gate guchálajlele Dios.

**Benne' dxeledé' xel-la' zi' lawe' da dxeluné' da chawe'**

<sup>8</sup> Na'a:

Le gaca tuze

Le xexache lazre' ljwézrele, ne le zri'i ljwézrele.

Le gaca benne' zri'i lazre', ne zren lazre'.

<sup>9</sup> Quebe gunle da calela chee benne' dxuné' chee da calela, ne quebe gucháchaléle benne' dxu-lucháchaléne' le'e. Le gun da chawe' chee benne' ca' lawe' da gunné' Dios le'e chee sile da chawe'. <sup>10</sup> Caní naca na lawe' da dxenná xiche lá'azxa:

Benne' dxaca lazre' gaca tu da ba neza chee',

ne sué' xel-la' dxebé

dxal-la' guxúe' luzre' chee quebe nne' dizra' schanni',

ne guxúe' dxu'e chee quebe nne' na da wen lazre'.

<sup>11</sup> Dxal-la' gusané' ca da calela bené',

ne québedxa guné' na, chee guné' da chawe'.

Dxal-la' cueche zrié' da ba xa',

ne gaque' benne' zren lazre'.

<sup>12</sup> Xránadxu dxuxúe' benne' chawe' ca',

ne dxenne' ca da dxelenaba benne' ca'.

Dxuzúe' chalá'ala benne' wen da zrinnaj ca'.

<sup>13</sup> ¿Núzraqueze benne' guné' chee da zrinnaj che le'e cuele gunne xue gunle da chawe'? <sup>14</sup> Lácala tele xel-la' zi' lawe' da dxunle da chawe', gaca na da ba neza chee. Quebe nu zrébele, ne quebe xrúsale. <sup>15</sup> Le gapa ba lá'ana Cristo ca Xránale lu xichaj lázrdaule. Le súateze ban lazre' xechébele lau benne' ca' dxelenabé' le'e bizr chee na' dxuxrén lázrele Le'. Le gun na lu xel-la' dxexruj lazre', ne le gapa ba lá'ana benne' ca'. <sup>16</sup> Le gun da chawe' chee quebe bi sua da gagu na zria lu xichaj lázrdaule, na' benne' ca' dxelenné' schanni' chee da chawe' da dxunle lawe' da dxéajlele chee Cristo, xelapa stu'e ca dizra' da dxelenné'. <sup>17</sup> Zácadxa tele xel-la' zi' lawe' da dxunle da chawe' cáteze dxaca lazre Dios, ne quegá tele xel-la' zi' lawe' da dxunle da calela.

<sup>18</sup> Caní naca na lawe' da gudé Cristo tu lásaze lu xel-la' gute zi xa' ne chee dul-la da nabágadxu. Le' guque' benne' xrlátaje, na' gudé' xel-la' zi' waláz cheedxu dxi'u, benne' wen da zrinnaj, chee gaca xeché'e dxi'u lau Dios. Gute Cristo lu bel-la' dxen chee', san bebán-queze' lu be' nácaqueze'. <sup>19</sup> Cá'anqueze lu be' nácaqueze' guxiáje' lataj chul-la naga xejchálajle' be' zaj nácaqueze benne' ca' nuzaga xel-la' gute lu lataj na'.

<sup>20</sup> Benne' caní quebe buluzúe' dizra' ca da bchalaj Noé gate nate, gate na' guleza Dios duté xel-la' zren lazre'

chee' dxácate na' ben Noé da zren na' da dxedá lawe' nísadau'. Lu da dxedá lawe' nísadau' gulelá xrúnuze benne' ne chee nisa xiuj da na' bzria xi na ca naca bèneache. <sup>21</sup> Nisa xiuj na' dxulé'e na ca naca nisa naga dxelexedxúa benne' nisa, na' lu le na' naladxu na'a. Nisa nigá quegá le na' quibe na dxi'u, san dxulé'e na dxaca lázredxu chádxedxu lau Dios, na' ladxu lawe' da bebán Jesucristo ládujla benne' gate, <sup>22</sup> ne begüene' xabáa, ne zué' chalá'a xabéla chee Dios, na' dizra' chee Le' dxuluzúa gubáz chee xabáa, gubáz ca' zaj nape' xel-la' dxenná bea, ne gubáz blau ca'.

**Dxal-la' gundxu zrin chee Dios guchínedxu ca da ba nunna Dios dxi'u**

<sup>4</sup> Chee le na', ca ben Cristo, gudé' xel-la' zi' lu belá' dxen chee', cá'anqueze le'e dxal-la' si lu nale tele xel-la' zi' lawe' da che tu benne' ba gudé' xel-la' zi' lu belá' dxen chee', ba bzua bènea' chalá'ala da naca dul-la, <sup>2</sup> chee guné' ca da dxaca lazre' Dios dxácate naca bané', ne quebe guné' ca da dxenná belá' dxen chee'. <sup>3</sup> Naze cáтите da ba benle gate nate da dxeledanne benne' quebe zaj núnbe'e Dios. Ca lu iza da ba guledé benle da sban ca', ne da zrinnaj ca' da guzá lázrele, ne guzúzele, ne benle laní sban ca'. Güéle'le'le, ne bca'ana szrenle bedau' xiaj xaga ca' da na' dxecuide Dios. <sup>4</sup> Benne' ca' quebe zaj núnbe'e Dios dxelexebáne' lawe' da québedxa dxunle le' tuze ca naca da sban da dxeluné', na' chee le na' dxelenné' schanni' chee. <sup>5</sup> Benne' ca', dxun na ba xen xululéne' ca da zaj nune' lau Bénnea' naca chee' guchi'e chee benne' ban ca', ne chee benne' gate ca'. <sup>6</sup> Benne' ca' zaj nate belenne' ca naca dizra' chee Dios chee xelexaca bané' lu be' zaj nácaqueze' ca naca ban Dios, lácala lu xezr la xu nigá Dios bchi'e ca da beluné' ca guchi'e chee xúguté bèneache.

<sup>7</sup> Ba za cheajsé chee xúguté da dxelé'edxu. Chee le na', le sua ban lazre', ne le guchálajlequeze Dios. <sup>8</sup> Da nácadxa blau, le zri'ile'e ljwézrele. Che nazri'idxu benne' bíchedxu ca', na' gunite laudxu da calela da beluné' cheedxu. <sup>9</sup> Le guzúa lízrele ljwézrele tule xetule, ne quebe nnele chee ljwézrele. <sup>10</sup> Tu tule le'e dxal-la' gunle zrin chee ljwézrele ca da nunna Dios chee, ca benne' dxuluchínene' chawe' ca da chawe' da dxunezruj Dios chee'. <sup>11</sup> Che nu benne' dxuchálaje', dxal-la' guchálaje' da gunezruj Dios le'. Che nu benne' guné' zrin chee, dxal-la' guné' na guchínene' xel-la' waca chee' da nunezruj Dios le'. Ca naca xúguté da dxunle, dxal-la' gaca ba Dios lawe' da nácale bi chee Jesucristo, na' chee Le' gaca xel-la' szren, ne xel-la' dxenná bea chadía chacanna. ¡Ca'an gaca na!

**Wadedxu xel-la' zi' lawe' da nácadxu bi chee Cristo**

<sup>12</sup> Benne' bícha'dau' nazri'it'e lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca. <sup>13</sup> Le be lawe' da tele xel-la' zi' ca xel-la' zi' da gudé Cristo chee cá'anqueze béle'e gate lé'ele xel-la' szren chee Cristo gate zezé'e. <sup>14</sup> Che

dxulugazja' benne' le'e dizra' lawe' da nácale bi chee Cristo, ba neza zren naca na chee, lawe' da zúale Be' Lá'azxa chee Dios le'e, Bénnea' ze'e xabáa. Dxelenné bèneache schanni' chee Le', san le'e dxápale Le' ba lá'ana. <sup>15</sup> Che núlale le'e dxedele xel-la' zi', quebe dxal-la' gaca na lawe' da bétele benne', u bi gulanle chee benne', u bi da zrinna'j benle, u lawe' da guchixre chee da naca chee benne' xula. <sup>16</sup> Che nu benne' dxedé'e' xel-la' zi' lawe' da naque' bi chee Cristo, quebe dxal-la' xedué'ene', san dxal-la' güe lá'ane' Dios lawe' da nazí le' bi chee Cristo. <sup>17</sup> Ba bzzin zra su lau Dios guchi'e' ca da zaj nun tu tu bi nácabé' chee Le'. Che Dios su lawe' guchi'e' ca da nundxu dxi'u, ¿ájala gaca chee benne' ca' quebe dxelune' ca dxenná dizra' chawe' chee Dios? <sup>18</sup> Che benne' xrlátaje ca' cánnaze xelélé' ¿ájazraqueze gaca chee benne' wen da zrinna'j ca', ne chee benne' wen dul-la ca'? <sup>19</sup> Caní naca, benne' dxeledé'e' xel-la' zi' lawe' da dxelune' da xrlátaje da dxaca lazre' Dios, dxal-la' xelúnqueze' da xrlátaje, ne xuluzúe' bènne'du zaj xu'e' lu na' Dios, Bénnea' bene' le', lawe' da naca Le' li lazre'.

#### Pedro dxuzéajni'ine' bi ca' chee Cristo

**5** Dxuzéajni'ida' le'e, benne' gula dxuxúele tu tu cue' bi ca' chee Cristo lawe' da naca' neda' benne' gula ca le'e, ne dxexechéba' ca xel-la' zi' da gudé Cristo, ne cá'anqueze lawe' da gúnnaqueze' neda', ne le'e, chee sidxu da xabáa chee' da gul'é'ne' te chee zra caní. <sup>2</sup> Ca dxelún benne' dxuluxúe' zrila' ca', le guxúe bidu ca' chee Dios, bènne'du ca' nabágale. Le gun na duté lázrdaule ca dxaca lazre' Dios, quebe gun na ba xen nu benne' nna bé'ene' le'e, ne quebe gunle ba chee dumí. Le gun zrin du lázrele, <sup>3</sup> ne quebe gun cuí-nale ca xrane bènne'du ca' nabágale. Le gun ba xuzre gácale tu da gulé'e na ca dxal-la' xelún bènne'du ca'. <sup>4</sup> Caní gaca, gate xelá' Xránadxu, Benne' Blau dxuxúe' zrila' ca', sile tu lazruj da naca na chee xabáa, da quebe te chee na. <sup>5</sup> Cá'anqueze le'e, benne' cuide', le

gun ca da dxelenná benne' gula ca'. Xúgutéle dxal-la' guzúale dizra' chee l'jwézrele tule xetule lu xel-la' dxexruj lazre' chee lawe' da dxenná xiche lá'azxa:

Dios dxezré'e' benne' ca' dxulucá'ana szren cuine'.

Duté xel-la' chawe' chee' dxácalene' benne' dxexruj lazre' ca'.

<sup>6</sup> Le guzexruj lázrele lu xel-la' dxenná bea zren chee Dios, na' xechisa Le' le'e ca zrin zra chee na. <sup>7</sup> Le guzúa lu na' Dios xúguté da dxele gunne xue, lawe' da dxe' Le' gunne xue da naca chee.

<sup>8</sup> Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu beze xixre', dxebezre xa'aba', dxíljaba' nu guébeba'.

<sup>9</sup> Le tíl-lalé da xriwe', ne le se' chacha lu xel-la' dxeajlí lazre' chee, lawe' da nézquezele dxeledéqueze xúguté bíchele zaj zré'e' lu xezr la xu nigá xel-la' zi' ca da dxedele le'e.

<sup>10</sup> Gate bache gudele xel-la' zi' tu chi'i, Dios guné' le'e li lazre', ne guzúa chawé'e' le'e. Dios ná'queze dxunne' dxi'u xúguté da chawe' chee', ne ba gunné' dxi'u chee gápadxu da naca chee xabáa chee' lawe' da nácadxu bi chee Jesucristo. <sup>11</sup> Gaca ba Le', ne chee' Le' gaca xel-la' dxenná bea chadía chacanna. ¡Ca'an gaca na!

#### Pedro dxugape' diuzre bi bíchedxu ca'

<sup>12</sup> Silvano, benne' nigá dxéqueda' naque' tu bi bíchedxu li lazre', ba bzua'je' dizra' caní chee le'e cáteze neda', Pedro, ba gucha' le' guzúaje'. Dxuzéajni'ida' le'e, ne dxapa' le'e ca naca da xrlátaje da ba guzile da dxululé'e na Dios nazri'ine' le'e. Le se' chacha ca zaj naca da caní.

<sup>13</sup> Bi chee Cristo zaj zré'e' Babilonia nigá, benne' ca' gucá'a Dios ca guqu'é' le'e, dxulugape' le'e diuzre. Cá'anqueze Marcos, bi na' nácabé' ca bi cheéqueza' dxugápabe' le'e diuzre. <sup>14</sup> Le gugapa diuzre l'jwézrele tule xetule, ne le gunida' l'jwézrele lu xel-la' zri'i lazre'.

Dxenaba' lau Dios gunné' le'e xel-la' dxebeza zri lazre', le'e nácale bi ca' chee Jesucristo. ¡Ca'an gaca na!

## 2 San Pedro

Dizra' da gusel-la San Pedro chee bi ca' chee Jesús

**1** Neda', Simón Pedro, naca' wən zrin chee Jesucristo, ne benne' gubáz chee'. Dxuzúaja' da nigá chee le'e, ba nápa le-xel-la' dxeajlí lazre' da zácále'e, ne naca tuze ca da nápantu' netu'. Caní naca lawe' da naca li lazre' Dios cheedxu, ne Benne' Weselá cheedxu Jesucristo. <sup>2</sup> Dxenaba' lau Dios gúnnale'e le'e da chawe' chee', ne xel-la' dxebeza zri lazre', lawe' da núnbeale Dios, ne Xránadxu Jesús.

Ca dxal-la' gaca bi chee Cristo

<sup>3</sup> Dios lu xel-la' waca chee' ba nunne' dxi'u xúgute da nachinedxu chee gápadxu xel-la' nabán chee Le', ne chee gaca gundxu zrin chee', lawe' da núnbeadxu Bénnea' gunné' dxi'u chee gápadxu da xabáa chee Le', ne xel-la' szren chee'. <sup>4</sup> Caní naca na, ba nunne' dxi'u ca da nachebe lazre', da zaj naca na szréne'e, ne da zaj zácále'e na, chee ne chee da guchebe lazre' wazrué'ele le'e gácale ca nácaqueze Dios, ne chee lale lu da sban da dxaca lu xezr la xu nigá ne chee da dxezá lazre' be'la' dxen chee benneache. <sup>5</sup> Chee le na' dxal-la' cue'le gunne xue gun xel-la' dxeajlí lazre' chee gunle da xrlátaje, ne chee gun da xrlátaje da dxunle gácale benne' sina. <sup>6</sup> Xel-la' sina chee dxal-la' gun na nna be'e cuínale, na' xel-la' dxenná be'e cuina chee dxal-la' gun na gácale benne' zren lazre', na' xel-la' zren lazre' chee dxal-la' gun na zri'ile Dios. <sup>7</sup> Xel-la' zri'i lazre' chee nen Dios dxal-la' gun na zri'ile benne' bíchedxu ca', na' xel-la' zri'i lazre' chee nen bíchele ca' dxal-la' gun na gácale zri'i lazre'.

<sup>8</sup> Che le'e dxunle da caní, ne dxelepe ban na, quebe xegá'ana cá'aze xel-la' nabán chee, ne quebe naca na níteze núnbeale Xránadxu Jesucristo. <sup>9</sup> Benne' quebe dxune' da caní naque' ca benne' la chul-la, u ca benne' quebe dxenné'e ca da za za'. Ba gul-la lazre' guxádxie' ca naca chee dul-la ca' da bene' gate nate. <sup>10</sup> Chee le na', benne' bícha'dau', le gun ba xuzre nézele Dios gunné' le'e, ne ba guqu'é le'e, na' che gunle da nigá, cabata' cheajházele. <sup>11</sup> Caní gun Dios, gúnnale'e le'e lataj chu'ule naga nna bea Xránadxu, ne weselá cheedxu Jesucristo chadía chacanna.

<sup>12</sup> Chee le na' tu dxusá'azqueza' lázrele da caní, lácala ba nézele na, ne ba ze cháchale lu xel-la' li da ba nápa le. <sup>13</sup> Dxácaté naca bana' dxéqueda' dxun na ba xen gusá'a lázrele chee da caní <sup>14</sup> lawe' da ba nezda' wátezea' ca ba gunná Xránadxu Jesucristo, guzre' ne-

da'. <sup>15</sup> Na'a guna' ca da séqueda' chee gate te gatia' neda', cheajsá lázrquezle chee da caní.

Benne' belelé'ene' xel-la' szren chee Cristo

<sup>16</sup> Da bsédentu' le'e ca naca chee xel-la' szren chee Xránadxu Jesucristo, ne ca xel'é xecha lasa quebe naca na ca da dxenná xichaj lázrdau benneache. Netu' blé'equezentu' ca naca xel-la' szren chee Xránadxu.

<sup>17</sup> Blé'entu' Le' gate Xradxu Dios be'e Le' xel-la' ba lánana, ne xel-la' szren, na' Dios gúzrequeze Le' lu da xabáa chee: "Benne' nigá naque' Zri'ina' nazri'ite lazra', ne dxezaca ba lazra' nen Le'." <sup>18</sup> Nétu'queze benentu' chi'i na' da za na xabáa gate zúantu' nen Xránadxu lu xi'a lánaxa na'. <sup>19</sup> Chee le na' dxuxrén lázredxantu' dizra' da buluzúaj benne' ca' gulenné' waláz chee Dios. Da xrlátaje dxunle le'e lawe' da dxenle ca naca dizra' nigá. Naca na ca tu xi' da dxusení na tu lataj naga naca chul-la ca zrin zra chaní', na' Cristo, Bénnea' naque' ca belaj zila súalene' le'e chee gusení'e lu xichaj lázrdau. <sup>20</sup> Le guxúe xanne' ca naca da nigá. Netú da naxúaj na lu xiche lánaxa quebe nu benne' seque' xuzájle'e na lu xel-la' dxéajni'i cheeze'. <sup>21</sup> Benne' ca' buluchálaje' waláz chee Dios quebe buluchálaje' ca da gulaca lázrequeze le'. Gulaque' benne' chee Dios, na' gulenné' waláz chee' ca da bnezruj Be' Lánaxa le'.

Ca naca chee benne' ca' dxulusédené' da wən lazre'  
(Judas 4-13)

**2** Cá'anqueze gulezrá' ládujla benne' Israel benne' wən lazre' ca', benne' belún cuine' ca benne' dxelenné' waláz chee Dios. Cá'anqueze welezrá' ládujla le'e benne' wən lazre', benne' xelún cuine' ca benne' dxulusédené' benneache dizra' chee Dios. Benne' caní wuluzéajni'ine' benneache bagácheze ca naca dizra' wən lazre' da guxrinnaj na, na' caní xeledábague' Xránadxu, Bénnea' bselé' dxi'u, na' lawe' da dxulusédené' da caní xelebía xi' zéqueze'. <sup>2</sup> Benne' zan chjácálene' ca da sban dxuluséde benne' ca', na' ne chee benne' caní xelenné' benneache schanni' chee dizra' li chee xel-la' weselá. <sup>3</sup> Lawe' da dxelezá lazre' xelezi'e dumí, xelebéaje' le'e dumí ne chee da wən lazre' da dxuluzéajni'ine' le'e. Dios ba nucueze' da guzría xi na benne' caní, lawe' da ba guchugue' gate nate ca da gaca chee benne' ca'.

<sup>4</sup> Dios quebe bnite lawe' chee gubáz chee xabáa ca' belún dul-la. Bde' gubáz chee xabáa ca' lu lataj ba xa', ne bzre'e le' lu da chul-la, ne bcheaje' le' du xia naga zaj nadxéaje' ca zrin zra chugu Dios ca da gaca chee

gubáz chee xabáa ca'. <sup>5</sup> Cá'anqueze Dios quebe bnite lawe' chee benne' ca' gulezrá' gate nate. Gusel-le' nisa xiuj da bzria xi na benne' ca' belune' da calęla. Bselé' Noé, bėnnea' bchálaje' ca naca da xrlátaje da dxal-la' xelún bėnneache. Bselé' gázreze benne'. <sup>6</sup> Cá'anqueze guchugu Dios chee xęzre Sodoma, ne xęzre Gomorra chee xelebía xi na. Bzėzxię' dxúpatę xęzre ca', na' belexegá'anaťe na de. Caní dxuluzéajni'i na benne' ca' xelune' da calęla, benne' xelezré'ę te na'. <sup>7</sup> Dios bselé' Lot lu xęzre Sodoma na' lawe' da guquę' tu benne' xrlátaje, ne bexíajele'ęne' gate blé'ęne' ca naca da sban da dxelún benne' ca' dxelune' da calęla. <sup>8</sup> Benne' xrlátaje nigá guzúe' ládujla benne' ca', na' tu zra tu zra guzúa ba xa' lázrdawe' ca dxenné'ę, ne dxenne' ca da calęla da dxelún benne' ca'. <sup>9</sup> Nézqueze Xránadxu guselé' benne' zaj naca bi chee' che bi da dxusaca zi na le', na' guzráqueze' benne' ca' dxelune' da calęla, ca tu lize xia, ca zrin zra chuge' chee' chjaque' lataj ba xa'.

<sup>10</sup> Dios xudéę' xel-la' zi' zrendxa benne' ca' dxelune' cáťeze da sban da dxelezá lazre', ne dxuluzé' chalá'ala xel-la' dxenná bea chee Xránadxu. Benne' caní zaj naque' lazre' dxugu dxelune' da sban, ne dxulucá'ana szren cuine'. Quebe dxelezrebe' dxelenné' schanni' chee gubáz chee xabáa ca'. <sup>11</sup> Gubáz ca' zaj nápadxę' xel-la' dxenná bea, ne xel-la' szren ca benne' caní, quebe dxelenné' da calęla chee benne' ca' gate dxelawe' zria chee' lau Xránadxu.

<sup>12</sup> Benne' caní zaj naque' ca bea ca' quebe zaj naxéajni'iba', bę dxelunba' ca da zaj nézezeba', ne zraba' chee xelél-le'-ba', ne xelutię'-ba'. Benne' caní dxelenné' schanni' chee da quebe dxeléajni'ine', na' xelátequeze' ca dxelate bea ca', <sup>13</sup> ne xeledéę' xel-la' zi' ca xel-la' zi' buludéę' benne' xula. Dxeléquene' zaj zré'ę lu da ba neza gate dxelebeňe' ca da dxaca tu zra tu zra. Zaj naque' ca tu da sban da dxusí'i na le'e xel-la' stu' gate zaj zré'ę nen le'e lu laní cheęle, dxácatę ne dxelezúe' lu xel-la' dxebe' lu da calęla da dxelune'.

<sup>14</sup> Dxelezá lazre' xúgutę nu'ula dxelelé'ęne', ne quebe dxelálene' dxelune' dul-la. Dxulusi'ę neza xula benne' bíchedxu quebe zaj zę chache'. Dxulucúdequeze', ne zaj naque' benne' zaj xu'ę de'. <sup>15</sup> Zaj nanítie' lawe' da gulecuase' lu neza li chee Dios. Dxelune' ca da bęn Balaam, zri'ine Beor. Balaam nigá bęne' ba chee dumí, ne gudé' dxune' da calęla, <sup>16</sup> na' bea na', bę dxua xua', gunęba' ca benne', ne gudíl-laba' Balaam ca naca dul-la da dxune', na' guchúguba' da xala da dxun Balaam.

<sup>17</sup> Benne' caní zaj naque' ca tu beaj bizre, ne ca tu beuj da dxua be' bdunu'. Ba zaj naca chee benne' ca' xelelegá'ane' chadía chacanna lu da chul-la. <sup>18</sup> Dxelenné' dizra' da dxulucá'ana szren na le', ne da zaj naca na dácheze. Dxuluchínene' da sban ca', ne da dxezáz lazre' bęla' dxen chee bėnneache chee dxulusi'ę chalá'ala benne' ca' za dxelexedxúajteque' ládujla benne' ca' dxelune' da calęla. <sup>19</sup> Dxelechebe lazre' xulunézuje' benne' ca' tu xel-la' weselá, san léqueze benne' ca' zaj naque' węn zrin chee da sban. Tu tu bėnneache naque' benne' nada'u chee da dxenná be'e na le'.

<sup>20</sup> Benne' ba zaj núnbe'ę Xránadxu, ne Weselá cheędxu

Jesucristo, ne ba gulelé' lu da sban chee xęzr la xu nigá, na' te na' che xelexeu'ę xecha lasa lu da sban na', ne xelu'ę lataj xenná be'e na le', na' gácadxa da ba xa' chee benne' ca' ca da guca chee' gate nate.

<sup>21</sup> Cháwe'dxela gaca na chee benne' caní la quebe zaj núnbe'ę Cristo, quegala gate ba belúnbe'ę Le', na' xelexeuase' ca naca xel-la' dxixruj bea lá'azxa da guzre Dios le' xelune'. <sup>22</sup> Ca da guca chee benne' caní dxulé'e na naca da li dizra' nigá da dxenná na:

Becu' dxexáguba' ca da ba bexébeba', na' cuče za bexíbeba' bexú'uba' xecha lasa lu guzra' cheęba'.

### Ca naca chee zra xelá' Xránadxu

**3** Benne' bícha'dau' nazri'ite' lazra', da nigá naca na dizra' gudxupe' da dxuzúaja' cheęle. Lu dxúpatę xiche caní guca lazra' guzėjajni'ida' le'e chee gulaba lázrele chee da caní. <sup>2</sup> Le gusá lazre' ca da gulenná benne' lá'azxa ca', benne' buluchálaje' waláz chee Dios, ne ca naca da gudixruj be'e Xránadxu, Benne' Weselá cheędxu, da na' bulusęde benne' gubáz chee' ca' le'e.

<sup>3</sup> Dxunna ba xen gúnbeale, lu zra da za zá'aca welelá' benne' xelún le' chee da zaj naca na da lá'azxa, ne xelune' cáťeze da dxelezá lazre', <sup>4</sup> ne xuluchebe' bėnneache: ¿Bizra guca chee da guchebe lazre' Cristo, gunné': Welá'a? Xra xrtáudxu ca' ba gulatię', na' túzqueze ca guca, gaca na gate guzreťe xęzr la xu.

<sup>5</sup> Benne' caní quebe dxeleque be'ęne' gulezúa xabáa, ne xęzr la xu gate nate, Dios gunné' bedxúaj na lu nisa, na' guzúa chacha na lu nisa, <sup>6</sup> na' xęzr la xu da zua gate nate guzríia xi na ne chee nisa xiuj, <sup>7</sup> na' xabáa, ne xęzr la xu da zaj zua na na'a, ba naca chee na xelezxe na ca ba núnqueze Dios chee na. Xi' na' guzezxe na da caní lu zra guchi'a Dios, gate xelebía xi' benne' ca' dxelune' da calęla.

<sup>8</sup> Benne' bícha'dau' nazri'ite' lazra', quebe gal-la lázrele da nigá: Lau Xránadxu tu zraze naca na ca chi gaxúa iza, na' chi gaxúa iza zaj naca na ca tu zraze.

<sup>9</sup> Quebe dxezré Xránadxu gunę' da nachębe lazre' ca dxeleque bėnneache. Naque' zren lazre' nen dxi'u lawe' da quebe dxaca lazre' nu cuía xi'. Dxaca lazre' xelexejaje lazre' xúgutę bėnneache.

<sup>10</sup> Zra xelá' Xránadxu zrin na gate quebe nu dxeque ca', ca za' tu gubán chizrela. Lu zra na' cuía xi' xabáa da dxelédxu, na' gunle'ę na schaga, ne ca naca da dxelédxu zran xabáa xelebía xi na lu xi', na' xęzr la xu nigá chezxe na tu zren nen da de lawe na.

<sup>11</sup> Che ba nézele xelebía xi' xúgutę da caní, ¿ájala dxal-la' gunle? Dخال-la' gácale li lazre' ne guzúa cuínale lu na' Dios <sup>12</sup> dxácatę ne dxebezále zra na', ne dxal-la' gunle ca da séquele zrintę zra na'. Lu zra na' cuía xi' xabáa lu xi', na' da zaj zria zran xabáa xelexuna na lu xi' na'. <sup>13</sup> Dxi'u dxebezádxu tu xabáa cube, ne tu xęzr la xu cube da ba guchebe lazre' Dios naga gaca xlátaje xúgutę.

<sup>14</sup> Cheę le' na', benne' bícha'dau' nazri'ite' lazra', dxácatę dxebezále da caní, le gun ca da séquele chee quebe bi bágale, ne quebe bi nadxenle chee dul-la lau

Dios, ne suale lu xel-la' dxebeza zri lazre'. <sup>15</sup> Le gusá lázrele naca Xránadxu zren lazre' nen dxi'u cheę ladxu. Cá'anqueze Pablo, benne' bíchedxu nazri'iteę lázredxu, bzuaje' cheęle, bchíneneę' ca naca xel-la' sina da bnezruj Dios leę'. <sup>16</sup> Lu xúgutę xiche da ba bzuaje', ba bchálajleneę' le'e ca naca cheę da caní, lácala bal-la na nácaleę'e na stębe chéajni'idxu na, na' benne' ca' quebe dxeléajni'ineę' na, ne benne' ca' quebe zaj zua chacheę' dxuluchuqueę' na, ca dxuluchuqueę' xezícala xrtizra Dios, na' cheę leę na' Dios guzría xi'e benne' ca'.

<sup>17</sup> Cheę leę na', benne' bícha'dau' nazri'iteę lazra', che le'e ba nézele da nigá nédxula, le guxúe cuínale cheę da węn lazre' cheę benne' ca' dxeluneę' da caleęa cheę quebe xelechę le'e chalá'ala, ne quebe nite xel-la' li lazre' cheęle lau Dios. <sup>18</sup> Le gúnbea xanne' Xránadxu, Benne' Weselá cheędxu, Jesucristo, ne le gula lu xel-la' zri'i lazre' cheę'. ¡Gaca ba Leę na'a, ne chadía chacanna! ¡Ca'an gaca na!

# 1 Juan

## Xtizra Dios da dxunna na xel-la' nabán li lazre'

**1** Dxuzúaja' cheęle da nigá ca naca cheę Bénnea' zúaqueze' gate guzú lau zua xúgute' da dx-elé'edxu. Dxuzúaja' ca naca cheę Bénnea' ba bémentu' cheę', ne ca naca da ba blé'eqezentu' bene', neda' ne xezícadxa benne' ca' bsede Jesús. Ca naca cheę Benne' nigá guzúantu' dxennantu', ne btantu' Le' nen na'ntu'. Dxuchálajntu' ca naca cheę Bénnea' naque' Dizra' da dxunna na xel-la' nabán li lazre'. <sup>2</sup> Bénnea' dxunne' xel-la' nabán zeajlí canna ba blé'e, na' netu' blé'entu' Le'. Dxixruj béantu' da naca cheę', ne dxuzentu' le'e ca naca cheę'. Léqueze' zúalene' Xradxu Dios, na' blé'e naga zúadxu. <sup>3</sup> Da blé'entu', ne da bémentu' dxuzentu' le'e cheę gácale tuze nen netu'. Da lítegaze, nácadxu tuze nen Xradxu Dios, ne nen Jesucristo, Zri'ine Dios. <sup>4</sup> Ca naca da caní dxuzúaja' cheęle cheę gaca du lazre' xel-la' dxebe cheęle.

## Dios naque' lení' cheę xichaj lázrdau bèneache

<sup>5</sup> Da nigá naca dizra' da bchálajle Jesús netu', ne da dxuzentu' le'e. Gunné': Dios naque' lení', ne quebe bi zúale Le' da naca cheę da chul-la. <sup>6</sup> Che dxennadxu nácadxu tuze nen Le', na' che dxundxu da naca na cheę da chul-la, dxun lázredxu ca naca da dxennadxu, na' ca naca da dxundxu quebe dxundxu da li. <sup>7</sup> Che dxundxu da li da naca cheę xel-la' naxaní', ca naca Dios, Bénnea' naque' li lazre', ne zue' lu xel-la' naxaní', nadxa zúadxu tuze tudxu xetudxu, na' dxen cheę Jesús, Zri'ine Dios, dxibe na dxi'u ca naca xúgute' dul-la nabágadxu.

<sup>8</sup> Che dxennadxu quebe nabágadxu dul-la, dxezí xéqueze cuínadxu, na' da li quebe zúale na dxi'u. <sup>9</sup> Che xrúalepedxu ca naca dul-la da nabágadxu, Dios naque' li lazre', ne xlátaje, na' cheę le na' Le' gunite lawe' cheędxu ca naca dul-la da nabágadxu, ne quibe' dxi'u ca naca xúgute' da sban da ba bęndxu. <sup>10</sup> Che dxennadxu quebe nundxu dul-la, dxucá'anadxu Dios ca wen lazre', ne quebe ne sidxu du lázredxu ca naca dizra' cheę'.

**2** Le'e, bi nazri'ite' lazra', dxuzúaja' da nigá cheęle cheę quebe gunle dul-la. Che nu benne' gunę' dul-la, zua wenaba cheędxu lau Dios, Jesucristo, Benne' xlátaje. <sup>2</sup> Le' gutie' waláz cheędxu cheę gudúe' da nabágadxu lau Dios ca naca dul-la cheędxu, ne quegaze da nabágadxu dxi'u, san gudúe' da zaj naba-ga xúgute' bèneache.

<sup>3</sup> Che dxuzúadxu dizra' ca naca da bdxixruj be'e Dios, nezdxu ba núnbeadxu Le'. <sup>4</sup> Che nu dxenná: Neda'

núnbe'a Le', ne che quebe dxuzúe' dizra' ca naca da bdxixruj be'e Dios, benne' nigá naque' wen lazre', ne quebe dxenné' da li. <sup>5</sup> Che nu benne' dxuzúe' dizra' ca naca da bdxixruj be'e Dios, benne' nigá nazri'ine' Dios du lazre'. Che dxundxu caní nezdxu ba zúadxu tuze nen Le'. <sup>6</sup> Bénnea' dxenné' naque' tuze nen Dios dxal-la' gaque' ca guca Jesús.

## Tu da cube da bdxixruj be'e Jesús

<sup>7</sup> Le'e, bi nazri'ite' lazra', dxuzúaja' cheęle ca naca da dxenná na dxal-la' zri'idxu le sa' ljwézredxu. Quebe naca na tu da cube da bdxixruj bea Dios. Naca na da gula na' da ba guzile nédxudautę. Da gula da bdxixruj bea Dios naca na dizra' da ba bénequezle. <sup>8</sup> Naca na ca dxuzúaja' cheęle tu da cube da dxixruj bea Dios, da naca béaqueze na naca da li lawe' da bęn Jesús ca naca na, ne lawe' da dxunle le'e ca naca na. Caní naca na lawe' da ba dxusení' xel-la' naxaní' li cheę xel-la' zri'i lazre' lu xichaj lázrdaudxu, da dxegúa na da naca na cheę da chul-la.

<sup>9</sup> Che nu benne' dxenné' dxunę' da naca na cheę xel-la' naxaní', ne che dxecuídene' le sa' ljwezre', benne' nigá ne dxedé' lu da naca na cheę da chul-la. <sup>10</sup> Benne' nazri'ine' le sa' ljwezre' dxunę' da naca cheę xel-la' naxaní', ne quebe dxunę' da guzrí'a xi na le sa' ljwezre'.

<sup>11</sup> Bénnea' quebe chawe' dxelé'ene' le sa' ljwezre', lu da naca na cheę da chul-la zua bèneache, ne lu da na' dxedé', ne quebe nézene' ga zéaje' lawe' da dxucá'ana da chul-la le' ca tu benne' la chul-la.

<sup>12</sup> Le'e, bi nazri'ite' lazra', dxuzúaja' cheęle lawe' da ba bnite lau Dios cheęle ca naca dul-la cheęle, lawe' da gute Jesucristo waláz cheędxu. <sup>13</sup> Le'e, benne' nazri'ite' lazra', dxuzúaja' cheęle lawe' da ba núnbeale Bénnea' zúaqueze' nédxudautę.

Le'e, benne' cuide', dxuzúaja' cheęle lawe' da ba bsanle da dxenná da xriwe'.

Le'e, bi nazri'ite' lazra', dxuzúaja' cheęle lawe' da ba núnbeale Xradxu Dios.

<sup>14</sup> Le'e, xruze xrna', dxuzúaja' cheęle lawe' da ba núnbeale Bénnea' zúaqueze' nédxudautę.

Le'e, benne' cuide', dxuzúaja' cheęle lawe' da nácale benne' wal-la, ne dizra' cheę Dios nácale, ne bsanle da dxenná da xriwe'.

<sup>15</sup> Quebe sa lázrele da calęla ca' da zaj naca na cheę xęzr la xu nigá, ne quegá da zaj de lu xęzr la xu nigá. Che nu benne' dxezá lazre' da zaj de lu xęzr la xu nigá, quebe nazri'ine' Xradxu Dios. <sup>16</sup> Da caní zaj naca na cheę xęzr la xu nigá, da dxezá lázredxu da dxezaca ba

lazre' bēla' dxen cheędxu, ne da dxezaca ba lazre' xiaj laudxu, ne ca naca xel-la' dxucá'ana szren cuina cheę da nápadxu. Xúgute da caní quebe zaj naca na da dx-unna Dios, san zaj naca na cheę xęzr la xu nigá. <sup>17</sup> Ba za zra xuzre lazre' xęzr la xu nigá, ne ca naca da dxezá lázredxu da naca na cheę xęzr la xu nigá. Bénnea' dx-une' da dxaca lazre' Dios wazúatecaze'.

### Ca naca da li, ne da węn lazre'

<sup>18</sup> Le'e, bi nazri'ite lazra', zra caní zaj naca na zra bzebe. Ba bénele gulé'e lawe' benne' tábague' Cristo. Neda' dxapa' le'e na'a, bache belelá' benne' zante benne' dxeledábague' Cristo. Cheę lę na' nezdXu ba zúadxu zra bzebe. <sup>19</sup> Benne' caní belexedxúajqueze' lá-dujla dxi'u. Da líqueze quebe gulaque' tuze nen dxi'u. La gulaque' tuze nen dxi'u, na' belexegá'analęqueze' dxi'u. Caní guca cheę nezdXu quebe zaj naca xúgute' tuze nen dxi'u.

<sup>20</sup> Ca naca cheęle le'e, ba zúale Be' Lá'azxa le'e, Bénnea' gusel-la Xradxu Lá'azxa. Cheę lę na' ba nézele xúgute da caní. <sup>21</sup> Dxuzúaja' cheęle da nigá lawe' da ba nézele da li, ne quegá dxennia' quebe nézele da li. Ba nézquezle le'e quebe dxun lazre' Bénnea' naque' da li.

<sup>22</sup> ¿Nuzra' naca benne' węn lazre'? Naca bénnea' dxenné' Jesús quebe naque' Cristo, Benne' nase-la Dios. Benne' węn lazre' nigá dxenné' Dios quebe naque' Xra Jesús, ne Jesús quebe naque' Zri'ine Dios. <sup>23</sup> Xúgute benne' dxelenné' Jesús quebe naque' Zri'ine Dios, Dios quebe zúalęne' benne' ca'. Bénnea' dxex-echebe' Jesús naque' Zri'ine Dios, Dios zúalęqueze' bénnea'.

<sup>24</sup> Cheę lę na', le cu'u lu xichaj lázrdaule dizra' da ba bénele nédxudautę. Che da ba bénele nédxudautę zua na lu xichaj lázrdaule, le'e súatequezle tuze nen Zri'ine Dios, ne nen Xradxu Dios. <sup>25</sup> Da nigá naca na da nachebe lazre' Dios, gunne' dxi'u xel-la' nabán zeajlí canna.

<sup>26</sup> Ba bzuaja' cheęle da nigá ca naca cheę benne' ca' dxelezí xęę le'e. <sup>27</sup> Na'a zúale Be' Lá'azxa le'e, Bénnea' gusel-la Jesucristo cheęle, na' Be' Lá'azxa nigá zuę' xichaj lázrdaule. Cheę lę na' quebe nachínele nu gusede le'e lawe' da dxusęde Be' Lá'azxa le'e ca naca xúgute da caní, na' da dxusędene' le'e naca na da li, ne quebe naca na da węn lazre'. Cheę lę na', le súatequeze tuze nen Cristo ca naca da ba bsęde Be' Lá'azxa le'e.

### Ca naca cheę benne' zaj naque' zri'ine Dios

<sup>28</sup> Na'a, bi nazri'ite lazra', le súatequeze tuze nen Cristo, cheę súadxu li lazre' gate xelá' Lę', ne quebe xeduédxu lau Lę' gate xelęę. <sup>29</sup> Ba nézele naca xlátaję Dios. Cheę lę na' dxal-la' nézele xúgute benne' ca' dx-elúnqueze' da naca na xlátaję zaj naque' zri'ine Dios.

**3** Le nna' xque ca nazrí'ileę Dios dxi'u lawe' da nazí ladxu bi cheę Dios, ne caní nácadxu. Cheę lę na' quebe zaj neze bénneache lu xęzr la xu nigá da ná-cadxu lawe' da quebe belúnbeę Jesús. <sup>2</sup> Le'e, bi nazrí'ite lazra', na'a nácadxu bi cheę Dios. Quebe ne

gulé'e lawe' da gácadxu. NezdXu gate xelá' Lę', gác-adxu ca naca Lę' lawe' da lé'dxu Lę' ca nácaqueze Lę'. <sup>3</sup> Nu benne' dxebeza lazre' gaque' ca naca Jesús dxue lazre' gaque' du lazre' ca naca Jesús, naque' du lazre'.

<sup>4</sup> Nu benne' dxunę' dul-la quebe dxuzúę' dizra' ca naca da bdxixruj be'e Dios lawe' da naca dul-la da dxedábaga da bdxixruj be'e Dios. <sup>5</sup> Ba nézele bla' Jesu-cristo cheę gudúę' dul-la nabágadxu, ne Lę' quebe bi dul-la bęne'. <sup>6</sup> Xúgute benne' zaj zúatequeze' tuze nen Jesús quebe dxelunę' dul-la, na' xúgute benne' dx-elunę' dul-la quebe ne xelélé'ene' Cristo, ne quebe ne xelúnbeę Lę'. <sup>7</sup> Le'e, zrí'ina'dau', quebe gúele lataj nu si xę le'e. Bénnea' dxunę' da xlátaję, xlátaję naque', ca naca Dios, naque' xlátaję. <sup>8</sup> Benne' dxunę' dul-la naque' cheę da xriwę' lawe' da dxun da xriwę' dul-la nédxudautę. Cheę lę na' bla' Zri'ine Dios, cheę bzria xi'e xúgute da nun da xriwę' lu xęzr la xu nigá.

<sup>9</sup> Xúgute benne' zaj naca bi cheę Dios quebe dxelunę' dul-la lawe' da zúalętequeze Be' cheę Dios benne' ca'. Cheę lę na' québedxa gaca xelezúę' xelunę' dul-la lawe' da zaj naque' bi cheę Dios. <sup>10</sup> Naca bea nu naca bi cheę Dios ne nu naca bi cheę da xriwę'. Bénnea' quebe dx-unę' da xrlátaję ne quebe nazri'ine' le sa' ljwezre' quebe naque' bi cheę Dios.

### Dxal-la' zri'idxu tu xetudxu

<sup>11</sup> Da nigá naca na dizra' da ba bénequezle nédxu-dautę, da dxenná na: Dxal-la' zri'idxu tudxu xetudxu.

<sup>12</sup> Quebe gundxu ca bęn Caín, bi na' gúcabe' cheę da xriwę', na' bétebe' bi bíchebe'. ¿Bizr cheę na' bétebe' lębe'? Bétebe' lębe' lawe' da naca da zrinnaj da bęn Caín, na' da bęn bi bíchebe' naca na da xrlátaję.

<sup>13</sup> Le'e, benne' bícha'dau', quebe xebánele che bén-neache lu xęzr la xu nigá dxuluzúę' le'e chalá'ala.

<sup>14</sup> NezdXu ba bdxúajdxu lu na' xel-la' gute, ne ba guxú'udxu lu xel-la' nabán lawe' da nazrí'idxu bíchedxu ca'. Bénnea' quebe nazri'ine' bíchedxu ca' zúaqueze' lu xel-la' gute. <sup>15</sup> Bénnea' dxuzúę' chalá'ala bíchedxu ca' naque' ca tu benne' dxute benne', na' ba nézquezle le'e nu benne' dxute benne' quebe nape' xel-la' nabán zeajlí canna. <sup>16</sup> Ba nezdXu da naca xel-la' zri'i lazre' lawe' da bzanne Jesucristo xel-la' nabán cheę', na' gutię' waláz cheędxu. Cá'anqueze dxi'u dxal-la' guzúadxu xel-la' nabán cheędxu cheę gácalędxu bíchedxu ca'. <sup>17</sup> Che tu benne' nape' xel-la' gunní'a da naca na cheę xęzr la xu nigá, ne che dxelé'ene' le sa' ljwezre' dxexázrjene', na' che quebe xexache lazre' lę', benne' nigá quebe nazri'ine' Dios. <sup>18</sup> Le'e, zrí'ina'dau', dxal-la' zri'idxu tudxu xetudxu, quegá nen dízra'ze, ne quegá nen da nnézedxu. Dxal-la' gúntequezdxu na, na' gaca bea na da li nazrí'idxu bíchedxu ca'.

### Zua zri lárzraudxu lau Dios

<sup>19</sup> Che gundxu caní ba nezdXu nácadxu cheę da li, na' sua zri lárzraudxu lau Dios, <sup>20</sup> gate zua tu da dxagu na zria lu lárzraudxu, lawe' da nezdXu naca Dios zrendxa

ca lázrdaudxu. Le' nézquezne' ca naca da dxundxu. <sup>21</sup> Ca'an naca, bi nazrí'ite lazra', che quebe zua tu da dxagu na zria lu lázrdaudxu, waca sua zrize lázrdaudxu lau Dios, <sup>22</sup> na' Le' gunne' dxi'u xúgute da nábadxu lawe'. Ca'an gaca lawe' da dxuzúadxu dizra' da bdxixruj be'e Dios, ne dxundxu da dxezaca ba lazre' Le'. <sup>23</sup> Da bdxixruj be'ene' dxi'u naca na chéajlëdxu cheë Jesucristo, Zrí'ine Dios, ne zrí'idxu tudxu xetudxu ca bdxixruj be'e Le'. <sup>24</sup> Bénnea' dxuzúe' dizra' da bdxixruj be'e Le' zúalequeze' Dios, na' Dios zúalequeze' bénnea'. Ba nezdXu Le' zúalequeze' dxi'u lawe' da bache benne' dxi'u Be' cheë'.

### Naca bea Be' cheë Dios

**4** Le'e, bi nazrí'ite lazra', quebe chéajlë cheë xúgute benne' dxelenné' zúale Be' cheë Dios le'. Le nna' xque ca naca da dxulusédené' cheë nézele che zúale Be' cheë Dios le'. Caní dxal-la' gunle lawe' da ba belelá' benne' zante, benne' wen lazre', dxelenné' dxuluchálajé' waláz cheë Dios. <sup>2</sup> Caní gaca nézele che zúale Be' cheë Dios tu benne'. Xúgute benne' dxelexechebe' ba bla' Jesucristo, ne guque' bénneache, benne' caní zaj naque' cheë Dios. <sup>3</sup> Xúgute benne' quebe dxelexechebe' ca guca Jesucristo quebe zaj naque' cheë Dios. Zaj naque' cheë bénnea' dxedábage' Jesucristo. Ba bénele gul'é lawe' bénnea', na' na'a ba zué' lu xëzr la xu nigá.

<sup>4</sup> Le'e, bi nazrí'ite lazra', nácale cheë Dios, ne bache bzúale chalá'ala benne' ca' dxelezí xë'e lawe' da szrendxa naca Be' zúale na le'e ca be' zua na lu xëzr la xu nigá. <sup>5</sup> Benne' ca' zaj naque' cheë xëzr la xu nigá. Cheë le' na' dxuluchálajé' cheë da naca na cheë xëzr la xu nigá, na' benne' zaj zré'e xëzr la xu nigá dxelenné' da dxuluchalaj benne' ca'. <sup>6</sup> Dxi'u nácadxu cheë Dios. Benne' zaj núnbe'e Dios dxuluzé nague' cheëdxu. Benne' quebe zaj naque' cheë Dios quebe dxuluzé nague' cheëdxu. Cheë le' na' nezdXu nu benne' zúale Be' cheë xel-la' li le', ne nu benne' zúale be' cheë da dxézí xë na le'.

### Tu dxúnzqueze Dios da naca cheë xel-la nazrí'i lazre'

<sup>7</sup> Le'e, bi nazrí'ite lazra', dxal-la' zrí'idxu tudxu xetudxu lawe' da dxunna Dios dxi'u xel-la' nazrí'i lazre' na'. Xúgute benne' zaj naque' zrí'i lazre' caní zaj naque' zrí'ine Dios ne zaj núnbe'e Dios. <sup>8</sup> Bénnea' quebe naque' zrí'i lazre' caní quebe núnbe'e Dios lawe' da tu dxúnzqueze Dios da naca cheë xel-la nazrí'i lázre'. <sup>9</sup> Naca béaqueze Dios nazrí'ile'ene' dxi'u lawe' da gusel-le' Zrí'ine' tu licha' lu xëzr la xu nigá cheë zrué'edxu xel-la' nabán da naca na cheë Zrí'ine' na'. <sup>10</sup> Xel-la' zrí'i lazre' li naca na caní: Quegá dxi'u na' bzrí'idxu Dios. Le' bzrí'ine' dxi'u, ne gusel-le' Zrí'ine' cheë guque' da gudúa na da nabágadxu lau Dios lawe' da nabágadxu dul-la.

<sup>11</sup> Le'e, bi nazrí'ite lazra', che Dios bzrí'ine' dxi'u caní, dxi'u dxal-la' zrí'idxu tudxu xetudxu. <sup>12</sup> Quebe nu ne le'e Dios, san che zrí'idxu tudxu xetudxu, Dios zúaque-

ze' lu xichaj lázrdaudxu, na' xel-la' zrí'i lazre' cheë' dxun na li lazre' xel-la' zrí'i lazre' cheëdxu. <sup>13</sup> NezdXu nácadxu tuze nen Dios, na' Dios naque' tuze nen dxi'u lawe' da bzue' Be' cheë' lu lázrdaudxu. <sup>14</sup> Ba blé'entu', ne dxuzentu' le'e ca naca da ben Xradxu Dios, gusel-le' Zrí'ine' cheë bedajselé' bénneache cheë xëzr la xu nigá. <sup>15</sup> Bénnea' dxexechebe' naca Jesús Zrí'ine Dios, Dios zúalequeze' bénnea', na' le' zúalequeze' Dios.

<sup>16</sup> Ba núnbeadxu ca nazrí'i Dios dxi'u, ne ba guxéajlëdxu nazrí'ine' dxi'u. Tu dxúnzqueze Dios da naca cheë xel-la nazrí'i lazre', na' bénnea' naque' zrí'i lazre' caní zúalequeze' Dios, na' Dios zúalequeze' le'. <sup>17</sup> Caní dxaca li xel-la' zrí'i lazre' cheëdxu, cheë sua zrize lázrdaudxu lu zra guzrí'a xi' Dios bénneache, benne' ca' dxeluné' da calëla, lawe' da nácadxu lu xëzr la xu nigá ca nácaqueze Jesucristo. <sup>18</sup> Bénnea' naque' zrí'i lazre' caní quebe dxezrebe' da gaca na lu zra na'. Xel-la' zrí'i lazre' li dxebéaj na chalá'ala xel-la' dxezrebe na'. Nu benne' dxezrebe' dxebeze' bi da saque', na' bénnea' dxezrebe' quebe dxaca li xel-la' zrí'i lazre' cheë'.

<sup>19</sup> Dxi'u nazrí'idxu Dios lawe' da bzrí'i Dios dxi'u nédxudaute. <sup>20</sup> Che nu benne' dxenné': Nazrí'ida' Dios, ne che benne' nigá dxuzúe' chalá'ala le sa' ljwezre', dxun lazre'. Che quebe nazrí'ine' le sa' ljwezre', bi dxel'é'tene', zájazra guné', zrí'ine' Dios, ne quebe dxel'é'ene' Le'? <sup>21</sup> Dios ba bdxixruj be'ene' dxi'u caní, gunné': Bénnea' nazrí'ine' Dios, zrí'iquezne' le sa' ljwezre'.

### Ca bdxúajdxu chawe' lu xëzr la xu nigá

**5** Xúgute benne' dxeléajlë'e Jesús naque' Cristo, Benne' nase-la Dios, benne' caní zaj naque' bi cheë Dios, na' che zaj nazrí'ine' Xradxu Dios, dxal-la' xelezrí'iquezne' xúgute benne' zaj naque' bi cheë Dios. <sup>2</sup> NezdXu nazrí'idxu benne' zaj naque' bi cheë Dios chete nazrí'idxu Dios, ne dxundxu ca naca da dxi'e dxi'u. <sup>3</sup> Che da li nazrí'idxu Dios, dxundxu da dxi'e dxi'u. Da dxi'e dxi'u quebe naca na stëbe. <sup>4</sup> Xúgute benne' zaj naque' bi cheë Dios dxedxúaje' chawe' lau da calëla da dxaca na lu xëzr la xu nigá. Dxedxúajdxu chawe' lau da calëla da dxaca na lu xëzr la xu nigá lawe' da dxéajlëdxu da naca na cheë Jesucristo. <sup>5</sup> Benne' dxedxuaje' chawe' lau da calëla da dxaca na lu xëzr la xu nigá naque' bénnea' dxéajlë'e naca Jesús Zrí'ine Dios.

### Da dxenná Dios ca naca cheë Zrí'ine'

<sup>6</sup> Guca bea Jesús naque' Cristo gate gudxúe' nisa, ne gate gulalaj dxen cheë'. Quegá gudxúaze' nisa san cá'anqueze gulalaj dxen cheë'. Be' cheë Dios gudxixruj lië' da nigá, na' Le' dxuchálajé' da li. <sup>7</sup> Chunne' dxelixruj lië' cheë da nigá xabáa, Xradxu Dios, ne Zrí'ine', ne Be' Lá'azxa, na' chunne' caní zaj naque' tuze. <sup>8</sup> Cá'anqueze chunna da dxelixruj li na cheë da nigá lu xëzr la xu nigá, Be' Lá'azxa, ne da guca gate gudxúa Jesús nisa, ne da guca gate gulalaj dxen cheë', na' da chunna caní, túzqueze da dxelixruj li na. <sup>9</sup> Dxéajlëdxu da dxelixruj li bénneache, san da nadxixruj li Dios zácadxa



na, na' Lẹ' nadxixruj liẹ' naca Jesús Zrí'inequeze'.

<sup>10</sup> Bénnea' dxéajle'e naca Jesús Zrí'ine Dios ba guzi'e xichaj lázrdawẹ' da ba gudxixruj li Dios, san bénnea' quebe dxéajle'e chee Dios dxucá'ane' Dios ca tu benne' wen lazre', lawe' da quebe guxéajle'e chee da ba gudxixruj li Dios ca naca chee Zrí'ine'. <sup>11</sup> Da nigá naca na da nadxixruj li Dios, dxenné' ba benne' dxi'u xel-la' nabán zeajlí canna, na' xel-la' nabán nigá za na lu na' Zrí'ine', Jesucristo. <sup>12</sup> Bénnea' zua Zrí'ine Dios na' lu xichaj lázrdawẹ' zúalẹ xel-la nabán nigá lẹ', san bénnea' quebe zua Zrí'ine' lu xichaj lázrdawẹ' quebe zúalẹ xel-la' nabán nigá lẹ'.

### Ca gaca nezdXu nápadXu xel-la' nabán zeajlí canna

<sup>13</sup> Da nigá dxuzúaja' chee dxéajle'e chee Zrí'ine Dios chee nézele zúalẹ xel-la' nabán zeajlí canna le'e.

<sup>14</sup> Dxuxrén lázrdXu Dios lawe' da nezdXu che bi nábadXu lau Lẹ' ca naca da dxaca lazre' Lẹ', Lẹ'queze' wenne' chee dxu. <sup>15</sup> Lawe' da nezdXu Dios dxenne' chee dxu, cá'anqueze ba nezdXu gunna Lẹ' da ba gunábadXu lau Lẹ'.

<sup>16</sup> Che tu benne' dxelé'ene' dxun bíchedXu dul-la da quebe nua na xel-la' gute, dxal-la' nabe' lau Dios ne chee bíchedXu na', na' Dios gunézruje' xel-la' nabán chee', che naca na tu dul-la da quebe nua na xel-la' gute. De dul-la da nua na xel-la' gute, na' quebe dxenná' ná bale lau Dios ne chee bénnea' dxune' dul-la nigá. <sup>17</sup> Xúgute da calela naca na dul-la, na' de dul-la da quebe nua na xel-la' gute.

<sup>18</sup> NezdXu nu benne' naca bi chee Dios québedxa dxúnqueze' dul-la lawe' da dxuwía dxuxúe Zrí'ine Dios lẹ', na' da xriwe' quebe bi dxezeque guné na lẹ'.

<sup>19</sup> NezdXu nácadXu bi chee Dios, na' xúgute benne' zaj naca chee xezr la xu nigá zaj xu'e lu na' da xriwe'.

<sup>20</sup> NezdXu ba bla' Zrí'ine Dios, ne ba bzéajni'ine' dxi'u chee gúnbeadxu Dios li. NácadXu tuze nen Bénnea' naque' li lazre', Jesucristo, Zrí'ine Dios. Benne' nigá naque' Dios li, ne Lẹ'queze' naque' xel-la' nabán zeajlí canna da zúalẹ na dxi'u. <sup>21</sup> Le'e, zrí'ina'dau', le guxúe xanne' cuínale chee quebe gucá'ana szrenle bedau' xiaj xaga ca'.

## 2 Juan

### Da naca li, ne xel-la' zri'i lazre'

**1** Neda', benne' gula wɛn zrin cheɛ Cristo, dxuzúaja' da nigá chiu' lue', nu'ula zana', ba gucá'a Dios lue'. Dxuzúaja' cheɛ zri'inu' ca'. Da li nazrí'ida' le'e, ne quegá tuze neda', san cá'anqueze benne' ca' zaj núnbe'e da li zaj nazrí'iquezne' le'e. <sup>2</sup> Nazrí'ida' le'e lawe' da ba núnbeadxu da li, da súatequeze na xichaj lázrdauxu. <sup>3</sup> Dxenaba' lau Xradxu Dios, ne lau Xrá-nadxu Jesucristo, Zri'ine Dios, xezá' lazre' cheɛle da xrlátaje, ne xache lazre' le'e, ne gunne' le'e xel-la' dxebeza zri lazre', cheɛ gúnbeale da li, ne cheɛ gácale zri'i lazre'.

<sup>4</sup> Dxebéle'eda' lawe' da ba benda' zri'inu' ca' dx-elunbe' ca naca da li, ca naca da bdxixruj be'e Xradxu Dios. <sup>5</sup> Na'a, nu'ula zána'dau', dxata' xúeda' lue' zri'idxu tudxu xetudxu. Da nigá dxuzúaja' chiu' quebe naca na tu da cube da nadxixruj bea Dios, san naca na da ba bendxu nédxudaute. <sup>6</sup> Xel-la' zri'i lazre' li naca bea na che dxundxu ca da nadxixruj bea Dios, na' da nadxixruj be'e naca na da ba bénele nédxudaute, cheɛ zri'idxu tudxu xetudxu.

### Benne' dxelezí xɛ'e

<sup>7</sup> Ba belelá' benne' zantɛ, benne' dxelezí xɛ'e. Benne' caní quebe dxelexechebe' guca Jesús bɛla' dxen. Benne' caní zaj naque' benne' dxelezí xɛ'e, ne dx-eledábague' Cristo. <sup>8</sup> Le guxúe xanne' cuínale cheɛ quebe gunítele da dxal-la sile du naxá'.

<sup>9</sup> Nu benne' dxedé' nagá xula cheɛ da nigá quebe dx-ezílɛne' ca naca da bsɛde Cristo, ne quebe zúale Dios le'. Bénnea' dxezílɛne' ca naca da bsɛde Cristo, da li Dios zúalɛne' Le', na' cá'anquez zúale Cristo Le'. <sup>10</sup> Che nu benne' xide' naga zúale le'e, ne quebe dxusédene' le'e ca naca da bsɛde Cristo, quebe nnele bénnea' lízrele, ne quebe gápale le' ba lá'ana. <sup>11</sup> Nu benne' gapɛ' bénnea' ba lá'ana, dxun benne' nigá tuze ca da calela da dxun bénnea'.

### Dizra' bzebe

<sup>12</sup> Da zantɛ dxal-la' xapa' le'e, san quebe dxaca lazra' guzúaja' na lu xícheze. Dxebeza lazra' xida' xedajná'a le'e, na' guchálajlequeza' le'e, cheɛ gaca béle'ɛdxu.

<sup>13</sup> Bidu ca' cheɛ bi bilu', nu'ula ba gucá'a Dios le', dxu-lugápabe' lue' diuzre. Ca'an gaca na.

## 3 Juan

### San Juan dxenné' da chawe' chee' benne' le' Gayo

**1** Neda', benne' gula wɛn zrin chee' Cristo, dxuzúaja' da nigá chiu' lue', Gayo, bi nazrí'itɛ lazra'. Da líqueze nazrí'ida' lue'.

<sup>2</sup>Lue', bi nazrí'itɛ lazra', dxenaba' lau Dios gaca da chawe' chiu', ne su' chawe', ca dxaca chee' bɛnne'du xu'u. <sup>3</sup>Gubéle'ɛda' gate belelé' tu chupa benne' bíchedxu, ne gulé'ɛ neda' ca dxéajle'u chee' Xránadxu, ne ca dxunu' ca naca da li. <sup>4</sup>Québequeze bi dɛ da gundxa na neda' súalɛ'a xel-la' dxebé, ca xel-la' dxebé da zua' gate dxenda' dxelún benne' zaj naque' ca zrín'ineqezza' ca naca da li.

<sup>5</sup>Lue', bi nazrí'itɛ lazra', nacu' benne' li lazre' ca naca da dxunu' dxácalɛnu' bi bíchedxu ca', ne da naca blaudxa dxácalɛnu' bi bíchedxu za'aque' xɛzre xula.

<sup>6</sup>Lau benne' zaj nazrague' chee' Dios nigá dxuluchalaj bi bíchedxu caní ca nazrí'inu' bi bíchedxu ca'. Da cháwedau' dxunu' gate dxugú'u benne' caní neza, dxácalɛnu' le' ca naca da dxezaca ba lazre' Dios. <sup>7</sup>Benne' caní zjaque' dxelunɛ' zrin nigá lawe' da zaj nazrí'ine' Cristo, ne quebe bi dxelezi'ɛ da xelunna benne' quebe zaj núnbe'ɛ Dios. <sup>8</sup>Chee' le' na' dxal-la' gápadxu ba lá'ana benne' caní chee' gúnledxu le' zrin chee' da li.

### Da calɛla da dxun benne' le' Diótrɛfes

<sup>9</sup>Ba bzuaaja' chee' benne' zaj nazrague' chee' Dios naga zu', na' bɛnnea' le' Diótrɛfes quebe dxape' netu' ba

lá'ana lawe' da dxaca lazre' gaque' blau lówela benne' ca'. <sup>10</sup>Chee' le' na', che xida' naga zu', guzéajni'ida' benne' ca' ca naca da dxun bɛnnea', dxezí tizre' netu', ne dxennéle'ɛ cheɛntu'. Quegá da nigáze dxunɛ', san cá'anqueze quebe dxezí' lu ne'ɛ benne' bíchedxu zá'aque' ga na', ne quebe dxu'ɛ lataj benne' ca' dxelaca lazre' xelezí' lu ne'ɛ benne' caní, ne dxexebéaje' le' lá-dujla benne' ca' zaj nazrague' chee' Dios.

<sup>11</sup>Lue', bi nazrí'itɛ lazra', quebe gunu' lue' ca naca da calɛla da dxelún benne' caní. Bɛn ca naca da xrlátaje. Bɛnnea' dxunɛ' da xrlátaje naque' chee' Dios, san nu benne' dxunɛ' da calɛla, quebe ne gúnbeaqueze' Dios.

### Da xrlátaje da dxun benne' le' Demetrio

<sup>12</sup>Xúgute' benne' dxelenné' da chawe' ca naca da dxun Demetrio, na' da líqueze naca bea na ca dxunɛ'. Cá'anqueze netu' dxixruj beantu' ca naca da dxunɛ', na' lue' nézqueznu' dxuchálajntu' da li.

### Dizra' bzebe

<sup>13</sup>Déle'ɛ da dxal-la' guchálajlɛna' lue', san quebe dxa-ca lazra' guzúaja' na lu xícheze, <sup>14</sup>lawe' da dxebeza lazra' lé'etɛquezda' lue'. Nadxa guchálajdxu caníqueze.

<sup>15</sup>Dxenaba' lau Dios sua zrize lazrda'u. Bi bíchedxu zaj zra' nigá dxulugape' lue' diuzre. Bgapa lue' diuzre tu tu benne' bíchedxu zaj zre'ɛ naga zu'. Ca'an gaca na.

# Judas

## Dizra' da gusel-la San Judas chee bi ca' chee Dios

**1** Neda', Judas, wen zrin chee Jesucristo, naca' benne' biche Jacobo, na' dxesel-la' dizra' nigá chee le'e, nácale benne' ca' ba gunné Xradxu Dios, ne ba guqué'e le'e chee gácale bi chee', ne dxuxúe' le'e lawe' da nácale tuze nen Jesucristo. <sup>2</sup> Dxenaba' lau Dios xache lázrele'e le'e, ne gúnnale'e chee le-la' dxebeza zri lazre', ne xel-la' zri'i lazre'.

## Ca naca chee benne' ca' dxulusédené' da wen lazre' (2 Pedro 2.1-17)

<sup>3</sup> Benne' bícha'dau' nazri'ite' lazra', ba guca lázreli'a guchálajlëna' le'e ca naca chee xel-la' weselá da ba nazile le'e, ne cá'anqueze neda', san na'a dxun na ba xen guchálajlëna' le'e, ne gata' xueda' le'e gapa típale da naca chee xel-la' dxeajlí lazre' da ba benna Dios chalásaze chee bi chee' ca'. <sup>4</sup> Caní naca lawe' da ba gulú'u benne' wen lazre' ca' ládujla dxi'u, benne' ca' ba gunná Dios gate nate dxal-la' xelebía xi'e. Zaj naque' benne' dxeluné' da sban, na' lawe' da dxunite lau Dios chee benne' dul-la, dxeléquene' zaj nápaqueze' lataj xeluné' cáteze da dxelaca lazre', ne dxuluzúe' chalá'ala Dios tu licha', Bénnea' dxenná bea, ne Xránadxu Jesucristo.

<sup>5</sup> Lácala ba nézquezle le'e da nigá, dxaca lazra' gusá'a lázrele ca ben Xradxu Dios gate bebéaje' benne' Israel ca' ládujla benne' Egipto, na' gudé na' bzria xi'e benne' Israel ca', benne' quebe guléajle'e chee'. <sup>6</sup> Cá'anqueze gubáz chee xabáa, gubáz ca' chee Dios, quebe beluné' ca da guzre Dios le', san bulucá'ane' lataj chee'. Dios nuzague' le' lu da chul-la, ne nuchéaje' gubáz ca' chalásaze nen du xia, chee guzrí xi'e le' lu zra bzebe ni'. <sup>7</sup> Cá'anqueze guca chee xezre Sodoma, ne xezre Gomorra ne chee xezre walízredu ca'. Ca belún gubáz chee xabáa ca', cá'anqueze belún bënneache chee xezre caní. Buluzúa cuine' lu da sban, ne beluné' cáteze da gulaca lazre', ne buluzúe' chalá'ala ca da bdxixruj bea Dios chee xel-la' zúale nu'ula. Na'a, lawe' da bzria xi' Dios benne' ca', bde'e le' tu lu xi' da québedxa xexula na, na' da na' guca chee benne' caní dxuzéajni' na dxi'u chee quebe gúnquezdxu ca'.

<sup>8</sup> Láqueze gulaca caní chee benne' ca', cá'anqueze dxelún benne' caní, zjácálene' xel-la' bchigala, ne dxuluca'ane' sban be'la' dxen chee', ne dxuluzúe' chalá'ala xel-la' dxenná bea chee Xránadxu, ne dxelenné' schanni' chee gubáz chee xabáa, gubáz ca' chee Dios.

<sup>9</sup> Léqueze Miguel, gubáz blau chee xabáa chee Dios

gate gudíl-lalene' da xriwe', ne btil-le' dizra' nen le' na chee guca bexu'e be'la' dxen chee Moisés, quebe bexájrjene' nnabe' da ba xa', san guzre' na: "Xránadxu Dios tíl-laqueze' lue'." <sup>10</sup> Na'a benne' caní dxelenné' schanni' chee da quebe zaj núnbe'e, na' da ba zaj nún-beaqueze', ca da zaj neze be' xixre', be' quebe zaj naxéajni'iba', da caní dxuluchínene' chee xuluzrí xi' cuine'.

<sup>11</sup> Edxugua benne' caní lawe' da dxeluné' ca da ben Caín, chee gulez' lu ne'e dumí, buluzúe' chalá'ala da dxenná Dios ca ben Balaam, na' welexenite' ca guca chee Coré, bënnea' bzria xi' Dios lawe' da gudábague' xrtizra Dios. <sup>12</sup> Benne' caní, gate dxelágulene' le'e lu laní chee dxeluné' cheajlechaze bënneache. Dxelé'aj dxelawe' nen le'e, ne quebe dxelape' ba lá'ana Dios. Dxelún cuine' ca benne' dxuluxúe' zri'la, san dxuluxúeze cuine'. Zaj naque' ca beuj ca' quebe zaj xuzru nisa, beuj ca' da dxua be'. Zaj naque' ca xaga ca' quebe dxelebía na da zixre chee na, ne zaj nabizre na du lue na, ne ba zaj zua na chee lepe na. <sup>13</sup> Zaj naque' ca xea-jxruza chee nísadau' da dxedxú'u na bzrina' sgute, da dxulé'e na ca da sban da dxeluné'. Zaj naque' ca belaj ca' dxelecuasa na lu xrneze na, ne zaj nabía xi' na chee cheajsúa na chadía chacanna lu da chul-la.

<sup>14</sup> Cá'anqueze Enoc, benne' chee gazre cue' zre sua Adán gunné' waláz chee Dios ca naca chee benne' caní, gunné': "Ble'eda' Xránadxu ze'e nen gaxúane gaxúane bi chee ca' <sup>15</sup> chee guchi'e ca da zaj nun xúgute bënneache. Gulezrí xi' xúgute benne' wen da sban ne chee da cale'la da beluné' lu xel-la' cale'la chee', nen benne' dul-la ca' ne chee xúgute dizra' schanni' da gulenné' chee Dios." <sup>16</sup> Zaj naque' benne' wagu zria, ne benne' wezí tizra', benne' dxelunze' cáteze dxelezaca ba lazre'. Dxuluchálaje' dizra' da dxucá'ana szren na le', ne dxelennáze' da chawe' chee bënneache chee xelez'ie da zaj de' chee benne' ca'.

## San Judas dxenné' xuene' bi ca' chee Xránadxu

<sup>17</sup> Le'e, benne' bícha'dau' nazri'ite' lazra', le gusá lázrele ca zánete' iza gulenná benne' gubáz chee Xránadxu Jesucristo, <sup>18</sup> gulé'e le'e: Lu zra bzebe welezrá' benne' xelún le' chee da ca' zaj naca lá'azxa, ne xeluné' cáteze zaj naca da sban da dxelezá lazre'. <sup>19</sup> Benne' caní dxeluné' chupa la'a bënneache. Zaj naque' benne' chee xezr la xu nigá, ne quebe zúale Be' Lá'azxa chee Dios le'.

<sup>20</sup> Le'e, benne' nazri'ite' lazra', le se' chacha ca naca lu xel-la' dxeajlí lazre' lá'azxa da ná'pale. Le guchálajle

Dios, zúaleḡ xel-la' waca cheḡ Be' Lá'azxa le'e. <sup>21</sup> Le cha' lu xel-la' zri'i lazre' cheḡ Dios, ne le cueza zra gate gun-na Xránadxu Jesucristo dxi'u xel-la' nabán da zeajlí can-na lu xel-la' zri'i lazre' cheḡ.

<sup>22</sup> Le gácaleḡ benne' ca' dxelaca chupa lazre' ca naca cheḡ Cristo. <sup>23</sup> Le gun xeelá benne' xula cheḡ quebe chjaque' lu xi' cheḡ lataj ba xa', ne le xexache lazre' xezícala bénneache. Le guxúe xanne' ca naca da sban da dxelún benne' ca' cheḡ quebe ca'a leḡ na le'e.

### San Judas dxue lá'aneḡ Dios

<sup>24</sup> Dios tu licha', Benne' naque' sina, ne naque' We-selá cheḡdxu, wazéquenḡ guxúe' le'e cheḡ quebe cuásale Le', ne cheḡ guzúe' le'e lau Le' lu xel-la' szren cheḡ, ne cheḡ quebe dxenle da naca cheḡ dul-la, ne cheḡ súaleḡqueze xel-la' dxebe' le'e.

¡Gaca ba Le', ne gaca cheḡ xel-la' szren, ne xel-la' waca, ne xel-la' dxenná bea, ne cheḡ Xránadxu Jesucristo, na'a zra, ne chadía chacanna! ¡Ca'an gaca na!

# Apocalipsis

## Da ble'e Jesucristo Juan

**1** Da nigá naca tu da bnezruj Dios Jesucristo da gul'éneḡ wən zrin cheḡ ca' ca naca da dxal-la' gá-cate. Jesucristo gusel-le' gubáz cheḡ xabáa cheḡ, na' le' bzéajni'ineḡ neda', Juan, naca' wən zrin cheḡ Jesús.  
<sup>2</sup> Neda' dxulé'eda' le'e da li ca naca xúgutḡ da ble'eda', ne dxexecheḡba' ca naca dizra' cheḡ Dios, ne ca naca da gunná Jesucristo.  
<sup>3</sup> Ba neza zrentḡ naca na cheḡ benne' gulabeḡ, ne cá'anqueze ba neza zrentḡ naca na cheḡ benne' ca' dxuluzé nagueḡ cheḡ bénnea' gulabeḡ dizra' nigá da ben-na Dios, ne xelunḡ ca naca da naxúaj nigá, lawe' da ba za gáguze zra gaca na.

## Juan dxuzuajḡ cheḡ gazre cue' benne' dxeléajleḡ cheḡ Jesús

<sup>4</sup> Neda', Juan, dxuzúaja' cheḡ gazre cue' benne' dx-eléajleḡ cheḡ Jesús, zaj zreḡ naga nababa Asia. Dxena-ba' lau Dios gaca chawe' cheḡle, ne gunḡ le'e xel-la' dxebeza zri lazre'. Le' guzúaquezeḡ nédxudautḡ, ne zúaquezeḡ na'a, ne tu súazquezeḡ chadía chacanna. Gazre Be' ca' zaj zra' ca li naga dxe' Dios zaj naca Le' tuze, <sup>5</sup> ne cá'anqueze Jesucristo naqueḡ Le' tuze ca naca da chawe' da dxun Dios cheḡle. Jesucristo naqueḡ benne' li lazre' dxexecheḡba' ca da zaj naca cheḡ Dios, ne naqueḡ benne' nedxu bebaneḡ chalásaze ládujla benne' gate ca', ne napeḡ xel-la' dxenná bea lówela xúgutḡ wenná bea zaj zreḡ xḡzr la xu nigá. Cristo nazri'ineḡ dxi'u, ne ba gudibeḡ xichaj lázrdaudxu. Begüḡ dul-la cheḡdxu gate blálajeḡ dxen cheéquezeḡ leḡ xaga begúaj. <sup>6</sup> Beneḡ dxi'u ca benne' wenná bea ca', ne bxruze ca' cheḡ gundxu zrin cheḡ Dios cheḡ, Bénnea' naqueḡ Xre'. ¡Gaca ba Le', ne gapeḡ xel-la' dxenná bea chadía chacanna! ¡Ca'an gaca na!  
<sup>7</sup> Le na' xque. Cristo zeḡ lu beuj bza. Xúgutḡ bénneache xelélé'eneḡ Le', ne cá'anqueze benne' ca' belunḡ Le' weḡ, na' ca naca bénneache zaj zra' lu xḡzr la xu xelebezre xacheḡ ca xelélé'eneḡ Le'. ¡Awe', ca'an gaca na!

<sup>8</sup> Le' dxenné': "Neda' zúaqueza' nédxudautḡ, ne zúaqueza' bzébedxa. Dxuna' su lau sua xúgutḡ ne guna' xexuzre na." Caní dxenná Xránadxu, napeḡ dutḡ xel-la' dxenná bea, naqueḡ Bénnea' guzúaquezeḡ, ne zúaquezeḡ, ne tu súazquezeḡ.

## Juan dxelé'eneḡ tu da ble'e Dios le' da naca na da xabáa cheḡ Cristo

<sup>9</sup> Neda', Juan, naca' benne' bíchele le'e, ne naca' tuze nen le'e lu xel-la' zi', ne lu xel-la' dxenná bea, ne lu xel-la' dxuchaga lau da dxunna Jesucristo dxi'u. Ca tu benne' xuḡ lizre xia guzúa' lu xḡzr la xu Patmos da naxechaj nísadau', lawe' da bchálaja' dizra' cheḡ Dios ne dxuna' ba nalí ca naca cheḡ Jesucristo. <sup>10</sup> Guzúale Be' Lá'azxa neda' lu zra cheḡ Xránadxu, na' benda' cúzrula' chi'i tu benne' dxenné' zizraj ca chi'i luzu da dxulucuezreḡ. <sup>11</sup> Gunné':

—Neda' naca' nedxu, ne bzeḡba ca naca da dxezú lau, ne da dxexuzre na. Bzuaj tu lu xiche da dxelé'enu', na' gusel-la na cheḡ gazre cue' bénneache dxeléajleḡ chia', zaj zreḡ naga nababa Asia, benne' ca' zaj zreḡ xḡzre Efeso, ne xḡzre Esmirna, ne xḡzre Pérgamo, ne xḡzre Tiatira, ne xḡzre Sardis, ne xḡzre Filadelfia, ne xḡzre Laodicea.

<sup>12</sup> Bexéchaja' cheḡ le'eda' nu chi'i na' gunné' neda', na' ca bexéchaja' na', ble'eda' gazre da zua na xi' da' zaj naca na oro. <sup>13</sup> Laduj da zaj zua na xi' ca' ble'eda' tu benne' naqueḡ ca Bénnea' guljeḡ bénneache, nácuḡ zra lanḡ da dxezrintḡ lu niḡ dxe'ela, na' xu'u tu bazxu oro lachuḡ. <sup>14</sup> Xicha xíchajeḡ zaj naca na chiche ca zrila' chiche, u ca bezxe', na' xiaj lawḡ dxelácatite legala na ca xi'. <sup>15</sup> Niḡ dxelácatite na ca xia da gudeteḡ bea guxú'u na lu xi', na' chiḡ naca na zizraj ca naca chi'i zane' xḡgu zri'a ca'. <sup>16</sup> Lu neḡ da zua xabḡla nuxreḡ da ca' zaj naca ca gazre belaj xabáa, na' dxuḡ dxedxuaj da naca na ca tu xia da nalá dxupa la'ate. Dxu'a lawḡ dxácatite na ca gubizra gate dxennáleḡ na.

<sup>17</sup> Ca ble'eda' Le', xeajchazia' zran niḡ ca tu benne' gate. Na' Le' guxrúa neḡ xabḡla neda', na' gunné':

—Quebe zrebu'. Neda' zúaqueza' nédxudautḡ, ne zúaqueza' bzébedxa. <sup>18</sup> Naca bánqueza'. Gutia', na' na'a nabánqueza' chadía chacanna. Neda' nuxra' zren xia cheḡ xel-la' gute, ne cheḡ lataj ba xa'. <sup>19</sup> Bzuaj da ba blé'enu' ne da dxaca na'a, ne da gaca te nigá. <sup>20</sup> Caní naca da zéajḡ ca gazre belaj ca' blé'enu' nuxra' na'a xabḡla, ne ca naca cheḡ gazre da zua na xi' da' zaj naca na oro. Gazre da zaj naca ca belaj ca' zéajḡ na gubáz ca' nasel-la' cheḡ gazre cue' bénneache chia' ca', na' gazre da zua na xi' zéajḡ na gazre cue' bénneache chia' ca'.

Dizra' gusel-la Cristo chee' gazre cue' bèneache chee'

Dizra' gusel-le' chee' bi chee' zaj zře'ę xęzre Efeso

2 Guzre Jesús neda':  
—Bzuaj chee' gubáz chia' zúalęę' bi chia' zaj zře'ę xęzre Efeso. Bzuaj da nigá: Caní dxenná Jesús, Bénnea' nuxře' gazre belaj ne'ę xabęla, ne dxedę' laduj gazre da zua na xi' da zaj naca na oro. <sup>2</sup> Neda' nezda' xúgutę da dxunle. Nezda' dxúnle'ęle zrin ne nácale zren lazre', ne quebe dxuele lataj benne' węn da zrin-naj ca'. Neda' nezda' ba bxue xánnele benne' ca' dxelennę' zaj naque' gubáz chia' ne quebe zaj naque', na' ba ble'ele zaj naque' benne' węn lazre'. <sup>3</sup> Gúcale zren lazre', ne gudele xel-la' zi', na' bęnle'ęle zrin chia', ne quebe gute ni'a na'le. <sup>4</sup> Na'a zua tu da dxagu na zria cheęle, québedxa nazri'ile neda' ca' bzri'ile neda' nédx-utę. <sup>5</sup> Cheę le' na', le gusá lazre' ca' bzri'ile neda' nédx-utę, ne le xexiáje lazre', na' le gun ca' da bęnle nédxutę. Che quebe gunle caní xídaqueza' naga zúale, na' xecá'a xrlátajle lu da naca chia' cheę québedxa gácale ca' da zua na xi' chia'. Caní guna' che quebe xexiáje lázrele. <sup>6</sup> Zua tu da dxecá'a na' le'e, dxecuidele da dxelún benne' ca' zaj nazí le' nicolaíta ca', benne' ca' dxulucá'ana szreę' bedau' xiaj xaga ca', da na' dxecuide-queza' neda'. <sup>7</sup> Benne' zua nague' dxal-la' xenne' da nigá dxę Be' Lá'azxa bi chia' ca'. Benne' ca' xeledxúaje' xrlátaje lawe' da zrinnaaj, neda' gunézruja' da xelawę' da dxebía xaga da dxunna na' xel-la' nabán, ne zua na lu lataj xrlátaje cheę Dios.

Dizra' gusel-le' chee' bi chee' zaj zře'ę xęzre Esmirna

8 Guzre Jesús neda':  
—Bzuaj chee' gubáz chia' zúalęę' bi chia' zaj zře'ę xęzre Esmirna. Bzuaj da nigá: Caní dxenná Jesús, Bénnea' zúaquezę' nédxudautę, ne zúaquezę' bzębedxa, Bénnea' gutię, ne bebánquezę'. <sup>9</sup> Neda' nezda' xúgutę da dxunu'. Nezda' gudele xel-la' zi', ne nácale benne' xache'. Da li nácale benne' gunni'a. Nezda' ca' dxelennę' schanni' cheęle benne' ca' dxelennę' zaj naque' judío, san zaj naque' tu cue' benne' dxulucá'ana szreę' da xriwę'. <sup>10</sup> Quebe zřebele ca' naca xel-l' a' zi' da tele, lawe' da guzrá' da xriwę' bál-lale le'e lizre xia cheę gulé'e lau da nácale, na' tele xel-la' zi' lawe' chi zra. Le gaca li lazre' lácala xelutię' le'e, na' neda' gunna' le'e xel-la' nabán ca' tu da dxunna bea na będxuajle chawe'. <sup>11</sup> Benne' zua nague' dxal-la' xenne' da nigá dxę Be' Lá'azxa bi chia' ca'. Benne' ca' xeledxúaje' chawe' lawe' da zrinnaaj, quebe bi gune da zi' da xa' da zeajlí canna cheę benne' ca'.

Dizra' gusel-le' chee' bi chee' zaj zře'ę xęzre Pérgamo

12 Guzre Jesús neda':  
—Bzuaj chee' gubáz chia' zúalęę' bi chia' zaj zře'ę xęzre Pérgamo. Bzuaj da nigá: Caní dxenná Jesús, Bénnea' nuxře' xia da nalá dxupa la'a. <sup>13</sup> Neda' nezda' xúgutę da dxunle. Nezda' zúale naga dxenná bea da

xriwę'. Quebe nusanle da naca chia'. Quebe bsanle dx-exechębele chia', ne lu zra ca' gate belutię' Antipas, benne' bechębę' du lazre' da naca chia' ládujla le'e, naga zua da xriwę'. <sup>14</sup> Na'a, zua tu da dxagu na zria cheęle, dxuele lataj zaj zra' ládujla le'e benne' ca' ne zjácłęę' da bsęde Balaam, bénnea' gulú'u xel-le' Bal-ac, bennen' bęnę' belún benne' Israel ca' dul-la, na' gu-lawę' da buluzrię' lau bedau' xiaj xaga ca', ne belunę' da sban. <sup>15</sup> Cá'anqueze zaj zra' ládujla le'e bal-la benne' ne zjácłęę' da dxulusęde benne' zaj nazí le' nicolaíta, da na' dxecuidequeza' neda'. <sup>16</sup> Cheę le' na' le xexiáje lázrele lawe' da che quebe xexiáje lázrele xida' naga zúale, na' tıl-lalęna' benne' ca' nen xia nalá da dxedxu-aj na dxu'a. <sup>17</sup> Benne' zua nague' dxal-la' xenne' da nigá dxę Be' Lá'azxa bi chia' ca'. Benne' xedxuaję' chawe' lawe' da zrinnaaj, neda' gunézruja' da gawę' da naca na xeta maná da nagache na xabáa, ne gunézru-ja' le' tu xiaj chiche, na' le'ę xiaj na' naxúaj tu la cube cheę bénnea', da quebe nu neze, san tuze bénnea' si'e na.

Dizra' gusel-le' chee' bi chee' zaj zře'ę xęzre Tiatira

18 Guzre Jesús neda':

—Bzuaj chee' gubáz chia' zúalęę' bi chia' zaj zře'ę xęzre Tiatira. Bzuaj da nigá: Caní dxenná Jesús, Bénnea' zaj zra xiaj lawę' da dxelácatite na ca xi', na' ni'e zaj naca na ca xia gache da nabá'ale'ę na. <sup>19</sup> Neda' nezda' xúgutę da dxunle. Nezda' ca' nazri'ile neda', ne ca dxéajlele chia', ne ca dxunle zrin chia', ne ca nácale zren lazre', na' dxúndxale na'a da zrendxa ca' da bęnle nédxutę. <sup>20</sup> Na'a, zua tu da dxagu na zria cheęle, dxuele lataj nu'ula na' le' Jezabel, nu'ula na' dxennę' dx-uchálaję' waláz cheę Dios, na' dxezi xę'ę benne' węn zrin chia' ca' ca' naca da dxusędenę' cheę xelunę' da sban, ne xelawę' da dxuluzrię' lau bedau' xiaj xaga ca'. <sup>21</sup> Neda' ba be'a nu'ula na' lataj xexiáje lazre', na' quebe guca lazre'. Quebe dxusanę' ca' naca da sban da dx-unę'. <sup>22</sup> Na'a, che benne' ca' quebe xulusanę' ca' da dx-elunę' ca' dxun nu'ula na', neda' cu'a le' xel-la' wę' da quixruj na le', na' weledęle'ę xel-la' zi' benne' ca' dx-elunę' dul-la nen nu'ula na', <sup>23</sup> na' gútequeza' benne' ca' zaj de'ę nu'ula na'. Caní gaca, xúgutę cue' bi chia' ca' xeleque be'ene' neda' nezda' ca' naca dutę da zua lu xichaj lázrdau bèneache, na' tu tule le'e gunna' le'e cáteze naca da bęnle. <sup>24</sup> Xezícadxale le'e zrale xęzre Tiatira, quebe zéajlele da na' dxusęde nu'ula na', ne quebe ne sile da dxennę' naca na da nagache cheę da xriwę', neda' dxapa' le'e, quebe bi xetú da gucha' le'e gunle. <sup>25</sup> Le gapa chi'i xel-la' dxixruj be'e da ba gucha' le'e gunle ca' zrindxa zra xelá'a neda'. <sup>26</sup> Benne' ca' xeledxúaje' chawe' lawe' da zrinnaaj, ne xelunę' ca' dxa-ca lazra' neda' ca' zrindxa zra bębę ni', neda' gunézru-ja' cheę benne' ca' xel-la' dxenná bea lawe' xęzre ca', <sup>27</sup> ca' bęn Xra', bęnņę' neda' xel-la' dxenná bea, na' xel-lenná be'ene' benne' xęzre ca' nen tu var xia, na' xuluzría xi'e xęzre ca' ca' dxun tu benne' dxelę'ę tu xesu' xu. <sup>28</sup> Cá'anqueze gu'a benne' ca' lataj xelezúalęę' ne-

da', naca' ca belaj zila. <sup>29</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

**Dizra' gusel-le' cheę bi cheę' ca' zaj zřeę xęzre Sardis**

**3** Guzre Jesús neda':  
—Bzuaj cheę gubáz chia' zúalęę' bi chia' zaj zřeę xęzre Sardis. Bzuaj da nigá: Caní dxenná Jesús, Bénnea' zaj zúalę gazre Be' cheę Dios Le', ne nuxre' da gazre ca' zaj naca ca belaj ca'. Neda' nezda' xúgute' da dxunle. Nezda' ba nácale ca benne' gate ca' lau Dios lácala dxeleque bénneache naca banle. <sup>2</sup> Le guxúe, ne le sua chacha cheę quębedxa gácale ca benne' ca' ba zúate xelátie'. Dxele'eda' da dxunle, quebe naca na li lazre' lau Dios chia'. <sup>3</sup> Le gusá lazre' ca naca da ba nazédele. Le chéajle na, ne le xexíaje lazre'. Che quebe guxúe cuínale wida' naga zúale ca za tu gubán, ne quebe nézele bi zra xida'. <sup>4</sup> Zaj zra' ládujla le'e bábaze benne' quebe ne xelunę' da sban, na' benne' caní xeledáleńę' neda', ne xelácuę' zra lanę' chiche lawe' da caní dxal-la' gaca cheę'. <sup>5</sup> Benne' ca' xeledxúaje' chawe' lawe' da zrinnaj xelácuę' zra lanę' chiche ne quebe xusula' la benne' ca' lu xiche naga zaj naxúaj la benne' ca' zúalę xel-la' nabán le', na' xechęba' cheę benne' ca' lau Xra' ne lau gubáz cheę xabáa cheę' ca'. <sup>6</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

**Dizra' gusel-le' cheę bi cheę' zaj zřeę xęzre Filadelfia**

<sup>7</sup> Guzre Jesús neda':  
—Bzuaj cheę gubáz chia' zúalęę' bi chia' zaj zřeę xęzre Filadelfia. Bzuaj da nigá: Caní dxenná Jesús, Bénnea' naque' lá'azxa ne li lazre', Bénnea' nuxre' zren xia da dxunna bea na nape' xel-la' dxenná bea ca da guda-pa wenná bea David, na' gate salje', netú quebe nu gaca xusezxuj, na' gate xusézxuje' netú quebe nu gaca salaj. <sup>8</sup> Neda' nezda' xúgute' da dxunle. Nuzúa' laule le'e tu dxa xu'u da naxalaj, da quebe nu gaca xusezxuj. Lácala quebe nadípatęcale, zéajlele dizra' chia', ne quebe ne gusán lázrele da naca chia'. <sup>9</sup> Benne' ca' dxulucá'ana szrene' da xriwe', benne' wen lazre' ca', benne' dxelennę' zaj naque' judío ne quebe zaj naque', neda' guna' xuluzú zribe' zran ní'ale cheę xelenézene' neda' nazrí'ida' le'e. <sup>10</sup> Ba benle ca da gucha' le'e gunle cheę gácale zren lazre', na' cheę le' na' guxúequeza' le'e lawe' xel-la' zi' da xeledé xúgute' bénneache zaj zřeę lu xęzr la xu, cheę gulé'e lau da zaj naque'. <sup>11</sup> Wí-dazequeza'. Le gapa chí'i da nácale cheę quebe nu ca'a ca da dxal-la' sí'le. <sup>12</sup> Benne' ca' xeledxúaje' chawe' lawe' da zrinnaj, neda' gun chacha' benne' ca', na' xelaque' ca ze'e xiaj ca' zaj zua na lizre Xra', ne cabá-taquezdxá xeledxúaje' na', na' lu lázrdawe' guzúaja' La Xra', ne la xęzre cheę Dios chia' da naca na Jerusalén cube da za' xabáa, ne La' cube. <sup>13</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

**Dizra' gusel-le' cheę bi cheę' zaj zřeę xęzre Laodicea**

<sup>14</sup> Guzre Jesús neda':

—Bzuaj cheę gubáz chia' zúalęę' bi chia' zaj zřeę xęzre Laodicea. Bzuaj da nigá: Caní dxenná Jesús, Bénnea' naque' li lazre', Bénnea' dxexechębe' da li, Bénnea' naque' naga guzú lau xúgute' da ben Dios. <sup>15</sup> Neda' nezda' xúgute' da dxunle. Nezda' quebe nácale zaga ca dxunle da naca chia', ne quebe nácale látęla. Dxacá lazra' la gácale zaga u la. <sup>16</sup> Nácale ca nisa bate, ne quebe nácale zaga, ne quebe nácale la, na' chu'una' le'e ca tu benne' dxexębe' nisa bate. <sup>17</sup> Le'e dxennale nácale gunn'á, ne dxaca chawe' cheęle ne quebe bi dxexázrjele, na' quebe dxęquebe'ele' dxaca ba xa' cheęle ne dzezaca zi'le, ne nácale xache', ne nácale la chul-la, ne nácale gala xide. <sup>18</sup> Cheę le' na' dxuzéa-jni'ida' le'e sí'le lu na' neda' da naca ca oro da nabá'a na lu xi', cheę gápale xel-la' gunn'á li lazre', ne sí'le zra lánale chiche cheę gácale, da gunna' le'e, na' xenite xel-la' stu' cheę da gúcale gala xide, ne sí'le da cu'ule xiaj laule cheę xelé'ele. <sup>19</sup> Neda' dxusízreda', ne dxudéa' xel-la' zi' xúgute' benne' ca' nazrí'ida'. Cheę le' na' dxal-la' xexíaje lázrele ne gunle zrin chia' du lázrele. <sup>20</sup> Le na' xque. Neda' zea' dxa xu'u dxennia'. Che nu benne' xenne' chí'a, ne salje' xu'u, na' chu'a gágulęna' le', na' le' gágulęne' neda'. <sup>21</sup> Benne' ca' xeledxúaje' chawe' lawe' da zrinnaj, neda' gunézruja' le' lataj xele-bé'leńę' neda' naga dxenná be'a, ca neda' bedxúaja' chawe', ne dxé'leńa' Xra' naga dxenná bea Le'. <sup>22</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

**Dxulucá'ana szrene' Dios lu xabáa**

**4** Ca gudé na' gunná'a, na' ble'eda' tu dxa xu'u da naxalaj na xabáa, na' benda' chí'i Bénnea' benda' cheę' nédxute' da naca na ca chí'i luzu da dxulucuezre', na' guzre' neda':

—Guluén nigá, na' gulé'eda' lue' da ca' dxal-la' gaca ca te cheę da nigá.

<sup>2</sup> Ca gunné' ca' guzúalę Be' Lá'azxa neda', na' ble'eda' tu lataj blau xabáa, ne ble'eda' tu Benne' zaca dxeę lataj blau na'. <sup>3</sup> Bénnea' dxeę lu lataj blau na' nalé' ca tu xiaj jaspe da dxácatite na, u ca tu xiaj cornalina, na' dxu'a lataj blau na' naxechaj ca tu bchita' da dxácatite na ca tu xiaj esmeralda. <sup>4</sup> Dxu'a lataj blau na' zaj zua tape dxua lataj naga zaj dxe' tape dxua benne' gula ca', zaj nacue' zra lanę' chiche, ne zaj zria xíchaje' da zaj naca na oro. <sup>5</sup> Lu lataj blau na' dxeledxúaj xesa, ne dxaca nine, ne dxelennę guziu', na' lau lataj blau na' zaj zua gazre xi' dxelala na, da zaj naca na gazre Be' cheę Dios. <sup>6</sup> Le na' lau lataj blau na' de' ca tu nísadau' da naca na ca xiaj esa' xaní'leęe'.

Laduj na' dxu'a lataj blau na' zaj zra' xetapa da zaj naca ban, zaj zua xiaj lau cuzre', ne laule'. <sup>7</sup> Benne' nedxu nalé'ę ca tu bežre xixre', na' benne' gudxupe' nalé'ę ca tu bežre, na' benne' guxunne' naca lawe' ca lau bénneache, na' benne' gudape' nalé'ę ca tu bsia



nachiluj xílabá'. <sup>8</sup> Dápatę benne' caní zaj zua xrupa xrilę' tu tuę, na' dxupa la'a leę xрила benne' caní zaj zria zane' xiaj lawę'. Te zra ne chizrela quebe dxulusanę' dxelennę':

Lá'azxa, lá'azxa, lá'azxa naca  
Xránadxu Dios nape' dutę xel-la' dxenná bea,  
Bénnea' guzáaquezę', ne zúaquezę', ne tu súazquezę'.

<sup>9</sup> Tu tu lasa gate dápatę benne' ban caní dxelegúę' ba Dios, ne dxulucá'ana szrenę' Lę', ne dxelęę' Lę':

Xcalenu', Bénnea' zúaquezę' chadíá chacanna, <sup>10</sup> na' dape dxuatę benne' gula ca' dxuluzú zribe' lau Lę', ne dxulucá'ana szrenę' Bénnea' zúaquezę' chadíá chacanna, ne dxuluzúę' da ca' zaj zría xíchaję' ca' lau lataj blau na', dxelennę':

<sup>11</sup> Xránantu' Dios, Lue' naca chiu' si' lu na'u xel-la' szren,  
ne xel-la' ba lá'ana, ne xel-la' dxenná bea,  
lawe' da bęnu' Lue' xúgutę da dę,  
na' ca dxaca lazru' Lue' zaj zua na, ne gulá gulebinna na.

#### Tu xiche nadube, ne Bénnea' naque' Zríla'dau'

**5** Lu na' xabęla cheę Dios, Bénnea' dxeę lataj blau na', ble'eda' tu xiche nadube, da naxúaj dxupa la'atę na, na' nazriche na gazre da dxelunna bea na. <sup>2</sup> Ble'eda' tu gubáz cheę xabáa nápalęę' xel-la' waca, na' gunné' zizraj:

—¿Nuzra naca cheę' chíluje' xiche na', ne chezę' da ca' dxelunna bea na?

<sup>3</sup> Queba nu chilá' xabáa, ne lu xęzr la xu, ne zranla xęzr la xu naca cheę' chíluje' xiche na', ne quebe nu gaca nneę' na cheę' lé'eneę' ca naca na. <sup>4</sup> Neda' gudxézreli'a lawe' da quebe nu chilá' benne' naca cheę' chíluje' xiche na', ne gulabę' na, ne quebe gaca nneę' na. <sup>5</sup> Nadxa tu benne' ládujla benne' gula ca' guzrę' neda':

—Québedxa cuzru' lawe' da ba bzrué'e Jesús, Bénnea' nazi'i le' Bęzre Xixre' cheę xrtia Judá lawe' da nape' xel-la' dxenná bea zrente, ne naque' zri'ine zre sua David, na' Lę' naca cheę' chíluje' xiche na', ne chezę' da gazre ca' dxelunna bea na.

<sup>6</sup> Nadxa ládujla naga zua lataj blau na', ládujla tapa benne' ban ca', ne ládujla tape dxua benne' gula ca', ble'eda' Jesús, Bénnea' naque' Zríla'dau' cheę Dios. Zeę na', lácala zrię' we' lawe' da belutię' Lę'. Zria gazre lúzuba' ne gazre xiaj lauba', na' xiaj lauba' ca' zaj naca na gazre Be' cheę Dios da ca' nase-la Dios du ca naca xęzr la xu. <sup>7</sup> Bénnea' naque' Zríla'dau' guxíaję' guquęę' xiche na' lu na' xabęla Bénnea' dxeę lataj blau na'. <sup>8</sup> Ca guquęę' xiche na', na' tapa benne' ban ca', ne tape dxua benne' gula ca' buluzú zribe' lau Bénnea' naque' Zríla'dau'. Tu tu benne' gula ca' zaj nuxrę' tu da dxelúl-lalęę' da can zríadi'i na du, nazí le na árpa, ne zaj nuę' xé'ena bzri da naca na oro zaj xu'u na xala zixre, da zéaję na xel-la' dxuláwizra Dios da dxelún bi ca' cheę Dios. <sup>9</sup> Dxelul-lę' tu da cube caní:

Lue' naca chiu' ca'u xiche na',

ne chezu' da ca' dxelunna bea na,  
lawe' da belutię' Lue', na' nen dxen chiu'  
bexa'u bėnneache cheę xelaque' cheę Dios,  
Zaj naque' benne' xúgutę cue' bėnneache,  
ne dxelennę' xúgutę dizra' walazre',  
ne zaj naque' benne' xúgutę xęzre  
ne xúgutę cue' xęzr la xu.

<sup>10</sup> Bęnu' le' benne' wenná bea ca',  
ne bxruze ca' lau Dios cheędxu,  
na' xelenná beę lu xęzr la xu.

<sup>11</sup> Nadxa gunná'a, na' benda' chi'i zane' gubáz ca' cheę xabáa zaj naxéchaję' lataj blau na', ne tapa benne' ban ca', ne tape dxua benne' gula ca'. Zaj zra' benne' zantau' gubáz ca', <sup>12</sup> na' dxelennę' zizraj:  
Bénnea' naque' Zríla'dau' belutię',  
naca cheę' się xel-la' dxenná bea, ne xel-la' gunní'a,  
ne xel-la' sina, ne xel-la' waca,  
ne xel-la' ba lá'ana, ne xel-la' szren,  
ne xel-la' dxue lá'ana.

<sup>13</sup> Cá'aqueze benda' dxelenná xúgutę da ca' bęn Dios, da ca' zaj zra' xabáa, ne da ca' zaj zra' xęzr la xu, ne da ca' zaj zra' lu nísadau', ne xúgutę da ca' zaj nita xúgutę lataj ca', dxelenná na:

Xel-la' dxue lá'ana, ne xel-la' ba lá'ana,  
ne xel-la' szren, ne xel-la' dxenná bea  
zaj naca na cheę Bénnea' dxeę lataj blau na',  
ne cheę bėnnea' naque' Zríla'dau',  
gaxúane gaxúane iza.

<sup>14</sup> Dápatę benne' ban ca' gulennę':

—¡Ca'an gaca na!

Na' dape dxuatę benne' gula ca' buluzú zribe', ne bulucá'ana szrenę' Bénnea' naca bane' gaxúane gaxúane iza.

#### Dxechezę' xrupa da gazre ca' da dxelunna bea na

**6** Nadxa ble'eda' gate Bénnea' naque' Zríla'dau' guchezę' da nedxu da gazre ca' dxelunna bea na. Na' benda' dxenná tu benne' tapa ca' zaj naca bane', na' chię ben na ca guziu', dxennę':

—Gudá, le'enu'.

<sup>2</sup> Gunná'a, na' ble'eda' tu bzrina' chiche, na' benne' zrię'-ba' nuxrę' tu da dxedxú'una na xágadau' nalá xéche'ze. Bulunézruje' le' tu da naquen oro da guzúe' xíchaję', na' nen dutę xel-la' dxenná bea bdxuaję' cheę zrué'ene' lu wedil-la.

<sup>3</sup> Gate Bénnea' naque' Zríla'dau' guchezę' da gudxupe' da dxunna bea na, na' benda' benne' gudxupe' cheę benne' tapa ca' zaj naca bane', dxennę':

—Gudá, le'enu'.

<sup>4</sup> Na' bdxuaj xetú bzrina', nácaba' bę xrna, na' bėnnea' zrię'-ba' guzię' xel-la' dxenná bea cheę cue' xel-la' dxebeza zri lazre' lu xęzr la xu, ne cheę gunę' xelute bėnneache ljwezre' ca', na' bulunézruje' le' tu xia tunna da nalá.

<sup>5</sup> Gate Bénnea' naque' Zríla'dau' guchezę' da gudxunne' da dxunna bea na, na' benda' benne' gudxunne' cheę benne' tapa ca' zaj naca bane', gunné':

—Gudá, le'enu'.

Gunná'a, ne ble'eda' tu bzrina' gasaj, na' benne' zrie'-ba' nuxre' zrgú'unsá. <sup>6</sup> Benda' tu chi'i dxenné na ládujla tapa benne' ban ca', gunná na:

—Chupa xia zrúa' xtila saca na lazruj chee tu zra, ne xrupa xia zrúa' cebada saca na lazruj chee tu zra, san quebe cu' za xel-la' wagu, ne quebe cu' xrise uva wal-la.

<sup>7</sup> Gate Bénnea' naque' Zríla'dau' gucheze' da gudape' da dxunna bea na, na' benda' benne' gudape' chee benne' ban ca', gunné':

—Gudá, le'enu'.

<sup>8</sup> Gunná'a, ne ble'eda' tu bzrina' gache, na' benne' zrie'-ba' le' Xel-la' Gute, na' cuzru bénnea' za tu benne' ze'e waláz chee lataj chul-la ga nnita benne' gate ca'. Bénnea' le' Xel-la' Gute guzi'e xel-la' dxenná bea chee gutie' tu cue' chee tapa cue' ca naca bénneache zaj zre'e xezr la xu. Gutie' benne' ca' lu wedil-la, ne lu xel-la' dxedún, ne lu xízrawe' ca', ne lu na' be' snia zaj zra-ba' lu xezr la xu.

<sup>9</sup> Gate Bénnea' naque' Zríla'dau' gucheze' da gáxxue da dxunna bea na, na' ble'eda' zran cugu bénne'du ca' gulú'u benne' ca' belute bénneache le' lawe' da bu-luchálaje' dizra' chee Dios, ne belexechebe' ca naca chee'. <sup>10</sup> Bénne'du ca' gulú'u benne' ca' gulenné' zizraj:

—Xran lá'azxa, ne li lazre', ¿xeajáte chenu' chee guchi'u cheentu', ne xebéaj lazru' benne' ca' belutie' netu', benne' ca' zaj zre'e lu xezr la xu?

<sup>11</sup> Nadxa bénne'du ca' gulú'u benne' ca' gulez'ie zra lané' chiche, na' guzre' le' xelebeze' xetú chí'idau', cadxa cha benne' biche' ca' dxelune' zrin chee Cristo, xelute bénneache le' ca belutie' benne' ca'.

<sup>12</sup> Gate Bénnea' naque' Zríla'dau' gucheze' da xrupe da dxunna bea na, na' guná'a, na' guzrú'le'e lu xezr la xu. Gubizra bexaca na da chul-la ca ladxe' gasaj, na' beu' bexaca na xrna ca dxen, <sup>13</sup> na' belaj zaj zria xabáa belexruj na lu xezr la xu, ca dxelexruj higo dxe'ene ca' gate dxácale'e be' dxunibe na xaga higo na'. <sup>14</sup> Xabáa benite na ca tu xiche da dxexedube, na' xúgute xi'a ca', ne xezr la xu ca' da zaj naxechaj nísadau' gulecuasa na naga zaj zua na. <sup>15</sup> Benne' wenná bea ca' zaj zre'e lu xezr la xu bulucache cuine' lu bluaj ca' ne ládujla xiaj ca' zaj nita lu xi'a ca', na' tuze gulaca benne' blau ca' ne benne' gunní'a ca', ne benne' xíchaje ca' chee benne' dxjaca wedil-la, ne benne' ca' dxelenná bea, ne benne' zaj nada'u, ne benne' zaj nadxúaje' lu na' xrané' ca', <sup>16</sup> na' benne' caní gulé'e xi'a ca', ne xiaj xre ca':

—Le quia cha netu', ne le gucache netu' lau Dios, Bénnea' dxe'e lataj blau, ne lu xel-la' zi' zren da gunna Bénnea' naque' Zríla'dau'.

<sup>17</sup> Ba bzrin zra chee xel-la' zi' zren. ¿Núzraqueze sue le na?

### Benne' Israel ca' gucá'a Dios

**7** Ca gudé chee da nigá, ble'eda' tapa gubáz chee xabáa zaj ze' dapa saca chee xezr la xu, na' zaj nuzague' be' da zá'aca na dapa saca, chee quebe bi be' gaca lu xezr la xu, ne lawe' nísadau', ne lawe' xaga ca'. <sup>2</sup> Cá'anqueze ble'eda' xetú gubáz chee xabáa ze'e naga

dxalaj gubizra, na' nuxre' da gunna bea na nu benne' naque' chee Dios ban. Gubáz nigá gunné' zizraj, dxe'e dápaté gubáz chee xabáa ca' bache zaj nazi'e xel-la' dxenná bea xuluzría xi'e xezr la xu, ne nísadau', gunné':

<sup>3</sup> —Quebe guzría xile xezr la xu, ne nísadau', ne xaga ca', dxácaté quebe ne guchícentu' luzrgá benne' ca' tu da gunna bea na zaj naque' chee Dios cheedxu.

<sup>4</sup> Benda' cátite zaj naca benne' ca' gulezriche luzrgue' da na' dxunna bea na. Zaj naque' tu gaxúe tape xun cue' da zaj naca na chi gaxúa weaj lálwela xúgute cue' benne' Israel. <sup>5</sup> Gulezriche luzrgue' da na':

Chazrinnu cue' benne' xrtia Judá, ne chazrinnu cue' benne' xrtia Rubén, ne chazrinnu cue' benne' xrtia Gad, ne <sup>6</sup> chazrinnu cue' benne' xrtia Aser, ne chazrinnu cue' benne' xrtia Neftalí, ne chazrinnu cue' benne' xrtia Manasés, ne <sup>7</sup> chazrinnu cue' benne' xrtia Simeón, ne chazrinnu cue' benne' xrtia Leví, ne chazrinnu cue' benne' xrtia Isacar, ne <sup>8</sup> chazrinnu cue' benne' xrtia Zabulón, ne chazrinnu cue' benne' xrtia José, ne chazrinnu cue' benne' xrtia Benjamín.

### Benne' zan zaj nacu zra lané' chiche

<sup>9</sup> Gudé na' gunná'a ne ble'eda' benne' zan chee xúgute cue' bénneache:

Benne' xúgute cue' xezr la xu, ne benne' dxelenné' xúgute dizra' walazre' cha chee', ne benne' xúgute xezre ca'.

Zaj ze' le na' naga zua lataj blau na', ne naga ze' Bénnea' naque' Zríla'dau'. Benne' caní zaj nacu'e zra lané' chiche, ne zaj nuxre' zina'. <sup>10</sup> Xúgute' dxelenné' zizraj: Xel-la' weselá za na lu na' Dios cheedxu, Bénnea' dxe'e lataj blau, ne lu na' Bénnea' naque' Zríla'dau'.

<sup>11</sup> Xúgute gubáz chee xabáa ca' zaj ze' zaj naxéchaje' lataj blau na', ne naga zaj zra' benne' gula ca', ne tapa benne' ban ca', na' buluzú zribe' belíxrujte lawe' zran ni'e, na' bulucá'ana szrene' Dios. <sup>12</sup> Dxelenné':

¡Ca'an gaca na!  
 ¡Xel-la' dxue lá'ana, ne da xabáa,  
 ne xel-la' sina, ne xel-la' dxezaca ba lazre',  
 ne xel-la' ba lá'ana, ne xel-la' dxenná bea,  
 ne xel-la' szren,  
 zaj naca na chee Dios cheedxu chadía chacanna!  
 ¡Ca'an gaca na!

<sup>13</sup> Nadxa tu benne' gula ca' bchebe' neda':

—¿Nuzra benne' caní zaj nacu'e zra lané' chiche, ne gazra zesí'aque'?

<sup>14</sup> Neda' gucha' le':

—Xran, lue' nézqueznu'.

Le' guzre' neda':

—Benne' caní ba guledé'e lu xel-la' zi' zren na', na' benne' caní ba zaj nacu'e zra lané' chiche lawe' da Bénnea' naque' Zríla'dau' ba gudibe' xichaj lázrdawe' nen dxen chee'. <sup>15</sup> Chee le' na' zaj zre'e dxu'a lataj blau naga

dxé' Dios, ne dxelúe lá'ané' Lē' te zra ne chizrela lu xudau' cheé', na' Bénnea' dxé'ē lataj blau na' guxúe-queze' benne' ca', ne súalētecaze' lē'. <sup>16</sup> Québedxa xeledunē' ne québedxa xelebilene', ne québedxa guzeze gubizra benne' ca', ne québedxa xeléquene' da la, <sup>17</sup> lawe' da zua Bénnea' naque' Zríla'dau' cuita lataj blau na', na' guxúe' benne' ca' ca dxun benne' dxuxúe' zríla' ca', ne che'ē benne' ca' naga dxelalaj nisa da dxunna na xel-la' nabán, na' Diósqueze tu súalēzqueze' benne' ca' cheé' québedxa xelebezre'.

#### Dxecheze' da gazre da ca' dxelunna bea na

**8** Gate Bénnea' naque' Zríla'dau' gucheze' da gazre da ca' dxelunna bea na, da ca' zaj nuchiche na xiche na', na' gudxé' zri xabáa tu chi'i zrénqueze. <sup>2</sup> Nadxa ble'eda' gazre gubáz cheé' xabáa ca' zaj zē' lau Dios, na' bulunézruje' gubáz cheé' xabáa ca' gazre luzu da xulucueze'. <sup>3</sup> Gudé na' bla' xetú gubáz cheé' xabáa nuxre' tu xé'ena bzri da naca na oro ne guzé' dxu'a cugu, na' bulunézrujle'ē lē' xala zixre cheé' guzúe' na lau Dios tu zren nen xel-la' dxuláwizra Dios ca' da belún benne' ca' zaj naque' cheé' Dios. Bzue' na lu cugu naca na oro, da zua na lau lataj blau na'. <sup>4</sup> Zren cheé' xala na' guluén na lau Dios tu zren nen xel-la' dxuláwizra Dios ca' belún benne' ca' zaj naque' cheé' Dios. <sup>5</sup> Nadxa tu gubáz cheé' xabáa guqu'ē xé'ena bzri na', na' bzre'ē na xi' da guqu'ē lu cugu na', na' gudxú'une' xi' na' lu xēzr la xu, na' gulenné' guziu', ne gulénnele'ē, ne gulépele'ē xesa, ne guzrú' xēzr la xu.

#### Dxuluchine gubáz ca' da dxulucueze'

<sup>6</sup> Nadxa gázrete' gubáz cheé' xabáa ca' zaj nuxre' gazre luzu da dxulucueze' gulezé' chawē' xuluchínene' na.

<sup>7</sup> Gubáz nedxu na' bchínene' da dxucueze', na' gulinaj xiaj bezxe', ne xi' da zaj nachixre na dxen da belexruj na lu xēzr la xu. Xáteze quebe bedú gachaj xēzr la xu guzeze na late weaj du ca naca lu xēzr la xu. Xáteze quebe gudache gáchajtē xaga ca' zaj zē' lu xēzr la xu gulezxe na, ne cá'anqueze guca cheé' xixre' xa'a ca'.

<sup>8</sup> Gubáz cheé' xabáa gudxupe' bchínene' da dxucueze', na' bexruj da naca na ca tu xi'a zren da dxala na xi' lu nísadau', na' xáteze quebe guca gáchajtē nísadau' na' bexaca na dxen. <sup>9</sup> Xáteze quebe guca gáchajtē bea zaj zra'ba' lu nísadau' guláteba', na' xáteze quebe guca gáchajtē da ca' dxeledán lawe' nísadau' gulebía xi na.

<sup>10</sup> Gubáz cheé' xabáa guxunne' bchínene' da dxucueze', na' bexruj tu belaj zrente' zran xabáa, da dxala na ca tu xi' xedxe. Naga bexruj na, xáteze quebe gudache gáchajtē xēgu ca', ne beaj ca' gulebía xi na. <sup>11</sup> Belaj na' lē' na Ajenjo, da zéajē na da naca na sla', na' xáteze quebe guca gáchajtē nisa da dē' lu xēzr la xu bexaca na ajenjo, na' benne' zantē gulatīe' nē cheé' nisa na' lawe' da bexaca na sla'.

<sup>12</sup> Gubáz cheé' xabáa gudape' bchínene' da dxucueze', na' xáteze quebe bedú gachaj xel-la' naxaní' cheé' gubizra, ne xel-la' naxaní' cheé' beu', ne xel-la' naxaní' cheé' belaj ca' belexaca na chul-la, na' quebe bulusení na du lazre' xáteze quebe guca gachaj zra, ne cá'anqueze che zrela.

<sup>13</sup> Nadxa gunná'a, ne benda' chi'i tu gubáz cheé' xabáa dxedé' lu be', dxenné' zizraj:

—Edxugua bēneache zaj zra' xēzr la xu gate xelebezre luzu da xuluchine xechunna gubáz cheé' xabáa ca'.

**9** Gubáz cheé' xabáa gázxue bchínene' da dxucueze', na' ble'eda' tu benne' naque' ca tu belaj bexruj na lu xēzr la xu, na' bulunézruje' lē' zren xia cheé' lataj chul-la cheé' benne' gate ca'. <sup>2</sup> Gusálaje' lataj chul-la na', na' lu'ule na' bdxuaj zren ca naca da dxedxuaj na naga dxeluzre' bla'dau', na' zren na' bchul-la na lau gubizra, ne lu be'. <sup>3</sup> Lu zren na' beledxúaj biche zu. Guledaba' du ca naca xēzr la xu, na' biche zu ca' guleziba' lataj xeláduba' bēneache ca da dxelún bēxrujni.

<sup>4</sup> Dios guzre' biche zu ca' quebe xuluzría xiba' xixre' xa'a ca', ne netú xaga, san xeláduzeba' bēneache quebe nazriche luzrgue' da dxunna bea na benne' ca' zaj naque' cheé' Dios. <sup>5</sup> Quebe zaj naziba' lataj xelúteba' bēneache, san xuludézeba' bēneache ba xa' lawe' gazxu' beu', na' xel-la' dxelá cheé' naga dxeláduba' naca na ca naca da dxun bēxrujni, bē dxelúteba' bēneache. <sup>6</sup> Lu zra ca' xelaca lazre' bēneache xelxute cuine', ne quebe xelezéquene'. Xelaca lazre' xelatīe' ne quebe xelatīe'.

<sup>7</sup> Biche zu ca' zaj nácaba' ca bzrina' ca' ba zaj nabéza-ba' chjácaba' lu wedil-la. Xíchajba' zaj zria na ca tu da naca na oro, na' dxu'a lau biche zu ca' naca na ca lau bēneache. <sup>8</sup> Xicha xíchajba' zaj naca na ca xicha xichaj nu'ula ca', na' lázxabá' zaj naca na ca lazxa bēzre xixre'. <sup>9</sup> Lachu'uba' xu'u na ca zra'ba' xia, na' xrílabá' dxeleninne na ca dxeleninne da dxelecá'a bzrina' ca' zjaca chéguba' lu wedil-la. <sup>10</sup> Zaj zua xrbánba' ca xrbán bēxrujni, zaj zua na liba'. Zaj nazi'ba' lataj xeláduba' bēneache lawe' gazxu' beu'. <sup>11</sup> Zua tu xrane biche zu ca' naca gubáz cheé' lataj chul-la, ne lē' na Abadón nen dizra' hebreo, ne nen dizra' griego lē' na Apolión, da zéajē na da dxuzría xi na.

<sup>12</sup> Caní guca da nedxu da ba xa' da xeledé bēneache, na' da' zí'aca xechupan ca'.

<sup>13</sup> Nadxa gubáz cheé' xabáa xrupe bchínene' da dxucueze', na' benda' tu chi'i da gunná ládujla tapa luzu cugu lá'azxa na' naca na oro da zua na lau Dios. <sup>14</sup> Chi'i na' guzre na gubáz cheé' xabáa xrupe na' nuxre' luzu da dxucueze':

—Bsan dápatē gubáz ca' zaj nadxéajē' dxu'a xēgu zren lē' na Eufrates.

<sup>15</sup> Ca' guca na, na' gulelá gubáz ca' cheé' xelutīe' xáteze ca gaca gáchajtē bēneache lawe' da ba zaj nabeza gubáz ca' cheé' zra na', ne beu' na', ne iza na'.

<sup>16</sup> Benda' cá'tite zaj naca benne' dxjaca wedil-la ca' zaj zriē' bzrina' zrlēne' gubáz ca'. Zaj naque' chupa cue' gaxua da zaj naca gaxúane gaxúane.

<sup>17</sup> Lu da ble'e Dios neda' ble'eda' ca zaj naca bzrina' ca', ne ca zaj naca benne' dxjaca wedil-la ca' zaj zri'e-ba'. Zaj xu'u lachu'e zre' xrna da naca na xia, ne da nalá' ca zran xabáa, ne da gache. Xichaj bzrina' ca' zaj naca na ca xichaj bežre xixre', na' dxú'aba' ca' beledxúaj xi', ne zren, ne tu da gache da dxuzézele'e na. <sup>18</sup> Xáteze quebe gudache gáchajte bénneache gulate' lu da ca' beledxúaj na dxu'a bzrina' ca', xi', ne zren, ne da gache na'. <sup>19</sup> Xel-la' snia chee bzrina' ca' zua na dxú'aba', ne xrbamba' lawe' da zaj naca xrbamba' ca' beła' ca' zaj zua xíchajba', na' nen da ca' dxuluzría xiba' bénneache.

<sup>20</sup> Benne' ca' xezica, benne' quebe belúteba', belúnqueze' da zrinnaj ca da dxelúnqueze', ne bulucá'ana szrénqueze' be' xriwe' ca', ne bedau' oro ca', ne bedau' plata ca', ne bedau' xia gache ca', ne bedau' xiaj ca', ne bedau' xaga ca', da ca' quebe dxaca xeledé'e na, ne quebe dxaca xelén na, ne quebe dxaca si'aca na.

<sup>21</sup> Cá'anqueze belútequeze' benne' ca', ne belúnqueze' xel-la' wazrá', ne belúnqueze' da sban, ne gulebá'queze'.

Tu gubáz chee xabáa nuxre' tu xíchedau' nazriluj na

**10** Nadxa ble'eda' xetú gubáz chee xabáa nápal'e xel-la' dxenná bea. Bétaj'e xabáa, xu'e tu lu beuj, ne zua tu bchita' xíchaj'e. Dxu'a lawe' dxácatite na ca gubizra, na' ni'e zaj naca na ca xi'. <sup>2</sup> Nuxre' tu xíchedau' da nazriluj na, na' bzue' ni'e zua xabéla lawe' nísadau', ne ni'e zua xéglala lawe' xezr la xu bizre. <sup>3</sup> Nadxa gudxezre xe'e ca dxun bežre xixre' dxebezre xa'aba', na' ca gudxezre xe'e gulenné gazre guziu'. <sup>4</sup> Ca gudé gulenné gazre guziu' ca', ba zúate guzúaja', na' benda' tu chi'e za xabáa, guzre neda':

—Bcache naze da gulenná gazre guziu' ca'. Quebe guzúaju' na.

<sup>5</sup> Nadxa gubáz chee xabáa na' ble'eda' ze' lawe' nísadau', ne lawe' xezr la xu bizre guchisa ne'e da zua xabéla zran xabáa, <sup>6</sup> na' bzétaj'e La Bénnea' zu'e' chadía chacanna, ne beñe' xabáa, ne xezr la xu, ne nísadau', ne xúgut'e da zaj de' lawe' da ca' beñe', na' gunné':

—Québedxa che na, <sup>7</sup> lawe' da gate su lau gubáz chee xabáa gazre guchínene' luzu da xulucuezre', ba guca li ca naca da nun Dios dxal-la' gaca ca bzenne' benne' wen zrin chee' ca', benne' gulenné' waláz chee':

<sup>8</sup> Ca naca chi'e da benda', da za xabáa, bchálajlene' neda' xetú, gunné':

—Guxíaj xeajcá'a xíchedu na' nuxru gubáz chee xabáa na' ze' lawe' nísadau', ne lawe' xezr la xu bizre.

<sup>9</sup> Nadxa guxá'a lau gubáz chee xabáa na', na' guna-ba' gunne' neda' xíchedu na', na' guzre' neda':

—Gucá'a na. Gudagu na. Lu dxu'u gaca na xixre ca bzrina'dau', na' lu le'u xexaca na da sla'.

<sup>10</sup> Nadxa gucá'a xíchedu na' lu na' gubáz chee xabáa na', na' gudawa' na, na' lu dxu'a guca na xixre ca bzrina'dau'. Ca gudé gudawa' na, bexaca na sla' lu le'a.

<sup>11</sup> Nadxa gulé'e neda':

—Dxun na ba xen guchálaju' waláz chee Dios lau benne' zaj zre'e zane cue' xezr la xu, ne lau benne' zaj zre'e xezre zan ca', ne lau benne' dxelenné' dizra' walazre' cha chee' ca', ne lau benne' wenná bea ca'.

Chupa benne' dxelexechebe'

**11** Nadxa belunne' neda' tu xia xtíladau' da naca na ca tu xaga da dxudxíredxu, na' gulé'e neda':

—Guxasa, bdxixre' xudau' chee Dios ne lu cugu, na' blaba bal-la benne' zaj zre'e na' dxulucá'ana szrene' Dios. <sup>2</sup> Quebe gudxixru' chale'aj chee xudau' na' lawe' da ba gudé na lu na' benne' zitu' ca', na' benne' ca' xululáje' xezre lá'azxa lawe' chupe xun beu'. <sup>3</sup> Neda' sel-la' chupa benne' zaj nacue' ladxe' tuzruj, na' xelenné' waláz chia' lawe' chazrinnu gaxúa ga xun zra.

<sup>4</sup> Benne' chupa caní zaj naque' ca chupa xaga olivo ca', ne ca zaj naca chupa da zaj zuan xi', da ca' zaj zua na lau Dios, Xrane xezr la xu. <sup>5</sup> Che nu benne' dxaca lazre' guzría xi'e benne' caní, na' le' xululube' xi' da dxuaj lu dxu'e ca', na' guzézxete na benne' ca' dxeledábague' le'. Caní gate núteteze benne' tábague' benne' chupa caní. <sup>6</sup> Benne' chupa caní zaj nape' xel-la' dxenná bea xelun'e ga quebe gaca xiuj dxácate na' dxelenné' waláz chee Dios. Cá'anqueze zaj nape' xel-la' dxenná bea xelun'e xaca nisa dxen, ne chee xulusaca zi'e bénneache nen xúgut'e xízrawe' ca', bátatezla dxelaca lazre'. <sup>7</sup> Gate bache belexuzre belun'e zrin chee', na' be xixre' snia, be dxedxúajba' lataj chul-la, tíl-laléba' benne' chupa ca', na' quél-laba' le', ne gúteba' le'. <sup>8</sup> Beła' dxen gate chee benne' caní xellexgá'ana na la neza chee xezre zrentau' naga gudá' Xránadxu xaga begúaj, ne ca dxutil-la Dios lebe, le na Sodoma, ne Egipto. <sup>9</sup> Lawe' chunna zra xugachaj, bénneache chee xúgut'e cue' benne', ne benne' xezre ca', ne benne' zra du gabí'i xezr la xu, ne benne' dxelenné' dizra' walazre' cha chee' xeledé'ene' beła' dxen gate chee benne' caní, ne quebe xelu'e lataj nu benne' gucache' le'. <sup>10</sup> Benne' zaj zre'e lu xezr la xu xeleben'e' lawe' da zaj nate benne' caní, na' xellexezaca ba lázrele'e, ne xelesel-le' da xulunezruj ljwezre' tu'e' xetu'e' lawe' da bulusaca zi' benne' caní gulenné' waláz chee Dios bénneache ca'. <sup>11</sup> Gate guca chunna zra xugachaj, na' Dios bseban'e' benne' caní, na' belexase', na' xúgut'e benne' ca' belelé'ene' le' belezrébele'e. <sup>12</sup> Nadxa dxúpat'e benne' ca' dxelexechebe belenne' chi'i tu benne' dxenné' zizraj xabáa, dx'e'e benne' ca':

—Le xegüén nigá.

Na' belexegüene', na' belelé'e benne' ca' dxeledábague' le' ca guca. <sup>13</sup> Ca'an gúcate guzrú'le'e xezr la xu, na' xu'u zaj nita na lu xezre na' gulebía xi na, na' gulate gazre cue' da nacan chi gaxúa bénneache weaj ne chee da guzrú'. Benne' ca', benne' quebe gulate lu xezre na, nen dute xel-la' dxelezrebe belúe lá'ane' Dios zu'e' xabáa.

<sup>14</sup> Ba gudé da gudxupe' da ba xa' da xeledé bénneache, na' la za'te da guxunne'.

### Gubáz gazre dxuchínene' da dxucuezre'

<sup>15</sup> Gubáz gazre bchínene' da dxucuezre', na' ben chi'i benne' zan xabáa dxelenné' zizraj:

Naga dxelenná bea bèneache lu xęzr la xu ba guledé na

lu na' Xránadxu Dios, ne lu na' Cristo cheę', na' Le' nna be'ene' lataj ca' chadía chacanna.

<sup>16</sup> Nadxa tape dxua benne' gula ca' zaj dxe'e dxu'a lataj blau naga dxe' Dios buluzú zribę' zaj nuzuate lawe' zran ni'e, dxulucá'ana szrene' Dios, <sup>17</sup> dxelenné':

Xcalenu', Xran.

Dios, napu' dutę xel-la' dxenná bea.

Guzúaquezu', ne zúaquezu', ne tu súazquezu', lawe' da ba guzi'u xel-la' dxenná bea zrentę chiu', ne ba guzú lau' dxenná be'u.

<sup>18</sup> Bèneache xúgute xęzre ca' dxeleze'e

san ba bzin zra gudéu' benne' ca' ba xa',

zra na' guchi'u cheę benne' gate ca'.

Xunézruju' da naca cheę benne' ca' gulenné' waláz chiu',

ne da naca cheę benne' ca' zaj naque' chiu',

ne da naca cheę benne' ca' belunę Lue' ba lá'ana,

benne' blau ca', ne benne' quebe nu zaj naca.

Ba bzin zra guzrí xi'u benne' ca' buluzrí xi'e xęzr la xu.

<sup>19</sup> Nadxa bxlaj xudau' cheę Dios da zua xabáa, na' ble'e lau xi'ina naga xu'u xel-la' wezrí xrlátaje cheę', da zua na lu xudau' na'. Gulępe xesa, ne guleninne na, ne gulenné guziu', ne guzrú' xęzr la xu, na' bxínnajle'e xiaj bezxe'.

### Tu nu'ula ne bę snia schanni' zrentę

**12** Nadxa ble'e lau tu da zrentę xabáa. Zua tu nu'ula naca zra lanę' ca gubizra, na' zran ni'e zua da naca ca beu', na' xíchaję' zria tu da zaca zaj zria na chazrinu belaj. <sup>2</sup> Nu'ula nigá zuę' zi'i, ne dxebezre xę'e xel-la' dxudi'a sanę' tu bidau', dxedéle'e xel-la' zi' cheę galaj bidu na'. <sup>3</sup> Nadxa ble'e lau xabáa xetú da zrentę, zua tu bę snia schanni', bę xrna, zua gazre xíchajba' ne chi lúzuba', na' zria tu da zaca tu tu xíchajba' ca'. <sup>4</sup> Nen xrbamba' gucá'a dxéguba' xáteze quebe guca gáchajte belaj zaj zria zran xabáa, na' bzálaba' na lu xęzr la xu. Bę snia schanni' na' guzęba' lau nu'ula na' sanę' bidau' cheę gáguba' bidu na' gate ze gálajbe'. <sup>5</sup> Nu'ula na' guzanę' tu bi biudau', bi na' nna be'ebe' dutę xęzr la xu nen tu var xia. Nadxa bi biu cheę nu'ula na' gucá'a Dios lebe', na' bexu'e-be' lataj blau cheę' naga dxe'e. <sup>6</sup> Na' nu'ula na' bzrúnnuje' zéaję' le'e xixre' lawe' lataj naga nucueza Dios tu lataj naga sua nu'ula na', naga xulugawę' le' lawe' chazrinu gaxúa ga xun zra.

<sup>7</sup> Gudé na' guxú'u wedil-la xabáa gate gubáz cheę xabáa blau le' Miguel nen gubáz cheę xabáa zaj da' le' guledíl-lalene' bę snia schanni' zrentę. Bę snia schanni' na', ne gubáz zaj de'e-ba' belunę' wedil-la. <sup>8</sup> Quebe bi gulezéquene' lu wedil-la na', na' québedxa guta' lataj cheę gubáz ca' lu xabáa. <sup>9</sup> Ca'an guca gulebéaję' bę

snia schanni' na' xabáa, bę snia na' zúaba' nédxute, na' nazí laba' da xriwe', ne Satanás, da na' dxezi xę na xúgute bèneache. Da xriwe' na', ne gubáz ca' zaj de'e na guledxú'ungę' na lu xęzr la xu.

<sup>10</sup> Nadxa benda' tu chi'i benne' gunné' zizraj xabáa:

—Ba bla' xel-la' weselá, ne xel-la' szren, ne xel-la' dxenná bea cheę Dios cheędxu, ne xel-la' dxenná bea cheę Cristo cheę', lawe' da ba guledxú'ungę' da na' gudagu zria na cheę benne' bíchedxu, da na' dxagu zria na cheę benne' ca' te zra, ne chizrela lau Dios cheędxu. <sup>11</sup> Benne' bíchedxu ca' beledxúaję' chawe' ne cheę dxen cheę Bènea' naque' Zríla'dau', ne ne cheę da belexechebę' ca naca cheę dizra' cheę Cristo, ne quebe belezrebę' nu benne' gutię' le'. <sup>12</sup> Cheę le' na' ga-ta' xel-la' dxebe xabáa.

¡Le be le'e zrale xabáa!

¡Edxugua benne' ca' zaj zre'e xęzr la xu, ne lawe' nísadau'

lawe' da ba bla' da xriwe' naga zúale,

dutę xel-la' dxezrá'a cheę na,

lawe' da neze na xáte'ga ne de cheę na!

<sup>13</sup> Gate guque be'e da xriwe' ba buluzalę' na lu xęzr la xu, na' gudxé' nau na nu'ula na' guzanę' bi biudu na'.

<sup>14</sup> Nu'ula na' bulunézruje' le' chupa xrilę' zren ca xrila

bsia cheę gaca xexiaję' xezue' le'e xixre' lawe' lataj, zitu'

naga zua bę snia schanni' na', na' bulugawę' le' lawe'

chun iza xugachaj. <sup>15</sup> Bę snia schanni' na' bexébeba'

nisa cheę benba' tu xęgu cheę gua na nu'ula na'. <sup>16</sup> Gú-

calę xęzr la xu nu'ula na'. Bzra xęzr la xu, na' gudębe

na xęgu na' bexębe bę snia schanni' na'. <sup>17</sup> Cheę le' na'

bzrá'le'e da xriwe' nu'ula na', na' guxíaj na xejtíl-lalę

na xrtia nu'ula na' zaj zre'e xęzr la xu, benne' ca' dxu-

luzúe' dizra' da bdxixruj be'e Dios, ne dxelexechebę' ca

naca cheę Jesucristo.

### Chupa bę xixre' snia ca'

**13** Nadxa guzúa' dxu'a nísadau', ne ble'eda' bdxuaj tu bę xixre' snia lu nísadau' na', zua gazre xíchajba', ne chi lúzuba'. Zria tu tu lúzuba' na' tu da zaca, na' da' tu laba' xíchajba' ca' da dxecuide Dios. <sup>2</sup> Bę xixre' snia nigá nácaba' ca tu bezrtau', na' ní'aba' zaj naca na wal-la ca ni'a oso, na' dxú'aba' naca na ca dxu'a bezre xixre'. Bę snia schanni' bnézrujba' xel-la' dxenná bea cheęba', ne lataj blau cheęba', ne xel-la' waca cheęba' lu na' bę snia na' nácaba' ca bezrtau'. <sup>3</sup> Zua tu wę' tu xichaj bę xixre' snia na' nácaba' ca bezrtau' da gute na lęba', na' wę' na' bexaca na, na' ca naca bèneache ca' zaj zre'e lu xęzr la xu belexebánele'ęne', ne zjácálene' bę xixre' snia na'. <sup>4</sup> Bulucá'ana szrene' bę snia schanni' na' lawe' da bnézrujba' xel-la' dxenná bea cheę bę xixre' na' nácaba' ca bezrtau', ne cá'anqueze bulucá'ana szrene' bę xixre' snia na', dxelenné':

—¿Núzraqueze naca ca bę xixre' nigá, ne nu seque' tíl-lalę lęba'?

<sup>5</sup> Nadxa da xriwe' bę na lęba' lataj gunęba' dizra' zri'a, na' gunęba' da calęla cheę Dios, ne gudápaba' xel-la' dxenná bea lawe' chupe xun beu'. <sup>6</sup> Gunęba' da calęla cheę Dios, ne cheę La Dios, ne cheę lataj lá'azxa

cheë', ne cheë benne' ca' zaj zřeë xabáa. <sup>7</sup> Cá'anqueze guziba' xel-la' dxenná bea tíl-lalēba' benne' ca' zaj naque' cheë Dios, ne gútetēba' benne' ca', na' guziba' xel-la' dxenná bea lu xúgutē cue' bēnneache, ne benne' zaj zřeë xúgutē xēzre ca', ne xúgutē cue' xēzr la xu ca', ne benne' dxelenné' dizra' walazre' cha cheë'. <sup>8</sup> Xúgutē benne' zaj zřeë xēzr la xu bulucá'ana szrenē' bē xixre' snia na', benne' ca' quebe zaj naxúaj lē' lu xiche naga zaj naxúaj la benne' ca' zaj nape' xel-la' nabán, xiche na' bzuaj Bēnnea' naque' Zríla'dau' belutie'-ba'.

<sup>9</sup> Che nu benne' zua nague', dxal-la' xenne' dizra' nigá. <sup>10</sup> Benne' ca' dxelegúē bēnneache lizre xia, cá'anqueze xelú'u benne' ca' lizre xia, na' benne' ca' dxelutie' benne' nen xia nalá, cá'anqueze xelatie' lu xia nalá. Cheë lē na' benne' zaj naque' cheë Dios dxal-la' xelaque' zren lazre', ne xeléajlē cheë Dios.

<sup>11</sup> Gudé na' ble'eda' xetú bē xixre' snia bdxúajba' lu xēzr la xu. Bea nigá zua chupa lúzuba' zaj naca na ca luzu zríla'. Bea nigá gunnēba' ca bē snia schanni' na'. <sup>12</sup> Bea nigá nápaba' dutē xel-la' dxenná bea da napa bē nedxu na', gate zúaba' lau bē nedxu na', na' gunná be'eba' ca naca bēnneache zaj zřeë dutē xēzr la xu xulucá'ana szrenē' bē nedxu na', bea na' bexaca wē' cheēba' da na' naca gute lēba'. <sup>13</sup> Bē gudxupe' na' bēnba' xel-la' waca zrí'a ca', ne bēnba' bexruj xi' zran xabáa lu xēzr la xu lau bēnneache ca'. <sup>14</sup> Nē cheë xel-la' waca ca' da bēnba' lau bē nedxu na', guzí xēba' benne' zaj zřeë xēzr la xu, na' gunná be'eba' benne' ca' xelunē' tu bedau' ca naca bē nedxu na', bea na' guzúa wē' cheë xia nalá, na' naca bánquezeba'. <sup>15</sup> Bē gudxupe' na' guziba' xel-la' dxenná bea gunézrujba' xel-la' nabán bedau' na' naca na ca bē nedxu na', cheë nne' bedau' na', ne gute na' xúgutē benne' quebe xulucá'ana szrenē' na. <sup>16</sup> Cá'anqueze bedau' na' gunná be'e na' zriche tu da gunna bea na luzrgá u lu na' zua xabēla cheë xúgutē bēnneache, benne' blau, ne benne' quebe nu naca, ne benne' gunní'a, ne benne' xache', ne benne' zaj nada'u, ne benne' zaj zřeë cá'aze. <sup>17</sup> Netú benne' quebe gaca ga'uwe' ne gutie' che quebe zriche da na' dxunna bea na lē', u la bē xixre' snia na', u xrbaba ca naca laba'. <sup>18</sup> Nu benne' gulabē' da nigá dxal-la' gaque' sina. Benne' dxéajni'inē' waca gulabē' ca naca xrbaba cheë laba'. Naca na tuze ca naca xrbaba cheë bēnneache, na' xrbaba nigá naca na xrupa gaxúa ga xun xrupa.

Da dxelul-la tu gaxúa tape xun cue' chi gaxúa weaj benne'

**14** Gudé na' gunná'a, na' ble'eda' Bēnnea' naque' Zríla'dau' zē' lu xi'a Sión. Tu zren nen Lē' zaj zra' tu gaxúa tape xun cue' chi gaxúa weaj benne', zaj zriche luzrgue' La Bēnnea' naque' Zríla'dau', ne La Xrē'. <sup>2</sup> Nadxa benda' tu da dxeninne na da za' xabáa, da dxeninne na ca schaga' da dxelún zánētē xēgu ca', ne ca schaga' da dxun guziu' gate dxennéle' na, ne ca dxeninne naga zaj zra' zánētē benne' dxelínnie' da ca' cun zríadi'i na du. <sup>3</sup> Belul-lē' tu da cube dxu'a lataj blau

naga dxē' Dios, ne lau tapa benne' ca' zaj zua nabancze', ne lau tape dxua benne' gula ca'. Netú benne' xezica quebe guca gul-lē' ca naca da na' belul-lē'. Dxa-ca dxelul-le na benne' tu gaxúa tape xun cue' chi gaxúa weaj, benne' ca' gulelé' lówela benne' zaj zřeë xēzr la xu. <sup>4</sup> Benne' caní quebe gulezúalēnē' nu'ula cheë benne' xula, san belexegá'ana chawē', na' zjá-calēnē' Bēnnea' naque' Zríla'dau' gátetēze zéajē'. Benne' caní gulelé' lówela bēnneache, ne zaj naque' lau Dios ca tu da blaudxa cheë da dxezidxu, da dxuzúadxu lau Dios, ne lau Bēnnea' naque' Zríla'dau'. <sup>5</sup> Cabata' dxelún lazre', na' zaj naque' du lazre' dxu'a lataj blau naga dxē' Dios.

Dizra' da dxuluzén chunna gubáz cheë xabáa bēnneache

<sup>6</sup> Nadxa ble'eda' xetú gubáz cheë xabáa dxedé' lu be' zran xabáa, nape' dizra' chawē' da chadía chacanna, cheë guzenne' na benne' ca' zaj zřeë xēzr la xu, benne' xúgutē cue' bēnneache, ne benne' xúgutē cue' xēzr la xu, ne xúgutē xēzre, ne benne' dxelenné' dizra' walazre' cha cheë'. <sup>7</sup> Gubáz na' gunné' zizraj:

—Le zrebe Dios, ne le güe lánana Lē' lawe' da ba bzrin zra guchi'a Lē' cheë bēnneache. Le gucá'ana szren Bēnnea' bēnē' xabáa, ne xēzr la xu, ne nísadau', ne beaj ca'.

<sup>8</sup> Xetú gubáz cheë xabáa zéajē' cuzru gubáz cheë xabáa nedxu na', dxenné':

—¡Ba guzrí'a xi'! ¡Ba guzrí'a xi' xēzre Babilonia, xēzre zren na', lawe' da bulusuzre' benne' xēzre ca', ne benne' dutē xēzr la xu nen da naca ca xrise uva wal-la cheë da sban da dxelunē'!

<sup>9</sup> Xetú gubáz cheë xabáa zéajē' cuzru gubáz chupa ca', dxenné' zizraj:

—¡Che nu benne' dxucá'ana szrenē' bē snia na', ne bedau' cheēba', ne gu'ē lataj zriche luzrgue' u nē'ē laba', <sup>10</sup> benne' nigá téē' lu da ba xa' da nucueza Dios lu xel-la' dxezrá'a cheë', na' saca zi'ē lu xi' cheë da dxuzéxle' na lau gubáz cheë xabáa ca' cheë Dios, ne lau Bēnnea' naque' Zríla'dau'! <sup>11</sup> ¡Zren cheë xi', naga saca zi'ē, cuen na' chadía chacanna, na' xelezaca zi' te zra ne chizrela benne' ca' dxulucá'ana szrenē' bē snia na', ne bedau' cheēba', ne dxelu'ē lataj zriche laba' luzrgue'! <sup>12</sup> ¡Cheë lē na', benne' ca' zaj naque' cheë Dios, ne dxuluzúē' dizra' ca nadxixruj be'ene', ne zjá-calēnē' da naca cheë Jesús, dxal-la' xelaque' zren lazre'!

<sup>13</sup> Nadxa benda' chí'i tu benne' da za xabáa. Dxē'ē neda':

—Bzuaj da nigá: Na'a, ne lu da za za' ba neza zrenē' naca na cheë benne' gate ca' xelute bēnneache lē' lawe' da dxeléajlē' cheë Xránadxu. Be' Lázaxa dxenné': "¡Ca' naca na, lawe' da xelezezí' lazre' ca naca lu zrin da belunē', na' da xrlátaje da belunē' zeajlē na benne' ca'!"

## Lina chee xęzr la xu

<sup>14</sup> Nadxa guná'a, na' ble'eda' tu beuj chiche, na' lawe' beuj na' dxe' tu benne' naque' ca Bénnea' gulje' bėnneache. Zria tu da naca na oro xíchaje', ne nuxre' tu xia nalá. <sup>15</sup> Bdxuaj tu gubáz chee xabáa lu xudau' da zua xabáa, na' gunné' zizraj. Dxe'e bėnnea' dxe'e lawe' beuj:

—İBchine xia nalá chiu', ne becá'a lina, lawe' da ba bzin zra, na' lina chee xęzr la xu ba guca na!

<sup>16</sup> Nadxa bėnnea' dxe'e lawe' beuj na' gudine' xia nalá chee' na', na' bequė'e lina chee xęzr la xu.

<sup>17</sup> Nadxa xetú gubáz chee xabáa bdxuaje' xudau' da zua xabáa, nuxre' tu xia nalá. <sup>18</sup> Xetú gubáz chee xabáa bdxuaje' lu cugu, gubáz chee xabáa na' nape' xel-la' dxenná bea lu xi', na' gunné' zizraj. Dxe'e gubáz chee xabáa na' nuxre' xia nalá:

—İBchine xia nalá chiu' na', ne becá'a uva ca' da zaj dęn lu xęzr la xu lawe' da ba güe na!

<sup>19</sup> Na' gubáz chee xabáa na' gudine' xia nalá chee' lawe' xęzr la xu, ne bequė'e uva ca' da zaj dę lu xęzr la xu da zėaje na benne' ca' dxelunę' da zrinnaj, na' bzre'e na naga xelesie' na, da na' zėaje na da ba xa' da nucueza Dios chee benne' ca' dxelunę' da zrinnaj.

<sup>20</sup> Uva ca' gulesie' na naga dxedxuaj xęzre, na' naga dxelesie' na bdxuaj dxen chee benne' ca' dxelunę' da zrinnaj da gulėn na cátite sibe zua dxu'a bzrina', na' guzá' dxen na' cátite sadxu du gazre zra.

## Gubáz chee xabáa ca' zaj nuxre' gazre da ba xa' da xuluzále' xęzr la xu

**15** Ble'eda' xabáa xetú da zrentę da xebánedxu, beelá' gazre gubáz chee xabáa zaj nuxre' gazre da ba xa' bzebe, da zaj naca na naga cheajsęte xel-la' dxezrá'a chee Dios.

<sup>2</sup> Cá'anqueze ble'eda' tu da naca na ca nısadau' da naca na ca xiaj esa', ne nachixre na xi', na' benne' ca' quebe gulezı lu ne'e da naca na chee bę snia na', ne da nacan chee bedau' cheeba', ne xrbaba chee laba', zaj ze' lu nısadau' na' da naca na ca xiaj esa', zaj nuxre' da ca' con zrıadı'i na du da ba bnezruj Dios le'. <sup>3</sup> Dxelul-le' da bil-la Moisés, benne' węn zrin chee Dios, ne da dxul-la Bénnea' naque' Zrıá'dau', da dxenná na:

Da zrentę, ne da dxeánedxu zaj naca xúgute da ba bęnu' Lue'.

Xran, nacu' Dios napu' dutę xel-la' dxenná bea.

Xrlátaje, ne li lazre' zaj naca xrba chiu' Lue'.

Nacu' Wenná Bea chee dutę xęzr la xu.

<sup>4</sup> İNúzraqueze quebe zrebe Lue', Xran?

İNúzraqueze quebe güe lá'ana Lue'?

Tuze Lue' nacu' lá'azxa.

Xelėlá' benne' dutę xęzr la xu, na' xulucá'ana szrenę' Lue',

lawe' da ba beelė'ene' da xrlátaje da nunu'.

<sup>5</sup> Gudé na' gunná'a ne ble'eda' bxlaj xudau' da zua na xabáa, naga zua lataj naga zaj naxúaj da ca' bdxixruj be'e Dios. <sup>6</sup> Lu xudau' na' beledxúaj gazre gubáz

chee xabáa ca' zaj nuxre' gazre da ba xa'. Zra lanę' zaj nacue' naca na ladxe' zaca, da naca na ba'a, ne dxelácatite na, na' zaj nasie' lachu'e bazxu da naca na oro.

<sup>7</sup> Nadxa tu benne' laduj tapa benne' zaj naca bınqueze' bnezruje' tu tu gubáz gazre ca' tu xé'ena bzri da naca na oro, ne zaj nazrate na da ba xa' da nucueza Dios, Bénnea' zuę' chadıa chacanna. <sup>8</sup> Guzrate xudau' na' nen zren chee xi' da dxulė'e na ca zaj naca xel-la' szren, ne xel-la' dxenná bea chee Dios, na' netú benne' quebe guca chu'e ga na' cadxa gudé chee da gazre da ba xa' ca' da zaj nuxru gazre gubáz chee xabáa ca'.

## Da gazre da ba xa' ca'

**16** Nadxa benda' chi'i tu benne' gunné' zizraj lu xudau'. Dxe'e gazre gubáz chee xabáa ca':

—Le chjaca, le cheajzala da ba xa' ca' lu xęzr la xu, da ca' nucueza Dios.

<sup>2</sup> Na' guxėaj gubáz chee xabáa nedxu, xeajlatje' xé'ena bzri chee' lawe' xęzr la xu, na' xúgute bėnneache, benne' zaj nazriche luzrgue' la bę snia na', ne dxulucá'ana szrenę' bedau' cheeba', gulebıa wę' lu belá' dxen chee benne' ca' da gulálę'e na.

<sup>3</sup> Gubáz gudxupe' xeajlatje' xé'ena bzri chee' lu nısadau', na' nısadau' na' bexaca na dxen ca dxen chee benne' gate, na' gulate xúgute bea zaj naca banba' lu nısadau' na'.

<sup>4</sup> Gubáz guxunne' xeajlatje' xé'ena bzri chee' lu xęgu nisa ca', ne lu beaj ca', na' belexaca na dxen. <sup>5</sup> Na' benda' chi'i tu gubáz chee xabáa dxenná be'ene' nisa canı, gunné':

—Xran, Dios Lá'azxa, zúaquezu', ne guzúaquezu'. Xrlátaje nacu' lawe' da guchugu' chee benne' ca' guca canı, <sup>6</sup> lawe' da bululalje' dxen chee benne' chiu' ca', ne chee benne' ca' gulenné' waláz chiu', na' na'a dxuxı'aju' benne' canı dxen lawe' da canı zaj naca chee' xelė'aje'.

<sup>7</sup> Cá'anqueze benda' chi'i tu benne' zuę' lu cugu, dxenné':

—Ca' naca na, Xran. Nacu' Dios napu' dutę xel-la' dxenná bea. Ba bchi'u chee bėnneache ca' ca naca da li, ne da xrlátaje.

<sup>8</sup> Gubáz gudape' xeajlatje' xé'ena bzri chee' lau gubizra, na' gubizra guzı na lataj guzezxe na bėnneache ca' nen xi' chee na. <sup>9</sup> Xúgute bėnneache gulėzxele'e, ne quebe belexebı'i lazre', ne quebe belúe lá'ane' Dios, san gulenné' da calęla chee Bénnea' nucueze' da ba xa' na'.

<sup>10</sup> Gubáz gázxue xeajlatje' xé'ena bzri chee' lawe' lataj naga dxe' bę xixre' snia, na' naga dxenná beaba' guchul-la na. Bėnneache ca' gulagu xa'a luzre' lu xel-la' dxudıa chee', <sup>11</sup> ne quebe bulusanę' da zrinnaj da dxelunę'. Gulenné' da calęla chee Dios zuę' xabáa, lawe' da dxelezaque' canı ne chee wę' da zaj zria belá' dxen chee' ca'.

<sup>12</sup> Gubáz xrupe xeajlatje' xé'ena bzri chee' lawe' xęgu zren le' na Eufrates, na' nisa xęgu na' bebizre na, chee xalaj tu neza naga xeledé benne' dxjaca wedil-la chee benne' wenná bea ca' zá'aque' naga dxalaj gubizra.

<sup>13</sup> Nadxa ble'eda' beledxúaj chunna be' xriwe' dxu'a be' snia schanni', ne dxu'a be' xixre' snia na', ne dxu'a benne' dxenné' waláz cheęba'. Be' xriwe' ca' zaj naca na ca bluzru ca'. <sup>14</sup> Be' xriwe' caní belún na xel-la' waca zri'a ca', na' beledxúaj na cheę xulutupa na xúgute benne' wenná bea cheę xęzr la xu, cheę chjaque' lu wedil-la cheę zra zren cheę Dios, Bénnea' nape' dutę xel-la' dxenná bea.

<sup>15</sup> Dxenná Xránadxu:

—Le na' xque, neda' xida' gate quebe dxebezále neda', ca za' tu benne' gubán. Ba neza zrentę naca na cheę bénnea' zuę' ban lazre' ne nupé'ę lázrdawe' ca tu benne' dxuxúę' zra lanę' cheę quebe te' gala xídeze, ne quebe xedué'ene' lau bénneache.

<sup>16</sup> Nadxa beledubę' benne' wenná bea ca' lu lataj naga le' na Armagedón nen dizra' hebreo.

<sup>17</sup> Gubáz gazre na' xeajlatję' xé'ena bzri cheę' lu be', na' lu xudau' da zua xabáa ben tu chi'i benne' dxenné' zizraj, da za na lataj blau naga dxe' Dios, dxenné':

—Bache naca na.

<sup>18</sup> Nadxa gulępe xesa, ne guleninne na, ne gulennę guziu', na' lu xęzr la xu guzrú'le'ę ca netú lasa quebe ne xru', na' gulálate' zaj zra' bénneache lu xęzr la xu.

<sup>19</sup> Xęzre zrentau' na' guzrá na chunna cue', na' xęzre ca' zaj nita lu xęzr la xu gulebía xi na, na' xeajsá lazre' Dios benne' ca' cheę xęzre zrentau' na' le' na Babilonia cheę xeledé' lu da ba xa' zren da nucueza Dios lu xel-la' dxezrá'a cheę'. <sup>20</sup> Xúgute xęzr la xu ca' da naxechaj nísadau', ne xúgute xi'a ca' belexenite na. <sup>21</sup> Cá'anqueze belexruij zran xabáa xiaj bezxe' zri'a lawe' bénneache ca', da dxelá'a na ca tu gaxúa xia weaj, na' bénneache ca' gulenné' da caleła cheę Dios ne cheę da ba xa' da gulezaque', lawe' da guca na tu da ba xa' zrentę.

Dios dxuzría xi'ę nu'ula dxúnle'ę da sban

**17** Nadxa bla' tu gubáz cheę gazre gubáz cheę xabáa ca', gubáz ca' bululátaję' xé'ena bzri ca', na' guzre' neda':

—Gudá, na' gulé'eda' lue' ca naca da ba xa' da saca' nu'ula na' dxúnle'ę da sban, nu'ula na' dxe'ę lawe' nísadau' ca'. <sup>2</sup> Benne' wenná bea ca' zaj zre'ę xęzr la xu dxelunę' da sban nen nu'ula na', na' benne' zaj zre'ę xęzr la xu zaj naque' ca' benne' dxelezuzre' lawe' da dxelunę' da sban nen nu'ula na'.

<sup>3</sup> Nadxa, lu da ble'e Be' Lá'azxa neda', gubáz cheę xabáa na' guché'ę neda' le'ę xixre' lawe' lataj, na' lataj na' ble'eda' tu nu'ula zrię' cuzru tu be' xixre' schanni' xrna, na' zaj naxúaj lu beła' dxen cheęba' laba' schanni' ca', da ca' dxecuide Dios, na' zaj naca gazre xíchajba', ne chi lúzuba'. <sup>4</sup> Nu'ula nigá nacue' zra lanę' bzawe, ne da xrna, na' lechítaję cheę' zaj naca na oro, ne xiaj xrantę, ne bga ca'. Nuxre' tu xé'ena bzri da naca na oro da nazratę na da sgute ca', ne da sban da dxunę'.

<sup>5</sup> Naxúaj luzrgue' ca le', da dxenná na: Babilonia, Xęzre Szrentau', Xrna' Xúgute Nu'ula Ca' Dxelunę' Da Sban, ne Xúgute Da Sgute Da Dę Xęzr La Xu. <sup>6</sup> Nadxa ble'eda' nu'ula na' dxezúzrene' nen dxen cheę benne' ca' zaj naque' cheę Dios, ne cheę benne' ca' belute bén-

neache le' lawe' da belexecheę' cheę Jesús. Gate ble'eda' da na', bebánele'ęda'. <sup>7</sup> Nadxa gubáz cheę xabáa na' guzre' neda':

—¿Bizr cheę na' dxebánenu'? Gulé'eda' lue' ca naca da nagache cheę nu'ula nigá, ne cheę be' xixre' schanni' na' núaba' le', bea na' zaj napa gazre xíchajba', ne chi lúzuba'. <sup>8</sup> Be' xixre' schanni' na' blé'enu', nácaba' tu be' zúaba' nédxute, na na'a québedxa zúaba'. Wagüenba' lu lataj chul-la nédxudxa ca za gáteba' tu chí'izqueze. Benne' zaj zra' xęzr la xu, ne quebe zaj naxúaj le' lu xiche cheę xel-la' nabán ca bentę Dios xęzr la xu, xelexebánele'ęne' gate xeledé'ene' bea nigá, be' zúaqueze nédxute, na' na'a québedxa zúaba', na' wela'ba'.

<sup>9</sup> Nigá de late' da gulé'eda' benne' xeléajni'ine' na. Gazre xíchajba' caní zaj zéaję na gazre xi'a naga dxenná bea nu'ula na'. <sup>10</sup> Cá'anqueze xíchajba' ca' zaj zéaję na gazre benne' wenná bea. Gazxu' benne' wenná bea caní ba gulatię'. Tu benne' ca' dxenná be'ę na'a, na' xetue' quebe ne xide'. Gate la' benne' bzebe nigá, québedxa súateque' scha'. <sup>11</sup> Be' xixre' schanni' na', be' zúaba' nédxute, na' na'a québedxa zúaba', zéaję na benne' xrunu' naque' benne' wenná bea. Naque' tu benne' ládujla benne' gazre ca', na' te na' gatię' tu chí'izqueze.

<sup>12</sup> 'Chi lúzu be' xixre' snia na' da blé'enu' zaj naca na chi benne' wenná bea ca', benne' quebe ne xelezú lawę' xelenná be'ę, na' xelezí'ę xel-la' dxenná bea xelaque' wenná bea tu chí'idau'ze tu zren nen be' xixre' schanni' na'. <sup>13</sup> Benne' chi wenná bea caní zaj nune' tuze dizra', na' xulunézruję xel-la' szren cheę', ne xel-la' dxenná bea cheę' lu na' bénnea' naque' be' xixre' schanni' na'. <sup>14</sup> Benne' caní xeledí-lalęne' Bénnea' naque' Zríla'dau', na' Benne' nigá guzría xi'ę benne' wenná bea ca', lawe' da naca le' Benne' Wenná Bea cheę benne' wenná bea ca', ne Xrane benne' zaj naque' xrane bénneache, na' benne' ca' zralęne' le', gunné Dios le', ne guqué'ę le', na' zaj naque' li lazre'.

<sup>15</sup> Cá'anqueze gubáz cheę xabáa na' guzre' neda':

—Nísadau' ca' blé'enu', naga dxe' nu'ula na' dxúnle'ę da sban, zaj naca na xęzre bénneache ca', ne benne' dxelenné' dizra' walazre' cha cheę', ne benne' zane cue' xęzr la xu. <sup>16</sup> Chi lúzuba' na' blé'enu' xichaj be' xixre' schanni' na', da zaj naca na chi benne' wenná bea ca', xelexuđene' nu'ula na' dxúnle'ę da sban, na' xelebéaj xíchaję le', ne xulucá'ane' le' gala xídeze. Xelawę' beła' dxen cheę', ne xuluzezxe' le' lu xi'. <sup>17</sup> Dios bzuę' lu lázrdau' benne' wenná bea ca' xelunę' ca da dxaca lazre' le', gate belunę' tuze dizra', ne bulunézruję' xel-la' dxenná bea cheę' lu na' bénnea' naque' be' xixre' schanni' na', cadxa gaca ca da ba gunná Dios. <sup>18</sup> Nu'ula na' blé'enu' naque' Babilonia, xęzre zrentau' na' dxenná be'e na benne' wenná bea ca' zaj zre'ę xęzr la xu.



## Dxebía xi' xezre Babilonia

**18** Gudé na' ble'eda' betaj xetú gubáz cheę xabáa, nápalę'e xel-la' dxenná bea, na' bsení' xel-la' szren cheę' lu xęzr la xu. <sup>2</sup> Na' gunné' zizraj:

—Ba guzría xi'. Ba guzría xi' Babilonia, xezre zrentau' na', ne ba bexaca na lataj naga zaj zra' da xriwe' ca', ne lataj naga zaj zra' xúgute' cue' be' xriwe' ca', ne lataj naga zaj zra' be' zua xrila, be' schanni' ca', ne be' sguete ca'. <sup>3</sup> Xúgute' bénneache zaj zre'ę tu tu cue' xęzr la xu zaj naque' ca' benne' dxelezuzre', lawe' da dxelunę' da sban da dxaca xezre na', na' benne' wenná bea ca' zaj zre'ę xęzr la xu belunę' da sban da dxaca xezre na', na' benne' ca' dxelúti'e gulaque' benne' gunní'a ne cheę da zantę da gulezá lazre' benne' ca' zaj zre'ę xezre na'.

<sup>4</sup> Nadxa benda' chi'i xetú benne' da za xabáa, dxenné':

—Le dxuaj xezre na', le'e, nácale chia', cheę quebe gácale benne' ca' tuze lu dul-la da dxelunę', ne cheę quebe tele lu da ba xa' da xelezaca benne' ca'. <sup>5</sup> Dul-la cheę benne' ca' ba guxán na, na' zaj naca na ca tu da ba bgula, da ba bzrintę na zran xabáa, na' Dios ba xea-jśá lazre' ca' naca da zrinnaj da dxelún benne' ca'.

<sup>6</sup> Dios gunézruje' cheę benne' ca' cáteze da bulunézruje' cheę benne' xula, ne xunézruje' le' chupa cuenla ca da zrinnaj da belunę'. Ba nucueze' da xelezaque' da nácale'ędxa zi' ca da bulusaque' benne' xula. <sup>7</sup> Gudęe' benne' ca' lu da ba xa', ne gudęe' le' xel-la' zi' cáteze na' belunę'. Buluzúa cuine' lu xel-la' szren, ne gulezúę' lu xel-la' dxelexezaca ba lazre' cheę', lawe' da dxelenné' lu lázrdawę': Dxé'entu' nigá dxenná béantu'. Quebe nácantu' wezębe, ne quebe bi sácantu'. <sup>8</sup> Cheę le' na', tuze zra xelezrín da ba xa' ca' da xelezaque', xel-la' gute, ne xel-la' zi', ne xel-la' dxedún, na' xelexę' lu xi', lawe' da napa Xránadxu Dios dutę xel-la' dxenná bea, na' naque' Bénnea' guchugue' cheę benne' ca' xelezaque' caní.

<sup>9</sup> Benne' wenná bea ca' zaj zre'ę xęzr la xu, ne belún-łęę' benne' ca' da sban ne da belexezaca ba lazre', xebebezre xache' gate xelexé'ene' ca' naca zren cheę xezre na', da dxexze na. <sup>10</sup> Welezé' zítu'la lawe' da xelexrebe' xelezaque' ca da dxelezaca benne' ca', na' xelenné':

—Baxache' nácale le'e, benne' zaj zre'ę xezre zrentau', Babilonia, lawe' da chaditę bla' da ba xa' da dxezácale.

<sup>11</sup> Cá'unqueze benne' ca' dxelúti'e, benne' zaj zre'ę xęzr la xu, webebezre', ne webebezre xáchequeze' ca' naca da dxaca cheę xezre na', lawe' da québedxa nu chilá' benne' si'ę da dxeluti'ę,

<sup>12</sup> da zaj naca oro, ne plata, ne xiaj xrtantę ca', ne bga ca', ne ladxe' zaca ca', ne ladxe' bzawe ne da xrna, ne xúgute' cue' xaga ca' dxelalále'ę na zixre, ne zrita xrtantę, ne xaga xrtantę, ne xia gache, ne xia, ne xiaj esa',

<sup>13</sup> ne lacu zixre, ne xixre'dau' dxelalále'ę na zixre, ne xala, ne da ca' dxelalále'ę na zixre,

ne xrise uva wala, ne za xel-la' wagu, ne xrte xezaj, ne zrua' xtila, ne be' xixre', be' dxelúa xua', ne zrila' ca', ne bzrina' ca', ne da ca' dxudé xua, ne benne' ca' dxelúti'ę le' lu na' benne' gunní'a ca'.

<sup>14</sup> Benne' caní xelé'ę benne' zaj zre'ę xezre na':

—Na'a québedxa gápale da zixre ca' da zácale'ę na da bdánnele'ęle, ne ba bnítele tu chí'izqueze xúgute' xel-la' gunní'a cheęle, ne da xrtantę cheęle.

<sup>15</sup> Benne' ca' belúti'ę da ca' xelexé' zítu'la lawe' da dx-elezrebe' xelezaque' ca da dxelezaca benne' zaj zre'ę xezre na', na' xebebezre', ne xebebezre xáchequeze', <sup>16</sup> na' xelenné':

—Baxache' zaj naca benne' ca' zaj zre'ę xezre zrentau' na'. Gulaque' ca tu nu'ula nacue' ladxe' zácale'ę da bzawe, ne da xrna, ne nazí'ę lechítaję da naca na oro, ne xiaj xrtantę, ne bga ca'. <sup>17</sup> Chaditę benite xel-la' gunní'a na', ne guxexze na.

Xúgute' benne' xrane da ca' dxeledán lawe' nísadau', ne benne' zaj zre'ę lu'ule na, ne benne' dxulusé'ę da ca' dxeledán lawe' nísadau', ne benne' dxelunę' zrin lu nísadau' belezé' zítu'la, <sup>18</sup> na' gate belexé'ene' zren cheę xezre na' dxexze na, na' gulenné' zizraj:

—¿Bízraqueze xetú xezre naca na da zren ca xezre zrentau' nigá?

<sup>19</sup> Dute' xel-la' dxelexewí'ine lazre' xuluzré'ę xu xícha-ję' ca', ne xebebezre', ne xebebezre xáchequeze', xelenné':

—Baxache' zaj naca benne' ca' zaj zre'ę xezre zrentau' na'. Nen xel-la' gunní'a cheę benne' ca' gulenni'a xúgute' benne' ca' zaj nape' da ca' dxeledán lawe' nísadau'. Chaditę guzría xi' xezre zrentau' na'.

<sup>20</sup> Ca guca cheę xezre na', le be, le'e zrale xabáa, ne le'e, gubáz cheę Cristo, ne le'e bchálajle waláz cheę Dios, ne xúgutele le'e nácale bi cheę Dios, lawe' da gate bzria xi' Dios xezre na', bebéaj lazre' da naca cheęle le'e.

<sup>21</sup> Nadxa tu gubáz cheę xabáa, gubáz nápalę'e xel-la' dxenná bea guchise' tu xiaj zren da naca na ca xiaj xiche, na' bzalę' na lu nísadau', gunné':

—Cá'ante cuía xi' Babilonia, xezre zrentau' na', na' québedxa nu lé'eqezdxa le' na, <sup>22</sup> ne québedxa nu xen la neza cheę xezre na' da ca' dxulugul-la bénneache, da can zríadi'i na du, ne bchiuj, ne luzu da dxulucuezre', ne québedxa nu chilá' gun zrin lu xezre na', ne québedxa xen schaga da dxun da dxutu na.

<sup>23</sup> Québedxa gusení' netú xi' lu xezre na', ne québedxa xen laní cheę wechaga na' ga na', lálcala benne' ca' belúti'ę lu xezre na' gulenná be'ę lawe' xúgute' benne' zaj zre'ę xęzr la xu, ne gulezı' xę'ę xúgute' cue' xęzr la xu nen xel-la' wazrá' cheę'.

<sup>24</sup> Caní guca lawe' da lu xezre na' gulalaj dxen cheę benne' ca' gulenné' waláz cheę Dios, ne dxen cheę benne' ca' zaj naque' bi cheę Dios, ne dxen cheę benne' ca' belute bénneache le' du ca naca xęzr la xu.

**19** Gudé na' benda' chi'i benne' zan zaj zre'ę xabáa, dxelenné' zizraj:

¡Gaca ba Dios! ¡Xel-la' weselá, ne xel-la' szren, ne xel-la' dxenná bea zaj naca na chee Dios cheedxu.

<sup>2</sup> Ca dxuchi'a Le', xrlátaje, ne li lazre' naca na!

¡Ba bzria xi'e xezre na' dxulé'e na nu'ula na' núnle'e da sban,

nu'ula na' bxrínnaje' bénneache zaj zre'e duté xezr la xu lu da sban da bene'!

¡Dios ba bebéaj lazre' nu'ula na' lawe' da betie' wen zrin ca' chee Dios!

<sup>3</sup> Nadxa gulenné' da xula:

—¡Gaca ba Dios lawe' da tu cuénzqueze zren chee xezre na' dxezxe na!

<sup>4</sup> Nadxa tape dxua benne' gula ca' ne tapa benne' ban ca' buluzú zribé', na' bulucá'ana szrené' Dios, Bénnea' dxe'e lataj blau na', dxelenné':

—¡Ca' naca na! ¡Gaca ba Dios!

<sup>5</sup> Nadxa ben tu chi'i benne' lu lataj blau na', dxenné': ¡Le güe lá'ana Dios cheedxu, xúgutele le'e dxunle zrin chee',

ne dxezrébele Le', le'e benne' blau, ne benne' quebe nu nácale!

### Laní chee wechaga na' chee Bénnea' naque' Zríla'dau'

<sup>6</sup> Cá'anqueze benda' tu da naca ca chi'i benne' zan, ca dxeleninne zánete xegu, ne ca dxelennéle'e guzi' ca', dxelenné':

¡Gaca ba Dios lawe' da ba guzú lau dxenná bea Xrá-nadxu Dios, Benne' nape' duté xel-la' dxenná bea!

<sup>7</sup> ¡Du be! ¡Béle'equezdxu, ne güe lá'anadxu Le'!

¡Ba bzrin zra chee laní wechaga na' chee Bénnea' naque' Zríla'dau'!

Nu'ula na' si'e ba nupá'a cuínabe',

<sup>8</sup> nu'ula na' nazi'ibe' lataj nácube' ladxe' zaca, da quebe nadxén na, ne dxácatite na.

Ladxe' zaca na' zéaje na da xrlátaje da zaj nun benne' ca' zaj naque' bi chee Dios.

<sup>9</sup> Nadxa guzre gubáz chee xabáa neda':

—Bzuaj caní: Ba neza zren naca na chee benne' ca' gunné Dios xeledéle laní wechaga na' chee Bénnea' naque' Zríla'dau'.

Nadxa guzre' neda':

—Da caní zaj naca na dizra' li chee Dios.

<sup>10</sup> Nadxa bzu zriba' lau gubáz chee xabáa na' chee gucá'ana szrena' le', na' le' guzre' neda':

—Quebe gunu' caní lawe' da nácaqueza' neda' wen zrin chee Dios ca lue', ne ca benne' bichu' ca' zéajle da li na' da ble'e Jesús le'e. Bca'ana szren Dios. Da li na' da ble'e Jesús le'e naca na da dxelenná benne' ca' dxuluchálaje' waláz chee Dios.

### Benne' zrie' bzrina' chiche

<sup>11</sup> Nadxa ble'eda' ba naxalaj xabáa, na' ble'e lau tu bzrina' chiche, na' Benne' zrie'-ba' le' Du Lazre', ne Li Lazre', lawe' da dxenná be'e, ne dxuné' wedil-la lu da xrlátaje. <sup>12</sup> Xiaj lawe' dxelácatite na ca xi' ca, na' xíchaje' zaj zria zánete da zaca ca', na' naxúaj tu le' lawe', da nézene' tuze Le'. <sup>13</sup> Nacu'e tu zre' da nazaj na dxen, na'

La Le' naca na Xrtizra Dios. <sup>14</sup> Xúgute benne' ca' zaj zre'e xabáa zjálalene' Le', zaj nacue' ladxe' zaca ca', ladxe' chiche zríladau', ne zaj zrie' bzrina' chiche ca'.

<sup>15</sup> Dxu'a Bénnea' zua tu da naca na ca tu xia nalále'e da quine' benne' xezre ca', na' nna be'ene' benne' ca' nen tu bar xia. Le' guzría xi'e benne' ca' ca tu benne' dxe' síe' uva ca', ne dxuléaje' na, da zéaje na da ba xa' da nucueza Dios lu xel-la' dxezrá'a chee', ca da xelezaca bénneache ca'. <sup>16</sup> Naxúaj le'e zre', ne zríchuje' da nazí Le' caní: Benne' Dxenná Be'ene' Benne' Wenná Bea Ca', ne Xrane Benne' Ca' Zaj Naque' Xrane Bénneache.

<sup>17</sup> Nadxa ble'eda' tu gubáz chee xabáa ze' lu gubizra, na' gunné' zizraj xúgute be' zua xrila, be' dxeledá zran xabáa, dxenné':

—Le da. Le zraga gágule da dxúnnale'e Dios le'e,

<sup>18</sup> chee gágule be'la dxen chee benne' wenná bea ca', ne chee benne' dxelenná be'e lu wedil-la, ne chee benne' wal-la ca', ne chee bzrina' ca', ne chee benne' zaj zrie'-ba', ne chee xúgute bénneache, benne' ca' zaj nadá'ue', ne benne' ca' quebe zaj nadá'ue', benne' blau ca' ne benne' quebe nu zaj naque'.

<sup>19</sup> Nadxa ble'eda' be' xixre' schanni', ne ca naca benne' wenná bea zaj zre'e xezr la xu nen benne' dxjaca wedil-la chee ' ca', ba nazrague' chee xeledil-lalene' Bénnea' zrie' bzrina' chiche na', ne nen benne' ca' zaj de'e Le'. <sup>20</sup> Gulel-le' be' xixre' schanni' na' tu zren nen bénnea' gunné' waláz cheeba', bénnea' bénle'e xel-la' waca zren lauba'. Ne chee xel-la' waca caní da bene', benne' nigá guzú xe'e benne' ca' belú'e lataj guzriche luzrgue' laba', ne bulucá'ana szrené' bedau' cheeba'. Nadxa beleché'e be' xixre' schanni' na', ne bénnea' gunné' waláz cheeba', na' belegue' le' zaj nabante' lu xi' chee da dxuzézele'e na da dxe' ca tu nísadau'.

<sup>21</sup> Nadxa Bénnea' zrie' bzrina' chiche betie' benne' ca' xezícala nen xia nalá na' zua dxu'e, na' xúgute bea ca' zaj zua xrila gulélajba' be'la dxen chee benne' ca'.

### Chi gaxúa iza

**20** Gudé na' ble'eda' betaj tu gubáz chee xabáa, nuxre' zren xia chee lataj chul-la, ne nuxre' tu du xia zren. <sup>2</sup> Gubáz nigá gudé-le' be' snia schanni', náca-ba' be'la' zua nédxute, ne nácaba' da xriwe', ne Sattanás, na' bcheaje'-ba' du xia lawe' chi gaxúa iza. <sup>3</sup> Na' gudxú'une'-ba' lataj chul-la na' naga bsézxuje'-ba', na' bde'e le'e dxa xu'u na' tu da gunna bea na, chee québedxa si xe na bénneache chee xezr la xu ca' cadxa te chi gaxúa iza. Te chee chi gaxúa iza, dxal-la' xelá' na tu chí'idau'.

<sup>4</sup> Nadxa ble'eda' lataj blau ca', naga zaj dxe' benne' ca' ba zaj nazi'e xel-la' dxenná bea chee xuluchi'e ca da zaj nun bénneache. Cá'anqueze ble'eda' bénne'du ca' gulexú'u bénneache ca' gulechugu bénneache xíchaje' lawe' da belexechebe' chee Jesús, ne buluchálaje' xrtizra Dios. Benne' caní quebe bulucá'ana szrené' be' xixre' schanni' na', ne bedau' cheeba', ne quebe belú'e lataj zriche laba' luzrgue', u ne'e. <sup>5</sup> Benne' gate ca' xezícala quebe xelexebane' ca tedxa chee chi gaxúa iza ca'. Da nigá guca naca na xel-la' dxexebán nedxu. <sup>6</sup> Ba

neza zrentę naca na cheę benne' ca' zaj naque' bi cheę Dios, benne' ca' xelexebanę' nedxu. Da zi' da xa' da zeajlí canna quebe seque' bi gune na benne' ca'. Xelaque' bxruze cheę Dios, ne cheę Cristo, na' xelenná be'ę tu zren nen Le' chi gaxúa iza.

<sup>7</sup> Ca te cheę chi gaxúa iza ca', na' la' Satanás naga nadxéaj na, <sup>8</sup> na' xedxúaj na cheę cheajxrí xę na bėneache zaj zre'ę xúgute cue' xęzr la xu ca'. Si xę na bėneache xęzre Gog, ne xęzre Magog, na' guchaga na benne' dxjaque' wedil-la cheę xúgute cue' xęzr la xu lu wedil-la, na' benne' dxjaque' wedil-la zaj naque' benne' zan ca naxán xuzre' da dxe' dxu'a tu xęgu zren. <sup>9</sup> Ca' guca, beledxúaję' du ca naca lu xęzr la xu, na' guléchaję' naga zaj zra' benne' zaj naque' cheę Dios, ne xęzre na' da nazrí'i Dios. Nadxa Dios gusel-le' xi' da za' xabáa, na' bzezxe xi' na' ca naca benne' ca'.

<sup>10</sup> Nadxa gulel-le' da xriwe', da guzí xę da dxuzézrele'e na da dxe' ca tu nísadau', naga zaj zra' bę xixre' schanni', ne bėneache' gunné' waláz cheęba'. Lu xi' na' xeledęę' lu da ba xa' te zra, ne chizrela chadía chacanna.

#### Dios dxe'ę lataj blau chiche, dxuchi'ę cheę benne' ca' dxelune' da zrinna

<sup>11</sup> Nadxa ble'eda' tu lataj blau chiche, ne Bėneache' dxe'ę lataj na'. Lau Le' belexenite xęzr la xu, ne xabáa, na' québedxa nu benne' lé'ęne' da ca'. <sup>12</sup> Nadxa ble'eda' benne' gate ca', benne' blau, ne benne' quebe nu zaj naque', zaj zę' lau Dios, na' belexalaj xiche ca', ne cá'anqueze xetú xiche naga zaj naxúaj la benne' ca' zaj nape' xel-la' nabán. Dios bchi'ę cheę benne' ca' cáteze da belún tu tuę', da ca' zaj naxúaj na lu xiche ca'. <sup>13</sup> Belexedxúaj benne' gate ca' zaj nagache' lu nísadau', ne belexedxúaj benne' gate ca' zaj nagache' lataj chul-la cheę benne' gate, na' Dios bchi'ę cheę xúgute' cáteze da belún tu tuę'. <sup>14</sup> Nadxa guledxú'ęne' benne' gate ca' gulezúę' lataj chul-la naga zra' benne' gate lu xi' cheę da dxuzézrele'e na da dxe' ca tu nísadau'. Xi' nigá naca na da zi' da xa' da zeajlí canna, <sup>15</sup> na' lu xi' nigá guledxú'ęne' xúgute' benne' ca' quebe zaj naxúaj le' lu xiche cheę xel-la' nabán.

#### Tu xabáa cube ne tu xęzr la xu cube

**21** Ca gudé na' ble'eda' tu xabáa cube, ne tu xęzr la xu cube, lawe' da belexenite xabáa nedxu, ne xęzr la xu nedxu, na' québedxa dę nísadau'. <sup>2</sup> Neda', Juan, ble'eda' xęzre lá'azxa, da naca na Jerusalén cube, dxetaj na xabáa, za na naga zua Dios. Xęzre na' nabeza na ca tu nu'ula wechaga na' nupá'a cuínabe' cheę gá-cabe' tuze nen benne' cheębe'. <sup>3</sup> Benda' chi'i tu benne' da za' xabáa, dxenné':

—Gunná'xque, Dios zue' ládújla bėneache, na' xelaque' xęzre cheę', na' Dios súaqueze' nen benne' ca', ne gaque' Dios cheę'. <sup>4</sup> Dios tu súałęzqueze' benne' ca' cheę québedxa xelexezre', na' québedxa gata' xel-la' gute, ne xel-la' gubezre, ne xel-la' dxebezre xache', ne

xel-la' dxudía, lawe' da ba gudé cheę xúgute da gulaca nédxute.

<sup>5</sup> Nadxa Dios, Bėneache' dxe'ę lataj blau na' gunné':

—Gunná'xque, neda' dxuna' cube xúgute da ca'.

Cá'anqueze gunné':

—Bzuj dizra' caní lawe' da naca li lazre', na' waca guxrén lázrele le' na.

<sup>6</sup> Gudé na' guzre' neda':

—Ba bęna' xúgute da ba gunnía' guna'. Neda' naca' Bėneache' zúaqueze' nédxudate, ne Bėneache' zúaqueze' bzębedxa. Naca' Bėneache' dxuna' su lau sua xúgute, ne dxuna' xexuzre na. Nu benne' dxeбіlenę', neda' gunézruja' nisa beaj xí'aję' da gunezruj na le' xel-la' nabán, ne quebe bi quízruje'. <sup>7</sup> Nu benne' zru'e'ęne' si'e xúgute da caní, neda' gaca' Dios cheę', na' le' gaque' zri'ina'. <sup>8</sup> Bėneache' ca' zaj naque' zra' chebe, ne benne' ca' quebe dxelájle'ę chia', ne benne' ca' dxelunę' da zrinna, ne benne' ca' dxelutię' benne', ne benne' dxelunę' da sban, ne benne' wazrá' ca', ne benne' dxulucá'ana szre'ę' bedau' xiaj xaga ca', ne xúgute' benne' dxelún lazre', gudéa' le' lu xi' cheę da dxuzézrele'e na da dxe' ca nísadau', da naca na da zi' da xa' da zeajlí canna.

#### Jerusalén cube

<sup>9</sup> Nadxa bla' tu gubáz cheę gazre gubáz cheę xabáa ca' belúxruę' gazre xé'ena bzri ca' naga zaj xu'u da gazre da ba xa' bzebe ca', na' guzre' neda':

—Gudá. Gulé'eda' lue' nu'ula wechaga na', zru'ula Bėneache' naque' Zríla'dau'.

<sup>10</sup> Lu da ble'e Be' Lá'azxa neda', gubáz cheę xabáa na' guchę'ę neda' tu xi'a zren, ne sibe, na' blé'ęne' neda' ca naca xęzre lá'azxa zren na', Jerusalén cube. Dxetaj na xabáa naga zua Dios. <sup>11</sup> Xęzre nigá dxácatite na nen da xabáa cheę Dios, na' xel-la' dxácatite cheę na naca na ca dxácatite tu xiaj xrtantę, ca tu xiaj jaspe, da naca na ca xiaj esa' xrtantę. <sup>12</sup> Dxu'a xęzre na' naxechaj na tu ze'e sibe, na' napa na chazrinnu dxa xu'u, na' tu tu dxa xu'u ca' zaj zę' tu weaj gubáz cheę xabáa, na' le'ę dxa xu'u ca' zaj naxúaj la chazrinnu cue' benne' Israel.

<sup>13</sup> Zaj zua chunna dxa xu'u weaj dapa sácatę. <sup>14</sup> Lu lane ze'e da naxechaj na xęzre na' zaj zra' chazrinnu xiaj, na' zaj naxúaj lu xiaj ca' la chazrinnu benne' gubáz cheę Bėneache' naque' Zríla'dau'.

<sup>15</sup> Gubáz cheę xabáa na' dxuchálajle'ę neda' nuxre' tu da naca na ca tu xia xtila da naca na oro cheę gudxixre' xęzre na', ne dxa xu'u cheę na ca', ne ze'e da naxechaj na. <sup>16</sup> Xęzre na' naca na lébetę dapa saca. Lébetę naca na xel-la' tunna, ne xel-la' laga cheę na. Gubáz na' bdxixre' xęzre na' nen da nuxre', na' naca na laga catitę sadxu tapa gaxúa zra, na' xel-la' laga, ne xel-la' tunna, ne xel-la' sibe cheę na zaj naca na lébetę.

<sup>17</sup> Gudé na' bdxixre' xel-la' sibe cheę ze'e na' naxechaj na. Naca na tu gaxúa tape xun zrita, na' chazrita cheę gubáz cheę xabáa na' naca na lébetę ca cheę bėneache.

<sup>18</sup> Ze'e na' da naxechaj na xęzre na' naca na xiaj jaspe, na' xęzre na' naca na oro du lazre', da naca na

ca xiaj esa' du lazre'. <sup>19</sup> Xiaj lane ze'e na' zaj naca na xiaj xrtante ca':

Xiaj nedxu naca na xiaj jaspe,  
na' xiaj gudxupe' naca na xiaj zafiro,  
na' xiaj guxunne' naca na xiaj ágata,  
na' xiaj gudape' naca na xiaj esmeralda,  
<sup>20</sup> na' xiaj gázxue naca na xiaj ónice,  
na' xiaj xrupe naca na xiaj cornalina,  
na' xiaj gazre naca na xiaj crisólito,  
na' xiaj xrunu' naca na xiaj berilo,  
na' xiaj ga naca na xiaj topacio,  
na' xiaj chi naca na xiaj crisoprasa,  
na' xiaj chinéaj naca na xiaj jacinto,  
na' xiaj chazrinnu naca na xiaj amatista.

<sup>21</sup> Chazrinnu da dxusezuj na dxa xu'u ca' zaj naca na chazrinnu bga ca'. Tu tu na naca na tuze bga. Neza blau chee xezre na' naca na oro du lazre', ca xiaj esa' du lazre'.

<sup>22</sup> Quebe ble'eda' netú xudau' xezre na', lawe' da Xránadxu Dios, Bénnea' nape' duté xel-la' dxenná bea, nácaqueze' xudau' chee xezre na', ne cá'anqueze naca Bénnea' naque' Zríla'dau'. <sup>23</sup> Xezre na' quebe nachine na gusení' gubizra na', ne beu', lawe' da dxusení'queze da xabáa chee Dios ga na', na' Bénnea' naque' Zríla'dau' naque' xel-la' naxaní' chee na. <sup>24</sup> Bénneache chee xúguté cue' xezr la xu, bénneache gulelé', xeledé' lu xel-la' naxaní' chee xezre na', na' benne' wenná bea ca' chee xezr la xu xelu'e da gunni'a chee' lu xezre na'. <sup>25</sup> Dxa xu'u chee xezre na' quebe xelexuj na te zra, na' québedxa gata' chizrela. <sup>26</sup> Xelu'e xel-la' szren, ne xel-la' ba lá'ana chee xúguté cue' xezr la xu lu xezre na'. <sup>27</sup> Cabata' chu'u da sban ga na', ne netú benne' dxuné' da zrinnaj, ne netú benne' dxun lazre'. Xelú'uze benne' ca' zaj naxúaj le' lu xiche chee xel-la' nabán da napa Bénnea' naque' Zríla'dau'.

**22** Nadxa gubáz chee xabáa na' blé'ene' neda' tu xegu nisa da dxunna na xel-la' nabán. Naca na xaní' ca xiaj esa', na' dxedxuaj na lataj blau naga zaj dxe' Dios, ne Bénnea' naque' Zríla'dau'. <sup>2</sup> Laduj neza blau chee xezre na' zaj naxaza xaga dxupa la'a dxu'a xegu na', na' da zixre chee xaga caní' zaj naca na da dxunna na xel-la' nabán, ne dxebía na da zixre chazrinnu lasa tu tu iza. Dxebía na da zixre chee na tu tu beu', na' xrlegue xaga na' naca na da dxexún na benne' zaj zre'e du gabí'i xezr la xu. <sup>3</sup> Québedxa bi gata' da xu'u de'. Lataj blau naga zaj dxe' Dios, ne Bénnea' naque' Zríla'dau' sua na lu xezre na', na' benne' wen zrin chee' ca' xulucá'ana szrené' Le'. <sup>4</sup> Xelelé'ene' Le' caní'queze, na' La Dios zriche na luzrgá benne' ca'. <sup>5</sup> Québedxa gata' chizrela ga na', na' benne' zaj zre'e na' quebe xelechinne' xi', ne xel-la' naxaní' chee gubizra, lawe' da Xránadxu Dios gusení' benne' ca', na' benne' ca' xelenná be'e chadía chacanna.

### Ba zua gagu zra xelá' Cristo

<sup>6</sup> Nadxa gubáz chee xabáa na' guzre' neda':  
—Dizra' caní' zaj naca na li lazre', ne waca guxren lázrele le' na. Xránadxu Dios, Bénnea' dxuzúe' Be' chee'

xichaj lázrdau benne' ca' dxelenné' waláz chee' ba gusel-le' gubáz chee' xabáa chee' chee' gulé'ene' benne' wen zrin chee' da ba zua gaca, <sup>7</sup> dxenné': "La zátequeza'. Ba neza zrenté naca na chee' benne' zéajlene' dizra' chee' Dios da naxúaj na lu xiche nigá."

<sup>8</sup> Neda', Juan, benda', ne ble'eda' da caní'. Ca gude' benda' na, na' bzu zriba' zran ni'a gubáz chee' xabáa na', gubáz blé'ene' neda' da caní' chee' gucá'ana szrena' le'. <sup>9</sup> Na' le' guzre' neda':

—Quebe gunu' ca' lawe' da naca' wen zrin chee' Dios ca nacu' lue', ne ca zaj naca benne' bichu' ca' dxelenné' waláz chee' Dios, ne ca zaj naca xúguté benne' ca' zjácalene' ca da naxúaj na lu xiche nigá. Bca'ana szren Dios.

<sup>10</sup> Cá'anqueze guzre' neda':

—Quebe gucachu' ca naca dizra' chee' Dios da naxúaj na lu xiche nigá lawe' da ba zua gaca da naxúaj na.

<sup>11</sup> Dxácaté na', be' lataj benne' dxeluné' da zrinnaj xelúnqueze' da zrinnaj dxeluné', ne benne' ca' dxeluné' da sban xelúnqueze' da sban na', san benne' xrlátaje ca' xelúnqueze' da xrlátaje, na' benne' zaj naque' bi chee' Dios chjácaléqueze' da naca na chee'.

<sup>12</sup> Dxenné':

—Ca' naca. La zátequeza', ne nu'a ca naca da gunézruja' tu tu benne' ca', cáteze da zaj nun tu tue'.

<sup>13</sup> Neda' naca' benne' zúaqueza' nédxudate, ne benne' zúaqueza' bzébedxa, bénnea' dxuna' su lau sua xúguté, ne dxuna' xexuzre na. <sup>14</sup> Ba neza zrenté naca na chee' benne' ca' dxulupé'e xichaj lázrdawe' ca tu benne' dxibe' zra lané', chee' xelape' lataj xelawe' da zixre chee' xaga da dxunna na xel-la' nabán, na' caní' xelezéquene' xelu'e lu dxa xu'u chee' xezre na'.

<sup>15</sup> Benne' ca' dxeluné' da zrinnaj quebe xelu'e ga na', ne québequeze xelú'u benne' wazrá' ca', ne benne' dxeluné' da sban ca', ne benne' wete benne', ne benne' dxulucá'ana szrené' bedau' xiaj xaga ca', ne benne' zaj nazri'ine' da wen lazre', ne benne' dxelún lazre'. <sup>16</sup> Neda', Jesús, ba gusel-la' gubáz chee' xabáa chia' chee' xuluzenne' tu tu cue' bénneache chia' ca naca da nigá. Neda' naca' ca xra xrtau David, benne' wenná bea, ne naca' zri'ine zre sua David na'. Neda' naca' ca belaj zila da dxácatitele'e na.

<sup>17</sup> Be' Lá'azxa, ne benne' ca' zaj naca ca zru'ula Bénnea' naque' Zríla'dau', dxelenné':

—Gudá, Xran.

Nu benne' xenne' da nigá dxal-la' nne':

—Gudá, Xran.

Benne' dxebilene', ne dxaca lazre' dxal-la' xide', na' xí'aje' nisa da dxunna na xel-la' nabán, na' quebe bi quízruje'.

<sup>18</sup> Xúgutéle le'e dxulábale dizra' chee' Dios da naxúaj na lu xiche nigá, neda' dxuzéajni'ida' le'e da nigá: Che nu benne' bi gudé'e chee' da caní', Dios gudé'e chee' bénnea' da ba xa' ca' da zaj naxúaj na lu xiche nigá.

<sup>19</sup> Cá'anqueze che nu benne' bi xequé'e chee' da zaj naxúaj na lu xiche nigá, Dios wecá'aqueze' da naca chee' bénnea' lu xiche chee' xel-la' nabán, ne lu xezre lá'azxa chee', cáteze naxúaj na lu xiche nigá.

<sup>20</sup> Xránadxu, Bénnea' dxulé'ene' da nigá, dxenné':  
—Ca' naca na. La zátęqueza'.  
¡Ca' gaca na! ¡Gudá, Xrana' Jesús!

<sup>21</sup> Dxenaba' Xránadxu Jesucristo gunę' da chawe'  
cheęle le'e, xúgutęle. ¡Ca'an gaca na!